


# Kukwe kuin ngöböökwe



New Testament in Ngäbere (PM:gym:Ngäbere)

**Kukwe kuin ngöböökwe**  
**New Testament in Ngäbere (PM:gym:Ngäbere)**

copyright © 2004 Wycliffe Bible Translators, Inc.

Language: Ngäbere

Translation by: Wycliffe Bible Translators, Inc.

Ngäbere [gym], Panama

**Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ngäbere

**© 2004, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

---

PDF generated using Haiola and XeLaTeX on 4 Mar 2019 from source files dated 22 Dec 2018  
dc5ef235-14f7-5b3f-997a-59dae7b091fe

## Contents

MATEO . . . . .	1
MARCOS . . . . .	71
LUCAS . . . . .	115
JUAN . . . . .	187
HECHOS . . . . .	239
ROMANOS . . . . .	299
1 CORINTIOS . . . . .	329
2 CORINTIOS . . . . .	355
GALATAS . . . . .	373
EFESIOS . . . . .	384
FILIPENSES . . . . .	394
COLOSENSES . . . . .	401
1 TESALONICENSES . . . . .	408
2 TESALONICENSES . . . . .	414
1 TIMOTEO . . . . .	417
2 TIMOTEO . . . . .	425
TITO . . . . .	431
FILEMÓN . . . . .	435
HEBREOS . . . . .	437
SANTIAGO . . . . .	459
1 PEDRO . . . . .	467
2 PEDRO . . . . .	475
1 JUAN . . . . .	480
2 JUAN . . . . .	487
3 JUAN . . . . .	489
JUDAS . . . . .	491
APOCALIPSIS . . . . .	494

## Kukwe Kuin Jesubtä Tikani Mateokwe Mateo

Ni iti kädian nämane Mateo käkwe tärä ne tikani. Niara kädian nämane Leví arato. Mateo abko ni israelita käräbare Jesukwe ja töitikakäre jabe. Jesu ngämi Mateo kärere, känenkri niara abko ngwian käräkä gobran romanobokrä, akwa Jesukwe käräbare ja töitikakäre jabe, ye btäräbe nikani Jesu jiebti. Kä ye ngwane nitre romanobo nämane gobrane nitre israelitabi.

Jesukwe dre dre nuenbare abko Mateokwe tuani ja okwä jenbti, ye abko tikani tärä nebtä. Erere arato, Jesukwe kukwe diribare ño ño abko kukwei nuani kwe, ye abko tikani täräbtä kwe. Mateo käkwe tärä ne tikani bäri nitre israelitakrä, ñobtä ñan angwane niaratre nämane ni ngibiare iti ja diantarikä. Ni jatadre iti nitre israelita Diantarikä abko Ngöbökwe niebare kira. Ni ye abko kä Mesías hebreore amne kä Kristo griegore. Ni Diantarikä juandre Ngöbökwe ye abko Jesu ara abko Mateo tö namani mikai gare nitre israelitareye tärä nebti.

*Jesu mräkä känökäne  
(Lucas 3.23-38)*

<sup>1</sup> Jesukristo mräkä känökäne jrei Davikri amne Abrahamkri abko nere:

<sup>2</sup> Abraham abko Isaac rün,  
Isaac abko Jacob rün,  
Jacob abko Judá rün amne  
Judá etbakantre mda mda rün arato,  
<sup>3</sup> Judá abko Fares amne Zara rün amne,  
Fares btä Zara meye abko Tamar,  
Fares abko Esrom rün amne,  
Esrom abko Aram rün,  
<sup>4</sup> Aram abko Aminadab rün amne,  
Aminadab abko Naasón rün amne,  
Naasón abko Salmón rün,  
<sup>5</sup> Salmón abko Booz rün,

(Booz ne meye abko Rahab. Rahab ne abko ñakare israelita.)

Booz abko Obed rün,  
    (Obed meye abko ni ñakare israelitare kädian nämane Rut.)

Obed abko Isaí rün amne,  
<sup>6</sup> Isaí abko jrei David rün.

Jrei David abko Salomón rün.

(Salomón ne meye abko nämane käne Uríabe.)

<sup>7</sup> Salomón abko Roboam rün,  
Roboam abko Abías rün,  
Abías abko Asa rün,  
<sup>8</sup> Asa abko Josafat rün amne,  
Josafat abko Joram rün amne,  
Joram abko Uzías rün,  
<sup>9</sup> Uzías abko Jotam rün amne,  
Jotam abko Acaz rün amne,  
Acaz abko Ezequías rün,  
<sup>10</sup> Ezequías abko Manasés rün amne,  
Manasés abko Amón rün amne,  
Amón abko Josías rün,

<sup>11</sup> Josías abko Jeconías amne mräkä mda mda rün,  
    (Jeconías näire abko nitre israelita jänikani ngite kä Babiloniate.)

<sup>12</sup> Abti nükaninta kä Israelite,  
yebti abko Jeconías abko Salatiel rün,  
Salatiel abko Zorobabel rün,  
<sup>13</sup> Zorobabel abko Abiud rün amne,  
Abiud abko Eliaquim rün amne,  
Eliaquim abko Azor rün,  
<sup>14</sup> Azor abko Sadoc rün,  
Sadoc abko Aquim rün amne,  
Aquim abko Eliud rün,  
<sup>15</sup> Eliud abko Eleazar rün amne,  
Eleazar abko Matán rün amne,  
Matán abko Jacob rün,  
<sup>16</sup> Jacob abko José rün.  
José ne mden abko ben María namani.  
María ne mden abko Jesu meye amne,  
Jesu ne mden abko ie nita Kristo niere.

<sup>17</sup> Ne aisetet Abraham näire nebebe jrei David näire nitre israelita ja mräkärebe namani ni jäätäbi nibkä ja täritäri. Yebti David näire abti nitre israelita jänikani ngite kä Babiloniate, ye näire nitre israelita ja mräkärebe namani ni jäätäbi nibkä ja täritäri arato. Abti nitre israelita jänikani ngite kä Babiloniate ye tähti nitre ja mräkärebe namani ni jäätäbi nibkä ja täritäri nebe Kristo därebare ye näire.

*Jesukristo därebare*

(Lucas 2:1-7)

<sup>18</sup> Jesukristo därebare abko nakaninkä krörö: Jesu ngämi därrere, känenkri María, Jesu meye abko nämane mikani jakrä kwärikwäri Josébe. Akwa María ngämi nebe Josébe, ye känenkri María ñan namani mobe, bren kwe kisete Ngöbö Üai Deme köböire. <sup>19</sup> Angwane José, ben María rabadre, José ye abko nämane nüne metre Ngöbö ngwärekri amne ñan tö namani María mikai ene ni jökrä ngwärekri, aisetet María tuadremetre kwe kä bube tiebe abko namani nütüre.

<sup>20</sup> Ye erere José jatanina nuene, btäräbe angele ni Dänkienkwe jatani, kákwe niebare krörö köböre ie:

José, jrei David mräkä, makwe ñan kä jürä ngwian jabtä María kare ngäbti ja nän mukore, ñobtä ñan angwane ngäbäkre rabadi kwe, ye abko namani btä Ngöbö Üai Deme di kri köböire. <sup>21</sup> Mdakäre abko, ngäbäkre däredi brare Maríakwe ye abko makwe kädian Jesu,\* ñobtä ñan angwane juta kwe ngite kukwe kämekäme kisete, ye abko niarakwe dianditari, aisetet makwe kädian kore. Abko kore se, niebare angelekwe Joséye.

<sup>22</sup> Ni Dänkien abko kákwe blitabare kira niara kukwei niekä köböire, ye erere rabadre bare täte, abkokäre kukwe nakaninkä kore. Kukwe niebare ni Dänkienkwe abko tä tikani krörö niara Kukweitä:

<sup>23</sup> Meri iti kaibe deme ñan rabadi mobe bren kwe kisete amne ngobo rabadi iti kwe.

Ngäbäkre ye abko kädiandi Emanuel,

*Isaías 7.14*

abko niebare ni Dänkienkwe. (Emanuel abko “Ngöböta nibe” nieta.)

<sup>24</sup> Yebti José nükaninta ngwäte angwane, angelekwe dre dre nuemna ie, ye erere nuenbare kwe, kákwe María kani ngäbti ja nän mukore. <sup>25</sup> Akwa María ngobo ngämi därrere kwe, ye känenkri namanintre ñakare jabe abti ngobo därebare kwe. Ngäbäkre ye abko Josékwe kädiani Jesu.

*Nitre ja töitikaka mukebtä nükani Jesu mike ütiäte jae*

<sup>1</sup> Jesu därebare juta Belénte kä Judeate angwane, ni iti kädian nämane Herodes nämane jreire. Jesu därebare, abti nitre töbtä nünanka mobe kä Judeabtä kä driri nükani juta

\* <sup>1:21</sup> Jesu abko käta ni Dänkien Ngöbö tä ni dentari niere hebreore.

Jerusalén yete. Nitre ye abko nämane ja töitike mukebtä abko nükani, <sup>2</sup> kákwe kukwe ngwianintari krörö:

<sup>3</sup> Jrei nitre israelitakwe därebare abko tä mdente? Muke kwati kákwe niara därebare mikaba gare, ye abko nunkwe tuaba nüke käin kä driri yete, aisetet nun jatani mike ütiäte jae, niebare kwetre.

<sup>3</sup> Nitre töbtä ja tötitikaka mukebtä kákwe kukwe niebare kore, ye gani jrei Herodekwe angwane, niara namani töbike kri. Erere arato, nitre nünanka juta Jerusalénte namani töbike kri arato. <sup>4</sup> Abtä jrei ye kákwe nitre blitaka Ngöböbe ni mda mda diäre dänkientre käräbare amne Kukwe Biani Ngöböökwe Moiséye dirikätre käräbare kwe arato, bti kukwe ngwianintari krörö kwe ietre:

<sup>5</sup> Ni Dianinkä Ngöböökwe abko däredre mdente metre? niebare kwe ietre.

<sup>5</sup> Angwane niaratre kákwe niebare mda Herodeye:

Jrei däredre juta Belénte kä Judeate abko gare nunye, ñobtä ñan angwane ni Ngöbö kukwei niekä kákwe tikani krörö:

<sup>6</sup> Belén, ma abko juta chi kä Judá känti nete.

Akwa ma abko ütiäte kri, juta mda mda ngätäite kä Judá ye känti,

ñobtä ñan angwane gobran kri däredi yete abko kákwe nitre israelita tikwetikwe ngibiadibti,

*Miqueas 5.2*

abko tä tikani Ngöbö Kukweibtä, niebare kwetre Herodeye.

<sup>7</sup> Yebti Herodekwe nitre töbtä ye käräbare tiebe, bti muke tuani ñongwane metre kwetre abko ngwianintari kwe ietre. <sup>8</sup> Angwane Herodekwe niebare ietre:

Mun nän Belén sete amne ngäbäkre ye tä mdente abko munkwe ngwiantari kuin jökrä. Abti kwan munye angwane, tä mdente abko mun jatata niere tie, ti rikadre mike ütiäte siba abkokäre, niebare kwe ietre.

Bti juani kwe Belén. <sup>9</sup> Jrei Herodes kákwe blitabare ünän kore, yebti nitre töbtä ye nikani ta; nikantre ta angwane muke tuani nüke käin kä driri kwetre, ye ara nikantia niaratre jie ngwenante abti batibe ngäbäkre nämane, ye känti muke ye namani nünaninkä käin. <sup>10</sup> Nitre töbtä kákwe muke tuani kore angwane, kä namani nuäre kri btätre. <sup>11</sup> Nikantre gwä angwane, ngäbäkre ye nämane gwi meye Maríabe, btä okwä namani. Angwane namani ngukudokwäbti temen, kákwe ngäbäkre ye mikani ütiäte jae. Yebti kaja ngwian nämane kwetre, ye jue tikani kwetre, bti oro amne kri ngwäri ütiäte kri rä bänne bänne kädianta incienso amne mirra biani ngwarbe kwetre ngäbäkre yeye. <sup>12</sup> Yebti jatanintre nikenta angwane, ñan rikadreta Herodes känti ta abko Ngöböökwe mikani gare köböre ietre, aisetet nikantia ji mdabti nebata ja käite.

### *Jesu jänikani ngitim Egipto*

<sup>13</sup> Abti nitre töbtä ye nikantante angwane, angele ni Dänkienkwe nükani blite köböre Josébe, kákwe niebare ie:

Näin krö amne ngäbäkre ye btä meye kwe, ye ben nän ngitim jötrö Egipto sete. Ye känti mun raba nüne abti tikwe kukwe mda niedi mae abko makwe ngibia, ñobtä ñan angwane Herodes bike ngäbäkre ye känentari kämikadre. Abko kore se, niebare angelekwe Joséye.

<sup>14</sup> Ye btäräbe José nükani dikekä krö, nikani jibti Egipto kukwäre ngitim ngäbäkre yebe amne ngäbäkre ye meyebe kä ikote deo. <sup>15</sup> Ye känti namanintre nünentbe abti Herodes krütani. Kukwe nakaninkä kore, angwane kukwe niebare krörö ni Dänkienkwe niara kukwei niekä köböire ye namani bare:

Ti Odei nämane Egipto, tikwe käräbareta mento,  
abko niebare kwe.

*Oseas 11.1*

<sup>16</sup> Nitre töbtä abko kákwe Herodes ngökan, ye gani Herodekwe angwane, Herodes mätä namani kri krübäte, aisetet ñongwane nitre töbtä kákwe muke tuani abko niebare kwetre Herodeye, yebtä Herodekwe töbikabare, kákwe ngäbäkre kiakia därebe nebebe kä kubu ie nämane nüne Belén amne Belén kenta temen abko Herodekwe kämikamna jökrä. <sup>17</sup> Herodekwe ngäbäkre kiakia kämikamna jökrä kore, ye köböire abko ni Ngöbö

kukwei niekä kädian nämane Jeremías kákwe Ngöbö kukwei tikani abko namani bare krörö:

<sup>18</sup> Ni kukwei ruen ngetrekä krikri krübäte juta Ramate, ye abko Raquel ngäbriänkä kiakia kämikani jökrä kän, mden abko tā müaire ye.

Niara moto mika tö nebata jáme, akwa ngäbriänkä kämikani jökrä kän, aise te moto ñan rabadreta jáme,  
<sup>Jeremías 31.15</sup>  
abko tikani kore, mden erere namani bare.

### *Jesu jänikani nüne juta Nazarete*

<sup>19</sup> Abti Herodes krütani angwane, angele ni Dänkienkwe nükani bliteta köböre Josébe Egipto, <sup>20</sup> kákwe niebare ie:

Näin krö amne ngäbäkre ye btä meye kwe ye ben nänta kä Israelite, ñobtä ñan angwane nitre tö namani ngäbäkre ye kämikai abko krütanina jökrä, aise te mun rikata, niebare angelekwe Joséye.

<sup>21</sup> Ye btäräbe José nükani dikekä krö, bti nikani jibti ngäbäkre yebe amne ngäbäkre ye meyebe nebata kä Israelite. <sup>22</sup> José nikaninta kore, nikani, nikani, nikani akwa ni iti kädian nämane Arquelao nämane gobrane mda rün mrö Herodes täte, ye gani kwe angwane, kä jürä namani kri btä. Abtä ñan nikani nebe kä Judeate. Angwane niara ñan rabadre nüne yete abko Ngöböökwe mikani gare köböre ie, abtä käkä Galilea, känti nikani jirekäbe. <sup>23</sup> Namani Galilea angwane, nikani nüne juta Nazarete. Jesu abko nazarebo niedre btä abko nitre Ngöbö kukwei niekä köböire Ngöböökwe kukwe niebare, ye erere namani bare jökrä kore.

## 3

### *Juan Bautista kákwe ji tikani Jesu käne (Marcos 1.1-8; Lucas 3.1-17; Juan 1.19-28)*

<sup>1</sup> Abti kä nikanina raire ta angwane, batibe ni iti kädian nämane Juan Bautista\* jatani dirire kä kaibete kä Judea känti. <sup>2</sup> Juan nikani dirire krörö: Ngöbö kä käinbti kebera nüke gobrane ni ngätäite, aise te kukwe kämekäme kite temen, bti ja töi kwiteta Ngöbö kukwäre abko nikani niere kore. <sup>3</sup> Juan ne mden abko btä Ngöböökwe kukwe niebare kira niara kukwei niekä Isaías köböire abko krörö:

Ni iti näin ñäke jume ja dibtä kä kaibete, käkwe niedi krörö:

Ji ükateta kuin biare jrei känenkri, ye kwrere ja töi mike kuin biare ni Dänkien käne munkwe.

Ji ükateta niken metre ta, ye kwrere ja töi ükete metre ni Dänkien käne munkwe abko näin niere,  
<sup>Isaías 40.3</sup>

abko Ngöböökwe niebare kore Juanbtä Isaías köböire.

<sup>4</sup> Juan abko nämane kameo drüen dikani dänre kite jabtä amne nämane mäkete nbikwatabti jae amne mrö kweta nämane kwe abko tröda btä munkö känsenta.† <sup>5</sup> Juan nämane dirire kore angwane, ni kwati nünanka juta Jerusalén amne kä Judeate btä ni kwati nünanka känamekäname Ñö Jordán bäre temen abko nükani jökrä niara kukwei nuen. <sup>6</sup> Angwane nitre ye abko namani ja ngite niere Ngöböye angwane, Juan namani ngökö Ñö Jordánte. <sup>7</sup> Akwa Juan nämane nitre ngökö ñöte, ye känti nitre bariseo amne nitre saduseo nükani kwati siba abko btä Juan okwä namani angwane, Juankwe niebare krörö ietre:

¡Mun abko tbi krübäte kwrere! ¿Ngöbö kebera mun mike ja ngie nuen kri krübäte, yebtä nirekwe mun mikani mokre amarebti mun kite nüke siba nete ye? <sup>8</sup> Munkwe ja töi kwitadreta era metre Ngöbö kukwäre bkänä tödekakäre bti abko erere munkwe nüna ni mda mda okwäbti. <sup>9</sup> Erere arato, munkwe ñan töbika krörö jabtä: Nun abko Abraham mräkä, aise te Ngöböökwe ñan nun mikadi ja ngie nuen, munkwe ñan nütü, ñobtä ñan

\* <sup>3:1</sup> Kukwe Bautista käta ni ngökaka ñöte niere. Juan kädian nämane Bautista ñobtä ñan angwane niara nämane ni ngökö ñöte. † <sup>3:4</sup> Juan nämane ja ngwä kite kore, ye kwrere nitre Ngöbö kukwei niekä kirakira nämane ja ngwä kite arato.

angwane jä tuen temen sete, se abko ngwarbe, akwa Ngöbö raba kwite Abraham mräkäre arato abko ti tö nibi niei metre kore munye. <sup>10</sup> Mdakäre abko, kri mden mden ñan ngwä nebe kuin, ye abko kräke ü mikana biare tikakakrä ngätrite ta. Abti tikakata jökrä angwane, ñukwä mikata btä, ye kwrere jire Ngöböökwe mun mikadi ja ngie nuen, munkwe ñan ja töi kwitadre Ngöbö kukwäre angwane.

<sup>11</sup> Nire nire käta ja töi kwiteta Ngöbö kukwäre, käta kukwe kämekäme kite temen, ye abko tita ngökö ñö aibe te, akwa ni jatadi iti ti jiebti abko bari di kri ti ngwä, aisetet i abko ja ñan rükadre töre jire chi tie sandalia ngwena kräke. ‡ Ni ye abko käkwe Ngöbö Üai Deme mikadi nüne munbtä amne mun mikadi deme kwe. <sup>12</sup> Ne abko, niarakwe dre nuendi abko ti bike niere munye abko krörö: Nura kädianta trigo juankata mürete amne trigo kwä kuinkuin aibe ükakrötä jenena, bti ükata gwi. Kwata abko kukwata ñukwä jutrate, ye kwrere ni ye abko tä juto biare ni Ngöböökwe erere ükakrökä jökrä ñünakäre jabe amne tä juto biare ni kukwe kämekäme nuenä abko erere kitakäre ñukwä jutra nötöte ñakare te ja tare nikakäre kärekäre. Munkwe ñan ja töi kwitadre Ngöbö kukwäre ne ngwane, kukwe rakadikä kore munbtä arato. Abko kore se, niebare Juankwe ietre.

*Juankwe Jesu ngökani ñöte  
(Marcos 1.9-11; Lucas 3.21-22)*

<sup>13</sup> Kä ye ngwane abko, Jesu nämane Galilea, nikani nebe Juan känti Ñö Jordánte mda, Juankwe ngökadre ñöte abkokäre. <sup>14</sup> Akwa namanina yete angwane, Juan ñan tö namani ngökai ñöte, käkwe niebare ie:

Ma bari ütiäte ti ngwä, aisetet makwe ti ngökadre ñöte bä amarebti ma kite ja mike ngökadre ñöte tie se, niebare kwe Jesuye.

<sup>15</sup> Angwane Jesukwe niebare mda ie:

Jändräñ mden mden tuen kuin Ngöböye, yebtä abko nikwe Ngöbö Kukwei mikadre täte, aisetet makwe ti ngökadre ñöte, niebare kwe Juanye.

Ye erere nükaninbti Juanye angwane, Jesu ngökani ñöte kwe. <sup>16</sup> Jesu ngökani ñöte, jataninta ñöte käin angwane, kä käin se namani tuen ñäkänintbe ie angwane, Ngöbö Üai jatani üttü bä kwrere timonkwäre, ñükani mate Jesubti, namani tuen ie. <sup>17</sup> Ye btäräbe ni kukwei jarabare kä käinbti, käkwe niebare:

Ni ne abra ti Ngobo tikwe. Niara tare kri tikwe. Niara käi nuäre kri tibta, niebare kore kä käinbti.

## 4

*Diablukwe Jesu nuaninte ja käne  
(Marcos 1.12-13; Lucas 4.1-13)*

<sup>1</sup> Yebti diablukwe Jesu nuadrete ja käne, abkokäre Ngöbö Üai nikani ngwena kä kaibete mda. <sup>2</sup> Ye känti köbö gre ketebu dibire rare Jesukwe mröbare ñakare amne mrö jatani krübäte ie. <sup>3</sup> Angwane diablu jatani nüke Jesu ken, Jesu nuatekäre ja käne, käkwe niebare ie:

Ma abko Ngöbö Odei era metre bkänä ne ngwane, jä se kwite mröre jae, niebare kwe ie.

<sup>4</sup> Akwa Jesu käkwe niebare mda diabluye:

Ñakare. Ngöbö Kukwei tä tikani krörö:

Ñan mrö aibebti ni rabadre nüne, akwa kukwe kwatirekwatire niebare Ngöböökwe, yebti ni rabadre nüne, abko tä tikani Ngöbö Kukweibta, niebare Jesukwe ie. <sup>Deuteronomio 8.3</sup>

<sup>5</sup> Yebti diablu nikani Jesu ngwena juta deme Jerusalén mda, känti nikani Jesu ngwena mobe ju blitakrä Ngöböbe bti käin, <sup>6</sup> käkwe niebare ie:

Ma abko Ngöbö Odei era metre bkänä ne ngwane, ja täkete timon nete, ñobtä ñan angwane Ngöbö Kukwei tä tikani krörö mabtä:

‡ <sup>3:11</sup> sandalia ngwena. Jesu näire ni klabore abko bari ene ni mda mdakrä. Niaratre aibe nämane sandalia ngwena ni mdakrä, aisetet Juan nämane ja bär miike bari ene ni klabore ngwä.

Ngöbökwe angeletre juandi ma ngibiare abko käkwe ma kadi ngäbti kisete, ma ngoto ñan matadre jäte temen abkokäre,  
*Salmos 91.11-12*  
 aisetet ja täkete timon, ma abko Ngöbö Odei ara mikakäre gare ni jökräye, niebare diablukwe Jesuye.

<sup>7</sup> Abtä Jesukwe niebare mda ie:

Ñakare. Ngöbö Kukwei tä tikani abko käta niere krörö arato:

Ni Dänkien Ngöbö käkwe ja kukwei mikadre täte ya, ñakare ya amne niara di tärä ja kukwei ngwiandre bare ya, ñakare ya abko makwe ñan nuate ja käne ja gakäre ben,  
*Deuteronomio 6.16*  
 abko tä tikani kore, aisetet tikwe ñan ma kukwei mikai täte, niebare kwe diabluye.

<sup>8</sup> Yebti mrä, ngitio bäri mente käin, yebti diablu nikani Jesu ngwena mda. Ye känti abko diablukwe juta kä jökräbt temen mikani tuadre Jesuye amne, jändrän ütiäte krikri juta kwatirekwatire te, ye abko mikani tuadre jökrä kwe arato ie. <sup>9</sup> Bti niebare kwe ie:

Ma rabadi ngukudokwäbti temen ti ngwärekri käkwe ti mikadi ütiäte jae ne ngwane, tikwe juta se btä jändrän ütiäte krikri se biandi jökrä mae, niebare mda kwe Jesuye.

<sup>10</sup> Abtä Jesukwe niebare ie:

Satana, nän mento nete, ñobtä ñan angwane Ngöbö Kukwei tä tikani abko käta niere krörö:

Ni Dänkien Ngöbö aibe mikadre ütiäte jae amne niara aibe kräke sribidre, *Deuteronomio 6.13*

abko nieta kore, aisetet tikwe ñan ma kukwei mika täte, niebare mda kwe diabluye.

<sup>11</sup> Angwane diablukwe kä mikaninkä Jesubtä, bti angele nükani ruäre abko namani Jesu die mike.

*Jesu nikani Ngöbö kukwei kuin dirire kena*

(Marcos 1.14-15; Lucas 4.14-15)

<sup>12</sup> Yebti Juan Bautista kitani ngite kä teri gani Jesukwe angwane, Jesu nikaninta Galilea, <sup>13</sup> akwa ñan namani nüne mda juta Nazarete, akwa nikani nüne juta Capernaúmte Ñö Okwä Kri Galilea köräbti. Ñö Okwä Kri Galilea, ye bäre temen abko Zabulón btä Neftalí mräkätre käkwe nünabare kira, känti juta Capernaúm nämane Jesu näire abko te Jesu nikani nüne. <sup>14</sup> Kukwe niebare Ngöbökwe niara kukwei niekä Isaías köböire rabadre bare, abkokäre Jesu nikani nüne yete. Kukwe ye abko tä tikani krörö:

<sup>15</sup> Kä Zabulónkwe amne kä Neftalíkwe abko tä Ñö Jordán kwära nakriri amne tä Ñö Okwä Kri köräbäre.

Kä ye abko tä kä Galileate arato, känti nitre ñakare israelitare tätre nüne.

<sup>16</sup> Nitre israelita ye abko nämane näin kä ikote, akwa ñotraträ kri dirare jatabare ietre. Erere arato, niaratre nämane nüne kä ikote mento Ngöböye angwane, Ngöböträ ngitianinkä ngwen kräke, kukwe metre Ngöbökwe mikakäre gare ietre, *Isaías 9.1-2*

abko tä tikani Ngöbö Kukweibtä abko erere namani bare.

<sup>17</sup> Kä ye ngwane mentokwäre Jesu nikani dirire, kä nikani niere krörö: Ngöbö kä käinbti kebera nüke gobrane nibti, aisetet munkwe kukwe kämekäme kita temen, bti ja töi kwiteta Ngöbö kukwäre munkwe abko Jesu nikani niere kore.

*Jesukwe ni käräbare nibkä ja töitike jabe*

(Marcos 1.16-20; Lucas 5.1-11)

<sup>18</sup> Abti bati Jesu nämane dikekä Ñö Okwä Kri Galilea köräbäre angwane, ni ja etbare nämane nibu ñö köräbti, btä okwä namani. Ni ye abko iti kädian nämane Simón, akwa kädian nämane Pedro arato amne, etba kwe kädian nämane Andrés. Niaratre abko gwa gaka, aisetet nämane krade kite ñöte, btä Jesu okwä namani. <sup>19</sup> Angwane Jesu nikani känti, käkwe niebare ietre:

Mun brän tibe amne munta gwa gaen ño, ye kwrere tikwe mun mikadi ni ngwianka Ngöböye, niebare Jesukwe ietre.

<sup>20</sup> Ye btäräbe, niaratre käkwe krade kitani temen, bti nikani Jesube.

<sup>21</sup> Yebti Jesu nikani mda mentokwäre se kwrere angwane, ni ja etbare nämane nibu mda, btä okwä namani. Nitre ye abko iti kädian nämane Santiago amne etba kwe abko kädian nämane Juan. Niaratre nibu abko Zebedeo ngäbriänkä. Nitre nibu ye abko nämane rute rünbe krade gudike, btä Jesu okwä namani angwane, Jesukwe käräbare ja töitike jabe arato. <sup>22</sup> Ye btäräbe niaratré kákwe ru amne rün mikaninte yete, bti nikani Jesube.

*Jesukwe ni bren bren mikaninta kuinta*  
(Lucas 6.17-19)

<sup>23</sup> Abti Jesu nikani dikekä kä jökräbti temen kä Galileate angwane, Ngöbö kä käinbti kebera gobrane nibti abko nikani dirire sinagogate\* kä ketareketare te. Erere arato, ni bren bätäkä ngwarbe abko Jesu namani miketa kuinta. <sup>24</sup> Yebtä abko blita namani jökrä kä Sariate angwane, ni bren ño ño erere jänamani kite jökrä Jesuye. Erere arato, ni bren üai käme kisete jänamani nüke Jesuye amne kä nötöte nibti amne ni ruen ñakare ngrabare jänamani nüke jökrä Jesuye angwane, Jesu namani miketa kuinta jökrä. <sup>25</sup> Yebtä abko, ni kwati nünanka kä Galileate juta ketareketare te Decápolite amne nitre Jerusalénbo btä ni nünanka kä Judeate amne ni nünanka Ñö Jordánbtä kä driri abko namani dikekä kwati Jesu jiebti.

## 5

*Kukwe diribare Jesukwe ngitiobtä*  
(Lucas 6.20-23)

<sup>1</sup> Nitre namani dikekä kwati dikaro Jesube namani tuen ie angwane, nikani mintokwäre nebe ngitiobtä, känti namani täkänintbe temen. Angwane nitre ja töitikaka ben kákwe krötabare ken. <sup>2</sup> Angwane Jesu nikani dirire krörö ietre:

- <sup>3</sup> Nire nire käta ja mike bobre Ngöböbtä, ye abko Ngöböökwe die mikadi amne kä rabadi nuäre btä, ñobtä ñan angwane Ngöbö kä käinbti tä gobrane bti.
- <sup>4</sup> Nire nire tätre ja müaire, ni ye abko Ngöböökwe die mikadi amne kä rabadi nuäre btä, ñobtä ñan angwane Ngöböökwe moto mikadita jáme.
- <sup>5</sup> Nire nire ñan tä bike kri ni mda mda okwäbti abko Ngöböökwe die mikadi amne kä rabadi nuäre btä, ñobtä ñan angwane Ngöböökwe kä temen ne biandi ie.
- <sup>6</sup> Mröta nebe krübäte nie amne tomna tä nebe krübäte nie, ye kwrere nire nire abko ie nüna metre Ngöbö ngwärekri ye mdei krübäte ie, ni ye abko Ngöböökwe die mikadi amne kä rabadi nuäre btä, ñobtä ñan angwane Ngöböökwe mikadi nüne metre täte jökrä.
- <sup>7</sup> Nire nire abko ie ni mda mda tä nebe ruentari tare, ni ye abko Ngöböökwe die mikadi amne kä rabadi nuäre btä, ñobtä ñan angwane niara rabadi ruentari tare Ngöböye arato.
- <sup>8</sup> Nire nire käta ja töi ngibiare kuin deme, ni ye abko Ngöböökwe die mikadi amne kä rabadi nuäre btä, ñobtä ñan angwane niaratré kákwe Ngöbö tuadi.
- <sup>9</sup> Nire nire käta sribire ni mda mda mikakäre ja mäketa, ni ye abko Ngöböökwe die mikadi amne kä rabadi nuäre btä, ñobtä ñan angwane niaratré abko ja ngäbriänkä niedi Ngöböökwe ietre.
- <sup>10</sup> Nire nire käta nüne metre Ngöbökrä abtä tä ja tare nike, ni ye abko Ngöböökwe die mikadi amne kä rabadi nuäre btä, ñobtä ñan angwane Ngöbö kä käinbti tä gobrane bti.

<sup>11</sup> Amne ni mdakwe ñäkä taretare munye amne mun mika ja tare nike amne tödekabtä tibti ni mda mdakwe kukwe käme nie ngwarbe bätäkä ngwarbe mun rüere, ye ngwane Ngöböökwe mun die mikadi amne kä rabadi nuäre munbtä. <sup>12</sup> Mun raba ja tare nike kore angwane, munkwe kä ngwian bäri nuäre jabtä amne kä raba juto munbtä, ñobtä ñan

\* <sup>4:23</sup> Sinagoga abko ju känti nitre israelita nämane gätäre köbö jadükakräte ñäkäkäre Ngöbö Kukweibtä amne Ngöbö mikakäre kri. Ye känti nitre israelita nämane kukwe ükete jakrä arato. Nitre israelita nämane nüne juta kwatirekwatire, käntikänti sinagoga nämane.

angwane munkwe ja tare nikadi ye ütiäre abko Ngöböökwe jäandrän kuin biandi munye kä käinhti sete. Munkwe kä ngwiandre nuäre kore jabtä arato, ñobtä ñan angwane nitre Ngöbö kukwei niekä kira abko rüe kákwe mikani ja tare nike kore arato.

*Mren amne ñotra trä  
(Marcos 9,50; Lucas 14,34-35)*

<sup>13</sup> Mdakäre abko, mren abko kuin ngri ngibiakrä amne jäandrän mikakrä bänante, ye kwrere mun abko mren kwrere kä nebtä, akwa bänän riadrekä rabadre tibo amne ñan bänän rabadreta mren kwrere. Mren bänän rabadre tibo, ye abko rikadre ngwarbe, aisetet ñan rabadre kuin mda, aisetet kitadrekä amne ni jökrä rabadre dikekä bti ta. Ne aisetet mren bänän kuin ye kwrere munkwe ja ngibia, ni mda mda rabadre Ngöbö tuen munbtä abkokäre.

<sup>14</sup> Mdakäre abko, ñotra träte käta nebe tuen nie kä ikote, ye kwrere munta ñotra trä kwrere kä nebtä amne juta mikata ngitio kribti käin, ye abko ñan raba ja rükente ni okwä bäre kä ikote, ye kwrere munta kä nebtä. <sup>15</sup> Erere arato, ñotra jutra mikata angwane, mikata ñakare kaja täni, akwa mikata mobe üräftä käin trä rabadre ngitie jökrä gwita temen, ni jökrä gwi, ie kä rabadre tuen abkokäre. <sup>16</sup> Ye kwrere arato, munta nüne Ngöbö träte, ye rabadre tuen ni mda mdaye, abkokäre munkwe ja töi mika nüne era metre Ngöbökrä mun rabadre ñotra trä ye kwrere ni mda mda okwätbi amne, munkwe jäandrän kuinkuin nuendre kore ni mda mda okwätbi, ye köböire abko jatadi mun Rün kä käinhti ye käkitekä siba.

*Jesu jatani Ngöbö Kukwei mikakäre bare täte*

<sup>17</sup> Mdakäre abko, ti jatani nete, ye abko ñan Kukwe Biani Ngöböökwe Moiséye mikakäre ngwarbe. Erere arato, Ngöbö kukwei niekä mda mda kákwe Ngöbö Kukwei tikani ye abko ti ñan jatani mikakäre ngwarbe, akwa ti jatani kukwe ye mikakäre bare täte jökrä. <sup>18</sup> Ye abko, ti bike kukwe era erere niere krörö munye: Kä käinta amne kä temen ne tädi kore angwane, tärä okwä bari kiakia tä tikani Ngöbö Kukweibä, ye abko ñan diandrekä jire chi kwati abti jäandrän jökrä mikanintbe Ngöböökwe rabadi bare täte jökrä ie. <sup>19</sup> Ne aisetet, kukwe biani nuendre Ngöböökwe nie, yebtä kukwe bari chi tä tikani abko nire nire ñan tä mike täte amne ni mda mda kákwe ñan mikadre täte abko dirita ietre arato, ne ngwane ni ye abko rabadi bäsü ütiäre ñakare kä käinhti, Ngöböta gobrane ye känti; akwa nire nire tä kukwe ye mike täte amne ni mda mdakwe mikadre täte arato abko tä dirire ietre, ni ye abko rabadi ütiäre kri kä käinhti sete, Ngöböta gobrane ye känti. <sup>20</sup> Tita niere kore, ñobtä ñan angwane Kukwe Biani Ngöböökwe Moiséye dirikätre btä nitre bariseo tätre nüne ño, yebti ta munkwe ñan nünandre bari era metre Ngöbö okwätbi ne ngwane, Ngöbö kä käinhti tä gobrane ye känti mun ñan rabadi nüne.

*Ñan ni mda kämikadre  
(Lucas 12,57-59)*

<sup>21</sup> Mdakäre abko, mun mräkä kirakira abko ie Ngöbö Kukwei diribare krörö abko munkwe kukwei nuanina: Makwe ñan ni mda kämika, niebare ietre amne nire nire käta ni mda kämike abko dokwäre mikadre ja ngie nuen. <sup>22</sup> Akwa ti abko käta niere krörö munye: Nire nire rabadre romon mräkäkrä, ye dokwäre Ngöböökwe mikadi ja ngie nuen. Nire nire abko kákwe “Ma ngwarbe, dokwä töi ñakare,” niedre kwe mräkäye, ye dokwäre abko järikadre ngite Sanedrin ngwärerekri kukwe ükatekäre kräke. Amne nire nire kákwe niedre mräkäye: “Ma ngututu käme ngwarbe,” niedre kwe, ni ye abko rabadi mikani biare kitadre Ngöböökwe ñukwä jutrate kä ja tare nikakrä ye känti mräkä ye dokwäre.

<sup>23</sup> Ne aisetet, ma rika jäandrän ngwena kukwadre Ngöböye ñukwä gräbti ja ngite ütiäre ju blitakrä Ngöböbe känti ne ngwane, ma rabara yete, ye btäräbe ma mräkä iti romon makrä, ye rükata töre mae, <sup>24</sup> ne ngwane jäandrän ye makwe mikate ñukwä grä ken yete, abti ma jana ja mäketa käne ma mräkäbe, bti ma jatata, kákwe jäandrän ye bian kukwadre Ngöböye.

<sup>25</sup> Mdakäre abko, nane rürümön ütiä mabti ni mdakwe abtä ni ye jata niken ma kite ngise kritoboye angwane, mun ngämi nebe kritobo känti, känenkri makwe kukwe ükate

ben, niara ñan rikadre ma ngwena kritobo känti abkokäre, ñobtä ñan angwane makwe ñan nuendre kore ne ngwane, nane ni ye rikadre ma ngwena nebe kritobo ngwärekri amne kritobo abko käkwe ma kitadre ngise guardiaye amne nane guardiakwe ma kitadre ngite kä teri. <sup>26</sup> Ye känti abko makwe ñan ngwian biandre täte jökrä ja ütiäre, känenkri ma ñan tikadreteta jire chi abko ti tö nibi niei metre munye.

#### *Ni gure ñan rabadre ja mike gure ni mdabe*

<sup>27</sup> Mdakäre abko, Ngöbö Kukwei tä tikani abko mun tärä kukwei nuen abko krörö: Mata gure, makwe ñan ja mika gure bati bati abko niebare kore. <sup>28</sup> Akwa ti abko bike niere krörö munye: Nire nire käkwe meri tuadre ja käne amne tö rabadre ie jakrä, ni ye käkwe meri ye mirira ja ken ja töite, aisetet ngite Ngöböye abko tita niere munye. <sup>29</sup> Ne aisetet, ma okwä küde ruenkri, köböite makwe ja mika ngite Ngöbö rüere ne ngwane, ma okwä ye makwe dianka mento jae, bti makwe kitaka mobe, ñobtä ñan angwane ma ngrabare chi ye abko diandrekä mento ye abko rabadre bäri kuin makrä amne ñan ma ngrabare rikadre ngöi jökrä kä ja tare nikakrä känti. <sup>30</sup> Erere arato, ma kise ruenkri, köböite makwe ja mika ngite Ngöbö rüere ne ngwane, makwe ja kise ye tikaka ta, bti makwe kitaka mobe mentokwäre, ñobtä ñan angwane ma ngrabare chi diandrekä mento ye abko rabadre bäri kuin makrä amne ñan ma ngrabare rikadre ngöi jökrä kä ja tare nikakrä känti.

#### *Meri ñan tuametre*

(Mateo 19.9; Marcos 10.11-12; Lucas 16.18)

<sup>31</sup> Mdakäre abko, kukwe diribare krörö Ngöbö Kukweibä abko garera munye: Nire nire tö rabadre meri kwe tuametre, ye ngwane täräkwata biandre kwe merire kweye, niarata merire kwe ye tuametre era metre abko mikakrä gare. <sup>32</sup> Akwa ti abko käta niere krörö: Meri ja mike ngite ñakare brare mda mdabe, akwa brare kwe käkwe tuadremetre, ye ngwane merire ye käkwe ja mikadre gure brare mdabe angwane, ni gure käta ja mike ngite bati bati ni mda mdabe, ye kwrere brare käne köböite meri ye rabadre ja mike ngite. Erere arato, meri tuanimetre brarekwe, ye ben ni mdakwe ja mikadre gure ne ngwane, ni gure käta ja mike ngite bati bati ni mda mdabe, ye kwrere ja mikadi ngite kwe.

#### *Ja kukwei biandre ño era metre*

<sup>33</sup> Mdakäre abko, kukwe niebare mun mräkä kirakiraye abko munkwe kukwei nuanina arato abko krörö: Jändrän jökrä rabadre bare täte mae mata niere ni Dänkien kähti, ye erere makwe ja kukwei mika täte jökrä, käkwe ñan ja kukwei kitadre temen, niebare kira. <sup>34</sup> Akwa ti abko käta niere krörö munye: Munkwe ñan ja kukwei bian jändrän kähti. Erere arato, kä käinta se kähti tita ja kukwei bien, munkwe ñan nie, ñobtä ñan angwane Ngöbö abko tä gobrane kä käinhti yete, aisetet bäri ütiäre. <sup>35</sup> Erere arato, kä temen ne kähti tita ja kukwei bien, munkwe ñan nie, ñobtä ñan angwane kä temen ne abko Ngöböökwe arato. Erere arato, Jerusalén se kähti tita ja kukwei bien, munkwe ñan nie, ñobtä ñan angwane juta Jerusalén abko juta Jrei kri Ngöböökwe kräke, aisetet bäri ütiäre arato. <sup>36</sup> Mdakäre abko, mun dokwä jen munkwe ye kähti, munta ja kukwei bien, munkwe ñan nie, ñobtä ñan angwane mun di ñakare jire ja dokwä drüen mikakäre krati ngwen amne drüne. <sup>37</sup> Ne aisetet, munkwe “jän” nie ne ngwane, munkwe “jän” nie kwatibe; munkwe “ñakare” nie ne ngwane munkwe “ñakare” nie kwatibe arato. Yebti munkwe kukwe mda niedre ne ngwane, munkwe ja mikadre ngite.

#### *Ñan ja ngie mikadre*

(Lucas 6.29-30)

<sup>38</sup> Ngöbö Kukwei tä tikani abko mun tärä kukwe nuen abko krörö: Ni iti käkwe ni okwä diandrete ne ngwane, niara okwä diandrete ie ja dokwäre arato. Erere arato, ni tu diandrekä kwe ne ngwane, tu diandrekä ie ja dokwäre arato abko munkwe kukwe nuani. <sup>39</sup> Akwa ti abko käta niere krörö munye: Nane ni mdakwe kukwe nuen blo ma rüere, akwa makwe ñan ja ngie mika amne jirekäbe makwe jändrän kuin nuen krörö kräke: nane ni mdakwe ma meta ngwäre küde ruenkri yebtä ma mikakäre ngwarbe jae, ne ngwane makwe ja ngwäre kwäräkri mika ie. <sup>40</sup> Erere arato, nane ni mdakwe ma kita

ngise, bti tö raba dän denkä ötati makän ne ngwane, dän mdara jire makwe, ye makwe bian ie arato. <sup>41</sup> Mdakäre abko, nane ni mdakwe tribe ngwiamna milla krati jakrä mae ne ngwane, ja moto kuinbti ma rika tribe ngwena milla krobu kräke. <sup>42</sup> Erere arato, nane ni mdakwe jäandrän makwe kärä mae angwane, makwe bian ie. Nane ni mdakwe jäandrän kärä ütiädre mae ne ngwane, makwe bian ie abko ti tö niei kore munye.

*Nikwe ni rüe taredre  
(Lucas 6.27-28,32-36)*

<sup>43</sup> Mdakäre abko, Ngöbö Kukwei tä tikani abko mun tärä kukwe nuen abko krörö: Makwe ma mräkä tare amne ma rüe abkobtä makwe bätä ngwian abko munkwe kukwe nuanina kore. <sup>44</sup> Akwa ti abko bike niere krörö munye: Munkwe mun rüe tare amne nire nire tä näin kisere mun jiebti mun mikakäre ja tare nike, ye abko kräke munkwe blita Ngöböbe. <sup>45</sup> Munkwe nuendre kore ne ngwane, mun Rün tä kä käinbti sete, ye kwrere mun rabadi amne mun rabadi niara ngäbriänkäre era metre arato. Munkwe nuendre kore, ñobtä ñan angwane mun Rün kä käinbti tä ñänä mike nüke käin ye abko täträ ngitiekä jökrä ni käme kräke amne ni kuin kräke. Erere arato, tä ñü mike näkäen temen, ye abko ni nünanka metre niara ngwärekri kräke tä näkäen amne ni nünanka käme niara rüere kräke tä näkäen arato.

Mun Rün abko käta ni jökrä tarere kore, ye kwrere munkwe nuendre arato, <sup>46</sup> ñobtä ñan angwane ¿nire nire käta mun tarere ye aibe munkwe taredre angwane, Ngöbökwe ütiä biandi munye, munta nütüre ya? Ñakare, ñobtä ñan angwane nitre ngwian käräkä gobran romanobokrä abko tä nebe tuen käme dikaro munye, ye abko tä nuene kore abko kwrere munkwe nuendre siba. <sup>47</sup> ¿Erere arato, mun mräkä aibe ie munkwe köbö ngwiandretari, ye angwane munta jäandrän nuene bäri kuin ni mdakrä ya? Ñakare, ñobtä ñan angwane nitre ñakare israelitare abko tuen ngututture munye abko käta nuene kore, ye kwrere munkwe nuendre siba. <sup>48</sup> Ne aisetet mun Rün kä käinbti abko kuin era metre, ye kwrere munkwe näna.

## 6

*Ngwian biandre tiebe*

<sup>1</sup> Mdakäre abko, munkwe ñan jäandrän kuinkuin nuen tuadre ni jökräye ja bä mikakäre kuin ni mda mda okwäbti, ñobtä ñan angwane munkwe nuendre kore ne ngwane, mun Rün tä kä käinbti ye käkwe ñan sribi ye ütiä biandre jire chi munye. <sup>2</sup> Ne aisetet munkwe jäandrän bian ni bobre die mikakrä angwane, ñan mun rika niere kä jökräbti temen kwäräkwärä mikakäre gare. Nitre ja bä mikaka kuin käta jäandrän bien kore amne tätre nikken mike gare sinagogate amne tätre nikken ji ngrabare temen mike gare. Yebtä abko ni mda mda käkwe niaratre käikitadrekä abkokäre tätre nuene, aisetet tätre jäandrän kuin nuene kore, ye abko ütiä nena kwetre abko titä niere metre, aisetet munkwe ñan jäandrän nuen niaratre kwrere. <sup>3</sup> Ne aisetet nane munkwe ni bobre die mika angwane, makwe ñan nie jire chi ma kukwe muko bäri kuinye, <sup>4</sup> akwa makwe nuen kaibe kä bube. Makwe nuendre kore ne ngwane, ma Rün, ie jäandrän kaibe tiebe tuen, ye käkwe sribi makwe ye ütiä biandi mae.

*Blitadre ño Ngöböbe  
(Lucas 11.2-4)*

<sup>5</sup> Mdakäre abko, mun rika blite Ngöböbe angwane, nitre ja bä mikaka metre tä nikken blite krikri Ngöböbe sinagogate. Erere arato, tätre nebe nünankä jibta blitare Ngöböbe. Ye abko, ni jökrä käkwe tuadre blite Ngöböbe, ie töta nebe, käta nuene kore. Ye kwrere munkwe ñan nuen, ñobtä ñan angwane tätre nuene kore ye abko ütiä nena kwetre abko titä niere metre munye. <sup>6</sup> Ne aisetet, ma rika blite Ngöböbe angwane, makwe ja ketaka kaibe kä teri gwi, käkwe jukwe dika jabti, bti ma Rün Ngöbö tuen ñakare mae, ben makwe blita kaibe angwane, ma Rün ie jäandrän nuenta kaibe makwe abko tuen, käkwe ütiä biandi mae. <sup>7</sup> Erere arato, mun rika blite Ngöböbe angwane, nitre ñakare israelitare tä

kukwe arabe niere bäre bäre, yebtä abko ngöbötre ngwarbe kákwe kukwe nuadre amne die mikadre kwetre tä nebe nütüre, aisetetätre blite kore, ye kwrere munkwe ñan blita Ngöböbe amne munkwe ñan kukwe arabe nie bäre bäre ngwarbe.<sup>8</sup> Munkwe ñan ja mika niaratre kwrere, ñobtä ñan angwane mutta dre dre mdei nike, ye mun ngämi kärere mun Rünye, ye känenkri tärä nebe gare ie.<sup>9</sup> Ne aisetet, munkwe blitadre Ngöböbe angwane, munkwe blitadre krörö ben:

Nun Rün kä käinbti, ma aibe kä raba mikani ütiäte ni jökräkwe.

<sup>10</sup> Jakwe gobrane nun ngätäite nete.

Erere arato, ma töta nebe dre dre nuein kä käinbti, erere tä nebe bare tätetjökrä, ye kwrere raba nebe bare tätetjökrä kä nebtä arato.

<sup>11</sup> Mdakäre abko, makwe mrö bian tätetnünankrä nunye mtare.

<sup>12</sup> Amne ni mdata ja mike ngite nun rüere abko nunta den bti ta, ye kwrere makwe nun ngite ma rüere, ye dianka mento nunbtä arato.

<sup>13</sup> Amne kukwe kämekäme tö nun nuaite ja käne ma rüere, ye känti makwe ñan nun jie ngwian.

Akwa makwe nun ngibia nun rüe diablu ngäniene, ñobtä ñan angwane ma aibe tä gobrane amne ma aibe di kri amne ma aibe raba käikitaninkä kärekäre. Abko kore se. Amen.

<sup>14</sup> Munkwe blitadre kore Ngöböbe, ñobtä ñan angwane ni mda tä ja mike ngite mun rüere angwane, mutta den jökrä bti ta ne ngwane, mutta ja mike ngite Ngöbö mun Rün rüere, ye mun Rün kä käinbti kákwe diandikä jökrä mento munbtä arato.<sup>15</sup> Akwa ni mda tä ja mike ngite mun rüere abko munkwe ñan diandre bti ta amne mun rabadre romon janknu kräke ne ngwane, mun ngite Ngöbö rüere, ye mun Rün kä käinbti kákwe ñan diandrekä mento munbtä arato.

### *Ja bändre ño Ngöbökrä*

<sup>16</sup> Mdakäre abko, munkwe ja bain Ngöbökrä angwane, munkwe ñan ja bá mika diäne nitre ja bá mikaka metre käta nuene ye kwrere, ñobtä ñan angwane nitre bikaka metre, ye tätre ja báine angwane, ni jökrä kákwe gadre, abkokäre tätre nebe ja bá mike diäne tuadre ni mda mdaye, akwa tätre nuene kore ye abko ütiä nena kwetre abko tita niere metre munye.<sup>17</sup> Ne aisetet makwe ja üka bain Ngöbökrä angwane, makwe ja ngwäre bätäte amne makwe ja ükate kuin.<sup>18</sup> Mata ja báine ye ñan gadre mabtä ni mda mdakwe amne, ma Rün tuen ñakare mae aibe kákwe gadre kaibe, abkokäre makwe nuen kore. Ye ngwane abko ma Rün, ie jändräñ kaibe tiebe tuen, ye abko kákwe ütiä biandi mae.

### *Jändräñ kuin kä käinbti, jiebti ni rankwadre*

(Lucas 12.33-36)

<sup>19</sup> Mdakäre abko, munkwe ñan jändräñ ütiäte kri ükakrö kabre jakrä kä nebtä, ñobtä ñan angwane kä u käta jändräñ juen ngwarbe. Erere arato, jändräñ tä nikengwarbe amne gokä tä nikengwarbe jändräñ goire, aisetet munkwe ñan jändräñ ükakrö kabre jakrä kä nebtä.<sup>20</sup> Akwa jändräñ kuinkuin ütiäte krikri rabadre bári kabre munkrä kä käinbti abko kräke munkwe sribi, ñobtä ñan angwane kä käinta kä u ñakare jändräñ rüere, erere arato jändräñ nikengwarbe ñakare amne ni gokä ñakare arato, aisetet munkwe sribi jändräñ kä käinbti ye ükakrökäre kabre jakrä,<sup>21</sup> ñobtä ñan angwane jändräñ ütiäte krikri tädi ükani mdente jakrä munkwe, ye känti mun töi tädi arato.

<sup>22</sup> Mun okwä abko ñotra kwrere munkrä. Ne aisetet ma okwä kuin dirare ne ngwane kä trä kuin tä tuen mae, ye kwrere abko ma töita mikani kwatibe Ngöböbti ne ngwane, Ngöbö trä kuin tä nüke gare kuin mae.<sup>23</sup> Akwa ma okwä käme ne ngwane, kä rabadi tuen kä iko kwrere ma bäre temen mae, ne aisetet kä trä ngwen tärä mabtä, akwa kä trä ye rabadre tuen drüne kwrere mae, ye abko kä iko ara jire abko rabadre tuen bári drüne mda mae. Ye kwrere ma töi ñan tä mikani kwatibe Ngöböbti ne ngwane, bári ma rabadre nüne kä ikote amne Ngöbö trä kuin ñan rabadre nüke gare jire chi mae.

<sup>24</sup> Mdakäre abko, ni ñakare jire abko rabadre sribire bkänkä nibu kräke ja näire, ñobtä ñan angwane sribi bkänkä iti rabadre tare kwe amne mdabtä mätä rabadre; iti kukwei

mikadre täte jökrä kwe, akwa mda abko ñan kukwei mikadre täte kwe. Ne aisetet ni ñan raba ja töi mike kwatibe sribire Ngöbökrä, ja töi mikare kwatibe ngwian ganankrä kwärä jae.

*Ñan töbikadre dikaro mröbtä amne dänbtä  
(Lucas 12.22-31)*

<sup>25</sup> Ne mden kisete, ti bike niere krörö munye: Munkwe mrö ño kwetadre nünankrä amne munkwe dre ñadre tomnane nünankrä jae, yebtä munkwe ñan töbika dikaro. Erere arato, munkwe dän ño kitadre jadtä, yebtä munkwe ñan töbika dikaro, ñobtä ñan angwane nita nüne kä nebtä angwane, nünandre metre Ngöböbe abko bäri ütiäte mrökrä amne ni ngrabare ye abko bäri ütiäte dänkrä, aisetet munkwe ñan töbika krübäte dikaro jäandrän yebtä. <sup>26</sup> Nukwå tä nikenkä käinta, se mika ñäräre munkwe. Nukwå tä nura nökö ñakare jakrä amne tä ngwå ötö ñakare arato amne ju ñakare kwe mrö ükakrä jakrä, akwa mun Rün kä käinbti käta mrö bien ietre kwetadre. Mun abko bäri ütiäte nukwå kräke, *¿se abko mun Rün käkwe ñan mrö biandre munye ya amarebti munta töbika krübäte dikaro se?* <sup>27</sup> Munkwe ñan töbikadre krübäte dikaro kore, ñobtä ñan angwane ni tö rabare ja tuai bäri kri, akwa di ñakare ja mike niren taiti mda kukwâne.

<sup>28</sup> Mdakäre abko, *¿ñobtä munta töbika krübäte dikaro dänbtä jakrä se?* Kri blü tä niren ño, yebtä munkwe töbika. Tä sribire ñakare jakrä, tä dän dike ñakare jakrä, <sup>29</sup> akwa jrei kri Salomón abko nämane jäandrän jökrä tuäretuäre bkâne, akwa dän tuäretuäre kri blü se kwrere abko Salomónkwe kitani ñakare jadtä. <sup>30</sup> Kri blü tä neme jötrö köböitibe, abti jäandrinane angwane mikata ngire ñukwâte, akwa Ngöböta ngibiare kuin, *¿ye mun abko ie dän ñan biandre Ngöbökwé ya amarebti munta tödeke ñakare täte Ngöböti ye?* <sup>31</sup> Munkwe ñan töbika dikaro, kä rika kukwe ngwentari krörö jae au: *¿Nikwe mrö ño kwetadi amne nikwe dre ñadi tomnane?* Erere arato, *¿nikwe dän ño kitadi jadtä se?* munkwe ñan nie kore jae au, <sup>32</sup> ñobtä ñan angwane nitre ñakare israelitare abko bäri tä nakwen kisere jäandrän ye jiebti, akwa mun käta dre mdei nike, ye abko garera jökrä Ngöbö mun Rün kä käinbti seye amne niarakwe jäandrän ye biandi munye, aisetet munkwe ñan töbika dikaro jäandrän nünankrä yebtä jakrä. <sup>33</sup> Ne aisetet, jäandrän jökrä Ngöbökwé tä mikani jenena munkrä, ye munkwe känäntari käne amne, mun rabadre nüne metre Ngöbö ngwärekri, ye munkwe känäntari arato angwane, jäandrän jökrä mdei nikata munkwe ye Ngöbökwé biandi munye arato. <sup>34</sup> Mdakäre abko, köbö mdara jire jatadi jetbe angwane, dre dre rakadikä, yebtä munkwe ñan töbika dikaro, ñobtä ñan angwane köbö jetbe ye abko jatadi kukwe mdara jire ngwena töbikakrä munye, aisetet köbö kwatirekwatire te kukwe tärä keta kabre ni mikakäre töbika, aisetet kukwe jatadre mate ño ño murnbtä jetbe, yebtä munkwe ñan töbika dikaro.

## 7

*Ñan ñäkädre ni mda mda rüere  
(Lucas 6.37-38,41-42)*

<sup>1</sup> Mdakäre abko, Ngöbökwé ñan kukwe ükadrete mun rüere, abkokäre munkwe ñan bika kri, käkwe ñäkä blo ni mda mda rüere, <sup>2</sup> ñobtä ñan angwane munkwe ñäkädre ño ño ni mda mda rüere, ye kwrere Ngöbökwé kukwe ükadite munkrä. Erere arato, munkwe ñäkädre krübäte ni mda mda rüere ne ngwane, Ngöbökwé kukwe ükadite krübäte mun rüere amne, munkwe ñäkädi chi ni mda rüere ne ngwane, ye näre Ngöbökwé kukwe ükadite mun rüere.

<sup>3</sup> Mdakäre abko, kukwe käme btä nita ja mike ngite kri, ye abko ti bike bä mike kri oto kri kwrere amne kukwe chi ye abko ti bike bä mike kä büre chi ye kwrere abko krörö: *¿Kri oto bäri kri tä ma okwâte, ye ño abko ma töbikare ñakare jae amarebti kä büre chi ma mräkä okwâte, abkobtä mata nebe ja ngwen ruen tare yere?* <sup>4-5</sup> *¿Ye ñobtä kri oto bäri kri tä ma okwâte abko mata dianka nütüre ñakare jae amarebti, kä büre chi ma mräkä okwâte abko ie mata niere?* Ti mräkä, kä büre ma okwâte ye, ti tuemetre denkä jae, mata niere ie? *¿Ye ñan ngwarbe, mata ja bä mike kuin ma mräkäbtä, käta kukwe nuene kore*

yera! Kri oto kri ma okwäte ye ara jire makwe dianka käne jae. Yebti kä raba tuenta kuin mae angwane, batibe makwe kä büre chi ma mräkä okwäte ye dianka mda ie. Ye kwrere, munta kukwe nuene bäri kämekäme abko okwäbti, ni mdata ja mike ngite chi abko mun ñan bika bäri kise ngwen ni yebtä. Munkwe ñan ñäkä jire chi ni yebtä, akwa kukwe käme, yebtä mun raba moto ulire, bti kukwe ye tuemetre jire jökrä käne, abti mun raba mun mräkä die mike.

<sup>6</sup> Ni ruäre abko krübäte amne romon dikaro nukro kwrere. Ni ye ie munkwe ñan jäandrän kuin Ngöböökwe bian, ñobtä ñan angwane nane rikwitadre mun rüiere amne nukro käkwe ni tikadrekä kiakia ngrabare tubti, ye kwrere jatadre nuene munbtä. Erere arato, ni tärä ruäre abko mtü kwrere käta jäandrän ütiäte ni mdakwe perla ütiäte kri kwrere mike ngwarbe jae. Ni ye abko ie jäandrän kuin Ngöböökwe ütiäte kri tä munkwe ye abko munkwe ñan kita temen kräke, ñobtä ñan angwane ñan rabadi ütiäte kräke, aisetet dikadikä jökrä bti ta kwe.

*Jäandrän kärädre janknu Ngöböye  
(Lucas 11.9-13; 6.31)*

<sup>7</sup> Käre munkwe jäandrän kärä Ngöböye amne Ngöböökwe biandi munye. Erere arato, munkwe jäandrän känäntari Ngöbö känti amne kwandi munye. Erere arato, nita neme jukwebtä jäandrän kärere ni mdaye, ye kwrere käre munkwe jäandrän kärä jukwebtä Ngöböye angwane, Ngöböökwe jukwe tikadi, käkwe biandi munye, <sup>8</sup> ñobtä ñan angwane nireta jäandrän kärere, ye erere bianta ie amne, nireta jäandrän känentari jakrä, ye erere tä kwen ie amne nireta ñäke jukwebtä abko ie Ngöböta jukwe tike amne tä jäandrän bien ietret.

<sup>9</sup> Ngöböta jäandrän bien kore, yebtä abko ti bike kukwe bä mike krörö mda: *¿Mun mden ie ngäbäkre munkwe tä ban ribere kwetadre jae amne munta jä bien kwetadre ie?* <sup>10</sup> Erere arato, *¿mun mden ie ngäbäkreta gwa kärere kwetadre jae amne munta tbi krübäte bien kwetadre ie?* <sup>11</sup> Mun abko moto käme, akwa ngäbäkre munkwe, ie jäandrän kuin bian gare munye. *¿Se mun Rün kä käinbti bäri moto kuin munkrä se abko munkwe jäandrän kuin kärädre ie abko ñan biandre kwe munye ya?* *¡Jänri!* Munkwe dre dre kärädre ie, erere biandi kwe munye.

<sup>12</sup> Mdakäre abko, ni mda mdakwe jäandrän kuin nuendre munkrä, ie mun töta nebe, ye kwrere munkwe jäandrän kuin nuen ni mda mdakrä, ñobtä ñan angwane munkwe nünandre kore angwane, Kukwe Biani Ngöböökwe Moiséye amne kukwe tikani nitre Ngöbö kukwei niekäkwe, ye mun rabare mike täte metre.

*Jukwe krä chi  
(Lucas 13.24)*

<sup>13</sup> Mdakäre abko, mun tö näin Ngöbö känti ne ngwane, jukwe krä chi abko känti ta mun rika, ñobtä ñan angwane jukwe kwata kri amne ji kwata kri abko käta nikken ni ngwena kä ja tare nikakrä känti amne ni kwati tä nikken jukwe kwata kri yete ta amne ji kwata kri yebti. <sup>14</sup> Akwa jukwe amne ji käta nikken ni ngwena nüne kärekäre Ngöböbe abko krä chi amne ni ñan raba dikekä nuäre bti, ye abko nebe tare ni kwati kräke, aisetet ni braibe tä nikken jukwe krä chi yete ta amne ji krä chi yebti.

*Jesukwe ni töi bä mikani kri ngwäbtä  
(Lucas 6.43-44)*

<sup>15</sup> Mdakäre abko, nitre ni ngökaka tä näin blite Ngöbö käbti tä niere, ye ngäniene munkwe ja ngibia, ñobtä ñan angwane obeja jáme kwrere tätre ja bä mike, bti tätre nüke mun känti, akwa era metre niaratre töi abko lobo krübäte kwrere jire, bti tätre nüke.

<sup>16</sup> Niaratre tä nüne ño, yebtä rükadre gare munye abko ti bike bä mike krörö: Kri mden tukwätetukwäte btä nita uba ngwä ötö ñakare. Erere arato, kri ochitukwä krie kwrere, btä ni higo ngwä ötö ñakare jire chi arato, <sup>17</sup> aisetet kri kuin uba o higokrie kwrere abko käre ngwäta nebe kuin amne kri käme abko käre ngwäta nebe käme. <sup>18</sup> Ye abko, kri kuin ñan ngwä rabadre käme jire chi amne kri käme abko ñan ngwä rabadre kuin jire

chi arato. <sup>19</sup> Kri mden kämekäme abko ngwä nebe ñakare kuinkuin abko erere tikakata, bti kitata ñukwätē abko garera munye. <sup>20</sup> Ne aisetē, nitre ni ngökaka ye tätre nüne ño, yebtä rüka gare munye.

<sup>21</sup> Mdakäre abko, ñan ni jökrä käkwe niedi krörö tie: Ti Dänkien, niedi kwe tie abko köböire näin kä käinbti, akwa ti Rün tä kä käinbti abko tö dreye, ye erere nire nire tä nuene, käta mike täte, ni ye kwrere aibe näin kä käinbti. <sup>22</sup> Ne aisetē Ngöbökwe kukwe ükadite ni jökrä kräke, ye näire ni kwati rabadi niere tie: Ti Dänkien, nunkwe Ngöbö kukwei kuin mikani gare ma käbti amne nunkwe üai kämekäme juanintari mento ma käbti. Erere arato, nunkwe sribi kri ñan tuabare nuenbare kabre ma käbti arato, aisetē nun rabadre nüne kärekäre kä käinbti mabe abko ni kwati rabadi niere kore tie. <sup>23</sup> Akwa ye ngwane tikwe niedi krörö ietre: jMun gare ñakare jire chi tie amne, mun abko kukwe nuenä kämekäme, aisetē nän mobe mento tibtä! tikwe niedi ietre.

*Ju mikaka nibu*  
(Marcos 1.22; Lucas 6.47-49)

<sup>24</sup> Ye mden tita dirire abko ni iti tä ti kukwei nuen amne tä mike täte, ni ye abko ti bike bā mike krörö: Ni iti töbtä käkwe ju mikani jäkwata ribi bti. <sup>25</sup> Yebti ñü jatani jobe temen amne ñö nikani niren niren kri jate amne müre nükani mate ribi krübäte ju yebtä, akwa ju ye mikani jäkwatabti, aisetē namani janknu amne ñan nikani temen. Ni ti kukwei mikaka täte abko ti tö nibi bā mikai kore. <sup>26</sup> Akwa tita kukwe dirire ne ni iti käkwe kukwe nuadre, akwa ti kukwei mikadre täte ñakare kwe, ni ye abko ti bike bā mike krörö: Ni iti töi ñakare käkwe ju mikani angwane, ju ye abko mikani ümanbti kwe. <sup>27</sup> Yebti ñü jatani jobe temen amne ñö nikani niren kri jate amne müre nükani mate ribi krübäte ju yebtä, käkwe ju kwitaninkä jökrä temen, käkwe ju juani ngwarbe jökrä kän. Ye kwrere abko nire nire ñan tä ti kukwei mike täte abko ti tö nibi bā mikai kore. Abko kore se.

<sup>28</sup> Jesu käkwe blitabare ünän jökrä kore angwane, ni kwati nämane näin ben, ye ñan töi namani krütare jökrä kukwe diribare kwe yebtä, <sup>29</sup> ñobtä ñan angwane ni töbtä di kri käkwe diri ja di ngöi, kwrere jire Jesukwe diribare ietre amne, Kukwe Biani Ngöbökwe Moiséye dirikätre abko nämane dirire, ye kwrere Jesukwe diribare ñakare. Yebtä abko ñan töi namani krütare Jesu kukweibtä.

## 8

*Ni iti kwata bren lebra kisete abko Jesukwe mikani kuinta*  
(Marcos 1.40-45; Lucas 5.12-16)

<sup>1</sup> Jesu nämane ngitiobtä, yebti nikaninta nebetta ngitiobtä ngüsürü mda angwane, ni kwati nikani niara jiebti. <sup>2</sup> Ye btäräbe ni iti bren lebra kisete, abtä ngütüete abko jatani Jesu ngäbti angwane, namani ngukudokwäbti temen Jesu ngwärekri, käkwe niebare ie:

Ti Dänkien, ma tö ti mikaita kuinta ne ngwane, ma di tärä nuendre gare tie, aisetē makwe ti mikata kuinta, ie ti tö nibi, niebare kwe ie.

<sup>3</sup> Angwane Jesukwe kise mikani btä, käkwe niebare mda ie:

Ma rabata kuinta, ie ti tö nibi, aisetē gwängwarbe ma bike nebetta kuinta, niebare kwe ie.

Ye btäräbe ni ye kwata ngütüete namaninta kuinta jökrä ngrabare. <sup>4</sup> Angwane Jesukwe niebare krörö mda ie:

Tikwe ma mirita kuinta, ye makwe ñan nie jire chi ni mda mdaye, akwa ma rika ja kwata kuinta mike tuare ni blitaka Ngöböbe ni mda mda diäreye amne ni bren kore tä nebetta kuinta abko käkwe jändräñ mden mden biandre niebare Moisékwe, ye erere ma rika ngwena biandre Ngöböye. Yebtä abko ma nenante kuinta abko rabadre gare ni jökräye, abkokäre ma rika jändräñ ye ngwena. Abko kore se, niebare kwe ie.

*Rükä dänkien romanobo käkwe tödekan metre Jesubti*  
(Lucas 7.1-10; Juan 4.43-54)

<sup>5</sup> Yebti Jesu nikani nebe juta Capernaúmte angwane, rükä dänkien romanobo jatani iti nüke Jesu känti ja di käräkäre ie, <sup>6</sup> käkwe niebare krörö:

Ti Dämkien, sribikä tikwe bren jume dikaro tikän amne ruen ñakare ngrabare abko kisete tä ja tare nike krübäte abko ti ki niere mae, makwe mikadre kuinta abkokäre, niebare kwe Jesuye.

<sup>7</sup> Angwane Jesukwe niebare mda ie:

Ye ti näin miketa kuinta makrä mtare, niebare kwe ie.

<sup>8</sup> Abtä niarakwe niebare mda Jesuye:

Ti Dämkien, ni ütiäte ñakare ti ne kwrere abko gwiriete ni ütiäte ma ye kwrere nin rükadre jire chi ruen tie. Akwa sribikä tikwe rabadreta kuinta abko makwe niedre jirekäbe nete angwane, rabadita kuinta abko gare tie abko ti tö nibi ribei mae, <sup>9</sup> ñobtä ñan angwane ni mda bäri ütiäte ütiäte, ben tita sribire, käta dre nuemna tie, erere tita nuene. Erere arato, nitre rükä tä sribire tibe abko, tita juen, ye tä niken jötrö ngwarbe. Jakwe, tita niere ie, jötrö ngwarbe tä kite. Mdakäre abko, ni klabore tikwe, ie sribi ne nuene, tita niere, jötrö ngwarbe tä nuene. Ne aisetet, tita dre niere, erere tä nebe bare täte jökrä. Ye kwrere arato, makwe dre dre niedre sribikä bren tikwebtä abko erere rabadi bare täte mae ruen tie, aisetet tita ja di ribere kore mae. Abko kore se, niebare kwe Jesuye.

<sup>10</sup> Yebtä abko, Jesu ñan töi namani krütare mda ni ye kukwei nuare kore angwane, nitre nämane näin Jesube, ie Jesukwe niebare krörö mda:

Ti bike kukwe era erere niere munye abko krörö: Ni tödeke kwatibe Ngöböbtí ni ne kwrere, nin ngämi kwen jire tie nitre israelita ngätäite, amarebti ni menteni nünanka juta mdara jire te tä tödeke kwatibe Ngöböbtí nüke kwen mtare tie nere. <sup>11</sup> Nebtä abko ti bike kukwe metre niere krörö munye: Nitre ñakare israelitare kä jökräbti temen abko näin nebe mröre ketetibe Abrahambe, Isaabe amne Jacobobe kä käinbti sete, Ngöböta gobrane ye känti. <sup>12</sup> Akwa mun israelita ye ara jire rabadre käne Ngöbö känti kä käinbti sete, akwa ñan rabadre bare kore, akwa kä bäri iko te Ngöböökwe mun kitadi ju bäre niara okwä bäre mento. Ye känti mun rabadi ja müaire krikri be amne ja tare nikabtä mun rabadi ulire dikaro. Abko kore se, niebare Jesukwe ni kwatiye.

<sup>13</sup> Yebti rükä dämkien ye ie Jesukwe niebare:

Ti di tärä ni sribikä makwe mikakrä kuinta kore nibi era makrä, ye erere nibira kuinta, aisetet nänta ja gwiriete, niebare Jesukwe ie.

Ye erere bkänä sribikä namaninta kuinta batibe.

#### *Jesukwe Simón köbrän merire mikaninta kuinta*

(Marcos 1.29-31; Lucas 4.38-39)

<sup>14</sup> Abti Jesu nikani Pedro gwiriete angwane, Pedro köbrän merire abko nämane bren drangwan kisete, abtä nämane kitanintbe jänbti temen, känti Jesu namani. <sup>15</sup> Jesu namani känti angwane, Jesukwe nuaninbtä jirekäbe kisebtä. Ye btäräbe drangwan nikaninbe batibe btä, namanintabe kuinta, aisetet nükani dikekäta krö, kä nikani mrö känene Jesu bukakrä.

#### *Jesukwe ni bren bren mikaninta kuinta*

(Marcos 1.32-34; Lucas 4.40-41)

<sup>16</sup> Yebti kä jatanina iko angwane, ni kwati nämane ja tare nike üai käme kisete abko jänikani Jesu känti angwane, Jesu nikani üai käme ye juentari mento, erere üai käme ngitiani jökrä mento btätre. Erere arato, ni bren ño ño erere jänikani Jesu känti yete abko Jesukwe mikaninta kuinta jökrä arato. <sup>17</sup> Kukwe nakaninkä kore, ye abko ni Ngöbö kukwei niekä kira kädian nämane Isaías abko köböire Ngöbö kákwe kukwe krörökrörö niebare kira Jesubtä abko erere rabadre bare, abkokäre kukwe nakaninkä kore se: Niarakwe bren dianinkä nibtä amne, ni mikaninta kuinta jökrä kwe, <sup>18</sup> Isaías 53.4 abko Ngöböökwe niebare kore Jesubtä Isaías köböire abko erere namani bare.

#### *Ni rikadre Jesu jiebti abko tare*

(Lucas 9.57-62)

<sup>18</sup> Yebti ni jatani nüke kwati dikaro Jesu bäre temen namani tuen ie angwane, ja ngwiamma Ñö Okwä Kri Galilea kwärä nakri kwe. <sup>19</sup> Ye btäräbe ni iti Kukwe Biani Ngöböökwe Moiséye dirikä kákwe krötabare Jesu ken, kákwe niebare ie:

Dirikä, ma näin mdente erere, ye känti ti rikai siba mabe, niebare kwe Jesuye.

<sup>20</sup> Abtä Jesukwe niebare mda ie:

Nukro känsenta, kwe kä mkä tärä nünankrä amne, nukwä nikenkä käinta abko juda tärä kwe nünankrä arato, akwa ti Ni Kä Nebtä Ngobo ne abko kwe kä ñakare jire chi jadükakrä. Ne aise te ma tö jatai tibe ne ngwane, ma rabadre juto biare nüne ti kwrere arato, niebare Jesukwe ie.

<sup>21</sup> Yebti ni mda nämane näin Jesube käkwe niebare mda ie:

Ti Dänkien, ti tuemetre nikenta ken ja gwiriete, abti ti rün krütadi, tikwe doboi mikadi, ye tähti ti näin mabe, niebare kwe Jesuye.

<sup>22</sup> Angwane Jesukwe niebare mda ie:

Nitre ie Ngöbö gare ñakare abko tä ni ngwákäre kwrere Ngöbö ngwärekri, ye tuametre ni ngwákäre doboi mike amne ma abko jata janknu ti jiebti, niebare Jesukwe ie.

### *Jesukwe müre amne ñö mikani kwe kbe*

(Marcos 4:35-41; Lucas 8:22-25)

<sup>23</sup> Yebti Jesu nakwani rute amne nitre ja tötitaka ben abko nikani siba niarabe.

<sup>24</sup> Nikanina ñöbti se kwrere angwane, batibe müre jatani mate ribi krübäte ñübe mni mni, ye abko namani ñö kite jökrä rute, aise te ru jatani nikén ñöte nguse, akwa Jesu abko nämane kibien. <sup>25</sup> Yebtä abko nitre ja tötitaka ben nikani gaenkrö, käkwe niebare ie:

¡Nun Dänkien, ni dentari! Ni kite nikén ñöte nguse, namani niere Jesuye.

<sup>26</sup> Abtä Jesukwe niebare ietre:

¡Se ñobtä munta tödeke ñakare dikaro Ngöböbti amarebti mun nibi nekwetekä krübäte dikaro ja jiebti ye! niebare Jesukwe ietre.

Jesukwe ñäkäbare kore ietre, bti nükani dikekä krö, käkwe ñäkäbare müreye amne ñöye. Ye btäräbe müre amne ñö namani kwe kbe jökrä. <sup>27</sup> Yebtä abko, nitre ja tötitaka Jesube ñan töi namani krütare mda Jesubtä, kä namani niere jae kwärikwäri:

¿Ni ne abko ni ño amarebti müre amne ñö käta kukwei mike täte jökrä se? namani niere jae kwärikwäri.

### *Ni Gadarabo nibu, btä Jesukwe üai käme juanintari mento*

(Marcos 5:1-20; Lucas 8:26-39)

<sup>28</sup> Yebti Jesu nikani nebe Ñö Okwä Kri Galilea kwärä nakri käkä Gadara känti angwane, ni nibu btä üai käme nämane nüne abtä nämane nüne kä mkäte rökabti abko jatani nüke Jesu ken. Nitre nibu btä üai käme nämane nüne ye abko nämane romon krübäte, aise te nämane nüne rökabti, ye käntita ni ñakare jire iti ie ja namani nüke töre dikekä yere.

<sup>29</sup> Akwa Jesu nikani yere angwane, nitre nibu ye namani niere krörö Jesuye:

Jesu Ngöbö Odei, ¿ye ñobtä ma kite nun nike nete ye? ¿Ngöböökwe kä kitani nun mikakäre ja ngie nuen, ye känenkri ma kitera nun mike ja tare nike ya ño yere? namanintre niere Jesuye.

<sup>30</sup> Kä ye känti abko känlime se kwrere mtü nämane kabre mröre <sup>31</sup> angwane, üai käme käkwe niebare Jesuye:

Ma bike nun juentari mento nitre nebtä ne ngwane, mtü tuen sete sebtä makwe nun juan, niebare kwe ie.

<sup>32</sup> Angwane Jesukwe niebare üai kämeye:

Mun nän mento nitre nebtä, niebare mda kwe.

Ye btäräbe üai käme ye nakwaninkäbe mentokwäre nitre yebtä, bti nikantre jökrä mtü kabre yebtä. Ye btäräbe mtü jökrä käkwe ja täkäntine, nikani betekä jökrä ja jiebti kä btä motokwäre, nikani ngitiekä jökrä ñöte, känti müre neketani jökrä. <sup>33</sup> Angwane nitre mtü ngibliaka nämane yete abko ngitiani jökrä, nikantre nebata jutate angwane, nitre nibu btä üai käme nämane abko btä kukwe nakaninkä ño ño amne kukwe nakaninkä ño ño mtübtä ye abko tanbare jökrä kwetre jutate yete. <sup>34</sup> Yebtä abko nitre nünanka juta yete nikani kwati Jesu känti, namanintre Jesu känti angwane, Jesukwe kä mikadrekä kä ye känti abko namani ribere ie.

## 9

*Ni ruen ñakare ngrabare abko Jesukwe mikaninta kuinta  
(Marcos 2,1-12; Lucas 5,17-26)*

<sup>1</sup> Yebti Jesu nakwaninta rute nitre ja töitikaka benbe, bti nikanintreta mda Ñö Okwä Kri Galilea kwärä nakri amne nikani nebata ja käite Capernaúmte. <sup>2</sup> Abti ni iti ruen ñakare ngrabare abko kisete ñan dikaka kä abko nämane mikani jänkwatabti abko ni mda mda nükani ngwena Jesuye. Nitre nükani ni bren ngwena amne ni bren ye namani tödeke kwatibe Jesubti namani tuen ie angwane, Jesukwe niebare ni bren yeye:

Ma ngite Ngöbö rüere, ye tikwe dininkä mabtä, aisetet kä raba nuäre mabtä ti mräkä, niebare kwe ie.

<sup>3</sup> Angwane Kukwe Biani Ngöbökwe Moiséye dirikätre nämane ruäre yete abko namani töbike krörö Jesubtä: Ni noko käkwe ñäri kore se abko ñäri Ngöbö ara jire rüere kwe, namanintre nütüre Jesubtä. <sup>4</sup> Akwa niaratre namani töbike kore ye abko gani Jesukwe, abtä niebare kwe ietre:

¿Ye ñobtä amarebti mun töi kämekäme dikaro kore ye? <sup>5</sup> ¿Dre abko bäri nuäre niedre: Ma ngite Ngöbö rüere ye tikwe dininkä mabtä abko bäri nuäre niedre ya? o ¿Näin krö, nänta abko bäri nuäre niedre ya? Ye abko, ma ngite Ngöbö rüere ye tikwe dininkä mabtä abko bäri nuäre niere, ñobtä ñan angwane raba bare ya, ñakare ya ñan jatadre munye. <sup>6</sup> Akwa ti Ni Kä Nebtä Ngobo, ne ie Ngöbökwe ja di biani mun ngite Ngöbö rüere diankakäre munbtä kä nebtä, ye abko ti bike bä mike tuadre munye, niebare Jesukwe.

Ye btäräbe ni ruen ñakare ngrabare ye ie Jesukwe niebare:

Näin krö. Jänkwata makwe ye den kisete amne nänta ja gwiriete, niebare kwe ie.

<sup>7</sup> Angwane jötrö ngwarbe ni ruen ñakare ngrabare ye naninkrö krö amne nikaninta ja gwiriete. <sup>8</sup> Nitre nämane yete okwäbti kukwe nakaninkä kore, yebtä abko namanintre nekwetekä krübäte, akwa Ngöbökwe ja di biani kri ni kä nebtäye namani tuen ietre, abtä namani Ngöbö käkitekä.

*Jesukwe Mateo käräbare ja töitike jabe  
(Marcos 2,13-17; Lucas 5,27-32)*

<sup>9</sup> Abti Jesu nikaninta angwane, kä jändrän ütiä biankrä gobran romanobokrä, känti ni näma täkänintbe iti jändrän ütiä kärere. Ni kädian nämane Mateo, ye abko ti ara, btä Jesu okwä rababa. Angwane Jesukwe nieba tie:

Brän tibe, nieba kwe tie.

Angwane jötrö ngwarbe ti Mateo rükaba dikekä krö, rikaba Jesu jiebti. <sup>10</sup> Yebti Jesu näma mröre ti gwiriete angwane, nitre jändrän ütiä käräkä gobran romanobokrä rükaba kwati amne ni mda mda näma tuen käme ni israelita ruäreye abko rükaba amne rababa täkänintbe jökrä mesabtä mröre ketetibe Jesube amne nitre ja töitikaka Jesube ye ben gware arato. <sup>11</sup> Jesu näma mröre kore, ye tuaba nitre bariseokwe angwane, nieba kore kwetre nun ja töitikaka Jesube yeye:

¿Nitre jändrän ütiä käräkä gobran romanobokrä abko käme amne ni mda mda kukwe nuenkä kämekäme se gare ñakare dirikä munkwe seye ya amarebti tä mröre jäme ketetibe ben se? nieba kwetre.

<sup>12</sup> Nitre bariseo käkwe ñäkäba kore, ye jaraba Jesuye angwane, Jesukwe ja bä mikaba ni kräkä bianka kwrere amne nitre jändrän ütiä käräkä amne nitre kukwe nuenkä kämekäme, ye bä mikaba ni bren kwrere, käkwe nieba krörö mda ietre:

Ni kuin bren ñakare ye abko ñan tä ni kräkä bianka ribere jadtä, akwa ni bren bren abtä tä ni kräkä bianka ribere jadtä abko ti tö nibi niei munye. <sup>13</sup> Ne aisetet Ngöbö Kukwei tä tikani krörö ti bike niere, nebtä mun rika ja töitike gwi:

Munkwe ni mda mda ngwiandre ruentari tare jae, ye abko ie ti tö bäri.

Akwa mun tädre jändrän bien jirekäbe kukwadre tie, ye abko ie ti ñan tö bäri, *Oseas 6,6* niebare Ngöbökwe. Yebtä mun rika ja töitike, ñobtä ñan angwane ni ie ja ruen kuin deme au Ngöbö ngwärekri mun kwrere, ye abko ñan ti jatani kärere Ngöbö kukwäre, akwa ni

kukwe kämekäme nuenkä Ngöbö rüere ye mden abko ti jatani kärere Ngöbö kukwäre. Abko kore se, nieba Jesukwe nitre bariseoye.

*Ñobtä nitre ja töitikaka Jesube ñan nämane ja bäine  
(Marcos 2.18-22; Lucas 5.33-39)*

<sup>14</sup> Yebti nitre nänkä Juan Bautistabe käkwe krötaba Jesu ken, käkwe nieba ie:  
Nun nänkä Juanbe btä nitre bariseo, nunta ja bäine Ngöbökrä, ¿se ñobtä abko nitre ja töitikaka mabe abko ja bäine ñakare Ngöbökrä sere? nieba kwetre Jesuye.

<sup>15</sup> Abtä Jesukwe kukwe bä mikaba ietre, käkwe ja bä mikaba ni ja mikaka gure kwrere amne nitre ja töitikaka ben abko bä mikaba kwe ni ja mikaka gure kukwe muko kwrere, käkwe nieba ietre:

Ni iti tä niken ja mike gure angwane, tä kukwe muko kwe kwe nübaire kä ngwiankäre nuäre gware jabtä, ¿ye ngwane ni ja mikaka gure ye tädre siba bentre angwane, kukwe muko ye raba moto ulire ja bäine ya? Ñakare, akwa ni ja mikaka gure ye järikadre kukwe muko okwäbti, ye ngwane rabadre ja bäine abko kore rakahidä nitre ja töitikaka tibe yebtä.

<sup>16</sup> Mdakäre abko, ti bike kukwe mdara jire bä mike krörö munye:

Dän ngututu gudikadre dän kukuwän btinbti angwane, dän kukuwän btin tä dän ngututu kwaenkä bari mda abko kisete dän ngututu rötadreteta angwane, rötadrete bari kri mda, aisetet ni ñan raba dän ngututu gudike dän kukuwän btinbti. <sup>17</sup> Erere arato, chibo kwata dikani kira uba doi ngwäre, te ni ñan raba uba doi mräre keke mikadre kwaka, ñobtä ñan angwane uba doi bänän jatadre dime amne rikadre nokrekä, ye käkwe chibo kwata ngututu trekadre amne rikadre ngwarbe uba doi kwaka ben ngöi jökrä arato. Mden kisete, uba doi mräre mikadre kwaka abko kekadre chibo kwata btinte, uba doi amne chibo kwata ñan rikadre ngwarbe. Abko kore se, nieba Jesukwe nitre nänkä Juanbe yeeye.\*

*Ngäbäkre krütani abko Jesukwe mikaninta nire amne meri bren abko mikaninta kuinta kwe  
(Marcos 5.21-43; Lucas 8.40-56)*

<sup>18</sup> Jesu näma blite kore, ye btäräbe ni iti ji dokwätte nitre israelita ngätäite jataba, rikaba ngitiekä ngukudokwätbi temen Jesu ngwärkri, käkwe nieba krörö ie:

Ti ngänkän küre gwä tikän, akwa ma rikadre tibe, käkwe kise mikadre bti angwane, rükadreta nire nibi ruen tie, aisetet ti ki ma kärere btä ye, nieba kwe Jesuye.

<sup>19</sup> Ye mden kisete, Jesu rikaba dikekä amne rikaba ni ji dokwätte yebe amne, nun ja töitikaka Jesube rikaba siba ben arato.

<sup>20</sup> Angwane abko meri rikaba iti Jesu jiebti. Meri ye abko kä kwä jätäbti kubura nikani bren dbä tibiere abko kisete nämane ja tare nika. Meri ye abko käkwe krötaba ja ken Jesu trökri, käkwe dän Jesubtä nuabtaba tiebe köräbtä, <sup>21</sup> ñobtä ñan angwane rababa töbige krörö: Tikwe dän körä aibe nuadrebtä Jesubtä angwane, ti rabadreta kuinta, nibi ruen tie, rababa nütüre kore, aisetet dän nuabtaba kwe Jesubtä. <sup>22</sup> Meri ye käkwe dän nuabtaba Jesubtä angwane, Jesu rikwitataeba ja jiebti, käkwe niara tuaba ja käne, bti nieba krörö kwe ie:

Ti mräkä, makwe tödiri kwatibe tibti, köböire ma nibirate kuinta, aisetet makwe kä ngwian nuäre jabtä, nieba Jesukwe ie.

Ye btäräbe meri ye rababata kuin batibe.

<sup>23</sup> Yebti Jesu rikaba janknu mentokwäre nebe ni ji dokwätte ye gwiriete angwane, nitre nörä jükaka dobo mikakrä ye namanina biare nörä jüke dobobti, btä Jesu okwä rababa. Erere nitre mürü ngwükä müaikä nämane ngetrekä krikri be, btä Jesu rababa. <sup>24</sup> Angwane Jesukwe nieba ietre:

Ngäbäkre merire noko küre ñakare, akwa tä kibien, aisetet mun nän jökrä mento nete, nieba kwe ietre.

\* <sup>9:17</sup> Kukwe diribare Jesukwe abko dän bren amne chibo kwata btin kwrere. Erere arato, kukwe diribare mekera abko dän ngututu amne chibo kwata ngututu kwrere, aisetet nitre ja töitikaka Jesube nin rabadre Jesu kukwei mike täte gware kukwe diribare mekera ye ben, ñobtä ñan angwane kukwe diribare Jesukwe abko bä jene kukwe mdakrä aisetet.

Abtä nitre ye rababa Jesu kötaire jökrä mda. <sup>25</sup> Akwa Jesukwe juantariba jökrä mento, bti Jesu rikaba nebe gwi, käkwe mürü ngwákä ye kaba küdebtì angwane, ngäbäkre merire ye rükabata krö batibe. <sup>26</sup> Kukwe rakakaba kore ye abko kädrie rikaba batibe jökrä kä ngrabare temen Galileate.

*Ni nibu ie kä tuen ñakare abko Jesukwe mikaninta kuinta*

<sup>27</sup> Ni ji dokwäte gwiriete Jesu näma, yebti rikabata angwane, ni nibu ie kä tuen ñakare abko rikaba ngwänenkä kri krörö Jesu jiebti:

Jrei David tukwe mräkä, nun ngwen ruentari tare jael! rikaba niere Jesu jiebti. <sup>28</sup> Yebti Jesu rikaba gwä angwane, nitre nibu ie kä tuen ñakare ye käkwe krötoba Jesu ken angwane, Jesukwe nieba ietre:

¿Ti di tärä mun okwä mikakräta kuinta ye abko era munkrä amne yebti munta tödeke ya? nieba Jesukwe ietre.

Niaratre käkwe nieba mda:

Jänri nun Dänkien! nieba kwetre Jesuye.

<sup>29</sup> Angwane Jesukwe kise mikaba niaratre okwäbtä, bti nieba kwe mda ietre:

Munta tödeke ño tibti, ye erere raba bare munkrä, nieba Jesukwe.

<sup>30</sup> Ye btäräbe niaratre okwä rababata kuin batibe amne kä rababa tuenta kuin ietre. Yebti Jesukwe mäträba krörö mda btätre:

Tikwe mun okwä mirita kuinta, ye munkwe ñan nie jire chi ni mda mdaye, nieba kwe ietre.

<sup>31</sup> Akwa niaratre nikaninta kire ji ngrabare angwane, Jesukwe mikabata kuinta ño ye tanbare jökrä kwetre kä ngrabare temen Galilea yete.

*Ni kukwe ñakare abko Jesukwe mikani blite*

<sup>32</sup> Nitre nibu ye rikabata kire, ye btäräbe ni mdara jire jataba nüke Jesu känti ni iti kukwe ñakare abko btä üai käme nämane nüne abko rükaba ngwena Jesu känti.

<sup>33</sup> Jesukwe üai käme juantariba mento ni yebtä, ye btäräbe rababa blite kuin angwane, ni näma kwati yete abko ñan töi rababa krütare mda, kä rababa niere krörö:

Kukwe nibi nakenkä ni okwäbti noko kwrere ni ngämi tuen jire chi batí kä Israelite nete, rababa niere kore.

<sup>34</sup> Akwa nitre bariseo abko rababa niere krörö:

Üai käme dänkien kri ara jire käkwe ja di bini ie, ye mden diebti abko üai käme junintari mento kwe ye, rababa niere kore Jesubtä.

*Sribikä ñakare bökan Ngöbökrä*

<sup>35</sup> Yebti sinagoga näma juta krikrite amne juta kiakiate Galilea, käntikänti Jesu rikaba dikekä kwärkwärä dirikäre mda. Ngöbö jatanina nüke gobrane nibti abko kukwe kuin btä Jesu näma dirire angwane, ni bren bätäkä ngwarbe kisete nämane ja tare nike abko Jesu rababa miketa kuinta. <sup>36</sup> Akwa ni nämane kwati dikaro rababa tuen Jesuye angwane, nitre ye rababa ruentari tare kri Jesuye, ñobtä ñan angwane obeja ngibiaka ñakare abko jändrän krübäte tä nike bäri amne di ñakare ja ngibiakrä rüe ngäniene, aibe kisete tä nebe dräre, ye kwrere jire nitre ye rababa tuen Jesuye. <sup>37</sup> Abtä nun ja töitikaka ben, ie nieba krörö kwe:

Nura nena biare kabre ötadre, ye kwrere ni kwati tä juto biare ngwiandre Ngöböye, akwa sribikä ñakare bökan, <sup>38</sup> aisetse sribi Bkänkä Ngöbö käkwe sribikä mda mda juandre jötrö sribire abko munkwe ribe ie, nieba Jesukwe nunye.

Bäri käne abko Simón (Simón ne arabe kädian nämane Pedro arato)  
amne Andrés. Andrés ne abko Simón etba,  
Santiago amne etba kwe Juan.

Niaratre nibu ne abko Zebedeo ngobo.

<sup>3</sup> Felipe amne Bartolomé; Tomás amne ti Mateo.

Ti ne mden nämane jändrän ütiä kärere gobran romanobokrä.

Santiago (Santiago ne abko Alfeo ngobo) amne Lebeo. Lebeo ne arabe kädian nämane Tadeo arato.

<sup>4</sup> Simón cananista amne mrä abko Judas Iscariote. Judas ne mden käkwe Jesu kitani ngise rüeye mrä.

<sup>5</sup> Jesukwe nun ni jätäbti nibu juanba dirire angwane, nun töi tikaba krörö kwe:

Nitre ñakare israelita tä nüne, ye käntikänti mun ñan rika. Erere arato, nitre Samariabó tä nüne, ye käntikänti mun ñan rika. <sup>6</sup> Akwa nitre israelita tä nianinte obeja kwrerekwrere, ye ara jire känti mun rika, <sup>7</sup> käkwe diri krörö ietre: Ngöbö kebera nüke gobrane nibti, munkwe nie ietre. <sup>8</sup> Amne ni bren bren abko munkwe mikata kuinta. Erere arato, ni krütanikrütani abko munkwe mikata nire amne, ni ngüütüete ngrabare lebra kisete abko munkwe mikata kuinta amne nire nire btä ñuai kämekäme tä nüne abko munkwe juantari mento btätre. Mdakäre abko, tikwe ja di bini munye sribi ne nuenkrä, ye abko tikwe bini ngwarbe munye, aisetekwe sribi ne nuen angwane, munkwe ñan ütiä kärä arato.

<sup>9</sup> Mdakäre abko mun rika angwane, mun ñan rika ngwian orore, platare amne cobrere ngwena jire chi jae. <sup>10</sup> Ye kwrere arato, mun ñan rika mrö ngwena droare jae amne, mun rika dän jabtäbe te amne mun ñan rika dän mdara jire ngwena kitadre jabtä. Erere arato, mun ñan rika sandalia mda mda ngwena jae amne mun ñan rika mökän mda ngwena biare jae, ñobtä ñan angwane ni sribikä mun kwrere abko nitre mun kukwei kaka ngäbti abko käkwe bukadre aisetekwe.

<sup>11</sup> Mdakäre abko, mun rika nebe juta krite ya o juta chite, ye känti nire tä biare mun kaen ngäbti töi kuinbti abko munkwe känä iti. Ye känti mun raba nünentbe. Munkwe nünantbe niara ye aibe gwiriete abti mun rika ta. <sup>12</sup> Akwa mun rika nebe gwi angwane, ni nünanka gwi ye ie munkwe köbö ngwiantari jáme amne, <sup>13</sup> nitre nünanka ju yete, ie munkwe köbö ngwianditari, ye abko kadre ngäbti kwetre ne ngwane rabadi nünentbe jáme yete, akwa ñan kadre ngäbti kwetre ne ngwane, munkwe ñan ja kukwe gadrete ngwarbe arato. <sup>14</sup> Erere arato, nane ju mdente mun rika nebe amne juta mdente mun rika nebe, ye känti nire nire ñan tö raba mun kain ngäbti ja gwiriete amne ñan tö raba mun kukwei tibtä mikai era ne ngwane, munkwe kä mikaka jirekäbe ju o juta yete, käkwe dobro mnü ngrükate ja ngotobtä, niaratre ngite au Ngöbö ngwärekri bää mikakäre ietre. <sup>15</sup> Ni yebtä ti bike kukwe era erere niere munye abko krörö: Ngöböökwe kukwe ükadite ni jökrä kräke, ye näire abko Ngöböökwe nitre ye mikadi ja tare nike bäri kri krübäte. Ngöböökwe nitre juta Sodomabo amne nitre Gomorrabo mikani ja tare nike, yebti ta Ngöböökwe niaratre mikadi ja tare nike abko ti bike niere era metre kore munye, nieba Jesukwe nunye.

### *Nitre ja tötitaka Jesube käkwe ja tare nikadi Jesu dokwäre*

<sup>16</sup> Yebti Jesukwe nieba mda nunye:

¡Olo ketete ti kukweiye munkwe! Ni mda mda abko krübäte lobo kwrere abko ngätäite titä mun juen obeja kwrere, akwa tbi tä juto biare mokrere jabti, ye kwrere munkwe dikaka mokrere kwärä jabti, akwa munkwe dikaka jáme ütiä jáme ye kwrere arato.

<sup>17</sup> Munkwe ñan dikaka okwä kware, ñobtä ñan angwane nitre krikri tä ji dokwätä jutate jutate, ye ie mun kitadi ngise amne niaratre käkwe mun ngö tikakamna sinagogate yete.

<sup>18</sup> Mdakäre abko, tödekabtä tibti mun jänäin ngite gobran ngwärekri amne jrei ngwärekri amne ye känti munkwe blitadre tibtä nitre ñakare israelitare ngwärekri, abkokäre mun jänäin ngite yete. <sup>19-20</sup> Akwa nitre kukwe ükatekä, ngwärekri mun järika ngite angwane, munkwe blitadre ño jakrä amne munkwe dre niedre, yebtä munkwe ñan töbika dikaro,

ñobtä ñan angwane mun järabara ja ngwärekri yete angwane, ñan munkwe blitadi kaibe au jakrä akwa, Ngöbö mun Rün abko Üai kwe ara jire käkwe kukwe biandi munye ja kwetakrä jakrä amne blitadi kwe mun köböire munkrä.

<sup>21</sup> Mdakäre abko, nitre tödekaka tibti abko etba kwekwe tödeke ñakare tibti abko käkwe kitadi ngise müre ketadre amne ngäbäkre tödekaka tibti abko rün kwe amnemeye kwe käkwe kitadi ngise müre ketadre arato. Erere arato, ngäbäkre rün amnemeye tödekaka tibti ye abko ngobo kwekwe tödekaka ñakare tibti rikwitadi rüere, käkwe kitadi ngise müre ketadre. Ne abko rabadi nakenkä kore nitre tödekaka tibti btä. <sup>22</sup> Angwane, ni kwati mätä rabadi munbtä tödekabtä tibti, akwa nire nire käkwe nünandikä dite jabtä, käkwe ñan ti rükandrete abti krütadre, ni ye abko Ngöböökwe dianditari. <sup>23</sup> Ne aisetetuta te mun raba, ye känti mun rüe raba näin kisere mun jiebti mun mikakäre ja tare nike tödekabtä tibti ne ngwane, mun gitia juta mdate. Mun ngämi dikekä juta kwatirekwatire te kä ngrabare temen kä Israelite, ye känenkri ti Ni Kä Nebtä Ngobo abko jatadita ne abko ti tö nibi niei metre kore munye.

### *Ñan ni mda jürä ngwiandre jabtä*

<sup>24</sup> Mdakäre abko, ni ja tötitaka ye abko ñakare bari ütiäte ni dirikä ye kräke amne ni klabore ye ñakare bari ütiäte bkänkä kwe ye kräke. <sup>25</sup> Ne aisetetni dirikä ti kwrere käkwe ja tare nikadre ño, ye kwrere ni ja tötitaka ben tädre juto biare ja tare nike. Erere arato, sribi bkänkä käkwe ja tare nikadre ño, ye kwrere ni klabore kwe tädre juto biare ja tare nike sribi bkänkä ye kwrere. <sup>26</sup> Ti abko ju dänkien kwrere akwa ti abko Beelzebú\* ara nieta tibtä mtare, se mun ti mräkätre ñan kädiandre kore arato ya? Jänri, kädiandre jökrä kore ni mdakwe, nieba Jesukwe.

### *Ñan kä jürä ngwiandre blite Jesubtä*

(Lucas 12.2-7)

<sup>26</sup> Yebti Jesukwe nieba krörö mda nunye:

Ni kwati rabadi mun rüere tikwe nini munye, akwa munkwe ñan ni mda mda ye jürä ngwian jabtä, ñobtä ñan angwane jäandrän nuenta kaibe tiebe ye abko ñan tä nebe kärekäre tiebe. Erere arato, jäandrän rükaninte kaibe, ye abko ñan tä nebe rükaninte kärekäre, <sup>27</sup> aisetet tita kukwe niere kaibe kä ikote kwrere munye, ye abko mun rika kädriere ni jökrä ngwärekri kä ngwenbti amne, blitata tiebetiebe ni olote, kwrere jire tita blite munbe, ye abko mun rika niere jubti käin amne munkwe ngrate krikri kukwe nuadre ni mda mdaye. <sup>28</sup> Mdakäre abko, ni mda raba mun ngrabare aibe kämike, akwa ñan raba mun üai mike ja tare nike kärekäre, aisetet munkwe ñan ni mda jürä ngwian jabtä; akwa Ngöbö abko raba mun üai kite mun ngrabare ye ben ngöi kä ja tare nikakrä känti, Ngöbö ye aibe abko jürä ngwian jabtä munkwe.

<sup>29</sup> Ye abko, nukwä kiakia rürümointa kubu abko ütiä bianta bari brai, aisetet ngwian bianta mnamube ütiäre, akwa Ngöböta nukwä ye tarere, aisetet mun Rün kä käinbti ñan töta nebe nukwä ye tuaimetre ngataen angwane, ñan tä ngataen jire chi kwati kä nebtä. <sup>30</sup> Amne mun ara jire abko dokwä driuen kratirekratire abko tä gare jökrä Ngöböye, <sup>31</sup> aisetet Ngöbökrä mun abko bari ütiäte kri nukwä kabre kabre bti ta, aisetet mun raba ja tare nike angwane, munkwe ñan kä jürä ngwian jabtä.

### *Nikwe ñan Jesu rükandrete*

(Lucas 12.8-9)

<sup>32</sup> Mdakäre abko, nire nire tä nekete tibe abko niedre metre kwe ni mda mda ngwärekri, ni ye abko jen tikwe abko tikwe niedi arato Ngöbö ti Rün ngwärekri kä käinbti sete. <sup>33</sup> Akwa nire nire käkwe ti rükandrete ni mda mda ngwärekri, ni ye abko gare ñakare tie abko tikwe niedi Ngöbö ti Rün ngwärekri kä käinbti sete arato.

### *Ni kwati rabadi rüre jabe kwärikwäri Jesu dokwäre*

(Lucas 12.51-53; 14.26-27)

\* 10:25 Beelzebú. Nitre israelita nämane Satana käden Beelzebú arato, aisetet Beelzebú abko Satana ara.

<sup>34</sup> Erere arato, ti jatani kä nebtä, ye abko ñan ti jatani ni jökrä mikakäre nüne jäme jabe kwärikwäri abko munkwe nütü; akwa ti jatani abtä ni kwati tädi rüre jabe kwärikväri.

<sup>35</sup> Ne aisetet i dokwäre ngäbäkre rikwitaita rün kwe rüere amne ti dokwäre ngäbäkre merire rikwitaita meye kwe rüere. Erere arato, bosi rikwitaita bie rüere arato. <sup>36</sup> Ne aisetet nitre ja mräkäre gwi arabe rikwitadita ja rüere kwärikväri ti dokwäre, ñobtä ñan angwane ruäre abko rabadi tödeke tibti, ruäre ñakare.

<sup>37</sup> Mdakäre abko, nire nire käta rün amne meye tarere bari tikrä, ni ye abko ñan rabadre jire chi tikwe. Erere arato, nire nire käta ngobo amne ngänkän tarere bari tikrä, ni ye abko ñan rabadre jire chi tikwe. <sup>38</sup> Erere arato, ni kämikata niken krusobtä angwane, nita niken kruso doboko ngwena au jakrä, ye kwrere nire nire käkwe ñan kötä mikadre au jakrä ja tare nikakäre tikrä amne krütakäre tikrä ne ngwane, ni ye ñan rabadre jire chi tikwe. <sup>39</sup> Ne aisetet, nire nire ie ja kwata rabadi ruuentari tare, käkwe ja ngibiadi au nünakäre nuäre kä nebtä, ni ye abko käkwe ñan nünandi kärekäre Ngöböbe; akwa nire nire ie ja kwata rabadi ruuentari tare ñakare ja tare nikakäre ti dokwäre, ni ye abko käkwe nünandi kärekäre Ngöböbe.

<sup>40</sup> Mdakäre abko, nire nire käkwe mun kadre ngäbti, ni ye abko käta ti ne ara jire kaen ngäbti, ñobtä ñan angwane mun tä näin blite tikrä aisetet. Erere arato, nire nire käkwe ti kadre ngäbti, ni ye abko käta Ngöbö ti juanka kaen ngäbti arato. <sup>41</sup> Erere arato, ni Ngöbö kukwei niekä rükadre angwane, niara abko Ngöbö kukwei niekä abtä nirekwe kadi ngäbti ja gwiriete, ye ütiäre abko ni Ngöbö kukwei niekä ie jäandrän biandre Ngöböökwe, ye kwrere Ngöböökwe biandi arato ni niara kaka ngäbti yeye. Erere arato, ni nüne metre Ngöbö ngwärerekri, ye nire nire käkwe kadre ngäbti ja gwiriete angwane, niara nüne metre abtä tä kaen ngäbti, aisetet ni nüne metre Ngöbö ngwärerekri, ie sribi ütiä biandi Ngöböökwe, ye kwrere biandi kwe arato ni niara kaka ngäbti yeye. <sup>42</sup> Erere arato, nitre bobre bobre tödekaka tibti ne ie nire nire käkwe ñö tibo aibe biandi chi tommpane, akwa ye abko Ngöböökwe ütiä biandi ie abko ti tö nibi niei metre kore munye. Abko kore se, nieba Jesukwe nunye.

## 11

### *Jesukwe blitabare Juan Bautistabä (Lucas 7.18-35)*

<sup>1</sup> Nun ni jätäbti nibu abko töi tikaba ünän jökrä kore Jesukwe, yebti Jesu rikaba Ngöbö kukwei kuin ye dirire amne mike gare kä ngrabare temen kä Galileate. <sup>2</sup> Kä ye ngwane abko Juan Bautista nämane ngite kä teri angwane, Kristo namani sribi kri ñan tuabare nuene kri abko gani kwe. Abtä nitre nänkä Juanbe abko Juankwe juani ruäre nebe Jesu känti. <sup>3</sup> Ye erere bkänä nitre ye nikani, nikani nebe Jesu känti angwane, nieba krörö kwetre Jesuye:

Ma abko ni Dianinkä juandre Ngöböökwe rükadre ni ngätäite niebare, ye erere ma ara nükani ya o nunkwe ni mdara jire ngibiadre abko nun juanba ngwentari mae, nieba kwetre ie.

<sup>4</sup> Angwane Jesukwe nieba mda ietre:

Tita dre dre niere abko kukwei nuri munkwe amne titä dre dre nuene tuata munkwe, ye erere mun näin niereta Juanye. <sup>5</sup> Amne munkwe nie krörö ie arato: Ni okwä kä drünente abko ie kä nibi tuenta kuin amne ni nakwente abko nibi dikekäta kuin kröta. Erere arato, ni bren bren lebra kisete abko kwata nibi nebata kuin jökrä amne ni olo ngidianinte abko ie ni kukwei nibi ruenta kuin. Erere arato, ni krütanikrütani abko nibi nüketa nire amne ni bobre bobre abko ie Ngöbö kukwei kuin mika nibi gare abko munkwe nie Juanye. <sup>6</sup> Erere arato, nire nire käta tödeke tibti amne ti ne ara nükani tä nütüre amne ñan tä trö kwite tie, ni ye abko ie Ngöböökwe ja di biandi amne ni yebtä kä rabadi nuäre tikwe nini abko munkwe nie kore Juanye. Abko kore se, nieba Jesukwe ietre.

<sup>7</sup> Yebti nitre juani Juankwe ye nikaninta angwane, nitre nämane yete ye ben Jesu rikaba blite krörö Juanbtä:

¿Mun nikani ni ño tuakäre kä kaibete? ¿Mikä juankata mürekwe nekwäre sekwäre, ye käta ni töi kwitaka jene jene nekwäre sekwäre bää mike, ni ye kwrere tua nikani munkwe ya? <sup>8</sup> ¿Mun nikani ni kore tuen ñakare ne ngwane, mun nikani ni ño tuakäre? ¿Ni ja ükaninte kuin käkwe dän ütiäte kri kitani jabtä nämane yete abko mun nikani tuen ya? Ñakare, ñobtä ñan angwane ni dän ütiäte kri kitani jabtä, ni ye kwrere abko tä nüne jrei gwiriete amne ñan tä nüne kä kaibete abko garera munye ruen tie. <sup>9</sup> ¿Akwa mun nikani ni ño mike ñäräre metre kä kaibete? ¿Mun nikani ni Ngöbö kukwei niekä mike ñäräre ñan ñan? Jänri, mun nikani ni kore mike ñäräre, akwa Juan ye abko bäri Ngöbö kukwei niekä kri abko mun nikani tuen. <sup>10</sup> Juan ye mdenbtä tärä tä tikani krörö Ngöbö Kukweibtä. Ngöböökwe niebare:

Tikwe ja kukwei ngwianka juandi iti ma känenkri.

Niarakwe ni töi mikadi biare ma käne, ji ükateta biare ye kwrere,

*Malaquías 3.1*

abko tä tikani kore Ngöbö Kukweibtä Juanbtä.

<sup>11</sup> Ne aisetet, ti bike kukwe era erere niere munye abko krörö: Ni jökrä därebare kä nebtä, ye ngätäite ni ñakare jire iti abko bäri ütiäte Juan Bautistakrä; akwa nire nire bári bobre, ütiäte ñakare, bti Ngöböta gobrane, ni ye abko bäri ütiäte Juankrä. <sup>12</sup> Juan Bautista nükani, ye ngwane mentokwäre abti kä nüke mtare abko Ngöbö rükadre gobrane nibti abko tä niren mentokwäre Ngöbö di kribti, akwa Ngöböta gobrane nibti ye rüe tärä arato abko töta nebe juain ngwarbe. <sup>13</sup> Mdakäre abko, Ngöbö Kukwei jire jökrä tä blite tibtä, yebti Juan jatani nüke. <sup>14</sup> Ni Ngöbö kukwei niekä kira kädian nämane Elías abko rükadreta nieta Ngöbö Kukweibtä, ye abko Juan ye ara btä tä niere kore abko titä niere munye. Ne abko mun mden mden tö raba ti kukwei mikai era käkwe mika era.

<sup>15</sup> Nire nire käta ti kukwei nuen, ye käkwe ti kukwei ketate ja olote.

<sup>16</sup> Mdakäre abko, mun nünanka kä ne näire abko ti bike bää mike krörö: Kä jändräñ rürümoinkrä jutate, känti ngäbäkre tä nebe täkänintbe temen, käta ñäke krikri mräkä mda mdaye, yebtä ti bike mun bää mike krörö: <sup>17</sup> Ngäbäkre tä niere mräkäye: Nunkwe nörä jüri tä rä mikakrä munye, akwa mun ñan tö nibi tä rä mikai, abtä ka ni moto mikakrä ulire abko nunkwe nini mda, akwa munkwe müaniri ñakare arato abko ngäbäkreta niere. Ye mden kwrere mutta niere Juanbtä amne tibtä, aisetet titä mun bää mike kore. <sup>18</sup> Juan nükani angwane, üai käme tä btä, aisetet ñan tä mröre kri amne ñan tä dö ñaen, mutta niere rüere. <sup>19</sup> Yebti ti, Ni Kä Nebtä Ngobo rükaba mda angwane, ti abko mröre büle krikri amne ti dö ñaen krübäte mutta niere tibtä. Mdakäre abko, ti ja getaka ni diän diän ben amne nitre jändräñ ütiä käräkä gobran romanobokrä tä tuen käme munye abko ben titä ja gete, abtä mutta ñäke ti rüere arato. Ye mdenbtä abko mun ngäbäkre kwrere titä niere, akwa ni nüne töbtä era metre Ngöbö diebti nun kwrere, yebtä abko nun abko ni jen Ngöböökwe era metre abko nuntä bää mike.

### *Jesukwe ñäkäbare nitre israelita rüere (Lucas 10.13-15)*

<sup>20</sup> Yebti juta känti sribi kri ñan tuabare nuenbare kabre Jesukwe, akwa nitre nünanka yete käkwe ja töi kwitaninta ñakare Ngöbö kukwäre, yebtä abko Jesukwe ñäkäba ietre, käkwe nieba krörö:

<sup>21</sup> ¡Aingwaree mun nünanka juta Corazínte amne juta Betsaidate! Mun bobre jakän, ñobtä ñan angwane sribi kri ñan tuabare nuenbare tikwe mun ngätäite, ne kwrere nuendre juta Tiro amne Sidón känti, akräke nitre yete käkwe ja töi kwitadreta Ngöbö kukwäre amne, dän ngutu jüräre kitadre kwetre jabtä amne rabadre täkänintbe ngübrunte ja moto ulire kukwe kämekäme nuenbtä bää mikakrä. <sup>22</sup> Ye mden kisete, Ngöböökwe kukwe ükadite ni jökrä kräke kä mrä angwane, Ngöböökwe mun nünanka juta Corazínte amne juta Betsaidate mikadi ja tare nike bári kri nitre nünanka juta Tirote amne Sidónte ye kräke.

<sup>23</sup> ¿Amne mun nünanka juta Capernaúmte, mun ye abko Ngöböökwe mikadi bári ütiäte, mutta nütüre ya? Ñakare, ñobtä ñan angwane Ngöböökwe mun ye kitadikä kä ja tare nikakrä känti, ñobtä ñan angwane sribi kri ñan tuabare namani bare mun ngätäite nete,

ye kwrere rabadre bare juta Sodamate, akräke juta ye tädre mtare. <sup>24</sup> Ye mden kisete, Ngöböökwe kukwe ükadite ni jökrä kräke kä mrä angwane, Ngöböökwe mun mikadi ja tare nike bäri nitre nünanka juta Sodoma ye kräke abko tita niere metre munye. Abko kore se, niebare Jesukwe.

*Jesu aibe ie Rün gare metre  
(Lucas 10.21-22)*

<sup>25</sup> Yebti Jesukwe blitaba Ngöböbe, käkwe nieba krörö:

Ti Rün, ma abko kä käin amne kä temen Dänkien. Tita ma käkitekä, ñobtä ñan angwane nitre bikaka töbtä krikri abko okwåte makwe kukwe metre makwe ye rükaninte, akwa ni bobre bobre töi ñakare ñakare ruen ie abko ietre makwe mikani gare, <sup>26</sup> ma tö namani ño, erere makwe nuenbare. Yebtä tita ma käkitekä, nieba Jesukwe Rün Ngöböye.

<sup>27</sup> Yebti nitre näma Jesu kukwe nuen, ye ie Jesukwe nieba mda:

Ti Rün käkwe jäandrän jökrä mikani gare tie. Niara aibe ie ti gare. Erere arato, ti Rün gare ñakare ni mda mdaye, akwa ti niara Odei ne aibe ie niara gare amne ti tö rabare mikai gare nireye, ye erere ie rabadi gare. <sup>28</sup> Mun mden mden dräre amne tribe doboko mun kötörä, mun ye abko jakwe jökrä tie amne tikwe mun mikadi jadüke. <sup>29</sup> Amne kri oto mäkäta nbi dokwäbtä tä nikken ngwena, ye kwrere ti bike sribi tikwe bien ngwiandre munye, ye abko munkwe ka ngäbti abti munkwe ja töitika tibe, ñobtä ñan angwane ti abko moto jáme amne tita bike tidrä ni mda mdabtä, yebtä munkwe ja töitika tibe amne munkwe jadükadi jáme, <sup>30</sup> ñobtä ñan angwane ja töitika tibe ye abko kri oto doboko mäkäta nbi dokwäbtä abko tä nikken ngwena, ye kwrere tita tribe mike mun kötörä ngwiandre munye, ye abko juto amne nuäre ngwiandre. Abko kore se, nieba Jesukwe.

## 12

*Jesu abko bäri ütiäte köbö jadükakrä yebti ta  
(Marcos 2.23-28; Lucas 6.1-5)*

<sup>1</sup> Abti bati Jesu rikaba dikekä nura ngätäite köbö jadükakrä näire mda angwane, nun ja töitikaka ben, ie mrö rababa krübäte. Abtä nun rikaba trigo ngwä ötö ji ngrabare amne nun rikaba kwete. <sup>2</sup> Angwane nitre bariseo näma näin siba nunbe käkwe nun tuaba amne nieba kwetre Jesuye:

Jäandrän ñan nuendre jire chi köbö jadükakrä näire nieta abko nitre ja töitikaka mabe nibi nuene tuen sete, nieba kwetre ie.

<sup>3-4</sup> Abtä Jesukwe nieba mda ietre:

Bati David btä rükä kwekwe ie mrö namani krübäte angwane, kukwe nuenbare krörö kwetre: Ju nuäre ngwiandre känti ban deme nämane mikani Ngöbö ngwärekri, ye känti David nikani gwä, ban diani kwe, bti kwetani kwe rüi muko kwekwe ben. Ban ye abko, David btä nitre nämane ben käkwe ñan kwetadre jire chi, ñobtä ñan angwane nitre blitaka Ngöböbe ni mda mda diäre aibe käkwe kwetadre niebare Ngöböökwe, akwa niaratre käkwe kwetani, akwa namani ngite ñakare. Kukwe yebtä mun tärä ñäke Ngöbö Kukweibtä ruen tie. <sup>5</sup> Erere arato, ju blitakrä Ngöböbe känti nitre blitaka Ngöböbe ni mda mda diäre tä sribire köbö jadükakrä näire, akwa Kukwe Biani Ngöböökwe Moiséye ye käta mike ngite ñakare arato, yebtä abko mun tärä ñäke arato ruen tie. <sup>6</sup> Ye abko, ju blitakrä Ngöböbe abko ütiäte kri, akwa nitre blitaka Ngöböbe ni mda mda diäre ñakare ngite, akwa nita iti nete abko bäri ütiäte ju blitakrä Ngöböbe ye kräke abko ti tö nibi niei munye. <sup>7</sup> Ngöbö Kukwei käta niere krörö ne abko ngämi nüke gare munye. Ngöböökwe niebare:

Munkwe ni mda mda ngwiandre ruentari tare jae, ye abko ie ti tö bäri.

Akwa mun tädre jäandrän bien jirekäbe kukwadre tie, ye abko ie ti ñan tö bäri, *Oseas 6.6* niebare Ngöböökwe. Kukwe ye ngämi nüke gare metre munye ruen tie, ñobtä ñan angwane rabadre gare metre munye, akräke ni ja mike ngite ñakare ye munkwe ñan

kitadre ngise ngwarbe, munta nitre ja tötitkaka tibe kite ngise ye kwrere. <sup>8</sup> Akwa köbö jadükakrä näire yebti ta ti Ni Kä Nebtä Ngobo abko bäri ütiäte, aisetet nitre ja tötitkaka tibe rabadre dre dre nuene köbö jadükakrä näire abko ti di tärä niere ietre. Abko kore se, nieba Jesukwe nitre bariseoye.

*Jesukwe ni mikaninta kuinta köbö jadükakrä näire*  
(Marcos 3.1-6; Lucas 6.6-11)

<sup>9</sup> Yebti Jesukwe kä mikakaba kä ye känti, bti rikaba sinagoga mdate. <sup>10</sup> Sinagoga ye känti Jesu rababa angwane, ni iti küdengrötani kwärä näma yete angwane, nitre bariseo tö rababa Jesu kitai ngise, käkwe nieba ie:

¿Kukwe Biani Ngöbökwe Moiséye tä kä bien nie ni bren miketa kuinta köbö jadükakrä näire ya? nieba kwetre Jesuye.

<sup>11</sup> Angwane Jesukwe nieba mda ietre:

¿Mun mdan kwe obeja tädre krati abko köbö jadükakrä näire betadrekä nguse munkän, ye mun ñan janandre dentari jakrä ya? Jänri, mun janandre dentari jakrä. <sup>12</sup> Ni bäri ütiäte obejakrä, ye mdanbtä abko ni rabadre ni bren miketa kuinta köbö jadükakrä näire abko Kukwe Biani Ngöbökwe Moiséye käta köböi bien nie, nieba Jesukwe nitre bariseoye.

<sup>13</sup> Ye btäräbe Jesukwe nieba ni kisengrötani yeye:

Küde ngököte, nieba kwe ie.

Ye btäräbe ni ye käkwe küde ngökateba angwane, kise rababata kuin jökrä ie, kise kuin kwäräkri ye kwrere kise rababata. <sup>14</sup> Yebtä abko nitre bariseo rikaba ju bäre mda amne Jesu kämikadre ño kwetre abko rikaba kädriere kena jabe kwärikwäri.

*Jesu dianinkä Ngöbökwe*

<sup>15</sup> Nitre bariseo rababa kukwe miketbe kore Jesu rüere, ye gaba Jesukwe angwane, kä mikakaba kwe yete, akwa rikaba angwane, ni rikaba kwati ben. Ye ngwane abko ni bren bren erere Jesu rababa miketa kuinta jökrä. <sup>16</sup> Akwa Jesu käkwe ñan ja kädriemna ni mda mda ngwärekri nitre mikaninta kuinta kwe yeye. <sup>17</sup> Kukwe niebare krörö Ngöbökwe niara kukwei niekä Isaías köböire rabadre bare, abkokäre kukwe rakakaba kore:

<sup>18</sup> Monso tikwe abko tä nete ne tuen.

Tikwe niara ne dianinkä jenena jakrä.

Niara tare kri tikwe amne käi nuäre kri tibtä.

Niara nebtä tikwe ja Üai mikadi nüne amne nitre ñakare israelitare, kräke Ngöböta kukwe miketbe kuin abko mikadi gare kwe ietre.

<sup>19</sup> Erere arato, niarakwe ñan ñäkädi ja dokwäre amne kukwe ñan jaradre ji ngrabare ngrente ja dokwäre.

<sup>20</sup> Nitre bobre bobre tä mikä kroko trekani kwrere, ye abko niarakwe ñan juandi ngwarbe. Erere arato, ñotra jutra mikata krire amne ngübü aibe tä nebe neen krä chi käne, ye kwrere nitre tödekaka krire niarabti tä, ye abko niarakwe ñan di gadrekäta jire chi abti Ngöbö jatadi kukwe ükete metre nikrä ni rüebe.

<sup>21</sup> Amne nitre ñakare israelitare abko käkwe tödekadi niarabti, abko niebare kore Isaákwe abko erere rababa bare Jesubtä.

*Isaías 42.1-4*

*Beelzebú nämane Jesubtä nie namani rüere*  
(Marcos 3.20-30; Lucas 11.14-23; 12.10)

<sup>22</sup> Yebti ni iti ie kä tuen ñakare amne kukwe ñakare arato abko btä üai käme nämane nüne abko järükaba Jesu känti angwane, Jesukwe mikabata kuinta, aisetet kä rababa tuenta ie, rababa blite kuin amne üai käme juantariba mento btä Jesukwe arato. <sup>23</sup> Yebtä abko nitre näma Jesube yete abko ñan töi rababa krütare jökrä Jesubtä, kä rababa niere:

¿David mräkäkri Ngöbökwe ni diandrekä iti abko rükadre niebare, ni ye abko Jesu noko ara ya ño amarebti se? rababa niere.

<sup>24</sup> Akwa kukwe ye jarabare nitre bariseoye angwane, rababa niere krörö Jesu rüere:

Üai käme dänkien kädianta Beelzebú, ye aibe käkwe ja di biani ni nokoye abko diebti tä üai kämekäme juentari mento se, rababa niere Jesu rüere.

<sup>25</sup> Nitre bariseo rababa töbike blo kore Jesu rüere, ye Jesukwe gaba btätre, abtä nieba kwe mda ietre:

Kä mdente erere känti nitre nünanka yete käkwe ja ñäkädrebti ketebu rükäre jabe kwärikwäri, ye ngwane nitre ye tä kä juen ngwarbe au jakän. Erere arato, juta amne ni ja mräkäre nünanka ketetibe käkwe ja ñäkädrebti ketebu rükäre ja rüere kwärikväri, ye ngwane nitre ye ñan rabadre nüne jire chi mda ketetibe, aisetet juta amne ju juandre ngwarbe au jakän kwetre. <sup>26</sup> Ye kwrere arato, Satana ara käkwe ja juandretari mento angwane, Satana ara jire tätre rüre ja rüere ñan ñan. Satana käkwe ja ñäkädrebti ketebu ja rüere kwärikväri au, ye ngwane Satana di tädre kri janknu ya niere tie munkwe. <sup>27</sup> Üai käme dänkien kädianta Beelzebú, diebti tita üai käme juentari mento munta niere tibtä, aisetet nitre reketaka munkri ye abko ie nireta ja di bien üai käme juantarikrä mento abko ti tö nibi ngwaintari munye. Niaratre tä üai käme juentari arato, aisetet munta ñäke blo tibtä abko bä mikata niaratrebtä, aisetet mun kitadre ngise kwetre ruen tie. <sup>28</sup> Akwa tita üai käme juentari mento Ngöbö Üai Deme diebti era metre, ye ngwane Ngöbö nükanina gobrane mun ngätäite abko bä mikata tikwe.

<sup>29</sup> Kukwe nebtä abko ti bike kukwe bärä mike krörö: Satana abko ni dite kwrere. Ni dite tä ju jen kwe ngibiare ni gokä ngäniene angwane, ni dite nünanka gwi ñan mäkärete angwane, ni gokä ñan raba jire iti, kä rabadre jändrän kwe denkä kän. Akwa mäkärete angwane, ni gokä rabadre jändrän kwe denkä jire jökrä kän. Ye kwrere ni ye btä üai käme tä abko ju Satanakwe kwrere. Ti bärä dite Satanakrä aisetet, ti raba üai käme juentari mento nibtä Satanakän, ni gokäta jändrädenkä ni dite kän ye kwrere.

<sup>30</sup> Ye abko nire nire ñan tä nekete tibe, ni ye abko tä rüre ti rüere amne, nire nire ñan tä sribire gware tibe abko tä sribi tikwe metekä jirekäbe tikän. <sup>31</sup> Ne aisetet ti bike niere krörö munye: Ni kä nebtä käkwe ja mikadre ngite ño erere Ngöbö rüere amne ñäkädré taretare kwe Ngöbö rüere, akwa ye Ngöbökwe diandrekä mento btätre; akwa ñäkädré käme taretare kwe Ngöbö Üai Deme ara jire rüere ne ngwane, Ngöbökwe ñan diandrekä jire chi mento btä. <sup>32</sup> Erere arato, ti Ni Kä Nebtä Ngobo, rüere nire nire käkwe ñäkädré taretare, akwa ye abko Ngöbökwe diandikä mento btä; akwa nire nire käkwe ñäkädré käme taretare Ngöbö Üai Deme ara jire rüere ne ngwane, Ngöbökwe ñan kukwe ye diandrekä jire chi mento btä, aisetet rabadi ngite kärekäre Ngöböye kä ne ngwane amne kärekäre rabadi ngite janknu Ngöböye abko ti tö nibi niei munye, nieba Jesukwe.

### *Jesukwe kukwe bärä mikani kri ngwä kuin amne kri ngwä käme btä (Lucas 6.43-45)*

<sup>33</sup> Yebti Jesukwe niaratre kukwei bärä mikani kri ngwä kwrere, käkwe nieba mda ietre: Kri kuin aibe ngwäta nebe kuin amne kri käme aibe ngwäta nebe käme arato, aisetet kri ngwä ño yebtä abko kri mden kuin amne mden käme abko tä nüke gare nie. <sup>34</sup> Mun abko tbi krübäte kwrere jire, aisetet mun moto amne mun töi kämekäme, ye abko munkwe kukwe kuin niedre ño se. Ni moto ño amne ni töi ño, ye kwrere nita blite. <sup>35</sup> Ne aisetet ni moto kuin ne ngwane, nita blite kuin ni mda mda die mikakrä, akwa ni moto käme ne ngwane nita blite ngwarbe diän diän jirekäbe, ye abko ñan tä ni mda mda die mike, ñobtä ñan angwane niara abko töi käme, yebe tä nüne. <sup>36</sup> Akwa ti bike kukwe era erere niere munye abko krörö: Kä mrä angwane, Ngöbö jatadi kukwe ükete ni jökrä kräke angwane, ñobtä munkwe kukwe diän diän niebare ngwarbe ye abko mikadi gare jökrä Ngöbö ngwärekri. <sup>37</sup> Ne aisetet mun kukwei jen munkwe ye ara jire köböire mun ngite ñakare, niedi Ngöbökwe munye o, mun ngite, niedi kwe munye arato. Abko kore se, niebare Jesukwe nitre bariseoye.

### *Sribi kri ñan tuabare käräbare Jesuye (Marcos 8.12; Lucas 11.29-32)*

<sup>38</sup> Yebtä abko nitre bariseo amne Kukwe Biani Ngöböökwe Moiséye dirikätre kákwe nieba mda Jesuye:

Dirikä, Ngöböökwe ma juani bkänä ya, ñakare ya abko nun tö nibi gai metre, aisetet sribi kri ñan tuabare nuene jötrö nun okwätbi tuadre nunye nete, nieba kwetre Jesuye.

<sup>39</sup> Abtä Jesukwe nieba mda ietre:

Mun nünanka kä ne ngwane abko moto kämekäme amne munta Ngöbö tarere munta niere, akwa käre munta niara tuemetre, abtä tikwe sribi kri ñan tuabare aibe nuendre mun okwätbi, ie mun töta nebe, akwa sribi kri ñan tuabare ye tikwe ñan nuendre jire chi mun okwätbi, munta ribere ye kwrere. Akwa Ngöbö nämane Jonábe, kákwe sribi kri ñan tuabare nuenbare Jonákrä, ye kwrere aibe Ngöböökwe bää mikadi mun kräke. <sup>40</sup> Jonás kákwe nünabare köbömä dibire rare gwa kri teri, ye kwrere arato ti, Ni Kä Nebtä Ngobo ne rabadi köbömä dibire rare dobote nguse. <sup>41</sup> Ngöböökwe kukwe ükadite ni jökrä kräke kä mrä angwane, nitre nünanka kira juta Nínivete abko kákwe mun nünanka mtare ye kitadi ngise, ñobtä ñan angwane Jonás nikani Ngöbö kukwei niere nitre Níniveboye angwane, niaratre kákwe Ngöbö kukwei mikani täte amne kukwe kämekäme kitani jökrä temen kwetre Jonás kukwei köböire. Akwa tita nete mtare abko bäri ütiäte kri Jonákrä amne mun ñan tö ti kukwei mikai era jae, aisetet rakadikä kore munbtä. <sup>42</sup> Erere arato, Ngöböökwe kukwe ükadite ni jökrä kräke kä mrä angwane, jreina nünanka mobe mötarikri\* nükani kira basare jrei Salomónye ye kákwe mun kitadi ngise arato, ñobtä ñan angwane Salomón nämane kukwe töbtä töbtä niere, ye jreina mobe jatani kukwe nuen jakrä, akwa tita nete abko bäri ütiäte kri Salomónkrä abko mun ñan tö ti kukwei nuai, aisetet rakadikä kore munbtä, nieba Jesukwe.

*Üai käme tä niken mento, bti tä nüketa nibtä*

(Lucas 11.24-26)

<sup>43</sup> Yebtä Jesukwe nieba:

Mdakäre abko, ni iti btä üai käme tädre nüne, abti üai käme ye juandretari mento btä, üai käme rikadre ngwarbe kwäräkwärä kä känene jadükakrä jae kä kaibete, akwa kä ñan kwandre jire chi ie jadükakrä. <sup>44</sup> Abtä rabadre töbige krörö: Ni nämane ju kwrere tikwe abko te ti nämane nüne, ye känti ti bike nikenta, üai käme rabadre nütüre. Ye erere bkänä, üai käme ye rikadreta ni ye känti, rabadreta yete angwane kä sökaninkä merebe gwita temen amne kä üikaninte kuin gwita, akwa kä tökare, ni ñakare nüne gwi, kwrere jire ni ye kwandre üai kämeye. <sup>45</sup> Angwane jötrö ngwarbe üai käme ye rikadre betekä, kákwe üai bäri kämekäme niarakrä känändre krä kükü mda ja mukore, bti rikadre nünenta jökrä ni yebtä. Üai käme ye rabadrera nünenta kore ni yebtä angwane, ni ye rabadre ja tare nike bäri krübäte mda üai käme kisete, ye kwrere rakadikä mun nünanka kä ne ngwane yebtä. Abko kore se, nieba Jesukwe.

*Nire abko Jesu mräkä era metre*

(Marcos 3.31-35; Lucas 8.19-21)

<sup>46</sup> Jesu näma blite kore angwane, niara meye btä etbakantre rükaba jiebti abko tö rababa blitai ben, akwa niara meye btä etbakantre rababa ju bäre, <sup>47</sup> aisetet ni iti kákwe nieba Jesuye:

Ma meye amne ma etbakantre tä ju bäre nokote abko tö nibi blitai mabe, nieba kwe ie.

<sup>48</sup> Abtä Jesukwe nieba mda ni yeye:

¿Nire abko ütiäte tikrä ti meye kwrere amne nire abko ütiäte tikrä ti etbakantre kwrere amarebti ye? nieba kwe.

<sup>49</sup> Bti nitre ja tötitaka ben näma yete, yebtä kise kitaba kwe, kákwe nieba mda:

Nire nire ütiäte ti meye tikwe kwrere amne ti etbakantre kwrere era metre abko erere tä nete ne, <sup>50</sup> ñobtä ñan angwane ti Rün kä käinbtí ye nire nire käta kukwei mike täte, ni ye abko ti etba tikwe, ti ngwai tikwe amne ti meye tikwe. Abko kore se, nieba Jesukwe.

\* <sup>12:42</sup> Jreina nünanka mobe mötarikri. Jreina ne abko nämane gobrane kä kädian nämane Saba känti. Kukweta tikani btä 1 Reyes 10.1-13 yebtä.

## 13

*Dobo ketabkä, btä Jesukwe kukwe bä mikani  
(Marcos 4.1-9; Lucas 8.4-8)*

<sup>1</sup> Abti Jesu rikaba ju bäre angwane, rikaba ñö Okwä Kri Galilea, känti rababa täkänintbe ñö okwä köräbti. <sup>2</sup> Ye ngwane abko, ni kwati käkwe ja ükakröba niara kukwei nuakäre. Abtä Jesu rankwaba rute, rababa täkänintbe amne, nitre käkwe ja ükakröba kwati btä ye abko rababa jökrä ñö köräbäre jateta temen. <sup>3</sup> Angwane Jesukwe kukwe keta kabre bärä mikaba dirikäre ietre, käkwe nieba krörö:

Bati ni nikani iti nura metekä. <sup>4</sup> Nura metaninkä kwe angwane nura ruäre nikani mate ji ngrabare temen, ye abko nukwä jatani, käkwe kwetani jökrä kän. <sup>5</sup> Nura ruäre abko nikani mate jäkwatabti temen, ye känti abko dobo ñakare böökän, aisetet nura ye nükani mure jötrö, akwa dobo ñakare mente nguse, <sup>6</sup> bti ñänä jatani ngire, käkwe nura mu ye kukwani jökrä amne ngätri ñakare arato, aisetet ngrötäninkä jökrä. <sup>7</sup> Nura ruäre abko nikani mate kökrä tukwätetukwätte ngätäite, ye abko nükani mure arato, akwa kökrä ye abko rirabare bärä jötrö nura mu yebti ta, käkwe kämikani. <sup>8</sup> Akwa nura ruäre abko nikani mate dobo kuinte, ye abko nükani mure amne, rirabare tuärebe amne ngwä namani kabrekabre btä. Datire datire ngwä namani gre ketarike, ruäre abko ngwä namani gre ketamä amne ruäre abko ngwä namani gre bti krä jätä btä. Ne abko nakaninkä kore. <sup>9</sup> Nire nire käta ti kukwei nuen, ye abko olo tärä ne ngwane, ti kukwei ne ketate ja olote kwe, kukwe ne rükadre gare kuin munye abkokäre, nieba Jesukwe ni kwati yeye.

*Ñobtä Jesukwe kukwe bärä mikani  
(Marcos 4.10-12; Lucas 8.9-10)*

<sup>10</sup> Angwane nun ja tötitakaka Jesube käkwe krötaba ja ken ben, käkwe nieba krörö ie: Ñobtä mata kukwe bärä mike bti mata dirire nitre seye, nunkwe nieba Jesuye.

<sup>11</sup> Abtä Jesukwe nieba mda nunye:

Ngöbö rükadre gobrane ño nibti abko tä tiebe, akwa Ngöböta mike gare munye, akwa nitre se abko ie Ngöböta mike gare ñakare, aisetet titi dirire kore. <sup>12</sup> Mdakäre abko, nire nire ie Ngöbö Kukwei nüke gare, ye abko ie Ngöböökwe ja kukwei biandi bärä mda amne Ngöbö Kukwei rabadi gare bärä kabre mda ie; akwa nire nire ie Ngöbö Kukwei gare ñakare, ye abko ie Ngöbö Kukwei gare kiakia abko Ngöböökwe diandikä jökrä kän. <sup>13</sup> Ye mden kisete, titi kukwe bärä mike btä titi dirire nitre seye, ñobtä ñan angwane nitre se ie kä tuen kuin kwrere, akwa titi sribi nuene okwäbti abko tuen ñakare ietre. Erere arato, ni kukwei ruen kuin ietre kwrere, akwa titi blite abko ñan tä nebe nüke gare ietre.

<sup>14</sup> Kukweta nakenkä kore nitre sebtä mtare angwane, kukwe niebare ni Ngöbö kukwei niekä Isaíakwe abko tä neme bare abko krörö:

Munkwe ti kukwei nuadi blite bärä, akwa titi dre niere ñan rükadi gare munye.

Erere arato, titi sribi nuene mun okwäbti, ye abko munkwe tuadi bärä, akwa drekäre titi sribi ye nuene abko ñan jatadre munye, <sup>15</sup> ñobtä ñan angwane nitre noko käkwe ja dokwä mikanina ribi ti kukwei kräke, aisetet ñan tö namani sribi tikwe tuai.

Erere arato, ñan tö namani ti kukwei nuai, käkwe ja olo gu dikani ti kukwei ngäniene amne, ñan tö namani sribi tikwe tuai, abkokäre ja okwä jue mikani kwetre.

Mdakäre abko, ti kukwei ñan rükadre gare ietre amne tikwe ñan diandretari, abkokäre nuenbare kore kwetre,

*Isaías 6.9-10*

niebare Isaíakwe. <sup>16</sup> Akwa mun abko btä kä rabadre nuäre, ñobtä ñan angwane mun abko okwä tärä sribi tikwe tuakäre amne mun olo tärä ti kukwei nuakäre, ye abko käi rabadre nuäre munbtä. <sup>17</sup> Ne aisetet ti bike kukwe era erere niere munye abko krörö: Sribi tikwe tuata ja okwä jenbti munkwe amne ti kukwei nuata ja olo jenbti munkwe, ye abko nitre Ngöbö kukwei niekä kwati nünanka kira amne nitre nünanka metre Ngöbö ngwärekkri kwati abko tö namani tuai amne tö namani kukwei nuai, akwa erere tuani ñakare kwetre amne kukwe nuani ñakare kwetre kira, nieba Jesukwe nunye.

*Dobo ketabkä tä dre niere abko nere  
(Marcos 4.13-20; Lucas 8.9-15)*

**18** Jesukwe nieba mda:

Mdakäre abko, ni nura metakaka, btä tikwe kukwe bä miri ye abko tä dre niere metre abko kukwe nuen munkwe. **19** Ngöbö kite gobrane ni ngätäite, ye abko nire nire käta kukwe nuen, akwa ñan tä nüke gare ie, ni ye abko nura nikani mate ji ngrabare ye kwrere, ñobtä ñan angwane Ngöbö Kukwei tä nebe nura kwrere btä, akwa diablu tä kite, käta Ngöbö Kukwei ye denkä jökrä töite, mden nini tikwe ye. **20** Amne ni ruäre abko käta Ngöbö Kukwei nuen, ye btäräbe käta nebe nuäre btä kare ngäbti, ni ye abko nura nikani mate jäkwatabti ye kwrere, **21** ñobtä ñan angwane nura nikani mate jäkwatabti abko ngätri ñan nämane bökän, ye kwrere jire ni ruäre tä Ngöbö Kukwei kaen ngäbti, bti bä jötrö tä näin Ngöböbe, akwa tädre niken ja tare nike tödektä Ngöböbt, ye btäräbe tä Ngöbö Kukwei kiteta temen, bti tä nikenta ja jiebti. **22** Amne ni ruäre abko tä Ngöbö Kukwei nuen, akwa tä nakwen bari jändrän kä nebtä jiebti, erere tä ja töi mike bari sribi kä nebtä jiebti amne tä ngwian tarere bari, ye abko käta ngökö. Ne aise te ni ye abko nura nikani mate kökrä tukwätekuwate ngätäite amne ngatani, ye tä nakenkä ni yebtä, aise te nura ngatani ngwä namani ñakare, ye kwrere jire ni ye tä sribi nuene ñakare Ngöbökrä. **23** Akwa ni ruäre tä Ngöbö Kukwei nuen amne tä nüke gare ie, käta niken sribi kuinkuin nuene bätäkä ngwarbe Ngöbökrä, ye abko nura nikani mate dobo kuinte abko rirabare kuin amne ngwä kuinkuin namani gre ketarike, ruäre gre ketamä, ruäre abko gre bti krä jätä, kwrere jire ni ye tä sribi nuene Ngöbökrä abko kukwe kore bä miri tikwe ye, nieba Jesukwe nunye.

### *Jesukwe kukwe bä mikani trigo amne nura kämenbtä*

**24** Yebti ni jen Ngöbökwre rabadre nüne ni kämekäme ngätäite abti kä mrä angwane Ngöbökwre mikadi nüne jenena jabe, ye bä mikakäre Jesukwe nieba krörö ni kwati ye:ye

Ngöböta kite gobrane nibti ye rüere abko kukweta niken nakenkä, ne kwrere ti bike niere munye: Bati ni iti käkwe trigo nurai kuin metaninkä tirete jakrä, **25** akwa ni jökrä nikani kibien angwane, kä bkänkä ye rüe jatani tiebe käkwe nura käme nökani trigo nurai kuin ye ngätäite, bti nikaninta. **26** Yebti trigo rirabare, namani ngwäre angwane, nura käme ye ngwä namani arato abko sribikätre käkwe gani. **27** Angwane sribikätre ye nikani kä bkänkä känti, käkwe niebare ie: Nun dänkien, makwe trigo nurai kuin metaninkä tirete jakrä, ¿se ño känti abko nura käme se namanina tirete mae arato se? niebare kwetre. **28** Abtä kä bkänkä käkwe niebare ietre: Ti rüe nükani iti nura käme metekä tiebe tirete tie kwrere ye, niebare kwe. Angwane sribikätre ye käkwe niebare mda ie: ¿Nun rikadre nura kämekäme se erere jäkekä jökrä, ie ma tö nibi ya? niebare kwetre. **29** Akwa kä bkänkä käkwe niebare mda ietre: Ñakare. Mun ñan rika jäkekä, ñobtä ñan angwane mun rikadre nura mu kämekäme ye jäkekä mtare angwane, trigo mu kuin ye räkädrekä ben gwaire siba. **30** Ne aise te tuadremetre niren ketetibe abko trigo öta näire angwane, tikwe trigo ötaka juandi ye abko käkwe nura kämekäme ye erere ükadikrö käne jenena mento, bti mäkadite jökrä kwetre, käkwe kukwadi ñukwate amne trigo ngwä kuinkuin ye erere abko ötadi kwetre, bti ju nura ngwä ükakrä tikwe, ye känti kitadi gwi kwetre tirkä, niebare kä bkänkäkwe abko nakaninkä kore se, nieba Jesukwe.

### *Jesukwe kukwe bä mikani mostasa nuraibtä amne lebadurabtä (Marcos 4.30-34; Lucas 13.18-21)*

**31** Yebti Jesukwe kukwe mdara jire bä mikaba, käkwe nieba:

Ngöböta kite gobrane nibti ye abko mostasa nurai chi kwrere. Ni iti käkwe mostasa nurai nökani tirete jakrä. **32** Nura jökrä munkwe, ngätäite mostasa nurai ye abko bari kiakia, akwa nökadre tirete angwane, rabadre bari kri nura jökrä bti ta angwane, nukwä jatadre nüne mostasa krie ye küde ngrabare, ye kwrere jire käne Ngöböta kite gobrane ni braibe bti, akwa mrä angwane Ngöbö rabadi gobrane ni kwatibti abko bä mikata nura chi yebtä, nieba Jesukwe.

<sup>33</sup> Erere arato, Jesukwe kukwe mdara jire bā mikaba, Ngöböta gobrane ni braibe bti käne, akwa mrä rabadi gobrane ni kватibti ye bā mikakäre, käkwe nieba krörö:

Ngöböta kite gobrane nibti, ye abko rabadi niren lebadurata niren ye kwrere abko krörö: Meri iti käkwe lebadura kitani chi arina kabre te, bti mritani kwe abti lebadura nikani arina kabre ye ñäre jökrä, nieba Jesukwe.

<sup>34</sup> Jesukwe kukwe bā mikaba jökrä kore, btä blitaba kwe ni kватibe amne niara nämane dirire angwane, käre kukwe bā mikaba kwe, aibebti diriba kwe. <sup>35</sup> Jesukwe diriba kore, yebtä abko ni Ngöbö kukwei niekä kira käkwe kukwe niebare abko erere rababa bare abko krörö:

Tikwe kukwe bā mikadi, bti tikwe blitadi amne, Ngöbökwe kä dätebare kena, abti kä nüke mtare kukwe ruäre nämane kaibe tiebe Ngöbökwe abko tikwe niedi, *Salmos 78.2* abko ni Ngöbö kukwei niekä käkwe niebare kore Jesubtä, ye erere rababa bare.

#### *Kukwe nura kuin amne nura käme ye tä dre niere abko Jesukwe niebare*

<sup>36</sup> Yebti Jesukwe nitre kwati ye mikateba yete, bti rikabata nebata gwi. Angwane nun ja töitikaka ben käkwe krötaba ken, käkwe nieba ie:

Nura mu kämekäme namani tirete makwe nini, ye abko tä dre niere metre abko makwe niedreta nunye abko nun tö nibi ribei mae, nunkwe nieba Jesuye.

<sup>37</sup> Angwane Jesukwe nieba mda nunye:

Ti, Ni Kä Nebtä Ngobo ne abko nura kuin metakaka <sup>38</sup> amne kä temen ne abko tire kwrere. Nire nire bti Ngöböta gobrane ye abko trigo nurai mu kwrere amne nire nire tä nekete diablukri ye abko nura kämekäme mu ye kwrere. <sup>39</sup> Amne ti rüe nura kämekäme metakaka ye abko diablu ara jire amne, kä nura öta näire ye abko kä mrä kä ne näin ta abko bā mikata amne nitre nura ngwā ötaka ötaka abko angeletre Ngöbökwe.

<sup>40</sup> Amne nura kämekäme ötata, bti kitata ñukwätē kukwadre, ye kwrere rakadikä kä mrä angwane, <sup>41</sup> aisetē kä mrä angwane ti Ni Kä Nebtä Ngobo ne käkwe angeletre tikwe juandi angwane, nitre bti Ngöböta gobrane, ye ngätäite nire nire köböite ni mda mda tä ja mike ngite Ngöbö rüere amne nire nire nuenkä kämekäme Ngöbö rüere abko angeletre ye käkwe ükadikrō jökrä, <sup>42</sup> bti ñukwā jutra ngire krübäte te nitre ye kitadi jökrä kwetre. Ye känti abko ni jökrä rabadi ja müaire krikri be amne tu ngöbe rabadi cherere jabtä ja tare nika kisete. <sup>43</sup> Angwane nitre nünanka metre Ngöbö ngwärerekri abko btätre kä rabadi nuäre amne ñänä träta nebe dirare, ye kwrere jire kä rabadi btätre kä nuärete Rün Ngöbö kwe känti. Nire nire käta ti kukwei nuen käkwe kukwe ne ketate ja olote. Abko kore se, nieba Jesukwe nunye.

#### *Jesukwe kukwe bā mikani ngwian kabrebtä amne perlabtä*

<sup>44</sup> Yebti Jesukwe nieba krörö mda:

Kä gobrankrä Ngöbökwe abko ngwian kabre tädre rükaninte dobote nguse ye kwrere abko krörö: Ni iti nämane sribire ye känti ngwian kabre ütiäte kri ye kwani ie angwane, niara käkwe ngwian ye ükaninta käname kä ye känti. Abti nikani, käkwe jändrän kwe erere rürümoinbare jökrä, bti nikani käkwe kä ye kökani jakrä, niara rabadre ngwian kabre ye bkäne abkokäre. <sup>45</sup> Mdakäre abko, ni bti Ngöböta gobrane, ngätäite kukweta nakenkä krörö arato: Ni iti jändrän ütiäte ütiäte rürümoinkä rikai perla kuin\* känen kökadre jae. <sup>46</sup> Erere bkänä, perla kuin ütiäte kri kwani ie angwane, nikani käkwe jändrän kwe erere rürümoinbare jökrä, bti nikani käkwe perla ye kökani jakrä.

#### *Jesukwe kukwe bā mikani kradebtä*

<sup>47</sup> Erere arato, krade kitata ñöte angwane gwa bätäkä ngwarbe tä niken te, ye kwrere ti bike Ngöbö gobrain bā mike abko krörö: <sup>48</sup> Nitre gwa gaka tä krade kite ñöte gwaye. Yebti gwa tärä niken kabre kradete angwane, tädre jake jate ñö köräbti. Tärä nebe ngwena ñö köräbti angwane, tätre niken ükekrö. Gwa kuinkuin erere tätre ükekrö kutiate jakrä amne gwa kämekäme abko erere tätre kitekä. <sup>49</sup> Ye kwrere kukwe rakadikä kä mrä

\* 13:45 perla. Jändrän kädianta perla ye abko jä kwrere amne bari ütiäte kri.

angwane. Angeletre jatadi, kákwe nitre moto kämekäme Ngöbö rüere diandikä jenena nitre nünanka metre Ngöbö ngwärekri ye bäre mento,<sup>50</sup> bti nitre moto kämekäme Ngöbö rüere ye angeletre kákwe kitadi ñukwä jutrate. Ye känti niaratre rabadi ja müaire krikri be amne tu ngö rabadi cherere jabtä ñukwä jutrate ja tare nika kisete. <sup>51</sup> Yebti Jesukwe nieba mda:

*¿Tikwe kukwe nini, ye nü gare jökrä munye ya? nieba kwe nunye.*

Jänri, nunkwe nieba käre.

<sup>52</sup> Angwane Jesukwe nieba krörö mda nunye:

Ngöbota gobrane ño nibti, yebtä Kukwe Biani Ngöbökwe Moiséye dirikätre mden mden tätre ja töitike, ye ngwane ni ju bkänkä ye kwrere jire tätre nebe, ñobtä ñan angwane jändräñ ño ño tä ükani kwetre gwi, ye ngätäite jändräñ mden abko mräre amne mden abko kira diankata kwetre abko tä mike gare ietre, ye kwrere nitre dirikä käta kukwe mräre amne kukwe nakaninkä kira dirire, nieba Jesukwe nunye.

*Jesu mikani ütiäte ñakare ja käite Nazarete*

(Marcos 6.1-6; Lucas 4.16-30)

<sup>53</sup> Jesukwe kukwe bá mikaba jökrä kore, bti blitaba ünän jökrä kwe, bti kä mikakaba kwe kä ye känti amne rikabata ja käite. <sup>54</sup> Rikaba nebata ja käite Nazaret angwane, rikaba dirire sinagogate angwane, ni jökrä ñan töi rababa nebe krütare niara kukwei nuare, kä rababa niere jae kwärikwäri:

*¿Ni noko kákwe ja töitikani mdente amarebti kukwe gare krübäte dikaro ie se? ¿Erere arato, sribi kri ñan tuabare se abko tä nuene ño amarebti tärä nebe bare ie se?* <sup>55</sup> José sribikä kri kukwänbtä abko ngobo kwrere nibi tuen nunye. Erere arato, niara meye abko María amne etbakantre abko Santiago, José, Simón amne Judas ñan ñan. <sup>56</sup> Mdakäre abko, *¿niara se ngwai tätre nüne jökrä ni ngätäite nete ruen tie ya amarebti mtare di kri dikaro se abko kwani mdenkri ie se?* nitre nünanka Jesu käite ye rababa niere Jesubtä.

<sup>57</sup> Amne Jesu kukwei namani tare btätre. Abtä Jesukwe nieba krörö ietre:

Ni Ngöbö kukwei niekä mikata ütiäte kä mda mdabti, akwa ja käite btä mräkä juete abko mikata ütiäte ñakare nieta. Ye kwrere, mun ñan tä ti mike ütiäte jae. Abko kore se, nieba Jesukwe ietre.

<sup>58</sup> Angwane nitre nünanka kä ye känti ñan rababa tödeke Jesubtä. Abtä sribi kri ñan tuabare abko Jesukwe nuenba ñakare kabre kä ye känti.

## 14

*Juan Bautista müre ketani*

(Marcos 6.14-29; Lucas 9.7-9)

<sup>1</sup> Kä ye ngwane abko, Herodes Antipas nämane gobrane kä Galileate angwane, Jesu namani sribi kri ñan tuabare nuene abko gani kwe. <sup>2</sup> Angwane nitre sribikä Herodekrä, ie Herodekwe niebare krörö Jesubtä:

Juan Bautista tikwe kämikamna, ye ara jire Ngöbökwe mikaninta nire, aisetet di tärä sribi kri ñan tuabare nuenkrä ye, niebare kwe sribikäye.

<sup>3-4</sup> Herodes kákwe niebare kore, ñobtä ñan angwane niara etba Felipe nän muko kädian nämane Herodías abko diani kwe kän. Yebtä abko Juan Bautista kákwe niebare Herodeye: Ma etba nän muko se makwe ñan mikadre jire ja ken kän, Juan nämane nire. Ye dokwäre abko Juan Bautista kamna ngite Herodekwe, bti kitamna ngite kä teri kwe, ye nükaninta töre ie, kákwe ñäkäbare kore. <sup>5</sup> Herodes tö namani Juan müre ketani ñäkä dokwäre jae Herodíabtä, akwa ni kwati nämane Juan mike ütiäte jae ni Ngöbö kukwei niekä kwrere, aisetet nitre ye abko jürä namani Herodebtä. Abtä Juan müre ketani ñakare kwe.

<sup>6</sup> Akwa batí Herodes därebare ye köböl erere nükaninta angwane, Herodekwe bieta nuenbare jae kä ngwiankäre nuäre jabtä. Ye erere ni jökrä nükani angwane, Herodías ngäkän batí nikani tärä mike kwäräkwärä se kwrere nitre nübaibare Herodekwe ye okwäbti. Herodías ngäkän namani tärä mike nuäre kwäräkwärä, ye abko käi namani nuäre krübäte Herodebtä, <sup>7</sup> kákwe ja kukwei biani krörö ie:

Ma tö dreye erere makwe kärä tie angwane, tikwe biandi mae, niebare kwe ie.

<sup>8</sup> Angwane Herodías ye abko kákwe ngänkän ye töi diani, aisetē niebare krörö kwe Herodeye:

Makwe Juan Bautista dokwä mikä blatote. Makwe bian tie nete, ie ti tö nibi, niebare kwe Herodeye.

<sup>9</sup> Yebtä abko, Herodes moto namani ulire mda, akwa nitre nübaibare kwe ye okwäßti ja kukwei biani kwe, aisetē ñan tö namani ja kukwei kitaita temen, kákwe Juan dokwä biamna blatote Herodías ngänkänye. <sup>10</sup> Ye erere bkänä, Juan Bautista nämane ngite kä teri abko Herodekwe dokwä tikaninkä, <sup>11</sup> bti Juan dokwä ye mikani blatote, jänikani, biani Herodías ngänkän bati yeye angwane, niara kákwe bianinbe meye Herodíaye mda.

<sup>12</sup> Yebti Juan nämane ngite, ye känti nitre nänkä ben nikani nebe angwane, Juan ngwákä jänikani kwetre, bti doboi mikani kwetre. Abti Juan müre ketanina abko nikani niere Jesuye mda.

### *Jesukwe ni mili krärike bukaní*

(Marcos 6.30-44; Lucas 9.10-17; Juan 6.1-15)

<sup>13</sup> Juan Bautista ara nükaninta nire abko Herodes namani nütüre Jesubtä, ye gaba Jesukwe angwane, kä mikakaba kwe kä ye känti mda amne rankwaba rute, bti rikaba kä kaibete Ñö Okwä Kri Galilea kwärä nakri. Angwane nun aibe rikaba Jesube, akwa Jesu rikaba ye nitre nünanka ja ken juta ngrabare yere kákwe gaba angwane, rikaba jökrä kä nötabti ta nebe Jesu ngäbti. <sup>14</sup> Yebti Jesu rikaba nebe ñö köräbti angwane näma rute, rankwaba timon, ye btäräbe nitre rababara kwati yete ngibiare ngäbti, btä okwä rababa. Angwane rababa tuen bobre Jesuye amne nitre bren bren ngwian nämane kwetre, ye Jesukwe mikabata kuinta jökrä kräke. <sup>15</sup> Yebti kä jataba dere angwane, nun ja töitikaka Jesube kákwe krötaba ja ken ben, kákwe nieba ie:

Kä kitera dere amne nita kä kaibete nete. Ne känti mrö ñakare, aisetē nitre noko rikadre mrö kökö jae jutate, abkokäre juenta jirekäbe, nunkwe nieba.

<sup>16</sup> Abtä Jesukwe nieba mda nunye:

Ñobtä niaratré rikadreta, ie mun tö nibi. Niaratre buke munkwe, nieba kwe nunye.

<sup>17</sup> Abtä nunkwe nieba mda ie:

Ban kunrikebe amne gwa krobu aibe tä nikwe, ¿se abko ni kwati se bukadre ño te? nunkwe nieba Jesuye.

<sup>18</sup> Angwane Jesukwe nieba mda nunye:

Ban kunrike amne gwa krobu ye ngwen tie nete, nieba kwe.

Ye erere nunkwe bianba ie. <sup>19</sup> Angwane nitre näma kwati yete, ye Jesukwe juanba täke jökrä temen temen mikäbti, bti ban kunrike btä gwa krobu, ye Jesukwe dianba kisete, kákwe nikraba kä käinbti amne kuin nieba btä kwe Ngöböye, bti ötakaba oto kiakia kwe, bti bianba kwe nun ja töitikaka benye angwane, nunkwe dräiba jökrä nitre kwati yebti. <sup>20</sup> Nitre kwati ye kákwe mröba trinetrine jökrä, bti ni jökrä kákwe mröba ünän angwane, ban btä gwa oto rabateba abko nun ja töitikaka Jesube kákwe ükakröba kutia kwä jätäbti kubu jire. <sup>21</sup> Nitre kwati kákwe mröba yete abko ni brare brare aibe näma mili krärike jire kákwe mröba amne, nitre merire merire btä ngäbäkre bati kiakia kákwe mröba arato, akwa ye tanba ñakare abko rakakaba kore se.

### *Jesukwe dikakabare ñöbti*

(Marcos 6.45-52; Juan 6.16-21)

<sup>22</sup> Yebti nun ja töitikaka Jesube abko rikadre niara käne nebe Ñö Okwä Kri Galilea ye kwärä nakri, ie Jesu tö namani, aisetē nun juanba rute kwe, akwa niara abko rababa nitre kwati ye juenta. <sup>23</sup> Abti nitre kwati ye nikarinante jökrä angwane, Jesu nikani kaibe nebe ngitiobti blitakäre Ngöböye. Yebti kä namanina iko angwane, Jesu nämane kaibe ngitiobti blite Ngöböye. <sup>24</sup> Angwane ru te nun näma näin ye abko rikabara mente ñöbti amne kä jate abko rababa mobe köre. Angwane ñö jataba romon, rababa ru kitekä

nekwäre sekwäre, ñobtä ñan angwane müre rababa mate nun ngäbti, ye abko rababa ñö kitekä kore, kä rababa ru ngrükete nunbe.

<sup>25</sup> Yebti kä jatabara ngwen ja ken dekä angwane, batibe Jesu rikaba dikekä ñöbti nun ngäbti. <sup>26</sup> Jesu jataba dikekä ñöbti, yebtä nun ja tötitaka ben okwä rababa angwane, nun rekvetakaba krübäte amne nun rababa ngrente krikri be amne kä jürä rababa krübäte nunbtä kákwe nieba:

¡Ni bækäi kite ni ngäbti ye! nun rababa niere.

<sup>27</sup> Akwa Jesu abko kákwe nieba nunye:

Mun ñan rekvetaka ngwarbe. Tita näin, aisetet munkwe ñan ti jürä ngwian, nieba kwe nunye.

<sup>28</sup> Angwane Pedro kákwe nieba mda Jesuye:

Ti Dänkien, ma ara tä dikekä ñöbti bkänä ne ngwane, ti rikadre dikekä siba ñöbti nebe ma känti abko niere tie, nieba kwe ie.

<sup>29</sup> Jakwe, nieba Jesukwe ie.

Ye erere bkänä, Pedro näma rute, rankwaba timon ñöte, rikaba dikekä ñöbti Jesu kukwäre. <sup>30</sup> Akwa müre rababa mate dite Pedrotä rababa tuen Pedroye, abtä rekvetakaba mda. Ye btäräbe jataba niken neen ñöte nguse, abtä ngrateba kri krörö kwe Jesuye:

¡Ti dentari ti Dänkien! nieba kwe Jesuye.

<sup>31</sup> Ye btäräbe Jesukwe kaba küdebtí, kákwe nieba mda ie:

¡Ye ñobtä mata tödeke chi dikaro tibti ye! Ti di tärä täte ma mikakrä dikekä ñöbti abko makwe ñan miri era jae ye, nieba Jesukwe Pedroye.

<sup>32</sup> Yebti Jesu rankwaba rute Pedrobe angwane, müre rabababe kwe kwe jökrä.

<sup>33</sup> Angwane nun näma rute ye erere rababa jökrä ngukudokwäbti temen Jesu ngwärerekri, kákwe nieba ie:

¡Ma abko Ngöbö Odei era metre bkänä! nunkwe nieba Jesuye.

### *Jesu btä nitre ja tötitaka ben nükani juta Genesarete*

(Marcos 6.53-56)

<sup>34</sup> Yebti nun rikaba nebe Ñö Okwä Kri Galilea ye kwärä nakri kä Genesarete. <sup>35</sup> Angwane nitre nünanka yete, ie Jesu rükaba gare, aisetet jötrö ngwarbe Jesu nükani abko mikaba gare kwetre jabtä kä ngrabare temen kä ye känti. Angwane ni kwati rükaba mräkä bren bren ngwena Jesu känti, Jesukwe mikadre kuinta abkokäre. <sup>36</sup> Angwane nitre bren bren ye abko Jesukwe tuadremetre dän körä aibe nuenbtä jabtä amne rabadreta kuinta abko mräkä rababa ribere ie. Ye erere bkänä, nitre bren bren rababa dän körä aibe nuenbtä Jesubtä angwane, rababa nebata kuinta batibe jökrä abko rakakaba kore.

## 15

### *Dre dre tä ni mike ngite Ngöbö ngwärerekri niebare Jesukwe*

(Marcos 7.1-23)

<sup>1</sup> Abti bati nitre bariseo btä Kukwe Biani Ngöböökwe Moiséye dirikätre nämame Jerusalén abko rükaba Jesu känti, kákwe kukwe ngwiantariba krörö ie:

¿Nun mräkä kirakira kákwe kukwe ükaninte nuendre, <sup>2</sup> se ñobtä abko nitre ja tötitaka mabe käta kite temen se? ¡Ni rabadredbe Ngöbö ngwärerekri, abkokäre ni ngämi mröre, känenkri köbötikadre abti mrödre abko tä ükaninte kore amarebti nitre ja tötitaka mabe abko ñan tä köbötike jire chi mrökrä se! nieba kwetre Jesuye.

<sup>3</sup> Abtä Jesukwe nieba mda ietre:

Ti bike kukwe ngwentari kwati munye arato abko krörö: ¿Ñobtä kukwe biani Ngöböökwe nuendre nie abko mutta kite jökrä temen, bti kukwe ükaninte au jakrä munkwe abko mikata bäri ütiäte jae munkwe? Ye niere tie. <sup>4</sup> Tita ngwentari, ñobtä ñan angwane Ngöböökwe niebare krörö:

Mun rün btä mun meye mika ütiäte jae munkwe  
amne,

nire nire kákwe näkädre tare rün amne meye rüere, ni ye abko kämikadre, *Exodo 21.17;*

*Levítico 20.9*

*Exodo 20.12; Deuteronomio 5.16*

niebare Ngöbökwé. <sup>5</sup> Akwa mun abko tä niere krörö: Ni iti kákwe niedre rünye amne meyeye: Jändrän tikwetikwe se erere tikwe biani jökrä Ngöböye, aisetē ti ñan raba mun die mike jire chi bti, niedre kwe, ye abko dbe, monta niere. <sup>6</sup> Ne aisetē nire nire kákwe nuendre kore, ni ye abko ñan rabadre rün amnemeye die mike jire chi mda abko dbe Ngöbökrä monta niere, ye ngwane Ngöbökwé kukwe biani nuendre abko monta kite temen, kukwe ükaninte munkwe mikakäre ütiäte jae. <sup>7</sup> |Mun ngwarbe ja bā mike kuin nete! Munta ja bā mike kuin, ye mdentä abko ni Ngöbö kukwei niekä Isaías kákwe niebare krörö:

<sup>8</sup> Juta ne käta ti mike ütiäte ja kada aibebti, aisetē tä ti tarere ñakare era metre.

<sup>9</sup> Tätre ti käkitekä ngwarbe amne, kukwe ükaninte au jakrä kwetre, aibe tätre dirire ti Kukwei tätē,  
niebare kore Isaíakwe munbtä, nieba Jesukwe ietre. Isaías 29.13

<sup>10</sup> Yebti Jesukwe ni jökrä käräba, kákwe nieba krörö ietre:

Ti bike kukwe niere, ne kukwei nuen munkwe angwane, munkwe mikä nüke gare jae abko krörö: <sup>11</sup> Mrö jökrä kwetata nikwe, ye abko ñan tä ni mike ngite Ngöbö ngwärekrí, akwa kukwe jökrä käme nita niere ja kadabti ye abra tä ni mike ngite Ngöbö ngwärekrí, nieba Jesukwe ni kwatiye.

<sup>12</sup> Yebtä abko nun ja tötitikaka Jesube kákwe krötaba ja ken ben, kákwe nieba ie:

¿Makwe blitaniri ye abko nitre bariseo kákwe kukwe nuri abtä moto nibi romon jökrä, ye makwe gari ya? nunkwe nieba Jesuye.

<sup>13</sup> Abtä Jesukwe nieba mda nunye:

Nitre bariseo amne Kukwe Biani Ngöbökwé Moiséye dirikätre ye abko ti bike bā mike kri mu kwrere amne, kri mdən mden abko ti Rün kä käinbti kákwe nökani ñakare, ye abko jäkädikä ngätri ngöi jökrä, bti kitadikä mento, ye kwrere rakadikä niaratrébtä.

<sup>14</sup> Erere arato, ni ie kä tuen ñakare, kwrere jire nitre bariseo amne Kukwe Biani Ngöbökwé Moiséye dirikätre tätre dikekä, ñobtä ñan angwane Ngöbö gare ñakare ietre amarebti tö Ngöbö kukwei dirire ni mda mdaye. Ne aisetē tuemetre dikekä kore, ñobtä ñan angwane ni nibu ie kä tuen ñakare rikadre ja jie ngwena kwärikwäri, ye ngwane niaratré nibu betadrekä gwaire kä mkäte nguse, nieba Jesukwe.

<sup>15</sup> Angwane Pedrokwé nieba mda Jesuye:

Makwe kukwe bā miri mröbtä, ye abko makwe dre nini abko niereta nunye, nieba kwe ie.

<sup>16</sup> Abtä Jesukwe nieba mda ie:

¿Munta näin raire tibe, akwa titä dre niere abko ñan tä nüke gare jire chi munye arato ya? <sup>17</sup> Tikwe kukwe nini abko krörö: ¿Nita mrö kwete, ye abko tä niken jökrä ni bülete, akwa nita nainkrö angwane, mrö ye kitakata jökrä ta, ye abko gare ñakare munye ya?

<sup>18</sup> Nita mröre abti nita kitékäta, akwa kukwe kämekäme nita niere ja kadabti, ye abko tä ni töite amne ni motote abko erere nita niere, aisetē kukwe kämekäme nieta nikwe ye abra tä ni mike ngite Ngöbö ngwärekrí, <sup>19</sup> ñobtä ñan angwane kukwe kämekäme abko tä ni töite amne ni motote abko erere nita niere amne nita nuene. Abtä nita ja mike ngite Ngöbö ngwärekrí abko krörö: nita ni mda mda kämike, ni gure käta ja mike gure bati bati tiebe ni mda mdabe. Erere arato, ni merire brare ja mike ngite bätäkä ngwarbe jabe kwärikväri amne ni jändräni goire ni mda mdakän amne ni blite ngwarbe ni mda mda rüere, erere arato ni ñäke ni mda mdabtä. <sup>20</sup> Munta kukwe nuene kore angwane, munta ja mike ngite Ngöbö ngwärekrí, akwa munkwe köbötikadre mrökrä abko ükaninte kira ye erere munkwe ñan mikadre tätē, yebtä mun ñan rabadre ngite jire chi Ngöbö ngwärekrí. Abko kore se, nieba Jesukwe nunye.

### *Meri ñakare israelitare kákwe tödekani Jesubti (Marcos 7.24-30)*

<sup>21</sup> Yebti Jesu näma yete, ye känti kä mikakaba kwe, bti rikaba juta Tiro amne juta Sidón kukwäre. <sup>22</sup> Rababa yete angwane, meri iti Canaánbo, ñakare israelitare nünanka kä ye känti kákwe krötaba Jesu ken, kä rababa ngrente krikri be krörö:

Ti Dänkien, ma jrei David tukwe mräkä. Ti ngwen ruentari tare jae, ñobtä ñan angwane ti ngänkän tikwe btä üai käme tä nüne, käta mike ja tare nike krübäte tikän. Yebtä ti die mike, rababa niere.

<sup>23</sup> Akwa Jesukwe ñakare jire chi meri ye käre. Abtä nun ja tötitaka ben käkwe krötaba Jesu ken, käkwe ribeba krörö ie:

Meri se nibi ngrente krübäte dikaro ni jiebti, aisetet ngänkän kwe miketa kuinta makwe, bti juenta jirekäbe, nunkwe nieba Jesuye.

<sup>24</sup> Angwane Jesukwe nieba meri yeye:

Juta israelita tä nianinte obeja kwrere, ye aibe kräke Ngöböökwe ti juani die mike, nieba kwe ie.

<sup>25</sup> Akwa meri ye abko rikaba ngitiekä ngukudokwäbti temen Jesu ngwärekri, käkwe nieba mda ie:

Ti Dänkien, ti die mike, rababa niere.

<sup>26</sup> Abtä Jesukwe nieba mda ie:

Mun ñakare israelitare abko käme nukro kwrere nieta nitre israelitakwe munbtä, aisetet tikwe ma die mikadre angwane, bäsí ban dianka ngäbäkre nikwe kän, bti kita nukroye, ye kwrere tikwe nuendre, nieba kwe meri yeye.

<sup>27</sup> Angwane meri ye käkwe nieba mda Jesuye:

Jän, ti abra nukro kwrere bkänä nitre israelita okwate ti Dänkien. Akwa nukro bkänkä tä niken mröre mesabtä angwane, mrö büre tä betekä timontimon abko tätre kwete, ye kwrere tita nete mtare amne makwe ti die mika chi abko ie ti tö nibi, nieba kwe Jesuye.

<sup>28</sup> Abtä Jesukwe nieba mda ie:

Ti mräkä, mata tödeke kri era metre tibti, nibi tuen tie, aisetet tikwe ma die mikadre, ie ma tö nibi, ye erere bikera nebe bare makrä, nieba Jesukwe ie.

Ye btäräbe meri ye ngänkän rababata kuinta batibe abko rakakaba kore.

### *Ni mili kräbkä bukani Jesukwe*

(Marcos 8.1-10)

<sup>29</sup> Yebti Jesukwe kä mikakaba kä ye känti angwane, rikaba nebe Ñö Okwä Kri Galilea ye köräbti. Abti rikaba mda ngitiobti, känti rababa täkänintbe. <sup>30</sup> Jesu rababa täkänintbe, ye känti ni kwati käkwe ja ükakröba btä. Nitre käkwe ja ükakröba kwati Jesubtä ye rikaba mräkä bren bren krörökrörö ngwena Jesuye: ni ngüre bren abko kisete näin nakwente, ni okwä kä drünente abtä kä tuen ñakare ie amne ni küdengrötani aisetet küde ruen ñakare ie. Erere arato, ni kukwei ñakare amne ni bren bätäkä ngwarbe bren mda mda kisete abko järababa kwetre, käkwe mikaba Jesu ngotobtä temen angwane, Jesukwe mikabata kuinta jökrä. <sup>31</sup> Ne aisetet ni kukwei ñakare abko rababa blite amne ni küdengrötani abko rababa nebata kuinta amne ni nakwente abko rababa dikekäta kuin amne ni okwä kä drünente abko ie kä rababa tuen. Yebtä nitre kwati ye ñan töi rababa krütare mda kukwe ye tuare amne rababa Ngöbö nitre israelitakwe ye käikitekä jökrä.

<sup>32</sup> Yebti Jesukwe nun ja tötitaka ben käräba, bti nieba kwe nunye:

Nitre tä kwati nete se nibi tuen bobre tie, ñobtä ñan angwane kä nena köbömä jire tätre tibe nete amne mrö ñakare kwetadre ietre. Abtä ti ñan tö nibi juenta mröi ja gwiriete. Nane di krütadre amne kä rötadrete bti ji ngrabare, abtä ti ñan tö nibi juenta mröi, nieba kwe nunye.

<sup>33</sup> Abtä nun ja tötitaka Jesube käkwe nieba mda ie:

Nete kä kaibete amne ni mda nüne ñakare käname nete, ¿se abko mrö kwandre mdente nie ni kwati se bukakrä jökrä? nunkwe nieba Jesuye.

<sup>34</sup> Angwane Jesukwe nieba mda nunye:

¿Banta kunbe munkwe? nieba kwe nunye.

Angwane nunkwe nieba mda ie:

Banta kun kükü be nunkwe amne gwa kiakia tä ruäre nunkwe, nunkwe nieba ie.

<sup>35</sup> Angwane Jesukwe ni jökrä mikaba täke temen, <sup>36</sup> käkwe ban kun kükü ye dianba kisete amne gwa kiakia ye dianba kisete kwe arato, käkwe kuin nieba btä Ngöböye, bti ban amne gwa ötakaba oto kiakia, käkwe bianba nun ja tötitaka ben ye angwane,

nunkwe dräiba nitre kwati yebti. <sup>37</sup> Angwane nitre kwati ye käkwe mröba trinetrine jökrä, bti ban amne gwa oto rabateba ye abko nun ja töitikaka Jesube käkwe ükakrörbata kutia kwä kükü jire. <sup>38</sup> Nitre kwati käkwe mröba ye abko ni brare aibe mili kräbkä käkwe mröba amne, nitre merire amne ngäbäkre kiakia näma yete käkwe mröba arato, akwa tanba ñakare.

<sup>39</sup> Yebti Jesukwe nitre kwati ye juanbata jökrä ja gwiriete, bti Jesu rankwaba rute nun ja töitikaka benbe, bti nun rikaba nebe käkä Magdala ye känti.

## 16

### *Sribi kri ñan tuabare käräbare Jesuye*

(Marcos 8.11-13; Lucas 12.54-56)

<sup>1</sup> Jesu rababa Magdala yete angwane, nitre bariseo amne nitre saduseo rababa Jesu känti ja tuakäre ben, akwa Jesukwe ja dokwä mikadre kö okwätte, abkokäre rikaba känti. Jesu abko juani era metre Ngöböökwe ya, ñakare ya abko Jesukwe bää mikadre, käkwe sribi kri ñan tuabare nuendre niaratre okwäbti abko rikaba niere Jesuye. <sup>2</sup> Akwa Jesukwe nieba krörö ietre:

Käta kite dere angwane, munta niere krörö: Kä jübateniri tain käinta, aisetet kä rabadi kuin moren jetbe, munta niere. <sup>3</sup> Erere arato, dekä angwane munta niere krörö: Mtare kä bää nibi tain käinta amne kä nibi mütare, aisetet kä rabadi käme ñüre, munta niere. Kä bätä nebe ño käinta abtä kä rabadi ño köbö kwatirekwatire tä ñüke gare kuin munye, ¿se ñobtä abko Ngöböta sribi ño ño nuene ti köböire mtare kä ne ngwane abko ñan tä ñüke gare munye se? <sup>4</sup> Mun nünanka kä ne ngwane abko moto kämekäme amne munta Ngöbö tarere munta niere, akwa käre munta niara tuemetre, abtä tikwe sribi kri ñan tuabare aibe nuendre mun okwäbti, ie mun töta nebe. Akwa sribi kri ñan tuabare ye tikwe ñan nuendre jire chi mun okwäbti, munta ribere ye kwrere. Akwa Ngöbö nämane Jonábe, käkwe sribi kri ñan tuabare nuenbare kräke, ye kwrere aibe Ngöböökwe bää mikadi mun kräke. Abko kore se, nieba Jesu ietre.

Bti Jesukwe kä mikakaba btätre yete amne rikaba kä mdabti.

### *Dirikätre blo, yebtä Jesukwe nitre ja töitikaka ben mikani mokre*

(Marcos 8.14-21)

<sup>5</sup> Yebti nun ja töitikaka Jesube rababa Ñö Okwä Kri Galilea kwärä nakri angwane, nun rikadre ban ngwena abko käi rikwitakaba nunbti. <sup>6</sup> Ye btäräbe Jesukwe nieba krörö nunye:

Olo ketete ti kukweiye munkwe. Lebadura nitre bariseokwe amne nitre saduseokwe, ye ngäniene munkwe ja ngibia kuin, nieba kwe nunye.

<sup>7</sup> Angwane nun ja töitikaka Jesube kä rababa blite krörö:

¡Nun ñan ki ban ngwena abtä Jesuta blite kore! nun rababa niere jae kwärikwäri.

<sup>8</sup> Nun rababa blite kore, ye gaba Jesukwe. Abtä nieba kwe mda nunye:

¿Ye ñobtä munta tödeke ñakare dikaro tibti, kä nibi ban ñakare niere dikaro kore ye?

<sup>9</sup> Ban kunrike be te tikwe ni brare brare aibe mili krärike jire bukaba angwane, ban oto rabateba abko ükakrörbata kutia kobe, ye munkwe tuaba ja okwä jenbti. ¿Akwa ti di tärä mun bukakrä ñan nükani gare munye töre ñakare munye arato ya ño ye? <sup>10</sup> ¿Erere arato, ban kun kükü be te tikwe ni brare brare aibe buri mili kräbkä jire amne ban oto nebete abko ürükrö kutia kobe, ye nebe töre ñakare munye arato ya ño ye? <sup>11</sup> ¿Ban ñakare nieta munkwe, ñan yebtä tita blite abko ñan nü gare munye ya? Lebadura nitre bariseokwe btä nitre saduseokwe abko ngäniene munkwe ja ngibiadre kuin tikwe nini munye, akwa ñan tita blite lebadura bante yebtä, nieba Jesukwe nunye.

<sup>12</sup> Angwane batibe ñan Jesu näma blite lebadura bante btä, akwa kukwe diri näma nitre bariseokwe amne nitre saduseokwe, ye abko Jesu näma bää mike lebadura kwrere abko ngäniene nunkwe ja ngibiadre kuin abko Jesu näma niere nun ja töitikaka benye abko rükaba gare nunye.

*Jesu abko Ni Dianinkä Ngöbökwe, niebare Pedrokwe  
(Marcos 8.27-30; Lucas 9.18-21)*

<sup>13</sup> Yebti Jesu rikaba nebe juta Cesarea Filipote käntita nun ja töitikaka benbe angwane, nieba krörö kwe nunye:

<sup>13</sup> ¿Ti Ni Kä Nebtä Ngobo ne abko nire nieta tibta ni mda mdakwe? nieba kwe nunye.

<sup>14</sup> Angwane nunkwe nieba mda ie:

Ma abko Juan Bautista nukaninta nire nieta ni ruärekwe amne ni mda abko käta ma Elías nukaninta niere mabtä. Ni mda abko ma ni Ngöbö kukwei niekä Jeremías nukaninta nire ara niere, akwa ni mda abko tä niere Ngöbö kukwei niekä kirakira mda mda abko nukaninta nire nieta kwe mabtä, nunkwe nieba Jesuye.

<sup>15</sup> Angwane Jesukwe nieba mda nunye:

<sup>15</sup> ¿Mun abko käta ti nire niere tibta? nieba kwe nunye.

<sup>16</sup> Angwane jötrö Simón Pedro kákwe nieba Jesuye:

Ma abko Ni Dianinkä Ngöbökwe ara amne ma abko Ngöbö nire Odei abko nunta niere, nieba kwe Jesuye.

<sup>17</sup> Angwane Jesukwe nieba mda Pedroye:

Simón, Jonás ngobo, kä raba nuäre mabtä amne Ngöbökwe ja di biani mae, ñobtä ñan angwane makwe kukwe nini tie, ye abko ñan ni kä nebtä köböire namani gare mae, akwa ti Rün tä kä käinbtí ara jire kákwe mikani gare mae amne makwe nini tie. <sup>18</sup> Mdakäre abko, ti bike Pedro niere mae amne já yebti nitre gätäkä ti käbti kákwe tödekadi amne rikadi niren kwati amne gata di kri krübaté ye abko kákwe ñan nitre gätäkä ti käbti ye ganaindre jire chi. <sup>19</sup> Erere arato, Ngöbö kä käinbtí tä gobrane, ye känti ni kwati rabadi nüke, abkokäre tikwe llabe biandi mae jukwe tikadre niaratré ngwiankäre nebe kä ye känti Ngöböta gobrane. Makwe dre dre mäkadrete kä nebtä, ye abko rabadira mäkäninte käne kä käinbtí Ngöbökwe amne, makwe dre dre tikadrete kä nebtä abko rabadira tikaninte käne kä käinbtí sete Ngöbökwe. Abko kore se, nieba Jesukwe Simón Pedroye.

<sup>20</sup> Yebtä nun ja töitikaka Jesube, ie nieba krörö kwe:

Ti abko Ni Dianinkä Ngöbökwe ara tä nete, ye munkwe ñan nie jire chi ni mda mdaye, nieba kwe nunye.

*Jesu müre ketadi, niebare käne kwe  
(Marcos 8.31-9.1; Lucas 9.22-27)*

<sup>21</sup> Ye ngwane mentokwäre nun ja töitikaka Jesube, ie Jesu rikaba niere krörö: Ti rikadre Jerusalén, akwa ni näin nebe sete angwane, nitre unbre ji dokwätē btä nitre blitaka Ngöböbe ni mda mda diäre dänkien amne Kukwe Biani Ngöbökwe Moiséye dirikätre ye kákwe ti mikadi ja tare nike kri krübaté, kákwe ti müre ketadi, akwa köbömäkäre angwane, ti rükadita nire, nieba Jesukwe nunye.

<sup>22</sup> Abtä Pedro kákwe Jesu ngwianba kaibe mentokwäre, bti rikaba mäträre krörö btä:

¡Ti Dänkien, Ngöbö se okwäbti kukwe kore ñan rakadrekä jire chi mabtä näre! nieba kwe Jesuye.

<sup>23</sup> Akwa Jesu rikwitataeba, kákwe Pedro tuaba ja käne, bti nieba mda kwe ie:

¡Satana, nän mento tibta nete! Tikwe ja mikadre ngite Ngöbö rüere, abkokäre ma kite ñäke kore tie ñan ñan. Kukwe mdan tä nebe tuen dbe Ngöböye, ye kwrere tuen ñakare mae amne, ni kä nebtä ie jäandrän tuen dbe abko erere tä tuen mae, aise te makwe ñan ñäkä kore tie, nieba Jesukwe.

<sup>24</sup> Yebti nun ja töitikaka Jesube, ie Jesukwe nieba mda:

Nire nire tö ja töi mikai kwatibe nänkrä tibe, ni ye abko tö dre dreye jakrä abko raba käikwitekä jabti amne köbö kwatirekwatire ja kwata raba ruentari tare ñakare ie nünakäre tikrä abko jata ti jiebti, <sup>25</sup> ñobtä ñan angwane nire nire tö ja kwata ngibiai jen jakrä abko krütadi kärekäre, erere rabadi kärekäre Ngöbö okwä bäre mento akwa, nire nire krütadi ti dokwäre abko rabadi dianintari nünakäre kärekäre Ngöböbe. <sup>26</sup> Ye abko, ni rabadre jäandrän jökrä bkäne kabre kä nebtä, akwa ni krütadre angwane nikwe ñan

nünandre mda Ngöböbe, ne ütiäre abko dre rükadre nie. Erere arato, nikwe nünandre kärekäre Ngöböbe, ye abko ni ñan raba kökö jire chi jakrä, ñobtä ñan angwane jäandrän ñakare jire abko ni rabadre bien Ngöböye nüna kärekäre ben ye ütiäre. <sup>27</sup> Akwa ti Ni Kä Nebtä Ngobo ne jatadita Ngöbö di kri bä nuärebtì amne ti jatadita angeletre tikwe ben, ye ngwane abko ni itire itire kákwe dre dre nuenbare, ye erere tikwe kukwe ükadite kräke, kákwe ütiää biandi ietre.

<sup>28</sup> Akwa mun tä nete ne ruäre ngämi krüte, känenkri ti Ni Kä Nebtä Ngobo ne jatadita gobrane, ye abko munkwe tuadi ja okwä jenbtì abko ti tö nibi niei metre munye. Abko kore se, nieba Jesukwe nun ja töitikaka benye.

## 17

### *Jesu bä nikwitani* (Marcos 9.2-13; Lucas 9.28-36)

<sup>1</sup> Yebti kä rikaba köbö ti ta mda angwane, Jesukwe Pedro, Santiago amne Santiago etba Juan aibe ngwianba jabe abko ben rikaba ngitio bäri mente käin yebti. <sup>2</sup> Niaratre nämanena ngitio yebti käin angwane, batibe Jesu bá nikwitani bá jene niaratre okwäbti, aisetè ñänä trä dirare ye kwrere Jesu ngwäre bá namani amne, dän Jesubtä abko trä namani ngwen bürere kä trä dirare kwrere. <sup>3</sup> Ye btäräbe Moisés btä Elías namani gökökä yete blite Jesube, btä okwä namani. <sup>4</sup> Angwane Pedro kákwe niebare Jesuye:

Ti Dänkien, nutna nete abko käi nibi nuäre tibta, aisetè ma tö ne ngwane nunkwe ju mikadi kiakia komä munkrä: kwati makrä, kwati Moisékrä amne kwati Elíakrä, niebare Pedrokwe.

<sup>5</sup> Pedro nämane blite kore Jesube, ye btäräbe müta trä ngwen jatani jüben niaratrebtì angwane, müta yete abko ni kukwei jarabare krörö ietre:

Ni ne abko ti Odei tare kri tikwe. Niara käi nuäre krübäte tibta, aisetè niara kukwei nuna munkwe abko ni kukwei namani kore mütate.

<sup>6</sup> Ni kukwei namani kore mütate, ye jarabare nitre ja töitikaka Jesube yeye angwane, kä jürä namani krübäte btätre, abtä nikaninbe ngitiekä ngwärere temen. <sup>7</sup> Ye btäräbe Jesukwe krötabare ken, kákwe nuaninbtä, bti niebare kwe ietre:

Näin krö. Mun ñan rekwtaka, niebare kwe ietre.

<sup>8</sup> Ye btäräbe niaratre kákwe nikrabareta angwane, ni mda ñakare amne Jesu aibe nämane kaibe, btä okwä namani. <sup>9</sup> Yebti Jesu nikaninta niaratrebe ngitiobtä motokwäre angwane, Jesukwe niebare ietre:

Ti Ni Kä Nebtä Ngobo ne ngämi krüte, bti nüketa nire, ye känenkri kukwe turi munkwe ngitiobti käin sete, ye munkwe ñan nie jire chi ni mda mdaye. Abko kore se, niebare kwe ietre.

<sup>10</sup> Abtä nitre nimä ja töitikaka ben ye kákwe niebare mda ie:

¿Ma krütadi bti rükadita nire mata niere ne ngwane, ñobtä abko Elías rükadre Ni Dianinkä Ngöböökwe käne kukwe ükatekäre biare kräke abko Kukwe Biani Ngöböökwe Moiséye dirikätre käta niere? niebare kwetre Jesuye.

<sup>11</sup> Amne Jesukwe niebare mda ietre:

Elías rükadre käne ye abra era bkänä. Erere arato, niara rükadre, kákwe jäandrän jökrä ükadrete kuin metre, ye abra era bkänä. <sup>12</sup> Akwa Elías abko nükanina, akwa Kukwe Biani Ngöböökwe Moiséye dirikätre, ie niara ñan nükani gare, aisetè tö namani dre dre nuein btä, erere nuenbare kwetre amne mrä müre ketani kwetre. Ye kwrere arato ti Ni Kä Nebtä Ngobo ne kákwe ja tare nikadi kri niaratre kisete arato abko ti tö nibi niei munye. Abko kore se, niebare Jesukwe nitre ja töitikaka ben yeye.

<sup>13</sup> Angwane Jesu nämane blite Juan Bautistabtä abko nükani gare ietre.

### *Jesukwe üai käme juanintari ngäbäkrebtä* (Marcos 9.14-32; Lucas 9.37-45)

<sup>14</sup> Yebti nitre näma kwati ngitiobtä ngüsürü, ye känti Jesu rikabata angwane, ni iti kákwe krötaba ken amne rikababe ngitiekä ngukudokwäbti temen ngwärerekri, kákwe nieba krörö ie:

<sup>15</sup> Ti Dämkien, ngäbäkre tikwe noko ngwen ruentari tare jae tikrä, ñobtä ñan angwane tä nikrenkä krübäte temen tikän abko kisete tä ja tare nike kri. Erere arato, tä kite nikrenkä temen angwane, tä niken mate ñukwäte, ere angwane abko tä niken temen ñöte tikän <sup>16</sup> abko nitre ja tötitikaka mabe, ie ti nü ngwena, akwa ñan di nibi mikakäreta kuinta, aisetet miketa kuin tikrä abko tita ribere mae, nieba kwe Jesuye.

<sup>17</sup> Abtä Jesukwe nieba mda:

¡Aingwaree, ti moto iko munbtä! Mun ye ño abko moto kämekäme dikaro abti munta tödeke ñakare dikaro Ngöböbti ye. ¿Ti rabadi kä nuäi mda munbe amarebti ye? nieba kwe.

Ye btäräbe Jesukwe nieba mda:

Ngäbäkre ye ngwen tie, nieba kwe.

<sup>18</sup> Ye erere bkänä, ngäbäkre järükaba Jesu känti angwane, Jesukwe ngrateba üai kämenbti, kákwe üai käme ye juantariba ngäbäkre yebtä amne ngäbäkre ye rababata kuinta batibe.

<sup>19</sup> Yebti nun ja tötitikaka Jesube kákwe nieba kaibe ie:

¿Nobtä üai käme ñan niki mento nunye ngäbäkre sebtä ruen? nunkwe nieba.

<sup>20</sup> Abtä Jesukwe nieba mda nunye:

Munta tödeke ñakare bkänä Ngöböbti, ye mdən kisete üai käme ñan niki mento munye. Ye munkwe tödekadre chi mostasa nurai chi ye näre, akwa munkwe tödekadre era metre Ngöböbti, ye ngwane mun rabadre niere ngitio nokoye: Ja denkä mento yete, bti ma rika kä mdabti, munkwe niedre ie, ye erere ngitio noko rikadre mento amne jändrän ñan rabadre jire tare nuendre munkrä, ye abko ti tö niei metre kore munye.

<sup>21</sup> [Akwa üai käme ne kwrere juantarikrä mento abko blitadre Ngöböbe amne ja baindre Ngöbökrä käne aibe köböire munkwe juandretari mento.] Abko kore se, nieba Jesukwe nunye.\*

<sup>22</sup> Yebti nun näma dikekä gware Jesube kä Galilea käntita temen mda angwane niarakwe nieba nunye:

Ti Ni Kä Nebtä Ngobo ne kitadi ngise ni mdaye <sup>23</sup> amne niaratre kákwe ti müre ketadi, akwa köbömäkäre angwane ti rükadita nire, nieba Jesukwe nunye.

Jesukwe kukwe nieba kore nunye, yebtä abko nun moto rababa ulire jökrä.

#### *Ju blitakrä Ngöböbe ye ütiä biandre*

<sup>24</sup> Abti Jesu amne nun ja tötitikaka ben rababata juta Capernaúmte angwane, nitre ngwian käräkä ju blitakrä Ngöböbe kräke, ye rikaba nebe Pedro känti, kákwe nieba krörö ie:

¿Dirikä makwe ye tärä ju blitakrä Ngöböbe ye ütiä bien arato ya? nieba kwe.

<sup>25</sup> Angwane Pedro kákwe nieba mda ie:

¡Jänri, tärä ütiä bien yeri! nieba kwe.

Yebti Pedro rikaba nebata gwi angwane, Jesu ara jire kákwe ñäkäba käne ie, kákwe nieba:

Simón, kukwe nebtä mata töbike ño abko ti tö nibi ngwaintari mae abko krörö: ¿Jrei krikri kä nebtä ye abko käta ja ütiä biamna nireye? ¿Ngäbäkre jen kwrere kákwe ja ütiä biandre ie nieta kwe ya? o ¿Ni mda mda abko kákwe ja ütiä biandre nieta kwe? abko niere tie Simón, nieba Jesukwe Pedroye.

<sup>26</sup> Angwane Pedrokwe nieba mda Jesuye:

Ni mda mda abko kákwe ja ütiä biandre nieta kwe ne abko, nieba Pedrokwe.

Angwane Jesukwe nieba mda:

Ngäbäkre jreikwe abko kákwe ja ütiä biandre ñakare kore ñan ñan. Ye mdən kisete, ju blitakrä ti Rün Ngöbökwé noko tikwe ütiä biandre ñakare arato abko rabadre dbe, ruen tie. <sup>27</sup> Akwa nikwe ñan ja ütiä biandre angwane, ni mda mda rabadre töbike blo ni btä abko ngäniene nän gwa kite Ñö Okwá Kri Galilea sete. Makwe kötu kita ñöte angwane,

\* <sup>17:21</sup> Versículo ne abko ñan tä tikani manuscrito bári kuinkuin btä, akwa jatani Marcos 9.29 yekri.

gwa mden raba käne kötubtä, ye makwe dian jate. Gwa ye abko kadate ngwian tädi abko kwandi mae, aisetet ngwian tädi täte ma amne ti ütiä biankrä. Ngwian yebti ma rika ja ütiä bien amne makwe ti ütiä bian arato. Abko kore se, nieba kwe Pedroye.

## 18

*Nire bari ütiäte niebare Jesukwe*  
(Marcos 9.33-37; Lucas 9.46-48; 17.1-2)

<sup>1</sup> Abti kä ye ngwane nun ja töitikaka Jesube käkwe krötaba ken mda, bti nunkwe nieba ie:

¿Ngöböta gobrane nunbti, ne ngätäite nire abko bari ütiäte ruen? nunkwe nieba Jesuye.

<sup>2</sup> Angwane Jesukwe ngäbäkre chi käräba iti, bti mikaba täkänintbe nun ngätäite kwe,  
<sup>3</sup> käkwe nieba krörö:

Ti bike kukwe era erere niere munye abko krörö: Ngäbäkre kiakia tä ja mike bobre, ne kwrere munkwe ñan ja mikadre bobre Ngöböbtä ne ngwane, Ngöböökwe ñan gobrandre jire chi munbti. <sup>4</sup> Ne aisetet, ni bti Ngöböta gobrane, ye ngätäite nire nire käta ja mike bobre Ngöböbtä abko tä ja mike bobre ngäbäkre chi ne kwrere, ye abko bari ütiäte.

<sup>5</sup> Ye abko, nire nire käta ni ja mikaka bobre Ngöböbtä ngäbäkre chi ne kwrere ye kaen ngäbti ti käbti, ye ngwane ti ne ara jire kata ngäbti kwe. <sup>6</sup> Akwa nire nire käta ja mike bobre Ngöböbtä ngäbäkre ne kwrere, ye nirekwe ngwiandreta ti käikwitekä jabti, känti rabadre kukwe nuene bari käme mda, ni ye abko Ngöböökwe mikadi ja tare nike krübäte. Mden kisete, ni ye ngämi ni tödekaka tibti ngwen ti käikwitekä jabti, känenkri jäkwata kri nura ukwakrä ye mäkadre ngärä, bti kitadre mrente nguse känti müre reketadre abko rabadre bari kuin kräke. Ye kwrere ni ye ñan rabadre ni tödekaka tibti ngwen ti käikwitekä jabti.

<sup>7</sup> Ni kä nebtä, kräke kukwe tärä keta kabre käta ni nuente ja käne abko nita ja mike ngite, ye abko käme nikrä bkänä, akwa ye abko tä käre. Akwa nire nire köböite ni mda mda tä ja mike ngite Ngöbö rüere, jni ye abko bobre jakän! ñobtä ñan angwane Ngöböökwe niara mikadi ja ngie nuen krübäte ni mda mda ye dokwäre. <sup>8</sup> Ne aisetet ma kise ya o ma ngoto ya, köböite makwe ja mika ngite Ngöbö rüere ne ngwane, makwe tikaka ta jae, bti makwe kitaka mobe ja okwä bäre mento abko bari rabadre kuin, ñobtä ñan angwane makwe nünandre deme kise kwäräbe amne ngoto kwäräbe rikakäre nüne Ngöböbe kä käinbti abko bari kuin angwane, ñan ma kise krobu amne ma ngoto krobu ben ngöi jökrä Ngöböökwe ma kitadre ñukwä jutra ngitiekä kärekäre te. <sup>9</sup> Erere arato, ma okwä köböite ma raba ja mike ngite Ngöbö rüere, ne ngwane makwe ja okwä ye diante kwati mento, bti makwe kitaka mobe arato, ñobtä ñan angwane ma okwä kwatibe ben ma rikadre nüne kärekäre Ngöböbe, ye abko rabadre bari kuin makrä amne, ñan ma okwä kubu ben ngöi ma kitadre kärekäre ñukwä jutrate kä ja tare nikakrä känti. Ye mdenbtä titä kukwe bärä mike kore mae, nieba Jesukwe nunye.

<sup>10</sup> Mdakäre abko, ti bike kukwe era erere niere krörö munye: Nitre tödekaka tibti tä ja mike bobre Ngöböbtä, ye abko ngäbäkre kiakia kwrere, se munkwe ñan bätä ngwian btä tikän, ñobtä ñan angwane käre angeletre niaratrekwe tä ti Rün ngwärekri kä käinbti.

*Obeja nianinte, btä Jesukwe kukwe bärä mikani*  
(Lucas 15.3-7)

<sup>11</sup> Mdakäre abko, ti Ni Kä Nebtä Ngobo jatani ni nianinte ye diantarikäre. <sup>12</sup> Yebti abko ti bike kukwe bärä mike krörö munye: Ni iti kwe obeja tädre gre ketarike, akwa obeja krati rikadre ngwarbe kwäräkwärä kän, ye ngwane obeja rabadre gre ketabkä bti krä jätäbti krä ökän (99), ¿ye ñan mikadre kwe ja ngibiare kaipe ngitiobti, bti rikadre obeja nianinte krati ye känentari ya? Jänri, rikadre obeja nianinte ye känentari. <sup>13</sup> Abti obeja ye kwandretari ie angwane, obeja kratibe ye abko bari käi rabadre nuäre btä obeja gre ketabkä bti krä jätäbti krä ökän yebti ta abko ti tö nibi niei metre. <sup>14</sup> Ye kwrere arato,

mun Rün tä kä käinbti sete abko ñan tö nitre tödekaka tibti tä ja mike bobre Ngöböbtä ngäbäkre kiakia kwrere se tuai nente jire iti jakän. Abko kore se, nieba Jesukwe.

*Ja mräkä tödekaka Jesubti töi diandre ño  
(Lucas 17.3)*

<sup>15</sup> Yebti Jesukwe nieba mda:

Ma mräkä mdən erere käkwe ja mika ngite ma rüere angwane, ma rika käkwe blita kaibe ben amne ja mikani ngite ño ma rüere kwe, ye makwe mika gare ie. Yebti ja ngite niedre kwe mae amne kukwe ükadrete kwe mabe, ne ngwane mun nibirate kuin jabtä. <sup>16</sup> Akwa ñan tö raba ma kukwei nuai amne ñan tö raba kukwe ükaite mabe ne ngwane, makwe ni mda känä iti, nibu ja mukore abko ben ma rika bliteta ma mräkä yebe. Abti makwe blitadi ño ben, ye abko rabadi gare metre ni nibuye, ni nimäye. <sup>17</sup> Akwa ma näin ni mda mda ngwena jabe, ye okwäbti ma mräkä ñan tö raba kukwe ükaite janknu mabe ne ngwane, nitre gätäkä ti käbti tä ja ükekrö ye ie makwe mika gare gätäte; akwa nitre gätäkä ye käkwe blitadre ma mräkä yebe, akwa ñan tö rabadre kukwe ükaite janknu mabe ne ngwane, ni tödekaka ngöbö ngwarbebtı, kwrere jire raba tuen munye amne ni ngututu jäandrän ütiä käräkä gobran romanobokrä ye kwrere jire raba mun okwäte arato.

<sup>18</sup> Ye abko, ti bike kukwe era erere niere munye abko krörö: Munkwe dre dre mäkädite kä nebtä, ye abko rabadi mäkäinti kä käinbti Ngöböökwe amne munkwe dre dre tikadrete kä nebtä abko rabadi tikaninte Ngöböökwe kä käinbti sete. <sup>19</sup> Ye kwrere arato, ti bike kukwe era erere niere munye abko krörö: Mun nibu käkwe kukwe ükadrete jabe kwäríkwäri kä nebtä käkwe ja töi mikadre gware, bti mun tö rabadre dreye, ye abko munkwe kärädré Ngöböye, käkwe blitadre ben amne ti Rün kä käinbti sete käkwe biandi munye, <sup>20</sup> ñobtä ñan angwane ni tädre nibu ya o nimä ja ükaninkrö gätäre ti käbti ye abko ti tädi siba ketetibe bentre. Abko kore se, nieba Jesukwe.

*Kukwe blo diandre jabti ta kwäríkwäri*

<sup>21</sup> Angwane Pedro rikaba, käkwe kukwe ngwiantariba Jesuye, käkwe nieba:

Ti Dänkien, ¿ti mräkä iti käkwe kukwe nuendre blo ti rüere, se abko tikwe diandre bäge bti ta ruen? ¿Tikwe diandre bäge kükü bti ta ya? nieba kwe Jesuye.

<sup>22</sup> Abtä Jesukwe nieba mda Pedroye:

Ñan makwe diandre bäge kükübe bti ta abko ti bike niere mae, akwa makwe diandre gre ketamä bti bäge jätäbti bäge kükü (77) bti ta. <sup>23</sup> Ne aiseti ni bti Ngöböta gobrane, ngätäite kukweta nakenkä krörö abko ti bike bäge mike: Bati jrei nämane iti abko nikani rürümön ütiä ükete sribikä kweben. <sup>24</sup> Nikani rürümön ütiä ükete krörö, ye btäräbe sribikä iti kwe abko bti rürümön ütiä nämane millone kabre krübäte abko jänükani jrei ye känti.

<sup>25</sup> Akwa sribikä ye abko ie ngwian ñan namani jire chi ja ütiä biankrä jrei yeye. Abtä jrei ye käkwe sribikä ye rürümoinna meri kwe amne ngäbriänkä kwe kwe amne jäandrän kwe kwe erere ben ngöi rürümoinna jreikwe rürümön ütiäre. Amne sribikä ye abko rabadre ni klabore ni mdakrä kore, jreikwe sribi ütiä diandre rürümön ütiäre abkokäre.

<sup>26</sup> Akwa sribikä ye nikani mate ngukudokwäbti temen jrei ye ngwärerekri, kä namani ribere kisere krörö jrei yeye: Makwe ti ngibia bätäre abko ti tö nibi ribei mae amne rürümön ütiä tibti ye tikwe ütiä biandita jökrä mae, niebare kwe jreiyen. <sup>27</sup> Angwane sribikä ye namani ruentari tare jrei yeye, käkwe rürümön ütiä kabre ye diani jökrä bti ta, käkwe tikaninte.

<sup>28</sup> Yebti sribikä ye nikantia angwane, sribi muko kwe abko bti rürümön ütiä nämane chi kwe abko ben namani ngätäi. Angwane sribikä ye nikani betekä, käkwe sribi muko kwe ye kani roro mkäbti, nikani roro mkä kekete se kwrere, kä namani niere: ¡Rürümön ütiä mabti, ye makwe ütiä bianta jökrä tie! namani niere ie. <sup>29</sup> Akwa sribikä ye nikani mate ngukudokwäbti temen sribi muko ye ngwärerekri, kä namani ribere kisere krörö ie: Makwe ti ngibia bätäre abko ti tö nibi ribei mae amne rürümön ütiä tibti ye tikwe ütiä biandita jökrä mae, niebare kwe sribi mukoye. <sup>30</sup> Akwa sribikä ye ñan tö namani sribi

muko kwe ye ngwen ruuentari tare jae, käkwe kitani ngite kä teri, bti rürümmon ütiä ye biandreta jökrä kwe angwane batibe tikadreteta, abkokäre kitani ngite kwe.

<sup>31</sup> Sribikä käkwe nuenbare kore, ye abko matani tare sribikä mda mdabtä. Abtä sribikä käkwe dre nuenbare ye abko sribikä mda mda ye nikani, käkwe niebareta jökrä jreiye.

<sup>32</sup> Abtä jrei ye käkwe sribikä ye kärämna mda. Nükani jrei känti angwane, niebare kwe ie: ¡Ma moto käme! Rürümmon ütiä kabre krübaté mabti abko tikwe diandre mabti ta abko ma rababa ribere kisere tie, erere tikwe nuenba makrä. <sup>33</sup> Tikwe ma ngwianba ruuentari tare jae, käkwe rürümmon ütiä kabre diani mabti ta, ye kwrere makwe sribi muko makwe ye ngwiandre ruuentari tare jae arato bā amarebti makwe kitani ngite rürümmon ütiä chi dokwäre se, niebare jreikwe ie. <sup>34</sup> Yebti jrei moto namani romon krübaté sribikä ye kräke, käkwe kitani ngite. Ye känti ngö tikadrekä krübaté mikakäre ja ngie nuen abti rürümmon ütiä biandreta jökrä kwe jreiye amne batibe rabadre tikaninte abkokäre abko nakaninkä kore.

<sup>35</sup> Ye kwrere arato, mun mräkä mden mden käkwe kukwe nuendre blo mun rüere, akwa munkwe ñan diandre bti ta ja moto kuinbti, ye ngwane ti Rün tä kä käinbti se käkwe ñan mun ngite niara rüere diandrekä jire chi munbtä arato. Abko kore se, nieba Jesukwe.

## 19

*Meri tuadremetre ya, ñakare ya*

(Marcos 10.1-12; Lucas 16.18)

<sup>1</sup> Jesu näma Galilea yete, käkwe blitaba ünän jökrä kore, bti kä mikakaba kwe kä ye känti, bti rikaba nebe kä Judeate, Ñö Jordánbtä kä driri. <sup>2</sup> Angwane nitre rikaba kwati Jesube amne Jesukwe ni bren bren mikabata kuinta kä ye känti.

<sup>3</sup> Ye ngwane abko nitre bariseo rükaba ruäre Jesu känti abko tö rababa Jesu nuaite ja käne, käkwe nieba krörö ie:

¿Kukwe mden erere nuendre merikwe angwane, rabadre tuen käme nie, yebtä nikwe meri nikwe tuadremetre ye abko dbe abko Ngöbö Kukwei tä niere ya? nieba kwetra Jesuye.

<sup>4</sup> Abtä Jesukwe nieba mda ietre:

Ngöbö Kukwei käta dre niere kukwe yebtä abko btä mun tärä ñäke, aisetate gare kuin munye ruen tie abko krörö: Kena dekä Ngöböökwe kä dätebare angwane, “ni brare btä ni merire dätebare kwe,” abko ie niebare krörö:

<sup>5</sup> Ne aisetate ni brare käkwe ja mikadre gure angwane, rikadre nüne jenena rünbtä amne meyebtä mento merire kwebe.

Angwane ni nibu ye abko rabadi ni itibe kwrere,

*Génesis 2.24*

abko niebare Ngöböökwe ietre. <sup>6</sup> Ye kwrere ni nibu ye ñan rabadi ni nibu kwrere mda, akwa rabadi ni itibe kwrere. Ye mden kisete, Ngöböökwe ni mikani ni itibe kwrere, ye ni ñan rabadre denkä jire chi jene jene mentokwäre, aisetate ni brare käkwe ñan meri tuadremetre, niebare kwe.

<sup>7</sup> Abtä nitre bariseo käkwe nieba mda Jesuye:

Mata niere kore, ¿se ñobtä abko meri tuadremetre angwane, tärä biandre ie bti juandretari abko Moisékwe köböi biani nunye arato? nieba kwetra ie.

<sup>8</sup> Angwane Jesukwe nieba mda ietre:

Mun dokwäkä ribi ribi Ngöbökrä, ye mdenbtä abko munkwe meri tuadremetre abko Moisékwe köböi biani munye ye. Akwa kena Ngöböökwe ñan kukwe mikanintbe kore,

<sup>9</sup> aisetate ti bike niere krörö munye: Meri ja mike ngite ñakare brare mda mdabe, akwa brare kwe käkwe tuadremetre, bti ja mikadre gure meri mdabe kwe, ye ngwane ni brare ye tä ja mike ngite meri yebe meri käne kwe rüere. Abko kore se, nieba Jesukwe nitre bariseoye.

<sup>10</sup> Angwane nun ja töitikaka Jesube käkwe nieba ie:

Meri nikwe abko rabadre ni mdabe aibe dokwäre ni rabadre tuemetre amne kukwe mda mda dokwäre ñakare ne ngwane, nikwe ñan ja mikadre gure jirekäbe abko bäri kuin ñan ñan, nunkwe nieba Jesuye.

**11** Abtä Jesukwe nieba mda nunye:

Munkwe kukwe nini, ye abko era bkänä, akwa ni kwati ñan raba kaen ngäbti mikakäre täte, aisetetire nire nire ie Ngöbökwe ja di biandre kukwe ye mikakäre täte aibe tä kaen ngäbti. **12** Ne aisetetire kukwe tärä kabre btä ni brare brare kwati ñan tä ja mike gure abko krörö: Ni ruäre tä därrere kise tökare biare, abtä ñan tä ja mike gure amne tä nebe kaibe kärekäre. Akwa ni ruäre abko ni mdara jire käta dätere kaibe, abtä tä nebe kise tökare amne ñan töta nebe ja gurebtä, aisetetire tä nebe nüne kaibe; akwa ni ruäre abko ñan tä ja mike gure jirekäbe nünakäre Ngöbö gobranka kä käinbti ye kräke, aisetetire nire nire tö raba kukwe ne kaen ngäbti nünakäre kore Ngöbökrä, ye käkwe ka ngäbti. Abko kore se, nieba Jesukwe nun ja töitikaka benye.

*Jesukwe ja di biani ngäbäkre kiakiaye*

*(Marcos 10.13-16; Lucas 18.15-17)*

**13** Yebti ngäbäkre järikaba ruäre nebe Jesu känti abko Jesukwe kise mikadre bti, käkwe blitadre Ngöböbe kräke, akwa nun ja töitikaka Jesube rababa ñäke nitre ngäbäkre ngwianka yeye. **14** Abtä Jesukwe nieba nunye:

Ngäbäkre ye tuemetre kite tie. Munkwe ñan ji öta käne, ñobtä ñan angwane nire nire käta ja mike bobre Ngöböbtä ngäbäkre ne kwrerekwrere, ni yebti abko Ngöböta gobrane, aisetetire munkwe ñan ji öta käne, nieba Jesukwe.

**15** Yebti Jesukwe kise mikaba ünän jökrä ngäbäkrebti, ja di biankäre ietre, bti kä mikakaba kwe.

*Ni batj jändräñ bkänkä kabre käkwe blitabare Jesube*

*(Marcos 10.17-31; Lucas 18.18-30)*

**16** Yebti ni rikaba iti nebe Jesu känti, käkwe nieba krörö ie:

Dirikä, ¿sribi mden bäri kuin nuendre tikwe abko ütiäre ti rabadre nüne kärekäre Ngöböbe? nieba kwe Jesuye.

**17** Angwane Jesukwe nieba mda ie:

¿Ye ñobtä abko sribi mden bäri kuin nuendre btä mata kukwe ngwentari tie ye? Ni kuin abra tärä itibe abko Ngöbö ara, akwa ma tö nünai kärekäre Ngöböbe ne ngwane, kukwe biani nuendre nie Ngöbökrä, ye makwe mika täte jökrä, nieba Jesukwe ie.

**18** Angwane ni batj ye käkwe nieba mda Jesuye:

¿Kukwe mden mden mikadre täte tikwe? nieba kwe ie.

Jesukwe nieba mda ie:

Makwe ñan ni mda kämika.

Ma gure, makwe ñan ja mika gure batj batj ni mda mdabe.

Makwe ñan go.

Makwe ñan blita ngwarbe ni mda mda rüere kitakäre ngite.

**19** Erere arato, ma rün amne ma meye mika ütiäre jae.

Amne mata ja tarere au,

ye kwrere makwe ni mda mda tare arato,

*Exodo 20.12-16; Deuteronomio 5.16-20;*

*Levítico 19.18*

nieba kwe ie.

**20** Angwane ni ye käkwe nieba mda Jesuye:

Makwe kukwe nini, ye erere tita mike täte jökrä. ¿Se abko tikwe dre nuendre mda se? nieba kwe ie.

**21** Abtä Jesukwe nieba mda ie:

Ma tö rabai metre Ngöbö ngwärekri ne ngwane, jändräñ tä makwe ye erere nän rürümoin jökrä, bti makwe ngwian ye dräi ni bobre bobrebtä angwane, ma rabadi jändräñ ütiäre kri bkäne kabre kä käinbti sete. Makwe jändräñ rürümoin ünän jökrä kore, bti ma jata ti jiebti. Abko kore se, nieba kwe ni batj yeye.

**22** Jesukwe nieba kore ie angwane, niara abko jändräñ bkäne kabre krübäte, aisetetire moto rötateba jändräñ kwekwe ye jiebti amne moto rababa ulire, ben rikabata.

**23** Yebti nun ja töitikaka Jesube, ie Jesukwe nieba:

Ti bike kukwe era erere niere krörö munye: Ni jäandrän bkänkä krikri ye käkwe ja mikadre bobre Ngöböbtä, Ngöböökwe gobrandre bti abko tare krübäte kräke, <sup>24</sup> aisetet ti bike niereta mda bati munye: Aku okwä chi, yete ta kameo krikri ye ara rikadre nuäre, akwa nitre jäandrän bkänkä kri ye käkwe ja mikadre bobre Ngöböbtä, Ngöböökwe gobrandre bti, ye abko bäri tare kräke, nieba Jesukwe nunye.

<sup>25</sup> Kukwe yebtä nun ja töitikaka Jesube ñan töi rababa krütare mda Jesu kukwei nuare. Abtä nunkwe nieba mda ie:

¿Ni jäandrän bkäne kri ñan rabadre dianintari nini makwe, se nire abko rabadi dianintari amarebti se? nunkwe nieba ie.\*

<sup>26</sup> Angwane Jesukwe nun tuaba ja käne, käkwe nieba mda nunye:

Mun kä nebtä ye kräke abko kukwe ye tare, akwa Ngöbö abko kräke jäandrän ñakare tare jire chi, aisetet niara aibe raba ni dentari, nieba Jesukwe.

<sup>27</sup> Abtä Pedro käkwe nieba mda Jesuye:

¿Nunkwe jäandrän jökrä mikaninte, bti nutta näin ma jiebti, se abko Ngöböökwe dre biandi ütiäre nunye? nieba kwe.

<sup>28</sup> Angwane Jesukwe nieba mda:

Ti bike kukwe era erere niere munye abko krörö: Ngöböökwe jäandrän jökrä ükadite btin kä mrä ngwane, ti Ni Kä Nebtä Ngobo ne rabadi täkänintbe kürä gobrankräbti kä nuärete, ye ngwane mun ja töitikaka tibe ye abko rabadi täkänintbe gware siba tibe kürä kwä jätäbti kubu yebti. Ye känti abko juta keta jätäbti ketebu nitre israelitakwe abko kräke munkwe kukwe ükadite siba tibe. <sup>29</sup> Amne nänbtä ti jiebti, nire nire käkwe ju mikaninte amne etbakantre amne ngwai mikaninte kwe, erere arato rün,meye amne ngäbriänkä kwekwe mikaninte kwe amne kä kwe erere mikaninte jökrä kwe nänbtä ti jiebti, nitre ye abko ie Ngöböökwe jäandrän biandi gre ketarike rike bäri mda amne Ngöböökwe mikadi nüne kärekäre jabe arato. <sup>30</sup> Akwa ni kwati tuen bäri ütiäre ütiäre kä ne ngwane, ye abko rabadi ütiäre ñakare Ngöbö ngwärekri; akwa ni kwati tuen ngwarbe, ütiäre ñakare kä ne ngwane, ye abko rabadi bäri ütiäre Ngöbö ngwärekri. Abko kore se, nieba Jesukwe nun ja töitikaka benye.

## 20

### *Sribikä uba gräte, btä Jesukwe kukwe bä mikani*

<sup>1</sup> Yebti Ngöbö abko ñan tä sribi ütiä bien ni kä nebtä kwrere abko Jesukwe bä mikaba mda, käkwe nieba krörö: Ngöböta gobrane ño ni kwe ngätäite abko ti bike bä mike ni kä bkänkä kwrere. Bati ni kä bkänkä nikani dekä ni känene sribikäre jakrä uba gräte. <sup>2</sup> Ye erere sribikä kwani ie angwane, sribi ütiä biandre nuäi köböiti, ye erere ükaninte kwe bentre, bti juani kwe sribire uba gräte.

<sup>3</sup> Yebti ñänä okwä krä ökän näre angwane, nikantia jutate. Nikani nebata yete angwane, ni mdara jire nämane nünaninkä ngwarbe kwani ie <sup>4</sup> angwane, niebare kwe ietre: Uba gräta tikwe sete, ye te mun nän sribire siba amne sribi ütiä bianta ño, ye näre tikwe ütiä biandi munye, niebare kwe ietre. Ye erere bkänä, nitre ye nikani sribire.

<sup>5</sup> Yebti ñänä ruäre näre angwane, kä bkänkä ye nikantia jutate ni mda mda känene. Erere arato ñänä okwä krämä dere angwane, nikantia amne nitre kwani ie yete, erere juani sribire kwe arato uba gräte. <sup>6</sup> Yebti ñänä okwä krärike näre dere angwane, kä bkänkä ye nikantia jutate amne ni mda nämane ngwarbe abko kwani ie angwane, niebare kwe ietre: ¿Ñobtä mutta sribire ñakare amarebti mutta ngwarbe nete köböiti jire se? niebare kwe ietre. <sup>7</sup> Angwane nitre ye käkwe niebare mda kä bkänkäye: Sribi bkänkä nun känene ñakare sribikäre jakrä, ¿se abko nunkwe sribidre mdente? niebare

---

\* <sup>19:25</sup> Jesu näire ni ngwian bkäne kri abko nämane ngwian bkäne, ñobtä ñan angwane Ngöbö nämane ja di bien ietre, aisetet bäri Ngöbö kukwe muko, aisetet rabadre dianintari käne, nitre israelita nämane nütüre Jesu näire. Ne aisetet, nitre ja töitikaka Jesube abko ñan töi namani krütare Jesu kukweibtä.

kwetre ie. Angwane kä bkänkä kákwe niebare ietre: ¡Mun nän sribire jötrö arato uba gräte tikrä sete! niebare kwe ietre. Ye erere bkänä nitre ye nikani sribire.

<sup>8</sup> Yebti kä jatanina iko dere angwane, kä bkänkä ye kákwe niebare nitre sribikä ye dänkienye: Sribikätre ye kärere jökrä, bti makwe sribi ütiä bian ietre. Akwa nitre nü sribire bäri mrä, ye ara jire ie makwe sribi ütiä bian käne. Abti nitre niki sribire bäri käne ye abko ie makwe sribi ütiä bian mrä, niebare kwe ie. <sup>9</sup> Ye erere bkänä, nitre nükani sribire mrä ñänä okwä krärike dere, ye ie sribi ütiä köböiti biani täte jökrä.

<sup>10</sup> Yebti nitre nikani sribire bäri käne dekä ye nikani sribi ütiä tuen jae angwane, sribi ütiä biandi bäri kabre ietre namani nütüre, akwa sribi ütiä biandre nuäi köböiti, ye erere biani täte ietre. <sup>11</sup> Sribi ütiä dianina kore kwetre angwane, nikani ñäke kä bkänkä ye rüere, <sup>12</sup> kä namani niere: Nitre nü mrä köre kákwe sribiniri ñänä okwä kratibe, akwa nun abko kákwe sribiniri tare ñänä ngirete ta nebebe kä dere. ¿Se ñobtä abko munkwe sribi ütiä bini ja näre nunye niaratrebe se? niebare kwetre. <sup>13</sup> Abtä kä bkänkä ye kákwe niebare krörö sribikä iti ie: Ja mräkä, ñan tita kukwe nuene blo ma rüere ruen tie, ñobtä ñan angwane sribi ütiä bianta nuäi köböiti, ye erere tikwe biandi mae abko nikwe ürüte kore dekä, ye tä töre mae ruen tie. <sup>14</sup> Ne aisetet sribi ütiä makwe, ye erere kaen ngäbti, bti ma rikata ja gwiriete, ñobtä ñan angwane nitre nü sribire mrä dere abko ie tikwe sribi ütiä bini ja kwrere mabe, ye abko kukwe tikwe, <sup>15</sup> ñobtä ñan angwane ngwian ye abko tikwe, aisetet ti tö rabadre dre dre nuein bti, ye erere ti rabadre nuene ruen tie. ¿Akwa tita ja moto mike kuin sribikä mrä se kräke, yebtä ma nibi mokrere ben ya ño ye? niebare kwe abko nakaninkä kore. Ne ngörä.

<sup>16</sup> Ne aisetet nire nire rabadre mrä, ye abko rabadita käne amne nire nire tä käne ye abko rabadi mrä, [ñobtä ñan angwane Ngöböta ni kwati nübaire, akwa ni braibe abko diankata jakrä kwe.] Abko kore se, nieba Jesukwe.\*

### *Jesu müre ketadi abko niebare bämäkäre kwe*

(Marcos 10.32-34; Lucas 18.31-34)

<sup>17</sup> Yebti Jesu rikabara ji ngrabare Jerusalén kukwäre angwane, nun ni jätabti nibu ja tötitakaka ben, ye abko käräba kaibe mento kwe, kákwe nieba nunye:

<sup>18</sup> Mtare nita näin Jerusalén kukwäre. Ni näin nebe Jerusalén, ye känti ti Ni Kä Nebtä Ngobo ne kitadi ngise nitre blitaka Ngöböbe ni mda mda diäre dänkienye amne Kukwe Biani Ngöbökwe Moiséye dirikätre yeye. Niaratre ye abko kákwe ti kitadi ngise müre ketadre amne, <sup>19</sup> nitre romanobo ñakare israelitare abko ie ti kitadi ngise amne niaratre kákwe ti mikadi yakrä kri jae amne ti kwata metadi krübäte kwetre. Yebti ti müre ketadi krusobtä kwetre, akwa köbömäkäre angwane, ti rükadita nire. Abko kore se, nieba Jesukwe nunye.

### *Juan btä Santiagomeye kákwe kukwe ribebare Jesuye*

(Marcos 10.35-45)

<sup>20</sup> Abti Zebedeo ngäbriänkä nibu Santiago btä Juan abko ben meye jataba kákwe krötäba Jesu ken angwane, rikaba ngitiekä ngukudokwäbti temen Jesu ngwärekri ja di käräkäre ie. <sup>21</sup> Angwane Jesukwe nieba ie:

¿Ma tö nibi dreye amarebti ye? nieba kwe ie.

Angwane Zebedeo ngäbriänkä ye meye kákwe nieba krörö mda ie:

Ma raba gobrane angwane, makwe ngäbäkre tikwe noko mika bäri ütiäte, kákwe mika täkäintbe iti ja küde ruenkri amne iti ja küde ngeberekri abko ti tö nibi ribei mae, nieba kwe Jesuye.

<sup>22</sup> Abtä Jesukwe nieba mda Zebedeo ngobo nibu yeye:

¿Tikwe ja tare nikadi kri krübäte, ye kwrere munta biare ja tare nike siba ya? nieba kwe ietre.

Jänri, nieba kwetre ie.

<sup>23</sup> Angwane Jesukwe nieba mda ietre:

\* 20:16 Kukweta tikani corcheta ngätäite abko ñan tä tikani manuscrito bäri kuinkuin btä.

Munkwe ja tare nikadi kri ti kwrere arato, akwa nire rabadre täkänintbe ti küde ruenkri amne nire rabadre ti küde ngeberekri, ye abko ñan tä ti kisete akwa tä ti Rün kisete. Ye aise, nire nire kräke kä ye tä ükaninte ti Rünkwe abko erere ie biandi kwe, aise ti ñan raba bien munye, nieba kwe ietre.

<sup>24</sup> Jesu näma blite kore, ye nun ni jätä ja tötitkaka ben käkwe gaba angwane, Juan btä Santiago ye kräke nun moto rababa romon mda. <sup>25</sup> Abtä Jesukwe nun käräba, käkwe nieba krörö nunye:

Nitre ñakare israelitare käta gobrane angwane, tätre kukwe miketbe tare ni mda mda mikakäre ja ngoto täni. Erere arato, nitre ütiäte krikri ñakare israelitare abko ni mda mdakwe mikadre ütiäte jae, abkokäre tätre bike krikri, ye abko gare kuin munye. <sup>26</sup> Akwa mun ja tötitkaka tibe, ye ngätäite abko ñan rabadre bare jire chi kore, aise mun ngätäite abko kukwe rabadre bä jene abko krörö: Nire nire tö rabai bäri ütiäte kri mun ngätäite ye abko käkwe sribidre ni bobre kwrere ni mda mdakrä <sup>27</sup> amne, nire nire mun ngätäite tö rabai bäri käne jäandrän jökräbtä, ni ye abko rabadre ni klabore kwrere ni mda mdakrä, <sup>28</sup> ti Ni Kä Nebtä Ngobo ne jatani kore ye kwrere, ñobtä ñan angwane ñan ni mda mdakwe sribidre tikrä, abkokäre tijatani, akwa ti jatani sribikäre ni mda mda kräke amne ti jatani ja mike müre ketadre ni kwati kökatarikäre Ngöbökrä. Abko kore se, nieba Jesukwe nun ja tötitkaka benye.

*Ni nibu okwä kä drünente abko Jesukwe mikaninta kuin*

(Marcos 10.46-52; Lucas 18.35-43)

<sup>29</sup> Yebti nun näma Jericó, bti nun rikaba ta angwane, ni kwati rikaba siba Jesube.

<sup>30</sup> Angwane ni okwä kä drünente näma nibu täkänintbe jibtä. Jesu rikaba ta ji yebti gaba kwetre angwane, rikaba ngwänenkä kri krörö Jesu jiebti:

¡Jrei David tukwe mräkä, nun ngwen ruentari tare jae! rababa niere.

<sup>31</sup> Angwane nitre nibu ye käkwe kada ketadre, abkokäre nitre kwati rababa ngren ngren bti, akwa niaratre abko rababa ngwänenkä bäri krikri mda, kä rababa niere:

¡Nun Dänkien, ma abko jrei David tukwe mräkä, nun ngwen ruentari tare jae! rababa niere Jesu jiebti.

<sup>32</sup> Abtä Jesu rababa nünaninkä, käkwe nitre nibu okwä kä drünente ye käräba, ye erere rükaba Jesu känti angwane, Jesukwe nieba ietre:

¿Tikwe dre nuendre munkrä, ie mun tö nibi? nieba Jesukwe ietre.

<sup>33</sup> Angwane niaratre käkwe nieba mda ie:

Nun Dänkien, makwe kä mikadre tuen nunye, ie nun tö nibi, nieba kwetre Jesuye.

<sup>34</sup> Angwane nitre nibu ye rababa ruentari tare Jesuye, käkwe kise mikaba okwäbtä. Ye btäräbe kä rababa tuen kuin batibe ietre angwane, rikaba siba Jesube.

## 21

*Jesu nikani nebe Jerusalén*

(Marcos 11.1-11; Lucas 19.28-40; Juan 12.12-19)

<sup>1</sup> Abti nun jatabara neme ja ken Jerusalén angwane, nun rababa juta Betfagé känti Ngítio Olibobtä. Ye känti Jesukwe nun ja tötitkaka ben juanba nibu, <sup>2</sup> käkwe nieba krörö ietre:

Juta tuen känime ni ngware ta. Se känti mun nän. Mun rabadi sete angwane, buro möre tädi mäkäninte kwandi munye angwane, buro ye abko ngäbäli tädi btä kwandi munye. Buro möre ye tikate munkwe, mun jata ngwena tie. <sup>3</sup> Akwa nane nitre yete käkwe ñäkä munye dokwäre angwane, munkwe nie krörö ietre: Ni Dänkien tö nibi ie, aise, nun bike niken ngwena, akwa gwängwarbe juandita kwe munkrä, nie kore, nieba Jesukwe nitre nibu ye.

Bti juani kwe. <sup>4</sup> Kukwe rababa bare kore, kukwe niebare kira ni Ngöbö kukwei niekäkwe rabadre bare abkokäre. Kukwe ye tä tikani krörö Ngöbö Kukweibtä:

<sup>5</sup> Nitre nünanka juta Síonte, ye ie niere krörö:

Jrei munkwe kitera nüke tuen sete. Tä näin bobre buro ngäbälibti.

Buro tribe ngwianka abko ngäbälibti tä näin ye,  
abko nämane tikani kore abko erere rabadre bare, abkokäre Jesukwe nitre juanba kore.

*Zacarías 9.9*

<sup>6</sup> Ye erere bkänä, ni ja tötitaka Jesube juanba nibu kwe, ye abko käkwe dre nuendre nieba kwe ietre, ye erere nuenba kwetre, <sup>7</sup> kä rikaba buro möre ye ngwena ngäbäli ben gware, käkwe dän jabtä ye tikateba ötati, bti kitaba buro ngäbäli ye tröbti kwetre ja täkräre Jesuye angwane, Jesu rankwaba buro ngäbäli yebti. <sup>8</sup> Ye ngwane abko nitre nämä kwati krübäte amne ni ruäre rababa dän jakwe metete ji ngrabare temen dikakakrä Jesuye amne, ni ruäre abko rababa kri küde tikekä, bti rababa mike ji ngrabare temen dikakakrä Jesu kakäre ngäbäli jrei kwrere. <sup>9</sup> Angwane nitre nämä näin ruäre Jesu känenkri amne ruäre Jesu jiebti, ye abko rababa ngrente ja dibti, kä rababa niere krörö:  
¡Hosanal! ¡Jrei David tukwe mräkä, ma kite ni Dänkien Ngöbö käbti!  
Ma ye aibe raba mikani ütiäte.

¡Hosanal! ¡Ari Ngöbö kri kä käinbti käikitekä bäri krikri!  
abko nitre ye rababa niere.

*Salmos 118.26*

<sup>10</sup> Yebti Jesu rikaba nebe Jerusalén angwane, jötrö kä rababa nokre jabtä jutate yete amne ni kwati rababa niere krörö:

¿Nire nü amarebti se? rababa niere jae kwärikwäri.

<sup>11</sup> Angwane nitre nämä yete käkwe niebare ietre:

Ni Ngöbö kukwei niekä kädianta Jesu abko nü nete. Niara abko Nazarebo kä Galileate abko mden nü nete, niebare kwetre.

### *Jesukwe nitre juanintari ju blitakrä Ngöböbe känti*

(Marcos 11.15-19; Lucas 19.45-48; Juan 2.13-22)

<sup>12</sup> Yebti ju blitakrä Ngöböbe, ye bäre Jesu rikaba angwane, nitre nämä jäandrän rürümoine yete amne ruäre abko nämä jäandrän kökö abko Jesukwe juantariba jökrä mento. Erere arato, nitre nämä ngwian kwite\* ni mda mdakrä abko kän Jesukwe mesa kwitakaba temen se kwrere amne ütü rürümoinkä kwe ja täkrä nämäne, ye abko Jesukwe kwitakaba jökrä temen se kwrere arato. <sup>13</sup> Yebti Jesukwe nieba nitre jäandrän rürümoinkä yeeye:

Ngöbö Kukwei tä tikani krörö:

Ju tikwe ne abra tä blitakrä tibe,  
niebare Ngöbökwe, akwa mun abko tä ju ne mike nitre gokä jue kwrere. Abko kore se, nieba Jesukwe.

*Isaías 56.7*

<sup>14</sup> Ye ngwane abko nitre okwä kä drünente amne nitre näin nakwente nakwente rababa nüke ju blitakrä Ngöböbe ye bäre Jesu känti angwane, Jesu rababa miketa kuinta jökrä. <sup>15</sup> Akwa sribi kri ñan tuabare Jesu rababa nuene, ye abko nitre blitaka Ngöböbe ni mda mda diäre dänkientre btä Kukwe Biani Ngöbökwe Moiséye dirikätre käkwe tuaba angwane, ju blitakrä Ngöböbe ye käntita abko ngäbäkre rababa ngrente krikri, kä rababa niere: ¡Hosana, jrei David tukwe mräkä abko tä nete! Ari käikitekä abko ngäbäkre rababa niere, ye kukwei jaraba ietre angwane, moto rababa romon, <sup>16</sup> käkwe nieba Jesuye:

¡Ngäbäkre tä ma käikitekä kore ye kukwei ruen ñakare mae ya amarebti ye! nieba kwetre Jesuye.

Angwane Jesukwe mda ietre:

Jänri, kukwe ruen tie. ¿Akwa kukwe kore btä Ngöbö Kukwei tä tikani, yebtä munta ñäke ñakare ya amarebti ye? Ngöbö Kukwei käta niere krörö:

Ngäbäkre kiakia käkwe kantadre mae amne ngäbäkre kianbtä kianbtä arato abko ma tö  
namani kukwei nuai,  
abko nieta kore, nieba Jesukwe.

*Salmos 8.2*

<sup>17</sup> Yebti Jesukwe kä mikakaba nitre yebtä, bti rikabata juta bäre mento angwane, rikaba nebe juta Betaniate, känti kibiaba kwe.

\* 21:12 ngwian kwite. Ngwian kä mdabti kwita nämäne ngwian ju blitakrä Ngöböbe yebe.

*Jesukwe ñäkäbare higokrieye  
(Marcos 11.12-14,20-26)*

<sup>18</sup> Yebti dekä angwane, Jesu rikabata juta Jerusalén kukwäre angwane mrö rababa ie.  
<sup>19</sup> Angwane higokrie näma käname jibtä, btä okwä rababa angwane, rikaba nebe higokrie ye känti. Rababa higokrie ye känti angwane, higo kä aibe kwanba btä ie, akwa ngwä abko ñakare. Abtä Jesukwe nieba krörö higokrie yeye:

¡Ma ñan ngwä rabata jire chi mda! nieba kwe ie.

Jötrö higokrie ye bä grötakaba nötare. <sup>20</sup> Kukwe rakakaba kore nun okwäbti, yebtä abko nun ja töitikaka Jesube ñan töi rababa krütare mda, käkwe nieba Jesuye:

¿Ñobtä makwe ñäri jirekäbe higokrie seye amarebti jötrö ngwarbe bängrökä nötare mda se? nunkwe nieba ie.

<sup>21</sup> Abtä Jesukwe nieba mda nunye:

Ti bike kukwe era erere niere munye abko krörö: Munkwe tödekadre kwatibe Ngöböbti amne munkwe ñan ja töi mikadre ngwarbe kwäräkwärä, ye ngwane ñan kukwe nuni higokriebtä tikwe, ye kwrere aibe rabadre bare munye, akwa mun rabadre niere ngitio nokoye: Ja denkä mento yete. Ma rika mrente, munkwe niedre ie, ye erere rabadre bare munye. <sup>22</sup> Munkwe tödekadre kwatibe Ngöböbti, käkwe blitadre ben angwane, dre dre munkwe kärädre ie, ye rükadre mun kisete. Abko kore se, nieba Jesukwe nun ja töitikaka benye.

*Nire diebti Jesu nämane sribire abko ngwianintari ie  
(Marcos 11.27-33; Lucas 20.1-8)*

<sup>23</sup> Yebti ju blitakrä Ngöböbe ye bäre Jesu rikabata mda. Jesu näma dirire yete angwane, nitre blitaka Ngöböbe ni mda mda diäre dänkientre amne nitre unbre ji dokwäte ye jataba nüke Jesu känti, käkwe nieba ie:

¿Nirekwe ma mikani sribi nuene kore amne nire diebti mata kukwe nuene kore nete? nieba kwetre ie.

<sup>24-25</sup> Angwane Jesukwe nieba mda ietre:

Ti bike kukwe ngwentari kwati arato munye. ¿Nirekwe Juan Bautista juani ni ngökö ñöte? ¿Ngöbökwé juani ya o ni kä nebtäkwe mikani sribire ya? Ye niere tie munkwe. Nirekwe juani, ye munkwe niedi tie ne ngwane, nire diebti titä sribi ne nuene abko tikwe niedi munye arato, nieba kwe ietre.

Yebtä abko rikabata blite jabe kwärikwäri, kä rababa niere krörö: Ngöbökwé juani, nikwe niedre ie angwane, niarakwe niedre krörö mda: Ngöbökwé juani munta niere, ¿se ñobtä abko munkwe ñan kukwei mikani era jae? niedre kwe nie. <sup>26</sup> Akwa, ni kä nebtäkwe mikani, ni ñan rabadre niere jire chi ie, ñobtä ñan angwane Juan abko ni Ngöbö kukwei niekä era metre, ye abko ni jökrä käta mike era, aisetetitre ye abko nita jürä ngwen, aisetetitre Juan mikani sribi ye nuene ni kä nebtäkwe abko ni ñan raba niere jire chi, rababa niere jae kwärikwäri.

<sup>27</sup> Abtä nieba krörö kwetre Jesuye:

Nirekwe Juan juani, ye gare ñakare nunye, nieba kwetre.

Angwane Jesukwe nieba mda ietre:

Kore ne ngwane, nirekwe ja di biani tie sribi ne nuenkäre abko tikwe ñan niedre munye arato, nieba Jesukwe ietre.

*Jesukwe bä mikani ngäbäkre nibubtä*

<sup>28</sup> Yebti Jesukwe nieba mda nitre blitaka Ngöböbe ni mda mda diäre dänkientreye amne nitre unbre ji dokwäteye:

¿Kukwe ne raba tuen ño munye? Bati ni nämane iti abko ngobo nibu kwe. Bati nikani, käkwe niebare ngobo itiye: Ma rika sribire mtare tirete tikrä uba gräte, nieba kwe ie.

<sup>29</sup> Akwa ngobo käkwe niebare ie: Ti ñan töi rikai sribire tirete, niebare kwe rünye. Akwa yebti ja töi kwitaninta kwe amne nikani sribire.

<sup>30</sup> Yebti ngäbäkre ye rün nikani, kákwe niebare kwrere ngobo mdaye angwane, ni ye ngobo kákwe niebare ie: Jän, ti näin sribire tirete makrä, niebare kwe rünye. Akwa ñan nikani sribire abko nakaninkä kore se. <sup>31</sup> Ye abko, ¿ngäbäkre nibu ne mden kákwe rün kukwei mikani täte? nieba Jesukwe ietre.

Angwane niaratre kákwe nieba:

Ngäbäkre käne ye mden kákwe rün kukwei mikani täte, nieba kwetre Jesuye.

Abtä Jesukwe nieba mda ietre:

Ti bike kukwe era erere niere munye abko krörö: Nitre jäandrän ütiä käräkä gobran romanobokrä abko tä nebe tuen käme munye amne meri bti kä ngwarbe ngwarbe abko tä nebe tuen käme munye arato, akwa niaratre abko bti Ngöbö kä käinbti rabadi gobrane bäri käne mun ye ngwä, <sup>32</sup> ñobtä ñan angwane Juan Bautista nükani ji kuin era metre Ngöbökwe mike gare munye angwane, munkwe ñan niara kukwei mikani era jae, akwa nitre jäandrän ütiä käräkä amne meri bti kä ngwarbe ngwarbe abko kákwe niara kukwei mikani era amne kani ngäbti kwetre, aisetetniaratre abko ngäbäkre käne ye kwrere. Akwa kukwe nuenbare Juankwe abko munkwe tuani, akwa munkwe ñan Juan kukwei mikani era jae, kákwe trö kwitani ñakare kukwe kämeye, aisetetni mun ye abko ngäbäkre mda ye kwrere. Abko kore se, nieba Jesukwe ietre.

*Nitre ji dokwäte, btä Jesukwe kukwe bä mikani*

(Marcos 12:1-12; Lucas 20:9-19)

<sup>33</sup> Ti bike kukwe mdara jire bä mike ne kukwe nuen munkwe: Bati ni kä bkänkä nämane iti, kákwe uba nurai nökani, bti ki mikani kwe amne kä ükaninte biare uba ñöi ngwäre kwe. Ju mikani nura ngibiabtikä kräke kwe, bti biani kwe ni mda mdaye sribikrä. Kä biani sribikrä kwe abko ütiäre uba döi biandreta ruäre ie. Yebti nikani kä mdabti. <sup>34</sup> Abti uba ngwä ötadre abko käi nükani angwane, sribikä kákwe uba biandreta ruäre kä bkänkäye ye abko kä bkänkä kákwe sribikä kwekwe juani tuenta jakrä. <sup>35</sup> Akwa sribikätre kä bkänkäkwe ye nikani nebe angwane, sribikätre ubabtä ye ie neketaninte, nikani sribikä iti mete ja ñäte kwäräkwärä se kwrere. Iti mda abko kämikani kwetre amne iti mda abko täkäni jähti kwetre kämikakäre.

<sup>36</sup> Yebti kä bkänkä kákwe sribikätre juani bäri mda uba tuenta ruäre jakrä, akwa sribikätre ubabtä ye kákwe nuenbareta kwrere arato btätre. <sup>37</sup> Abtä mrä angwane, kä bkänkä ye kákwe odoi jen kwe ara jire juani, kä namani töbige krörö: Ti odoi ne aibe abko mikadi ütiäte sribikätrekwe, aisetetni bike juen, namani nütüre. <sup>38</sup> Ye erere bkänä juani kwe, akwa kä bkänkä ye odoi nikani tuen sribikätre ubabtä yeye angwane, niebare kwetre jae kwäräkwäri:

Ni se abko rabadi jäandrän rünkwe bkäne jökrä, aisetetni ari kämike amne ni rabadi kä ne bkäne jökrä, niebare kwetre.

<sup>39</sup> Ye erere bkänä, kä bkänkä odoi ye neketaninte ietre, nikani ngwena uba grä bäre mento, bti kämikani kwetre se kwrere.

<sup>40</sup> ¿Yebti kä bkänkä rikadre mda angwane, dre nuendre kwe sribikätre käme yebtä raba ruen munye? nieba Jesukwe.

<sup>41</sup> Angwane nitre yete ye kákwe nieba mda:

Kä bkänkä ye ie sribikä moto kämekäme ye rabadre ruentari tare ñakare, kákwe kämikadre jire jökrä. Abti sribikä mden mden kákwe nura ütiä biandre ie nura ngwä öta näire, ye ie tire ye biandre kwe mda, nieba kwetre.

<sup>42</sup> Bti Jesukwe ja bä mikaba jä kwrere amne, nitre dirikä krikri abko bá mikaba ju mikaka kwrere, kákwe nieba ietre:

Kukwe nebtä Ngöbö Kukwei tä tikani abko btä mun tärä ñäke ruen tie abko krörö: Jä ütiäte kri ju mikakrä metre abko nitre ju mikaka kákwe kitaninkä, akwa jä ye abko ni Dänkien kákwe mikani bäri ütiäte ju mikakrä metre.

Ye abko namani tuen bäri nuäre nie, *Salmos 118.22-23*  
abko tä tikani kore. <sup>43</sup> Ne aisetetni bike niere krörö munye: Munkwe sribibare ñakare era metre, sribikätre käme ye kwrere, aisetetni Ngöbökwe ñan gobrandre munbti amne juta

mda kákwe sribidre era metre Ngöbökrä, ye abko bti Ngöbö rabadi gobrane. <sup>44</sup> Angwane ni ütiäte kri jä kwrere tikwe nini, ye abko btä nire nire ritadrete amne rikadre temen jä yebti angwane, jä ye kákwe ni ye ötadibä kiakia jökrä ngrabare. Erere arato, nire nire bti jä ye rikwitadrekä angwane, gütadikä mnüne jökrä jä ye täni arato. Abko kore se, nieba Jesukwe ietre.

<sup>45</sup> Jesukwe kukwe bärä mikaba btä blitaba kwe ye abko nitre blitaka Ngöböbe ni mda mda diäre dänkientre rüere amne nitre bariseo rüere näma blite gaba kwetre. <sup>46</sup> Angwane niaratre tö rababa Jesu kitai ngite kä teri, akwa Jesu abko Ngöbö kukwei niekä abko ni kwati näma mike era jae, abtä ni kwati ye jürä rababa btätre.

## 22

### *Ni ja mikaka gure, btä Jesukwe kukwe bärä mikani (Lucas 14.15-24)*

<sup>1</sup> Yebti Jesu rikaba bliteta amne kukwe mda bärä mikaba kwe, kákwe nieba krörö:

<sup>2</sup> Ngöbö kä käinbti käta gobrane ño nibti abko ti bike bärä mike krörö: Bati jrei nämane iti abko ngobo jatani ja mike gure angwane, jrei ye kákwe mrö sribebare kri kä ngwiankäre nuäre jabtä. <sup>3</sup> Yebti nitre nübaibarera kwe kä ngwen nuäre jabtä ye abko sribikätre juani kärere kwe, akwa nitre nübaibare kwe ye ñan tö namani näin. <sup>4</sup> Abtä sribikä mdara jire juani jreikwe, kákwe niebare krörö ietre: Nitre nübaibare tikwe, ye ie munkwe nie krörö: Tikwe nbi kämikamna amne tikwe jändrän mda mda köteköte kämikamna kwetadre, aiseteköte mrö nena biare jökrä amne nitre nübaibare tikwe ye jata kä ngwen nuäre jabtä tibe, munkwe nie ietre, niebare kwe sribikätre yeeye.

<sup>5</sup> Ye erere sribikätre nikani, kákwe niebare, akwa nitre nübaibare jreikwe ye kákwe sribikätre ye kukwei mikani ngwarbe. Ni ruäre nikani jirekäbe tirete amne ni ruäre abko nikani jändräni mda mda nuene. <sup>6</sup> Akwa ni ruäre abko ie sribikätre jreikwe ye neketaninte, nikani mete kwäräkwärä se kwrere, bti mrä kämikani kwetre. <sup>7</sup> Abtä jrei ye moto namani romon krübäte. Abtä rükä kwekwe ye juani kwe, kákwe nitre moto kämekäme ye kämikani jökrä, bti juta ye kukwani jökrä kwetre sribikätre kwe ye dokwäre.

<sup>8</sup> Yebti jrei ye kákwe niebare sribikätre mda mdaye: Ti ngobo tikwe bike ja mike gure, kräke mrö nena biare jökrä kä ngwiankäre nuäre jabtä, akwa nitre nübaibare tikwe abko rükadre kä ngwen nuäre jabtä, akwa ti kukwei kitani temen kwetre, yebtä abko moto käme bärä mikani kwetre jabtä. <sup>9</sup> Mtare mun nän ji kri ngrabare sere amne nire nire kwan ji ngrabare munye, ye erere munkwe nübai jökrä kä ngwen nuäre jabtä tibe nete, niebare jreikwe sribikäye. <sup>10</sup> Ye erere bkänä, sribikätre ye nikani ji ngrabare angwane, nire nire kwani ietre ji ngrabare, ye erere ükaninkrö jökrä kwetre, ni moto käme amne ni moto kuin, ni ño erere jänikani jökrä kwetre angwane, ju kä ngwiankrä nuäre jabtä, ye te ni namani iti jökrä.

<sup>11</sup> Yebti nitre nübaibare kä ngwen nuäre jabtä, ye namanina jökrä gwi angwane, jrei nikani mike ñäräre. Jrei namani gwi angwane, ni nämane iti yete abko dän kitadre jabtä nänkrä kä ngwiankrä nuäre jabtä ni ja mikaka gure känti, ye abko nämane ñakare btä.

<sup>12</sup> Abtä jrei ye kákwe niebare ni yeeye: Ja mräkä, dän kitadre jabtä makwe abko ñakare mabtä, ye abko ma nü ño gwi nete siba, niebare kwe ie. Angwane ni ye rababa kwekbe jirekäbe. <sup>13</sup> Angwane nitre mrö mikaka mesabtä mesabtä, ye ie jreikwe niebare: Ni noko ngoto amne kise mäkete, bti munkwe kitaka kä bäri iko te ju bäre sere. Ye känti niara rabadi ja müaire krikri be amne tu ngö rabadi cherere jabtä ja tare nika kisete, <sup>14</sup> ñobtä ñan angwane Ngöböta ni kwati nübaire, akwa ni braibe abko diankata jakrä kwe. Abko kore se, nieba Jesukwe.

### *Ja ütiä biandre gobranye ya, ñakare ya (Marcos 12.13-17; Lucas 20.20-26)*

<sup>15</sup> Yebti nitre bariseo kákwe gätäbare angwane, tö namani Jesu tuai ja dokwä mike kö okwäre, aiseteköte Jesukwe ñakadre blo gobran romanobo rüere abtä kitadre ngise kwetre,

abkokäre ja töi mikani kватibe kwetre Jesu rüere, <sup>16</sup> kákwe nitre reketaka jakri juani ruäre nitre reketaka Herodekri ben gware niekäre krörö Jesuye:

Dirikä, mata kukwe era erere niere, ye gare kuin nunye amne ji Ngöbökwe abko dirita era metre arato makwe, ye gare nunye arato. Erere arato, ni mda mda tä ño niere ma rüere diribä kore, ye abko ñakare ütiäte makrä, ñobtä ñan angwane ñan mata blite ni mda mda moto mikakäre nuäre, ye garera nunye. <sup>17</sup> Ne aisetekukwe nebtä makwe dre niedre abko nun tö nibi gai abko krörö: ¿Emperador romanobo César abko ie nunkwe ja ütiä biandre ye abko dbe ya, ñakare ya niere nunye? nieba kwetre Jesuye.

<sup>18</sup> Nitre ye näma töbike blo Jesu rüere, ye Jesukwe gaba btätre. Abtä nieba mda kwe ietre:

Mun ngwarbe ja bä mike kuin tibtä nete. ¿Se ñobtä tikwe ja dokwä mikadre kö okwäte au, abkokäre mun kite kukwe ngwentari kore tie ye? <sup>19</sup> Ngwian bti munta ja ütiä bien, ye mike tuadre tie, nieba Jesukwe ietre.

Ye erere bkänä, ngwian denario bianba kwetre Jesuye. <sup>20</sup> Angwane Jesukwe nieba mda ietre:

¿Nire bä amne nire käta tikani ngwian nebtä? nieba Jesukwe ietre.

<sup>21</sup> Angwane niaratre kákwe nieba mda Jesuye:

Emperador César bä amne käta btä, nieba kwetre.

Abtä Jesukwe nieba mda ietre:

Jändrän emperadorekwe erere munkwe bian emperadoreye amne jändrän Ngöbökrä erere munkwe bian Ngöböye. Abko kore se, nieba kwe ietre.

<sup>22</sup> Jesukwe ñákäba kore ietre, ye kukwei nuaba kwetre angwane, ñan töi rababa krütare Jesu kukweibä, ñobtä ñan angwane ja kitani ngite ñakare Ngöbö rüere o César rüere aisetekukwe ngwentari Jesubä yete, rikabata jökrä.

*Ni krütani rükadreta nire ya abko ngwianintari Jesuye*

(Marcos 12.18-27; Lucas 20.27-40)

<sup>23</sup> Abti köbö ye arabe näire, nitre saduseo rikaba ruäre ja tuakäre Jesube. Nitre saduseo ye abko ni krütanikrütani mikadreta nire Ngöbökwe abko ñan nämane mike era, aisetekukwe ngwentari Jesuye, kákwe nieba ie:

<sup>24</sup> Dirikä, Moisékwe niebare krörö: Ni iti tädre gure, akwa ngäbäkre ñakare kwetre amne ni ye krütadre angwane, merire rabadre kaibe, meri ye abko yäräkwe diandre jae mda. Yebti ngäbäkre rabadre kwetre angwane, ngäbäkre ye abko rabadre niara etba krütani ngobo kwrere, niebare Moisékwe. <sup>25</sup> Ye erere bati nun ngätäite nete nitre ja etbarebe nämane ni kükü. Nitre ye etba mubai kákwe ja mikani gure, akwa ngäbäkre ngämi nebe kwetre angwane, ni ye krütani, aisetekukwe merire namani kaibe ie, ye abko namani etba siba kräke. <sup>26</sup> Ye erere bkänä meri ye namani yärä mda yebe, akwa brare krütani kän arato. Abtä meri ye namani yärä mdabe, akwa brare krütaninta kän arato. Ye kwrere nikani nakenä janknu ja täritäri. Abti nitre ni kükü ye krütani jökrä meri ye kisete. <sup>27</sup> Abti mrä angwane, meri ye krütani arato. <sup>28</sup> Akwa ni krütani rükadreta nire mata niere, aisetekukwe ni brare ni kükü, ben meri ye namani jökrä, abti niaratre ni kükü ye rükadreta nire jökrä angwane, meri ye rabadi nire nän mukore abko niere nunye, nieba kwetre Jesuye.

<sup>29</sup> Angwane Jesukwe nieba mda ietre:

Ngöbö Kukwei gare ñakare munye amne Ngöbö di kri gare ñakare munye arato, aisetekukwe ngwarbe blo kore. <sup>30</sup> Ni krütanikrütani rükadita nire angwane, ni merire, brare kákwe ñan ja mikadre gure, ñobtä ñan angwane niaratre abko rabadi angele kä käinbi kwrere. <sup>31</sup> Mdakäre abko, ni krütanikrütani rükadreta nire abko Ngöbö ara jire kákwe niebare kira, niara nämane blite Moisébe angwane. Yebtä mun tärä ñäke ruen tie. Ngöbö Kukwei käta niere krörö: <sup>32</sup> Ti abko Ngöbö Abrahamkwe, Isaakwe amne Jacobokwe, niebare Ngöbökwe Moiséye. Abraham, Isaac amne Jacob krütanina abti Ngöbökwe niebare kore Moiséye. Ngöbö abko ñan ni ngwakäre Ngöbö akwa Ngöbö abko

ni nire Ngöböi gare nie. Ye aisetet Abraham, Isaac amne Jacob tä nüne janknu Ngöbö ngwärekri abko gare nie, nieba Jesukwe nitre saduseoye.

<sup>33</sup> Jesukwe blitaba kore, ye nitre kwati käkwe kukwe nuaba ünän jökrä angwane, Jesukwe diriba ño, yebtä niaratre töi ñan rababa krütare Jesu kukweibtä.

*Kukwe mdən bəri ütiäte mikadre täte  
(Marcos 12.28-34)*

<sup>34</sup> Jesukwe nitre saduseo kada ketaba kwäräbe jökrä kore, ye abko nitre bariseo käkwe gaba angwane, ja ükakröbata kwetre Jesu känti mda. <sup>35</sup> Angwane ni bariseo abko Kukwe Biani Ngöböökwe Moiséye dirikä arato näma iti yete abko tö rababa Jesu tuai ja dokwä mike kö okwätä, käkwe nieba krörö ie:

<sup>36</sup> Dirikä, ¿Kukwe Biani Ngöböökwe Moiséye nuendre nie, ye mdən abko bəri ütiäte? nieba kwe Jesuye.

<sup>37</sup> Angwane Jesukwe nieba mda ie:

Makwe ma Dänkien Ngöbö tare ja di ngöi jökrä, ja üai ngöi jökrä amne ja töi ngöi jökrä abko nieta kore, <sup>38</sup> aisetet kukwe ye abko bəri ütiäte amne tä bəri käne arato kukwe jökrä mda mda ngätäite. <sup>39</sup> Akwa kukwe tärä kwati mda abko bəsi kukwe käne ye kwrere arato abko käta niere krörö: Mata ja tarere au, ye kwrere makwe ni mda mda tare arato abko nieta kore Ngöbö Kukweibtä. <sup>40</sup> Munkwe kukwe ketebu ye mikadre täte ne ngwane, kukwe mda mda biani Ngöböökwe Moiséye nuendre nie, ye munkwe mikadre täte jökrä. Erere arato, kukwe biani Ngöböökwe nie ja kukwei niekä niekä köböire, ye munkwe mikadre täte jökrä arato. Abko kore se, nieba Jesukwe nitre bariseoye.

*¿Nirekri Ni Dianinkä Ngöböökwe däredre?  
(Marcos 12.35-37; Lucas 20.41-44)*

<sup>41</sup> Yebti nitre bariseo näma ja ükaninkrö Jesu känti yete angwane, <sup>42</sup> Jesukwe nieba mda ietre:

¿Ni Dianinkä Ngöböökwe abko däredre nirekri nütüta munkwe? nieba Jesukwe ietre.

Ni Dianinkä Ngöböökwe abko däredre jrei Davikri, nieba kwetre Jesu käre.

<sup>43</sup> Abtä Jesukwe nieba mda ietre:

Ni Dianinkä Ngöböökwe abko däredre Davikri mutta niere, ¿ye ñobtä abko Ngöbö Üai köböire Davikwe “ti Dänkien” niebare Ni Dianinkä Ngöböökwe yebtä? Ni ngätäite nete ni ñakare jire iti käta “ti dänkien” niere ngäbäkre kweye, akwa David abko käkwe niebare krörö:

<sup>44</sup> Ti Dänkien Ngöbö käkwe nieba ti Dänkienye:

Kä bəri ütiäte kri ti küde ruenkri, ne känti jakwe täke nete.

Ye känti ma raba abti tikwe ma rüe mikadi jökrä ma ngoto täni, *Salmos 110.1* niebare Davikwe Ni Dianinkä Ngöböökwe yebtä. <sup>45</sup> David ara jire käkwe ja Dänkien niebare Ni Dianinkä Ngöböökweibtä, ¿se ñobtä abko Ni Dianinkä Ngöböökwe abko jatadre Davikri nieta munkwe se, ñobtä ñan angwane nita Dänkien niere ñakare jire ni mräkä bəri mrä nikrä yeye? nieba Jesukwe nitre bariseoye.

<sup>46</sup> Angwane nitre bariseo ye ñan kukwe gitia jire kwati mda Jesu käre, ñobtä ñan angwane kukwe niedre ño ño ñan rababa gare jire chi ietre aisetet. Abti köbö ye näire mentokwäre ni ñakare jire iti, ie ja rababa nüke töre kukwe ngwentari Jesuye ja gakäre ben.

*Jesukwe nitre ja töitikaka ben mikani mokre  
(Marcos 12.38-40; Lucas 11.37-54; 20.45-47)*

<sup>1</sup> Yebti nitre näma yete btä nitre ja töitikaka Jesube, ie Jesukwe nieba mda:

<sup>2</sup> Kukwe Biani Ngöböökwe Moiséye dirikätre amne nitre bariseo abko tätre dirire Moisés täte, aisetet niaratre aibe kukwei ütiäte abko niaratre tä niere jabtä. <sup>3</sup> Ne aisetet nitre ye kukwei mika täte munkwe amne dre nuemna kwetre, erere munkwe nuen. Akwa niaratre

tä nüne ño, ye kwrere munkwe ñan nüna, ñobtä ñan angwane niaratre tä kukwe niere abko erere tätre nuene ñakare, akwa tätre jändrän mda nuene.

<sup>4</sup> Mdakäre abko, tribe kri doboko abko ni ñan raba kaenkä, ye kwrere jire tätre kukwe taretare ükete nuendre munye, bti tätre kite ni mda mda kötörä. Abti niaratre ñan töta nebe kise mikai jire chi tribe yebtä ni mda mda die mikakäre. <sup>5</sup> Erere arato, niaratre tä jändrän nuene, ye abko ni mda mda käkwe tuadre abko ie töta nebe abko krörö: kaja chi te Ngöbö Kukwei tä tikani täräbtä abko mikata ja okobtä amne küdebtä, akwa niaratre abko kaja krikri be tätre mäkete ja okobtä amne ja küdebtä tuadre ni mda mdaye. Erere arato, kö kitani kabre dän köräbare abko tätre kite jabtä bikakäre bari deme. <sup>6</sup> Erere arato, niaratre nübaita bietabtä angwane, ja täkrä ni ütiäte ütiäte kräke, känti tö täkäi temen. Erere arato, ja täkrä ni ütiäte ütiäte kräke sinagogate, känti töta nebe rabai täkänintbe amne ja täkrä ni ütiäte ütiäte kräke, känti tätre nebe täkänintbe. <sup>7</sup> Mdakäre abko, ni ütiäte krikri, ie köbö ngwiandretari, ye kwrere ni jökrä käkwe köbö ngwiandretari käne ietre kä jändrän rürümoinkrä ye käntita temen, ie töta nebe. Erere arato, ni mda mdakwe kädiandre dirikä abko ie töta nebe.

<sup>8</sup> Akwa dirikä niedre munye mun mräkäkwe ye abko munkwe ñan ribe jae, ñobtä ñan angwane Dirikä itibe tä munkwe abko Ngöbö ara amne mun abko ja etbare jökrä.

<sup>9</sup> Mdakäre abko, Ngöbö mun Rün itibe abko tä kä käinbti sete, aise ni mda mda kä nebtä abko mun rün munkwe ñan nie ietre mikakäre täte Ngöbö kwrere. <sup>10</sup> Erere arato, mun abko ni mda mda jie ngwianka niedre munye abko munkwe ñan ribe jae, ñobtä ñan angwane mun Jie Ngwianka era metre abko tärä munkwe. Mun Jie Ngwianka ye abko Ni Dianinkä Ngöböökwe. <sup>11</sup> Mdakäre abko, nire nire tö rabai bari ütiäte mun ngätäite, ni ye abko käkwe ja mika sribikä ni mda mdakrä, <sup>12</sup> ñobtä ñan angwane nire nire tö ja mikai kri au, ni ye abko Ngöböökwe mikadi bobre ja ngwärekri, akwa nire nire käkwe ja mikadre bobre, ye abko Ngöböökwe mikadi ütiäte kri ja ngwärekri.

<sup>13</sup> ¡Aingwaree! Mun Kukwe Biani Ngöböökwe Moiséye dirikätre amne mun bariseo käta ja bá mike kuin. Mun ye abko bobre jakän, ñobtä ñan angwane Ngöbö rükadre gobrane ni jökräbti, ye ngäniene munta jukwe dike jite, Ngöbö ñan rabadre gobrane btitre abkokäre. Ngöböta gobrane nibti, ye känti mun ñan tö rikai amne ni mda mda tö rikai abko mun ñan tä tuemetre nikken arato, aise ni mun bobre jakän. <sup>14</sup> ¡Aingwaree! Ngöbö bike mun Kukwe Biani Ngöböökwe Moiséye dirikä amne mun bariseo mike ja ngie nuen kri, ñobtä ñan angwane munta ja bá mike kuin abko krörö: Meri kän brare krütani abko kän munta ju denkä, abti munta nebe bike kuinkuin, käta nebe blite raire Ngöböökwe ni jökrä ngwärekri, akwa munta kukwe nuene kore, akwa yebtä Ngöböökwe mun mikadi ja ngie nuen kri.]\* <sup>15</sup> ¡Aingwaree! Ngöbö bike mun Kukwe Biani Ngöböökwe Moiséye dirikä amne mun bariseo mike ja ngie nuen kri, ñobtä ñan angwane munta ja bá mike kuin abko krörö: Munta nikken kä mdabti amne munta nikken mrenbti kä mda mda känti ni mda mda känene töi kwitakäre jakri. Ye erere tärä nebe nekete munkri angwane, kukwe dirita munkwe ietre abko erere tätre nuene. Abtä mun köböite tätre ja mike ngite bari krübäte mun ngwä.

<sup>16</sup> ¡Aingwaree! Mun okwäta kä drünente käta ni mda mda jie ngwena. Mun ye abko bobre jakän, ñobtä ñan angwane munta niere krörö angwane munta ni mda mda mike ja mike ngite Ngöbö rüere: Ju blitakrä Ngöböökwe se käbti nire käkwe ja kukwei biandre abti kitadre temen kwe, ye ngwane rabadre ngite ñakare Ngöböye, munta niere. Akwa ju blitakrä Ngöböökwe känti, orota mikani, oro ye käbti ja kukwei biandre abti ja kukwei kitadre temen kwe, ye ngwane rabadre ngite Ngöböye abko munta niere angwane, munta dirire blo. <sup>17</sup> ¡Mun ngwarabe töi ñakare amne mun abko ni okwá kä drünente kwrere, aise ni Ngöbö Kukwei gare ñakare metre munye, käta kukwe niere kore! ¿Dre bari ütiäte? ¡Oro tä mikani ju blitakrä Ngöböökwe känti ya o ju blitakrä Ngöböökwe ara jire köböire oro

\* 23:14 Versículo 14 abko ñan tä tikani manuscrito kuinkuibtä. Tä tikani Marcos 12.40 abko tikani nete.

tä nebe deme Ngöbö ngwärekri ya? Ju blitakrä Ngöböbe abko bäri ütiäte, akwa ütiäte ñakare mutta niere.

<sup>18</sup> Erere arato, ñukwä grä jändrän kukwakrä Ngöböye, ye kähti nire kákwe ja kukwe biandre abti ja kukwei kitadre temen kwe, ye ngwane ñan rabadre ngite Ngöböye, mutta niere. Akwa jändrän kukwata ñukwä gräbti ye ara jire kähti nirekwe ja kukwei biandre abti ja kukwei kitadre temen kwe, ye ngwane rabadre ngite Ngöböye mutta niere. <sup>19</sup> ;Kä iko mun okwáte Kukwe Ngöböökwebti ñan ñan! ¿Dre bäri ütiäte? ¿Jändrän biandre Ngöböye kukwadre abko bäri ütiäte ya o ñukwä grä köböire jändrän bianta Ngöböye abko tä nebe deme Ngöbö ngwärekri abko bäri ütiäte ya? Ñukwä grä abko bäri ütiäte. <sup>20</sup> Ne aisetet nire nire käta ja kukwei bien ñukwä grä kähti, ye abko ñan ñukwä grä aibe kähti tä ja kukwei bien, akwa jändrän jökrä tä mikani ñukwä gräbti ye kähti tä ja kukwei bien. <sup>21</sup> Erere arato, nire nire käta ja kukwei bien ju blitakrä Ngöböbe kähti, ye abko ñan ju ye aibe kähti tä ja kukwei bien, akwa Ngöbö ara jire tä nuñe ju yete abko kähti tä ja kukwei bien arato. <sup>22</sup> Amne nire nire käta ja kukwei bien kä käinbti se kähti, ye abko kürä gobrankrä Ngöböökwe bti Ngöböta täkänintbe kä käinbti, aisetet Ngöbö ara jire kähti tä ja kukwei bien arato, nieba Jesukwe.

<sup>23</sup> Yebti Jesukwe nieba mda:

¡Aingwaree! Ngöbö bike mun Kukwe Biani Ngöböökwe Moiséye dirikä amne mun bariseo mike ja ngie nuen kri, ñobtä ñan angwane mutta ja bá mike kuin abko krörö: Kri mu ütiäte ñakare kädianta menta, anís amne comino abko mutta ükete keta jätä jätä, abti mutta mike keteti jenena Ngöbökrä. Akwa jändrän bäri ütiäte kri nuendre abko Kukwe Biani Ngöböökwe Moiséye tä dirire abko mutta nuene ñakare abko krörö: Kukwe ükadrete era metre ni mda mdakrä amne ni mda mda ngwiandre ruuentari tare jae, erere arato tödekadre kватibe Ngöböbt, ye abko munkwe nuendre jändrän kiakia nuenta munkwe ye ben gware, akwa ye kwrere mutta nuene ñakare. <sup>24</sup> Ne aisetet mun abko ni okwá kä drünente kwrere. Ngöbö tö dreye gare ñakare metre munye, akwa mutta ja mike Ngöbö kukwei dirikätre, käta ni mda mda jie ngwena blo. Kä u kiakia jäkäteta deme bätärekä dendente ta, ye kwrere jire kukwe kiakia bási ütiäte ñakare bökän Ngöbö Kukweibtä, bti mutta mokrere krübäte, akwa kukwe bäri ütiäte nuendre tä tikani Ngöbö Kukweibtä ye abko kameo krikri ñaka ngöi jökrä, kwrere jire mutta nuene kukwe ütiäte krikribtä, aisetet mutta mike ütiäte ñakare.

<sup>25</sup> ¡Aingwaree! Ngöbö bike mun Kukwe Biani Ngöböökwe Moiséye dirikä amne mun bariseo mike ja ngie nuen kri, ñobtä ñan angwane mutta ja bá mike kuin abko krörö: Mun abko baso amne siä bätäteta btäräita aibe amne terita abko tä nebe dobrore kwrere jire, aisetet mun töita gobtä amne jändrän ni mda mdakwe abko ie mun töta nebe jökrä jakrä. <sup>26</sup> Mun bariseo, mutta ni okwá kä drünente kwrere, aisetet ti bike niere krörö munye: Baso amne blato bätäteta kuin jökrä terita amne btäräita tä nebe merebe jökrä, ye kwrere jire munkwe ja töi ara jire mika kuin merebe amne mun ngrabare rabadi kuin merebe jökrä Ngöbö ngwärekri arato.

<sup>27</sup> ¡Aingwaree! Ngöbö bike mun Kukwe Biani Ngöböökwe Moiséye dirikä amne mun bariseo mike ja ngie nuen kri, ñobtä ñan angwane mutta ja bá mike kuin abko krörö: Ni doboi mikata abko känti kä ükateta abti jükata báta nebe ngwen bürere báne, akwa ni krütani aibe kroko tä nguse amne jändrän kämekäme rä kuredbe ñakare Ngöbö ngwärekri tä nguse, ye kwrere jire mutta nebe. <sup>28</sup> Ye abko, mun abko kä ükateta kuin rökkabti amne jükata tä nebe báne btäräita kwrere jire abko krörö: Munta ja bá mike ni moto kuin kwrere ni mda mda okwáte, akwa mun moto amne töi abko te jändrän kämekäme tä munkwe, aisetet mutta bike deme amne kukwe jökrä käme btä mun töita, aisetet mun röka jükani ye kwrere.

<sup>29</sup> ¡Aingwaree! Ngöbö bike mun Kukwe Biani Ngöböökwe Moiséye dirikä amne mun bariseo mike ja ngie nuen kri, ñobtä ñan angwane mutta ja bá mike kuin abko krörö: Nitre Ngöbö kukwei niekä kirakira abko kräke mutta kä ükete kuin rökkabti niaratre mikakäre ütiäte jae. Erere arato, ni ruäre kákwe nünabare metre Ngöbö ngwärekri abko

doboibti mutta kä ükete bā nuäre nuäre, <sup>30</sup> bti mutta niere krörö: Ni mräkä kirakira kákwe nitre Ngöbö kukwei niekä kämikani, ye ngwane ni tädre nüne akräke nikwe ñan kämikadre jire chi gware bentre, mutta niere jabtä. <sup>31</sup> Mutta blite kore, yebtä mun mräkä kirakira kákwe nitre Ngöbö kukwei niekä kämikani, ye arabe mräkäkri mun jatani abko tā nüke gare munye ñan ñan. <sup>32</sup> Mun mräkä kirakira kákwe kukwe mikanintbe ño mun käne nitre Ngöbö kukwei niekä rüere, ye kwrere munkwe mika nebe bare täte jökrä tibtä arato.

<sup>33</sup> ¡Mun abko tbi bökan krübäte ye kwrere jire! Ne aise te Ngöbö kwe mun mikadi ja ngie nuen kä ja tare nikakrä känti. Yebtä munkwe ñan kwäräbedre jire chi. <sup>34</sup> Ne aise te nitre Ngöbö kukwei niekä amne nitre töbtä töbtä amne nitre Ngöbö kukwei dirikä ye abko tikwe juandi Ngöbö Kukwei niekäre munye nete, akwa munkwe müre ketadi amne munkwe metadi krusobtä ruäre. Ruäre abko sinagoga käntikänti munkwe kwata metadi amne ruäre rikadi ngitie amne jiebti mun näin kisere juta kwatirekwatire te niaratre mikakäre ja tare nike. <sup>35</sup> Ne aise te nitre nünanka metre Ngöbö ngwärekri abko kämikanina mun mräkä kirakirakwe, ye dokwäre Ngöbö kwe mun mikadi ja ngie nuen kri krübäte. Abel kákwe nünabare metre, ye näire mentokwäre ni müre ketani nebe Berequías ngobo Zacarías näire amne Zacarías abko müre ketani munkwe ju blitakrä Ngöböbe känti ñukwä grä amne kä deme te ruäre. <sup>36</sup> Nitre müre ketani kore, ye dokwäre abko Ngöbö kwe nitre nünanka kä ne ngwane mikadi ja ngie nuen kri krübäte abko ti bike niere metre munye.

*Jesukwe nitre Jerusalénbo müaibare  
(Lucas 13.34-35)*

<sup>37</sup> Ye btäräbe Jesukwe nitre Jerusalénbo müaiba, kákwe nieba krörö:

¡Aingwaree, mun nünanka Jerusalén nete! Käre mutta nitre Ngöbö kukwei niekä müre kete amne nitre juanta Ngöbö kwe ja kukwei ngwena abko müre ketata jäbti. Ye abko, kwita ngäbäli kiakia ngibiare ja ngike täni, ye kwrere käre ti tö namani mun ngibiai, akwa mun ñan tö namani ti tuai ja ngibiare. <sup>38</sup> Ye mden kisete, ju munkwe nete ne rabadi tökare jökrä mun täbtä nete abko titi niere munye, <sup>39</sup> ñobtä ñan angwane mtare mentokwäre ti ngämi kiteta, känenkri munkwe ñan ti tuadre jire chi mda, yebti munkwe ti tuadi angwane munkwe niedi krörö:

Ni kitera nüke ni Dänkien Ngöbö käbti raba mikani ütiäte kri, munkwe niedi kore ti ngäbti. Abko kore se, nieba Jesukwe.

## 24

*Dre rakadikä kä mrä känenkri  
(Marcos 13.1-23; Lucas 21.5-24; 17.22-24)*

<sup>1</sup> Yebti Jesu näma ju blitakrä Ngöböbe bäre, rikabata akwa ngämi nikenta mente, känenkri nun ja tötitaka ben kákwe krötäba ken amne nun rababa näkwiteta ja jiebti, kä rababa ju blitakrä Ngöböbe ye driereta ie tuadre. <sup>2</sup> Ye erere bkänä Jesukwe ju ye mikabata ñäräre, kákwe nieba krörö nunye:

Ti bike kukwe era erere niere munye abko krörö: Ju kuin btä mun okwä nibi, köbötira jire ju se juandi ngwarbe jire jökrä, aise te jä ketani jabti se juandi jökrä temen abko ti tö nibi niei munye, nieba Jesukwe nunye.

<sup>3</sup> Yebti nun rikaba ta nakri Jesube nebe Ngitio Olibobti, ye känti Jesu rababa täkänintbe angwane, nun ja tötitaka ben kákwe krötäba ken, kákwe nieba kaibe ie:

¿Ngöbö kwe kä ne juandi ngwarbe jökrä makwe nini, ye abko rakadikä ñongwane? Erere arato, ma jatadreta bobuta amne kä ne rikai ta, ye abko bā mikadi ño nunye abko makwe niedre nunye, ie nun tö nibi, nunkwe nieba Jesuye.

<sup>4</sup> Abtä Jesukwe nieba krörö nunye:

Bäri käne abko, nitre ni ngökaka, ye ngäniene munkwe ja ngibia kuin, <sup>5</sup> ñobtä ñan angwane ni jatadi kwati ti käbti kákwe niedi krörö: Ti abko Ni Dianinkä Ngöbö kwe ara tä nete, niedi kwetre, ye kákwe ni kwati ngökadi. <sup>6</sup> Mdakäre abko, munkwe kukwe

krörö gadi: Nitre tädi rüre jabe kwärikwäri nete sete abko gadi munkwe amne blita rabadi kabre rübtä, akwa mun ñan rekwetaka, ñobtä ñan angwane kukwe ye rakadikä kore abko erere rabadi nakenkä. Akwa ye ngwane kä mrä ngämi nüke abko raba gare munye,<sup>7</sup> ñobtä ñan angwane juta kwatirekwatire rabadi rüre jabe kwärikväri amne nitre nünanka kä ketareketare te rabadi rüre jabe kwärikväri. Erere arato, ni kwati rabadi mrö nike krübäte amne dobo rabadi nakaenkä kä ketareketare temen kwäräkwärä arato.

<sup>8</sup> Akwa ye ngwane abko ja tare nika jatadi krire kena kä nebtä.

<sup>9</sup> Ye ngwane mun abko mikadi ja tare nike tödekaabtä tibti amne mun ruäre abko müre ketadi amne mutta tödeke tibti, ye dokwäre ni kwati nünanka kä ketareketare temen mätä rabadi munbtä. <sup>10</sup> Erere arato, kä ye ngwane ni kwati käta ja tödekaaka tibti niere abko kákwe trö kwitadita tie, kákwe ti rükandite amne mätä rabadi jabtä kwärikväri, kákwe ja kitadi ngise ngwarbe kwärikväri. <sup>11</sup> Erere arato, ni kwati jatadi ja bä mike ni Ngöbö kukwei niekä era metre kwrere ye kákwe ni kwati ngökadi krübäte. <sup>12</sup> Ni kwati rabadi kukwe nuene kämekäme krübäte, aisetet bäsni jökrä ñan rabadi ja tarere kwärikväri mda. <sup>13</sup> Akwa nire nire kákwe nünandrekä dite jabtä, kákwe ñan ti rükandrete nebebe kä mrä, ni ye abko rabadi dianintari Ngöbökw. <sup>14</sup> Mdakäre abko, Ngöbö kebera nüke gobrane nibti, ye abko kukwe kuin abko tita niere, ne abko rabadi diribare kä jökräbti temen Ngöböta sribire ño ni ngätäite mikakäre gare angwane, batibe kä mrä jatadi nüke.

<sup>15</sup> Mdakäre abko, ni iti ngwarbe käme kákwe jäandrän deme Ngöbökw mikadi ngwarbe jae, ye mdenbtä abko ni Ngöbö kukwei niekä kädian nämane Daniel kákwe tärä tikani kira. Drebtä tita blite rüka gare munye, ñobtä ñan angwane ni ye tädi nünaninkä kä deme ju blitakrä Ngöböbe ye känti, Daniel kákwe kukwe tikani ye kwrere. <sup>16</sup> Angwane mun tädre Judeate ye abko gitia mintokwäre <sup>17</sup> amne mun mden mden tädre jubti käin\* ye abko ñan rika jäandrän tuenta jire chi gwi jae amne mun gitia jirekäbe. <sup>18</sup> Mun mden mden tädre sribire tirete ye abko ñan rika dän tuenta jire chi gwi jae, akwa mun gitia gwängwarbe jirekäbe. <sup>19</sup> Akwa meri doboko doboko amne meri kwe ngäbäkre kiakia kianbtä, ye abko bobre jakän, ñobtä ñan angwane niaratre ñan raba ngitie jötrö.

<sup>20</sup> Akwa mun gitiadre ye abko ñan rakadrekä kä ñüre näire abko munkwe ribe Ngöböye, ñobtä ñan angwane tare näin jötrö kä ñüre näire amne mun gitiadre ñan rakadrekä köbö jadükakrä näire.† <sup>21</sup> Munkwe ribe kore Ngöböye, ñobtä ñan angwane kä dätebare kena angwane ja tare nika ñakare krübäte kore abko erere ja tare nikadi kri krübäte kä ye ngwane. Yebti ñan ja tare nikadreta mda ye kwrere. <sup>22</sup> Ye abko, Ngöbökw ñan köbö krötadre jötrö käne ja tare nikakrä, ye ngwane ni ñan rabadre dianintari jire iti, akwa ni dianinkä jakrä Ngöbökw abko Ngöböta tarere, aisetet köbö ja tare nikakrä krötadi jötrö kwe. <sup>23</sup> Ne aisetet, kä ye ngwane kukwe raba nakenkä kore angwane, nane ni mdakwe niedre krörö munye: ¡Ni Dianinkä Ngöbökw abko tä nete tuen! niedi kwe, o ¡Ni Dianinkä Ngöbökw tä sete tuen! niedre kwe, akwa munkwe ñan kukwei mika era, <sup>24</sup> ñobtä ñan angwane kä ye ngwane ni kwati jatadi ja bä mike Ni Dianinkä Ngöbökw kwrere amne ni kwati jatadi ja bä mike ni Ngöbö kukwei niekä kwrere, kákwe sribi krikri ñan tuabare nuendi kabre bätäkä ngwarbe ni mda mda ngökakäre amne rabadre ni dianinkä jen jakrä Ngöbökw ara jire ngökö, ne ngwane ngökadre kwetre, akwa ñan rabadi ngökö. <sup>25</sup> Ne aisetet kukwe ye ngämi nakenkä, känenkri tita mun mike mokre biare.

<sup>26</sup> Ne aisetet ni mdakwe nie krörö munye: Ni Dianinkä Ngöbökw abko tä kä kaibete sete, nie kwe angwane, mun ñan rika tuer känti. Erere arato, nie krörö munye: Ni Dianinkä Ngöbökw abko tä ja rükantente nete, nie kwe angwane, munkwe ñan kukwei mika era, <sup>27</sup> ñobtä ñan angwane merataträ ngitiekä ngwen käinta angwane, träta jataen batibe nindrini amne kä driri, ye kwrere arato, ti Ni Kä Nebtä Ngobo ne jatadita angwane,

\* <sup>24:17</sup> tädre jubti käin. Ju nitre israelitare abko kiare bti käin, aisetet nuäre dikakrä bti ta. † <sup>24:20</sup> mun gitiadre ye abko ñan rakadrekä köbö jadükakrä näire. Nitre israelita ñan rikadre mente köbö jadükakräte abko ükaninte kwetre. Rikadre mente angwane, ja mikadre ngite kwe, aisetet Jesukwe niebare kore nütüta.

ni jökrä käkwe gadi batibe jökrä. <sup>28</sup> Ye abko, ni ngwakä tä mdente, btä jüden rabadi ja ükekrö ngwakä kwete abko nita tuen, ye kwrere ti jatadita ni jökrä käkwe gadi.

### *Jesukristo jatadita*

(Marcos 13.24-37; Lucas 17.26-30,34-36; 21.25-33)

<sup>29</sup> Ja tare nikadi kri nini tikwe, yebti btäräbe ñänä se rötadite amne kä rabadi iko jökrä. Erere arato, sö se ñanträ rabadre mda amne muke käinta se abko rabadi betekä timontimon amne jäandrän kä käinhti se abko rabadi grükekä arato. <sup>30</sup> Angwane ti, Ni Kä Nebtä Ngobo jatadita abko bää mikadi kore kä käinhti sete abko ni jökrä käkwe tuadi. Ye ngwane abko ni kä jökräbti temen rabadi nekwetekä krübäte ja jiebti, käkwe ja müaidi angwane, ti Ni Kä Nebtä Ngobo abko jatadi tuen ja di kri bää nuärehti mütabti abko ni jökrä käkwe tuadi. <sup>31</sup> Angwane tikwe angeletre tikwe juandi drü jüke krikri käkwe ni dianinkä jen jakrä ükadikrö jökrä ketetibe. Ni dianinkä jen jakrä nünanka nindrini, kä driri, sekri, nekri abko ükadikrö jökrä kwe.

<sup>32</sup> Mdakäre abko, higokrie btä kukweta nakenkä ño, yebtä munkwe ja töitika abko krörö: Higo küdetra niren mräre mda amne käta nebe mräre btä arato angwane, kä töre tärä kite nüke ja ken abko monta gaen, <sup>33</sup> ye kwrere arato kukwe nini tikwe ye jata nakenkä jökrä mun okwäbti angwane, ti Ni Kä Nebtä Ngobo nükerate ja ken jukwebtä abko rabara gare munye. <sup>34</sup> Ti bike kukwe era erere niere munye abko krörö: Nitre nünanka kä nebtä ngämi krüte jökrä, ye känenkri kukwe nini tikwe ye erere rakadikä jökrä.

<sup>35</sup> Mdakäre abko, kä käinta se btä kä temen ne abko Ngöböökwe gadikä jökrä, angwane rikadi ta, akwa ti kukwei abko rabadi kärekäre.

<sup>36</sup> Akwa ti jatadreta köbö mdente amne ñänä okwä nuäi, ye abko gare ñakare jire chi ni mda mdaye, angele kä käinhti ie gare ñakare amne Ngöbö Odei ie gare ñakare arato, akwa Ngöbö ni Rün aibe ie tä gare kaibe. <sup>37</sup> Mdakäre abko, kukwe nakaninkä ño ño Noé näire angwane ni jökrä nämane nüne jáme, ye kwrere arato ti Ni Kä Nebtä Ngobo ne jatadita angwane, kukwe rakadikä abko krörö: <sup>38</sup> Kä ye ngwane abko ñü ngämi näkäen temen, känenkri abti Noé nikani rute, ye ngwane ni jökrä tö namani nünai ño, erere nämane nüne, aise te nämane mröre, dö ñaen amne nämane ja mike gure. <sup>39</sup> Ne aise te nämane jáme, te batibe ñü jatani jobe temen, käkwe ño mikani niren kri abko nikani nitre ye ngwena jökrä abko müre neketani ñöte, ñobtä ñan angwane niaratre kwani jáme ñüye, ye kwrere arato ti Ni Kä Nebtä Ngobo ne jatadita angwane, kukwe rakadikä kore arato.

<sup>40</sup> Ye abko ti bike bää mike krörö munye: Ti jatadita ye ngwane ni tädi nibu sribire jáme tirete abko btäräbe iti jänäin amne iti abko mikadite. <sup>41</sup> Erere arato, meri tädi nibu trigo ukwe jáme abko btäräbe iti jänäin amne iti abko mikadite. <sup>42</sup> Ti mun Dänkien jatadita ñongwane, ye abko gare ñakare munye, aise munkwe mokre jabti ti ngibiakäre ngäbti.

<sup>43</sup> Kukwe mdara jire rabadre gare munye arato abko krörö: Ni gore rükadre kä ñongwane, ye rabadre gare ju bkänkäye akräke ju bkänkä käkwe kraidre gwi angwane, jäandrän ñan goidre jire kän kwe. <sup>44</sup> Ni gore rükadre ñongwane gare ñakare, ye kwrere ti Ni Kä Nebtä Ngobo ne jatadre ñakare jötrö mun tädi nütüre, aise mun tädi ngibiare ngäbti ñakare angwane, batibe rükadita, aise munkwe mokre jabti ti ngibiakäre ngäbti.

### *Sribikä kuin amne sribikä käme, btä Jesukwe kukwe bää mikani*

(Lucas 12.41-48)

<sup>45</sup> Kukwe ye abko ti bike bää mike krörö: Sribikä kuin bti bkänkä rabadre tödeke amne sribikä töbtä ye abko bkänkä tä mikete ju ngibiare jakrä amne sribikä ye abko kä mrökrä erere käita nüke angwane, mrö tärä nebe biare kwe ni gwi bukakrä, sribikä kore yebtä abko ti bike niere krörö munye: <sup>46</sup> Sribikä kisete bkänkä tä sribi mike, bti bkänkä tä nikken kä mdabti, bti tä kite nüketa angwane tä kwen sribi ye nuene täte bkänkäye, sribikä yebtä abko kä rabadre nuäre, <sup>47</sup> ñobtä ñan angwane sribikä kore abko sribikä kuin abko ie bkänkä käkwe jäandrän kwe mikadi gare jökrä ngibiadre jakrä abko ti tö nibi niei metre kore munye.

<sup>48</sup> Akwa sribikä moto käme ye abko rabadre töbike krörö: Ti dänkien nikani amne ñan rükadreta jötrö, rabadre nütüre, <sup>49</sup> kä rikadre sribikä mda mda ngö tikekä amne nitre dröbaka dröbaka, ben rikadre ja gete amne rikadre mröre, dö ñaen krübäte, <sup>50</sup> aisetetädare jáme, ñan tädre bkänkä ngibiare ngäbti amne kä nuäi angwane bkänkä rükadreta, ye ñan tädre gare ie. Akwa batibe bkänkä rükadita <sup>51</sup> angwane, bkänkä ye kákwe mikadi ja tare nike krübäte amne nitre ja bä mikaka kuin abko mikadre ja ngie nuen, ye ben ketetibe ja tare nikadi kwe. Angwane batibe sribikä ye rabadi ja müaire amne tu ngö rabadi cherere jabtä ja tare nika kisete. Munkwe ñan ti ngibiadre ngäbti ne ngwane, kukwe rakadrekä kore munbtä arato. Abko kore se, nieba Jesukwe.

## 25

### *Meri ni jätä gure ñakare*

<sup>1</sup> Mdakäre abko, kä ye ngwane ni bti Ngöböta gobrane abko btä kukweta nakenkä ni ja mikaka gure kwrere abkobtä ti bike bä mike abko krörö: Bati ni iti nikani ja mike gure angwané, meri batibati ni jätä\* kákwe ja mikani juto niara ngibiare ngäbti kä ngwiankäre nuäre jabtä ben amne ñotra diani kisetekisete kwetre abko ben nikani ni ja mikaka gure ye ngäbti. <sup>2</sup> Akwa meri nirike abko töi ñakare amne meri nirike mda abko töbtä, <sup>3</sup> aisetemeri töi ñakare ye abko nikani ñotra aibe ngwena; <sup>4</sup> akwa meri nirike töbtä ye abko nikani aseite ngwena biare boteate kekadre ñotrate jae. <sup>5</sup> Abti meri ni jätä ye namani ni ja mikaka gure ye ngibiare ngäbti, akwa ni ye abko ñan namani nüke jötrö angwane, meri ye ie köbö jatani abti mrä angwane nikaninta kibien jökrä mda.

<sup>6</sup> Yebti kä jatanina nüke ruäre deo angwane, batibe ni kukwei jarabare ngwänkenä krörö ietre:

¡Ni ja mikaka gure kitera nüke! ¡Mun jakwe kaen ngäbti! ni kukwei jarabare kore ietre.

<sup>7</sup> Ye btäräbe meri batibati ni jätä ye naninkrö jötrö, kä nikani ñotra mike biare nänkrä ni ja mikaka gure ye ngäbti. <sup>8</sup> Akwa meri nirike töi ñakare ye kákwe niebare meri nirike töbtä yeeye:

Aseite kitera krüte ñotrate nunkän amne ñotra nibi nötöte nunkän, aisetemerkwianta munkwe ye munkwe bian ruäre nunye, niebare kwetre.

<sup>9</sup> Abtä meri nirike töbtä ye kákwe niebare mda ietre:

Nunkwe ñan aseite biandre munye, ñobtä ñan angwane nunkwe biandre munye angwane, ñan rabadre täte ni jökrä kräke, aisetemerkwianta rürümointa ye känti mun rikadre kökö jötrö jakrä abko rabadre bäri kuin, niebare kwetre ietre.

<sup>10</sup> Ye erere bkänä, meri nirike töi ñakare ye nikani aseite kökö jae. Ye btäräbe ni ja mikaka gure nükani angwane, meri nirike töbtä abko nikani nebe gwi kä ngwiankäre nuäre jabtä ni ja mikaka gure yebe angwane, jukwe dikaninbe kwe. <sup>11</sup> Yebti meri nirike töi ñakare ye jatani nüke mda, kä namani niere krörö jukwebtä:

Nun Dänkien, jukwe tike nunye, namani niere.

<sup>12</sup> Akwa ni ja mikaka gure ye kákwe niebare mda ietre:

Era metre mun gare ñakare tie, aisetemerkwianta tikwe ñan jukwe tikadre munye. Abko kore se, niebare kwe ietre.

<sup>13</sup> Ye abko, nane kukwe rakadrekä kore munbtä, ye känenkri munkwe mokre jabti, kákwe ti ngibia ngäbti, ñobtä ñan angwane köbö mdente amne ñänä okwä nuäi angwane ti jatadita abko gare ñakare munye aisetemerkwianta.

### *Ngwian ngibiaka kuin, btä Jesukwe kukwe bä mikani (Lucas 19.11-27)*

<sup>14</sup> Mdakäre abko, kä ye ngwane ni bti Ngöböta gobrane abkobtä kukweta nakenkä krörö arato: Bati ni nämane iti abko jatani nikken mente kä mdabti. Jatanina nikken jibti, kákwe sribikä kwekwe käräbare, bti ngwian biani ngibiadre kwe jakrä ietre. <sup>15</sup> Akwa ni itire itire töi ño ño ye erere btä ngwian biani kwe ietre, aisetemerkwianta ni iti, ie ngwian biani mili

\* 25:1 Meri batibati ni jätä ne abko nämane meri ja mikaka gure kukwe muko abko nämane näin niara mukore.

krärike kwe amne sribikä mda abko ie biani mili krobu kwe amne sribikä mda abko ie biani mili krati kwe, abti nikani.

<sup>16</sup> Yebti sribikä ie ngwian biani mili krärike, ye nikani sribire ngwian yebti, aisetet ngwian mili krärike yebti ngwian mda ganaibare mili krärike kwe. <sup>17</sup> Ye kwrere arato, sribikä ie ngwian biani mili krobu, ye nikaninbe sribire ngwian yebti arato, aisetet ngwian mili krobu, yebti ngwian mda ganaibare mili krobu kwe. <sup>18</sup> Akwa sribikä ie ngwian biani mili krati, ye abko nikani, kákwe ngwian bkänkäkwe ye nökani jirekäbe dobote nguse.

<sup>19</sup> Yebti kä nikanina raire ta angwane, sribikä bkänkä nükaninta. Angwane ngwian biani kwe ngibiadre sribikäye, yebtä nikani kukwe ükete bentre. <sup>20</sup> Angwane sribikä ie ngwian biani mili krärike kwe ye ara jire nükani käne, kákwe ngwian mili krärike ye bianinta bkänkäye amne ngwian mda biani mili krärike kwe arato, kákwe niebare bkänkäye: Ti Dänkien, makwe ngwian bianba mili krärike tie, akwa ngwian yebti abko tikwe ngwian mda ganaibare mili krärike arato makrä abko tä nete ne, niebare kwe bkänkäye.

<sup>21</sup> Abtä sribikä bkänkä kákwe niebare mda ie: Bäri kuin. Ma abko sribikä kuin amne ma kuin tödekkärä. Ngwian braibe bti makwe sribibare kuin tikrä, aisetet tikwe sribi bäri kri mikadi ma kisete mda, aisetet jakwe kä ngwen nuäre jabtä tibe, niebare kwe ie.

<sup>22</sup> Angwane sribikä ie ngwian biani mili krobu kwe ye ara jire nükani mda, kákwe ngwian mili krobu ye bianinta bkänkäye amne ngwian mda biani mili krobu kwe arato, kákwe niebare ie: Ti Dänkien, makwe ngwian bianba mili krobu tie, akwa ngwian yebti abko tikwe ngwian mda ganaibare mili krobu arato makrä abko tä nete ne, niebare kwe bkänkäye. <sup>23</sup> Abtä sribi bkänkä kákwe niebare mda ie: Bäri kuin. Ma abko sribikä kuin amne ma kuin tödekkärä. Ngwian braibe, bti makwe sribibare kuin tikrä, aisetet tikwe sribi bäri kri mikadi ma kisete mda, aisetet jakwe kä ngwen nuäre jabtä tibe, niebare kwe ie.

<sup>24</sup> Akwa sribikä ie ngwian biani mili krati bkänkäkwe, ye nükani mda angwane niebare krörö kwe ie: Ti Dänkien, ma töta nünai ni mda mda aibe diebti, ye gare kuin tie, ñobtä ñan angwane ni mda mda tä nura nökö amne ma abko tä ngwä ötö kabre kä ütiäre, akwa ma abko nura nökö ñakare. Erere ni mda mda tä nura metekä amne mata ngwä ötö kabre kä ütiäre, akwa ma abko nura metekä ñakare jakrä. <sup>25</sup> Ye mdenbtä ma jürä rababa tibtä. Abtä tikwe ngwian makwe ye nökaba jirekäbe dobote nguse, akwa ngwian makwe erere tä jökrä nete ne, niebare kwe bkänkäye.

<sup>26</sup> Abtä bkänkä kákwe niebare romone ie: Ma abko sribikä käme amne kä krene mabtä. Tita nura nökö ñakare, akwa titä ngwä ötö ni mda mdakän amne ti nura metekä ñakare, känti titä ngwä ötö ni mda mdakän gare kuin mae mata niere, <sup>27</sup> aisetet ma rikadre kákwe ngwian tikwe ye mikadre bankote tikrä, abti ti jatadre nüketa angwane ngwian mda biandre tie ngwian tikwe ye bärire mda näre abko makwe ñan ngwian mikani bankote tikrä, niebare kwe sribikä yeye.

<sup>28</sup> Abti nitre nämane yete, ie sribi bkänkä kákwe niebare: Ngwian mili krati tä ni nokokwe, se denkä kän munkwe, bti sribikä kwe ngwianta mili krä jäätä, seye bian munkwe, <sup>29</sup> ñobtä ñan angwane nire nire kwe jäandrän tärä kabre abko ie jäandrän biandi bäri mda amne rabadi jäandrän bkäne bäri kabre mda; akwa nire nire jäandrän bkäne chi ye abko kän jäandrän chi ye diandikä jökrä. <sup>30</sup> Ye mden kisete, sribikä käme krene noko kitekä kä bäri iko te ju bäre sere munkwe. Ye känti niara rabadi ja müaire amne tu ngö rabadi cherere jabtä ja tare nika kisete. Abko kore se, niebare sribikä bkänkäkwe.

### Kä mrä näire Jesukwe kukwe ükadite ni jökrä kräke

<sup>31</sup> Mdakäre abko, ti Ni Kä Nebtä Ngobo jatadita ja di kri bä nuärehti angwane, angeletre tikwetikwe rabadi jökrä bäre temen angwane, kürä gobrankrä bti ti rabadi täkänintbe kä bä nuärete. <sup>32</sup> Ye ngwane abko nitre nünanka kä jökräbti temen rükadi ja ükekrö ti ngwärekri angwane, ni obeja ngibiaka käta obeja erere ükekrö jenena amne kabra erere tä ükekrö jenena, ye kwrere jire tikwe ni ükadikrä ketebu jene jene. <sup>33</sup> Amne ni jen tikwe obeja kwrere erere tikwe mikadi ja küde ruenkri amne ni ñakare tikwe kabra kwrere abko

tikwe mikadi ja küde ngeberekri, ni obeja ngibiaka käta nuene obeja amne kabrabitä ye kwrere.

<sup>34</sup> Yebti nitre tädi jrei küde ruenkri, ye ie jreikwe niedi krörö: Mun die mikani ti Rünkwe ye erere jakwe jökrä nete. Ngöböökwe kä dätebare kena angwane, kä ye känti niarata gobrane ye abko niarakwe kä ükaninte biare munkrä ne mun jakwe kaen ngäbtì, <sup>35</sup> ñobtä ñan angwane mrö rababa tie angwane, munkwe ti bukaba; tomna rababa tie angwane, munkwe tomna bianba tie; ti näma dikekä ngwarbe krö kwäräkwärä ni menteni kwrere angwane, munkwe kä bianba kibiakrä tie. <sup>36</sup> Erere arato, ti jatani bütie ngitiete angwane, munkwe dän biani tie; ti nämane nebe bren bren angwane, mun nämane nebe basare tie amne ti kita nämane ngite kä teri angwane, mun nämane nebe ti tuenbti tuenbti, aisetet mun jakwe kä gobrankrä ne känti nünakäre tibe, niedi Jreikwe nitre niara küde ruenkri yeye.

<sup>37</sup> Angwane nitre nünanka metre ye käkwe niedi krörö jrei yeye: Nun Dänkien, ¿ñongwane nunkwe ma tuani mröi amne nunkwe ma bukani? ¿Erere arato, ñongwane nunkwe ma tuani tomna mdei nike amne nunkwe tomna biani ñadre mae? <sup>38</sup> ¿Mdakäre abko, ñongwane nunkwe ma tuani dikekä ngwarbe krö kwäräkwärä ni menteni kwrere amne nunkwe kä biani kibiakrä mae amne, ñongwane nunkwe ma tuani ja bütie nike angwane, nunkwe dän biani mae? <sup>39</sup> ¿Erere arato, ñongwane nunkwe ma tuani bren o ngite kä teri angwane, nun nämane niken ma tuenbti tuenbti? niedi kore kwetre jrei yeye. <sup>40</sup> Abtä jrei ye käkwe niedi mda ietre: Ti mräkätre bäri bobre, kräke munkwe jäandrän kuin nuenbare kore, ye ti ne ara jire munkwe die mikani abko ti tö nibi niei metre kore munye, niedi kore Jreikwe.

<sup>41</sup> Yebti nitre tädi jrei küde ngeberekri abko ie Jreikwe niedi krörö: Mun nena biare ja tare nikakäre, aisetet ñukwä jutra ngitiekä kärekäre tä ükaninte biare diablu amne üai kämekäme kwe mikakäre ja tare nike, se känti nän siba amne kä mikekä tibtä nete, <sup>42</sup> ñobtä ñan angwane mrö rababa tie angwane, munkwe ñan ti bukaba; tomna rababa tie angwane, munkwe ñan tomna bianba tie. <sup>43</sup> Ti näma dikekä ngwarbe krö kwäräkwärä ni menteni kwrere angwane, munkwe ñan kä bianba kibiakrä tie. Erere arato, ti jatani bütie ngitiete angwane, munkwe ñan dän biani tie; ti näma nebe bren bren amne ti kita nämane ngite kä teri angwane, mun ñan nämane niken ti tuenbti, niedi Jreikwe nitre yeye.

<sup>44</sup> Abtä niaratre käkwe niedi krörö: Nun Dänkien, ¿ñongwane nunkwe ma tuani mröi amne, tomna mdei nike amne ñongwane nunkwe ma tuani ja bütie nike? ¿Erere arato, ñongwane nunkwe ma tuani dikekä ngwarbe krö kwäräkwärä ni menteni kwrere amne ñongwane nunkwe ma tuani bren bren amne ngite kä teri, akwa nunkwe ñan ma die mikani, mata niere ye? niedi kwe jrei yeye. <sup>45</sup> Angwane jrei ye käkwe niedi krörö mda ietre: Ti mräkätre bäri bobre bobre abko kräke munkwe ñan jäandrän kuin nuenbare jire chi, aisetet ti ne ara jire kräke munkwe ñan jäandrän kuin nuenbare arato abko ti tö nibi niei metre kore munye, Jreikwe niedi nitre yeye. <sup>46</sup> Yebti nitre ye abko näin kä ja tare nikakrä kärekäre ye känti amne nitre nünanka metre metre abko näin näne kärekäre Ngöböbe. Abko kore se, nieba Jesukwe.

## 26

*Jesu rüe tö namani kain ngite tiebe  
(Marcos 14.1-2; Lucas 22.1-2; Juan 11.45-53)*

<sup>1</sup> Jesukwe diribare ünän jökrä, yebti nun ja tötitikaka ben ie nieba krörö kwe:

<sup>2</sup> Bieta Pascua abko köböi nebera köböbube, ye garera munye angwane, Pascua ye näire abko ti Ni Kä Nebtä Ngobo ne kitadi ngise müre ketadre krusobtä, nieba Jesukwe nunye.

<sup>3</sup> Ye erere bkänä, kä ye ngwane abko nitre ji dokwäte nitre blitaka Ngöböbe ni mda mda diärebti amne nitre unbre ji dokwäte käkwe ja ükaninkrö gätäbtä nitre blitaka Ngöböbe ni mda mda diäre dänkien kädian nämane Caifás gwiriete. <sup>4</sup> Ye känti ni ngökadre ño kwetre köböire Jesu kadre ngite kwetre, bti müre ketadre kwetre abko nikani ükete Jesu

rüere. <sup>5</sup> Akwa nane ni kwati krübäte nämane Jerusalén Pascua köböikrä kákwe rüdre bentre Jesu dokwäre, aisetē Pascua näire ñan nuendre, niaratre namani niere.

*Meri iti kákwe ñö rä bänē kekani Jesubti*

(Marcos 14.3-9; Juan 12.1-8)

<sup>6</sup> Kä ye ngwane abko Jesu näma juta Betaniate Simón juete. Jesu ngämi Simón ye miketa kuinta, känenkri Simón ye abko kädian nämane lebroso arato abko känti Jesu näma. <sup>7</sup> Ye btäräbe meri jataba iti nüke Jesu ken angwane, já bā ngwen kädianta alabastro abko dätebare boteare abko krati meri ye näma näin ñö rä bänē ütiäte kri ngwena abko rükaba Jesu känti. Jesu abko näma täkänintbe mesabtä angwane, meri ye kákwe ñö rä bänē yekekaba Jesu dokwäbti. <sup>8</sup> Merikwe ñö rä bänē ütiäte kri ianteba Jesubti nun okwäbti angwane, nun ja töitikaka Jesube moto rababa romon, kä rababa niere krörö:

¿Se ñobtä meri se tä ñö rä bänē ütiäte kri iente ngwarbe se? <sup>9</sup> Ñö rä bänē se rürümoindre ngwian kabre btä kwe abti ni bobre bobre die mikadre kwe bā amarebti ininte ngwarbe kwe se, nun rababa niere.

<sup>10</sup> Nun rababa ñäke kore ye kukwei jaraba Jesuye. Abtä nieba kwe nunye:

Meri ne kákwe jäandrän kuin nuni tikrä. ¿Se ñobtä abko mun nibi nike krübäte dikaro?

<sup>11</sup> Nitre bobre bobre tädi käre mun ngätäite nete abko munkwe die mikadre, akwa ti abko ñan tädi kärekäre munbe nete, aisetē niarakwe ti miri ütiäte kore abko tädbe. <sup>12</sup> Meri ne kákwe ñö rä bänē kiri ti ngrabare, yebti abko ti miri juto biare kwe doboi mikadre.

<sup>13</sup> Ye abko, ti bike kukwe era erere niere munye abko krörö: Kukwe kuin tibtä ye kädriedi mdente mdente erere, ye känti meri ne kákwe jäandrän kuin nuni tikrä mtare ne kädriedi arato, aisetē jäandrän kuin nuni meri nekwe, yebtä rükadita töre. Abko kore se, nieba Jesukwe nunye.

*Judakwe Jesu kitani ngise*

(Marcos 14.10-11; Lucas 22.3-6)

<sup>14</sup> Abti nun ja töitikaka Jesube ni jätäbti nibu, ye ngätäite ni iti kädian nämane Judas Iscariote abko rikaba nitre blitaka Ngöböbe ni mda mda diäre dänkientre ye känti,

<sup>15</sup> kákwe niebare krörö ietre:

Ti tö Jesu kitai ngise munye, akwa ¿ye abko munkwe ütiä biandre nuäi tie? niebare kwe.

Angwane nitre ji dokwäte ye kákwe ngwian mnüne biani gre ketämä Judaye Jesu ütiäre. <sup>16</sup> Ye näire mentokwäre Judas namani kä kuin ngibiare kisere jae, Jesu kitakäre ngise.

*Jesukwe mröbare mrä nitre ja töitikaka benbe*

(Marcos 14.12-25; Lucas 22.7-23; Juan 13.21-30; 1 Corintios 11.23-26)

<sup>17</sup> Yebti bieta Te Lebadura Ñakare Bante kweta nämane ye köböi kena rükaba angwane, nun ja töitikaka Jesube kákwe krötaba ken kákwe nieba ie:

¿Mrö kwetadre bieta Pascuakrä ye abko nunkwe sribedre mdente makrä, ie ma tö nibi? nieba nunkwe ie.

<sup>18</sup> Angwane Jesukwe nieba krörö nunye:

Mun nän juta Jerusalén sete, ye känti ni kwandi iti munye abko ie munkwe nie krörö: Dirikä nunkwe kákwe niemna krörö mae: Kä kitera nüke ja ken ti käne, aisetē mrö Pascuakrä abko ti tö kwetai ketetibe nitre ja töitikaka tibe ben, aisetē ti näin mröre niaratrabe ma juete, tikwe nini abko munkwe nie ie. Abko kore se, nieba Jesukwe nunye.

<sup>19</sup> Ye erere bkänä, Jesukwe nun juanba mrö ükete biare, ye kwrere nun janama nuene, kákwe mrö sribeba kwetadre bieta Pascuakrä.

<sup>20</sup> Yebti kä jatabara diore dere angwane, Jesu näma täkänintbe mesabtä nun ja töitikaka ni jätäbti nibu ben. <sup>21</sup> Nun näma mröre angwane, Jesukwe nieba krörö:

Ti bike kukwe era erere niere munye abko krörö: Mun iti tä nete kákwe ti kitadi ngise ti rüeye, nieba kwe nunye.

<sup>22</sup> Yebtä abko nun moto rababa ulire jökrä angwane, nun itire itire rikaba niere ja täritäri Jesuye:

Ti Dänkien, ¿tikwe nuendi ya gwari? nun rababa niere.

<sup>23</sup> Abtä Jesukwe nieba mda nunye:

Ni iti käta ban mike tibo gware tibe blato kwatibe te, ye abko kákwe ti kitadi ngise, <sup>24</sup> akwa ti, Ni Kä Nebtä Ngobo abko müre ketadi ño, ye tä tikani Ngöbö Kukweibä abko erere rakadikä. ¡Akwa ni ti kitaka ngise abko ñan bobre jakän ya! Ni ye nin däredre näre abko därebare, nieba Jesukwe.

<sup>25</sup> Angwane Judas kä nämane Jesu kite ngise tiebe ye kákwe nieba mda Jesuye:

Dirikä, ¿tikwe ma kitadi ngise ya? nieba kwe.

Abtä Jesukwe nieba mda ie:

Ma ara kákwe ti kitadi ngise erere makwe nini metre, nieba kwe ie.

<sup>26</sup> Yebti nun näma mröre jökrä angwane, Jesukwe ban dianba kunti kisete, kákwe kuin nieba btä Ngöböye, bti ötabtäba kwe, bti bianba kwe nun ja tötitikaka benye, kákwe nieba:

Ban ne abko ti ngätä ara. Ne kaen ngäbti munkwe, bti munkwe kweta, nieba kwe nunye.

<sup>27</sup> Yebti uba doi näma basote abko Jesukwe dianba kisete, bti kuin nieba btä kwe Ngöböye, bti bianba kwe nunye, kákwe nieba:

Uba doi tä basote ne ñaen ja täritäri munkwe. <sup>28</sup> Uba doi ne abko ti därie tikwe ara. Ngöbökwe kukwe ükadite btin munbe ye abko rabadi bare täte jökrä ti därie nehti. Erere arato, ti därie rimiadite ni kwati kräke köböire ni kwati ngite Ngöbö rüere ye Ngöbökwe diandikä mento btä. <sup>29</sup> Akwa Ngöböta gobrane ye känti tikwe uba doi btin ñadita munbe, akwa ti ngämi ñaen munbe, känenkri tikwe ñan ñadreta jire chi abko ti tö nibi niei munye. Abko kore se, nieba kwe nunye.

<sup>30</sup> Yebti nunkwe ka Salmobtä nieba ünän jökrä, bti nun rikaba Ngitio Olibobti.

*Pedro kákwe Jesu rükandite, niebare Jesukwe*

*(Marcos 14.26-31; Lucas 22.31-34; Juan 13.36-38)*

<sup>31</sup> Angwane Jesukwe nieba nunye:

Kukwe rakadikä tibtä, yebtä mtare deo mun gitiasi iti iti kwäräkwärä tibtä mentokwärä, ñiobtä ñan angwane Ngöbö Kukwei käta ti bä mike obeja ngibiaka kwrere amne mun abko obeja tikwe kwrere abko krörö:

Tikwe obeja ngibiaka kämikadi angwane, obeja kwe abko gitiasi kratikrati kwäräkwärä,

*Zacarías 13.7*

abko Ngöbö Kukwei tä niere kore munbtä.

<sup>32</sup> Akwa ti müre ketadi, bti ti rükadita nire angwane, ti näin mun ngäbti Galilea, känti ni rabadita ketetibe jökrä, nieba Jesukwe nunye.

<sup>33</sup> Abtä Pedro kákwe nieba Jesuye:

Ni mda mda kákwe ñan tödekadre mabti, aiseti gitiasi mabtä mento, akwa ti abko kákwe ñan nuendi jire chi kore, nieba kwe.

<sup>34</sup> Abtä Jesukwe nieba mda ie:

Mtare deo antlan ngämi ngwane, känenkri makwe ti rükadite bämä jire abko ti tö nibi niei metre mae, nieba kwe Pedroye.

<sup>35</sup> Abtä Pedrokwe nieba mda Jesuye:

Ti kämikadre gware mabe ya ño, akwa tikwe ñan ma rükadite jire chi, nieba kwe.

Amne nun ja tötitikaka Jesube abko rababa ñäke gware jökrä Pedro kwrere siba.

*Jesu nikani blite Ngöböbe Getsemaní*

*(Marcos 14.32-42; Lucas 22.39-46)*

<sup>36</sup> Yebti nun ja tötitikaka Jesube, ben Jesu rikaba nebe kákä Getsemaní känti angwane, Jesukwe nieba nunye:

Täke temen yete munkwe amne ti abko bike niken käname nokore blite Ngöböbe, nieba kwe.

<sup>37</sup> Yebti Pedro amne Zebedeo ngobo nibu Juan amne Santiago aibe ngwianba kwe jabe. Yebti Jesu moto jatani ulire amne moto namani bete krübäte ja jiebti, <sup>38</sup> kákwe niebare nitre nimä yeye:

Ti moto nibi ulire krübäte dikaro tie, aisetet i kebera krüte nibi ruen tie, aisetet mun raba ti ngibiare nete, akwa munkwe ja ngwätei siba tibe amne munkwe ñan kibia, niebare kwe ietre.

<sup>39</sup> Ye btäräbe Jesu nikani bā mente temen se kwrere, känti nikani ngitiekä ngukudok-wäbti temen, käkwe ja okokrä mikani nebe dobobtä temen amne blitabare krörö kwe Ngöböbe:

Ti Rün tikwe, ti kite ja tare nike kri krübäte jakän, akwa tikwe ñan ja tare nikadre kore, ie ma tö ne ngwane, makwe dian ti bäre. Akwa ma tö dreye tigrä, ye erere raba bare tibtä amne ñan ti töi abko erere rabadre bare, niebare kwe Rün Ngöböye.

<sup>40</sup> Yebti nitre nimä ja tötitikaka Jesube näma, ye känti Jesu nikaninta angwane, niaratre nämane kibien kuin jökrä, btä Jesu namaninta angwane, Jesukwe niebare Pedroye:

¿Ñänä okwä kratibe abko te kä ñan nü munye ja ngwätere blitakäre Ngöböbe gware tibe ya? <sup>41</sup> Diablu jatadi mun nuente ja käne ye ngwane, munkwe ñan ja mikadre ngite, abkokäre munkwe ja ngwätei amne munkwe blita jakrä Ngöböbe, ñobtä ñan angwane mun töi abko tä biare jäandrän kuin nuene, akwa mun di ñakare, aisetet munkwe blita jakrä Ngöböbe, niebare Jesukwe ietre.

<sup>42</sup> Yebti Jesu nikani bliteta bobukäre Ngöböbe, käkwe niebare krörö:

Ti Rün, tikwe ja tare nikadre kri krübäte jakän, ye makwe dian ti bäre, akwa tikwe ja tare nikadre kri, abti makwe diandrekä tibti, ye ngwane ma tö dreye, ye erere raba bare tibtä, niebare Jesukwe Rün Ngöböye.

<sup>43</sup> Yebti nitre nimä ja tötitikaka Jesube, ye känti Jesu nikaninta angwane, namani kibien kuin jökrä, ñobtä ñan angwane köbö namani krübäte ietre, aisetet okwä kwata namani neketekäbe jabtä köbö kisete, btä Jesu namaninta. <sup>44</sup> Abtä Jesukwe ñan ñäkäbare mda ietre angwane, nikani bliteta bämäkäre Ngöböbe amne Jesukwe blitabare ño käne, ye kwrere blitabareta kwe Ngöböbe. <sup>45</sup> Abti nitre nimä ja tötitikaka Jesube, ye känti Jesu nikaninta angwane, Jesukwe niebare ietre:

¿Mun tä kibien amne mun tä jadüke janknu ya? Nitre kukwe kämekäme nuenkä abko kisete ti Ni Kä Nebtä Ngobo ne kitadi ngise ye abko käi nuru, <sup>46</sup> aisetet ni ti kitaka ngise tiebe ti rüeye abko nükera tibtä, aisetet näin krö, bränta, niebare kwe ietre.

### *Jesu kani ngite*

(Marcos 14.43-50; Lucas 22.47-53; Juan 18.2-11)

<sup>47</sup> Jesu näma blite kore, ye btäräbe ni iti ja tötitikaka ben kädian näma Judas Iscariote ye ara jataba nüke Jesu känti. Judas ye abko näma näin ni kwati ben. Nitre jataba ben ye abko näma näin ngitra ngwena kisete amne ruäre abko näma näin krito ngwena kisete. Nitre ye abko näma näin nitre blitaka Ngöböbe ni mda mda diäre Dänkien kähti amne nitre unbre ji dokwäte kähti arato. <sup>48</sup> Angwane Judas, Jesu kitaka ngise, ye abko käkwe nitre töi dianina käkwe niebare ietre:

Nire demain tikwe mun okwäbti ye abko Jesu ara, aisetet munkwe niara ye ka ngite, niebare kwe ietre.

<sup>49</sup> Ye erere bkänä, Judas jataba nüke, ye btäräbe rikaba Jesu känti, käkwe nieba krörö ie:

¡Ñantöre Dirikä! nieba kwe.

Bti Jesu demainba kwe.

<sup>50</sup> Abtä Jesukwe nieba mda ie:

Ja mräkä ma tö nibi dre nuein, ye erere makwe mika nebe bare jötrö, nieba kwe Judaye.

Angwane nitre jataba Jesu rüere ye käkwe krötäba Jesu ken, rankwaba btä, käkwe kaba ngite.

<sup>51</sup> Ye btäräbe ni iti ja tötitikaka Jesube käkwe ngitra diankaba kwatate, bti ni klabore ni blitaka Ngöböbe ni mda mda diäre dänkienkwe ye olo tikakaba ta kwe ie. <sup>52</sup> Abtä Jesukwe nieba ie:

Ngitra ye miketa jötrö kwatate yete, ñobtä ñan angwane ni rükä ngitrabti abko kämikata ngitrabti arato, aisetet ngitra ye üketa. <sup>53</sup> ¿Tikwe ja di kärädre ti Rünye angwane, gwängwarbe niarakwe angele juandre kabrekabre krübäte rüre ti dokwäre, ye

gare ñakare mae ya amarebti ye? <sup>54</sup> Akwa tikwe ja di kärädre kore ti Rünye angwane, Ngöbö Kukwei tä tikani tibtä abko erere ñan rabadre bare, aisete tikwe ñan angele kärädre ti Rünye rükäre ti dokwäre, nieba Jesukwe nun ja tötitkaka ben yeye.

<sup>55</sup> Yebti nitre rikaba Jesu kaen ngite, ye ie Jesukwe nieba krörö:

¿Ñobtä abko bäsí ni gokä kri krübäte rüere ngitra jäta niken amne krito jäta niken, kwrere jire mun kite ngwena ti rüere ti kakäre ngite ye? Käre köbö kwatirekwatire titä dirire ju blitakrä Ngöböbe käntita temen, akwa mun ñakare ti kaen ngite. <sup>56</sup> Akwa nitre Ngöbö kukwei niekä kákwe tärä tikani tibtä, ye erere rabadre bare täte jökrä tibtä, abkokäre mun nüke ti kaen ngite kore, nieba Jesukwe ietre.

Jesukwe ñäkäba kore, ye btäräbe nun ja tötitkaka ben kákwe kä mikakaba batibe jökrä amne nun gitiaiba iti iti kwäräkwärä amne nunkwe Jesu mikateba kaibe rüeye.

### *Jesu jänikani Sanedrin ngwärekri*

(Marcos 14.53-65; Lucas 22.54-55,63-71; Juan 18.12-14,19-24)

<sup>57</sup> Yebti nitre Jesu kaka ngite ye nikani Jesu ngwena nebe Caifás gwiriete. Caifás abko ni blitaka Ngöböbe ni mda mda diáre dänkien. Angwane Caifás gwiriete abko Kukwe Biani Ngöböökwe Moiséye dirikätre nämane ja ükaninkrö ketetibe nitre unbre ji dokwätebe abko känti Jesu jänikani. <sup>58</sup> Jesu jänikani angwane, Pedro abko jatani bä mente temen siba Jesu jiebti. Yebti nikani nebe ju bäre ni blitaka Ngöböbe ni mda mda diáre dänkien ye känti. Pedro nikani siba ki teri angwane, guardia ju blitakrä Ngöböbe ngibiabtikä nämane täkänintbe, ye känti Pedro namani täkänintbe siba amne dre rakadikä mda Jesubtä abko tö namani tuai, aisete nikani yete. <sup>59</sup> Angwane nitre blitaka Ngöböbe ni mda mda diáre dänkien amne Sanedrin namani kukwe känene ngwarbe Jesu rüere Jesu kitakäre ngise müre ketadre, <sup>60</sup> akwa kukwe era erere ñan namani kwen ietre Jesu rüere. Ni kwati namani nüke blite ngwarbe Jesu rüere, akwa kukwe ñan namani kwen jire chi ietre Jesu kitakäre ngise. Yebti ni mdara jire namani nibu <sup>61</sup> abko kákwe niebare krörö Jesu rüere:

Ni noko kákwe nieba krörö: Ju blitakrä Ngöböbe se ti raba juen ngwarbe jökrä, abti köbömäkäre angwane, ti raba miketa täte, nieba kwe nun okwäbti, niebare kwetre.

<sup>62</sup> Yebtä abko ni blitaka Ngöböbe ni mda mda diáre dänkien ye nükani dikekä krö, kákwe niebare Jesuye:

¿Kukwe nie nibi ma rüere, se ño metre amarebti ma nibi kwekbe jirekäbe ye? niebare kwe ie.

<sup>63</sup> Akwa Jesu abko namani kwekbe janknu. Abtä ni blitaka Ngöböbe ni mda mda diáre dänkien ye kákwe niebare mda Jesuye:

Ngöbö nire tä näne se käbti makwe kukwe era erere nie tie abko krörö: ¿Ma abko Ni Dianinkä Ngöböökwe ara ya amne ma abko Ngöbö Odei ara ya? ye niere nunye, niebare kwe Jesuye.

<sup>64</sup> Angwane Jesukwe niebare mda:

Jän ti abko ni ño nini makwe, ye kwrere bkänä, akwa ti bike kukwe mdara jire niere arato mun jökräye abko krörö: Kä bäri ütiäte kri Ngöbö Di Kri Jändrän Jökrä Nuenkrä ye küde ruenkri munkwe Ni Kä Nebtä Ngobo tuadi täkänintbe. Erere arato, jatadita mütabti käinta sete amne munkwe tuadi, niebare Jesukwe.

<sup>65</sup> Angwane ni blitaka Ngöböbe ni mda mda diáre dänkien ye moto namani romon, kákwe dän ngianinkä seeen jabtä romone, kákwe niebare krörö:

¡Ni ne käta ñäke taretare Ngöbö rüere! ¿Se abko ni mda mda kákwe niara kitadre ngise amne batibe ngite, nikwe niedre ya? Ñakare, ñobtä ñan angwane niarakwe ñäri tare Ngöbö rüere, ye nunkwe kukwe nurira ñan ñan. <sup>66</sup> ¿Munkwe töbikadi ño mda kräke? niebare kwe.

Angwane nitre jökrä nämane yete kákwe niebare:

Niarata ja mike ngite, aisete krütadre jirekäbe, niebare kwetre mda.

<sup>67</sup> Ye btäräbe nitre ye käkwe käli kitani Jesu ngwärebtä amne nikani mete ja käne amne ni mda mda abko namani Jesu mete ngwärebtä mikakäre ngwarbe jae, <sup>68</sup> kä namani niere ie:

Ma abko Ni Dianinkä Ngöböökwe bkänä ne ngwane, nirekwe ma miti ngwärebtä ye niere metre nunye, namanintre niere Jesu mikakäre yakrä jae.

*Pedro käkwe Jesu rükaninte*

(Marcos 14.66-72; Lucas 22.54-62; Juan 18.15-18,25-27)

<sup>69</sup> Kukwe nämane nakenkä kore Jesubtä angwane, Pedro abko namani täkänintbe ju bäre. Ye btäräbe meri sribikä yete jatani nüke Pedro ken, käkwe niebare ie:

Jesu Galileabo se ben ma nämane dikekä siba arato, niebare kwe ie.

<sup>70</sup> Akwa nitre nämane yete, ye ngwärekri jökrä Pedrokwe ja rükaninte, käkwe niebare: Mata blite drebtä abko ñan nebe nüke gare tie, niebare kwe.

<sup>71</sup> Yebti Pedro nikani, namani nünaninkä jukwete kibtä, känti meri sribikä mdara jire ie niara jatabare angwane, ni ye käkwe niebare ni mda mdaye:

Jesu Nazarebo abko ben ni noko nämane dikekä siba, niebare kwe.

<sup>72</sup> Angwane ja rükanrete kwärä Pedrokwe ja kukwe biani, kä namani niere krörö:

Ni kädekata Jesu makwe, ni ye gare ñakare jire chi tie, namani niere.

<sup>73</sup> Yebti nitre nämane yete käkwe krötabare mda Pedro ken, käkwe niebare ie:

Ma ye tä nekete arato Jesube kwrere, ñobtä ñan angwane mata blite ño, ye aibebti ma reketaka niarakri abko ma nibi bá mike jabtä, niebare kwetre Pedroye.

<sup>74</sup> Angwane Pedrokwe ja kukwei bianinta amne niarakwe ñan kukwe niedre metre ne ngwane, Ngöböökwe ngürün mikadre btä namani niere, käkwe niebare mda:

Ni kädekata Jesu munkwe, ni ye abko gare ñakare jire chi tie, niebareta kwe.

Ye btäräbe antlankwe ngwänänbare. <sup>75</sup> Angwane Jesukwe kukwe niebare krörö Pedroye abko nükantinta töre ie: Antlan ngämi ngwäne, känenkri makwe ti rükandite bämä jire, niebare Jesukwe ie, ye nükantinta töre ie angwane, nikani mentokwäre se kwrere, käkwe ja müaibare kri kä bäre mento.

## 27

*Jesu jänikani ngite Pilato ngwärekri*

(Marcos 15.1; Lucas 23.1-2; Juan 18.28-32)

<sup>1</sup> Kä jatani ngwen dekä angwane, nitre blitaka Ngöböbe ni mda mda ma diäre dänkientre amne nitre unbre ji dokwätte nitre israelita ngätäite ye käkwe kukwe ükaninte Jesu müre ketakäre. Yebtä abko ja töi mikani kwatibe jökrä kwetre, <sup>2</sup> käkwe Jesu kise mäkäninte jökrä, bti jänikani ngite Pilato ngwärekri. Pilato abko gobran romanobo.

*Judas Iscariote käkwe ja müre ketani*

<sup>3</sup> Angwane Judas Jesu kitaka ngise tiebe ye abko Jesu kitani ngite müre ketadre gani kwe angwane, ja namani ruen ngite krübäte ie. Abtä nikaninta, käkwe ngwian mnüne gre ketamä ye bianinta jökrä nitre ji dokwätteye amne nitre unbre ji dokwätte yeye, <sup>4</sup> käkwe niebare ietre:

Jesu abko ngite ñakare, akwa tikwe kitaba ngise müre ketadre. Yebtä abko tikwe ja mikaba ngite Ngöbö rüere, aisetet i bike ngwian bienta jirekäbe munye, niebare kwe.

Akwa nitre ye käkwe niebare Judaye:

Mata kukwe niere ye abko ngwarbe, ütiäte ñakare nunkrä, ñobtä ñan angwane ye abko kukwe kaibe makwe. Abko kore se, niebare kwetre Judaye.

<sup>5</sup> Angwane ju blitakrä Ngöböbe ye känti Judakwe ngwian ye kitani temen, bti Judas nikani, käkwe ja müre ketani köte. <sup>6</sup> Abtä nitre ji dokwätte nitre blitaka Ngöböbe ni mda mda diärehti ye käkwe ngwian ye ükaninkrö, käkwe niebare krörö:

Ni müre ketadre abko ütiä biani ngwian nebti, aisetet ngwian biani Ngöbökrä ye ben ketetibe ni ñan raba ngwian ne mike, niebare kwetre.

<sup>7</sup> Abti ja töi mikani kwatibe kwetre kä kökakrä ngwian yebti. Kä kädeka nämane ni kantra sribekä abko käi nie nämane, ye abko kökani kwetre ngwian yebti nitre menteni

doboi mikakrää, <sup>8</sup> aisetet kä ye abko kädianta krörö: Ni Müre Ketani Käi abko nieta kore abko kä nüke mtare.

<sup>9</sup> Kä kökani kore kwetre angwane, kukwe niebare ni Ngöbö kukwei niekä kira Jeremíakwe namani bare abko tä tikani krörö Ngöbö Kukweibtä:

Niara ütiä mikani nuäi nitre israelitakwe, ye erere ngwian mnünebe biani gre ketämä niara ütiäre amne, <sup>10</sup> ngwian yebti abko kä kädekata Ni Kantra Sribekä Käi nieta abko kökani, ni Dänkien Ngöbö kákwe nuemna ño tie, ye erere namani bare,

*Jeremías 19.1-13; 32.6-9*

abko niebare kore Jeremíakwe, ye erere namani bare.

### *Jesu Pilato ngwärekri*

(Marcos 15.2-5; Lucas 23.3-5,13-25; Juan 18.29-19.16)

<sup>11</sup> Jesu abko jänamani gobran Pilato ngwärekri angwane gobran ye kákwe niebare ie: ¿Ma abko jrei nitre israelitakwe bkänä ya? niebare kwe Jesuye.

Angwane Jesukwe niebare mda ie:

Jän. Era metre ti ara, niebare kwe ie.

<sup>12</sup> Angwane nitre blitaka Ngöböbe ni mda mda diäre dänkientre btä nitre unbre ji dokwäte namani Jesu kite ngise krübäte, akwa Jesu abko namani kwekbe jirekäbe. <sup>13</sup> Abtä Pilato kákwe niebare krörö ie:

¿Kukwe nie nibi bätäkä ngwarbe ma rüere ye jaraen ñakare mae ya amarebti ma nibi kwekbe jirekäbe? niebare kwe Jesuye.

<sup>14</sup> Akwa Jesu namani kwekbe janknu, nin ñäkäbare jire chi kwe Pilato käre. Abtä gobran Pilato ye ñan töi namani krütare mda Jesubtä.

### *Jesu kitani ngite müre ketadre*

(Marcos 15.6-15; Lucas 23.13-25; Juan 18.39-19.16)

<sup>15</sup> Kä kwatirekwatire bieta Pascua näire abko nitre ngite ye ngätäite nire tikadreteta abko nitre israelita kwati nämane niere abko erere käre gobran ye nämane tikete. <sup>16</sup> Ne aisetet kä ye ngwane ni iti ja mikaka ngite kri krübäte abko nämane kitani ngite kä teri yete. Ni ye abko kädian nämane Barrabás. <sup>17</sup> Gobran Pilato ye ñan töi namani krütare mda Jesubtä. Yebti ni jökrä namani ja ükaninkrö yete, ie Pilato kákwe niebare mda:

Tikwe nire tikadreteta munkrää ie mun tö nibi. Barrabás ya o Jesu Ni Dianinkä Ngöböökwe nieta se tikadreteta, niere tie munkwe, niebare Pilatokwe.

<sup>18</sup> Pilato abko kákwe niebare kore, ñobtä ñan angwane nitre ji dokwäte ye namani mokrere Jesube, abtä kitani ngite kwetre abko ganina Pilatokwe btätre, aisetet niebare kore kwe. <sup>19</sup> Yebti kürä kukwe ükatekrä gobrankwe, yebti Pilato nämane täkänintbe angwane, merire kwe kákwe kukwe juani krörö kräke: Ni ye abko töi metre amne ngite ñakare, aisetet makwe ñan kukwe nuen käme rüere, ñobtä ñan angwane ni yebtä tikwe ja käbätiri krübäte deo abko Pilato merirei ye kákwe niemna kore ie.

<sup>20</sup> Akwa nitre blitaka Ngöböbe ni mda mda diäre dänkientre amne nitre unbre ji dokwäte kákwe nitre kwati ye töi kwitani jakri amne Barrabás abko tikadreteta amne Jesu abko müre ketadre abko ni jökrä kákwe niedre, niebare kwetre ie. <sup>21</sup> Abtä gobran ye kákwe niebareta mda ietre:

¿Ni nibu tä ngite kä teri nete, ne mdən tikadreteta ie mun tö nibi? niebare kwe.

Angwane ni jökrä israelita nämane yete kákwe niebare:

¡Barrabás ye tiketeta! namanintre niere. <sup>22</sup> Angwane Pilatokwe niebare mda ietre:

¿Jesu abko Ni Dianinkä Ngöböökwe nieta, sebtä abko tikwe dre nuendre, ie mun tö nibi amarebti yere? niebare kwe.

Angwane ni jökrä kákwe niebare:

¡Jesu ye müre kete krusobtä! namanintre niere mda.

<sup>23</sup> Abtä Pilato kákwe niebare mda ietre:

¿Drebtä ni nekwe ja mikani ngite amarebti, mun nibi müre ketamna krusobtä tie yere? niebare kwe ietre.

Yebtä namani ngrente bäri jume mda, kä namani niere:

¡Müre kete krusobtä, müre kete krusobtä! namanintre niere Pilatoye.

<sup>24</sup> Abtä ni jökrä ñan namani tuen töi kwitare jire chi Pilatoye angwane, niarakwe kukwe niebare, yebtä bári ni jökrä jatani kä mike bári nokre. Abtä Pilato kákwe ñö käräbare, bti ja kise bätäninte kwe nitre israelita ngwärekri, kákwe niebare krörö ietre:

Jesu müre ketadi, yebtä ti ñan rabadre ngite, ñobtä ñan angwane ye abko kukwe munkwe, aisetet mun rabadi ngite Jesu dokwäre, niebare kwe.

<sup>25</sup> Angwane nitre israelita kákwe niebare krörö mda Pilato käre:

Jesu müre ketadi ye abko nun amne ngäbäkre nunkwe abko rabadi ngite Ngöböye, aisetet nunkwe kötä mikadi ie, niebare kwetra Pilatoye.

<sup>26</sup> Angwane Pilatokwe Barrabás tikaninte. Akwa Jesu abko kwata metamna köbti kwe amne biani kwe rükä romanoboye müre ketadre krusobtä. <sup>27</sup> Ye erere bkänä, nitre rükä gobrankwe ye nikani Jesu ngwena nebe ju gobrankwe känti angwane, nitre rükä kákwe ja ükaninkrö jökrä Jesu bäre mikakäre yakrä jae, <sup>28</sup> kákwe dän tikaninte btä, bti dän bá tain drüne kita nämane jabtä jreikwe, ye kwrere kitani Jesubtä. <sup>29</sup> Erere arato, jrei kri kákwe korona mikadre ja dokwäbti, ye kwrere kri tukwä krübäte sribbare koronare kwetre, bti mikani Jesu dokwäbti kwetre, bti mökän mikani krati Jesu kise ruenkri kwetre niara mikakäre yakrä jae jrei di kri kwrere. Yebti namanintre jökrä ngukudokwäbti temen Jesu ngwärekri, kä namani niere krörö ie mikakäre ngwarbe jae:

¡Ma jrei nitre israelitakwe, nunta ma mike ütiäte kri mtare! namanintre niere.

<sup>30</sup> Kä namani käli kíte Jesubtä amne mökän mikani kisete kwetre ye arabebti namanintre Jesu mete dokwätä. <sup>31</sup> Jesu mikani yakrä kore kwetre jae, bti dän bá tain drüne ye tikaninteta Jesubtä kwetre, bti dän Jesukwe ara kitaninta btä kwetre. Yebti nikanintre ngwena müre ketadre krusobtä.

### *Jesu metani krusobtä*

(Marcos 15.21-32; Lucas 23.26-43; Juan 19.17-27)

<sup>32</sup> Yebti namanina ji ngrabare angwane, ni iti nünanka juta Cirenete abko kädian nämane Simón abko namani ngätäi bentre angwane, Simón ye mikani kruso ngwena Jesukrä rükäkwe. <sup>33</sup> Bti nikanintre nebe kákä Gólgota känti. Kä Gólgota ye abko “Ni dokwä kroko käi” nieta abko känti nikanintre nebe Jesube. <sup>34</sup> Angwane krikä kwaka mritani uba döibe mni mni biani ñadre kwetre Jesuye. Jesu kákwe dö ye bänän nuani angwane, nin ñani jire chi mda kwe. <sup>35</sup> Angwane nitre rükä romanobo kákwe Jesu metani krusobtä. Yebti tö namanintre dän Jesukwe ñäkäitbe jabti, kákwe ja gani dän yebtä. <sup>36</sup> Yebti nitre rükä ye namanintre täkänintbe temen Jesu ngibiabtikäre. <sup>37</sup> Angwane ñobtä Jesu kitani ngise müre ketadre abko nämane tikani kri kukwänbtä abko mikani krusobtä Jesu dokwä känti käin abko btä kukwe nämane tikani krörö: “NI NE ABKO JESU. NIARA ABKO JREI NITRE ISRAELITAKWE” abko nämane tikani kore.

<sup>38</sup> Jesu metani krusobtä angwane, nitre gokä metani nibu krusobtä käin arato niarabe gware. Iti mikani niara küde ruenkri amne iti abko mikani niara küde ngeberekeri.

<sup>39</sup> Angwane nire nire namani kíte dikekä Jesu bäre, kä namani dokwä ngrüketbe ñäkäre kwärä Jesuye, Jesu mikakäre ngwarbe jae, <sup>40</sup> kä namanintre niere ie:

Ju blitakrä Ngöböbe se makwe juandi ngwarbe abti köbömäkäre makwe mikadreta tate jökrä, makwe niebare, aisetet ma Ngöbö Odei bkänä ne ngwane, ja denkä au mento krusobtä yete, bti ma jatata timon, namanintre niere Jesuye.

<sup>41</sup> Erere arato, nitre blitaka Ngöböbe ni mda mda diäre dänkientre amne Kukwe Biani Ngöbökwe Moiséye dirikätre amne nitre unbre ji dokwätä abko namanintre Jesu mike yakrä jae, kä namani niere krörö ie:

<sup>42</sup> Ni mda mda dianintari kwe, ¿se ñobtä abko ñan nebe ja dentari au se? Niara abko Jrei nitre israelitakwe nieta kwe jabtä, aisetet ja diandrekä au krusobtä mento kwe sete angwane, nunkwe mikadi ütiäte jae. <sup>43</sup> Mdakäre abko, niarakwe ja töi mikani kwatibe Ngöböbtä, aisetet Ngöbö tö era metre ie bkänä ne ngwane, Ngöbö ara jire kákwe diandikä gwängwarbe krusobtä mento mtare. Niara nämane ja Ngöbö Odei niere jabtä amarebti nibi kweke krusobtä käin se, namanintre niere Jesuye.

<sup>44</sup> Angwane nitre gokä nämane metani kruso mda mdabtä käin arato Jesu ken, ye namani ñäke arato Jesuye, mikakäre yakrä jae.

### *Jesu krütani*

(Marcos 15.33-41; Lucas 23.44-49; Juan 19.28-30)

<sup>45</sup> Yebti ñänä ruäre angwane, kä ngidianinte mda amne kä namani iko jökrä temen nükebe ñänä okwä krämä dere. <sup>46</sup> Ñänä okwä krämä nükani, ye btäräbe Jesukwe ngratebare kri ja dibtì, kákwe niebare krörö:

Elí, Elí ¿lama sabactani? niebare kwe.

Kukwe niebare kore Jesukwe ye abko “Ngöbö tikwe, Ngöbö tikwe, ¿ñobtä makwe kä mirikä tibtä jakän amarebti yere?” niebare kwe. <sup>47</sup> Jesukwe ñäkäbare kore, ye abko nitre ruäre nämane yete kákwe kukwe nuani angwane, namanintre niere:

¿Ñan tä ni Ngöbö kukwei niekä kira kädian nämane Elías kärere jabtä, ja die mikakäre ya? namanintre niere kore.

Niebare kore kwetre, ñobtä ñan angwane Jesukwe “Elí” niebare angwane, namani ruen “Elías” kwrere ietre aisetē.

<sup>48</sup> Ye btäräbe nitre ye nikani betekä iti, kákwe jändrän dän kukwän kwrere kä dianta esponja abko mritaninkä uba ñöi dimente, bti mäkäninte kwe nörä kräbtä, bti biani kwe ñadre tomnane Jesuye. <sup>49</sup> Akwa ni mda mda abko kákwe niebare krörö ni yeye:

Elías rükadre dentari ya ño ari ngibiare, aisetē tuemetre yete, niebare kwetre.

<sup>50</sup> Ye btäräbe Jesukwe ngratebareta jume ja dibtì bobuta, kákwe ja üai mikaninta Ngöbö kisete angwane krütani. <sup>51</sup> Jesu krütani, ye btäräbe dän ngutu ngetbo, bti ju blitakrä Ngöböbe nämane ñäkänintbe abko nianinkä kumu käin nükebe temen amne dobo abko namani nakenkä amne jäkwata abko getrani. <sup>52</sup> Angwane kä mkä känti nitre nämane doboi mikani, ye mkä ngitianinkä jökrä angwane, ni kwati kákwe nünabare deme Ngöbökrä abko nämane doboi mikani ye nükaninta nire <sup>53</sup> abko kákwe kä mikaninkä rökabti yete. Yebti Jesu nükaninta nire arato angwane, niaratre nikani nebe juta demente Jerusalén. Ye känti ni kwati kákwe tuani.

<sup>54</sup> Ye ngwane nitre rükä dänkien romanobo amne nitre rükä mda mda nämane Jesu ngibiarebti, ye okwäbti dobo namani nakaenkä amne kukwe mda mda namani nakenkä bätäkä ngwarbe niaratre okwäbti angwane, kä jürä namani krübäte btätre, kákwe niebare:

¡Ni noko abko Ngöbö Odei era metre bkänä! niebare kwetre.

<sup>55</sup> Amne meri ruäre nämane dikekä kwäräkwärä Jesube kä Galileate, kä nämane Jesu die mike sribitä, ye abko nükani siba Jerusalén abko namani bätäkä amne. Ye erere Pilatokwe Jesu okwä Jesubtä. <sup>56</sup> Meritre ye abko kädian nämane María Magdalabo amne María Santiago amne Josémeye, erere arato Zebedeo ngäbriänkä Juan amne Santiago mdara jire abkomeye nämane siba arato.

### *Jesu doboi mikani*

(Marcos 15.42-47; Lucas 23.50-56; Juan 19.38-42)

<sup>57</sup> Yebti kä jatani dere angwane, ni iti ngwian bkänä kri kädian nämane José nünanka juta Arimateate abko nükani. José ye abko nämane dikekä siba Jesube. <sup>58</sup> José ye abko nikani Pilato känti, kákwe Jesu ngwäkä käräbare Pilatoye. Ye erere Pilatokwe Jesu ngwäkä biamna Joséye. <sup>59</sup> Ye erere bkänä, Josékwe Jesu ngwäkä diani timon angwane, dän kädianta lino abko nämane merebe, te ngwäkä mrianinte kwe. <sup>60</sup> Yebti kä muani btin jäkwataate ni doboi mikakrä Josékwe, ye känti Jesu doboi mikani kwe. Jesu doboi mikanina angwane, kä mkä ye dikaninta kuin jite kwe jäkwata kribti, bti nikaninta. <sup>61</sup> Akwa María Magdalabo amne María mda nämane yete, ye abko namani täkänintbe yete Jesu doboi mikani ye känti.

*Guardia mikani röka ngibiarebti*

<sup>62</sup> Jesu doboi mikani, yebti jändrinane köböjadükakrää näire, nitre blitaka Ngöböbe ni mda mda diäre dänkientre amne nitre bariseo nikanintre gware nebe Pilato känti, <sup>63</sup> kákwe niebare krörö ie:

Nun dänkien, ni ngwarbe ni ngökaka müre ketaba jändrin kädianta Jesu, ye abko nämame nüne angwane, nieba krörö kwe: Ti müre ketadi, akwa köbömäkäre angwane ti rükadita nire, nieba kwe, ye abko nüta töre nunye. <sup>64</sup> Ne aisetet, makwe guardia mikadre röka ye ngibiarebti kuin nebebe köbömä näre abko nun tö nibi niei mae, ñobtä ñan angwane nane nitre ja tötitikaka Jesube kákwe ngwákä goidre abti nukaninta nire tädre näin niere ni mda mdaye, nane nitre ja tötitikaka ben abko rikadre ni ngökö bári mda, ye abko rabadre bári käme, aisetet nun tö nibi niei kore mae ye, niebare kwetre Pilatoye.

<sup>65</sup> Abtä Pilatokwe niebare mda ietre:

Nitre rükä tärä guardiare munkwe yete, ye abko ben mun rika, kákwe kä tärä mika gare kuin röka yebti ni mda mda mikakäre mokre amne munkwe röka ye ngibiadre bári kuin. Abko kore se, niebare Pilatokwe ietre.

<sup>66</sup> Ye erere bkänä, nitre ye nikani amne jäkwata mikani röcabti, yebtä kä tärä mikani gare kuin kwetre, ni mdakwe ñan Jesu ngwákä goidre abkokäre. Erere arato, nitre rükä mikaninte ruäre guardiare kwetre röka ngibiarebti yete.

## 28

### *Jesu nukaninta nire*

(Marcos 16.1-8; Lucas 24.1-12; Juan 20.1-10)

<sup>1</sup> Yebti köböjadükakrää nikani ta, abti kä jatani ngwen krire bämänte dekä angwane, María Magdalabo amne María mdara jire ye nikaninta dobobti. <sup>2</sup> Ye btäräbe dobo namani nakaenkä kri krübäte, ñobtä ñan angwane angele ni Dänkien Ngöböwe nämame kä käinbti abko nükani kä temen nebtä. Angele ye abko nikani nebe röcabti angwane, jäkwata kri mikani kä mkäbti ye abko angelekwe dianinkä mento, bti namani täkänintbe jäkwata yebti. <sup>3</sup> Angele ye abko bá namaniträ ngitiekä mera trä kwrere amne dän btä abko bá namani ngwen bürere täräkwata kwrere. <sup>4</sup> Angele ye jatabare nitre rükä nämame guardiare röcabti yeye angwane, niaratre namani nekwetekä krübäte, aisetet namani grükekä jökrä ngrabare amne kä nötaninte jökrä bti, aisetet namanintre kitaninte temen ni ngwákäre kwrere.

<sup>5</sup> Angwane angele kákwe niebare meritre yeye:

Mun ñan rekwtaka. Jesu müre ketani krusobtä abko munta näin tuenta känti, ye gare kuin tie, <sup>6</sup> akwa Jesu nürate nire, aisetet ñakare nete, niarakwe niebare munye ye kwrere nibi bare, aisetet kä mkä aibe nebe tökare niara täbtä nete mun jakwe tuen. <sup>7</sup> Bti nitre ja tötitikaka Jesube ye ie mun rika niereta jötrö krörö: Jesu nürate nire, bike niken Galilea ja ükakrökäreta ketetibe munbe, känti munkwe ja tuadita ben abko munkwe nie kore ietre amne kukwe ne aibe tä niedre tikwe munye. Abko kore se, niebare angelekwe meritre yeye.

<sup>8</sup> Ye erere bkänä, meritre nämame dobobti ye nikaninta jötrö angwane, kä jürä namani krübäte btätre, akwa erere arato kä namaninta nuäre krübäte btätre, aisetet nikanintre betekä kukwe ngwenante nun ja tötitikaka Jesube ye kräke. <sup>9</sup> Niaratre nämame näin betekä ji ngrabare angwane, batibe Jesu ara nükani ngätäi bentre, kákwe “Ñantöre” niebare ietre. Ye btäräbe niaratre kákwe krötabare Jesu ken, nikani ngitiekä Jesu ngotobtä temen, kákwe Jesu ngoto kani ja käne angwane, mikani ütiäte kwetre jae.

<sup>10</sup> Angwane Jesukwe niebare ietre:

Mun ñan rekwtaka tibtä. Ti mräkätre ja tötitikaka tibe abko rikadre ti ngäbti kä Galileate. Ye känti ti tuadita kwetre abko mun nän niere ietre. Abko kore se, niebare Jesukwe meritre yeye.

<sup>11</sup> Nitre merire nikani kukwe ngwena kore, akwa nämame ji ngrabare angwane, nitre rükä mikani guardiare röka ngibiarebti abko bti kä nükani ruenta amne nikani betekä nebata jutate Jerusalén amne nitre blitaka Ngöböbe ni mda mda diäre dänkientre, ie kukwe nakaninkä ño ño, ye erere niebare jökrä kwetre. <sup>12</sup> Angwane nitre blitaka Ngöböbe

ni mda mda diäre dänkientre ye abko nikani blite mda nitre unbret ja töi mikakäre kwatibe gwaire bentre. Angwane niaratre kákwe ngwian biani kabre nitre rükä nämame guardiare rökabti yeje niaratre näkwitakäre, <sup>13</sup> kákwe niebare ietre:

Mun nämame kibien deo angwane nitre ja töitikaka Jesube jananbare Jesu ngwákä goireta rökabti, munkwe nie ni mda mdaye. <sup>14</sup> Erere arato, gobran Pilato kákwe kukwe ye gadi angwane, nunkwe blitadi ben niara näkwitakäre. Ye köböire abko kukwe ñan rabadre jire chi mun rüere amne nun rüere, niebare kwetre guardiaye.

<sup>15</sup> Ye erere bkänä, nitre rükä nämame guardiare ye kákwe ngwian kabre ye kani ngäbti. Abti niaratre kákwe dre niedre niebare ietre, ye erere nikanintre niere, aise te nitre ja töitikaka Jesube abko kákwe Jesu ngwákä goibare abko nie nikani kore kena nitre israelita ngätäite, ye erere nieta janknu abti kä nüke mtare.

### *Kukwe mrä Jesukwe*

(Marcos 16.14-18; Lucas 24.36-49; Juan 20.19-23)

<sup>16</sup> Nitre merire kákwe kukwe nieba nun ja töitikaka Jesube yeje angwane, nun ni jätabti iti abko rikaba bkänä Jesu ngäbti Galilea angwane, ngitio mdenbti nun rikadre niebare Jesukwe, ye känti nun rikaba. <sup>17</sup> Nun rikaba nebe yete angwane, Jesu jataba nunye angwane, Jesu ara nükaninta nire ye nun ruäre kräke ñan rababa nebe era, akwa nun jökrä rababa Jesu käikitekä. <sup>18</sup> Angwane Jesukwe krötaba nun ken, kákwe nieba krörö nunye:

Kä käinta se amne kä temen ne Ngöbökwe mikani gare jökrä tie, <sup>19</sup> aise te mun nän, amne nitre nünanka kä jökräbti temen, ye känti mun näin ti mike gare ietre amne munkwe niaratre mika ja töitikaka siba tibe amne munkwe niaratre ngöka ñöte ni Rün käbti, Ngöbö Odei käbti amne Ngöbö Üai Deme käbti. <sup>20</sup> Amne kukwe diribare tikwe munye, ye erere munkwe diri jökrä ietre amne niaratre kákwe ti kukwei ye mikadre täte jökrä arato, abkokäre munkwe diri ietre. Ti abko tädi kärekäre munbe köbö kwatirekwatire nebebe kä mrä. Abko kore se, nieba Jesukwe.

Abko kukwe nakaninkä kore se. Ne ngörä.

## Kukwe Kuin Jesubtä Tikani Marcokwe Marcos

Tärä ne tikaka abko kädian nämane Marcos. Niara kädian nämane Juan Marcos arato. Marcos abko nikani ñakare Jesu mukore nitre ja töitikaka Jesube ni jätäbti nibu kwrere, akwa niara abko Pedro kukwe muko nütüta, aisetet Pedro kákwe Marcos die mikani tärä ne tike abko ni kwati tä nütüre. Erere arato, Marcos abko Jerusalénbo, aisetet Jesukwe dre dre nuenbare amne dre dre niebare kwe abko nükani gare ie.

Nitre ñakare israelitare nünanka juta Romate, ye kräke Marcokwe tärä ne tikani, kukwe kuin Jesukristobtä mikakäre gare ietre. Nitre romanobo nämane nitre tödekaka Jesubti mike ja tare nike kri juta Romate, aisetet nane Marcos kákwe tärä ne tikani niaratre die mikakäre nünenkä dite Jesukrä.

Tärä nebtä abko Ngöbö Odei Jesu nükani nüne kä nebtä angwane, kukwe kuinkuin nuenbare kwe ni kwatikrä niaratre okwäbti abko Marcos tö namani mikai gare ni jökraye. Erere arato, Jesu mikani ja tare nike kri, bti krütani krusobtä, yebtä Marcos tä blite bari kabre. Erere arato, Jesukwe ja tare nikani kri, bti krütani, abti nükantina nire, aisetet niara bari dite ni rüe Satana ye ngwä amne tä ni die mikaka mtare abko Marcos tö namani mikai gare tärä nebtä.

Marcos ne mdenbtä abko kukweta tikani Hechos 12.12,25; 13.5,13; 15.36-39 amne 2 Timoteo 4.11. Marcos kákwe tärä ne tikani ñongwane metre gare ñakare nie, akwa tikani kä 50-70 angwane nütüta.

*Juan Bautista kákwe ji tikani Jesu käne  
(Mateo 3.1-12; Lucas 3.1-9,15-17; Juan 1.19-28)*

<sup>1</sup> Kukwe kuin nuenbare Ngöbö Odei Jesukristokwe abko nakaninkä ño kena ja täritäri abko ti bike tike täräbtä. Jesukristo nämane nüne ño abko ti bike tike täräbtä.

<sup>2</sup> Bati kira Ngöbökwe Juan ni ngökaka ñöte juandi ni mike biare niara Odei kakäre ngäbti, ye Ngöbökwe niebare niara Odeiye angwane, tikamna krörö täräbtä kwe ja kukwei niekä kädian nämane Isaíaye:

Tikwe ja kukwei ngwianka juandi iti ma känenkri.

Niarakwe ni töi mikadi biare ma käne, ji ükateta biare ye kwrere.

*Malaquías 3.1*

<sup>3</sup> Ni ye näin ñäke jume ja dibti kä kaibete, kákwe niedi krörö:

Ji ükateta kuin biare jrei känenkri, ye kwrere ja töi mike kuin biare munkwe.

Ji ükateta niken metre ta, ye kwrere ja töi ükete metre ni Dänkien käne munkwe, niebare kwe

*Isaías 40.3*

abko tikani kore täräbtä Isaíakwe Juanbtä.

<sup>4</sup> Ye erere bati, Juan ni ngökaka ñöte nükani kä kaibete, kä nikani niere: Munta kukwe kämekäme nuene, yebtä mun moto raba ulire. Kukwe käme kite jire jökrä temen munkwe, bti mun jata ja mike ngökare ñöte. Munkwe ye nuendi angwane, Ngöbökwe mun ngite ye diandikä jire jökrä munbtä, bti tikwe mun ngökadi ñöte, niebare Juankwe. Ngöbö Kukwei tikani Isaíakwe Juanbtä abko erere namani bare. <sup>5</sup> Ye ngwane, nitre nünanka kákä Judeate btä juta Jerusalénte nükani kwati Juan kukwei nuakäre, kä namanintre ja ngite niere Ngöböye angwane, Juan namani ngökö Ñö Jordánte.

<sup>6</sup> Juan abko nämane kameo drüen dikani dänre\* kite jabtä amne nämane mäkete nibi kwatabti jae amne mrö kweta nämane kwe abko tröda btä munkö känsenta. <sup>7</sup> Juan nämane ñäke angwane, käre namani niere krörö: Ni jatadi iti ti jiebti abko bari di kri ti ngwä, aisetet ja ñan rükadre töre jire chi tie sandalia tikete ni ye ngotobtä. <sup>8</sup> Tita mun

\* 1:6 kameo drüen dikani dänre. Kukwe tä tikani Mateo 3.4 btä, yebtä ñäke. <sup>†</sup> 1:7 sandalia tikete. Jesu näire ni klabore kökani ni mdakwe abko bari ene. Niaratre aibe nämane sandalia ni mdakwe tikete, aisetet Juan nämane ja bari mike bari ene ni klabore ngwä.

ngökö ñö aibe te, akwa ni ye abko kákwe Ngöbö Üai Deme mikadi nüne munbtä. Abko kore se, niebare Juankwe.

*Juankwe Jesu ngökani ñöte  
(Mateo 3.13-17; Lucas 3.21-22)*

<sup>9</sup>Juan nämane nitre ngökö ñö Jordánte angwane, Jesu nämane juta Nazarete kä Galilea yete. Jatani nüke Juan känti angwane, Juankwe ngökani ñöte, <sup>10</sup>jatani gökökäta ñöte käin, ye btäräbe kä käin ñäkänintbe Ngöböökwe namani tuen ie, bti Ngöbö Üai jatani ütü bä kwrere nüke mate btä, namani tuen ie jabtä. <sup>11</sup>Ngöbö kukwei jarabare krörö kä käinbtí: Ma ti Ngobo tikwe. Ma tare kri tikwe. Ma käi nuäre kri tibtä, niebare kore kä käinbtí Jesuye.

*Diablukwe Jesu nuaninte ja käne  
(Mateo 4.1-11; Lucas 4.1-13)*

<sup>12</sup>Yebti Ngöbö Üai nikani Jesu ngwena nebe kä kaibete. <sup>13</sup>Kä ye känti Jesukwe nünantbebare köbö gre ketebu jäandrän känsenta käite. Ye ngwane abko, Satana namani Jesu nuente ja käne, akwa Jesukwe ñan Satana mikani täte. Yebti angele nükani ruäre abko namani Jesu die mike.

*Jesu nikani Ngöbö kukwei kuin dirire kena  
(Mateo 4.12-17; Lucas 4.14-15)*

<sup>14</sup>Yebti abko, Juan kitani ngite kä teri. Yebti Jesu nikani Galilea, namani kukwe kuin Ngöböökwe niere krörö: <sup>15</sup>Ti rabadre gare kä nebtä köböi kitani Ngöböökwe abko nüra amne Ngöbö kitera gobrane nibti. Kukwe kämekäme kita temen munkwe, bti kukwe kuin Ngöböökwe nebti tödeka munkwe, Jesu namani dirire kore.

*Jesukwe ni käräbare nibkä ja töitike jabe  
(Mateo 4.18-22; Lucas 5.1-11)*

<sup>16</sup>Abti bati Jesu nikani Ñö Okwä Kri Galilea köräbare, nikrabare kwe angwane, ni jatabare nibu ie. Iti abko kädian nämame Simón. Etba kwe abko kädian nämame Andrés. Niaratre abko gwa gaka abko nämame krade kite ñöte, btä Jesu okwä namani. <sup>17</sup>Jesukwe niebare ietre:

Mun brän tibe amne munta gwa gaen ño, ye kwrere tikwe mun mikadi ni ngwianka Ngöböye, niebare kwe ietre.

<sup>18</sup>Ye btäräbe, niaratre kákwe krade kitani temen, bti nikani Jesube.

<sup>19</sup>Nebti Jesu nikani mda mentokwäre ñö köräbare angwane, ni iti kädian nämame Santiago amne etba kwe abko kädian nämame Juan abko nämame krade gudike rute. Niaratre nibu ye abko Zebedeo ngäbriänkä, btä Jesu okwä namani angwane, <sup>20</sup>Jesukwe käräbare ja töitike jabe arato. Niaratre kákwe sribikä aibe mikaninte rute rün Zebedeobe, bti nikaintre Jesube.

*Jesukwe üai käme juanintari mento  
(Lucas 4.31-37)*

<sup>21</sup>Yebti nikani jökrä juta kädian nämame Capernaúmte. Abti köbö jadükakräte angwane, Jesu nikani sinagoga yete, känti nikani dirire. <sup>22</sup>Jesu namani dirire, yebtä ni jökrä ñan töi namani krütare, ñobtä ñan angwane ni töbtä di kri kákwe diri ja di ngöi, kwrere jire Jesukwe diribare ietre amne, Kukwe Biani Ngöböökwe Moiséye dirikätre nämame dirire, ye kwrere Jesukwe diribare ñakare. <sup>23</sup>Angwane ni nämame iti sinagoga yete, btä üai käme nämame nüne. Te batibe ni ye kákwe ngratebare krörö mda:

<sup>24</sup>¡Jesu Nazarebo, nun tuemetre kaiibe nete! ¿Ye ñobtä abko ma kite ja mike kukwe nunkwete ta yere? ¿Ma kite nun gaenkä ya ño yere? Jesu, ma gare kuin tie. Ma abko Ni Deme Ngöböökwe gare tie, niebare üai kämenkwe Jesuye.

<sup>25</sup>Abtä Jesukwe niebare mda üai kämeye:

¡Üai käme, kada mkä kete makwe! Ni ye tuemetre gwängwarbe. Nän mento btä, niebare kwe.

<sup>26</sup> Üai käme ye käkwe ni ye ngrükaninte jume ngrabare, bti ngratebare kri kwe, bti ngitianini mento ni yebtä. <sup>27</sup> Nebtä ni jökrä töi ñan namani krütare Jesubtä, kä namani niere jae kwärikwäri: ¡Ni neta kukwe btin dirire ño ño amarebti niara di tärä üai käme juentari jötrö au, tä ñäke kwatibe üai käme juantarikrä mento amne üai käme tä niara kukwei mike täte sere! abko namanintre niere kore jae kwärikväri.

<sup>28</sup> Kukwe nakaninkä kore, abtä Jesu kädrie nikani jötrö ngwarbe, niken kä ketareketare te kä Galilea yete.

*Jesukwe Simón köbrän merire mikaninta kuinta*  
(Mateo 8.14-15; Lucas 4.38-39)

<sup>29</sup> Jesu nämane sinagoga känti. Nikani angwane, nikani Santiagobe btä Juanbe nebe Simón btä Andrés känti. <sup>30</sup> Namani känti angwane, Simón köbrän merire abko nämane bren drangwan kisete, niebare kwetre Jesuye.

<sup>31</sup> Abtä Jesu nikani mike ñäräre mda, nikani nebe jänbtä ken se kwrere, käkwe Simón köbrän kani küdehti, bti ganinkrö krö kwe. Ngöbö diebti drangwan nikaninbe batibe btä, namanintabe kuinta, bti nikani mrö känene niaratre bukakrä.

*Jesukwe ni bren bren mikaninta kuinta*  
(Mateo 8.16-17; Lucas 4.40-41)

<sup>32</sup> Kä jatanina iko angwane, ‡ ni kwati nünanka juta yete nükani Simón känti mräkä bren bren ngwena amne mräkä nämane ja tare nike üai käme kisete abko jänikani Jesuye mikadreta kuinta kwe abkokäre. <sup>33</sup> Ni namani kwati krübäte ja ükaninkrö jukwebtä angwane, <sup>34</sup> Jesu namani ni bren bätäkä ngwarbe miketa kuinta. Arato üai käme juanintari mento kwe ni kwtibtä. Jesu nämane sribire Ngöbö diebti abko nämane gare üai kämeye, aisetekwe üai käme kukwei ötani jökrä arato.

*Jesu nikaninta Ngöbö Kukwei dirire*  
(Lucas 4.42-44)

<sup>35</sup> Abti de, kä nämane diore angwane, Jesu naninkrö, nikani kä kaibete blitakäre Ngöböbe. <sup>36-37</sup> Simón btä kukwe muko mda mda nükani ngwäte angwane, nikanintre Jesu känentari kisere. Te kwanintari ietre angwane, niebare kwetre Jesuye:

Ni kwati nibi ma känentari kisere, niebare kwetre ie.

<sup>38</sup> Jesukwe niebare mda ietre:

Ti jatani blitakäre kukwe kuin Ngöbökwetbä juta mda mdate arato, aisetekwe mun ani juta mdabti nokore temen, niebare kwe ietre.

<sup>39</sup> Ye erere bkänä, Jesu nikani dikekä kä jökräbti temen kä Galileate angwane, namani blite kukwe kuin Ngöbökwetbä sinagoge kä ketareketare te. Arato üai käme nibtä abko namani juentari mento btä.

*Ni iti kwata bren lebra kisete abko Jesukwe mikani kuinta*  
(Mateo 8.1-4; Lucas 5.12-16)

<sup>40</sup> Kukwe namani bare kore angwane, ni iti bren lebra kisete, abtä ngütüete ngrabare jatani Jesu ngäbti angwane, namani ngukudokwäbti temen Jesu ngwärekri, käkwe niebare ie:

Ma tö ti mikaita kuinta ne ngwane, makwe ti mikata kuinta, ie ti tö nibi, niebare kwe Jesuye.

<sup>41</sup> Abtä ni ngütüete ye namani ruentari tare kri Jesuye, käkwe kise mikani ni yebti, bti niebare kwe ie:

Ma rabata kuinta, ie ti tö nibi, aisetekwe gwängwarbe ma bike nebata kuinta, niebare Jesukwe ie.

<sup>42</sup> Ye btäräbe ni kwata ngütüete ngrabare lebra kisete ye kwata namaninta kuinta jökrä ngrabare. <sup>43-44</sup> Bti Jesukwe niebare ie:

‡ 1:32 Kä jatanina iko, yebti nitre israelita nikani mräkä bren bren ngwena nebe Jesuye, ñobtä ñan angwane ñänä nikani timon dere angwane köbö jadükakrä nikani ta abko nämane ngibiare aisetekwe.

Ma nibira kuinta jökrä, ye makwe ñan nie jire chi ni mda mdaye, akwa ma rika ja kwata kuinta mike tuadre ni blitaka Ngöböbe ni mda mda diáreye. Erere arato, ni bren kore tä nebetta kuinta abko kákwe jändrän mden mden biandre niebare Moisékwe, ye erere ma rika ngwena biandre Ngöböye, ma rabadre dbe niara ngwärerekri abkokäre. Yebtä abko ma nenante kuinta abko rabadre gare ni jökräye, abkokäre ma rika jändrän ye ngwena. Abko kore se, niebare kwe ie.

<sup>45</sup> Akwa Jesukwe niara mikani kuinta, ye nikani kädriere ni jökrä ben. Yebtä abko, ni kwati tö namani ja tuai Jesube. Abtä Jesu ñan namani dikekä jáme juta ngwäre temen, aisetetnamani ja gwirie miketbe bäri kä kaibete juta bäre akwa, ni kwati krübäte namani nüke niara känti.

## 2

### *Ni ruen ñakare ngrabare abko Jesukwe mikaninta kuinta*

(Mateo 9.1-8; Lucas 5.17-26)

<sup>1</sup> Abti Jesu nükanti gwi juta Capernaúmbokwe <sup>2</sup> angwane, ni nükani kwati gwi nükebe jukwebtä, aisetetnamani kwen rabakäre Jesu känti gwi. Angwane Jesu nämane dirire Ngöbö Kukweibtä ni kwati yeye. <sup>3</sup> Angwane ni jatani nibkä ni bren ngwena iti ja ñäte Jesuye. Ni bren ye abko ni ruen ñakare ngrabare abko kisete dikekä ñakare abko jatani ngwena ja ñäte Jesuye. <sup>4</sup> Akwa ni nämane kwati dikaro aisetetnamani, ñan namani neme Jesu känti. Abtä nikanintre jubti käin, kákwe ju mkä tikaninkä, bti ni bren ye gibianinkä jänkwata ngöi ju mkäte ta timon kwetre Jesu ngwärerekri. <sup>5</sup> Nitre nükani ni bren ngwena amne ni bren ye nämane tödeke kватibe Jesubti namani tuen Jesuye angwane, Jesukwe niebare ni bren yeye:

Tikwe ma ngite Ngöbö rüere ye dininkä mento mabtä ti mräkä, niebare kwe ie.

<sup>6</sup> Yebtä abko, Kukwe Biani Ngöbökwe Moiséye dirikätre nämane siba, kä namani töbike krörö mda Jesu kukweibtä: <sup>7</sup> Ngöbö aibe tä ni ngite niara rüere denkä mento nibtä amarebti, ¿se ñobtä abko ni se tä ñäke kore Ngöbö rüere sere? namanintre töbike kore Jesubtä. <sup>8</sup> Namanintre töbike kore, ye abko gani Jesukwe. Abtä niebare kwe ietre:

¿Ñobtä mutta töbike kore tibtä yere? <sup>9</sup> ¿Dre abko bäri nuäre niedre ni ruen ñakare ngrabare nokoye? ¿Ma ngite Ngöbö rüere, ye tikwe dininkä mabtä abko bäri nuäre niedre ya? o ¿Näin krö, jänkwata makwe ye den kisete, bti nän dikekä abko bäri nuäre niedre ya? Ye abko, ma ngite Ngöbö rüere ye tikwe dininkä mabtä abko bäri nuäre niere, ñobtä ñan angwane raba bare ya, ñakare ya ñan jatadre munye. <sup>10</sup> Akwa ti, Ni Kä Nebtä Ngobo ne ie Ngöbökwe ja di biani mun ngite Ngöbö rüere diankakäre mento munbtä kä nebtä, ye abko ti bike bä mike tuadre munye, niebare Jesukwe.

Bti niebare kwe ni ruen ñakare ngrabare yeye:

<sup>11</sup> Näin krö. Jänkwata makwe ye den kisete amne nänta ja gwiriete, niebare kwe ie.

<sup>12</sup> Angwane jötrö ngwarbe ni jökrä okwäbti, ni ruen ñakare ngrabare ye naninkrö krö, kákwe jänkwata diani kisete, bti nikaninta. Yebtä ni jökrä ñan töi namani krütare, aisetetnamani Ngöbö käikitekä, kä namani niere: Kukwe ne kwrere ñan tuabare erere nakaka mtare, namanintre niere kore jae kwärikwäri.

### *Jesukwe Leví käräbare ja töitike jabe*

(Mateo 9.9-13; Lucas 5.27-32)

<sup>13</sup> Abti Jesu nikaninta Ñö Okwä Kri Galilea köräbare mda angwane, ni nükani kwati niara känti angwane, niara namani dirire ietre. <sup>14</sup> Yebtä nikan mentokväre angwane, kä jändrän ütiä käräkrä gobran romanobokrä, känti ni nämane täkänintbe iti jändrän ütiä kärere. Ni ye abko Alfeo ngobo kädian nämane Leví abko nämane jite, btä Jesu okwä namani angwane, Jesukwe niebare Levíye:

Brän tibe, niebare kwe ie.

Angwane jötrö ngwarbe Leví nikani dikekä krö, nikani Jesu jiebti.

<sup>15</sup> Abti Jesu nikan mröre Leví känti angwane, nitre jändrän ütiä käräkrä gobran romanobokrä nämane kwati amne ni mda mda nämane tuen käme ni israelita ruäreye

nämane arato, ñobtä ñan angwane ni kwati ye kwrere nämane näin Jesube. Nitre ye abko bări käme nie namani nitre bariseokwe abko ben Jesu btä nitre ja töitikaka ben nämane täkänintbe mröre ketetibe. <sup>16</sup> Jesukwe mröbare kore nitre bariseo Kukwe Biani Ngöböökwe Moiséye dirikätre ruäre okwäbti, abtä niebare kwetre nitre ja töitikaka Jesubeye:

¿Nitre jändrän ütiä käräkä gobran romanobokrä abko käme amne ni mda mda kukwe nuenkä kämekäme se gare ñakare ni seye ya amarebti tä mröre jäme ketetibe ben se? niebare kwetre ietre.

<sup>17</sup> Nitre bariseo käkwe ñäkäbare kore, ye jarabare Jesuye angwane, Jesukwe ja bä mikani ni kräkä bianka kwrere amne nitre jändrän ütiä käräkä amne nitre kukwe nuenkä kämekäme, ben nämane mröre ye bä mikani ni bren kwrere, käkwe niebare krörö mda ietre:

Ni kuin bren ñakare ye abko ñan tä ni kräkä bianka ribere jabtä, akwa ni bren bren abtä tä ni kräkä bianka ribere jabtä abko ti tö nibi niei munye. Ni ie ja ruen kuin deme au Ngöbö ngwärekri mun kwrere, ye abko ñan ti jatani kärere Ngöbö kukwäre, akwa ni kukwe kämekäme nuenkä Ngöbö rüere ye mden abko ti jatani kärere Ngöbö kukwäre. Abko kore se, niebare Jesukwe nitre bariseoye.

*Ñobtä nitre ja töitikaka Jesube ñan nämane ja baine  
(Mateo 9.14-17; Lucas 5.33-39)*

<sup>18</sup> Abti bati nitre nänkä Juan Bautistabe btä nitre bariseo nämane ja baine ja mikakäre metre Ngöbö ngwärekri angwane, ni mdarajire käkwe tuani, aisetekatani, käkwe niebare krörö Jesuye:

¿Ñobtä nitre nänkä Juanbe btä nitre bariseobe käta ja baine Ngöbökrä amarebti, nitre ja töitikaka mabe ja baine ñakare Ngöbökrä sere? niebare kore kwetre Jesuye.

<sup>19</sup> Abtä Jesukwe kukwe bä mikani ietre, käkwe ja bä mikani ni ja mikaka gure kwrere amne nitre ja töitikaka ben abko bä mikani kwe ni ja mikaka gure kukwe muko kwrere, käkwe niebare ietre:

Ni iti tä nikken ja mike gure angwane, tä kukwe muko kwekkwe nübaire kä ngwiankäre nuäre gwaire jabtä, ye ngwane ni ja mikaka gure ye tädre siba bentre angwane, ¿kukwe muko ye raba moto ulire ja baine ya? Ñakare. Ni ja mikaka gure ye tä siba bentre angwane, kukwe muko ñan raba nebe moto ulire ja baine. <sup>20</sup> Akwa ni ja mikaka gure ye järikadre kukwe muko okwäbti, ye ngwane rabadre ja baine abko kore rakadikä nitre ja töitikaka tibe yebtä.

<sup>21</sup> Mdakäre abko, dän ngututu gudikadre dän kukwän btinbti angwane, dän kukwän btin tä dän ngututu kwaenkä bări mda abko kisete dän ngututu rötadreteta angwane, rötadrete bări kri mda, aiseteketani ni ñan raba dän ngututu gudike dän kukwän btinbti.

<sup>22</sup> Erere arato, chibo kwata dikani kira uba doi ngwäre, te ni ñan raba uba doi keke mikadre kwaka, ñobtä ñan angwane chibo kwata ngututu rötadrete, rikadre ngwarabe uba doi kwaka ben ngöi jökrä arato. Mden kisete, uba doi mikadre kwaka abko kekadre chibo kwata btinte. Ne abko kore, niebare Jesukwe ni mda mdaye.\*

*Jesu abko bări ütiäte köbö jadükakrä yebti ta  
(Mateo 12.1-8; Lucas 6.1-5)*

<sup>23</sup> Abti bati Jesu nikani dikekä nura ngätäite köbö jadükakrä näire mda angwane, nitre ja töitikaka ben nämane näin siba, kä nikani trigo ngwä ötö ji ngrabare kwetadre jae.

<sup>24</sup> Abtä nitre bariseo käkwe niebare Jesuye:

Jändrän ñan nuendre jire chi köbö jadükakrä näire nieta abko nitre ja töitikaka mabe nibi nuene tuen sete, niebare kwetre Jesuye.

\* <sup>2:22</sup> Kukwe diribare Jesukwe abko dän btin amne chibo kwata btin kwrere. Erere arato, kukwe diribare ja băinbtä nitre bariseokwe abko dän ngututu amne chibo kwata ngututu kwrere, aiseteketani ja töitikaka Jesube nin rabadre Jesu kukwei mike täte gwaire kukwe diribare nitre bariseokwe amne Juankwe ye ben, ñobtä ñan angwane kukwe diribare Jesukwe abko bä jene kukwe mdakrä aiseteketani.

**25-26** Abtä Jesukwe niebare mda käre:

Bati David btä rükä kwekwe ie mrö namani krübate angwane, kukwe nuenbare krörö kwetre: Ju nuäre ngwiandre känti ban deme nämane mikani Ngöbö ngwärekri, ye känti David nikani gwä, ban diani kwe, bti kwetani kwe rü muko kwekwe ben. Ban ye abko, David btä nitre nämane ben käkwe ñan kwetadre jire chi, ñobtä ñan angwane nitre blitaka Ngöböbe ni mda mda diäre aibe käkwe kwetadre niebare Ngöböke, akwa niaratre käkwe kwetani, akwa namani ngite ñakare Ngöböye. Abiatar nämane sribire nitre blitaka Ngöböbe ni mda mda diäre dänkien angwane kukwe ne nakaninkä. Kukwe yebtä mun tärä ñäke Ngöbö Kukweibäruen tie.

**27** Ye erere, Ngöböke köbö jadükakrä mikani jadükakrä nie, ñan Ngöböke ni dätebare kukwe driebare munkwe köbö jadükakräbä mikakrä täte. **28** Amne köbö jadükakrä näire yebti ta abko ti Ni Kä Nebtä Ngobo abko bäri ütiäte, aise te nitre ja töitikaka tibe rabadre dre dre nuene köbö jadükakrä näire abko ti di tärä niere ietre. Abko kore se, niebare Jesukwe nitre bariseoye.

### 3

*Jesukwe ni mikaninta kuinta köbö jadükakrä näire*

(Mateo 12:9-14; Lucas 6:11)

**1** Abti köbö jadükakrä mdara jire te Jesu nikaninta sinagoga mdate angwane, ni iti küdengrötani kwärä nämane yete. Arato nitre bariseo nämane yete. **2** Jesukwe ni ye mikadreta kuinta köbö jadükakräte ne ngwane, Jesukwe ja mikani ngite Ngöbö rüere niedre kwetre Jesu rüere ni mda mdaye, abkokäre nitre bariseo namani ngibiaretari kisere ni küdengrötani yebtä. **3** Angwane Jesukwe niebare ni küdengrötani kwärä yeye:

Jakwe ni jökrä ngwärekri nete, niebare kwe ie.

**4** Erere bkänä, ni ye nikani angwane, Jesukwe niebare krörö mda nitre bariseoye:

¿Köbö jadükakrä, yebtä Kukwe Biani Ngöböke Moiséye käta dre niere? ¿Jändrän kuin nuendre ni mdakrä ya? ¿Kukwe käme nuendre ni mdabtä ya? ¿Ni bren mikadreta kuinta ya? ¿Ni bren kämikadre ja okwäbti ya? Dre nuendre metrere niere tie munkwe, niebare Jesukwe ietre.

Akwa namanintre kwekbe jökrä niara kukweibäruen, ñobtä ñan angwane ñan tö namani ja kitai ngise au. **5** Nitre bariseo moto ribi, aise te ni bren ñan namani ruentari tare ie. Abtä Jesu namani ulire krübate, käkwe mikani ñäräre romone ja bäre temen, bti niebare kwe ni küdengrötani yeye:

Küde ngököte, niebare kwe ie.

Ye btäräbe ni ye käkwe küde ngökatebare angwane, kise namaninta kuin jökrä ie.

**6** Yebtä abko, nitre bariseo nikani ju bäre amne Jesu kämikadre ño ja ñäte nitre reketaka jrei Herodes ben abko nikani kädriere jötrö jabe kwärikwäri.

*Ni kwati bren bren nükani Jesu känti*

**7** Abti Jesu btä nitre ja töitikaka ben nikaninta Ñö Okwä Kri Galilea köräbti rabakäre kaibe, akwa ni nikani kwati jiebti. **8** Jesu nämane jändrän kuinkuin nuene, abkotari ni Galileabo, ni Judeabo, ni juta Jerusalénbo, ni Idumeabo, ni nünanka Ñö Jordán bti kä driri, ni juta Tirobo bäre temen, btä juta Sidónbo bäre temen nükani kwati ja tuakäre Jesube. **9** Ni nükani kwati dikaro abko nane rabadre Jesu kete dime ja ngätäite, aise te Jesukwe ru chi mikamna biare krati jakrä nitre ja töitikaka benye. **10** Jesukwe ni bren bren mikaninta kuinta kwati, abkotari ni mda mda bren rabadretä kuinta abkokäre tö namani kise mikai Jesubtä, aise te namanintre ja kitekäbe kwärikwäri rabakäre Jesu känti.

**11** Ye ngwane Jesu namani tuen üaitre kämeye angwane, ni btä nämane ye namanintre ngwen ja mike bobre ngukudokwäbti Jesu ngwärekri, kä namani ngrente krörö: ¡Ma Ngöbö Odei abko gare nunye! namani ngrente kore.

**12** Jesu Ngöbö Odei, ye abko Jesu ñan tö namani mikai gare jötrö ngwarbe ni jökräye, aise te Jesu käkwe ñan ja kädriemna ni mda mda ngwärekri üai kämeye. Ye ngwane Jesukwe ni kwati mikaninta kuinta btä üai käme juanintari mento ni kwatibäruen tie.

*Jesukwe ni dianinkä ni jätäbti nibu ja töitikakäre jabe  
(Mateo 10.1-4; Lucas 6.12-16)*

<sup>13</sup> Abti Jesu nikani mintokwäre nebe ngitiobti angwane, tö namani nire nire ngwiai jabe, erere käräbare kwe abko nikanitre ben mintokwäre. <sup>14</sup> Ni ngwiani jabe Jesukwe, ne ngätäite ni dianinkä ni jätäbti nibu kwe abko rabadre ja töitike ben, bti juandre ja kukwei kädriere kwe, abkokäre dianinkä kwe. <sup>15</sup> Ni dianinkä ni jätäbti nibu Jesukwe abko ie ja di biani kwe üai käme juantarikrä mento nibtä

<sup>16</sup> abko nere: Simón  
(ni ye Jesukwe kädiani Pedro mda),

<sup>17</sup> Santiago btä etba kwe Juan. Ne abko Zebedeo ngäbriänkätre, ne arabe Jesukwe kädiani Boanerges. (Ne abko kukwe unsuni ngö käinta kwrere, aisetet kädiani Unsuni Ngobo arato;)

<sup>18</sup> btä Andrés, Felipe, Bartolomé,  
Mateo, Tomás, Santiago,  
Santiago ne abko Alfeo ngobo;  
btä Tadeo btä Simón Zelote.

<sup>19</sup> Mrä abko, Judas Iscariote. Judas ne mden käkwe Jesu kitani ngise rüeye mrä.  
Jesukwe ni dianinkä ni jätäbti nibu kore.

*Beelzebú nämane Jesubtä nie namani rüere  
(Mateo 12.22-32; Lucas 11.14-23; 12.10)*

<sup>20</sup> Nebti Jesu nikaninta gwä angwane, ni nükaninta kwati känti ja tuakäre ben abko ñan namani niara btä nitre ja töitikaka ben tuemetre mröre jire chi. <sup>21</sup> Jesu mräkäkwe kukwe ne gani angwane, kä namani jáme Jesu dokwäbti namani nütüre, aisetet nikani niara jiebti, tö namani Jesu ngwianta ja gwiriete.

<sup>22</sup> Angwane Kukwe Biani Ngöbökwe Moiséye dirikätre nünanka juta Jerusalén abko nükani ruäre Jesu känti, kä namani niere ni jökraye:

Üai käme dänkien kädianta Beelzebú, ye mden käkwe ja di biani ni nokoye abko diebti tä üai kämekäme juentari mento se, namanitre niere kore Jesubtä.

<sup>23</sup> Abtä Jesukwe dirikä ye käräbare, käkwe kukwe bä mikani krörö mda ietre:

¿Satana kädianta Beelzebú arato ye abko raba ja juentari au ya? Ñakare. <sup>24</sup> Erere arato, gobran btä ni nünanka kä ketetibe te rikwitare ja rüere kwärikwäri, ne ngwane gobran kä ye känti ñan rabadre gobrane mda. <sup>25</sup> Ne ben, ni jakwebe nüne ju kватibe te rikwitare ja rüere angwane, ñan rabadre nüne ketetibe käre. <sup>26</sup> Ye mden kwrere abko, Satana rikwitareta ja rüere au ne ngwane, kä rükadre mrä käne, akwa Satana ñan tä rüre jabe au, aisetet ti ñan tä üai käme juentari mento nibtä Satana diebti, aisetet munta blite ngwarbe.

<sup>27</sup> Yebti Jesukwe kukwe mda bä mikani, käkwe Satana bä mikani ni dite kwrere amne ja bä mikani ni gokä kwrere kwe, käkwe niebare:

Satana abko ni dite kwrere. Ni dite tä ju jen kwe ngibiare ni gokä ngäniene, aisetet ni dite nünanka gwi ñan mäkärete angwane, ni gokä ñan raba jire iti, kä rabadre jäandrän kwe denkä kän, akwa mäkärete angwane, ni gokä rabadre jäandrän kwe denkä jire jökrä kän. Ye kwrere ni ye btä üai käme tä abko ju Satanakwe kwrere. Ti bari dite Satanakrä aisetet, ti raba üai käme juentari mento nibtä Satanakän, ni gokäta jäandrän denkä ni dite kän ye kwrere.

<sup>28-30</sup> Jesu abko btä üai käme nämane, nie namani Kukwe Biani Ngöbökwe Moiséye dirikäkwe, mdentbä Jesukwe ñäkäbare krörö ietre:

Ti bike kukwe era erere niere munye abko krörö: Nire nire käkwe ñäkädre blo Ngöbö rüere, btä ja mikadre ngite ño erere Ngöbö rüere kwe, yebtä Ngöbö raba ni ngite ye denkä mento btä; akwa nire nire käkwe ñäkädre blo Ngöbö Üai Deme rüere, ne ngwane ni ye rabadre ngite kärekäre Ngöböye, aisetet ni ngite ye ñan diandrekä btä kwe. Abko kore se, niebare Jesukwe ietre.

*Nire abko Jesu mräkä era metre  
(Mateo 12.46-50; Lucas 8.19-21)*

<sup>31</sup> Kä namani jäme Jesu dokwäbti, Jesu mräkä namani nütüre, aisetet Jesu meye amne etbakantre nükani ju bäre temen jiebti, kákwe kärämna ngwiandreta ja gwiriete.

<sup>32</sup> Angwane ni nämane täkänintbe Jesu bäre temen kákwe niebare ie:

Ma meye amne ma etbakantre tä ju bäre nokote abko tö nibi blitai mabe, niebare kwetre Jesuye.

<sup>33</sup> Jesukwe niebare mda ietre:

¿Nire abko ti meye amne nire abko ti etbakantre amarebti tö nibi blitai tibe ye? niebare kwe.

<sup>34</sup> Bti ni nämane täkänintbe, ye Jesukwe mikani ñääräre kuin, kákwe niebare ietre:

Ti meye tikwe amne ti etbakantre era metre abko erere tä nete ne, <sup>35</sup> ñobtä ñan angwane nire nire käta Ngöbö kukwei mike täte, ni ye abko ti etba tikwe, ti ngwai tikwe amne ti meye tikwe. Abko kore se, niebare Jesukwe.

## 4

*Dobo ketabkä, btä Jesukwe kukwe bää mikani  
(Mateo 13.1-9; Lucas 8.4-8)*

<sup>1</sup> Abti bati Jesu nikaninta dirire mda Ñö Okwä Kri Galilea köräbti angwane, ni kwati kákwe ja ükaninkrö Jesubtä niara kukwei nuakäre. Abtä Jesu nakwani rute, namani täkänintbe. Nitre kákwe ja ükaninkrö kwati btä ye abko namani jökrä ñö köräbti jateta temen. <sup>2</sup> Angwane Jesukwe kukwe keta kabre bää mikani dirikäre ietre, kákwe niebare krörö:

<sup>3</sup> ¡Olo ketete munkwe! Bati ni nikani iti nura metekä. <sup>4</sup> Nura metaninkä kwe angwane nura ruäre nikani mate ji ngrabare temen, ye abko nukwä jatani, kákwe kwetani jökrä kän. <sup>5</sup> Nura ruäre abko nikani mate jäkwatabti temen, ye känti abko dobo ñakare böökä, aisetet nura ye nükani mure jötrö, akwa dobo ñakare mente nguse, <sup>6</sup> bti ñänä jatani ngire, kákwe nura mu ye kukwani jökrä amne ngätri ñakare arato, aisetet ngrötäninkä jökrä.

<sup>7</sup> Nura ruäre abko nikani mate kökrä tukwätē tukwätē ngätäite, ye abko nükani mure arato. Akwa kökrä ye abko rirabare bari jötrö nura mu yebti ta, kákwe kämikani, aisetet ñan ngwä namani. <sup>8</sup> Akwa nura ruäre abko nikani mate dobo kuinte, ye abko nükani mure amne, rirabare tuärebe amne ngwä namani kabrekabre btä. Datire datire ngwä namani gre bti krä jätä, ruäre abko ngwä namani gre ketamä, ruäre abko ngwä namani gre ketarike. Ne abko nakaninkä kore se.

<sup>9</sup> Nire nire käta ti kukwei nuen, ye abko olo tärä ne ngwane, ti kukwei ne ketate ja olote kwe, kukwe ne rükadre gare kuin munye abkokäre. Abko kore se, niebare kwe ni kwati yeeye.

*Ñobtä Jesukwe kukwe bää mikani  
(Mateo 13.10-17; Lucas 8.9-10)*

<sup>10</sup> Yebti Jesu namani kaibe angwane, ni ja tötitaka ni jätäbti nibu ben btä ni mda mda nämane näin siba Jesube kákwe niebare ie:

¿Makwe kukwe bää miri, ye dre nini kore makwe yere? niebare kore kwetre Jesuye.

<sup>11</sup> Jesukwe niebare mda ietre:

Ngöbö rükadre gobrane ño nibti abko tä tiebe, akwa tita mike gare munye, akwa ni kwati mda abko ie Ngöböta mike gare ñakare, aisetet tita kukwe bää mike kore, Ngöbö Kukwei tä tikani krörö rabadre bare abkokäre:

<sup>12</sup> Kukwe bää mikata kore tikwe, ye jatadre ni mda mdaye, akwa ñan rükadre gare.

Ne ben, kukwe nieta tikwe jaradre ie, akwa tebaidre ñakare kwetre.

Yebtä ñan jatadreta Ngöbö kukwäre.

Arato niaratre ngite Ngöbö rüere, ye Ngöbökkwe ñan diandrekä mento btä, *Isaías 6.9-10* abkokäre tita kukwe bää mike kore, niebare kwe ietre.

*Dobo ketabkä tä dre niere abko nere*  
*(Mateo 13.18-23; Lucas 8.9-15)*

<sup>13</sup> Jesukwe kukwe bā mikani, ye ñan nükani gare metre nitre ja töitikaka benye. Abtä niebare kwe ietre:

„Tikwe kukwe bā miri nura metaninkäbtä ñan nü gare munye, ye kukwe mda mda bāri tare bā mikadre tikwe abko rükadre gare ño munye amarebti yere? <sup>14</sup> Ye mden kisete, kukwe bā miri tikwe käta ño niere metre abko ti bike mike gare munye. Ni Ngöbö kukwei ngwianka, ye abko ni nura metakaka kwrere. <sup>15</sup> Nura nikani ngitiekä ji ngrabare, ye nukwā jatani, kákwe kwetani jökrä. Ye kwrere abko, ni ruäreta Ngöbö Kukwei nuen, akwa ñan tä nüke gare metre ie. Btäräbe Satana tä kite, käta Ngöbö Kukwei denkä jökrä kän, mden nini tikwe ye.

<sup>16</sup> Amne ni ruäre abko käta Ngöbö Kukwei nuen, ye btäräbe käta nebe nuäre btä kare ngäbti, ni ye abko nura nikani mate jäkwatabti ye kwrere, <sup>17</sup> ñobtä ñan angwane nura nikani mate jäkwatabti abko ngätri ñan nämane böökän, ye kwrere jire ni ruäre tä Ngöbö Kukwei kaen ngäbti, bti bā jötrö tä näin Ngöböbe, akwa tädre niken ja tare nike tödeketabti Ngöböbti, ye btäräbe tä Ngöbö Kukwei kiteta temen, bti tä nikenta ja jiebti. <sup>18-19</sup> Amne ni ruäre abko tä Ngöbö Kukwei nuen, akwa tä nakwen bāri jändrän kä nebtä jiebti, erere tä ja töi mike bāri sribi kä nebtä jiebti amne, tä ngwian tarere bāri amne töta nebe rabai jändrän mda mda bkäne, ye abko käta ngökö. Ne aise te ni ye abko nura nikani mate kökrä tukwäte tukwäte ngätäite amne ngatani, ye tä nakenkä ni yebtä, aise te nura ngatani, ngwā namani ñakare, ye kwrere jire ni ye tä sribi nuene ñakare Ngöbökrä. <sup>20</sup> Akwa ni ruäre tä Ngöbö Kukwei nuen amne tä kaen ngäbti, käta niken sribi kuinkuin nuene bätäkä ngwarbe Ngöbökrä, ye abko nura nikani mate dobo kuinte abko rirabare kuin amne ngwā kuinkuin namani gre bti krä jätä, ruäre gre ketamä, ruäre abko gre ketarike, kwrere jire ni ye tä sribi nuene Ngöbökrä abko kukwe kore bā miri tikwe ye, niebare Jesukwe nitre ja töitikaka benye.

*Jesukwe ja kukwei bā mikani ñotra kwrere*  
*(Lucas 8.16-18)*

<sup>21</sup> Jesukwe kukwe bā mikani krörö mda ni kwati yeye, kákwe niebare: „Ñotra jutra mikata gwi, ye jue mikata kaja täni ya? Ñakare. „Mikata jän täni jae ya? Ñakare. Ñotra mikata, ye mikata üräbtä käinträ rabadre ngitie jökrä gwita temen, ni jökrä gwi, ie kä rabadre tuen abkokäre. <sup>22</sup> Ye kwrere abko, Ngöbö Kukwei ñotra kwrere, aise te Ngöbö Kukwei nieta kaibe tikwe mtare abko batira jire kädriedi ji kribti ni mda mdabe. Erere arato, Ngöbö Kukweita tiebe mtare abko batira jire niedi ni kwati ngwäre kri, ñotra mikata üräbtä käinträ rabadre jökrä gwita temen ye kwrere. <sup>23</sup> Ni kukwei ruen munye angwane, munkwe kukwe ne ketate olote. Abko kore se, niebare Jesukwe ni kwatiye.

<sup>24</sup> Bti Jesukwe kukwe bā mikani mda, kákwe niebare: Olo ketete kuin kukwe neye munkwe. Ti kukwei mikare täte ño munkwe, ye kwrere Ngöbö kwe ti kukwei mikadi gare mda munye. Arato niarakwe ti kukwei mikadi gare bāri mda munye. <sup>25</sup> Mdakäre abko, nire nire ie Ngöbö Kukwei nüke gare, ye abko ie Ngöbö kwe ja Kukwei biandi bāri mda; akwa nire nire ie Ngöbö Kukwei gare ñakare, ye abko ie Ngöbö Kukwei gare kiakia abko Ngöbö kwe diandikä jökrä kän, niebare Jesukwe ietre.

*Ngöbota gobrane ño ni kwe ngätäite abko Jesukwe bā mikani nurabtä*

<sup>26</sup> Jesukwe kukwe mdara jire niebare krörö ni kwati yeye ñö okwā kri köräbti: Ngöbö gobranta kite niren ño ni kwe ngätäite abko ti bike bā mike nura metakata btä. <sup>27</sup> Ni nura metakaka käta nura metekä, bti tä nikenta gwā. Bti dibire rare tä kibien ya, tä ngwätē ya ño, akwa nura abko tä nüke mure, bti tä niren ño gare ñakare ie. <sup>28</sup> Akwa nurata nüke mure ja di jenbti, ye erere batibe nura muta nüke chi, bti tä niken niren, bti tä nebe blüre, bti ngwätē nebe btä. <sup>29</sup> Yebti ngwätē neme nötare jökrä angwane, kä nura ötakrä tä nüke. Angwane nura bkänkä tä ötamna sribikätre kweye, ye erere ötata niken. Ye abko, nurata

nüke mure, bti ngwäta neme nötare kaibe amne ötata ño, ye kwrere Ngöbö gobrain tä kite niren ni kwe ngätäite. Ne abko kore, niebare Jesukwe ni kwatiye.

*Jesukwe kukwe bā mikani mostasa nuraibtä*

(Mateo 13.31-32; Lucas 13.18-19)

<sup>30</sup> Mdakäre abko, ¿Ngöböta kite gobrane nibti ye abko tikwe bā mikadre dre kwrere ruen munye? <sup>31</sup> Ngöböta kite gobrane nibti ye abko mostasa nurai chi kwrere. Ni iti käkwe mostasa nurai nökani tirete jakrä. Nura jökrä munkwe, ngätäite mostasa nurai ye abko bäri kiakia, <sup>32</sup> akwa nökadre tirete angwane, rabadre bäri kri nura jökrä bti ta angwane, küdeta nebe ngetre kwäräkwärä, aisetet nukwä raba kite nüne küdete käinta kä tiborete, ye kwrere jire käne Ngöböta kite gobrane ni braibe bti, akwa mrä angwane Ngöbö rabadi gobrane ni kwatibti abko bā mikata nura chi yebtä.

*Jesu nämane kukwe bā mike jirekäbe, btä nämane dirire*

(Mateo 13.34-35)

<sup>33</sup> Jesu nämane kukwe bā mike jäandrän mda mdabtä, erere nämane dirire, akwa kukwe bäri tare abko ñan nämane dirire ni kwatiye. <sup>34</sup> Kukwe bā mika nämane jirekäbe Jesukwe, btä nämane dirire ni mda mdaye, akwa nämane nebe kaibe nitre ja tötitikaka benbe angwane, kukwe bā mika nämane ni mda mdaye kwe abko nämane dre niere metre abko nämane mike gare jökrä ietre.

*Jesukwe müre amne ñö mikani kwe kwe*

(Mateo 8.23-27; Lucas 8.22-25)

<sup>35</sup> Jesukwe blitabare kukwe keta kabrebtä, ye näirerabe kä jatani iko angwane, niebare kwe nitre ja tötitikaka benye:

Brän ñö okwä kri kwäräkri, niebare kwe ietre.

<sup>36</sup> Erere bkänä, ru te Jesu nämanena, arabe te jänikani. Arato ru mda mda nikani siba ben. Ni nämane kwati, ye abko namani jökrä ñö okwä köräbti ie. <sup>37</sup> Niaratre nikani, nikani te batibe müre jatani mate ribi krübäte, kä nikani ñö mike nakwen kukwäne, aisetet namani ñö kite nakwen jökrä rute, kä namani ru krien ñöte nguse. <sup>38</sup> Akwa Jesukwe ja dokwäkrä mikani, bti nämane kibien kuin ru körekri. Ye nitre ja tötitikaka ben nikani, käkwe ganinkrö, bti niebare kwetre Jesuye:

¡Dirikä, ni kite niken ñöte ngusedbe makrä ya, amarebti ma nibi kibien dikaro yere! niebare kwetre Jesuye.

<sup>39</sup> Abtä Jesu naninkrö, käkwe ñäkäbare krörö müreye amne ñöye:

Kwekbe munkwe, niebare kwe.

Ye btäräbe kä namainta kwekbe jökrä. Ñö abko namani nenta jirekäbe jökrä.

<sup>40</sup> Jesukwe niebare nitre ja tötitikaka benye:

¡Ngöböta mun ngibiare, bti munta tödeke yera, amarebti mun moto nibi bete dikaro ja tari yere! niebare Jesukwe ietre.

<sup>41</sup> Akwa namaintre nekwetekä Jesubtä, töi ñan namani krütare, kä namani niere jae kwäräkwäri:

¿Ni se abko, ni ño amarebti, müreta mike täte btä ñöta mike täte sere? namaintre niere jae kwäräkwäri.

*Ni Gadarabo btä Jesukwe üai käme juanintari mento*

(Mateo 8.28-34; Lucas 8.26-39)

<sup>1</sup> Yebti Jesu nikani nitre ja tötitikaka benbe nebe Ñö Okwä Kri Galilea kwärä nakri käkä Gadara känti. <sup>2-3</sup> Niara nakwani timon, ye btäräbe ni nükani iti Jesu känti abko btä üai käme nämane. Mden kisete nämane nüne rökabti abko nikani Jesu ngäbti. Ni ye abko, ni krübäte üai käme kisete, aisetet mäkäte nämane kadenanbti, akwa ñan nämane neketete jire chi ni mda mdaye, <sup>4</sup> ñöbtä ñan angwane küde mäkäte nämane kadenanbti ie angwane, nämane kadena ötöte jökrä ja küdebtä. Ne ben ngoto mäkäte nämane ie

angwane, nämane kadena ötöte kia bürere jökrä ja ngotobtä, aisetē ñan namani nuene ni mda mdakrä. Käre mäkäte nämane, akwa nämane ngitieta ben gware. <sup>5</sup> Dibire rare ni ye nämane nikken ngwänenkä krikri be rökabtita btä ngudrebtita ja metare kwärä jääbti ngrabare. <sup>6</sup> Jesu jatabare mente ie se kwrere angwane, niara nakwaninkä, nikani betekä Jesu ngäbti, namani känti angwane, nikani ngitiekä ngukudokwäbti temen Jesu ngwärekri ja mikakäre bobre Jesubtä. <sup>7-8</sup> Jesukwe niebare üai kämeye mda:

Nän mento ni nebtä, niebare kwe.

Abtä ni yekwe ngratebare kri mda, kákwe niebare:

Jesu, ma Ngöbö Kri Kä Käinbti Odei, ¿ye ñobtä ma kite ti nike nete ye? Ngöbö se okwäbti, makwe ñan ti mika ja tare nike abko ti tö nibi ribei mae, niebare kwe.

<sup>9</sup> Abtä Jesukwe niebare mda üai kämeye:

¿Ma kä ño?

Üai käme ye kákwe niebare mda Jesuye:

Nun kabre jae, aisetē ti kä Kabre, niebare kwetre.

<sup>10</sup> Bti namani ribere kisere mda Jesuye:

Makwe ñan nun juantari mento kä mdabti, üaitre käme namani ribere kisere Jesuye.

<sup>11</sup> Ye känti abko, mtü nämane kabre krübäte mröre bä känime ngudrebtäta, <sup>12</sup> aisetē namani ribere Jesuye:

Mtüta sere, sebtä nun juen, namani niere ie.

<sup>13</sup> Ye erere, Jesukwe üai käme juanintari mento ni yebtä abko juani mda kwe mtübtä. Üai käme nikani mento ni yebtä, bti nikani mda mtübtä angwane, mtü nikani betekä jökrä ja jiebti kä btä motokwäre, nikani ngitiekä jökrä ñöte, känti müre neketani jökrä. Mtü mili krobu näre müre neketani jökrä kore.

<sup>14</sup> Yebtä abko, mtü ngibiakatre ngitian, nikani kukwe ne niere jutate ta btä ji ngrabare. Abtä ni jatani kwati mda kukwe nakaninkä ye tuakäre. <sup>15</sup> Nukanintre Jesu känti angwane, ni btä üai käme nämane kabre abko ja ngwä kitani kwe, nämane täkänintbe temen, kä ruen kuin bti, btä nukanintre. Abtä Jesu di kri nükani gare ietre, aisetē Jesu jürä namani ni jökräbtä. <sup>16</sup> Ni btä üai käme nämane kabre btä kukwe nakaninkä, erere arato kukwe nakaninkä ño ño mtübtä abko nitre tuakatuaka namani taentari jire jökrä ja täritäri ni jökrä ye. <sup>17</sup> Yebtä abko, Jesu jürä namani kri btä, aisetē Jesukwe kä mikarekä, rikadre kä mdabti abko ni jökrä namani ribere Jesuye.

<sup>18</sup> Ye erere bkänä, Jesu nakwaninta rute angwane, ni btä üai käme juanintari mento kwe, ye abko Jesu rikadre ngwena jabe abko namani ribere Jesuye, <sup>19</sup> Akwa Jesukwe niebare mda ie:

Ñakare. Ma raba jirekäbe nete. Ma Dänkienkwe dre nuni makrä btä ma tareniri ño kwe, ye nän niereta jire jökrä ma mräkäye ja gwiriete, niebare kore Jesukwe ie.

<sup>20</sup> Ye erere bkänä, Jesukwe kukwe kuin nuenbare ni yekrä, ye niara nikani niere ni jökräye juta kwtirekwatire te kä kädian nämane Decápolite. Yebtä ni jökrä töi ñan namani krütare kukwebtä abko nakaninkä kore se.

*Jesukwe Jairo ngänkän mikaninta nire amne meri bren abko mikaninta kuinta kwe  
(Mateo 9.18-26; Lucas 8.40-56)*

<sup>21</sup> Yebti Jesu jataninta rute nüketa Ñö Okwä Kri Galilea kwärä nakri. Jesu nämane ñö okwä köräbäre angwane, ni nükani be ja ükekrö kwati ja tuakäre ben. <sup>22</sup> Angwane ni nükani iti abko kädian nämane Jairo. Jairo abko nämane ji dokwäte sinagogue. Jesu jatabare ie angwane, nikani be ja mike bobre ngukudokwäbti Jesu ngotobtä, <sup>23</sup> kä namani ribere kisere Jesuye:

Ngäbäkre chi merire tikwe kite krüte tikän abko rabadreta kuinta tirkä, abkokäre ti ki ma kärere kise mike bti jakrä, niebare kwe ie.

<sup>24</sup> Ye erere Jesu nikani be angwane, ni kwati nikani siba, kä namani kete dime ja ngätäite. <sup>25</sup> Angwane nitre nikani kwati Jesube, ye ngätäite meri nämane näin iti siba abko kä kwä jätäbti kubura nämane bren dbä tibiere köbö kwtirekwatire <sup>26</sup> abko kisete nämane ja tare nike. Käre nikani kräkä bianka kwati känti angwane, kräkä bian

nämane ie, akwa nämane kitetebe bäri mda. Ngwian nämane kwe, erere ganinte jökrä kwe kräkäbtä jakän, akwa nikani bäri bren jume mentokwäre. <sup>27-28</sup> Akwa Jesu nämane ni miketa kuinta kädrie namani meri ye okwäbti. Abtä nikani siba, namani ja ken Jesube angwane, namani nütüre: Tikwe dän Jesubtä se aibe nuadrebtä angwane, ti rabadretta kuinta, namani nütüre. Ne erere ni kwati ngätäite ta, krötabare ja ken Jesu trökri kwe, bti dän Jesubtä nuaninbtä tiebe kwe. <sup>29</sup> Ye btäräbe namaninta kuinta batibe se kwrere, aisetet ja namani ruenta kuin jökrä ngrabare ie. <sup>30</sup> Jesu die näkänintbe ruäre abko Jesukwe gani angwane, ni nämane kwati bäre temen mikani ñäräre kwe, bti niebare kwe ietre:

¿Nirekwe dänkä nuribtä tibta ye? niebare kwe.

<sup>31</sup> Abtä nitre ja tötitkaka ben käkwe niebare mda ie:

¿Ni nibi kwati ma bäre temen, kä nibi ma kete dime ja ngätäite ñan tuen mae ya, amarebti nirekwe dän mabtä nuribtä ma nibi niere yere? niebare kwetre Jesuye.

<sup>32</sup> Akwa nirekwe dän nuaninbtä Jesubtä abko Jesu tö namani gai aisetet, kä namani mike ñäräre janknu ja bäre temen. <sup>33</sup> Jesu namani nikren dikaro, abtä meri ye moto namani bete, aisetet namani grükekä jökrä ngrabare, nikani ja mike bobre ngukudokwäbti Jesu ngwärekri, bti jakwe dän nuaninbtä Jesubtä, käkwe ja mikaninta kuinta, niebare metre kwe Jesuye. <sup>34</sup> Abtä Jesukwe niebare mda ie:

Ti mräkä, makwe tödiri kwatibe tibti, köböire ma nibirate kuinta, aisetet nänta jáme, niebare kore kwe ie.

<sup>35</sup> Jesu nämane blite kore angwane, ni ji dokwäte sinagogate, ye jiebti ni ruäre mda nükani kukwe ngwena, käkwe niebare ie:

Ma ngämkän kürera makän. Makwe ñan dirikä nika mda, niebare kwe ie.

<sup>36</sup> Ne jarabare Jesuye, abtä Jesukwe niebare ni ji dokwäte yeye:

Ma ñan rekwetaka ngäbäkre jiebti jakän. Makwe tödeka kwatibe janknu tibti, niebare kwe ie.

<sup>37</sup> Bti Jesu nikani, käkwe Pedro, Santiago, btä Juan, Santiago etba aibe ngwiani jabe, ben nikani. <sup>38</sup> Namanintre ni ji dokwäte juete angwane, ni nämane kwati ngetrekä jume ja dibti, aisetet kä nämane nokre gwi, btä namanintre. <sup>39</sup> Niara nikani gwä angwane, ngäbäkre krütanina namani gare Jesuye, akwa niebare kwe nitre ngetrakaka ie:

Ngäbäkre merire ye kürera munta nütüre, akwa tä kibien. ¿Ñobtä mun ngetrakwe nibi nokre kore gwi yere? niebare kwe ietre.

<sup>40</sup> Yebtä ni jökrä namani Jesu kötaire ñäkäbtä kore, akwa Jesukwe ni nämane gwi ye juani jökrä ju bäre, bti ngäbäkre meye, rün btä ni ja tötitkaka nimä nämane näin Jesube aibe ben nikani nebe ngäbäkre ngwákä ye känti. <sup>41</sup> Namanintre känti angwane, Jesukwe ngäbäkre merire ngwákä kani küdehti, bti ñäkäbare arameo kwe ie krörö:

Talita, kumi, niebare kwe ie. (Ne abko nieta: Ngäbäkre merire chi, näin krö, tita niere mae.)

<sup>42</sup> Ne btäräbe, ngäbäkre merire ye nükani krö, nikaninbe dikekäta. Yebtä nitre nämane kwati, ye töi ñan namani krütare jire chi kukwe nakaninkä yebtä. Ngäbäkre merire ye abko kä kwä jätäbti kubu ie. <sup>43</sup> Jesukwe ngäbäkre mikaninta nire, bti bukamna kwe. Akwa nitre kukwe tuakatuaka abko käkwe ñan kukwe ye kädriedre jire chi ni mda mdabe, niebare kwe ietre. Ne abko nakaninkä kore.

## 6

### *Jesu mikani ütiäte ñakare ja käite Nazarete*

(Mateo 13.53-58; Lucas 4.16-30)

<sup>1</sup> Yebti Jesu nikaninta ja käite juta Nazarete nitre ja tötitkaka benbe. <sup>2</sup> Abti köbö jadükakrä nükani angwane, nikani dirire sinagogate. Angwane ni kwati nämane kukwe nuen. Ruäre abko ñan töi nämane krütare Jesu kukweibtä, kä namanintre niere jae kwärikwäri:

¿Ni nokokwe ja tötitkani mdente amarebti töbtä dikaro sere? Arato, töi ngitiekä dikaro dirikrä, btä tä sribi kri ñan tuabare nuene Ngöbö diebti. ¿Se abko ño känti gare ie

amarebti sere? <sup>2</sup> Niarata bike kri ñan ñan? <sup>3</sup> Niara María ngobo sribikä kri kukwänbtä ara. Niara abko Santiago, José, Judas btä Simón etba ara. Niara ngwai tä nüne jökrä kä ne känti arato, namanintre niere jirekäbe jae kwärirkwäri.

Ne aisetet Jesu kukwei namani tare btä. <sup>4</sup> Abtä Jesukwe niebare mda ietre:

Ni Ngöbö kukwei niekä mikata ütiäte kä mda mdabti, akwa ja käite amne mräkä kwekwe ngätäite amne mräkä juete abko mikata ütiäte ñakare nieta. Ye kwrere mun ñan tä ti mike ütiäte jae. Abko kore se, niebare kwe ietre.

<sup>5-6</sup> Nitre Nazarebo käkwe ñan Jesu kukwei mikani ütiäte abko namani tebaidre kri Jesukrä. Abtä ni bren bren nämane ruäre, aibebti Jesukwe kise mikani abko namaninta kuinta, akwa sribi kri nuenbare ñakare mda kwe kä ye känti.

*Jesukwe nitre ja töitikaka ben juani Ngöbö kukwei dirire*

(Mateo 10.5-15; Lucas 9.1-6)

Yebti Jesu nikani dirire janknu juta kватирекватире Galileate angwane, <sup>7</sup> ni ja töitikaka ben ni jätäbti nibu käräbare kwe, ie Ngöbö di biani kwe üai käme juantarikrä, bti juani nibu nibu kwe Ngöbö Kukwei dirire. <sup>8-9</sup> Akwa rikadre känenkri abko töi diani krörö kwe:

Mun rikadre angwane, mun ñan rika mrö ngwena, mun ñan rika kra ngwena, mun ñan rika ngwian ngwena, akwa mökän aibe järika munkwe jae amne sandalia mun ngotobtä aibe te mun rika. Arato, dän jabtäbe, te mun rika, ñobtä ñan angwane munkwe nünentbe nirebe abko käkwe mun die mikadre jäandrän jökrä yebti. <sup>10</sup> Ne mden kisete, juta mdente mun rika, ye känti munkwe nünantbe ju kwtibe te, bti mun rika ta juta mdate. <sup>11</sup> Akwa nane juta mden känti mun ñan ka ngäbti, btä mun ñan kukwe nua tö raba angwane, munkwe dobro ja ngotobtä ye bäbrükate nitre nünanka juta yete okwäbti, niaratre ngite au Ngöbö ngwärekri bä mikakrä tuare ietre. Yebti abko, kukwe era erere ti bike niere munye. [Ngöbökwe ni jökrä mikadi ja tare nike, ye ngwane nitre Sodomabo btä Gomorrabo abko Ngöbökwe ngwiandi ja tare nike krübäte bkänä, akwa ni kä ye känti tä mun kukwei nuen ñakare abko Ngöbökwe ngwiandi ja tare nike bari krübäte mda. Abko kore se, niebare Jesukwe ietre.]\*

<sup>12</sup> Ye erere bkänä, nitre ja töitikaka Jesube nikani, kä namani niere krörö: Kukwe kämekäme kite temen munkwe, bti tödeke Ngöböbti munkwe, namanintre niere. <sup>13</sup> Ye ngwane, üai käme juanintari mento ni kwtibtä kwetre. Arato ni bren bren mikaninta kuinta kwetre aseite kekare kwärä ni bren bren yebti.†

*Juan Bautista müre ketani*

(Mateo 14.1-12; Lucas 9.7-9)

<sup>14</sup> Kä ye ngwane abko, jrei kädian nämane Herodes Antipas nämane gobrane angwane, Jesu nämane dre dre nuene gani kwe, ñobtä ñan angwane ni jökrä nämane Jesu käikitekä kä ketareketare Galileate. Yebti ni ruäre namanintre niere krörö Jesubtä: Ngöbökwe Juan Bautista mikaninta nire, aisetet di tärä sribi kri ñan tuabare nuenkrä ye, namanintre niere.

<sup>15</sup> Ni mda mda abko namani niere: Ni Ngöbö kukwei niekä kira kädian nämane Elías ara se, namanintre niere.

Ni mdara jire abko namani niere: Nitre Ngöbö kukwei niekä kirakira abko kwrere sere, namanintre niere.

<sup>16</sup> Blita namani Jesubtä, ye namani gare Herodeye angwane, niebare kwe:

Juan dokwä tikakamna tikwe, ara nükaninta nire mtare, niebare Herodekwe.

<sup>17-19</sup> Ñobtä jrei Herodes käkwe Juan dokwä tikakamna abko nakaninkä krörö: Herodes käkwe niebare kore, ñobtä ñan angwane niara etba Felipe nän muko kädian nämane Herodías abko diani kwe kän. Yebti abko Juan Bautista käkwe niebare Herodeye: Ma etba nän muko se makwe ñan mikadre jire ja ken kän, Juan nämane niere. Ye dokwäre abko Juan Bautista kamna ngite Herodekwe, bti kitamna ngite kä teri kwe, ye nükaninta töre

\* <sup>6:11</sup> Kukwe corcheta ngätäite abko ñan tä tikani manuscrito bari kuinkuin btä. † <sup>6:13</sup> aseite kekare ni bren bren yebti. Aseite kekani ni bren brenbti, Ngöbö di nämane ni yebti Ngöbö Üai köböire bä mikakäre ietre.

ie, kákwe ñäkäbare kore. Ye mdenbtä Herodías abko tö namani Juan müre ketai, akwa ñan namani nuene kräke, <sup>20</sup> ñobtä ñan angwane Juan abko ni era metre nünanka deme Ngöbö ngwärekri nämane gare Herodeye, abtä nämane mike ütiäte, aisetet jrei Herodes nämane Juan ngibiare Herodías ngäniene. Arato kä nämane nebe nuäre Herodebtä Juan kukwei nuare, akwa nämane nebe töbige kri btä.

<sup>21</sup> Te bati, Herodes därebare köböl nükani angwane, Herodekwe sribikä bari ütiäte krikri käräbare, btä nitre rükä rükä dänkien käräbare kwe. Arato ni ütiäte krikri Galileate käräbare kwe mröre jae. Ye ngwane köböl kuin nükani Herodíakrä. <sup>22-23</sup> Herodías ngänkän bati nikani tärä mike kwäräkwärä se kwrere nitre nübaibare Herodekwe ye okwäbti. Herodías ngänkän namani tärä mike nuäre kwäräkwärä, ye abko käi namani nuäre krübäte Herodebtä amne ni mda mda nämane mröre ben yebtä. Abtä Herodekwe niebare Herodías ngänkanye:

Ngöbö se okwäbti, ma tö dre dre ie, erere kärere jökrä tie angwane, tikwe biandi mae. Kä te tita gobrane, ye ma tö käräi ruäre ta tie angwane, tikwe biandi mae. Dre erere ma tö käräi tie, tikwe biandi mae. Ne tita niere mae Ngöbö se okwäbti, niebare kwe bäre bäre ngäbäkre merire yeye.

<sup>24</sup> Dre kärädre kwe abko ñan nükani gare ie. Abtä nikani, kákwe niebare meyeye:

¿Tikwe dre kärä ruen? niebare kwe meyeye.

Meyekwe niebare mda ie:

Juan Bautista dokwä kärere ie, niebare mda kwe ie.

<sup>25</sup> Ye erere bkänä, Herodías ngänkän nikaninbe mda. Namaninta jrei Herodes känti, kákwe niebare ie:

Gwängwarbe, makwe Juan Bautista dokwä mika blatote. Makwe bian tie nete, ie ti tö nibi, niebare kwe Herodeye.

<sup>26</sup> Yebtä abko, Herodes moto namani ulire mda, akwa nitre nübaibare kwe ye okwäbti ja kukwei biani kwe Herodías ngänkanye, aisetet ñan tö namani ja kukwei kitaita temen.

<sup>27</sup> Yebtä jrei Herodes kákwe, ni rükä juani iti abko kákwe Juan dokwä tikarekä, bti jatadre ngwena niebare kwe ie. <sup>28</sup> Ye erere Juan nämane ngite, ye känti ni rükä nikani, kákwe Juan dokwä tikaninkä, bti mikani blatote kwe, jänikani, biani kwe Herodías ngänkän bati yeye angwane, niara kákwe bianinbe meye Herodíaye mda.

<sup>29</sup> Juan müre ketani, ye nitre ja töitikaka ben kákwe gani angwane, Juan ngwäkä jänikani kwetre, bti doboi mikani kwetre.

### *Jesukwe ni mili krärike bukani*

(Mateo 14.13-21; Lucas 9.10-17; Juan 6.1-14)

<sup>30</sup> Jesukwe nitre ja töitikaka ben töi diani, bti juani kwe kä ketareketare Galileate. Abti nükaninta jökrä känti angwane, dre dre nuenbare kwetre btä diribare ño ño kwetre, ye kädriebare jire jökrä kwetre Jesube. <sup>31</sup> Ye ngwane, ni kwati nämane nüke basare ietre, namani nikenta, täte ni mda namani nüke, namani nikenta aibe janknu, aisetet kä ñan namani mrökrä ietre. Abtä Jesukwe niebare nitre ja töitikaka benye:

Brän jadüke chi kä kaibete, niebare kwe ietre.

<sup>32</sup> Ye erere bkänä, nakwani jökrä rute, bti nikanintre kä kaibete. <sup>33</sup> Nikanintre angwane, Jesu ara namani rute nükani gare ni kwatiye, aisetet nikanintre betekä jiebti. Erere arato, ni kwati nünanka juta mda mdate kákwe gani abko nikanintre betekä Jesu ngäbti, namanina käne kä kaibete ngibiare, btä nikanintre ngitiekä.

<sup>34</sup> Jesu nikani mate, nakwani timon angwane, ni nämane kwati ngibiare ngäbti. Nitre ye abko namani tuen bäsí obeja ngibiaka ñakare raba ngwarbe ye kwrere, namani tuen Jesuye, aisetet namani tuen bobre ie. Abtä nikani kukwe dirire kabre bätäkä ngwarbe ietre. <sup>35</sup> Bti kä jatani dere nitre ja töitikaka Jesube okwäbti angwane, nikanintre, kákwe niebare krörö Jesuye:

Kä kitera dere. Nita kä kaibete nete, <sup>36</sup> aisetet nitre se juen mrö kökö jae. Käname nere ya, jutate ya, mdente erere juen mrö kökö jae, niebare kwetre Jesuye.

<sup>37</sup> Jesukwe niebare mda ietre:

Niaratre buke munkwe, niebare kwe ietre.  
 Niaratre käkwe niebare mda:  
 ¿Ni iti käkwe ngwian ganandre sö krä kwä jire abko näre bti, nun rikadre ban kökö nitre kwati se bukakrä jökrä bäre sera? niebare kwetre.

<sup>38</sup> Jesukwe niebare ietre:  
 ¿Ban tä kunbe munkwe? Ye mun nän tuen, niebare kwe ietre.  
 Erere jananbare tuen, bti jatanintre nüketa, käkwe niebare:  
 Banta kunrike btä gwa krobu, niebare kwetre Jesuye.  
<sup>39</sup> Jesukwe nitre juani täke ketareketare temen ja täritäri mikä rerebarebti. <sup>40</sup> Erere nitre namani täkänintbe gre ketarike ja täritäri, ruäre abko namani täkänintbe gre ketebu bti ni jäätä ja täritäri. <sup>41</sup> Bti Jesukwe ban kunrike btä gwa krobu diani kisete, nikrabare kä käinbti kwe, bti kuin niebare btä Ngöböye kwe, bti ban ñäkänintbe kwe, biani kwe nitre ja töitikaka benye ni jökrä bukakrä. Erere gwa krobu te ni jökrä bukani arato. <sup>42</sup> Ni kwati käkwe mröbare, namanintre trinetrine jökrä, <sup>43</sup> bti ban oto btä gwa oto namaninte abko ükaninkröta kutia kwä jäätäti kubu jire mda. <sup>44</sup> Ni kwati käkwe mröbare, ye abko ni brare brare aibe mili krärike. Meri btä ngäbäkre nämane kwati abko tanbare ñakare.

*Jesukwe dikakabare ñöbti  
 (Mateo 14.22-27; Juan 6.16-21)*

<sup>45</sup> Nebti ni nämane kwati, ye Jesu jämi juenta ja gwiriete kwäräkwärä, känenkri nitre ja töitikaka ben juani rute kwe, bti juani Nö Okwä Kri Galilea kwärä nakri ja ngibiare juta Betsaidate. <sup>46</sup> Jesukwe ni kwati ye juaninta jökrä ja gwiriete, bti niara nikani mintokwärä mda blitakäre Ngöböbe. <sup>47</sup> Kä jatanina iko angwane, nitre ja töitikaka Jesube namani ru ngwena Nö Okwä Kri Galilea te ruäre. Jesu abko namani kaibe, nämane jate abko okwäbti <sup>48</sup> müre namani mate ribi krübäte nitre ja töitikaka ben ngäbti, aiseite namani ñö sökö tare rubtä, namani tuen Jesuye. Kä jatanina ngwen ja ken dekä angwane, batibe Jesu nikani dikekä ñöbti kukwärä. Jatanina nüke ru ken, tö namani näin ru bäre ta, akwa jatabare nitre ja töitikaka benye angwane, <sup>49</sup> ni bækäi nämane dikekä ñöbti, namanintre nütüre, aiseite nekwetaninkätre, käkwe ngratebare, ñobtä ñan angwane <sup>50</sup> Jesu jatabare ietre angwane, nekwetaninkä jökrä. Abtä Jesu käkwe niebare ietre:

Ti ara tä näin. Mun ñan rekvetaka, niebare kwe ietre.  
<sup>51</sup> Bti Jesu nikani rute käin, btäräbe müre nötaninkäbe. Abtä nitre ja töitikaka Jesube ñan töi namani krütare, <sup>52</sup> ñobtä ñan angwane ñan namani Jesu kukwei kaen ngäbti metre, aiseite Jesukwe ban ñäkänintbe Ngöbö diebti angwane, niara ñakare niaratre kwrere abko ñan nükani gare ietre.

*Jesu btä nitre ja töitikaka ben nükani juta Genesarete  
 (Mateo 14.34-36)*

<sup>53</sup> Yebti niaratre nükani Nö Okwä Kri Galilea kwärä nakri juta Genesarete, känti ru mäkäninte kwetre ñö köräbtä, <sup>54</sup> bti nakwanintre timon. Btäräbe nitre nünanka yete, ie Jesu nükani gare, <sup>55</sup> aiseite jötrö ngwarbe nikanintre betekä juta ngwäré. Jesu namani nikeni mdente mdente, ye nükani gare ni bren bren mräkäye angwane, namanintre ni bren bren ye tike jänbti jänbti Jesu kukwäré. <sup>56</sup> Jesu namani nikeni juta kiakiate, namani nikeni juta krikrite, namani nikeni kä kiakiate, mdente erere ni bren bren mika namani jite jite mräkäkwe Jesu ngäbti. Angwane nitre bren bren ye abko Jesukwe tuadremetre dän körä aibe nuenbtä jabtä amne rabadreta kuinta abko mräkä namani ribere Jesuye. Ye erere bkänä, nitre bren bren namani dän körä aibe nuenbtä Jesubtä angwane, namani nebata kuinta batibe jökrä abko nakaninkä kore.

*Dre dre tä ni mike ngite Ngöbö ngwärekri niebare Jesukwe  
 (Mateo 15.1-20)*

<sup>1</sup> Abti bati nitre bariseo btä Kukwe Biani Ngöbökwe Moiséye dirikätre nämane Jerusalén, nükani Jesu känti Capernaúmte. <sup>2</sup> Ye ngwane, Kukwe Biani Ngöbökwe Moiséye dirikätre kirakira käkwe köbötikamna bti mrömna kwetre nitre israelitaye, ye kwrere nitre ja tötitaka Jesube nikani mröre abko ruäre käkwe ñan köbötikani nitre bariseo okwäbti. Abtä namani ñäke btä. <sup>3</sup> (Nitre israelita ngämi mröre abko känenkri köbötikadre kuin abko Kukwe Biani Ngöbökwe Moiséye dirikätre kirakira käkwe ükaninte nuendre kore, ñiobtä ñan angwane kore rabadredbe Ngöbö ngwärekkri, erere nitre bariseo btä nitre israelita käta mike täte jökrä. <sup>4</sup> Nitre israelita tä nebe jändräñ kökö jae, bti tä nüketa gwi angwane, ñan köbötikadre käne kwetre, ñan mrödre kwetre. Arato kukwe mda mda mikata täte kwetre abko nere: baso bätädrete, mrü bätädrete, unkwen bätädrete, jän bätädrete. Ye abko, Kukwe Biani Ngöbökwe Moiséye dirikätre kirakira abko käkwe kukwe ükaninte nuendre ja mikakäredbe Ngöbö ngwärekkri nitre israelitaye, erere tä nuene janknu ja täritäri.) <sup>5</sup> Ne mdenbtä abko, nitre bariseo btä Kukwe Biani Ngöbökwe Moiséye dirikätre jatani, käkwe niebare Jesuye:

Nun mräkä kirakira kákwe kukwe ükaninte nuendre, jse ñobtä abko nitre ja tötitaka mabe käta mike ñakare täte se? Ni rabadredbe Ngöbö ngwärekri, abkokäre ni ngämi mröre, känenkri köbötikadre abti mrödre abko tä ükaninte kore amarebti nitre ja tötitikaka mabe abko ñan tä köbötike jire chi mrökrä se, niebare kwetre Jesuye.

<sup>6</sup> Jesukwe niebare mda ietre:

Mun ngwarbe ja b   mike kuin. Mun ye mdenbt   Isa  as k  kwe Ng  b  o Kukwei niebare metre munbt   abko t   tikani kr  r  r  :

Juta ne käta ti mike ütiäte ja kada aibebti, aisete tä ti tarere ñakare era metre.

<sup>7</sup> Tätre ti käikitekä ngwarbe amne kukwe ükaninte au jakrä kwetre, aibe tätre dirire ti  
Kukwei tätē,Isaías 29.13  
niebare Isaákwē munhtä

<sup>8</sup> Ye abko, kukwe biani Ngöökwe nuendre nie abko munta kite jökrä temen, amne kukwe ükaninte ni kä nebtäkwe abko mikata bäri ütiäte jae munkwe.

<sup>9</sup> Ye abko, kukwe biani Ngöböökwe nuendre nie, erere munta mike ngwarbe jae, akwa kukwe ükaninte au jakrä munkwe abko mikata täte munkwe. <sup>10</sup> Ye mdenbtä, Ngöböökwe ja kukwei tikamna krörö täräbtä Moiséye:

Mun rün btä mun meye mika ütiäte jae munkwe.

Nire nire kákwe näkädre tare rün amne meye rüere, ni ye abko kämikadre, [Exodo 21.17](#); [Levítico 20.9](#)

<sup>14</sup> Yebti Jesukwe ni jökrä käräbareta mda, bti niebare kwe ietre:

Ti bike kukwe niere, ne kukwei nuen munkwe angwane, munkwe mika nüke gare jae abko krörö: <sup>15</sup> mrö jökrä kwetata nikwe, ye abko ñan tä ni mike ngite Ngöbö ngwärekri, akwa kukwe jökrä käme ni töibtä, nita nuene ye abra tä ni mike ngite Ngöbö ngwärekri. Abko kore se, niebare Jesukwe. <sup>16</sup> [Ni kukwei ruen munye angwane, munkwe kukwe ne ketate olote. Abko kore se, niebare Jesukwe nitre kwatiye.]†

\* 7:11 Korban abko käta "jändrän biandre Ngöböye" niere hebreore. Ngäbäkre ngwarbe ñan tö namani rün btämeye die mikai angwane, nämame korban niere ngwian ganaibare kwe yebtä. Abtä ngwian ganaibare kwe, yebti ñan rün btämeye die mikadre, akwa biandre Ngöböye. Ye abko nämame dbe abko nitre dirikä nämame niere, akwa Ngöböta ni rün btä nimeye die mikamna nie. † 7:16 Kukwe tikani corcheta ngätäite abko ñan tä tikani manuscrito bari kuinkuin btä.

<sup>17</sup> Yebti Jesu nikaninta gwä nitre ja töitikaka benbe. Ni mda mda nämane kwati abko namani jökrä ju bäre. Jesu namaninta gwi angwane, nitre ja töitikaka ben kákwe niebare ie:

¿Kukwe diriniri makwe, ye ño yere? niebare kwetre Jesuye.

<sup>18</sup> Jesukwe niebare mda ietre:

¿Abko kukwe ñan nü gare munye arato ya? Mrö jökrä kwetata nikwe, ye ñan tä ni mike ngite Ngöbö ngwärerekri, <sup>19</sup> ñobtä ñan angwane nita mrö kwete, ye abko tä nikken jökrä ni bülete, akwa nita nainkrö angwane, nita mrö ye kitekäta jökrä, ¿ye abko gare ñakare munye ya? (Ne aisetet, mrö jökrä kuin kwetadre, niebare Jesukwe.) <sup>20</sup> Kukwe kämekäme ni töibtä, nita nuene, ye käta ni mike ngite Ngöbö ngwärerekri, <sup>21</sup> ñobtä ñan angwane kukwe kämekäme abko tä ni töite amne ni motote abko erere nita nuene abtä nita ja mike ngite Ngöbö ngwärerekri abko krörö: Ni merire brare ja mike ngite bätäkä ngwarbe jabe kwärikwäri amne ni jäandrän goire ni mda mdakän. Erere arato, nita ni mda mda kämike, ni gure käta ja mike gure batibati tiebe ni mda mdabe. <sup>22</sup> Nita gore, jäandrän ni mda mdakwe, ie ni tö jökrä jakrä, nita kukwe kämekäme aibe nuene, nita ni ngökö, ni diän diän, ni tö rabai ni mda kwrere, nita ñäke ni mdabtä, nita bike kri, ni töbike ñakare metre ja käne. <sup>23</sup> Kukwe kämekäme keta kabre nita nuene, ñobtä ñan angwane ye tä ni töibtä, käta ni mike ngite Ngöbö ngwärerekri. Abko kore se, niebare Jesukwe nitre ja töitikaka benye.

#### *Meri ñakare israelitare kákwe tödekani Jesubti*

(Mateo 15.21-28)

<sup>24</sup> Abti Jesu nikanjuta Tiro bäre temen. Namani yete angwane nikani gwä, akwa ñan tö namani ja mikai tuare ni nünanka kä yete ie, aisetet nikani tiebe, akwa nitre kä ye känti käkwe gani. <sup>25-26</sup> Ye känti meri nämane iti abko ngänkänbtä üai käme nämane nüne. Meri ye abko griega amne Sirofenecia. Niara ñakare israelita. Jesu nükani gani kwe angwane, jötrö ngware nikani, kákwe ja mikani bobre ngukudokwäbti Jesu ngwärerekri, bti niebare kwe ie:

Üai käme juentari ngäbäkre tikwe sebtä, namani kärere kisere Jesuye.

<sup>27</sup> Abtä Jesukwe niebare mda ie:

Tikwe kukwe kri nuendre makrä, ye abko mrö ngäbäkrekrä kita nukro ngäbäli kiakia ie kän, ye kwrere tikwe nuendre nitre israelitabtä, aisetet ti ñan raba üai käme juentari ngäbäkrebtä makrä, ñobtä ñan angwane ma abko nukro ngäbäli kiakia ye kwrere aisetet.

<sup>28</sup> Meri ye kákwe niebare mda Jesuye:

Jän, ti dänkien, akwa mrö büreta betekä timon ngäbäkre kisete abko nukro ngäbäli kiakia tä kwete mesa täni. Ye mden kisete, titakwe ribere mae nete, niebare kwe ie.

<sup>29</sup> Jesukwe niebare mda ie:

Mata kukwe era niere. Ngöböta sribire ño ni kwe ngätäite tä gare kuin mae, nibi tuen tie. Arato mata tödeke kwatibe Ngöböti, nibi tuen tie. Ye köböire tikwe üai käme junina mento ma ngänkänbtä, aisetet nibirate kuinta, aisetet nänta ja gwiriete. Abko kore se, niebare Jesukwe ie.

<sup>30</sup> Ye erere bkänä, meri ye nikaninta, namaninta gwi angwane, üai käme nikanina mento ngänkänbtä aisetet, nämane jáme jänbti, btä namaninta. Ne abko nakaninkä kore.

#### *Ni olo ngidianinte amne kukwe ritete abko Jesukwe mikantia kuinta*

<sup>31</sup> Jesu nämane juta Tiro bäre temen, nikaninta angwane, nikani juta Sidón känti ta, nikani kä kädian nämane Decápolis känti. Te nükani, namani Ñö Okwá Kri Galilea btä.

<sup>32</sup> Ye känti ni iti abko olo ngidianinte amne kukwe ritete jänükani mräkäkwe Jesuye. Angwane Jesukwe kise mikadre bti mikakäre kuinta abko mräkäkwe ribebare kisere ie.

<sup>33</sup> Ye känti ni nämane kwati Jesu bäre ta, aisetet Jesukwe ni ye ngwiani mento, bti kise kriani olote kwärikväri kwe, tüdrä abko nuaninbtä kälibti kwe, <sup>34</sup> nikrabare kä käinbtä kwe blitakäre Ngöböbe, bti büre jäkäni nga kwe, bti ñäkäbare krörö arameo kwe ni neye: ¡Efata! niebare Jesukwe ie. (Kukwe arameo ne abko käta: ¡Olo ngiente titä niere mae!

<sup>35</sup> Ye btäräbe ni ye olo gu ngitianinta, tüdrä namaninta kuinta amne namani blite kuin metre. <sup>36-37</sup> Kukwe nakaninkä kore, ye Jesukwe ñan kädriemna jire chi ni mda mdabe, akwa ni nämane yete, okwätbi Jesukwe kukwe kri nuenbare, ye töi ñan namani krütare, kä namanintre niere: Ni seta jäandrän kuinkuin nuene ño, amarebti ni olo ngidianinte ie tä ni kukwei mike ruenta. Ni kukwei ñakare abko tä kukwe tike sere, namanintre niere kore. Mden kisete, kukwe nakaninkä ñan kädriedre abko Jesu namani niere ietre, akwa bäri namani kädriere ni mda mdabe.

## 8

*Ni mili kräbkä bukani Jesukwe**(Mateo 15.32-39)*

<sup>1</sup> Kä ye ngwane, bati ni nükaninta ja ükekrö kwati Jesubtä abko kän mrö krütani jökrä. Abtä Jesukwe nitre ja töitikaka ben käräbare, bti niebare kwe ietre:

<sup>2</sup> Käbömära jire ni kwati tä tibe nete, ie mrö ñakare kwetadre, aisetet nibi tuen bobre tie. <sup>3</sup> Ni ruäre nünanka mente jatani tä nete. Tikwe juandreta mröi ja gwiriete angwane, nane kä rötarete bti ji ngrabare, aisetet nibi tuen bobre tie. Ti ñan tö juainta mröi, niebare Jesukwe ietre.

<sup>4</sup> Nitre ja töitikaka ben käkwe niebare mda ie:

Nita kä kaibe nete. ¿Kä krörö känti abko ni bukare drete sere? niebare kwetre ie.

<sup>5</sup> Jesukwe niebare mda ietre:

¿Banta kobe munkwe?

Niaratrekwe niebare mda ie:

Banta kun kükübe nunkwe, niebare kwetre Jesuye.

<sup>6</sup> Jesu käkwe täkämna temen nitre nämane yeye, bti ban kun kükü diani kisete kwe, kuin niebare btä kwe Ngöböye, ñäkänintbe kwe, bti ngökani kwe nitre ja töitikaka benye dräidre ni nämane kwati yebti. Erere bkänä, ban dräibare kwetre. <sup>7</sup> Gwa kiakia nämane krobu, krämä kwetre, btä Jesukwe kuin niebare Ngöböye, bti ngökani kwe nitre ja töitikaka benye, bti juani dräire kwe arato. <sup>8</sup> Ni jökrä käkwe mröbare, namanintre trinetrine jökrä, bti ban oto namaninte, ye abko nitre ja töitikaka Jesube käkwe ükaninkröta kutia kwä kükü. <sup>9</sup> Ni kwati käkwe mröbare, ye abko ni brare brare aibe mili kräbkä näre amne meri btä ngäbäkre nämane kwati abko tanbare ñakare. Ni jökrä käkwe mröbare trine, bti Jesukwe juaninta ja gwiriete, <sup>10</sup> bti niara btä nitre ja töitikaka ben nakwani rute, nikani kä kädian nämane Dalmanuta känti.

*Sribi kri ñan tuabare käräbare Jesuye**(Mateo 16.1-4; Lucas 12.54-56)*

<sup>11</sup> Jesu btä nitre ja töitikaka ben namani Dalmanuta angwane, nitre bariseo nükani ja kwete ben amne Jesukwe ja dokwä mikadre kö okwäte, abkokäre nükani ja kwete ben. Jesu abko juani era metre Ngöbökwé ya, ñakare ya abko Jesukwe bää mikadre, käkwe sribi kri ñan tuabare nuendre niaratre okwätbi abko nükani ribere Jesuye.

<sup>12</sup> Ye namani tare kri Jesubtä, aisetet büre jäkäni nga kwe, bti niebare mda kwe ietre:

¡Jo! ¿Ye ñobtä mun nünanka kä ne ngwane tä kukwe ye kwrere ribere dikaro tie yere? Ngöbö tö dre nuein, ye tikwe nin niedi jire chi munye, niebare Jesukwe ietre.

<sup>13</sup> Kukwe namani tare kri Jesubtä. Yebti nitre bariseo mikaninte känime kwe, nakwaninta rute, bti nikaninta ja jiebti ñö okwä kri kwärä nakri.

*Dirikätre blo, yebtä Jesukwe nitre ja töitikaka ben mikani mokre**(Mateo 16.5-12)*

<sup>14</sup> Nämane Dalmanuta angwane abko nitre ja töitikaka Jesube, bti kä nikwitaninkä ban ngwiandre jabe, abkokänti namanina rute angwane, banbe nämane kuntibe kwetre. <sup>15</sup> Ye ngwane, Jesukwe nitre ja töitikaka ben mikani mokre, käkwe niebare ietre:

Lebadura nitre bariseokwe btä nitre reketaka Herodebe, ye ngäniene munkwe ja ngibia kuin, niebare Jesukwe.

<sup>16</sup> Abtä nitre ja töitikaka Jesube namani niere jae kwärikwäri:

Ni ñan ki ban mda ngwena, abtä Jesuta blite kore, namani niere jae kwärikwäri.

<sup>17</sup> Ye gani Jesukwe, abtä niebare kwe ietre:

¿Ti abko nire metre ngämi nüke gare munye ya? ¿Ti raba mrö bien munye Ngöbö diebti ngämi nüke gare munye ya? ¿Ye ñobtä ban ñakare munye, muta niere dikaro jae abko mun töi ngitiekä ñakare arato ya? <sup>18</sup> ¿Kä tuen munye amarebti titi dre nuene abko nüke gare ñakare munye yere? ¿Ni kukwei ruen munye amarebti mun ti kukwei tebaire ñakare yere? ¿Tikwe dre nuenba, ye töre ñakare munye ya? ¿Ye ñobtä abko ban ñakare mun nibi niere yere? <sup>19</sup> ¿Ni mili krärike jire bti tikwe ban kunrikebe dräiba, ye rabateba abko ükakröbata kutia kobe munkwe? niebare Jesukwe nitre ja tötitaka benye.

Niaratre käkwe niebare mda:

Ban rabateba abko ükakröbata kutia kwä jätäbti kubu nunkwe, niebare kwe Jesuye.

<sup>20</sup> Bti Jesukwe niebare mda ietre:

¿Erere arato, ni mili kräbkä jire bti tikwe ban kun kükübe dräiba, ye rabateba abko munkwe ükakröbata kutia kobe? niebare kwe ietre.

Niaratre käkwe niebare mda Jesuye:

Ban rabateba abko ükakröbata kutia krikri kwä kükü nunkwe, niebare kwetra.

<sup>21</sup> Abtä Jesukwe niebare mda ietre:

Tikwe jäandrän ne nuenba mun okwäbti amarebti, ¿se ñobtä abko drebtä titi blite abko ngämi nüke gare metre munye? Abko kore se, niebare kwe ietre.

#### *Ni iti, ie kä tuen ñakare abko Jesukwe mikaninta kuinta*

<sup>22</sup> Yebti Jesu btä nitre ja tötitaka ben nikani mate juta Betsaidate angwane, ni iti, ie kä tuen ñakare jänükani mräkäkwe Jesuye. Jesukwe okwä nuadrebtä ja kisebti mikakäre kuinta abko mräkä namani ribere kisere ie. <sup>23</sup> Ni ie kä tuen ñakare, ye Jesukwe kani küdebti, nikani ben mento juta bäre, namani juta bäre angwane, Jesukwe käli mikani ni ye okwäbtä, bti kise mikani okwäbtä kwe, käkwe niebare ie:

¿Kä nibi tuen mae ya?

<sup>24</sup> Ni ye käkwe niebare:

Ni nibi tuen kri kwrere dikekä tie, niebare kwe ie.

<sup>25</sup> Ni ye, ie kä namani tuen diore, abtä Jesukwe kise mikaninta mda bati okwäbtä angwane, okwä namaninta kuin jökrä, aisetekä namani tuenta kuin jökrä ie. <sup>26</sup> Bti Jesukwe niebare ie:

Tikwe ma okwä mirita kuinta, ye makwe ñan kädrie jire chi ni mda mdabe juta Betsaidate. Nänta jirekäbe ja gwiriete, niebare kwe ie.

#### *Jesu abko Ni Dianinkä Ngöbökwe, niebare Pedrokwe*

(Mateo 16.13-20; Lucas 9.18-21)

<sup>27</sup> Yebti juta kiakia tä juta Cesarea Filipo bäre temen, ye kukwäre Jesu nikani nitre ja tötitaka benbe sribikäre juta kiakia yete. Namanintre dikekä ji ngrabare angwane, Jesukwe niebare ietre:

¿Ti ne abko nire nieta ni mda mdakwe tibta? niebare kwe ietre.

<sup>28</sup> Niaratre käkwe niebare mda Jesuye:

Ma abko Juan Bautista nükaninta nire nieta ni ruärekwe amne ni mda abko käta ma Elías nükaninta niere mabta. Akwa ni mda abko tä niere Ngöbö kukwei niekä kirakira mda mda abko nükaninta nire nieta kwe mabta, niebare kwetra ie.

<sup>29</sup> Jesukwe niebare mda ietre:

¿Mun abko käta ti nire niere tibta? niebare kwe ietre.

Pedro abko käkwe niebare Jesuye:

Ma abko ni Dianinkä juani Ngöbökwe nun ngätäite, niebare kwe ie.

<sup>30</sup> Jesukwe niebare mda nitre ja tötitaka benye:

Ti abko Ni Dianinkä Ngöbökwe abko, munkwe ñan kädrie jire chi ni mda mdabe, niebare kwe ietre.

#### *Jesu müre ketadi, niebare käne kwe*

(Mateo 16.21-28; Lucas 9.22-27)

<sup>31</sup> Ye känti mentokwäre Jesu nikani dirire nitre ja töitikaka benye angwane, nikani niere:

Nitre unbre ji dokwätē, nitre blitaka Ngöböbe ni mda mda diäre dänkien amne Kukwe Biani Ngöböökwe Moiséye dirikätre, kákwe ti Ni Kä Nebtä Ngobo ne mikadi ja tare nike kri amne trö kwitadi kwetre tie, kákwe ti müre ketadi, akwa köbömäkäre angwane, ti rükadita nire, niebare kwe ietre.

<sup>32</sup> Kukwe ne rakadrekä ño Jesubtä, erere niebare metre ta kwe nitre ja töitikaka benye. Abtä Pedrokwe Jesu kärabare, nikani kaibe ben mentokwäre, bti nikani mäträre btä.

<sup>33</sup> Abtä Jesu nikwitaninte, kákwe nitre ja töitikaka ben mikaninta ñäräre, bti ñäkäbare krörö kwe Pedroye:

Satana, nän mento tibtä nete. Tikwe ja mikadre ngite Ngöbö rüere, abkokäre ma kite ñäke kore tie ñan ñan. Ni kä nebtä ie jändrän tuendbe abko erere tä tuen mae, aise te makwe ñan ñäkä kore tie, niebare Jesukwe Pedroye.

<sup>34</sup> Bti Jesukwe nitre ja töitikaka ben btä ni mda mda nämame yete, ye kärabare, bti niebare kwe ietre:

Nire nire tö ja töi mikai kwatibe nänkrä tibe, ni ye abko tö dreye jakrä abko raba käikwitekä jabti amne ja kwata raba ruentari tare ñakare ie nünakäre tikrä abko jata ti jiebti, <sup>35</sup> ñobtä ñan angwane nire nire tö ja kwata ngibiai jen jakrä abko krütadi kärekäre, erere rabadi kärekäre Ngöbö okwä bäre mento akwa, nire nire krütadi ti dokwäre amne kukwe kuin Ngöböökwe tibtä ye dokwäre abko rabadi dianintari nünakäre kärekäre Ngöböbe.

<sup>36</sup> Ye abko, ni rabadre jändräñ jökrä bkäne kabre kä nebtä, akwa ni krütadre angwane nikwe ñan nünandre mda Ngöböbe, ne ütiäre abko dre rükadre nie. <sup>37</sup> Erere arato, nikwe nünandre kärekäre, ye abko ni ñan raba kökö jire chi jakrä, ñobtä ñan angwane jändräñ ñakare jire abko ni rabadre bien Ngöböye nüna kärekäre ben ye ütiäre. <sup>38</sup> Ne aise te, nire nire käta ti rükente amne kukwe dirita tikwe ne rükente nitre tödekaka ñakare Ngöböbti käta kukwe kämekäme nuene ye ngwärerekri, ni ye abko ti Ni Kä Nebtä Ngobo ne jatadita angwane, tikwe ni ye rükandite arato. Ti jatadita angwane ti jatadita ti Rün di kri bää nuärebti, erere arato angele deme Ngöböökwe bää nuärebti, niebare Jesukwe nitre ja töitikaka benye btä ni mda mda nämame yete yeye.

## 9

<sup>1</sup> Yebti Jesukwe niebare mda:

Mun tä nete ne ruäre ngämi krüte, känenkri Ngöböta gobrane ño ja dibti ni kwe ngätäite, ye abko munkwe tuadi ja okwä jenbti abko ti tö nibi niei metre munye. Abko kore se, niebare Jesukwe ni jökrä nämame yete yeye.

### *Jesu bää nikwitanî* (Mateo 17.1-13; Lucas 9.28-36)

<sup>2</sup> Yebti kä nikani köbö ti ta mda angwane, Jesukwe Pedro, Santiago amne Juan aibe ngwiani jabe abko ben nikani ngitio bări mente käin yebti. Niaratre nämänenä ngitio yebti käin angwane, Jesu bää nikwitanî bää jene niaratre okwäbti, <sup>3</sup> Angwane dän Jesubtä namani trä ngitiekä jökrä ngrabare, namani ngwen bürere. Ni ñakare jire iti kä raba dän bätete ngwen bürere dikaro erere dän bää namani Jesubtä. <sup>4</sup> Ye btäräbe Elías btä Moisés namani gökökä yete blite Jesube, btä okwä namani. <sup>5</sup> Pedrokwe niebare Jesuye:

Ti Dänkien, nuna nete abko käi nibi nuäre tibtä, aise te ma tö ne ngwane nunkwe ju mikadi kiakia komä munkrä: kwati makrä, kwati Moisékrä amne kwati Elíakrä, niebare Pedrokwe.

<sup>6</sup> Pedro abko kákwe ñäkäbare kore, ñobtä ñan angwane nitre ja töitikaka Jesube abko namani nekwetekä, aise te ño niedre kwetre abko ñan namani nüke gare ietre. Abtä Pedro namani ñäke kore. <sup>7</sup> Ye btäräbe müta jatani jüben niaratrebti angwane, müta yete abko ni kukwei jarabare krörö ietre:

Ni ne abko ti Odei tare kri tikwe. Niara kukwei nua munkwe abko ni kukwei namani kore mütate. <sup>8</sup> Ye btäräbe nitre ja tötitkaka käkwe nikrabareta ja bäre angwane, ni mda ñakare amne Jesu aibe nämane kaibe, btä okwä namani.

<sup>9</sup> Yebti Jesu nikaninta niaratetrebe ngitiobtä motokwäre angwane, Jesukwe niebare ietre:

Ti Ni Kä Nebtä Ngobo ne ngämi krüte, bti nüketa nire, ye känenkri kukwe turi munkwe ngitiobti käin sete, ye munkwe ñan nie jire chi ni mda mdaye. Abko kore se, niebare Jesukwe ietre.

<sup>10</sup> Ja rükadreta nire niebare Jesukwe, ye niaratre käkwe ngibiabare tiebe, akwa ye abko dre niebare Jesukwe abko ñan nükani gare ni nimä ja tötitkaka benye, aisetetamani ngwentari jirekäbe jae kwärikwäri. <sup>11</sup> Abtä niaratre käkwe niebare mda ie:

¿Ma krütadi bti rükadita nire mata niere ne ngwane, ñobtä abko Elías rükadre bäri Ni Dianinkä Ngöböökwe käne kukwe ükatekäre biare kräke Kukwe Biani Ngöböökwe Moiséye dirikätre käta niere? niebare kwetre Jesuye.

<sup>12</sup> Amne Jesukwe niebare mda ietre:

Elías rükadre käne ye abra era bkänä. Erere arato, niara rükadre Ni Dianinkä Ngöböökwe käne, käkwe jändrän jökrä ükadrete kuin metre. Akwa ti tö kukwe mda ngwiaintari munye: ¿Ñobtä ti, Ni Kä Nebtä Ngobo, mikadi ja tare nikadi kri amne ti mikadi ngwarbe ni mdakwe abko tä tikani Ngöbö Kukweibtä? Yebtä töbika munkwe. <sup>13</sup> Akwa Elías abko nükanina, \* akwa Kukwe Biani Ngöböökwe Moiséye dirikätre, ie niara ñan nükani gare, aisetetö namani dre dre nuein btä, erere nuenbare kwetre amne mrä müre ketani kwetre, nämane tikani Ngöbö Kukweibtä abko erere namani bare jökrä btä.

### *Jesukwe üai käme juanintari ngäbäkrebtä*

(Mateo 17,14-21; Lucas 9,37-43)

<sup>14</sup> Jesu jatani nüketa möta nitre ja tötitkaka nimä ben angwane, nitre ja tötitkaka ben ni ökän namani abko ben Kukwe Biani Ngöböökwe Moiséye dirikätre nämane ruäre abko nämane ja kwete amne, ni mda mda nämane kwati, btä Jesu nükaninta. <sup>15</sup> Jesu nükaninta, ye ni nämane kwati käkwe gani angwane, töi ñan namani krütare, kä nikani betekä jökrä köbö ngwentari Jesuye. <sup>16</sup> Jesukwe niebare mda ietre:

¿Drebtä mutta ja kwete nete? niebare kwe ietre.

<sup>17-18</sup> Jötrö ngwarbe ni nämane kwati, ye ngätäite ni nämane iti käkwe niebare Jesuye:

Dirikä, üai kämenta jadenkä ngäbäkrebtä tikän abko kisete kukwe ngitie ñakare. Tä niken mdente erere, ye känti tä neketete üai käme yeye, tä kaenkä käinta bti tä kite temen, tä nikrenkä jökrä ngrabare, däbe tä nebe betekä kadate angwane, tä nebe tu ukwe jökrä jabtä. Mden abko makwe mikadreta kuinta tikrä, abkokäre ti ki ngwena mae yere. Akwa nitre ja tötitkaka mabe aibe tä nete, ie tikwe üai käme juantarimna ngäbäkrebtä jakrä, akwa ñan niki mento ietre, niebare kwe Jesuye.

<sup>19</sup> Abtä Jesukwe niebare mda ietre:

¡Aingwaree, ti moto iko munbtä! Mutta tödeke ñakare dikaro Ngöböbti ye. ¿Ti rabadi kä nuäi mda munbe amarebti ye? niebare Jesukwe.

Ye btäräbe Jesukwe niebare mda:

Ngäbäkre ye ngwen tie, niebare kwe.

<sup>20</sup> Erere ngäbäkre ye jänikani Jesuye, jänikani nebe ken angwane, Jesu jatabare üai kämeye, ye btäräbe üai käme käkwe kä ötanintbe ngäbäkre yebti, nikani ngitiekä temen, namani ja den ngwarbe jabti tata nekwäre, sekwäre, nekwäre, sekwäre. Däbe namani betekä kadate. <sup>21-22</sup> Ye ngwane Jesukwe niebare ngäbäkre ye rünye:

¿Kä kobera üai käme nikani jadenkä kore ngäbäkre nebtä? niebare kwe rünye.

Niarakwe niebare mda Jesuye:

Nämane chi angwane, üai käme nikani jadenkä btä tikän yere, abko täbe kämige. Üai käme töta nebe müre ketai, käta kite ñukwäre, tä kite ñöte tikän, aisetetamani ma di tärä

\* 9,13 Elías abko nükanina. Jesu nämane blite Elíabtä angwane, nämane blite Juan Bautistabtä era metre. Näke Mateo 17,12,13 yebtä.

mikakräta kuinta tikrä, ne ngwane nun ngwen ruen bobre jae. Nun die mike. Üai käme juuentari mento btä, niebare kwe Jesuye.

<sup>23</sup> Jesukwe niebare mda ie:

Nirekwe tödekadre kwatibe tibti, kräke jäandrän jökrä nuäre nuene. ¿Se ñobtä abko ti di tärä üai käme juantarikrä mata ngwentari tie yere? niebare kore Jesukwe ie.

<sup>24</sup> Abtä ngäbäkre rünkwe ñäkäbare jume ja dibti krörö mda Jesuye:

Tita tödeke mabti, akwa mtare ti tö nibi tödekai bäri kwatibe mabti, yebtä ti die mika makwe, niebare kwe Jesuye.

<sup>25</sup> Ye btäräbe ni jatani nüke ja üikekrö bäri kabre mda, namani tuen Jesuye. Abtä jötrö ñäkäbare krörö kwe üai kämeye:

Üai käme, ma ngäbäkre ne kukwe ötaka amne ma ngäbäkre ne olo dikatekä, ma yeje tita niere, nän mento ngäbäkre nebtä. Ma ñan jata jadenkäta jire chi mda btä, tita niere mae, niebare Jesukwe üai kämeye.

<sup>26</sup> Angwane üai kämenkwe ngratebare kri ngäbäkre yebtä, bti kä ötanintbe bti kwe bobuta, nikani ngitiekä temen angwane, üai käme nikani mento. Ngäbäkre abko namani kwekbe temen ngwäkäre kwrere ni kwati ye okwäbti. Abtä namanintre niere: ¡Aiteeje! Ngäbäkre krüta tare yera, ni kwati namani niere kore. <sup>27</sup> Akwa Jesu nikani, kákwe ngäbäkre ye kani küdebtí, bti ganinkrö krö kwe. Ngäbäkre ye nükaninbe dikekäta krö. Namani kuin jökrä abko nakaninkä kore.

<sup>28</sup> Yebti Jesu namaninta kaibe gwi nitre ja töitikaka benbe angwane, niebare mda kwetre Jesuye:

Nunkwe üai käme junintari mento, ¿ye ñobtä ñan niki mento nunye ruen? niebare kwetre ie.

<sup>29</sup> Jesukwe niebare mda ietre:

Munkwe blitadre Ngöböbe btä ja bändre Ngöbökrä käne, aibe köböire üai käme ye kwrere mun raba juentari mento. Ye munkwe nuni ñakare kore, mdén kisete ñan niki mento munye, niebare kwe ietre.

#### *Jesu krütadi niebare bobukäre kwe*

(Mateo 17.22-23; Lucas 9.43-45)

<sup>30</sup> Jesu btä nitre ja töitikaka ben nämane Cesarea Filipo käntita temen, nikaninta angwane nikaninta kä Galilea käntita. Akwa ni mda mdakwe ñan gadre ie tö namani,

<sup>31</sup> ñobtä ñan angwane Jesu nämane dirire krörö kaibe nitre ja töitikaka benye:

Ni mda mda abko ie ti, Ni Kä Nebtä Ngobo, ne biandi müre ketadre, akwa köbömä angwane, ti rükadita nire, niebare kwe.

<sup>32</sup> Jesukwe dre niebare kore ñan nükani gare nitre ja töitikaka benye, akwa namani ja gaire, aise ñan namani ngwentarita Jesuye.

#### *Nire bäri ütiäte niebare Jesukwe*

(Mateo 18.1-9; 10.42; Lucas 9.46-50; 17.1-2)

<sup>33</sup> Abti nükaninta mda juta Capernaúmte. Namaninatre ja gwiriete angwane, Jesukwe niebare nitre ja töitikaka benye:

¿Drebtä mun täni ja kwete ji ngrabare yere? niebare Jesukwe ietre.

<sup>34</sup> Namanintre kwekbe jökrä, ñobtä ñan angwane niaratre ngätäite nire bäri ütiäte, abkobtä nämane näin ja kwete ji ngrabare, aise ñan namanintre kwekbe. <sup>35</sup> Drebtä namanintre ja kwete namanina gare Jesuye, aise ñan namani täkänintbe, kákwe niebare mda ietre:

Mun jakwe ti ken nete. Nire nire tö ja tuai bäri ütiäte kri ni mda mdakrä Ngöbö okwäbti, ye kákwe ja mika bäri bobre ni mda mdakrä amne ja mika ni sribikä ene kwrere ni mda mdakrä, niebare Jesukwe.

<sup>36</sup> Bti Jesukwe ngäbäkre chi käräbare nüke nitre ja töitikaka ben ngätäite, bti kukwe ye bä mikakäre, ngäbäkre ye diani kisete kwe, bti niebare kwe ietre:

<sup>37</sup> Nire nire käta ti tarere metre abko kákwe ngäbäkre ne kwrere kadre ngäbti ti kähti. Nirekwe kadre ngäbti kore, ye ngwane ñan ngäbäkre aibe kata ngäbti kwe angwane, ti

kata ngäbti kwe arato. Ye kwrere arato, nire nire käkwe ti kadre ngäbti kuin abko käta Ngöbö ti juanka kaen ngäbti arato. Abko kore se, niebare Jesukwe ietre.

*Nireta rüre ñakare Jesu rüere abko tä nekete Jesukri  
(Lucas 9.49-50)*

<sup>38</sup> Ye ngwane Juan abko käkwe niebare mda Jesuye:

Dirikä, nunkwe ni turi iti üai käme juentari ma käbti, akwa nekete ñakare nibe, aise ñan üai käme juandretari mda kwe ma käbti, nunkwe nini ie, niebare kwe Jesuye.

<sup>39</sup> Abtä Jesukwe niebare mda ietre:

Munkwe ñan ñäkä kore ie amne ñan bika kri niarabtä munkwe, ñobtä ñan angwane nirekwe sribi kri ñan tuabare nuendre ti käbti, yebti ñan tä näin ñäke blo ti rüere, akwa tä blite kuin tibtä. <sup>40</sup> Se ñobtä abko, munkwe ñan üai käme juantarinna mda ti käbti ie yere? <sup>40</sup> Ni ja rüere ñakare nibe, ye abko tä nekete nibe, aise munkwe ñan ñäkä ie.

<sup>41</sup> Jesukwe niebare:

Munta ti mike täte, abtä nirekwe ñö aibe biandre chi tomnane munye, akwa ni ñö bianka munye tä nekete nibe, ni yeye Ngöbökwe sribi kuin ye ütiä biandi abko ti tö nibi niei metre munye. <sup>42</sup> Akwa nire nire käta ja mike bobre Ngöböbtä ngäbäkre ne kwrere, ye nirekwe ngwiandreta ti käikwitekä jabti, känti rabadre kukwe nuene bari käme mda, ni ye abko Ngöbökwe mikadi ja tare nike krübäte kä nakebtä. Mden kisete, ni ye ngämi ni tödekaka tibti ngwen ti käikwitekä jabti, känenkri jä oto kri doboko nura ukwakrä ye mäkadre ngärä, bti kitadre mrente nguse känti müre reketadre abko rabadre bari kuin kräke. Ye kwrere ni ye ñan rabadre ni tödekaka tibti ngwen ti käikwitekä jabti aise.

<sup>43</sup> Ye kwrere mun kise mden köböite makwe ja mika ngite Ngöbö rüere ne ngwane, munkwe ja kise ye tikaka ta abko bari rabadre kuin, ñobtä ñan angwane munkwe nünandre deme kise otore kwärä rikakäre nüne Ngöböbe kä käinbtä abko bari kuin angwane, ñan mun kise krobu ngöi jökrä ben mun rikadre ja tare nike kärekäre ñukwä jutra nötöte ñakare köbö kwatirekwatire ye te. <sup>44</sup> [Kä nakebtä, yete jändrän jökrä tä nikken ngwarbe amne nginta kwete kärekäre. Ye kwrere abko ñukwä jutra ngitiekä käre, ni käme Ngöbö ngwärekri mikakäre ja tare nike kärekäre.]†

<sup>45</sup> Erere arato, mun ngoto mdenkri, köböite mun raba ja mike ngite, ne ngwane munkwe tikaka ta jae abko bari rabadre kuin, ñobtä ñan angwane mun ngoto kwäräbe akwa mun rabadre nüne metre Ngöbökrä abtä munkwe nünandre kärekäre ben, ye abko rabadre bari kuin munkrä amne, ñan mun ngoto krobu ben ngöi Ngöbökwe mun kitadre kä ja tare nikakrä känti. <sup>46</sup> [Kä nakebtä yete jändrän jökrä tä nikken ngwarbe amne nginta kwete kärekäre. Ye kwrere abko, ñukwä jutra ngitiekä käre, ni käme Ngöbö ngwärekri mikakäre ja tare nike kärekäre.]‡

<sup>47</sup> Erere arato, mun okwä köböite mun raba ja mike ngite Ngöbö rüere, ne ngwane munkwe ja okwä ye diante kwati mento, bti munkwe kitaka mobe arato, ñobtä ñan angwane Ngöböta gobrane, ye känti mun okwä kwatibe ben mun rikadre nüne kärekäre ben, ye abko rabadre bari kuin munkrä amne, ñan mun okwä kubu ben ngöi mun kitadre kä ja tare nikakrä känti. <sup>48</sup> Kä nakebtä yete jändrän jökrä tä nikken ngwarbe amne nginta kwete kärekäre. Ye kwrere abko, ñukwä jutra ngitiekä käre, ni käme Ngöbö ngwärekri mikakäre ja tare nike kärekäre.

<sup>49</sup> Jändrän kukwadre Ngöböye, btä mren mikata mikakäre bänante, ye kwrere abko munkwe ja tare nikadi mun mikakäre metre. <sup>50</sup> Mdakäre abko, mren abra kuin jändrän jökrä mikakrä bänante, akwa mren bänän riadrekä, ye ngwane ñan bänän rabadretä kuin mda. Ye kwrere mutta bike kri jabtä kwärikwäri angwane, mun ñan raba sribi nuene Ngöbökrä, aise mun rabadre ngwarbe mren bänän riadrekä kwrere. Mden kisete munkwe ti mikadi täte metre, ye köböire mun rabadi nüne jáme jabe kwärikväri. Abko kore se, niebare Jesukwe nitre ja tötitikaka benye.

† <sup>9:44</sup> Kukweta tikani corcheta ngätäite abko ñan tä tikani manuscrito bari kuinkuin btä. ‡ <sup>9:46</sup> Kukweta tikani corcheta ngätäite abko ñan tä tikani manuscrito bari kuinkuin btä.

## 10

*Meri tuadremetre ya, ñakare ya*  
*(Mateo 19.1-12; Lucas 16.18)*

<sup>1</sup> Jesu nämane Capernaúm, nikani mda nitre ja töitikaka benbe kä Judeate. Arato nikani Ñö Jordánbtä kä driri. Ye känti ni nukaninta ja ükekröta kwati Jesubtä abko, ie Jesu nämanena dirire ño, erere nikani dirireta ietre. <sup>2</sup> Ye ngwane, nitre bariseo nükani ruäre abko tö namani ja gain Jesube niara kitakäre ngite, kákwe niebare ie:

¿Kukwe Biani Ngöbökwe Moiséye käta dre niere abko nikwe mikadre täte ya? ¿Ni gure kákwe ja tuametreta, ye abko dbe ya ño niere nunye? niebare kwetre Jesuye.

<sup>3</sup> Jesukwe niebare mda ietre:

¿Ni gure kákwe ja tuametreta, ye nuemna Moisékwe munye ya ño arato? niebare kwe ietre.

<sup>4</sup> Niaratrekwe niebare mda Jesuye:

Ni gure kákwe ja tuadremetre abko dbe niebare Moisékwe, akwa nita ja tuemetre abko tikadre täräbtä biandre meriye, niebare Moisékwe, niebare kore nitre bariseokwe ie.

<sup>5</sup> Abtä Jesukwe niebare mda ietre:

Mun dokwä ribi ribi Ngöbökrä. Ye mdentä ni gure kákwe ja tuadremetre abko Ngöbökwe tikamna täräbtä Moiséye munkrä yere. <sup>6</sup> Akwa Ngöbökwe kä dätebare kena btä abko tikamna krörö kwe täräbtä Moiséye arato:  
 Ngöbökwe ni brare btä ni merire dätebare.

<sup>7</sup> Ne aisetekwe ni brare kákwe ja mikadre gure angwane, rikadre nüne jenena rünbtä amne meyebtä mento merire kwebe.

<sup>8</sup> Angwane ni nibu ye abko rabadi ni itibe kwrere, *Génesis 2.24*  
 abko tikamna kore kwe täräbtä Moiséye. Ye kwrere ni nibu ye ñan rabadi ni nibu kwrere mda, akwa rabadi ni itibe kwrere. <sup>9</sup> Ye mdentä kisete, Ngöbökwe ni mikani ni itibe kwrere, ye ni ñan rabadre denkä jire chi jene jene mentokwäre, aisetekwe ni brare kákwe ñan meri tuadremetre. Abko kore se, niebare Jesukwe nitre bariseoye.

<sup>10</sup> Yebti Jesu namanina gwi angwane, kukwe ngwianintari nitre bariseokwe, ye arabe nitre ja töitikaka ben nikani ngwentarita ie. <sup>11</sup> Abtä Jesukwe niebare nitre ja töitikaka benye mda:

Ni brare kákwe merire kwe tuadremetre, bti meri mdara jire ben ja mikadre gure kwe, ni ye kákwe ja mikadre ngite merire käne rüere. <sup>12</sup> Ye erere arato, ni merire kákwe brare käne kwe tuadremetre, bti rabadre brare mdabe, meri ye abko kákwe ja mikadre ngite brare käne rüere. Abko kore se, niebare Jesukwe ietre.

*Jesukwe ja di biani ngäbäkre kiakiaye*  
*(Mateo 19.13-15; Lucas 18.15-17)*

<sup>13</sup> Yebti ngäbäkre jänikani mräkäkwe Jesuye abko bti Jesukwe kise mikadre ja di bianskäre ietre. Akwa nitre ja töitikaka Jesube namani ñäke ngäbäkre mräkäye. <sup>14</sup> Ye gani Jesukwe angwane, namani romon nitre ja töitikaka benkrä, kákwe niebare mda ietre:

Ngäbäkre ye tuemetre kite tie. Munkwe ñan ji öta käne, ñobtä ñan angwane nire nire käta ja mike bobre Ngöböbtä ngäbäkre ne kwrerekwrere, ni yebti abko Ngöböta gobrane, aisetekwe munkwe ñan ji öta käne. <sup>15</sup> Nire nire ñan tä ja mike bobre Ngöböbtä ngäbäkre chi kwrerekwrere, ni yebti Ngöbökwe ñan gobrandi amne ñan nünandi kärekäre Ngöböbe kwe abko ti tö niei metre munye. Abko kore se, niebare Jesukwe.

<sup>16</sup> Bti Jesukwe ngäbäkre dianekisete, kise mikani dokwäbti kwe, bti ja di käräbare kräke kwe Ngöböye.

*Ni jändräñ bkäñkä kabre kákwe blitabare Jesube*  
*(Mateo 19.16-30; Lucas 18.18-30)*

<sup>17</sup> Yebti Jesu jatani nikenta mda angwane, ni jatani iti betekä, nükani ngitiekä ngukudokwäbti temen ngwärekri, kákwe niebare ie:

Dirikä kuin, ḡtikwe dre nuendre abko ütiäre ti rabadre nüne kärekäre Ngöböbe? niebare kwe Jesuye.

<sup>18</sup> Jesukwe niebare mda ie:

Ngöbö aibe kuin, yebti ni mda ñakare jire kuin. ḡYe ñobtä abko mata ti kuin niere tie ye? niebare Jesukwe ie.

<sup>19</sup> Bti Jesukwe niebareta ie:

Ma tö nünai kärekäre Ngöböbe angwane, Kukwe Biani Ngöböökwe Moiséye, ye garera mae abko erere makwe mika täte abko krörö:

Makwe ñan ni mda kämika.

Ma gure, makwe ñan ja mika gure bati bati ni mda mdabe.

Makwe ñan go.

Makwe ñan blita ngwarbe ni mda mda rüere kitakäre ngite.

Makwe ñan ni ngöka jändrän diankakäre kän.

Erere arato, ma rün amne ma meye mika ütiäre jae. *Exodo 20.12-16; Deuteronomio 5.16-20*  
Ye abko Kukwe Biani Ngöböökwe Moiséye nuendre nie kore, erere makwe mikadre täte jökrä, niebare kwe ie.

<sup>20</sup> Ni yekwe niebare mda Jesuye:

Dirikä, makwe kukwe nini, ye ti nämane bati ngäbäkrere angwane, ti nikani mike täte jökrä abti kä nüke tie mtare, niebare kwe ie.

<sup>21</sup> Niara namani ruentari tare kri Jesuye, käkwe mikani ñäräre, bti niebare kwe ie:

Jändrän tä keteti nuendre mae. Jändrän tä makwe ye erere nän rürümoine jökrä, bti makwe ngwian ye dräi ni bobre bobrebtì angwane, ma rabadi jändrän ütiäre kri bkäne kabre kä käinbtì sete. Makwe jändrän rürümoin ünän jökrä kore, bti ma jata ti jiebti. Abko kore se, niebare Jesukwe ie.

<sup>22</sup> Yebtä ni ye moto namani ulire Jesu kukwei nuare, ñobtä ñan angwane niara abko jändrän bkäne kabre krübäte, aisetetomo nötaninte jändrän kwe kwe ye jiebti amne moto namani ulire, ben nikaninta.

<sup>23</sup> Nikaninta angwane, Jesukwe nitre ja tötitaka ben mikani ñäräre, bti niebare kwe ietre:

Ni jändrän bkänkä krikri ye käkwe ja mikadre bobre Ngöböbtä, Ngöböökwe gobrandre bti abko tare krübäte kräke, niebare kwe.

<sup>24</sup> Kukwe niebare Jesukwe, yebtä nitre ja tötitaka ben namani töbikë kri, ñobtä ñan angwane ni jändrän bkänkä kri nämane nüne metre Ngöbö ngwärekri, nämane nütüre. Ye aisetetomo Jesukwe niebareta mda ietre:

Ti mräkä tikwe, ni ye btä Ngöböta gobrane, yebe ketetibe tare krübäte ni jändrän bkänkä krikri neme ketetibe. <sup>25</sup> Aku okwä chi, yete ta kameo krikri ye ara rikadre nuäre, akwa nitre jändrän bkänkä kri ye käkwe ja mikadre bobre Ngöböbtä, Ngöböökwe gobrandre bti, ye abko bäri tare kräke.

<sup>26</sup> Kukwe yebtä bäri nitre ja tötitaka Jesube ñan töi namani krütare mda, käkwe niebare:

ጀNi jändrän bkäne kri ñan rabadre dianintari nini makwe, se nire abko rabadi dianintari amarebtì se? namanintre niere jae kwärikwäri.\*

<sup>27</sup> Abtä Jesukwe mikani ñäräre, bti niebareta kwe ietre:

Mun kä nebtä, ye kräke abko kukwe ye tare, akwa ñakare Ngöbökrä, ñobtä ñan angwane Ngöbö abko kräke jändrän ñakare tare jire chi, niebare Jesukwe.

<sup>28</sup> Jötrö ngwarbe Pedrokwé niebare mda ie:

Nunkwe jändrän jökrä mikaninte, bti nunta näin ma jiebti, ḡse abko Ngöböökwe dre biandi ütiäre nunye? niebare kwe Jesuye:

<sup>29</sup> Jesukwe niebare mda ie:

---

\* <sup>10:26</sup> Jesu näire abko ni ngwian bkäne kri abko nämane ngwian bkäne, ñobtä ñan angwane Ngöbö nämane ja di bien ietre, aisetetomo bäri Ngöbö kukwe muko, aisetetomo rabadre dianintari käne, nitre israelita nämane nütüre, aisetetomo nitre ja tötitaka Jesube abko ñan töi namani krütare Jesu kukweibtä.

Ti bike kukwe era erere niere munye abko krörö: Nänbtä ti jiebti amne Ngöbö kukwe kuin kابتä ngäbti, nire nire käkwe ju mikaninte o etbakantre o ngwai mikaninte kwe, erere arato meye o rün o ngäbriänkä o kä kwe erere mikaninte jökrä kwe nänbtä ti jiebti, nitre ye abko, ie Ngöbökwе jändrän biandi gre ketarike rike bärı mda amne Ngöbökwе mikadi nüne kärekäre jabe arato. <sup>30</sup> Nitre ye tä nüne kä nebtä angwane abko ie Ngöbökwе jändrän biandi gre ketarike rike bärı mda abko krörö: Rabadi ju bkäne bärı kabre mda. Erere arato, etba btä ngwai rabadi bärı mda kwe. Arato meye, ngäbriänkä rabadi kwati kwe. Arato kä sribikrä biandi bärı kabre kwe ie. Arato ja tare nikadi kwe tikrä, akwa kä jatadi mrä angwane, nünandi kärekäre Ngöböbe kä käinbtı kwe. <sup>31</sup> Akwa ni kwati tuen bärı ütiäte ütiäte kä ne ngwane, ye abko rabadi ütiäte ñakare Ngöbö ngwärekri; akwa ni kwati tuen ngwarbe, ütiäte ñakare kä ne ngwane, ye abko rabadi bärı ütiäte Ngöbö ngwärekri sete. Abko kore se, niebare Jesukwe nitre ja töitikaka benye.

*Jesu müre ketadi abko niebare bämäkäre kwe*  
*(Mateo 20.17-19; Lucas 18.31-34)*

<sup>32</sup> Abti Jesu nämane näin juta Jerusalén kukwäre angwane, nikani bärı mente nitre ja töitikaka ben käne. Angwane nitre ja töitikaka ben ñan töi namani krütare Jesubtä angwane, ni mda mda nämane näin jiebti köre, abkobtä kä jürä namani. Te Jesukwe nitre ja töitikaka ben ni jätäbti nibu käräbareta mda kaibe mento, bti dre dre rakadikä btä abko nikani niere jökrä ietre krörö:

<sup>33</sup> Mtare nita näin Jerusalén kukwäre. Ni näin nebe Jerusalén ye känti ti Ni Kä Nebtä Ngobo ne kitadi ngise nitre blitaka Ngöböbe ni mda mda diäre dänkienye amne Kukwe Biani Ngöbökwе Moiséye dirikätre ye. Niaratre ye abko käkwe ti kitadi ngise müre ketadre amne, nitre romanobo ñakare israelitare abko ie ti kitadi ngise. <sup>34</sup> Niaratre käkwe ti mikadi yakrä kri jae, käli kitadi tibtä kwetre amne ti kwata metadi krübäte kwetre. Yebti ti müre ketadi kwetre, akwa köbömäkäre angwane, ti rükadita nire. Abko kore se, niebare Jesukwe nitre ja töitikaka benye.

*Santiago btä Juan tö namani rabai gobrane siba Jesube*  
*(Mateo 20.20-28)*

<sup>35</sup> Yebti Zebedeo ngäbriänkä nibu Santiago btä Juan namani bike kri, käkwe krötabare Jesu ken, bti niebare kwetre ie:

Dirikä, nun tö jändrän ribei mae abko erere makwe nuendre, ie nun tö nibi abko nun ki kärere mae, niebare kwetre Jesuye.

<sup>36</sup> Jesukwe niebare mda ietre:

¿Dre nuendre tikwe munkrä, ie mun tö nibi amarebti yere? niebare kwe ietre.

<sup>37</sup> Niaratrekwe niebare mda Jesuye:

Ma rabadi gobrane kri ja dijenbtı ni jökrä ngwärekri, ye ngwane makwe nun mika bärı ütiäte, käkwe nun mika täkänintbe iti ja küde ruenkri amne iti ja küde ngeberekri abko nun tö ribei mae, niebare kwetre ie.

<sup>38</sup> Abtä Jesukwe niebare mda Zebedeo ngobo nibu ye:

¡Jo! Munta kukwe tare krübäte ribere tie gare ñakare jire chi munye. ¿Tikwe ja tare nikadi kri krübäte, ye kwrere munta biare ja tare nike siba ya? niebare kwe ietre.

<sup>39</sup> Jänri! niebare kwetre Jesuye.

Jesukwe niebare mda ietre:

Munkwe ja tare nikadi kri ti kwrere arato, <sup>40</sup> akwa nire rabadre täkänintbe ti küde ruenkri amne nire rabadre ti küde ngeberekri, ye abko ñan tä ti kisete, akwa tä Ngöbö kisete. Ye aise te nire nire kräke kä ye tä ükaninte ti Rünkwe abko erere ie biandi kwe, aise te ti ñan raba bien munye. Abko kore se, niebare Jesukwe Santiagoye btä Juanye.

<sup>41</sup> Jesu nämane blite kore, ye ni mda mda ja töitikaka Jesube käkwe kukwe ye gani angwane, moto namani romon Santiagokrä btä Juankrä. <sup>42</sup> Abtä Jesukwe käräbare, bti nikani niere ietre:

Nitre ñakare israelitare käta gobrane angwane, tätre kukwe miketbe tare ni mda mda mikakäre ja ngoto täni. Erere arato, nitre ütiäte krikri ñakare israelitare abko ni mda

mdakwe mikadre ütiäte jae, abkokäre tätre bike krikri, ye abko gare kuin munye. <sup>43</sup> Akwa mun ja töitikaka tibe, ye ngätäite abko ñan rabadre bare jire chi kore, aisetu mun ngätäite abko kukwe rabadre bär jene abko krörö: Nire nire tö rabai bäri ütiäte kri mun ngätäite ye abko käkwe sribidre ni bobre kwrere ni mda mdakrä <sup>44</sup> amne, nire nire mun ngätäite tö rabai bäri käne jäandrän jökräbtä, ni ye abko rabadre ni klabore kwrere ni mda mdakrä. <sup>45</sup> Munkwe nünandre kore, ñobtä ñan angwane ti, Ni Kä Nebtä Ngobo ñan jatani ni mda mda mikakäre sribire jakrä, akwa ti jatani sribikäre ni mda mdakrä amne ti jatani ja mike müre ketadre ni kwati kökatarikäre Ngöbökrä. Abko kore se, niebare Jesukwe ietre.

*Ni okwä kä drünente abko Jesukwe mikaninta kuinta*  
(Mateo 20.29-34; Lucas 18.35-43)

<sup>46</sup> Yebti Jesu nükani juta Jericóte nitre ja töitikaka benbe, nikani ta angwane, ni mda mda nikani kwati jiebti arato nitre ja töitikaka benbe. Niara abko nämane näin käne angwane, ni nämane iti abko kädian nämane Bartimeo (ne abko Timeo ngobo nieta) abko okwä kä drünente, aisetu nämane täkänintbe jibta ngwian kärere jakrä. <sup>47</sup> Jesu Nazarebo jatani ta gani kwe angwane, namani ngrente ja dibti krörö jite yete Jesuye:

¡Jesu, jrei David tukwe mräkä, ti ngwen ruentari tare jae! namani niere jite.

<sup>48</sup> Ni kwati namani kada ketamna ie akwa, niara namani ngwänenkä bäri krikri mda, kä namani niere:

¡Jrei David tukwe mräkä, ti ngwen ruentari tare jae! namani niere bär mda kore.

<sup>49</sup> Abtä Jesu namani nünaninkä käkwe niebare:

Ni ye kärere munkwe, niebare kwe.

Erere ni mdakwe niebare ni okwä kä ikote yeye:

Jesuta ma kärere, aisetu kä ngwen nuäre jabta. Näin krö. Brän jötrö känti, niebare kwetre ie.

<sup>50</sup> Ye btäräbe, ni okwä kä drünente ye käkwe ja täkäninte känta, tö namani näin jötrö, aisetu dän nga ötati kitani temen kwe, bti nikani nebe Jesu ken. <sup>51</sup> Angwane Jesukwe niebare ie:

Tikwe dre nuendre makrä, ie ma tö nibi, niebare kwe ie.

Ni ye käkwe niebare mda Jesuye:

Ti Dänkien, kä rabadre tuen tie, ie ti tö nibi, niebare kwe.

<sup>52</sup> Jesukwe niebare mda ie:

Ma nibi tödeke kwtibe Ngöböbti, ye köböire ma okwä nibirate kuin, aisetu nänta, niebare Jesukwe ie.

Ye btäräbe kä namani tuen kuin jökrä ie, bti nikani siba Jesube.

## 11

*Jesu nikani nebe Jerusalén*  
(Mateo 21.1-11; Lucas 19.28-40; Juan 12.12-19)

<sup>1</sup> Bti Jesu btä nitre ja töitikaka ben nükana ja ken Jerusalén angwane, ni namani juta Betania amne juta Betfagé känti Ngitio Olibobtä. Ye känti, Jesukwe nitre ja töitikaka ben juani nibu, <sup>2</sup> käkwe niebare ietre:

Juta tuen käntime ni ngware ta. Se känti mun näin. Mun raba yete angwane, buro ngäbäli näkwita ngämi kwan mäkäninte munye, ye tikate munkwe, bti mun jata ngwena tie. <sup>3</sup> Akwa ¿Ñobtä mutta tikete? nie munye angwane, munkwe nie krörö ietre: Ni Dänkien tö nibi ie, aisetu nun bike nikken ngwena, akwa gwängwarbe juandita kwe munkrä, munkwe nie kore, niebare Jesukwe ietre.

<sup>4</sup> Erere nikanintre angwane, buro nämane mäkäninte jukwebtä jite, btä namanintre abko tikaninte kwetre. <sup>5</sup> Abtä ni ruäre nämane yete käkwe ñäkäbare krörö ietre:

¿Mutta dre nuene yete amarebti yere? ¿Nirekwe buro ye tikatemna munye, amarebti mutta tikete yere? niebare kwetre ietre.

<sup>6</sup> Jesukwe ño niemnabare ietre, erere niebare kwetre, aisetu buro tuanimetre ngwian-dre ietre. <sup>7</sup> Nikanintre buro ngwena, nükani nebe Jesu känti angwane, dän jakwe mikani

ötati buro ngäbäli ye tröbti kwetre ja täkräre Jesuye, bti Jesu nakwani buro yebti, bti nikani mda Jerusalén. <sup>8</sup> Ye ngwane ni kwati namani Jesu ngibiare jite, käkwe dän jakwe metaninte ji ngrabare temen dikakakrä Jesuye. Ni ruäre abko käkwe kriküde tikaninkä Jerusalén bäre temen abko namani mike ji ngrabare temen dikakakrä Jesuye kakäre ngäbti jrei kwrere. <sup>9</sup> Angwane nitre nämane näin ruäre Jesu känenkri amne ruäre abko nämane näin Jesu jiebti, ye abko namani ngrente ja dibti, kä namani niere krörö:  
¡Hosana! ¡Ari Ngöbö käkitekä gware jökrä!

Ni ne kite ni Dänkien Ngöbö käbti.

Ma ye aibe raba mikani ütiäte.

<sup>10</sup> Ni mräkä jrei David nämane gobrane kira, ye kwrere Ngöböökwe ni ne mikadi gobrane ni ngätäite nete.

¡Hosana! ¡Ari Ngöbö kri kä käinbti käkitekä bari krikri!

*Salmos 118.25-26*

abko namani ñäke kore Jesu ngäbti.

<sup>11</sup> Jesu namani Jerusalén angwane, nikani ju blitakrä Ngöböbe känti angwane, mikani ñäräre kuin jökrä bäre ta kwe, bti kä jatanina dere, aise te nikantia nitre ja töitikaka ni jätabti nibu yebe nebebe ruta Betania kibiakäre yete.

### *Jesukwe ñäkäbare higokrieye*

(Mateo 21.18-19)

<sup>12</sup> Abti jändrinane Jesu nämane Betania, nikantia Jerusalén angwane, mrö namani ie,

<sup>13</sup> nikrabare kwe angwane, higokrie abko kä namani tuen mobe ie se kwrere. Higokrie ye abko ngwä nämanena, namani nütüre, aise te nikani mike ñäräre btä. Namani känti angwane, higokrie ye ngwä rabadre abko käi ngämi, aise te ngwä ñakare btä angwane, kä aibe kabre btä. <sup>14</sup> Abtä Jesukwe ñäkäbare tare higokrie yeye:

Ma ñan ngwä raba jire mda kwetadre ni mdaye, niebare kwe higokrie yeye nitre ja töitikaka ben okwäbti.

Bti nikantia janknu ji ngrabare Jerusalén.

### *Jesukwe nitre juanintari ju blitakrä Ngöböbe känti*

(Mateo 21.12-17; Lucas 19.45-48; Juan 2.13-22)

<sup>15</sup> Nükani Jerusalén angwane, nikantia nebe ju blitakrä Ngöböbe känti. Ju bäre temen nitre nämane jändrä rürümoiné\* yete amne ruäre abko nämane jändrä kökö abko Jesukwe juanintari jökrä mento. Erere arato, nitre nämane ngwian kwite ni mda mdakrä abko kän Jesukwe mesa kwitaninkä temen se kwrere amne ütü rürümoinikä kwe ja täkrä nämane, ye abko Jesukwe kwitaninkä jökrä temen se kwrere arato. <sup>16</sup> Bti nire nire tö namani jändrä ngwiain ju blitakrä Ngöböbe känti, ye abko Jesu ñan namani tuemetre nüke jire chi kä ye känti, kä ngibiakäre deme Ngöbökrä.

<sup>17</sup> Yebti Jesu nikani dirire krörö mda nitre ju blitakrä Ngöböbe dänkientre rüere, käkwe niebare:

Ngöbö Kukwei tä tikani krörö:

Ju tikwe ne abra tä blitakrä tibe nitre nünanka kä jökräbti kräke, *Isaías 56.7*  
nieta Ngöböökwe ja Kukweibä. Akwa mun abko tä ju blitakrä Ngöböbe ne mike nitre gokä jue kwrere. Abko kore se, niebare Jesukwe.

<sup>18</sup> Jesu namani dirire bá jene abko namani tuen kuin ni jökräye, aise te ñan töi namani krütare Jesu kukweibä. Ye mden kisete Jesu jürä namani nitre blitaka Ngöböbe ni mda mda diäre dänkientre yebta amne Kukwe Biani Ngöböökwe Moiséye dirikätre, yebta Jesu jürä namani arato, aise te namani ji känen jae Jesu kämikakäre. <sup>19</sup> Yebti kä jatani dere angwane, Jesu btä nitre ja töitikaka ben nikantia ruta Jerusalén bäre mentokwäre.

### *Nikwe tödekadre kwatibe Ngöböbti abko Jesukwe diribare higo kriebtä*

(Mateo 21.20-22)

\* 11:15 jändrä rürümoiné. Nitre israelita nünanka ñakare ruta Jerusalén nükani Jerusalén jändrä biankäre Ngöböye angwane, ñan nükani obeja, ütü amne nbi kwe kwe ngwena kukwakrä, akwa nämane kökö Jerusalén yete ju blitakrä Ngöböbe känti.

<sup>20</sup> Yebti jändrinane Jesu nikaninta dekä angwane, higokrie ngwä ñakare, ye namanina nötare jökrä nükebe dobote temen. <sup>21</sup> Higokrie, ie Jesukwe ñäkäbare nitre ja töitikaka ben okwäbti ye nükaninta töreta Pedroye, kákwe niebare Jesuye:

¡Jo! Dirikä, higokrie ie makwe ñäkäba jändrin, ye nibira nötare jökrä nükebe dobote temen tuen, niebare kwe ie.

<sup>22</sup> Abtä Jesukwe niebare mda ietre:

Ngöbö di tärä jändrän jire jökrä nuenkrä, yebti munkwe tödeka kwatibe, ye ngwane mun rabadre kukwe nuene jire jökrä ti kwrrere. <sup>23</sup> Ti bike kukwe era erere niere munye abko krörö: Nirekwe niedre ngitio nokoye: Ja denkä mento yete. Ma rika mrrente, niedre kwe ngitio nokoye, tödekare kwärä Ngöböbti amne Ngöbö di tärä sribi ye nuendre, ye munkwe mikadre ngwarbe ñakare jae angwane, mun rabadre ñäke kore ngitioye angwane, ye erere rabadre bare munye. <sup>24</sup> Ne aisetet, dre dre munkwe kärädre Ngöböye, erere biandi kwe munye, bti munkwe tödekadre kwatibe kore, ne ngwane Ngöböökwe biandi munye.

<sup>25</sup> Mdakäre abko, mun rika blite Ngöböbe angwane, ni mdakwe kukwe nuenbare blo munbtä, ye töre käre munye btä mun moto romon kräke, ye ngwane kukwe ye käikwitaka jabti munkwe angwane, mun Rün kä käinbti kákwe mun ngite niara rüere ye diandrekä jire jökrä munbtä. <sup>26</sup> [Akwa ni mdakwe kukwe nuenbare blo munbtä, ye töre käre munye, btä mun moto romon kräke, ye munkwe ñan käikwitadrekä jabti angwane, mun Rün kä käinbti kákwe mun ngite niara rüere ye ñan diandrekä munbtä arato. Abko kore se, niebare Jesukwe nitre ja töitikaka benye.]†

*Nire diebti Jesu nämane sribire abko ngwianintari ie  
(Mateo 21.23-27; Lucas 20.1-8)*

<sup>27</sup> Yebti Jesu nikani janknu nebe Jerusalén. Nikani dikekä ju blitakrä Ngöböbe bäre temen angwane, ni blitaka Ngöböbe ni mda mda diäre dänkientre btä Kukwe Biani Ngöböökwe Moiséye dirikätre, arato nitre unbre ji dokwäte kákwe krötabare Jesu ken, <sup>28</sup> kákwe niebare ie:

¿Nirekwe ma mikani sribi nuene kore amne nire diebti mata kukwe nuene kore nete? niebare kwetre Jesuye.

<sup>29-30</sup> Angwane Jesukwe niebare mda ietre:

Ti bike kukwe ngwentari kwati arato munye. ¿Nirekwe Juan Bautista juani ni ngökö ñöte? ¿Ngöböökwe juani ya o ni kä nebtäkwe mikani sribire ya? Ye niere tie munkwe. Nirekwe juani, ye munkwe niedi tie ne ngwane, nire diebti titi sribi ne nuene abko tikwe niedi munye arato, niebare kwe ietre.

<sup>31</sup> Yebtä abko nikani blite jabe kwärikwäri, kä namani niere krörö: Ngöböökwe juani nikwe niedre ie angwane, niarakwe niedre krörö mda: Ngöböökwe juani mutta niere, ¿se ñobtä abko munkwe ñan kukwei mikani era jae? niedre kwe nie. <sup>32</sup> Akwa, ni kä nebtäkwe mikani, ni ñan rabadre niere jire chi ie, aisetet nikwe ño niedre ie ruen, namanintre niere kore jae kwärikväri.

Niaratre kákwe blitabare kore, ñobtä ñan angwane Juan abko ni Ngöbö kukwei niekä era metre ni jökrä nämane mike era. Mden kisete ni mdakwe juani niedre kwetre angwane, ni jökrä rabadre ja rüere ben abko jürä namani btä, aisetet ño niedre kwetre ñan namani nüke gare ietre. <sup>33</sup> Abtä niebare krörö kwetre Jesuye:

Nirekwe Juan juani, ye gare ñakare nunye, niebare kwetre.

Angwane Jesukwe niebare mda ietre:

Kore ne ngwane, nirekwe ja di biani tie sribi ne nuenkäre abko tikwe ñan niedre munye arato. Abko kore se, niebare kwe ietre.

† 11:26 Kukweta tikani corcheta ngätäite abko ñan tä tikani manuscrito bari kuinkuin btä.

## 12

*Nitre ji dokwäte, btä Jesukwe kukwe bä mikani  
(Mateo 21.33-46; Lucas 20.9-19)*

<sup>1</sup> Yebti Jesu nikani kukwe bä mike krörö mda ietre: Bati ni nämane iti, kákwe uba nurai nökani, bti ki mikani kwe amne kä ükaninte biare uba ñöni ngwäre kwe. Ju mikani nura ngibiatikä kräke kwe, bti biani kwe ni mda mdaye sribikrä. Kä biani sribikrä kwe abko ütiäre uba doi biandreta ruäre ie. Yebti nikani kä mdabti. <sup>2</sup> Abti uba ngwä ötadre abko käi nükani angwane, sribikä kákwe uba biandreta ruäre kä bkänkäye ye abko kä bkänkä kákwe sribikä kwe juani iti tuenta jakrä. <sup>3</sup> Akwa ni juani kä bkänkäkwe ye nikani nebe angwane, sribikätre ubabtä ye ie neketaninte, nikani mete ja ñäte kwäräkwärä se kwrere, bti juanintarita kwetre. Nin uba doi biani jire chi kwetre kä ütiäre, bti juanintarita kise tökare kwetre. <sup>4</sup> Yebti kä bkänkä kákwe sribikä mdara jire juani uba tuenta ruäre jakrä akwa, ni ye neketaninte sribikäye, metani jökrä dokwäkäte kwetre, bti ñäkäbare diän kwetre ie, bti nikaninta ngwarbe arato. <sup>5</sup> Yebti abko, kä bkänkä kákwe sribikä mdara jire juani abko müre ketani sribikätre ja ñäte arato. Abtä niarakwe sribikä mda mda juani kwati mda uba doi tuen jae kä ütiäre, akwa neketaninte sribikätre, nikani kwata mete kwäräkwärä se kwrere, ruäre abko müre ketani kwetre, akwa nin uba doi biani jire kwetre ietre.

<sup>6</sup> Abtä mrä angwane, ni kä bkänkä, ie ni namanina itibe juandre uba doi tuen jakrä. Ye abko odoi itibe tare kri kwe aibe namani ie. Namani nütüre: Ti odoi ne aibe abko mikadi ütiäre sribikätre, aisetet ti bike juen, namani nütüre. Erere juani kwe. <sup>7</sup> Akwa kä bkänkä odoi nikani ngitiekä rün käite angwane, sribikätre ye kákwe niebare jae kwäräkwäri:

Ni se abko rabadi jäandrän rünkwe bkäne jökrä, aisetet ari kämike amne ni rabadi kä ne bkäne jökrä, niebare kwetre.

<sup>8</sup> Ye erere bkänä, ni kä bkänkä odoi itibe ye neketaninte sribikätre, müre ketani kwetre, bti ngwäkä kitankä kä ye bäre mento kwetre. Ne ngörä.

<sup>9</sup> ¿Ne ngwane, uba bkänkä kákwe dre nuendre sribikätre käme yebtä raba ruen munye? Niara rikadre, kákwe sribikätre ye kämikadre jökrä, bti uba grä ye biandre ni mda mdaye kwe sribikrä. Abko kore se, niebare Jesukwe.

<sup>10-11</sup> Bti Jesukwe ja bä mikani já kwrere amne nitre dirikä krikri abko bä mikani ju mikaka kwrere, kákwe niebare ietre:

Ngöbö Kukwei käta niere krörö gare munye, raba ruen tie:  
Já ütiäre kri ju mikakrä metre abko nitre ju mikaka kákwe kitankä, akwa já ye abko ni Dänkien kákwe mikani bäri ütiäre ju mikakrä metre.

Ye abko namani tuen bäri nuäre nie,  
abko nieta kore Ngöbö Kukweibtä, niebare Jesukwe ietre.

*Salmos 118.22-23*

<sup>12</sup> Jesukwe kukwe bä mikani, ye abko nitre dänkien krikri btä dirikätre krikri yebtä matani tare, ñobtä ñan angwane Jesukwe niaratré bä mikani sribikätre käme ye kwrere abko gani kwetre jabtä. Abtä tö namani Jesu kitai ngite, akwa ni mda mda jürä namani btä, aisetet kä mikaninkä Jesubtä yete kwetre, nikaninta mentokwäre.

*Ja ütiä biandre gobranye ya, ñakare ya  
(Mateo 22.15-22; Lucas 20.20-26)*

<sup>13</sup> Abti Jesukwe ñäkädre blo emperador César rüere abtä kitadre ngise, ye abko nitre dirikä krikri btä nitre dänkin krikri tö namani, abkokäre nitre bariseo btä nitre reketaka jrei Herodekri juani kwetre ja gaen Jesube. <sup>14</sup> Erere nikanintre, namani Jesu känti angwane, niebare kwetre ie:

Dirikä, mata kukwe era erere niere, ye gare kuin nunye. Ni mda mda tä ño niere ma rüere diribtä kore, ye abko ñakare ütiäre makrä, ñobtä ñan angwane ñan mata blite ni mda mda moto mikakäre nuäre, akwa ji Ngöbökwé abko dirita era metre makwe, ye garera nie. ¿Akwa emperador romanobo César abko ie nunkwe ja ütiä biandre ye abko dbe ya, ñakare ya niere nunye? niebare kwetre Jesuye.

**15** Akwa namanintre bike moto kuin abko ganina btätre Jesukwe. Abtä niebare mda kwe ietre:

¿Se ñobtä tikwe ja dokwä mikadre kö okwáte au, abkokäre mun kite kukwe ngwentari kore tie ye? Ngwianta munkwe, ye ngwen kunti tuadre tie, niebare Jesukwe ietre.

**16** Ye erere bkänä, ngwian denario biani kwetre Jesuye angwane, Jesukwe niebare mda ietre:

¿Nire bä amne nire käi tä tikani ngwian nebtä? niebare kwe.

Niaratrekwe niebare mda:

Emperador César bä amne käi tä btä, niebare kore kwetre Jesuye.

**17** Abtä Jesukwe niebare mda ietre:

Jändrän emperadorekwe erere munkwe bian emperadoreye amne jändrän Ngöbökrä erere munkwe bian Ngöböye. Abko kore se, niebare kwe.

Ye kwrere Jesukwe ja kitani ngite ñakare Ngöbö rüere amne César rüere, akwa kukwe niebare kwe abko bäri nuäre btä bäri metre aisetet, nitre bariseo btä nitre reketaka Herodekri ñan töi namani krütare Jesubtä.

*Ni krütani rükadreta nire ya abko ngwianintari Jesuye*

(Mateo 22.23-33; Lucas 20.27-40)

**18** Yebti nitre saduseo nikani ruäre ja tuakäre Jesube. Nitre saduseo ye abko ni krütanikrütani mikadreta nire Ngöbökrwe abko ñan nämane mike era, aisetet jatani kukwe ngwentari Jesuye, käkwe niebare ie:

**19** Dirikä, Ngöbökrwe tikamna krörö täräbtä nunkrä Moiséye: Ni iti tädre gure, akwa ngäbäkre ñakare kwetre amne ni ye krütadre angwane, merire rabadre kaibe. Meri ye abko yäräkwe diandre jae mda. Yebti ngäbäkre rabadre kwetre angwane, ngäbäkre ye abko rabadre niara etba krütani ngobo kwrere abko tikani täräbtä Moisékwe nunkrä.

**20** Ne aisetet batit nitre ja etbarebe nämane ni kükü. Nitre ye etba mubai käkwe ja mikani gure, akwa ngäbäkre ngämi nebe kwetre angwane, ni ye krütani. **21** Merire namani ie abko namani yärä mda yebe, akwa nin ngämi ngäbäkrengibaire angwane, brare krütani kän arato. Meri ye namaninta kaibe bobukäre. Namani yärä mdara jire ben, akwa nin ngämi ngäbäkrengibaire angwane, krütani kän arato. **22** Ye kwrere nikani nakenkä janknu ja täritäri. Abti nitre ni kükü ye krütani jökrä meri ye kisete, akwa nin ngäbäkrengibaire jire iti kwe. Abti mrä meri ye krütani abko kukwe nakaninkä kore nieta.

**23** Akwa ni krütani rükadreta nire mata niere, aisetet ni brare ni kükü ben meri ye namani jökrä, abti niaratre ni kükü ye rükadreta nire jökrä angwane, meri ye rabadi nire nän mukore abko niere nunye, niebare kore nitre saduseokwe Jesuye.

**24** Jesukwe niebare mda ietre:

¿Ngöbö Kukwei gare ñakare munye amne Ngöbö di kri gare ñakare munye arato, aisetet mutta töbike ngwarbe blo kore ñan ñan? **25** Tita niere kore, ñobtä ñan angwane ni krütanikrütani rükadita nire angwane, ni merire, brare käkwe ñan ja mikadre gure, ñobtä ñan angwane niaratre abko rabadi angele kä käinbtí kwrere.

**26** Mdakäre abko, ni krütanikrütani rükadreta nire abko btä ti tö nibi kukwe nie munye. Kira, kri chi namani jutra ngitiäte, te Ngöbökrwe blitabare Moisébe: Ti abko Ngöbö Abrahamkwe, Isaakwe amne Jacobokwe, niebare kwe Moiséye abko btä mun tärä ñäke.

**27** Ye abko, Abraham, Isaac amne Jacob krütanina abti Ngöbökrwe niebare kore Moiséye. Ngöbö abko ñan ni ngwákäre Ngöböi akwa Ngöbö abko ni nire Ngöböi gare nie. Ye aisetet Abraham, Isaac amne Jacob tä nüne janknu Ngöbö ngwärekri abko gare nie. Abko kore se, niebare Jesukwe nitre saduseoye.

*Kukwe mden bäri ütiäte mikadre täte*

(Mateo 22.34-40)

**28** Nitre saduseokwe kukwe ngwianintari Jesuye abko, btä Jesu nämane blite angwane, Kukwe Biani Ngöbökrwe Moiséye dirikä nükani kukwe nuen. Jesukwe kukwe kani ngäbäti kuin, Kukwe Biani Ngöbökrwe Moiséye dirikä nämane iti ye okwäbti. Abtä niebare krörö kwe Jesuye:

¿Kukwe biani keta kabre Ngöböökwe Moiséye nuendre nie, ye mden abko bäri ütiäte abko nikwe mikadre täte bäri? niebare kwe Jesuye. <sup>29</sup> Jesukwe niebare mda ie:

Kukwe bäri ütiäte mikadre täte bäri niebare Ngöböökwe Moiséye abko nieta krörö: Mun israelita olo ketete ti kukweiye munkwe. Ni Dänkien Ngöbö abko itibe. Yebti ngöbö ñakare jire mda. <sup>30</sup> Amne ni Dänkien Ngöbö aibe tare ja üai ngöi jökrä, ja töi ngöi jökrä amne ja di ngö jökrä. <sup>31</sup> Kukwe ketebu bäri ütiäte mikadre täte abko krörö: Mata ja tarere au, ye kwrere makwe ni mda mda tare arato. Ye abko, Kukwe Biani Ngöböökwe Moiséye nuendre nie bäri ütiäte nere. Nebti kukwe mda mda tärä nuendre, akwa ñakare bäri ütiäte, niebare Jesukwe ie.

<sup>32</sup> Abtä Kukwe Biani Ngöböökwe Moiséye dirikä kákwe niebare mda Jesuye:

Dirikä, mata kukwe era erere niere metre. Erere makwe kukwe nini, ye abra era bkänä. Ngöbö abko itibe. Nebti ngöbö ñakare jire mda <sup>33</sup> amne niara taredre kri. Arato niarabe taredre käre ja moto kuinbti. Arato niarabe tädre käre ni töibä köbö kwatirekwatire. Erere arato, nikwe sribidre ja di ngöi jökrä niarakrä. Mdakäre abko, nita ja tarere ño au, ye kwrere nikwe ni mda mda taredre, nini makwe, ye abra era bkänä, aisetet Ngöbö ngwärekri ye bäri ütiäte jändrän kämikata kukwakrä Ngöböye ye ngwä. Erere arato, Ngöbö ngwärekri ye bäri ütiäte jändrän jökrä bianta Ngöböye ye ngwä.

<sup>34</sup> Kukwe Biani Ngöböökwe Moiséye dirikä ye kákwe Jesu kukwe kani ngäbti kuin dikaro namani tuen Jesuye. Abtä niebare mda kwe ie:

Ngöbö kebera nüke gobrane mabtä, nibi tuen tie, niebare Jesukwe ie.

Yebti nitre dirikä krikri, ie nin ja nükani töre mda kukwe ngwentari mda ja gakrä Jesuye.

#### *¿Nirekri Ni Dianinkä Ngöböökwe däredre?*

*(Mateo 22.41-46; Lucas 20.41-44)*

<sup>35</sup> Yebti ju blitakrä Ngöböbe ye bäre temen Jesu nämane dirire angwane, niebare kwe ni kwatiye:

Ni Dianinkä Ngöböökwe abko däredre jrei David tukwe kri nieta abko Kukwe Biani Ngöböökwe Moiséye dirikätre käta niere. Ye ñobtä abko munta niere kore abko ti tö ngwiaintari. <sup>36</sup> ¿Ye ñobtä abko Ngöbö Üai Deme köböire Davikwe “ti Dänkien” niebare Ni Dianinkä Ngöböökwe yebtä? Ni ngätäite nete ni ñakare jire iti käta “ti dänkien” niere ngäbäkre kweye, akwa David abko kákwe niebare krörö:

Ti Dänkien Ngöbö kákwe nieba ti Dänkienye:

Kä bäri ütiäte kri ti küde ruenkri, ne känti jakwe täke nete.

Ye känti ma raba abti tikwe ma rüe mikadi jökrä ma ngoto täni, *Salmos 110.1* niebare Davikwe Ni Dianinkä Ngöböökwe yebtä. <sup>37</sup> David arajire kákwe ja Dänkien niebare Ni Dianinkä Ngöböökwebtä. ¿Se ñobtä abko Ni Dianinkä Ngöböökwe abko jatadre Davikri nieta munkwe se, ñobtä ñan angwane nita “Dänkien” niere ñakare jire ni mräkä bäri mrä nikrä yeye? niebare Jesukwe.

Jesukwe diribare kore, ye ni nämane kwati olote namani ngitie nuäre, aisetet kä namani nuäre btä Jesu kukwei nuare.

#### *Jesukwe ni mikani mokre Kukwe Biani Ngöböökwe Moiséye dirikätre ngäniene*

*(Mateo 23.1-36; Lucas 11.37-54; 20.45-47)*

<sup>38</sup> Jesu nämane dirire angwane niebare kwe:

Kukwe Biani Ngöböökwe Moiséye dirikätre, ye ngäniene munkwe ja ngibia kuin, ñobtä ñan angwane niaratretä tä dän nga ütiäte kri kite jabtä, bti ni jökrä kákwe köbö ngwiandretari käne ietre kä jändrän rürümoinkrä ye käntita temen, ie töta nebe. <sup>39</sup> Erere arato, ja täkrä ni ütiäte ütiäte kräke sinagogate, känti töta nebe rabai täkänintbe amne ja täkrä ni ütiäte ütiäte kräke, känti tätre nebe täkänintbe. Erere arato, niaratretä nübaita bietabtä angwane, ja täkrä ni ütiäte ütiäte kräke, känti tö täkäi temen.

<sup>40</sup> Erere arato, meri kän brare krütani abko kän tätre ju denkä, abti tätre bike kuin, käta blite raire Ngöböbe, akwa yebtä Ngöböökwe mikadi ja tare nike krübäte, aisetet munkwe

ja ngibia kuin Kukwe Biani Ngöböökwe Moiséye dirikätre ngäniene. Abko kore se, niebare Jesukwe ietre.

*Meri bobre käkwe sentabo ngörä kubu biani Ngöbökrä  
(Lucas 21.1-4)*

<sup>41</sup> Yebti ju blitakrä Ngöböbe bäre temen jäandrän dätebare ngwian ükakrörä nämane mikani ngwian biandre Ngöbökrä ngwäre, ye känti Jesu nikani, namani täkänintbe. Angwane ni kwati namani nüke ngwian kite jäandrän ngwian ükakröräte. Erere arato, ni ngwian bkänkä kabrekabre namani nüke kwati, namani ngwian kite kabre yete okwäbti.  
<sup>42</sup> Te batibe meri bobre kän brare krütani abko jatani, käkwe ngwian sentabo kwrere kitani kubube arato kajate Ngöbökrä Jesu okwäbti. <sup>43</sup> Angwane Jesukwe nitre ja töitikaka ben käräbare, bti niebare kwe mda ietre:

Ti bike kukwe era erere niere munye abko krörö: Meri bobre kän brare krütani se käkwe ngwian bini bäri kabre ni ngwian bkäne krikri käkwe ngwian kiti kajate Ngöbökrä se ngwä, <sup>44</sup> ñobtä ñan angwane niaratre käta ngwian namaninte ie aibe bien, akwa meri bobre ye abko käkwe ngwian ngörä nünankrä kwe erere bini jökrä, aise te niarakwe ngwian bini bäri kabre. Abko kore se, niebare Jesukwe ietre.

## 13

*Ju blitakrä Ngöböbe juandi ngwarbe, niebare Jesukwe  
(Mateo 24.1-2; Lucas 21.5-6)*

<sup>1</sup> Jesu nämane ju blitakrä Ngöböbe käntita, jatani nikenta angwane ni iti ja töitikaka ben käkwe niebare ie:

Jo! Dirikä, ju krikri be bär nuäre nuäre janknu. Jä krikri ketani jabti jabti tuen, niebare kwe Jesuye.

<sup>2</sup> Jesukwe niebare mda ie:

Ju kuinkuin mun okwä nibi btä, ye abko köbötira jire ju se juandi ngwarbe jire jökrä, aise te jä ketani jabti jabti se juandi jökrä temen, niebare Jesukwe nitre ja töitikaka benye.

*Dre rakadikä kä mrä känenkri  
(Mateo 24.3-28; Lucas 21.7-24; 17.22-24)*

<sup>3</sup> Yebti Jesu nikani ju blitakrä Ngöböbe btä nakri, känti namani täkänintbe Ngitio Olibo bti kain, okwä namani ju blitakrä Ngöböbe kukwäre angwane, Pedro, Santiago, Juan btä Andrés käkwe niebare kaipe ie:

<sup>4</sup> Ju blitakrä Ngöböbe juandi ngwarbe nini makwe, ¿ye abko rakadikä ñongwane nun tö gai? Arato kukwe ye rakadrekä ñongwane amne bär mikadi ño nunye abko makwe niedre nunye, ie nun tö nibi, niebare kwetre Jesuye.

<sup>5</sup> Abtä Jesukwe niebare mda ietre:

Bäri käne abko, nitre ni ngökaka ye ngäniene munkwe ja ngibia kuin, <sup>6</sup> ñobtä ñan angwane ni jatadi kwati ti käbti käkwe niedi krörö: Ti abko Ni Dianinkä Ngöböökwe ara tä nete, niedi kwetre, ye käkwe ni kwati ngökadi.

<sup>7</sup> Mdakäre abko, munkwe kukwe krörö gadi: nitre tädi rüre jabe kwärikwäri nete sete abko gadi munkwe angwane mun ñan rekwtaka, ñobtä ñan angwane kukwe ye rakadikä kore abko erere rabadi nakenkä. Akwa ye ngwane kä mrä ngämi nüke abko raba gare munye, <sup>8</sup> ñobtä ñan angwane juta kwatirekwatire rabadi rüre jabe kwärikväri amne nitre nünanka kä ketareketare te rabadi rüre jabe kwärikväri. Erere arato, dobo rabadi nakaenkä kä ketareketare temen kwäräkwärä amne ni kwati rabadi mrö nika krübäte arato. Akwa ye ngwane abko ja tare nika jatadi krire kena kä nebtä, niebare Jesukwe.

<sup>9</sup> Bti Jesukwe niebareta mda nitre ja töitikaka benye:

Munkwe ñan dikaka okwä kware mun rüe ngätäite, ñobtä ñan angwane nitre israelita käkwe mun kitadi ngise sinagoga yete nitre kritoboreye. Ne känti mun kwata metadi kwetre. Erere arato, jrei kri amne gobran kri ñakare israelita, ye ngwärekri mun jänäin ngite tödekaabtä tibti, akwa ye ngwane abko tikwe dre dre nuenbare abko kräke kä rabadi kuin munye blitakäre tibtä nitre ye ngwärekri, abkokäre mun jänäin ngite.

<sup>10</sup> Angwane kä ne ngämi niken ta, känenkri kukwe kuin tibta, ye rabadi diribare ni kä jökräbtiye angwane batibe ti jatadita. <sup>11</sup> Akwa mun järikadi ngite nitre kritobore ngwärerekri angwane, munkwe dre niedi ja kriere, yebtä munkwe ñan töbika, ñobtä ñan angwane Ngöbö Üai Deme tädi munbe. Mden kisete munkwe ño niedre, ye niarakwe mikadi gare munye, erere munkwe nie ja kriere.

<sup>12-13</sup> Kukwe ye rakahidäkä kore munbtä, ñobtä ñan angwane ni kwati mätä rabadi tibta abko mätä rabadi munbtä tödektä tibti arato. Aisete ni tödekkaka tibti abko etba kwe kákwe kitadi ngise müre ketadre; ngäbäkre tödekkaka tibti abko rün kwe kákwe kitadi ngise müre ketadre tödektä tibti. Erere arato, ngäbäkre kwe rün kwe kitadi ngise müre ketadre tödektä tibti abko rabadi nakenkä kore ja täritäri nitre tödektä tibti yebtä; akwa nire nire tä nüne angwane, ti ñan rükandite ni jökrä ngwärerekri kwe, ni ye abko tikwe dianditari.

<sup>14</sup> Yebti Jesukwe niebareta mda ietre:

Ti bike kukwe nire, btä munkwe töbikadre kri abko krörö: Ni iti ngwarbe käme kákwe jändräni deme Ngöböökwe mikadi ngwarbe jae, btä Ngöbö mätä jatadi tikani Danielikwe abko kä nin te rabadre abko te rabadi. Ni ye kwrere rüka mun okwäbti, ye ngwane abko mun tädre Judeate ye abko gitia mintokwäre. <sup>15</sup> Amne mun mden mden tädre jubti käin\* ye abko ñan rika jändräni tuenta jire chi gwi jae amne mun gitia jirekäbe; <sup>16</sup> amne mun mden mden tädre sribire tirete ye abko ñan rika dän tuenta jire chi gwi jae, akwa mun gitia gwängwarbe jirekäbe. <sup>17</sup> Akwa meri doboko doboko amne meri kwe ngäbäkre kiakia kianbtä, ye abko bobre jakän, ñobtä ñan angwane niaratre ñan raba ngitiye jötrö. <sup>18</sup> Akwa mun gitiadre ye abko ñan rakahidrekä kä ñüre näire abko munkwe ribe Ngöböye, ñobtä ñan angwane tare näin jötrö kä ñüre näire aisete. <sup>19</sup> Munkwe ribe kore Ngöböye, ñobtä ñan angwane Ngöböökwe kä dätebare kena angwane ni kä nebtä ngämi ja tare nike krübäte dikaro abti kä nüke mtare abko erere ja tare nikadi kri krübäte kä ye ngwane. Yebti ñan ja tare nikadreta mda ye kwrere.

<sup>20</sup> Ye abko, Ngöböökwe ñan köbö krötadre jötrö käne ja tare nikakrä, ye ngwane ni ñan rabadre dianintari jire iti, akwa ni dianinkä jakrä Ngöböökwe abko Ngöböta tarere, aisete köbö ja tare nikakrä krötadi jötrö kwe.

<sup>21</sup> Ne aisete, kä ye ngwane kukwe raba nakenkä kore angwane, nane ni mdakwe niedre krörö munye: ¡Ni Dianinkä Ngöböökwe abko tä nete tuen! niedi kwe, o ¡Ni Dianinkä Ngöböökwe tä sete tuen! niedre kwe, akwa munkwe ñan kukwei mika era, <sup>22</sup> ñobtä ñan angwane kä ye ngwane ni kwati jatadi ja bä mike Ni Dianinkä Ngöböökwe kwrere amne ni kwati jatadi ja bä mike ni Ngöbö kukwei niekä kwrere. Niaratre kákwe sribi krikri ñan tuabare nuendi kabre bätäkä ngwarbe ni mda mda ngökakäre amne rabadre ni dianinkä jen jakrä Ngöböökwe ara jire ngökö, ne ngwane ngökadre kwetre, akwa ñan rabadi ngökö. <sup>23</sup> Ne aisete kukwe ye ngämi nakenkä, känenkri titi mun mike mokre biare, abtä munkwe ñan dikadrekä okwä kware, niebare Jesukwe nitre ja töitikaka benye.

### Jesukristo jatadita

(Mateo 24.29-35,42,44; Lucas 21.25-36)

<sup>24</sup> Jesukwe niebareta ietre:

Ja tare nikadi kri nini tikwe, yebti ñänä se rötadite amne kä rabadi iko jökrä. Erere arato, sö se ñanträ rabadre mda <sup>25</sup> amne muke käinta se abko rabadi betekä timontimon amne jändräni kä käinbti se abko rabadi grükekä arato. <sup>26</sup> Ye angwane, ti Ni Kä Nebtä Ngobo abko jatadi tuen ja di kri bä nuärebti mütabti kä käinbti sete abko ni jökrä kákwe tuadi. <sup>27</sup> Angwane tikwe angeletre juandi, kákwe ni dianinkä jen jakrä ükadikrö jökrä ketetibe. Ni dianinkä jen jakrä nünanka nindrini, kä driri, sekri, nekri abko ükadikrö jökrä kwe.

<sup>28</sup> Bti Jesukwe niebareta mda:

\* <sup>13:15</sup> tädre jubti käin. Ju nitre israelitare abko kiare bti käin, aisete nuäre dikakrä bti ta.

Mdakäre abko, higokrie btä kukweta nakenkä ño, yebtä munkwe ja töitika abko krörö: Higo küdeta niren mräre mda amne käta nebe mräre btä arato angwane, kä töre tärä kite nüke ja ken abko mutta gaen, <sup>29</sup> ye kwrere arato kukwe nini tikwe ye jata nakenkä jökrä mun okwäbti angwane, ti Ni Kä Nebtä Ngobo nükerate ja ken jukwebtä abko rabara gare munye. <sup>30</sup> Ti bike kukwe era erere niere munye abko krörö: Nitre nünanka kä nebtä ngämi krüte jökrä, ye känenkri kukwe nini tikwe ye erere rakadikä jökrä. <sup>31</sup> Mdakäre abko, kä käinta se btä kä temen ne abko Ngöbökwe gadikä jökrä, angwane rikadi ta, akwa ti kukwei abko rabadi kärekäre.

<sup>32</sup> Akwa ti jatadreta köbö mdente amne ñänä okwä nuái ti jatadreta ye abko gare ñakare jire chi ni mda mdaye, angele kä käinbti ie gare ñakare amne Ngöbö Odei ie gare ñakare arato, akwa Ngöbö ni Rün aibe ie tä gare kaibe.

<sup>33</sup> Ye kwrere arato, ti jatadita ñongwane gare ñakare munye. Mden kisete, munkwe ja mika juto käre ti ngibiare ngäbti amne munkwe blita käre Ngöböbe, <sup>34</sup> ñobtä ñan angwane ti näinta, bti ti jatadita, ye abko rakadikä ño ti bike bä mike krörö munye: Ni iti jatani yäke mente kä mdabti käkwe sribikä kwekwe mikaninte ju ngibiare jakrä, bti sribi biani jene jene kwe ietre angwane, jukwe ngibiaka abko ie ju ngibiamna kuin kwe jakrä. Ni ye namani niara ngibiare ngäbti.

<sup>35</sup> Ye kwrere abko, ti ju bkänkä kwrere käta mun mikete, aisetet munkwe mokre jabti ti ngibiakäre ngäbti, ñobtä ñan angwane mun Dänkien ju bkänkä rükadita dere ya, kä ruäre ya, kä ngwen ja ken dekä ya o kä ngwenbti dekä ya, ñongwane abko gare ñakare jire chi munye. <sup>36</sup> Ye mden kisete, nane batibe ti jatadreta ñongwane abko, ie mun kwan jáme ngwarbe, mden känenkri munkwe ti ngibia ngäbti käre. <sup>37</sup> Munkwe ti ngibia ngäbti tita niere munye, ye ñan mun aibeye tita niere amne ni jökrä käkwe ti ngibiadre ngäbti abkokäre tita niere munye. Abko kore se, niebare Jesukwe.

## 14

*Jesu rüe tö namani kain ngite tiebe  
(Mateo 26.1-5; Lucas 22.1-2; Juan 11.45-53)*

<sup>1</sup> Yebti Pascua \* köböi namanina köbóbube. Pascua köböi angwane abko bieta Te Lebadura Ñakare Bante kweta nämame Ngöbö mikakäre ütiäte nämame bämän kratit angwane, ye känenkri ni blitaka Ngöböbe ni mda mda diäre dänkientre btä Kukwe Biani Ngöbökwe Moiséye dirikätre abko käkwe Jesu kadre ngite müre ketadre ño tiebe abko namanintre ngibiaretari kisere. <sup>2</sup> Akwa nane ni kwati krübäte nämame Jerusalén Pascua köböikrä käkwe rüdre bentre Jesu dokwäre, aisetet Pascua näire ñan nuendre, niaratré namani niere.

*Meri iti käkwe ñö rä bäné kekani Jesubti  
(Mateo 26.6-13; Juan 12.1-8)*

<sup>3</sup> Kä ye ngwane abko, Jesu nämame Betaniate täkänintbe mesabtä mröre ni kädian nämame Simón känti. Jesu ngämi Simón ye miketa kuinta, känenkri kädian nämame lebroso arato abko känti Jesu nämame. Angwane batibe meri nükani iti ñö rä bäné ütiäte kri kädian nämame nardo ngwena jä bä ngwen kädianta alabastro dätebare boteare te. Nardo ye abko ñan nämame mritani jire ñöbe abko meri ye jatani ngwena. Meri ye abko käkwe ñö rä bäné jue tikani, bti kekani kwe Jesu dokwäbti se kwrere. <sup>4</sup> Yebtä ni nämame siba gwi abko ruäre moto namani romon. Abtä namani niere jae kwärikwäri: ¿Se ñobtä meri se tä ñö rä bäné ütiäte kri iente ngwarbe se? <sup>5</sup> Ngwian ganainta bäsí kä kwati jire näre, btä ñö rä bäné se rürümoindre, bti ni bobre bobre die mikadre bä amarebti ininte ngwarbe kwe se, namanintre niere kore jae kwärikväri meri yebtä, bti namani ngren ngren bti.

\* <sup>14:1</sup> Pascua. Nitre israelita käkwe Pascua köböi mikani ütiäte, ñobtä ñan angwane kira nämame ngite kä Egiptoe angwane, Ngöbökwe tikaninte Pascua köböibti. Pascua abko käta “niken bäre ta” niere. Köbö yebtä angele ni kämikaka nikani nitre israelita bäre ta amne kämikani ñakare kwe, aisetet Ngöbökwe köbö Pascua mikamna ütiäte nitre israelitaye.

**6** Abtä Jesukwe niebare mda ietre:

Munkwe ñan meri ne nika. ¿Se ñobtä abko mun nibi nike krübäte dikaro? Meri ne käkwe jändrän kuin nuni tikrä, **7** ñobtä ñan angwane nitre bobre bobre tädi käre mun ngätäite nete, ye abko mun tö rabadre die mikai ñongwane, erere munkwe die mikadre; akwa ti abko ñan tädi kärekäre munbe nete. **8** Ne aisetetä jändrän kuin rabadre bare tikrä meri neye, erere nuni kwe tikrä, ñobtä ñan angwane ñö rä bänne kiri kwe ti ngrabare, yebti abko ti miri juto biare kwe doboi mikadre. **9** Ye abko, ti bike kukwe era erere niere munye abko krörö: Kukwe kuin tibta ye kädriedi mdente mdente erere, ye känti meri ne käkwe jändrän kuin nuni tikrä mtare ne kädriedi arato, aisetetä jändrän kuin nuni meri nekwe, yebtä rükadita töre. Abko kore se, niebare Jesukwe ietre.

*Judakwe Jesu kitani ngise*

(Mateo 26.14-16; Lucas 22.3-6)

**10** Yebti, ni blitaka Ngöböbe ni mda mda diäre dänkientre btä Kukwe Biani Ngöböökwe Moiséye dirikätre abko käkwe Jesu kadre ngite müre ketadre ño tiebe abko namanintre ngibiaretari kisere. Ye ngwane ni ni jätäbti nibu ja tötitaka Jesube abko iti kädian nämane Judas Iscariote abko nikani nitre blitaka Ngöböbe ni mda mda diäre dänkientre känti Jesu kitakäre ngise ietre. **11** Judas nikani Jesu kite ngise gani kwetre angwane, kä namani nuäre btätre, käkwe ngwian bian braibare Judaye, bti Judas nikani. Ye ngwane Judas namani kä kuin ngibiare kisere jae, Jesu kitakäre ngise.

*Jesukwe mröbare mrä nitre ja tötitikaka benbe*

(Mateo 26.17-29; Lucas 22.7-23; Juan 13.21-30; 1 Corintios 11.23-26)

**12** Abti bämän krati lebadura ñakare bante kweta nämane Ngöbö mikakäre ütiäte jae, ye köböl nukaninta kena. Köböl ye näire kordero kämika nämane kwetadre Pascua köböite angwane, nitre ja tötitikaka Jesube käkwe niebare ie:

¿Mrö kwetadre Bieta Pascuakrä ye abko nunkwe sribedre mdente makrä, ie ma tö nibi? niebare kwetre Jesuye.

**13** Abtä nitre nibu ja tötitikaka Jesube, ie Jesukwe niebare:

Mun nän juta Jerusalén sete. Ye känti ni brare tädi iti ñö ngwena kantrate abko rükadi ngätäi munbe ji ngrabare. Ni ye rika mdente gwä, känti mun rika. **14** Mun rika nebe gwi angwane, munkwe nie krörö ju bkänkäye: Dirikäkwe mrö Pascua köböikrä kwetadi nitre ja tötitikaka benbe abkokrä käta ükaninte mdente, ngwiantarimna kwe, munkwe nie kore ie. **15** Angwane ju mikani bobu jabti käin, te kä tädira ükaninte biare mrökrä, känti mun jänain kwe. Ye känti munkwe mrö scribe biare nunkrä. Abko kore se, niebare Jesukwe.

**16** Erere bkänä, nitre nibu ja tötitikaka nikani, namani jutate Jerusalén angwane, Jesukwe kukwe niebare ño ño ietre, erere kwani ietre, känti mrö sribebare kwetre kwetadre Pascuate. **17** Yebti kä jatanina diore dere angwane, Jesu nikani mröre mda nitre ja tötitikaka benbe. **18** Nämane mröre angwane, niebare kwe ietre:

Ti bike kukwe era erere niere munye abko krörö: Mun mrökä tibe ketetibe, ne ngätäite nita iti käkwe ti kitadi ngise ti rüeye gare kuin tie, niebare Jesukwe.

**19** Abtä nitre ja tötitikaka ben namani ulire jökrä batibe, kä namani niere itire itire ja täritäri Jesuye:

¿Tikwe nuendi ya gwari? namani ngwentari itire itire Jesuye.

**20** Abtä Jesukwe niebare mda ietre:

Mun ni jätäbti nibu, ye ngätäite nita iti käta ban mike tibo gware tibe blato kwaitibe te, ye abko käkwe ti kitadi ngise. **21** Akwa ti, Ni Kä Nebtä Ngobo abko müre ketadi ño, ye tä tikani Ngöbö Kukweibtä abko erere rakadikä. ¡Akwa ni ti kitaka ngise abko ñan bobre jakän ya! Ni ye nin däredre näre abko därebare, niebare Jesukwe ietre.

**22** Yebti nämane mröre jökrä angwane, Jesukwe ban diani kunti kisete, käkwe kuin niebare btä Ngöböye, bti ötaninbtä kwe, bti biani kwe nitre ja tötitikaka benye, käkwe niebare ietre:

Ban ne abko ti ngätä ara. Ne kaen ngäbti munkwe, bti munkwe kweta, niebare kwe ietre.

<sup>23</sup> Bti uba döi nämane basote abko Jesukwe diani kisete, bti kuin niebare btä kwe Ngöböye, bti biani kwe ietre. Niaratre jökrä käkwe ñani, <sup>24</sup> bti Jesukwe niebare ietre:

Uba döi ne abko ti därie tikwe ara amne Ngöböökwe kukwe ükadite btin munbe ye abko rabadi bare täte jökrä ti därie nebti. Erere arato, ti därie rimiadite ni kwati kräke.

<sup>25</sup> Mdakäre abko, ti bike kukwe era erere niere munye abko krörö: Ngöböta gobrane ye känti tikwe uba döi btin ñadita, akwa ti ngämi ñaen yete, känenkri tikwe ñan ñadreta jire chi abko ti tö nibi niei munye. Abko kore se, niebare Jesukwe nitre ja töitikaka benye.

*Pedro käkwe Jesu rükandite, niebare Jesukwe  
(Mateo 26.30-35; Lucas 22.31-34; Juan 13.36-38)*

<sup>26</sup> Yebti Jesu btä nitre ja töitikaka ben käkwe ka Salmobtä niebare ünän, bti nikanintre Ngítio Olibobti. <sup>27</sup> Angwane Jesukwe niebare nitre ja töitikaka benye:

Mun jökrä gitiasi iti iti kwäräkwärä tibta mentokwäre gare kuin tie, ñobtä ñan angwane Ngöbö Kukwei käta niere krörö, käta ti bä mike obeja ngibiaka kwrere amne mun abko obeja tikwe kwrere:

Tikwe obeja ngibiaka kämikadi angwane, obeja kwe abko gitiasi kratikrati kwäräkwärä, *Zacarías 13.7*

abko Ngöbö Kukwei tä niere kore munbtä.

<sup>28</sup> Akwa ti müre ketadi, bti ti rükadita nire angwane, ti näin mun ngäbti Galilea, känti ni rabadita ketetibe jökrä, niebare Jesukwe.

<sup>29</sup> Abtä Pedro abko käkwe niebare mda Jesuye:

Ni jökrä käkwe ñan tödekadre mabti abko gitiasi, akwa ti abko ñan gitiadre jire chi mabtä, niebare kwe ie.

<sup>30</sup> Jesukwe niebare mda Pedroye:

Mtare deo, antlan ngämi ngwâne bobu, känenkri ma reketaka tibe abko makwe rükandite bämä jire abko ti tö nibi niei metre mae, niebare kwe Pedroye.

<sup>31</sup> Akwa Pedro abko namani ja kwete janknu Jesube, kä namani niere:

Ti müre ketadre siba mabe akwa ti reketaka mabe, tikwe ñan rükandrete jire chi, Pedro namani niere.

Erere ni mda mda ja töitikaka Jesube namani niere gwaire jökrä Jesuye.

*Jesu nikani blite Ngöböbe Getsemaní  
(Mateo 26.36-46; Lucas 22.39-46)*

<sup>32</sup> Yebti Jesu btä nitre ja töitikaka ben nikani nebe käkä Getsemaní känti angwane, Jesukwe niebare ietre:

Täke temen yete munkwe. Ti bike nikani blite Ngöböbe, niebare kwe ietre.

<sup>33</sup> Yebti Pedro, Santiago btä Juan aibe ngwiani kwe jabe. Angwane Jesu moto jatani ulire amne moto namani bete krübäte ja jiebti, <sup>34</sup> käkwe niebare nitre ja töitikaka ben nimä ye:ye

Ti moto nibi ulire krübäte dikaro tie, aisetet i kebera krüte nibi ruen tie, aisetet mun raba ti ngibiare nete, akwa munkwe ja ngwäteri siba tibe amne munkwe ñan kibia, niebare kwe ietre.

<sup>35</sup> Ye btäräbe Jesu nikani bä mente temen se kwrere, känti namani kitanintbe ngwärere timonkwäre temen angwane, niara müre ketadre ye abko Ngöböökwe diandre niarabti ta abko btä blitabare krörö kwe Ngöböbe:

<sup>36</sup> Tata tikwe, ma raba jäandrän jökrä nuene, aisetet tikwe ja tare nikadre, bti ti müre ketadre, ye ma tö diain ti bäre angwane, makwe dian ti bäre. Akwa ma tö dreye tikrä, ye erere raba bare tibta amne ñan ti töi abko erere rabadre bare, niebare kwe Rün Ngöböye.

<sup>37</sup> Bti nitre mikaninte nimä kwe ja ngibiare, känti nikaninta angwane, nämane kibien kuin jökrä, btä namaninta angwane, niebare kwe Pedroye:

¿Ñänä okwä kratibe abko te kä ñan nü mae ja ngwätere blitakäre Ngöböbe ya? niebare kwe ie.

<sup>38</sup> Bti niebareta kwe ietre:

Diablu jatadi mun nuente ja käne, ye ngwane munkwe ñan ja mikadre ngite, abkokäre munkwe ja ngwätere amne munkwe blita jakrä Ngöböbe, ñobtä ñan angwane mun töi abko

tä biare jändrän kuin nuene, akwa mun di ñakare, aisetet munkwe blita jakrä Ngöböbe, niebare Jesukwe ietre.

<sup>39</sup> Yebti Jesu nikani bliteta bobukäre Ngöböbe angwane, ño niebare käne kwe Ngöböye, ye arabe nikani niereta ja täritäri bobukäre. <sup>40</sup> Yebti nitre nimä ja tötitaka Jesube, ye känti Jesu nikaninta angwane, namani kibien kuin jökrä, ñobtä ñan angwane köbö namani krübäte ietre, aisetet okwä kwata namani neketekäbe jabtä köbö kisete, btä Jesu namaninta angwane, ño niedre kwetre Jesuye ñan namani nüke gare ietre.

<sup>41</sup> Yebti Jesu nikaninta bämäkäre bliteta Ngöböbe. Blitabareta kwe Ngöböbe, bti jatani nüketa angwane, niebare kwe ietre:

¿Mun tä kibien amne mun tä jadüke janknu ya? Munkwe kibianirira dbe. Nitre kukwe kämekäme nuenkä abko kisete ti Ni Kä Nebtä Ngobo ne kitadi ngise ye abko käi nära,

<sup>42</sup> aisetet ni ti kitaka ngise tiebe ti rüeye abko nükera tibtä, aisetet näin krö, bränta, niebare Jesukwe ietre.

### *Jesu kani ngite*

(Mateo 26.47-56; Lucas 22.47-53; Juan 18.2-11)

<sup>43</sup> Jesu nämane blite kore, ye btäräbe ni ja tötitaka ben ni jätäbti nibu, ye ngätäite ni iti kädian nämane Judas Iscariote ye ara jatani nüke Jesu känti. Judas ye abko nämane näin ni kwati jie ngwena. Nitre jatani Judabe ye abko nämane näin ngitra ngwena kisete amne ruäre abko nämane näin krito ngwena kisete. Nitre ye abko nämane näin nitre blitaka Ngöböbe ni mda mda diäre dänkien käbti amne Kukwe Biani Ngöbökwe Moiséye dirikätre ye käbti amne nitre unbre ji dokwäte käbti arato. <sup>44</sup> Angwane Judas, Jesu kitaka ngise ye abko käkwe nitre töi dianina käkwe niebare ietre:

Nire demain tikwe mun okwäbti ye abko Jesu ara, aisetet munkwe niara ye ka ngite. Mun rika ngwena, niebare kwe ietre.

<sup>45</sup> Ye erere bkänä, Judas jatani nüke, ye btäräbe nikani Jesu känti, käkwe niebare krörö ie:

¡Dirikä! niebare kwe.

Bti Jesu demainbare kwe. <sup>46</sup> Angwane nitre jatani Jesu rüere ye käkwe krötani Jesu ken, nakwani btä, käkwe kani ngite. <sup>47</sup> Ye btäräbe ni ja tötitaka Jesube nämane iti käkwe ngitra dianinkä kwatate, bti ni klabore ni blitaka Ngöböbe ni mda mda diäre dänkienkwe ye olo tikaninkä ta kwe ie. <sup>48</sup> Yebti nitre nikani Jesu kaen ngite, ye ie Jesukwe niebare krörö:

¿Ñobtä abko bäsí ni gokä kri krübäte rüere ngitra jäta nikken amne krito jäta nikken, kwrere jire mun kite ngwena ti rüere ti kakäre ngite ye? <sup>49</sup> Käre köbö kwatirekwatire titä dirire ju blitakrä Ngöböbe käntita temen mun ngätäite, akwa mun ñakare ti kaen ngite. Akwa dre dre rakadrekä tibtä tä tikani mekera Ngöbö Kukweibtä abko erere rabadre bare tibtä, abkokäre munta ti kaen ngite mtare, niebare Jesukwe.

<sup>50</sup> Jesukwe ñäkäbare kore, ye btäräbe nitre ja tötitaka ben käkwe kä mikaninkä batibe jökrä btä amne ngitian iiti iti kwäräkwärä amne niaratre käkwe Jesu mikaninte kaibe rüeye.

<sup>51</sup> Jesu jänikani angwane abko, ni batí nämane näin ja mrianinte dän aibe te abko nikani siba Jesu jiebti. Ni ye gani Jesu rüekwe angwane neketaninte ietre, <sup>52</sup> akwa niarakwe dän jabtä tikanintbe, bti ngitian bütiere.

### *Jesu jänikani Sanedrin ngwärekri*

(Mateo 26.57-68; Lucas 22.54-55,63-71; Juan 18.12-14,19-24)

<sup>53</sup> Angwane Jesu jänikani ni blitaka Ngöböbe ni mda mda diäre dänkien gwirierte. Jänamani angwane, ni blitaka ni mda mda diäre dänkientre käkwe ja ükaninkrö, btä nitre unbre ji dokwäte käkwe ja ükaninkrö. Arato Kukwe Biani Ngöbökwe Moiséye dirikätre nükani ja ükekrö bentre. <sup>54</sup> Jesu jänikani angwane, Pedro abko jatani bä mente temen siba Jesu jiebti. Yebti nikani nebe ju bäre ni blitaka Ngöböbe ni mda mda diäre dänkien ye känti. Pedro nikani siba ki teri angwane, guardia ju blitakrä Ngöböbe ngibiabtikä nämane täkänintbe, ye känti Pedro namani täkänintbe siba ñukwätä, ñukwä träse.

<sup>55</sup> Angwane nitre blitaka Ngöböbe ni mda mda diäre dänkientre amne nitre sribikä Sanedrinbe namani kukwe känene Jesu rüere Jesu kitakäre ngise müre ketadre. Akwa kukwe era erere ñan namani kwen ietre Jesu rüere, <sup>56</sup> ñobtä ñan angwane ni kwati namani kukwe ngwarbebe niere Jesu rüere, aisetet ja kukwei ñan namani nükebti gware jökrä ietre.

<sup>57</sup> Yebtä ni ruäre kákwe kukwe känabare ngwarbe mda Jesu kitakrä ngise bari abko namani niere krörö:

<sup>58</sup> Ju blitakrä Ngöböbe mikani ni kä nebtäkwe, se abko tikwe juandi ngwarbe jökrä, abti köbömäkäre angwane, tikwe ju mdara jire mikadita täte, akwa ñan ni kä nebtäkwe mikadi, nieba kwe nun okwäbti, niebare kwetre Jesu rüere.

<sup>59</sup> Kukwe känabare ngwarbe kwetre ni ngökakrä Jesu rüere, akwa ñan namani nükebti gware jökrä ietre.

<sup>60</sup> Yebtä abko ni blitaka Ngöböbe ni mda mda diäre dänkien nükani dikekä krö ni jökrä ngätäite, kákwe niebare Jesuye:

¿Kukwe nie nibi ma rüere, se ño metre amarebti ma nibi kwe kwe jirekäbe ye? niebare kwe Jesuye.

<sup>61</sup> Akwa Jesukwe nin ñäkäbare käre, namani kwe kwe jirekäbe. Abtä ni blitaka Ngöböbe ni mda mda diäre dänkien kákwe niebareta bobukäre Jesuye:

¿Ma abko Ni Dianinkä Ngöböökwe ara ya amne ma abko Ngöbö Kri Odei ara ya? niebare kwe Jesuye.

<sup>62</sup> Jesukwe niebare mda ie:

Jän. Ti abko niara ara amne kä bari ütiäte kri Ngöbö Di Kri Jändrän Jökrä Nuenkrä ye küde ruenkri munkwe Ni Kä Nebtä Ngobo tuadi täkänintbe. Erere arato, jatadita mütabti käinta sete angwane munkwe tuadi, niebare Jesukwe.

<sup>63</sup> Angwane ni blitaka Ngöböbe ni mda mda diäre dänkien ye moto namani romon, kákwe dän ngianinkä seeen jabtä romone, kákwe niebare krörö:

¿Tä ñäke kore, se abko ni mda mda kákwe niara kitadre ngise amne batibe ngite, nikwe niedre ya? <sup>64</sup> Ñakare, ñobtä ñan angwane niarakwe ñäri tare Ngöbö rüere, ye nunkwe kukwe nurira ñan ñan, aisetet munkwe töbikadi ño mda kräke, niebare kwe.

Ni jökrä kákwe niebare:

Niara ngite, aisetet müre ketadre, namanintre niere gware jökrä.

<sup>65</sup> Ye ngwane ni ruäre namani kali kite Jesubtä. Ni ruäre abko namani dän kukwän mäke Jesu okwäbti, bti namani mete, namani mete, bti namani niere ie:

Ma Ngöbö Odei mata niere, aisetet nirekwe ma miti, niere metre nunye, namani niere ie.

Angwane guardia ju blitakrä Ngöböbe ngibiatikä abko namani Jesu mete arato.

*Pedro kákwe Jesu rükanté*

*(Mateo 26.69-75; Lucas 22.54-62; Juan 18.15-18,25-29)*

<sup>66</sup> Jesu nämane gwi Sanedrin ngwärekri angwane, Pedro abko nämane ju bäre ngüsürüta temen angwane, ni merire iti sribikä ni blitaka Ngöböbe ni mda mda diäre dänkienkwe abko jatani angwane, <sup>67</sup> Pedro nämane täkänintbe ñukwäbti ñukwä träse, btä meri ye okwä namani, mikani ñäräre kuin kwe, bti niebare kwe ie:

Jesu Nazarebo se ben ma nämane dikekä siba arato, niebare kwe ie.

<sup>68</sup> Angwane Pedrokwe ja rükanté, kákwe niebare mda ie:

Ni kädianta makwe, ye gare ñakare jire chi tie, aisetet mata blite drebtä, ye ñan nebe nüke gare tie, niebare kwe.

Bti naninkrö, nikani jukwebtä angwane, btäräbe antlankwe ngwänänbare.

<sup>69</sup> Bä raire erere, meri sribikä ye arabe jataninta angwane, okwä namaninta Pedrobtä bobukäre angwane, namani niere ni mda mdaye:

Ni noko reketaka Jesube arato se, namani niere.

<sup>70</sup> Akwa Pedrokwe ja rükanteta.

Bti bäräre erere angwane, nitre nämane yete kä namani niere Pedroye:

Ma Galileabo, ñobtä ñan angwane ma blite niaratre kwrere, bä amarebti rä jire mata nekete ñakare Jesube, ma nibi niere yere, namanintre niere ie.

<sup>71</sup> Angwane Pedrokwe ja kukwei bianinta amne niarakwe ñan kukwe niedre metre ne ngwane, Ngöböökwe ngürün mikadre btä namani niere, käkwe niebare mda:

Ni kädekata Jesu munkwe, ni ye abko gare ñakare jire chi tie, niebareta kwe.

<sup>72</sup> Ye btäräbe antlankwe ngwänänbare bobukäre angwane, Jesukwe kukwe niebare krörö Pedroye abko nükaninta töre ie: antlan ngämi ngwâne bobu, känenkri makwe ti rükandite bämä jire, niebare Jesukwe ie, ye nükaninta töre ie angwane, niara moto nötaninte, käkwe ja müaibare kri.

## 15

### *Jesu jänikani ngite Pilato ngwärekri*

(Mateo 27.1-2,11-14; Lucas 23.1-5; Juan 18.28-38)

<sup>1</sup> Kä nükani ngwen dekä angwane, nitre sribikä Sanedrinbe amne nitre blitaka Ngöböbe ni mda mda diäre dänkientre, nitre unbre ji dokwäte btä Kukwe Biani Ngöböökwe Moiséye dirikätre käkwe ja ükaninkrö ketetibe jökrä mda, käkwe Jesu mäkätemnabare, bti jänikani ngite Pilato ngwärekri kwetre. <sup>2</sup> Angwane Pilatokwe niebare ie:

¿Ma abko jrei nitre israelitakwe bkänä ya? niebare kwe Jesuye.

Jesukwe niebare mda Pilatoye:

Jän. Era metre ti ara, niebare kwe ie.

<sup>3</sup> Angwane ni blitaka Ngöböbe ni mda mda diäre dänkientre namani kukwe niere bätäkä ngwarbe Jesu rüere kitakrä ngise. <sup>4</sup> Abtä Pilatokwe niebareta Jesuye:

Kukwe keta kabre, btä ma ngite nie nibi ma rüere. ¿Se ñobtä abko ma nibi kwe kwe dikaro yere? niebareta Pilatokwe Jesuye.

<sup>5</sup> Akwa Jesu namani kwe kwe janknu, nin ñäkäbare jire chi kwe Pilato käre. Jesu ñan tö namani rabai tikaninte namani tuen Pilatoye, aisetet Pilato ñan töi namani krütare mda Jesubtä.

### *Jesu kitani ngite müre ketadre*

(Mateo 27.15-31; Lucas 23.13-25; Juan 18.38-19.16)

<sup>6</sup> Kä kwatirekwatire bieta Pascua näire ni ngite ngätäite nire tikadrete Pilatokwe, kärä nämane ie abko erere nämane tikete <sup>7</sup> abko erere ye näire ni kädian nämane Barrabás abko nämane ngite ni mda mdabe. Ni ye abko nämane ja rüere gobran romanobobe angwane, ni müre ketani kwe abtä nämane ngite. <sup>8</sup> Ye ngwane ni nükani kwati niere Pilatoye:

Käre mata ni ngite tikete iti kä kwatirekwatire. Ye kwrere makwe ni ngite tikadrete iti abko nun nibi ribere mae, niebare kwetre ie.

<sup>9</sup> Pilatokwe niebare mda ietre:

¿Jrei nitre israelitakwe ye tikadrete tikwe abko ie mun tö nibi ya? niebare kwe ietre.

<sup>10</sup> Pilato abko käkwe niebare kore, ñobtä ñan angwane ni blitaka Ngöböbe ni mda mda diäre dänkientre namani mokrere Jesube, abtä kitani ngite kwetre abko ganina Pilatokwe btätre, aisetet niebare kore kwe. <sup>11</sup> Akwa ni blitaka Ngöböbe ni mda mda diäre dänkientre namani ni jökrä töi den jakri abko käkwe Barrabás tikatemna abkokäre. <sup>12</sup> Akwa Pilato tö namani Jesu tikaite, käkwe niebare mda ietre:

¿Jrei nitre israelitakwe nieta munkwe, sebtä abko tikwe dre nuendre, ie mun tö nibi amarebti yere? niebare kwe ietre.

<sup>13</sup> Jötrö ngwarbe ni jökrä namani ngrente, kä namani niere Pilatoye:

¡Müre kete krusobtä! namanintre niere gware jökrä.

<sup>14</sup> Abtä Pilatokwe niebareta mda ietre:

¿Drebtä ni nekwe ja mikani ngite amarebti, mun nibi müre ketamna krusobtä tie yere? niebare Pilatokwe ietre.

Yebtä namani ngrente bäri jume mda, kä namani niere:

¡Müre kete krusobtä, müre kete krusobtä! namanintre niere Pilatoye.

<sup>15</sup> Akwa Pilato tö namani ni jökrä moto mikai nuäre, aise Barabás tikaninte kwe, akwa Jesu abko kwata metamna köbti kwe amne biani kwe rükä romanoboye müre ketadre krusobtä.

<sup>16</sup> Nitre rükä nikani Jesu ngwena mda ju gobrankwe ye känti. (Kä ye abko kädian nämane pretorio). Angwane nitre rükä käkwe ja ükaninkrö jökrä ketetibe Jesu mikakäre yakrä jae, <sup>17</sup> käkwe dän bä tain kita nämane jabtä jreikwe, ye kwrere kitani Jesubtä, bti jrei kri käkwe korona kitadre ja dokwäbti, ye kwrere kri tukwä krübäte sribbare koronare kwetre, bti mikani Jesu dokwäbti kwetre. <sup>18</sup> Yebti namanintre Jesu mike yakrä jae, kä namani niere:

¡Ma jrei nitre israelitakwe, nunta ma mike ütiäte kri mtare! namani niere kore Jesuye.

<sup>19</sup> Bti nikanintre Jesu mete dokwätä ta kritobti, nikani käli kite Jesubtä, bti nierare namanintre nebe ngukudokwätbi temen Jesu ngwärerekri. <sup>20</sup> Jesu mikani yakrä kore kwetre jae, bti dän bä tain drüne ye tikaninteta Jesubtä kwetre, bti dän Jesukwe ara kitaninta btä kwetre. Yebti nikanintre Jesu ngwena müre ketadre krusobtä.

### *Jesu metani krusobtä*

(Mateo 27.32-44; Lucas 23.26-43; Juan 19.17-27)

<sup>21</sup> Jesu jänikani kwetre angwane, ni iti kädian nämane Simón abko Alejandro btä Rufo rün Cirenebo nämane Jerusalén bäre, jataninante, nükani ngätäi bentre angwane, kruso btä Jesu müre ketadre abko nitre rükä romanobo käkwe Simón mikani ngwena Jesukrä. <sup>22</sup> Bti nikanintre nebe käkä Gólgota känti. Kä Gólgota ye abko “Ni dokwä kroko käi” nieta abko känti nikanintre nebe Jesube. <sup>23</sup> Angwane krikä kwaka kädianta mirra mritani uba döibe mni mni biani ñadre kwetre Jesuye, akwa Jesukwe ñan kani ngäbti. <sup>24</sup> Ye btäräbe nitre rükä romanobo käkwe Jesu metani krusobtä, bti tö namanintre dän Jesukwe ñäkäitbe jabti, käkwe ja gani dän yebtä.

<sup>25</sup> Ñänä okwä krä ökän näre dekä angwane, Jesu metani krusobtä nitre rükäkwe.

<sup>26</sup> Angwane “NI NE ABKO JREI NITRE ISRAELITAKWE,” tikani kore kri kukwänbtä metani Jesu dokwä känti käin krusobtä. Ye abko ñobtä Jesu nämane ja ngie nuen krusobtä gadre abkokäre. <sup>27</sup> Jesu metani krusobtä angwane, nitre gokä metani nibu krusobtä käin arato niarabe gware. Iti mikani niara küde ruenkri amne iti mikani niara küde ngeberekri.

<sup>28</sup> [Ne abko nämane tikani krörö kira Ngöbö Kukweibtä,

Ni kämekäme ngätäite niarakwe ja ngie nuadi siba,

nämane tikani abko erere namani bare kore.]\*

<sup>29</sup> Angwane nire nire namani kite dikekä Jesu bäre, kä namani dokwä ngrüketbe ñäkäre kwärä Jesuye, Jesu mikakäre ngwarbe jae, kä namanintre niere ie:

¡Jan jan! Ju blitakrä Ngöböbe se makwe juandi ngwarbe abti köbömäkäre makwe mikadreta täte jökrä, makwe niebare, <sup>30</sup> aise ja denkä au mento krusobtä yete, bti ma jatata timon, namanintre niere Jesuye.

<sup>31</sup> Ye erere arato, ni blitaka Ngöböbe ni mda mda diäre dänkientre btä Kukwe Biani Ngöböökwe Moiséye dirikätre namani Jesu mike yakrä jae, aise namanintre niere kwrere arato jae kwärikwäri Jesubtä:

Ni mda mda dianintari kwe, ¿se ñobtä abko ñan nebe ja dentari au se? <sup>32</sup> ¡Ni se Ni Dianinkä Ngöböökwe mikadre jrei nitre israelitakwe nieta kwe jabtä, aise ja diandrekä au krusobtä mento kwe sete angwane, nunkwe mikadi ütiäte jae! namanintre niere kore jae kwärikwäri.

Ye kwrere arato, ni nämane nibu ja tare nike krusobtä käin Jesube gware, ye namani Jesu mike yakrä jae siba.

### *Jesu krütani*

(Mateo 27.45-56; Lucas 23.44-49; Juan 19.28-30)

\* <sup>15:28</sup> Versículo 28 abko ñan tä tikani manuscrito bari kuinkuin btä.

<sup>33</sup> Bti ñänä nükani ruäre käin angwane, kä ngidianinte mda. Kä namani iko jökrä temen. Kä namani iko nebebe ñänä okwä krämä dere. <sup>34</sup> Ñänä okwä krämä nükani, ye btäräbe Jesukwe ngratebare kri ja dibti krörö: Eloi, Eloi, ¿lama sabactani? niebare kwe. (Ne abko: Ngöbö tikwe, Ngöbö tikwe, ¿ñobtä makwe kä mirikä tibta jakän amarebti yere? nieta.) Abko mdan niebare Jesukwe.

<sup>35</sup> Jesukwe ñäkäbare kore, ye abko nitre ruäre nämane yete käkwe kukwe nuani angwane, namanintre niere:

¿Ñan tä ni Ngöbö kukwei niekä kira kädian nämane Elías kärere jabta, ja die mikakäre ya? namanintre niere kore.

Niebare kore kwe, ñobtä ñan angwane Jesukwe “Eloi” niebare angwane, namani ruen “Elías” kwrere ietre aisetet.

<sup>36</sup> Ye btäräbe, ni nämane yete, ngätäite ni nikani betekä iti, käkwe jändrän dän kukwän kwrere kä dianta esponja abko mritaninkä uba ñöni dimente, bti mäkäninte kwe nörä kräbtä, jatani ben, biani kwe ñadre tomnane Jesuye. Bti ni ye käkwe niebare:

Tuemetre yete. Elías rükadi den timon krusobtä yete ni okwäbti ya, ari ngibiaretari, niebare kwe.

<sup>37</sup> Akwa Jesu abko käkwe ngratebare bäri kri ja dibti mda, btäräbe krütani. <sup>38</sup> Jesu krütani, ye btäräbe dän ngutu ngetbo, bti ju blitakrä Ngöböbe nämane ñäkänintbe abko nianinkä kumu käin nükebe temen. <sup>39</sup> Jesukwe ngratebare, bti krütani ño nitre rükä dänkien romanobo okwäbti. Abta niebare mda kwe:

Ni ne abko Ngöbö Odei era metre bkänä, niebare kwe.

<sup>40</sup> Ye ngwane, ni merire merire nämane ruäre, namani bä mente temen se kwrere okwä Jesubtä siba. Nitre merire nämane, ye ngätäite María Magdalabo nämane, btä José btä Santiago bäri bati meye María nämane, arato Salomé nämane. <sup>41</sup> Meri ye abko, Jesu nämane nüne Galilea angwane nämane nekete ben angwane, nämane niara die mike. Ye ngwane meri mda mda nämane kwati siba abko nämane nekete Jesube, aisetet nikani gware Jesube nebe Jerusalén. Meri ye abko nämane siba okwä Jesubtä.

### *Jesu doboi mikani*

(Mateo 27.57-61; Lucas 23.50-56; Juan 19.38-42)

<sup>42</sup> Ye ngwane abko, köbö jadükakrä känenkri, ni jökrä nämane sribi nuene biare jakrä jadüka mäträ, aisetet kä jatani dere angwane, <sup>43</sup> José Arimateabo abko ie ja nükani töre, nikani Pilato känti, käkwe Jesu ngwákä käräbare ie. José Arimateabo abko ni ütiäte kri sribikä siba Sanedrinbe. Ni ye abko, Ngöbö rükadre gobrane ni kwe ngätäite diribare Jesukwe nämane ngibiare kisere arato, aisetet nikani Jesu ngwákä kärere Pilatoye.

<sup>44</sup> Josékwe Jesu ngwákä käräbare Pilatoye angwane, Pilatokwe ja ngwiani nikenkä, ñobtä ñan angwane Jesu krütani jötrö krübäte, käkwe ni rükä romanobo dänkien käräbare iti, bti Jesu krütanina bkänä abko ngwianintari kwe ie. <sup>45</sup> Nitre rükä dänkien käkwe Jesu krütanina bkänä niebare Pilatoye angwane, batibe Pilatokwe Jesu ngwákä biamna Joséye. <sup>46</sup> José käkwe dän bäri ütiäte kädianta lino kökani, bti Jesu ngwákä krusobtä käin diani timon, mrianinte kwe dänte, bti kä muanina biare jäkwatate ni doboi mikakrä, te Jesu doboi mikani kwe, bti jä kri münaninkä kwe abko mikani kä mkä juere kwe Jesu doboibti. <sup>47</sup> Angwane María Magdalabo btä María, José meye, nikani siba, okwäbti Jesu doboi mikani.

## 16

### *Jesu nükaninta nire*

(Mateo 28.1-10; Lucas 24.1-12; Juan 20.1-10)

<sup>1</sup> Yebti köbö jadükakrä nikana ta angwane, María Magdalabo, María Santiago meye, btä Salomé käkwe jändrän rá mane kökani mda mikadre Jesu ngwákä ngrabare. <sup>2</sup> Abti ñänä jatani gökökä krire käin bämänte dekä angwane, nükanintre mda Jesu doboibti jändrän rá mane mikakäre ngrabare. <sup>3</sup> Nikana nebe ja ken doboibti angwane, nikani niere jae kwärikwäri:

*Jä kri dikaro mikani dobohti ye, nirekwe mikadikä mento nie amarebti yere? namani niere kore jae ji ngrabare.*

<sup>4</sup> Namanina känti angwane, nikrabare kwetre angwane, jä kri abko ñakare täte kä mkäbti amne kä mkäbe tökare se kwrere, btä okwä namanintre. <sup>5</sup> Bti nikanintre nikrenkä nguse kä mkäte angwane, ni bati btä dän nga ngwen bürere abko angele aibe nämane täkänintbe niaratre küde ruenkri, btä okwä namani angwane nekwetaninkä ni yebtä.

<sup>6</sup> Akwa angelekwe niebare nitre merire yeye:

Mun ñan rekwetaka tibta. Jesu Nazarebo müre ketani krusobtä, doboi mikani nete abko muta näin tuenta känti, ye gare kuin tie, akwa Jesu ye nürate nire, aisetet ñakare nete amne kä mkä be nebe tökare niara tähti, mun jakwe tuen. <sup>7</sup> Mun rikata, kákwe nie krörö nitre ja töitikaka Jesube yeye btä Pedroye: Jesu nürate nire, bike niken Galilea ja ükakrökäreta ketetibe munbe, känti munkwe ja tuadita ben, niebare kwe munye ye kwrere, munkwe nie kore ietre, niebare angelekwe nitre merire yeye.

<sup>8</sup> Yebti nitre merire nimä ye nikaninta angwane, nikani betekä ngitieta dobohti mentokwäre, ñobtä ñan angwane nekwetaninkä krübäte. Moto namani bete tükü tükü. Mden kisete namanintre grükekä jökrä ngrabare angwane, kä jürä namani krübäte dikaro btätre, aisetet kukwe nakaninkä ño ño nin niebare jire chi kwetre ni mda mdaye abko kukwe nakaninkä kore Jesubtä. Ne abko kore.

#### *Jesukwe ja mikaninta tuadre María Magdalaboye*

<sup>9</sup> Bämante dekä, Jesu nükaninta nire angwane, María Magdalabo, btä üai käme nämane krä kükü juanintari Jesukwe, ye ara jire, ie ja mikani tuare käne Jesukwe. <sup>10</sup> Yebti nitre ja töitikaka Jesube nämane diäne müen abko, ie Jesu nükaninta nire, María jananbare niere. <sup>11</sup> Jesu nükaninta nire jakwe tuani niebare Maríakwe, akwa María nämane blite ngwarbe namanintre nütüre btä, aisetet ñan kukwei mikani era kwetre.

#### *Nitre nibu ja töitikaka Jesube, ie Jesukwe ja mikaninta tuadre*

<sup>12</sup> Abti ni nibu ja töitikaka Jesube nikani juta Jerusalén bäre mento angwane, batibe Jesukwe ja bär kwitani jene, kákwe ja mikani tuare ietre ji ngrabare, <sup>13</sup> bti nikani mda, kákwe niebare nitre ja töitikaka Jesube mda mda yeye, akwa ñan kukwe mikani era kwetre arato.

#### *Jesukwe sribi biani nitre ja töitikaka benye*

<sup>14</sup> Abti nitre ja töitikaka Jesube ni jätäbti iti nämane mröre angwane, batibe Jesu nükani ja mike tuare ietre. Akwa Jesu nükaninta nire, ye ni tuakatuaka kákwe niebare nitre ja töitikaka ben yeye abko ñan kukwei kani ngäbti jire chi kwetre, yebtä Jesukwe ñäkäbare ietre.

<sup>15</sup> Bti Jesukwe niebare mda ietre:

Kukwe kuin tibta, ye mun rika mike gare kä ketareketare temen. <sup>16</sup> Munkwe kukwe ye mikadi gare, ye nire nire kákwe kadi ngäbti angwane, ja ngökadi ñöte kwe ti käbti, ni ye abko Ngöböökwe dianditari, akwa nire nire kákwe ñan kukwe ye kadre ngäbti abko ñan diandretari kwe, akwa Ngöböökwe mikadi ja tare nike kri.

<sup>17</sup> Angwane, nitre tödekaka tibti abko kákwe jändränuendi krörö ti diebti: Üai käme juanditari mento nibtä kwe, ni kukwei jenena gare ñakare ietre abko bti blitadi kwe Ngöbö Üai köböire. <sup>18</sup> Nane tbi krübäte diandre kisete kwe, arato nane kräkä krübäte ni kämikakrä ñadre kwe, akwa ñan jraindre kisete. Mräkäre abko, ni bren bren bti kise mikadi kwe abko rabadita kuinta ti diebti. Ye abko, nitre tödekaka tibti, ie kukwe rabadi bare kore. Abko kore se, niebare Jesukwe nitre ja töitikaka benye.

#### *Jesu nikaninta kä käinbti*

<sup>19</sup> Ni Dänkien Jesu kákwe blitabare ünän kore nitre ja töitikaka benbe, bti Ngöböökwe kaninkä käin, nikani ben kä käinbti, känti mikani täkäninte kwe ja küde ruenkri. Ye kwrere mikani bärä ütiäte kwe jae. <sup>20</sup> Abti nitre ja töitikaka Jesube abko nikani mda kä ketareketare te. Kukwe kuin nuenbare Jesukwe abko nikanintre mike gare ni jökraye. Angwane jändränuendi ñan rabadire bare ja di jenbti abko namani nebe bare ietre Jesu diebti,

niaratre kukwei rabadre era ni mda mdakrä, abkokäre ni Dänkien Jesu namani die mike kore abko kukwe nakaninkä kore Jesubtä. Ne ngörä.\*

---

\* 16:20 Versículo 9-20 abko ñan tä tikani manuscrito bärí kuinkuin btä.

## Kukwe Kuin Jesubtä Tikani Lucakwe

Lucas

Ni kädian nämane Lucas abko kákwe tärä ne tikani niara kukwe muko Teófilo kräke. Teófilo abko ni romanobo ütiäte kri nütüta. Jesukwe dre dre nuenbare amne dre dre diribare kwe rabadre gare metre Teófiloye, abkokäre Lucakwe tärä ne tikani kräke.

Jesu jatani ni jökrä diantarikäre abko Lucas tä mike gare tärä nebtä. Ñan Jesu jatani nitre israelita aibe kräke, akwa Jesu därebare kä nebtä ni jökrä die mikakäre abko Lucas tä niere. Erere arato, Jesukristo jatani niara Rün Ngöbö mike gare ni jökräye abko Lucas tö namani mikai gare bäri.

Lucas abko sribi muko Pablokwe abko gare nie, ñobtä ñan angwane tä tikani kore Colosenses 4.14; Filemón 24 amne 2 Timoteo 4.11. Lucas abko ñakare israelitare nütüta amne niara abko kräkä bianka tä gare nie. Lucas kákwe tärä ne tikani juga Romate kä 60-79 ne ngwane nütüta. Lucas kákwe tärä Hechos tikani Teófiloye arato.

### *Kukwe känökäne*

<sup>1-2</sup> Ngöbökwe kukwe mikanintbe ño ño abko erere namani bare Jesu köböire ni ngätäite, ye abko nitre nikani dikekä käne Jesube kákwe tuani ja okwä jenbti. Kukwe kuin Jesubtä, ye abko ni tuakatuaka ye nämane sribire mikakäre gare. Erere arato, jäandrän kuin nakaninkä ño ño Jesubtä ye ni tuakatuaka kákwe niebare nunye, erere ni kwati kákwe tikani täräbtä. <sup>3-4</sup> Ye kwrere ti tö namani tikai arato, aisetekä nera kukwe nakaninkä ño ño Jesubtä abko ti nikani ngwentari kuin, aisetekä mtare ti tö tikai metre ja täritäri makrä, ti kukwe muko ütiäte Teófilo, jäandrän nakaninkä ño ño Jesubtä diribarera mae, ye rabadre gare bäri kuin mae, abkokäre titakwe ne tike krörö mae:

### *Juan Bautista däredi niebare Zacaríaye*

<sup>5</sup> Bati jrei kädian nämane Herodes Kri nämane gobrane kä Judea yete angwane, ni blitaka Ngöböbe ni mda mda diäre kädian nämane Zacarías nämane nüne yete. Niara abko ni blitaka Ngöböbe ni mda mda diäre kira kädian nämane Abías tukwe mräkä. Niara abko sribikä ju blitakrä Ngöböbe känti. Nitre blitaka Ngöböbe ni mda mda diäre därebare Abías mräkäkri, ye ben nämane sribire. Meri Zacaríakwe kädian nämane Elisabet abko ni blitaka Ngöböbe ni mda mda diäre kira kädian nämane Aarón tukwe mräkä arato. <sup>6</sup> Niaratre nibu nämane nüne era metre Ngöbö ngwärekri, ñobtä ñan angwane Ngöbö Kukweita dre nuemna, erere nämanentre mike täte metre. Mden kisete kukwe kwani ñakare ni mda mdaye kitakrä ngite. <sup>7</sup> Ye kwrere nämanentre Ngöbö Kukwei mike täte, akwa Zacarías btä Elisabet nämane bati angwane namani jabe, akwa Elisabet küde mriani jabtä, aisetekä ngäbäkre ñakare kwetre. Mdakäre arato, namanina unbre jökrä.

<sup>8</sup> Akwa batira jire Abías tukwe mräkä blitaka Ngöböbe ni mda mda diäre nämane sribire ju blitakrä Ngöböbe känti, ben Zacarías nämane sribire gware angwane, <sup>9</sup> nämanentre ni den iti ja ngätäite kri ngwäri mnü rä bane kukwe Ngöbö ngwärekri. Ne abko nämanentre nuene käre köbö kwatirekwatire. Te Zacarías käbä namani sribi yebtä, ñobtä ñan angwane kä ngidianinkä aisetekä. Ne erere niara diani sribi ye nuenä kwetre kä demente ju blitakrä Ngöböbete. <sup>10</sup> Ye erere kä nükani angwane, Zacarías nikani kri ngwäri mnü kukwe kä demente angwane, ni kwati mda namani blite Ngöböbe ju bäre.

<sup>11</sup> Zacarías nämane kri ngwäri mnü kukwe jáme, te batibe angele ni Dänkienkwe jatabare ie. Angele ye nämane ñukwä grä kri mnü rä bane kukwakrä ne kwäräkri, niara küde ruenkri se kwrere. Btä okwä namani angwane, <sup>12</sup> jaiteeje, ni rä nekwetaninkä ya! Namani grükekä jökrä ngrabare. <sup>13</sup> Btäräbe angelekwe niebare ie:

Zacarías ma ñan rekwtaka tibtä. Ma btä Elisabet kákwe ngäbäkre käräbare Ngöböye, erere Ngöbökwe mun kukwei nuanina, aisetekä meri makwe Elisabet yekwe ngäbäkre brare ngibiadi. Ye makwe kädian Juan. <sup>14</sup> Ngäbäkre däredi ye kä rabadi nuäre mabtä amne, ni kwati mda mda, btä kä rabadi nuäre siba, <sup>15</sup> ñobtä ñan angwane niara rabadi ütiäte kri ni

Dänkien ngwärekri. Mdakäre abko, niarakwe nin uba döi btä dö kwakakkaka mda ñadre jire chi. Arato niara ngämi därere, känenkri Ngöbö Üai Deme tädira täte btä. <sup>16</sup> Juan rabadi ütiäte kri ni Dänkien ngwärekri, ñobtä ñan angwane niarakwe ni israelita kwati mikadita ja mäketa niaratre Dänkienbe.

<sup>17</sup> Ne abko Ngöbö kukwei niekä kädian nämane Elías nämane sribire mekera Ngöbö Üai köböire amne Ngöbö diebti, ye kwrere Juankwe sribidi niara Dänkien känenkri, nitre israelita mikakäre biare niaratre Dänkien kaen ngäbti. Mdakäre abko, ni kwati tä ja rüere ngäbriänkätrebe, arato ngäbriänkä tä ja rüere rünbe abko ie ja mäkämnnanta jabe kwärikwäri kwe. Erere arato, ni kwati tä ja dokwä mike ribi Ngöbökrä abko ie ja töi kwitamnanta kwe tödekkäre Ngöböbti. Ye kwrere, Juankwe ni kwati mikadi juto, ne abko kwe rabadre biare ni Dänkien kaen ngäbti. Ne mden kisete, kä rabadi nuäre ni kwatibta, niebare angelekwe Zácaríaye.

<sup>18</sup> Zácarías kákwe ngwianintari mda ie:

Ne abko ño sere ti tö nibi gai bäri metre tie. Nun nena unbre, dokwä ngwen bürere jakän. ¿Se ño amarebti, ngäbäkre däredre nunkwe sere? niebare kwe ie.

<sup>19</sup> Angwane angele kákwe niebare mda ie:

Ti kä Gabriel. Ti ne mdenta sribire Ngöbö ngwärekri kä käinbti. Niarakwe ti juni blite mabe kukwe kuin ne mikakäre gare mae. <sup>20</sup> Akwa makwe ñan ti kukwei miri era, aise te mtare mentokwäre ngäbäkre makwe ngämi därere, känenkri ma kukwei rötadi. Akwa kukwe ne rabadi bare täte jökrä angwane, batibe ma kukwei gitiadita. Abko kore se, niebare kwe ie.

<sup>21</sup> Kukwe ne nämane nakenkä angwane, nitre nämane ju bäre temen Zácarías ngibiare abko namanintre niere jae kwärikväri:

¿Ne ñobtä amarebti, Zácarías nibingrötöte krübäte kä demente nere? namanintre niere jae kwärikväri.

<sup>22</sup> Abti raire erere angwane Zácarías jataninta ju bäre. Niara tö namani blitai bentre, akwa nin kukwe namani ngitieta jire chi angwane, Ngöbökwé kukwe mikani tuare jabtä ie kä demente aise te, namanime blite jirekäbe kisebti kore mda abko nükani gare ietre.

<sup>23</sup> Kä kitani sribikäre namani bare angwane, Zácarías nikaninta ja gwiriete. <sup>24-25</sup> Abti mda Elisabet namani bren, bren kwe kisete. Yebtä niara namani ja baine dikakabtä sö krärike gwi. Nin namani näin kwäräkwärä. Namani nütüre: Ti Dänkien kákwe ti die mikaba, aise te titä ngäbäkre ngibiare. Kä näirare ni kwati kákwe ti mikaba ngwarbe, ñobtä ñan angwane ngäbäkre ñakare tikwe. Mtare ñan rabare ñäke tibtä, ñobtä ñan angwane titä ngäbäkre ngibiare aise te, nütübare kore kwe.

### *Jesu däredi Maríakwe abko angele nükani niere ie*

<sup>26-27</sup> Nebti Elisabet bren sö krä tira angwane, Ngöbökwé angele Gabriel juani mda kä Galilea yete nebe juta Nazarete, kukwe mike gare meri iti kädian nämane Maríaye. Ni merire ne abko bati kaibe, deme arato; ja mike gure ñakare jire chi, akwa nämanena mikani jakrä kwärikväri ni kädian nämane Josébe. José abko jrei David tukwe mräkä.

<sup>28</sup> Ne erere angele nükani María känti, kákwe niebare ie:

Nantöre mae. Ngöböta ja moto mike bäri kuin makrä meri mda ngwä, aise te niarata ma die mike, niebare angelekwe ie.

<sup>29</sup> Maríakwe angele ne mikani ñäraäre angwane, nekwetaninkä niara kukweibtä. Abtä namani nütüre: ¿Se ñobtä angele kákwe köbö ngunintari kore tie sere? namani nütüre.

<sup>30</sup> Angwane angele kákwe niebare mda ie:

María, ma ñan kä jürä ngwian jabtä. Ma käi nuäre Ngöböbtä. <sup>31</sup> Makwe ngäbäkre brare ngibiadi iti abko makwe kädian Jesu. <sup>32</sup> Niara rabadi ütiäte kri. Niara kädiandi Ngöbö Kri Kä Käinbti Odeire amne niara mräkä jrei David tukwe nämane gobrane kira, täte niarakwe gobrandi.

<sup>33</sup> Niara rabadi gobrane kärekäre nitre israelita ngätäite amne gobrain ñan krütadi jire chi, niebare kore angelekwe ie. <sup>34</sup> Maríakwe niebare mda angele yeye:

*¿Ti ngämi ja mike gure, amarebti mata niere kore tie yere?*

<sup>35</sup> Angele käkwe niebare mda ie:

Ne ñobtä titä niere raba ruen mae, ñobtä ñan angwane Ngöbö Üai Deme rükadi mabtä. Ye ngwane Ngöbö Kri Kä Käinbti di tädi mabtä arato. Ye mden kisete ngäbäkre däredi makwe, ye abko deme amne Ngöbö Odei jen kwe. Mdakäre abko ti bike kukwe mda niere mae abko krörö: <sup>36</sup> Ma mräkä Elisabet käkwe ngäbäkre ngibiadi. Niara nena biyore akwa, sö krä tira tä bren, bren kwe kisete arato. Meri ne mden di ñakare ngäbäkre ngibiakrä, aisetetodei neme ñakare jire chi, nieta btä amarebti tä kore. <sup>37</sup> Tita niere mae, Ngöbö di tärä jäandrän jökrä nuenkrä abko rabadre gare mae, aisetetniara di tärä kukwe ne ngwiankrä bare mabtä arato raba gare mae, abkokäre titä niere mae. Ne abko kore, niebare kore angelekwe Maríaye.

<sup>38</sup> Maríakwe niebare mda ie:

Makwe kukwe nini tie, ne erere raba bare jire jökrä tibtä angwane, ti Dänkien tö ti mikai dre dre nuene, erere ti tö nuein tie. Abko kore se, niebare kwe angele yeye.

Bti angele nikantä kä käinbti.

### *María nikani basare Elisabeye*

<sup>39</sup> Nebti María nikani jötrö ngwarbe Zacarías btä Elisabet känti kukwe niebare ie Elisabebtä tuakäre. Zacarías amne Elisabet abko nämane nüne mintokwäre kä Judea yete. <sup>40-41</sup> María namani Zacarías känti, nikani gwä, käkwe köbö ngwianintari Elisabeye. María kukwei jarabare Elisabeye angwane, btäräbe ngäbärekwe betatebare Elisabebtä amne Ngöbö Üai Deme nukaninbe täte btä. <sup>42-44</sup> Yebtä kä namani nuäre Elisabebtä, käkwe ñäkäbare jume mda Maríaye:

¡Jo! Ngöbota kukwe kuin nuene era metre makrä ni merire jökrä gwä. Ye kwrere ngäbäkre ngämi därrere makwe, kräke Ngöbota kukwe kuin nuene arato. Angwane meriti ne kwrere ie basa dre sera amarebti Ngöbota kukwe kuin nuene makrä, ma ye abko nüke basare tie. Ne ñobtä ñan angwane ma abko ti Dänkienmeye aisetet. ¿Se ñobtä ma nüke basare tie sere? Ne ñobtä raba ruen mae, ñobtä ñan angwane makwe köbö ngunintari tie, btäräbe ngäbärekwe bitite tibtä, kä ngwinijuto jabtä kwe ma kukweibtä aisetet. <sup>45</sup> Ngöbö köböire käta neme nuäre mabtä, ñobtä ñan angwane Ngöbökwe ja kukwei niebare mae ngäbäkre makwebtä abko namani era makrä angwane, dre dre niebare kwe mae, ye erere rabadi bare jire jökrä ie, aisetet titä niere mae. Abko kore se, niebare kwe Maríaye.

<sup>46</sup> Abtä Maríakwe niebare mda:

Ti bike ti Dänkien Ngöbö käikitekä.

<sup>47</sup> Ngöbö ti Diantarikä käi nibi nuäre kri tibtä,

<sup>48-49</sup> ñobtä ñan angwane ti bobre, ütiäte ñakare, akwa ti Dänkien Ngöbö käkwe ti tarebare kri.

Ngöbö Di Kri käkwe kukwe nuenba kri tikrä.

Nebtä mtare mentokwäre, Ngöbökwe kukwe nuenba kuin krübäte tikrä abko ni jökrä rabadi niere tibtä.

Ma abko deme käre Ngöbö.

<sup>50</sup> Ni nünanka kira amne ni nünanka kä ne ngwane käta Ngöbö mike ütiäte jae amne tä niara jürä ngwen jabtä.

Ni ye abko tä ruentari tare kärekäre Ngöböye abko krörö:

<sup>51</sup> Ngöbökwe sribi kri nuenbare ja di kribti amne, nire nire nämane bike krikri Ngöbö rüere abko Ngöbökwe juani ngwarbe.

<sup>52</sup> Erere arato, gobran krikri abko kitani timon, akwa ni bobre bobre abko Ngöbökwe mikani ütiäte kri, käkwe die mikani.

<sup>53</sup> Mdakäre abko, nitre tu neketebi mrö miare abko ie jäandrän kuinkuin biani täte kwe amne, nitre jäandrän bkäne kabre abko kän jäandrän dianinkä jökrä kwe.

<sup>54-55</sup> Ngöbökwe nitre israelita dianinkä sribikä jabe abko die mikani kwe amne ngwiani ruentari tare kwe jae ño kukwe ükaninte kwe ni ruai mrö känekänebe ye kwrere.

Mdakäre abko, Abraham btä Abraham ngäbriänkätre ja täritäri kädianta nitre israelita die mikadi Ngöökwe.

Mden erere ni kái kwitakata ñakare jabti Ngöökwe amne ni die mikata kärekäre kwe ja täritäri. Abko kore se, niebare Maríakwe.

<sup>56</sup> Yebti Maríakwe nünabare sö krämä Elisabet känti, bti jataninta ja gwiriete Nazarete.

#### *Juan Bautista därebare Elisabekwe*

<sup>57</sup> Abti mda ja ngibia kái nükani Elisabeye angwane, ngäbäkre brare därebare iti kwe. <sup>58</sup> Ne gani Elisabet mräkätrekwe btä kukwe muko mda kákwe gani angwane, jatanintre kái ngwen nuäre jabtä ben, ñobtä ñan angwane Ngöökwe kukwe kuin nuenbare Elisabekrä, aiseete niaratrekwe kái ngwiani nuäre jabtä arato. <sup>59</sup> Kwäira erere angwane, ngäbäkre ne kwata tikaninkä ñäräkrä mikakrä, ne abko kwe rabadre juta israelitare siba abkokäre. Ye ngwane niara kädian jababare rünbtí mräkätrekwe, <sup>60</sup> akwameye Elisabet abko ñan tö namani, kákwe niebare mda:

¡Ñakare! Ngäbäkre ne kädiandi Juan, niebare kore meyekwe.

<sup>61</sup> Zácarías mräkätre kákwe niebare:

¿Ma mräkä mden mden kädian tärä kore abko erere ma tö nibi ma ngobo kädiain sere? niebare kwetre mda ie.

<sup>62</sup> Ne ngwane ngäbäkre rün abko tö namani ngobo ne kädiain ño abko tö namanintre gai, aiseete Zácarías kákwe ngäbäkre kä tikadre kri kukwänbtä abko niebare kisehti kwetre ie. <sup>63</sup> Abtä Zácaríakwe kri kukwän käräbare ietre, ngobo kái tikakäre btä. Ne erere tikani kwe kri kukwänbtä: Ngäbäkre kädian Juan, tikani kore kwe. Nebtä namanintre töbige kri mda. <sup>64</sup> Te batibe, Zácarías kukwe ngitianinkäta se kwrere, kákwe Ngöökä käkitaninkä mda.

<sup>65</sup> Yebtä abko, mräkätre nekwetaninkä, töi ñan namani krütare batibe Zácaríabtä amne ngäbäkre kwebtä. Kukwe ne nakaninkä Zácarías juete abko kädrie namani jire jökrä ngwtäräta temen kä kiakiate Judea yete. <sup>66</sup> Angwane ni jökrä kákwe kukwe ne gani angwane abko ngäbäkre ne ñakare ngäbäkre mda mda kwrere, ñobtä ñan angwane ni Dánkien nämane niarabe namani tuen ietre, aiseete namanintre töbige krörö: ¿Ngäbäkre se rabadi ño sere? namanintre töbige ngäbäkre chi Juanbtä.

#### *Zácaríakwe Ngöökä demainbare*

<sup>67</sup> Yebti Juan rün Zácarías kukwe ngitianinkäta angwane, Ngöökä Üai Deme nükani btä angwane, Ngöökwe dre nuendi nitre israelitakrä abko niebare krörö kwe:

<sup>68</sup> Ngöökä nitre israelitakwe, ma ti Dánkien.

Tita ma demaine, ñobtä ñan angwane ma kitera nitre israelita jen makwe dentari, <sup>69</sup> kákwe ni Diantarikä di kri juni nun kräke.

Niara abko jrei David tukwe sribikä makwe ye mräkä.

<sup>70</sup> Mekera makwe ni Diantarikä juandi abko makwe niebare nitre israelitaye ma kukwei niekä deme köböire abko mden nere:

<sup>71</sup> Nitre ja rüere nun israelitabe btä nitre mätä nunbtä, ye ngäniene makwe nun ngibiadi amne nun dianditari kwe abko makwe niebare nunye.

<sup>72</sup> Erere arato, nun ruai mrö känökäne, ye rabadi ruentari tare mae, makwe niebare ietre. Mden kisete makwe kukwe ükaninte kuin metre nun ruai mrö känökänebe, ye ñan kái rikwitadrekäta jire mabti, makwe niebare ietre.

<sup>73</sup> Ti Dánkien, makwe ja kukwei biani kwatibe nun ruai mrö Abrahamye kira abko krörö:

<sup>74-75</sup> Ni rüe jürä ñan rabadre mda nibtä amne, ni rabadre nüne jáme amne deme sribikäre makrä, abkokäre makwe ni dianditari ni rüe ngäniene, makwe niebare Abrahamye abko erere mata ngwena bare.

<sup>76</sup> Bti Zácaríakwe niebare krörö Juanye:

Ma ti ngobo chi tikwe, ma rabadi ünän angwane, ma abko Ngöökä Kri Kä Käinbtí kukwei niekä, niedi mabtä, ñobtä ñan angwane makwe nitre israelita töi mikadi biare ni Dánkien káne ño, ji ükateta niken kuin ni dánkien jrei káne ye kwrere.

Ma nändi nitre israelita mike biare abko krörö:

<sup>77</sup> Makwe Ngöbö kukwei niedi kore nitre israelitaye angwane, ni ngite kukwe kämekäme nuenbtä, ye Ngöbökwe diandikä jire jökrä btä, ñan ja tare nikadre kwetre abkokäre, abko erere makwe niaratre mikadi biare ni Dänkien käne.

<sup>78</sup> Ye kwrere Ngöbökwe nuendi, ñobtä ñan angwane nitre israelita ruentari tare kri Ngöböye aise.

Ñänänta kite kuin dekä dekä amne, käta nebe tuen kuin jökrä nie, ye kwrere abko Ngöbökwe ni Diantarikä juandi, käkwe Ngöbö mikadi gare metre nie.

<sup>79</sup> No kä ikote käta nebe tuen ñakare nie, angwane kä jüräta nebe krübäte nibtä, ye kwrere ni ie Ngöbö gare ñakare abko gata jürä krübäte btä.

Ni ye abko, ie ni Diantarikä juandi Ngöbökwe abko käkwe Ngöbö mikadi gare metre, ñänänta kite kuin dekä dekä amne, käta nebe tuen kuin jökrä nie ye kwrere.

Ye köböire abko, ni rabadre nüne jáme Ngöbö ngwärekri kä nebtä amne ñan kä jürä rabadre mda nibtä, abkokäre ni Diantarikä juandi kwe. Abko kore se, niebare Zacaríakwe ngäbäkre chi Juanbtä.

<sup>80</sup> Ngäbäkre Juan ne abko nikani niren, nikani niren ja töi metrebiti. Niara namani ünän angwane, nikani nüne kä kaibete. Namani nüne yete abti kä nükani ie blitakäre Ngöböbtä nitre israelita ngätäite.

## 2

### *Jesu därebare juta Belénte*

(Mateo 1.18-25)

<sup>1</sup> Ne ngwane emperador romanobo kädian nämane Augusto César käkwe ni jire jökrä kä tikamna täräbtä kä jökräbti temen gadre jae. <sup>2</sup> Kä ye ngwane abko, ni iti kädian nämane Cirenio nämane gobrane käkä Siria yete angwane, emperador Augustokwe kukwe ne mikanintbe krire kena. <sup>3</sup> Ye mdentä ni jökrä nikani ja käite, ruäre ja gwirierte ja kä tikakäre täräbtä.

<sup>4</sup> Ne mdent erere, José abko nikani Belén ja kä denkä täräbtä. Niara nämane nüne juta Nazaret kä Galilea yete. Niara abko, jrei David tukwe kira mräkä, aise niara gwirie jen kwe abko Judea juta Belénte. Juta Belén känti jrei David tukwe därebare kira akwa, José nämane nüne Nazaret angwane, emperador Augustokwe kukwe ne mikanintbe, aise niara nikaninta Belén ja kä diankakäreta täräbtä. <sup>5</sup> Niara btä María nämane mikani jakrä kwärikwäri, jänikani kwe siba jabe Belén. María abko ñan mobe, bren kwe kisete, akwa jänikani kwe nebe Belén. <sup>6</sup> Namani Belén, btäräbe ja ngibia käi nükani Maríaye. <sup>7</sup> Ngäbäkre mubai därebare brare Maríakwe, mrianinte kwe dän kukwante. Angwane kri kukwän sribebare jändrän bukakrä, te mikani kwe, ñobtä ñan angwane ju ütiä biandre kibiakrä ñan kwani jire chi ietre nünantbekrä ngäbäkre kwe yebe.

### *Jesu därebare abko angele nükani niere obeja ngibiakatreye*

<sup>8-9</sup> Kä ye ngwane, nitre nämane obeja ngibiare jakrä dibire ta juta Belén kenta temen. Nämanentre jáme, te batibe angele jatabare iti ietre se kwrere. Btäräbe kä trä Ngöbökwe niabare ngwen jökrä niaratre bäre temen. Abtä nekwetaninkä amne moto namani bete krübäte. <sup>10-11</sup> Btäräbe angelekwe niebare ietre:

Mun ñan rekwtaka tibtä, ñobtä ñan angwane ti ki kukwe kuin mike gare munye. Kukwe ne abko, ni jökräkwe käi ngwiandi nuäre kri jabtä, ñobtä ñan angwane mtare ngäbäkre däreniri iti juta Belén, David käite sete. Ngäbäkre ne abko mun Diantarikä. Niara abko Ni Dianinkä Ngöbökwe amne niara abko ni jökrä Dänkien. <sup>12</sup> Mdakäre abko, ti kukwei metre ya, ñakare ya rükadre gare krörö munye: Mun rika mike ñäräre. Ngäbäkre ye kwandi mrianinte dän kukwante. Kri kukwän sribebare jändräbukakrä te tädi mikani, kwandi munye angwane, ti kukwei metre gadi munkwe. Ne abko kore, niebare kwe ietre.

<sup>13</sup> Ye btäräbe, angele mda mda mata namani kwati angele ne känti okwäbtitre se kwrere, kä namanentre Ngöbö käkitekä krörö:

<sup>14</sup> Ngöbö kri kä käinbti, ma aibe ütiäte kri.

Nunta ma käkitekä, ñobtä ñan angwane makwe ngäbäkre ne juni kä nebtä, aisetet kä jämentä kä temenbtä ni ngätäite.

Erere mata blite jäme nitre nebe kä temenbtä, namanintre niere kore obeja ngibiakatre okwäbti, bti nikanintreta kä käinbti.

<sup>15</sup> Nikanintreta jökrä angwane, obeja ngibiakatre namani blite jabe kwärkwäri, kä namani niere:

Dreta nakenkä Belén sete abko ni Dänkienkwe miri gare nie, ye brän mike ñäräre, niebare kwetre jae kwärkwäri.

<sup>16</sup> Erere bkänä, nikanintre jötrö ngwarbe Belén. Namanintre yete angwane, ngäbäkre kwani ietre mikani kri kukwante. María btä José abko nämane täkänintbe ken, btä namanintre. <sup>17</sup> Ngäbäkre jatabare ietre, bti nikani angwane, angele kákwe kukwe niebare ietre ngäbäkre yebtä, ye kädriebare kwetre ni mda mdabe. <sup>18</sup> Kukwe ye gani ni kwatikwe angwane, töi ñan namani krütare erebe jökrä. <sup>19</sup> Akwa kukwe niebare ie obeja ngibiakatrekwe, yebtä abko María namani töbike kri kaibe. <sup>20</sup> Obeja ngibiakatre kákwe kukwe tuani amne ni kukwei nuani kwetre, yebtä nikani Ngöbö käkitekä ja jiebti se kwrere. Angele kákwe kukwe niebare ietre, ye erere nakaninkä jökrä btätre.

### *María btä José nikani Jesu ngwena ju blitakrä Ngöböbe känti Jerusalén*

<sup>21</sup> Köbö kwäira erere angwane, María btä José kákwe ngäbäkre ne mikani kwata tikadrekä ñäräkrä mikakrä angwane, kädiani Jesu kwetre arato, angelekwe nuemna Maríaye, niara ngämi bren, bren kwe kisete ye känenkri. Ye erere abko nämane ja töibtä kwe, erere nuenbare kwetre.

<sup>22-24</sup> Abti köbö ja mikakrätadbe Ngöbö ngwärekri mikani nuendre Ngöböökwe nitre israelitaye, ye nükani Maríaye angwane, nikani Josébe ju blitakrä Ngöböbe juta Jerusalén yete, ja mikakäretadbe Ngöbö ngwärekri. Ne erere niaratre nikani ju blitakrä Ngöböbe juta Jerusalén yete ütü kiare kubu o ütü ngäbäli kubu bien kukwadre María kräke Ngöböye, Kukwe Biani Ngöböökwe Moiséye ye mikakäre täte jökrä. Erere arato, María btä José nikanintre Jerusalén angwane, nikanintre ngäbäkre mubai Maríakwe ngwena siba jabe mikakäre gare Ngöböye, ñobtä ñan angwane “Ngäbäkre mubai jire jökrä abko rün btämeye kákwe mikadre gare Ngöböye” abko Dänkien Ngöbö kákwe nuemna kore nitre israelitaye ja Kukweibtä, erere nuenbare kwetre ju blitakrä Ngöböbe yete.

<sup>25</sup> Kä ye ngwane abko, ni nämane nüne iti juta Jerusalén yete abko kädian nämane Simeón. Ni ye abko nämane nüne era metre Ngöbö ngwärekri amne Kukwe Biani Ngöböökwe Moiséye ye nämane mike täte arato. Erere arato, Ni Dianinkä Ngöböökwe kákwe nitre israelita moto mikadi jäme abko Simeón nämane ngibiare ngäbti amne Ngöbö Üai Deme nämane btä. <sup>26</sup> Mdakäre abko, Ni Dianinkä Ngöböökwe ne ngämi tuen, känenkri ñan jraindre abko Ngöbö Üai Deme kákwe mikani gare ie.

<sup>27</sup> Ye näire Ngöbö Üai Deme kákwe Simeón töi mikani nikani ju blitakrä Ngöböbe ye känti. Angwane María btä José nikani ngäbäkre Jesu ngwena yete arato, Kukwe Biani Ngöböökwe Moiséye ngäbäkre mubaibtä mikakäre täte angwane, <sup>28</sup> nikanintre gwäkäre angwane, Simeón ne jatani nemente, kákwe Jesu diani, ketani jabtä kwe, bti Ngöbö käkitaninkä okwäbti kwe se kwrere, kákwe niebare krörö:

<sup>29-30</sup> Ti Dänkien Ngöbö, makwe kukwe niebare tie, erere mtare nibira bare mae.

Ne aisetet ti sribikä makwe ne tuemetre jraine jäme jakän, ñobtä ñan angwane makwe ni juani nitre Diantarikä, ni ye mden abko tikwe turira.

<sup>31</sup> Ni ne mden abko makwe juani ni jökrä kräke.

<sup>32</sup> Mdakäre abko, ñotraträ kakata ni käne kä ikote, ye kwrere ma ño abko niarakwe mikadi gare nitre ñakare israelitareye.

Ni kwati kákwe nitre israelita mikadi ütiäte, ñobtä ñan angwane niara därebare nitre israelita ngätäite aisetet. Abko kore se, niebare Simeónkwe Ngöböye.

<sup>33</sup> Abtä José btä Jesu meye abko töi ñan namani krütare Simeón kukwei nuare Jesubtä.  
<sup>34-35</sup> Nebti Simeón kákwe ja di käräbare Ngöböye kräketre angwane, niebare kwe Jesu meye Maríaye:

Ngöböökwe ngäbäkre ne juani akwa niara ünän angwane, ni kwati ütiäte ñakare abko rabadi mikani ütiäte amne ni kwati ütiäte abko rabadi mikani ütiäte ñakare niara köböire. Mdakäre abko, ni kwati moto ño ño abko Ngöböökwe niara mikani mikakäre gare amne, ni kwati tä töbige ño ño Ngöböbtä abko niarakwe mikadi gare. Abtä ni kwati rabadi ja rüere ben, aise te ño ni gitika nguse ngitratbi tä ja tare nike krübäte, ye kwrere ma moto ötadite niara jiebti. Abko kore se, niebare Simeónkwe Maríaye.

<sup>36-37</sup> Ne känti abko, ni kädian nämane Aser tukwe abko mräkä kädian nämane Fanuel abko ngäankän Ngöbö kukwei niekä kädian nämane Ana nämane siba ju blitakrä Ngöböbe käntita. Ana abko nämane bati ngäbäkrere angwane, namani gure akwa nünabare kä kwä kükübe kwe brarebe amne brare krütani kän, bti namani kaibe. Ana ne abko namanina dokwä ngwen bürere, kä namani gre ketabkä bti kobkära ie, nämane siba ne näire. Batibe nikani ju blitakrä Ngöböbe käntita. Ye känti nämane käre köbö kwatirekwatire Ngöbö käkitekä amne, nämane ja báine Ngöbökrä amne nämane blite Ngöböbe. <sup>38</sup> Ne aise te Simeón nämane blite Maríabe ngäbäkre Jesubtä, ne btäräbe Ana mata nükani, kä nikani Ngöbö käkitekä ngäbäkre Jesubtä. Erere arato, nitre israelita nünanka Jerusalén nämane ni ni diantarikä ngibiare ngäbti abko erere ben Ana nikani blite ngäbäkre Jesubtä.

<sup>39</sup> Nebti Kukwe Biani Ngöböökwe Moiséye, erere María btä José kákwe mikani täte jökrä, bti nikantia ngobo kwebe ja käite, juta Nazarete Galilea. <sup>40</sup> Namaninta ja käite, känti ngäbäkre Jesu nikani niren kuin dite ngrabare amne, namani niren bári töbtä. Ne abko Ngöbö namani ja moto mike kuin kräke, aise te namani niren kore.

### *Ju blitakrä Ngöböbe, känti Jesukwe ja mikaninkä blitakäre dirikä krikri be*

<sup>41</sup> Jesu nämane niren angwane, bieta ban te lebadura mikani ñakare kweta nämane kädianta Pascua, bieta ne käre nuen nämane kä kwatirekwatire juta Jerusalén. Känti käre kä kwatirekwatire Jesu meye btä José nämane nikani siba. <sup>42</sup> Ne erere bati, kä kwä jätäbti kubu Jesuye angwane, Pascua köböi nükantia mda. Ye näire abko, José btä María nämane nikani käre kä kwatirekwatire, ye erere nikantia mda Jesube.

<sup>43</sup> Abti Pascua köböi nikani ta angwane, José btä María ngidianinkä, nikantia ja gwirie kukwäre amne Jesu ngäbäkrere namani Jerusalén abko nin gani kwetre. <sup>44</sup> Akwa Jesu nämane näin ja kukwe muko ngätäite nämanentre nütüre, aise te namantia näin jäme. Te nänbarera köböiti jire kwetre ji ngrabare angwane, nikani Jesu känentari mräkä btä kukwe muko ngätäite nekwäre sekware. <sup>45</sup> Nikani känentari, nikani känentari se kwrere, akwa nin kwanintari jire ietre. Abtä nikantretia ja jiebti nebetta Jerusalén Jesu känentari.

<sup>46</sup> Kä nikani köbömä ta angwane, nikantia nebetta Jerusalén, nikantia nebetta amne Kukwe Biani Ngöböökwe Moiséye dirikätre nämane ju blitakrä Ngöböbe bäre abko ngätäite Jesu nämane täkänintbe. Niara nämane nitre dirikä kukwei nuen. Erere arato nämane kukwe ngwentari kabre mda ietre. <sup>47</sup> Kukwe ngwiantari namani Jesukwe ne abko, ni töbtä töbtä raba blite, se kwrere namani blite. Mden kisete ni niara kukwei nuaka nuaka ñan töi namani krütare kukweibta. <sup>48</sup> Jesu nämane blite kore, btä meye amne José nikani nebetta angwane, ñobtä abko nämane blite dirikä krikri be abko ñan töi namani krütare tuare ja käne, bti meyekwe niebare mda ie:

Ti ngobo tikwe, ñobtä mata nuene kore nunbtä yere, amarebti ma rün noko btä ti mata nun ngwen ja känentari kri töbikare kwärä ja jiebti yere? niebare Maríakwe Jesuye.

<sup>49</sup> Abtä Jesukwe niebare mda meyeye:

¿Ye ño mutta ti känentari krübäte dikaro kore yere? ¿Ti tädre ti Rün gwirierte arato, ye gare ñakare munye ya amarebti yere? niebare kwe ie.

<sup>50</sup> Jesukwe ñäkäbare ne abko dre niebare kwe niara Rün kwebtä ñan namani nüke gare ietre. <sup>51</sup> Bti Jesu nikantia meyebe btä Josébe juta Nazarete. Jesu meye btä José nämane

dre dre niere ie, erere nämane mike täte jire jökrä. Akwa kukwe nakaninkä Jesubtä Jerusalén, abkobtä meye nämane töbike kri kaibe mda. <sup>52</sup> Jesu abko nikani niren bäri kri amne nikani töi ngitiekä bäri kri arato. Mdakäre abko, Ngöbö nämane niara ngibiarebti kuin janknu amne ni kwati namani niara tarere kri arato.

## 3

*Juan Bautista käkwe ji tikani Jesu käne  
(Mateo 3:1-12; Marcos 1:1-8; Juan 1:19-28)*

<sup>1</sup> Abti kä kwä jätäbti kwärakera emperador Tiberio nikani gobrane ne ngwane, ni nämane gobrane kräke abko nere: Gobernador Poncio Pilato nämane gobrane käkä Judeate. Dänkien tetrarca Herodes Antipas abko nämane gobrane käkä Galileate. Herodes etba kädian nämane Felipe abko nämane gobrane käkä Itureate btä käkä Traconite yete amne dänkien tetrarca Lisanias abko nämane gobrane käkä Abilenete. <sup>2</sup> Kä ne ngwane Anás btä Caifás nämane nitre blitaka Ngöböbe ni mda mda diäre dänkiene. Te batí Zácarías ngobo kä Juan abko ben Ngöböökwe blitabare kä kaibete. <sup>3</sup> Abtä Juan nikaninbe Ngöbö kukwei niere krörö nitre nünanka Ñö Jordán ngrabare yeye: Kukwe kämekäme nuenta munkwe, yebtä mun moto raba ulire, bti mun jata Ngöböye amne mun jata ja mike ngökadre ñöte tie. Ye ngwane mun ngite kukwe kämekäme nuenbtä, ye Ngöböökwe diandikä jire jökrä munbtä, Juan namani niere. <sup>4</sup> Ye abko, Juan nikani ñäke ño abko nämanena tikani Ngöbö Kukweibtä tärä Isaíabtä abko krörö: Ni iti näin ñäke jume ja dibti kä kaibete, käkwe niedi krörö:

Ji ükateta kuin biare jrei känenkri, ye kwrere ja töi mike kuin biare ni Dänkien käne munkwe.

Ji ükateta niken metre ta, ye kwrere ja töi ükete metre ni Dänkien käne munkwe, <sup>5</sup> ño kä ngitio ngürebta möta, te dobo keka kabre ükate ruäre ngitio mintrinibe amne raba kiare, ji rabadre metre jreikrä abkokäre.

Ye kwrere arato, ngitio krikri btä ngitio kiakia tikakata, bti ükateta kiare jökrä, ji rabadre metre dänkien jreikrä abkokäre.

Mdakäre abko, ji tolentolen tikakata niken metre tata amne ji turureturure ükateta niken kiare, ye kwrere munkwe ja töi ükate kuin biare ni Dänkien käne.

<sup>6</sup> Ne abko ni Diantarikä juandi Ngöböökwe, ye ni nünanka kä jökräbti käkwe tuadi, niarakwe niedi, *Isaías 40:3-5* abko Ngöböökwe tikamna kore Isaíaye.

<sup>7</sup> Ye erere Juan nämane blite angwane, ni namani kite kwati ja mike ngökadre ñöte Juanye abko ie Juan namani ñäke krörö:

Mun abko tbi krübäte kwrere. ¿Ngöbö kebera mun mike ja ngie nuen kri krübäte, yebtä nirekwe mun mikani mokre amarebti mun kite nüke siba nete ye? <sup>8</sup> Munkwe ja töi kwitadre era metre Ngöbö kukwäre bkänä tödekkäre bti abko erere munkwe nüna ni mda mda okwäbti. Erere arato, munkwe ñan nie au jabtä: Nun abko Abraham mräkä, aisetet Ngöböökwe ñan nun mikadi ja ngie nuen, munkwe ñan nie au jabtä, ñobtä ñan angwane jä tuen temen sete, se abko ngwarbe akwa Ngöbö raba kwite Abraham mräkäre abko ti tö nibi niei metre kore munye. <sup>9</sup> Mdakäre abko, kri mden mden ñan ngwä nebe kuin, ye abko kräke ü mikanina biare tikakakrä ngätrite ta. Abti tikakata jökrä angwane, kitata ñukwäte, ye kwrere jire Ngöböökwe mun mikadi ja ngie nuen, munkwe ñan ja töi kwitadre Ngöbö kukväre angwane.

<sup>10</sup> Abtä ni nämane yete käkwe niebare Juanye:

Ni nun kwrere abko käkwe kukwe kuin nuendre ño, köböire nunta Ngöbö mike ütiäte jae bä rabadre nunbtä, niere nunye niebare kwetre Juanye.

<sup>11</sup> Juankwe niebare mda ietre:

Mun mdenkwe dänta ötabu, ye abko ni dän ñakare, ie munkwe dän jakwe bian ötati. Erere arato, mun mden mrö bkäne, mrö ye abko munkwe ni mrö nikaka buka te siba, ye ngwane munta Ngöbö mike ütiäte rükadi gare munbtä, niebare kwe ietre.

<sup>12</sup> Ne ngwane nitre israelita jäandrän ütiä käräkä gobran romanobokrä, ye nükanintre siba ja ngökakäre ñöte arato, käkwe niebare Juanye:

¿Nun abko käkwe kukwe kuin nuendre ño, köböire nunta Ngöbö mike ütiäte jae bärabadro nunbtä? niebare kwetre Juanye.

<sup>13</sup> Juankwe niebare mda ietre:

Gobranta ngwian kärämna nuäi nuäi ni mda mdaye, ye erere munkwe kärä. Akwa munkwe ñan ngwian dianka bari bti ni mda mdakän, ye ngwane munta Ngöbö mike ütiäte rükadi gare munbtä, niebare kore kwe ietre.

<sup>14</sup> Erere arato, nitre rükä nükani ruäre, käkwe niebare Juanye:

¿Nun abko käkwe kukwe kuin nuendre ño, köböire nunta Ngöbö mike ütiäte jae bärabadro nunbtä? niebare kwetre ie.

Juankwe niebare mda ietre:

Ni mda mda rätäkäta munkwe amne munta ngwian btä jäandrän kwe kwe denkä kän, ye kwrere munkwe ñan nuen jire chi mda. Erere arato, munkwe ñan ni mda mda kita ngise ngwarbe amne sribi ütiä bianta nuäi nuäi munye, yebe ben munkwe nüna jäme. Ye ngwane munta Ngöbö mike ütiäte rükadi gare munbtä. Abko kore se, niebare kwe ietre.

<sup>15</sup> Kä ye ngwane abko, ni jökrä nämane Ni Dianinkä Ngöböökwe ngibiare ngäbti kisere, aisetet nane Juan abko Ni Dianinkä Ngöböökwe ara nükani, nitre israelita jökrä namani nütüre, btä nämane töbige kri. <sup>16</sup> Ye mden kisete Juankwe niebare ietre:

Tita mun ngökö ñö aibe te bkänä, akwa ni jatadi iti ti jiebti abko bari di kri ti ngwä. Niara abko Ni Dianinkä Ngöböökwe, aisetet sandalia ngotobtä yebtä nin ja nüke töre jire chi tie kö tikarete ie. \* Ni ye abko käkwe Ngöbö Üai Deme mikadi nüne munbtä amne Ngöbö Üai Deme rabai ñukwä jutra kwrere munbtä, mun mikakäre deme Ngöbökrä. <sup>17</sup> Ne abko, niarakwe dre nuendi abko ti bike niere munye abko krörö: Niara tä jäandrän ngwena kisete trigo juankakrä. Trigo juandikä kwe angwane, trigo kuinkuin erere ükadikrō jenena kwe amne trigo kwata abko ükadikrō jenena kwe. Yebti ñukwä nötöte ñakare abko te trigo kwata ye kukwadi kwe. Tita mun bärabadro kwrere amne trigo kwata kwrere. Abko kore se, niebare Juankwe nitre israelitaye.

<sup>18</sup> Ye kwrere Juan namani blite ni kwati ben töi diankäre, kä namani kukwe kuin Ngöböökwe mike gare ietre kore.

<sup>19</sup> Akwa kä ye ngwane abko, jrei Herodes käkwe etba kwe kädian nämane Felipe abko merie kädian nämane Herodías diani etba kän. Erere arato, nämane kukwe kämekäme nuene bätäkä ngwarbe Ngöbö rüere. Abtä Juankwe ñäkäbare Herodeye <sup>20</sup> abko dokwäre Juan kitani ngite kä teri kwe ne ngwane, ja mikani ngite bari kri mda kwe Ngöbö rüere.

### *Juankwe Jesu ngökani ñöte*

(Mateo 3.13-17; Marcos 1.9-11)

<sup>21</sup> Akwa Juan kita ngämi ngite kä teri, känenkri nämane ni ngökö ñöte angwane, Jesu ngökani ñöte kwe arato. Jesu jämi nikenta jate angwane, nämane blite Ngöböbe, btäräbe jukwe tika kwrere kä ngitianí kä käinbti, <sup>22</sup> amne Ngöbö Üai Deme, jatani tuen ütü bärabadro timonkwäre, nikani mate Jesubti. Ne btäräbe ni kukwe jarabare krörö kä käinbti: Ma abko ti Ngobo tikwe. Ma tare kri tikwe. Ma käi nuäre kri tibtä, niebare kore kä käinbti timonkwäre Jesuye.

### *Jesu mräkä känekäne*

(Mateo 1.1-17)

<sup>23</sup> Kä kwä gre bti kwä jätära Jesuye kwrere angwane, jatani sribi Ngöbö Kukweiblä kömiketbe kena. Jesu abko José ngobo nütü nämane ni jökräkwe amne José abko Elí ngobo.

<sup>24</sup> Elí abko Matat ngobo,

---

\* <sup>3:16</sup> sandalia tikete. Jesu näire ni klabore kökani ni mdakwe abko bari ene ni mda mdakrä. Niaratre aibe nämane sandalia ni mdakwe tikete, aisetet Juan nämane ja bärabadro kwe kwe ne klabore ngwä.

Matat abko Leví ngobo,  
 Leví abko Melqui ngobo,  
 Melqui abko Jana ngobo,  
 Jana abko José mdara jire ngobo,  
<sup>25</sup> José abko Matatías ngobo,  
 Matatías abko Amós ngobo,  
 Amós abko Nahum ngobo,  
 Nahum abko Esli ngobo,  
 Esli abko Nagai ngobo,  
<sup>26</sup> Nagai abko Maat ngobo,  
 Maat abko Matatías mdara jire ngobo,  
 Matatías abko Semei ngobo,  
 Semei abko José mdara jire ngobo,  
 José abko Judá ngobo,  
<sup>27</sup> Judá abko Joana ngobo,  
 Joana abko Resa ngobo,  
 Resa abko Zorobabel ngobo,  
 Zorobabel abko Salatiel ngobo,  
 Salatiel abko Neri ngobo,  
<sup>28</sup> Neri abko Melqui mdara jire ngobo,  
 Melqui abko Adi ngobo,  
 Adi abko Cosam ngobo,  
 Cosam abko Elmodam ngobo,  
 Elmodam abko Er ngobo,  
<sup>29</sup> Er abko Josué ngobo,  
 Josué abko Eliezer ngobo,  
 Eliezer abko Jorim ngobo,  
 Jorim abko Matat mdara jire ngobo,  
<sup>30</sup> Matat abko Leví mdara jire ngobo,  
 Leví abko Simeón ngobo,  
 Simeón abko Judá mdara jire ngobo,  
 Judá abko José mdara jire ngobo,  
 José abko Jonán ngobo,  
 Jonán abko Eliaquim ngobo,  
<sup>31</sup> Eliaquim abko Melea ngobo,  
 Melea abko Mainán ngobo,  
 Mainán abko Matata ngobo,  
 Matata abko Natán ngobo,  
<sup>32</sup> Natán abko David ngobo,  
 David abko Isaí ngobo,  
 Isaí abko Obed ngobo,  
 Obed abko Booz ngobo,  
 Booz abko Salmón ngobo,  
 Salmón abko Naasón ngobo,  
<sup>33</sup> Naasón abko Aminadab ngobo,  
 Aminadab abko Aram ngobo,  
 Aram abko Esrom ngobo,  
 Esrom abko Fares ngobo,  
 Fares abko Judá mdara jire ngobo,  
<sup>34</sup> Judá abko Jacob ngobo,  
 Jacob abko Isaac ngobo,  
 Isaac abko Abraham ngobo,

Abraham abko Taré ngobo,  
 Taré abko Nacor ngobo,  
<sup>35</sup> Nacor abko Serug ngobo,  
 Serug abko Ragau ngobo,  
 Ragau abko Peleg ngobo,  
 Peleg abko Heber ngobo,  
 Heber abko Sala ngobo,  
<sup>36</sup> Sala abko Cainán ngobo,  
 Cainán abko Arfaxad ngobo,  
 Arfaxad abko Sem ngobo,  
 Sem abko Noé ngobo,  
 Noé abko Lamec ngobo,  
<sup>37</sup> Lamec abko Matusalén ngobo,  
 Matusalén abko Enoc ngobo,  
 Enoc abko Jared ngobo,  
 Jared abko Mahalaleel ngobo,  
 Mahalaleel abko Cainán mdara jire ngobo,  
<sup>38</sup> Cainán abko Enós ngobo,  
 Enós abko Set ngobo,  
 Set abko Adán ngobo,  
 Adán abko Ngöbökwe dätebare.

## 4

*Diablukwe Jesu nuaninte ja käne  
 (Mateo 4.1-11; Marcos 1.12-13)*

<sup>1</sup> Jesu nämane Ñö Jordánbtä, känti Juankwe ngökani ñöte angwane, Ngöbö Üai Deme nämanena täte btä, kä nikani Jesu ngwena kä kaibete mda. <sup>2</sup> Ne känti Jesukwe nünantbebare köbö gre ketebu angwane, diablu namani nüke Jesu nuente ja käne. Köbö gre ketebu Jesukwe mröbare ñakare jire chi, akwa kä ye namani bare angwane, btäräbe mrö namani dikaro ie. <sup>3</sup> Ne aisetet diablu jataninta, kákwe niebare ie:

Ma abko Ngöbö Odei era metre ne ngwane, jä se kwite mröre jae, niebare kwe ie.

<sup>4</sup> Akwa Jesu kákwe niebare mda diabluye:

Ñakare. Ngöbö Kukwei tä tikani krörö:

Ñan mrö aibebti ni rabadre nüne, akwa kukwe kwatirekwatire niebare Ngöbökwe, yebti ni rabare nüne, <sup>Deuteronomio 8.3</sup> abko tä tikani Ngöbö Kukweibtä, niebare Jesukwe ie.

<sup>5</sup> Nebti ngitio bäri mente käin, yebti diablu nikani Jesu ngwena mda. Ye känti, jötrö ngwarbe kä jökrä amne juta kä jökräbti temen mikani tuadre kwe Jesuye, <sup>6-7</sup> bti niebare kwe ie:

Jändränen ne biani jökrä tie amne ti tö rabai bien nireye, erere tikwe biandre jökrä aisetet, makwe ja mikadi ngukudokwäbti temen ti ngwärerekri, kákwe ti mikadi ütiäte jae angwane, kä jökrä tä ti kisete btä jändränen jökrä ütiäte krikri tä kä nebtä, se tikwe biandi jire jökrä mae, niebare diablukwe Jesuye.

<sup>8</sup> Abtä Jesukwe niebare mda ie:

Ñakare. Ngöbö Kukwei tä tikani krörö:

Ni Dänkien Ngöbö aibe mikadre ütiäte jae. Niara aibe kräke sribidre, <sup>Deuteronomio 6.13</sup> abko nieta kore, aisetet tikwe ñan ma kukwei mikai täte, niebare Jesukwe diabluye.

<sup>9-11</sup> Nebti diablu nikani Jesu ngwena juta Jerusalénte mda, känti nikani Jesu ngwena mobe ju blitakrä Ngöböbe bti käin, bti niebare kwe ie:

Ma abko Ngöbö Odei era metre bkänä ne ngwane, ja täkete timon nete, ñobtä ñan angwane Ngöbö Kukwei tä tikani krörö mabtä:

Ngöbökwe angeletre juandi ma ngibiarebti abko käkwe ma kadi ngäbti kisete, ma ngoto ñan matadre jäte temen, abkokäre angeletrekwe ma ketadite käintabe kisete,  
*Salmos 91.11-12*

abko tä tikani Ngöbö Kukweibta mabtä, aisetet ja täkete timon, ma Ngöbö Odei ara mikakäre gare ni jökraye, niebare diablukwe ie.

<sup>12</sup> Abtä Jesukwe niebare mda diabluye:

Ñakare. Ngöbö Kukwei tä tikani abko käta niere krörö arato:

Ni Dänkien Ngöbö käkwe ja kukwei mikadre täte ya, ñakare ya amne, niara di tärä ja kukwei ngwiandre bare ya, ñakare ya abko makwe ñan nuate ja käne ja gakäre ben,  
*Deuteronomio 6.16*  
 abko tä tikani kore, aisetet tikwe ñan ma kukwei mikai täte. Abko kore se, niebare Jesukwe diabluye.

<sup>13</sup> Nebti diablukwe Jesu nuaninte ünän jökrä ja käne, bti nikani mentokwäre, köbö bäri kuin Jesu nuatekäreta, ye ngibiare jae mda.

*Jesu nikani Ngöbö kukwei kuin dirire kena*

*(Mateo 4.12-17; Marcos 1.14-15)*

<sup>14</sup> Nebti Jesu nikaninta Galileate angwane, Ngöbö Üai Deme di namani kri btä, aisetet namani dre dre nuene, abkobtä ni jökrä namani kädriere juta ketareketare temen.

<sup>15</sup> Erere arato, sinagoga juta ketareketare te, käntikänti Jesu namani niken dirire. Kukwe diri nämane kwe, yebtä ni jökrä namani niara käkitekä.

*Jesu mikani ütiäte ñakare ja käite Nazarete*

*(Mateo 13.53-58; Marcos 6.1-6)*

<sup>16</sup> Jesu nämane Galilea, nikaninta juta Nazarete niara rirabare ye känti. Namaninta yete angwane, köbö jadükakrä näire niara nämane niken sinagogue, känti nämane niken käre. Ye erere, bati köbö jadükakräte nikaninta, känti namani nünaninkä ñäkäkäre Ngöbö Kukweibta. <sup>17</sup> Ne btäräbe, ni Ngöbö kukwei niekä kädian nämane Isaías kákwe tärä tikani abko ngökani Jesuye. Jesu nikani täräkwata ne metete angwane, batibe tärä krörö kwani ie, bti nikani ñäke btä:

<sup>18</sup> Dänkien Ngöbökwe ti dianinkä ja kukwei kuin mikakäre gare ni bobre bobreye, aisetet ja Üai mikani tibtä kwe sribi nuenkäre.

Ngöböta biare ni ngite ngite tikatekäre abko ti juani niere kwe ietre.

Ni ie kä tuen ñakare abko ie kä rabadre tuenta abko ti juani niere kwe ie.

Erere arato, nire nire tä ja tare nike ni mda mda ngoto täni kwrere abko ti juani tikete kwe kä rabadre nuäre btä abkokäre.

<sup>19</sup> Mdakäre abko, Dänkien Ngöböta ja moto mike kuin ni kräke abko ti juani niere kwe,  
*Isaías 61.1-2*

abko tärä yebtä Jesukwe ñäkäbare.

<sup>20</sup> Bti tärä, btä Jesukwe ñäkäbare, ye mrianinkäta kwe, ngökaninta kwe sinagoga ngibiaka yeye, bti namaninta täkänintbe dirikäre se kwrere. Angwane Jesukwe ño niedi mda abko ni jökrä namani ngibiare, aisetet okwä namani kwekbe jökrä Jesubtä Jesu kukwei ngibiare se kwrere. <sup>21</sup> Ne btäräbe Jesukwe niebare mda:

Kukwe btä tikwe ñäri gwä, ye abko mtare mentokwäre nibira bare jökrä, niebare Jesukwe.

<sup>22</sup> Jesu namani kukwe kuinkuin niere dikaro, yebtä ni jökrä ñan töi namani krütare, aisetet namanintre Jesu kädriere kuin jökrä. Akwa yebti, namanintre niere krörö jae kwärikwäri Jesubtä:

¿Ni noko ñan José ngobo ya amarebti nibi dirire kore jabtä noko? namanintre niere Jesu rüere. <sup>23</sup> Abtä Jesukwe niebare mda ietre:

Ni kräkä bianka, btä nita töbika blo, ie nita niere krörö: ¡A! Ma kräkä bianka kri era metre ne ngwane, makwe ja mika kuinta au angwane, nunkwe ma mikai era jae abko nieta. Ne kwrere munta töbika tibtä, ye gare kuin jabtä tie. Ye kwrere, Ngöbökwe ma juani ni die mikakäre mata niere jabtä, aisetet ye bä mike tuadre abko munta nütüre

tibta. Mdakäre abko, sribi kri nuenta Ngöbö diebti, erere namani bare mae Capernaúm kädrieta nun okwäbti, ye kwrere nuene ja käite nete nun kräke tuadre nunye, ne munkwe niedi tie, ye gare kuin tie arato. <sup>24</sup> Mden kisete ti bike kukwe era erere niere munye: Ni Ngöbö kukwei niekä, ye abko ja käite mikata ütiäte ñakare jae mräkäkwe abko krörö: <sup>25</sup> Bati ni Ngöbö kukwei niekä kira kädian nämane Elías\* nämane nüne abko näire Ngöbökwe kä mikani bäri moren kä komä bti ötare amne nin ñü näkäni jire chi temen, aisetet mrö nikani kri kä jökräbti temen Israel känti. <sup>26</sup> Kä ye ngwane abko, meri kän brare krütani krütani nämanena kabre nitre israelita ngätäite, akwa nin Ngöbökwe Elías juani nüne meritre israelita ye känti, ñobtä ñan angwane nitre israelita ñan nämane Elías mike ütiäte jae. Akwa meri nämane iti kän brare krütani arato, akwa ñakare israelitare nämane nüne mobe Israel bäre juta Sareptate juta kri Sidón bäre abko känti Ngöbökwe Elías juani nüne.

<sup>27</sup> Ye kwrere arato, ni Ngöbö kukwei niekä nämane nüne kira kädian nämane Eliseo abko näire ni ngütüete ngrabare lebra kisete nämanena kwati nitre israelita ngätäite abko nin mikaninta kuinta jire iti Ngöbökwe, ñobtä ñan angwane nitre israelita ñan nämane Eliseo mike ütiäte jae. Akwa ni menteni ñakare israelitare nünanka mobe kä Siria känti ngütüete jökrä ngrabare arato abko kädian nämane Naamán aibe mikaninta kuinta Ngöbökwe.<sup>†</sup> Mräkä israelitakwe mikani ñakare era jae, aisetet Ngöbökwe die mikani ñakare. Ye kwrere tä nakenkä tibta nete. Abko kore se, niebare Jesukwe.

<sup>28</sup> Nebtä ni Jesu kukwei nuaka nuaka sinagogue namanintre moto romon krübäte jökrä kräke, <sup>29</sup> aisetet ni jökrä namani ja rüere Jesube, kä nikani kitekä romone ja käne juta bäre mento nebe kä oko romonbtä ngitiobti. Ne känti abko Nazaret nämane. Känti tö namanintre Jesu kitai jräte. <sup>30</sup> Akwa Jesu abko nikaninta jäme ni kwati ye ngätäite ta mentokwäre.

### *Jesukwe üai käme juanintari mento*

(Marcos 1.21-28)

<sup>31</sup> Nebti Jesu nikaninta mda motokväre juta Capernaúmte Galilea. Abti köbö jadükakrä näire nämane niken sinagogue, känti namani dirire ni nämane ja ükekrö ye

<sup>32</sup> amne, niaratre jökrä ñan töi namani krütare kukwe diribare kwe yebtä, ñobtä ñan angwane ni töbtä di kri käkwe diri ja di ngöi, kwrere jire Jesukwe diribare ietre. <sup>33</sup> Jesu nämane dirire angwane, ni nämane iti sinagoga yete, btä üai käme nämane nüne. Te batibe ni ye käkwe ngratebare kri ja dibti Jesuye:

<sup>34</sup> ¡Jesu Nazarebo, nun tuemetre kaibe nete! ¿Ye ñobtä abko, ma kite ja mike kukwe nunkwete yere? ¿Ma kite nun gaenkä ya ño yere? Jesu, ma gare kuin tie. Ma abko Ni Deme Ngöbökwe gare tie, niebare üai kämenkwe Jesuye.

<sup>35</sup> Abtä Jesukwe niebare mda üai kämeye:

¡Üai käme, kada mkä kete makwe! Ni ye tuemetre gwängwarbe. Nän mento btä, niebare kwe.

Ye btäräbe, ni jökrä ngwärekri, üai käme ni yebtä käkwe nitani temen, bti nikani mento, akwa ñan ni ye mikani bren kwe.

<sup>36</sup> Nebtä ni jökrä töi ñan namani krütare Jesubtä, kä namani niere jae kwärikwäri:

¿Ni neta kukwe ño ño dirire amarebti niara di tärä üai käme juentari jötrö au, tä ñäke kwatibe üai käme juantarikrä mento amne, üai käme tärä niken mento ie sere? namanintre niere kore Jesubtä.

<sup>37</sup> Yebtä abko, Jesu kädrie namani kä jökräte juta Capernaúm käntita temen.

### *Jesukwe Simón köbrän merire mikaninta kuinta*

(Mateo 8.14-15; Marcos 1.29-31)

<sup>38</sup> Jesukwe diribare ünän sinagoga yete, bti nikani nebe Simón känti mda angwane, Simón köbrän merire abko nämane bren jume drangwan kisete. Angwane Jesukwe

\* <sup>4:25</sup> Elías. Ma raba ñäke kukwe nebtä tärä 1 Reyes 17.7-24 ye känti. † <sup>4:27</sup> Eliseo. Ma raba ñäke kukwe nebtä tärä 2 Reyes 5.1-14 ye känti.

mikadreta kuenta abko mräkä namani ribere ie. <sup>39</sup> Ye erere Jesu nikani, namani jänbtä Simón köbrän merire ye ken, käkwe drangwan juanintari Simón köbränbtä. Ye btäräbe, drangwan nikaninbe batibe btä, namaninta kuin batibe, namanintabe kuenta amne nükani dikekäta krö, nikani mrö känene niaratre bukakrä.

*Jesukwe ni bren bren mikaninta kuenta*  
(Mateo 8.16-17; Marcos 1.32-34)

<sup>40</sup> Nebti ñänä jatanina niken timon dere<sup>‡</sup> angwane, ni kwati nämane ja tare nike bren bätäkä ngwarbe kisete abko mräkä namani niken ngwena Jesuye. Ye abko, Jesu namani kise mike bti angwane, namani nebeta kuenta jökrä. <sup>41</sup> Erere arato, ni kwati btä üai käme nämane nüne abko kisete bren jänükani siba Jesuye. Ni ye abko, btä üai käme nämane niken mento, kä namani ñäke krikri be krörö Jesuye:

„Jesu, ma Ngöbö Odei, ye gare kuin tie! üai käme namani niere kore Jesuye.

Abtä Jesukwe kada ketamna üai kämeye. Nin Jesu namani üai käme tuemetre ñäke jire chi mda, ñobtä ñan angwane Jesu abko Ni Dianinkä Ngöböökwe abko namanina gare kuin üai kämeye, aisetet ñan niedre kwe gadre ni jökräye, abkokäre Jesukwe kada ketani.

*Jesu nikaninta Ngöbö Kukwei dirire*  
(Marcos 1.35-39)

<sup>42</sup> Jändrinane dekä, Jesu nikani kä kaibete juta bäre mento rabakäre kaibe akwa, ni kwati namani känentari kisere kwäräkwärä, te nikani nebe Jesu jiebti. Namanintre Jesu känti angwane, Jesu ñan rikadre, ie tö namani, kä namani Jesu ketete kisere. <sup>43</sup> Akwa Jesukwe niebare ietre:

Ngöbö kite gobrane ni ngätäite, ye tikwe mikadre gare juta ketareketare te, abkokäre Ngöböökwe ti juani, aisetet ti ñan rabadre kwe kwe kä ketetibe känti. Abko kore se, niebare kwe.

<sup>44</sup> Ye erere bkänä, Jesu namani niken kukwe ye mike gare nitre israelitaye sinagogate kwäräkwärä kä Judeate.<sup>§</sup>

## 5

*Jesukwe ni käräbare nimä ja töitiike jabe*  
(Mateo 4.18-22; Marcos 1.16-20)

<sup>1</sup> Abti bati, kä jatani ngwen dekä angwane, Jesu nämane Ñö Okwä Kri Genesaret (arabe kädianta Ñö Okwä Kri Galilea) ye köräbti angwane, ni kwati tö namani Ngöbö Kukwei nuai, kä namani Jesu kete dime ja ngätäite namani ruen Jesuye. <sup>2</sup> Ne btäräbe ni gwa gaka nämane ruäre kraze bätete, käkwe ru jakwe mikaninte krobu ñö köräbti, btä Jesu okwä namani. <sup>3</sup> Jesu nikani, nakwani ru krati te. Ru te Jesu nakwani, ye abko ru Simónkwe. Jesu namanina rute, ru ngwiamna bäri ñöte kwe Simónye, bti namani täkänintbe Ngöbö Kukwei dirire ni kwatiye. <sup>4</sup> Jesukwe diribare ünän angwane, niebare kwe mda Simónye:

Ñö okwä bäri mente nguse, ye känti ru ngwena, bti munkwe kraze kita ñöte gwa gakrä, niebare Jesukwe Simónye.

<sup>5</sup> Abtä Simónkwe niebare Jesuye:

Dirikä, deo abko kä kuin gwa gakrä. Nunkwe sribinirira kri dibire ta. Nin nun käbä nibi jire chi, akwa mata ti juen gwa gaenta, aisetet ti bike nikani, niebare kwe ie.

<sup>6</sup> Ye kwrere bkänä, Simón nikani sribi mukobe, namanintre ñö okwä nguse känti, käkwe kraze kitani ñöte angwane, batibe gwa neketaninte kabrekabre kraze ietre se kwrere. Kraze namani nötöte bee kisete gwa täni. <sup>7</sup> Amne sribi muko kwe kwe nämane ru mdate abko namanintre kärere, kä namani kise minienkä ietre abko rikadre die mike gwa ükekrö abkokäre. Erere sribikä nämane ru mdate, ye nikani gwa ükekrö siba amne gwa ükaninkrö ru krobu bti tabe kwetre. Gwa namani ñakare rute ya, aisetet bäsí ru namani

<sup>‡</sup> 4:40 ñänä jatanina niken timon dere, yebti nitre israelita nikani mräkä bren bren ngwena nebe Jesuye, ñobtä ñan angwane ñänä nikani timon dere angwane, köbö jadükakrä nikani ta abko nämane ngibiare aisetet. <sup>§</sup> 4:44 kä Judeate. Manuscrito bäri kuinkuin, yebtä Judea tä tikani. Manuscrito ñakare bäri kuin, btä Galilea tä tikani.

niken neen jökrä ñöte nguse gwa däbä täni Simón okwäbti. <sup>8</sup> Yebtä ja namani ruen käme btä ngite Jesu ngwärekri Simón Pedroye, aisetet nikaninbe ngitiekä ngukudokwäbti temen Jesu ngwärekri, kákwe niebare ie:

Ti Dänkien, ma deme ti ngwä. Ti abko moto kämekäme dikaro, aisetet nän mento tibta, niebare Simónkwe Jesuye.

<sup>9-10</sup> Simónkwe ñäkäbare kore Jesuye, ñobtä ñan angwane Simón btä Zebedeo ngäbriänkätre kädian nämane Santiago btä Juan abko kákwe ñan gwa gabare jire erere gwa gani kwetre aisetet, Jesu diebtibe gwa gani kabre kore kwe nükani gare ietre aisetet, töi ñan namani krütare. Kwrere ni mda mda nämane näin siba Simónbe ñan töi namani krütare arato, gwa gani kabre kwetre yebtä. Simónkwe ñäkäbare kore Jesuye, abtä Jesukwe niebare mda ie:

Simón, ma abko gwa gaka, akwa mtare mentokwäre ma jatadi ni gaen Ngöbökrä, aisetet ma ñan rekwtaka tibta, niebare kwe ie.

<sup>11</sup> Yebti Simón, Santiago btä Juan nikani ru ngwenante nebe ñö köräbti jate, kákwe jändrän jökrä kwe mikaninte, bti nikanintre Jesube.

*Ni iti kwata bren lebra kisete abko Jesukwe mikani kuinta*

(Mateo 8.1-4; Marcos 1.40-45)

<sup>12</sup> Bati Jesu nämane jutate angwane, ni iti bren lebra kisete, abtä ngüütüete ngrabare nükani abko ie Jesu jatabare angwane, nikani ngitiekä ngwäre timonkwäre Jesu mikakäre ütiäte, kákwe niebare ie:

Ti Dänkien, ma tö ti mikaita kuinta ne ngwane, makwe ti mikata kuinta, ie ti tö nibi, niebare kwe ie.

<sup>13</sup> Angwane Jesukwe kise mikani btä, kákwe niebare mda ie:

Ma rabata kuinta, ie ti tö nibi, aisetet gwängwarbe ma bike nebata kuinta, niebare Jesukwe ie.

Ye btäräbe ni kwata ngüütüete ngrabare ye kwata namaninta kuinta jökrä ngrabare.

<sup>14</sup> Angwane Jesukwe niebare krörö mda ie:

Tikwe ma mirita kuinta, ye makwe ñan nie jire chi ni mda mdaye, akwa ma rika ja kwata kuinta milke tuare ni blitaka Ngöböbe ni mda mda diäreye amne ni bren kore tä nebata kuinta abko kákwe jändrän mden mdene biandre niebare Moisékwe, ye erere ma rika ngwena biandre Ngöböye ma rabadre dbe niara ngwärekri abkokäre. Yebtä abko ma nenante kuinta abko rabadre gare ni jökräye, abkokäre ma rika jändrän ye ngwena. Abko kore se, niebare Jesukwe ie.

<sup>15</sup> Jesukwe ja dokwä täkäni kore ni mikaninta kuinta kwe yebe, akwa kukwe nakaninkä, yebtä abko bäri ni jökrä namani Jesu kädriere niken juta ngrabare temen, abkotari ni mda mda namani nüke ja ükekörö kwati mda Jesu kukwe nuakäre, ruäre bren abko Jesukwe mikadreta kuinta abkokäre namanintre nüke. <sup>16</sup> Akwa Jesu abko nämane niken käre kä kaibete blitakäre Ngöböbe.

*Ni ruen ñakare ngrabare abko Jesukwe mikaninta kuinta*

(Mateo 9.1-8; Marcos 2.1-12)

<sup>17</sup> Bati Jesu nämane dirire mda angwane, nitre bariseo btä Kukwe Biani Ngöböökwe Moiséye dirikätre nünanka juta ketareketare te Galilea amne Judea ngrabare temen, ruäre abko nünanka juta Jerusalénte nükani, namani täkänintbe Jesu kukwei nuen. Ye ngwane Dänkien Ngöbö di kri nämane Jesubtä ni bren bren mikakäreta kuinta. <sup>18</sup> Jesu nämane dirire gwi angwane, ni ruen ñakare ngrabare abko kisete ñan dikaka kä, mikani jäwkwatabti abko ni mda mda nükani ngwena ja ñäte, tö namanintre niken ngwena nebe gwi Jesu ngwärekri. <sup>19</sup> Akwa ni namani kwati dikaro aisetet, ñan namani tuen ngwiane gwä ietre. Abtä nikanintre jubti käin, kákwe ju mkä tikaninkä abko te ta ni bren ye gibusinkä köbtä käin timon kwetre, nükani ngitiekä temen Jesu ngwärekri ni kwati okwäbti se kwrere. <sup>20</sup> Nitre nükani ni bren ngwena amne ni bren ye namani tödeke kwatibe Jesubti namani tuen ie, kákwe niebare ni bren ye.

Ma ngite Ngöbö rüere, ye tikwe dininkä mabtä ti mräkä, niebare kwe ie.

<sup>21</sup> Angwane Kukwe Biani Ngöbökw Moiséye dirikätre btä nitre bariseo namani töbike krörö Jesubtä: Ngöbö aibe tä ni ngite niara rüere denkä mento nibtä amarebti, jse ñobtä abko ni se tä ñake kore Ngöbö rüere se! namanintre töbike kore Jesubtä. <sup>22</sup> Akwa niaratre namani töbike kore ye abko gani Jesukwe. Abtä niebare kwe ietre:

¿Ñobtä munta töbike kore tibtä yere? <sup>23</sup> ¿Dre abko bari nuäre niedre? ¿Ma ngite Ngöbö rüere, ye tikwe dininkä mabtä abko bari nuäre niedre ya? o ¿Näin krö, nän dikekä abko bari nuäre niedre ya? <sup>24</sup> Akwa ti, Ni Kä Nebtä Ngobo ne ie Ngöbökw ja di biani mun ngite Ngöbö rüere diankakäre mento munbtä kä nebtä, ye abko ti bike bä mike tuadre munye, niebare Jesukwe.

Bti niebare kwe ni ruen ñakare ngrabare yeye:

Näin krö. Jänkwata makwe ye den kisete amne nänta ja gwiriete, niebare kwe ie.

<sup>25</sup> Btaräbe, ni jökrä okwäbti, ni ruen ñakare ngrabare ye naninkrö krö, kákwe jänkwata bti nämane temen diani kisete, bti nikaninta ja gwiriete Ngöbö käkitarekä kwärä se kwrere. <sup>26</sup> Yebtä ni nämane kwati ye ñan töi namani krütare amne namani Ngöbö käikitækä jökrä, kä namani niere krörö jae kwärikwäri:

¡Aiteeje, mtarebra ñan nikwe jändrän kuin turi ya! Jändrän ne kwrere ni ngämi tuen jire bati, erere nikwe tua mtare yera, ni jökrä namani niere kore jae kwärikwäri.

### *Jesukwe Leví käräbare ja töitike jabe*

(Mateo 9.9-13; Marcos 2.13-17)

<sup>27</sup> Nebti Jesu nämane jutate, nikaninta angwane, kä jändrän ütiä käräkrä gobran romanobokrä, ye känti ta nikani mda amne, ni kädian nämane Leví nämane täkänintbe jändrän ütiä kärere yete, känti Jesu nikani mate angwane, Jesu okwä namani kwekebe Levítä, kákwe niebare ie:

Brän tibe, niebare kwe Levíye.

<sup>28</sup> Angwane jötrö ngwarbe Levíwe jändrän jökrä mikaninte, nükani dikekä krö, bti nikani Jesu jiebti.

<sup>29</sup> Abti Leví tö namani Jesu mikai ütiäte, kákwe bieta köböi kitani ja juete mda Jesukrä. Ye ngwane ni jändrän ütiä käräkrä gobran romanobokrä namani kwati täkänintbe, btä ni mda mda nämane täkänintbe mröre siba mesabtä Jesube. <sup>30</sup> Yebtä abko, nitre bariseo btä Kukwe Biani Ngöbökw Moiséye dirikätre reketaka jakri bariseobe abko namanintre ñake nitre ja töitikaka Jesube rüere, kákwe niebare ietre:

Nitre jändrän ütiä käräkrä gobran romanobokrä abko käme amne ni mda mda kukwe nuenkä kämekäme amarebti munta mröre siä kватibe te amne munta dö ñaen bentre sere, niebare kwetre.

<sup>31</sup> Nitre bariseo kákwe ñäkäbare kore, ye jarabare Jesuye angwane, Jesukwe ja bá mikani ni kräkä bianka kwrere amne nitre jändrän ütiä käräkrä amne nitre kukwe nuenkä kämekäme, ben nämane mröre ye bá mikani ni bren kwrere kwe, kákwe niebare krörö mda ietre:

Ni kuin, bren ñakare ye abko ñan tä ni kräkä bianka ribere jabtä, akwa ni bren bren abtä tä ni kräkä bianka ribere jabtä abko ti tö nibi niei munye. <sup>32</sup> Ni ie ja ruen kuin deme au Ngöbö ngwärekri mun kwrere, ye abko ñan ti jatani kärere Ngöbö kukwäre, akwa ni kukwe kämekäme nuenkä Ngöbö rüere ye mden abko ti jatani kärere Ngöbö kukwäre, niaratre kákwe ja ngite niedre Ngöböye, bti kukwe kämekäme kitadre temen kwetre amne tödekadre Ngöböbti kwetre, abkokäre ti jatani. Abko kore se, niebare kwe nitre bariseoye.

### *Ñobtä nitre ja töitikaka Jesube ñan nämane ja báine*

(Mateo 9.14-17; Marcos 2.18-22)

<sup>33</sup> Abti nitre bariseo kákwe niebare krörö Jesuye:

Nitre nänkä Juan Bautistabe btä nitre nänkä nun bariseobe abko käre tä ja báine Ngöbökrä, käre tä blite Ngöböbe. ¿Se ñobtä abko, nitre ja töitikaka mabe abko käre mröre, käre dö ñaen akwa, ja báine ñakare Ngöbökrä sere? niebare kwetre ie.

<sup>34</sup> Abtä Jesukwe kukwe bā mikani ietre, kākwe ja bā mikani ni ja mikaka gure kwrere amne, nitre ja töitikaka ben abko bā mikani kwe ni ja mikaka gure kukwe muko kwrere, kākwe niebare nitre bariseoye:

Ni iti tä nikken ja mike gure angwane, tä kukwe muko kwe kwe nübaire kä ngwiankäre nuäre gwaire jadtä, ye ngwane ñni ja mikaka gure ye tädre siba bentre angwane, kukwe muko ye raba moto ulire ja bāine ya? Ñakare. <sup>35</sup> Akwa ni ja mikaka gure ye järikadre kukwe muko okwäbti, ye ngwane rabadre ja bāine abko kore rakadikä nitre ja töitikaka tibe yebtä, niebare Jesukwe ietre.

<sup>36</sup> Kukwe ngwianintari ja bāinbtä, abtä Jesukwe kukwe bā mikani krörö dän btinbtä amne uba döi btinbtä, kākwe niebare:

Ni ñakare jire iti käta dän btin tikekä, bti tä dän ngututu gudike, ñobtä ñan angwane nikwe dän btin kukwän tikadrekä, ye ngwane dän btin juandre ngwarbe. Erere arato, dän ngututu gudikadre kukwän btin bti, ye ñan rabadre kuin. <sup>37</sup> Erere arato, chibo kwata dikani kira uba döi ngwäre, te ni ñan raba uba döi mräre keke mikadre kwaka, ñobtä ñan angwane uba döi bänän jatadre dime amne rikadre nokrekä, ye kākwe chibo kwata ngututu trekadre amne rikadre ngwarbe uba döi kwaka ben ngöi jökrä arato. <sup>38</sup> Mden kisete, uba döi mräre mikadre kwaka abko kekadre chibo kwata btinte, uba döi amne chibo kwata ñan rikadre ngwarbe. <sup>39</sup> Mdakäre abko, nita uba döi sribebare kira ñaen, yebti ni ñan töta nebe uba döi mrä ñaen mda, ñobtä ñan angwane ni uba döi kira ñaka, ye käta uba döi kira abko bäri bänänte niere. Ye kwrere arato, mun ñan tö kukwe btin dirita tikwe kaen ngäbti, tuen tie. Mun ñan tö kukwe ngututu diribare kira tuaimetre, kukwe dirita tikwe kakrä ngäbti, aiseite titä kukwe ne niere munye. Abko kore se, niebare Jesukwe.

## 6

### *Jesu abko bäri ütiäte köböjadükakrä yebti ta (Mateo 12,1-8; Marcos 2,23-28)*

<sup>1</sup> Abti bati Jesu nikani dikekä nura ngätäite köböjadükakrä näire mda angwane, nitre ja töitikaka ben nämane näin siba, kä nikani trigo ngwä ötö ji ngrabare kwetadre jae; nikani münenente, münenente, nikani kwete ji ngrabare. <sup>2</sup> Yebtä abko, nitre bariseo nämane näin ruäre, kākwe niebare nitre ja töitikaka Jesubeye:

¿Ye ñobtä jändräñ ñan nuendre jire chi köböjadükakrä näire nieta abko mun nibi nuene sere? niebare kwetre ietre.

<sup>3-4</sup> Abtä Jesukwe niebare ietre:

Bati David btä rükä kwe kwe, ie mrö namani krübäte angwane, kukwe nuenbare krörö kwetre: Ju nuäre ngwiandre känti ban deme nämane mikani Ngöbö ngwärekri, ye känti David nikani gwä, ban diani kwe, bti kwetani kwe rü muko kwe kwe ben. Ban ye abko, David btä nitre nämane ben kākwe ñan kwetadre jire chi, ñobtä ñan angwane nitre blitaka Ngöböbe ni mda mda diäre aibe kākwe kwetadre niebare Ngöböökwe, akwa niaratre kākwe kwetani, akwa namani ngite ñakare. Ngöbö Kukwei yebtä mun tärä ñäke ruen tie. <sup>5</sup> Ye kwrere abko, köböjadükakrä näire yebti ta abko ti Ni Kä Nebtä Ngobo abko bäri ütiäte, aiseite nitre ja töitikaka tibe rabadre dre dre nuene köböjadükakrä näire abko ti di tärä niere ietre. Abko kore se, niebare Jesukwe nitre bariseoye.

### *Jesukwe ni mikaninta kuinta köböjadükakrä näire (Mateo 12,9-14; Marcos 3,1-6)*

<sup>6</sup> Abti köböjadükakrä mdara jire te, Jesu nikani sinagogate, känti namani dirire angwane, ni iti küde ruenkri ara jire ngrötani ie nämane yete. <sup>7</sup> Ye ngwane Kukwe Biani Ngöböökwe Moiséye dirikätre btä nitre bariseo nämane yete arato. Jesukwe ni ye mikadreta kuinta köböjadükakräte ne ngwane, Jesukwe ja mikani ngite Ngöbö rüere niedre kwetre Jesu rüere ni mda mdaye, abkokäre namanintre Jesu ngibiatetari kisere ni küde ngrötani yebtä. <sup>8</sup> Akwa Kukwe Biani Ngöböökwe Moiséye dirikätre amne nitre

bariseo nämane töbike ño Jesubtä, ye Jesukwe gani btätre, kákwe niebare krörö ni küdengrötani yeye:

Jakwe ni jökrä ngwärekri nete, niebare kwe ie.

Erere ni ye nikani, namani nünaninkä ni jökrä ngwärekri se kwrere angwane,  
<sup>9</sup> Jesukwe niebare nitre bariseoye amne Kukwe Biani Ngöböökwe Moiséye dirikätreye:

¿Köböjadükakrä, yebtä Kukwe Biani Ngöböökwe Moiséye käta dre niere? ¿Jändrän kuin nuendre ni mdakrä ya? ¿Kukwe käme nuendre ni mdabtä ya? ¿Ni bren mikadreta kuinta ya? ¿Ni bren tuametre krüte ja okwäbti ya? Dre nuendre metrere niere tie munkwe, niebare Jesukwe ietre.

<sup>10</sup> Bti Jesukwe mikani ñäräre jire jökrä ja bäre temen, bti niebare kwe ie:

Küde ngököte, niebare Jesukwe ie.

Ye erere ni ye kákwe küde ngökaninte angwane, küde namaninta kuin batibe ie. <sup>11</sup> Yebtä Kukwe Biani Ngöböökwe Moiséye dirikätreye btä nitre bariseo kákwe kä mikaninkäbe romone, mätä namani kri Jesubtä, kä namani niere jae kwärikwäri:

¿Nikwe dre nuendi ni noko kitakrä ngite ruen? namanintre niere jae kwärikwäri Jesu rüere.

### *Jesukwe ni dianinkä ni jätäbti nibu ja kukwei ngwianka*

(Mateo 10.1-4; Marcos 3.13-19)

<sup>12</sup> Abti bati Jesu nikani blite Ngöböbe ngitiohti käin. Ye känti kä nükani ngwen ie blitabtä Ngöböbe. <sup>13</sup> Kä nükani ngwen dekä angwane, Jesukwe nitre nänkä ben ye käräbare ja känti, bti nitre ye ngätäite ni dianinkä ni jätäbti nibu kwe ja kukwei ngwianka.

<sup>14</sup> Ni dianinkä Jesukwe abko nere:

Simón, (ne mden Jesukwe kädiani Pedro arato); btä niara etba kwe Andrés; arato Jacobo, Juan, Felipe, Bartolomé;

<sup>15</sup> btä Mateo, Tomás, btä Alfeo ngobo Jacobo; arato Simón Zelote

<sup>16</sup> btä Jacobo etba kwe Judas btä Judas Iscariote. (Judas Iscariote ne mden kákwe Jesu kitani ngise müre ketadre.)

### *Jesukwe ni breñ breñ mikaninta kuinta*

(Mateo 4.23-25)

<sup>17</sup> Nebti Jesu nämane ngitiohti ni dianinkä ni jätäbti nibu kwe ye ben, nikaninta motokwäre, namaninta kiabti ngüsürü. Ye känti ni kwati nänkä ben, btä ni kwati nünanka kä ketareketare kä Judeate, juta Jerusalénte amne ni nünanka mren köräbare juta kädianta Tiro amne Sidón ye ken, kákwe ja ükaninkrö kwati Jesu ngibiare ngäbti, btä Jesu nükaninta. <sup>18</sup> Ni nükani kwati ne abko jatani Jesu kukwei nuakäre. Ni bren breñ abko Jesukwe mikadreta kuinta, abkokäre jatani. Ni ruäre abko nämane ja tare nike üai käme kisete abko namani nebata kuinta Jesu diebti. <sup>19</sup> Erere arato, Jesu die namani kri ni mikare kuinta, abkotari ni jökrä bren bren tö namani Jesu nuainbtä, erere namani nuenbtä angwane, namanintre kuinta Jesu diebti.

### *Jesukwe diribare ni kwatiye*

(Mateo 5.1-12)

<sup>20</sup> Jesukwe ni breñ breñ mikaninta kuinta, yebti nitre ja tötitaka ben amne ni mda mda nämane näin ben, ye mikani ñäräre jökrä kwe, bti niebare kwe ietre:

Mun bobre bobre, ye abko Ngöböökwe die mikadi amne kä rabadi nuäre munbtä, ñobtä ñan angwane Ngöbö tä gobrane munbti.

<sup>21</sup> Mun ruäre tä mrö nike mtare, ye abko Ngöböökwe die mikadi amne kä rabadi nuäre munbtä, ñobtä ñan angwane mun ye abko ie Ngöböökwe mrö biandi ere.

Mun ruäre tä ja müaire kä nebtä kukwe bätäkä ngwarbe btä, ye abko Ngöböökwe die mikadi amne kä rabadi nuäre munbtä, ñobtä ñan angwane mun ye abko kákwe kötadi bänante mrä.

<sup>22</sup> Mdakäre abko, ti Ni Kä Nebtä Ngobo Kwrere ne mikabtä täte, ni mda mdakwe bätä ngwiandi munbtä, ñan tö rabadi mun tuai ketetibe jabe, käkwe mun juanditari amne ñäkädi taretare kwe munye.

Ni moto kämekäme btä ñäkä raba kämekäme, ye kwrere jire ñäkä rabadi munbtä, mun ye abko Ngöböökwe die mikadi amne kä rabadi nuäre munbtä, aise te mun ñan raba ulire.

<sup>23</sup> Munkwe ja tare nika kore angwane, munkwe kä ngwian bäri nuäre jabtä amne mun rika nakwenkä kwäräkwärä, ñobtä ñan angwane munkwe ja tare nikadi ye ütiäre abko Ngöböökwe jäandrän kuin biandi munye kä käinhti sete. Munkwe kä ngwiandre nuäre kore jabtä arato, ñobtä ñan angwane nitre mun mikaka ja tare nike, ye mräkä kirakira käkwe nitre Ngöbö kukwei niekä kira abko mikani ja tare nike kore arato, niebare Jesukwe.

<sup>24</sup> Bti ni ngwian bkäne krikri btä Jesukwe blitabare krörö:

Mun ngwian bkäne krikri tödeke ñakare Ngöböhti akwa, ngwian kabre munkwe aibebti munta tödeke, aise te kä nuäre kä nebtä aibe tä munkwe, ñobtä ñan angwane mrä abko jäandrän Ngöböökwe ñan rabadi jire chi munkrä.

<sup>25</sup> Ye abko, mun ngwian bkäne krikri käta mröre trinetrine mtare kä nebtä, aise te munta nüne jáme, mun Ngöbö Kukwei töbikaire ñakare. Mun ye abko käkwe mrö nikadi tare jakän.

Erere arato, mun ngwian bkäne krikri käta kötö kuin bänante mtare, akwa mun Ngöbö käi ngwen nuäre ñakare jabtä.

Ye aise te mun ye abko moto rabadi ulire ulire ja müaire tare jakän.

<sup>26</sup> Mdakäre abko, kira nitre ni ngökaka jatani ja Ngöbö kukwei niekä niere, mika nämane ütiäte ütiäte ni jökräkwe, ye kwrere mun mikata ütiäte ütiäte jae mtare.

Akwa mtare munta Ngöbö mike ñakare ütiäte jae, aise te mrä angwane, Ngöböökwe ñan mun mikadi ütiäte jae.

Mun ye abko bobrera jakän. Abko kore se, niebare Jesukwe ni ngwian bkäne krikribtä.

*Nikwe ni rüe taredre  
(Mateo 5.38-48; 7.12)*

<sup>27</sup> Jesukwe niebare:

Mun ti kukwei nuaka nete, ye ie ti bike niere krörö: Munkwe mun rüe tare. Nire nire mätä munbtä abko kräke munkwe jäandrän kuin nuen. <sup>28</sup> Nire nire käkwe mun rätäkä taretare, ye kräke munkwe jäandrän kuinkuin kärä Ngöböye. Nire nire käkwe mun mikadre ja tare nike krübäte, ye kräke munkwe blita Ngöböbe. <sup>29</sup> Erere arato, nane ni mdakwe ma meta ngwäre küde ruenkri yebtä ma mikakäre ngwarbe jae ne ngwane, makwe ja ngwäre kwäräkri mika demaindre ie ja mäkäkäreta ben. Akwa makwe ñan ja ngie mika. Erere arato, nirekwe dän bäri kuin makwe ja mriatekrä tä mabtä ye dianka makän angwane, dän raba ötadi mabtä, ye makwe bian ie arato. <sup>30</sup> Nirekwe jäandrän munkwe kärä munye, ye erere munkwe bian ie. Erere arato, nirekwe jäandrän jen munkwe dianka munkän, munkwe ñan ja ngie mika amne munkwe ñan käräta ie. Munkwe kukwe ne nuendre kore angwane, munkwe mun rüe taredre. <sup>31</sup> Ni mda mdakwe jäandrän kuin nuendre munkrä, ie mun töta nebe, ye kwrere munkwe jäandrän kuin nuen ni mda mdakrä.

<sup>32</sup> Mdakäre abko, ni moto kämekäme tä ni niara tarekätarekä tarere, ye kwrere munkwe ni mun tarekätarekä aibe taredre arato angwane, ¿Ngöböökwe ütiä biandi munye, munta nütüre ya? Ñakare, ñobtä ñan angwane ¿dre bä jene nuenta munkwe ni moto kämekäme ngwä? ¿Ye ñan kukwe nuenta ni moto kämekämenkwe arabe munta nuene siba ya? <sup>33</sup> Erere arato, ni jäandrän kuinkuin nuenkä aibe kräke ni moto kämekäme tä jäandrän kuinkuin nuene, ye kwrere ni jäandrän kuin nuenkä munkrä aibe kräke munkwe jäandrän kuin nuendre angwane, ¿Ngöböökwe ütiä biandi munye, munta nütüre ya? Ñakare, ñobtä ñan angwane ¿dre nuendre munkwe ni moto kämekäme ngwä kore? ¿Ye ñan kukwe nuenta ni moto kämekämenkwe arabe munta nuene siba ya? <sup>34</sup> Ne

kwrere arato, ni moto kämekäme aibe tä ngwian bien ütiädre jae kwärikwäri, bti tädre tödeke ngwian jakwebti kwärikväri. Ye kwrere ni ie mun tö rabadre ja di käräi amne ngwian tärlera kwe mun die mikakrä aisetet aibe ie, munkwe ngwian biandre ütiädre angwane, „Ngöböökwe ütiä biandi munye, munta nütüre ya? Ņakare, ñobtä ñan angwane „dre bä jene nuenta munkwe ni moto kämekäme ngwä? „Ye ñan kukwe nuenta ni moto kämekämenkwe arabe munta nuene siba ya?

<sup>35</sup> Ne mden kisete, munkwe ñan mun mräkä aibe die mikadre, akwa munkwe mun rüe taredre amne munkwe jäandrän kuin nuen mun rüe die mikakrä. Erere arato, munkwe ngwian bian ütiädre mun rüeye angwane, munkwe ñan biandre ütiä diankräta töre kwäräkrita jae. Munkwe nuendre kore ne ngwane, Ngöböökwe sribi mun rüekrä ye ütiä biandi kri munye kä käinbti. Erere arato, mun rabadi Ngöbö Kri Kä Käinbti ngobore, ñobtä ñan angwane ni diän diän kräke Ngöbö ütiäte ñakare amne ni moto kämekäme tä ñüne Ngöbö rüiere, akwa Ngöbö mandama kräke, aisetet ye kwrere mun rabadre arato.

<sup>36</sup> Ni jökrä ruentari tare Ngöbö mun Rünye, ye kwrere munkwe ni jökrä ngwian ruentari tare jae, niebare Jesukwe.

*Ñan ñäkädre ni mda mda rüere  
(Mateo 7:1-5)*

<sup>37</sup> Jesukwe niebare:

Ngöböökwe ñan kukwe ükadrete mun rüiere, abkokäre munkwe ñan bika kri, käkwe ni mda mda bä mika käme ja käne. Erere arato, Ngöböökwe ñan mun mikadre ngite, käkwe mun mikadre ja tare nike kärekäre, abkokäre munkwe ñan bika kri, käkwe ni mda mda mika ngite ngwarbe. Ni mdakwe ja mika ngite mun rüiere, ye munkwe dian jabti ta angwane, mun ngite Ngöbö ngwärerekri, ye Ngöböökwe diandikä jire jökrä munbtä arato.

<sup>38</sup> Ye kwrere arato, nireta jäandrän mdei nike, ie munkwe jäandrän bian ngwarbe angwane, Ngöböökwe jäandrän biandi munye. Ye abko, munkwe jäandrän ñäkädi kuin täte, ye kwrere Ngöböökwe jäandrän biandi kuin täte munye. Ye mden kisete, munkwe jäandrän biandre ngwarbe ño ni mda mdaye, ye kwrere Ngöböökwe jäandrän biandi munye arato, niebare Jesukwe.

<sup>39-40</sup> Bti Jesukwe kukwe bä mikani krörö mda:

„Ni ja töitikaka, ye bäri töbtä kri ni dirikä ie yekrä ya? Ņakare, akwa ni ja töitikaka, ye käkwe ja töi tikadre ünän jökrä angwane, batibe rabadre töbtä dirikä ie ye kwrere, aisetet mun ngämi ja töitike ünän, känenkri mun abko ni krörökrörö kwrere: „Ni ie kä tuen ñakare, ye raba ni mda niara kwrere jie ngwen kuin ya? Ņakare, ñobtä ñan angwane ni nibu ie kä tuen ñakare ja kwrere rikadre ja jie ngwena kwärikväri ye kä oko romon mdente tuen ñakare ietre, aisetet betadrekä jräte amne rikadre ngwarbe gware. Ne aisetet, mun ngämi ja töitike ünän, känenkri munkwe ñan bika kri, kä rika ni mda mda jie ngwena, niebare kwe.

<sup>41</sup> Jesukwe kukwe mda bä mikani krörö, käkwe kukwe käme nikwe bä mikani kri oto bäri kri kwrere amne, kukwe käme nuenta ni mdakwe abko bä mikani kä büre chi kwrere, käkwe niebare:

„Kri oto bäri kri tä ma okwäte, ye ño abko ma töbikare ñakare jae amarebti kä büre chi ma mräkä okwäte, abkobtä mata nebe ja ngwen ruen tare yere? <sup>42</sup> „Ye ñobtä kri oto bäri kri tä ma okwäte abko mata dianka nütüre ñakare jae amarebti, kä büre chi ma mräkä okwäte abko, ie mata niere: Ti mräkä, kä büre ma okwäte ye, ti tuemetre denkä jae, mata niere ie? „Ye ñan ngwarbe, mata ja bä mike kuin ma mräkäbtä, käta kukwe nuene kore yera! Makwe kri oto kri ma okwäte, ye ara jire dianka käne jae, bti kä raba tuenta kuin mae angwane, batibe makwe kä büre chi ma mräkä okwäte ye dianka mda ie. Ye kwrere, munta kukwe nuene bäri kämekäme abko okwäbti, ni mdata ja mike ngite chi abko munkwe ñan bika bäri kise ngwen btä. Munkwe ñan ñäkä jire chi ni yebtä, akwa kukwe käme, yebtä mun raba moto ulire, bti kukwe ye tuemetre jire jökrä käne, abti mun raba mun mräkä die mike, niebare Jesukwe.

*Jesukwe ni töi bā mikani kri ngwätä  
(Mateo 7.17-20; 12.34-35)*

<sup>43</sup> Bti Jesukwe kukwe mda bā mikani abko krörö:

Kri ngwä kuin kwetadre ñan ngwätä nebe käme. Erere arato, kri ngwä käme kwetata ñakare, ye ñan ngwätä nebe kuin. <sup>44</sup> Ye mdən kisete, ngwätä kuin ya, käme ya, yebtä kri kuin ya, käme ya tä nüke gare nie. Ne aisetet, ḥkri tukwätē tukwätē btä nita higo ngwä kuin kwetadre ötö ya? Ñakare. Erere arato, ḥkri mda mda tukwätē tukwätē btä nita uba ngwákä ükekrö ya? Ñakare. <sup>45</sup> Ye kwrere jire abko, ni moto kuin ne ngwane, nita blite kuin ni mda mda die mikakäre, akwa ni moto käme ne ngwane nita blite ngwarbe diän diän jirekäbe, ye abko ñan tä ni mda mda die mike, ñobtä ñan angwane niara abko töi käme, yebe tä nüne. Ne aisetet ni moto ño amne ni töi ño, ye kwrere nita blite, niebare Jesukwe.

*Ju mikaka nibu  
(Mateo 7.24-27)*

<sup>46-47</sup> Bti Jesukwe niebare mda:

Mun ti kukwe nuaka nuaka nete, ye ngätäite ni ruäre käta ti Dänkien, niere tie akwa, titi kukwe nuemna abko erere tä nuene ñakare. Ni ye kwrere abko, ti bike bā mike ni krörö btä munye: <sup>48</sup> Bati ni nämane iti, kä nikani ju mike ñö köräbtä. Käne kä muani mente nguse nguse kwe, bti ürä kuin nökani kwe ju gräre, bti ju mikani kuin jäkwatabti kwe. Abti bati ñü jatani temen, ñö nikani niren niren jate, jatani mate dite jubtä se kwrere, akwa ju mikani kuin kwe, aisetet nin ñö nikani ngwena kän. Ye kwrere abko ni ti kukwe nuaka nuaka abko ie titi dre dre nuemna, erere tä nuene, ni ye abko ni iti käkwe ju mikani kuin ye kwrere. <sup>49</sup> Akwa ni mdara jire käkwe ju mikani ñö köräbtä arato abko käkwe ürä nökani käname ümante abko ñü jatani temen, ñö nikani niren niren kri jate, jatani mate dite jubtä. Ju ye abko namani jueme, aisetet ñö jatani mate btä, nikarinbe temen, nikani ngwarbe jire jökrä. Ye kwrere abko, ni ti kukwe nuaka nuaka abko ie titi dre dre nuemna akwa tä nuene ñakare, ni ye abko ni iti käkwe ju mikani jueme, nikani temen ye kwrere. Abko kore se, niebare Jesukwe ni kwatiye.

## 7

*Rükä dänkien romanobo käkwe tödekani metre Jesubti  
(Mateo 8.5-13; Juan 4.43-54)*

<sup>1</sup> Jesukwe blitabare ünän ni kватibe, yebti nikani mda juta Capernaúmte. <sup>2</sup> Ye känti rükä dänkien romanobo nämane nüne iti. Ni ye abko kwe, ni nämane iti sribikä jakrä. Sribikä ye abko mika nämane ütiäte kri kwe abko näkäni bren jume, namani tu neketebi kän. <sup>3</sup> Ne btäräbe Jesu nämane Capernaúmte kädrie namani jabtä ni rükä dänkien ye okwäbti. Jötrö ngwarbe, niara käkwe nitre unbre ji dokwätē nitre Capernaúmbo ngätäite juani Jesu kärere sribikä jakwe miketa kuinta. <sup>4-5</sup> Erere nitre unbre ji dokwätē ye jatani, nükani Jesu känti, kä namani ribere kisere krörö Jesuye:

Nitre rükä dänkien abko ñakare israelita. Niara romanobo bkänä akwa, ni israelita tare kri kwe. Niara arabe käkwe ngwian biani sinagoga jue ütiä biankrä nunkrä Capernaúm nete, aisetet niara ütiäte, aisetet makwe sribikä kwe mikadreta kuinta kräke, ie nun tö nibi abko namanintre ribere kisere kore ie.

<sup>6</sup> Te Jesu nikani bentre, nikanina nebe nitre rükä dänkien ye gwirie ken angwane, nitre rükä dänkien ye käkwe kukwe muko juani ruäre Jesu ngäbti ja kukwei niere, käkwe niebare Jesuye:

Nitre rükä dänkien käkwe ja kukwei niemna mae abko nun ki niere ma ngäbti abko krörö: Ti Dänkien, ni ütiäte ñakare ti ne kwrere abko gwiriete ni ütiäte ma ye kwrere nin rükadre jire chi ruen tie, aisetet makwe ñan ja nikadre dikaro rükakäre ti gwiriete, nibi ruen tie. <sup>7</sup> Ma bäri ütiäte, ye mdənbtä abko nin ja nüke töre jire chi tie, niken ma kärere au sribikä tikwe miketa kuinta, aisetet tikwe ni mda aibe juni ma kärere. Akwa sribikä tikwe rabadreta kuinta abko makwe niedre jirekäbe menteninbe angwane, rabadita kuinta

abko gare tie abko ti tö nibi ribei mae,<sup>8</sup> ñobtä ñan angwane ni mda bări ütiäte ütiäte, ben titi sribire, käta dre nuemna tie, erere titi nuene. Erere arato, nitre rükä tä sribire tibe abko titi juen, ye tä niken jötrö ngwarbe. Jakwe, titi niere ie, jötrö ngwarbe tä kite. Mdakäre abko, ni klabore tikwe, ie sribi ne nuene, titi niere, jötrö ngwarbe tä nuene. Ne aisetet, titi dre niere, erere tä nebe bare täte jökrä. Ye kwrere arato, makwe dre dre niedre sribikä bren tikwebtä abko erere rabadi bare täte mae ruen tie, aisetet titi ja di ribere kore mae, niemna kore nitre rükä dänkienkwe mae, niebare rükä dänkien kukwe mukokwe Jesuye.

<sup>9</sup> Yebtä Jesu ñan töi namani krütare mda, käkwe ni nämane näin ben mikani ñäräre jökrä, bti niebare kwe ietre:

Ni tödeke kwatibe Ngöböbtä ni ne kwrere, nin ngämi kwen jire tie nitre israelita ngätäite amarebtä ni menteni nünanka juta mdara jire te tä tödeke kwatibe Ngöböbtä nüke kwen mtare tie nere, niebare Jesukwe ni kwatiye kore.

<sup>10</sup> Bti Jesu nikantia ja jiebti amne ni Jesu käräkä käräkä abko nikantia janknu, nikani nebata nitre rükä dänkien känti angwane, ni klabore nitre rükä dänkienkwe, ye namaninante kuinta, btä nikani nebata abko nakaninkä kore.

#### *Meri ngobo itibe krütani kän abko Jesukwe mikaninta nire*

<sup>11</sup> Nebti Jesu nikani mda juta chi kädian nämane Naín känti nitre ja tötitaka benbe angwane, ni mda mda nikani kwati siba ben. <sup>12</sup> Nikani ngitiekä jukwebtä juta chi Naín yete angwane, mürü ngwákä jäjatani doboi mikadre, jänükani ngätäi ben. Mürü ngwákä ye abko, meri kän brare krütani abko ngobo ngörä itibe kwe ben nämane nüne abko krütani kän. Mden abko ngwákä ngwian nämane abko ben ni mda mda nämane näin kwati uliere siba, nükani ngätäi ji ngrabare Jesube. <sup>13</sup> Meri ngobo ngörä itibe kwe krütani kän, meri ye abko jatabare Jesuye amne namani ruentari tare kri Jesuye, käkwe niebare ie:

Ma bobre, ngäbäkre krüta tare makän ne abko, akwa makwe ñan müai jakän, niebare kwe meri yeye.

<sup>14</sup> Ne btäräbe jänkwata bti mürü ngwákä ngwian nämane, ye ken Jesukwe krötabare, bti kise mikani jänkwatabtä kwe mürü ngwákä yeye. Abtä ni mürü ngwákä ngwiarka namani nünaninkä jökrä angwane, Jesukwe niebare mürü ngwákä yeye:

Ngäbäkre, nüketa nire titi niere mae, niebare kwe ie.

<sup>15</sup> Erere bkänä, mürü ngwákä ye nükantabe nire batibe. Ngäbäkre ye nükani täkäintbe krö, bti nikantinbe bliteta se kwrere. Bti Jesukwe bianinta meyeye ni kwati okwäbti. <sup>16</sup> Yebtä abko, ni jökrä namani nekwetekä, akwa namanintre Ngöbö käkiterekä, kä namani niere krörö Jesubtä:

Ni Ngöbö kukwei niekä kri nüke ni ngätäite nete mtare, köböire Ngöböta ni jen kwe die mike, namanintre niere, kä ngwiare nuäre jabtä Ngöbö käkitarekä kwärä se kwrere.

<sup>17</sup> Jesukwe mürü ngwákä mikaninta nire, ye abko kädrie namani batibe jökrä Judeate ta temen btä kä kiakia te Judea bäre temen abko nakaninkä kore.

#### *Jesukwe blitabare Juan Bautistabtä*

(Mateo 11.2-19)

<sup>18</sup> Kukwe kuin ne namani bare Jesuye, ne abko nitre nänkä Juan Bautistabe nikani, käkwe niebare jire jökrä ie. Abtä Juankwe nitre nänkä ben, ye käräbare nibu ja känti, <sup>19</sup> bti ni nibu ye juani kwe ni Dänkien Jesu känti abko ni Dianinkä juandre Ngöböökwe ne abko Jesu ya, ñakare ya abko tö namani gai. Ñakare ne ngwane, ni mdara jire ngibiadre ngäbti ya, ño abko tö namani gai, käkwe ni juani nibu kukwe ye ngwentari Jesuye. <sup>20</sup> Erere bkänä, ni nibu ye nükani Jesu känti, käkwe niebare krörö ie:

Ni Dianinkä juandre Ngöböökwe rükadre ni ngätäite niebare, ye erere ma ara nükani ya o nunkwe ni mdara jire ngibiadre abko nun juanba ngwentari mae, niebare kwetre Jesuye.

<sup>21</sup> Jesukwe kukwe kani ngäbti ñakare jötrö, akwa ne btäräbe ni kwati nämane ja tare nike bren bätäkä ngwarbe kisete abko Jesukwe mikaninta kuinta. Ni ruäre abko, btä

üai käme nämane, kisete nämane ja tare nike abko Jesu namani juentari mento btä. Erere arato, ni kwati ie kä tuen ñakare abko ie Jesu namani kä mike tuenta ni juani nibu Juankwe ye okwäbti. <sup>22</sup> Bti Jesukwe niebare krörö mda ni nibu yeze:

Tita dre dre nuene tuata munkwe amne titatia dre dre niere abko kukwei nuri munkwe, ye erere mun nän niereta Juanye. Amne munkwe nie krörö ie arato: Ni ie kä tuen ñakare abko ie kä nibi tuenta kuin amne, ni nakwente abko nibi dikekäta kuin kröta. Erere arato, ni bren bren lebra kisete abko kwata nibi nebata kuin jökrä amne ni olo ngidianinte abko ie ni kukwei nibi ruenta kuin. Erere arato, ni krütanikrütani abko nibi nüketa nire amne ni bobre bobre abko ie Ngöbö kukwei kuin mika nibi gare abko munkwe nie Juanye. <sup>23</sup> Erere arato, nire nire käta tödeke tibti amne ti ne ara nükani tä nütüre amne ñan tä trö kwite tie, ni ye abko ie Ngöböökwe ja di biandi amne kä rabadi nuäre btä tikwe nini abko munkwe nie kore Juanye. Abko kore se, niebare Jesukwe ni nibu yeze.

<sup>24</sup> Ni juani nibu Juankwe nikantia angwane, nitre nämane yete ye ben Jesu rikaba blite krörö Juanbtä:

¿Mun nikani ni ño tuakäre kä kaibete? ¿Mikä juankata mürekwe nekwäre sekware, ye käta ni töi kwitaka jene jene nekwäre sekware bä mike, ni se kwrere tua nikani munkwe ya? <sup>25</sup> ¿Mun jananbare Juan mike ñäräre angwane, ni ja ükaninte kuin kákwe dän ütiäte kri kitani jabtä nämane yete abko mun jananbare mike ñäräre ya? Ñakare, ñobtä ñan angwane ni dän ütiäte kri kitani jabtä, ni ye kwrere abko tä nüne jáme jrei gwiriete amne ñan tä nüne kä kaibete abko garera munye ruen tie. <sup>26</sup> ¿Akwa mun nikani ni ño mike ñäräre metre? ¿Mun nikani ni Ngöbö kukwei niekä mike ñäräre ñan ñan? Jänri, mun nikani ni kore mike ñäräre. Akwa Juan ye abko bäri Ngöbö kukwei niekä kri abko mun nikani tuen.

<sup>27</sup> Juan ye mdentä tärä tä tikani krörö Ngöbö Kukweibti: Ngöböökwe niebare: Tikwe ja kukwei ngwianka juandi iti ma känenkri.

Niarakwe ni töi mikadi biare ma käne, ji ükateta biare ye kwrere, abko tä tikani kore Juanbtä.

Malaquías 3.1

<sup>28</sup> Ne mdentä kisete, ti bike kukwe niere krörö munye: Ni jökrä därebare kä nebtä, ye ngätäite ni ñakare jire iti abko bäri ütiäte Juankrä; akwa nire nire bäri bobre, ütiäte ñakare, bti Ngöböta gobrane, ni ye abko bäri ütiäte Juankrä, niebare Jesukwe.

<sup>29</sup> Jesukwe Juan mikani bäri ütiäte kore, abtä ni kwati Jesu kukwei nuaka nuaka amne nitre ngwian käräkä gobran romanobokrä nämane yete kákwe kukwe mikanintbe Ngöböökwe ni diantarikrä diribare Juankwe, ye abko era bä mikani, ñobtä ñan angwane niaratre kákwe ja mikani ngökadre ñöte Juanye aisetet. <sup>30</sup> Akwa nitre bariseo btä Kukwe Biani Ngöböökwe Moiséye dirikätre namani yete Jesu kukwei nuen arato amne kukwe mikanintbe Ngöböökwe ni diantarikrä diribare Juankwe, ye abko niaratre namani mike ngwarbe jae, ñobtä ñan angwane ñan ja mikani ngökadre ñöte kwetre Juanye, ñobtä ñan angwane nin namani moto ulire kukwe kämekämenbtä aisetet. <sup>31</sup> Ni jökrä kákwe töbikabare ñakare ja kwrere Juanbtä kore, abtä Jesukwe niebareta ietre:

Ne mdentä abko ni nünanka kä ne näire abko ti bike bärä mike krörö: Kä jäandrän rürümoinkrä jutate, känti ngäbäkre tä nebe täkänintbe temen, käta ñäke krikri mräkä mda mdaye, yebtä ti bike ni nünanka kä ne näire bärä mike krörö: <sup>32</sup> Ngäbäkre tä niere mräkaye: Nunkwe nörä jürü tärä mikakrä munye, akwa mun ñan tö nibi tärä mikai. Abtä ka ni moto mikakrä ulire abko nunkwe nini mda, akwa munkwe müaniri ñakare arato abko ngäbäkreta niere. Ye mdentä kwrere munta niere Juanbtä amne tibtä, aisetet titatia nitre ye bärä mike kore, <sup>33</sup> ñobtä ñan angwane Juan Bautista nükani angwane, üai käme tä btä, aisetet ñan tä mröre kri amne ñan tä dö ñaen, munta niere rüere. <sup>34</sup> Yebtä ti, Ni Kä Nebtä Ngobo rükaba mda angwane, ti abko mröre büle krikri amne ti dö ñaen krübäte munta niere tibtä. Mdakäre abko, ti ja getaka ni diän diän ben amne nitre jäandrän ütiä käräkä gobran romanobokrä tä tuen käme munye abko ben titatia ja gete, abtä munta ñäke ti rüere arato. Ye mdentä abko mun ngäbäkre kwrere titatia niere. <sup>35</sup> Akwa ni nüne töbtä era metre Ngöbö diebti nun kwrere, yebtä abko nun abko ni jen Ngöböökwe era metre abko nunta bärä mike. Abko kore se, niebare Jesukwe.

*Ñö rä bâne ütiâte kri kekani Jesu ngotobi*

<sup>36</sup> Nebti bati, bariseo kädian nämane Simón käkwe Jesu ngwiani mröre ja gwiriete. Erere Jesu nikani, namani täkänintbe mesabtä Simón juete angwane, <sup>37</sup> meri bti kängwarbe nämane nüne juta ne arabe känti abko Jesu nükani mröre Simón gwiriete gani kwe. Angwane ñö rä bâne ütiâte kri kädian nämane nardo nämane jä bâ ngwen kädianta alabastro dätebare boteare te, ye jänükani kwe Jesu känti. <sup>38</sup> Müare kwärä nikani ngitiekä Jesu ngotobtä temen, kä nikani Jesu ngoto bätete ni klabore kwrere, akwa ja okwâ ñöibti bätäninte kwe. Jesu ngoto bätäninte ünän kwe, bti rötaninta kwe ja dokwâ drüenbti, ngoto demainbare kwe, bti ñö rä bâne kekani kwe Jesu ngotobi, namani Jesu tarere kri mikakäre tuare ie. <sup>39</sup> Ye abko nakaninkä Simón, Jesu nübaikä mröre ja känti ye okwâbti. Abtä Simón namani töbike krörö mda Jesubtä: ¡Jo! Ni noko Ngöbö kukwei niekä bkänä ne ngwane, ni ñö tâ nuenbtä ngotobtä gadre kwe. Amne meri se bti kä ngwarbe ni jökrä tâ kädriere kämekäme rükadre gare btä ie arato bâ amarebti se, Simón namani nütüre kore Jesubtä. Ne Jesukwe gani Simónbtä, <sup>40</sup> abtä niebare mda kwe bariseo yeye:

Simón, ti tö kukwe ngwaintari kwati mae, niebare Jesukwe ie.

Simón käkwe niebare mda Jesuye:

¿Abko dre? niebare kwe ie.

<sup>41</sup> Ne btäräbe, Jesu nikaninbe kukwe bâ mike meri yebtä Simónye:

Bati ni nämane iti abko ngwian bkâne kri. Ni ye abko nämane ngwian bien ütiâdre ni mda mdaye. Ni ye abko, ie ni nibu käkwe ngwian kärâbare ütiâdre ie. Ni iti, bti rürümön ütiä nämane siento krärike jire amne ni mda abko, bti rürümön ütiä nämane gre ketarike. <sup>42</sup> Rürümön ütiä nämane krörö ni nibubti, akwa nin ngwian namani kwenta jire ietre biandreta ja ütiâreta. Abtä ngwian bkänä käkwe niebare ietre: Tikwe ngwian bianba ütiâdre munye, akwa ngwian ñakare munye biandreta ja ütiâre tie, aisetetibike rürümön ütiä munbti ye käkwitekä jabti jökrä, niebare kore kwe ni nibu yeye. ¿Ni nibu ne mdenkwe ni ngwian bkänä taredi bâri ruen mae? niebare Jesukwe Simónye.

<sup>43</sup> Simónkwe niebare mda Jesuye:

Ni bti bâri rürümön ütiä kri käikwitaninkä jabti ngwian bkänkâkwe, ni ye abko käta ngwian bkänkä tarere bâri raba ruen tie, niebare kwe Jesuye.

<sup>44</sup> Bti meri ye nükani Jesu ngoto bätete, ye Jesukwe mikani ñäräre, käkwe niebare Simónye:

Simón, ti nü gwi ma känti nete, makwe ti miri ngwarbe jae, käkwe nin ñö bini jire chi tie ja ngoto bätätekra ti kakrä ngäbti, akwa meri ne nü, käkwe ti ngoto bâtrite ja okwâ ñöibti, bti rütüta kwe ja dokwâ drüenbti, mike ñäräre makwe, btä makwe töbika.

<sup>45</sup> Erere arato, ti ki gwâkäre mae angwane, nin makwe ti demainiri jire ti kakrä ngäbti kuin, akwa ti ki gwâkäre amne, meri ne nikirabe ti demaine ngotobtä abti kä nüke nere.

<sup>46</sup> Mdakäre abko, ti nü amne nin makwe olibo köi ütiä brai kiri ti dokwâbti ti kakrä ngäbti kuin, akwa meri ne abko käkwe ñö rä bâne ütiâte kri kiri ti ngotobi. <sup>47</sup> Era metre meri ne käkwe ja mikani ngite kabre Ngöbö rüere bkänä akwa, tikwe niara ngite dininkä jire jökrä btä. Mdenbtä abko tâ ti tarere bâri makrä bâ mirita kore kwe, ni bti ngwian ütiä käikwitaninkä jabti ngwian bkänkâkwe ye kwrere abko ti tö nibi niei mae Simón, ñobtä ñan angwane ni ngite ñakare bökän diankata nibtä, ni ye abko ñan tâ ni tarere dikaro. Abko kore se, niebare Jesukwe Simónye.

<sup>48</sup> Bti Jesukwe niebare mda meri yeye:

Ma ngite kukwe kämekämenbtä, ye tikwe dininkä jökrä mabtä, niebare Jesukwe ie.

<sup>49</sup> Abtä ni mda mda nämane siba yete, ye namani niere krörö jae kwäríkwäri:

¿Ni noko nire amarebti tâ ni ngite denkä nibtä tâ niere sere? namanintre niere kore Jesubtä.

<sup>50</sup> Akwa Jesu abko nikani niere janknu krörö meri yeye:

Ma nibi tödeke kwaribe tibti, köböire kukwe kämekäme btä ma ngite, ye tikwe dininkä mabtä, aisetetibike nänta jáme, niebare Jesukwe ie.

## *Nitre merire Jesu die mikaka*

<sup>1</sup> Nebti Ngöbö jatanina nüke gobrane nibti abko kukwe kuin Jesu nikani niere juta krikrite amne juta kiakiate kä Galileate ta temen. Ye ngwane, nitre ja tötitikaka Jesube ni jätabti nibu nämane näin siba ben. <sup>2</sup> Erere arato, ni merire merire bren bren mikaninta kuinta Jesukwe, ruäre abko btä üai käme juanintari kwe, ye abko nämane näin ruäre. Ni merire nämane näin siba Jesube abko nere: María Magdalabo, María ne mdenbtä Jesukwe üai käme krä kükü juanintari mento. <sup>3</sup> Arato Juana nämane näin siba. Juana ne abko ni iti kädian nämane Chuza merie. Chuza abko ju ngibiabtikä jrei Herodes Antipas kräke. Arato Susana nämane näin siba. Ye ngwane meri mda mda nämane näin kwati siba abko jändräñ nämane kwekwe, erere bti nämane Jesu btä nitre ja tötitikaka ben die mike.

*Dobo ketabkä, btä Jesukwe kukwe bā mikani*

(Mateo 13.1-9; Marcos 4.1-9)

<sup>4</sup> Ne ngwane bati ni nünanka juta ketareketare Galilea temen namani nüke ja ükekrö kwati ja tuakäre Jesube abko ie Jesukwe kukwe bää mikani krörö: <sup>5</sup> Bati ni nikani iti nura metekä. Nura metaninkä kwe angwane, nura ruäre nikani mate ji ngrabare temen. Nura ye abko ni jatani, kákwe rätäbare jökräbti. Bärire mda abko nukwä jatani, kákwe kwetani jökrä kän. <sup>6</sup> Nura ruäre abko nikani mate jäkwatabti temen abko nükani mure, akwa dobo nötare dikaro, aisetet ngrötäninkä jökrä. <sup>7</sup> Nura ruäre abko nikani mate kökrä tukwätetukwäte ngätäite, ye abko nükani mure arato, akwa kökrä ye abko rirabare bärä jötrö nura mu yebti ta, kákwe kämikani. <sup>8</sup> Akwa nura nikani mate dobo kuinte, ye abko nükani mure amne rirabare tuärebe, bti ngwä nikani nebe btä btä amne datire datire ngwä namani gre ketarike. Ne abko nakaninkä kore, niebare Jesukwe ni kwatiye kore.

Ye btäräbe, Jesukwe ñäkäbare jume ja dibti krörö mda ni kwati yeye:

Nire nire käta ti kukwei nuen, ye abko olo tärä ne ngwane, ti kukwei ne ketate ja olote kwe, kukwe ne rükadre gare kuin munye abkokäre. Abko kore se, niebare Jesukwe.

## *Ñobtä Jesukwe kukwe bë mikani*

(Mateo 13,10-17; Marcos 4,10-12)

<sup>9</sup> Jesukwe kukwe b   mikani kore ne   nan n  kani gare nitre ja t  titikaka benye, k  kwe niebare ie:

Makwe kukwe b   miri, ye abko dre b   miri kore makwe yere, niebare kwetre Jesuye.

<sup>10</sup> Abtä Jesukwe niebare mda ietre:

Ngöbö rükadre gobrane ño nibti abko tä tiebe, akwa Ngöböta mike gare munye, akwa ni mda mda abko ie Ngöböta mike gare ñakare, aisetetita kukwe bá mike kore, Ngöbö Kukwei tä tikani krörö rabadre bare abkokäre:

Nebtä nikradre bäri kwetre, akwa kukwe ño ñan jatadre metre ietre amne ni kukwei  
nuadre bäri kwetre akwa, ñan rükadre gare ietre, Isaías 6.9

kokäre tita kukwe bää mike kore ietre, Ngöbö kukwei niekä kirakira käkwe niebare ni

Stańcie kwestie.

## Dobo ketabkä tä dre niere abko n̄

<sup>13</sup>See also the discussion in the North American article.

<sup>11</sup> Kukwe nini tikwe ye abko tä kukwe krörö bā mike: Ngöbö Kukwei abko nura kwrere.  
<sup>12</sup> Amne nura nikani ngitiekä ji ngrabare temen, ye abko ni ruäre tä Ngöbö Kukwei nuen akwa, diablu tä kite, käta Ngöbö Kukwei ye denkä jökrä töite, ni ye käkwe ñan Ngöbö Kukwei mikadre era amne ñan rabadre dianintari abkokäre, mden nini tikwe ye. <sup>13</sup> Amne ni ruäre abko käta Ngöbö Kukwei nuen amne käta nebe nuäre btä kare ngäbti. Ni ye abko nura nikani mate jäkwatabti ye kwrere, ñobtä ñan angwane nura nikani mate jäkwatabti abko ngätri ñan nämane bökän, ye kwrere jire ni ruäre tä Ngöbö Kukwei kaen ngäbti, bti bā jötrö tä tödeke Ngöböbti. Tädre niken ja tare nike tödekabtä Ngöböbti amne käta Ngöbö Kukwei kiteta temen, bti tä nikenta ja jiebti. <sup>14</sup> Amne ni ruäre abko tä Ngöbö Kukwei nuen, akwa tä nakwen bärä jändräñ kä nebtä jiebti amne, tä ngwian tarere bärä

amne jändrän nuäre nuäre kä nebtä yebtä tä ja kite, ye abko käta ngökö. Ne aisetet ni ye abko nura nikani mate kökrä tukwätetukwätte ngätäite amne ngatani, ye tä nakenkä ni yebtä, aisetet nura ngatani ngwā namani ñakare, ye kwrere jire ni ye tä sribi nuene ñakare Ngöbökrä. <sup>15</sup> Akwa nura nikani ngitiekä dobo kuinte, ye abko ni töi kuin amne tä biare, käta Ngöbö Kukwei nuen angwane, tä ketete dime jabtä amne tä nünenkä dite btä. Ni ye abko nura ngwāta neme kuin ötata kabre, ye kwrere jire ni yetä jändrän kuin nuene Ngöbökrä. Abko kore se, niebare Jesukwe ietre.

*Jesukwe ja kukwei bā mikani ñotra kwrere  
(Marcos 4.21-25)*

<sup>16</sup> Jesukwe niebareta:

Ni ñakare jire iti käta ñotra jutra mike abti tä jue miketa kaja täni. Erere arato, ñan tä mike jän täni jae, akwa ñotra jutra mikata angwane, mikata üräbtä käinträ rabadre ngitie jökrä gwita temen, ni jökrä gwi, ie kä rabadre tuen abkokäre. <sup>17</sup> Ye kwrere arato, titakuwe jire jökrä dirire kaibe tiebe munye mtare, akwa batira jire munkwe mikadi gare ni jökräye. Erere arato, kukwe diribare tiebe tikwe, batira jire rabadi gare metre ja ngwärerekri jökrä. <sup>18</sup> Ne aisetet olo ketete kuin ti kukweiye munkwe, ñobtä ñan angwane nire nire ie Ngöbö Kukwei ñuke gare, ye abko ie Ngöbökrwe ja Kukwei biandi bari mda; akwa nire nire ie Ngöbö Kukwei gare ñakare, ye abko ie Ngöbö Kukwei gare kiakia abko Ngöbökrwe diandikä jökrä kän. Abko kore se, niebare Jesukwe nitre ja töitikaka benye.

*Nire abko Jesu mräkä era metre  
(Mateo 12.46-50; Marcos 3.31-35)*

<sup>19</sup> Ye ngwane, Jesu meye amne etbakantre abko nikani jiebti ja tuakäre ben angwane, ni nämane kwati Jesu bäre temen, aisetet niaratre ñan namani nebe Jesu känti. <sup>20</sup> Angwane ni iti käkwe niebare Jesuye:

Ma meye amne ma etbakantre tä ju bäre nokote abko tö nibi blitai mabe, niebare kwe ie.

<sup>21</sup> Jesukwe niebare ni jökräye:

Nire nire tä Ngöbö Kukwei nuen, erere tä mike täte, ni ye abko ti meye tikwe amne ti etbakantre tikwe era metre, niebare kwe.

*Jesukwe müre amne ñö mikani kwekbe  
(Mateo 8.23-27; Marcos 4.35-41)*

<sup>22</sup> Abti bati Ñö Okwā Kri Galilea känti Jesu nakwani rute, käkwe niebare nitre ja töitikaka benye:

Brän ñö okwā kwärä sekri, niebare kwe.

Ye erere nikaintre. <sup>23</sup> Nikaintre ñöbti angwane, Jesu nikani kibien. Batibe müre jatani mate ribi krübäte ñö okwā ye känti, ye abko namani ñö kite jökrä rute, aisetet ru jatani nikken ñöte nguse se kwrere. <sup>24</sup> Yebtä abko nitre ja töitikaka ben nikani gaenkrö, käkwe niebare ie:

¡Dirikä, ni kite nikken ñöte nguse! niebare kwetre Jesuye.

Angwane Jesu nükaninta krö, käkwe ñäkäbare müreye amne ñöye. Ye btäräbe, müre amne ñö namani kwekbe jökrä. <sup>25</sup> Bti Jesukwe niebare nitre ja töitikaka benye:

¿Munta tödeke kwatibe Ngöböbti ya ño yere? niebare kwe ietre.

Akwa niaratre abko namani nekwetekä krübäte amne töi ñan namani krütare, kä namani niere jae kwärikwäri:

¿Ni ne abko ni ño amarebti tä ñäke müreye amne ñöye amne, tä niara kukwei mike täte se? namani niere jae kwärikväri.

*Ni Gadarabo btä Jesukwe üai käme juanintari mento  
(Mateo 8.28-34; Marcos 5.1-20)*

<sup>26</sup> Nebti niaratre nikani janknu rute ñöbti nebe käkä Gadarete Ñö Okwā Kri Galilea kwäräkri. <sup>27</sup> Jesu nämane rute, nikani jate angwane, juta yete ni nämane iti abko btä üai käme nämane abko jatani Jesu ngäbti. Raire abko ni ye nämane dän kite ñakare jabtä

amne nämane nüne ñakare gwi, akwa nämane nüne rökabti. <sup>28</sup> Jesu jatabare ie angwane, nikani ngitiekä ngukudokwäbti temen Jesu ngwärekri, kákwe ngratebare kri krörö:

Jesu, Ngöbö Kri Kä Käinbtì Odei, ¿ye ñobtä ma kite ti nike nete ye? Makwe ñan ti mika ja tare nike abko ti tö nibi ribei mae, namani niere Jesuye.

<sup>29</sup> Üai käme rikadre mento btä abko Jesukwe niebarera ie, aisetet namani ñäke krikri kore. Batire batire üai käme nämane niken ni yebtä angwane, ñan gitiadre künken, abkokäre kise amne ngotokwä mäkäte nämane jökrä ie kadenanbtì, akwa nämane kadena ötöte jökrä angwane, üai käme nämane niken ngwena kä kaibete. <sup>30</sup> Ni ye abko ie Jesukwe niebare:

¿Ma kä ño? niebare kwe ie.

Angwane üai kämentre kákwe niebare mda ie:

Ti kä Kabre, niebare kwetre.

(Ja kä Kabre, niebare kwe, ñobtä ñan angwane üai käme nämane kabre btä aisetet.)

<sup>31</sup> Ye mden kákwe ñan ja juamna kä ja tare nikakrä te Kä Timonbtì Jesuye. <sup>32</sup> Ye känti abko mtü nämane kabre krübäte mröre bä känime ngudrebtäta, aisetet üai kämenkwe ja juamna mtü yebtä Jesuye, erere Jesukwe juani mtübtä. <sup>33</sup> Üai käme nämane nibtä, ye abko nikani mento btä, bti nikani mda mtü kabre yebtä. Ye btäräbe mtü kabre ye nikani betekä jökrä ja jiebti kä btä motokwäre, nikani ngitiekä jökrä ñöte, känti müre neketani jökrä.

<sup>34</sup> Nitre mtü ngibiaka abko okwäbti kukwe nakaninkä kore. Yebtä abko niaratré nikani betekä ngitie, kä nikani kukwe ye niere jökrä juta ngrabare temen amne juta bäre mento arato. <sup>35</sup> Abtä kukwe nakaninkä ño abko ni kwati nükani tuen, känti nikantre nebe Jesu känti angwane, ni btä üai käme nämane abko nikani mento, ni ye abko kákwe dän kitani jabtä amne kä namani ruenta kuin bti nämane täkänintbe Jesu ken, btä namanintre angwane, kä jürä namani kri btätre. <sup>36</sup> Angwane ni btä üai käme nämane ye abko namaninta kuinta ño abko nitre tuakatuaka namani niere jökrä ni mda mdaye. <sup>37</sup> Yebtä abko, Jesu di kri krübäte gani kwetre, aisetet kä jürä namani kri nitre Gadarabobtä, aisetet jötrö ngwarbe Jesu rikadre kä mdabti abko namanintre ribere ie. Ye erere Jesu nakwaninta rute nitre ja tötitkaka benbe, bti nikantia.

<sup>38</sup> Akwa Jesu ngämi nikanta, känenkri ni btä üai käme nikani mento ye abko Jesu rikadre ngwena jabe abko namani ribere Jesuye, akwa niara rabadre jirekäbe yete, Jesukwe niebare ie. Angwane Jesukwe niebare krörö mda ie:

<sup>39</sup> Nänta jirekäbe ja gwiriete amne Ngöbökwé dre nuni makrä, ye erere makwe nie jökrä ni mda mdaye. Abko kore se, niebare Jesukwe ie.

Ye erere bkänä, Jesukwe dre nuenbare niara kräke, erere nikani niere jökrä juta ngrabare temen.

*Jesukwe Jairo ngänkän mikaninta nire amne meri bren abko mikaninta kuinta kwe  
(Mateo 9.18-26; Marcos 5.21-43)*

<sup>40</sup> Yebti Jesu nikani nebata Ñö Okwä Kri Galilea kwäräkri mda angwane, ni nämane kwati ngibiare ngäbti, aisetet kä namani nuäre btätre Jesu kare ngäbti. <sup>41</sup> Ye btäräbe ni kädian nämane Jairo nükani Jesu känti. Jairo abko nämane sinagoga dänkiene juta yete abko jatani, nikantibet ngitiekä ngukudokwäbti temen Jesu ngotobtä ja mikakäre bobre btä, kä namani Jesu ngwen kisere nebe ja gwiriete. <sup>42</sup> Ngänkän itibe kwe abko ie kä kwä jätäbti kubu abko jatani krüte kän, aisetet namani Jesu ngwen ja känti. Ye erere Jesu nikani angwane, ni nikani kwati krübäte ben, kä namani kete dime ja ngätäite, namani ruen ie.

<sup>43</sup> Angwane nitre nikani kwati Jesube, ye ngätäite meri nämane näin iti siba abko kä kwä jätäbti kubura nämane bren dbä tibiere abko kisete nämane ja tare nike amne, ngwian nämane kwe, erere ganinte jökrä kwe kräkäbtä jakrä akwa, ñakare namani nökröta nitre kräkä biankaye. <sup>44</sup> Te meri ye abko nikani, kákwe krötäbare ja ken Jesu trökri, kákwe dän Jesubtä nuaninbtä tiebe köräbtä. Ye btäräbe namaninta kuinta batibe se kwrere. <sup>45</sup> Angwane Jesukwe niebare:

¿Nirekwe dänkä nuribtä tibta ye? niebare kwe.

Akwa ni jökrä namani ja rükente. Abtä Pedrokwe niebare Jesuye:

Dirikä, ni kwati nibi ma kete dime ja ngätäite, kä nibi ma kitekä nekwäre, sekwäre. ¿Ye ñobtä abko nirekwe ma nuribtä ma nibi niere yere? niebare Pedrokwe ie.

<sup>46</sup> Akwa Jesukwe niebareta mda:

Ni iti kákwe ti nuribtä tikwe gari, ñobtä ñan angwane Ngöbö di tä tibta abko niki ruäre mento tibta, nibi ruen tie, niebare kwe.

<sup>47</sup> Angwane meri ye kákwe ja rükandrete ño mda ñan namani nüke gare ie, akwa kä jürä namani btä. Abtä namani grükekä jökrä ngrabare, nikani, namani ngukudokwäbti temen Jesu ngotobtä ja mikakäre bobre btä angwane, ñobtä Jesu nuaninbtä kwe amne namaninta kuinta ño abko niebare jökrä kwe ni jökrä ngwärerekri Jesuye. <sup>48</sup> Angwane Jesukwe niebare mda ie:

Ti mräkä, makwe tödiri kватibe tibti, köböire ma nibirate kuinta, aise te nänta jáme, niebare kwe meri yeye.

<sup>49</sup> Jesu nämane blite kore angwane, sinagoga dänkien ye jiebti ni mdara jire nükani kukwe ngwena, kákwe niebare ie:

Ma ngänkän kürera makän. Makwe ñan dirikä nika mda, niebare kwe ie.

<sup>50</sup> Blitabare kore kwe, ye jarabare Jesuye angwane, Jesukwe niebare:

Ma ñan rekwetaka ngäbäkre jiebti jakän, akwa makwe tödeka kватibe janknu tibti angwane, ma ngänkän rabadita kuinta, niebare kwe ie.

<sup>51</sup> Yebti nikanintre nebe gwi angwane, Jesukwe Pedro, Santiago, Juan amne meri batie rün amne meye aibe tuanimetre niken nebe gwi jabe. <sup>52</sup> Angwane ni jökrä nämane meri batie krütani ye uliere amne müaire krikri be gwi, btä Jesu namani. Akwa niarakwe niebare ietre:

Ngäbäkre merire ye kürera munta nütüre, akwa tä kibien, aise te munkwe ñan müai mda, niebare kwe ietre.

<sup>53</sup> Akwa meri ye krütani bkänä namani gare ietre, aise te namanintre Jesu kötaire jökrä.

<sup>54</sup> Akwa Jesu nikani, kákwe meri ngwökä ye kani küdebtie, bti ñäkäbare krörö kwe ie:

Ti ngänkän, ¡Näin krö! niebare Jesukwe ie.

<sup>55</sup> Ye btäräbe üai nükanintabe btä, aise te nükanintabe nire angwane, nükaninbetäkänintbeta krö, bti Jesukwe bukamna mräkäye. <sup>56</sup> Meri batie mikaninta nire kore Jesukwe, yebtä abko rün amne meye ñan töi namani krütare mda. Akwa kukwe nakaninkä ño, ye abko ñan kädriedre jire kwetre ni mda mdabe, Jesukwe niebare ietre.

## 9

*Jesukwe nitre ja töitikaka ben juani Ngöbö kukwei dirire*

*(Mateo 10.5-15; Marcos 6.7-13)*

<sup>1</sup> Yebti Jesukwe nitre ja töitikaka ben ni jätäbti nibu ükaninkrö, bti Ngöbö die biani kwe ietre üai käme bätäkä ngwarbe juantarikrä mento amne ni bren bren mikakräta kuinta arato. <sup>2</sup> Bti Ngöböta gobrane ni ngätäite kädriedre kwetre amne ni bren bren mikadreta kuinta kwetre, abkokäre Jesukwe juani, <sup>3</sup> kákwe niebare krörö ietre:

Mun ñan rika tribe ngwena jire chi mda jabtä ji ngrabarekäre abko krörö: Mun ñan rika mökän amne kra ngwena jae. Erere arato, mun ñan rika mrö, ngwian amne dän mda ngwena jae, ñobtä ñan angwane munkwe tödekadre Ngöböbiti, ie ti tö aise te. <sup>4</sup> Ju mdente mun raba nünentbe, ye aibe känti mun raba. Mun ñan rika ju kwatirekwatire te, akwa mun raba ju kватibe te, abti mun rikata. <sup>5</sup> Akwa juta känti mun ñan ka tö raba ngäbti ni mdakwe, ye känti munkwe kä mikaka, akwa munkwe dobro mnü ngrükate ja ngotobtä, nitre ye ara jire ngite Ngöböye ja töi jenbti bë mikakrä ietre, niebare Jesukwe ietre.

<sup>6</sup> Ye erere nitre ja töitikaka Jesube nikani juta kwatirekwatire kä ngrabare temen kukwe kuin Jesubtä ye kädriere amne, nikani ni bren bren miketa kuinta arato.

*Jesu abko nire jrei Herodes tö namani gai*

*(Mateo 14.1-12; Marcos 6.14-19)*

<sup>7</sup> Kukwe namani nakenkä kore Jesu köböire, ye gani Herodekwe angwane, nire köböire nämane nakenkä ñan namani nüke gare ie, ñobtä ñan angwane Ngöbökwe Juan Bautista mikaninta nire abko ni ruäre namani niere Jesubtä. <sup>8</sup> Akwa Ngöbö kukwei niekä kira kädian nämane Elías abko nükaninta ni ruäre namani niere. Mdakäre abko, Ngöbö kukwei niekä kira mda abko nükaninta nire, ni mda namani niere Jesubtä. <sup>9</sup> Abtä Herodekwe niebare:

¿Tikwe Juan dokwä tikakamna, aisetē ni ye ñakare Juan amarebti nire abko btä blitata krübäte dikaro kore ne? niebare Herodekwe.

Yebtä abko Herodes tö namani ja tuai Jesube.

### *Jesukwe ni mili krärike bukaní*

(Mateo 14.13-21; Marcos 6.30-44; Juan 6.1-14)

<sup>10</sup> Abti nitre juani ja kukwei ngwianka Jesukwe ye nükaninta jökrä Jesu känti angwane, dre dre nuenbare kwetre, ye erere niebare jökrä kwetre Jesuye. Abti Jesukwe käräbare jenena angwane, nikani ngwena kä kaibete juta Betsaidate. <sup>11</sup> Akwa Jesu nikani ye abko ni kwati käkwe gani angwane, nikani niaratre jiebti amne, Jesukwe kani ngäbti kuin, bti Ngöbota gobrane ni ngätäite, yebtä Jesukwe blitabare bentre amne ni bren bren abko mikaninta kuinta kwe. <sup>12</sup> Yebti kä jatanina dere angwane, nitre ja tötitaka Jesube ni jätäbti nibu nikani, käkwe niebare ie:

Nita kä kaibete nete, jäandrän ñakare kwetadre, aisetē nitre se juenta jökrä jadüke amne mrö känene jae juta käntikänti sete kä ngrabare temen, niebare kwetre Jesuye.

<sup>13</sup> Abtä Jesukwe niebare mda ietre:

Niaratre buka munkwe, niebare kwe ietre.

Abtä niebare kwetre ie:

¿Banta kunrikebe amne gwata krobube nikwe, se abko biandre ño ietre? ¿Ni kwati se kräke, ni rikadre mrö kökö ya? niebare kwetre mda Jesuye.

<sup>14</sup> Ye ngwane abko, ni brare aibe nämane mili krärike jire, akwa Jesukwe niebare mda nitre ja tötitaka benye:

Nitre ye mika täkänintbe gre ketebu bti ni jätä jätä ja täritäri, niebare kwe ietre.

<sup>15</sup> Ye erere Jesu kukwei mikani täte kwetre, käkwe nitre mikani täkänintbe jökrä temen temen. <sup>16</sup> Bti Jesukwe ban kunrike amne gwa krobu diani kisete, käkwe nikrabare kä käinbti, kuin niebare kwe btä Ngöböye, bti ñäkänintbe kiakia kwe, bti biani kwe nitre ja tötitaka ben yeye dräidre ni kwati yebti. <sup>17</sup> Angwane ni jökrä käkwe mröbare, namani trinetrine, bti ban amne gwa oto namaninte abko ükaninkrö kutia kwä jätäbti kubu jire.

### *Jesu abko Ni Dianinkä Ngöbökwe, niebare Pedrokwe*

(Mateo 16.13-19; Marcos 8.27-29)

<sup>18</sup> Yebti bati Jesu nämane blite kaibe Ngöböbe angwane, nitre ja tötitaka ben nämane yete ben abko ie niebare krörö kwe:

¿Ti ne abko nire nieta ni mda mdakwe tibtä? niebare kwe.

<sup>19</sup> Angwane nitre ja tötitaka ben käkwe niebare ie:

Ma abko Juan Bautista nükaninta nire nieta ni ruärekw amne ni mda abko käta ma Elías nükaninta niere mabtä. Akwa ni mda abko tä niere Ngöbö kukwei niekä kirakira mda mda abko nükaninta nire nieta kwe mabtä, niebare kwetre ie.

<sup>20</sup> Jesukwe niebare mda ietre:

¿Amne mun abko käta ti nire niere tibtä? niebare kwe ietre.

Angwane Pedro abko käkwe niebare Jesuye:

Ma abko Ni Dianinkä Ngöbökwe ara, niebare kwe ie.

### *Jesu müre ketadi, niebare käne kwe*

(Mateo 16.20-28; Marcos 8.30-9.1)

<sup>21</sup> Pedrokwe niebare kore, abtä Jesukwe niebare mda ietre:

Akwa kukwe ye abko ñan niedre jire kwetre ni mda mdaye, niebare kwe ietre.

<sup>22</sup> Bti Jesukwe niebare krörö ietre:

Nitre unbre ji dokwâte, nitre blitaka Ngöböbe ni mda mda diäre dänkien amne Kukwe Biani Ngöböwe Moiséye dirikätre, kákwe ti Ni Kä Nebtä Ngobo ne mikadi ja tare nike kri amne trö kwitadi kwetra tie, kákwe ti müre ketadi, akwa köbömäkäre angwane, ti rükadita nire, niebare kwe nitre ja tötitikaka benye.

<sup>23</sup> Yebti Jesukwe niebare ni jökrä nämane yete yeze:

Nire nire tö ja töi mikai kwatibe nänkrä tibe, ni ye abko tö dreye jakrä abko raba käikwitekä jabti amne, köbö kwatirekwatire ja kwata raba ruuntari tare ñakare ie nünakäre tirkä abko jata ti jiebti, <sup>24</sup> ñobtä ñan angwane nire nire tö ja kwata ngibiai jen jakrä abko krütadi kärekäre, erere rabadi kärekäre Ngöbö okwä bäre mento. Akwa nire nire krütadi ti dokwäre abko rabadi dianintari nünakäre kärekäre Ngöböbe. <sup>25</sup> Ye abko, ni rabadre jäandrän jökrä bkäne kabre kä nebtä, akwa ni krütadre angwane nikwe ñan nünandre mda Ngöböbe, ne ütiäre abko dre rükadre nie. <sup>26</sup> Ne aise, nire nire käta ti rükente amne kukwe dirita tikwe ne rükente angwane, ti Ni Kä Nebtä Ngobo ne jatadita angwane, tikwe ni ye rükandite arato. Ti jatadita angwane, ti jatadita ja di kri bä nuärebiti amne Ngöbö di kri bä nuärebiti, erere arato angele deme Ngöböwe bä nuärebiti. <sup>27</sup> Akwa mun tä nete ne ruäre ngämi krüte, känenkri Ngöböta gobrane ño nibtä, ye abko munkwe tuadi ja okwä jenbti abko ti tö nibi niei metre munye, niebare Jesukwe ni jökrä nämane yete yeze.

### *Jesu bä nikwitani*

(Mateo 17.1-8; Marcos 9.2-8)

<sup>28</sup> Jesukwe kukwe niebare kore, yebti kwäirare Jesu nikani ngitiobti blitakäre Ngöböbe angwane, Pedro, Santiago amne Juan nikani siba ben. <sup>29</sup> Jesu nämane blite Ngöböbe, te batibe ngwäre bä nikwitani jene amne dän btä abkoträ namani ngwen bürere meraträ bär kwrere. <sup>30</sup> Ye btäräbe ni nibu namani gökökä yete blite Jesube. Ni nibu ye abko Moisés amne Elías. <sup>31</sup> Niaratre nämane ye bäre temen käträ namani kuin bär nuäre amne Jesu tädi Jerusalén, känti näinta kä käinbti abko btä nämane blite kä ye känti. <sup>32</sup> Ye ngwane abko Pedro, Santiago amne Juan okwä namani doboko köbö kisete angwane, batibe nukaninta ngwätte angwane, Jesu bär dite amne nuäre tuani kwetre. Erere arato, Moisés amne Elías tuani kwetre. <sup>33</sup> Ni nükani nibu Jesu känti, ye jatanina nikenta angwane, Pedrokwe niebare Jesuye:

Ti Dänkien, nita nete abko käi nibi nuäre tibtä, aise, ma tö ne ngwane, nunkwe ju mikadi kiakia komä munkrä: kwati makrä, kwati Moisékrä amne kwati Elíakrä, niebare kwe.

Pedro abko kákwe ñäkäbare kore akwa, drebtä nämane blite abko ñan nämane gare ie.

<sup>34</sup> Pedro nämane blite kore, ye btäräbe müta jatani jüben niaratrebiti angwane, kä jürä namani krübäte niaratre nimäbtä. <sup>35</sup> Angwane müta yete ni kukwei jarabare krörö ietre:

Ni ne abko ti Odei tikwe. Ne mden tikwe dianinkä jakrä, aise, niara kukwei nua munkwe abko ni kukwei namani kore müttate.

<sup>36</sup> Ni kukwei jarabare kore angwane, ni nibu ye nikaninta angwane, Jesu aibe namaninta kaibe. Kukwe nakaninkä kore, ye abko nitre ja tötitikaka Jesube kákwe tuani, akwa ükani kaibe kwetre jakrä, aise, kä ye ngwane niebare ñakare kwetre ni mda mdaye.

### *Jesukwe üai käme juanintari ngäbäkrebtä*

(Mateo 17.14-21; Marcos 9.14-29)

<sup>37</sup> Jesu nämane ngitiobti nitre ja tötitikaka nimäbe, bti jändrinane jataninta motokwäre angwane, ni nükani kwati ngäbti. <sup>38</sup> Ni kwati ye ngätäite ni nämane iti kákwe ngratebare jume, kákwe niebare Jesuye:

Dirikä, ti ngobo ngörä itibe tikwe noko jakwe tuen känti tirkä abko titä ribere kisere mae, <sup>39</sup> ñobtä ñan angwane üai käme ie niarata neketete, käta mike ngrente kri amne, btäräbe tä kä ötöte bti amne tä kitékä nekwäre, sekwäre amne däbe tä neme betekä kadate. Erere arato, ñan tä nebe gibiekä, ye abko tä mike ja tare nike tikän. <sup>40</sup> Abtä nitre ja tötitikaka mabe kákwe üai käme juandretari mento btä abko tikwe ribera kisere ietre, akwa üai käme ñan rikaba mento ietre, niebare kwe Jesuye.

<sup>41</sup> Abtä Jesukwe niebare ietre:

¡Aingwaree, ti moto iko munbtä! Mun ye ño abko moto kämekäme dikaro abti mutta tödeke ñakare dikaro Ngöböti ye. ¿Ti rabadi kä nuäi mda munbe amarebti ye? niebare Jesukwe.

Ye btäräbe Jesukwe niebare mda:

Ngäbäkre ye ngwen tie, niebare kwe.

<sup>42</sup> Ye erere, ngäbäkre jänikani nebe ja ken Jesube angwane, üai kämenkwe kitaninta temen amne kä ötaninteta bti kwe, akwa Jesukwe ngratebare üai kämenbti, btäräbe ngäbäkre ye namaninta kuinta angwane, Jesukwe bianinta rünye. <sup>43</sup> Ngöbö di kri köböire ngäbäkre namaninta kuinta, yebtä abko ni jökrä ñan töi namani krütare.

#### *Jesu krütadi niebare bobukäre kwe*

(Mateo 17.22-23; Marcos 9.30-32)

Ni jökrä ñan töi namani krütare kore angwane, Jesukwe niebare nitre ja töitikaka benye:

<sup>44</sup> Olo ketete kuin ti kukweiye munkwe amne munkwe ñan käikwitaka jabti. Jötrö ti, Ni Kä Nebtä Ngobo biandi müre ketadre ni mda mdaye, niebare Jesukwe ietre.

<sup>45</sup> Akwa dre niebare kore kwe, ye abko ñan nükani gare nitre ja töitikaka benye, ñobtä ñan angwane kukwe niebare Jesukwe, yebtä abko Ngöbö ngämi töi tikekä, aisetet ñan nükani gare ietre. Mdakäre abko, namaninta ja gaire kukwe ye ngwiantarita Jesuye, aisetet namaninta kwekbe jökrä.

#### *Nire bari ütiäte niebare Jesukwe*

(Mateo 18.1-5; Marcos 9.33-37)

<sup>46</sup> Ye ngwane abko, nitre ja töitikaka Jesube mden bari ütiäte, abkobtä nikani ja kwete kwärikwäri mda. <sup>47</sup> Angwane nämane töbike ño, ye gani btä Jesukwe. Abtä Jesukwe ngäbäkre chi käräbare, mikani täkänintbe ja ken kwe, <sup>48</sup> bti niebare krörö kwe ietre:

Nireta ütiäte ñakare ni mda mda okwate ngäbäkre chi ne kwrere, ye nireta kaen ngäbti ti käbti, ye abko ti ara jire kata ngäbti kwe amne, nireta ti kaen ngäbti ja dänkiene, ye abko Ngöbö ti juanka abko kata ngäbti kwe arato. Ne aisetet mun jökrä ngätäite, nire nire tuen ütiäte ñakare munye, ni ye abko bari ütiäte Ngöbö ngwärekri. Abko kore se, niebare Jesukwe.

#### *Nireta rüre ñakare Jesu rüere abko tä nekete Jesukri*

(Marcos 9.38-40)

<sup>49</sup> Angwane Juan abko kákwe niebare:

Dirikä, nunkwe ni tuaba iti üai käme juentari ma käbti, akwa niara tä nekete ñakare nibe, aisetet ñan üai käme juandretari mda kwe ma käbti, nunkwe nieba ie, niebare kwe Jesuye.

<sup>50</sup> Abtä Jesukwe niebare mda:

Nireta sribire ñakare mun rüere, ye abko tä nekete munkri, aisetet munkwe ñan sribi ye kwrere dokwä täkä mda kän, niebare Jesukwe ietre.

#### *Jesukwe ni juani gre ketamä bti ni jäätä Ngöbö Kukwei kädriere*

<sup>51</sup> Abti Jesu rikadreta kä käinbti abko köböi jatani nüke ja ken, aisetet niarakwe ja töi mikani kwatibe nikenta Jerusalén. <sup>52</sup> Angwane Jesukwe ni juani ruäre ja käne kä känenet juta Samariate nünantbekrä jae. Akwa <sup>53</sup> Jesu nämane näin Jerusalén kukwäre, ye gani nitre Samariabokwe angwane, Jesu kani ngäbti ñakare kwetre, ñobtä ñan angwane nitre israelita amne nitre Samariabo nämane rüre jabe kwärikväri aisetet. <sup>54</sup> Nitre Samariabo kákwe ñan Jesu kani ngäbti, ye gani Santiagokwe amne Juankwe angwane, niebare kwetre Jesuye:

Dänkiene, niaratré ñan tö ma kain ngäbti, ye dokwäre Ngöböökwe ñukwä kä käinbti juandre kákwe nitre se gadrekä jökrä abko nunkwe kärädre Ngöböye, ¿ie ma tö nibi ya? niebare kwetre ie.

<sup>55</sup> Abtä Jesu nikwitaninte, kákwe mäträbare btätre. <sup>56</sup> Yebti nikanintre juta mdate.

*Ni rikadre Jesu jiebti abko tare  
(Mateo 8.19-22)*

<sup>57</sup> Niaratre nämane dikekä ji ngrabare angwane, ni iti käkwe niebare Jesuye:  
Ti Dänkien, ma näin mdente erere, ye känti ti rikai siba mabe, niebare kwe.

<sup>58</sup> Abtä Jesukwe niebare mda ie:

Nukro känsenta, kwe kä mkä tärä nünankrä amne, nukwä nikenkä käinta abko juda tärä kwe nünankrä arato, akwa ti Ni Kä Nebtä Ngobo ne abko kwe kä ñakare jire chi jadükakrä. Ne aise te ma tö jatai tibe ne ngwane, ma rabadre juto biare nüne ti kwrere arato, niebare kwe.

<sup>59</sup> Bti Jesukwe niebare ni mdaye:

Brän tibe, niebare kwe ie.

Akwa ni ye abko käkwe niebare Jesuye:

Ti Dänkien, ti tuemetre nikenta ken ja gwiriete, abti ti rün krütadi, tikwe doboi mikadi, ye täbti ti näin mabe, niebare kwe ie.

<sup>60</sup> Abtä Jesukwe niebare ie:

Nitre ie Ngöbö gare ñakare abko tä ni ngwákäre kwrere Ngöbö ngwärekri, ye tuametre ni ngwákäre doboi mike. Ma abko Ngöbötä gobrane ño nibtä, ye abko ma rika kädriere ni mda mdabe, niebare Jesukwe ie.

<sup>61</sup> Abti ni mdara jire käkwe niebare Jesuye:

Ti Dänkien, ti tö rikai mabe akwa, ti ngämi niken känenkri ti tö rikai ja tuaita niere ti mräkäye, niebare kwe.

<sup>62</sup> Abtä Jesukwe niebare ni neye:

Ni sribikä tä niken dobro tikekä aradorebti akwa tä nikrenta ja jiebti, ye ñan tä sribire kuin metre, aise te sribi rabai ngwarbe, aise te nire nire töita niken jäandrän mda mda jiebti, ni ye kwrere abko ñakare kuin sribikä kä gobrankrä Ngöbökwebtä. Abko kore se, niebare Jesukwe ie.

## 10

*Jesukwe ni juani gre ketamä bti ni jätä Ngöbö Kukwei kädriere*

<sup>1</sup> Yebti ni Dänkienkwe ni mdara jire dianinkä gre ketamä bti ni jätä. Jesu rikadre juta mdente mdente, ye känti Jesukwe ni ye juani nibu nibu ja känenkri. <sup>2</sup> Akwa käne abko ni kwati nämane juto biare kukwe kuin mike era, abkobtä kukwe bää mikani krörö, käkwe niebare ietre:

Nura nena biare kabre ötadre, ye kwrere ni kwati tä juto biare ngwiandre Ngöböye, akwa sribikä ñakare bökän, aise te sribi Bkänkä Ngöbö käkwe sribikä mda mda juandré jötrö sribire abko munkwe ribe ie. <sup>3</sup> Akwa mun nän. Obeja ngäbälita niken lobo ngätäite, ye kwrere titä mun juen ni krübäte krübäte ngätäite. <sup>4</sup> Mdakäre abko, mun rika angwane, mun ñan rika ngwian ngwena jatä. Mun ñan rika kra ngwena jae amne mun ñan rika sabato mda ngwena jae. Erere arato, munkwe ñan kä gate ngwarbe köbö ngwentari ji ngrabare ni mda mdaye nünankäkäre raire ji ngrabare.

<sup>5</sup> Akwa ju mdente mun rika nebe, känti munkwe köbö ngwiantari käne, käkwe nie krörö: Kä jáme Ngöbökwe raba munbtä, nie munkwe. <sup>6</sup> Angwane ni nünanka gwi yete tädi biare kä jáme Ngöbökwe ye kaen ngäbti ne ngwane, kadi ngäbti kwe; ñakare ne ngwane, ñan kadre ngäbti kwe. <sup>7</sup> Ju mdente mun raba, ye känti mun raba nünentbe. Munkwe ñan ja kwita ju mda mdate. Mdakäre abko, mrö mden mden kwetata kwetre, erere te mun buka angwane, munkwe kweta, ñobtä ñan angwane ni sribikä abko ie sribi ütiä biandre abko erere munkwe mrödi sribi munkwe ütiäre. <sup>8</sup> Erere arato, juta mdente mun raba, ye känti mrö mden te mun buka, ye munkwe kweta jáme jökrä. <sup>9</sup> Angwane ni bren bren tärä juta yete ne ngwane, munkwe mikata kuinta amne, Ngöbö kebera nüke gobrane ngätäite abko munkwe nie ietre.

<sup>10</sup> Akwa juta mden känti mun raba angwane, nitre yete käkwe ñan mun ka ngäbti, yebtä abko mun rikata jibti ñäkäre kwärä krörö: <sup>11</sup> Dobro mnü juta munkwete nete

neketaninkä nun ngotobtä abko nunta ngrükete mun ngwärkri jökrä nete. Ne abko mun ñan tö Ngöbö kukwei kain ngäbti, aise mun ara jire ngite Ngöböye ja töi jenbtä bä mikakrä, ye raba gare munye. Akwa Ngöbö kebera nüke gobrane mun ngätäite, ye raba gare munye, aise munkwe nie kore ietre. <sup>12</sup> Akwa köbö mrä näire, nitre Sodomabo käkwe ja tare nikadi, yebti ta nitre nünanka juta yete käkwe ja ngie nuadi abko ti tö niei munye, niebare Jesukwe nitre juani kwe yeye.

*Jesukwe ñäkäbare nitre israelita rüere*  
(Mateo 11.20-24)

<sup>13</sup> Bti Jesukwe niebare mda:

¡Aingwaree mun nünanka juta Corazínte amne juta Betsaidate! Mun bobre jakän, ñobtä ñan angwane sribi kri ñan tuabare nuenbare tikwe mun ngätäite, ne kwrere nuen-dre juta Tiro amne Sidón känti, akräke nitre yete käkwe ja töi kwitadreta Ngöbö kukwäre amne, dän ngutu jüräre kitadre kwetre jabtä amne rabadre täkänintbe ngübrunte ja moto ulire kukwe kämekäme nuenbtä bä mikakrä.

<sup>14</sup> Ye mden kisete, Ngöbökwe kukwe ükadite ni jökrä kräke kä mrä angwane, Ngöbökwe mun nünanka juta Corazínte amne juta Betsaidate mikadi ja tare nike bäri kri nitre nünanka juta Tirote amne Sidónte ye kräke. <sup>15</sup> Amne mun nünanka juta Capernaúmte, ma känti nete tikwe sribi kri ñan tuabare nuenbare kabre, ¿yebtä Ngöbökwe mun mikadi bäri ütiäte, munta nütüre ya? Ñakare, ñobtä ñan angwane Ngöbökwe mun ye kitadikä kä ja tare nikakrä känti.

<sup>16</sup> Yebti Jesukwe niebareta mda nitre juani kwe yeye:

Nirekwe mun kukwei mikadre era ye käkwe ti ne ara jire kukwei kadi ngäbti; akwa nirekwe ñan mun kukwei mikadre era, ye abko ti ne ara jire ñan kukwei kadi ngäbti kwe amne nire ñan tö rabadre ti kukwei kain ngäbti, ye abko Ngöbö ti juanka ñan kadi ngäbti kwe. Abko kore se, niebare Jesukwe.

*Ni juani gre ketamä bti ni jätä nükaninta Jesu känti*

<sup>17</sup> Abti nitre gre ketamä bti ni jätä juani Jesukwe ye jatani nüketa mda angwane, kä namani nuäre krübäte btätre, käkwe niebare Jesuye:

Dänkien, nunkwe üai käme juantariba mento nibtä angwane, ma käbti üai käme nibi nun kukwei mike täte jökrä kore, niebare kwetre ie.

<sup>18</sup> Angwane Jesukwe niebare ietre:

Munta kukwe era erere niere, ñobtä ñan angwane merata trä ngitiekä jötrö, ye kwrere Satana kä käinbtä jataninbe timon sribi munkwe köböire, rababa tuen tie. <sup>19</sup> Ye abko, üai käme krübäte tbi kwrere amne drike kwrere, kräke tikwe ja di biani munye ganainkäre amne, mun rüe Satana käkwe ñan mun mikadre bren, abkokäre tikwe ja di biani munye ganainkäre. <sup>20</sup> Akwa üai käme käta mun kukwei mike täte, ye munkwe ñan käi ngwian nuäre bäri jabtä, akwa munkwe nünandre kärekäre Ngöböbe, aise mun käi nena tikani täräbtä kä käinbtä, ye abko bäri käi ngwian nuäre jabtä munkwe, niebare Jesukwe ietre.

*Jesu aibe ie Rün gare metre*  
(Mateo 11.25-27; 13.16-17)

<sup>21</sup> Yebti, Ngöbö Üai Deme namani täte Jesubtä, köböire kä namani nuäre kri btä, käkwe niebare:

Ti Rün, ma abko kä käin amne kä temen Dänkien. Tita ma käkitekä, ñobtä ñan angwane nitre bikaka töbtä krikri abko okwätē makwe kukwe metre makwe ye rükainte, akwa ni bobre bobre töi ñakare ñakare ruen ie abko ietre makwe mikani gare, ma tö namani ño, erere makwe nuenbare. Yebtä tita ma käkitekä, niebare Jesukwe Rün Ngöböye.

<sup>22</sup> Yebti nitre näma Jesu kukwe nuen, ye ie Jesukwe niebare mda:

Ti Rün käkwe jändrä jökrä mikani gare tie amne ti abko nire ngobo era metre gare ñakare ni mda mdaye, akwa ti Rün aibe ie ti gare. Erere arato, ti Rün abko gare ñakare

ni mda mdaye, akwa ti niara Odei ne aibe ie niara gare amne ti tö rabare mikai gare nireye, ye erere ie rabadi gare, niebare Jesukwe.

<sup>23</sup> Yebti Jesu nikwitaninte, kákwe niebare kaibe nitre ja tötitikaka benye:

Tita sribi kuin nuene bätäkä ngwarbe, ye abko mutta tuen ja okwä jenbti, ye munkwe käi ngwian nuäre kri jabtä, <sup>24</sup> ñobtä ñan angwane sribi kri ñan tuabare tuata munkwe, ye abko nitre Ngöbö kukwei niekä kirakira amne jrei kwati kirakira tö namani tuai, akwa tuani ñakare kwetre. Erere arato, ti kukwei nuata munkwe, ye niaratre tö namani kukwei nuai, akwa erere kukwei nuani ñakare kwetre. Abko kore se, niebare Jesukwe ietre.

### *Ni Samariabo moto kuin*

<sup>25</sup> Yebti bati, Kukwe Biani Ngöböökwe Moiséye dirikä nämane iti, namani nünaninkä krö, kákwe kukwe ngwianintari ja gakäre Jesube, kákwe niebare ie:

Dirikä, ¿tikwe dre nuendre köböire ti rabadre nüne kärekäre Ngöböbe? niebare kwe Jesuye.

<sup>26</sup> Abtä Jesukwe niebare mda ie:

¿Kukwe Biani Ngöböökwe Moiséye btä mata ñäke, ye käta dre niere arato? niebare kwe ie.

<sup>27</sup> Angwane dirikä ye kákwe niebare:

Ngöbö Kukweita niere krörö: Makwe ma Dänkien Ngöbö tare ja üai ngöi jökrä, ja di ngöi jökrä amne ja töi ngöi jökrä. Erere arato, mata ja tarere au, ye kwrere makwe ni mda mda tare arato, nieta Ngöbö Kukweibtä, niebare kwe Jesuye.

<sup>28</sup> Jesukwe niebare mda ie:

Kukwe era erere nini makwe. Ye kwrere makwe nuendre ne ngwane, ma rabadi nüne kärekäre Ngöböbe, niebare kwe ie.

<sup>29</sup> Akwa Kukwe Biani Ngöböökwe Moiséye dirikä kákwe kukwe ngwianintari, yebti tö namani bikai deme, kákwe niebare Jesuye:

¿Ti mräkä mden abko tikwe taredre metre ruen? niebare kwe mda Jesuye.

<sup>30</sup> Abtä ni menteni amne ni rüe abko ni mräkä metre, ye Jesukwe bärä mikani, kákwe niebare krörö ie:

Bati ni nämane iti Jerusalén, nikani motokwäre juta Jericó kukwäre angwane, batibe nitre gokä jatani, kákwe jäandrän goibare jökrä kän amne, dän btä dianinkä jökrä kän kwetre, bti metani kwetre, namani bärä ngwákäre angwane, mikaninte jite kwetre se kwrere, bti ngitian. <sup>31</sup> Ye ngwane ni blitaka Ngöböbe ni mda mda diäre jatani iti ji ye arabebti angwane, ni bärä ngwákäre nämane jite. Yebti okwä mata namani akwa, nikani mobe menteninta temen bäre se kwrere, bti nikani janknu ta. <sup>32</sup> Yebti ni levita sribikä ju blitakrä Ngöböbe jatani iti mda, nükani ja ken ni bärä ngwákäre yebe angwane, nikani ñäräre jirekäbe kwe, akwa nikani janknu ta arato.

<sup>33</sup> Akwa yebti ni jenena Samariabo jatani iti mda ji ye arabebti abko okwä mata namani ni bärä ngwákäre btä angwane, namani ruen bobre ie, <sup>34</sup> kákwe krötäbare ken, bti olibo köi amne uba döi nikani träinbti kwe kräkäi mikakäre amne träin mrianinte kwe, bti nikani buro jakwebti kwe, bti nikani ngwena nebe ju ni basakakrä känti. Ye känti ngibiabare kwe ye näire. <sup>35</sup> Yebti jäandrinate dekä angwane, ngwian ganaindre köböbu näre ye ni Samariabo kákwe biani ju bkänkäye, kákwe niebare ie: Makwe ni ne ngibia tigrä. Nane makwe ngwian gate bäri mda niarakrä ne ngwane, ti jatadita, kákwe ütiä biandi mae, niebare kwe ie. Abko kukwe nakaninkä kore. <sup>36</sup> Ne aisetni iti goibare nitre gokäkwe angwane, ni nikani nimä. ¿Nitre nimä ye ngätäite, ni mden kákwe ni mda tuani känti ja mräkä kwrere ruen? niebare Jesukwe ie.

<sup>37</sup> Angwane Kukwe Biani Ngöböökwe Moiséye dirikä kákwe niebare mda Jesuye:

Ni ie ni bren namani ruen bobre, ye abko kákwe ni bren tarebare mräkä kwe kwrere, niebare kwe.

Abtä Jesukwe niebare ie:

Ni Samariabokwe kukwe nuenbare kuin mräkä mdakrä, ye kwrere nän nuene arato. Abko kore se, niebare Jesukwe ie.

*Dre bäri ütiäte niebare Jesukwe*

<sup>38</sup> Yebti Jesu nikani janknu ta nitre ja tötitaka benbe amne nükani juta mdate, känti meri iti kädian nämane Marta nämane nüne. Marta ne abko kákwe Jesu kani ngäbti ja gwirierte. <sup>39</sup> Marta etba nämane iti abko kädian nämane María. María ye abko nikani, namani täkänintbe Jesu ngotobtä Jesu kukwei nuen. <sup>40</sup> Akwa Marta abko namani sribi kabre gwita ye aibe btä töbike, aisetet namani sribire janknu, bti nikani, kákwe niebare Jesuye:

Ti Dämkien, ¿ti mräkäkwe ti mirite sribire kaibe, se ütiäte ñakare makrä ya? Niara juen jötrö ti die mike, niebare kwe Jesuye.

<sup>41</sup> Akwa Jesukwe niebare mda ie:

Marta, ma nibi töbike krübäte dikaro sribibtä, kä nibi ma nike. Erere arato, jäandrän keta kabre, btä mata töbike, <sup>42</sup> akwa jäandrän ketetibe bäri ütiäte, ye mden abko Maríakwe känäniri jakrä, käta ti kukwei nuen. Ye abko ni ñakare jire abko rabadre denkä kän. Abko kore se, niebare kwe Martaye.

## 11

*Blitadre ño Ngöböbe*

(Mateo 6.9-15; 7.7-11)

<sup>1</sup> Bati Jesu nämane blite Ngöböbe kä mda känti, kákwe blitabare ünän angwane, ni iti ja tötitaka ben abko kákwe niebare ie:

Ti Dämkien, blitadre ño Ngöböbe abko Juan Bautistakwe diribare nitre ja tötitaka benye, aisetet makwe diridre nunye arato, niebare kwe Jesuye.

<sup>2</sup> Abtä Jesukwe niebare ietre:

Mun rika blite Ngöböbe angwane, munkwe nie krörö:  
Ti Rün kä käinbti, ma kä aibe raba mikani ütiäte ni jökräkwe.  
Jakwe gobrane nun ngätäite nete.

Ma tö dreye kä käinbti, erere tä neme bare mae kä käinbti, erere raba bare mae kä nebtä nun ngätäite arato abko nunta ribere mae.

<sup>3</sup> Kóbö kwatirekwatire makwe mrö bian täte nunye.

<sup>4</sup> Nun ngite kukwe kämenbtä ye denkä mento nunbtä, ñobtä ñan angwane ni mda mda tä ja mike ngite nun rüere, käre nunta den jabti ta kóbö kwatirekwatire.

Amne kukwe kämekäme tö nun nuaite ja käne ma rüere, ye känti makwe ñan nun jie ngwian,

abko munkwe blita kore Ngöböbe, niebare Jesukwe ietre.

<sup>5</sup> Bti Ngöböta juto biare ni kukwei kaen ngäbti, ye abko Jesukwe bärä mikani, kákwe niebare krörö mda ietre:

Nane mun kukwe muko jatadre iti kä ruäre deo, kákwe niedre: Ja mräkä, ban ngwen kumä ütiädre tie, <sup>6</sup> ñobtä ñan angwane gwä ti kukwe muko nü basare jire tie, akwa bukakrä ñan nebe tie. Abtä ti ki ban tärire mae, tikwe ñan ja gaidre krübäte abkokäre, niedre kwe mae. <sup>7</sup> Angwane ni tädre gwi kákwe ñan niedre: Ti nibira jänbti ngäbäkrebe, aisetet ti ñan raba nainkröta krö jäandrän biankäre mae, aisetet makwe ñan ti nika, niedre ñakare jire kwe kukwe kare ngäbti. <sup>8</sup> Akwa niara ñan kädriedre blo, abkokäre rükadre krö amne jäandrän jökrä kärädre ie kukwe mukokwe, ye erere biandre jökrä kwe ie. Ye abko ñan niara kukwe muko, aisetet nuendi kore kwe akwa, ñan ñäkädre rüere abtä rabadre ja gaire, abkokäre nuendi kore kwe.

<sup>9</sup> Blitadre Ngöböbe, ye mdenbtä abko ti tö kukwe mda niei krörö munye arato: Käre munkwe jäandrän kärä Ngöböye amne Ngöböke biandi munye. Erere arato, munkwe jäandrän känäntari Ngöbö känti amne kwandi munye. Erere arato, nita neme jukwebtä jäandrän kärere ni mdaye, ye kwrere käre munkwe jäandrän kärä jukwebtä Ngöböye angwane, Ngöböke jukwe tikadi, kákwe biandi munye, <sup>10</sup> ñobtä ñan angwane nireta jäandrän kärere, ye erere bianta ie amne, nireta jäandrän känäntari jakrä, ye erere tä kwen ie amne, nireta ñäke jukwebtä abko ietre Ngöböta jukwe tike amne tä jäandrän bien ietre.

<sup>11</sup> Mdakäre abko, Ngöböta jäandrän bien kore, yebtä abko ti bike kukwe bā mike krörö mda: „Mun mden ngäbäkre rünre, ie ngäbäkreta gwa kärere kwetadre jae angwane, tä tbi krübäte bien kwetadre ie? <sup>12</sup> Erere arato, „mun mden ngäbäkrex rünre, ie ngäbäkreta kwi mrüke kärere angwane, tä drike bien kwetadre ie? Ni ñakare jire iti käta jäandrän krübäte bien ngäbäkre kweye. <sup>13</sup> Mun abko moto käme, akwa ngäbäkrex munkwe, ie jäandrän kuin bian gare munye. Se abko mun Rün kä käinhti bari moto kuin munkrä abko ie munkwe niara Üai Deme kärädre angwane, biandi kwe munye. Abko kore se, niebare Jesukwe nitre ja tötitaka benye.

*Beelzebú nämane Jesubtä nie namani rüere*

(Mateo 12.22-30; Marcos 3.20-27)

<sup>14</sup> Abti batni iti btä üai käme nämane, kákwe kukwe ötani abko btä Jesukwe üai käme juanintari mento. Ye erere üai käme nikani mento btä angwane, namani bliteta kuin. Yebtä abko ni kwati ñan töi namani krütare mda. <sup>15</sup> Akwa ni ruäre namani niere:

Üai käme dänkien kädianta Beelzebú, ye mden kákwe ja di biani niaraye abko diebti tä üai kämekäme juentari mento se, namani niere Jesubtä.

<sup>16</sup> Akwa era metre Jesu namani sribire Ngöbö diebti rabadre era kräke, abkokäre Ngöböta kä käinhti kákwe sribi kri ñan tuabare nuendre niaratré okwäbti Ngöbö nämane ben bā mikakäre abko ni ruäre namani kärere Jesuye.

<sup>17</sup> Angwane nitre namani töbike blo Jesu rüere, ye ganina btätre Jesukwe. Abtä niebare kwe ietre:

Juta amne ni mräkä mden erere käta ja ñäketbe ketebu rükäre jabe kwärikwäri, ye abko tä ja juen ngwarbe au. <sup>18</sup> Ye kwrere abko, „Satana amne üai käme kwekwe kákwe ja ñäkäretbe ketebu jene jene ja rüere au, ye angwane tädre dite ya? Ñakare. Ye abko, titä üai käme juentari Beelzebú diebti mutta niere tibta, ye mdenbtä abko titä ñäke kore.

<sup>19</sup> Üai käme dänkien kädianta Beelzebú, diebti titä üai käme juentari mento mutta niere tibta, aisete „nitre reketaka munkri ye abko ie nireta ja di bien üai käme juantarikrä mento abko ti tö nibi ngwiaintari munye? Niaratre kákwe mun kitadre ngise ruen tie.

<sup>20</sup> Akwa titä üai käme juentari mento Ngöbö Üai Deme diebti era metre, ye ngwane Ngöbö nukanina gobrane mun ngätäite abko bā mikata tikwe.

<sup>21</sup> Akwa ti bike kukwe mdara jire niere munye üai kämenbtä abko krörö: Ni dite kri kwe jäandrän tärä kabre rükrä, bti tä jäandrän jakwe erere ngibiare kuin jáme gwi abko üai käme kwrere. <sup>22</sup> Akwa ni mda bari dite ti kwrere jatadre rüre, kákwe ganaindre kwäräbe angwane, jäandrän rükrä ni ditekwe, bti tädre tödeke abko diandrekä jökrä ni dite ye kän amne jäandrän kwekwe diandrekä jökrä kän, bti dräidre jökrä jabti kwe.

<sup>23</sup> Ye abko nire nire ñan tä nekete tibe, ni ye abko tä rüre ti rüere amne, nire nire ñan tä sribire gware tibe abko tä sribi tikwe metekä jirekäbe tikän, niebare Jesukwe.

*Üai käme tä niken mento, bti tä nüketa nibtä*

(Mateo 12.43-45)

<sup>24</sup> Yebti Jesu nikani blite krörö mda üai kämenbtä:

Ni iti btä üai käme tädre nüne, abti üai käme ye juandretari mento btä, üai käme rikadre ngwarbe kwäräkwärä kä känene jadükakrä jae kä kaibete, akwa kä ñan kwandre jire chi ie jadükakrä, abtä rabadre töbike krörö: „A! Ni nämane ju kwrere tikwe abko te ti nämane nüne, ye känti ti bike nikenta, üai käme rabadre nütüre. <sup>25</sup> Ye erere bkänä, üai käme ye rikadreti ni ye känti, rabadreti yete angwane kä sökaninkä merebe gwita temen amne kä ükaninte kuin gwita, kwrere jire ni ye kwandre üai kämeye. <sup>26</sup> Angwane jötrö ngwarbe üai käme ye rikadre betekä, kákwe üai bari kämekäme niarakrä känändre krä kükü mda ja mukore, bti rikadre nünenta jökrä ni yebtä. Üai käme ye rabadrera nünenta kore ni yebtä angwane, ni ye rabadre ja tare nike bari krübäte mda üai käme kisete, niebare kore Jesukwe ni jökräye.

<sup>27</sup> Jesu nämane blite kore, ye btäräbe meri nämane iti ni mda mda ngätäite kákwe ñäkäbare jume ja dibti mda:

Mameye kwe ma därebare amne ma mikani kianbtä kwe, meri ye abko Ngöbö diebti abko kä nuäre kri btä, niebare kwe.

<sup>28</sup> Abtä Jesukwe niebare:

Nire nire tä Ngöbö Kukwei nuen amne tä mike täte, ni ye abko Ngöbö diebti käta neme bäri nuäre btä abko ti tö nibi niei, niebare kwe.

*Sribi kri ñan tuabare käräbare Jesuye*

(Mateo 12.38-42; Marcos 8.12)

<sup>29</sup> Yebti ni nikani ja ükekrö bäri kwati mda Jesu bäre temen angwane, Jesu nikani nire krörö ietre:

Mun nünanka kä ne ngwane abko moto kämekäme, abtä tikwe sribi kri ñan tuabare aibe nuendre mun okwäbti, ie mun töta nebe, akwa sribi kri ñan tuabare ye tikwe ñan nuendre jire chi mun okwäbti, munta ribere ye kwrere. Akwa Ngöbö nämane Jonábe, käkwe sribi kri ñan tuabare nuenbare Jonákrä, ye kwrere aibe Ngöböökwe bää mikadi mun kräke, <sup>30</sup> ñobtä ñan angwane kukwe nakaninkä Jonábtä käkwe nitre Nínivebo töi kwitani, abtä Jonás kukwei mikani era kwetre, ye kwrere Ngöböta sribire era metre ti Ni Kä Nebtä Ngobo köböire abko Ngöböökwe bää mikadi metre munye.

<sup>31</sup> Erere arato, Ngöböökwe kukwe ükadite ni jökrä kräke kä mrä angwane, jreina nünanka mobe mötarikri\* nükani kira basare jrei Salomónye ye käkwe mun kitadi ngise arato, ñobtä ñan angwane Salomón nämane kukwe töbtä töbtä niere, ye jreina mobe jatani kukwe nuen jakrä, akwa tita nete abko bäri ütiäte kri Salomónkrä abko mun ñan tö ti kukwei nuai, aisetekadikä kore munbtä. <sup>32</sup> Erere arato, munta nüne kä ne ngwane abko, btä Ngöböökwe kukwe ükadite kä mrä angwane, nitre Nínivebo käkwe mun kitadi ngise arato, ñobtä ñan angwane Jonákwe Ngöbö kukwei niebare angwane, nitre Nínivebo käkwe ja töi kwitani Ngöböbtä, käkwe Ngöbö kani ngäbti, akwa tita nete abko bäri ütiäte Jonákrä, käta Ngöbö kukwei niere munye abko mun ñan tö kukwei nuai amne mun ñan tö ja töi kwitai Ngöböbtä, ye dokwäre abko Ngöböökwe kukwe ükadite munbtä, niebare Jesukwe.

*Jesukwe kukwe bää mikani ñotra jutrabtä*

(Mateo 5.15; 6.22-23)

<sup>33</sup> Bti Jesukwe ja bää mikani ñotra jutra kwrere, käkwe niebare mda:

Ni ñakare jire iti käta ñotra jutra mike, abti tä mike kä mkäte nguse. Erere arato, ñan tä mike kaja täni, akwa tä mike üräbtä käin, ye abko ni rikare gwäkäre angwane, kä rabadre tuen kuin nie abkokäre. <sup>34</sup> Ye kwrere ma okwä abko ñotra kwrere nikrakrä ja bäre temen, aisetekadre ma okwä kuin ne ngwane, käta tuen kuin mae. Ye kwrere abko makwe nünandre metre, ie Ngöbö tö ne ngwane, ni ie kä tuen kuin käta dikekä metre ñotra träbti, ye kwrere ma rabadi nüne kä ngwen Ngöböökwe. Akwa ma okwä bren angwane, kä ñan raba tuen kuin mae ne ngwane, mata kä ikote. Ye kwrere abko makwe kukwe kuin Ngöböökwe mikadre ngwarbe jae ne ngwane, ma töi rabadi käme amne ma rabadi nüne kä ikote Ngöbö rüiere. <sup>35</sup> Ne aisetekadre munkwe ja ngibia kuin au, ñotra trä kuin tä munkwe ne ngwane, munta kä trä ngwen Ngöböökwe, ye ngwane mun ñan rabadre kä ikote Ngöbö rüiere. <sup>36</sup> Munkwe ja töi mikadre nüne metre Ngöbö ngwärekri angwane, munkwe ñan nünandi kä ikote kwrere amne, ji Ngöböökwe rabadi gare kuin munye, kä trä kuin tuen nie ye kwrere ne ngwane, munta kä ngwen Ngöböökwe amne kä iko ñakare mun töibtä, aisetekadre jändrä jökrä Ngöböökwe rabai gare kuin munye, käta nebe tuen kuin ñotra träte munye ye kwrere. Abko kore se, niebare Jesukwe.

*Jesukwe ñäkäbare nitre bariseoye amne nitre dirikäye*

(Mateo 23.1-36; Marcos 12.38-40; Lucas 20.45-47)

<sup>37</sup> Jesukwe blitabare ünän angwane, ni bariseoye käkwe ngwiani mröre ja känti. Ye erere Jesu nikani, namani täkänintbe mesabtä mda. <sup>38</sup> Akwa ni rikadre mröre,

\* 11:31 Jreina nünanka mobe mötarikri. Jreina ne abko nämane gobrane kä kädian nämane Saba känti. Kukweta tikani btä 1 Reyes 10.1-13 yebtä.

känenkri köbötikadre kane ja ngibiakäredbe Ngöbö ngwärekri nämane ükaninte nitre israelitakwe, erere Jesukwe köbötikani ñakare. Yebtä abko bariseo ye ñan töi namani krütare Jesubtä.<sup>39</sup> Abtä Jesukwe niebare ietre:

Mun bariseo abko baso amne siä bätäteta btärita aibe amne terita abko tä nebe dobrore kwrere jire, aisetemun töita gobtä amne mun töi kämekämä.<sup>40</sup> Mun töi ngitiekä ñakare metre Ngöbö Kukweibtä. „Ngöböökwe mun ngrabare dätebare, kákwe mun töi, mun moto dätebare ñakare arato ya?<sup>41</sup> Munkwe jäandrän jakwe bian ni bobre bobre die mikakrä, ye ngwane mun töi rabadi merebe arato baso amne siä bätäteta btärita amne terita arato ye kwrere, niebare Jesukwe bariseoye.

<sup>42</sup> Bti Jesukwe niebare:

¡Aingwaree mun bariseo! Käre munta kri mu chi, ütiäte ñakare kädianta menta amne kri mda mu kädianta ruda amne kri mu mda mda kuin kwetadre amne kuin kräkäre, akwa ütiäte ñakare ükekrö keta jätä, bti munta mike keteti jenena biandre Ngöbökrä. Akwa jäandrän bari kuin ütiäte nuendre ni bobre kräke amne Ngöbö taredre abko erere munta nuene ñakare. Ye kwrere jäandrän bari ütiäte abko munta nuene ñakare, aisetemunkwe jäandrän ketebu ye nuendre amne mikadre täte keteti munkwe, akwa jäandrän bari ütiäte abko nuendre bari munkwe.

<sup>43</sup> ¡Aingwaree mun bariseo! Käre ja täkrä ni ütiäte ütiäte kräke sinagogue, känti mun töta nebe rabai käre ja mikakrä ütiäte. Erere arato, ni mda mdakwe mun mikadre ütiäte jae, kákwe köbö ngwiandretari kane munye ji ngrabare mrö rürümoinkrä känti, ie mun töta nebe ja mikakrä ütiäte.

<sup>44</sup> ¡Aingwaree mun bariseo! Kä ni doboi mikakrä, känti kä ükateta kuin ruäre, aisetemobo mikani gare ñakare amne, ni raba dikekä jáme bti ta abtä ja mikata ngite amne tädbe ñakare Ngöbö ngwärekri, ye kwrere jire mun bärkuin metre, akwa munta ni mda kite ja mike ngite abko gare ñakare ni mda mdaye, niebare Jesukwe nitre bariseoye.

<sup>45</sup> Abtä Kukwe Biani Ngöböökwe Moiséye dirikätre nämane yete abko iti kákwe niebare Jesuye:

Dirikä, mata ñäke kore, ye abko mata ñäke nun rüere arato, niebare kwe.

<sup>46</sup> Akwa Jesukwe niebare mda ie:

¡Aingwaree mun Kukwe Biani Ngöböökwe Moiséye dirikätre! Käre munta tribe mike kabre ni mda mda tröbtä, tä nebe doboko krübäte kräke, akwa nin munta die mike jire chi abko krörö: Kukwe ükateta kabre nuendre ni jökräye munkwe, ye abko tribe doboko kwrere, akwa munta ja kukwei mike täte ñakare jire chi, niaratre kitakäre kukwe kuin nuene Ngöbökrä.

<sup>47</sup> Erere arato, nitre Ngöbö kukwei niekä kirakira kämikani mun mräkäkwe abko doboibti kä ükateta kuin munkwe.<sup>48</sup> Ye abko, mun mräkäkwe kukwe nuenbare abkodbe munkrä tuen munbtä, aisetemun mräkäkwe ni Ngöbö kukwei niekä kirakira kämikani amne mun abko tä doboi ükateta kuin nuäre, niebare Jesukwe ietre.

<sup>49</sup> Munta töbige kore, ye mdenbtä abko Ngöbö töbtä kri kákwe niebare: Tikwe ja kukwei niekä niekä juandi amne ja kukwei ngwianka ngwianka tikwe juandi arato, ye abko müre ketadi ruäre amne ruäre abko jiebti rikai kisere mikakäre ja tare nike.

<sup>50-51</sup> Ne aisetemitre ti kukwei niekä därie metaninkä temen, yebtä Ngöböökwe kukwe ükadite munkrä abko krörö: Nitre Ngöbö kukwei niekä kirakira kämikani Abel näire nebebe Zacarías näire. Zacarías ye abko kämikani kwetre ñukwä grä amne ju blitakrä Ngöböbe te ruäre. Abtä Ngöböökwe kukwe ükadite ni kä ne ngwanebe abko ti tö nibi niei munye, niebare Jesukwe ietre.

<sup>52</sup> Bti Jesukwe niebare mda:

¡Aingwaree mun Kukwe Biani Ngöböökwe Moiséye dirikätre! Munta kukwe era metre Ngöböbtä rükente ni mda mda kane. Mun ñan töi kukwe era metre mikai gare kuin jae amne mun ñan tä dirire era metre arato ni mda mdaye, aisetemrükadre ño Ngöbö känti ñan rükadre gare ietre. Abko kore se, niebare Jesukwe.

<sup>53</sup> Nebti Jesu nikaninta mda angwane, nitre bariseo amne Kukwe Biani Ngöböökwe Moiséye dirikätre moto namani romon krübäte Jesu kukweibtä. Abtä nikanintre kukwe ngwentari kabre Ngöbö kukweibtä ie, <sup>54</sup> ye abko Jesukwe ja kitadre au kö okwätä ja kukweibtä, abtä kitadre ngise kwetre, abkokäre namanintre kukwe ngwentari kore ie.

## 12

### *Nikwe ñan bikadre deme, niebare Jesukwe (Mateo 10.26-31)*

<sup>1</sup> Ye ngwane ni jatani nüke ja ükekro bari kwati mda Jesu känti, aisetet ni namani kwati krübäte, kä namani ja kitekäbe kwärikwäri. Angwane nitre ja tötitikaka Jesube, ie Jesu nikani niere krörö:

Lebadura mikata bante tä ngitie jökrä te, ye kwrere jire nitre bariseo töi kämekäme, käta bike kuin deme ye abko käta ngitie ni mda mda töite, käta ni mda mda töi mike ja kwrere, aisetet munkwe ja ngibia kuin nitre bariseo ngäniene, <sup>2</sup> ñobtä ñan angwane kukwe ñakare jire tiebe abko ni mdakwe ñan gadre. Erere arato, jändrän ñakare jire gore abko ni mdakwe ñan gadre. <sup>3</sup> Ne aisetet jändrän jökrä nieta kaibe munkwe akwa, ni jökrä käkwe kukwe nuadi. Erere arato, kukwe nieta tiebe kaibe gwi munkwe abko kädriedi ji kribti temen ja ngwärekri jökrä, aisetet munkwe ñan bika deme nitre bariseo se kwrere.

<sup>4</sup> Ye abko, mun ti kukwe muko tikwe, ie ti tö niei krörö: Ni mda raba mun ngrabare aibe kämike, akwa yebti ñan raba jändrän nuene munbtä, aisetet munkwe ñan ni mda jürä ngwian jabtä; <sup>5</sup> akwa nire jürä ngwiandre era metre munkwe jabtä abko ti bike niere munye: Ngöbö aibe jürä ngwian munkwe jabtä, ñobtä ñan angwane mun kriütadre, bti Ngöbö di tärä mun kitakrä kä ja tare nikakrä känti aisetet. <sup>6</sup> Akwa mun bari tare kri Ngöböökwe abko ti bike bärä mike krörö munye: Nukwä kiakia rürümointa kwärike abko ütiä bianta bari brai, aisetet ngwian bianta mnambube ütiäre, akwa nukwä kiakia ye käita nikwitekä ñakare Ngöbööti. <sup>7</sup> Amne mun ara jire abko dokwä drüen kratirekratire abko tä gare jökrä Ngöböye, aisetet Ngöbökrä mun abko bari ütiäte kri nukwä kabrekabre bti ta, aisetet mun raba ja tare nike angwane, munkwe ñan kä jürä ngwian jabtä, niebare Jesukwe nitre ja tötitikaka benye.

### *Nikwe ñan Jesu rükandrete (Mateo 10.32-33; 12.32; 10.19-20)*

<sup>8</sup> Bti Jesukwe niebare mda:

Ti tö kukwe krörö niei mda munye: Nire nire tä nekete tibe abko niedre metre kwe ni mda mda ngwärekri, ni ye abko jen tikwe abko ti, Ni Kä Nebtä Ngobo käkwe niedi arato angeletre Ngöböökwe ngwärekri. <sup>9</sup> Akwa nire nire käkwe ti rükandrete ni mda mda ngwärekri, ni ye abko gare ñakare tie abko tikwe niedi angeletre Ngöböökwe ngwärekri arato. <sup>10</sup> Mdakäre abko, ti Ni Kä Nebtä Ngobo, rüere nirekwe ñäkädre blo, akwa ja töi kwitadreta kwe angwane, Ngöböökwe kukwe käme ye diandrekäta btä; akwa nirekwe ja dokwä mikadre ribi, käkwe Ngöbö Üai Deme mikadre ngwarbe jae, ye aibe Ngöböökwe ñan ngite diandrekäta jire btä.

<sup>11</sup> Mdakäre abko, sinagoga känti mun järika nitre israelitakwe kukwe ükatekäre amne nitre kritobore ñakare israelitare, ye ngwärekri mun järika kukwe ükatekäre angwane, munkwe blitadre ño jakrä amne munkwe dre niedre, yebtä munkwe ñan töbika dikaro, <sup>12</sup> ñobtä ñan angwane munkwe dre niedre jakrä, ye abko Ngöbö Üai Deme käkwe mikadi gare munye abko erere munkwe niedi jakrä kritobo ngwärekri, niebare Jesukwe nitre ja tötitikaka benye.

### *Nikwe ñan töbikadre jändrän bkäne kabre jakrä*

<sup>13</sup> Angwane nitre nämane kwati, ye ngätäite ni nämane iti käkwe niebare Jesuye:

Dirikä, jändrän namani nun rün mröye, se ti etbakwe dräidre jabti tibe niere ie, niebare kwe ie.

<sup>14</sup> Abtä Jesukwe niebare ie:

Ja mräkä, ḡnirekwe ti mikani kritobore mun ngätäite jäandrän dräikäre munbti amarebti mata niere kore tie ye? niebare kwe ie.

**15** Ni ye tö namani jäandrän rünkwe diain kabre jae, aisetet Jesukwe niebare mda ietre:

Ni rabadre jäandrän bkäne kabre, ñan ye köböire kä rabai nuäre nibtä, aisetet mun tö jäandrän bkäne kabre jakrä, ye ngäniene munkwe ja ngibia, niebare kwe.

**16** Bti Jesukwe kukwe ye bärä mikani krörö:

Bati ni nämane iti abko jäandrän bkäne kabre krübäte. Batira jire nura nökani kwe, abti ngwä ötani kabrekabre kwe. **17** Yebti ni jäandrän bkänsä kabre ye namani töbige mda: Jäandrän ngwä ötani kabre krübäte tikwe noko amne ju ñakare tikwe ükakrä. ḡTikwe ükadi mdente? namani nütüre. **18** Te batibe niebare kwe jae: ¡A! Tikwe dre nuendi nüra gare tie. Ju chi tä tikwe nura ükakrä noko tikwe dikandite, bti tikwe ju mikadi bärä kri mda ju chi noko täte abko te tikwe mrö noko ükadi jökrä jäandrän jakwebe. **19** Bti tikwe niedi krörö jae au: Ti nena jäandrän bkäne kabre amne jäandrän nena nünankrä raire tie, aisetet mtare mentokwäre ti bike jadüke, ti bike mröre, dö ñaen amne ti bike kä ngwen nuäre jabtä kwäräkwärä mda ruen tie, nütübare kwe. **20** Akwa ye btäräbe Ngöbökwe niebare ie: ¡Ma töi ñakare! Mtare deo ma krütadi angwane, ḡjäandränta ükani kabre makwe, se abko rabadi nirekrä? niebare Ngöbökwe ie.

**21** Ye kwrere tä nakenä munbtä. Munkwe jäandrän ükadre kabre jakrä kä nebtä, akwa jäandrän kuin tä biandre Ngöbökwe munye, ye abko munkwe känändre ñakare jakrä, angwane mun rabadi bobre Ngöbö ngwärekri angwane, kukwe ne kwrere rakadikä munbtä, niebare Jesukwe ni jökräye.

### Ñan töbikadre dikaro mröbtä amne dänbtä (Mateo 6.25-34)

**22** Yebti Jesu nikwitaninte, kákwe niebare nitre ja tötitikaka benye:

Tikwe kukwe nini, yebtä munkwe mrö ño kwetadre nünankrä amne munkwe dän ño kitadre jabtä, yebtä munkwe ñan töbika dikaro abko ti tö nibi niei munye, **23** ñobtä ñan angwane nita nüne kä nebtä angwane, nünandre metre Ngöböbe abko bärä ütiäte mrökrä amne ni ngrabare ye abko bärä ütiäte dänkrä, aisetet munkwe ñan töbika krübäte dikaro jäandrän yebtä.

**24** Ye abko, nukwä kwerbo tä nüne ño, ye mika ñäräre munkwe. Kwerbo tä nura nökö ñakare, tä ngwä ötö ñakare, ju ñakare kwe mrö ükakrä jakrä, akwa Ngöböta mrö bien kwetadre ietre. ¡Mun abko bärä ütiäte nukwä kräke, se abko mun Rün kákwe ñan mrö biandre munye ya amarebti mutta töbige krübäte dikaro se! **25** Erere arato, munkwe ñan töbikadre krübäte dikaro kore, ñobtä ñan angwane ni tö rabare ja tuai bärä kri, akwa di ñakare ja mike niren taiti mda kukwane. **26** Jäandrän ne abko chi akwa, mun di ñakare nuenkäre, ḡse ñobtä abko jäandrän bärä taretare nuendre abko btä mutta töbige krübäte dikaro se?

**27** Mdakäre abko, ḡñobtä mutta töbige krübäte dikaro dänbtä jakrä se? Kri blü tä niren ño, yebtä munkwe töbika. Tä sribire ñakare, tä dän dike ñakare jakrä, akwa jrei kri Salomón abko nämane jäandrän jökrä tuäretuäre bkäne, akwa dän tuäretuäre kri blü se kwrere abko Salomónkwe kitani ñakare jabtä. **28** Kri blü tä neme jötrö köböitibe, abti jäandräne angwane mikata ngire ñukwäre, akwa Ngöböta ükete tuäretuäre. ḡYe mun abko ie dän ñan biandre Ngöbökwe ya amarebti mutta tödeke ñakare täte Ngöböbti ye?

**29** Munkwe dre kwetadi amne munkwe dre ñadi tomnane, yebtä munkwe ñan töbika krübäte dikaro amne mun ñan raba ulire, **30** ñobtä ñan angwane ni kwati kä nebtä tä tödeke ñakare Ngöböbti abko bärä tä nakwen kisere jäandrän ye jiebti. Akwa mun käta dre mdei nike, ye abko garera jökrä Ngöbö mun Rün kä käinbti seye amne niarakwe jäandrän ye biandi munye, aisetet munkwe ñan töbika dikaro jäandrän nünankrä yebtä jakrä. **31** Akwa jäandrän Ngöbökwe tä kä käinbti, ye munkwe känäntari angwane, jäandrän jökrä mdei nikata munkwe ye Ngöbökwe biandi munye arato.

*Jändrän kuin kä käinbti, jiebti ni rankwadre  
(Mateo 6.19-21)*

<sup>32</sup> Ne aisetet mun obeja kiakia tikwe, munkwe ñan kä jürä ngwian jabtä, ñobtä ñan angwane jändrän jökrä kä käinbti, känti Ngöbö mun Rünta gobrane abko mikani gare ja moto kuinbti kwe munye. <sup>33</sup> Ye aisetet, jändränta munkwe, ye erere munkwe rürümoin jökrä, bti munkwe ngwian dräi ni bobre bobrebti angwane, Ngöböta jändrän kuin ütiäte kri ngibiare munkrä kä käinbti, ye känäntari jakrä munkwe. Erere arato, jändrän kuinkuin ütiäte krikri rabadre munkrä kä käinbti, ye munkwe känäntari jakrä, ñobtä ñan angwane Ngöböta jändrän kuin ütiäte kri ngibiare kä käinbti munkrä, ye känti ni gore ñan rabadre gwi amne kebekwe ñan juandre ngwarbe munkän arato, aisetet munkwe jändräntütiäte kri kä käinbti känäntari bäri kabre jakrä. <sup>34</sup> Munkwe nuendre kore, ñobtä ñan angwane jändrän ütiäte krikri tädi ükani mdente jakrä munkwe, ye känti mun töi tädi arato, niebare Jesukwe nitre ja töitikaka benye.

*Nikwe Jesu ngibiadre ngäbti kisere*

<sup>35-36</sup> Bti Jesukwe niebare mda ietre:

Ti bike kukwe mdara jire niere munye abko krörö: Munkwe dän kita biare jabtä amne munkwe ñotra jutra mika biare ti ngibiakäre ngäbti, ni klabore tä bkänkä ngibiare ngäbti ye kwrere, ñobtä ñan angwane ni mdata ja mike gure angwane, sribikätre bkänkä tä nüke kä ngwen nuäre jabtä, akwa sribikätre kwe abko tä biare ngibiare ngäbti jukwe tikakäre ie, ye kwrere munkwe ja mika biare ti ngibiare ngäbti. <sup>37</sup> Ye abko, nitre sribikä tä kwen ngwate bkänkäye, ye abko käita neme nuäre btä, aisetet sribikä kwandre ngwate bkänkäye ne ngwane, bkänkä ara jire kákwe dän sribikrä kitadi jabtä, bti sribikä kwekwe mikadi täkänintbe mesabtä kwe, mrö mikadi kwetadre kwe ietre mikakäre ütiäte. Ye kwrere munkwe ti ngibiadre ngäbti angwane, ti rükadita angwane, tikwe mun mikadi ütiäte arato abko ti tö niei metre munye. <sup>38</sup> Ne aisetet, nitre sribikä ye bkänkä rükadreta kä ruäre angwane ya o kä ngwen ja ken dekä angwane rükadreta ya, akwa sribikä kwe tä biare ngibiare ngäbti, ye abko bäri käi rabadre nuäre sribikätre yebtä, erere munkwe ti ngibiadre ngäbti kisere angwane, bäri käi rabadi nuäre munbtä arato.

<sup>39</sup> Kukwe mdara jire rabadre gare munye arato abko krörö: Ni gore rükadre kä ñongwane, ye rabadre gare ju bkänkäye akräke ju bkänkä kákwe kraidre gwi angwane, jändrän ñan goidre jire kän kwe. <sup>40</sup> Ni gore rükadre ñongwane gare ñakare, ye kwrere ti Ni Kä Nebtä Ngobo ne mun tädi ngibiare ngäbti ñakare angwane, batibe rükadita, aisetet munkwe mokre jabti ti ngibiakäre ngäbti, niebare Jesukwe nitre ja töitikaka benye.

*Sribikä kuin amne sribikä käme, btä Jesukwe kukwe bë mikani  
(Mateo 24.45-51)*

<sup>41</sup> Angwane Pedrokwe niebare mda Jesuye:

Ti Dänkien, ;makwe blitaniri, ye makwe nini kaibe nunkrä ya o makwe nini ni jökrä kräke? niebare kwe ie.

<sup>42</sup> Angwane ni Dänkien kákwe niebare mda:

Ni sribikä kuin tä biare abko bkänkä tä mikete sribikätre mda mda ngibiare amne mrödre ñongwane erere käita nüke angwane, tä sribikä mda mda buke. <sup>43</sup> Ni sribikä mikateta ja täte bkänkäkwe angwane, sribi mikateta kisete bkänkäkwe erere tä nuene täte jökrä, bti bkänkä tä nüketa, käta kukwe ükete kuin kräke, <sup>44</sup> kákwe ni sribikä kuin kore ye abko mikadi jändrän jökrä ngibiabtikä jakrä, aisetet käta neme nuäre btä abko ti tö niei metre munye.

<sup>45</sup> Akwa sribikä mikadrete sribire ja täte bkänkäkwe ye abko rabadre töbike krörö: Ti bkänkä ñan rükadreta jötrö, rabadre nütüre, kä rikadre sribikä mda mda merire, brare ngötikekä kwäräkwärä amne, rikadre mröre, dö ñaen amne rikadre dröbare jirekäbe angwane, <sup>46</sup> bkänkä rükadreta ñongwane gare ñakare ie. Ne aisetet tädre jäme angwane, batibe bkänkä jata dre nüketa, yebtä abko bkänkäkwe mikadi ja tare nike kri, sribikä dokwä ribi mda ben.

<sup>47</sup> Mdakäre abko, ni sribikä abko bkänkä tö dreye gare kuin ie, akwa bkänkä kwe mikata täte ñakare kwe, aisetet metadi tare krübäte kwe. <sup>48</sup> Akwa sribikä mda abko, bkänkä tö dreye metre gare ñakare ie, käkwe ja mikadre ngite, yebtä mikadre ja ngie nuen, akwa metadre bää räkä, ñobtä ñan angwane kukwe gare ñakare ie aisetet. Ne mden kisete, nire nire abko ie sribi ya, jändräni mda mda ya bianta kabre, ye ie käräta bäri mda btä. Erere arato, nirebti tödekata sribi nuenbtä abko ribeta bäri mda btä, niebare Jesukwe nitre ja tötitikaka benye.

*Ni kwati rabadi rüre jabe kwärikwäri Jesu dokwäre  
(Mateo 10.34-36)*

<sup>49-51</sup> Yebti Jesukwe niebare mda ietre:

Tikwe ja tare nikadi kri angwane ti krütadi, akwa ye ngämi nakenkä, känenkri ti moto neme nuäre ñakare. Mdakäre abko, ñan ti jatani mun mikakäre nüne jäme jabe kwärikväri abko munkwe nütü, akwa ti jatani ñukwä bukete mun ngätäite kä nebtä, ye abko ti tö nena tuai jutra ngitiekä. Ti jatani, abtä ni kwati rabadi nikwite ja rüere kwärikväri. <sup>52</sup> Mtare mentokwäre ni ruäre rabadre tödeke ñakare tibti käkwe rüdi mräkä tödekaka tibti ben, aisetet ni ja mräkäre tädi nüne nirike gwi, ye abko nimä rabadi rüre mräkä nibu rüere. Erere arato, ni nibu ye rabadi rüre mräkä nimä ye rüere. <sup>53</sup> Angwane ngäbäkre rün rabadi rüre ngobo kwebe amne ngäbäkre rabadi rüre rün kwebe. Erere arato, meye rabadi rüre ngäankän kwebe amne ngäbäkre merire rabadi rüre meye kwebe. Ye kwrere arato, bi rabadi rüre bosibe amne bosí rabadi rüre bibe. Ne abko rabadi nakenkä kore munbtä tödekabtä tibti, niebare Jesukwe nitre ja tötitikaka benye.

*Dreta nakenkä rükadre gare  
(Mateo 16.1-4; Marcos 8.11-13)*

<sup>54</sup> Bti ni nämane kwati yete, ye ie Jesukwe niebare mda:

Mütata kite jüben nindrini angwane, ñü räkändi temen mutna niere, erere ñüta näkäen. <sup>55</sup> Erere arato, müreta kite mate mötarikri angwane, kä rabadi ngire krübäte mutna niere, erere käta neme ngire. <sup>56</sup> Ye aisetet ngwarbe mutna bike töi ñakare, ñobtä ñan angwane jändränta tuen kä käinbti amne kä temenbtä, ye abko tädre dre bää mike tä nüke gare kuin jökrä munye. ¿Ye ñobtä abko dreta nakenkä kä ne ngwane mun näire Ngöbö diebti mun okwäbti abko tä nüke gare ñakare munye? ¿Ye ñan ngwarbe mutna bike töi ñakare ya?

*Nikwe kukwe ükadrete jötrö ni rüebe  
(Mateo 5.25-26)*

<sup>57</sup> Mdakäre abko, kukwe raba ja rüere kwärikväri munkwe angwane, ükadrete ño kuin, ye erere munkwe ükate jabe kwärikväri. <sup>58</sup> Akwa nane ma rüekwe ma kita ngise kritobo ñakare israelitareye ne ngwane, ma ngämi nebe kritobo ngwärekri, känenkri makwe kukwe ükate ma rüebe ji ngrabare, mun ñan rabadre kritobo ngwärekri abkokäre, ñobtä ñan angwane ma rabadre kritobo ngwärekri angwane, niarakwe ma köböi biandi guardiaye amne guardiakwe ma kitadi ngite kä teri. <sup>59</sup> Ye känti abko makwe ñan ngwian biandre täte jökrä ja ütiäre, känenkri ma ñan tikadreteta kwe abko ti tö niei munye. Abko kore se, niebare Jesukwe ni nämane kwati yete ye.

## 13

*Ni jökrä käkwe kukwe käme kitadre temen, bti Ngöbö kadre ngäbti*

<sup>1</sup> Kä ye ngwane ni israelita nämane ruäre Jesu känti yete käkwe niebare ie:

Krire nitre Galileabo nämane jändräni jakwe kämike kukwadre Ngöböye, Ngöbö käikitakäre ju blitakrä Ngöböbe känti angwane, Pilatokwe kämikamna, erere rükä romanobo kwekwe käkwe kämikani.

<sup>2</sup> Abtä Jesukwe niebare ni jökräye:

¿Nitre Galileabo kämikani kore, aisetet niaratre abko bäri kukwe kämekäme nuenkä nitre Galileabo mda mdakrä, mutna nütüre ya? <sup>3</sup> Akwa ñakare kore ti tö niei munye.

Akwa munkwe ñan ja töi kwitadre, käkwe ñan kukwe käme kitadre temen, bti Ngöbö kadre ngäbti munkwe ne ngwane, mun rabadi nianinte, käkwe ja tare nikadi kri Ngöbö okwä bäre mento kärekäre.

<sup>4</sup> Erere arato, nitre ni jätäbti ni kwä, bti ki Siloéte nikani temen, käkwe kämikani, ¿niaratre ye abko nämane Ngöbö Kukwei mike täte ñakare, abtä nämane ja mike ngite bäri Ngöbö rüere nitre Jerusalénbo mda mdakrä, monta nütüre ya? <sup>5</sup> Akwa ñakare kore ti tö nei munye. Munkwe ñan ja töi kwitadre, käkwe ñan kukwe käme kitadre temen, bti Ngöbö kadre ngäbti munkwe ne ngwane, mun rabadi nianinte, käkwe ja tare nikadi kri Ngöbö okwä bäre mento kärekäre. Abko kore se, niebare Jesukwe ietre.

<sup>6</sup> Yebti nitre israelitakwe ñan Ngöbö kadre ngäbti ne ngwane, Ngöbökwe juandre ngwarbe abko mikakäre mokre, Jesukwe kukwe mda bä mikani ietre angwane, nitre israelita krikri bä mikani higo krie kwrere kwe amne Ngöbö bä mikani kä bkänkä kwrere kwe abko krörö:

Bati ni nämane iti käkwe higo krie nökani uba nurai ngätäite. Abti higo ngwä namanina ya abko nikani tuenta, akwa higo ngwä kwani ñakare ie. <sup>7</sup> Abtä nura ngibiabtikä nämane kwe yete, ie niebare kwe: Higo ne ngwä nena btä ya abko ti nükani tuen kä komä jire ja täritäri akwa, ngwäta kwen ñakare tie amne tä kä den ngwarbe jae, aisete makwe tikaka jirekäbe, niebare kwe sribikäye.

<sup>8</sup> Akwa nura ngibiabtikä käkwe niebare ie: Ti dänkien, makwe higo krie ye tuametre kä nete. Tikwe dobo muandi dokwä bäre temen, bti tikwe abono mikadi btä. <sup>9</sup> Ye ngwä rabadi btä akwa, nane ngwä ñan rabadre btä ne ngwane, makwe tikaka ngätrite ta, niebare sribikäwe bkänkäye. Ne abko nakaninkä kore abko erere rabadre nakenä munbtä. Abko kore se, niebare Jesukwe ietre.

#### *Jesukwe meri bren mikaninta kuinta köböjadükakrä näire*

<sup>10</sup> Bati köböjadükakrä näire, Jesu nikani dirire mda sinagogate angwane, <sup>11</sup> meri bren nämane iti yete. Meri ye abko kä kwä jätäbti kwä kwära nikani bren. Üai käme nikani btä, käkwe trö dötäninkä, aibe kisete ñan namani nünenkä metre krö. <sup>12</sup> Meri ye abko nämane siba yete, btä Jesu okwä namani angwane, käräbare kwe, bti niebare kwe ie:

Ti mräkä, ma bikera nementa kuinta mtare, niebare kwe ie.

<sup>13</sup> Bti kise mikani kwe meri bren yebti. Ye btäräbe meri ye namani nünankäta metre krö batibe, kä nikani Ngöbö käikitekä kwäräkwärä se kwrere.

<sup>14</sup> Yebtä abko, sinagoga ye dänkien namani romon, ñobtä ñan angwane Jesukwe meri bren mikaninta kuinta köböjadükakrä näire, käkwe niebare ni jökräye:

Kä tärä köbö ti sribikrä, aisete köbö ti ye näire mun bren bren jata ja mikakäreta kuinta, akwa köböjadükakrä näire, mun bren bren ñan jata ja mikakäreta kuinta, niebare kwe ni jökräye.

<sup>15</sup> Abtä ni Dänkienkwe niebare mda ie:

¿Mun ngwarbe ja bä mike kuin! ¿Buey amne buro mäkteta mun itire itirekwe angwane, köböjadükakrä näire monta tikete ñakare, bti monta nikken ngwena tomna ñaen ñakare ya? Mun jökrä tä nikken jändräñ ye ngwena tomna ñaen ye monta sribire ruen tie. <sup>16</sup> Ye aisete meri ne jatani Abraham mräkäkri. Niara abko bäri ütiäte jändräñ ye ngwä abko kä kwä jätäbti kwä kwära neketaninte Satanaye abtä bren, ¿se abko ñan diandrekäta köböjadükakrä näire Satanaye kisete ya? niebare Jesukwe ietre.

<sup>17</sup> Jesukwe ñäkäbare kore angwane, Jesu rüe namanintre ja gaire jökrä, akwa ni mda mda abko btä kä namani nuäre jändräñ kuin nuen namani Jesukwe ye tuare.

#### *Jesukwe kukwe bä mikani mostasa nurai amne lebadura btä*

(Mateo 13.31-33; Marcos 4.30-32)

<sup>18</sup> Erere arato, Jesukwe niebare:

¿Ngöböta gobrane ño nibti? ¿Ngöböta kite gobrane nibti, ye abko tikwe bä mikadre dre kwrere ruen munye? <sup>19</sup> Ngöböta kite gobrane nibti ye abko mostasa nurai chi kwrere. Ni iti käkwe mostasa nurai nökani ju bäre jakrä abko nikani niren kri krikri kwrere angwane, nukwä namani nüne kri ye küdehti, ye kwrere jire käne Ngöböta kite gobrane ni braibe

bti, akwa mrä angwane Ngöbö rabadi gobrane ni kватibti abko bä mikata nura chi yebtä.  
**20** Ye ngwane Jesukwe kukwe mdara jire bä mikani krörö:

¿Ngöböta kite gobrane nibti ye abko tikwe bä mikadre dre kwrere ruen munye?  
**21** Ngöböta kite gobrane nibti ye abko rabadi niren lebadurata niren ye kwrere abko krörö: Meri iti kákwe lebadura kitani chi arina kabre te, bti mritani kwe abti lebadura nikani arina kabre ye ñäre jökrä, niebare Jesukwe.

*Jukwe krä chi*  
*(Mateo 7.13-14,21-23)*

**22** Yebti Jesu nikani janknu Jerusalén kukwäre mda angwane, nikani dirire juta kwatirekwatire te ji ngrabare. **23** Angwane bati ni iti kákwe niebare ie:

Ti Dänkien, ¿ni braibe rabadi dianintari ya?

Abtä Jesukwe niebare mda ni jökräye: **24** Munkwe ja di mika kri rikakäre gwä jukwe krä chite ta, ñobtä ñan angwane mrä ni kwati tö rabadi näin gwä akwa ñan rabadi, **25** ñobtä ñan angwane ju bkänkä kákwe jukwe dikadi jite, ye ngwane mun rabadi ju bäre abko rabadi ju bkänkä ye kärere, kä rabadi niere krörö ie: Ti Dänkien, jukwe tike nunye, mun rabadi niere. Akwa niarakwe niedi munye: Mun gare ñakare tie amne mun kä mdenbo gare ñakare tie, niedi kwe munye. **26** Angwane mun rabadi niere krörö ie: Nunkwe mröbare amne nunkwe tomna ñiani gwaire mabe. Erere arato, makwe diribare nun känti, jye töre ñakare mae ya! munkwe niedi. **27** Akwa ju bkänkä kákwe niedi munye: Mun gare ñakare tie amne mun kä mdenbo gare ñakare tie. Mun kukwe kämekäme nuenkä nän mobe mento tibtä, niedi kwe munye.

**28** Ye ngwane abko, Ngöböta gobrane, ye känti Abraham, Isaac, Jacob amne Ngöbö kukwei niekätre tädi jökrä, btä mun okwä rabadi angwane, munkwe ja müadi krikri be amne mun moto rabadi romon krübäte ju bkänkäkrä, ñobtä ñan angwane mun abko tädi kitaninkä ju bäre. **29** Mun tädi ngwarbe ju bäre, ye ngwane abko nitre nünanka mintokwäre, mötarikri, kä driri amne nindrini abko rükadi jökrä, rabadi täkänintbe mröre gwaire jökrä Ngöböta gobrane ye känti. **30** Ye ngwane abko, ni ruäre ütiäte kri mtare abko rabadi ni bobre kwrere mrä amne, ni ruäre bobre mtare abko rabadi ütiäte kri mrä. Abko kore se, niebare Jesukwe.

*Jesukwe nitre Jerusalénbo müaibare*  
*(Mateo 23.37-39)*

**31** Kä ye ngwane abko, nitre bariseo nükani ruäre, kákwe niebare Jesuye: Herodes tö ma kämikai, aisetet nän ngitie mento nete, niebare kwetre.

**32** Angwane Ngöbö ñan tö ne ngwane, Herodes ñan rabadre Jesu kämike ja töi jenbtí, ye mikakäre gare ietre, abkokäre Jesukwe niebare mda ietre:

Herodes abko nukro känsenta kwrere, ye ie mun nän niere krörö: Mtare, jetbe tikwe üai käme juanditari nibtä amne tikwe ni bren bren mikadita kuinta amne münkme tikwe sribidi ünän. **33** Akwa mtare, jetbe, münkme ti näin sribire janknu ji ngrabare. Abti ti näin nebe Jerusalén, munkwe nie ie, ñobtä ñan angwane ni Ngöbö kukwei niekä abko ñan krütadre juta Jerusalén bäre mento, aisetet ti näin känti. Abko kore se, niebare Jesukwe ietre.

**34** Ye btäräbe Jesukwe nitre Jerusalénbo müaiba, kákwe niebare krörö:

¡Aingwaree, mun nünanka Jerusalén nete! Käre munta nitre Ngöbö kukwei niekä müre kete amne nitre juanta Ngöbökkwe ja kukwei ngwena abko müre ketata jäbti. Ye abko, kwita ngäbäli kiakia ngibiare ja ngike täni, ye kwrere käre ti tö namani mun ngibiai, akwa mun ñan tö namani ti tuai ja ngibiare, **35** aisetet ju munkwe nete ne rabadi tökare jökrä mun täbtä abko tita niere munye amne, mtare mentokwäre ti ngämi kiteta, känenkri munkwe ñan ti tuadre jire chi mda, yebti munkwe ti tuadi angwane munkwe niedi krörö:

Ni kitera nüke ni Dänkien Ngöbö käbti raba mikani ütiäte kri abko munkwe niedi ti ngäbti. Abko kore se, niebare Jesukwe.

## 14

*Ni nüen ngrabare abko Jesukwe mikaninta kuinta*

<sup>1</sup> Bati köbö jadükakrää näire, Jesu nikani mröre bariseo ütiäte kri känti angwane, nitre bariseo mda mda namani ngibia retari kisere kitakäre ngite. <sup>2</sup> Angwane ni nämane iti yete abko nüen jökrää ngrabare, aisetē nämane bren, btä Jesu okwää namani, <sup>3</sup> kækwe niebare Kukwe Biani Ngöböökwe Moiséye dirikätreye amne nitre bariseoye:

¿Köbö jadükakrää näire ni raba ni bren miketa kuinta ya, ñakare ya? niebare kwe.

<sup>4</sup> Angwane niaratre namani kwekbe jökrää. Abtä Jesukwe ni bren käräbare ja ken, mikaninta kuinta kwe, bti juaninta kwe. <sup>5</sup> Yebti Jesukwe niebare mda nitre bariseoye:

Buro ya o nbi betadrekä nguse munkän köbö jadükakrää näire, ye mun rikadre jötrö ngwarbe dentarita, ye ngwane mutta sribire. ¿Akwa ni bäri ütiäte jändräñkrää abko tikwe mirita kuinta abtä ti ngite mutta nütüre ya? niebare kwe ietre.

<sup>6</sup> Angwane nitre bariseo namaninta kwekbe jökrää, ñobtä ñan angwane kukwe kwani ñakare ietre.

<sup>7</sup> Angwane nitre nübaibare mröre siba abko nikani ja täkrää ni ütiäte ütiäte kräke mesabtä känene jae, bti namani nebe täkänintbe Jesu okwäbti. Abtä Jesukwe kukwe bää mikani ietre, kækwe niebare krörö:

<sup>8</sup> Nane ni iti rika ja mike gure, känti ma nübai kä ngwiankrää nuäre jabtä siba angwane, ja täkrää ni ütiäte kräke, yete ma ñan raba täkänintbe, ñobtä ñan angwane nane ni mda bäri ütiäte makrä nübaibare arato abko jatadre nüke angwane, <sup>9</sup> ni mun nübaikä ye jatadre, kækwe niedre mae: Ja täkrää känti mata täkänintbe, ye bien ni neye, niedre kwe mae angwane, ma rikadre nebe täkänintbe mrä köre, ye abko rabadre gaidre kri makrä.

<sup>10</sup> Ne aisetē ma nübaikä känti ma rika angwane, ja täkrää mrä känti ma raba täkänintbe. Yebti ni ma nübaikä ye jatadre, kækwe niedre krörö mae: Ja mräkä, ja täkrää ni ütiätekrä tä mesabtä ne känti jakwe siba, niedre kwe mae, ye ngwane ma rabadre ütiäte ni mesabtä ye okwäbti abko rabadre bäri kuin. <sup>11</sup> Tita niere kore, ñobtä ñan angwane nire nire tö bikai kri au abko Ngöböökwe mikadi bobre amne, nire nire tö ja mikai bobre abko Ngöböökwe mikadi ütiäte kri, niebare Jesukwe.

<sup>12</sup> Yebti Jesukwe niebare niara nübaikä ye:

Makwe mrö scribe kri kä ngwiankrää nuäre jabtä, o ma rika ni mda mda buke mröte dere, ye ngwane ma kukwe muko, ma etba, ma mräkä mda mda amne nitre ngwian bkänkä kri nünanka känime ma bäre temen, ye aibe makwe ñan nübai mröre jabe, ñobtä ñan angwane niaratre bukadre makwe ye ütiäre ma kärädretä kwetre mröre jae, aisetē makwe mrö biani ye ütiä biandita kwe mae, aisetē nitre ngwian bkäne kri aibe ñan nübai makwe. <sup>13</sup> Akwa ma rika mrö sribere kri kä ngwiankrää nuäre jabtä angwane, makwe ni bobre nübai. Erere arato, ni bren bren ngrabare, ni nakwente amne ni okwää kä drünente nübai makwe mröre jae angwane, <sup>14</sup> kä rabadi nuäre mabtä, ñobtä ñan angwane niaratre ñan raba ma buketa jire mrö ye ütiäre, akwa nitre metre Ngöbö ngwärerekri rükaita nire kä mrä angwane, ye näire Ngöböökwe ütiä biandi mae. Abko kore se, niebare Jesukwe ietre.

*Jesukwe kukwe bää mikani ja bukabtä*

*(Mateo 22.1-10)*

<sup>15</sup> Ni metre metre Ngöbö ngwärerekri rükadita nire, btä Jesukwe blitabare kore, yebtä abko nitre nämane mesabtä ye ngätäite ni iti kækwe niebare mda Jesuye:

Ngöbö jatadi gobrane ni ngätäite angwane, nire tädi mröre yete abko btä kä rabadi nuäre krübäte, niebare kwe.

<sup>16</sup> Abtä Jesukwe kukwe bää mikani ietre, kækwe nitre israelita ütiäte kri bää mikani ni nübaibare känekäne kwrere, kækwe niebare mda:

Yebtä abko ti bike kukwe bää mike krörö munye: Bati ni iti kækwe mrö sribebare kri kwetadre, kækwe ni kwati nübaimna mröre jae. <sup>17</sup> Ye erere mrö namanina biare kwetadre angwane, ni ye kækwe niebare sribikä kweye: Nitre nübaibare tikwe, ye nän kärere amne makwe nie krörö ietre: Mrö nibira biare kwetadre, aisetē mun jakwe mröre, makwe nie ietre, niebare kwe sribikä kweye.

<sup>18</sup> Ye erere bkänä, sribikä ye nikani akwa, nitre nübaibare abko kwe kukwe mdara jire nämanena nuendre, aisetē ñan rikadre namani niere. Ni iti käkwe niebare: Gwä tikwe kä kürü abko ti bike niken tuenbtí, aisetē ti ñan rikadre, ye abko munkwe dian tibti ta, niebare kwe. <sup>19</sup> Ni mda abko käkwe niebare: Tikwe buey kürü krä jätä sribikrä jae abko tä sribire kuin ya, ñakare ya abko ti bike niken nuente, aisetē ti ñan rikadre, akwa munkwe dian tibti ta, niebare kwe. <sup>20</sup> Ni mdara jire abko käkwe niebare: Gwä tikwe ja miri gure, aisetē ti ñan rikadre, niebare kwe.

<sup>21</sup> Angwane sribikä ye nikaninta, käkwe niebaretä jökrä bkänkäye. Abtä sribikä bkänkä moto namani romon krübäte, käkwe niebare sribikä kweye: Nän jötrö ji kri ngrabare amne ji krä kiakiabti juta ngrabare nokore ni bobre känene, ni bren bren ngrabare känene amne ni okwä kä drünente känene. Erere arato, ni nakwente känene. Ma jata ngwena mröre nete, niebare kwe sribikäye.

<sup>22</sup> Ye erere bkänä, sribikä jananbare. Abti bā raire angwane, sribikä jataninta, käkwe niebare bkänkäye: Ti dänkien, makwe ni kärämna tie, erere tikwe käränirira, akwa kä tä ni mda mdakrä, niebare kwe. <sup>23</sup> Angwane sribikä bkänkä käkwe niebare mda ie: Nän ni mda mda känene ji ngrabare juta bäre mento sere. Ma jata ngwena nüke nete, ñan tö raba kite akwa, ma jata ngwena ni mikakrä bäri kwati gwi ti känti nete, <sup>24</sup> ñobtä ñan angwane nitre nübaibare känekäne tikwe, ye abko ñan rükadre jire iti mröre tibe mesabtä, niebare kwe. Ye kwrere Ngöböökwe mun ütiäte ütiäte kärädi nüne ja känti angwane, nane mun ütiäte ütiäte ñan rabadre känti, akwa ni bobre bobre rabadi. Abko kore se, niebare Jesukwe ietre.

*Nire nire tö näin Jesube käkwe töbikadre kuin ja käne  
(Mateo 10.37-38)*

<sup>25</sup> Jesukwe mröbare ünän kore, bti nikani ta angwane, ni nikani kwati jiebti. Abtä niara nikwitaninte, käkwe niebare ietre:

<sup>26</sup> Nire nire tö näin tibe rabakäre ja töitikaka tibe abko käkwe ti taredre bäri jäandrän jökrä bti ta. Akwa nire nire tä rün, meye, merire kwe, brare kwe, etba, ngwai kwe tarere bäri amne tä ja tarere bäri au ne ngwane, ñan rabadre ja töitikaka tibe. <sup>27</sup> Erere arato, ni kämikata niken krusobtä angwane, nita niken kruso doboko ngwena au jakrä, ye kwrere nire nire käkwe ñan kötä mikadre au jakrä ja tare nikakäre tikrä amne krütakäre tikrä ne ngwane, ni ye ñan rabadre ja töitikaka tibe.

<sup>28</sup> Ye abko ti bike bā mike krörö: Nane ni iti rikadre ju mike nura ngibiabtikrä angwane, ngwian tärä täte ju ye mikakrä bare täte jökrä ya, btä tä töbikä käne, abti ngwian tärä täte ye ngwane tä ju mike. <sup>29</sup> Akwa ngwian ñakare täte ju mikakrä, akwa ju kömikadretbe kwe abti rabadre ötare ñan rabadre käte ie. Yebtä abko ni jökrä rabadi ni ye kötaire, <sup>30</sup> kä rabadre niere: ¡Al! Ni se nikani ju mike akwa, namani bare ñakare ie abko ni jökrä rabadre niere kötaire kwärä kore btä. Ye kwrere mun mden tö näin tibe käkwe töbika kuin ja käne.

<sup>31</sup> Yebtä ti bike kukwe mdara jire bā mike abko krörö: Jrei tädre iti kwe rükä tädre mili krä jätä abko jatadre niken rüre jrei mda rüiere. Akwa jrei mda ye abko kwe rükä tädre mili krä gre, aisetē jrei kwe rükä mili krä jätäbe ye rabadre töbikä käne, rükä mili krä gre ye ganaindi kwäräbe kwetre ya abko rabadre töbikä. <sup>32</sup> Akwa nane rükä mili krä jätä ben jrei ye käkwe ñan ganandre, rabadre tuen ie angwane jrei kwe rükä mili krä gre ye tädre mente angwane, ñan rüdre kwe, aisetē ja mäkadreta jirekäbe kwe abkokäre nitre juandre niere kwe jrei mda yeye. <sup>33</sup> Ye kwrere abko, nire nire tö näin tibe rabakäre ja töitikaka tibe, akwa ñan tö jäandrän jakwe mikaité jökrä ne ngwane, ñan rabadre ja töitikaka tibe. Ne aisetē mun mden tö raba näin tibe käkwe töbika kuin käne. Abko kore se, niebare Jesukwe ni jökräye.

*Jesukwe kukwe bā mikani mrenbtä  
(Mateo 5.13; Marcos 9.50)*

<sup>34</sup> Yebti nire nire tö näin Jesube abko Jesukwe bā mikani mrenbtä, käkwe niebare mda:

Mren abra kuin jäandrän jökrä mikakrä bänante, akwa bänän riadrekä rabadre tibo, ye abko rikadre ngwarbe, aisetē ñan rabadre kuin mda, <sup>35</sup> amne ñan rabadre kuin dobokrä amne ñan rabadre kuin abono sribekrä, aisetē rabadre ngwarbe. Abtä kitadrekä jirekäbe. Tita kukwe niere ne mun mden mden tö näin tibe kákwe ketate ja olete, bti töbika kuin btä munkwe, niebare Jesukwe ni jökräye.

## 15

*Obeja nianinte, btä Jesukwe kukwe bä mikani  
(Mateo 18.10-14)*

<sup>1</sup> Angwane ni kwati ngwian käräkä gobran romanobokrä amne ni kwati mda mda namani tuen moto kämekäme nitre bikaka metre Ngöbö ngwärekriye, ye namani nüke Jesu ken niara kukwei nuakäre. <sup>2</sup> Abtä nitre bariseo amne Kukwe Biani Ngöbökwe Moiséye dirikätre namani ñäke tiebe Jesu rüere, kä namani niere jae kwärikwäri:

Nitre kukwe kämekäme nuenkä se kwrere abko ni noko tä kaen ngäbti jökrä amne tä mröre ketetibe ben, abtä tä ja mike ngite Ngöbö rüere ñan ñan, namanintre niere Jesubtä.

<sup>3</sup> Angwane Jesukwe kukwe bä mikani krörö mda ietre, nitre namani tuen kämekäme abko ütiäte Ngöbokrä era metre mikakäre gare:

<sup>4</sup> Ni iti mun ngätäite abko kwe obeja tädre gre ketarike abko riadrete krati kän, ye ngwane niarakwe ñan obeja gre ketabkä bti krä jätäbti krä ökän (99) ye mikadrete ja ngibiare kaibe kä kaibete, bti obeja kratibe nianinte, ¿ye niara ñan rikadre känentari kisere ya? <sup>5</sup> Kwandretari ie angwane, kä rabadre nuäre btä, kákwe kitadre ja köitäbti ta, bti rikadre ngwenante <sup>6</sup> ja gwiriete angwane, niara kukwe muko nünanka känimékäime abko kärädre jökrä kwe, bti niedre kwe ietre: Obeja nianinte krati tikän abko kuninantari tie, aisetē ari käi ngwen nuäre jabtä tibe, niedre kwe. <sup>7</sup> Ye kwrere abko, ni iti kukwe kämekäme nuenkä ni ne kwrere käta ja töi kwite, käta kukwe käme kite temen amne tä Ngöbö kaen ngäbti, ye abko käita neme bäri nuäre Ngöböbtä kä käinbti sete ni gre ketabkä bti ni jätäbti ni ökän käta Ngöbö mike täte era metre nütüta jabtä munkwe kwrere ye abko ie Ngöbö garera, niebare Jesukwe.

*Jesukwe kukwe bä mikani ngwian nianinte btä*

<sup>8</sup> Bti Jesukwe niebare mda:

Ye kwrere arato, meri tädre iti, kwe ngwian tädre kun jätä abko riadrete kundi kän angwane, meri ye kákwe ñotra mikadre, bti rikadre kä sökökä gwita ngwian ye känäntarikäre. <sup>9</sup> Abti kwandretari ie angwane, kukwe muko merire merire nünanka känimékäime abko kärädre kwe, bti niedre kwe ietre: Ngwian nianinte tikän abko kuninantari tie, aisetē ari käi ngwen nuäre jabtä tibe, niedre kwe kukwe mukoye. <sup>10</sup> Ye kwrere abko ni kukwe kämekäme nuenkä käta ja töi kwite, käta kukwe käme kite temen amne tä Ngöbö kaen ngäbti abko käita nebe nuäre angeletre Ngöböökwebtä kä käinbti sete, ye abko ti tö niei munye, niebare Jesukwe ietre.

*Jesukwe kukwe bä mikani ni bati diänbtä*

<sup>11</sup> Yebti Jesukwe kukwe mdara jire niebare angwane, nitre bariseo romon kräke abko bä mikani ngäbäkre mubai kwrere kwe amne nitre kukwe kämekäme nuenkä abko bä mikani ngäbäkre diän kwrere kwe abko krörö:

Bati ni nämane iti abko kwe ngäbriänkä nämane nibu. <sup>12</sup> Ni ye abko ngobo bäri bati nikani, kákwe niebare ie: Tata, jäandränta biandre tie makwe, ye erere makwe bian jötrö tie, niebare kwe rünye. Abtä rünkwe jäandrän jakwe ye dräibare niaratre nibubti.

<sup>13</sup> Yebti kä ngämi nikken raire ta angwane, ni bäri bati ye kákwe jäandrän jakwe erere rürümoinbare jökrä, bti ngwian diani kwe, bti nikani mobe kä mdabti, känti nikani kukwe nuene ngwarbe diän diän. Abtä ngwian ganinte jökrä jakän kwe. <sup>14</sup> Ngwian krütanina jökrä kän, ye btäraibe kä ye känti mrö nika jatani krübäte, aisetē niara nikani mrö nike krübäte arato.

<sup>15</sup> Angwane ni nämane iti juta yete abko israelita ñakare akwa, niara nikani sribi kärere jakrä ie. Erere bkänä, sribi bäri käme krübäte ni israelitakrä abko biani kwe ie, käkwe niara mikani mtü ngibiare. <sup>16</sup> Nämane sribire angwane, mtü buka nämane algarobate kwe abko niara tö namani nebe kwetai siba akwa, ñan namani bien jire chi kwetadre ie, aise te mrö namani krübäte ie.

<sup>17</sup> Abtä batí namani töbige: ¡Jo! Ni kwati tä ganane ti rün känti kwe mrö tärä kabre kwetadre amne ti abko kite jraine jakän mrö miare nete, <sup>18</sup> aise te ti bike nikenta ti rün gwiriete, käkwe niedi krörö ie: Tata, tikwe ja mikani ngite Ngöbö rüere amne ma rüere, <sup>19</sup> aise te makwe ñan ti kata ngäbti ja ngobo kwrere ja juete, akwa nita ganane mae, ye kwrere makwe ti mika ganane jae, tikwe niedi kore tataye, namani nütüre.

<sup>20</sup> Ye erere bkänä, nikaninta jibti, nikani nebata rün gwiriete. Nämane mente se kwrere angwane, jatabare rünye amne namani ruen bari böbre ie, aise te nikani betekä ngäbti, käkwe küde kitani ngärä demaine kwärä. <sup>21</sup> Angwane ngobokwe niebare ie: Tata, tikwe ja mikani ngite Ngöbö rüere amne ma rüere, aise te ti ma ngobo makwe, ye makwe niedre ñakare mda ruen tie, niebare kwe rünye. <sup>22</sup> Akwa rün abko käkwe niebare sribikätre kweye: Dän bari kuinkuin känene. Munkwe kita btä amne anio ni bärä mikakrä ütiäte kita kisebtä munkwe, bti sandalia kita ngotobtä munkwe niara ñan bärä rabadre ni klabore kwrere abkokäre. <sup>23</sup> Bti nbi ngäbäli bari kuin ngibiata jenena mun rika tuen. Munkwe kämika kwetadre. Ngäbäkre tikwe nüta ye ari käi ngwen nuäre kri jabtä, <sup>24</sup> ñobtä ñan angwane ni krüta kwrere jire ngäbäkre tikwe ne nianinkä ti okwätte, akwa nüta mtare. Niara nianinte tikän, akwa nürate, aise te ari käi ngwen nuäre jabtä, niebare kwe. Ye erere, ni jökrä nikani kä ngwen nuäre jabtä.

<sup>25</sup> Angwane ngäbäkre mubai abko nämane tirete, jataninta gwäkäre mda, nükani bärä känime se kwrere angwane, tän ngö amne ka kukwei jarabare ie amne tärä mika nämane namani ruen ie. <sup>26</sup> Abtä ni sribikä rünkwe käräbare iti kwe, bti niebare kwe ie: ¿Dreta nakenkä gwi? niebare kwe ie. <sup>27</sup> Angwane sribikä ye käkwe niebare ie: Käre ma rünta nbi ngäbäli bari köte ngibiare jenena, ye abko kämikamna, ñobtä ñan angwane ma etba nikani abko nüta. Niara tä kuin, aise te kä nibi nokre gwi ye, niebare kwe ie mda.

<sup>28</sup> Yebtä abko ngäbäkre mubai ye mätä namani kri krübäte, ñan tö namani rikai gwä. Abtä rün nikani känti ju bäre, kä namani ngwen kisere nebata gwi. <sup>29</sup> Angwane niebare kwe rünye: Tikwe sribibarera kä kobe makrä, ye gare kuin mae. Erere arato, tikwe ñan ma kukwei kitabare temen. Käre tita ma kukwe mike täte jökrä, akwa ma ngämi chibo ngäbäli bien jire krati tie kwetadre, kä ngwiankrä nuäre jabtä ti kukwe mukobe. <sup>30</sup> Akwa ma ngobo ngutu ngwarbe jananbare, meri bti kä ngwarbe ngwarbe, btä ngwian makwe ganinte jökrä makän abko kräke makwe nbi ngäbäli bari kuin kämikamna kä ngwiankrä nuäre jabtä, niebare kwe rünye.

<sup>31</sup> Abtä rünkwe niebare ie: Ma ti ngobo tikwe, käre mata nüne gwi tibe nete amne jäandrän jire jökrä tä tikwe, se abko jökrä makwe. <sup>32</sup> Akwa ni krüta kwrere jire ma etba nianinkä ti okwätte abko nüta, nämane nianinte tikän, akwa nürate, ye abko käi ngwiandre nuäre jabtä nikwe, abkokäre tikwe mrö sribemna, niebare kwe ngobo mubaiye. Abko nakaninkä kore. Ne ngörä, niebare Jesukwe nitre bariseoye amne kukwe biani Ngöökwe Moiséye dirikätreye.

## 16

### *Jesukwe kukwe bärä mikani ni ju ngibiabtikä btä*

<sup>1</sup> Jesukwe kukwe mda niebare krörö nitre ja tötitikaka benye:

Bati ni ngwian bkänkä kri nämane iti abko kräke ni mda nämane jäandrän ngibiabtikä. Ni jäandrän ngibiabtikä ye abko ñan nämane sribire kuin, aise te jäandrän jatani nente kri sribi bkänkäkän niebare kwetra ie. <sup>2</sup> Abtä sribi bkänkä käkwe sribikä kwe ye käräbare, bti niebare kwe ie: ¿Mata jäandrän ngibiarebti ño tirkä amarebti ma kädrieta nüke blo tibe nete? Mata sribire ño ño tirkä, ye niere jökrä tie, ñobtä ñan angwane makwe ñan jäandrän ngibiadre bti jire mda, niebare kwe ie.

<sup>3</sup> Abtä ni jäandrän ngibiabtikä ye namani töbike kri krörö mda: Sribi bkänkä bike sribi denkä tikän mtare, nehti tikwe ja nuendi mda. Ti di ñakare sribi taretare nuenkäre amne, titä neme ja gaire ngwian kärere ngwarbe jakrä ni mda mdaye, namani nütüre. <sup>4</sup> Te töi ngitianinkä krörö: Sribi diandrekä tikän angwane, ni mda mda tädre biare ti kaen ngäbti ja gwiriete, abkokäre ti bike kukwe ne nuene, namani nütüre.

<sup>5</sup> Erere bkänä, ni mda mda bti rürümön ütiä nämane sribi bkänkäkwe, erere käräbare kwe ja känti. Erere ni nükani käne, ie niebare kwe: ¿Rürümön ütiäta nuäi mabti ti bkänkäkwe, niebare kwe ie? Angwane ni ye kákwe niebare: Olibo köi galon siento krä kwä ütiäta tibti, niebare kwe. <sup>6</sup> Abtä ni jäandrän ngibiabtikä kákwe niebare ie: Makwe olibo köi diani ütiätre angwane, makwe tärä ükaninte, ye makwe ükateta, aisetet jötrö ngwarbe makwe olibo köi mika galon siento kräbkäbe tärä mdabtä, niebare kwe. <sup>7</sup> Yebti ni mda nükani abko ie niebare kwe: ¿Ma abko bti rürümön ütiäta nuäi ti bkänkäkwe? niebare kwe. Angwane ni ye kákwe niebare ie: Trigo sako mili krati ütiäta tibti, niebare kwe. Angwane ni jäandrän ngibiabtikä kákwe niebare ie: Tärä biani käne mae, ye ükateta amne makwe trigo mika siento krä kwäbe, niebare kwe ie.

<sup>8</sup> Yebtä abko ni jäandrän ngibiabtikä abko ni ngökaka akwa, sribi bkänkä kákwe niara käkitaninkä töbikabtä kuin jakrä kore, ñobtä ñan angwane jäandrän nuenta au jakrä, abkokrä ni töi kämekäme kä nebtä bäri tä juto biare jäandrän ükete kuin jakrä ni jen Ngöböökwe ngwä. <sup>9</sup> Ne aisetet mun kukwe muko rabadre bäri kwati munkwe, abkokäre jäandrän kabre munkwe tuen ütiäte ñakare Ngöböye, ye munkwe dräi ni bobre bobrebiti. Yebti jäandrän krütadre jökrä munkän angwane, ju nünankrä kärekäre kä käinbiti ye känti Ngöbö tädira biare mun kakäre ngäbti.

<sup>10</sup> Mdakäre abko, nire nire käta jäandrän braibe ngibiare kuin era metre, ni yebti abko tödekata jäandrän kabre ngibiabtä kuin era metre arato. Erere arato, ni ni ngökaka jäandrän braibe btä abko kákwe ni ngökadre jäandrän kabrebtä arato. <sup>11</sup> Ne aisetet jäandrän kä nebtä ütiäte ñakare bökan akwa, mun ñan tö ngibiai kuin era metre, ¿se abko Ngöböökwe tödekadre munbti, kákwe mun mikadre jäandrän bäri ütiäte kri ngibiarebti? ¡Ñakare jire!

<sup>12</sup> Mdakäre abko, ¿jäandrän jenena ni mdakwe munkwe ñan ngibiadre kuin era metre, se abko nirekwe jäandrän biandre ngibiadre jakrä munye?

<sup>13</sup> Ne aisetet ni klabore ñakare jire abko rabadre sribire bkänkä nibukrä ja näire, ñobtä ñan angwane sribi bkänkä iti rabadre tare kwe amne mda btä mätä rabadre; iti kukwei mikadre täte jökrä kwe, akwa mda abko ñan kukwei mikadre täte kwe. Ne aisetet ni ñan raba ja töi mike kwatibe sribire Ngöbökrä, ja töi mikare kwatibe ngwian ganankrä jae kwärä. Abko kore se, niebare Jesukwe.

<sup>14</sup> Ye ngwane abko, nitre bariseo ngwian tarekätarekä kákwe Jesu kukwei nuani. Abtä namani Jesu kukwe mike yakrä jae. <sup>15</sup> Abtä Jesukwe niebare mda ietre:

Mun ngwarbe tä bike deme ni mda mda okwäbti, akwa mun moto ño ño gare kuin jökrä Ngöböye. Ye abko, jäandrän ütiäte kri nikrä abko tä nebe tuen bäri käme Ngöböye, niebare Jesukwe nitre bariseoye.

<sup>16</sup> Yebti Jesukwe kukwe mda niebare krörö:

Kukwe Biani Ngöböökwe Moiséye amne kukwe tikani nitre Ngöbö kukwei niekäkwe, ye namani mrä Juan Bautista näire. Abti mtare mentokwäre Ngöböta gobrane ño ni ngätäite abko kukwei kuin dirita niken mda amne, Ngöböökwe gobrandre nibtä, ye ni kwati tö Ngöbö mikai nuene jabtä ja di jenbti. <sup>17</sup> Akwa nane Kukwe Biani Ngöböökwe Moiséye ye abko ñakare ütiäte mda munkrä, mun rabadre nütüre, akwa era metre ütiäte, ñobtä ñan angwane kä käinta amne kä temen ne juandre ngwarbe jökrä Ngöböökwe, akwa nin tärä okwä bäri chi tä tikani btä diandikä kwitakäre jene, ñobtä ñan angwane Kukwe Biani Ngöböökwe Moiséye abko ütiäte aisetet.

<sup>18</sup> Mdakäre abko, ni brare kákwe merire kwe tuadremetre, bti meri mdara jire ben ja mikadre gure kwe, ni ye kákwe ja mikadre ngite merire käne rüere. Erere arato, meri

tuanimetre brarekwe, ye ben ni mdakwe ja mikadre gure ne ngwane, ni gure käta ja mike ngite bati bati ni mda mdabe, ye kwrere ja mikadi ngite kwe, niebare Jesukwe.

*Kukwe bää mikani ni ngwian bkäenkä kribtä amne Lázarobtä*

<sup>19</sup> Abti Jesukwe kukwe mdara jire bää mikani krörö:

Bati ni nämane iti abko ngwian bkäne kabre krübäte, aisetet nämane dän kuinkuin ütiäte krikri kite jabtä amne käre nämane mrö sribere krikri köbö kwatirekwatire kä ngwiankrä nuäre jabtä kukwe mukobe. <sup>20</sup> Kä ye känti abko, ni bobre nämane iti arato abko kädian nämane Lázaro. Lázaro ye abko ngütüete jökrä ngrabare abko nämane nebe täkänintbe jukwebtä ni ngwian bkäenkä kabre ye känti. <sup>21</sup> Angwane mrö büre nämane betekä timontimon mesabtä, ye abko ni bobre ye tö namani nebe kwetai trine ni ngwian bkäenkä kabre ye känti. Angwane nukro abko nämane nebe Lázaro träin bäse.

<sup>22</sup> Yebti bati ni bobre ye krütani angwane, angele nikani ngwena kä nuäre känti yete, mikani mröre ketetibe kwetre Abrahambe. Abti ni ngwian bkäenkä kabre ye krütani mda abko mräkäkwe doboi mikani jirekäbe. <sup>23</sup> Angwane ni ngwian bkäenkä kabre ye nikani kä ja tare nikakrä känti. Ye känti nämane ja tare nike krübäte, käkwe nikrabare amne Lázaro nämane tuen täkänintbe Abraham ken ie se kwrere. <sup>24</sup> Angwane ngwänänkäbare krörö kwe Abrahamye: ¡Rua Abraham, ti ngwen ruen bobre jae! Tita ja tare nike krübäte ñukwä jutrate nete, aisetet Lázaro juen ja kise judabti aibe mike tibo ñöte sete, bti jata ketekä ti tüdrä mikakäre tibore nete niere ie, niebare kwe Abrahamye.

<sup>25</sup> Akwa Abraham käkwe niebare ie: Ti bräi tikwe, ma nämane nüne angwane, ma nämane jäandrän bkäne kabre, bti ma nämane kä ngwen nuäre jabtä amne, Lázaro abko nämane ja tare nike kri. Mtare niarata kuin jämä amne ma tä ja tare nike. <sup>26</sup> Mdakäre abko, kä oko kri krübäte ni jiete, ¿ne abko ni rikadre ño ja känti kwärikwäri? Ni nekri ñan raba nebe mun känti yete amne mun ñan raba nüke nun känti nete arato, niebare Abrahamkwe ie.

<sup>27-28</sup> Abtä ni ngwian bkäenkä kabre käkwe niebare mda Abrahamye: Rua Abraham, ti etbata nirike ti rün juete, ye ñan jatadre siba ja tare nika ne känti, abkokäre Lázaro juen dirire ietre tikrä abko tita ribere mae, niebare kwe Abrahamye. <sup>29</sup> Abtä Abrahamkwe niebare mda ie: Kukwe Biani Ngöbökwe Moiséye ye tärä kwetre amne nitre Ngöbö kukwei niekä käkwe tärä tikani tä kwetre arato, ye abko mikadre täte kwetre, angwane nünandre metre amne ñan rikadre kä ja tare nika känti mabe, niebare kwe ie. <sup>30</sup> Angwane ni ngwian bkäenkä kabre käkwe niebare mda: Rua Abraham, tärä tä ti mräkäkwe ye aibe ñan rabadre dbe kräke, aisetet ni krütanina abko rükadreta nire rikadre dirireta ietre abko kukwei mikadre era kwetre amne kukwe käme kitadre temen kwetre ruen tie, niebare kwe Abrahamye. <sup>31</sup> Akwa Abraham käkwe niebare mda ie: Kukwe Biani Ngöbökwe Moiséye amne nitre Ngöbö kukwei niekä käkwe tärä tikani tä niaratre kisete abko ñan tä mike täte, ye kwrere ni krütanina rükadreta nire, rikadre dirireta ietre abko ñan kukwei mikadre täte kwetre arato. Abko kore se, niebare Abrahamkwe ie, abko nakaninkä kore. Ne ngörä, niebare Jesukwe ni jökräye.

## 17

*Ja mikadre mokre kukwe käme ngäniene*

(Mateo 18.6-7,21-22; Marcos 9.42)

<sup>1</sup> Bti Jesukwe niebare nitre ja tötitikaka benye:

Käre ni mda mda jatadi, kä rabadre ni nuente ja käne, käkwe ni mikadre ja mike ngite Ngöbö rüere, akwa aingwaree ni ni mda ngwianka ja mike ngite Ngöbö rüere. Ni ye abko bobre jakän, <sup>2</sup> ñobtä ñan angwane niara ngämi ni mda mike kukwe käme nuene Ngöbö rüere, ye känenkri jä oto kri trigo ukwakrä ye mäkädrete rorobtä, bti kitadre ñöte abko rabadre bäri kuin kräke, ñobtä ñan angwane Ngöbökwe mikadre ja tare nike bäri ni mikabtä kukwe käme nuene ye dokwäre aisetet. <sup>3</sup> Ne aisetet munkwe ja ngibia kuin.

Mdakäre abko, ma mräkäkwe ja mika ngite ma rüere angwane, makwe mäträ btä, abti ja töi kwitata kwe amne moto raba ulire btä ne ngwane, ja mikani ngite kwe, ye

makwe dian bti ta. <sup>4</sup> Ye abko, ja mika ngite bā kükü ma rüere kwe, akwa rikata bā kükü arato nierieta krörö mae: Tikwe ja mikaba ngite ma rüere, ye kwrere tikwe ñan nuendre mda, nie kwe mae, angwane ja mikani ngite kwe ma rüere, ye makwe dianta jökrä bti ta, niebare Jesukwe.

### *Nikwe tödekadre metre Ngöböhti*

<sup>5</sup> Angwane nitre Jesu kukwei ngwianka kákwe niebare mda ie:

Dänkien, nun die mike tödeke bări Ngöböhti, niebare kwetre.

<sup>6</sup> Abtä Jesukwe niebare mda ietre:

Munkwe tödekadre bări chi Ngöböhti mostasa nura chi näre, akwa munkwe tödekadre kwatibe bti angwane, munkwe niedre kri ngätri bări mente nguse nokoye: Ja jäkekä au yete, bti ma raba mrente sete, munkwe niedre kri yeye, ye erere mun kukwei mikadre täte kwe, niebare kwe ietre.

### *Sribidre krörö Ngöbökrä*

<sup>7</sup> Nebti Jesukwe blitabare kukwe mdabtä, kákwe niebare:

Mdakäre abko, mun iti kwe ni klabore tädre abko rikadre dobo ükete sribikrä o tädre obeja ngibiare. Ni klabore ye jatadreta dere gwäkäre angwane, bkänkä kákwe ñan niedre ie: Ma dräre, aisetet jakwe mröre mesabtä nete, ñan niedre jire kwe ie. <sup>8</sup> Akwa niedre krörö ie: Dän mda kite jabtä, bti makwe mrö scribe tigrä. Makwe ti buka amne makwe tomna bian tie. Tikwe mrödi amne tikwe tomna ñadi ünän, yebti makwe mrödi amne makwe tomna ñadi, niedre kwe ie. <sup>9</sup> Erere arato, bkänkäkwe sribi nuemna ie, erere nuendre kwe amne niara ñan käikitadrekä bkänkäkwe. <sup>10</sup> Ne kwrere arato, Ngöbökwé dre nuemna, ye erere munkwe nuendre täte jökrä angwane, munkwe niedre krörö ie: Nun abko ni klabore ütiäte ñakare makwe Ngöbö, ñobtä ñan angwane sribi nuemna aibe nunkwe nuenbare, aisetet munkwe nie kore. Abko kore se, niebare Jesukwe ietre.

### *Jesukwe ni ni jätä breñ lebra kisete mikaninta kuinta*

<sup>11</sup> Yebti Jesu nikani janknu Jerusalén kukwäre mda angwane, nikani kä Samaria amne kä Galilea ngätäite ta. <sup>12</sup> Angwane nikani nebe ja ken juta mdabe. Ye känti ni breñ lebra kisete nämane ni jätä, jatani niara ngäbti abko nükani bā mente temen se kwrere, <sup>13</sup> kä namani ngrente krikri be krörö:

Jesu, dirikä, nun ngwen ruen bobre jae. Nun mikete kuinta, namanintre niere.

<sup>14</sup> Jesu okwä namani btätre angwane, niebare kwe ietre:

Ni blitaka Ngöböbe ni mda mda diäre, ye känti mun nän ja kwata mike tuare ietre, niebare kwe ietre.

Erere bkänä nikanintre, nämane näin ji ngrabare angwane, batibe namaninante kuinta jökrä ngrabare gani kwetre. <sup>15</sup> Nitre namaninta kuinta, ye ngätäite ni jataninta itibe ja jiebti, jatani ngrente krikri be Ngöbö käikitarekä kwärä. <sup>16</sup> Jatani nüketa Jesu känti angwane, nikani ngitiekä ngwärere timonkwäre Jesu ngotobtä, kuin niekäre ie. Ni ye abko, ni Samariabo aibe nüketa Jesu känti kuin niekäre ie. <sup>17</sup> Angwane Jesukwe niebare ie:

Ni ni jätä nibita kuin jökrä ñan ñan, ¿akwa ni ni ökän abko ame <sup>18</sup> amarebti ni menteni ñakare israelitare aibe nüketa itibe Ngöbö käikiterekä noko? niebare kwe.

<sup>19</sup> Yebti Jesukwe niebare ni yeye:

Makwe tödiri kwatibe Ngöböhti, köböire ma nibita kuinta, aisetet näinta krö, bti nänta, niebare kwe ie.

### *Ngöbö jatadi gobrane ni ngätäite*

(Mateo 24,23-28,36-41)

<sup>20</sup> Angwane nitre bariseo nämane yete kákwe niebare Jesuye:

Ngöbö rükadi gobrane ñongwane ni ngätäite abko nunkwe gadi ño, niebare kwetre ie. Abtä Jesukwe niebare ietre:

Ngöbö rükadre gobrane ni ngätäite, ye abko ñan tuadre jire chi ja okwä jenbtí, <sup>21</sup> aiseté Ngöböta gobrane nete, sete, mun ñan rabadre niere, ñobtä ñan angwane Ngöbö nena gobrane munbtí, akwa ye ñan raba tuen ja okwä jenbtí, niebare kwe nitre bariseoye.

<sup>22</sup> Bti Jesukwe niebare nitre ja töitikaka benye:

Batira jire kä jatadi angwane, ti Ni Kä Nebtä Ngobo jatadita ye mun tö rabadi tuai batibe siba, akwa munkwe ñan tuadre. <sup>23</sup> Angwane ni ruäre rabadi niere munye: Ni Kä Nebtä Ngobo tä nete, Ni Kä Nebtä Ngobo tä sete, rabadi niere, akwa mun ñan rika tuen känti amne ni ye kwrere, jiebti mun ñan rika, <sup>24</sup> ñobtä ñan angwane merata trä ngitiekä ngwen käinta tä jataen batibe jökrä kwäräkwärä, ye kwrere arato ti Ni Kä Nebtä Ngobo ne jatadita angwane, ni jökrä käkwe gadi batibe jökrä aiseté. <sup>25</sup> Akwa käne tikwe ja tare nikadi kri bätäkä ngwarbe amne nitre nünanka kä ne ngwane käkwe mikadi ngwarbe jae.

<sup>26</sup> Akwa ti Ni Kä Nebtä Ngobo ne jatadita angwane, kukwe nakaninkä ño ño Noé näire angwane ni jökrä nämane nüne jáme, ye kwrere arato ti Ni Kä Nebtä Ngobo ne jatadita angwane, kukwe rakadikä abko krörö: <sup>27</sup> Kä ye ngwane abko ñü ngämi näkäen temen, känenkri abti Noé nikani rute, ye ngwane ni jökrä tö namani nünai ño, erere nämane nüne, aiseté nämane mröre, dö ñaen amne nämane ja mike gure. Te batibe ñü jatani jobe temen, käkwe ño mikani niren kri abko nikani nitre ye ngwena jökrä abko müre neketani ñöte. <sup>28</sup> Ye kwrere nakaninkä krörö Lot näire arato: Ni jökrä nämane mröre, dö ñaen, jändräñ kökö, jändräñ rürümoine, nura nökö amne ju mike. Ni jökrä nämane töbige jändräñ ye aibebtä. <sup>29</sup> Angwane Lot nikanta mräkäbe juta Sodoma bäre mento, ye btäräbe Ngöböökwe ñukwä kä käinbtí juani asufrebe mni mni, käkwe nitre Sodomabo kämikani jökrä. <sup>30</sup> Ye kwrere arato, ti Ni Kä Nebtä Ngobo ne jatadita angwane, kukwe rakadikä kore.

<sup>31</sup> Kä ye ngwane abko, nitre tädre jubti käin\* amne jändräñ tädre gwi kwe ñan rika tuenta ngwiandre jae, akwa gitia jirekäbe amne, ni tädre sribire tirete ye abko ñan rika jändräñ tuenta jire chi gwi, akwa gitia gwängwarbe jirekäbe. <sup>32</sup> Angwane kukwe nakaninkä ño meri Lokwebtä, ye munkwe ngwianta töre jae, käkwe jändräñ munkwe taredre ñakare, <sup>33</sup> ñobtä ñan angwane nire nire abko ie ja kwata rabadi ruuentari tare abko krütadi kärekäre Ngöbö okwä bäre mento, akwa nire nire tä biare krüte Ngöbökrä abko käkwe nünandi kärekäre Ngöböbe. <sup>34</sup> Erere arato, ti Ni Kä Nebtä Ngobo jatadita, ye ngwane ni tädi nibu kibien jänbtí deo abko jänäin iti amne iti abko mikadite. <sup>35</sup> Erere arato, meri tädi nibu trigo ukwe gware abko jänäin iti amne iti abko mikadite, niebare Jesukwe. <sup>36</sup> [Erere arato, ni tädi nibu sribire tirete abko jänäin iti amne iti abko mikadite, niebare Jesukwe.]†

<sup>37</sup> Angwane nitre ja töitikaka Jesube käkwe niebare mda ie:

¿Kukwe ye abko rakadikä mdente, Dänkien? niebare kwetre ie.

Abtä Jesukwe niebare mda ietre:

Ni ngwákä tädi mdente, btä jüden rabadi ja ükekrö ngwákä kwete, ye känti rakadikä. Abko kore se, niebare kwe ietre.

## 18

### *Nikwe blitadre janknu Ngöböbe abko Jesukwe bää mikani*

<sup>1</sup> Yebti nitre ja töitikaka Jesube ñan di krütadre blitabtä Ngöböbe, abkokäre Jesukwe kukwe mda bää mikani dirikäre ietre, <sup>2</sup> käkwe niebare krörö: Bati ni iti nämane kritobore juta kwati känti. Kritobo ye abko nämane Ngöbö jürä ngwen ñakare amne nämane ni mda mda mike ütiäte ñakare jae. <sup>3</sup> Juta ye arabe känti meri kän kwäräi krütani nämane iti arato abko ben ni mda nämane rüre. Abtä meri ye nikanti janknu kritobo känti kukwe ükatemna jakrä ie. <sup>4</sup> Akwa kä raire kritobo ye käkwe kukwe ükaninte ñakare meri ye kräke. Akwa yebti kritobo namani töbige: Tita Ngöbö jürä ngwen ñakare amne titä ni mda mda mike ütiäte ñakare jae, <sup>5</sup> akwa meri kän kwäräi krütani se käkwe ñan ti nikadre

\* 17:31 tädre jubti käin. Ju nitre israelitare abko kiare bti käin, aiseté nuäre dikakrä bti ta. † 17:36 Kukweta corcheta ngätäite abko ñan tä tikani manuscrito bári kuinkuintä.

krübäte mda, abkokäre ti bike kukwe ükete kräke, niara ñan jatadreta mda abkokäre, ñobtä ñan angwane tädre nüke janknu kore, kákwe ti moto mikadre iko. Erere arato ni mda mda kákwe ñan töbikadre blo tibta, abkokäre ti bike kukwe ükete kräke, kritobo namani nütüre, abko nakaninkä kore. Ne ngörä.

<sup>6</sup> Kritobo moto käme akwa, töbikabare kore kwe. <sup>7</sup> ¿Akwa Ngöbö abko moto kuin, se abko ni dianinkä jen jakrä kwe käta blite dibire rare ben abko ñan ngie mikadre kwe ya? ¡Niarakwe ñan juandretari jirekäbe ja jiebt! <sup>8</sup> Ngöbö abra kuin kákwe ni kwe kwe die mikadre jötrö. ¿Akwa ti, Ni Kä Nebtä Ngobo jatadita angwane, ni tödekaka tibti tädi blite janknu Ngöböbe kwandi ruäre tie nete ya? abko ti tö ngwiantari munye, niebare Jesukwe nitre ja tötitaka benye.

#### *Ni bikaka metre amne ni ngwian käräkä, btä Jesukwe kukwe bä mikani*

<sup>9</sup> Abti ni ruäre, ie ja nämane nebe ruen metre amnedbe Ngöbö ngwärerekri nämane Jesu känti abko ietre ni mda mda nämane tuen käme, abtä Jesukwe kukwe bä mikani krörö ietre: <sup>10</sup> Bati ni nikani nibu ju blitakrä Ngöböbe känti blitakäre Ngöböbe. Ni iti abko bariseo amne ni mda abko ngwian käräkä gobran romanobokrä. <sup>11</sup> Angwane bariseo ye namani nünaninkä blitakäre Ngöböbe, kákwe niebare jabtä: Ngöbö, tita kuin niere mae, ñobtä ñan angwane ni mda mda tä gore, tä kukwe nuene kämekäme amne tä ja mike gure batibati, ye kwrere tita nuene ñakare. Erere arato, ti ñakare ni ngututu käme ngwian käräkä noko kwrere. <sup>12</sup> Mdakäre abko, tita ja bäine bobu bämän kratirekratire makrä amne, jäandrän bianta keta jätä jätä tie amne jäandrän ganainta keta jätä jätä tikwe abko tita bien keteti makrä, ye abko tita nuene kore makrä, niebare kwe Ngöböye.

<sup>13</sup> Akwa ni ngwian käräkä ye abko namani bä mente temen se kwrere amne ja ñan namani nüke töre ie nikren kä käinbi, kä namani ja mete mäträte namani ulire kukwe käme nuenbtä bä mikakäre, kákwe blitabare krörö Ngöböbe: Ngöbö, ti abko kukwe kämekäme nuenkä krübäte, aisetet i ngwen ruentari tare jae amne ti ngite denkä mento tibta, namani niere Ngöböye abko kukwe nakaninkä kore. Ne ngörä.

<sup>14</sup> Kukwe yebtä ti bike kukwe ütiäte niere munye abko krörö: Ni ngwian dianka jämi niken ja gwirierte, känenkri ngite ñakare mda Ngöböwe niebare amne kani ngäbti kwe, akwa bariseo abko ñan mikani metre ja ngwärerekri kwe amne kani ngäbti ñakare kwe, ñobtä ñan angwane nirekwe ja mikadre kuin deme au abko Ngöböwe mikadi ene, akwa nirekwe ja mikadre bobre Ngöbö ngwärerekri abko Ngöböwe mikadi ütiäte jae. Abko kore se, niebare Jesukwe nitre bariseoye.

#### *Jesukwe ja di biani ngäbäkre kiakiaye*

(Mateo 19.13-15; Marcos 10.13-16)

<sup>15</sup> Ye ngwane abko ngäbäkre kiakia, bti Jesukwe kise mikadre ja di biankäre ietre, abkokäre jänikanri mräkäkwe Jesuye. Akwa nitre ja tötitaka ben kákwe gani angwane, namani ñäke ngäbäkre mräkäye. <sup>16</sup> Abtä Jesukwe ngäbäkre kiakia käräbare, bti niebare kwe:

Ngäbäkre ye tuemetre kite tie. Munkwe ñan ji öta käne, ñobtä ñan angwane nire nire käta ja mike bobre Ngöböbätkä ngäbäkre ne kwrerekwrere, ni yebti abko Ngöböta gobrane, aisetet munkwe ñan ji öta käne. <sup>17</sup> Ti bike kukwe era erere niere munye abko krörö: Nire nire ñan tä ja mike bobre Ngöböbätkä ngäbäkre chi kwrerekwrere, ni yebti Ngöböwe ñan gobrandi amne ñan nünandi kärekäre Ngöböbe kwe. Abko kore se, niebare Jesukwe nitre ja tötitaka benye.

#### *Ni jäandrän bkänkä kabre kákwe blitabare Jesube*

(Mateo 19.16-30; Marcos 10.17-31)

<sup>18</sup> Yebti ni iti ji dokwäte kákwe kukwe ngwiantari krörö Jesuye:  
Dirikä kuin, ¿tikwe dre nuendre abko ütiäre ti rabadre nüne kärekäre Ngöböbe?  
niebare kwe.

<sup>19</sup> Abtä Jesukwe niebare mda ie:

Ngöbö aibe kuin, yebti ni mda ñakare jire kuin. ¿Ye ñobtä abko mata ti kuin niere tie ye? <sup>20</sup> Akwa ma tö nünai kärekäre Ngöböbe angwane, Kukwe Biani Ngöböökwe Moiséye nuendre nie, ye garera mae abko erere makwe mika täte abko krörö:  
Ma gure, makwe ñan ja mika gure bati bati ni mda mdabe.  
Makwe ñan ni mda kämika.  
Makwe ñan go.

Makwe ñan blita ngwarbe ni mda mda rüere kitakäre ngite.  
Erere arato, ma rün amne ma meye mika ütiäte jae, *Exodo 20.12-16; Deuteronomio 5.16-20*  
niebare Ngöböökwe Moiséye abko gare kuin mae ruen tie, niebare Jesukwe ie.

<sup>21</sup> Angwane ni ye kákwe niebare:

Makwe kukwe nini, ye ti nämane bati ngäbäkrere angwane, ti nikani mike täte jökrä abti kä nüke mtare tie, niebare kwe.

<sup>22</sup> Niebare kore kwe, abtä Jesukwe niebare mda ie:

Jändrän tä keteti nuendre mae. Jändrän tä makwe ye erere nän rürümoine jökrä, bti makwe ngwian ye dräi ni bobre bobrebtii angwane, ma rabadi jändrän ütiäte kri bkäne kabre kä käinbtii sete. Makwe jändrän rürümoine ünän jökrä kore, bti ma jata ti jiebti. Abko kore se, niebare kwe ie.

<sup>23</sup> Jesukwe kukwe niebare kore ie angwane, niara abko jändrän bkäne kabre krübäte, aiseete moto namani ulire Jesu kukwei nuare. <sup>24</sup> Yebti namani tuen ulire dikaro Jesuye angwane, Jesukwe niebare:

Ni jändrän bkänkä krikri ye kákwe ja mikadre bobre Ngöböbtä, Ngöböökwe gobrandre bti abko tare krübäte kräke. <sup>25</sup> Era metre, aku okwä chi, yete ta kameo krikri ye ara rikadre nuäre, akwa nitre jändrän bkänkä kri ye kákwe ja mikadre bobre Ngöböbtä, Ngöböökwe gobrandre bti, ye abko bäri tare kräke, niebare Jesukwe.

<sup>26</sup> Angwane nitre Jesu kukwei nuaka kákwe niebare mda ie:

¿Ni jändrän bkäne kri ñan rabadre dianintari nini makwe, se nire abko rabadi dianintari amarebti se? niebare kwetre Jesuye.\*

<sup>27</sup> Jesukwe niebare mda ietre:

Jändrän tare nuene abtä ñan neme bare ni kä nebtäye, ye abko nuäre nuendre Ngöbökrä, niebare kwe.

<sup>28</sup> Angwane Pedro kákwe niebare Jesuye:

Ti Dänkien, ¿nunkwe jändrän jakwe jakwe erere mikaninte jökrä, bti nunta näin ma jiebti, aiseete se abko Ngöböökwe dre biandi ütiäre nunye? niebare kwe.

<sup>29</sup> Abtä Jesukwe niebare ie:

Ti bike kukwe era erere nire munye abko krörö: Ngöböta gobrane, ye nireta kaen ngäbti, abtä ju mikaninte kwe o rün, meye o etbakantre mikaninte kwe, erere arato, meri kwe o ngäbriänkä kwe kwe mikaninte kwe, <sup>30</sup> nitre ye abko ie Ngöböökwe jändrän biandi bäri kabre mda kä ne ngwane amne mikadi näne kärekäre jabe kwe arato. Abko kore se, niebare Jesukwe ie.

*Jesu müre ketadi abko niebare bämäkäre kwe*

*(Mateo 20.17-19; Marcos 10.32-34)*

<sup>31</sup> Yebti Jesukwe nitre ja tötitaka ben ni jätäbti nibu käräbare kaibe jenena, kákwe niebare ietre:

Nita näin Jerusalén kukwäre. Angwane nitre Ngöbö kukwei niekä kirakira kákwe tärä tikani ño ti Ni Kä Nebtä Ngobo nebtä, ye erere rabadi bare jökrä tibtä abko krörö: <sup>32</sup> Nitre romanobo ñakare israelitare abko ie ti kitadi ngise amne niaratré kákwe ti mikadi yakrä jae, ñäkädi taretare kwe tie amne käli kitadi tibtä kwetre, <sup>33</sup> bti ti kwata metadi krübäte kwetre. Yebti ti müre ketadi kwetre, akwa köbömäkäre angwane, ti rükadita nire. Abko kore se, niebare Jesukwe ietre.

\* <sup>18:26</sup> Jesu näire abko ni ngwian bkäne kri abko nämane ngwian bkäne, ñobtä ñan angwane Ngöbö nämane ja di bien ietre, aiseete bäri Ngöbö kukwe muko, aiseete rabadre dianintari käne, nitre israelita nämane nütüre. Ne aiseete nitre ja tötitaka Jesube abko ñan töi namani krütare Jesu kukweibtä.

<sup>34</sup> Akwa niaratre abko töi namani braibe, aisetet drebtä Jesu nämane blite ñan namani nüke gare ietre.

*Ni okwä kä drünente abko Jesukwe mikaninta kuinta  
(Mateo 20.29-34; Marcos 10.46-52)*

<sup>35</sup> Abti Jesu nikana mate ja ken juta Jericóte mda angwane, ni nämane iti abko okwä kä drünente nämane täkänintbe jibta ngwian kärere jakrä, känti ta Jesu nikani nebe.

<sup>36</sup> Angwane batibe ni ye ie ni namani ruen näin kwati dikaro ji ngrabare niara bäre temen. Abtä dre namani nakenkä amarebti ni nikani kwati dikaro, niebare kwe. <sup>37</sup> Angwane Jesu Nazarebo jatani ji ngrabare yete, niebare ie. <sup>38</sup> Abtä niarakwe ngratebare kri krörö:

¡Jrei David tukwe mräkä, ti ngwen ruentari tare jae! namani ngrente jite.

<sup>39</sup> Abtä nitre nämane näin Jesu käne kä namani kada ketamna ie, akwa niara namani ngwänenkä bäri krikri mda, kä namani niere:

¡Jrei David tukwe mräkä, ti ngwen ruentari tare jae! namani niere.

<sup>40</sup> Angwane Jesu namani nünaninkä, käkwe ngwiamna nüke ja känti. Erere jänükani Jesu ken angwane, Jesukwe niebare ie:

<sup>41</sup> ¿Tikwe dre nuendre makrä, ie ma tö nibi? niebare kwe ie.

Ni okwä kä drünente ye käkwe niebare mda ie:

Ti Dänkien, kä rabadre tuen tie, ie ti tö nibi, niebare kwe Jesuye.

<sup>42</sup> Angwane Jesukwe niebare ie:

Ma nibi tödeke kwatibe Ngöböbti, ye köböire ma okwä nibirate kuinta, aisetet kä raba tuen mae, niebare kwe ie.

<sup>43</sup> Ye btäräbe kä namani tuen kuin batibe ie, bti nikani siba Jesube Ngöbö käkitekä angwane, ni jökrä käkwe kukwe ye tuani abko namani Ngöbö käkitekä arato.

## 19

### *Zaqueo tö namani ja tuai Jesube*

<sup>1</sup> Abti Jesu nikani nebe juta Jericóte mda angwane, nikani ji ngrabare jutate. <sup>2</sup> Juta yete abko, ni nämane iti abko kädian nämane Zaqueo. Niara abko nämane nitre ngwian käräkä gobran romanobokrä dänkiene aisetet, nämane ngwian bkäne bäri kabre krübäte.

<sup>3</sup> Nire abko Jesu, Zaqueo tö namani tuai, akwa Zaqueo abko chi amne ni namani kwati, aisetet niara okwä ñan namani nebe Jesubtä. <sup>4</sup> Abtä nikani betekä käne amne okwä rabadre Jesubtä, abkokäre ji känti ta Jesu rikadre, ye känti Zaqueo nikani kribtä käin Jesu ngibiare jite.

<sup>5</sup> Zaqueo nämane, ye känti Jesu nikani nebe angwane, batibe Jesukwe nikrabare kribtä käin, käkwe niebare Zaqueoye:

Zaqueo, ti rabadi ma juete mtare, aisetet jakweta jötrö timon, niebare kwe ie.

<sup>6</sup> Ye erere Zaqueo jataninta jötrö timon amne kä namani juto btä Jesu kare ngäbti ja gwiriete. <sup>7</sup> Jesu nikani Zaqueo känti ni mda mda okwäbti, yebtä abko ni jökrä namani ñäke Jesu rüere, kä namani niere:

¡Jo! Jesu bike niken ni kukwe kämekäme nuenkä gwiriete, namanintre niere Jesubtä.

<sup>8</sup> Ye erere Jesu nämane mröre Zaqueo känti angwane, Zaqueo namani nünaninkä, käkwe niebare ni Dänkienye:

Ti Dänkien, jändrän jökrä tä tikwe, ye tikwe biandi ruäre ta ni bobre bobreye amne, nire nire kän tikwe ngwian dianinkä bäri mda ne ngwane, tikwe ngwian dianinkä kän ye bärire mda tikwe ngwian mda biandita ketabkä ietre abko ti tö niei metre mae, niebare kwe Jesuye.

<sup>9</sup> Abtä Jesukwe niebare Zaqueoye:

Mtare ma amne ma mräkä nibira dianintari abko mata bä mike kore. Zaqueo ne abko Abraham mräkä arato, akwa nämane mente Ngöböye. <sup>10</sup> Ni nianinte niara kwrere abko ti Ni Kä Nebtä Ngobo ne jatani käänäntarikäre amne diantarikäre, mden erere nibi bare mtare Zaqueobtä. Abko kore se, niebare kwe ie.

*Ngwian ngibiaka kuin, btä Jesukwe kukwe bää mikani  
(Mateo 25.14-30)*

<sup>11</sup> Jesu nämane blite kore, ye abko ni niara kukwei nuaka nuaka, ie Jesukwe kukwe bää mikani, ñiobtä ñan angwane nikanina nebe käname Jerusalén ken, aisetet Ngöbö jatadre gobrane gwängwarbe niaratret ngätäite abko ni ruäre nämane nütüre, akwa nämane töbike blo, aisetet Jesukwe kukwe krörö bää mikani ietre töi tikakakäre metre. <sup>12</sup> Jesukwe niebare:

Bati ni nämane iti. Niara abko jrei mräkä amne niara mikadre gräbti jreire, abkokäre nikani mobe kä mdate. Abti mikadrera jreire, abti jatadreta gobrane, abkokäre jatani niken. <sup>13</sup> Akwa ngämi niken, känenkri ni klabore kwekkwe käräbare ni jätä kwe, bti ngwian biani kabre kwe ja näre näre itire itire ietre, käkwe niebare: Ti bike niken mente, aisetet ti mikakäre nüketa, munkwe sribi nuen ngwian nehti ti käne, abti ti jatadi nüketa, niebare kwe ietre, bti nikani. <sup>14</sup> Akwa nitre ye bti jrei ye nämane gobrane abko mätä namani kri ni yebta, käkwe ni mdara jire juani ni ye jiebti blitakäre krörö niara rüere: Nun ñan tö ni ne tuai jreire ja ngätäite, niedre kwetre, abkokäre juani jiebti.

<sup>15</sup> Akwa ni ye mikani jreire, bti jatani nüketa ja käite. Nükantia angwane, ni klabore kwekkwe, ie ngwian biani kwe sribikrä ye abko itire itire käkwe ngwian ganaibare nuäi mda ngwian kwebti abko tö namani gai, käkwe käräbare jökrä nüke ja känti. <sup>16</sup> Ye erere ni nükani iti käne käkwe niebare ie: Ti dänkien, ngwian makwebti tikwe ngwian ganainba keta jätä mda, tä nete ne, niebare kwe ie. <sup>17</sup> Angwane jrei ye käkwe niebare ie: Ma sribikä kuin krübäte. Jändrän braibe, btä mata sribire kuin era metre, aisetet ti raba tödeke mabti tä gare tie, aisetet juta keta jätä, bti tikwe ma mikadi gobrane tikrä, niebare kwe ie.

<sup>18</sup> Yebti ni klabore mda jatani, käkwe niebare jreiyen: Ti dänkien, ngwian makwebti tikwe ngwian ganainba ketarike mda, tä nete ne, niebare kwe ie. <sup>19</sup> Angwane jrei ye käkwe niebare krörö mda ie arato: Kore ne ngwane, tikwe ma mikadi gobrane juta ketarikebti tikrä, niebare kwe ie.

<sup>20</sup> Yebti ni klabore mdara jire nükani jrei känti, käkwe niebare ie: Ti dänkien, tikwe ngwian makwe ükaba dän kukwante jirekäbe abko tä nete ne. Tikwe sribibare ñakare bti, <sup>21</sup> ñiobtä ñan angwane mata mokrere krübäte jändrän makwebti amne ma käbare, aisetet ma ngwian bien ñakare, känti mata ngwian ükekrö ni mdakan. Erere arato, ni mda mda tä nura metekä amne mata ngwä öötö kabre kän kä ütiäre, akwa ma abko nura metekä ñakare jakrä. Ye mdenbtä ma jürä rababa krübäte tibta, käkwe ngwian ükaba jirekäbe, niebare kwe jreiyen.

<sup>22</sup> Abtä jreikwe niebare mda ie: Ma sribikä käme. Ti ño ño makwe nini tie, ye kwrere tikwe kukwe ükadite makrä. Tita mokrere krübäte jändrän tikwebti amne ti käbare, aisetet ti ngwian bien ñakare, känti titi ngwian ükekrö ni mdakan. Erere arato, ni mda mda tä nura metekä amne titi ngwä öötö kabre kän kä ütiäre, akwa ti abko nura metekä ñakare jakrä, ye gare kuin mae. <sup>23</sup> ¿Se ñiobtä abko ma ñan jananbare ngwian tikwe mike bankote abko ti rükadreta angwane, ngwian mda biandre chi btä tie? niebare jreikwe sribikä ngwarbeye.

<sup>24</sup> Bti ni mda mda nämane yete, ie jreikwe niebare: Ngwianta ni nokokwe, se denkä kän, bti sribikä kuin käkwe ngwian ganaibare keta jätä mda, seye bien munkwe, niebare kwe. <sup>25</sup> Abtä ni mda mda ye käkwe niebare jreiyen: Nun dänkien, ni noko nena ngwian bkäne kabre krübäte, ¿se ñiobtä abko mda biandre ie? niebare kwetre. <sup>26</sup> Abtä jreikwe niebare mda ietre: Ti tö kukwe era erere niei krörö munye: Nire nire jändrän bkäne kabre abko ie mda biandi bäri; akwa nire nire kwe jändrän ñakare abko kän jändräni chi kwe diandikä jökrä kän. <sup>27</sup> Mdakäre abko, nire nire namani ti rüere, ñan tö namani ti tuai jreire ye abko mun jata ngwena nüke ti känti nete, bti munkwe kämika ti ngwärekri nete. Abko kore se, niebare jreikwe abko kukwe nakaninkä kore se. Ne ngörä, niebare Jesukwe.

*Jesu nikani nebe Jerusalén  
(Mateo 21.1-11; Marcos 11.1-11; Juan 12.12-19)*

<sup>28</sup> Jesukwe blitabare ünän kore, bti nikani janknu mda Jerusalén kukwäre. <sup>29</sup> Nikanina mate ja ken juta Betfagébe amne juta Betaniabe, Ngitio Olibo känti angwane, nitre ja töitikaka ben käräbare nibu kwe, <sup>30</sup> bti niebare kwe ietre:

Juta tuen käntime ni ngware ta. Se känti mun nän. Mun raba yete angwane, buro ngäbäli näkwita ngämi kwan mäkäninte munye, ye tikate munkwe, bti mun jata ngwena tie nete. <sup>31</sup> Akwa ñobtä mutta tikete? nie munye angwane, munkwe nie krörö ietre: Ni Dämkien tö nibi ie, aisetet nun bike niken ngwena, munkwe nie kore, niebare Jesukwe ietre.

<sup>32</sup> Erere bkänä, nitre ja töitikaka Jesube nikani, nikani nebe angwane, Jesukwe kukwe niebare ño ño ietre, ye erere kwani ietre. <sup>33</sup> Nämene buro tikete angwane, buro bkänkätre jatani, kákwe niebare ietre:

Ñobtä mutta buro ye tikete nunkän ye? niebare kwetre.

<sup>34</sup> Angwane niebare kwetre buro bkänkäye:

Nun Dämkien tö nibi ie, kákwe käräniri, aisetet nunta tikete, niebare kwetre.

<sup>35</sup> Yebti nikanintre buro ngwena, nikani nebe Jesu känti angwane, dän jakwe mikani ötati buro ngäbäli ye tröbti kwetre ja täkräre Jesuye, bti Jesu nakwani buro yebti. <sup>36</sup> Bti Jesu nikani janknu mentokwäre angwane, ni jökrä namani dän jakwe metete ji ngrabare temen Jesu kakäre ngäbti jrei kwrere. <sup>37</sup> Angwane Jesu nikana Ngitio Olibobti käin, jatanina niken motokwäre amne, nitre nämene näin ben, btä kä namani nuäre, kä nikani ngrente krikri be Ngöbö käikitarekä, ñobtä ñan angwane sribi kri ñan tuabare nuenbare Jesukwe tuani kwetre yebtä, <sup>38</sup> kä namani niere:

Jrei ne kite ni Dämkien Ngöbö käbti.

Ma ye aibe raba mikani ütiäte.

¡Kä raba jáme kä käinbti amne, nunta Ngöbö kä käinbti käikitekä!

*Salmos 118.26*

<sup>39</sup> Kukwe yebtä, nitre bariseo nämene ruäre ni mda mda ngätäite yete kákwe niebare Jesuye:

Dirikä, nitre nänkä mabe se kákwe kada ketadre niere ietre, niebare kwetre.

<sup>40</sup> Akwa Jesu kákwe niebare nitre bariseoye:

Nitre noko rabadre kwekbe angwane, já oto kabre nere temen kákwe ngradrete Ngöbö käikitakakäre, aisetet ngwarbe tikwe kada ketamna ietre abko ti tö nibi niei metre munye, niebare kwe ietre.

<sup>41</sup> Yebti Jesu namanina Jerusalén ken, okwä namani juta Jerusalénbtä angwane, müaibare kwe, <sup>42</sup> kákwe niebare:

Nirekwe kä jáme biandre mun nünanka Jerusalénte yeye, ye rükadre gare mtare munye näre, akwa tä rükaninte mun okwä bäre, aisetet tuen ñakare munye. <sup>43</sup> Batira jire kä jatadi käme mun rüere angwane, mun rüekwe ki mikadi mun bäre temen amne, mun rüe rabadi jökrä mun bäre temen, kákwe rüdi mun rüere angwane, <sup>44</sup> mun juandi ngwarbe jökrä kwetre amne, nitre nünanka nete noko kämikadi kwati kwetre. Erere arato, já mikani jure amne kire noko dikandite jökrä kwetre arato, ñobtä ñan angwane Ngöbö nükani basare munye, mun diantarikäre akwa, ñan nükani gare munye, aisetet rakadikä kore mun nünanka Jerusalénte yebtä, niebare Jesukwe.

### *Jesukwe nitre jäandrän rürümoinkä juanintari*

(Mateo 21.12-17; Marcos 11.15-19; Juan 2.13-22)

<sup>45</sup> Jesu nükani Jerusalén, bti nikani ju blitakrä Ngöböbe ye bäre angwane, nitre nämene jäandrän rürümoine yete abko Jesu nikani juentari jökrä nekwäre, sekware mentokwäre,

<sup>46</sup> kákwe mäträbare krörö btätre:

Ngöbö Kukwei tä tikani krörö:

Ju tikwe ne abra tä blitakrä tibe,

*Isaías 56.7*

nieta Ngöbö Kukweibtä, akwa mun abko tä ju blitakrä Ngöböbe ne mike nitre gokä jue kwrere. Abko kore se, niebare Jesukwe ietre.

<sup>47</sup> Yebti ju blitakrä Ngöböbe bäre Jesu namani dirire käre köbö kwatirekwatire. Angwane nitre blitaka Ngöböbe ni mda mda diäre dämkien amne Kukwe Biani Ngöbökwe

Moiséye dirikätre, erere arato nitre unbre ji dokwäte nitre israelita ngätäite abko nämane ji känene jae Jesu kämikakäre. <sup>48</sup> Akwa ji ñan namani kwen ietre Jesu kämikakrä, ñobtä ñan angwane Jesu namani blite, ye abko ni jökrä nämane biare kukwe nuen, aisetet Jesu kämikadre ño kwetre abko kái ñan namani kwen ietre.

## 20

*Nire diebti Jesu nämane sribire abko ngwianintari ie  
(Mateo 21.23-27; Marcos 11.27-33)*

<sup>1</sup> Bati ju blitakrä Ngöböbe ye bäre Jesu nämane dirire ni kwatiye amne nämane kukwe kuin Ngöböökwe mike gare angwane, nitre blitaka Ngöböbe ni mda mda diäre dänkientre amne Kukwe Biani Ngöböökwe Moiséye dirikätre nikani nitre unbre ji dokwätebe, <sup>2</sup> kákwe niebare Jesuye:

¿Nirekwe ma mikani sribi nuene kore amne nire diebti mata kukwe nuene kore nete? niebare kwetre Jesuye.

<sup>3-4</sup> Abtä Jesukwe niebare ietre:

Ti bike kukwe ngwentari kwati arato munye. ¿Nirekwe Juan Bautista juani ni ngökö ñöte? ¿Ngöböökwe juani ya o ni ká nebtäkwe mikani sribire ya? niebare kwe ietre.

<sup>5</sup> Yebtä nikaninta blite jabe kwärikwäri, ká namani niere krörö:

Ngöböökwe juani, nikwe niedre ie angwane, niarakwe niedre krörö mda: Ngöböökwe juani mutna niere, ¿se ñobtä abko munkwe ñan kukwei mikani era jae? niedre kwe nie.

<sup>6</sup> Akwa ni ká nebtäkwe mikani, ni ñan rabadre niere jire chi ie, ñobtä ñan angwane Juan abko ni Ngöbö kukwei niekä era ni jökrä kräke, aisetet ni mda mdakwe ni kämikadre jähti ñäkäbtä kore rüere, namanintre niere jae kwärikväri.

<sup>7</sup> Abtä niebare krörö kwetre Jesuye:

Nirekwe Juan juani, ye gare ñakare nunye, niebare kwetre.

<sup>8</sup> Angwane Jesukwe niebare mda ietre:

Kore ne ngwane, nirekwe ja di biani tie sribi ne nuenkäre abko tikwe ñan niedre munye arato, niebare kwe ietre.

*Nitre ji dokwäte, btä Jesukwe kukwe bá mikani  
(Mateo 21.33-46; Marcos 12.1-12)*

<sup>9</sup> Yebti nitre nämane yete, ie Jesu nikani kukwe bá mike Kukwe Biani Ngöböökwe Moiséye dirikätrebtä amne nitre blitaka Ngöböbe ni mda mda diäre dänkientrebtä, kákwe niebare krörö:

Bati ni nämane iti kákwe uba nurai nökani, bti biani kwe ni mda mdaye sribikrä. Kä biani sribikrä kwe abko ütiäre uba döi biandreta ruäre ie. Yebti nikani raire ká mdabti. <sup>10</sup> Abti uba ngwä ötadre abko kái nükani angwane, sribikä kákwe uba biandreta ruäre ká bkänkäye, ye abko ká bkänkä kákwe sribikä kwe juani iti tuenta jakrä. Akwa sribikätre ubabtä ye kákwe sribikä ye metani ja ñäte kwäräkwärä se kwrere, bti juanintarita kise tökare kwetre.

<sup>11</sup> Yebti ká bkänkä kákwe sribikä mdara jire juani uba tuenta ruäre jakrä, akwa sribikätre ubabtä kákwe sribikä ye metani ja ñäte arato, kákwe ñäkäbare diän diän ie, bti juanintarita kise tökare kwetre arato. <sup>12</sup> Yebti uba bkänkä kákwe sribikä mdara jire juani uba tuenta, akwa sribikä mda mda ye kákwe metani arato, bti kitankä kwetre uba grä bäre mento.

<sup>13</sup> Yebti ni uba bkänkä kákwe niebare jae: ¿Mtare tikwe dre nuendre mda? namani nütüre. Te batibe töi ngitianinkä, kákwe niebare: Ti odoi tare kri tikwe abko ti bike juen. Nane niara mikadre ütiäre jae sribikätrekwe, raba ruen tie, aisetet ti bike niara juen, niebare kwe jae. <sup>14</sup> Ye erere bkänkä juani kwe. Akwa ká bkänkä ye odoi nikani tuen sribikätre ubabtä yeeye angwane, niebare kwetre jae kwärikväri: Ni se abko rabadi jäandrän rünkwe bkäne jökrä, aisetet ari kämike amne ni rabadi ká ne bkäne jökrä, niebare kwetre. <sup>15</sup> Ye erere niaratre nikani ká bkänkä odoi ye ngwena uba grä bäre mento, bti kämikani kwetre se kwrere abko nakaninkä kore. Ne ngörä, niebare Jesukwe.

Bti Jesukwe niebare ni jökräye:

¿Ne ngwane, uba bkänkä kákwe dre nuendre sribikä yebtä raba ruen munye? <sup>16</sup> Niara rikadre, kákwe sribikätre ye kämikadre jökrä, bti uba grä ye biandre ni mda mdaye kwe sribikrä. Abko kore se, niebare Jesukwe.

Ye jarabare ni jökräye angwane, niebare kwetre:

¡Kukwe ñan rakadrekä jire kore! niebare kwetre.

<sup>17</sup> Akwa Jesu kákwe mikani ñäräre, bti niebare kwe ietre:

Kukwe tä tikani Ngöbö Kukweibtä ne käta dre niere abko niere tie munkwe:

Jä ütiäte kri ju mikakrä metre abko nitre ju mikaka kákwe kitaninkä, akwa já ye abko ni  
Dänkien kákwe mikani bäri ütiäte ju mikakrä metre. *Salmos 118.22*  
nieta Ngöbö Kukweibtä.

<sup>18</sup> Angwane ni ütiäte kri já kwrere tikwe nini, ye abko btä nire nire ritadrete amne rikadre temen já yebti angwane, já ye kákwe ni ye ötdabitä kiakia jökrä ngrabare. Erere arato, nire nire bti já ye rikwitadrekä angwane, gütadikä mnüne jökrä já ye täni arato. Abko kore se, niebare Jesukwe ietre.

<sup>19</sup> Yebtä abko, Kukwe Biani Ngöbökw Moiséye dirikätre amne nitre blitaka Ngöböbe ni mda mda diäre dänkientre, rüere Jesukwe kukwe bá mikani kore gani kwetre jabtä. Abtä jötrö ngwarbe tö namani Jesu kain ngite ye näire, akwa ni nämane kwati Jesu kukwei nuen, ye abko jürä namani btätre, aise te namani kwe kwe.

*Ja ütiä biandre gobranye ya, ñakare ya*

(Mateo 22.15-22; Marcos 12.13-17)

<sup>20</sup> Angwane ni juani ruäre kwetre Jesu ngibiaretari mda. Niaratre abko namani bike moto jáme, akwa Jesu ngwiandre kukwe nainte kwetre, abtä kitadre ngise kwetre gobernador romanobo ngwärekri, abkokäre namani bike moto jáme. <sup>21</sup> Namani Jesu kánti angwane, niebare kwetre ie:

Dirikä, mata kukwe niere amne mata dirire, ye abko era metre gare kuin nunye amne, ma ñan tä dirire ni ruäre aibe moto mikakrä nuäre, akwa ji Ngöbökw abko dirita era metre makwe, ye garera nie. <sup>22</sup> Ye aise te nun tö kukwe ngwiaintari mae abko krörö:  
¿Emperador romanobo César abko ie nunkwe ja ütiä biandre ye abko dbe ya, ñakare ya niere nunye? niebare kwetre Jesuye.

<sup>23</sup> Angwane tö namani Jesu ngökai, ye gani Jesukwe btätre, kákwe niebare ietre:

<sup>24</sup> Ngwian ye mike tuadre kundi tie munkwe, niebare Jesukwe ietre.

Erere biani tuadre kwetre Jesuye angwane, Jesukwe niebare mda ietre:

¿Nire bá amne nire kái tä tikani ngwian nebtä? niebare kwe.

Angwane niebare kwetre ie:

Emperador César bá amne kái tä btä, niebare kwetre mda Jesuye.

<sup>25</sup> Abtä Jesukwe niebare mda ietre:

Jändrän emperadorekwe erere munkwe bian emperadoreye amne jändräen Ngöbökrä erere munkwe bian Ngöböye. Abko kore se, niebare kwe ietre.

<sup>26</sup> Jesukwe kukwe kani ngäbti kuin ni jökrä okwäßti, yebtä abko töi ñan namani krütare amne, kukwe kwani ñakare ietre Jesu kitakrä ngise, aise te namanintre kwe kwe jökrä.

*Ni krütani rükadreta nire ya abko ngwianintari Jesuye*

(Mateo 22.23-33; Marcos 12.18-27)

<sup>27</sup> Yebti nitre saduseo nikani ruäre ja tuakäre Jesube. Nitre saduseo ye abko ni krütanikrütani mikadreta nire Ngöbökw abko ñan nämane mike era, aise te jatani kukwe ngwentari Jesuye, kákwe nieba ie:

<sup>28</sup> Dirikä, Ngöbökw tikamna krörö täräbtä nunkrä Moiséye: Ni iti tädre gure akwa, ngäbäkre ñakare kwetre amne ni ye krütadre angwane, merire rabadre kaibe. Meri ye abko yäräkwe diandre jae mda. Yebti ngäbäkre rabadre kwetre angwane, ngäbäkre ye abko rabadre niara etba krütani ngobo kwrere abko tikani täräbtä Moisékwe nunkrä.

<sup>29</sup> Ne aise te nun tö nibi kukwe ne ngwiaintari krörö mae: Bati nitre ja etbarebe nämane

ni kükü. Nitre ye etba mubai käkwe ja mikani gure, akwa ngäbäkre ngämi nebe kwetre angwane, ni ye krütani. <sup>30</sup> Merire namani ie abko namani yärä mda yebe, akwa nin ngämi ngäbäkrei ngibiare angwane, brare krütani kän arato. Meri ye namaninta kaibe bobukäre. <sup>31</sup> Namani yärä mdara jire ben, akwa nin ngämi ngäbäkrei ngibiare angwane, krütani kän arato. Ye kwrere nikani nakenkä janknu ja täritäri. Abti nitre ni kükü ye krütani jökrä meri ye kisete, akwa nin ngäbäkrei ngibiabare jire iti kwe. <sup>32</sup> Abti mrä meri ye krütani abko kukwe nakaninkä kore nieta. <sup>33</sup> Akwa ni krütani rükadreta nire mata niere, aisetet ni brare ni kükü, ben meri ye namani jökrä, abti niaratre ni kükü ye rükadreta nire jökrä angwane, meri ye rabadi nire nän mukore abko niere nunye, niebare kwetre Jesuye.

<sup>34</sup> Angwane Jesukwe niebare mda ietre:

Kä ne ngwane, ni brare amne ni merire käta ja mike gure, <sup>35</sup> akwa kä mrä, ni rükadreta nire angwane, nire nire tuen ütiäte Ngöböye nünakäre kärekäre jabe abko ni merire, brare käkwe ñan ja mikadre gure. <sup>36</sup> Ni ñan krütadre mda, akwa ni rabadre angeletre Ngöböwe kwrere. Erere arato, ni rükadita nire angwane, ni rabadi Ngöbö odeire jökrä, aisetet ni rabadi ja etbare amne ja ngwaire, aisetet ñan ja mikadre gure.

<sup>37</sup> Akwa kri chi namani jutra ngitiekä, ye känti ni rükadreta nire era metre abko Moisékwe bää mikani, käkwe niebare: Ni Dänkien Ngöbö abko Ngöbö Abrahamkwe, Isaakwe amne Jacobokwe, niebare kwe. <sup>38</sup> Ye abko, Abraham, Isaac amne Jacob krütanina abti Ngöböwe niebare kore Moiséye. Ngöbö abko ñan ni ngwakäre Ngöbö akwa Ngöbö abko ni nire Ngöbö gare nie. Ye aisetet Abraham, Isaac amne Jacob tä näne janknu Ngöbö ngwärekri abko gare nie. Abko kore se, niebare Jesukwe.

<sup>39</sup> Ye ngwane, Kukwe Biani Ngöböwe Moiséye dirikätre nämane yete, btä käi namani nuäre, ñobtä ñan angwane ni rükadreta nire abko era kräke. Yebtä abko niebare kwetre:

Dirikä, makwe blitaniri kuin krübäte, niebare kwetre Jesuye.

<sup>40</sup> Angwane kä jürä namani ni jökräbtä, käkwe kukwe ngwianintari ñakare mda Jesuye ja gakäre ben.

### *¿Nirekri Ni Dianinkä Ngöböwe däredre?*

(Mateo 22.41-46; Marcos 12.35-37)

<sup>41</sup> Yebti Jesukwe kukwe ngwianintari krörö mda nitre Saduseo yeye:

¿Ñobtä Ni Dianinkä Ngöböwe abko däredre jrei David tukwe kri nieta munkwe <sup>42</sup> amarebti David ara jire käkwe kukwe tikani krörö tärä Salmobtä?:  
Ti Dänkien Ngöbö käkwe nieba ti Dänkienye:

Kä bări ütiäte kri ti küde ruenkri, ne känti jakwe täke nete.

<sup>43</sup> Ye känti ma raba abti tikwe ma rüe mikadi jökrä ma ngoto täni, Salmos 11.1 niebare Davikwe Ni Dianinkä Ngöböwe yebtä. <sup>44</sup> David ara jire käkwe ja Dänkien niebare Ni Dianinkä Ngöböwebtä, ¿se ñobtä abko Ni Dianinkä Ngöböwe abko jatadre Davikri nieta munkwe se? Tita ngwentari kore, ñobtä ñan angwane nita Dänkien niere ñakare jire ni mräkä bări mrä nikrä yeye, niebare Jesukwe.

### *Jesukwe ni mikani mokre Kukwe Biani Ngöböwe Moiséye dirikätre ngäniene*

(Mateo 23.1-36; Marcos 12.38-40; Lucas 11.37-54)

<sup>45</sup> Ni jökrä nämane Jesu kukwei nuen angwane, batibe Jesukwe niebare mda nitre ja tötitikaka benye:

<sup>46</sup> Kukwe Biani Ngöböwe Moiséye dirikätre, ye ngäniene munkwe ja ngibia kuin, ñobtä ñan angwane niaratre tä dän nga ütiäte kri kite jadtä, bti ni jökrä käkwe köbö ngwiandretari käne ietre kä jändräñ rürümoinkrä ye käntita temen, ie töta nebe. Erere arato, ja täkrä ni ütiäte ütiäte kräke sinagogate, känti töta nebe rabai täkänintbe amne ja täkrä ni ütiäte ütiäte kräke, känti tätre nebe täkänintbe. Erere arato, niaratre nübaita bietabtä angwane, ja täkrä ni ütiäte ütiäte kräke, känti tö täkäi temen. <sup>47</sup> Erere arato, meri kän brare krütani abko kän tätre ju denkä abti tätre bike kuin, käta blite raire Ngöböbe, akwa yebtä Ngöböwe mikadi ja tare nike krübäte, aisetet munkwe ja ngibia

kuin Kukwe Biani Ngöböökwe Moiséye dirikätre ngäniene. Abko kore se, niebare Jesukwe ietre.

## 21

*Meri bobre käkwe sentabo ngörä kubu biani Ngöbökrä  
(Marcos 12.41-44)*

<sup>1</sup> Ye ngwane abko, nitre ngwian bkäne krikri namani nüke ngwian kite kajate Ngöbökrä ju blitakrä Ngöböbe bäre Jesu okwäbti. <sup>2</sup> Angwane meri bobre kän brare krütani abko jatani, käkwe ngwian sentabo kwrere kitani kubube arato kajate Jesu okwäbti. <sup>3</sup> Abtä Jesukwe niebare:

Ti bike kukwe era erere niere munye abko krörö: Meri bobre kän brare krütani se käkwe ngwian bini bäri kabre ni ngwian bkäne krikri se ngwä, <sup>4</sup> ñobtä ñan angwane niaratre käta ngwian namaninte ie aibe bien, akwa meri bobre ye abko käkwe ngwian ngörä nünankrä kwe erere bini jökrä, aise te niarakwe ngwian bini bäri kabre, niebare Jesukwe.

*Dre rakadikä kä mrä känenkri  
(Mateo 24.1-28; Marcos 13.1-23)*

<sup>5</sup> Angwane ju blitakrä Ngöböbe mikakrä bä nuäre amne, ni ruäre käkwe jändrän tuäretuäre biani Ngöböye, bti ju mikani tuäre, yebtä abko ni ruäre nämane blite mda. Abtä Jesukwe niebare ietre:

<sup>6</sup> Köbötira jire ju tuata munkwe se juandi ngwarbe jire jökrä, aise te jä ketani jabti jabti se juandi jökrä temen, niebare Jesukwe.

<sup>7</sup> Abtä nitre nämane yete käkwe niebare mda Jesuye:

Dirikä, <sup>8</sup>ju blitakrä Ngöböbe juandi ngwarbe nini makwe, ye abko rakadikä ñongwane nun tö gai? Arato kukwe ye kebera nakenkä abko bä mikadi ño nunye abko makwe niedre nunye, ie nun tö nibi, niebare kwetre ie.

<sup>8</sup> Abtä Jesukwe niebare mda ietre:

Bäri käne abko, nitre ni ngökaka ye ngäniene munkwe ja ngibia kuin, ñobtä ñan angwane ni jatadi kwati ti kähti käkwe niedi krörö: Ti abko Ni Dianinkä Ngöböökwe ara tä nete amne, kä mrä nükera ja ken, niedi kwetre. Akwa niaratre ye abko ni ngökaka, aise te mun ñan rika niaratre jiebti. <sup>9</sup> Erere arato, munkwe kukwe krörö gadi: Nitre tädi rüre jabe kwärikwäri ga munkwe angwane, munkwe ñan kä jürä ngwian jabtä, ñobtä ñan angwane kukwe ye abko rakadikä käne kore abko erere rabadi nakenkä, akwa ye ngwane kä mrä ñan jatadi jötrö, niebare Jesukwe.

<sup>10</sup> Yebti Jesu nikani blite janknu, käkwe niebare:

Kä mrä ngämi nüke juta kwatirekwatire rabadi rüre jabe kwärikväri amne nitre nünanka kä ketareketare te rabadi rüre jabe kwärikväri amne, <sup>11</sup> dobo rabadi nakaenkä kri krübäte, mrö nika rabadi kri krübäte amne bren nika rabadi krübäte kä ngrabare temen amne Ngöböökwe jändrän krikri krübäte mikadi tuadre käinta, abtä kä jürä rabadi kri ni kwatibtä.

<sup>12</sup> Akwa kukwe ye ngämi nakenkä, känenkri ni kwati jatadi mun rüere. Sinagoga nitre israelitakwe käntikänti mun jänäin kritobo ngwärekri kwetre, bti mun kitadi ngite kä teri kwetre. Erere arato, jrei amne gobran, ie mun kitadi ngise tödekaabtä tibti. <sup>13</sup> Akwa ye ngwane, tikwe dre dre nuenbare abko kräke kä rabadi kuin munye blitakäre tibtä nitre ye ngwärekri. <sup>14</sup> Mun jä ngämi niken kritobo ngwärekri, känenkri munkwe ja kwetadi ño ja dokwäre, yebtä munkwe ñan töbika dikaro, <sup>15</sup> ñobtä ñan angwane tikwe ja kukwei töbtä kri mikadi gare munye blitakäre ja dokwäre, ye käkwe mun rüe kukwe ötadi jökrä angwane, rabaditre kwekbe jökrä mun käne.

<sup>16</sup> Akwa ye ngwane abko, mun rün, mun meye, mun etba, mun ngwai, mun mräkä mda mda amne mun kukwe muko abko rikwitadi mun rüere, ye käkwe mun kämikadi ruäre. <sup>17</sup> Angwane ni jökrä mätä rabadi kri munbtä tödekaabtä tibti. <sup>18</sup> Akwa mun ñan

riadrete, abkokäre Ngöböökwe mun ngibiadi kuin jökrä, <sup>19</sup> aiseete munkwe nünanka dite jadtä angwane, mun rabadi dianintari, niebare Jesukwe.

<sup>20</sup> Yebti Jesukwe niebare krörö mda:

Nitre rükä raba tuen jökrä juta Jerusalén se bäre temen munye angwane abko, juta se juan kebera ngwarbe, ye rabara gare munye. <sup>21</sup> Ye ngwane mun tädre Judeate ye abko gitia mintokwäre amne nire nire tädre juta Jerusalénte abko gitia juta bäre mento amne, nire nire tädre Jerusalén bäre abko ñan rika ngitieta juta Jerusalénte, <sup>22</sup> ñobtä ñan angwane kukwe tä tikani Ngöbö Kukweibä, ye rabadre bare jökrä, abkokäre Ngöböökwe nitre nünanka kä nebtä mikadi ja ngie nuen kri köbö ye näire. <sup>23</sup> Akwa meri doboko doboko amne meri kwe ngäbäkrebä kiakia kianbtä, ye abko bobre jakän, ñobtä ñan angwane niaratré ñan raba ngitie jötrö, jye abko ñan bobre jakän ya! Kä ye ngwane abko ja tare nika rabadi kri krübäte kä nebtä amne nitre israelita käkwe ja ngie nuadi kri krübäte. <sup>24</sup> Ne aiseete ni ruäre kämikadi ngitrabti amne ni ruäre abko jänäin ngite juta mda mdate angwane, nitre ñakare israelitare, kräke Ngöböökwe köbö kitani nuäi, ye näre juta Jerusalén mikadi ja ngoto täni kwetre.

### *Jesukristo jatadita*

(Mateo 24.29-35,42-44; Marcos 13.24-37)

<sup>25</sup> Kä mrä angwane, Ngöböökwe sribi kri ñan tuabare nuendi abko bäre mikadi kwe ñänänbtä, söbtä amne mukebtä. Angwane ni kä nebtä töi rabadi ngwarbe kwäräkwärä amne mren rabadi romon krübäte, aiseete ngö rabadi nebe kri krübäte. Yebtä abko, ni jökrä rabadi töbika kri. <sup>26</sup> Erere arato, ni kwati rabadi nekwetekä krübäte amne kä rabadi nötöte bti, ñobtä ñan angwane kukwe rakadikä ño kä nebtä abko rabaditreibung töbika, ñobtä ñan angwane jäandrän jökrä käinta se rabadi grükekä ye abko jürä rabadi kri ni kwtibtbä. <sup>27</sup> Angwane ti Ni Kä Nebtä Ngobo abko jatadi tuen ja di kri bäre nuärebti mütabti kä käinbti sete abko ni jökrä käkwe tuadi. <sup>28</sup> Ne aiseete, kukwe nini tikwe ye erere rabara nakenä mun okwäbti angwane, munkwe kä ngwian nuäre jadtä, ñobtä ñan angwane Ngöbö kebera nüke mun tiketeta, aiseete munkwe kä ngwian nuäre jadtä, niebare Jesukwe.

<sup>29</sup> Ye btäräbe, kukwe yebtä Jesukwe kukwe bäre mikani krörö mda, käkwe niebare:

Higokrie amne kri mda mda, ye mika ñäräre munkwe, btä munkwe töbika. <sup>30</sup> Kri ye tä mutu ngitiekä angwane, kä töre tärä kite nüke ja ken mutna gain, <sup>31</sup> ye kwrere arato kukwe nini tikwe ye jata nakenä jökrä mun okwäbti angwane, Ngöbö kebera nüke gobrane ye rabara gare munye. <sup>32</sup> Ti bike kukwe era erere nire munye abko krörö: Nitre nünanka kä nebtä ngämi krüte jökrä, ye känenkri kukwe nini tikwe ye erere rakadikä jökrä. <sup>33</sup> Mdakäre abko, kä käinta se btä kä temen ne abko Ngöböökwe gadikä jökrä, angwane rikadi ta, akwa ti kukwei abko rabadi kärekäre, niebare Jesukwe.

<sup>34</sup> Yebti Jesukwe niebare mda:

Munkwe ja ngibia au, munkwe ñan ja töi mika jäandrän diän diän nuenbtä amne, munkwe ñan dröba nika amne munkwe ñan töbika jäandrän kä nebtä ye aibebtä, ñobtä ñan angwane munkwe ñan ja ngibiadre au ne ngwane, mun kwandre jáme köbö ye näire aiseete. <sup>35</sup> Amne jäandrän ngwarbe tä niken jáme, bti batibe tä neme kö okwäte, ye kwrere mun ñan tädre jáme, abkokäre munkwe mokre jabti, ñobtä ñan angwane nire nire kä nebtä tädi jáme, tädi ti ngibiare ngäbti ñakare angwane, ti jatadita. <sup>36</sup> Akwa kärekäre mun abko käkwe ja mika biare ti ngibiare ngäbti amne munkwe blita Ngöböbe jakrä angwane, kukwe jatadi taretare yebtä munkwe kwäräbedi jökrä amne, mun rabadi biare rabakäre ti Ni Kä Nebtä Ngobo ne ngwärekri. Abko kore se, niebare Jesukwe.

<sup>37-38</sup> Kä ye ngwane abko, käre köbö kwatirekwatire Jesu namani dirire ju blitakrä Ngöböbe ye bäre amne, ni kwati namani nüke dekä niara kukwei nuen, akwa deo abko Jesu nämane niken kibien Ngitio Olibo känti.

## 22

*Jesu rüe tö namani kain ngite tiebe  
(Mateo 26.1-5,14-16; Marcos 14.1-2,10-11; Juan 11.45-53)*

<sup>1</sup>Kä ye ngwane, bieta Te Lebadura Ņakare Bante kweta nämane Ngöbö mikakäre ütiäte. Bieta ye arabe kädian nämane Pascua\* abko erere köbö jatanina nüketa ja ken. <sup>2</sup>Angwane nitre blitaka Ngöböbe ni mda mda diäre dänkientre amne Kukwe Biani Ngöbökw Moiséye dirikätre abko kákwe Jesu müre ketadre ño abko namanintre ngibiaretari kisere, akwa ni nämane kwati nekete Jesukri abko jürä namani btätre. <sup>3</sup>Angwane nitre ja tötitikaka Jesube ni jätäbti nibu, ye ngätäite ni iti kädian nämane Judas Iscariote abko btä Satana nikani. <sup>4</sup>Ne aisetekniko nikani nitre blitaka Ngöböbe ni mda mda diäre dänkientre känti amne nitre ju blitakrä Ngöböbe guardia dänkientre känti angwane, Jesu kitadre ngise kwe ietre kämikadre abko nikani kädriere bentre. <sup>5</sup>Angwane kä namani nuäre kri btätre, kákwe ngwian bian braibare Judaye, <sup>6</sup>ye abko nükaninbiti Judaye angwane, Judakwe kitadre ngise ño rüeye ni mda mda okwä bäre abko Judas namani ngibiare kisere jae mda.

*Jesukwe mröbare mrä nitre ja tötitikaka benbe  
(Mateo 26.17-29; Marcos 14.12-25; Juan 13.21-30; 1 Corintios 11.23-26)*

<sup>7</sup>Nebti bieta Te Lebadura Ņakare Bante Kweta nämane ye nükani mda. Köbö ye näire kordero kämika nämane kwetadre Pascua köböite abko köböi nükaninta. <sup>8</sup>Abtä Jesukwe Pedro amne Juan käräbare, bti niebare kwe ietre:

Mun nän mrö sribere kwetadre Pascuate, niebare kwe ietre.

<sup>9</sup>Niaratré kákwe niebare mda Jesuye:

¿Nunkwe mrö sribedre mdente, ie ma tö nibi? niebare kwetre ie.

<sup>10</sup>Angwane Jesukwe niebare mda ietre:

Mun rika nebe jutate. Ye känti ni brare tädi iti ñö ngwena kantrate abko rükadi ngätäi munbe ji ngrabare. Ni ye rika mdente gwä, känti mun rika. <sup>11</sup>Mun rika nebe gwi angwane, munkwe nie krörö ju bkänkäye: Dirikäkwe mrö Pascua köböikrä kwetadi nitre ja tötitikaka benbe abkokrä käta ükaninte mdente, ngwantarimna kwe, munkwe nie kore ie. <sup>12</sup>Angwane ju mikani bobu jabti käin, te kä kri tädira ükaninte biare mrökrä, känti mun jänäin kwe. Ye känti munkwe mrö scribe biare nunkrä amne jändrän jökrä ükate biare. Abko kore se, niebare kwe ietre.

<sup>13</sup>Ye erere bkänä nikanintre angwane, Jesukwe kukwe niebare ño ño ietre, erere kwani ietre, känti mrö sribebare kwetre kwetadre Pascuate.

<sup>14</sup>Ye erere, mrö käi nükani angwane, Jesu nikani, namani täkänintbe mesabtä nitre niara kukwei ngwiankabe angwane, <sup>15</sup>niebare kwe ietre:

Ti ngämi krüte, känenkri bäri ti tö namani mrö Pascuakrä ne kwetai munbe gware abko erere käi nüra mtare. <sup>16</sup>Ti tö namani mrö Pascuakrä ne kwetai kore munbe, ñobtä ñan angwane Ngöbö ngämi gobrane ni ngätäite, känenkri tikwe ñan mrö Pascuakrä ne kwetadreta jire mda, akwa batibe kukwe bää mikata mrö Pascuakrä nebti rabadi bare angwane, tikwe kwetadita, niebare Jesukwe nitre ja tötitikaka benye.

<sup>17</sup>Bti uba doi nämene basote diani kisete kwe, kuin niebare btä kwe Ngöböye, bti niebare kwe nitre ja tötitikaka benye:

Uba doi ne ñaen ja täritäri munkwe, <sup>18</sup>ñobtä ñan angwane Ngöbö ngämi gobrane ni ngätäite, ye känenkri tikwe ñan uba doi ñadreta jire mda abko ti tö nibi niei munye, niebare Jesukwe ietre.

<sup>19</sup>Yebti Jesukwe ban diani kundi kisete, kuin niebare btä kwe Ngöböye, bti ötaninbtä kwe, bti biani kwe nitre ja tötitikaka benye, kákwe niebare ietre:

\* 22:1 Pascua. Nitre israelita kákwe Pascua köböi mikani ütiäte, ñobtä ñan angwane kira nitre israelita nämane ngite kä Egiptote angwane, Ngöbökw tikaninte Pascua köböitä. Pascua abko käta “niken bäre ta” niere. Köbö yebtä angele ni kämikaka nikani nitre israelita bäre ta amne kämikani ūakare kwe, aisetekniko Ngöbökw köbö Pascua mikamna ütiäte nitre israelitayte.

Ban ne abko ti ngätä ara. Ne mden abko tita bien müre ketadre mun kräke. Käre munkwe ban ne kweta kore ti ngwiankrä töre jae, niebare Jesukwe.

<sup>20</sup> Ye kwrere arato, uba döi nämane basote abko Jesukwe diani kisete, käkwe niebare nitre ja töitikaka benye:

Uba döi ne abko ti därie tikwe ara. Ti krütadi angwane, ti därie rimiadite munkrä, köböire Ngöböökwe kukwe ükaditeta btin munbe, ye mden abko uba döi ne tä bä mike. <sup>21</sup> Akwa ni ti kitaka ngise ti rüeye abko tä mröre ketetibe tibe mesabtä nete. <sup>22</sup> Ne abko, ji ükaninte Ngöböökwe ti Ni Kä Nebtä Ngobo ne käne ye erere tikwe mikadre täte jökrä, jakwa ni ti kitaka ngise abko ñan bobre jakän ya! niebare Jesukwe.

<sup>23</sup> Angwane nitre ja töitikaka Jesube namani niere jae kwärikwäri:

¿Nirekwe niara kitadi ngise rüeye ruen? namanintre niere.

### *¿Nire bäri ütiäte?*

<sup>24</sup> Ye ngwane abko, nitre ja töitikaka Jesube mden bäri ütiäte abko btä nikani ja kwete.

<sup>25</sup> Abtä Jesukwe niebare ietre:

Nitre Ngöbö mikaka ngwarbe jae ye mikata jreire abko tä nebe ja bärä mike krübäte ni mda mda okwate. Erere arato, nitre mikata ni mda mda dänkiene abko krübäte arato, akwa ni se bäri moto kuin, nieta btä abko käita nebe juto btätre. <sup>26</sup> Akwa mun ngätäite abko ñan rabadre bare kore, ñobtä ñan angwane ni bati mikata sribi ngwarbe nuene, ye kwrere nire nire rabadre bäri ütiäte mun ngätäite abko rabadi ni bati ye kwrere. Erere arato, mun mden rabadre ji dokwate abko käkwe ja mika ni klabore kwrere. <sup>27</sup> Ye abko, ti bike kukwe niere munye: ¿Nita täkänintbe mröre mesabtä angwane, ni mrö mikaka mesabtä, ni nibu ye abko mden bäri ütiäte? Ni mrökä mesabtä abko bäri ütiäte ni sribikä mrö sribekä ye kräke raba ruen tie, akwa ni sribikä ye kwrere tita mun ngätäite nete, erere munkwe nüna arato.

<sup>28</sup> Tikwe ja tare nikaba angwane, käre mun näma ketetibe tibe, <sup>29</sup> aisetet ti Rünkwe kä biani gobrankrä tie, ye kwrere tita bien munye arato, <sup>30</sup> tikwe gobrandi Ngöböbe, ye känti munkwe mrödre amne munkwe dö ñadre ketetibe tibe ti kukwe muko kwrere, abkokäre tita kä gobrankrä bien munye. Ye ngwane, mun ja töitikaka tibe ye abko rabadi täkänintbe kürä kwä jätäbti kubu yebti. Ye känti abko juta keta jätäbti ketebu nitre israelitakwe abko kräke munkwe kukwe ükadite siba tibe, niebare Jesukwe ietre.

### *Pedro käkwe Jesu rükandite, niebare Jesukwe*

(Mateo 26.31-35; Marcos 14.27-31; Juan 13.36-38)

<sup>31</sup> Yebti ni Dänkien käkwe niebare mda:

Simón, Satana tö mun jökrä nuaita krübäte ja käne, käkwe mun köböi käräba Ngöböye, <sup>32</sup> akwa makwe tödekadre janknu Ngöböbti, abkokäre tikwe blitaba Ngöböbe makrä Simón. Ne aisetet ma töi rikwitata ti kukwäre angwane, makwe ma mräkä mda mda nete se die mika nünenkä dite jabtä, niebare Jesukwe Simónye.

<sup>33</sup> Abtä Simónkwe niebare mda ie:

Ti Dänkien, ma kitadre ngite ya o ma kämikadre ya, ye känti tita juto biare niken gware mabe, niebare kwe Jesuye.

<sup>34</sup> Abtä Jesukwe niebare mda ie:

Pedro, ti bike kukwe era erere niere mae abko krörö: Antlan ngämi ngwane dekä, ye känenkri ti gare ñakare mae, makwe niedi bämä jire. Abko kore se, niebare Jesukwe ie.

### *Kä taretare kite jötrö*

<sup>35</sup> Yebti nitre ja töitikaka Jesube, ie Jesukwe niebare:

Tikwe mun juanba Ngöbö Kukwei kädriere angwane, mun ñan rikadre ngwian ngwena jae amne, mrö, sabato ye ñan järikadre munkwe jae, tikwe nieba munye. ¿Ye ngwane munkwe ja tare nikani jändrän ye miare ya? niebare Jesukwe ietre.

Angwane, Ñakare, niebare kwetre.

<sup>36</sup> Abtä Jesukwe niebare ietre:

Kore tikwe mun juanba akwa, mtare abko ngwian tärä munkwe angwane, mun jata ngwena jae amne mun jata mrö ngwena jae arato, akwa mun mdenkwe ngitra ñakare abko käkwe dän jakwe rürümoín, bti munkwe ngitra köka jae, ñobtä ñan angwane kä taretare kite munkrä, ñobtä ñan angwane <sup>37</sup> Ngöbö Kukweita tikani krörö tibta:

Ni ngututu kwrere jire niara namani tuen ni mda mdaye, *Isaías 53.12*  
abko tikani kira tibta, ye abko rabadre bare täte jökrä tibta. Abko kore se, niebare Jesukwe ietre.

<sup>38</sup> Abtä nitre ja töitikaka ben käkwe niebare ie:

Ni Dänkien, ngitra tärä kumu nikwe nete, niebare kwetre.

Angwane Jesukwe niebare ietre:

Kada kete munkwe. Tikwe dre nini ñan nü gare munye, niebare kwe ietre.

#### *Jesu nikani blite Ngöböbe Getsemaní*

(Mateo 26.36-46; Marcos 14.32-42)

<sup>39</sup> Yebti Jesu nämane nikken käre Ngitio Olibo känti, ye erere nikaninta mda angwane, nitre ja töitikaka ben ni jäätäbtä iti nikanintre jökrä ben. <sup>40</sup> Namaninta ngitiobti angwane, niebare kwe ietre:

Kukwe taretare kite mun nuente ja käne angwane, munkwe ñan ja mikadre ngite, abkokäre munkwe blita jakrä Ngöböbe, niebare Jesukwe ietre.

<sup>41</sup> Yebti jä kitata tä nikken mate nuäi temen, ye näre Jesu nikani mentokwäre se kwrere, känti namani ngukudokwäbti temen blitakäre Ngöböbe, <sup>42</sup> käkwe niebare ie:

Ti Rün, kukwe kite tare ti rüere ti mikakrä ja tare nike, ye ma tö diain ti bäre ne ngwane, makwe dian ti bäre, akwa ma tö dreye tirkä, ye erere raba bare tibta amne ñan ti töi abko erere rabadre bare, niebare kwe Rün Ngöböye.

<sup>43</sup> [Ye btäräbe angele nämane kä käinbi, nükani Jesu die mike. <sup>44</sup> Angwane Jesu namani ja tare nike bäri krübäte, akwa bäri namani blite ja dibti Ngöböbe, aisetekrreibäre namani ngitiekä abko namani näkäenkä krikri be däri kwrerekwrere abko namani nikken mate temen.]†

<sup>45</sup> Yebti Jesukwe blitabare ünän Ngöböbe angwane, nikaninta nitre ja töitikaka ben ye känti amne niaratre namani ulire krübäte, aisetekrreibäre namane kibien kuin jökrä, btä Jesu namaninta. <sup>46</sup> Abtä niebare kwe ietre:

¿Ye ñobtä munta kibien? Diablu jatadi mun nuente ja käne angwane, munkwe ñan ja mikadre ngite, abkokäre näin krö, blite jakrä Ngöböbe, niebare Jesukwe ietre.

#### *Jesu kani ngite*

(Mateo 26.47-56; Marcos 14.43-50; Juan 18.2-11)

<sup>47</sup> Jesu nämane ñäke kore nitre ja töitikaka benye, te batibe ni mda nükani kwati känti. Nitre ye ngätäite abko, ni iti ja töitikaka Jesube kädian nämane Judas abko nämane näinji ngwena käne, nikani nebe Jesu känti angwane, krötäbare Jesu ken kwe, Jesu demainkäre ngwärebtä. <sup>48</sup> Akwa Jesukwe niebare ie:

Judas, ¿ti, Ni Kä Nebtä Ngobo ne ma tö nibi demaine kore kitakäre ngise ñan ñan? niebare kwe ie.

<sup>49</sup> Angwane nitre ja töitikaka Jesube mda mda okwäbti kukwe ye nikani nakenä angwane, niebare kwetre Jesuye:

Ni Dänkien, nun bike nitre se tikekä ngitrabti, niebare kwetre.

<sup>50</sup> Yebti ni blitaka Ngöböbe ni mda mda diäre dänkien, kwe ni klabore nämane abko olo küde ruenkri tikaninkära ta ie ni itikwe se kwrere. <sup>51</sup> Akwa Jesukwe niebare ietre:

Nitre ye tuemetre, niebare Jesukwe.

Bti ni klabore ye olortä Jesukwe kise mikani angwane, namaninta kuin batibe. <sup>52</sup> Yebti nitre blitaka Ngöböbe ni mda mda diäre dänkientre amne guardia ju blitakrä Ngöböbe ngibiabtikä amne nitre unbre ji dokwäte nikani Jesu kaen ngite, ye ie Jesukwe niebare:

† <sup>22:44</sup> Kukweta tikani corcheta ngätäite abko ñan tä tikani manuscrito bari kuinkuinetä.

¿Nobtä abko bäsí ni gokä kri krübäte rüere ngitra jäta niken amne krito jäta niken, kwrere jire mun kite ngwena ti rüere ti kakäre ngite ye? <sup>53</sup> Ju blitakrä Ngöböbe känti käre ti nämane nebe ketetibe munbe angwane, mun ti kaen ñakare ngite amarebti mtare mun kite kore ye. Akwa mtare diablu tä dikekä kä ikote, diebti kä nüra munkrä, aise te mun nüke ti kaen ngite kore mtare, niebare Jesukwe ietre.

*Pedro käkwe Jesu rükante*

(Mateo 26.57-58,69-75; Marcos 14.53-54,66-72; Juan 18.12-18,25-27)

<sup>54</sup> Yebti Jesu kani ngite, jänikani nitre blitaka Ngöböbe ni mda mda diäre dänkien juete angwane, Pedro nikani bää mente jiebti se kwrere. <sup>55</sup> Jesu jänikani ngite, ye känti namanintre angwane, ni ruäre käkwe ñukwä bukaninte ju bäre, bti namanintre täkänintbe ñukwä bäre temen mda angwane, Pedro nükani, namani täkänintbe siba niaratre ngätäite ñukwä träse. <sup>56</sup> Angwane meri sribikä nämane ñukvä träse yete abko ie Pedro jatabare täkänintbe ñukwäbtä amne okwä namani kwekbe btä, käkwe niebare:

Ni se nämane dikekä Jesube arato, niebare kwe ie.

<sup>57</sup> Abtä Pedrokwe ja rükante, käkwe niebare:

Niara gare ñakare tie. ¿Ye ño abko mata ñäke kore ye?

<sup>58</sup> Yebti bää derare angwane, ni mdara jire okwä namani Pedrobtä, käkwe niebare:

Mata nekete arato Jesube, niebare kwe ie.

Angwane Pedrokwe niebare ie:

Tita nekete ñakare niarabe. Makwe ñan ñäkä ngwarbe, niebare kwe ie.

<sup>59</sup> Yebti kä nikani ñänä okwä krati näre ta mda angwane, ni mdara jire jatani ñäke kisere Pedroye, kä namani niere:

Ni ne abko Galileabo, aise te niara ne nämane näin siba Jesube, namani niere.

<sup>60</sup> Angwane Pedrokwe niebare:

Drebäta mata blite ñan nebe nüke gare tie, niebare kwe.

Pedro nämane ja rükente kore, ye btäräbe antlankwe ngwänänbare se kwrere <sup>61</sup> angwane, ni Dänkien nikwitaninte, käkwe Pedro mikani ñäräre ja käne angwane, ni Dänkien käkwe kukwe niebare krörö Pedroye abko nükaninta töre ie: Antlan ngämi ngwâne, känenkri makwe ti rükandite bämä jire, niebare ni Dänkienkwe ie, ye nükaninta töre ie. <sup>62</sup> Angwane nikani mentokwäre, käkwe ja müaibare kri kä bäre mento.

*Nitre guardia käkwe Jesu mikani yakrä jae*

(Mateo 26.67-68; Marcos 14.65)

<sup>63-64</sup> Jesu jänikani ngite, ye känti nitre mikani Jesu ngibiabtikä abko käkwe dän kukwän mäkäni Jesu okwäbti, bti namanintre mete amne namanintre mike yakrä jae, kä namani niere ie:

Nirekwe ma miti niere metre, namanintre niere Jesuye.

<sup>65</sup> Erere arato, namanintre ñäke kämekäme amne taretare Jesuye, mikakäre ene jae.

*Jesu jänikani Sanedrin ngwärerekri*

(Mateo 26.59-66; Marcos 14.55-64; Juan 18.19-24)

<sup>66</sup> Yebti kä jatani ngwen dekä angwane, nitre nämane sribire Sanedrinbtä abko nitre blitaka Ngöböbe ni mda mda diäre dänkientre amne Kukwe Biani Ngöböökwe Moiséye dirikätre käkwe ja ükaninkrö jökrä amne, ye ngwärerekri Jesu jänikani. Namani känti angwane niebare kwetre ie:

<sup>67</sup> Ma abko Ni Dianinkä Ngöböökwe ara ne ngwane, niere nunye, niebare mda kwetre Jesuye.

Angwane Jesukwe niebare:

Tikwe jän niedre munye angwane, munkwe ñan ti kukwei mikadre era. <sup>68</sup> Erere arato, tikwe kukwe ngwiandretari munye angwane, munkwe ñan ti kukwei kadre ngäbti.

<sup>69</sup> Akwa mtare Ngöbö Di Kri Jändrän Jökrä Nuenkrä ye küde ruenkri kä ni ütiäte krikrä, känti Ni Kä Nebtä Ngobo rabadi täkäninte gobrane Ngöböbe gware, niebare Jesukwe.

<sup>70</sup> Angwane ni jökrä käkwe niebare mda Jesuye:

¿Mata niere kore, aisetet ma Ngöbö Odei bkänä ñan ñan? niebare kwetre ie.  
 Angwane Jesukwe niebare mda ietre:  
 ¿Mun arajire käta ti Ngöbö Odei niere, ye aisetet ñan ye kwrere bkänä ya? niebare kwe ietre.  
<sup>71</sup> Angwane niebare kwetre:  
 Niarakwe ñäri kore, käkwe ja miri ngite au, nikwe kukwe nuri. ¿Se abko ni mdara jire känändre blite mda rüere ya? niebare kwetre jae kwärikwäri.

## 23

### *Jesu jänikani Pilato ngwärekekri*

(Mateo 27.1-2,11-14; Marcos 15.1-5; Juan 18.28-38)

<sup>1</sup> Yebti ni jökrä nämane yete abko nikani Jesu ngwena mda Pilato ngwärekekri.  
<sup>2</sup> Angwane nikani Jesu kite ngise krörö Pilatoye:

Ni noko tä kukwe miketbe blo nun israelita rüere abko nunkwe gaba btä. Nunkwe ñan ja ütiä biandre emperador romanoboye tä niere. Mdakäre abko, niara Ni Dianinkä Ngöböökwe amne niara abko jrei tä niere emperador rüere, niebare kwetre Pilatoye.

<sup>3</sup> Abtä Pilatokwe niebare Jesuye:  
 ¿Ma abko jrei nitre israelitakwe bkänä ya? niebare kwe.  
 Jesukwe niebare Pilatoye:  
 Jän. Era metre ti ara, niebare kwe ie.

<sup>4</sup> Angwane nitre blitaka Ngöböbe ni mda mda diäre dänkientre amne ni mda mda, ie Pilatokwe niebare:

Ni ne ja mike ngite ñakare abtä ñan kämikadre, nibi tuen tie, niebare kwe ietre.

<sup>5</sup> Akwa ni jökrä namani ja nike kisere, kä namani niere ie:  
 Ni noko tä kukwe dirire abko käta nun kwite jökrä ja rüere kwärikväri. Käne nikani dirire Galileate sere, abti mtare kite nüke dirire arato Judeate nere, namanintre niere Pilatoye.

### *Jesu jänikani jrei Herodes Antipas ngwärekekri*

<sup>6</sup> Jesukwe sribi nuenbare kena Galileate niebare, ye jarabare Pilatoye angwane, Jesu abko Galileabo ya ngwianintari kwe. <sup>7</sup> Jesu abko Galileabo gani kwe amne, kä ye känti Herodes nämane gobrane arato aisetet kukwe ükadrete nitre Galileabokrä, aisetet Herodes nämane Jerusalén, ye känti Pilatokwe Jesu juani. <sup>8</sup> Jesu jatabare Herodeye angwane, käi namani nuäre Herodebtä, ñobtä ñan angwane kä raire nämane ni kukwei nuen blite Jesubtä, aisetet tö namani ja tuai ben amne tö namani Jesu tuai sribi kri ñan tuabare nuene keteti ja okwäbti, <sup>9</sup> käkwe kukwe ngwianintari kabre ie. Akwa Jesukwe ñan kukwe kani ngäbti jire chi. <sup>10</sup> Kä ye känti abko, nitre blitaka Ngöböbe ni mda mda diäre dänkientre amne Kukwe Biani Ngöböökwe Moiséye dirikätre nämane siba yete abko namani Jesu kite ngise kisere Herodeye. <sup>11</sup> Angwane Herodes btä rükä namani Jesu mike ngwarbe amne namani mike yakrä jae, käkwe dän bäri kuin kita nämane jabtä jrekwe, kwrere kitani kwetre Jesubtä. Bti Herodekwe juaninta Pilato känti, ñobtä ñan angwane namani tuen ngite ñakare ie aisetet. <sup>12</sup> Ne känenkri abko, Herodes nämane ja rüere Pilatobe akwa, ja mäkäninta kwetre köbö ye näire.

### *Jesu kitani ngite müre ketadre*

(Mateo 27.15-26; Marcos 15.6-15; Juan 18.39-19.16)

<sup>13</sup> Yebti Pilatokwe nitre blitaka Ngöböbe ni mda mda diäre dänkientre amne nitre ütiäte ütiäte ükaninkrö nitre israelita mda mdabe, <sup>14</sup> käkwe niebare ietre:

Ni ne nämane kukwe miketbe gobrane romanobo rüere, abtä mun ki ngwena tie nete, munkwe nini. Akwa tikwe kukwe ngunintari ie mun okwäbti amne, kukwe btä munta kite ngise abko erere ja mike ngite ñakare tuen tie. <sup>15</sup> Erere arato, Herodeye kuni ngite ñakare, aisetet juninta jrekäbe kwe tie nete. Ni ne ja mike ngite ñakare. ¿Se ñobtä müre ketadre? <sup>16</sup> Aisetet ti bike kwata metamna köbti jrekäbe, bti tikwe tikaditeta. Abko kore se, niebare Pilatokwe ietre.

<sup>17</sup> [Bieta Pascuate abko, käre gobran romanobo käkwe ni ngite tikadrete.]\* <sup>18</sup> Pilatokwe blitaba kore, abtä ni jökrä namani ngrente, kä namani niere:

¡Barrabás tikiteta nunkrä amne ni ye abko ngwena müre ketadre! namanintre niere.

<sup>19</sup> Barrabás ye abko nämane kukwe miketbe gobran romanobo rüere amne niarakwe ni mda kämikani arato. Abtä nämane kitani ngite kä teri abko ni jökrä namani tikatemna.

<sup>20</sup> Akwa Pilato abko tö namani Jesu tikaiteta, käkwe ñäkäbareta bobuta ietre. <sup>21</sup> Akwa niaratre käkwe ngratebare bärja dibti mda, kä namanintre niere:

¡Müre kete krusobtä! ¡Müre kete krusobtä! namanintre niere.

<sup>22</sup> Abtä Pilatokwe niebareta bämäkäre ietre:

¿Drebä ni nekwe ja mikani ngite? Niara ja mike ngite ñakare nibi tuen tie. ¿Se abko drebtä müre ketadre? Aisete ti bike kwata metamna köbti jirekäbe, bti tikwe tikaditeta, niebare kwe.

<sup>23</sup> Akwa ni jökrä namani Jesu kämikamna kisere krusobtä, kä namani ngrente bärja krikri. Te Pilato töi kwitani kwetre Jesu rüere, aisete tö nämane dreye, erere namanina kwetre. <sup>24</sup> Ne aisete, niaratre tö namani dreye, ye erere Pilatokwe köböi biani ietre.

<sup>25</sup> Angwane niaratre namani Barrabás tikatemna, ye erere nuenbare kwetre. Barrabás ye abko nämane kukwe miketbe gobran romanobo rüere amne ni kämikani kwe, abtä nämane ngite kä teri abko Pilatokwe tikaninteta amne nitre israelita tö namani Jesu kämikai abko erere kämikamna Pilatokwe.

### *Jesu metani krusobtä*

(Mateo 27.32-44; Marcos 15.21-32; Juan 19.17-27)

<sup>26</sup> Abti Jesu jänikani mda müre ketadre krusobtä angwane, ni Cirenebo kädian nämane Simón nämane Jerusalén bäre, jataninta, nükani ngätäi bentre ji ngrabare angwane, kruso mikani Simón kötörä nitre rükäwe abko nikani ngwena Jesu jiebti. <sup>27</sup> Ye ngwane ni nikani kwati jiebti angwane, meri nikani kwati siba abko namani uliere krübäte. Abtä nämane näin müen krikri be Jesu jiebti. <sup>28</sup> Abtä Jesukwe mikani ñärräre ja käne, käkwe niebare ietre:

Mun merire Jerusalénbo, munkwe ñan ti müai, akwa munkwe ja müai au amne munkwe ngäbäkre jakwe müai jakrä, <sup>29</sup> ñobtä ñan angwane kä taretare jatadi angwane, niedi krörö nitre merirebtä: Meri kaibe ngäbäkre ngibiare ñakare amne ngäbäkre mike ñakare kianbtä abko btä käta nuäre kri niedi, ñobtä ñan angwane ngäbäkre ñakare munkwe krütadre munkán kukwe taretare näire aisete. <sup>30</sup> Ye ngwane abko ni jökrä rabadi niere ngitioye:

Ngitio ngidien järäre nunbti amne nun doboi mike nun rüe ngäniene, *Oseas 10.8* rabadi niere. <sup>31</sup> ¿Ye abko ti kri niki kwrere btä tätre kukwe nuene käme kore se abko mun israelita kri nötare kwrere abko btä ñan nuendre kwetre arato ya? niebare Jesukwe meritre yeye.

<sup>32</sup> Jesu jänikani müre ketadre krusobtä angwane, ni mda käkwe ja mikani ngite abko jänikani nibu kämikadre gware ben krusobtä. <sup>33</sup> Ye erere käkä Calavera känti Jesu jänamani angwane, metani krusobtä amne ni ja mikaka ngite metani kruso mda mdabtä arato abko nikani iti küde ruenkri amne iti küde ngeberekri. <sup>34</sup> Angwane Jesukwe niebare Ngöböye:

Ti Rün, nitre tä ja mike ngite ti rüere ne makwe dian bti ta amne makwe ñan mika ja ngie nuen ti dokwäre, ñobtä ñan angwane niaratre tä dre nuene gare ñakare metre ietre, niebare Jesukwe.

Angwane nitre rükä abko käkwe ja gani dän Jesukwe ñäkätbekrä jabti. <sup>35</sup> Ye ngwane ni nämane kwati okwä Jesubtä angwane, nitre ütiäte ütiäte nitre israelita ngätäite namani Jesu mike ngwarbe jae, kä namani niere jae kwärikwäri:

Niarakwe ni mda mda dianintari, aisete niara abko Ni Dianinkä Ngöbökwe bkänä ne ngwane, ja diandretari au krusobtä mento kwe, namani niere Jesubtä.

\* 23:17 Versículo 23.17 ñan tä tikani manuscrito bärja kuinkuinetä.

<sup>36</sup> Erere arato, nitre rükä romanobo namani Jesu mike yakrä, kä namani krötö Jesu ken amne namani uba ñöi dime bien ñadre ie, <sup>37</sup> kä namani niere:

Ma ñakare Jrei nitre israelitakwe bkänä, ñobtä ñan angwane kore ne ngwane, makwe ja diandretari au mento, namanintre niere Jesuye.

<sup>38</sup> Angwane Jesu dokwä känti käin abko kukwe tikani krörö kri kukwänbtä abko nämane mikani “NI NE ABKO JREI NITRE ISRAELITAKWE” abko namani tikani. <sup>39</sup> Angwane ni kukwe käme nuenkä nämame mikaninkä krusobtä käin, ye abko iti namani ñäke diänbe Jesuye arato, kä namani niere:

Ma abko ñakare Ni Dianinkä Ngöböökwe bkänä, ñobtä ñan angwane kore ne ngwane, makwe ja diandretari au amne makwe nun diandretari arato, namani niere Jesuye.

<sup>40</sup> Abtä ni iti mda nämame krusobtä käin arato ye käkwe niebare kukwe muko yeye:

¿Mata ja tare nike ja kwrere ni nokobe, akwa Ngöbö jürä ñakare mabtä ñan ñan? <sup>41</sup> Ni nibu ne käkwe ja mikani ngite abtä nita ja ngie nuen ye tä dbe. ¿Akwa ni noko ja mike ngite ñakare, akwa tä ja tare nike, se tuen mae ya? niebare kwe ie.

<sup>42</sup> Bti niebare mda kwe Jesuye:

Jesu, ma raba gobrane angwane, makwe ti ngwianta töre jae amne makwe ti die mika, niebare kwe ie.

<sup>43</sup> Jesukwe niebare mda ie:

Era metre mtare ma rabadi kä kuinte tibe, niebare kwe ie.

### *Jesu krütani*

(Mateo 27.45-56; Marcos 15.33-41; Juan 19.28-30)

<sup>44-45</sup> Yebti ñänä ruäre angwane, kä ngidianinte mda amne kä namani iko jökrä temen nebebe ñänä okwä krämä dere, aisetet ñänä trä namani ñakare. Erere arato, dänkwän ngetbo, bti ju blitakrä Ngöböbe nämame ñäkänintbe, ye nianinkäbe ötöbu ta se kwrere.

<sup>46</sup> Angwane Jesukwe ngratebare kri, käkwe niebare:

¡Ti Rün, ti bike ja üai mike gare mae! niebare kwe.

Ye btäräbe krütani. <sup>47</sup> Jesu krütani kore nitre rükä romanobo dänkien okwäbti angwane, Ngöbö käkitaninkä kwe, käkwe niebare:

Ni ne abko ni metre amne ngite ñakare bkänä ñan ñan, niebare kwe.

<sup>48</sup> Ye ngwane ni nämame kwati yete okwäbti kukwe nakaninkä kore. Abtä moto namani ulire, kä nikani ja mete mäträte, nikaninta mentokwäre. <sup>49</sup> Angwane nitre ja getaka Jesube amne nitre merire merire Galileabo nikani siba Jesube abko namanintre bå mente temen se kwrere okwä Jesubtä.

### *Jesu doboi mikani*

(Mateo 27.57-61; Marcos 15.42-47; Juan 19.38-42)

<sup>50-51</sup> Ye ngwane abko, ni iti sribikä Sanedrinbe kädian nämame José nünanka juta Arimateate kä Judeate nämame. José ne abko moto kuin amne nämame nüne metre Ngöbö ngwärekri. Erere arato, Ngöbö rükadre gobrane ni kwe ngätäite diribare Jesukwe abko José nämame ngibiare kisere amne, Sanedrin käkwe kukwe nuenbare Jesubtä, ye ñan namani dbe kräke. <sup>52</sup> Ye mden kisete, Jesu krütani angwane, niara nikani, käkwe Jesu ngwákä käräbare Pilatoye. Erere Pilatokwe köböi biani ie angwane, <sup>53</sup> José nikani, Jesu ngwákä diani krusobtä timon kwe, mrianinte kwe dän bäri ütiäte kädianta lino ye te, bti kä nämame muani jäkwatate ni doboi mikakrä akwa, ni doboi mika ngämi te, ye känti Jesu doboi mikani kwe. <sup>54</sup> Köbö ye ngwane abko, nitre israelita nämame jäandrän ükete biare köbö jadükakrä ngibiakäre ngäbti, erere köbö jadükakrä jatanina nüke. <sup>55</sup> Angwane José nikani Jesu doboi mike angwane, nitre merire Galileabo nikani siba Jesu mukore nebe Jerusalén, ye abko Jesu doboi mikadi mdente Josékwe abko nikani tuen angwane, Jesu doboi mikani mdente metre, ye tuani kwetre. <sup>56</sup> Bti nikaninta, namaninta gwi angwane, ñö rä båne amne kri ngwäri mnü rä båne sribebare kwetre mikakäre Jesu ngwákä ngrabare. Yebti kukwe nämame ükaninte ño Ngöböökwe köbö jadükakräbtä, ye erere nitre merire ye käkwe jadükani.

*Jesu nükaninta nire**(Mateo 28.1-10; Marcos 16.1-8; Juan 20.1-10)*

<sup>1</sup> Akwa ñänä jatani gökökä krire käin bämänte dekä angwane, nitre merire ye nikaninta dobobti mda, kä nikani ñö rä bäne amne kri ngwäri mnü rä bäne sribebare kwetre ye ngwena mikadre Jesu ngwökä ngrabare. <sup>2</sup> Namanintre dobobti angwane, jä mikani kä mkäte Jesu doboibti ye namanina dianinkä mento amne ñakare täte, btä namanintre. <sup>3</sup> Angwane nikanintre nikren kä mkäte nguse se kwrere angwane, jjo! ni Dänkien Jesu ngwökä kwani ñakare nguse ietre. <sup>4</sup> Yebtä abko töi ñan namani krütare. Ye btäräbe ni btä dän ngwen bürere namanintre nünaninkä nibu niaratre ken, btä okwä namani. <sup>5</sup> Angwane kä jürä namani kri btätre, abtä nikaninbe mate ngukudokwäbti temen, käkwe ja okokrä mikani dobobtä temen. Akwa angele nibu ye käkwe niebare meritre ye:

¿Ñobtä muta näin ni nire känentari mürükä ngätäite ye? <sup>6</sup> ¡Ni känäntarita näin munkwe, ye nürate nire, aisetet ñakare nete! Niara nämene Galilea munbe angwane, dre niebare kwe, ye munkwe ngwianta töre jae abko krörö: <sup>7</sup> Ni Kä Nebtä Ngobo ne kitadi ngise nitre kukwe kämekäme nuenkäye, bti niaratre käkwe müre ketadi krusobtä, akwa mukirare angwane, rükadita nire, niebare kwe munye, niebare kwetre meritreye.

<sup>8</sup> Angwane batibe Jesu kukwei nükaninta töre meritre ye angwane, <sup>9</sup> nämene dobobti, nikaninta Jerusalén. Namaninta gwi angwane, kukwe nakaninkä ño ño, ye erere niebare jökrä kwetre nitre Jesu kukwei ngwianka ni jätäbti iti ye angwane ni mda mdaye. <sup>10</sup> Nitre merire nükani kukwe ngwena nitre Jesu kukwe ngwiankaye abko María Magdalabo, Juana, Santiagomeye kädian nämene María, amne meri mda mda abko nükani kukwe ngwena. <sup>11</sup> Akwa nitre Jesu kukwei ngwianka abko ie meritre ye namani tuen ñäke ngwarbe, aisetet ñan tö namani kukwei mikai era. <sup>12</sup> Akwa Pedro abko nikani betekä dobobti, namani yete käkwe nikrabare nguse amne, dän te Jesu mrianinte aibe nämene nguse, btä okwä namani angwane, nikaninta akwa kukwe nakaninkä, yebtä töi ñan namani krütare mda.

*Ji juta Emaús kukwäre, känti Jesukwe blitabare ni nibu ben*

<sup>13</sup> Jesu nükaninta nire, ye näire nitre nänkä ben nikani nibu juta Emaús kukwäre. Emaús ye abko nämene kilometro krä jätäbti krati Jerusalén bäre mento, känti nikanintre. <sup>14</sup> Nikanintre angwane kukwe nakaninkä ño ño Jesubtä, yebtä nikani blite jökrä ji ngrabare. <sup>15</sup> Niaratre nämene näin blite jabe kwärikwäri angwane, Jesu ara jire käkwe krötäbare ken amne nikani gware bentre mda. <sup>16</sup> Jesu namani tuen ietre, akwa Ngöbökwe ñan Jesu mikani gare ietre. <sup>17</sup> Angwane Jesukwe niebare ietre:

¿Mun ye tä näin dre kädriere ji ngrabare ye? niebare kwe ietre.

Abtä namanintre nünaninkä moto ulire. <sup>18</sup> Angwane ni iti kädian nämene Cleofas käkwe niebare Jesuye:

¿Ni nämene kwati ngätäite ma nämene siba Jerusalén angwane kukwe rakakaba mukira, ye abko ma aibe ie gare ñakare ya? niebare kwe ie.

<sup>19</sup> Jesukwe niebare mda ie:

Dre nakaninkä niere tie, niebare kwe ie.

Niara käkwe niebare mda ie:

Kukwe rakakaba Jesu Nazarebotbä. Niara abko ni Ngöbökwe nikä amne di kribti nämene sribi kri nuene amne nämene blite kuin Ngöbökwe abko Ngöbök amne ni jökrä namani nütüre btä. <sup>20</sup> Akwa nitre blitaka Ngöbökbe ni mda mda diäre dänkientre amne nitre ütiäte ni israelita ngätäite käkwe kitani ngise nitre romanoboye müre ketadre amne metadre krusobtä abko erere nuenbare kwetre btä. <sup>21</sup> Niarakwe ni israelita dianditari nitre romanobo ngoto täni amne ni rabadi tikaninte abko nun nämene nütüre, aisetet nun nämene tödeke bti akwa, köbömära kukwe rakakaba kore btä nun okwäbti.

<sup>22</sup> Akwa mtare nitre merire tä nun ngätäite niki dekä doboibti angwane, nüta, kákwe nun ngwini nikenkä, <sup>23</sup> ñobtä ñan angwane janintre doboibti amne, Jesu ngwökä kuni ñakare ietre, akwa Jesu nürate nire, nini ietre angeletrekwe abko nü niereta gwi abtä nun nekwekä. <sup>24</sup> Angwane nun kukwe muko ruäre niki doboibti kukwe ye mike ñäräre, akwa nitre merire kákwe dre nini, ye kwrere täni bkänä btä nibitre, akwa Jesu turi ñakare kwetre abko tä nakedenkä. Abko kore se, niebare kwetre Jesuye.

<sup>25</sup> Angwane Jesukwe niebare mda ietre:

¡Mun ye ño amarebti mun töi braibe dikaro amne, nitre Ngöbö kukwei niekä kirakira abko mun ñan tä mike era! <sup>26</sup> ¿Ni Dianinkä Ngöböökwe ne mika ngämi ütiäte Ngöböökwe, känenkri ja tare nikadre kri kwe, nieta kore Ngöbö Kukweibtä, ye gare ñakare munye ya? niebare kwe ietre.

<sup>27</sup> Yebti tärä tikani Moisékwe nebebe tärä tikani kira nitre Ngöbö kukwei niekäkwe abko nämane blite ño ño Jesubtä, yebtä Jesukwe blitabare. <sup>28</sup> Yebti juta känti nikanintre ye känti namani angwane, Jesu jatani niken janknu ta bä mikani kwe, <sup>29</sup> akwa niaratré abko namani Jesu ketete nebe jabe jirekäbe, kä namani niere ie:

Kä kitera dere amne kä kite iko, aisetet ma raba jirekä nunbe nete, namani niere ie.

Ye erere Jesu nikani, namani gwi bentre.

<sup>30</sup> Yebti namanina täkänintbe mesabtä angwane, Jesukwe ban diani kundi kisete, kákwe kuin niebare btä Ngöböye, bti ñäkänintbe kwe, kákwe biani ietre. <sup>31</sup> Ye ngwane Jesu ara namani bentre gani kwetre, akwa Jesu abko kákwe ja ganinkäta okwäte. <sup>32</sup> Abtä niebare kwetre jae kwärikwäri:

¿Niara ki blite ji ngrabare nibe Ngöbö Kukweibtä angwane, kä nibi nuäre krübäte nibtä, aisetet ni nibi grükekä jökrä ngrabare niara kukwei nuare ñan ñan? namani niere jae kwärikwäri.

<sup>33</sup> Yebti jötrö ngwarbe Cleofas amne kukwe muko kwe nikaninta ja jiebti Jerusalén. Nikanintre nebebe Jerusalén angwane, nitre Jesu kukwei ngwianka ni jätäbti iti nämane ja ükaninkrö ni mda mdabe, <sup>34</sup> ye kákwe niebare Cleofas amne kukwe muko kwe ngäbti:

¡Jesu nükaninta nire bkänä! Niarakwe ja miri tuadre Simónye, niebare kwetre ietre.

<sup>35</sup> Angwane Cleofas amne kukwe muko kwe btä kukwe nakaninkä ño ji ngrabare abko niebare jökrä kwetre. Erere arato, Jesukwe ban ñäkänintbe bti angwane, Jesu nükaninta gare ietre, niebare kwetre.

### *Jesukwe ja mikani tuadre nitre ja kukwei ngwiankaye*

(Mateo 28.16-20; Marcos 16.14-18; Juan 20.19-23)

<sup>36</sup> Kukwe nakaninkä ño ño btätre, yebtä nämane blite, btäräbe Jesu nükaninbe niaratré ngätäite se kwrere, kákwe köbö ngwianintari krörö ietre:

Kä jáme Ngöböökwe raba munbtä, niebare kwe ietre.

<sup>37</sup> Angwane ni üaibe namani tuen ietre namanintre nütüre, aisetet namanintre nekwetekä krübäte. <sup>38</sup> Abtä Jesukwe niebare ietre:

¿Ñobtä muta töbike ngwarbe kwäräkwärä amarebti mun nibi nekwetekä krübäte dikaro ye? <sup>39</sup> Ti abko Jesu ara. Ti kise amne ti ngoto träin mike ñäräre munkwe amne, ti nuenbtä munkwe amne ti mike ñäräre munkwe, ñobtä ñan angwane ti ngätä amne ti kroko tärä, ye tuen angwane, ti ñakare ni üai gadi munkwe, ñobtä ñan angwane ni üai abko ngätä amne kroko ñakare, niebare kwe ietre.

<sup>40</sup> Niebare kore kwe ietre, ye btäräbe ja kise amne ja ngoto mikani tuadre kwe ietre.

<sup>41</sup> Akwa niaratré btä kä namani nuäre krübäte amne töi ñan namani krütare, aisetet namanina Jesu tuenta, akwa ñan namani nebe era kräke. Abtä Jesukwe niebare mda ietre:

¿Mrö tärä munkwe nete ya? niebare kwe ietre.

<sup>42</sup> Angwane gwa kukwani nämane kwetre abko oto biani kwetre Jesuye. <sup>43</sup> Jesukwe kani ngäbti, bti kwetani kwe niaratré okwäbti. <sup>44</sup> Bti niebare kwe ietre:

Ti ngämi krüte, känenkri ti nämane mun ngätäite angwane, kukwe rakadrekä ño ño tibtä abko tikwe nieba munye, mden erere namani bare tibtä. Kukwe Biani Ngöböökwe

Moiséye tä tikani tibta amne nitre Ngöbö kukwei niekä käkwe tärä tikani tibta amne Salmobtä tärä nämane tikani ño tibta, ye erere rabadi bare jökrä, tikwe nieba, mden erere namanina bare, niebare Jesukwe ietre.

<sup>45</sup> Yebti Jesukwe niaratre töi tikani Ngöbö Kukweibta mda, <sup>46</sup> käkwe niebare krörö ietre:

Ngöbö Kukweita tikani krörö tibta: Ti, Ni Dianinkä Ngöböökwe krütadi akwa köbömära angwane rükadita nire. <sup>47</sup> Angwane ni kä jökräbti käkwe kukwe käme kitadre temen, bti Ngöbö kadre ngäbti kwetre, Ngöböökwe niaratre ngite kukwe käme nuenbtä diandrekä mento btä abkokäre, ye abko tä tikani kore tibta Ngöbö Kukweibta. Kukwe ye diri rikadre ti käbti käne Jerusalén, bti kä mda mdabti. <sup>48</sup> Ne aisetekwe nakaninkä ño tibta, munkwe tuani ja okwä jenbti, ye munkwe kädrie ni mda mdabe. <sup>49</sup> Angwane ti Rünkwe ni köböi mikani munye abko tikwe juandi täte munbtä, akwa niara di kä käinbti rükadre täte jökrä munbtä, ye abko munkwe ngibia Jerusalén nete, aisetekwe mun raba jökrä nete. Abko kore se, niebare Jesukwe ietre.

*Ngöbö nikani Jesu ngwenante kä käinbti  
(Marcos 16.19-20)*

<sup>50</sup> Abti Jesu nikani ngwena juta Jerusalén bäre mento angwane, nikani nebe juta Betaniate. Ye känti Jesukwe kise kaninkä käin ja di biankäre ietre. <sup>51</sup> Jesu nämane ja di bien kore ietre, btäräbe Jesu jänikani kä käinbti se kwrere. <sup>52</sup> Yebti niaratre abko käkwe Jesu käkitaninkä yete, bti kä namani nuäre btätre amne nikaninta Jerusalén. <sup>53</sup> Yebti ju blitakrä Ngöböbe, känti namanintre Ngöbö käkitekä käre köbö kwatirekwatire abko nakaninkä kore se. Ne ngörä.

## Kukwe Kuin Jesubtä Tikani Juankwe Juan

Tärä ne abko tikani Juankwe. Juan nikani Jesu mukore nitre ja tötitaka ni jätäbti iti mda mdabe. "Ni iti ja tötitaka Jesube abko Jesu nämane tarere kri," abko tä tikani Juan 13.23; 19.26; 20.2; 21.7,20,24 ye känti. Ni ja tötitaka Jesube btä tä blite, ye abko Juan ara nütüta. Juan abko ni israelita amne Jesukwe niara btä etba kwe Santiago käräbare ja tötitikakäre jabe. Niara btä Santiago abko gwa gaka amne nämane nüne Nö Okwä Kri Galilea ken. Juankwe tärä ne tikani kä 80-90 angwane nütüta.

Ñobtä Juankwe tärä ne tikani abko Juan ara käkwe mikani gare nie Juan 20.30-31 känti kukwe krörö tä tikani: "Ni Dianinkä Ngöböökwe abko Jesu ara amne niara abko Ngöbö Odei, ye abko rabadre era munkrä amne munkwe tödekadre bti, abkokäre tikwe kukwe ne tikani," abko Juankwe tikani. Ngöbö abko Jesu Rün ara abko Juankwe mikani ütiäte tärä nebtä. Erere arato, Jesu amne Ngöbö, Jesu Rün, abko tä ketetibe gware abko Juankwe mikani ütiäte tärä nebtä.

Juan namanina unbre angwane, nitre romanobo käkwe niara kitani ngite kä butu kädianta Patmos yete. Juan nämane nüne yete ngwane, Jesukristo käkwe tärä kädianta Apocalipsis tikamna ie. Erere arato, tärä kädianta 1 Juan, 2 Juan amne 3 Juan abko tikani kwe arato.

### *Kristo jatani kä nebtä*

<sup>1</sup> Kena dekä, kä ne däte ngämi, känenkri ni kädekata Kukwe nämanena. Niara nämane nüne Ngöböbe amne niara abko Ngöbö ara arato. <sup>2</sup> Kena dekä kä ne däte ngämi, känenkri niara nämane ketetibe Ngöböbe. <sup>3</sup> Niara köböire Ngöböökwe jäandrän jökrä dätebare amne jäandrän ñakare jire chi abko niarakwe dätebare ñakare.

<sup>4</sup> Niara di nämanena ni mikakäre nire Ngöbökrä amne niara abko ñotra ni jökrä kräke abko krörö: ñotra käta ji metre mike gare nie kä ikote, ye kwrere niarakwe ji Ngöböökwe mikani gare nie. <sup>5</sup> Nita nüne mente Ngöböye amne nita nüne kä iko diablukwe te abko kräke ni kädekata Kukwe ye tä trä ngitiekä amne kä iko abko di ñakare kä trä ye ötatekrä.

<sup>6</sup> Bati ni nämane iti abko kädian nämane Juan Bautista. Ni ye abko Ngöböökwe juani <sup>7</sup> blitakäre käne angwane, kukwe gare ño ie ni ñotra kwrere yebtä, ye erere niedre kwe, ni jökrä käkwe tödekadre ni yebti abkokäre. <sup>8-9</sup> Juan ye abko juani käne Ngöböökwe blitakäre ni ñotra kwrere yebtä, akwa Juan abko ñakare ni ñotra kwrere. Akwa ñotra era metre tä trä ngitiekä ni jökräftä ji metre Ngöböökwe mikakäre gare ietre, ye abko jatanina nükke abko Juan jatani niere käne.

<sup>10</sup> Ni kädekata Kukwe ye abko käkwe jäandrän jökrä amne ni jökrä dätebare, akwa nükani kä nebtä nitre töi kämekämäe ngätäite angwane, niara abko ni jökrä ye dätekä ara abko ñan nükani gare ietre. <sup>11</sup> Nükani nüne mräkä kwe israelita ngätäite, akwa mräkä kwe käkwe kani ngäbti ñakare. <sup>12</sup> Akwa nire nire käkwe niara kani ngäbti käkwe tödekani bti, ye abko ie kä biani kwe rabakäre Ngöbö ngäbriänkäre. <sup>13</sup> Nitre tä Ngöbö ngäbriänkäre ye abko ñan ni därebare rün btä meyekwe, köböire tätre Ngöbö ngäbriänkäre. Erere arato, ñan rün btä meye töi köböire tätre Ngöbö ngäbriänkäre amne ñan ni brare tö namani meriye abko köböire tätre Ngöbö ngäbriänkäre, akwa ja töi jenbti Ngöböökwe mikani ja ngäbriänkäre.

<sup>14</sup> Ni kädekata Kukwe ye nämane Ngöbö känti. Ngöböökwe juani ni ngätäite, nükani därrere ni kwrere amne, ngrabare namani ni kwrere amne nünabare kwe ni ngätäite nete. Niara ütiäte kri bä nuäre, ye abko nunkwe tuaba. Niara abko Ngöbö Odei itibe amne Ngöbö niara Rün käkwe mikani ütiäte kri abko nunkwe tuaba. Ngöböökwe niara mikani ütiäte kri abko kwe niara moto namani kuin ni jökrä kräke amne kukwe era erere mikani gare kwe nie. <sup>15</sup> Niara ye mdenbtä Juankwe blitabare angwane, nikani ngrente krikri be, käkwe niebare krörö:

Ni se mdenbtä tikwe blitaba angwane, tikwe nieba krörö: Ni mda jatadi ti jiebti abko bări ütiäte ti ngwă, ñobtä ñan angwane niara abko nämanena nüne bări kăne tigrä, tikwe nieba, niebare Juankwe Jesubtä.

<sup>16</sup> Niarata ni tarere kri krübäte ja moto kuinbti, ye mdenbtä abko jändrän kuin biani kwe nie ja täritäri abko krörö: <sup>17</sup> Kukwe Biani Ngöbökwe nuendre nie, ye abko biani mekera kwe Moisés köböire, ye abko jändrän kuin biani ngwarbe kăne Ngöbökwe nikrä; akwa Ngöbö moto kuin ni kräke käta ni tarere amne tä kukwe era erere mike gare nie, ye abko namani bare era metre nikrä Jesukristo köböire, ye abko jändrän mdara jire bări kuin biani ngwarbe kwe nikrä. <sup>18</sup> Ne abko, ni ñakare jire iti kákwe Ngöbö tuani ja okwă jenbti, akwa Ngöbö Odei itibe tare kri kwe tä nüne ketetibe Rün kwebe. Niara abko Ngöbö ara arato abko kákwe Ngöbö mikani gare nie.

### *Ja ñakare Ni Dianinkä Ngöbökwe abko Juankwe niebare*

(Mateo 3.11-12; Marcos 1.7-8; Lucas 3.15-17)

<sup>19</sup> Juankwe blitabare Jesubtä angwane, kukwe nakaninkä krörö btä: Bati nitre israelita ji dokwătä nämane Jerusalén kákwe nitre blitaka Ngöböbe ni mda mda diäre amne nitre levita ju blitakrä Ngöböbe ye ngibabtikä juani ruäre, Juan abko Ni Dianinkä Ngöbökwe ya, ñakare ya ngwentari ie. Ye erere nikanintre nebe Juan känti, kákwe ngwianintari kore ie angwane, Juan kákwe kukwe niebare metre krörö ietre:

<sup>20</sup> Ti abko ñakare Ni Dianinkä Ngöbökwe, niebare kwe ietre.

<sup>21</sup> Abtä niebareta kwetre Juanye:

¿Ma abko nire amarebti? ¿Ni Ngöbö kukwei niekä kira juandre mda Ngöbökwe Ni Dianinkä Ngöbökwe känenkri kädian nämane Elías abko mare ya? niebare kwetre mda Juanye.

Angwane Juankwe niebare mda:

Ti abko ñakare Elías, niebare kwe ietre.

Angwane niaratre nikani kukwe ngwentari kisere mda Juanye, kákwe niebare ie:

¿Ngöbökwe ja kukwei niekä mdara jire Moisés kwrere juandre nieta Ngöbö Kukweibtä, ye abko ma ara ya? niebare kwetre.

Ñakare, niebare Juankwe ietre.

<sup>22</sup> Abtä niebareta kwetre Juanye:

Ma abko nire, ye makwe niedre nunye, ñobtä ñan angwane nitre nun juanka, kräke nun rikadre kukwe ngwenante, aisetate ma abko nire ye makwe niedre au jakrä abko erere nunkwe niedre, niebare kwetre Juanye.

<sup>23</sup> Abtä Juankwe niebare mda ietre:

Kira ni Ngöbö kukwei niekä kädian nämane Isaías kákwe niebare krörö:

Ni iti tä niken ngrente krikri kä kaibete, käta niken niere:

Ji ükateta kuin metre jrei kri kräke, ye kwrere jire ja mika juto ni Dänkien kăne munkwe. *Isaías 40.3*

Ni btä Isaíakwe blitabare abko ti ara, niebare Juankwe ietre.

<sup>24</sup> Angwane nitre bariseo juani ruäre abko namani yete siba <sup>25</sup> kákwe kukwe ngwianintari krörö mda Juanye:

Ma abko ñakare Ni Dianinkä Ngöbökwe, ma ñakare Elías amne ma ñakare ni Ngöbö kukwei niekä Moisés kwrere mata niere, ¿se ñobtä abko mata ni mda mda ngökö ñöte se? ¿Nirekwe kä biani mae ni ngökakäre ñöte se? niebare kwetre ie.

<sup>26</sup> Juankwe niebare mda ietre:

Tita mun ngökö ñö aibe te, akwa mun ngätäite nita iti abko gare ñakare munye. <sup>27</sup> Ni ye abko jatadi ti jiebti amne, ni klabore aibe käta sandalia tikete ni mdakrä, \* akwa ti abko bări ene ruen tie, aisetate ti abko ja ñan rükadre töre jire chi tie sandalia tikete ni ye ngotobtä, niebare kwe.

\* <sup>1:27</sup> sandalia tikete. Jesu näire ni klabore kökani ni mdakwe abko bări ene. Niaratre aibe nämane sandalia ni mdakwe tikete, aisetate Juan nämane ja bă mike bări ene ni klabore ngwă.

<sup>28</sup> Kukwe ye abko nakaninkä jökrä kore käkä Betábara känti Ñö Jordánbtä kä driri, Juan nämane ni ngökö ñöte ye känti.

#### *Jesu abko Kordero Ngöböökwe*

<sup>29</sup> Yebti jändrinane angwane, Jesu jatani Juan kukwäre, ye jatabare Juanye angwane, niebare kwe ni jökraye:

Kordero Ngöböökwe<sup>†</sup> kite tuen sete se. Se mike ñäraäre munkwe. Ni se mden ni ngite kukwe kämekäme nuenbtä Ngöbö rüere diankaka nibtä. <sup>30</sup> Ni se mden, btä ti nämane blite, käkwe nieba krörö: Ni mda jatadi ti jiebti abko bäri ütiäte ti ngwä, ñobtä ñan angwane niara abko nämanena nüne bäri käne tikrä, tikwe nieba angwane, <sup>31</sup> niara abko Ngöbö Odei ara ñan nämane gare tie, akwa rükadre gare juta israelitaye, abkokäre Ngöböökwe ti juani ni ngökö ñöte, niebare Juankwe.

<sup>32</sup> Erere arato, Juankwe kukwe niebare metre Jesubtä krörö:

Ngöbö Üai Deme nämane kä käinbtí jataba ütü kwrere timonkwäre, rikaba mate niarabtä, tikwe tuaba. <sup>33</sup> Akwa ye ngwane, niara abko Ngöbö Odei ngämi nüke gare tie, akwa Ngöbö ti juanka ni ngökö ñöte, ye käkwe niebare krörö tie: Ngöbö Üai rika timonkwäre angwane, raba mate nirebtä ma okwäbti, ni ye abko käkwe Ngöbö Üai Deme mikadi nüne nibtä, nieba kwe tie. <sup>34</sup> Ye erere tikwe Ngöbö Üai tuaba nüke btä, aise te niara abko Ngöbö Odei ara titi niere. Abko kore se, niebare Juankwe.

#### *Jesukwe nitre ja töitikaka ben käräbare*

<sup>35</sup> Yebti jändrinane angwane, Juan nämane ni ngökö ñöte, ye känti namaninta angwane, nitre nänkä Juanbe namani nibu ben yete. <sup>36</sup> Ye btäräbe Jesu jatani tuen dikekä Juanye se kwrere angwane, Juankwe niebare:

¡Kordero Ngöböökwe kite tuen sere se! niebare kwe nitre nibu ye okwäbti.

<sup>37</sup> Juankwe niebare kore, ye jarabare nitre nibu yeye angwane, nikani Jesu jiebti mda.

<sup>38</sup> Jesukwe mikaninta ñäraäre ja jiebti, käkwe niebare ietre:

¿Mun ye tö nibi dreye? niebare kwe ietre.

Angwane nitre nibu ye käkwe niebare mda:

Dirikä, ¿mata nüne mdente? niebare kwetre ie.

<sup>39</sup> Abtä Jesukwe niebare mda ietre:

Tita nüne mdente brän tuen, niebare kwe ietre.

Ye erere nikanintre angwane, Jesu nämane mdente ye abko tuani kwetre. Angwane ye näire ñänä okwä namaniña kräbkä dere amne niaratre namani Jesu känti ye näire dere.

<sup>40</sup> Ni nibu käkwe Juan kukwei nuani, nikani Jesu jiebti, ni ye abko iti kädian nämane Andrés. Andrés ye abko Simón Pedro etba. <sup>41</sup> Andrés nikaninta angwane, nikaninbe etba Simón känentari. Simón kwanintari ie angwane, niebare kwe ie:

Ni Dianinkä Ngöböökwe kädianta Kristo griegore, ye abko kwanba nunye, niebare Andrékwe Simónye.

<sup>42</sup> Yebti nikani Simón ngwena nebe Jesu känti. Simón ye jatabare Jesuye angwane, Jesukwe niebare ie:

Ma abko Simón. Ma Jonás ngobo, akwa mtare mentokwäre ma kä rabadi Cefas arato. Abko kore se, niebare Jesukwe Simónye. (Cefas abko käta “jä” niere kukwe arameore abko Pedro nieta griegore.)

#### *Jesukwe Felipe amne Natanael käräbare ja töitike jabe*

<sup>43</sup> Yebti jändrinane Jesu tö namani rikai kä Galileate, ye erere nikani mda. Namani yete angwane, namani ngätäi Felipebe angwane, niebare kwe ie:

Jakwe. Brän tibe, niebare kwe ie.

<sup>†</sup> <sup>1:29</sup> Kordero Ngöböökwe. Jesu bä mikani kordero kwrere, ñobtä ñan angwane bäri käne, Ngöböökwe kordero kämikamna nitre israelitaye kukwadre Ngöböye ja ngite ütiäre Pascua näire. Jesu nükani ja biankäre müre ketadre ni ngite ütiäre. Erere arato, kordero abko kwekbe, rüre ñakare ja dokwäre, ye kwrere Jesu nämane arato. Kukwe nebtä ñäke Isaías 53.7; Jeremías 11.19.

<sup>44</sup> Felipe ye abko Betsaidabo. Andrés amne Pedro abko Betsaidabo arato. <sup>45</sup> Jesukwe Felipe ngwiani jabe, yebti Felipe nikani Natanael känene mda. Kwani ie angwane, niebare krörö kwe ie:

Ni Dianinkä Ngöböökwe, ye kwanba nunye. Kukwe Biani Ngöböökwe Moiséye, yebtä Moisékwe tärä tikani niarabtä. Erere arato, nitre Ngöbö kukwei niekä mda mda kákwe tärä tikani niarabtä arato. Ni ye abko José Nazarebo ngobo. Niara abko kä Jesu, ye mden abko kwanba nunye, niebare kwe Natanaeliye.

<sup>46</sup> Abtä Natanaelikwe niebare mda:

¡Jo! Juta Nazaret käme. ¿Yete abko jäandrän kuin jatadre ya? niebare kwe Felipeye.

Angwane Felipekwe niebare mda ie:

Jakwe, brän. Makwe tua ja okwä jenbti, niebare kwe ie.

<sup>47</sup> Erere Natanael jatani nüke ja ken se kwrere, ye jatabare Jesuye angwane, Jesukwe niebare ie:

Ni israelita töi era metre kite nüke nete. Niara ne abko ni ngökö ñakare, niebare Jesukwe ie.

<sup>48</sup> Abtä Natanael kákwe niebare mda Jesuye:

¿Mdente ti nükani gare mae amarebti mata niere kore tie ye? niebare kwe ie.

Angwane Jesukwe niebare ie:

Felipe ngämi nüke ma kärere, ye känenkri tikwe ma turi täkänintbe higo krie täni sete, niebare Jesukwe mda ie.

<sup>49</sup> Abtä Natanael kákwe niebare Jesuye:

¡Dirikä, era bkänä ma abko Ngöbö Odei amne ma Jrei nitre israelitakwe! niebare mda kwe ie.

<sup>50</sup> Abtä Jesukwe niebare mda ie:

¿Higo krietäni tikwe ma turi täkänintbe, tikwe nini mae, ye aibebtä ti kukwei nibi era makrä ya? Makwe ti tuadi jäandrän bäri krikri nuene mda abko tita niere mae, niebare Jesukwe ie.

<sup>51</sup> Yebti Jesukwe niebareta mda:

Ti bike kukwe era erere niere krörö munye: Kä käinbti se munkwe tuadi tikani amne angele rabadi kite timonkwäre amne rabadi nikenta kukwäne abko rabadi nüke ti Ngöbö Odeibtä, Ngöböta tibe mikakäre gare abko Ngöböökwe bá mikadi tuare munye. Abko kore se, niebare kwe ietre.

## 2

### *Jesukwe ñö kwitani uba döire*

<sup>1</sup> Yebti mukirare angwane, ni iti kákwe ja mikani gure juta Canáte kä Galileate. Ye känti Jesu meye nämane arato amne, <sup>2</sup> Jesu käräbare arato nitre ja tötitikaka benbe, ni iti nämane ja mike gure ye känti. <sup>3</sup> Jesu nämane yete angwane, uba döi krütani. Abtä Jesu meye kákwe nieba ie:

Uba döi küre jire jökrä, nieba kwe Jesuye.

<sup>4</sup> Abtä Jesukwe nieba meyeye:

Mama tikwe, kä kitani ti käne abko ngämi nüke tie. ¿Ye ñobtä abko mata niere kore tie? nieba kwe ie.

<sup>5</sup> Angwane nitre näma uba döi dräire, ye ie Jesu meye kákwe nieba:

Niarakwe dre nuemna munye, ye erere munkwe nuen jökrä, nieba kwe ietre.

<sup>6</sup> Kä ye känti abko já dätebare ñö ngwäre näma kwä ti. Ye abko te nitre israelita nämane ñö köbötikakrä ja mikakäre dbe Ngöbö ngwäreökri üke. Já dätebare ñö ngwäre ye kwatirekwatire te ñö nämane nikken bäsí galon krä gre bti krä jätä jire abko näma yete. <sup>7</sup> Angwane nitre sribikä yete, ie Jesukwe nieba:

Já dätebare ñö ngwäre tä yete, ye te ñö keka munkwe, nieba Jesukwe.

Ye erere sribikä kákwe ñö kekaba jäandrän ye iti iti jökrä. <sup>8</sup> Angwane Jesukwe nieba mda ietre:

Mtare ñö den ruäre, mun rika ngwena. Nita mikani ji dokwäte bietabtä, ye ie munkwe bian, nieba kwe ietre.

Ye erere sribikätre käkwe nuenbare jökrä. <sup>9</sup> Angwane ñö nikwitani uba döire Jesu diebti ye ni ji dokwäte bietabtä käkwe bänän nuaba, akwa uba döi ye jatani mdenkri abko ñan rababa gare ie. Akwa nitre sribikä käkwe ñö diani ye aibe ie namani gare. Angwane ni ji dokwäte bietabtä, ye käkwe uba döi bänän nuaba, bti ni ja mikaka gure ye käräba kwe, <sup>10</sup> käkwe nieba ie:

Ni jökrä käta uba döi bäri kuinkuin keke käne ñadre, bti ni nübaibare bietabtä ye tärä uba döi ñaen kabre, ye ngwane uba döi ñakare kuin bianta mrä ñadre nie. Akwa ma abko käkwe uba döi bäri kuin abko ürü ñadre mrä. Ye abko bäri kuin, nieba kwe ni ja mikaka gure yeye.

<sup>11</sup> Jesukwe ñö kwitani uba döire juta Canáte Galilea ye abko sribi kri ñan tuabare nuenba kena Jesukwe Ngöbö nämane ben mikakäre gare. Yebtä abko Jesu ütiäte kri bää mikaba tuadre angwane, nitre ja tötitkaka ben käkwe tödekaba niarabti. <sup>12</sup> Yebti Jesu rikaba juta Capernaúmte mda angwane, niarameye rikaba siba ben. Erere arato, niara etbakantre amne nun ja tötitkaka ben rikaba siba, akwa nünanteba bää jötrö kwe juta Capernaúmte.

*Nitre jändrän rürümoinkä abko Jesukwe juanintari  
(Mateo 21.12-13; Marcos 11.15-18; Lucas 19.45-46)*

<sup>13</sup> Abti bieta kädianta Pascua nitre israelitakwe abko jatabara nüke ja ken, aisetet Jesu rikaba juta Jerusalénte mda. <sup>14</sup> Angwane Jesu rikaba ju blitakrä Ngöböbe känti. Ju ye bäre temen nitre näma nbi, obeja amne ütü rürümoine kukwadre Ngöbö käikitakakäre. Erere arato, nitre ngwian kwitakakwitaka näma täkänintbe mesabtä kä ye känti arato, <sup>15</sup> btä Jesu okwä rababa. Angwane Jesukwe kö känänba ruäre, bti kö ye mäkäteba kwe, bti rikaba nitre ye juentari jökrä obeja amne nbi kwekwe ben gware ju blitakrä Ngöböbe ye bäre mento se kwrere. Amne nitre ngwian kwitakakwitaka abko kän ngwian kitakaba jökrä tementa kwe se kwrere. Erere arato, mesa bti ngwian näma mikani ye kwitakaba jökrä temen kwe kän. <sup>16</sup> Angwane nitre ütü rürümoinkä abko ie nieba krörö kwe:

Jändrän noko denkä jökrä mento nete. Ju ti Rünkwe ye munkwe ñan mika jändrän rürümoinkrä jael nieba kwe ietre.

<sup>17</sup> Angwane nun ja tötitkaka Jesube, ie kukwe nämane tikani krörö Jesubtä Ngöbö Kukweibtä abko rükabata töre: “Tita ju makwe tarere kri krübäte Ngöbö, aisetet tita mokrere bti,” abko rükabata töre nunye.

<sup>18</sup> Nitre jändrän rürümoinkä juantariba jökrä kore Jesukwe angwane, nitre israelita ji dokwäte dokwäte näma yete, käkwe nieba ie:

Makwe jändrän nuni kore se abko nirekwe kä biani mae kukwe se nuenkrä, ye bää mike tuadre nunye nete, nieba kwetre Jesuye.

<sup>19</sup> Abtä Jesukwe nieba mda ietre:

Ju blitakrä Ngöböökwe ne abko dikente jökrä munkwe, bti mukirare angwane, tikwe mikadita täte, nieba kwe ietre.

<sup>20</sup> Abtä nitre israelita ye käkwe nieba mda Jesuye:

Joo! Kä gre ketebu bti kwä ti jire sribibare amne ju noko namani bare. ¿Se abko mukirare amne makwe mikareta jökrä täte mata niere ya? nieba kwetre Jesuye.

<sup>21</sup> Akwa Jesu abko käkwe ñäkäba kore, ye abko ja ngrabare bää mikaba kore kwe ju blitakrä Ngöböökwebtä. <sup>22</sup> Akwa Jesu kämikaba bti rükabata nire angwane, niarakwe blitaba ye nitre ja tötitkaka ben, ie niara kukwei rükabata töre angwane, Ngöbö Kukwei tikani ye rababa era kräke amne Jesu kukwei mikaba era kwetre arato.

<sup>23</sup> Angwane Jesu näma Bieta Pascuabtä Jerusalén, ye ngwane sribi kri ñan tuabare Jesu rababa nuene kabre Ngöbö nämane ben mikakäre gare, aisetet ni kwati käkwe niara kukwei mikaba era, käkwe tödekaba bti. <sup>24</sup> Akwa Jesu abko ie ni töi ño ño amne nita ja töi kwite jötrö gare jökrä, aisetet nitre näma yete, yebti Jesu näma tödeke ñakare. <sup>25</sup> Erere

arato, ni moto ño ño gare jökrä Jesuye, aisetē ni moto ño ño, ye ni ñakare jire iti kä rababa mike gare ie.

## 3

*Jesukwe blitabare Nicodemobe*

<sup>1</sup> Kä ye ngwane bati, ni bariseo ütiäte kri nämane iti abko kädian nämane Nicodemo. Niara näma sribire Sanedrinbe nitre israelitakrä. <sup>2</sup> Ni ye abko nikani deo Jesu känti mda, käkwe nieba ie:

Dirikä, mata sribi kri ñan tuabare nuene, yebtä abko Ngöbökwe ma juani dirire nunye abko nüke gare nunye, ñobtä ñan angwane ni btä Ngöbö di ñakare ñan raba sribi nuene jire chi ja di jenbtí au, mata nuene ye kwrere, nieba kwe Jesuye.

<sup>3</sup> Abtä Jesukwe nieba mda ie:

Ti bike kukwe era erere niere mae abko krörö: Ni brare ya, merire ya ñan däredreta bobukäre Ngöbö köböire angwane, Ngöbökwe ñan gobrandre bti, aisetē ñan nünandi kärekäre kwe Ngöböbe, nieba kwe ie.

<sup>4</sup> Angwane Nicodemokwe nieba mda Jesuye:

¿Ni tärä nebe unbreti ne kwrere abko däredreta ño amarebti mata niere kore tie ye?  
¡Ni unbreti ne kwrere ñan rabadre nikenta bobuta meyebtä, bti därereta bobu kore!

<sup>5</sup> Angwane Jesukwe nieba mda ie:

Ti bike kukwe era erere niere mae abko krörö: Ni brare ya, merire ya ñan däredreta bobukäre ñö köböire amne Ngöbö Üai köböire angwane, Ngöbökwe ñan gobrandre bti.

<sup>6</sup> Nita därrere ni rün, ni meye kä nebtäkwe, ye abko nita därrere niaratré kwrere; akwa nita därrere bobuta Ngöbö Üai köböire ye abko ni üai, ni töi amne ni moto tä neme btin.

<sup>7</sup> Akwa ti bike kukwe niere mae abko krörö: Ni jökrä däredre bobuta Ngöbö köböire, titä niere, nebtä makwe ñan töbika kri dikaro. <sup>8</sup> Ne abko, Ngöbö Üai abko müreta mate ye kwrere, ñobtä ñan angwane müre töta neme mata mdente mdente, ye känti tä mate. Ye abko, müre ngö tä ruen nie, akwa müre tä kite mdenkri amne tä niken mdente, ye tä nüke gare ñakare nie. Ye kwrere arato, nita därrere bobukäre Ngöbö köböire amne Ngöbö Üai tä sribire ño ño ni itire itire btä, ye tä nüke gare ñakare ni mda mdaye, akwa sribi kwe abko tuata btä, nieba kwe Nicodemoye.

<sup>9</sup> Angwane Nicodemo käkwe nieba mda Jesuye:

¿Ño köböire kukwe ye rabadre bare amarebti mata niere ye? nieba kwe Jesuye.

<sup>10</sup> Jesukwe nieba mda ie:

¿Ma dirikä kri nitre israelita ngätäite abko ie kukwe ne nüke gare ñakare ya? <sup>11</sup> Ti bike kukwe era erere niere mae: Kukwe gare kuin tie Ngöböbtä, yebtä titä blite amne tikwe kukwe tuani ja okwä jenbtí, ye titä niere munye, akwa ti kukwei mikata era ñakare munkwe. <sup>12</sup> Akwa kukwe kä nebtä btä titä blite mabe, ye abko tare ñakare, aisetē rükadre gare mae, akwa ti kukwei ñan tä nebe era makrä. ¿Ye abko, kukweta nakenkä kä käinbtí, yebtä tikwe blitadre abko makwe mikadre era ño ye? <sup>13</sup> Ni ngämi niken jire iti neme Ngöbö känti kä käinbtí abko raba blite kukwe yebtä, akwa ti Ni Kä Nebtä Ngobo kä käinbtí jatani nüke kä nebtä, aisetē ti raba blite kukwe nebtä mabe.

<sup>14</sup> Mdakäre abko, kira bronse sribebare tbire\* abko Moisékwe kaninkä kribtä käin kä kaibete nitre israelita bren bren käkwe mikadre ñäräre angwane, Ngöbökwe diandretari angwane ñan krütadre, ye kwrere ti Ni Kä Nebtä Ngobo ne rabadi kaninkä kribtä käin,

<sup>15</sup> nire nire käkwe tödekadre tibti abko Ngöbökwe dianditari angwane, nünandi kärekäre kwe Ngöböbe, abkokäre ti ne rabadi kaninkä kribtä käin.

<sup>16</sup> Ye kwrere ni Kä Nebtä Ngobo rabadi kaninkä käin, ñobtä ñan angwane Ngöbö ara käkwe ni jökrä tarebare kri krübäte, käkwe ja Odei itibe biani müre ketadre kräke, ni jökrä käkwe tödekadre Ngöbö Odei yebti angwane, ñan rabadre ganinte kärekäre Ngöbö okwä bäre mento, akwa nünandre kärekäre kwe Ngöböbe, abkokäre Ngöbökwe juani,

\* 3:14 bronse sribebare tbire. Dre nakaninkä abko tä tikani Números 21.4-9 yebtä.

<sup>17</sup> ñobtä ñan angwane ñan Ngöböökwe ja Odei juani ni kukwe kämekäme nuenkä Ngöbö rüere mikakäre ja tare nike, akwa niara köböire rabadre dianintari, abkokäre juani kwe. <sup>18</sup> Nire nire käkwe tödekadre Ngöbö Odeibti, ye abko ñan juandre kä ja tare nikakrä känti Ngöbö okwä bäre mento, akwa nire nire tä tödeke ñakare Ngöbö Odei itibe yebti abko Ngöböökwe kukwe ükaninante kräke amne juandi kwe kä ja tare nikakrä ye känti, ñobtä ñan angwane ñan tä tödeke Ngöbö Odeibti aisetet.

<sup>19</sup> Ngöböökwe kukwe ükaninte kore ni juankäre kä ja tare nikakrä känti, ñobtä ñan angwane Ngöbö Odei nükani ñotra kwrere kä nebtä Ngöbö mikakäre gare nie, akwa ni ruäre namani kä iko tarere, tö namani nünai janknu kä ikote, kukwe kämekäme nuenkäre janknu Ngöbö rüere, aisetet ñotra ye ñan kani ngäbti kwetre. <sup>20</sup> Ye abko, ni jökrä töi kämekäme abko mätäta neme ñotrabtä amne ñan töta neme rikai ñotra träte. Kukwe kämekäme nuenta kwetre Ngöbö rüere ye ñan gadre ni mda mdakwe, abkokäre töta neme ja rükainte kore kä ikote. <sup>21</sup> Akwa nire nire tä Ngöbö Kukwei kuin metre ye nuene era metre abko tä niken jáme neme ñotra träte, niarakwe sribi kuin nuenbare Ngöbö köböire, ye ni jökrä käkwe gadre nuäre, abkokäre tä niken jáme ñotra träte.

### *Juan Bautista käkwe blitabare Jesubtä*

<sup>22</sup> Abti Jesu näma Jerusalén, rikabata nun ja töitikaka benbe kä Judea käntita, känti rababa nünentbe bä jötrö nunbe angwane, nun näma ni mda mda ngökö ñöte ben. <sup>23</sup> Angwane Juan Bautista abko nämane ni ngökö ñöte arato kä Enónte käname kä Salim ken, ñobtä ñan angwane kä ye känti abko ñö okwä nämane kabre. Ye ngwane, ni nämane kite köbö kwatirekwatire amne Juan namani ngökö ñöte. <sup>24</sup> Ye ngwane abko, Juan kita ngämi ngite kä teri angwane, kukwe ye rakakaba kore. <sup>25</sup> Akwa ja bä mikadre ñodbe ñöbti Ngöbö ngwärekri diribare nitre israelitakwe, yebtä ni ruäre nänkä Juanbe abko käkwe ja kwetani nitre israelita ruäre ben. <sup>26</sup> Bti nikani, käkwe niebare Juanye:

Dirikä, ni näma iti mabe Ñö Jordánbtä sekri sete, btä makwe blitaba, ni ye abko tä ni mda mda ngökö ñöte arato amne ni jökrä nibi niken niara känti, niebare kwetre ie.

### *27 Abtä Juankwe niebare ietre:*

Ngöböökwe ñan jäandrän biandre angwane, ni ñan rabadre jäandrän bkäne, <sup>28</sup> aisetet munkwe ti kukwei nuaba, kukwe era erere tikwe nieba krörö: Ti abko ñakare Ni Dianinkä Ngöböökwe, akwa Ni Dianinkä Ngöböökwe ye rükadre abko känenkri ti juani kwe, tikwe nieba metre munye. <sup>29</sup> Yebtä ti bike kukwe bä mike jadtä amne Jesubtä munye abko krörö: Ni iti tä niken ja mike gure angwane, ni ja mikaka gure ye abko ni merire rabadre ben, ye abko kwe. Akwa ni ja mikaka gure ye kukwe muko tä käname käkwe ni ja mikaka gure ye kukwei nuadre blite angwane, kä rabadre nuäre kri krübäte btä. Ye kwrere kä nena nuäre kri tibtä mtare, ñobtä ñan angwane Jesu abko ni ja mikaka gure kwrere amne ti abko kukwe muko kwrere aisetet. <sup>30</sup> Niara rika neme bäri ütiäte, ie Ngöbö tö amne ti abko jatadre nementa ütiäte ñakare, ie Ngöbö tö arato. Abko kore se, niebare Juankwe ietre.

<sup>31</sup> Jesu kä käinbti jatani abko bäri ütiäte ni jökrä bti ta; akwa ni därebare kä temenbtä Juan Bautista kwrere, ye ie kukwe kä temenbtä aibe gare, aisetet jäandrän kä temenbtä aibebtä blitata kwe. Akwa ni kä käinbti jatani ye abko bäri ütiäte ni jökrä bti ta. <sup>32</sup> Ni kä käinbti jatani käkwe jäandrän tuani amne kukwe nuani kwe kä käinbti, yebtä tä blite, akwa ni kwati ñan tä niara kukwei mike era. <sup>33</sup> Akwa nirekwe niara kukwei mikadre era angwane, Ngöbö abko tä kukwe era metre niere abko mikata gare ni mda mdaye, <sup>34</sup> ñobtä ñan angwane ni juani Ngöböökwe, ye abko tä Ngöbö kukwei era niere, ñobtä ñan angwane Ngöböökwe ja Üai mikani täte jökrä btä, aisetet tä blite kore. <sup>35</sup> Ni juani Ngöböökwe abko Ngöbö Odei amne, Ngöböta ja Odei tarere amne jäandrän jökrä mikani gare kwe ie. <sup>36</sup> Ye aisetet, nire nire käkwe tödekadre Ngöbö Odeibti ye käkwe nünandi kärekäre Ngöböbe, akwa nire nire käkwe trö kwitadre Ngöbö Odeiye ye abko käkwe ñan nünandre kärekäre Ngöböbe, akwa Ngöböökwe mikadi ja ngie nuen tare krübäte kärekäre.

## 4

*Jesukwe blitabare meri Samariabobe*

<sup>1</sup> Yebti ni rababa niken bări kwati mda Jesu jiebti amne Jesu rababa ni ngökö bări kwati ñöte Juan Bautista ngwä abko gani nitre bariseokwe. <sup>2</sup> (Akwa Jesu ara jire abko näma ni ngökö ñakare ñöte, akwa nun ja tötitaka Jesube abko näma ni ngökö ñöte Jesu diäre.) <sup>3</sup> Nitre bariseo kákwe kukwe gani kore Jesubtä, ye gaba ni Dänkienkwe angwane, niara näma kä Judeate, känti kä mikakaba kwe, bti rikabata Galileate mda. <sup>4</sup> Akwa rikadre kä Samariate ta, <sup>5</sup> aisetet juta kä Sicar kä Samariate, känti Jesu rikaba nebe. Kira abko Jacobokwe kä biani ngobo Joséye, ye abko näma känime juta Sicar ken <sup>6</sup> amne, ñö okwä Jacobokwe näma yete, ye känti Jesu rikaba. Akwa Jesu rababa dräre dikaka kisete, abtä rababa täkänintbe ñö okwä ye känti. Ñänä jataba nüke ruäre kain angwane, Jesu rababa täkänintbe yete. <sup>7-8</sup> Akwa nun ja tötitaka ben abko rikaba mrö kökö jae jutate, aisetet Jesu näma kaibe yete. Ye btäräbe meri Samariabo jataba nüke iti ñö okwäte yete ñö den jae angwane, Jesukwe niebare ie:

Ñö ngwen chi tomnane tie, niebare kwe meri yeye.

<sup>9</sup> Akwa ni israelita abko ja gete ñakare jire chi nitre Samariabobe, aisetet meri ye namani töbige kri Jesu kukweibtä, kákwe niebare krörö mda ie:

Nitre israelita tä ja gete ñakare jire chi nun Samariabobe, ¿ye ñobtä abko ma israelita amarebti ti Samariabo abko ie ma kite ñö kärere ñadre jae ye? niebare kwe Jesuye.

<sup>10</sup> Abtä Jesukwe niebare mda ie:

Jändrän kuin tä makrä Ngöböökwe amne nireta blite mabe, ye rabadre gare mae angwane, makwe ñö nire<sup>\*</sup> kärekäre ye kärädre tie amne tikwe biandre mae, niebare Jesukwe ie.

<sup>11</sup> Angwane meri ye kákwe niebare Jesuye:

Jändrän ñakare ñö diankakrä mae amne ñö okwä noko mente nguse, ¿se abko ñö nire kärekäre makwe diandre mdente tikrä se? <sup>12</sup> Mdakäre abko, nun mräkä kira Jacob kákwe ñö okwä noko mikaninte nunkrä amne niarakwe ñö noko ñani. Erere arato, niara ngäbriänkä amne jändrän kwekwe kákwe ñö noko arabe ñani. ¿Akwa mtare abko ja ruen bări Jacobokrä mae ya? niebare kore kwe mda ie.

<sup>13</sup> Abtä Jesukwe niebare mda ie:

Ni jökrä käta ñö noko ñaen abko ie tomna tä nementa. <sup>14</sup> Akwa ñö bianta tikwe ye abko nire nire kákwe ñadre abko ie tomna ñan rabadreta jire mda, ñobtä ñan angwane tikwe ñö biandre abko ñadre kwe, ñö ye abko rabadi neen kärekäre btä, kákwe mikadi nüne kärekäre Ngöböbe, niebare kwe meri yeye.

<sup>15</sup> Angwane meri ye kákwe niebare mda Jesuye:

Tomna ñan rabadreta mda tie amne ti ñan jatadreta ñö mda denta jire chi nete, abkokäre ñö nire kärekäre bianta makwe, mata niere, ye ari bien tie, niebare kwe ie.

<sup>16</sup> Angwane Jesukwe niebare mda ie:

Nän ma kwäräi kärere, ben ma jatata nete, niebare kwe ie.

<sup>17</sup> Abtä meri ye kákwe niebare mda ie:

Ti kaibe. Ti kwäräi ñakare, niebare kwe Jesuye.

Jesukwe niebare ie:

Ma kaibe, ma kwäräi ñakare makwe nini, ye abko kukwe era erere nini kuin makwe, <sup>18</sup> ñobtä ñan angwane makwe ja kwäräi mikanina nirike jire amne, mtare mata ni brare mdara jire ben, akwa munkwe ñan ja mikani gure metre, aisetet ma gure ñakare, makwe nini metre kore, niebare kwe meriye.

<sup>19</sup> Jesukwe ñäkäbare kore meri yeye angwane, meri ye kákwe niebare mda ie:

Ti Dänkien, ma abko ni Ngöbö kukwei niekä era metre nibi tuen tie. <sup>20</sup> Akwa nun mräkä Samariabo kirakira kákwe Ngöbö käkitaninkä ngitio nehti, akwa nun rikadre Ngöbö käkitekä juta Jerusalénte abko mun israelita tä niere, niebare kwe Jesuye.

\* 4:10 Ñö nire käta nüne kärekäre Ngöböbe bă mike.

<sup>21</sup> Angwane Jesukwe niebare mda ie:

Meri, ti kukwe mike era makwe. Kä nükera angwane, munkwe ni Rün Ngöbö käikitadikä mdente erere rabadidbe Ngöbökrä, aisetemun rikadre käname ngitio Gerizim nokobti ya o mun rikadre Jerusalén Ngöbö käikitakakäre, ye abko ñan rabadre ütiäte. <sup>22</sup> Mdakäre abko, Ngöbö gare ñakare metre mun Samariaboye, aisetemunta nire käkitekä ye gare ñakare metre munye; akwanun israelita abko käta nire käkitekä, ye gare metre nunye, ñobtä ñan angwane ni diantarikä abko jatadi nun israelitakri. <sup>23</sup> Akwanitare kä jatadi amne kitera nüke angwane, nire nire tö Ngöbö käikitakä ye abko käkwe nuendi era metre Ngöbö Kukweita dirire ye kwrere amne Ngöbö Üai köböire. Ni Ngöbö käikitakaka kore abko Ngöböta känenjakrä, <sup>24</sup> ñobtä ñan angwane Ngöbö abko üai, ye aisetemire nire tö Ngöbö käikitakä abko käkwe nuen era metre Ngöbö Kukweita dirire ye kwrere amne Ngöbö Üai köböire. Abko kore se, niebare kwe meri yeye.

<sup>25</sup> Abtä meri ye käkwe niebare mda Jesuye:

Ni Dianinkä Ngöbökwé (kädekata Kristo kukwe griegore) abko rükadre, ye garera tie amne, niara rükadre angwane, kukwe era erere niedi jökrä kwe nunye kukwe nebtä, niebare kwe ie.

<sup>26</sup> Angwane Jesukwe niebare mda ie:

Ni btä mata blite ye abko ti ara. Ti ne mdentä käta blite mabe ye, niebare mda kwe ie.

<sup>27</sup> Ye btäräbe nun ja töitikaka Jesube jataba nüketa angwane, Jesu nämane blite meribe, yebtä nun ñan töi rababa krütare. Akwaneriyeyet abko tö namani dreye amne Jesu nämane dre kädriere ben abko nin ja rükaba töre jire nunye ngwentari ie.

<sup>28</sup> Akwaneriyeyet käkwe kantra mikateba, bti rikabata jutate, käkwe niebare nitre jutate yeye:

<sup>29</sup> Tikwe kukwe nuenbare kaibe tiebe, ye abko ni iti käkwe nini jökrä tie, aisetemire abko Ni Dianinkä Ngöbökwé ruen tie abko mun jakwe tuen, niebare kwe.

<sup>30</sup> Abtä nitre nünanka juta yete jataba jökrä Jesu känti. <sup>31</sup> Akwanitre jutate jataba, ye ngämi nüke Jesu känti, känenkri nun ja töitikaka Jesube rababa niere ie:

Dirikä, mrö kwete chi, nun näma niere ie.

<sup>32</sup> Akwaneriyeyet:

Mrö tärä keteti kwetadre tie abko gare ñakare munye, nieba kwe nunye.

<sup>33</sup> Angwane nun ja töitikaka ben rababa niere krörö jae kwärikwäri:

¿Ni mda nära mrö ngwena kwetadre ie ya ño yere? nun rababa niere jae kwärikväri.

<sup>34</sup> Akwaneriyeyet abko käkwe niebata mda nunye:

Ngöbö ti juanka tö dreye tikrä amne sribi ye abko tikwe mikadre bare täte jökrä, ye abko mrö kwrere tikrä. <sup>35</sup> Mdakäre abko, mun abko tä niere: Kä tä sö kräbkä jire nura ngwä ötakrä, mutta niere. Akwaneriyeyet jökrä kä nebtä abko tire Ngöbökwé amne nire nire tä juto biare tödeke tibti abko nura nena biare ötadre kwrere, aisetemira nura tirete ye nena biare ötadre, ye munkwe mika ñäräre abko tita niere munye. <sup>36</sup> Mtare, nire nire tä biare tödeke tibti, ye nitre nura ngwä ötakä tä ngwena tödekekäre tibti abko ie sribi ütiä bianta. Erere arato, nitre nura ngwä ötakä käta ni jökrä ngwena tie tödeke tibti, rabadre nüne kärekäre abkokäre. Yebtä abko ni nura nökaka käta Ngöbö Kukwei mike gare ni mda mdaye amne ni juto biare tödeke tibti, ye nitre nura ngwä ötakä käta ngwena tödeke tibti käkwe kä ngwiandre nuäre gware jabtä abkokäre. <sup>37</sup> Ye abko, kukwe nieta krörö: Ni iti käta nura nökö, akwaneriyeyet abko käta ngwä ötö, abko nieta metre kore. <sup>38</sup> Ye kwrere, munkwe nura nökani ñakare tare, akwaneriyeyet mun juanba nura ngwä ötö. Ni mda mda käkwe sribibare kri sribi Ngöbökwetä amne mun abko nikani jirekäbe sribi kwekwe ngwä ötö. Abko kore se, nieba Jesukwe nun ja töitikaka ben yeye.

<sup>39</sup> Jesu nämane juta Sicar yete angwane, ni kwati Samariaboye nünanka yete käkwe tödekanji Jesubti, ñobtä ñan angwane meri ben Jesukwe blitabare ye abko namani niere: Ni menteni gare ñakare tie, akwaneriyeyet nuenbare kaibe tiebe tikwe abko nini metre jökrä kwe tie, niebare kwe. Yebtä ni kwati käkwe tödekaba Jesubti. <sup>40</sup> Yebtä nitre Samariaboye rükaba Jesu känti angwane, Jesu rabadre basare ietre abko rababa ribere

kisere ie, ye erere Jesu rababa köböbu juta Sicar yete. <sup>41</sup> Angwane ni kwati käkwe niara kukwei nuaba, abtä ni kwati käkwe tödekaba bti. <sup>42</sup> Angwane nieba krörö kwetre meri yeye:

Mtare ñan kukwe nieba makwe jabtä nunye aibe köböire niara mikata era nunkwe, akwa nun ara jire käkwe niara kukwei nuri blite, aisetet niara abko ni jökrä töi kämekämë Ngöbö rüere Diantarikä abko nena gare era metre nunye, amne niarabti nulta tödeke, nieba kwetre meri yeye.

*Sribikä jreikrä abko ngäbäkre kwe Jesukwe mikaninta kuinta  
(Mateo 8.5-13; Lucas 7.1-10)*

<sup>43</sup> Yebti kä rikaba köböbu ta angwane Jesu näma juta Sicar, rikabata kä Galileate mda. <sup>44</sup> (Akwa käre Jesu ara jire näma niere krörö jabtä: Ni Ngöbö kukwei nieka abko mikata ütiäte ñakare ja käite, näma niere.)

<sup>45</sup> Akwa Jesu rababa kä Galileate angwane, nitre nünanka yete käkwe kaba ngäbti kuin, ñobtä ñan angwane niaratre jananbare arato Bieta Pascuabtä Jerusalén angwane, Jesukwe sribi kri ñan tuabare nuenbare ye abko tuani jökrä kwetre amne tö namani tuai mda, aisetet kaba ngäbti kuin kwetre.

<sup>46</sup> Jesu rikaba nebe juta Canáte kä Galilea yete. Juta Caná känti Jesukwe ñö kwitani uba döire, ye känti rababata. Angwane abko ni näma iti sribikä ütiäte kri jreikrä abko kän ngäbäkre näma bren dikaro juta Capernaúmte. <sup>47</sup> Angwane Jesu nämane kä Judeate abko nükantina kä Galileate abko sribikä ütiäte jreikrä ye käkwe gani angwane rikaba ja tuakäre Jesube. Rükaba Jesu känti, ñobtä ñan angwane ngäbäkre kwe nämane bren jume dikaro amne jatanina krüte, aisetet rababa Jesu ngwen kisere neme ja gwiriete ngäbäkre ye mikakäreta kuinta. <sup>48</sup> Abtä Jesukwe nieba ni jökrä näma yete ie:

Sribi ñan tuabare nuenta tikwe, Ngöböta tibe bä mikakrä, ye ñan rabadre bare Ngöbö diebti tie angwane, mun nünanka nete ye käkwe ñan tödekadre jire chi tibti, nieba kwe ietret.

<sup>49</sup> Akwa sribikä ütiäte jreikrä ye käkwe nieba mda Jesuye:

Nane ngäbäkre tikwe krüta tikän, ye känenkri brän jötrö ti känti, nieba kwe ie.

<sup>50</sup> Angwane Jesukwe nieba mda ie:

Ma ngobo rabadita kuinta, aisetet nänta ja gwiriete, nieba kwe ie.

Angwane ni ye käkwe Jesu kukwei mikaba era, aisetet rikabata ja jiebti. <sup>51</sup> Nämane dikedä ji ngrabare ja jue kukwäre angwane, nitre sribikä kwe jatani, nükani ngätäi ben, käkwe niebare ie:

jNgäbäkre makwe nibirate kuinta! niebare kwetre ie.

<sup>52</sup> Abtä niarakwe niebare mda:

Kä nuäi angwane ja ki ruenta mobe ie, niebare kwe.

Jändrin, ñänä okwä krati dere angwane, drangwan rikaba btä, niebare kwetre ie.

<sup>53</sup> Angwane ñänä okwä ye näre dere Jesukwe niebare krörö ngäbäkre rün yeye: Ma ngobo rabadita kuinta, niebare kwe ie, ye abko nükantina töre ie amne niara btä mräkä kwekwe erere käkwe tödekani jökrä Jesubti.

<sup>54</sup> Ne abko Jesu näma kä Judeate, rükabata Galileate angwane, sribi kri ñan tuabare nuenba bobukäre kwe Ngöbö nämane ben bä mikakäre.

*Jesukwe ni bren mikaninta kuinta ñö okwä Betesda känti*

<sup>1</sup> Yebti köbö mdara jire te, nitre israelita jataba bieta mda nuene Ngöbö käkitakakrä angwane, Jesu rikabata Jerusalén mda. <sup>2</sup> Angwane Jerusalén yete abko jukweta kwati abko kädianta Jukwe Obejakwe. Käntime jukwe ye ken ñö okwäta kwati abko kädianta Betesda hebreore amne jukäta kwärike ñö okwä ye bäre temen. <sup>3</sup> Jukä ye täni ni bren bren näma kwati abko krörö: Ni okwä kä drünente, ni nakwente amne ni ruen ñakare ngrabare aisetet dikedä ñakare abko näma kitanintbe tementa yete. [Ñö ye abko nämane ngibiare kisere, <sup>4</sup> ñobtä ñan angwane nane nane angele nämane kite timonkwäre, kä

nämane ñö mike ngrenkä angwane, ni bren rikadre käne ñöte abko rabadreta kuinta, aisetet nämane ñö ngibiare kisere.]<sup>\*</sup> <sup>5</sup> Ni bren bren ye ngätäite abko ni näma iti abko nikani bren kä kwä gre bti kwä jätäbti kwä kwära abko näma siba. <sup>6</sup> Ni ye näma kitaintbe temen yete, btä Jesu okwä rababa angwane, kä raire niara nikani bren nike abko ben nämane nüke yete abko Jesukwe gaba btä angwane, nieba kwe ie:

<sup>7</sup> Ma tö rabaita kuinta ya? nieba Jesukwe ie.

<sup>7</sup> Angwane ni bren ye käkwe nieba mda Jesuye:

Ti Dänkien, ñö okwä se tä kite ngrenkä batire batire kukwäne angwane, ni mda ñakare ti mikaka te, aisetet käre ti töta neme rikai ñö okwä nokote angwane, ni mda tärä niken käne te, aisetet käre titä nemente ye, nieba kwe ie.

<sup>8</sup> Angwane Jesukwe nieba mda ie:

Näin krö, jänkwata makwe ye den kisete, ben ma rika dikekä, nieba Jesukwe ie.

<sup>9</sup> Ye btäräbe ni ye rababata kuinta batibe, käkwe jänkwata jakwe dianba kisete, bti rikaba dikekä kwäräkwärä se kwrere. Akwa ye näire abko köbö jadükakrä te ni ye rababata kuinta. <sup>10</sup> Ye aisetet ni bren rababata kuinta, ye ie nitre israelita ji dokwäte käkwe nieba:

Köbö jadükakrä mtare, ye te makwe jänkwata makwe ye ngwiandre ñakare jire, <sup>11</sup> ye ñobtä mata ngwena ye? nieba kwetre ie.

<sup>11</sup> Abtä ni ye käkwe nieba nitre israelitaye:

Ni ti mikakata kuinta käkwe nini krörö tie: Jänkwata makwe ye den kisete, ben nän dikekä, nini kwe tie, erere titä nuene, nieba kwe ietre.

<sup>12</sup> Angwane nitre israelita ji dokwäte ye käkwe nieba mda ni yeye:

Jänkwata makwe ye den kisete, bti nän dikekä, ye nirekwe nini mae? nieba kwetre ie.

<sup>13</sup> Akwa nirekwe mikabata kuinta abko ñan rababa gare ie, ñobtä ñan angwane Jesukwe niara mikaninta kuinta angwane, ni näma kwati, ye känti Jesukwe kä mikakaba kä bube ngware. <sup>14</sup> Yebti ni bren mikabata kuinta Jesukwe ye näma ju blitakrä Ngöböbe känti abko kwanba Jesuye angwane, Jesukwe mäträba btä, käkwe nieba ie:

Tuen, mtare ma nenante kuinta Ngöbö diebti, akwa nane kukwe mda rakaka bari tare mabtä, ye ngäniene makwe ñan ja mika ngite Ngöbö rüere mda, nieba kwe ie.

<sup>15</sup> Angwane batibe Jesukwe niara mikaninta kuinta, ye abko rikaba, käkwe niebare nitre israelita ji dokwäte yeye.

### *Ngöbö Odei köböire ni raba nüne kärekäre Ngöböbe*

<sup>16</sup> Ye kwrere Jesu näma sribi nuene köbö jadükakrä näire, abtä nitre israelita ji dokwäte rababa näin kisere Jesu rüere. <sup>17</sup> Akwa blitaba kwetre Jesube angwane, Jesu abko käkwe nieba krörö ietre:

Ti Rün tikwe tä sribire käre abti kä nüke mtare abko erere titä sribire arato, nieba kwe ietre.

<sup>18</sup> Nebtä abko bari nitre israelita ji dokwäte tö rababa Jesu müre ketai mda, ñobtä ñan angwane köbö jadükakrä ye abko Jesu ñan namani mike ütiäte jae, namanintre nütüre. Bärire mda abko, Ngöbö abko ja Rün jakwe Jesu rababa niere, yebtä abko Jesu näma ja mike Ngöböre abko dokwäre tö rababa Jesu müre ketai.

<sup>19</sup> Angwane Jesukwe nieba mda ietre:

Kukwe era erere ti bike niere munye: Ti, Ngöbö Odei ne ñan raba jändränuene jire chi ja töi jenbti, akwa ti Rün dre dre nuene, ye erere ti Ngöbö Odei tä nuene, ñobtä ñan angwane jändränuene jökrä nuenta ti Rünkwe ye erere titä nuene. <sup>20</sup> Ye ñobtä ñan angwane ti Rün käta ti niara Odei tarere amne ti Rün käta dre dre nuene, ye erere tä mike gare jökrä tie. Ye abko, ni bren mikaninta kuinta tikwe, yebti ta sribi bari krikri ñan tuabare munkwe abko ti Rünkwe mikadi tuadre munye ti köböire, abtä mun ñan töi rabai krütare.

<sup>21</sup> Ti Rün käta ni krütani miketa nire amne tä nebe nünenta, ye kwrere arato ti, Ngöbö Odei ne tö rabadre nire nire mikaita nire, ye erere tikwe mikadita nire. <sup>22</sup> Ti Rün käta

\* 5:4 Kukweta tikani corcheta ngätäite abko ñan tä tikani manuscrito bari kuinkuin btä.

kukwe ükete ñakare ni kä nebtä kräke, akwa ti Ngöbö Odei ne kisete sribi mikani kwe, kukwe ükatekäre kä mrä angwane ni kä nebtä kräke,<sup>23</sup> ni jökrä käta ti Rün mike ütiäte kri, ye kwrere ti, Ngöbö Odei ne mikadre ütiäte kri kwetre amne käkitadrekä kri kwetre arato, abkokäre kä biani kwe tie kukwe ükatekäre. Ye abko, nire nire kákwe ñan ti Ngöbö Odei ne mikadre ütiäte jae, ye ngwane ti Rün kákwe ti juani ye mikata ütiäte ñakare kwetre arato.

<sup>24</sup> Kukwe era erere ti bike niere mda munye abko krörö: Tita blite ye nire nire tä kukwe nuen amne tä ketete ja olete amne ni ti juanka, yebti tä tödeke, ni ye abko tä neme nünenta kärekäre Ngöböbe amne Ngöbökwе ñan juandi kä ja tare nikakrä känti, ñobtä ñan angwane niara ngämi tödeke tibti, känenkri nämane ni ngwákäre kwrere, akwa tödekabtä tibti nükani nire kena. <sup>25</sup> Akwa kukwe mdara jire era erere ti bike niere munye abko kä kitera nüke mtare angwane, ni ngwákäre ie ti Ngöbö Odei kukwei jaradi angwane, nire nire kákwe ti Ngöbö Odei kukwei nuadre, bti tödekadre kwe tibti, ye abko rabadi nuñe kärekäre Ngöböbe,<sup>26</sup> ñobtä ñan angwane Ngöbö di tärä ni mikakrä nire, ye kwrere arato kä biani kwe tie ni mikakäreta nire. <sup>27</sup> Erere arato, kä biani täte jökrä kwe tie kukwe ükatekäre ni mda mda kräke, ñobtä ñan angwane ti abko Ni Kä Nebtä Ngobo, aise te kä biani kwe tie sribi ne nuenkäre.

<sup>28</sup> Tita kukwe niere, yebtä munkwe ñan töbika krübäte dikaro, ñobtä ñan angwane kä jatadi köbötira jire abko te ni krütani doboi mikani, ie ti Ngöbö Odei ne kukwei jaradi dobobi angwane,<sup>29</sup> rükadita nire jökrä. Akwa nire nire kákwe sribi nuenbare kuin Ngöbökrä abko rükadita nire nünakäre kärekäre Ngöböbe amne, nire nire kákwe kukwe nuenbare käme Ngöbö rüere abko rükadita nire ja tare nikakäre kärekäre Ngöbö okwä bäre mento. <sup>30</sup> Mdakäre abko, ti ñan raba kukwe nuene jire chi ja töi jenbti, aise te ti Rünta kukwe ükatemna ño tie ni mda mda kräke, ye erere tita ükete. Amne tita kukwe ükete kuin metre, ñobtä ñan angwane ti ñan tö kukwe nuein jire chi ja töi jenbti kä ngwiankrä nuäre jabtä, akwa ti tö ti Rün ti juanka moto mikai nuäre, aise te niara töta neme dreye, ye erere tita nuene.

### *Kukwe niebare Jesu kräke*

<sup>31</sup> Mdakäre abko, ti aibe kákwe blitadre jakrä au, ye ngwane ti kukwei ñan rabadre tuen metre munye,<sup>32</sup> akwa ti Rün arato tä kukwe era erere niere tikrä arato. Niara abra tä kukwe niere metre tibtä abko gare kuin tie.

<sup>33</sup> Ye abko, batı munkwe ni juani kukwe ngwentari Juan Bautistaye angwane, Juankwe blitabare kuin era metre kukwe erabtä tikrä.<sup>34</sup> Ye abko, ñan ni mda mda kákwe blitadre tikrä abko ütiäte tikrä, aise te Juankwe blitabare abko tita niereta. Akwa Juankwe kukwe niebare tibtä, ye munkwe mikadre era, köböire mun rabadre dianintari, abkokäre tita Juan kukwei niereta munye.<sup>35</sup> Juan abko nükani ñotra kwrere abkoträ namani ngitiekä mun ngätäite, kä namani kukwe era erere niere tibtä angwane, bä jötrö mun tö namani käi ngwen nuäre jökrä jabtä Juan kukwei nuare abti mun ñan tö namani kukwei nuai mda.

<sup>36</sup> Akwa ni mda mda blitaka bări kuin tikrä Juan ngwä abko nere: Ti Rünkwe sribi nuemna bätäkä ngwarbe tie, ye erere tita nuene. Ye abko, ti Rünkwe ti juani era metre abko sribi ye käta bă mike tibtä.<sup>37</sup> Erere arato, ti Rün ti juanka ye abko tä blite metre tikrä. Akwa mun abko kákwe ñan ti Rün kukwei nuabare jire chi amne niara bă ño abko mun tuen ñakare amne<sup>38</sup> ti Rün kukwei neketete ñakare munbtä, ñobtä ñan angwane ti juani ti Rünkwe abbotti mun ñan tä tödeke, aise te ti Rün kukwei ñan tä neme munbtä.

<sup>39</sup> Ye abko, munta ja töitike krübäte Ngöbö Kukweibtä, ñobtä ñan angwane ye köböire mun rabadre nuñe kärekäre abko munta nütüre, akwa Ngöbö Kukwei ara käta blite tibtä,<sup>40</sup> akwa ti nebti mun ñan tö tödekai nünakäre kärekäre Ngöböbe.

<sup>41</sup> Mdakäre abko, ni mda mda kákwe ti mikadre ütiäte, kákwe ti käkitadrekä, ye abko ñakare ütiäte tikrä,<sup>42</sup> akwa mun abko gare kuin jökrä tie abko krörö: Munta Ngöbö tarere ñakare, ye gare kuin tie munbtä,<sup>43-44</sup> ñobtä ñan angwane mun abko tä ja käkitekä kwärikwäri amne Ngöbö itibe kákwe mun käkitadrekä, yebtä munta töbige ñakare,

aisete ñmun rabadre tödeke ño tibti? Ni mda mda jatadre kukwe ükaninte au niere mun moto mikakäre nuäre, ye abko munkwe kadre ngäbti jäme jäotrö, akwa ti abko jatani ti Rün käbti, niara kukwei niere metre munye angwane, mun ñan tö ti kain ngäbti.

<sup>45</sup> Akwa kä mrä angwane, ti näin mun kite ngite ti Rün ngwärekri munkwe ñan nütü tibta, ñnobtä ñan angwane Moisés, btä monta ja töi mike, Moisés ye ara käkwe mun kitadi ngite ti Rün ngwärekri, <sup>46-47</sup> ñnobtä ñan angwane mun ñan tö tödekai tibti. Akwa Moisés käkwe tärä tikani tibta abko monta mike ñakare era jae. Ye ti abko kukwei mikadre era ño jae munkwe amarebti Moisékwe tärä tikani tibta ye mikadre era munkwe, ye ngwane munkwe ti kukwei mikadre era jae arato amne munkwe tödekadre tibti, ñnobtä ñan angwane Moisékwe tärä tikani tibta. Abko kore se, nieba Jesukwe nitre israelita ji dokwäteye.

## 6

### *Jesukwe ni mili krärike bukani*

(Mateo 14.13-21; Marcos 6.30-44; Lucas 9.10-17)

<sup>1</sup> Abti bati Jesu rikabata Galilea mda. Abti Jesu rikabata Nö Okwä Kri Galilea kwäräkri. (Nö okwä ye arabe kädianta Tiberias arato). <sup>2</sup> Angwane ni rikaba kwati Jesu jiebti, ñnobtä ñan angwane Jesu rababa sribi kri ñan tuabare nuene Ngöbö nämane ben bä mikakäre, kä rababa ni bren bren miketa kuinta nitre ye okwäbti, yetari rikaba Jesu jiebti. <sup>3</sup> Angwane Jesu rikaba ngitiobtä mintokwäre, känti rababa täkänintbe temen nun ja töitikaka benbe. <sup>4</sup> Kä ye ngwane abko bieta nitre israelitakwe kädianta Pascua, ye köböl jatabara nüke ja ken.

<sup>5</sup> Akwa Jesu rababa täkänintbe dirire ietre. Yebti niara käkwe nikraba angwane, ni näma näin kwati jiebti, yebtä okwä rababa angwane, nieba kwe Felipeye:

*¿Ni kwati se kräke nikwe ban kökadre mdente, mata nütüre? nieba kwe ie.*

<sup>6</sup> Jesu abko käkwe dre nuendi abko rababara gare kuin ie, akwa Felipekwe dre niedre abko Jesu tö rababa gai, käkwe nieba kore ie. <sup>7</sup> Angwane Felipekwe nieba Jesuye:

Ngwian ganaindre sö krä kwä jire rabadre nikwe akwa, ngwian ye näre ñan rabadre täte jire chi mrö kökakrä biandre kiakia nitre kwati seye, nieba kwe ie.

<sup>8</sup> Ye btäräbe Simón Pedro etba Andrés ja töitikaka Jesube arato käkwe nieba Jesuye:

<sup>9</sup> Ngäbäkreta iti nete abko kwe sebada bainta kunrike amne gwa nötare tä krobu kwe, akwa *¿se abko rabadre täte ño nitre kwati bti se?* nieba kwe ie.

<sup>10</sup> Abtä Jesukwe nieba mda:

Nitre ye rabadre täkänintbe jökrä temen niere ietre munkwe, nieba kwe.

Angwane kä ye känti abko kä mikäre temen, känti nitre ye rababa täkänintbe jökrä. Nitre brare brare aibe näma mili krärike jire yete. <sup>11</sup> Angwane ban näma kunrike ngäbäkrekwe, ye Jesukwe dianba kisete, kuin nieba btä kwe Ngöböye, bti nitre näma täkänintbe temen, yebti dräiba kwe. Erere arato, gwa dräiba kwe amne ni itire itire tö rababa mröi nuäi nuäi, ye erere bianba kwe ietre. <sup>12</sup> Yebti nitre ye rababa trine trine jökrä angwane, Jesukwe nieba nun ja töitikaka benye:

Ban oto nebete se ñan rikadre ngwarbe jire chi, abkokäre ükekrö jökrä munkwe, nieba kwe.

<sup>13</sup> Ye erere bkänä, sebada bain oto rabateba, ye nunkwe ükakröba kutia krikri kwä jätabti kubu jire.

<sup>14</sup> Sribi kri ñan tuabare nuenba Jesukwe Ngöbö nämane ben mikakäre gare, ye abko nuenbare kwe nitre kwati ye okwäbti angwane, niaratre rababa niere jae kwärikwäri:

Ni Ngöbö kukwei niekä rükadre kä nebtä niebare Moisékwe abko ara tä nete ñan ñan, rababa niere jae kwärikväri.

<sup>15</sup> Akwa niaratre tö namani Jesu ngwiain kisere mikakäre jreire, ye gaba btätre Jesukwe. Abtä Jesu rikabata jirekäbe nementa ngitiobti minti rabakäre kaibe yete.

### *Jesukwe dikakabare ñöbti*

(Mateo 14.22-27; Marcos 6.45-52)

<sup>16</sup> Yebti kä jataba iko angwane, nun ja tötitaka Jesube abko jatabata motokwäre nüketa ñö okwä känti. <sup>17</sup> Ye känti ru näma krati, te nun rükaba. Jesukwe nun juanba juta Capernaúmte abko erere ru yete nun rankwaba, bti nun rikaba ñö okwääbti. Nun rikaba angwane, kä rababara iko, akwa Jesu ngämi nüketa rute. <sup>18</sup> Nun rikaba, ye btäräbe müre jataba mate ribi ja dibti, kä rikaba ñö kitekä nekwäre sekwäre angwane, <sup>19</sup> nun abko rikabara mobe ñöbti, bäsí kilometro krärike, krä ti näre angwane, Jesu näma dikekä ñöbti. Jesu näma dikekä ñöbti, ye jataba nüke ru ken nun känti, btä nun okwä rababa. Abtä kä jürä rababa kri nunbtä. <sup>20</sup> Angwane Jesukwe nieba mda nunye:

Tita näin, aisetet mun ñan rekvetaka tibta, nieba kwe.

<sup>21</sup> Angwane kä rababa nuäre nunbtä Jesu kare ngäbti rute. Ye btäräbe nun rababa ñö köräbti juta Capernaúmte.

<sup>22</sup> Yebti jändrinane angwane, ru näma kratibe abko te nun ja tötitaka Jesube rikaba, akwa Jesu abko rikaba ñakare rute nunbe, ye abko nitre kwati rababa ñö okwä kwäräkri ye kákwe gaba. <sup>23</sup> Ye btäräbe ru mda mda nämane juta Tiberiate abko nükani neme känime, Jesukwe kuin nieba banbtä, bti dräiba kwe, ye ken ru namani. <sup>24</sup> Angwane Jesu näma ñakare yete amne nun ja tötitaka ben näma ñakare yete, ye nitre kwati kákwe gaba angwane, rankwaba arato rute, rikaba arato juta Capernaúm kukwäre Jesu känentari.

#### *Jesu abko ban ni mikakäre nüne kärekäre*

<sup>25</sup> Ye erere bkänä, rikaba nebe ñö okwä kwäräkri, känti Jesu kwanba ietre angwane, nieba kwetre ie:

¿Dirikä, ma nükani ñongwane nete? nieba kwetre ie.

<sup>26</sup> Angwane Jesukwe nieba mda ietre:

Ti bike kukwe era erere niere munye. Sribi kri ñan tuabare tikwe nuenba mun okwääbti Ngöböta tibe bá mikakäre, abkotari mutta ti känentari ñakare. Akwa tikwe mun bukaba trine trine bante, aibetari mutta näin ti jiebti abko ti tö nibi niei munye. <sup>27</sup> Akwa mrö tä nikén ngwarbe jötrö te tikwe mun bukaba, ye kräke munkwe ñan sribi, akwa mrö kákwe ni mikadre nüne kärekäre Ngöböbe, ye kräke munkwe sribi. Mrö ni mikakrä nüne kärekäre, ye abko ti Ni Kä Nebtä Ngobo aibe kákwe biandre munye, ñobtä ñan angwane ti abko dbe Ngöbö ti Rün ngwärekri abko Ngöbö ti Rün kákwe bá mikanina tibta, nieba Jesukwe ietre.

<sup>28</sup> Abtä nitre ye kákwe nieba mda Jesuye:

¿Nunkwe sribi mdən nuendre, ie Ngöbö tö abko nun tö gai? nieba kwetre ie.

<sup>29</sup> Angwane Jesukwe nieba ietre:

Ti abko juani Ngöböökwe. Tibti munkwe tödekadre, ie Ngöbö tö, aisetet ye aibe nuendre munkwe, nieba kwe ietre.

<sup>30</sup> Abtä nieba mda kwetre Jesuye:

¿Sribi mdən mdən ñan tuabare makwe bá mikadre tuare nunye, Ngöböta mabe mikakäre gare nunye, abtä nunkwe tödekadre mabti? ¿Amne sribi mdən nuenta makwe abtä nun rabadre tödeke mabti? ye niere nunye. <sup>31</sup> Makwe nuendre krörö ruen nunye: Nun mräkä kirakira nämane dikekä kä kaibete angwane, mrö kä mana kwetani kwetre abko sribi kri ñan tuabare Moisékwe nuenbare. Kukwe yebtä abko nieta krörö Ngöbö Kukweibtä:

Ban kä käinbti kä mana bini kwetadre nie, *Exodo 6.14*  
abko Ngöbö Kukwei käta niere. ¿Ye kwrere makwe nuendre arato ya? nieba kwetre Jesuye.

<sup>32</sup> Angwane Jesukwe nieba ietre:

Ti bike kukwe era erere niere munye. Moisékwe ban kä käinbti biani ñakare kwetadre munye, akwa Ngöbö ara kákwe biani Moisés köböire. Akwa mtare ti Rün käta ban era metre kä käinbti bien mun kräke, <sup>33</sup> ñobtä ñan angwane ban era metre bianta Ngöböökwe ni jökrä kräke, ye abko ni kä käinbti jatani kä nebtä abko tä mun mike nüne kärekäre, ye abra ban era metre, nieba kwe mda ietre.

<sup>34</sup> Abtä nieba kwetre mda Jesuye:

Dänkien, makwe ban ye bian käre köbö kwatirekwatire nunye, nieba kwetre ie.

<sup>35</sup> Angwane Jesukwe nieba ietre:

Ti abko ban käta ni mike nüne kärekäre Ngöböbe. Nire nire tä kite tie amne tä tödeke tibti, ni ye ñan rabadreta mröi jire chi mda. Erere arato, nire nire käta tödeke tibti abko ie tomna ñan rabadre jire chi mda. <sup>36</sup> Akwa ye abko tikwe kukwe niebarera munye, erere ti bike niereta munye abko krörö: ti tuata munkwe, akwa mun ñan tö tödekai tibti. <sup>37</sup> Akwa nire nire bianta tie ti Rünkwe, ye abko tä kite tie tödekakäre tibti amne, nire nire tä kite tie, ye abko tita ngibiare kuin jakrä amne tita juentarita ñakare jire chi mento. <sup>38</sup> Ye abko ñan ti kä käinbti jatani kä nebtä kukwe nuenkäre ja töi jakwebti, akwa ti Rün kákwe ti juani, ye abko tö dreye abko erere ti jatani mike täte. <sup>39</sup> Amne ti Rün kákwe ti juani abko kákwe nire nire biandre tie, ye abko ñan riadrete jire iti tikän amne kä mrä angwane tikwe mikadreta nire nünakäre kärekäre Ngöböbe abko ie ti Rün tö, <sup>40</sup> ñobtä ñan angwane nire nire kákwe ti Ngöbö Odei mikadre ñäräre kuin amne tödekadre tibti kwe abko kákwe nünandi kärekäre amne, köbö mrä angwane tikwe mikadita nire abko ie ti Rün tö abko erere tita nuene, nieba Jesukwe.

<sup>41</sup> Ti abko ban kä käinbti jatani kä nebtä, nieba Jesukwe, yebtä abko nitre israelita ji dokwáte rikaba ñäke jökrä Jesu rüere mda, <sup>42</sup> kákwe nieba krörö:

¿Jesu noko abko ñan José ngobo ya? Niara rün amne meye gare kuin nie. ¡Se ñobtä nämane kä käinbti abko jatani kä nebtä nibi nire mtare se! rababa nire Jesu rüere.

<sup>43</sup> Abtä Jesukwe nieba mda ietre:

Kwekbe munkwe. Munkwe ñan ñäkä kore ti rüere. <sup>44</sup> Ti Rün kákwe ti juani, ye ñan jatadre ni ngwena tie angwane, ni ñan jatadre jire iti ja töi jenbti tie, akwa ni ye tä kite tie abko tikwe mikadita nire nünakäre kärekäre Ngöböbe köbö mrä angwane. <sup>45</sup> Ye mden kisete, nitre Ngöbö kukwei niekä kira kákwe tärä tikani btä nieta krörö:

Ngöböökwe ni jökrä töi tikadi,

*Isaías 54.13*

nietra Ngöbö Kukweibä. Ne aisetet nire nire tä ti Rün kukwei nuen amne ti Rün kákwe töi tikadre, ye abko tä kite tie. <sup>46</sup> Ye abko, ni ñakare jire iti kä nebtä kákwe ti Rün tuani, akwa ti jatani Ngöböökri ne aibe kákwe ti Rün tuani. <sup>47</sup> Ne aisetet, ti bike kukwe era erere nire munye: Nire nire kákwe tödekadre tibti ye abko kákwe nünandi kärekäre Ngöböbe. <sup>48</sup> Ti abko ban käta ni mike nüne kärekäre. <sup>49</sup> Mun mräkä kirakira kákwe mana kwetani kä kaibete, akwa ye nämane ni mike nüne ñakare kärekäre, aisetet niaratre krütani jökrä. <sup>50-51</sup> Akwa ti abko ban kä käinbti jatani kä nebtä ara tä nete amne nire nire kákwe ban ne kwetadre abko ñan krütadre kärekäre, akwa nünandi kärekäre kwe. Akwa ban biandi tikwe kwetadre, ye abko ti ngätä tikwe ne biandi tikwe. Angwane ni jökrä rabadre nünenta kärekäre, abkokäre tikwe ja ngätä ne ara jire biandi müre ketadre.

<sup>52</sup> Yebtä abko, nitre israelita ji dokwáte rikaba ñäke jae kwärikwäri Jesu rüere, kákwe nieba:

¿Ni se kákwe ja ngätä biandre kwetadre ño nie amarebti nibi ñäke kore se? rababa nire.

<sup>53</sup> Abtä Jesukwe nieba mda ietre:

Ti bike kukwe era erere nire munye, btä ti bike kukwe bä mike krörö munye: Nire nire tä kite tie, ye abko tä ti ngätä kwete kwrere amne nire nire tä tödeke tibti, ye abko tä ti därie ñaen kwrere. Angwane ti Ni Kä Nebtä Ngobo ye munkwe ñan ngätä kwetadre amne munkwe ñan därie ñadre angwane, munkwe ñan nünandre kärekäre Ngöböbe.

<sup>54</sup> Ne aisetet, nire nire kákwe ti ngätä kwetadre amne ti därie ñadre kwe kore, ye abko kákwe nünandi kärekäre Ngöböbe angwane, tikwe mikadita nire köbö mrä näire, <sup>55</sup> ñobtä ñan angwane ti ngätä abko mrö era metre amne ti därie abko tomna era metre. <sup>56</sup> Ne aisetet, nire nire jatadre tie, kákwe ti ngätä kwetadre amne nire nire kákwe tödekadre tibti, kákwe ti därie ñadre, ni ye abko kákwe nünandi ketetibe tibe amne tikwe nünandi ketetibe ben arato. <sup>57</sup> Ti Rün kákwe ti juani, ye tä nüne amne niara köböire tita nüne, ye kwrere arato nire nire kákwe ti ngätä kwetadre mrö kwrere, ni ye abko kákwe nünandi kärekäre ti köböire. <sup>58</sup> Ti ngätä ne abko ban kä käinbti jatani kä nebtä. Yebtä tita blite

amne kukwe bā mike. Ban ne abko ñakare mana kwetani mun mräkä kirakirakwe ye kwrere, ñobtä ñan angwane niaratre käkwe mana kwetani, akwa krütani jökrä. Akwa ban btä tita blite, ye abko nire nire käkwe kwetadre ye abko tödeka tibti abko tita niere angwane, nünandi kärekäre kwe Ngöböbe. Abko kore se, nieba Jesukwe.

<sup>59</sup> Kukwe ye abko Jesukwe diriba jökrä sinagogue juta Capernaúmte.

#### *Ni kwati nänkä Jesube rikaba Jesubtä mento*

<sup>60</sup> Jesukwe diriba kore, ye ni kwati nänkä ben käkwe kukwe nuaba angwane, nieba kwetre:

¿Ni se käkwe blitaniri se abko tare krübäte ni kräke, se nirekwe niara kukwei mikadre tätē se? rikaba niere jae kwärikwäri.

<sup>61</sup> Niaratre rababa blite kore Jesu rüere, ye gaba Jesukwe angwane, nieba mda kwe ietre;

¿Tikwe blitaniri ye nibi mate tare munbtä ya? <sup>62</sup> ¿Ti Ni Kä Nebtä Ngobo nämane nüne käne, känti rikadreta kä käinbti mun okwäbti, ye ngwane munkwe töbikadre ño btä?

<sup>63</sup> Ngöbö Üai käta ni mike nüne kärekäre Ngöböbe amne, jäandrän jökrä kä nebtä ni ngätä kwrere, ye abko ütiäte ñakare, ñobtä ñan angwane ñan raba ni mike nüne kärekäre Ngöböbe. Ye abko, kukwe btä tita blite Ngöbö Üai köböire amne kukwe nini tikwe, ye munkwe mikadre era jae, käkwe tödekadre tibti angwane, munkwe nünandi kärekäre Ngöböbe. <sup>64</sup> Akwa mun ruäre tä nete abko ñan tö tödekai tibti, aisetu mun ñan tö ti kukwei mikai era. Abko kore se, nieba Jesukwe ietre.

Jesu abko käkwe ñäkäba kore, ñobtä ñan angwane nire nire käkwe ñan tödekadre bti, ye nämanena gare käne ie. Erere arato, ni iti käkwe niara kitadi ngise rüeye, ye nämanena gare käne ie, aisetu ñäkäba kore kwe. <sup>65</sup> Yebti Jesukwe nieba mda ietre:

Mun töi kore, ye mden kisete tikwe nini krörö: Ti Rün käkwe ñan ni biandre tie, ye ngwane ni ñan jatadre jire iti tie ja töi jakwebti, tikwe nini munye, nieba Jesukwe.

<sup>66</sup> Ye ngwane mentokwäre ni kwati näma näin Jesu jiebti käkwe kä mikakaba btä amne ñan rababa dikekä mda ben. <sup>67</sup> Angwane nun ja töitikaka ni jätäbti nibu, ie Jesukwe nieba:

¿Mun tö nibi näinta mento tibtä arato ya? nieba kwe nunye.

<sup>68-69</sup> Angwane Simón Pedro käkwe nieba:

Ti Dänkien, ma kukwei abko kukwe ni mikakrä nire kärekäre amne, ma abko Ni Deme Ngöbökwé ye nena gare nunye amne nunkwe mikanina era jae. ¿Se abko nun rikadre nireye mda se? nieba kwe Jesuye.

<sup>70</sup> Abtä Jesukwe nieba mda ie:

Mun ni jätäbti nibu käkwe ja töitikadre tibe, abkokäre tikwe mun dianinkä, akwa mun iti abko diablu kwrere jire, nieba kwe nunye.

<sup>71</sup> Jesukwe ñäkäbare kore ye abko Simón Iscariote ngobo kä Judas näma ja töitike siba Jesube abko käkwe Jesu kitadi ngise rüeye, abkobtä nieba kore kwe. Akwa Judas abko ni ja töitikaka Jesube arato nun ni jätäbti nibu ngätäite.

#### *Jesu nikani bieta Ju Bäbtä*

<sup>1</sup> Yebti Jesu näma dikekä kwäräkwärä dirire kä Galileate. Niara ñan tö rababa rikaita nebe kä Judeate, ñobtä ñan angwane nitre israelita ji dokwäte näma ngibiare yete müre ketare. <sup>2</sup> Ye ngwane abko, bieta nitre israelita kädianta Ju Bäkrä jatabare nüke ja ken.

<sup>3</sup> Abtä Jesu etbakantre käkwe nieba ie:

Mata sribi kri ñan tuabare nuene nete, ye nitre nänkä ma jiebti tä nüne kä Judeate ye käkwe tuadre, abkokäre nän nebe bietabtä Judeate. Akwa ma ñan raba Galileate nete,

<sup>4</sup> ñobtä ñan angwane ni rabadre ütiäte ni mda mda ngätäite, ie ni töta nebe, ye abko ñan nita nebe jäandrän nuene kaibe tiebe, aisetu mata sribi kri ñan tuabare nuene Galilea nete, ye ma rika nuene ni jökrä ngwärekri Jerusalén arato, nieba kwetre Jesuye.

<sup>5</sup> (Jesu etbakantre abko ñan nämane tödeke bti, aisetu ñäkäbare kore kwetre ie.)

<sup>6</sup> Akwa Jesukwe nieba mda ietre:

Kä kitani ti käne erere ngämi nüke tie, akwa mun abko kräke köbö jökrä kuin nänkrä bietabtä Jerusalén. <sup>7</sup> Ni mda mda kákwe ñan bätä ngwiandre munbtä, ñobtä ñan angwane mun töi ja kwrere niaratrebe. Akwa ti abko btä bätä ngwianta kwetre, ñobtä ñan angwane niaratre tä kukwe nuene kämekäme Ngöbö rüere, ye abko käme titi niere metre ietre, abtä mätä tibtä, aisetet i ñan rikadre. <sup>8</sup> Akwa mun abko rüe ñakare, aisetet mun rika bietabtä amne ti abko kä kitani ti käne Ngöbökwe abko ngämi nüke, aisetet ti ñan rikadre bieta yebtä. Abko kore se, nieba kwe etbakantreye.

<sup>9</sup> Jesukwe nieba kore etbakantreye, bti niara rababa kä Galileate yete <sup>10</sup> angwane, etbakantre rikaba jökrä bietabtä. Yebti Jesu rikaba köre bietabtä arato, akwa rikaba kä bube tiebe, ñan rikaba ni jökrä ngwärekri. <sup>11</sup> Angwane Jesu ngämi nüke Jerusalén bietabtä, känenkri nitre israelita ji dokwäte abko rababa Jesu känentari kisere nekwäre, sekwäre bieta yete, kä rababa nire:

¿Ni ngututu ngwarbe ye tä mdente ruen? rababa nire.

<sup>12</sup> Akwa ni näma kwati bietabtä, ye rababa blite tiebetiebe jökrä Jesubtä. Ni ruäre rababa nire:

Ni ye abra moto kuin, rababa nire.

Akwa ni ruäre abko rababa nire:

Ñakare. Ni ye ñakare kuin amne tä näin ni ngökö jirekäbe, rababa nire tiebe Jesubtä.

<sup>13</sup> Akwa ni jökrä, btä nitre israelita ji dokwäte ye jürä rababa, aisetet rababa blite tiebetiebe jabe kwärirkwäri amne ñan rababa blite ja ngwärekri jökrä Jesubtä.

#### *Jesukwe diribare bieta näire*

<sup>14</sup> Yebti bieta ötöbu ta angwane, ju blitakrä Ngöböbe ye bäre Jesu rikaba amne rikaba dirire. <sup>15</sup> Angwane nitre israelita ji dokwäte töi ñan rababa krütare kukweibtä, kä rababa nire:

¿Ni noko jananbare ja töitike ñakare dirikä krikri be, se ño känti abko Ngöbö Kukwei gare krübäte dikaro ie se? rababa nire Jesubtä.

<sup>16</sup> Abtä Jesukwe nieba ietre:

Tita kukwe dirire, ye abko ñakare tikwe, akwa ni ti juanka abko kukwei dirita tikwe.

<sup>17</sup> Ne aisetet Ngöbö ti juanka tö dreye, ye erere nire nire tä biare mikakäre täte, ni ye abko ie ti kukwei rükadi gare metre angwane, tita kukwe dirire, ye Ngöbökri ya o tita kukwe dirire ja töi jenbti au abko rükadi gare ie. <sup>18</sup> Ye abko, nire nire tö ja mikai ütiäte abko käta blite ja töibti au aibe, akwa nire nire tä sribire ni niara juanka mikakäre ütiäte, ni ye abko tä kukwe era erere nire amne ñan tä kukwe ngwarbe nire jire. Ye erere tita dirire. <sup>19</sup> Moisés abko kákwe Ngöbö kukwei biani nuendre munye ye abko era ñan ñan. Akwa ni ñakare jire iti mun ngätäite käta kukwe ye mike täte metre. ¿Ye ñobtä mun tö ti müre ketai? nieba Jesukwe ietre.

<sup>20</sup> Abtä nitre näma kwati yete ye kákwe nieba mda:

¿Nire tö nibi ma müre ketai amarebti mata ñäke kore ye? ¡Ye ñan üai käme tä mabtä, kisete mata ñäke kore ya! nieba kwetre Jesuye.

<sup>21</sup> Angwane Jesukwe nieba mda ietre:

Tikwe sribi kri ñan tuabare nuenba kákwe ni mikabata kuinta batibe köbö jadükakrä näire, abtä mun ñan töi rababa krütare amne mun rababa romon tikrä. <sup>22</sup> Akwa ja ñäräkrä mikadre ja kwatabtä abko Moisékwe nuemna munye, aisetet Moisés kukwei mikakäre täte, munta ni ñäräkrä mike kwatabtä köbö jadükakrä näire. Ye abko ñan Moisékwe nuemna kena, akwa Ngöbökwe nuemna kena nitre israelita mräkä känekäneye, yebti Moisékwe nuemnanta munye. <sup>23</sup> Mun ñan töta nebe Moisés kukwei kitai temen, aisetet ngäbäkre tä därrere abti ñäräkrä mikadre kwatabtä niebare Moisékwe amne, köbö kwäirare ye tä nüke köbö jadükakrä näire akwa, munta ngäbäkre ñäräkrä mike kwatabtä, ye abko sribi, akwa munta nuene. ¿Ye ñobtä abko tikwe ni bren mikaninta kuin täte jökrä köbö jadükakräte abko btä mun romon tikrä? <sup>24</sup> Mun tö raba kukwe ükaite tikrä angwane, kukwe ño ño nuenta tikwe erere tuen ño munye, abtä munta ti kite ngise

ngwarbe. Ye abko munkwe ñan nuendre jire chi mda, akwa kukwe era metrebtí munkwe kukwe ükadrete. Abko kore se, nieba Jesukwe nitre israelita ji dokwáteye.

### *Jesu abko Ni Dianinkä Ngöböökwe ya?*

<sup>25</sup> Angwane nitre israelita ruäre nünanka Jerusalén rababa niere jae kwäríkwäri:

¡Ñan ni se känántarita nitre ji dokwátekwe müre ketadre yera, <sup>26</sup> amarebtí tuen dirire ni jökrá ngwárekri sete se, akwa nitre ji dokwáte ñan nebe ñáke jire chi ie! ¿Ni se abko Ni Dianinkä Ngöböökwe ara juani Ngöböökwe abko nibira era nitre ji dokwátekrá ya ño amarebtí ñan nebe ñáke ie se? <sup>27</sup> Ni se jatani mdenkri garera nie, akwa Ni Dianinkä Ngöböökwe jatadi angwane, jatadi mdenkri ñan rabadi gare nie, aiseté ni se abko ñakare Ni Dianinkä Ngöböökwe ruen nunye, rababa niere Jesubtä.

<sup>28</sup> Jesu näma dirire ju blitakrää Ngöböökwe käntita angwane, nitre kukwei jaraba kore ie angwane, Jesukwe ñákäba ja dibtí, kákwe nieba:

Ti gare kuin munye bkánä amne, ti jatani mdenkri, ye gare kuin jökrá munye, munta nütüre ñan ñan. Akwa ñan ti jatani ja töi jenbtí amne Ngöböökwe ti juani era metre. Niara gare ñakare munye, <sup>29</sup> akwa ti abko jatani niarakri amne ti juani kwe, aiseté niara gare tie. Abko kore se, nieba Jesukwe.

<sup>30</sup> Yebtä ni ruäre tö rababa Jesu kain ngite, akwa niara müre ketadre abko kái ngämi nüke, aiseté nitre ye kákwe ñan kise mikaba jire chi btä. <sup>31</sup> Akwa ye ngwane abko, ni kwati kákwe tödekkaba Jesubtí abko rababa niere:

Ni Dianinkä Ngöböökwe rükadre angwane, sribi kri ñan tuabare abko ñan nuendi bári kuin kwe ni se ngwá, raba ruen nunye, rababa niere Jesubtä.

<sup>32</sup> Nitre tödekkaka Jesubtí rababa blite tiebe kore, ye kukwei jarabare nitre bariseoye. Abtä nitre bariseo btä nitre blitaka Ngöböökwe ni mda mda diäre dänkientre kákwe guardia ju blitakrää Ngöböökwe ngibiabtikä juanba Jesu kaen ngite. <sup>33</sup> Angwane Jesukwe nieba mda:

Tikwe nünandi bá jötrö mda mun ngätäite nete. Yebti ni ti juanka, känti ti näinta. <sup>34</sup> Angwane mun rabadi ti känentari kisere, akwa ti ñan kwandretari munye, ñobtä ñan angwane ti tädi, ye känti mun ñan rabadre, nieba Jesukwe ietre.

<sup>35</sup> Yebtä abko, nitre israelita ji dokwáte rababa niere jae kwäríkwäri:

¿Ni se abko näin mdente amarebtí ñan kwandretari nie, tä niere se? ¿Nitre israelita tä nüne juta jenenante kwäräkwärä nitre ñakare israelitare ngätäite, känti näin ya ño ruen? o ¿Nitre ñakare israelitare, ie näin dirire ya? Dre nuendi metre kwe ruen <sup>36</sup> amarebtí nini krörö kwe nie: Mun rabadi ti känentari kisere, akwa ti ñan kwandretari munye, ñobtä ñan angwane ti tädi, ye känti mun ñan rabadre nikken, nini kwe nie, ¿se abko dre nini kore kwe se? rababa niere Jesubtä.

### *Jesukwe Ngöbö Üai bá mikani ñö nire kwrere*

<sup>37</sup> Yebti bieta Ju Bä köbölí mrä abko köböl bári ütiäte, ye näire Jesu rababa nünankä krö ju blitakrää Ngöböökwe käntita angwane, ñákäba jume ja dibtí kwe, kákwe nieba mda:

Mun mdene ie tomna nibi angwane, mun jakwe tomna ñaen tie amne, <sup>38</sup> nire nire kákwe tödekkadre tibti abko btä ñö nire rabadi neen käre, nieta Ngöbö Kukweibtä ye kwrere, nieba Jesukwe.

<sup>39</sup> Jesukwe blitaba kore angwane abko Ngöbö Üai bá mikaba ñö nire kwrere kwe. Akwa blitaba kwe angwane, Ngöbö Üai ngämi nüke nitre tödekkaka Jesubtí yebtä, ñobtä ñan angwane Jesu ngämi nikenta kä käinbtí, känti Ngöböökwe Jesu mikani ütiäte kri. (Akwa Ngöböökwe Jesu mikani ütiäte kri, yebti abko Jesukwe Ngöbö Üai juani nüne nitre ja töitikaka Jesubtí yebtä.)

<sup>40</sup> Jesukwe blitaba ye abko nitre näma yete, ye ngätäite ni ruäre kákwe Jesu kukwei nuuba angwane, rababa niere:

Ni Ngöbö kukwei niekä rükadre niebare Moisékwe ara tä nete ñan ñan, rababa niere.

<sup>41</sup> Akwa ni mda mda abko rababa niere:

Era metre Ni Dianinkä Ngöböökwe ara noko, rababa niere.

Akwa ni mda abko rababa niere:

Ni noko abko Galileabo, aiseți niara abko ñan Ni Dianinkä Ngöböökwe, ñobtä ñan angwane Ni Dianinkä Ngöböökwe abko ñan jatadre nitre Galileabokri. <sup>42</sup> Ye abko, Ni Dianinkä Ngöböökwe jatadi jrei David tukwe mräkäkri amne David abko därebare juta Belénte, ye arabe känti Ni Dianinkä Ngöböökwe jatadi arato abko nieta kore Ngöö Kukweibtä, nieba ni ruärekwe.

<sup>43</sup> Yebtä abko ni jökrä töi rababa bää jene jene Jesubtä. <sup>44</sup> Ni ruäre abko tö rababa rikai Jesu ngwena ngite, akwa nuenba ñakare kwetre. <sup>45</sup> Ye mden kisete, guardiatre juani Jesu kaen ngite, ye rikabata kise tökare nebata bariseotre ye känti amne nitre blitaka Ngööbëbe ni mda mda diäre dänkientre ye känti angwane, niaratre käkwe niebare guardiatre yeye: Nunkwe ni kamna ngite, ¿ye ñobtä mun ñan ki ngwena? nieba kore kwetre guardiaye.

<sup>46</sup> Abtä guardiatre käkwe niebare mda ietre:

¡Ni blite nuäre nuäre ni ye kwrere nunkwe ñan tuabare jire abko erere ni ye tä blite! Abtä nun ñan ki ngwena, niebare kwetre:

<sup>47</sup> Angwane nitre bariseo ye käkwe niebare mda guardiatreye:

¿Munkwe ja ngökamna kwäräbe ie arato ñan ñan? niebare kwetre ietre.

<sup>48</sup> ¿Nitre blitaka Ngööbëbe ni mda mda diäre dänkientre amne nitre bariseo tärä iti käta tödeke ni yebti mun okwäbti ya? ¡Ñakare jire! <sup>49</sup> Nitre se käta niara mike ütiäte, ie Kukwe Biani Ngöböökwe Moiséye gare ñakare jire chi ye abko btä Ngööbëta ngürün mike, ye namanintre niere guardiatreye.

<sup>50</sup> Abtä batni bariseo kädian nämane Nicodemo jananbare blite deo Jesube ye käkwe nieba:

<sup>51</sup> Kukweta ükaninte ni ngätäite käta niere krörö: Ni iti käkwe dre nuenbare abtä kitadre ngite, ye niara ngämi blite au jakrä, ni ñan raba kite ngite abko tä ükaninte kore, nieba Nicodemokwe. <sup>52</sup> Abtä niaratre käkwe nieba romone Nicodemoye mda:

¿Ma abko ni ngututu käme Galileabo arato ya? Ngööbë Kukwei käta dre niere, yebtä makwe ja töitika angwane, ni Galileabo ñakare jire iti Ngööbë kukwei niekä abko rükadi gare mae, nieba kwetre Nicodemoye.

### *Meri iti käkwe ja mikani ngite tiebe*

<sup>53</sup> [Yebti ni jökrä rikabata ja gwiriete.

## 8

<sup>1</sup> Akwa Jesu abko rikaba Ngitio Olibobti. <sup>2</sup> Yebti jändrinane dekä angwane, ju blitakrä Ngööbëbe ye käntita Jesu rikabata angwane, ni kwati jataba nüke niara ken kukwei nuakäre angwane, niara rababa täkänintbe temen, kä rikaba dirire ietre. <sup>3</sup> Ye btäräbe Kukwe Biani Ngöböökwe Moiséye dirikätre amne nitre bariseo rükaba meri ngwena iti Jesu känti. Meri ye abko nämane ja mike gure kaibe gore abko kwani ietre abko rükaba ngwena. Meri ye abko mikaba nünaninkä kwetre ni jökrä ngwärekri Jesu känti.

<sup>4</sup> Angwane nieba kwetre ie:

Dirikä, meri ne tä ja mike gure kaibe gore akwa, kuni jabtä nunye abko nun ki ngwena mae nete. <sup>5</sup> Kukwe Biani Ngöböökwe Moiséye, yebtä Moisékwe meri ne kwrere kämikamna jäbti. ¿Akwa ma abko käta dre niere meri kore btä? nieba kwetre Jesuye.

<sup>6</sup> Niaratre abko rababa kukwe ngwentari kore ie ja gakäre ben, ñobtä ñan angwane Jesukwe ñäkädre blo, yebtä abko kukwe käme kwandre ietre kitakrä ngise abkokäre. Akwa Jesu abko rababa nünaninkä krö, bti rababa täkänintbe ngürehti, kä rikaba tärä take kisehti dobrobtä temen. <sup>7</sup> Akwa nitre ye rababa kukwe ngwentari janknu Jesuye meri yebtä. Abtä Jesukwe niaratre mikaba nääräre ja käne, käkwe nieba ietre:

Mun mden mden ja mike ngite ñakare jire chi Ngööbë rüere abko käkwe meri ye täkä käne jäbti, nieba Jesukwe ietre.

<sup>8</sup> Yebti Jesu rababata täkänintbe ngürehti, rikaba tärä tiketa dobrobtä temen nitre ye okwäbti. <sup>9</sup> Akwa Jesukwe ñäkäba kore ietre, yebtä abko niaratre rikaba kä mikekä itire itire ja täritäri, akwa nitre bäri unbretire ara jire käkwe kä mikakaba käne, bti ni bäri

bati bati rikabata mento mrä. Jesu abko rababa kaibe meri yebe. <sup>10</sup> Niara naninkrö krö, bti meri ye mikaba ñäräre ja käne kwe, käkwe nieba ie:

¿Nitre ma kitaka ngise abko ame jökrä nete? ¿Ni ñakare jire iti käkwe ma kiti ngite ñan ñan? nieba Jesukwe ie.

<sup>11</sup> Angwane meri ye käkwe nieba mda ie:

Ni ñakare jire iti käkwe ti kiti ngite se abko, nieba kwe Jesuye.

Angwane Jesukwe nieba mda ie:

Tikwe ñan ma kitadre ngite arato, aisetet nänta. Akwa mtare mentokwäre makwe ñan ja mika ngite janknu mda. Abko kore se, nieba kwe meri yeye.]\*

*Jesu abko ñotra ni jökrä kräke*

<sup>12</sup> Yebti Jesukwe nieba mda ni kwati näma yete yeye:

Ti abko ñotra ni jökrä kräke. Nire nire jatadre ti jiebti abko kwe ñotra trä rabadi die mikakäre amne ñan nünandi jire chi mda kä ikote kwe, nieba kwe.

<sup>13</sup> Yebtä abko, nitre bariseo käkwe nieba mda Jesuye:

Mata nete käta blite au jakrä, aisetet ma kukwei ye abko tuen ñakare metre, nieba kwetre ie.

<sup>14</sup> Abtä Jesukwe nieba mda ietre:

Tita blite au jakrä akwa, ti abko kukwei ütiäte amne metre, ñobtä ñan angwane ti mdente jatani, ye gare kuin tie. Erere arato, ti näinta mdente gare kuin tie, akwa mun abko ie gare ñakare jire chi. <sup>15</sup> Nitre kä nebtä tä kukwe ükete ño ni kitakäre ngite, ye kwrere munta kukwe ükete tikrä, akwa ti abko tä kukwe ükete ñakare ni kitakäre ngite.

<sup>16</sup> Akwa nane tikwe kukwe ükarete ni kitakäre ngite, ye ngwane tikwe kukwe ükadrete era metre, ñobtä ñan angwane ñan tita kukwe ükete kaibe ja töi jenbti, akwa ti Rün käkwe ti juani abko käta kukwe ükete ti ben gware, aisetet tita kukwe ükete kuin metre.

<sup>17</sup> Angwane Kukwe Biani Ngöökwe Moiséye mun kräke, btä nieta krörö: Ni nibu käkwe blitadre ja kwrere ni kitani ngise rüere, ye ngwane niaratre nibu kukwei rabadre ütiäte abko nieta. <sup>18</sup> Ye abko tä dbe, aisetet ti ara jire tä blite au jakrä amne ti Rün käkwe ti juani abko tä blite tikrä arato, nieba Jesukwe.

<sup>19</sup> Abtä nitre bariseo käkwe nieba mda Jesuye:

¿Ma rün abko tä mdente? nieba kwetre ie.

Angwane Jesukwe nieba mda ietre:

Ti abko nire gare ñakare metre munye amne ti Rün gare ñakare munye arato. Ti abko nire rükadre gare munye angwane, ti Rün rükadre gare munye arato. Abko kore se, nieba kwe ietre.

<sup>20</sup> Jesukwe ñäkäba kore angwane abko näma dirire ju blitakrä Ngöböbe ye bäre. Jesu näma dirire, ye käntita abko kaja näma abko te ngwian kita nämane Ngöbökrä, känti Jesu näma, käkwe kukwe diriba kore. Akwa Ngöökwe kä kitani angwane Jesu müre ketadre, ye ngämi nüke ie, aisetet ñan kaba ngite kwetre müre ketakäre.

<sup>21</sup> Bti Jesukwe niebata mda ietre:

Ti bike nikenta amne mun abko rabadi ti käntari kisere, akwa mun ngite ye ben gware mun krütadre jökrä. Ti näin mdente, ye känti mun ñan raba neme jire ti känti, nieba kwe nitre bariseoye.

<sup>22</sup> Angwane nitre israelita ji dokwäte rababa niere jae kwärikwäri:

¿Niara tö kite ja müre ketai au ya ño amarebti, ti bike nikten ye känti mun ñan raba, nini kwe ye? rababa niere jae kwärikväri.

<sup>23</sup> Angwane Jesukwe nieba mda ietre:

Mun abko tä nüne kä temen nebtä, akwa ti abko kä käinbti sete jatani; mun abko tä nüne Ngöbö rüere, akwa ti abko rüre ñakare Ngöbö rüere. <sup>24</sup> Ye mdent kisete, kukwe kämekäme munta nuene Ngöbö rüere, yebtä mun krütadi. Ti abko ni ño tita niere

\* 8:11 Kukweta tikani corcheta ngätäite abko ñan tä tikani manuscrito bári kuinkuin btä.

munye, ye munkwe ñan mikadre era jae angwane, mun krütadi angwane, mun rabadi ngite Ngöböye kärekäre, tikwe nini munye ye kwrere, nieba Jesukwe ietre.

<sup>25</sup> Angwane niaratre käkwe nieba mda ie:

¿Ma abko nire? nieba kwetre Jesuye.

Jesukwe nieba mda ietre:

Ti jataba nüke angwane, ti abko nire tikwe nieba käne munye abti kä nüke mtare.

<sup>26</sup> Ye abko, kukwe tärä kabre abko tikwe kädriedre munbe. Erere arato, kukwe tärä kabre abko tikwe ükarete munkrä, akwa ni tijuanka käta kukwe era erere niere abko tita kukwe nuen, ye erere tita niere nitre nünanka Ngöbö rüere ie, nieba Jesukwe.

<sup>27</sup> Akwa Jesukwe blitaba ni niara juanka yebtä angwane abko näma blite Rün kwebtä abko ñan rükaba gare ietre. <sup>28</sup> Abtä Jesukwe nieba mda ietre:

Munkwe Ni Kä Nebtä Ngobo ne kadikä krusobtä käin angwane, ti abko ni ño tita niere munye, ye abko rükadi gare tibtä munye. Erere arato, tita jäandrän nuene ñakare ja töi jenbti, akwa ti Rün käkwe dre diribare tie, ye erere tita nuene abko rükadi gare tibtä munye. <sup>29</sup> Ni ti juanka ye abko tä tibe amne ti Rün tä ti mikete ñakare kaibe, ñobtä ñan angwane dre tuen kuin ie abko erere tita nuene, kä mikakäre nuäre btä, aisetet ñan tä ti mikete kaibe. Abko kore se, nieba Jesukwe ietre.

<sup>30</sup> Jesukwe blitaba kore angwane, ni kwati käkwe tödekaba bti.

#### *Nitre israelita abko Abraham mräkä tä nütüre jabtä*

<sup>31</sup> Yebti nitre israelita käkwe tödekaba Jesubti, ye ie Jesukwe nieba mda:

Munkwe nünandikä kärekäre ti kukweibtä ne ngwane, mun rabadi ja töitikaka era metre tibe. <sup>32</sup> Ye ngwane, kukwe era metre Ngöböbtä rükadi gare munye amne kukwe era yebti mun rabadi tikaninte, nieba Jesukwe ietre.

<sup>33</sup> Abtä nieba mda kwetre Jesuye:

Nun därebare Abraham mräkäkri amne ni mda mda nebe ñakare nun dänkiene. ¿Se ñobtä abko mun rabadreta tikaninte, mata niere se? nieba kwetre Jesuye.

<sup>34</sup> Jesukwe nieba mda ietre:

Ti bike kukwe era erere niere munye: Nire nire käta kukwe kämekäme nuene Ngöbö rüere, ni ye abko kukwe kämekäme tä bkäne amne dänkiene, aisetet niara abko ni klabore kwrere kukwe kämekäme kräke. <sup>35</sup> Ye abko, ni klabore ye ñan raba nüne kärekäre gwi bkänkä mräkäbe, ñobtä ñan angwane bkänkä raba rürümoine ni mdaye. Akwa ni klabore bkänkä, ye ngäbriänkä aibe käkwe nünandre kärekäre gwi rünbe. <sup>36</sup> Ne aisetet Ngöbö Odei käkwe mun tikadrete ne ngwane, mun rabadi tikaninte era metre.

<sup>37</sup> Mun därebare Abraham mräkäkri, ye garera tie, akwa mun tö ti müre ketai, ñobtä ñan angwane tita kukwe niere, ye mun ñan tö kain ngäbti. <sup>38</sup> Tikwe dre dre tuaba ja okwä jenbti ti Rün känti, ye erere btä tita blite. Ye kwrere arato, munkwe mun rün kukwei nuani blite ño, ye erere munta nuene arato, nieba Jesukwe ietre.

<sup>39</sup> Abtä nieba mda kwetre Jesuye:

¡Nun rün kira abko Abraham abko mräkäkri nun därebare! nieba kwetre Jesuye.

Akwa Jesu abko käkwe nieba mda ietre:

Mun däredre Abraham mräkäkri bkänä akräke niarakwe nünabare ño, ye erere munkwe nünandre arato. <sup>40</sup> Akwa ye kwrere ñakare, aisetet kukwe diribare tie Ngöböktwe abko erere tita niere era metre munye. Abtä mun tö ti müre ketai. Akwa Abraham abko rabadre nüne mtare angwane, niarakwe ñan kukwe kore nuendre jire chi abko erere mun tö nuein tibtä. <sup>41</sup> Ye abko, mun rün tä dre nuene, ye erere munta nuene arato, nieba Jesukwe ietre.

Abtä nieba kwetre Jesuye:

Ni ja mikaka gure batibati abko kwe nun därebare ñakare amne nun rün abko era metre. Nun rün abko itibe abko Ngöbö, nieba kwetre Jesuye.

#### *Diablu mräkä*

<sup>42</sup> Angwane Jesukwe nieba mda ietre:

Ngöbö mun Rün era metre bkänä akräke ti rabadre tare munkwe, ñobtä ñan angwane ti jatani Ngöbökri amne titä mun ngätäite nete. Ye ñan ti jatani ja töi jenbti akwa, Ngöbökwe ti juani abkokänti titä nete. <sup>43</sup> Akwa mun abko ñan tö ti kukwei kain ngäbti, aisetä titä blite abko ñan tä nüke gare munye. <sup>44</sup> Ye abko, mun rün era metre munkwe abko diablu amne niara tä mun bkäne, aisetä mun abko niara kwrere amne niara töta nebe dreye, ye erere mun tö nuein. Kena abti kä nüke mtare, diablu abko ni kämikaka amne niara ñan tä kukwe era metre niere jire chi bat. Tä blite angwane, kukwe era nieta ñakare jire kwe, angwane tä blite nierare, ñobtä ñan angwane niara abko ni ngökaka amne käne kira niarakwe kukwe niebare ngwarbe. <sup>45</sup> Mun abko mun rün diablu kwrere käta kukwe ngwarbe tarere, aisetä ti abko käta kukwe era erere niere munye angwane, mun ñan tö ti kukwei mikai era. <sup>46</sup> Ti kukwe käme nuene ñakare Ngöbö rüere, aisetä ni ñakare jire mun ngätäite nete kä raba ti kite ngise kukwe kämenbtä, aisetä titä kukwe era erere niere munye, ¿se ñobtä abko mun ñan tö ti kukwei mikai era? <sup>47</sup> Akwa nire niere era metre Ngöbökwe abko tä Ngöbö kukwei kaen ngäbti, akwa mun abko ñakare era metre Ngöbökwe, aisetä mun ñan tö ti kukwei kain ngäbti. Abko kore se, nieba Jesukwe nitre israelitaye.

#### *Ja bari kri Abrahamkrä niebare Jesukwe*

<sup>48</sup> Yebtä abko nitre israelita käkwe nieba mda Jesuye:

Ma abko ni ngututu Samariabo amne üai käme tä mabtä, nunta niere ye abko era bkänä ñan ñan, nieba kwetre.

<sup>49</sup> Abtä Jesukwe nieba mda ietre:

Üai käme ñakare jire tibtä, akwa titä ti Rün mike ütiäte jae amne mun abko käta ti mike ngwarbe jae. <sup>50</sup> Ñan munkwe ti mikadre ütiäte abko känänta au tikwe jakrä, akwa ni tärä iti abko tä ti mike ütiäte amne niara abko kukwe ükatekä ni jökrä kräke. <sup>51</sup> Ti bike kukwe era erere niere munye: Nire nire käkwe ti kukwei mikadre täte abko ñan krütadi, nieba Jesukwe.

<sup>52</sup> Angwane nitre israelita ji dokwäte käkwe nieba mda ie:

Mtare üai käme tä mabtä nunta niere, ye abko era nära gare metre nunye mabtä, ñobtä ñan angwane Abraham amne nitre Ngöbö kukwei niekä kirakira krütani jökrä amarebti nire nire käkwe ti kukwe mikadre täte abko ñan krütadi, mata niere ye. <sup>53</sup> ¿Ma abko bari ütiäte nun mräkä Abrahamkrä ya? Ñakare jire raba ruen nunye, ñobtä ñan angwane Abraham krütani amne nitre Ngöbö kukwei niekä kirakira krütani jökrä. ¿Ma abko nire amarebti ja nibi ruen bari mae niaratrekrä ye? nieba romone kwetre Jesuye.

<sup>54</sup> Jesu käkwe nieba mda ietre:

Tikwe bikadre kri ja mikakäre ütiäte au, ye ngwane tikwe ja mikadre ütiäte ngwarbe, akwa ti Rün ara käta ti mike ütiäte. Ti Rün ye mden abko Ngöbö munkwe mutta niere, akwa mikata ñakare ütiäte munkwe. <sup>55</sup> Ngöbö ye abko gare ñakare munye, akwa ti abko ie niara gare kuin. Ne aisetä niara gare ñakare tie, tikwe niedre, ye ngwane ti rabadre ni ngökaka mun kwrere arato, akwa niara gare kuin tie bkänä amne titä niara kukwei mike täte. <sup>56</sup> Ti köböi mikani ye abko mun mräkä käne Abraham tö namani tuai, aisetä namani töbike ti köböibtä angwane, kä namani juto btä. Yebti ti rükadre köbö ño te abko Abrahamkwe tuani angwane, kä namani nuäre krübäte btä, nieba Jesukwe.

<sup>57</sup> Yebtä abko, nitre israelita käkwe nieba mda Jesuye:

¡Jo! Nin kä ngämi gre ketebu bti kwä jätä mae. ¿Ma ye abko käkwe Abraham tuani mata niere ya? nieba kwetre Jesuye.

<sup>58</sup> Angwane Jesukwe nieba mda ietre:

Kukwe era erere ti bike niere munye: Abraham ngämi därrere, ye känenkri ti nämanena nüne. Abko kore se, nieba kwe nitre israelita ji dokwäteye.

<sup>59</sup> Abtä nitre israelita ye käkwe jä dianba kisete Jesu kämikakäre, akwa nitre nämane yete, ye ngätäite Jesukwe ja rükanteba, bti ju blitakrä Ngöböbe bäre Jesu näma, ye känti Jesukwe kä mikakaba tiebe amne rikabata mentokwäre.

## 9

*Ni okwä kä drünente abko Jesukwe mikaninta kuinta*

<sup>1</sup> Abti bati Jesu rikaba ji ngrabare angwane, ni näma iti jite btä Jesu okwä rababa. Ni ye abko okwä kä drünente. Niara abko därebare kore, aisetet kä tuen ñakare ie abko näma jite. <sup>2</sup> Abtä nun ja tötitaka Jesube käkwe nieba ie:

¿Dirikä, ñobtä ni se därebare okwä kä drünente kore? ¿Niara meye amne rün käkwe ja mikani ngite Ngöbö rüere ya? o ¿Niara ara jire käkwe ja mikani ngite au Ngöbö rüere abtä därebare kore ya? nieba nunkwe Jesuye.

<sup>3</sup> Angwane Jesukwe nieba mda nunye:

Ñan niara meye amne rün käkwe ja mikani ngite Ngöbö rüere, abtä därebare kore. Erere arato, ñan niarakwe ja mikani ngite abtä därebare kore. Akwa Ngöbö diebti sribi kri ñan tuabare rabadre bare, abkokäre niara därebare kore. <sup>4-5</sup> Tita kä nebtä mun ngätäite nete angwane, ti abko ñotra ni jökrä kräke, aisetet titi mun ngätäite nete angwane, ni ti juanka ye kräke nikwe sribidre kä trä ngwenbti, ñobtä ñan angwane ti järikadi munkän angwane, kä jatadi kä iko kwrere, ye näire ni ñan rabadre sribire jire chi mda, nieba Jesukwe.

<sup>6</sup> Jesukwe blitaba kore, yebti tö rababa kukwe ye bë mikai, käkwe ni ye mikaba kuinta krörö: käli kitaba temen kwe, mritaba dobrobe kwe, bti dobro ye jüanteba ni ye okwäbtä kwe, <sup>7</sup> bti nieba kwe ie:

Ñö okwä Siloé, ye te nän ja okwä bätete, nieba kwe ie.

(Siloé ye abko “juani” nieta kukwe hebreore.) Ye erere ni ie kä tuen ñakare ye rikaba, käkwe ja okwä bätäninte, bti nikaninta ja gwiriete angwane, kä namaninta tuenta ie.

<sup>8</sup> Abtä nitre nünanka känimékäname niara kenta temen amne nitre kä nämane niara tuen ngwian kärere käre, ye namani niere jae kwärikwäri:

¿Ni noko nämane nebe täkänintbe jite ngwian kärere yera? rababa niere.

<sup>9</sup> Angwane ni ruäre namanintre niere:

Niara ara se, namanintre niere.

Akwa ni mda mda abko namani niere:

Ñakare, akwa ni mda bësi niara bë kwrere se, namanintre niere.

Akwa ni ye ara jire käkwe niebare:

Ti ne ara nämane ngwian kärere jite ye, niebare kwe.

<sup>10</sup> Angwane ni mda mda käkwe niebare ie:

¿Ño köböire kä nena tuen mae mtare? niebare kwetre ie.

<sup>11</sup> Niara käkwe niebare mda:

Ni kädekata Jesu ye käkwe dobro mriti, bti jünunte ti okwäbtä kwe amne nini krörö kwe tie: Ñö okwä Siloé, ye känti nän amne makwe ja okwä bätäte, nini kwe tie. Ye erere ti niki, käkwe ja okwä bätrite angwane, kä nibibe tuen tie, niebare kwe ietre.

<sup>12</sup> Angwane ni bariseo mda mda ye käkwe niebare mda ie:

¿Ni kädekata makwe ye abko tä mdente? niebare kwetre ie.

Niara käkwe niebare mda:

Niara tä mdente gare ñakare tie, niebare kwe ietre.

*Nitre bariseokwe ñäkäbare Jesu rüere*

<sup>13-14</sup> Jesukwe dobro mritaba kälibe, bti ni okwä kä drüente ye okwäbtä jüanteba kwe angwane, kä rababa tuenta ie, ye abko Jesukwe nuenba köbö jadükakrä näire. Yebtä abko ni okwä kä drünente Jesukwe mikabata kuinta ye järikaba mda nitre bariseo ngwärekri.

<sup>15</sup> Angwane ño köböire namaninta kuinta niebare kwetre ie. Niara käkwe niebare ietre:

Dobro mriti kwe, jünunte ti okwäbtä kwe, bti tikwe ja okwä bätrite amne mtare kä nibi tuen tie, niebare kwe ietre.

<sup>16</sup> Abtä nitre bariseo ruäre namani niere:

Ni sribi ye nuenkä abko ñan jatani Ngöbökri, ñobtä ñan angwane tä köbö jadükakrä mike ütiäte ñakare jae, namani niere.

Akwa bariseo ruäre abko namani niere:

¡Ni ngite Ngöbö rüere ñan rabadre sibi kri ñan tuabare nuene ni noko kwrere! namanintre niere.

Yebtä abko namanintre ja kwete kwäríkwäri Jesubtä. <sup>17</sup> Bti ni okwä kä ikote ie kä namani tuen, ye ie niebareta mda kwetre:

¿Ni käkwe kä mikani tuenta mae, ni ye abko ni ño nieta makwe? niebare kwetre ie.

Niara käkwe niebare mda:

Niara abko ni Ngöbö kukwei niekä titä niere, niebare kwe ietre.

<sup>18</sup> Akwa ni ye abko därebare amne okwä kä drünente, aisetet kä tuen ñakare ie, akwa okwä namaninta kuinta, aisetet kä namani tuen ie, ye abko nitre israelita ji dokwäte ñan tö namani mikai era, abtä ni okwä kä drünente ye meye btä rün käräbare kwetre.

<sup>19</sup> Ni ye meye btä rün nükani angwane, niebare kwetre ietre:

¿Ni ne abko, mun ngobo munkwe bkänä ya? ¿Erere arato, därebare angwane, kä tuen ñakare ie bkänä, munta niere ya? Ño köböire kä tuen ie mtare, ye niere nunye, niebare kwetre ietre.

<sup>20</sup> Angwane ni ye meye amne rün käkwe niebare mda:

Niara abko nun ngobo nunkwe bkänä. Erere arato, därebare angwane, kä tuen ñakare ie bkänä, <sup>21</sup> akwa ño köböire kä tuen ie mtare, ye abko gare ñakare nunye. Erere arato, nirekwe kä mikani tuenta ie, ye gare ñakare nunye, aisetet munkwe ngwiantari niaraye. Niara abko nena ünän, aisetet dre dre nakaninkä btä, ye niarakwe niedre au jakrä munye, niebare kwetre nitre israelita ji dokwäteye.

<sup>22</sup> Ni ie kä tuen ñakare ye meye amne rün, btä nitre israelita ji dokwäte jürä namani, aisetet nieba kore kwetre, ñobtä ñan angwane Jesu abko Ni Dianinkä Ngöböökwe, ye nirekwe niedre, ni ye abko kitadrekä sinagoga bäre mento abko nitre israelita ji dokwäte käkwe ükaninte kore, ye abko jürä namani ni ye meyebtä amne rünbtä. <sup>23</sup> Ne aisetet niara meye amne rün käkwe niebare: Niara nena ünän, aisetet kukwe nakaninkä ño ño btä, ye munkwe ngwiantari ie amne niarakwe niedi au munye, niebare kwetre.

<sup>24</sup> Angwane ni okwä nämane kä ikote käne, ye nitre israelita ji dokwäte käkwe käräbareta bobuta, bti niebare kwetre ie:

Ngöbö okwäbti kukwe era erere niere nunye, ñobtä ñan angwane Jesu ye abko ni ngututu kukwe kämekäme nuenkä Ngöbö rüere, ye gare kuin nunye, niebare kwetre ie.

<sup>25</sup> Ni ye käkwe niebare mda:

Niara abko ni kukwe kämekäme nuenkä ya abko gare ñakare tie, akwa ti okwä nämane kä ikote amne niara köböire kä tuen kuin tie mtare. Ye aibe gare tie, niebare kwe ietre.

<sup>26</sup> Abtä nitre israelita ji dokwäte käkwe niebare mda ie:

¿Dre nuenbare kwe mabtä? ¿Ño köböire kä mikani tuen kwe mae? niebare kwetre ie.

<sup>27</sup> Abtä niarakwe niebare:

Kukwe gare tie, erere tikwe ninina jökrä munye, akwa munkwe ñan ti kukwei miri era. <sup>28</sup> Se drekäre tikwe kukwe arabe niedreta bobuta munye, ie mun tö nibi ye? ¿Mun tö nibi ja getai arato Jesube ya amarebti mun nibi kukwe ngwentari janknu kore tie ye? niebare kwe ietre.

<sup>28</sup> Angwane nitre israelita ji dokwäte rikaba ngren ngren ni yebti, käkwe niebare ie:

Ma abra ja getaka Jesu yebe, akwa nun abko tä nekete Moisékri. <sup>29</sup> Ngöböökwe blitabare Moisébe, ye gare kuin nunye, aisetet nunta nekete niarakri. Akwa Jesu ye abko jatani mdenkri abko gare ñakare jire chi nunye, niebare kwetre ni ye.

<sup>30</sup> Abtä ni ye käkwe niebare mda ietre:

¡Rä jire niara jatani mdenkri gare ñakare munye, yebtä ti töi ñan nebe kriütare mda! Akwa ti abko okwä mirita kuinta kwe amne kä nibi tuen tie, <sup>31</sup> aisetet ni kukwe kämekäme nuenkä Ngöbö rüere käta ja di kärere Ngöböye sibi kri ñan tuabare nuenkäre abko ie Ngöböta ja di bien ñakare, ye gare kuin nie. Akwa nire nire tä Ngöbö mike ütiäte amne tä Ngöbö Kukwei mike täte aibe die mikata Ngöböökwe sibi kri ñan tuabare nuenkäre, ye abko garera nie arato. <sup>32</sup> Erere arato, ni därebare okwä kä drünente ti kwrere abko ni mdara jire kä mike tuen ie, ye abko ni ngämi kukwe nuen jire chi. <sup>33</sup> Ne aisetet, Jesu

ñan jatadre Ngöbökri, akräke sribi ütiäte kri ñan tuabare ye kwrere ñan rabadre bare jire chi ie Ngöbö diebti, niebare kwe.

<sup>34</sup> Abtä nitre israelita ji dokwäte käkwe niebare mda ie:

Kukwe kämekäme kri krübäte Ngöbö rüere mabtä, aisetet ma därebare abti kä nüke mtare ma ngite kri Ngöbö rüere. ¿Ma ye abko tö kite dirire nunye mtare ñan ñan? niebare kwetre ie.

Bti ni ye juantariba künken kwetre.

*Nitre israelita ji dokwäte abko ie kukwe metre Ngöböbtä gare ñakare*

<sup>35</sup> Yebti ni ie kä mikani tuenta Jesukwe, ye kitani künken sinagoga bäre mento gaba Jesukwe. Yebti Jesu rababa ngätäi ben angwane, Jesukwe nieba ie:

¿Ni Kä Nebtä Ngobo bti mata tödeke ya? nieba kwe ie.

<sup>36</sup> Angwane niarakwe nieba mda:

Ti Dänkien, nire abko Ni Kä Nebtä Ngobo makwe niedre tie angwane, tikwe tödekadi bti, nieba kwe Jesuye.

<sup>37</sup> Jesukwe nieba mda ie:

Ti ara tuata makwe, ti ne mdən ben mata blite, nieba kwe ie.

<sup>38</sup> Ye btäräbe ni ye rababa ngukudokwäbti Jesu ngwärekri, Jesu mikakäre ütiäte, käkwe nieba:

Tita tödeke mabti ti Dänkien, nieba kwe Jesuye.

<sup>39</sup> Yebti Jesukwe nieba mda:

Ti jatani kä nebtä kukwe rabadre ükaninte ni jökrä kräke amne, ni ie kukwe metre Ngöbökwe gare ñakare amne ni ie kä tuen ñakare ye kwrere abko ie kä rabadre tuen angwane, kukwe metre Ngöbökwe rabadre gare ie, abkokäre ti jatani. Erere arato, nire nire ie kä tuen kuin tä nütüre, aisetet kukwe metre Ngöbökwe garera ie tä nütüre, ni ye abko tä ja ngökö au abko ie kä ñan rabadre tuen, abkokäre ti jatani, nieba Jesukwe ie.

<sup>40</sup> Yebtä abko nitre bariseo näma ruäre Jesube yete käkwe nieba ie:

¿Kukwe metre Ngöböbtä gare ñakare nunye arato, aisetet nun okwä kä drünente amne kä tuen ñakare nunye abko mata niere nunye ya? nieba kwetre mda Jesuye.

<sup>41</sup> Angwane Jesukwe nieba mda ietret:

Mun okwä tädre kä drünente angwane, kä ñan rabadre tuen munye, akräke kukwe käme Ngöbö rüere, ye munkwe nuendre ñakare amne mun ñan rabadre ngite Ngöböye; akwa kukwe metre Ngöbökwe garera kuin munye, aisetet kä tuen kuin munye munta niere au jabtä, aisetet mun ngite janknu Ngöbö rüere. Abko kore se, nieba Jesukwe nitre bariseoye.

## 10

*Obeja ngibiaka era metre gare kuin obejaye*

<sup>1-3</sup> Yebti Jesukwe nieba mda:

Ti bike kukwe era erere niere munye. Ni obeja ngibiaka era metre abko käre tä ni mda mikete jukwebtä obeja ngibiare deo jakrä. Ye mdən kisete, obeja ngibiaka ye tä nüke angwane, ni jukwe ngibiaka tä jukwe tike ie angwane, obeja ngibiaka ye tä nikene obeja kä deke kratirekratire ja täritäri. Niara kukwei gare obejaye, aisetet obeja kwe tä nikene jiebti amne tä nikene ngwena ki bäre mento mikä känene. Akwa ni obeja ngibiaka ñakare era metre abko tä nakwen kibti ta, ñobtä ñan angwane niara abko gokä, aisetet tä kite tiebe kibti ta. Akwa ni obeja ngibiaka era metre bkänä abko tä nüke jukwebtä obeja kwe kärere. <sup>4</sup> Yebti obeja kwe tärä nikene jökrä ki bäre mento angwane, niara tä nikene käne amne obeja tä nikene jiebti, ñobtä ñan angwane niara abko kukwei gare kuin obeja kweye.

<sup>5</sup> Akwa ni gare ñakare obejaye abko ngäniene obeja tä ngitie jirekäbe amne ñan tä nikene jiebti, ñobtä ñan angwane niara abko kukwei gare ñakare obejaye, aisetet obeja tä ngitie, nieba Jesukwe nitre bariseoye.

<sup>6</sup> Jesukwe blitaba kore jabtä, käkwe nitre bariseo bärä mikaba ni gokä kwrere, ye abko dre bärä mikaba kore ñan rükaba gare nitre bariseoye.

<sup>7</sup> Angwane Jesukwe niebata mda:

Ti bike kukwe era erere niereta mda munye abko krörö: Ti abko jukwe kwrere abko känti obeja jatadre. <sup>8</sup> Ni jökrä nükani ti känenkri ja Ni Dianinkä Ngöböökwe niere abko nitre ni ngökaka amne gokä, akwa obeja era metre tikwe abko käkwe kukwei nuani ñakare. <sup>9</sup> Ti abko jukwe kwrere, aisetet nire nire rükadre ti köböire ki teri Ngöbö känti, ye abko rabadi dianintari. Ne aisetet, obeja tä niken ki teri, bti tä nikenta ki bäre mento amne mikä kuin tä kwen kwetadre ietre, ye kwrere nire nire rikadre ti köböire Ngöbö känti abko ie jäandrän kuin kwandre. <sup>10</sup> Akwa ni gokä tä kite gore, ni kämike amne jäandrän jökrä juankäre ngwarbe nikän; akwa ti abko jatani ni mikakäreta nire Ngöböbe amne ni rabadre nüne bäri kuin kärekäre, abkokäreti jatani.

<sup>11</sup> Mdakäre abko, ti abko ni obeja ngibiaka kuin kwrere. Ni obeja ngibiaka kuin abko tä biare ngataen obeja kräke, obeja diantarikäre. <sup>12</sup> Akwa ni ngwian ganainkä jae obeja ngibiabtä abko lobo tä kite tuen ie obeja kukwäre angwane, tä ngitie lobo ngäniene amne tä obeja mikete kaibe, ñobtä ñan angwane niara abko ñakare obeja ngibiaka amne obeja ye ñakare kwe, aisetet tä mikete loboye amne lobo tä niken obeja kwete amne tä obeja juentari kratikrati kwäräkwärä. <sup>13</sup> Ni ngwian ganainkä obeja ngibiabtä ye abko tä ngitie lobo ngäniene amne tä obeja mikete kaibe, ñobtä ñan angwane niara töita ja kwata ngibiabtä, akwa obeja ngibiadre ye abko ütiäte ñakare kräke, aisetet tä ngitie kore.

<sup>14-15</sup> Mdakäre abko, ti ni obeja ngibiaka kuin kwrere, ñobtä ñan angwane ti gare kuin ti Rünje amne ti Rün gare kuin tie, ye kwrere obeja tikwetikwe erere gare kuin tie amne ti gare kuin ietre arato. Ti abko obeja ngibiaka kuin kwrere, aisetet ti gatadi obeja tikwe kräke. <sup>16</sup> Mdakäre abko, nitre ñakare israelitare ngätäite obeja mda mda tärä tikwe, akwa tä ñakare ki kwaitibe teri obeja tikwe tikwe nitre israelita ngätäite ben gware. Akwa ti jatadre obeja ye ngwena arato mikakäre ki teri obeja nitre israelita ben gware, amne obeja ye käkwe ti kukwei nuadre amne ti kukwei mikadre täte kwetre angwane, rabadre nüne ki kwaitibe teri jökrä amne niaratre ngibiaka rabadi itibe arato abko ti ara. <sup>17</sup> Ti abko bike ja kwata bien müre ketadre, ti rabadita nire bobukäre abkokäre, aisetet ti Rün tikwe käta ti tarere. <sup>18</sup> Tikwe ñan ja biandre müre ketadre, ye ngwane ni ñakare jire iti käkwe ti müre ketadre ja töi jenbti. Ti ara jire käta ja bien müre ketadre au, aisetet ti müre ketai, akwa ti abko di tärä ja bien müre ketadre amne ti di tärä ja mikakäre nünenta, ye abko ti Rün käkwe nuemna tie, erere tita nuene. Abko kore se, nieba Jesukwe nitre israelitaye.

<sup>19</sup> Jesukwe blitaba kore, ye kukwei nuaba nitre israelitakwe angwane, niaratre töi rababa bär jene jene jökrä. <sup>20</sup> Ne aisetet ni kwati rababa niere:

Üai käme tä btä, aibe käta kä kwitekä dokwäbti, aisetet tä ñäke kore. ¿Se drekäre munta kukwe mike ütiäte se? nieba kwetre.

<sup>21</sup> Akwa ni ruäre abko rababa niere:

Nire nire btä üai käme tä ye abko ñan raba blite jire chi ni se kwrere. Mdakäre abko, ni ie kä tuen ñakare abko ie üai käme tä kä mike tuenta ñakare jire chi, rababa niere jae kwäräkwäri.

#### *Nitre israelita ji dokwäte käkwe tödekaní ñakare Jesubti*

<sup>22</sup> Kä ye ngwane abko kä tibo, kä ñüre angwane, ju blitakrä Ngöböbe Jerusalén abko mikanintadbe Ngöbö ngwärekri mekera abko nitre israelita nämane ngwenta töre jae, aisetet nämane jökrä bietabtä Jerusalén.\* <sup>23</sup> Angwane Jesu nämane dikekä ju blitakrä Ngöböbe ye bäre jukä kädianta Jukä Salomónkwe käntita mda angwane, <sup>24</sup> nitre israelita ji dokwäte jataba ruäre, käkwe ja ükakröba Jesu bäre, käkwe nieba ie:

Ma abko nire metre abko ñan tä nüke gare nunye, aisetet nun moto iko töbikabtä kore, aisetet ma abko Ni Dianinkä Ngöböökwe ara ya abko niere gwängwarbe nunye, nieba kwetre Jesuye.

<sup>25</sup> Abtä Jesukwe nieba mda ietre:

\* 10:22 Bieta ye abko kädianta Hanuca mtare.

Ti abko nire, ye tikwe niebarera munye, akwa munkwe ñan ti kukwei mikani era amne mun ñan tä tödeke tibti. Ye abko, sribi ñan tuabare tita nuene ti Rün diebti niarata tibe bå mikakäre, ye abko tä ti mike gare metre, <sup>26</sup> akwa mun ñan tö tödekai tibti, ñobtä ñan angwane mun abko ñakare obeja tikwe, aisetet muta nuene kore. <sup>27</sup> Akwa obeja tikwetikwe abko ie ti kukwei gare kuin, käta ti mike täte amne, niaratre gare kuin tie arato, aisetet obeja tikwe erere tä niken ti jiebti obejata niken ngibiaka jiebti ye kwrere. <sup>28</sup> Amne tikwe obeja tikwetikwe mikadi ñüne kärekäre Ngöböbe amne Ngöbökwe ñan juandi ja okwä bäre mento kä ja tare nikakrä ye känti. Erere arato, ni mda di ñakare jire dianakrä ti kisete. <sup>29</sup> Ye abko, ti Rün di kri kákwe obeja biani tie, aisetet ni mda di ñakare jire obeja ye dianakrä ti Rünkän. <sup>30</sup> Ye kwrere ti Rün btä ti, nun abko töi ja kwrere amne nunta ketetibe, nieba Jesukwe nitre israelita ji dokwätaye.

<sup>31</sup> Yebtä abko nitre israelita ji dokwätate kákwe jä dianba kisete Jesu kämikakäre jäbti.  
<sup>32</sup> Abtä niarakwe nieba mda ietre:

Ti Rün diebti tikwe jändrän kuinkuin nuenbare kabre ni mda mda die mikakäre, ¿akwa kukwe kuin nuenbare tikwe, ye mdan namani blo mun kräke abko dokwäre mun tö nibi ti kämikai jäbti ye? nieba Jesukwe ietre.

<sup>33</sup> Abtä nitre israelita ji dokwätate kákwe nieba mda Jesuye:

Ñan makwe jändrän kuin nuenbare abko dokwäre nun tö ma kämikai jäbti, akwa mata ñäke ngwarbe Ngöbö rüere amne ma ngwarbe nun kwrere käta ja mike Ngöböre au. Yebtä nun tö ma kämikai jäbti, nieba kwetre ie.

<sup>34</sup> Abtä Jesukwe nieba mda ietre:

Ye abko, Ngöbö Kukwei yebtä Ngöbökwe kukwe niebare krörö:

*Salmos 82.6*

Mun abko ngöbötre, tikwe nieba munbtä, abko Ngöbökwe niebare, tä tikani niara Kukweibtä. <sup>35</sup> Ngöbö Kukweita tikani kore, ye abko ni ñan raba rükente jire chi abko garera nie amne, ni jökrä ie Ngöbökwe ja Kukwei biani abko ngöbötre niebare kwe ie, <sup>36</sup> aisetet ¿se ñobtä abko tita ja Ngöbö Odei niere abko nibi blo munkrä se? Ngöbökwe ti dianinkä ja Odeire, kákwe ti juani nitre kukwe nuenkä kämekäme Ngöbö rüere ye ngätäite, tita niere aisetet ¿se ñobtä abko tita ja Ngöbö Odei niere angwane tita ñäke ngwarbe Ngöbö rüere abko mutna niere tie? <sup>37</sup> Ti abko Ngöbö Odei tita niere, akwa tikwe ñan sribi ti Rünkwe nuendre angwane, munkwe ñan ti kukwei mikadre era; <sup>38</sup> akwa tikwe sribi ti Rünkwe nuendre, ye ngwane nane mun ñan tö ti kukwei aibe mikai era abko tädbe. Akwa tita sribi ti Rünkwe nuene era metre, aisetet yebti munkwe tödeka, ti Rünnta ketetibe tibe amne tita ketetibe ben ye rükadre gare metre munye, abkokäre munkwe tödeka sribi ti Rünkwe nuenta tikwe yebti.

<sup>39</sup> Abtä nitre israelita ji dokwätate tö rababa Jesu kain ngite bobukäre, akwa Jesu gitia kän.

<sup>40</sup> Angwane Jesu rikabata Ñö Jordánbtä, Juan Bautista nämane ni ngökö ñöte, ye känti Jesu rababa nünentbe. <sup>41</sup> Angwane ni kwati rikaba känti ja tuakäre ben, kä rababa niere:

Sribi kri ñan tuabare abko Juankwe nuenbare ñakare, akwa kukwe nieba kwe Jesubtä abko kukwe era erere nieba kwe ñan ñan abko ni kwati rababa niere.

<sup>42</sup> Angwane ni kwati näma yete kákwe tödekaba Jesubti.

## 11

### *Jesu kukwe muko Lázaro krütani*

<sup>1-2</sup> Kä ye ngwane ni iti kädian nämane Lázaro näma näma nüne juta Betaniate abko namani bren jume. Juta Betania yete abko Marta amne María näma nüne ngwai Lázarobe. María ye mdan abko kákwe ñö rá bäre kekaba ni Dänkien ngotobti, bti ni Dänkien ngoto rötoba ja dokwå drüenbtí kwe. <sup>3</sup> Lázaro namani bren jume, aisetet ngwai nibu ye mdan kákwe ni mda juanba niere krörö Jesuye: Ni Dänkien, ma kukwe muko kuin makwe, mata tarere ye bren abko juanba niere kwetre Jesuye.

<sup>4</sup> Erere bkänä ni ye nikani, rükaba mate Jesu känti angwane, Jesukwe kukwei nuaba kore, bti nieba kwe:

Bren ye kisete niara ñan krütadre janknukäre akwa, bren ye köböire Ngöbö di kri amne ti Ngöbö Odei di kri rabadi mikani tuadre, nieba Jesukwe.

<sup>5</sup> Jesu abko kwe Marta, María amne Lázaro nämane tare kri, <sup>6</sup> akwa Lázaro bren nie rükaba ie angwane niara näma, ye känti rababa köböbu mda.

<sup>7</sup> Bti nitre ja tötitikaka ben ie nieba kwe:

Bränta kä Judeate, nieba kwe.

<sup>8</sup> Abtä nun ja tötitikaka Jesube käkwe nieba mda ie:

Dirikä, nitre israelita ji dokwätetö rababa ma kämikai jäbti kä Judeate, ye abko käi ngämi niken raire ta. ¿Kä ye känti abko ma tö nibira rikaita bobuta ya? nunkwe nieba ie.

<sup>9</sup> Abtä Jesukwe nieba mda nunye:

¿Kä ngwen abko tä neme ñänä okwä krä jätabti krobu ñan ñan? Ne aisetetita dikekä kä ngwenbti angwane, kä tuen kuin nie, aisetetita ni ngotota ritete ñakare, ñobtä ñan angwane kä trä ngwen kä nebtä yebti abko käta nebe tuen kuin ja käne nie. <sup>10-11</sup> Akwa nire erere rikadre dikekä deo, ye ngwane kä ñan rabadre tuen ie, aisetetita ngoto rabadre ritete. Tita niere kore, ñobtä ñan angwane ti abko kä trä ngwen kwrere amne tita nete angwane, kä tärä sribikrä. Ni kukwe muko Lázaro nikani kibien, akwa ti bike niken gaenkröta, nieba Jesukwe nunye.

<sup>12</sup> Angwane nun ja tötitikaka ben käkwe nieba mda ie:

Kiterate kuinta, aisetetita tä kibien, nunkwe nieba ie.

<sup>13</sup> Akwa Lázaro abko krütanina abko Jesu näma niere nunye, akwa Lázaro nikani kibien bkänä abko Jesu näma niere, nun rababa nütüre. <sup>14</sup> Abtä kukwe era erere nieba metre kwe nunye krörö:

Lázaro kürera, <sup>15</sup> akwa tita ñakare känti angwane küre, ye abko käi nibi nuäre tibtä, ñobtä ñan angwane Lázaro küre, ye köböire kukwe mda rakadikä abko rabadi bäri kuin munkrä abko käkwe mun die mikadi tödeke bäri tibti, aisetetita brän Lázaro tuen, nieba Jesukwe nunye.

<sup>16</sup> Angwane ni iti ja tötitikaka Jesube kädian nämane Tomás arabe kädian nämane “Munkin” abko käkwe nieba nun ja tötitikaka Jesube mda mdaye:

Ni kämikadre gware niarabe kä Judeate, abkokäre brän siba ben, nieba kwe.

### *Jesukwe Lázaro ngwai moto mikani nuäre*

<sup>17</sup> Ye erere Jesu rikaba, rikaba nebe juta Betaniate mda angwane, Lázaro doboi mikani abko käi nikana köböökä jire ta angwane, Jesu rikaba neme. <sup>18</sup> Juta Betania abko näma käname Jerusalén ken, bäsí kilometro krämä näre. <sup>19</sup> Ne aisetetita nitre israelita ji dokwätetö rikaba kwati yete basare Martaye amne Maríaye moto ketabtäkäre kä mikakäreta nuäre btätre, ñobtä ñan angwane ngwai Lázaro krütani kän aisetetita.

<sup>20</sup> Angwane Jesu rikaba neme juta ken, ye gaba Martakwe angwane, jataba ngäbti, akwa María abko rababa gwi. <sup>21</sup> Marta rikaba Jesu känti angwane, nieba kwe Jesuye:

Ti Dänkien, ma tädre nete akräke ti ngwai ñan krütadre tikän, <sup>22</sup> akwa mtare makwe dre dre kärädré Ngöböye, erere biandi jökrä kwe mae, ye abko gare kuin tie, nieba kwe ie.

<sup>23</sup> Abtä Jesukwe nieba mda ie:

Ma ngwai rükadita nire, nieba kwe Martaye.

<sup>24</sup> Angwane Martakwe nieba mda:

Kä mrä angwane, ni krütani krütani rükadita nire, ye näire Lázaro rükadita nire arato, ye abko gare kuin tie, nieba kwe Jesuye.

<sup>25</sup> Abtä Jesukwe nieba ie:

Ti abko ni krütanina mikakata nire amne ti abko ni mikaka nüne ketetibe Ngöböbe. Nire nire käkwe tödekadre tibti abko krütadi era metre, akwa rükadita nire amne, <sup>26</sup> nire nire tä nüne käkwe tödekadre tibti abko ñan krütadre kärekäre Ngöbö okwä bäre mento. ¿Ne abko era makrä ya Marta? nieba Jesukwe ie.

<sup>27</sup> Angwane niarakwe nieba mda ie:

Jän, ti Dämkien. Ma abko Ni Dianinkä Ngöböökwe amne ma Ngöbö Odei abko rükadre kä nebtä, ye abko tita mike era jae, aisetetita tödeke mabti, nieba kwe Jesuye.

<sup>28</sup> Martakwe blitaba kore Jesube, yebti Marta rikaba etba María kärere, käkwe nieba tiebe krörö ie:

Dirikä tä nete, käkwe ma käräniri, nieba kwe ie.

<sup>29</sup> Martakwe nieba kore Maríaye, ye btäräbe María rükaba dikekä krö, jataba niken ja tuakäre Jesube. <sup>30</sup> Akwa Jesu ngämi neme jutate, aisetetita rükaba ngäbti, ye känti näma juta bäre. <sup>31</sup> Angwane nitre israelita näma gwi Marta amne María känti kä mikakäreta nuäre btätre abko okwäbti María rükaba dikekä krö, bti rikaba jötrö, angwane nitre israelita ye rikaba jökrä jiebti, ñobtä ñan angwane María rikaba müen dobobti rababa nütüre, aisetetita rikaba kore María jiebti. <sup>32</sup> Akwa Jesu näma, ye känti María jataba nüke angwane, María rikaba ngitiekä ngukudokwäbti temen Jesu ngotobtä Jesu mikakäre ütiäte, käkwe nieba ie:

Ti Dämkien, ma tädre nete akräke ti ngwai ñan krütadre tikän, nieba kwe Jesuye.

<sup>33</sup> Angwane María btä nitre israelita rükaba Maríabe, ye rababa müen jökrä Jesu okwäbti. Abtä Jesu rababa ulire amne moto rababa däre krübäte, <sup>34</sup> käkwe nieba mda ietret:

¿Munkwe Lázaro doboi mikani mdente? nieba kwe.

Angwane niaratre käkwe nieba:

Jakwe tuen nete ti Dämkien, nieba kwetre mda.

<sup>35</sup> Angwane Jesukwe müuba arato. <sup>36</sup> Abtä nitre israelita käkwe nieba:

Lázaro nämane tare kri kwe tuen, rababa niere.

<sup>37</sup> Akwa ni ruäre abko rababa niere:

Ni ie kä tuen ñakare niara se käkwe kä mikani tuenta ie. ¿Se abko Lázaro ñan krütare, abkokäre jäandrän mdara jire nuendre kwe kräke abko ñan rabadre bare ie ya? rababa niere Jesu rüere.

#### *Jesukwe Lázaro mikaninta nire*

<sup>38</sup> Angwane Jesu moto rababata däre, käkwe krötaba Lázaro doboi kukwäre angwane, kä mkä te Lázaro doboi mikani, yebti jä oto kwata kri näma mikani. <sup>39</sup> Angwane Jesukwe nieba:

Jä oto ye denkä mento dobobti yete, nieba kwe.

Abtä Lázaro ngwai Marta käkwe nieba Jesuye:

Ti Dämkien, kä nena köböbkä jire niara krütani amne doboi mikani, aisetetita rä nena kure, nieba kwe ie.

<sup>40</sup> Abtä Jesukwe nieba mda ie:

¿Makwe tödekadre tibti angwane, Ngöbö di kri bär nuäre ye makwe tuadi, tikwe ñan nini mae ya? nieba Jesukwe ie.

<sup>41</sup> Angwane jä oto ye diankaba mento. Ye btäräbe Jesukwe nikraba kä käinbti, käkwe nieba:

Ti Rün tikwe, tikwe blitaniri mabe amne mata biare ti die mike, yebti ti tö kuin niei mae. <sup>42</sup> Käre tita blite mabe ja di kärere mae angwane, mata nuene ye gare kuin tie, akwa makwe ti juani ye abko nitre tä nete noko, kräke rabadre era, abkokäre tita blite kore mabe, nieba Jesukwe Rünye.

<sup>43</sup> Jesukwe blitaba ünän jökrä kore, ye btäräbe ngrateba kri kwe, käkwe nieba:

¡Lázaro, jakweta künken kä mkä ye bäre mento! nieba kwe.

<sup>44</sup> Ye btäräbe Lázaro näma nguse, ye kise amne ngoto näma mrianinte jökrä dänte abko erere jataba kä mkä yete mentokwäre angwane, ngwäre abko näma mrianinte jökrä jatabata kä mkäte mento. Angwane nitre näma yete, ye ie Jesukwe nieba:

Tikete, bti tuemetre dikekä, nieba kwe.

Erere nuenba kwetre.

#### *Jesu rüe tö namani kain ngite tiebe*

(Mateo 26.1-5; Marcos 14.1-2; Lucas 22.1-2)

<sup>45</sup> Jesukwe Lázaro mikabata nire, ye abko nitre israelita näma Marta amne María mukore ye kákwe tuaba angwane, niaratre kwati kákwe tödekaba Jesubti. <sup>46</sup> Akwa ni mda mda kákwe tödekani ñakare Jesubti abko rikaba nitre bariseo känti angwane, Jesukwe Lázaro mikabata nire ño, ye abko niebare jökrä kwetre nitre bariseoye. <sup>47</sup> Abtä nitre bariseo amne nitre blitaka Ngöböbe ni mda mda diäre dänkientre kákwe nitre sribikä Sanedrinbtä käräbare gätäkäre, bti niebare jae kwärikwäri kwetre:

Ni kädekata Jesu käta sribi kri ñan tuabare nuene kabre ni ngätäite. ¿Sebtä abko nikwe dre nuendre? <sup>48</sup> Nikwe tuadremetre sribi nuene janknu kore angwane, ni jökrä rabadi tödeke bti. Yebtä abko nitre romanobo tä nun dänkiene jatadi, kákwe ju blitakrä Ngöböbe nikwe se juandi ngwarbe jökrä amne, juta israelita nikwe noko juandi ngwarbe jökrä kwetre arato, niebare kwetre.

<sup>49</sup> Abtä ni iti kädian nämane Caifás abko nämane sribire nitre blitaka Ngöböbe ni mda mda diäre dänkiene kä ye näire abko kákwe niebare ietre:

¡Mun töi ñakare! <sup>50</sup> Ni gadrekä jökrä juta israelita nete, ye abko rabadre bári tare, akwa ni itibe krütadre ni jökrä täte amne ni jökrä kräke, ye abko rabadre bári kuin munkrä abko btä munta töbige ñakare, niebare Caifákwe.

<sup>51</sup> Caifás abko kákwe ñákabare kore, ye abko ñan niebare ja töi jenbti kwe, akwa kä ye ngwane niara nämane nitre blitaka Ngöböbe ni mda mda diäre dänkiene, aisetet Jesu krütadre nitre israelita täte abko niebare Ngöbö Üai köböire kwe. <sup>52</sup> Ye abko ñan Jesu krütadre nitre israelita aibe täte amne kräke, akwa Ngöbö ngäbriänkätre nämane kä ketareketare te kwäräkwärä abko rabadreta ükaninkrö jökrä ketetibe nitre Ngöbö ngäbriänkätre juta israelita ben gware, abkokäre Jesu krütadre, aisetet Caifákwe niebare kore. <sup>53</sup> Ne aisetet köbö ye näire mentokväre nitre sribikä Sanedrinbtä kákwe ja töi mikani gware jökrä Jesu müre ketakäre.

<sup>54</sup> Abtä Jesu ñan rabadre dikekä ja ngwärekri jökrä nitre israelita ji dokwáte ngätäite angwane, juta kä Efraín näma käname kä kaibe ken, ye känti Jesu rikaba amne rababa nünentbe yete nitre ja töitikaka benbe.

<sup>55</sup> Kä ye ngwane abko, bieta Pascua nitre israelitakwe abko köböi jatabara nüketa ja ken, aisetet nitre israelita kwati nünanka Jerusalén báre rikaba neme Jerusalén ja mikakäredbe Ngöbö ngwärekri bieta Pascua känenkri, rabadre neme ju blitakrä Ngöböbe känti Pascua mikakäre ütiäte jae, abkokäre rikaba. <sup>56</sup> Angwane nitre ye rababa näin jökrä Jesu kämentari, kä rababa niere krörö jae kwärikwäri ju blitakrä Ngöböbe ye känti:

¿Munta töbige ño? ¿Jesu rükai bietabtä nete ruen ya? rababa niere jae kwärikväri.

<sup>57</sup> Angwane nitre bariseo amne nitre blitaka Ngöböbe ni mda mda diäre dänkientre kákwe nieba krörö ni jökräye:

Jesu tä mdente raba gare munye angwane, munkwe mika gare jötrö nunye amne nunkwe kadi ngite, nieba kwetre.

## 12

*Meri iti kákwe ñö rä báne kekani Jesubti  
(Mateo 26.6-13; Marcos 14.3-9)*

<sup>1</sup> Yebti köbö ti Pascua känenkri, Jesu rikaba Lázaro känti juta Betaniate mda. Lázaro ne mden abko krütani, akwa Jesukwe mikaninta nire abko känti Jesu rikaba. <sup>2</sup> Jesu rababa yete angwane, mrö sribeba kwetadre Jesu mikakäre ütiäte angwane, Marta näma mrö dräire amne Lázaro abko näma täkänintbe siba mesabtä mröre Jesube. <sup>3</sup> Angwane María jataba kri ngwäri rä báne kä nardo ngwena bási botea ötare jire. Nardo ye abko ütiäte kri amne ñan nämane mritani jire ñöbe abko María jataba ngwena, bti Jesu mikakäre ütiäte Maríakwe nardo ye kekaba Jesu ngotobti, bti Jesu ngoto rötatabata ja dokwá drüenbtí kwe. Angwane kä rä rababa báne jökrä gwita temen nardo ye kisete.

<sup>4</sup> Angwane ni iti ja töitikaka Jesube kä Judas Iscariote kákwe Jesu kitadre ngise ye kákwe nieba:

<sup>5</sup> ¡Jo! ¡Ngwian ganaindre bási kä kwati jire btä kri ngwäri rä báne se rürümoindre abko bti ni bobre bobre die mikadre bá amarebti ñan rürümoindrí se! nieba kwe.

<sup>6</sup> Judas käkwe ñäkäba kore, akwa ñan ni bobre bobre ruentari tare ie, aisetet ñäkäba kore kwe. Akwa niara abko gore, aisetet ñäkäba kore kwe. Niara abko ngwian ngibiaka nunkrä, akwa näma ngwian ye goire ruäre nunkän, aisetet ñäkäba kore kwe. <sup>7</sup> Abtä Jesukwe nieba mda Judaye:

Niarakwe ti mikadre biare doboi mikadre, abkokäre nämane kri ngwäri ye üke tikrä, aisetet tuemetre kaibe. Makwe ñan nika. <sup>8</sup> Mdakäre abko, nitre bobre bobre abko tädi käre mun ngätäite nete, aisetet mun tö raba die mikai ñongwane, erere munkwe die mika, akwa ti abko ñan tädi kärekäre munbe nete. Abko kore se, nieba Jesukwe.

<sup>9</sup> Yebti Jesu näma juta Betaniate abko gaba nitre israelitakwe angwane, ni kwati jataba Jesu känti. Niaratre ye abko ñan jataba Jesu aibe tuakäre, akwa Lázaro krütani, mikaninta nire Jesukwe ye abko jataba tuakäre arato. <sup>10</sup> Abtä nitre blitaka Ngöböbe ni mda mda diäre dänkientre käkwe kukwe ükateba Lázaro kämikäre arato, <sup>11</sup> ñobtä ñan angwane Lázaro krütani akwa Jesukwe mikabata nire, aisetet Lázaro köböire ni israelita kwati käkwe tödekaba Jesubti amne ñan rababa nekete mda nitre blitaka Ngöböbe ni mda mda diäre dänkientre yekri. Abtä kukwe ükateba kore kwetre Lázaro rüere.

### *Jesu nikani nebe Jerusalén*

(Mateo 21.1-11; Marcos 11.1-11; Lucas 19.28-40)

<sup>12</sup> Ye näire, ni rababara kwati krübäte juta Jerusalénte bieta Pascua mikakäre ütiäte amne, jändrinane Jesu jatabara ji ngrabare Jerusalén kukwäre abko nitre kwati ye käkwe gaba. <sup>13</sup> Angwane datile kriekä tikakaba kwetre, ben jataba Jesu kakäre ngäbti jrei kwrere, kä rababa ngrente krikri be krörö ie:

¡Hosana! ¡Ma abko Jrei nitre israelitakwe!

Ni Dänkien Ngöbö käkwe ma juani.

Ma kite ni Dänkien Ngöbö käbti, aisetet nunta ma käkitekä,  
abko nitre israelita rababa niere Jesu ngäbti.

*Salmos 118.25*

<sup>14</sup> Angwane Jesu näma näin buro ngäbälibti, rikaba neme Jerusalén mda Ngöbö Kukweita niere ye kwrere:

<sup>15</sup> Mun nünanka juta Siónte\* nete, mun ñan rekwtaka, ñobtä ñan angwane Jrei munkwe  
kite buro ngäbälibti, ye mike ñäräre munkwe,  
abko tä tikani Ngöbö Kukweibä abko erere Jesukwe nuenbare.

*Zacarías 9.9*

<sup>16</sup> Akwa ye näire nun ja töitikaka Jesube abko ie kukwe ye ñan rükaba gare, akwa Ngöbökwé Jesu mikaba ütiäte, rikaba ngwenante kä käinbtí angwane, batibe kukwe rakkakaba ye abko näma tikani jökrä Ngöbö Kukweibä abko erere nakaninkä btä abko rükabata töre nunye.

<sup>17</sup> Jesu jataba burobti, ye ngwane abko Lázaro krütani nämane doboi mikani nguse abko Jesukwe käräßata künken amne Jesukwe mikaninta nire, ye abko nitre tuakatuaka rababa niere ni mda mdaye. <sup>18</sup> Ne aisetet ni kwati jataba Jesu ngäbti, ñobtä ñan angwane Jesukwe sribi kri ñan tuabare nuenba, Ngöbö nämane ben bá mikakrä abko gaba kwetre, aisetet rababa kite jökrä Jesu ngäbti. <sup>19</sup> Akwa nitre bariseo abko rababa niere jae kwärikwäri:

¡Ni jökrä nibi niken niara jiebti, ne aisetet kitera ni ganaine kwäräbe, tuen sete se!  
¿Sebti nikwe dre nuendi mda? rababa niere.

### *Jesu müre ketadi rückwe, niebare kwe*

<sup>20</sup> Angwane nitre rababa kwati Jerusalén Ngöbö mikakäre ütiäte jae bietabtä, ye ngätäite nitre griegore näma ruäre abko <sup>21</sup> jataba nüke Felipe känti. Felipe ye abko nünanka juta Betsaidate kä Galileate. Nitre ye jataba Felipe känti, käkwe nieba ie:

Ja mräkä, nun tö nibi ja tuai Jesube, nieba kwetre ie.

\* 12:15 Sión. Juta Jerusalén ara abko kädianta Sión arato.

<sup>22</sup> Angwane Felipe rikaba kákwe nieba mda Andréye, bti niaratre nibu rikaba kákwe kukwe ye nieba jökrä Jesuye. <sup>23</sup> Angwane Jesukwe nieba mda ietre:

Kä kitani Ngöbökwe ti Ni Kä Nebtä Ngobo mikakäre ütiäte abko käi nüra. <sup>24</sup> Ye abko ti bike kukwe era erere niere munye. Trigo nurai nökata dobote, ye abko nita krüte bää mikata trigo nuraibta. Ye abko trigo nurai ñan gütadrete kore angwane, trigo nurai ye aibe rabadre kärekäre, akwa trigo nurai ye nökadre, bti gütadrete amne mu rabadre niren angwane, ngwä rabadre kabre. Ti abko trigo nurai ye kwrere. Ti ñan krütadre angwane, ti aibe rabai nüne kärekäre Ngöböbe, akwa ti krütadre angwane, ni kwati jatadi nüne kärekäre Ngöböbe. <sup>25</sup> Mdakäre abko, nire nire israelita ya, ñakare ya ie ja kwata ruentari tare, abtä ñan tö ja tare nikai ti kräke, ni ye abko kákwe ñan nünandi kärekäre Ngöböbe; akwa nire nire ie ja kwata ñan rabadre ruentari tare ja tare nikakrä kä nebtä tikrä, ni ye abko kákwe nünandi kärekäre Ngöböbe. <sup>26</sup> Ne aisetet nire nire tö sribire tikrä abko jata ti jiebti amne ti tädi mdente erere, ye känti sribikä tikwe tädi tibe. Erere arato, nire nire kákwe sribidre tikrä, ni ye abko Ngöbö ti Rün tikwe kákwe mikadi ütiäte. Abko kore se, nieba Jesukwe ietre.

<sup>27</sup> Yebti Jesu krütadre abko btä näma töbike kri, kákwe nieba:

¡Aingwaree, ti nibi nekwetekä krübäte dikaro ja jiebti bäre! ¿Nebtä tikwe dre niedre se? ¿Tikwe niedre, Tata tikwe, kukwe kite tare krübäte ti rüere, ngäniene ti nibi nekwetekä, aisetet den tibti ta, tikwe niedre ya? Ñakare, raba ruen tie, ñobtä ñan angwane ti jatani kukwe ne mikakäre täte aisetet. <sup>28</sup> Ti Rün tikwe, ja bää mike ütiäte ni jökrä okwate, ie ti tö. Abko kore se, nieba Jesukwe.

Ye btäräbe ni kukwei rababa kä käinbti, kákwe nieba krörö:

Tikwe ja mikanina ütiäte, akwa tikwe ja mikadita ütiäte bobuta abko nieba kä käinbti sete.

<sup>29</sup> Angwane, nitre näma yete, ie ni kukwei kä käinbti jaraba angwane, rababa niere:

Unsuní ngö käinta ye, rababa niere.

Akwa ni ruäre abko rababa niere:

Angele kä käinbti kákwe ñäri Jesuye ye, rababa niere.

<sup>30</sup> Angwane Jesukwe nieba ietre:

Ni kukwei jaraniri kä käinbti munye, ye abko mun die mikakrä tödeke tibti, akwa ñakare tikrä. <sup>31</sup> Ye abko, gwängwarbe kukwe rabadre ükaninte Ngöbökwe ni jökrä kä nebtä kräke abko kä kitera nüke. Erere arato, diablu tä ni jökrä dänkiene kä nebtä abko juantari mento abko kä kitera nüke arato. <sup>32</sup> Akwa ti ne ara rabadre kaninkä krusobtä käin angwane, ti ne ara jire kákwe ni jökrä kärädi jae, nieba Jesukwe.

<sup>33</sup> Jesu abko krütadi ño, ye mden tö rababa niei, kákwe blitaba kore. <sup>34</sup> Abtä nitre näma kwati yete, ye kákwe nieba Jesuye:

Ni Dianinkä Ngöbökwe abko kákwe nünandi kärekäre, ye abko Ngöbö Kukwei tä niere amne Ni Dianinkä Ngöbökwe amne ni Kä Nebtä Ngobo abko ni itibe, akwa Ni Dianinkä Ngöbökwe ñan krütadre, aisetet, ¿ye ñobtä abko Ni Kä Nebtä Ngobo kadikä krusobtä käin, mata niere ye? ¿Nire abko Ni Kä Nebtä Ngobo amarebti btä mata ñäke kore ye? nieba kwetre Jesuye.

<sup>35</sup> Abtä nitre näma kwati yete, ie Jesukwe nieba mda:

Ti abko ñotra kwrere amne jäandrän jökrä Ngöbö rüere amne ti rüere, ye abko kä iko kwrere. Ti abko ñotra tä mun ngätäite nete, akwa ñotra ye abko rabadi bää jötrö mda mun ngätäite nete, aisetet ñotra tä munbe nete angwane, munkwe dikaka ñotra trä yete, kä iko kákwe ñan mun ganaindre abkokäre, ñobtä ñan angwane nire nire tä dikekä kä ikote ye abko tä niken mden kukwäre ñan tä neme gare ie. <sup>36</sup> Ti abko ñotra tä mun ngätäite nete. Mun rabare nüne ti kwrere, abkokäre titä nete mun ngätäite angwane munkwe tödeka tibti. Abko kore se, nieba Jesukwe.

Jesukwe blitaba ünän jökrä kore, yebti Jesu rikabata, kákwe ja rükantebata bobuta nitre israelita ji dokwäteye.

*Ni kwati kákwe tödekani ñakare Jesubti*

<sup>37</sup> Jesukwe sribi kri ñan tuabare nuenba kabre nitre israelita okwäbti Ngöbö nämane niarabe mikakäre gare ietre, akwa ñan tö namani tödekai jire chi Jesubti, <sup>38</sup> ye abko ni Ngöbö kukwei niekä kädian nämane Isaías kákwe tikani krörö abko erere namani bare niaratretbä:

Ti Dänkien, ¿kukwe dirita nunkwe, ye nirekwe mikadi era?

¿Amne ma di kri ye abko makwe mikani tuadre nireye? *Isaías 53.1*  
abko tikani kore Isaíakwe nitre israelitabtä.

<sup>39</sup> Ye mden kisete, nitre israelita kwati ñan namani tödeke Jesubti. Mdakäre abko, Isaías arabe kákwe kukwe mda tikani krörö btätre arato abko nere:

<sup>40</sup> Ngöbökwe kä trä ötaninte niaratre okwäte, niarata dre nuene niaratre okwäbti ñan jatadre metre ietre abkokäre.

Erere arato, Ngöbökwe niaratre töi ganinte, kukwe ño ño ñan rabadre nüke gare ietre abkokäre.

Ye kwrere ñan jatadreta ti kukwäre angwane, tikwe ñan mikadreta kuinta diantarikäre, *Isaías 6.10*

abko Isaíakwe tikani täräbtä nitre israelitabtä. <sup>41</sup> Isaías abko kákwe Jesu di kri bā nuäre tuani, aisetet nämane blite btä, kákwe niebare kore nitre israelitaye kira.

<sup>42</sup> Nitre israelita kwati kákwe tödekaba ñakare Jesubti, akwa nitre israelita kwati mda abko kákwe tödekaba bti. Erere arato, ni ruäre ji dokwäte abko kákwe tödekaba Jesubti siba, akwa ñan tö rababa niei ja ngwärekri jökrä, ñobtä ñan angwane nane nitre bariseo kákwe gadre amne kitadrekä sinagoga bäre mento abko jürä rababa btätre, aisetet nämane tödeke Jesubti abko ñan rababa niere, <sup>43</sup> ñobtä ñan angwane nitre kä nebtä kákwe mikadre ütiäte jae abko ie tö rababa bäri amne, Ngöbökwe mikadre ütiäte jae, ye abko rababa ütiäte ñakare kräke.

### *Jesukwe diribare ünän ja ngwärekri jökrä*

<sup>44</sup> Yebti Jesukwe ngrateba kri, kákwe nieba:

Nire nire kákwe tödekadre tibti, ye abko ñan tödekadre ti ne aibebti kwe, akwa ti Rün tikwe kákwe ti juani, yebti tödekadre kwe arato. <sup>45</sup> Erere arato, nire nire käta ti tuen, ye tä ti Rün ti juanka tuen arato, ñobtä ñan angwane niarata dre dre nuemna tie aibe tita nuene. <sup>46</sup> Nire nire tä nüne kä ikote amne Ngöbö gare ñakare ie, kákwe tödekadre tibti abko ñan nünandi mda kä ikote kwe, ñobtä ñan angwane rükadre ño Ngöbö känti rükadre gare ie, abkokäre ti jatani ñotrare mun ngätäite kä nebtä. <sup>47</sup> Akwa nire nire käta ti kukwei nuen, akwa ñan tä mike täte amne ñan tä mike era jae, ye kräke tikwe ñan kukwe ükadrete au, ñobtä ñan angwane ñan ti jatani kukwe ükete ni rüere juantarikäre Ngöbö okwä bäre mento, akwa ti jatani ni diantarikäre niaratre ngite ngäniene.

<sup>48</sup> Akwa nire nire tä bätä ngwen tibtä amne kukwe dirita tikwe ñan tä mike ütiäte jae, ye abko ñan tikwe kukwe ükadite kräke amne ñan tikwe kitadi ngite Ngöböye. Akwa munkwe ñan ti kukwei mikadre era, ye ngwane ti Rün kákwe kukwe ükadite munkrä kä mrä angwane, <sup>49</sup> ñobtä ñan angwane tita blite, ye abko ñan tita niere ja töi jenbti, akwa ti Rün tikwe kákwe ti juani ye abko tä dre niemna tie abko erere tita dirire munye. <sup>50</sup> Ti Rün kukwei, ye abko nire nire kákwe mikadre era jae abko rabadi nüne kärekäre ti Rün Ngöböbe abko gare kuin tie, aisetet tita kukwe niere ye abko ti Rün tikwe tä niemna tie, erere tita niere. Abko kore se, nieba Jesukwe.

## 13

### *Jesukwe nitre ja töistikaka ben ngoto bätäninte*

<sup>1</sup> Yebti bieta Pascua jatabara nüke angwane, Jesukwe kä mikarekä kä nebtä amne, rikareta kä käinbti niara Rün känti, ye abko kä nükanina abko nämanena gare Jesuye angwane, nitre jen Jesukwe nämane kä nebtä abko Jesu näma tarere, ye abko tareba täte jökrä kwe. <sup>2</sup> Nun jataba mröre dere, akwa nun ngämi mröre, känenkri Simón ngobo Judas Iscariote abko diablukwe töi mikabara Jesu rüere, Jesu kitakäre ngite. <sup>3</sup> Akwa Jesu abko, ie Rünkwe jäandrän jökrä mikanina gare nämanena gare ie amne, niara jatani Ngöbökri

amne rikadita Rün känti, ye abko nämanena gare ie arato. <sup>4</sup> Ne aisetet, batibe rababara täkänintbe mröre mesabtä, akwa rükaba dikekäta krö, käkwe dän tikateba jabtä, bti dän kukwän chi mäkäteba kwe ja mrökarabtä, <sup>5</sup> bti ñö kekaba unkwente kwe, bti rikaba nun ja töitikaka ben ye ngoto bätete, ni klabore käkwe nuendre ye kwrere amne, dän kukwän nämene niara mrökarabtä, yebti rikaba nun ngoto bärötä se kwrere. <sup>6</sup> Jesu rikaba nebe Simón Pedro känti ngoto bätätekäre angwane, Pedrokwe nieba ie:

Ti Dänkien, ñni klabore käta ni ngoto bätete, kwrere jire ma bike ti ngoto bätete tie ya? nieba kwe ie.

<sup>7</sup> Abtä Jesukwe nieba mda ie:

Tita dre nuene ñan nebe nüke gare mae mtare, akwa abti rükadi gare mae, nieba kwe Simón Pedroye.

<sup>8</sup> Angwane Pedrokwe nieba mda Jesuye:

¡Tikwe ñan ma tuametre ja ngoto bätete jire chi! nieba kwe ie.

Abtä Jesukwe nieba mda ie:

Tikwe ñan ma ngoto bätärete ne ngwane, ma ñan rabadre jen tikwe, nieba kwe ie.

<sup>9</sup> Angwane Simón Pedro käkwe nieba mda ie:

Ti Dänkien, kore ne ngwane, ñan makwe ti ngoto aibe bätäte, akwa makwe ti kise amne ti dokwä bätäte arato, ie ti tö nibi, nieba kwe ie.

<sup>10</sup> Akwa Jesukwe nieba mda ie:

Nita jüben krire, bti nita niken käname, ye ngwane ni ngoto aibe tä nebe dobrore, aisetet ni ngoto aibe bätärete, ñobtä ñan angwane ni ngrabare abko tärä nebe merebe jökrä amne mun abko nena merebe, akwa era metre mun jökrä ñakare merebe, nieba Jesukwe.

<sup>11</sup> Jesukwe nieba kore, ñobtä ñan angwane nirekwe kitadi ngise ye abko näma gare kuin ie, aisetet nieba kore kwe Judas Iscariotebtä.

<sup>12</sup> Jesukwe nun ja töitikaka ben ngoto bätäteba ünän jökrä, bti Jesukwe dän kitabata jabtä, bti rababata täkänintbe mesabtä, käkwe nieba:

¿Ñobtä tikwe mun ngoto bätrite ye nü gare munye ya? nieba Jesukwe nunye.

<sup>13</sup> Yebti Jesukwe nieba mda nunye:

Ti abko Dirikä amne ti mun Dänkien munta niere tie, ye abko kukwe era erere munta niere, ñobtä ñan angwane ti abko Dirikä amne ti mun Dänkien bkänä. <sup>14</sup> Ti Dirikä amne ti mun Dänkien käkwe mun ngoto bätrite jökrä ni klabore kwrere ne ngwane, ye kwrere munkwe ja mika bobre ni klabore kwrere, käkwe ja ngoto bätädre jae kwärikwäri, tikwe nuni ye kwrere. <sup>15</sup> Tikwe ja miri bobre ni klabore kwrere mun jökrä kräke, ye kwrere munkwe nuendre jakrä kwärikväri, abkokäre tikwe kukwe bär miri kore mun okwäbti. <sup>16</sup> Ye abko, ti bike kukwe era erere niere munye abko krörö: Ni klabore ye ñakare bär ütiäte niara bkänä kräke. Erere arato, ni ni mda kukwei ngwianka ye abko ñakare bär ütiäte ni niara juanka ye kräke. <sup>17</sup> Ne aisetet tikwe kukwe nuni mun kräke, ye nü gare munye angwane, munkwe nuendre kwrere jakrä kwärikväri arato ne ngwane, kä rabadi nuäre munbtä amne Ngöbökwé ja di biandi munye.

<sup>18</sup> Akwa tita kukwe niere, ye abko ñakare mun jökrä kräke, ñobtä ñan angwane tikwe mun mden mden dianinkä jen jakrä ye abko gare kuin tie, akwa Ngöbö Kukwei tä tikani ye abko rabadre bare, abkokäre ni iti käkwe kukwe nuendi krörö btä kukweta tikani:

Ni iti tä mröre siä kwatibe te tibe abko nikwitani ti rüere,  
abko tä tikani Ngöbö Kukweibtä, ye erere rakadikä.

*Salmos 41.9*

<sup>19</sup> Kukwe ye abko ngämi nakenkä, känenkri tita niere munye, kukwe ye kwrere rabara nakenkä mun okwäbti angwane, TITA abko munkwe mikadre era, abkokäre tita niere munye. <sup>20</sup> Mdakäre abko, ti bike kukwe era erere niere mda munye abko krörö:

Tita ni juen, ye nire nire käkwe kadre ngäbti, ni ye abko käta ti ne ara jire kaen ngäbti amne, nire nire käta ti kaen ngäbti, ni ye abko käta Ngöbö ti juanka ara jire kaen ngäbti. Abko kore se, nieba Jesukwe nun ja töitikaka benye.

*Judas Iscariote kákwe Jesu kitadi ngise, niebare Jesukwe  
(Mateo 26.20-25; Marcos 14.17-21; Lucas 22.21-23)*

<sup>21</sup> Jesukwe blitaba kore, ye btäräbe Jesu ñan moto rababa neme nuäre, rababa ruen ie angwane, Judakwe niara kitadi ngise abko nieba metre krörö kwe:

Mun iti tä nete kákwe ti kitadi ngise ti rüeye ti müre ketakäre, ye abko ti bike niere metre munye, nieba Jesukwe.

<sup>22</sup> Abtä nun ja tötitikaka ben rababa ja mike ñäräre kwärikwäri, akwa Jesu näma ñäke nirebtä, ye ñan rababa nüke gare nunye. <sup>23</sup> Abtä ni iti ja tötitikaka ben abko Jesu nämane tarere kri abko näma täkänintbe käname mesabtä mröre Jesu ken angwane, <sup>24</sup> nirebtä näma blite ni ye kákwe ngwiandretari Jesuye abko Simón Pedro kákwe nieba kisebti ie.

<sup>25</sup> Ye erere bkänä, ni ye kákwe gitakaba Jesu kukwäre, kákwe nieba ie:

Ti Dänkien, ¿nirekwe ma kitadi ngise? nieba kwe ie.

<sup>26</sup> Angwane Jesukwe nieba mda ie:

Ti bike ban oto mike tibo mrö ñöite abko tikwe biandi nireye amne ni ye ara, nieba kwe.

Ye btäräbe Jesukwe ban oto mikaba tibo, bti Simón ngobo Judas Iscariote, ie bianba kwe. <sup>27</sup> Judas kákwe ban oto kaba ngäbti Jesuye, ye btäräbe Satana rükaba btä angwane, Jesukwe nieba ie:

Makwe dre nuendi, ye nuene jötrö, nieba kwe ie.

<sup>28</sup> Jesukwe ñäkäba kore Judaye, akwa ñobtä ñäkäba kore kwe ie, nun mda mda ja tötitikaka ben näma mröre mesabtä, ie ñan rükaba gare.

<sup>29</sup> Akwa Judas abko näma ngwian nunkwe ngibiare, aisetetötitikaka juani jäandrän kökö bietakrä ya o ngwian biamna kwe ie ni bobre bobreye abko nun ruäre rababa nütüre.

<sup>30</sup> Akwa Jesukwe ban bianba Judaye angwane, Judakwe kaba ngäbti, ye btäräbe Judas rikaba Jesu kite ngise rüeye. Ye ngwane kä rababara iko jökrä.

<sup>31</sup> Judas rikaba mentokwäre, yebti Jesukwe nieba:

Mtare ti, Ni Kä Nebtä Ngobo, mun tarekä kri abko di kri bä nuäre rabadi mikani tuare amne Ngöbö mun tarekä di kri bä nuäre rabadi mikani tuare Ni Kä Nebtä Ngobo köböire.

<sup>32</sup> Ye abko, ti Ngöbö Odei kákwe Ngöbö di kri bä nuäre mikadi tuare, ye kwrere arato Ngöbö kákwe ti Ngöbö Odei di kri bä nuäre mikadi tuare arato, ye abko Ngöbökwe nuendi jötrö.

<sup>33</sup> Mdakäre abko, mun ngäbäkre kiakia tare kri tikwe, mun ye ben tikwe ñan nünandre raire mda. Ti näin angwane, mun rabadi ti känentari kisere, akwa tikwe kukwe nieba nitre israelita ji dokwäteye, erere ti bike niere munye: Ti näin mdente, ye känti mun ñan raba niken gware tibe. <sup>34</sup> Akwa ti bike kukwe bien nuendre btin munye, ne erere munkwe nuen abko krörö: Mun ja tötitikaka tibe kákwe ja tare kwärikväri. Tita mun tarere ño, ye kwrere munkwe ja tare kwärikväri. <sup>35</sup> Munkwe ja taredre kwärikväri tita niere munye, ne kwrere munkwe ja taredre ne ngwane, mun abko ja tötitikaka tibe ye rabadi gare ni jökräye, nieba Jesukwe nunye.

*Pedro kákwe Jesu rükandite, niebare Jesukwe  
(Mateo 26.30-35; Marcos 14.26-31; Lucas 22.31-34)*

<sup>36</sup> Angwane Simón Pedro kákwe nieba mda ie:

Ti Dänkien, ¿ma näin mdente? nieba kwe ie.

Jesu kákwe nieba mda ie:

Ti näin mdente, ye känti ma ñan raba niken jire chi tibe mtare, akwa abti ma näinta ti jiebti arato, nieba kwe ie.

<sup>37</sup> Abtä Pedrokwe nieba mda Jesuye:

Ti Dänkien, ¡tita juto biare krütakäre makrä! ¿Se ñobtä abko ti ñan rabadre mabe gware mtare, mata niere se? nieba kwe ie.

<sup>38</sup> Ye ngwane Jesukwe nieba mda ie:

¿Mata biare krüte tikrä bkänä ya? Ti bike kukwe era erere niere mae abko krörö: Antlan ngämi ngwäne, ye känenkri ti gare ñakare mae, makwe niedi bämä jire, nieba kwe Pedroye.

## 14

### *Jesukwe nitre ja tötitaka ben moto mikani jáme*

<sup>1</sup> Yebti Jesukwe nieba mda:

Kukwe yebtä mun ñan rekwetaka ja jiebti, akwa munkwe tödeka Ngöböbtí amne munkwe tödeka tibti arato, <sup>2</sup> ñobtä ñan angwane ti Rün tikwe, känti kä tärä kabre nünankrä. Kä ñakare kore, ne ngwane tikwe niedre munye, akwa kä tärä amne ti bike niken kä ükete biare munkrä. <sup>3</sup> Ye erere ti näinta kä ükete munkrä, yebti ti jatadita mun tuenta, kä näin mun ngwena jabe angwane, ti tädi ti Rün känti, ye känti mun tädi ketetibe tibe, abkokäre ti näin mun ngwena. <sup>4</sup> Mdakäre abko, ti näin mdente, ye känti ji garera kuin munye, nieba Jesukwe nun ja tötitikaka benye.

<sup>5</sup> Abtä Tomákwe nieba Jesuye:

Ti Dänkien, ma näin mdente gare ñakare nunye, ¿se abko ji rabadre gare ño nunye amarebti mata niere kore ye? nieba kwe ie.

<sup>6</sup> Angwane Jesukwe nieba mda:

Ti abko ji ngöräbe, köböire ni jökrä raba nüke ti Rün känti amne, ti aibe abko kukwe era erere mikaka gare Ngöböbtä amne ti aibe abko ni mikaka nire kärekäre, aiseti ti ne aibe köböire ni rabadre ti Rün känti. <sup>7</sup> Ti abko nire metre gare munye ne ngwane, ti Rün garera munye arato. Mun jatani ja töitike tibe abti kä nüke mtare munta ti Rün tuen tibtä amne ti Rün nena gare munye mtare, nieba kwe nunye.

<sup>8</sup> Angwane Felipe abko kákwe nieba mda ie:

Ti Dänkien, ma Rün mike tuadre nunye aibe kwe nun rabadidbe, nieba kwe Jesuye.

<sup>9</sup> Abtä Jesukwe nieba mda Felipeye:

Felipe, ¿tikwe nünabarera raire munbe nete, akwa ti abko ni ño, ye ngämi nüke gare mae ya? Nire nire käta ti tuen, ye abko tä ti Rün tuen arato. ¿Ye ñobtä abko tikwe ti Rün mikadre tuadre munye, mata niere tie ye? <sup>10</sup> ¿Ti tä ketetibe ti Rünbe amne ti Rün tä ketetibe tibe, ye abko ñakare era makrä ñan ñan? Akwa titá kukwe niere munye, ye abko ñan titá niere ja töi jenbti, akwa ti Rün tä nüne ketetibe tibe käta sribi jakwe nuene ti köböire. <sup>11</sup> Ye abko, titá ketetibe ti Rünbe amne ti Rünta ketetibe tibe, ye mika era munkwe; akwa ne ñan raba neme era munkrä ne ngwane, sribi kri ñan tuabare nuenta tikwe, yebtä ti kukwei mika era munkwe. <sup>12</sup> Mdakäre abko, ti bike kukwe era erere niere munye: Nire nire käta tödeke tibti, ye abko sribi kri nuenta tikwe, ye kwrere nuendi kwe arato. Akwa mtare ti bike nikenta ti Rün känti, aiseti ni ye kákwe sribi bári kri nuendi Ngöbö diebti. <sup>13</sup> Ye abko, mun tö raba dre dre käräi ti Rünne ti käbti, ye abko tikwe nuendi mun kräke, ye köböire ti Rün di kri bá nuäre rabadre mikani ütiäte kri ti Ngöbö Odei köböire, abkokäre tikwe nuendi mun kräke. <sup>14</sup> Ye abko, mun tö raba kukwe ño ño käräi tie ti käbti angwane, tikwe nuendi mun kräke.

### *Jesukwe Ngöbö Üai juandi, niebare kwe*

<sup>15</sup> Yebti Jesukwe nieba mda nunye:

Munta ti tarere era metre bkänä ne ngwane, titá kukwe nuemna ye erere munkwe mikadre täte <sup>16-17</sup> angwane, mun Die Mikaka mdara jire juandré ti Rünkwe ti täte munkrä abko tikwe kärädi ie. Mun Die Mikaka mdara jire ye abko Ngöbö Üai. Niara abko kukwe era erere niekä, ye abko ti Rün tikwe kákwe juandi angwane, rabadre kärekäre munbe abkokäre. Akwa nitre nünanka Ngöbö rüere abko ñan raba mun Die Mikaka ye kaen ngäbti jire chi, ñobtä ñan angwane niaratre ie Ngöbö Üai tuen ñakare amne gare ñakare ietre arato, aiseti ñan raba kaen ngäbti; akwa mun abko ben Ngöbö Üai mun Die Mikaka tä nüne amne niara garera munye, ñobtä ñan angwane tä nüne tibtä aiseti. Nebti niara rabadi nüne munbtä.

<sup>18</sup> Mdakäre abko, ti bike nikenta, akwa mun ñan rabadre uli kwrere nete, ñobtä ñan angwane ti jatadita rabakäre munbe. <sup>19</sup> Akwa nitre nünanka Ngöbö rüere kákwe ñan ti tuadreta jire mda abko köböl nükera käname, akwa mun abko kákwe ti tuadita amne titä nüne kärekäre, abtä munkwe nünandi kärekäre arato. <sup>20</sup> Akwa munkwe ti tuadita, köböl ye näire titä ketetibe ti Rünbe amne munta ketetibe tibe amne titä ketetibe munbe abko munkwe gadi. <sup>21</sup> Ye abko, titä kukwe bien nuendre, ye nire nire tä kaen ngäbti abko erere tä mike täte, ni ye tä ti tarere era metre bkänä abko bärä mikata kwe. Nire nire käta ti tarere kore, ni ye abko ti Rün tikwe kákwe taredi amne titä ara jire kákwe taredi arato, kákwe ja mikadi gare metre ie, nieba Jesukwe nun ja töitikaka benye.

<sup>22</sup> Abtä Judas (akwa ñakare Judas Iscariote, akwa Judas mdara jire) ye kákwe nieba mda Jesuye:

Ti Dänkien, ¿ñobtä makwe ja mikadita tuadre nun aibeye amne ñakare ni jökräye mata niere ye? nieba kwe ie:

<sup>23</sup> Angwane Jesukwe nieba mda:

Nire nire käta ti tarere ye abko tä ti kukwei mike täte amne titä Rün kákwe taredi. Erere arato, ti Rün amne titä, nun jatadi ja gwirie mike ni yebtä. <sup>24</sup> Akwa nire nire tä ti tarere ñakare, ni ye abko tä ti kukwei mike täte ñakare. Ti kukwei nuata munkwe, ye abko ñan ti kukwei jen tikwe abko titä niere, akwa titä Rün titä juanka abko kukwei nieta tikwe munye.

<sup>25</sup> Ye abko, titä munbe nete angwane, titä kukwe ne niere jökrä munye kore, <sup>26</sup> akwa mun Die Mikaka Ngöbö Üai Deme juandre titä Rünkwe ti käbti, ye rükadi nüne munbtä angwane, kukwe era Ngöböbtä ütiäte munkrä, erere diridi jökrä kwe munye. Erere arato, titä kukwe niere munye, ye mikadita töre jökrä kwe munye.

<sup>27</sup> Mdakäre abko, kä jáme jen tikwe titä bike mikete munbtä, ye abko ñan nitre nünanka kä nebtä käta kä jáme bien, kwrere jire titä bike bien munye, aisetetate mun ñan rekwtaka ja jiebti amne munkwe ñan kä jürä ngwian jabtä. <sup>28</sup> Ti abko bike nikenta, akwa titä rükadita munbe nete, tikwe nini, ye munkwe kukwei nurira. Ye abko, munta titä tarere era metre bkänä ne ngwane, titä bike nikenta kä käinbti titä Rün känti, tikwe nini munye, ye käi rabadre nuäre munbtä, ñobtä ñan angwane titä Rün abko bärä kri tikrä aisetetate. <sup>29</sup> Ye abko, titä kukwe niere ne ngämi nakenkä, känenkri titä kukwe jökrä niere munye, akwa rakadrekä angwane, titä kukwei rabadre era munkrä, kákwe tödekkade metre tibti, abkokäre titä niere käne kore. <sup>30</sup> Akwa gwängwarbe kä ñan nebera blitakrä kabre dikaro munbe tie, aisetetate tikwe ñan blitadre kabre mda munbe, ñobtä ñan angwane Satana tä nitre nünanka Ngöbö rüere dänkiene abko kitera titä rüere. Satana abko tä ñakare jire chi titä dänkiene. <sup>31</sup> Akwa titä titä Rün tarere abko nitre nünanka Ngöbö rüere ie rabadre gare metre amne titä Rün tä dre nuemna tie, erere titä nuene täte jökrä, ye rabadre gare ietre arato, abkokäre kukwe ye rakadikä kore.

Ne aisetetate, näin krö. Brän. Ari kä mikekä nete, nieba Jesukwe nunye.

## 15

### *Nikwe nünandre ketetibe Ngöböbe niebare Jesukwe*

<sup>1</sup> Yebti Jesukwe ja bärä mikaba uba kökräi kwrere amne nitre tödekkade bti abko bärä mikaba uba küdei kwrere kwe, kákwe nieba mda nunye:

Ti abra uba kökräi era metre kwrere amne titä Rün abko sribikä uba kökräi yebtä kwrere. <sup>2</sup> Ye abko, uba küdei mden mden ngwä neme ñakare btä, ye abko titä Rün tä tikekä ta; akwa uba küdei ngwä neme kabre kabre btä, ye abko niarata mutu kiakia aibe tikekä, bti tä bäsikä kuin merebe abko ngwä rabadre bärä kabre btä abkokäre. <sup>3</sup> Mun abko ie tikwe kukwe niebare, ye munkwe mikani era, kákwe tödekkade tibti, aisetetate kukwe ye köböire mun nena merebe, ngite ñakare Ngöbö ngwärekri. <sup>4</sup> Mun abko raba nekete janknu ketetibe tibtä amne titä rabadi nekete janknu ketetibe munbtä arato, ñobtä ñan angwane uba küdei tä neketaninte uba kökräibtä aibe angwane ngwäta neme btä; akwa uba küdei kaibe mento uba kökräi bärä, ye ñan ngwä raba neme jire chi btä. Ye kwrere

arato, munta ñakare ketetibe tibe, akwa tä ti bäre mento ne ngwane, mun ñan rabadre sribi kuin nuene tikrä amne ni ñakare jire mda kákwe tödekadre tibti mun köböire.

<sup>5</sup> Ti abko uba kökräi era metre kwrere amne mun abko uba küdei kwrere. Nire nire tä nüne ketetibe tibe amne titä nüne ketetibe ben, ni ye abko kákwe sribi kuin nuendi tikrä, köböire ni mda mda kákwe tödekadri Ngöböbti, ye abko uba ngwäta nebe kabre uba küdei kuinbtä ye kwrere. Akwa mun tädre kaike ti bäre mento angwane, sribi kuin ütiäte Ngöbökrä ñan rabadre bare jire chi munye. <sup>6</sup> Ye abko, nire nire kákwe ñan nünandre ketetibe tibe, ye abko kitadrekä Ngöbö okwä bäre mento amne, uba küdekrä tikakata tä neme nötare amne ükakröta ketetibe jökrä, bti kukwata, ye kwrere jire Ngöböökwe ni ye kitadi ja okwä bäre mento ja tare nikakäre kärekäre. <sup>7</sup> Akwa mun abko kákwe nünandre käre ketetibe tibe amne titä kukwe dirire munye, yebtä munkwe nünandrekä era metre ne ngwane, mun tö raba dre dre käräi Ngöböye, erere munkwe kärä amne biandi kwe munye. <sup>8</sup> Mdakäre abko, uba ngwäta neme kabre, ye kwrere munkwe sribi kuinkuin nuendi, köböire ni kwati kákwe tödekadre Ngöböbti abko rabadi uba ngwä kabre kwrere, yebtä abko mun ja tötitaka tibe abko rabadi gare metre amne ti Rün rabadi käkitaninkä kri.

<sup>9-10</sup> Ti Rünta ti tarere, ye kwrere titä mun tarere arato. Angwane ti Rün kukwei mikata täte metre tikwe, abtä ti Rünta ti tarere kärekäre tä nüke gare kärekäre tie, ye kwrere jire munkwe ti kukwei mikadre täte ne ngwane, titä mun tarere kärekäre rabadre nüke gare kärekäre munye arato. <sup>11</sup> Ye abko, munkwe kä ngwiandre bari nuäre gware jabtä tibe amne kä nuäre rabadre täte jökrä munbtä, abkokäre titä blite kore munbe. <sup>12</sup> Angwane ti kukwei mikadre täte munkwe abko krörö: Tikwe mun tarebare, ye kwrere munkwe ja tare kwärikwäri. <sup>13</sup> Nire tä ja mike müre ketadre kukwe muko diäre, ye ngwane tä kukwe muko tarere era metre abko bärä mikata. <sup>14</sup> Titä dre dre nuemna abko erere munta nuene ne ngwane, mun abko ti kukwe muko tikwe abko bärä mikata munkwe. <sup>15</sup> Ye abko, mun ni klabore tikwe abko tikwe ñan niedre mda, ñobtä ñan angwane ni klabore abko bkänkä tä dre dre nuene, ye gare ñakare ie, akwa ti Rün tä dre dre niere tie, erere titä mike gare jökrä munye, aise te mun abko ti kukwe muko tikwe, titä niere. <sup>16</sup> Mdakäre abko, ñan munkwe ti dianinkä ja töi jenbti au dirikäre jae, akwa tikwe mun dianinkä ja tötitikakäre jabe amne, tikwe mun mikani juandre kwäräkwärä sribire jakrä abko köböire ni mda mda jatadre kabre tödeke tibti abkokäre. Ye aise te, uba ngwäta neme kabre btä, ye kwrere sribi munkwe rabadre abko köböire ni kwati rabadre tödeke kärekäre tibti, abkokäre tikwe mun dianinkä jakrä. Erere arato, titä dre dre nuemna munye, ye kwrere munkwe nuendre ne ngwane, munkwe jäandrän ño erere kärädré ti Rünye ti kähti angwane, biandi kwe munye. <sup>17</sup> Akwa titä kukwe nuemna munye abko krörö: Munkwe ja tare kwärikwäri abko titä niereta munye, nieba Jesukwe.

*Ni jökrä töi Ngöbö rüere abko mätä kri nitre ja tötitikaka Jesube yebtä*

<sup>18-19</sup> Yebti Jesukwe nieba mda:

Nitre nünanka Ngöbö rüere ye ben ketetibe mun tädre, akräke mun rabadre tare kri kwetre. Mun nämane niaratre ngätäite, akwa tikwe mun dianinkä jen jakrä, aise te mtare mun ñan nena nitre nünanka Ngöbö rüere kwrere, aise te tä bätä ngwen munbtä. Nitre nünanka Ngöbö rüere abko kákwe bätä ngwiani káne tibtä, aise te bätä ngwiandi kwetre munbtä arato, ye abko rabadre gare munye. <sup>20</sup> Akwa tikwe kukwe nini krörö munbtä, ye munkwe ngwianta töre jae: Ni klabore ye abko ñakare bari ütiäte niara bkänkäbti ta, tikwe nini munye. Ne aise te ni ruäre tä näin kisere ti jiebti ti mikakäre ja tare mike, ye kwrere arato nändi mun jiebti kwetre mun mikakäre ja tare mike tödektä tibti; akwa ni ruäre kákwe ti kukwei mikani ütiäte, ye abko kákwe mun kukwei mikadi ütiäte arato. <sup>21</sup> Tödektä tibti nitre nünanka Ngöbö rüere kákwe kukwe nuendi bätäkä ngwarbe mun rüere, ñobtä ñan angwane Ngöbö ti juanka abko gare ñakare ietre, aise te nuendi kore kwetre munbtä.

<sup>22</sup> Ye abko, ti ñan rükadre blite bentre Ngöböktä akräke kukwe nuenta kwetre, yebtä rabadre ngite ñakare. Akwa ti nükanina blite Ngöböktä bentre, aise te niaratre ja mike

ngite ñakare abko ñan raba niere jire chi jabtä. <sup>23</sup> Nire nire tä bätä ngwen tibtä, ye abko tä bätä ngwen ti Rünbtä arato. <sup>24</sup> Erere arato, sribi kri ñan tuabare, ni mda mdakwe ñan nuenbare jire abko erere ti nükani nuene niaratre ngätäite Ngöböta tibe mikakäre gare, sribi ye abko ti ñan rükadre nuene akräke niaratre tä ja mike ngite, yebtä rabadre ngite ñakare. Akwa sribi kri ñan tuabare tikwe nuenbare abko tuani ja okwä jenbti kwetre, akwa tätre bätä ngwen janknu tibtä amne ti Rünbtä arato. <sup>25</sup> Akwa Ngöbö Kukwei krörö rabadre bare, abkokäre niaratreba bätä ngwen kore tibtä amne ti Rünbtä:

Ti ja mike ngite ñakare rüere,

akwa tä bätä ngwen tibtä,  
abko tä tikani niaratrebtä.

*Salmos 35.19; 64.4*

<sup>26</sup> Akwa Ngöbö Üai tä ti Rün känti. Niara abko mun Die Mikaka amne tikwe niara juandi munbtä. Ngöbö Üai ye abko kukwe era metre niekä Ngöböbtä amne jäandrän jökräbtä abko jatadi ti Rünkri, aisetekukwe era erere niedi tibtä kwe munye, ti mikakäre gare munye. <sup>27</sup> Erere arato, tikwe sribi kömikanintbe kena angwane, mun nämane siba tibe abti kä nüke mtare, aisetekukwe era erere niedi tibtä ni mda mdaye arato, ti mikakäre gare ietre.

## 16

<sup>1</sup> Munkwe tödekadre janknu tibti amne munkwe ñan ti giviarekäta, abkokäre titakukwe ne niere munye. <sup>2</sup> Nitre nünanka Ngöbö rüere kákwe mun kitadikä sinagoga bäre mento, mun ñan rikadre gätäre ketetibe bentre mda abkokäre. Bärre mda abko, kä jatai angwane, nitre ye kákwe mun müre ketadi, akwa niaratre tädi sribi kuin nuene Ngöbökrä rabadi nütüre. <sup>3</sup> Nitre nünanka Ngöbö rüere abko ie ti Rün gare ñakare amne ti gare ñakare ietre arato, aisetekuendikore kwetre munbtä. <sup>4</sup> Tita kukwe niere munye, ye kwrere rabadre nakenkä munbtä angwane, tikwe kukwe niebarera käne munye, ye abko munkwe ngwiandreta töre jae, abkokäre titakukwe niere mtare munye.

### *Sribi Ngöbö Üaikwe*

Käne ti jatani sribi kömiketbe angwane, ti nämane ketetibe munbe abti kä nüke mtare, aisetekukwe ye nieba ñakare käne munye. <sup>5</sup> Akwa mtare Ngöbö ti juanka, känti ti bike nikenta rabakäre ketetibe ben, akwa ti bike nikenta mdente mun ngämi ngwentari metre tie. <sup>6</sup> Angwane ti bikera nikenta, tikwe nini, abtä mun moto nibi nötöte jirekäbe ja jiebti au, aisetekukwe ulire ulire jökrä. <sup>7</sup> Akwa ti bike kukwe era erere niere munye abko krörö: Ti rikareta ti Rün känti ye abko bäri kuin munkrä, ñobtä ñan angwane ti ñan rikadretä ne ngwane, Ngöbö Üai mun Die Mikaka ñan rükadre nüne munbtä, akwa ti näinta ne ngwane, tikwe niara juandi nüne munbtä. <sup>8</sup> Ngöbö Üai mun Die Mikaka rükadi angwane, nitre nünanka Ngöbö rüere abko ngite Ngöbö ngwärekri, ye abko mikadi gare kwe ietre amne niaratre ñakare metre Ngöbö ngwärekri mikadi gare kwe ietre arato. Erere arato, nitre nünanka Ngöbö rüere abko kräke Ngöböökwe kukwe ükadite juankäre ngwarbe kä ja tare nikakrä känti abko Ngöbö Üai kákwe mikadi gare ietre, ye ngäniene niaratre kákwe tödekadre tibti, abkokäre kukwe mikadi gare kore ietre. <sup>9</sup> Ye abko, nitre nünanka Ngöbö rüere abko ngite Ngöböye abko Ngöbö Üaikwe mikadi gare ietre, ñobtä ñan angwane niaratre tä tödeke ñakare tibti. <sup>10</sup> Angwane niaratre tä bike metre amne ti abko metre ye ñakare era kräke abko Ngöbö Üaikwe mikadi gare ietre ti diäre, ñobtä ñan angwane ti bike nikenta ti Rün känti kä kainbti, känti munkwe ñan ti tuadita mda. <sup>11</sup> Erere arato, nitre nünanka Ngöbö rüere abko kräke Ngöböökwe kukwe ükadite juankäre ngwarbe kä ja tare nikakrä känti abko Ngöbö Üai kákwe mikadi gare ietre, ñobtä ñan angwane Satana tä niaratre dänkiene abko kräke Ngöböökwe kukwe ükaninante mikakäre ja tare nika kärekäre kä ja tare nika känti.

<sup>12</sup> Mdakäre abko, kukwe mda mda tä kabre tikwe niedre munye, akwa tikwe niedre jökrä angwane, rabadre bäri tare munkrä mtare, aisetekukwe ñan niedre. <sup>13</sup> Akwa Ngöbö Üai kukwe era metre Ngöböökwe mikaka gare, ye rükadi nüne munbtä angwane, kukwe era metre jire jökrä tibtä tä dre niere abko niarakwe mikadi gare munye, ñobtä ñan

angwane Ngöbö Üai ye kákwe ñan blitadi au jadtä, akwa Ngöbökwe kukwe ño ño niemna tibtä ie, ye aibe mikadi gare kwe munye. Erere arato, kukwe rakadikä ño ja täritäri abko mikadi gare kwe munye arato. <sup>14</sup> Mdakäre abko, ti abko ütiäte kri amne ti di kri bä nuäre, ye abko mikadi gare kwe munye, ñobtä ñan angwane jäandrän tikwe abko niarakwe mikadi gare munye aisetet. <sup>15</sup> Niara rükadi jäandrän tikwe mike gare munye tita niere munye, ñobtä ñan angwane jäandrän jökrä tä ti Rünkwe, ye abko jen tikwe arato, aisetet Ngöbö Üai rükadi jäandrän tikwe mike gare munye tita niere.

*Nitre ja töitikaka Jesube, btä kä rabadi nuäre Jesu tuareta*

<sup>16</sup> Akwa mtare bä jötrö munkwe ñan ti tuadreta mda, akwa yebti bä jötrö munkwe ti tuadita mda, nieba Jesukwe nun ja töitikaka benye.

<sup>17</sup> Angwane nun ruäre ja töitikaka Jesube kä rababa niere jae kwärikwäri:

¿Niara tö nibi dre niei nie amarebti nibi ñäke kore nie se? Bä jötrö nikwe ñan tuadreta, nini kwe, yebti bä jötrö angwane nikwe tuadita bobuta, nini kwe. Erere bike nikenta Rün känti, nini kwe. <sup>18</sup> ¿Se abko tö nibi dre niei nie amarebti, bä jötrö, nibi niere se? ¿Se abko dre nieta kwe amarebti ñan nebe nüke gare jire chi nie? rababa niere jae kwärikväri.

<sup>19</sup> Yebtä abko nun tö rababa kukwe ngwaintari Jesuye abko Jesukwe gaba nunbtä, kákwe nieba nunye:

Bä jötrö munkwe ñan ti tuadreta, tikwe nini, bti bä jötrö munkwe ti tuadita, tikwe nini munye, ¿ye abko dre nini tikwe abko monta ngwentari jae kwärikväri ñan ñan? <sup>20</sup> Ti bike kukwe era erere niere munye abko krörö: Kä kebera nüke angwane, bä jötrö munkwe ja müäidi amne mun moto rabadi nötöte, akwa nitre nünanka Ngöbö rüere abko btä kä rabadi nuäre krübäte. Mun moto rabadi nötöte ja jiebti, akwa yebti kä rabadita nuäre munbtä, aisetet kä ulire ye käi rikwitadikäta jötrö munbti. <sup>21</sup> Yebtä abko ti bike kukwe bä mike krörö: Meri tä kite ja ngibiare angwane, ja tare nikadi kri kwe ngäbäkre ngibiabtä, ye tärä neme gare ie, aisetet tä neme ulire. Akwa ngäbäkre tärä därrere kwe angwane, tä ja tare nike krübäte ye käita nikwitekäta jökrä bti, ñobtä ñan angwane ngäbäkre tä därrere kwe ye abko käita neme nuäre krübäte btä, aisetet ja tare nikata kwe, ye abko käita nikwitekä bti. <sup>22</sup> Ye kwrere arato, monta ulire mtare ñobtä ñan angwane ti näinta, akwa ti jatadita mun tuenta angwane, kä rabadita bäri nuäre munbtä, akwa kä nuäre ye abko ni mda mda kákwe ñan diandrekäta jire chi munkän. Ti rükadita mun ngätäite abko käi rabadi bäri nuäre munbtä. <sup>23</sup> Ye ngwane mentokwäre munkwe ñan kukwe ngwiandretari mda tie, akwa ti bike kukwe era erere niere munye abko krörö: mun tö dreye, ye erere munkwe kärä ti Rünje ti kähti angwane, biandi jökrä kwe munye. <sup>24</sup> Mun jataba ja töitike tibe kena abti kä nüke mtare mun ngämi jäandrän kärere jire chi ti Rünje ti kähti, akwa mtare mentokwäre munkwe jäandrän kärä ie ti kähti angwane, biandi kwe munye. Yebtä kä nuäre rabadi täte jökrä munbtä.

<sup>25</sup> Tita kukwe bä mike mtare munye, btä tikwe blitaniri, akwa kä jatadi köböiti angwane, tikwe ñan kukwe bä mikadre mda munye, akwa tikwe blitadi metre ta ti Rünbtä munbe. <sup>26</sup> Ne aisetet ti näinta ti Rün känti, ye ngwane mentokwäre tikwe ñan jäandrän kärädre munkrä ti Rünje, akwa mun ara jire kákwe jäandrän kärädi au jakrä ti Rünje ti kähti, <sup>27</sup> ñobtä ñan angwane monta ti tarere amne ti jatani Ngöbökri abko munkwe mikani era jae. Yebtä abko ti Rün ara jire käta mun tarere, aisetet jäandrän käräta munkwe ti kähti abko ti Rün kákwe biandi munye. <sup>28</sup> Ti näma ti Rün känti. Ti jataba nüne mun ngätäite kä nebtä, akwa mtare abko ti bike kä mikekäta kä nebtä, aisetet ti bike nikenta ti Rün känti, nieba Jesukwe.

<sup>29</sup> Angwane nun ja töitikaka Jesube kákwe nieba mda ie:

Mtare mata blite era metre amne mata kukwe bä mike ñakare mda, <sup>30</sup> aisetet mtare nun ngämi kukwe ngwentari mae, känenkri nun bike dre dre ngwentari, ye garera mae, nibi tuen nunye amne, nunkwe ñan kukwe ngwiandretari jire mda mae abko nibi tuen nunye, aisetet ma jatani Ngöbökri abko nibira era nunkrä, nunkwe nieba Jesuye.

<sup>31</sup> Abtä Jesukwe nieba mda nunye:

¶Mtare ti kukwei nibi era munkrä ñan ñan, akwa ne känenkri ñakare ya! <sup>32</sup> Mtare kä nükera gwängwarbe angwane, mun näin iti iti jene jene kwäräkwärä amne munkwe ti mikadite kaibe. Akwa ti Rün tikwe käkwe ñan ti mikadite kaibe akwa tädi tibe, aiseti ti ñan rabadre kaibe. <sup>33</sup> Tita kukwe ne niere jökrä kore munye, mun rabadre nüne ketetibe tibe angwane, kä jáme Ngöböökwe rabadre munbtä abkokäre. Akwa mun tädi nüne kä nebtä nitre nünanka Ngöbö rüere ngätäite angwane, munkwe ja tare nikadi kri tödekaabtä tibti, akwa kukwe jökrä Ngöbö rüere kä nebtä abko tikwe ganaibarera kwäräbe, aiseti munkwe nünanka dite jabtä amne munkwe ñan kä jürä ngwian jabtä. Abko kore se, nieba Jesukwe nun ja töitikaka benye.

## 17

### *Jesukwe ja di käräbare Ngöböye jakrä*

<sup>1</sup> Jesukwe blitaba ünän jökrä kore, bti nikraba kä käinbti kwe, käkwe nieba Ngöböye:

Tata, ti krütadre, bti ti rükadreta nire abko makwe kä kitani ti käne, ye erere nüra, aiseti ti ma Odei ne käkwe ma mikadre ütiäte kri jae, abkokäre makwe ti ma Odei ne mika ütiäte kri jae, <sup>2</sup> ñobtä ñan angwane nitre nünanka ma rüere kä nebtä, ngätäite makwe ni dianinkä ruäre abko makwe biani tie ni ye rabadre nüne kärekäre kä käinbti, abkokäre ni jökrä nünanka kä nebtä ye makwe mikani gare jökrä täte ti ma Odei neye. <sup>3</sup> Akwa nitre biani tie makwe, ye rabadre nüne kärekäre, abkokäre ma abko Ngöbö itibe era metre rabadre gare kuin ietre amne ti Jesukristo juani makwe kä nebtä, ye abko rabadre gare kuin ietre, ye aibe köböire rabadre nüne kärekäre mabe.

<sup>4</sup> Mdakäre abko, tikwe ma mikani ütiäte kri kä nebtä amne makwe sribi biani nuendre tie, ye erere namani bare täte jökrä tie. <sup>5</sup> Ne aiseti, kä ne däte ngämi, känenkri ti näma ma känti angwane, ti nämane mikani ütiäte kri ma ben gware, ye kwrere makwe ti mikata ütiäte kri bobuta ma ben gware Tata.

### *Jesukwe ja di käräbare Ngöböye nitre ja töitikaka ben kräke*

<sup>6</sup> Mdakäre abko, nitre nünanka ma rüere, ngätäite makwe ni dianinkä ruäre abko makwe biani tie. Niaratre ye abko ie tikwe ma mikanina gare kuin amne niaratre ye abko makwe jökrä, akwa makwe biani tie amne ma kukwei kani ngäbti kwetre, käkwe mikani era jae. <sup>7</sup> Mtare jäandrän jökrä bianta tie makwe, ye abko tä kite makri nena gare kuin ietre, <sup>8</sup> ñobtä ñan angwane makwe ja kukwei biani tie, ye abko tikwe diribarera ietre amne kani ngäbti kwetre. Ne aiseti ti jatani makri, ye nükani gare metre ietre amne makwe ti juani abko mikani era kwetre, käta tödeke tibti. <sup>9</sup> Makwe niaratre biani tie amne niaratre abko makwe, aiseti titi ja di kärere kräke mae, akwa nitre nünanka ma rüere ye kräke ti ja di kärere ñakare mae mtare, ñobtä ñan angwane niaratre abko ñakare makwe aiseti. <sup>10</sup> Mdakäre abko, jäandrän jökrä tikwe ye abko makwe arato amne jäandrän jökrä makwe abko tikwe arato. Ye abko, ni biani tie makwe ye köböire ti abko ütiäte kri nena gare. <sup>11</sup> Erere arato, tikwe ñan nünandi mda kä nebtä, akwa nitre biani tie makwe, ye rabadi nüne kä nebtä amne ti abko näin nünenta mabe.

Tata, ma abko deme. Ma kä ütiäte kri, ye mden makwe biani tie arato, yebti makwe niaratre ngibia kuin, ma btä ti tä ketetibe, ye kwrere niaratre rabadre nüne ketetibe gware arato, abkokäre makwe niaratre ngibia kuin. <sup>12</sup> Ye abko, ma kä ye mden makwe biani tie arato amne, ti tä nüne niaratrebe kä nebtä angwane, ni biani tie makwe ye titi ngibiare ma käbti, amne ni biani tie makwe ye abko ñan nikaninta jire iti mento tikän. Akwa ma kukwei tä tikani Judas Iscariotetbä ye rabadre bare, abkokäre niara tä nianinte tikän amne rabadi mento mabtä kärekäre kä ja tare nikakrä ye känti.

<sup>13</sup> Mtare ti bike nikenta ma känti Tata, akwa ti tä kä nebtä angwane, nitre ja töitikaka tibe biani tie makwe abko kräke titi ja di kärere mae. Yebtä abko kä nuäre kri tibtä, ye kwrere kä rabadre bäri nuäre btätre abko titi kärere mae kräke. <sup>14</sup> Mdakäre abko, tikwe ma kukwei diribare ietre, akwa nitre nünanka ma rüere, kwrere titi nüne ñakare jire ma rüere amne, ye kwrere nitre ja töitikaka tibe ñan nena nüne ma rüere, aiseti nitre nünanka ma rüere tä bätä ngwen btätre. <sup>15</sup> Akwa ye ngäniene, ñan makwe nitre

ja töitikaka tibe ye diandrekä kä nebtä abko tita ribere mae, akwa makwe ngibiadre rüe Satana ngäniene abko tita ribere mae. <sup>16</sup> Ti abko ñakare nitre nünanka ma rüere kwrere, ye kwrere nitre ja töitikaka tibe abko ñan nena nüne ma rüere, aisetet bätä ngwianta btätre.

<sup>17</sup> Akwa nitre ja töitikaka tibe käkwe nünandre bari deme amne sribidre bari metre kwetre makrä, abkokäre makwe niaratre kwita käre köbö kwatirekwatire ma kukwei era metre yebti. <sup>18</sup> Angwane nitre nünanka ma rüere, ngätäite makwe ti juani kä nebtä, ye kwrere arato tita nitre ja töitikaka tibe juen niaratre ngätäite. <sup>19</sup> Tita ja mike jenena nünakäre makrä amne sribikäre makrä, ye kwrere niaratre rabadre mikani jenena makrä nünakäre deme amne sribikäre makrä.

### *Ni jökrä tödekaka Jesubti, kräke Jesukwe ja di kärabare Ngöböye*

<sup>20</sup> Mdakäre abko, ñan nitre biani tie makwe noko aibe kräke tita ja di kärere mae, akwa niaratre näin kukwe kuin tibta niere ni mda mdaye, ye abko nire nire käkwe tödekadi tibti niaratre kukwei köböire, nitre ye kräke tita ja di kärere mae arato. <sup>21</sup> Ma ti Rün tikwe töita ketetibe tibe amne tita ketetibe mabe, ye kwrere nitre tödekaka tibti tibti, ye makwe die mika ja töi mike gware jökrä nünakäre kuin jabe kwärikwäri, abkokäre tita ja di kärere mae kräke. Nitre tödekaka tibti tibti ye rabadre ketetibe nibe arato abko köböire makwe ti juani kä nebtä, ye rabadre era nitre nünanka ma rüere ye kräke, abkokäre tita ja di kärere mae kräke. <sup>22</sup> Mdakäre abko, makwe ti mikani ütiäte kri, ye kwrere tikwe niaratre mikani ütiäte arato, ye köböire abko niaratre töi rabadre ketetibe jökrä ño ti amne mata ketetibe gware ye kwrere abko krörö: <sup>23</sup> Tita nüne niaratrebtä amne mata ketetibe tibe, ye kwrere jire niaratre rabadre ni itibe kwrere nünakäre makrä. Ye abko, makwe ti juani kä nebtä amne mata ti tarere, ye kwrere mata nitre tödekaka tibti tarere, ye rükadre gare nitre nünanka ma rüere yeye, abkokäre nitre tödekaka tibti ye töi rabadre ketetibe jökrä ni itibe kwrere abko tita ribere mae.

<sup>24</sup> Tata tikwe, nitre ja töitikaka tibe amne ni mda mda käkwe tödekadi tibti, ye makwe biani tie, aisetet ti tädre mdente, ye känti tädre siba tibe, ie ti tö. Amne makwe ti mikani ütiäte kri, käkwe ja di kri bär nuäre biani tie, ye niaratre käkwe tuadre arato, ie ti tö, ñobtä ñan angwane kä ne däte ngämi, känenkri ma nämane ti tarere aisetet.

<sup>25</sup> Tata, käre mata kukwe era metre erere nuene amne, nitre nünanka ma rüere abko ie ma gare ñakare, akwa tie ma gare kuin, amne makwe ti juani ye abko nena gare nitre ja töitikaka tibe nokoye. <sup>26</sup> Amne tikwe ma mikanina gare ietre, akwa tikwe ma mikadi gare janknu ietre ma Üai köböire, ye köböire abko nita ja tarere kwärikväri, ye kwrere jire niaratre käkwe ja taredre kwärikväri arato amne, ti ara jire rabadre nüne niaratrebtä, abkokäre tikwe ma mikadi gare janknu ietre. Abko kore se, nieba Jesukwe niara Rün Ngöböye.

## 18

### *Jesu kani ngite*

(Mateo 26.47-56; Marcos 14.43-50; Lucas 22.47-53)

<sup>1</sup> Jesukwe kukwe nieba ünän jökrä kore, bti ngurun kä Cedrón, ye kwärä nakriri Jesu rikaba nun ja töitikaka benbe. Jesu rikaba ye känti abko olibo krie nämane nökani, känti Jesu rikaba nun ja töitikaka benbe. <sup>2</sup> Jesu nämanena gätäre bäre bäre kä ye känti nun ja töitikaka benbe, aisetet Judas, Jesu kitaka ngise kämikadre, ye ie kä ye nämanena gare arato. <sup>3</sup> Ne aisetet, batibe Judas jataba nitre krörökrörö jie ngwena: nitre rükä romanobo kwati amne guardia ju blitakrä Ngöböbe ngibabtikä abko nitre blitaka Ngöböbe ni mda mda diäre dänkientre amne nitre bariseo käkwe juani. Nitre jataba nüke Judabe ye abko näma näin jäandrän rükrä ngwena kisetekisete. Erere arato, näma näin ñukwä amne ñotra ngwena kisetekisete.

<sup>4</sup> Akwa Jesu abko, btä kukwe rakadikä ño ño, ye garera ie, aisetet nieba kwe ietre:

¿Munta näin nire känene ye? nieba kwe ietre.

<sup>5</sup> Niaratre käkwe nieba mda Jesuye:

Jesu Nazarebo känänta nunkwe, nieba kwetre ie.

Angwane Jesukwe nieba mda ietre:

Ti ara tä nete, nieba Jesukwe ietre.

Angwane Judas, Jesu kitaka ngise kämikadre ye näma nünaninkä siba nitre ye ngätäite.

<sup>6</sup> Angwane, Ti ara tä nete nieba Jesukwe, ye btäräbe nitre rükaba kwati Jesu rüere ye käkwe näntebata ja jiebti angwane, rikaba jökrä temen se kwrere. <sup>7</sup> Angwane Jesukwe niebata mda ietre:

¿Munta näin nire känene ye? niebata kwe ietre.

Angwane niaratre käkwe niebata Jesuye:

Jesu Nazarebo känänta nunkwe, niebata kwetre ie.

<sup>8</sup> Abtä Jesukwe niebata mda ietre:

Ti ara tä nete, tikwe nini munye. Akwa mutta näin ti känene ne ngwane, nitre ja töitikaka tibe noko aibe munkwe tuametre nikenta jirekäbe, nieba Jesukwe ietre.

<sup>9</sup> Kukwe ye rakakaba kore, ñobtä ñan angwane Jesukwe blitaba krörö Ngöböbe abko rabadre bare abkokäre: "Nire nire biani tie makwe, ye abko ñan riateba jire iti tikän," nieba kwe, erere rababa bare.

<sup>10</sup> Angwane Simón Pedro näma yete käkwe ngitra jabtä diankaba kwatate, bti ni iti kä Malco olo küde ruenkri tikakaba ta kwe ie. Malco ye abko nämane klabore ni blitaka Ngöböbe ni mda mda diäre dänkienkwe abko olo tikakaba Simón Pedrokwe. <sup>11</sup> Abtä Jesukwe nieba Pedroye:

Ngitra ye miketa kwatate yete. Ti Rün ara jire kite ti mike jäandrän tare krübäte nuene, ¿se abko tikwe ñan nuendre ya? nieba kwe ie.

### *Jesu jänikani Anás känti*

(Mateo 26.57-58; Marcos 14.53-54; Lucas 22.54)

<sup>12</sup> Bti nitre rükä romanobo amne dänkien kwetre btä guardia ju blitakrä Ngöböbe ngibiabtikä rükaba ye abko käkwe Jesu kaba ngite, bti mäkäteba kwetre, <sup>13</sup> bti järikaba käne kwetre nebe Anás känti. Anás ye abko Caifás köbrän. Anás abko käkwe sribibarera nitre blitaka Ngöböbe ni mda mda diäre dänkien kwrere, akwa kä ye ngwane abko Caifás nämane nitre blitaka Ngöböbe ni mda mda diäre dänkiene. <sup>14</sup> Bati Caifás ne mden käkwe niebare krörö Jesubtä nitre israelitaye: Ni israelita ñan krütadre jökrä, abkokäre ni itibe krütadre ni israelita jökrä kräke amne täte, niebare kwe.

### *Pedrokwe Jesu rükaninte käne*

(Mateo 26.69-70; Marcos 14.66-68; Lucas 22.55-57)

<sup>15</sup> Jesu järikaba ngite angwane abko Simón Pedro btä ni ja töitikaka Jesube rikaba iti mda siba Jesu jiebti. \* Angwane ni ja töitikaka Jesube rikaba iti Jesu jiebti, ye abko nämanena gare nitre blitaka Ngöböbe ni mda mda diäre dänkien yeye, aisetet rikaba ju bäre ki teri Jesube. <sup>16</sup> Akwa Pedro abko rababa nünaninkä ki jukweibtä. Abtä ni gare kuin nitre blitaka Ngöböbe ni mda mda diäre dänkienye, ye rikaba, käkwe blitaba meri jukwe ngibiabtikä yete ben angwane, rikaba Pedro ngwena ju bäre ki teri arato. <sup>17</sup> Angwane meri ye käkwe nieba Pedroye:

¿Ma abko ja töitikaka ni se ben arato ñan ñan? nieba kwe ie.

Abtä Pedrokwe nieba ie:

Ñakare. Tita ja töitike ñakare ben, nieba kwe.

<sup>18</sup> Ye ngwane abko, kä rababa tibo krübäte, aisetet nitre klabore amne guardia ju blitakrä Ngöböbe ngibiabtikä käkwe ñukwä bukateba, bti näma träse angwane, Pedro näma ñukwä träse siba niaratrebe yete.

### *Kukwe ngwianintari Jesuye*

(Mateo 26.59-66; Marcos 14.55-64; Lucas 22.66-71)

\* 18:15 Ni ja töitikaka Jesube nikani Simón Pedrobe ye abko Juan käkwe tärä ne tikani nütüta.

<sup>19</sup> Angwane Anás kákwe sribibarera nitre blitaka Ngöböbe ni mda mda diäre dänkien kwrere, ye mden rikaba kukwe ngwentari Jesuye nitre ja töitikaka benbtä amne kukwe ño diri nämane Jesukwe, ye abko rikaba ngwentari. <sup>20</sup> Angwane Jesukwe nieba ie:

Nitre israelita tä ja ükekrö sinagogate amne ju blitakrä Ngöböbe känti abko ie käre tita dirire amne tita blite ni jökrä ngwärekri, aisetetita blite ñakare gore nitre ja töitikaka tibe aibe ben. <sup>21</sup> ¿Se ñobtä abko tita kukwe ño dirire abko ma kite ngwentari ti ara jire ie ye? Nitre ti kukwei nuaka nuaka ye ben tikwe blitabare kukwe mden mdenbtä ye gare kuin jökrä ietre, aisetetmakwe kukwe ye ngwantari ietre, nieba Jesukwe Anáye.

<sup>22</sup> Jesukwe ñäkäba kore, yebtä abko guardia ju blitakrä Ngöböbe ngibiabtikä kákwe Jesu metaba tokobee ja kâne, kákwe nieba ie:

¿Nitre blitaka Ngöböbe ni mda mda diäre dänkien abko ie mata ñäke kore ya? nieba kwe ie.

<sup>23</sup> Jesu kákwe nieba mda ie:

Tikwe kukwe nini, ye mden blo abko niere tie. ¿Akwa tikwe kukwe nini ye tädbe ne ngwane, ñobtä mata ti mete niere tie? nieba Jesukwe ie.

<sup>24</sup> Angwane Jesu näma mäkäninte abko Anákwe juanba mda nebe dänä Caifás känti. Caifás abko näma nitre blitaka Ngöböbe ni mda mda diäre dänkiene kä ye ngwane abko känti Jesu juanba kwe.

### *Pedrokwe Jesu rükantebä, bämä*

(Mateo 26.71-75; Marcos 14.69-72; Lucas 22.58-62)

<sup>25</sup> Akwa Anás nämane kukwe ngwentari Jesuye angwane abko, Pedro abko näma ñukwä träse yete angwane, ni iti kákwe nieba ie:

¿Ma abko ñakare ja töitikaka ni se ben arato ya? nieba kwe ie.

Angwane Pedrokwe ja rükanteba, kákwe nieba:

Tita ja töitike ñakare ben yeri, nieba kwe.

<sup>26</sup> Yebti ni klabore nitre blitaka Ngöböbe ni mda mda diäre dänkien kräke, akwa ni olo tikakaba kwärä ie Pedrokwe abko mräkä kákwe nieba Pedroye:

¿Ma ye täni siba ben olibo nurai känti sete tikwe turi, nibi ruen tie ya? nieba kwe ie.

<sup>27</sup> Akwa Pedro abko kákwe ja rükantebata, ye btäräbe antlankwe ngwänänba, Jesukwe nieba ie, ye kwrere rakakaba.

### *Jesu jänikani Pilato ngwärekri*

(Mateo 27.1-2,11-14; Marcos 15.1-5; Lucas 23.1-5)

<sup>28</sup> Jesu näma Caifás känti, bti järikaba mda gobran romanobo ngwärekri angwane kä jatabara ngwen. Akwa nitre israelita ji dokwätë ñan rikaba Jesu ngwena nebe gwi gobran känti, ñobtä ñan angwane nitre ñakare israelita, känti niaratre rikadre nebe gwi angwane, kukwe nämane ükaninte nitre israelitakwe nünankrä dbe Ngöbö ngwärekri, ye rüiere ja mikadre ngite kwetre amne ñan rabadre dbe Ngöbö ngwärekri abtä ñan rabadre mrö bieta Pascuakrä kwete siba, abtä ñan rikaba gwä. <sup>29</sup> Abtä Pilato jataba blite bentre ju bäre, kákwe nieba ietre:

¿Drebtä munta ni ne kite ngite? nieba kwe.

<sup>30</sup> Angwane nitre israelita ji dokwätë kákwe nieba:

Ni ne ja mike ngite ñakare, akräke nun ñan jatadre ngwena jire chi müre ketadre mae nete, nieba kwetre.

<sup>31</sup> Abtä Pilatokwe nieba mda ietre:

Ni noko ngwenante, bti kukuweta ükaninte ño mun ngätäite ni kitakäre ngite, ye kwrere munkwe kukwe ükate kräke au, nieba kwe mikakäre yakrä jae.

Akwa nitre israelita ji dokwätë kákwe nieba mda Pilatoye:

Ni ngite abko nunkwe müre ketadre ye abko mun romanobokwe köböi biani ñakare nunye, aisetet nun ñan raba ni mda müre kete, nieba kwetre.

<sup>32</sup> Ja krütadi ño nieba Jesukwe, ye erere rababa bare köbö ye näire. <sup>33</sup> Yebtä Pilato rikaba gwä, kákwe Jesu käräba, bti niebare kwe ie:

¿Ma abko jrei nitre israelitakwe bkänä ya? niebare kwe ie.

<sup>34</sup> Abtä Jesukwe niebare mda ie:

¿Mata kukwe ngwentari tie ja töibti ya o ni mdakwe blitabare tibta mabe, aisetate mata kukwe ngwentari kore tie? niebare kwe Pilatoye.

<sup>35</sup> Angwane Pilatokwe niebare Jesuye:

Ti abko ñakare israelita, aisetate ma jrei nitre israelitakwe ya, ñakare ya, ye abko ñakare ütiäte tikrä, akwa nitre nünanka ma käite amne nitre blitaka Ngöböbe ni mda mda diäre dänkientre käta ma kite ngite müre ketadre tie, aisetate drebtä makwe ja mikani ngite niere tie, niebare kwe ie.

<sup>36</sup> Abtä Jesukwe niebare mda Pilatoye:

Ni kä nebtä tä jreire, ye kwrere ti ñan rabadre jreire. Ti rabadre jreire niaratre kwrere, akrake rükä tädrera sribikä tikrä abko käkwe rüdre ti dokwäre amne ti ñan kadre ngite nitre israelitakwe. Ye mden kisete, ti abko ñakare jrei kä nebtä kwrere, niebare kwe.

<sup>37</sup> Abtä Pilatokwe niebare mda Jesuye:

¿Ma abko jrei bkänä ñan ñan? niebare kwe ie.

Angwane Jesukwe niebare ie:

Ti abko jrei makwe nini, ye kwrere bkänä, aisetate ti därebare kä nebtä amne nitre nünanka kä nebtä abko ie ti jatani kukwe era erere niere, aisetate nire nire tä nekete kukwe erabtä abko käta ti kukwei kaen ngäbti amne tä mike täte, niebare mda Jesukwe.

<sup>38</sup> Angwane Pilatokwe niebare mda Jesuye:

¿Kukwe mden abko era? niebare kwe.

Pilatokwe kukwe ngwianintari kore Jesuye, bti Pilato rikabata ju bäre bliteta nitre israelita ji dokwätebe, käkwe nieba ietre:

Ni ne ja mike ngite ñakare nibi tuen tie. <sup>39</sup> ¿Akwa bieta Pascua näire tikwe ni ngite tikadrete iti abko nuenta käre, aisetate jrei nitre israelitakwe ne tikadrete tikwe, ie mun tö nibi ya? nieba Pilatokwe.

<sup>40</sup> Angwane nitre israelita jökrä rababa ngrente, kä rababa niere krörö:

¡Ni ye ñan tikate makwe! ¡Barrabás ye tikete! rababa niere.

Barrabás ye abko nämane rü miketbe gobran romanobo rüere abko tikadrete, rababa niere Pilatoye.

## 19

### Jesu kitani ngite müre ketadre krusobtä

(Mateo 27.15-31; Marcos 15.6-20; Lucas 23.13-25)

<sup>1</sup> Abtä Pilato nikani käkwe Jesu kwata metamna köbti nitre rükäye. Erere nuenbare kwetre. <sup>2</sup> Angwane Jesu bärabare jrei kwrere, abkokäre nitre rükä käkwe kri tukwä sribebare koronare abko mikani kwetre Jesu dokwäbti, bti dän bärabare tain drüne kitani kwetre Jesubtä mikakäre yakrä jae. <sup>3</sup> Bti namani niken käname Jesu ken, kä namani niere:

Jrei israelitakwe, ma raba nüne raire näre, namanintre niere Jesu mikakäre yakrä jae.

Bti namanintre Jesu mete tokobee ngwärebtä. <sup>4</sup> Yebti Pilato jataba ju bäre, käkwe nieba nitre israelita ji dokwäteye:

Jesu ja mike ngite ñakare nibi tuen tie, aisetate ti ki ngwenante munye nete tuen, nieba Pilatokwe ietre.

<sup>5</sup> Erere bkänä, Jesu jäjataba ju bäre angwane, kri tukwä sribebare koronare näma dokwäbti amne dän bärabare tain drüne kitani btä abko te järikaba ju bäre angwane, Pilatokwe nieba:

Ni ne ti bike miketa mun kisete abko tä nete ne, nieba kwe ietre.

<sup>6</sup> Angwane nitre blitaka Ngöböbe ni mda mda diäre dänkientre amne guardia ju blitakrä Ngöböbe ngibiabtikä okwä rababa Jesubtä angwane, rikaba ngrente krikri be, kä rababa niere:

¡Müre kete krusobtä! ¡Müre kete krusobtä! rababa niere.

Abtä Pilatokwe nieba mda ietre:

Niara ngite ñakare nibi tuen tie, akwa mun tö müre ketai ne ngwane, ngwenante munkwe müre keta krusobtä, nieba kwe mikakäre yakrä jae.

<sup>7</sup> Angwane nitre israelita ji dokwätä käkwe nieba mda Pilatoye:

Kukweta ükaninte keteti Ngöbökwé nun israelita ngätäite, ye rüere niarata ja mike ngite, ñobtä ñan angwane niarata ja Ngöbö Odei niere, ye abko kukweta ükaninte nun ngätäite abko rüere tä ja mike ngite, aisetet müre ketadre, rababa niere kore.

<sup>8</sup> Jesu abko ja Ngöbö Odei nämane niere, ye jarabare Pilatoye angwane, bari kä jürä namani btä. <sup>9</sup> Abtä nikaninta gwä, käkwe niebare Jesuye:

¿Ma abko kä mdenbo era metre? niebare kwe ie.

Akwa Jesu abko namani kwekbe, ñäkäbare ñakare kwe Pilato käre. <sup>10</sup> Abtä Pilatokwe niebare ie:

¿Ti di tärä ma bien müre ketadre krusobtä amne ti di tärä arato ma tikatekäreta, ye gare ñakare mae ya amarebti ma ñan tö nibi ti kukwei kain ngäbti ye? niebare kwe ie.

<sup>11</sup> Angwane Jesukwe niebare mda Pilatoye:

Ngöbökwé ñan kä biandre mae ti müre ketadre, akräke ma di ñan rabadre jire chi ti bien müre ketadre, aisetet nitre ti kitaka ngise mae müre ketadre, niaratre ye abko bari ngite krübäte Ngöböye makrä, niebare Jesukwe ie.

<sup>12</sup> Ye ngwane mentokwäre abko Pilato namani kä känene jae Jesu tikatekäreta, akwa nitre israelita ji dokwätä rababa ngrente, kä rababa niere:

¡Makwe ni ye tikaditeta ne ngwane, ma ñakare ja kukwe mukore emperadorebe! Mdakäre abko, nire tö ja mikai jreire Jesu kwrere, ni ye abko emperador rüere, rababa niere Pilatoye.

<sup>13</sup> Nitre ji dokwätä rababa ñäke kore, ye jaraba Pilatoye angwane, rikaba Jesu ngwena ju bäre, bti kürä näma gwi ja täkräre kukwe ükatekrä, yebti Pilato rababa täkänintbe. Kä te Pilato rababa täkänintbe ye abko kädian nämane Gabata. Gabata abko Kä Jäkwatare nieta hebreore abko känti Pilato nämane täkänintbe. <sup>14</sup> Kä ye ngwane abko, köbö ja mikakrä biare köbö jadükakrä ngäbti bieta Pascua angwane, ye näire bäsí ñänä ruäre angwane Pilatokwe nieba krörö nitre israelita ji dokwätä yeeye:

Jrei munkwe tä nete noko, nieba kwe.

<sup>15</sup> Abtä nitre israelita ji dokwätä käkwe ngrateba bari kri mda, kä rababa niere:

¡Ngwena mento, ngwena mento müre ketadre krusobtä! rababa niere.

Abtä Pilatokwe nieba mda ietre:

¿Tikwe jrei munkwe biandre müre ketadre krusobtä, ie mun tö nibi ñan ñan? nieba kwe.

Angwane nitre blitaka Ngöböbe ni mda mda diäre dänkientre käkwe nieba Pilatoye:

Emperador romanobo aibe tä jreire nunkwe. Nebti jrei mda ñakare jire nunkwe, nieba kwetre mda ie.

<sup>16</sup> Angwane nitre israelita ji dokwätä ye moto mikakäre jäme, Pilatokwe Jesu bianba müre ketadre krusobtä rükätre romanoboye.

### *Jesu metani krusobtä*

(Mateo 27.32-44; Marcos 15.21-32; Lucas 23.26-43)

Erere bkänä, nitre rükä rikaba Jesu ngwena müre ketadre krusobtä. <sup>17</sup> Jesu järikaba angwane, rikaba kruso ngwena jakrä au käkä “Ni Dokwä Kroko Käi” nie nämane abko känti. Kä ye arabe abko kädianta Gólgota hebreore. <sup>18</sup> Kä ye känti Jesu metaba krusobtä angwane, ni nibu metaba Jesubtä kwärikwäri müre ketadre, aisetet Jesu rababa ni nibu ye ngätäite. <sup>19</sup> Angwane drebtä Jesu kitaba ngite, ye Pilatokwe tikamna krörö kri kukwäriltä: “JESU NAZAREBO NERE ABKO JREI NITRE ISRAELITAKWE” abko tikamna Pilatokwe, bti mikamna krusobtä käin kwe. <sup>20</sup> Ye erere mikaba krusobtä käin angwane, nitre israelita kwati rababa ñäke tärä okwä yebtä, ñobtä ñan angwane känime juta Jerusalén köräbtä Jesu müre ketaba krusobtä. Erere arato, tärä okwä mikaba krusobtä käin, ye abko näma tikani hebreore, latinore amne griegore, ni kwati rabadre ñäke btä

abkokäre. <sup>21</sup> Pilatokwe tärä tikamna kore, yebtä abko nitre blitaka Ngöböbe ni mda mda diäre dänkientre käkwe niebare Pilatoye:

Jrei nitre israelitakwe, ye makwe ñan tika kore, akwa niarata bike jrei nitre israelitakwe, ye abko makwe tika kore, niebare kwetre Pilatoye.

<sup>22</sup> Akwa Pilato abko käkwe niebare mda ietre:

Tikwe kukwe tikamna, ye erere rabadi tikani. Tikwe ñan kwitadre jire, niebare kwe ietre.

<sup>23</sup> Akwa nitre rükä romanobo abko käkwe Jesu metaba krusobtä, yebti dän Jesukwe ñäkäbtiba ketabkä kwetre, bti dianba ötati jene jene kwe jakrä. Akwa dän nga dikani ötati nükebe temen Jesu nämane kite jabtä, abkobtä <sup>24</sup> nitre rükä romanobo käkwe nieba jae kwärikwäri:

Dän ne abko nikwe ñan ngiandrekä kiakia, aisetet ari ja gaen btä. Nirekwe ganandi abko kwe rabadi, nieba kwetre.

Ye kwrere bkänä nuenbare kwetre. Ye kwrere abko, Ngöbö Kukwei nämane tikani kira krörö Jesubtä abko rababa bare:

Dän tikwe dräibare jökrä jabti kwetre amne, dän nga tikwe abko btä ja gani kwetre, *Salmos 22,18*

nieta Ngöbö Kukweibtä abko erere nuenbare nitre rükä romanobokwe.

<sup>25</sup> Angwane kruso btä Jesu näma metani käin, kruso yebtä Jesumeye María näma yete etbabe. Erere arato, Cleofas nän muko kädian nämane María näma siba amne María Magdalabo näma arato kruso ken yete Jesu mukore. <sup>26</sup> Angwane Jesu okwä rababa meyebtä angwane, ti ja tötitakaka Jesube abko Jesu nämane tarere kri abko nämameye ken, abkobtä Jesu okwä rababa angwane, Jesukwe nieba meyeye:

Mama tikwe, ma ngobo makwe abko tä yete mabe ye, nieba kwe ie.

<sup>27</sup> Bti ti ja tötitakaka Jesube, ie Jesukwe nieba:

Mameye makwe abko tä yete mabe, ye makwe ngibia, nieba kwe tie.

Jesukwe ñäkäba kore tie, ye näire mentokväre tikwe Jesumeye kaba ngäbti ja gwirierte ngibiakäre.

### *Jesu krütani*

(Mateo 27,45-56; Marcos 15,33-41; Lucas 23,44-49)

<sup>28</sup> Jesukwe ñäkäba ünän kore, yebti sribi jatani neme bare jökrä ie, ye abko nämane gare ie, aisetet sribi mikani nuendre ie nämane tikani Ngöbö Kukweibtä abko rabadre bare täte, abkokäre nieba kwe:

Tomna nibi tie, nieba kwe.

<sup>29</sup> Angwane kä ye känti uba ñöi dime näma kantra chi kwati abko nitre rükä romanobo rikaba, käkwe jäandrän dän kukwän kwrere ye mritakaba jökrä uba ñöi dime yete, bti mäkäteba kwetre hisopo krie küdebtä, bti mikaba Jesu kadate kwetre. <sup>30</sup> Jesukwe uba ñöi dime ye ñaba ünän angwane, nieba kwe:

Sribita ti kisete, erere nibira bare täte jökrä tie, nieba kwe.

Ye btäräbe, Jesukwe ja dokwä giviakaba timonkwäre, käkwe ja üai mikabata Ngöbö kisete angwane krütäba.

<sup>31</sup> Köbö ye abko, köbö ja mikakrä biare köbö jadükakrä kräke amne, köbö jadükakrä ye nämane Pascua näire, aisetet bari ütiäte. Ye mdan kisete, nitre israelita ji dokwätä rikaba niere krörö Pilatoye:

Nitre tä krusobtä se krütadre jötrö, abkokäre ngüre ötabtäba, bti diandreta timon doboi mikadre, nieba kwetre.

<sup>32</sup> Ye erere bkänä, nitre rükä romanobo rikaba käkwe ni iti ngüre ötabtäba käne, bti ni mda näma krusobtä käin Jesu ken abko ngüre ötabtäba kwetre arato. <sup>33</sup> Yebti rikaba Jesu ngüre ötabtäba mda angwane, Jesu krütanina, btä okwä rababa, abtä Jesu ngüre ötabtäba ñakare kwetre. <sup>34</sup> Akwa ni rükä iti käkwe Jesu däkäteba bukobti kronante ta. Ye btäräbe däri amne ñö betakaba Jesu kronante ta. <sup>35-37</sup> Kukwe ye abko rakakaba kore tikwe tuuba ja okwä jenbti abko erere tita niere, aisetet kukwe era erere tita niere. Tita niere munye,

ñobtä ñan angwane Ni Dianinkä Ngöböökwe abko btä kukwe rakadrekä kore abko nämane tikani kira Ngöbö Kukweibtä abko erere rikaba neme bare krörö Jesubtä:

Niara kroko ötaninbtä ñakare krati ie,  
nieta Ngöbö Kukweibtä. Mdakäre abko, nieta krörö:

*Salmos 34.20*

Buko betadikä niara kronante ta nitre nünanka Jerusalén okwäbti,  
nieta arato Ngöbö Kukweibtä. Ye erere rababa bare Jesubtä ti okwäbti, aise te mun jökrä kákwe kukwe ne mikadre era amne tödekadre Jesubti, abkokäre tita niere munye.

*Zacarías 12.10*

### *Jesu doboi mikani*

(*Mateo 27.57-61; Marcos 15.42-47; Lucas 23.50-56*)

<sup>38</sup> Jesu krütaba, yebti José Arimateabo kákwe ja köböi käräba Pilatoye Jesu ngwäkä ngwiankäre doboi mikadre. José ye abko nämane dikekä siba Jesube, akwa nitre israelita ji dokwäte jürä rababa btä, aise te näma nekete tiebe Jesukri. José ye mden kákwe ja köböi käräba Pilatoye, ye erere rükabtiba Pilatoye angwane, José rikaba Jesu ngwäkä ngwena doboi mikadre. <sup>39</sup> Erere arato, Nicodemo rükaba blite bati deo Jesube, Nicodemo ara rükaba José Arimateabobe, kä jataba mirra krie ngwäri sribebare mnüne amne kri kädianta aloe sribebare mnüne, ye abko mritani ketetibe kwe abko näma rä bäne rükaba ngwena kabre, bäsí siä kwä kükü bti kwärä mikadre Jesu ngwakäbtä, ñan rä rabadre kure abkokäre. <sup>40</sup> Angwane José btä Nicodemo kákwe kri ngwäri mnü ye mikaba dän ütiäte kri kädianta lino btä abko te Jesu ngwakä mriateba kwetre, nitre israelita tä ni doboi mike ño, ye kwrere nuenba kwetre. <sup>41</sup> Yebti Jesu müre ketaba krusobtä, ye ken abko nura nämane nökani kabre angwane, kä ye känti abko kä muani btin jäkwatate ni doboi mikakrä näma kwati abko te ni doboi mika ngämi abko näma yete, <sup>42</sup> abko te Jesu doboi mikaba, ñobtä ñan angwane kä mkä ye abko näma känime juta Jerusalén yete amne köbö jadükakrä nitre israelitakwe abko jataba nüke angwane, ñan rabadre sribi ye nuene, aise te Jesu doboi mikaba jötrö kä ye känti.

## 20

### *Jesu nükaninta nire*

(*Mateo 28.1-10; Marcos 16.1-6; Lucas 24.1-12*)

<sup>1</sup> Yebti köbö kena bämänte dekä, María Magdalabo rikaba dobobti. Kä näma iko dekä angwane rikaba. Yebti nikani nebe dobobti angwane, jä kri mikani kä mkäbtä, ye abko nämanena dianinkä mento, btä okwä namani. <sup>2</sup> Angwane nikani betekäta gwäkäre nebata Simón Pedro känti amne ti ja töitikaka Jesube abko Jesu näma tarere kri ye känti, kákwe nieba nunye:

¡Ni Dänkien ngwakä jänikani doboibti mentokwäre amne mikani mdente mda ñan nebe gare jire chi nunye! nieba kwe nunye.

<sup>3</sup> Abtä Pedro amne ti rikaba mda Jesu doboi tuen. <sup>4</sup> Nun nibu rikaba betekä gware, akwa ti rikaba betekä bäri jötrö Pedrokrä, aise te ti rababa käne dobobti. <sup>5</sup> Ti rababa dobobti, kákwe ja mikateba timonkwäre, bti tikwe nikraba nguse amne dän te Jesu mrianinte aibe näma nguse, btä ti okwä rababa, akwa ti ñan rikaba nebe kä mkäte nguse.

<sup>6</sup> Yebti Simón Pedro rikaba nebe köre ti jiebti angwane, rikaba nebe kä mkäte nguse angwane, dän kukwän te Jesu mrianinte ye aibe kwanba ie. <sup>7</sup> Mdakäre abko, dän kukwän mdara jire, te Jesu dokwä mrianinte, ye abko näma mrianinkä kuin, näma mikani jenena dän kukwän bäri kri ye bäre mento abko kwanba ie arato. <sup>8</sup> Yebti ti rababa käne dobobti abko rikaba nikren kä mkäte nguse arato angwane, kukwe nakaninkä ño ño Jesubtä tikwe tuaba jökrä angwane, tikwe tödekaba bti. <sup>9</sup> Akwa ye känenkri, Jesu rükadreta nire tä tikani Ngöbö Kukweibtä, ye abko ñan nükani gare metre nun ja töitikaka Jesube ie, aise te nun ñan näma mike era. Akwa tikwe tuaba angwane, batibe rababa era tikrä, kákwe tödekaba bti. <sup>10</sup> Yebti nun nibu ja töitikaka Jesube ye rikabata gwä nebata ja gwiriete.

### *Jesukwe ja mikani tuadre María Magdalaboye*

(*Marcos 16.9-11*)

<sup>11</sup> Angwane María rikabata nebata dobobti Pedro amne ti jiebti. Abti Pedro amne ti rikabata gwä angwane, María aibe namani müen dobobti. Niara namani müen kore, käkwe ja mikaninte timonkwäre nikrakäre kä mkäte nguse. <sup>12</sup> Angwane angele nämane nibu nguse, btä okwä namani. Angeletre ye abko btä dän ngwen bürere jökrä abko nämane täkänintbe nguse. Jesu dokwä nämane, yekri angele nämane iti amne Jesu ngoto, yekri abko angele nämane iti mda abko btä Maríá okwä namani. <sup>13</sup> Angwane angeletre ye käkwe niebare Maríaye:

¿Mata dre müaire ti mräkä? niebare kwetre ie.

Angwane María käkwe niebare mda:

Ti Dänkien ngwákä jänikani tikän amne mikani mdente ñan nebe nüke gare tie, aisetetita müaire ye, niebare kwe angeleye.

<sup>14</sup> Maríakwe niebare kore, ye btäräbe nikrabareta ja trökri kwe angwane, Jesu nämane käname ken, btä okwä namani. Akwa Jesu ara nämane yete abko ñan nükani gare Maríaye. <sup>15</sup> Akwa Jesukwe niebare ie:

¿Mata dre müaire ti mräkä? ¿Nire käntarita näin makwe? niebare kwe ie.

Akwa ni ye abko nämane nura ngibiare, María namani nütüre, aisetetiba niebare kwe ie:

Ma nikani ti Dänkien ngwákä ngwena ne ngwane, makwe mikani mdente mda, ye makwe nie tie, ti mräkä, amne ti näin tuenta, niebare kwe ie.

<sup>16</sup> Abtä Jesukwe niebare mda ie:

¡María! niebare kwe ie.

Ye btäräbe María nikwitaninte, käkwe niebare hebreore Jesuye:

¡Rabuni! niebare kwe. (Ye abko “Dirikä tikwe” niebare kwe.)

<sup>17</sup> Angwane Jesukwe niebare mda ie:

Ti ngämi nikenta ti Rün känti kä käinbti, aisetetiba makwe ñan ti ketate, akwa nänta ti mräkätre ja töitikaka tibe ye känti amne makwe nie krörö ietre: Ti bike nikenta ti Rün amne mun Rün känti kä käinbti. Erere arato, Ngöbö tikwe amne Ngöbö munkwe, känti ti bike nikenta, tikwe nini, ye abko makwe nie kore ietre. Abko kore se, niebare Jesukwe Maríaye.

<sup>18</sup> Ye erere bkänä, María nikaninta, namaninta gwi angwane, Dänkien tuani kwe ye tanba kwe nun ja töitikaka Jesube yeye. Erere arato, Jesukwe blitabare ño ño ben, ye erere nieba jökrä kwe nunye.

### *Jesukwe ja mikani tuadre nitre ja töitikaka benye*

(Mateo 28.16-20; Marcos 16.14-18; Lucas 24.36-49)

<sup>19</sup> Yebti köbö kena bämänte ye arabe näire nun ja töitikaka Jesube näma ja ükaninkrö gwi, akwa nane nitre israelita ji dokwätä käkwe nun kadre ngite arato abko jürä rababa nunbtä, aisetetiba nun näma ja ükaninkrö, ye känti nunkwe jukwe dikaba jabti, akwa batibetiba Jesu rababa gwi amne rababa nünaninkä nun ja töitikaka ben ye ngätäite, käkwe nieba nunye:

Kä jäme Ngöböökwe raba munbtä, nieba kwe nunye.

<sup>20</sup> Jesukwe ñäkäba kore, ye btäräbe klaboträin kisebtä amne buko träin kronante mikaba tuadre kwe nunye angwane, kä rababata nuäre krübäte nunbtä nun Dänkien tuareta. <sup>21</sup> Angwane Jesukwe niebata mda nunye:

Kä jäme Ngöböökwe raba munbtä. Ti Rün käkwe ti juani ño, ye kwrere ti bike mun juen arato, nieba kwe nunye.

<sup>22</sup> Ye btäräbe müre täkäba kwe nunbtä, käkwe nieba nunye:

Ngöbö Üai Deme kaen ngäbti munkwe. <sup>23</sup> Nire nire ngite abko diandrekä btä munkwe niedi ie, ye erere Ngöböökwe dianinkära btä; akwa nire nire rabadi ngite kärekäre munkwe niedi ie, ye abko Ngöböökwe ñan ngite diandrekä btä, nieba Jesukwe nun ja töitikaka benye.

Bti Jesukwe kä mikakaba. <sup>24</sup> Jesu rükabata kena nun ja töitikaka ben ngätäite, ye näire abko ni iti ja töitikaka ben kädian näma Tomás abko näma ñakare nunbe yete. Tomás ye

mden abko kädian näma “Munkin” abko näma ñakare angwane Jesu rükabata. <sup>25</sup> Yebti Tomás rükabata angwane, nun ja tötitkaka Jesube kákwe nieba ie:

Nunkwe ni Dänkien turi mtare, nunkwe nieba ie.

Akwa Tomás abko kákwe nieba mda nunye:

Tikwe ñan klaboträin tuadre kisete amne tikwe ñan kise kräkia mikadre klaboträinte, erere arato bukoträin kronante, te tikwe ñan kise mikadre, ne ngwane tikwe ñan munukwei mikadre era jire chi, nieba kwe nunye.

<sup>26</sup> Abti bämän krati mda nun ja tötitkaka Jesube näma ja ükaninkröta jökrä bämänte angwane, Tomás näma siba yete angwane, nunkwe jukwe dikaba arato, akwa batibe Jesu rababa gwi amne rababa nünaninkä nun ngätäite, kákwe niebata nunye:

Kä jáme Ngöbökwe raba munbtä, nieba kwe nunye.

<sup>27</sup> Yebti nieba kwe mda Tomáye:

Tomás, kise mike tie nete amne ti kise träin ne mike ñäräre, bti ti krona träin ne te kise krien tie, bti kukwe ñan tä nebe era makrä, ye kwrere makwe ñan nuen mda, kákwe kukwe tibtä ye mika era jae, nieba Jesukwe ie.

<sup>28</sup> Angwane Tomákwe ngrateba kri, kákwe nieba Jesuye:

jMa abko ti Dänkien tikwe amne Ngöbö tikwe! nieba kwe ie.

<sup>29</sup> Angwane Jesukwe nieba mda ie:

Mata ti tuenta ja okwä jenbti, aisetet iara abko makwe miri era, kákwe tödiri tibti ñan ñan; akwa nire nire tä ti tuen ñakare akwa tä ti kukwei mike era jae amne tä tödeke tibti, ni yebtä abko kä rabadi bäri nuäre krübäte amne Ngöbökwe ja di biandi ietre, nieba Jesukwe Tomáye.

<sup>30</sup> Jesu abko nämane sribire nun ja tötitkaka benbe kä nebtä angwane, Ngöbö di näma ben ye bää mikakrä abko sribi ñan tuabare nuenba kabre mda kwe nun ja tötitkaka ben okwäbti, akwa ye abko tikwe tikaba ñakare jökrä tärbä nebtä. <sup>31</sup> Akwa munkwe kukwe kuin Jesubtä mikadre era jae amne Ni Dianinkä Ngöbökwe abko Jesu ara amne niara abko Ngöbö Odei, ye abko rabadre era munkrä amne munkwe tödekadre bti, abkokäre tikwe kukwe ne tikani. Mdakäre abko, munkwe tödekadre Jesubtä, ye köböire munkwe nünandre kärekäre Ngöböbe, abkokäre titä kukwe ne tike.

## 21

### *Nitre ja tötitkaka Jesube kákwe gwa gani kabre*

<sup>1</sup> Jesukwe ñäkäba kore Tomáye. Abti Jesukwe ja mikabata tuadre mda nun ja tötitkaka benye ñö okwä kri kädianta Tiberias ye köräbtä. Ñö okwä kri ne arabe kädianta Galilea arato, känti kukwe rakakaba krörö: <sup>2</sup> Simón Pedro näma Tomábe yete. Tomás ye arabe kädian näma “Munkin” abko näma yete. Erere arato, Natanael nünanka juta Canáte kä Galileate amne Zebedeo ngobo nibu, btä nun ja tötitkaka Jesube näma nibu mda yete.

<sup>3</sup> Angwane Simón Pedro kákwe nieba nunye:

Ti bike niken gwa gaen, nieba kwe.

Angwane nunkwe nieba Pedroye:

Nun bike niken siba mabe, nieba nunkwe.

Ye erere bkänä, rikaba, rankwaba rute amne rikaba gwa gaen. Akwa ye näire deo käbä rababa ñakare jire gwabtä. <sup>4</sup> Abti kä jataba ngwen dekä angwane, batibe Jesu rababa ñö okwä köräbtä yete, akwa Jesu ara näma yete, ye abko ñan rükaba gare nunye. <sup>5</sup> Angwane Jesu kákwe nieba nunye:

¿Gwa tärbä munkwe ya ti mräkätre? nieba kwe.

Nunkwe nieba ie:

Gwa ñakare nunkwe, nunkwe nieba Jesuye.

<sup>6</sup> Abtä Jesukwe nieba mda nunye:

Krade kiteta ñöte küde ruenkri rubtä timon yete munkwe angwane, mun käbä rabadi, nieba kwe nunye.

Ye erere nunkwe nuenba angwane, gwa rababa kratibe dikaro kradete, aisetet krade ñan rababa näkäita kukwâne nebata rute nunye. <sup>7</sup> Angwane ti ja töitikaka Jesube abko Jesu nämane tarere kri abko käkwe nieba Pedroye:

¡Ni Dänkien ara tä ñö köräbtä se! tikwe nieba.

Tikwe nieba kore, ye jaraba Simón Pedroye angwane, jötrö ngwarbe dän kitaba jabtä kwe, bti rankwaba ñöte, rikaba jübenkä nebe Jesu känti. <sup>8</sup> Angwane nun mda mda ja töitikaka Jesube abko rikaba ru ngwena janknu nebe ñö köräbtä. Akwa gwa rababa kabre kradete, ye abko nun rikaba jäke bätärekä bätärekä nebe ñö köräbtä. Nun näma bå käname båsi metro siento krati näre ñökrä ken, aisetet rababa gwa ngwena nebe ñö köräbtä. <sup>9</sup> Abti rababa ñö köräbtä jate, rankwaba timon angwane, ñukwâ oto näma bukaninte kwati kwanba nunye. Ñukwâ yebti abko gwa näma mikani krati amne ban näma mikani arato. <sup>10</sup> Angwane Jesukwe nieba nunye:

Gwa naka munye, ye ngwen ruäre kukwadre nete, nieba kwe nunye.

<sup>11</sup> Angwane jötrö Simón Pedro rikaba rute käin, kä rikaba krade ngwena nebe jate. Gwa krikri be näma kradete, ye tanba angwane, gwa näma siento krati bti gre ketebu bti krä jätäbtä krämä (153) kradete. Gwa näma kabre kore, akwa krade rötateba ñakare.

<sup>12</sup> Yebti Jesukwe nieba mda nun ja töitikaka benye:

Mun jakwe mröre, nieba kwe.

Ye erere nun rikaba, akwa Jesu abko ni Dänkien ara abko rababa gare nunye, aisetet Jesu abko nire ye abko ja ñan rükaba töre nunye ngwentari ie. <sup>13</sup> Yebti Jesukwe krötäba nun ken, käkwe ban amne gwa dianba kisete, bti bianba kwe nunye kwetadre. <sup>14</sup> Ne ngwane abko Ngöbökwe Jesu mikaninta nire, yebti Jesukwe ja mikaba tuare bämäkäre nun ja töitikaka benye.

#### *Jesukwe blitabare Simón Pedrobe*

<sup>15</sup> Nunkwe mröba ünän jökrä angwane, Jesukwe nieba Simón Pedroye:

Simón, Jonás ngobo, ¿mata ti tarere båri ni mda mda noko ngwâ ya? nieba kwe ie.

Angwane Pedrokwe nieba mda ie:

Jän, ti Dänkien. Ma tare kri tikwe ye garera mae, nieba kwe Jesuye.

Angwane Jesukwe nieba mda ie:

Nitre tödekaka tibti tä obeja ngäbäli kwrere, ye makwe buka, nieba kwe Pedroye.

<sup>16</sup> Yebti Jesukwe niebata bobuta ie:

Simón, Jonás ngobo, ¿mata ti tarere era metre ya? nieba kwe ie.

Angwane Pedrokwe niebata Jesuye:

Jän, ti Dänkien. Ma tare kri tikwe, ye garera kuin mae, nieba kwe ie.

Angwane Jesukwe nieba mda ie:

Nitre tödekaka tibti tä obeja kwrere, ye makwe ngibia, nieba kwe ie.

<sup>17</sup> Yebti bämäkäre Jesukwe niebata mda Pedroye:

Simón, Jonás ngobo, ¿mata ti tarere era metre ya? nieba kwe ie.

Jesukwe kukwe arabe ngwiantariba bämä jire ie, abtä moto rababa ulire, käkwe nieba Jesuye:

Ti Dänkien, kukwe gare jökrä mae, aisetet ma tare kri tikwe, ye gare kuin mae, nieba kwe ie.

Abtä Jesukwe nieba mda ie:

Nitre tödekaka tibti tä obeja kwrere, ye makwe buka, nieba kwe ie.

<sup>18</sup> Yebti Jesukwe nieba mda ie:

Ti bike kukwe era erere niere krörö mae: Ma nämane batia angwane, ma nämane ja dätere, bti ma tö nämane nebe rikai mdente erere, känti ma nämane nikken. Akwa ma rabara unbre angwane, makwe ja küde aibe ngökadite amne ni mdakwe dän kitadi mabtä amne, ma ñan tö näin abko känti ma jänäin, nieba Jesukwe Pedroye.

<sup>19</sup> Jesukwe nieba kore Pedroye, ye abko Pedro krütadi ño krusobtä abko Jesu tö rababa niei biare ie, abkokäre nieba kore kwe ie. Erere arato, Pedro krütadre, yebti abko Ngöbö

rabadre käkitaninkä kri abko Jesukwe mikaba gare ie, käkwe nieba kore ie. Yebti Jesukwe nieba mda Pedroye:

**j**Makwe dikaka janknu ti jiebti, ie ti tö! nieba kwe ie.

**20** Jesu amne Pedro näma dikekä ñö köräbäre, ye btäräbe Pedrokwe nikrabata ja jiebti angwane, ti ne mdən Jesu näma tarere, ye rükaba niaratre jiebti abko btä Pedro okwä rababa. Ti näma täkänintbe känime Jesu ken mröre mrä Jesube Pascua näire angwane, tikwe nieba Jesuye: **¿**Ti Dänkien, nirekwe ma kitadi ngise ma rüeye müre ketadre? tikwe nieba Jesuye abko rükaba Jesu amne Pedro jiebti. **21** Ti ne mdən abko rikaba tuen Pedroye angwane, Pedrokwe nieba Jesuye:

**¿**Ti Dänkien, niara sebtä abko dre rakadikä? nieba kwe Jesuye.

**22** Abtä Jesukwe nieba Pedroye:

Ti tö rabadre ni se mikai nüne janknu angwane, tädre nire angwane ti jatadreta kä nebtä, aisetē ye ñan rabadre ütiäte makrä. Akwa ma abko käkwe dikaka janknu ti jiebti, nieba kwe ie.

**23** Jesukwe nieba kore Pedroye, yebtä abko ti ñan krütadre jire abko ja mräkätre ruäre tödekaka Jesubti kä rababa nire jae kwärikwäri. Akwa Jesukwe ñan nieba kore, akwa nieba krörö kwe: “Ti tö rabadre ni se mikai nüne janknu angwane, tädre nire angwane ti jatadreta kä nebtä, ye ñan rabadre ütiäte makrä,” nieba Jesukwe. **24** Ti abko btä Jesukwe blitaba Pedrobe abko käta tärä ne tike amne, tikwe kukwe tuaba Jesubtä ja okwä jenbti erere tita nire metre, aisetē kukwe ne abko era metre erere abko gare nie. **25** Jesu nämane sribire kä nebtä angwane, sribi kri namani bare kabre mda ie, aisetē kukwe ye tikadre jökrä ja täritäri täräbtä angwane, tärä ye käi rabadre ñakare kä nebtä, raba ruen tie. Abko kukwe nakaninkä kore Jesubtä. Abko kore se. Ne ngörä.

## Sribi Nitre Jesu Kukwei Ngwianka Köböire

### Los Hechos de los Apóstoles

Tärä ne abko Lucakwe tikani ni kädian nämane Teófilo ye ara kräke. Tärä tikani käne kräke abko Kukwe Kuin Jesubtä Tikani Lucakwe. Ye mden kisete, ni tärä ne tikaka abko Lucas ara tä gare nie. Niarakwe tärä Lucas tikani käne, abti tärä Hechos ne tikani kwe. Jesu abko nikaninta kä käinbti, yebti Jesukwe sribi nuenbare ño ño Ngöbö Üai köböire kä nebtä nitre Jesu kukwei ngwiankabti abko Lucas tä mike gare tärä nebtä. Kukwe ne tä tikani krörö Hechos 1.8 yebtä: “Mun rabadi dite, kä näin kukwe kuin tibtä ye niere juta Jerusalénte amne kä Judeate amne kä Samariate. Erere arato, mun näin kukwe kuin ye niere kä jökräbti temen” abko tä tikani. Bäri käne Ngöböökwe sribibare ño ño Pedro köböire Jerusalénte, Judeate amne Samariate abko Hechos tä niere. Yebti Pablo abko kákwe kukwe kuin Jesubtä mikani gare kä jökräbti temen abko Lucas kákwe mikani gare. Tärä nebtä abko, Jesukristo abko ni Diantarikä ni jökrä kräke abko Lucas tä mike gare.

Lucas abko ni kräkä bianka. Pablo nikani kukwe kuin Jesubtä mike gare abko ben Lucas nikani bäre bäre arato. Ye mden kisete, Ngöböökwe sribibare ño ño Pablo köböire abko Lucakwe tuani ja okwä jenbti abko erere tikani täräbtä kwe.

### KUKWE NAKANINKÄ KÄNEKÄNE JESU KUKWEI NGWIANKABTÄ (1.1-26)

#### *Jesu nikaninta kä käinbti*

<sup>1-2</sup> Ti mräkä Teófilo, tikwe tärä tikani käne mae, yebtä tikwe tikaba krörö: Ngöbö ngämi niken Jesu ngwenante kä käinbti känenkri Jesu nikani sribire kena angwane, dre dre nuenbare kwe amne dre dre diribare kwe abko tikwe tikani käne täräbtä makrä. Erere arato, ni dianinkä kwe ja kukwei ngwianka, ye abko kákwe dre dre nuendre abko niebare kwe ietre Ngöbö Üai Deme köböire abko tikwe tikani käne täräbtä makrä. <sup>3</sup> Jesu krütani, yebti nükaninta nire. Ne abko niara nükaninta nire bkänä rabadre gare metre, abkokäre ja mikani tuadre bäre bäre köbö gre ketebu kwe niara kukwei ngwianka yeye. Angwane Ngöböta gobrane ño ni kwe ngätäite, abkobtä blitabare kwe bentre. <sup>4</sup> Angwane batí Jesu nämane bentre angwane, niebare krörö kwe ietre:

Ngöbö ti Rün kákwe ja Üai Deme köböi mikani munye, btä tikwe blitaba munbe, ye munkwe ngibia Jerusalénte. Munkwe ñan kä mikaka jire Jerusalénte abko titä niere munye, <sup>5</sup> ñiobtä ñan angwane Juankwe ni ngökani ñö aibe te ni mikakäre jenena Ngöbökrä, akwa Ngöböökwe ja Üai Deme juandi nünakäre munbtä, aisetet munkwe ngibia Jerusalén yete. Abko kore se, niebare Jesukwe ietre.

#### *Ngöbö nikani Jesu ngwenante kä käinbti*

<sup>6</sup> Yebti nitre Jesu kukwei ngwianka kákwe niebare mda Jesuye:  
Dänkien, ¿jrei nämane kira nun ngätäite nete, ye kwrere ma bike gobrane nun israelita ngätäite nete ya? niebare kwetre Jesuye.

<sup>7</sup> Jesukwe niebare mda ietre:  
Ti rabadre gobrane ñongwane amne köbö mdente, ye abko ti Rün käta ükete au tirkä amne, ye ñan rabadre gare munye. <sup>8</sup> Akwa kukwe krörökrörö abko rabadre gare munye: Ngöbö Üai Deme rükadi nüne munbtä, kákwe ja di biandi munye angwane, mun rabadi dite, kä näin kukwe kuin tibtä ye niere juta Jerusalénte amne kä Judeate amne kä Samariate. Erere arato, mun näin kukwe kuin ye niere kä jökräbti temen, ye abko rabadre gare käne munye. Abko kore se, niebare Jesukwe ietre.

<sup>9</sup> Jesukwe blitabare ünän kore bentre angwane, niaratré okwä nämane Jesubtä. Ye btäräbe Ngöböökwe Jesu kaninkä käin, nikani ngwena mütate ta käin amne nianinkäbe niaratré okwáte, nin jatabareta mda ietre.

<sup>10</sup> Jesu namani niken kä käinbti, ye abko nikani nenkä ño niaratre okwäbti abko jiebti okwä nämane kwekbe. Ye btäräbe ni btä dän ngwen bürere namanina nünaninkä nibu niaratre ken, <sup>11</sup> kákwe niebare ietre:

Mun Galileabo, okwäbti Ngöbö niki Jesu ngwenante kä käinbti abko jiebti mun okwäta. ¿Se ñobtä mun okwäta jiebti? Jesu ye mden Ngöbö niki ngwenante kä käinbti mtare, ye kwrere jatadita bobuta, niebare kwe ietre.

### Matías dianinkä sribikäre Jesu kukwei ngwianka

<sup>12</sup> Kä ye ngwane abko, nitre Jesu kukwei ngwianka nämane Ngitio Olibobti, nikaninta Jerusalén. Ji Ngitio Olibo nebebe Jerusalén ye abko bäsí kilometro krati, känti nikaninta.

<sup>13</sup> Nikani nementa jutate angwane, ju käin ninkri, känti nämanentre nüne, ye känti nikani nebata. Ye känti Pedro, Juan, Santiago btä Andrés; Felipe btä Tomás; Bartolomé btä Mateo; Alfeo ngobo Santiago btä Simón (ne arabe kä Zelote) amne Santiago mda ngobo Judas abko nämane arato. <sup>14</sup> Ye känti, meri ruäre, ben nämane ja ükekrö käre blitakäre Ngöböbe amne, Jesu meye María amne Jesu etbakantre, ben nämane blite Ngöböbe arato.

<sup>15</sup> Kä ye ngwane abko batira jire ni tödekaka Jesubti nämane ja ükaninkrö bäsí gre keta ti jire, ye ngätäite Pedro namani nünaninkä, kákwe niebare:

<sup>16</sup> Ja mräkä, Judas nikani Jesu rüe jie ngwena Jesu kaen ngite, ye abko Ngöbö Üai Deme köböire nämane tikani kira Ngöbö Kukweibtä jrei Davikwe. Ye rabadre bare, mden erere namanina bare mtare. <sup>17</sup> Judas abko nämane nibe ketetibe amne nämane sribire nibe gware, niebare Pedrokwe.

<sup>18</sup> (Akwa Judas ye mden abko kákwe kukwe nuenbare käme Jesu rüere, ye abko ütiä biani ie. Mdenbti kä kökani kwe jakrä. Abti kä ye känti, niara nikani ngitiekä dokwäre temen amne büle ngetrani angwane, ngänkrä nakwani jökrä künken. <sup>19</sup> Ye abko, nitre nünanka Jerusalén kákwe gani angwane, kä ye kädiani Aceldama kwetre. Ye abko "Kä Därire" nieta niaratre kukwe arameore.)

<sup>20</sup> Pedrokwe niebare:

Kukwe rakadrekä kore, ye mden abko nämane tikani krörö Davikwe tärä Salmobtä:  
Ju niarakwe, känti kä raba kaibe ngwarbe jökrä amne, ni mda ñan raba nüne jire niara täte. Salmos 69.25

Erere arato, kukwe nebtä Davikwe kukwe tikani mda abko krörö:  
Sribi kwe abko raba ni mda kisete, Salmos 109.8  
tikani kore kira Davikwe.

<sup>21</sup> Ne aisetet, ni Dänkien Jesu nämane nüne ni ngätäite nete angwane, ni ruäre tä näin siba nibe, ne käre nämane näin ketetibe nibe <sup>22</sup> kena angwane Juankwe Jesu ngökani ñöte abti kä nükebe Ngöbö nikani Jesu ngwenante kä käinbti. Nitre tä näin kore nibe, ye ngätäite nikwe ni diandrekä iti sribikäre jabe Judas täte, Jesu nükaninta nire kädriekäre gware nibe abko rabadre kuin. Abko kore se, niebare Pedrokwe ietre.

<sup>23</sup> Ye erere bkänä, ni mikani nibu jite kwetre diandrekä mikakäre sribire abko nere: Ni iti abko kädian nämane José, arabe kädian nämane Barsabás amne arabe kädian nämane Justo arato. Amne ni mda abko kädian nämane Matías mikani kwetre jite arato.

<sup>24-25</sup> Nebti blitabare krörö kwetre Ngöböbe: Ni Dänkien Jesu, Judas Iscariote kákwe ja mikani ngite, känti sribi kwe namani ie amne, Ngöböökwe üai juani mdente, ye känti nikani. Mtare nire rabadre ma kukwei ngwianka Judas täte, ye abko makwe mika gare nunye, ñobtä ñan angwane ni moto ño gare kuin jökrä mae, aisetet nitre nibu ngätäite, nire rabadre abko makwe mika gare nunye, niebare kwetre Ngöböye. <sup>26</sup> Yebti nire rabadre sribire abko Ngöböökwe mikadre gare ietre, abkokäre jä kitani kwetre\* gakäre angwane, jä yebti abko Ngöböökwe Matías mikani jite. Ye ngwane mentokwäre, Matías namani Jesu kukwei ngwianka siba ni ni jätäbti iti yebe.

### KUKWE KUIN JESUBTÄ NIEBARE JUTA JERUSALÉNTE (2.1–8.3)

\* 1:26 jä kitani kwetre. Proverbios 16.33 yebtä ñäke.

*Ngöbö Üai Deme nükani*

<sup>1</sup> Bieta kädian nämane Pentecostés\* ye abko köböi nükaninta angwane, nitre tödekaka Jesubti nämane ja ükaninkrö jökrä ja känti. <sup>2</sup> Te batibe müreta kite mate bäri ribi krübäte ngöta neme, ye kwrere jire kä ngö jatani kä käinbtí timonkwäre abko ngö nükani mate gwita temen niaratre nämane täkänintbe jökrä ye känti. <sup>3</sup> Angwane jändrän bä namani ñukwä jutra kwrere niatebare abko nikani mate jene jene ni itire itire btä gwita temen. <sup>4</sup> Ye btäräbe Ngöbö Üai Deme namani täte jökrä btätre. Angwane ni kukwei jenena bätäkä ngwarbe btä ja tötitikani ñakare kwetre abko erere bti namanintre blite, Ngöbö Üai namani kukwe tike ño, ye kwrere namani blite jökrä.

<sup>5</sup> Kä ye ngwane abko nitre israelita nünanka kä jökräbti temen kä nämane Ngöbö mike ütiäte abko nämane nünentbe Jerusalénte Ngöbö käkitakakäre Pentecostés näire. <sup>6</sup> Angwane nitre tödekaka Jesubti namani blite bätäkä ngwarbe, kukwe ye jarabare nitre israelitaye angwane, dre namani nakenkä ñan namani nüke gare ietre, kákwe ja ükaninkrö kwati ni kukwei nuakäre, ñobtä ñan angwane nitre nämane yete, ye kukwe ño ño abko erere nitre tödekaka Jesubti namani blite. <sup>7</sup> Yebtä abko, ni jökrä kákwe ja ngwiani nikenkä amne töi ñan namani krütare jökrä, kä namani niere krörö jae kwärikwäri:

¡Nitre noko abko ñan Galileabo jökrä ya, <sup>8</sup> amarebti nibitre blite ni kwrere amne kukwe nibi nüke gare nie se! <sup>9</sup> Nita nete ne abko, Partobo, Medobo, ni Elambo, ni Mesopotamiabo, ni Judeabo, ni Capadociabo, ni Pontobo tä nete. Erere arato, ni nünanka kákä Asiate tä nete. <sup>10</sup> Mdakäre abko, ni Frigiabo, Panfiliabo amne ni Egiptobo tä nete amne, ni nünanka kä Libiate juta Cirene ken tä nete. Erere arato, ni nünanka juta Romate tä siba nete abko <sup>11</sup> ruäre därebare ni israelitakri, akwa ruäre abko kákwe Ngöbö nitre israelitakwe kani ngäbti Ngöbö jen kwe kwrere, köböire namani nekete jakri nitre israelitabe abko tä nete. Erere arato, ni nünanka kä butubti Cretate amne, ni kä Arabiabo tä nete. ¿Se ño abko sribi kri nuenbare Ngöböökwe, btä nibitre blite ni jökrä kukwere se? ni jökrä namani niere kore jae kwärikväri.

<sup>12</sup> Yebtä abko, ni jökrä ñan töi namani krütare amne töbikadre ño mda kwetre ñan namani nüke gare ietre, kä namani niere jae kwärikväri:

¿Dreta nakenkä nete amarebti ni jökrä nibi blite bätäkä ngwarbe kore se? namanintre niere mda.

<sup>13</sup> Akwa ni ruäre abko nämane nitre tödekaka Jesubti mike yakrä, kä namani niere:

¡A, ngwarbe nibitre dröbare jökrä, aisetetätre kore se! namanintre niere.

*Pedro kákwe blitabare Jesubtä*

<sup>14</sup> Ye btäräbe nitre ni jätäbti iti Jesu kukwei ngwianka mda mda, ben Pedro namani nünaninkä krö, kákwe ñäkäbare jume ja dibti krörö:

Ti mräkä israelita amne ni mda mda tä nüne Jerusalén nete abko ie dre dre tä nakenkä rabadre gare, aisetetibike kukwe niere, neye olo ketete kuin munkwe: <sup>15</sup> Nitre ne tä dröbare mun nibi nütüre btä, akwa ye kwrere ñakare, ñobtä ñan angwane ñänä okwä krä ökänbe krire dekä. Se ño abko rabadre dröbare jökrä, aisetetiaratre ñan tä dröbare. <sup>16</sup> Akwa kukwe ne tä nakenkä nete mtare, abkobtä Ngöbö kukwei niekä Joel kákwe tikani krörö:

<sup>17</sup> Ngöböta niere krörö munye:

Kä mrä angwane, ni nünanka kä ketareketare te kwäräkwärä, btä tikwe ja Üai Deme mikadi täte.

Ne aisetetibune ngäbriänkä merire, brare kákwe ti kukwei niedi amne, ni brare bati bati abko ie jändrän tikwe rabadi tuen köböre kwrere.

Amne ni unbretibune abko tikwe mikadi köböre jändrän tikwebtä arato.

<sup>18</sup> Erere arato, ni merire, brare sribikä tikrä, yebtä tikwe ja Üai mikadi täte angwane, niaratre kákwe ti kukwei niedi arato.

\* 2:1 Pentecostés. Bieta Pentecostés, ye näire nitre israelita nämane kuin niere Ngöböye nura ngwä kenabtä. Levítico 23.15-21, yebtä ñäke.

<sup>19</sup> Mdakäre abko, kä käinbti, kä temenbtä abko tikwe sribi kri ñan tuabare mikadi tuadre amne, jändrän btä ni töi ñan krütai abko tikwe nuendi okwäbti abko krörö:

Däri rabadi tuen, ñukwä jutra rabadi tuen kri amne ngübü rabadi tuen krikri krübäte.

<sup>20</sup> Erere arato, ñänä gidiadite iko jökrä. Sö abko bärabadi därire jökrä.

Ne abko, ni Dämkien köböi bärabadi nuäre ütiäte kri abko känenkri kukwe rakadikä kore.

<sup>21</sup> Akwa nire nire käkwe ja di kärädre ni Dämkienye rabakäre dianintari, ni ye abko Ngöbökwe dianditari, nieta kore Ngöbökwe

*Joel 2.28-32*

abko tikani Joelikwe, niebare Pedrokwe.

<sup>22</sup> Yebti Pedrokwe niebareta mda:

Mun israelita, ie ti bike kukwe nire, aiseete olo ketate kuin ti kukweiye munkwe: Jesu Nazarebo abko ni brare juani Ngöbökwe rabadre era munkrä, abkokäre Ngöbökwe ja di biani ie sribi kri ñan tuabare nuenkäre bätäkä ngwarbe mun ngätäite. Niarakwe sribibare kore abko garera kuin munye. <sup>23</sup> Ni ye abko, kräke kukwe nämane ükaninte Ngöbökwe, aiseete erere nikani nakenkä krörö btä: Ni iti käkwe kitani ngite mun kisete, bti ni moto kämekäme käkwe mun die mikani kämike krusobtä. <sup>24</sup> Akwa Ngöbö ara jire käkwe mikaninta nire, ñobtä ñan angwane gata ñan rabadre niara ganaine janknu jire chi. <sup>25</sup> Ngöbökwe niara mikadita nire, yebti abko jrei Davikwe tärä tikani krörö kira:

Ti nämane ti Dämkien tuen käre ja ken tibe.

Niara tä ti ken ti küde ruenkri ti die mikakäre, aiseete tikwe ñan kä jürä ngwiandre jire jabtä.

<sup>26</sup> Ne aiseete kä juto tibtä amne kä nuäre tibtä Ngöbö käikitakakäre.

Mdakäre abko, ti krüte angwane, Ngöbökwe ti ngätä ngibiadi kuin, yebti tita tödeke,

<sup>27</sup> ñobtä ñan angwane ti krüte angwane, makwe ñan ti ngätä tuadimetre ni krütani ngätäite dobote Ngöbö.

Erere arato, ni Deme makwe, ye makwe ñan ngwákä tuadimetre ngütekä.

<sup>28</sup> Amne ji mdenbtä ti rikadre nünakäre kärekäre mabe, ye abko makwe mikani gare tie, aiseete ti rabadita ma ngwärerekri amne makwe kä mikadita nuäre tibtä ma tuareta.

*Salmos 16.8-11*

Ne abko Davikwe tikani kore Jesubtä.

<sup>29</sup> Ja mräkätre, ti bike kukwe era metre nire krörö munye, ye ie olo ketete munkwe: Ni mräkä kira David käkwe kukwe tikani, David ye abko krütani, doboi mikani, amne ngwákä ngütaninkä amne doboi tä kä ne känti Jerusalén nete. <sup>30</sup> Akwa David abko ni Ngöbö kukwei niekä, aiseete ni iti niara mräkäkri abko Ngöbökwe mikadi gobrane niara täte, ye nämane gare ie, ñobtä ñan angwane Ngöbökwe köböi mikani ie. <sup>31</sup> Ne mden kisete, Ni Dianinkä Ngöbökwe ye abko rükadreta nire amne ñan gütidrekä abko Ngöbökwe mikanina gare ie käne. <sup>32</sup> Mden erere, mtare Ngöbökwe Jesu mikaninta nire. Jesu mikaninta nire, ye mden abko nunkwe tuaba ja okwá jenbti amne nunta niekäre metre mtare. <sup>33</sup> Ngöbökwe mikaninta nire, abti Ngöbökwe mikani ütiäte kri, käkwe mikani täkänintbe ja küde ruenkri angwane, ja di kri mikani niara kisete kä käinbti kwe. Bti Ngöbö Üai Deme köböi mikani kwe nunye, ye abko Ngöbökwe biani ie arato amne, niara abko käkwe mikaba nüne täte nunbtä. Ye mden munkwe turi mtare amne munkwe kukwe nuri arato ye. <sup>34</sup> Ye abko, David tukwe ñan nämane blite jabtä gare nie, ñobtä ñan angwane niara doboi tä Jerusalén nete, amne Ngöbö ñan nikani niara ngwena kä käinbti, akwa David arabe käkwe kukwe tikani krörö:

Ti Dämkien Ngöbökwe niebare ti Dämkienye:

Kä bäri ütiäte kri ti küde ruenkri, ne känti jakwe täke nete.

<sup>35</sup> Ye känti ma raba abti tikwe ma rüe mikadi jökrä ma ngoto täni. *Salmos 110.1*

Ye abko namani tikani kore Davikwe, akwa tikani ñakare kwe jabtä amne, Jesu Ni Dianinkä Ngöbökwe abko btä tärä tikani kwe.

<sup>36</sup> Ne aiseete, mun israelita, ie kukwe era metre rabadre gare abko erere ti bike niere: Jesu juani müre ketadre krusobtä munkwe, Jesu ye mden abko Ngöbökwe mikani

Dänkiene amne mikani ni Dianinkä kwrere kwe arato. Ne abko raba gare munye kore. Abko kore se, niebare Pedrokwe ietre.

<sup>37</sup> Pedrokwe blitabare nitre kwati olote kore, ye abko matani tare motobtä amne, ja namani ruen ngite krübäte Ngöbö ngwärerekri ietre, kákwe kukwe ngwianintari krörö Pedroye amne Jesu kukwei ngwianka mda mdaye:

Ja mräkä, mtare nunkwe dre nuendre niere nunye, niebare kwetre.

<sup>38</sup> Abtä Pedrokwe niebare mda ietre:

Munkwe kukwe nuenbare käme Ngöbö rüere, ye kite temen jökrä, bti munkwe tödeka Jesubti. Yebti mun jata ja mike ngökare ñöte Jesukristo käbti. Angwane munkwe ja mikani ngite, ye Ngöbökwе diandikä jökrä munbtä, kákwe ja Üai Deme mikadi nüne munbtä arato, <sup>39</sup> ñobtä ñan angwane Ngöbökwе ja Üai Deme köböi mikani, ye abko munkrä amne mun ngäbriänkäkrä, erere arato ni kä jökräbti kärädre ni Dänkienkwe ye kräke, niebare Pedrokwe ietre.

<sup>40</sup> Pedrokwe blitabare kore angwane, kukwe mda mda ribebare bäri mda kwe ietre, niaratre töi diankrä amne mikakrä mokre abko krörö:

Ngöbökwе ñan mun mikadre ja tare nike nitre kukwe kämekäme nuenkä ben gware, abkokäre mun rabadre dianintari Ngöbö diebti abko tita ribere munye, niebare kwe ietre.

<sup>41</sup> Ye kwrere bkänä, kukwe diribare Pedrokwe, ye ni kwati kákwe kani ngäbti amne ngökani ñöte Jesu käbti. Köbö ye näire abko, ni mda mda namani tödeke Jesubti abko namani mili krämä jire (3,000) abko namani ja gete nitre tödekaka Jesubti yebe.

### *Nitre tödekaka Jesubti nämene nüne krörö jabe kwärikwäri*

<sup>42</sup> Angwane kukwe diribare nitre Jesu kukwei ngwiankakwe, yebtä niaratre namani ja kite köbö kwatirekwatire amne namanintre jäandrän jakwe dräire jabti kwärikwäri. Erere arato, namanintre ja ükekrö ju kwatirekwatire te mröre gware Jesu ngatani ngwiankäreta töre jae amne blitakäre Ngöböbe. <sup>43</sup> Nitre Jesu kukwei ngwianka namani sribi kri nuene amne, sribi ñan tuabare namani nuene ni kwati okwäbti Jesu di namani bentre bä mikakäre. Yebtä abko, ni jökrä ñan töi namani krütare jökrä. <sup>44</sup> Angwane nitre tödekaka Jesubti abko töi namani ketetibe jökrä, kä namani jäandrän jakwe jakwe dräire jabti kwärikväri ni tödekaka Jesubti bobre bobre die mikakäre. <sup>45</sup> Erere arato, namanintre kä jakwe amne jäandrän jakwe rürümoine, bti ni bobre bobre, ie ngwian biandre nuäi nuäi, ye näre nikanintre bien ni itire itire ie. <sup>46</sup> Mdakäre abko, ju blitakrä Ngöböbe te namanintre ja ükekrö köbö kwatirekwatire amne, ju kwatirekwatire te mrö dräi namani angwane, kä namani neme nuäre btätre mröre ketetibe ja moto jämenbti. <sup>47</sup> Angwane namanintre Ngöbö käkitekä amne, ni jökrä namanintre mike ütiäte. Mdakäre abko, köbö kwatirekwatire, nire nire namani neme dianintari abko ni Dänkien Jesu namani mike ketetibe nitre tödekaka niarabtibe.

## 3

### *Pedrokwe ni ngüre bren mikaninta kuinta*

<sup>1</sup> Abti bati, kä mikani blitakrä Ngöböbe ñänä okwä krämä näre dere, ye ngwane Pedro amne Juan nikani mda ju blitakrä Ngöböbe ye känti blitakäre Ngöböbe. <sup>2</sup> Angwane ju blitakrä Ngöböbe, ye känti jukwe nämene kwati abko kädian nämene Jukwe Bä Nuäre. Jukwe ye känti abko, ni därebare ngüre bren nämene iti. Ni ye abko käre jänämäne nikken köbö kwatirekwatire nebe yete ngwian käräkäre nitre nämene nikken yete yeye abko erere ni ngüre bren nämene yete. <sup>3</sup> Angwane Pedro jatanina nemente jukwete ta Juanbe, rikakäre ju blitakrä Ngöböbe ye känti angwane, ni ngüre bren ye okwä namani btätre, kákwe ngwian käräbare ietre jakrä. <sup>4</sup> Abtä Pedro amne Juan okwä namani kwekbe ni yebtä, bti Pedrokwe niebare ie:

Nun mike ñära, niebare kwe ie.

<sup>5</sup> Angwane niaratrekwe ngwian biandi ie namani nütüre, kákwe okwä ketaninte kwekbe btä bkänä. <sup>6</sup> Akwa Pedro abko kákwe niebare krörö mda ie:

Ngwian amne oro ñakare jire chi tikwe biandre mae, akwa jäandränta tikwe, erere ti bike bien mae: Jesukristo Nazarebo ye kähti näin krö, nän dikekä, niebare kwe ie.

<sup>7</sup> Pedrokwe ñäkäbare kore ie, ye btäräbe kani küde ruenkribti kwe, käkwe ganinkrö krö. Ye btäräbe ni ye ngüre namaninta dite jökrä ie se kwrere. <sup>8</sup> Angwane ni ngüre bren ye käkwe ja täkärinte käinta, nükaninbe dikekä krö amne nikani dikekä kwäräkwärä. Bti nikani siba Pedrobe amne Juanbe ju blitakrä Ngöböbe ye känti, akwa nikani angwane, nikani ja täkete käintabe nekwäre sekware Ngöbö käikitarekä kwärä. <sup>9</sup> Namani ja täkete kwäräkwärä Ngöbö käikitakä, ye ni jökrä käkwe tuani angwane, <sup>10</sup> töi ñan namani krütare btä, ñobtä ñan angwane ni nämane täkärintbe ngwian kärere Jukwe Bá Nuärebä nämane tuen amarebti niara ara nämane näin dikekä aise.

#### *Pedrokwe blitabare Jesubtä*

<sup>11</sup> Ni ngüre bren namaninta kuinta, ye namani Pedro amne Juan gibiekä ñakare angwane, ni kwati ñan töi namani krütare. Angwane ni namaninta kuinta nämane Pedro amne Juanbe ju blitakrä Ngöböbe bäre jukä kädian nämane Jukä Salomónkwe, ye känti ni jökrä nikani betekä ni ye tuakäre. <sup>12</sup> Ni nämane ja ükekrö kwati dikaro, ye jatabare Pedroye, abtä nitre ye ie Pedrokwe niebare:

Mun israelita, ¿ye ñobtä abko mun ñan töi nibi krütare kore yere? ¿Ñobtä mun okwä nibi jökrä kore nunbtä? ¿Nunkwe ni ne mirita kuinta ja di jenbti o nun köböire nibi dikekäta, mutna nütüre nunbtä ya? Mdakäre abko, ¿nunta nüne bäri deme amne bäri metre Ngöbö ngwärekri, aise nun di nibi niara mikakrä kuinta, mutna nütüre ya, amarebti mun okwä nibi kore nunbtä yere? <sup>13</sup> Ngöbö mikani ütiäte Abrahamkwe, Isaakwe, Jacobokwe amne ni mräkä kira kirakwe, Ngöbö ye mden abko käkwe sribikä jakwe Jesu mikani bäri ütiäte ja ngwärekri. Jesu ye mden munkwe biani müre ketadre Pilatoye. Pilato tö rababa tikaiteta, akwa munkwe trö kwitani ie. <sup>14</sup> Akwa ni Deme amne Metre ne ñan tikadrete, mun rababa niere Pilatoye amne, ni ni kämikaka abko tikadrete mun rababa niere kore ie. <sup>15</sup> Ni ni mikaka nüne ne abko munkwe müre ketani kore, akwa Ngöböökwe mikaba nüketa niere. Niara nükaninta niere abko nunkwe tuaba ja okwä jenbti, aise nunta niere. <sup>16</sup> Ni ngüre bren ne abko gare munye. Ye abko käkwe tödekan i kiatibe Jesubti, mden köböire ngüre nibita dite jökrä ie. Niarakwe ja töi miri kiatibe Jesubtä angwane, Jesukwe niara die miri tödeke jabti, mden köböire nibita kuinta täte jökrä, nibi tuen munye ye kwrere.

<sup>17</sup> Ja mräkä, mun amne nitre ji dokwäte mun ngätäite käkwe Jesu müre ketani angwane, mun nämane dre nuene metre ñan nämane gare munye. <sup>18</sup> Akwa Ni Dianinkä jen jakrä Ngöböökwe abko käkwe ja tare nikadre amne kämikadre, niebare Ngöböökwe ja kukwei niekä kirakira köböire, mden erere Ngöböökwe mikani neme bare. <sup>19</sup> Munkwe kukwe nuenba kore, yebtä mun moto raba ulire amne munkwe tödeka Ngöböbiti, Ngöböökwe mun ngite ye diandrekä jire jökrä mento munbtä amne, kä rabadi nuäre munbtä amne mun moto rabadi jáme Ngöbö ngwärekri abkokäre. <sup>20</sup> Angwane Jesu Ni Dianinkä kira Ngöböökwe munkrä, Ngöböökwe juandre munkrä, abkokäre munkwe kadre ngäbti. <sup>21</sup> Akwa gwängware abko, Jesukristo rabadre nüne kä käinbti, ñobtä ñan angwane Ngöbö ngämi jäandrä jökrä üketeta kuin amne miketa kuin, ye känenkri Jesu ñan rükadreta, ni Ngöbö kukwei niekä deme kirakira käkwe niebare ye kwrere. <sup>22</sup> Yebtä abko, Moisékwe niebare krörö Jesubtä:

Ni Ngöbö kukwei niekä ti kwrere abko Ngöböökwe diandikä iti mun ngätäite blitakäre jakrä munbe.

Ni ye käkwe dre niedi, ye erere munkwe kukwei mika täte jökrä, <sup>23</sup> ñobtä ñan angwane ni Ngöbö kukwei niekä, ye nire nire käkwe ñan kukwei mikadre täte, ye erere abko munkwe kämikadre diankakäre ja ngätäite,

*Deuteronomio 18.15,18,19*

niebare kore Moisékwe.

<sup>24</sup> Ye abko, kukwe nakaninkä ño Jesubtä kä ne näire, ye rakadrekä abko nitre Ngöbö kukwei niekä kirakira Samuel näire mentokwäre käkwe niebare jökrä. <sup>25</sup> Amne Ngöböökwe kukwe ükaninte ni Dianinkä kwe juandre abko niebare kwe nitre niara kukwei

niekä köböire. Erere arato, Ngöbökwe kukwe ükaninte mun mräkä kirakirabe, ye abko rababa bare kä ne näire munkrä, ñobtä ñan angwane kukwe niebare Ngöbökwe Abrahamye, ye abko rababa bare kä ne näire abko krörö:

Ma mräkä köböire ni kä jökräbti temen kä nebtä, ie tikwe ja di biandi, *Génesis 12.3; 22.18* niebare Ngöbökwe Abrahamye.

<sup>26</sup> Ngöbökwe sribikä kwe juani kä nebtä angwane, juani käne mun israelita ngätäite kwe ja di biankäre munye, munkwe kukwe kämekäme kitadre jire jökrä temen, abkokäre juani käne kwe munye. Abko kore se, niebare Pedrokwe ni kwati yeye.

## 4

*Pedro btä Juan käkwe blitabare Sanedrin ngwärekri*

<sup>1</sup> Pedro amne Juan nämane blite kore ni kwatibe angwane, batibe nitre blitaka Ngöbobe ni mda mda diäre nükani mda guardia ju blitakrä Ngöbóbete dänkien amne nitre saduseo ruäre nükani arato. <sup>2</sup> Niaratre abko namani romon, ñobtä ñan angwane Ngöbökwe Jesu mikaninta nire ne abko käkwe ni krütanikrütani mikadreta nüne arato bä mikani abko Pedro amne Juan namani dirire. <sup>3</sup> Abtä Pedro amne Juan kani ngite kwetre. Angwane kä namanina dere dikaro, abtä kitani ngite kä teri kwetre nebe jäandrínane. <sup>4</sup> Akwa ye ngwane abko, kukwe diribare Pedrokwe amne Juankwe, ye ni kwati käkwe kukwe nuani angwane, mikani era kwetre, käkwe tödekaní Jesubti, aisetet nitre tödekaka Jesubti namani bäri kwati mda. Tanbare angwane, ni brarebe namani mili krärike (5,000) jire.

<sup>5</sup> Yebti jäandrínane, nitre israelita ji dokwáte, nitre unbre ji dokwáte amne Kukwe Biani Ngöbökwe Moiséye dirikätre käkwe ja ükaninkrö kwati mda Jerusalén. <sup>6</sup> Ye ngwane ni blitaka Ngöbobe ni mda mda diäre dänkien kädian nämane Anás nämane amne, mräkä brare brare kwe kädian nämane Caifás, Juan amne Alejandro nämane siba. <sup>7</sup> Namani ja ükaninkrö jökrä angwane, Pedro amne Juan ngwiamna kwetre neme ja känti. Ye erere jänananina känti angwane, mikaninta nünaninkä ja ngwärekri kwetre, käkwe niebare krörö ietre:

¿Nirekwe ja di biani mun yeye amne, nire käbti munkwe ni ngüre bren ye mikaninta kuinta? niebare kwetre Pedroye amne Juanye.

<sup>8</sup> Batibe Ngöbö Üai Deme namani täte Pedrobta abko diebti Pedro käkwe niebare mda: Mun ji dokwáte amne mun unbre töbtä töbtä, ye ie ti bike niere krörö: <sup>9</sup> Ni ngüre bren, kisete nämane bren abko kräke nunkwe jäandrän kuin nuenbare amne namaninta kuinta, ye abko nunkwe mikaninta kuinta ño abko mun tö gai, ne ngwane ti bike niere metre munye abko krörö: <sup>10</sup> Jesukristo Nazarebo müre ketamna krusobtä munkwe abko Ngöbökwe mikaninta nire. Jesu ye mden käbti amne diebti nunkwe ni ngüre bren ne mikaninta kuinta, ye abko nun tö niei metre mun ütiäte krikri yeye amne nitre israelita jökräye arato. <sup>11</sup> Jesu ye abko,

Jä ütiäte kri ju mikakrä metre abko mun ju mikaka käkwe kitaninkä, akwa já ye abko ni Dänkien käkwe mikani bäri ütiäte ju mikakrä metre, *Salmos 118.22* abko tikani kore Jesubtä tärä Salmobtä.

<sup>12</sup> Ne mden aisetet, Jesu aibe ni diantarikä. Nebti Ngöbökwe ni mda mikani ñakare jire kä nebtä ni diantarikäre. Abko kore se, niebare Pedrokwe.

<sup>13</sup> Pedro amne Juan, btä kä jürä namani ñakare blitare, ye namani tuen nitre ji dokwáteye angwane, niaratre käkwe ja tötitkani ñakare amne bobre amarebti namani blite kore, ye abko ñan namani nüke gare nitre yeye aisetet, töi ñan namani krütare btätre, akwa nitre ne käkwe dikakabare Jesube abko gani btä kwetre. <sup>14</sup> Akwa ni ngüre bren namaninta kuinta, ye nämane nünaninkä siba yete niaratrebe, aisetet dre niedre kwetre rüere ñan namani nüke gare ietre. <sup>15</sup> Abtä Pedro amne Juan käkwe kä mikadrekä, rikadre ju bäre, niebare kwetre ietre, bti niaratre namani blite jabe kwärikwäri gwi, <sup>16</sup> kä namani niere jae kwärikwäri:

¿Nitre nibu sebtä, nikwe dre nuendre? Sribi ütiäte kri ñan tuabare nuenbare kwetre, ye abko ni kwati nünanka Jerusalén nete, ie nena gare, aisetet ni ñan raba rükente jire.  
<sup>17</sup> Akwa kukwe ne ñan kädrie rikadre janknu ja täritäri, abkokäre ari niaratre rätekä. Nikwe rätädikä ne ngwane, mtare mentokwäre ñan blitadre mda kwetre Jesu kähti, niebare kwetre jae kwärirkwäri.

<sup>18</sup> Bti Pedro amne Juan käräbareta gwä kwetre, käkwe niebare ietre:

Munkwe ñan blita amne, munkwe ñan diri jire chi mda Jesu kähti, niebare kwe ietre.

<sup>19</sup> Abtä Pedro amne Juan käkwe niebare mda ietre:

Ngöbö okwäbti dre nuendre nunkwe abko bári kuin, yebtä töbike kuin munkwe, bti munkwe nieta nunye. ¿Nunkwe mun kukwei mikadre täte amne Ngöbö abko nunkwe ñan kukwei mikadre täte ya? ye abko bári kuin ya abko munkwe nie nunye. <sup>20</sup> Akwa nun bike Ngöbö mike täte aisetet, kukwe nakaninkä ño ño Jesubtä nunkwe tuaba ja okwä jenbti amne dre dre niebare kwe abko nunkwe kukwe nuaba, ye abko nunkwe kädriedi janknu. Abko kore se, niebare Pedrokwe amne Juankwe.

<sup>21</sup> Angwane nitre ji dokwäte sribikä Sanedrinbe ye käkwe Pedro amne Juan rätäninkäta jirekäbe, bti tikaninte kwetre, ñobtä ñan angwane kukwe nakaninkä, yebtä abko ni jökrä namani Ngöbö käkitekä, aisetet Pedro amne Juan mikadre ja ngie nuen ño kwetre ñan namani nüke gare ietre, ñobtä ñan angwane ni jökrä jürä namani btätre aisetet. <sup>22</sup> Ni jökrä nämane Ngöbö käkitekä, ñobtä ñan angwane ni ngüre bren namaninta kuinta Jesu di kribti, ye abko ie kä nikanina gre ketebu jire ta angwane namaninta kuinta aisetet.

#### *Nitre tödekaka Jesubti käkwe ja di käräbare Ngöböye*

<sup>23</sup> Pedro amne Juan tikaninteta angwane, nikaninta nebata mräkä tödekaka Jesubti känti angwane, nitre blitaka Ngöböbe ni mda mda diäre dänkien btä nitre unbre ji dokwäte käkwe dre dre niebare ietre, ye erere niebare jökrä kwetre mräkäye. <sup>24</sup> Niaratre käkwe Pedro amne Juan kukwei nuani ünän jökrä, bti ja töi mikani gware kwetre, kä nikani blite krörö Ngöböbe:

Ni Dänkien Ngöbö, makwe kä käinta amne kä tementa dätebare. Erere arato, makwe mren dätebare amne jäandrän jökrä tä nüne käinta, tementa, mrente makwe dätebare.

<sup>25</sup> Ma Üai Deme köböire nun mräkä kira sribikä makwe David käkwe ma kukwei niebare krörö:

¿Ñobtä nitre ñakare israelitare tätre neme romon jökrä Ngöbö rüere?

¿Ñobtä nitre israelita abko tä kukwe miketbe ngwarbe kore Ngöbö rüere?

<sup>26</sup> Nitre jreire btä nitre gobranka käta ja ükekrö rükare jökrä ni Dänkien Ngöbö rüere  
amne Ni Dianinkä jen kwe rüere arato,  
niebare Davikwe.

*Salmos 2.1-2*

<sup>27</sup> Angwane makwe dre niebare David köböire abko metre garera nunye, ñobtä ñan angwane ye kwrere nena nakenä bkänä Ngöbö, ñobtä ñan angwane Jesu sribikä deme makwe, ye makwe dianinkä jenena sribikäre jakrä, ye rüere abko jrei Herodes amne gobran Poncio Pilato käkwe ja ükaninkrö ni menteninbe amne nitre israelitabe. <sup>28</sup> Ye abko, ma diebti makwe kukwe ükaninte kira amne rakadrekä kore makwe niebare kira David köböire, mden erere namani bare jökrä ietre ma rüere Ngöbö. <sup>29</sup> Ye kwrere arato, mtare tätre nun rätekä amne tätre kada ketamna nunye, ye tuen mae ni Dänkien Ngöbö amne, makwe ja di bian nun sribikä makwe neye, kä jürä ñan rabadre jire chi nunbtä blitakäre ma kukweibä. <sup>30</sup> Erere arato, Jesu sribikä deme makwe, ye kähti makwe ni bren bren mikata kuinta amne, sribi ñan tuabare mda mda raba bare ma diebti nun köböire abko nutta ribere mae Ngöbö. Abko kore se, niebare kwetre Ngöböye.

<sup>31</sup> Blitabare ünän kore kwetre Ngöböbe, ye btäräbe kä känti namanintre gätäre ye käkwe grükakabare. Angwane Ngöbö Üai Deme di kri namani jökrä btätre amne, kä jürä namani ñakare btätre Ngöbö Kukwei kädriere gwärere.

#### *Nitre tödekaka Jesubti käkwe jäandrän biani jae kwärirkwäri*

<sup>32</sup> Nitre tödekaka Jesubti nämane kwati, ye abko töi namani ja kwrere jökrä. Angwane jäandrän kwekwe abko ñakare namanintre ja mike bkäne kaibe, akwa namanintre ni

mda mda mike bkäne siba. <sup>33</sup> Erere arato, ni Dänkien Jesu nükaninta nire ye abko nitre Jesu kukwei ngwianka namani kädriere bari ja di ngöi jökrä mda amne, Ngöbö namani ja di bien kri ja moto kuinbti ietre. <sup>34</sup> Kä ye ngwane, nitre tödekaka Jesubti, ye ngätäite ni namani ñakare jire iti jäandrän mdei nike, ñobtä ñan angwane ni kä bkänkä amne ju bkänkä abko namani rürümoine, bti namanintre nüke ngwian ye ngwena, <sup>35</sup> bti namanintre bien nitre Jesu kukwei ngwianka yeye, bti nire nire nämane mrö mike amne nämane jäandrän mda mda mdei nike, yebti nämane ngwian dräire. Ye erere ngwian biandre ni itire itire ye erere namanintre bien ietre.

<sup>36</sup> Ye kwrere abko, ni levita kä José, Chiprebo käkwe nuenbare. (José ne arabe abko nitre Jesu kukwei ngwianka kädiani Bernabé. Ne niaratre kukwere abko “Ni kä mikakata nuäre nibtä” nieta.) <sup>37</sup> Niara ne mdan käkwe kä jakwe rürümoinbare, bti ngwian biani kwe nitre Jesu kukwei ngwiankaye dräidre nitre tödekaka Jesubti mda mda nämane jäandrän mdei nike yebti.

## 5

*Kukwe nakaninkä Ananíabtä amne Safirabtä*

<sup>1</sup> Ni mda nämane yete abko kädian nämane Ananías. Niara amne merire kwe Safira käkwe kä jakwe rürümoinbare arato. <sup>2</sup> Akwa ni ye abko käkwe ja töi mikani ruäre meri kwebe, käkwe ngwian ye diani ruäre ta jae, bti biani jökrä kwe namani bär mike jabtä nitre Jesu kukwei ngwianka yeye. <sup>3</sup> Abtä Pedrokwe ñäkäbare krörö ie:

¿Ananías, ñobtä makwe Satana turimetra nüke ja töibtä amarebti, ngwian biani kä ütiäre mae abko makwe dianinkä ruäre ta jae, abti ma tö nibi Ngöbö Üai Deme ngökai yere? <sup>4</sup> ¿Kä ye ñan makwe ya? ¿Amne makwe rürümoiniri angwane, ngwian ye ñan makwe arato ya? ¿Ye ñobtä makwe kukwe nuni kore ni ngökakrä amarebti mata Ngöbö ara jire ngökö yere? niebare kore Pedrokwe Ananíaye.

<sup>5-6</sup> Angwane batibe Ananías nikani ngitiekä ngwäkäre temen se kwrere, Pedro kukwei nuare. Ye btäräbe ni bati bati jatani, käkwe mrianinte, bti nikanintre ngwena doboi mikadre. Kukwe nakaninkä Ananíabtä, ye nire nire käkwe gani angwane, Ngöbö jürä namani kri btätre. <sup>7</sup> Yebti kä nikani ñänä okwä krämä näre ta angwane, Ananías nän muko Safira nikani gwäkäre mda. Akwa kukwe nakaninkä Ananíabtä, ye abko gare ñakare ie, aise te nikani neme jáme gwi. <sup>8</sup> Angwane Pedrokwe niebare ie:

¿Munkwe kä rürümoiniri nuái metre, erere munta niere tie yera? niebare kwe ie.

Angwane, ¡Jánri! Nunkwe rürümoinbare kore, ¿abko ño? niebare kwe Pedro käre.

<sup>9</sup> Abtä Pedrokwe niebare mda ie:

¿Ye ñobtä abko, mun raba ni Dänkien Üai Deme ngökö ya, ñakare ya abko mun tö nibi gai, käkwe ja töi miri ruäre ni ngökakrä yere? Ni bati bati jani ma kwäräi mrö doboi mike abko kitera tuenta sete se. Se arabe näinta ma ngwena doboi mikadre arato mtare, niebare Pedrokwe ie.

<sup>10</sup> Ye btäräbe Safira nikani ngitiekä ngwäkäre Pedro ngotobtä temen se kwrere. Angwane nitre bati bati jataninta gwäkäre, ye ie Safira kwani ngwäkäre temen, nikaninta ngwena doboi mikadre ja ken brare mröbe. <sup>11</sup> Kukwe nakaninkä kore, ye abko nitre tödekaka Jesubti amne ni mda mda käkwe gani angwane, Ngöbö jürä namani kri btätre kukwe nuene blo Ngöbö rüre.

*Nitre Jesu kukwei ngwianka käkwe ni kwati mikaninta kuinta*

<sup>12</sup> Abti kukwe Jesubtä abko era metre, ye mikakäre era nitre Jesu kukwei ngwianka namani sribi kri ñan tuabare nuene Jesu diebti abko namanintre bär mike tuadre ni kwati okwäbti. Erere arato, nitre tödekaka Jesubti nämane ja ükekro jukä kä Salomón känti ju blitakrä Ngöböbe ye bäre. <sup>13</sup> Angwane nitre Jesu kukwei ngwianka ye mika namani ütiäre jae ni kwatikwe, akwa kukwe nakaninkä Ananías amne Safirabtä, yebti ni ruäre btä jürä namani, aise te ñan tö namani reketai niaratrebe. <sup>14</sup> Akwa ye ngwane ni kwati merire, brare nikani tödeke Jesubti, aise te ni tödekaka Jesubti namani bär kwati mda. <sup>15</sup> Sribi kri ñan tuabare nuen nämane kabre, abtä ni kwati namani mräkä bren bren mike jän

kwatabti amne jamankate namani kite ngwena mikadre jibtä, ñobtä ñan angwane Pedro jatadre ji yebti angwane, mikadreta kuinta kwe, akwa ñakare ne ngwane, Pedro trä aibe matadre ni bren bren yebtä abkokäre. <sup>16</sup> Erere arato, nitre nünanka känimekänime juta Jerusalén bäre temen abko namani nüke kwati mräkä bren bren ngwena amne, ni ruäre bren üai käme kisete, ye namani nementa kuinta jökrä Jesu diebti nitre Jesu kukwei ngwianka ye köböire.

*Nitre israelita krikri käkwe nitre Jesu kukwei ngwianka kitani ngite*

<sup>17</sup> Yebtä abko, ni blitaka Ngöböbe ni mda mda diäre dänkien amne ni mda mda nämane nekete nitre saduseokri, ye namani mokrere krübäte mda, <sup>18</sup> käkwe nitre Jesu kukwei ngwianka ye kamna ngite jökrä, bti ni ngite ngite kita nämane ngite jökrä ye käi känti kitani ngite kwetre. <sup>19</sup> Akwa batibe deo, angele nükani iti, käkwe jukwe tikani nitre Jesu kukwei ngwianka yebti se kwrere angwane, dianinta kwe ju bäre mento, käkwe niebare ietre:

<sup>20</sup> Ju blitakrä Ngöböbe, ye känti mun nän. Mun rabata yete angwane, nünandre ño Ngöböbe Jesu köböire, ye abko munkwe diri täte jökrä ni jökräye. Abko kore se, niebare angelekwe ietre.

<sup>21</sup> Ye kwrere bkänä, jändrinane dekä angwane, angelekwe ño ño niebare ietre ye erere nikaninta ju blitakrä Ngöböbe ye käntita angwane, namaninta dirire.

Angwane ni blitaka Ngöböbe ni mda mda diäre dänkien amne ni mda mda nämane ben yete, ye käkwe nitre unbre ji dokwäte nitre israelita ngätäite ye käräbare jökrä gätäbtä jae, bti nitre Jesu kukwei ngwianka nämane ngite, ye tuamna kwetre. <sup>22</sup> Erere bkänä, guardia ju blitakrä Ngöböbete ye nikanintre neme nitre Jesu kukwei ngwianka nämane ngite kä teri ye känti angwane, nitre ye kwani ñakare ietre. Abtä jötrö ngwarbe nikani kukwe ngwenante, <sup>23</sup> käkwe niebare ietre:

Ju ni ngitekrä abko, bti jukwe täni dikani kuin amne, guardia ni ngite ngibiabtikä täni nünaninkä jökrä jukwebtä, jukwe ye ngibiarebti, btä nun nibi. Akwa nunkwe jukwe tiri angwane, ni ñakare gwi amne, kä kuni tökare nunye, niebare kwetre.

<sup>24</sup> Angwane guardia ju blitakrä Ngöböbete dänkien amne nitre blitaka Ngöböbe ni mda mda diäre dänkientre käkwe guardia kukwe nuani angwane, ja ngwiani nikenä kwetre, kä namanintre töbige krörö: ¡Kukwe ne abko nakaka, nehti dre rakadikä mda! namanintre nütüre. <sup>25</sup> Ye btäräbe ni jatani betekä iti, käkwe niebare ietre:

Nitre kitani ngite jändrin munkwe, ye tä dirire jökrä ni kwatiye ju blitakrä Ngöböbe känti sete, niebare kwe ietre.

<sup>26</sup> Angwane guardia dänkien nikani guardiabe nitre Jesu kukwei ngwianka ye tuen. Nikani ngwena akwa, ye ngwane mikanintre ja tare nike ñakare kwetre, ñobtä ñan angwane nane ni nämane kwati yete kukwe nuen abko käkwe täkädre jäbti kämikakäre abko jürä namani btätre, aiseteknikani ngwena ngwebti. <sup>27</sup> Namanintre ju blitakrä Ngöböbe känti angwane, nitre Jesu kukwei ngwianka jänikani Sanedrin ngwärekkri angwane ni blitaka Ngöböbe ni mda mda diäre dänkien käkwe ñäkäbare ietre:

<sup>28</sup> Ni btä mutta dirire, yebtä abko munkwe ñan diridre jire chi mda, nunkwe nieba munye. ¡Se ñobtä abko mun tä dirire kore amarebti mtare mun nena dirire ni jökräye Jerusalén nete! Abti ni ye krütani abkobtä nun mikata ngite munkwe arato se, niebare kwe ietre.

<sup>29</sup> Abtä Pedro amne nitre Jesu kukwei ngwianka mda mda käkwe niebare mda:

Nunkwe Ngöbö mikadre täte, akwa mun abko ñan kukwei mikadre täte nunkwe, <sup>30</sup> ñobtä ñan angwane Jesu metamna krusobtä munkwe amne munkwe müre ketamna akwa, Ngöböökwe mikaninta nire. Ngöbö ye mdet abko ni mräkä kirakira nämane mike ütiäte. <sup>31</sup> Ngöbö ye ara käkwe Jesu mikaninta nire amne nikani ngwenante kä käinbti, käkwe mikani täkänintbe ja küde ruenkri mikakäre ütiäte amne, mikani Ni Jökrä Jie Ngwianka amne Ni Diantarikä. Jesu ne köböire abko nitre israelita käkwe kukwe kämekäme kitadre jökrä temen amne Jesukwe ni ngite ye diandrekä mento nibtä, abkokäre mikani ütiäte jae kwe kä käinbti. <sup>32</sup> Ne mdet abko nunkwe tuaba ja okwä jenbti

abko erere nunta niere. Erere arato, nitre Ngöbö mikaka täte nun kwrere abko ie Ngöböta ja Üai bien amne kukwe ne abko metre abko Ngöbö Üai Deme käta bā mike metre nunbe gware arato. Abko kore se, niebare kwetre.

<sup>33</sup> Yebtä abko Sanedrin mätä namani kri mda Pedrobtä amne Jesu kukwei ngwianka mda mdabtä, aisetetö namanintre kämikai.

<sup>34</sup> Akwa Sanedrin ngätäite yete abko ni bariseo nämane iti abko kädian nämane Gamaliel. Ni ye abko Kukwe Biani Ngöböökwe Moiséye dirikä kuin amne, ni jökrä nämane mike ütiäte jae. Gamaliel ye namani nünaninkä, kákwe nitre Jesu kukwei ngwianka juamna ken ju bäre. <sup>35</sup> Bti niebare krörö kwe:

Ja mräkä israelita, nitre ne, btä mun tö dre nuein, yebtä munkwe töbika kuin ja käne, <sup>36</sup> ñobtä ñan angwane bati kä nera ni iti kädian nämane Teudas jatani ja mike jite ni ütiäte kwrere ni ngätäite. Angwane ni siento kräbkä jire namani nekete niarabe nitre romanobo rüere. Akwa niara kämikani nitre rükä romanobokwe angwane, ni kwati rikaba ben nikaninta iti iti jökrä kwäräkwärä. Ye känti sribi kwe krütani, ye munkwe ngwian töre jae. <sup>37</sup> Abti kä nikani bā raire ta angwane nitre romanobo kákwe ni kä tikamna täräbtä mda. Ye ngwane abko ni Galileabo kädian nämane Judas kákwe ja mikani jite ni ütiäte kwrere mda. Angwane ni kwati namani nekete niarabe nitre romanobo rüere arato. Akwa niara kämikani nitre rükä romanobokwe arato. Angwane nitre reketaka niarabe nikaninta iti iti jökrä kwäräkwärä. Ye abko namani bare kore ni nibu yebtä. <sup>38</sup> Akwa mtare ti tö niei krörö munye: Nitre se munkwe tuametre kaibe amne, munkwe ñan niaratre nika jire chi abko ti tö nibi niei munye, ñobtä ñan angwane kukwe ni kä nebtäkwe ne ngwane, näin ta arato. <sup>39</sup> Akwa sribi Ngöböökwe era metre ne ngwane, munkwe ñan ganaindre jire chi, ñobtä ñan angwane batibe mun tädre rüre Ngöböbe. Abko kore se, niebare Gamalielikwe mräkäye.

Ye erere Gamalielikwe nitre Sanedrin töi mikani jakri, aisetetö kwrere mikani täte mräkä Sanedrinkwe. <sup>40</sup> Akwa nitre Jesu kukwei ngwianka nämane ju bäre, ye käräbareta gwä kwetre, bti kwata metani tröbtä köbti kwetre töi diankrä amne, ñan blitamna jire chi mda Jesubtä ietre, bti tikaninteta kwetre.

<sup>41</sup> Nitre Jesu kukwei ngwianka abko nikaninta angwane, kä namani nuäre krübäte btätre, ñobtä ñan angwane niaratre namani ütiäte Ngöbö ngwärekri ja tare nikabtä Jesu kräke, aisetetö kwrere mikani täte ñakare kwetre amne, Jesu Ni Dianinkä Ngöböökwe abko kukwe kuin ye abko nitre Jesu kukwei ngwianka namani dirire bari mda köbti kwatirekwatire ju blitakrä Ngöböbe känti amne ju mda mdate Jerusalén yete.

## 6

### *Ni ni die mikaka dianinkä ni kükü*

<sup>1</sup> Kä ye ngwane, nitre tödekaka Jesubtä nikani niren bari kwati mda. Angwane köbti kwatirekwatire nire nire nämane mrö nire abko bti namani mrö dräire. Akwa nitre israelita kukwe griegore tödekaka Jesubtä nikani ñäke nitre kukwe hebreore rüere, ñobtä ñan angwane meri kukwe griegore, kän brare krütani abko ñan die mikani kuin era metre mröbtä köbti kwatirekwatire. <sup>2</sup> Abtä nitre Jesu kukwei ngwianka ni jätäbti nibu kákwe nitre tödekaka Jesubtä ükaninkrö kwati, bti niebare kwetre ietre:

Nun rabadre mrö dräire jirekäbe nete, abtä kukwe kuin Jesubtä abko nunkwe ñan diridre mda, ye abko ñan rabadre kuin. <sup>3</sup> Ne aisetetö ja mräkä, ni töbtä töbtä btä Ngöbö Üai Deme tä täte, bti munta tödeke abko känä ni kükü ja ngätäite munkwe. Ni ye abko nikwe mikadi sribi ye nuene. <sup>4</sup> Angwane nun abko kákwe blitadi janknu Ngöböbe amne nunkwe Ngöbö kukwei kuin Jesubtä diridi janknu arato. Abko kore se, niebare kwetre.

<sup>5</sup> Ye abko nükaninbti ni jökräye aisetetö, ni dianinkä ni kükü kwetre abko nere: Ni iti kädian nämane Esteban dianinkä kwetre. Esteban abko nämane tödeke kwatibe Ngöböbti amne Ngöbö Üai Deme nämane täte btä. Erere arato, Felipe, Prócoro, Nicanor, Timón, Parmenas dianinkä amne ni iti juta Antioquíabo kädian nämane Nicolás dianinkä arato. Nicolás ne abko ñakare israelita akwa ja töi mikani kwatibe Ngöbö mikakäre täte

reketakäre nitre israelitabe. <sup>6</sup> Nebti ni dianinkä ni kükü ye abko jänikani mda nebe nitre Jesu kukwei ngwianka ye ngwärekri, angwane niaratre kákwe ja di kärabare kräke Ngöböye, kise mikare kwärä btitre sribi rabadre kisete bā mikakäre.

<sup>7</sup> Kukwe ükaninte kore kwetre, abtä kukwe kuin Jesubtä nikani gare bări ni kwatiye amne, nitre tödekaka Jesubti namani niren bări mdajuta Jerusalénte. Angwane ni blitaka Ngöböbe ni mda mda diáre namanintre tödeke kwati krübäte Jesubti arato.

#### *Esteban kitani ngite Jesu rüekwe*

<sup>8</sup> Yebti Ngöbö namani ja moto mike bări kuin Estebankrä, kákwe ja di biani kri ie abko köböire namani sribi kri ñan tuabare nuene bätäkä ngwarbe ni kwati okwäbti Jerusalén. <sup>9</sup> Angwane abko sinagoga nämane kwati abko te nitre juta Cirenebo amne juta Alejandríabo tikaninte bkänkákwe amne nitre kä Ciliciate amne kä Asiate erere nämane ja ükekörö. Jesu abko Ni Dianinkä Ngöböökwe abkobtä nitre ye nikani ja kwete Estebanbe. <sup>10</sup> Akwa Esteban abko ie Ngöbö Üai namani ja di bien, aisetet Jesu abko Ni Dianinkä Ngöböökwe bā mikani metre, aisetet namani ni kwati kada kete kwäräbe jökrä.

<sup>11</sup> Abtä Esteban nämane ñäke blo Moisés rüere amne Ngöbö rüere ni mdakwe niedre Esteban rüere, abkokäre nitre ye kákwe ni känabare ruäre, bti ngwian biani tiebe kwetre ietre blita ütiäre ngwarbe Esteban rüere. <sup>12</sup> Erere bkänä, nikani blite ngwarbe Esteban rüere. Yebtä abko, ni kwati nünanka juta Jerusalénte namani romon jökrä Estebankrä. Erere arato, nitre unbre ji dokwáte amne Kukwe Biani Ngöböökwe Moiséye dirikätre namani romon jökrä, kákwe Esteban kamna ngite, bti jänikani Sanedrin ngwärekri kwetre. <sup>13</sup> Angwane ni mdara jire känabare blitakäre ngwarbe kwetre Esteban rüere, kákwe niebare krörö:

Käre ni ne tä ñäke blo ju deme blitakrä Ngöböbe noko rüere amne tä ñäke blo Kukwe Biani Ngöböökwe Moiséye rüere arato. <sup>14</sup> Mdakäre abko ju blitakrä Ngöböbe, se Jesu Nazarebo jatadi, kákwe juandi ngwarbe jökrä amne, Kukwe Biani Ngöböökwe Moiséye nikrä abko kwitadi jökrä kwe arato tä niere kore abko käre nunta kukwe nuen ñäke kore, niebare kore kwetre Esteban rüere.

<sup>15</sup> Angwane abko, nitre ütiäre krikri amne ni mda mda nämane täkänintbe yete, ye kákwe Esteban mikani ñäräre angwane, Esteban ngwäre namani tuen angele ngwäre kwrere jire ietre.

## 7

#### *Estebankwe blitabare ja dokwäre*

<sup>1</sup> Angwane ni blitaka Ngöböbe ni mda mda diáre dänkien kákwe niebare mda Estebanye:

Mata ñäke blo ju blitakrä Ngöböbe rüere amne Kukwe Biani Ngöböökwe Moiséye rüere nieta, ¿se abko era bkänä ya? niebare kwe Estebanye.

<sup>2</sup> Angwane Esteban kákwe niebare krörö mda:

Mun ti mräkä amne mun ti ruaitre tikwe, olo ketete ti kukweiye munkwe: Abraham ni mräkä kira ngämi niken nüne juta Harán, ye känenkri Ngöbö di kri kákwe ja mikani gare ie kä Mesopotamia känti, <sup>3</sup> kákwe niebare ie:

Kä makwe amne ma mräkä, yebtä kä mikekä amne ti bike kä mike tuadre mae, ne känti nän nüne, niebare Ngöböökwe ie.

<sup>4</sup> Ye erere bkänä, Abrahamkwe kä mikaninkä kä Caldeate, Mesopotamia yete amne nikani nüne juta Haránte mda. Abti Abraham rün krütani angwane, kä te munta nüne mtare, nete Ngöbö jatani Abraham ngwenante nüne. <sup>5</sup> Akwa Ngöböökwe ñan kä biani jire chi jen jakrä Abrahamye nünankrä. Akwa Abraham krütadre angwane, Abraham bküntre ja täritäri abko ietre Ngöböökwe kä ne biandi jen jakrä, Ngöböökwe niebare Abrahamye. Kä ye ngwane abko, ngäbäkre ñakare Abrahamkwe, akwa Ngöböökwe niebare kore ie. <sup>6</sup> Mdakäre abko, Abraham bküntre kákwe nünandi ni menteni kwrere kä jenenante amne ni kä ye känti kákwe mikadi klabore jae amne ngwianditre ja tare níke kwetre kä siento kräbkä (400) jire, niebare kore Ngöböökwe Abrahamye.

<sup>7</sup> Akwa Ngöböökwe niebare krörö arato Abrahamye: Juta känti ma bküntre mikadi klabore jae, juta ye abko tikwe mikadi ja ngie nuen ma bküntre dokwäre. Yebti ma bküntre näinta mentokwäre angwane, rükadita ti käkitekäta Canaan nete, niebare kwe Abrahamye. <sup>8</sup> Ngöböökwe kukwe ükaninte kore Abrahambe angwane, Ngöböökwe ja ñäräkrä mikamna ja kwatabtä ie. Ye mden kisete, Abraham ngobo Isaac därebare, bti kwäirare angwane, ñäräkrä mikani kwatabtä kwe. Erere arato, Isaakwe nuenbare ngobo Jacobobtä amne, Jacob käkwe nuenbare kwrere arato ngäbriänkä ni jätäbti nibu btä. Ni ni jätäbti nibu, yekri juta Israel keta jätäbti ketebu jatani.

<sup>9</sup> Ni ruai mrö känekäne Jacobokri abko namanintre mokrere etba Josébe, käkwe José rürümoinbare angwane, bkänkä nikani ngwena Egipto. Akwa Ngöbö nämane Josébe, <sup>10</sup> ye käkwe José die mikani ja tare nikabtä. Angwane José mikani töbtä kwe, ye köböire abko namani tuen kuin sribikäre jrei Faraónye, aisetet jrei Faraón Egiptobo käkwe mikani gobrane Egipto amne ja gwirie mikani gare ie arato.

<sup>11</sup> Abti mrö nika namani krübäte Egipto amne Canaan arato. Angwane bësi mrö krütani jökrä ni ruai mrö känekäne kän. <sup>12</sup> Akwa mrö nämanena Egipto abko gani Jacobokwe angwane, Jacobokwe ngäbriänkä juani käne mrö kökö. Jacob ngäbriänkä ye abko ni ruai mrö känekäne. <sup>13</sup> Abti Jacobokwe ngäbriänkä juani mrö kököta bobukäre angwane, Josékwe ja mikaninta gare etbakantreye amne, José mräkä mdenkri nükani gare Faraónye arato. <sup>14</sup> Abti José rün Jacob amne mräkä mda mda järikadre jökrä etbakantrekwe Egipto, niebare Josékwe ietre. Ye erere, José mräkä ni gre ketamä bti ni jätäbti nirike (75) nikani jökrä neme Egipto. <sup>15</sup> Jacob jänikani neme nüne kore Egipto, känti nünabare kwe mräkäbe. Abti Jacob krütani kä ye känti. Erere arato, Jacob ngäbriänkä krütani jökrä Egipto arato. <sup>16</sup> Abti jänikaninta jökrä doboi mikadre juta Siquem. Abrahamkwe kä kökani ja doboi mikakrä Hamor ngoboye juta Siquemte, ye känti namani doboi mikani.

<sup>17</sup> Abti Ngöböökwe kä Canaan biandre Abraham bküntreye, niebare Ngöböökwe Abrahamye, ye abko köböi jatani nüke ja ken angwane, nitre israelita namanina niren bari kwati krübäte Egipto. <sup>18</sup> Angwane jrei mdara jire namani gobrane Egipto. Jrei ye abko, ie José gare ñakare. <sup>19</sup> Mden kisete jrei ye käkwe ni mräkä ngökani amne ni mräkä kirakira mikani ja tare nike kri kwe, käkwe ngäbäkre brare därebe därebe kitakamna ju bäre meyeye amne rünye kämikakäre. <sup>20</sup> Kä ye ngwane abko Moisés därebare. Moisés ye abko därebare bë nuäre krübäte, aisetet meye amne rün käkwe ngibabare tiebebee sö krämä jire gwi. <sup>21</sup> Yebti ngibiadre ño tiebe mda kwetre ñan namani nüke gare ietre angwane, kitaninkä jirekäbe kwetre. Akwa jrei ngänkän, ie Moisés kwani amne diani kwe jakrä, bti ngibabare ja ngobo jen kwrere kwe. <sup>22</sup> Nitre töbtä krikri Egiptobo, ben Moisékwe ja töitikani, aisetet Moisés namani blite kuin amne namani jändrän jökrä nuene kuin arato.

<sup>23</sup> Abti kä gre ketebu Moiséye angwane, tö namani rikaita basare mräkä israelitaye, erere nikani mda. <sup>24</sup> Akwa nikani nebe mräkä känti angwane, ni Egiptobo nämane iti ni israelita ngötikekä, btä Moisés okwá namani. Abtä Moisés nikani, käkwe ni Egiptobo ye kämikani ni israelita dokwäre. <sup>25</sup> Nebtä abko, Moisés köböire Ngöböökwe nitre israelita dianditari abko rükadi gare mräkäye, namani nütüre. Akwa nitre israelita käkwe ñan töbikabare kore. <sup>26</sup> Yebti jändrinane, Moisés nikani basareta mräkä israelitaye bobuta angwane, ni israelita jakwebe nämane ja mete kwärikwäri, btä Moisés namani. Akwa niaratrekwe ja mäkadreta, abkokäre Moisékwe niebare krörö ietre: Mun ja mräkäre. ¿Se nobtä abko munta ja mete kore kwärikväri yere? niebare kwe ietre.

<sup>27</sup> Angwane ni iti mräkä ja metaka käkwe Moisés kitaninkä ja käne se kwrere, bti niebare kwe ie: ¿Nirekwe ma mikani nun dänkiene nun ngätäite amne, nirekwe ma mikani kritobore nunkrä amarebti ma kite ñäke kore tie yere? <sup>28</sup> Mdakäre abko, ¿makwe ni Egiptobo kämikaba iti jändrin, kwrere ma tö nibi ti kämikai arato mtare ya? niebare kwe Moiséye. <sup>29</sup> Ni ye käkwe ñäkäbare kore Moiséye, yebtä abko Moisékwe ni Egiptobo kämikani namani gare ni jökräye gani Moisékwe, aisetet ngitiani amne nikani

kä Madián känti. Kä ye känti Moisés namani gure amne, niara ngäbriänkä ngibiabare nibu merirekwe. Akwa niara abko kákwe nünabare ni menteni kwrere kä ye känti.

<sup>30</sup> Abti Moisékwe nünabarera kä gre ketebu Madián. Angwane bati Moisés nämane kä kaibete ngitio Sinaí känti angwane, batibe kri chi namani jutra ngitiekä abko te angele namani ja mike tuare Moiséye. <sup>31</sup> Kri chi namani jutra ngitiekä Moisés okwábti, yebtä Moisés ñan töi namani krütare, kákwe krötabare bäri känime tuakäre bäri kuin. Angwane Ngöbö kukwei jarabare krörö ie: <sup>32</sup> Ti abko Ngöbö ma mräkä känökänekwe—Abrahamkwe, Isaakwe amne Jacobokwe, niebare Ngöbökwe Moiséye. Abtä jürä namani krübäte Moisébtä amne, namani grükekä jökrä ngrabare, aisetet ñan tö namani nikren kri chi yebtä.

<sup>33</sup> Angwane Ngöbökwe niebare Moiséye: Kä deme känti mata nete, aisetet sabato tikete ja ngotobtä, niebare kwe ie. <sup>34</sup> Bti Ngöbökwe niebare mda Moiséye: Nitre israelita tä ja tare nike krübäte dikaro nitre Egiptobo kisete tuen tie amne, tätre ja müaire, ye abko kukweta ruen tie arato. Ye mdentä abko, ti ki nete niaratre tikatekäreta, aisetet jakwe, ti bike ma juenta Egipto ma mräkä die mike, niebare Ngöbökwe ie.

<sup>35</sup> Ye känenkri abko, nitre israelita kákwe Moisés kani ngäbti ñakare ja ngätäite, kákwe niebare ie: ¿Nirekwe ma mikani nun dänkiene amne kritobore nun ngätäite yere? niebare kwetre Moiséye. Akwa Ngöbö abko kákwe Moisés juaninta nitre israelita dänkiene amne niaratre kökatarikä ye abko angelekwe mikani gare Moiséye kri chite ñukwä jutrate. <sup>36</sup> Moisés ye mdentä kákwe ni mräkä kirakira dianinkäta Egipto angwane, sribi kri ñan tuabare nuenbare kwe Egipto. Erere arato, sribi kri ñan tuabare namani bare ie Mren Tainte amne, kä gre ketebu sribi kri ñan tuabare nuenbare kwe kä kaibete ni mräkä kirakira okwábti. <sup>37</sup> Moisés ne arabe kákwe niebare krörö nitre israelitaye: Ni Ngöbö kukwei niekä ti kwrere abko Ngöbökwe diandikä iti mun ngätäite blitakäre jakrä munbe, niebare kwe. <sup>38</sup> Erere arato, nitre israelita nämane jökrä kä kaibete Sinaí angwane, angele nämane Ngöbö kukwei niere Moiséye ni mräkä kirakira kräke, aisetet nikwe nünandre ño abko Ngöbökwe niebare, ye mdentä abko niebare kwe Moiséye. Ye mdentä namani ni kräke arato.

<sup>39</sup> Ngöbökwe jäandrän jökrä ne nuenbare nitre mräkä kirakira kräke, akwa niaratre kákwe Moisés kukwei mikani täte ñakare jire amne Moisés kani ngäbti ñakare kwetre arato. Angwane tö namanintre näinta nebata Egipto amne namani töbike bäri Egiptobtä.

<sup>40</sup> Ye mdentä kisete, Moisés nikani ngitio Sinaíbti angwane abko ni mräkä kirakira kákwe niebare Aarónye: Moisés noko mdentä kákwe nun dianinkäta Egipto, jatani nun ngwenante, akwa dre nakaninkä btä abko gare ñakare nunye mtare, aisetet makwe ngöbötre mda mda sribedre nun jie ngwianka, ie nun tö, niebare kwetre Aarónye.

<sup>41</sup> Erere bkänä, jäandrän ngwarbe sribebare krati kwetre ngöbö ngwarbere abko bärnamani nbi ngäbäli brai bär kwrere, bti jäandrän kämikani kwetre ngöbö ngwarbe ye mikakäre ütiäte jae. Erere arato, ngöbö ngwarbe sribebare ja kise jenbti kwetre, ye abko käi ngwiani nuäre kwetre jabtä jäandrän se mikakäre ütiäte ngöbö kwrere. <sup>42</sup> Yebtä abko Ngöbökwe kä mikaninkä btätre amne tuanimetre muke kä käinbti mike ngöböre jae kwe. Ye mdentä abko nitre Ngöbö kukwei niekä Amós kákwe tikani krörö täräbtä:

Ngöbota niere krörö:

Mun israelita kákwe dikakabare kä gre ketebu kä kaibete angwane, jäandrän ngwarbe kämikani ñakare ti käkitakakäre metre, akwa kämikani kwetre ngöbö ngwarbe ye käkitakakäre.

Erere arato, munkwe jäandrän mda mda biani ñakare tie ti mikakäre ütiäte metre, akwa biani kwetre ngöbö ngwarbe ye mikakäre ütiäte jae.

<sup>43</sup> Akwa ju mikani chi abko te ngöbö ngwarbe kä Moloc nämane, aibe mun nämane nikken ngwena jabe kwäräkwärä.

Erere arato, jäandrän dätebare muke bär kwrere munkwe ngöbö ngwarbe Renfán bär mikakrä, aibe mun nämane nikken ngwena arato.

Ngöbö ngwarbe sribebare kore munkwe ja kise jenbti abko mun namani mike ütiäte jae.

Ye mdenbtä abko tikwe mun juandi ja ngie nuen mobe kä kaibete kä Babilonia bäre  
mento, nieta Ngöböwe. Amós 5.25-27

Ye abko tä tikani kore Ngöbö Kukweibtä.

<sup>44</sup> Mdakäre abko, ju nuäre ngwiandre blitakrä Ngöböbe nämane ni mräkä kirakirakwe amne, Ngöböwe ja kukwei biani Moiséye, ye abko nämane ükani kajate ju yete arato. Ju ye abko mikadre nuäi abko Ngöböwe mikani tuadre Moiséye, erere mikani kwetre. <sup>45</sup> Ju nuäre ngwiandre blitakrä Ngöböbe, ye abko Ngöböwe biani jakrä ni mräkä kirakiraye. Niaratre nämane näin Josuébe kä Canaánte angwane, kä dianinkä nitre nünanka Canaán kän kwetre amne, Ngöböwe niaratre rüe ye juanintari käne. Ye ngwane nikani ju ye ngwena jabe arato. Ju ye abko nämane kwetre nebe jrei David näire. <sup>46</sup> Ngöbö abko kwe jrei David namani tare kri, aisetet Ngöbö mikani ütiäte Jacobokwe, ye kräke jrei David tö namani ju mikai kwati nünankrä, <sup>47</sup> akwa jrei David ngobo Salomón abko kákwe ju mikani nünankrä Ngöböye.

<sup>48</sup> Akwa ju mikata ni kä nebtäkwe abko te Ngöbö Kri Kä Käinbti ñan rabadre nüne jire chi. Ne aisetet ni Ngöbö kukwei niekä Isaías köböire Ngöböwe niebare krörö:

<sup>49-50</sup> Ti abra tä gobrane kä käinbti amne kä temenbtä.

Tikwe jäandrän jökrä dätebare au.

¡Se abko nirekwe ju mikadre kuin nünankrä tie!

¡Nirekwe kä ükadrete kuin jadükakrä tie! niebare kore Ngöböwe, Isaías 66.1-2  
nieta Ngöbö Kukweibtä, niebare Estebankwe.

<sup>51</sup> Yebti Estebankwe niebare krörö mda:

¡Mun käre dokwä ribi jökrä! Mun olo tärä Ngöbö kukwei nuare amne mun moto tärä Ngöbö tarekäre, akwa ni ñakare israelita tä nüne Ngöbö rüere, kwrere jire munta nüne, aisetet käre munta rüre Ngöbö Üai Deme rüere. Mun mräkä kirakira nämane dre dre nuene Ngöbö rüere, kwrere jire munta nuene arato mtare. <sup>52</sup> Mun mräkä kirakira käkwe ni Ngöbö kukwei niekä niekä ngwiani ja tare nike kri jökrä. Erere arato, Ni Era Metre rükadre abko ni Ngöbö kukwei niekä niekä käkwe niebare, yebtä abko mun mräkä kirakira käkwe kämikani. Abti Jesu abko Ni Era Metre ye nükanina bkänä akwa, munkwe kitani ngise, bti munkwe kämikani arato. <sup>53</sup> Ngöböwe ja kukwei biani Moiséye munkrä angeletre köböire, akwa mun ñan tä mike täte jire chi, niebare Estebankwe Sanedrinye.

### Esteban kämikani jähti

<sup>54</sup> Estebankwe ñäkäbare kore, yebtä abko béri Sanedrin moto namani romon Estebankrä, kä namani tu ukwebee jabtä Esteban rüere mda. <sup>55</sup> Akwa Esteban abko, btä Ngöbö Üai Deme namani täte, käkwe nikrabare kä käinbti angwane, Ngöbö bä nuäre krübäte jatabare ie amne, Jesu abko mikanina béri ütiäte Ngöböwe amne mikanina béri dite Ngöböwe jäandrän jökrä bti ta kä käinbti, btä Esteban okwä namani, <sup>56</sup> käkwe niebare krörö:

Jukwe kä käinbti tä tikani nibi tuen tie amne, Ni Kä Nebtä Ngobo abko mikanina béri ütiäte Ngöböwe abko tä nünankä krö Ngöbö kise ruenkri nibi tuen tie. Se mike ñäräre munkwe, Estebankwe niebare ietre.

<sup>57</sup> Angwane Sanedrin käkwe kise mikanai jökrä ja olbti amne ngrarete kwärä, nikani betekä jökrä Esteban rüere, <sup>58</sup> käkwe Esteban dianinkä juta Jerusalén bäre mento, bti nitre blitaka ngwarbe Esteban rüere abko käkwe dän kwekwe mikaninte ngibiadre ni bati kädian nämane Saulo yeeye, bti nikanintre Esteban täke jähti kämikakäre. <sup>59</sup> Esteban täkä namani jähti angwane, blitabare krörö kwe jakrä Ngöböbe:

Ti Dämkien Jesu, ti üai kaen ngäbti ja känti yete, niebare kwe.

<sup>60</sup> Ye btäräbe namani ngukudokwäbti temen, käkwe ñäkäbare ja dibti krörö:

Ti Dämkien, nitre kukwe nuenkä käme tibtä, ne makwe ñan mika ja ngie nuen ti dokwäre abko titä ribere mae kräke, niebare kwe se kwrere.

Estebankwe ñäkäbare kore, ye btäräbe krütani.

## 8

<sup>1</sup> Esteban täkä namani kore jäbti kämikakäre ye abko namani tuen dbe Sauloye.

*Nitre gätäkä Jesu käbti namani ja tare nike bätäkä ngwarbe*

Köbö yebtä abko, nitre gätäkä Jesu käbti nämane Jerusalén abko rüe nikani mike ja tare nike bätäkä ngwarbe tödekabtä Jesubti, ye ngäniene ni kwati nikani kwäräkwärä kä Judeate amne kä Samariate. Akwa nitre Jesu kukwei ngwianka aibe abko namani Jerusalén. <sup>2</sup> Esteban kämikani, yebti ni ruäre nämane tödeke era metre Ngöböbtä, ye käkwe Esteban doboi mikani amne müaibare krübäte kwetre. <sup>3</sup> Ye ngwane abko Saulo tö namani nitre gätäkä Jesu käbti juain ngwarbe jökrä, aise te nitre ye jiebti Saulo namani näin kisere ju kwatirekwatire te. Namani ni merire, ni brare jáke tementa ju bäre, bti namani kite ngite jökrä kä teri tödekabtä Jesubti.

### KUKWE KUIN JESUBTÄ KÄDRIEBARE JUDEATE AMNE SAMARIATE (8.4–9.43)

*Felipe nikani kukwe kuin Jesubtä niere Samaria känti*

<sup>4</sup> Nitre tödekaka Jesubti nämane Jerusalén ngitiani, ye abko namani nikken mdente erere, käntikänti namanintre kukwe kuin Jesubtä ye kädriere mda. <sup>5</sup> Nitre ye ngätäite abko ni tödekaka iti Jesubti kädian nämane Felipe abko nikani nebe juta bari ütiäte Samariate, känti nikani blite ni mda mdabe Kristo Jesubtä. <sup>6</sup> Felipe namani blite angwane, ni jökrä namani olo ketete kwekbe, ñobtä ñan angwane namani blite Jesubtä amne namani sribi kri ñan tuabare nuene okwäbti Jesu die bärä mikakäre abko krörö: <sup>7</sup> Ni kwati btä üai käme nämane abko namani nikken mento btä. Üai käme ye namani nikken mento nibtä angwane, namani ngrrente kri krübäte, bti namani nikken mento angwane, ni ye namani nebata kuinta. Erere arato, ni ruäre ruen ñakare ngrabare amne ni ruäre abko ngüre ya, küde yangrötani abko namani nebata kuinta jökrä Jesu diebti Felipeye. <sup>8</sup> Yebtä abko kä namani nuäre kri ni jökräbtä juta yete.

*Kukwe nakaninkä Simón Mago yebtä*

<sup>9</sup> Akwa kä Samariate yete abko ni nämane iti. Ni ye abko kädian nämane Simón. Simón ye abko käre nämane sukiare amne nitre Samariabo ngökani krübäte kwe, ñobtä ñan angwane niara nämane ja mike ni ütiäte kri kwrere. <sup>10</sup> Ne aise te nitre ütiäte krikri amne ni bobre bobre kwati namanintre olo ketete kwekbe jökrä niara kukwei nuakäre, kä namanintre niere:

Ngöbö di kri tä ni nebtä, namanintre niere.

<sup>11</sup> Kä raire Simón nämane sukiare kri amne, sribi yebtä ni kwati ñan töi namani krütare, aise te ni kwati namani nekete ben.

<sup>12</sup> Akwa Ngöbö amne Jesukristo nämane gobrane ño ni ngätäite, ye diri nikani Felipekwe angwane, nitre ye käkwe kukwe kuin Jesubtä kani ngäbti jökrä, bti Felipekwe ni merire, brare ngökani ñöte Jesu käbti. <sup>13</sup> Erere arato, sukia Simón ara jire käkwe kukwe kuin Jesubtä ye mikani era amne ngökani ñöte Jesu käbti arato. Yebti Simón nikani dikekä Felipe mukore kwäräkwärä angwane, sribi kri ñan tuabare Felipe nämane nuene Jesu diebti, yebtä abko Simón ñan töi namani krütare mda.

<sup>14</sup> Ngöbö kukwei kuin Jesubtä mikani era nitre Samariabokwe, ye abko nitre Jesu kukwei ngwianka nämane Jerusalén käkwe gani angwane, Pedro juani Juanbe kwetre nebe Samaria kukwe tuenbtä. <sup>15</sup> Erere bkänä, Pedro amne Juan nikani nebe Samaria mda angwane, nitre Samariabo btä Ngöbö Üai Deme rükadre, abkokäre blitabare kwetre Ngöböbe kräke, <sup>16</sup> ñobtä ñan angwane nitre Samariabo käkwe tödekan Jesubti, ye abko ngökani jirekäbe ñöte Jesu käbti akwa, Ngöbö Üai Deme ngämi nüke btätre. <sup>17</sup> Yebti Pedro amne Juan käkwe kise mikani btitre angwane, batibe Ngöbö Üai Deme nükani btätre. <sup>18</sup> Pedro amne Juan namani kise mike nibti angwane, Ngöbö Üai Deme namani nüke btätre Simón okwäbti, yebtä abko Simón tö namani ngwian biain Pedro amne Juanye di ye ütiäre, <sup>19</sup> käkwe niebare krörö ietre:

Tikwe kise mikadre nibtä angwane, Ngöbö Üai Deme rükadre btä arato, abkokäre ja di kri ye bien tie arato, niebare Simónkwe.

<sup>20</sup> Abtä Pedrokwe ñäkäbare krörö mda Simónye:

Ngwian makwe ye ben ngöi ma rika kä ja tare nikakrä känti, ñobtä ñan angwane jändrän kuin bianta ngwarbe Ngöbökwe nie abko ma tö nibi kökai ngwianbti. <sup>21</sup> Ye aisetemoto ñakare kuin Ngöbö ngwärekri, tuen tie. Yebtä abko, ma ñan rabadre sribi Ngöbökwe nuene jire chi nunbe. <sup>22</sup> Akwa ma töi käme, ye makwe kita temen amne makwe ja di kärä Ngöböye angwane, mata ja mike ngite, ye abko nane Ngöbökwe diandrekäta mabtä. <sup>23</sup> Tita niere kore mae, ñobtä ñan angwane ma moto romon krübäte amne ma töita kukwe kämekäme aibebtä nibi tuen mabtä tie. Abko kore se, niebare Pedrokwe Simónye.

<sup>24</sup> Abtä Simónkwe niebare mda ie:

Kukwe rakadrekä blo tibtä, munkwe nini tie, ye kwrere ñan rabadre bare tibtä, abkokäre blite tikrä ni Dänkienbe, niebare kwe Pedroye amne Juanye.

<sup>25</sup> Yebti Pedro amne Juan käkwe kukwe kuin ni Dänkien Jesubtä kädriebare ünän kä yete, bti nikantia juta Jerusalén kukwäre angwane, nikani kukwe kuin Jesubtä ye kädriere kä kiakiate niken ji ngrabare Samariate abti nikani nebata Jerusalén.

#### *Felipekwe blitabare sribikä ütiäte Etiopiabobe*

<sup>26</sup> Abti angelekwe niebare Felipeye:

Felipe, ji niken Jerusalén btä kä kaibete tä neme juta Gaza, yebti nänta, niebare angelekwe ie.

<sup>27</sup> Erere bkänä, Felipe nikani mda angwane, ni Etiopiabo ütiäte kri mikani kaibe, monsoi neme ñakare jatabare Felipeye. Jreina Etiopiabo kädian nämane Candace abko kräke ni Etiopiabo ye nämane ngwian ngibiare abko ben Felipe namani ngätäi. Ni ye abko jananbare Ngöbö käikitekä Jerusalén, <sup>28</sup> bti jataninta ja jiebti ja käite angwane, Felipe namani ngätäi ben ji ngrabare. Ni ye abko kareta jäkä nämane mdäkwe abko te niara nämane täkänintbe amne, ni Ngöbö kukwei niekä kädian nämane Isaías käkwe tärä tikani, yebtä niara nämane ñäke angwane, namani ngätäi Felipebe. <sup>29</sup> Angwane Ngöbö Üai Deme käkwe niebare Felipeye:

Kareta jäkäta mdäkwe ye ken krötö jötrö, niebare Ngöbö Üaikwe ie.

<sup>30</sup> Ye erere bkänä, Felipekwe krötabare jötrö kareta ken angwane, tärä Isaías btä ni Etiopiabo nämane ñäke, ye kukwei jarabare Felipeye. Abtä Felipekwe niebare mda ie:

¿Tärä btä mata ñäke, ye tä nüke gare mae ya? niebare kwe ie.

<sup>31</sup> Angwane ni ye käkwe niebare mda Felipeye:

¿Kukwe ne dirikä ñakare tie, se rükadre gare ño tie? mata nütüre, niebare kwe Felipeye.

Bti Felipe käräbare täketbe karetate kwe jabe. <sup>32</sup> Tärä btä nämane ñäke abko nere: Kordero jäta niken kämikadre, kwrere jire niara jänikani.

Erere arato, kordero jäta niken drüen tikadrekä tä neme kwe kwe, ye kwrere niara nämane kwe kwe amne ñäkäbare ñakare ja dokwäre kwe.

<sup>33</sup> Niara mikani ngwarbe ni mda mdakwe akwa, ja mike ngite ñakare, akwa ngite niebare. Niara ngämi ngäbäkre bkäne, känenkri kämikani kwe, aisetemoto ñakare jire. *Isaías 53.7-8*

Kukwe ne mdentä nämane ñäke abko jarabare Felipeye.

<sup>34</sup> Angwane ni Etiopiabo ye käkwe niebare Felipeye:

Ni Ngöbö kukwei niekä ye abko nämane blite jabtä ya, o nämane blite ni mdara jire btä, ye abko makwe niedre tie abko ti tö nibi ribei mae, niebare kwe Felipeye.

<sup>35</sup> Angwane tärä btä ni Etiopiabo nämane ñäke, ye ara jire btä Felipekwe blitabare känne ben. Erere arato kukwe mda mdabti, Felipekwe kukwe kuin Jesubtä mikani gare ie. <sup>36</sup> Yebti nämane näin ji ngrabare, te nikani mate ñöbtä mda. Angwane ni Etiopiabo ütiäte kri ye käkwe niebare Felipeye:

Nete ño tärä, aisetemoto ñakare ti ngökadre ñöte nete abko rabadre ño? niebare kwe ie.

<sup>37</sup> [Angwane Felipekwe niebare mda ie:

Kukwe kuin Jesubtä, ye mata mike era bkänä ne ngwane, rabadre kuin, niebare ie Felipekwe.

Abtä niarakwe niebare Felipeye:

Jesukristo abko Ngöbö Odei ye abko era tigrä, niebare kwe.]\*

<sup>38</sup> Ye btäräbe kareta mikamna nünenkä kwe, bti nikantire nebe ñöbtä angwane, Felipekwe ngökani ñöte. <sup>39</sup> Yebti jatanintre nüketa jate angwane, Ngöbö Üai nikarinbe Felipe ngwena ni Etiopiabo ye okwä bäre mento, aisetet Felipe tuaninta ñakare mda kwe. Akwa niara abko btä kä namani bäri nuäre amne, nikantia ja gwiriete. <sup>40</sup> Akwa Felipe abko, batibe namanime mobe juta Azotote. Ye känti nikani kukwe kuin Jesubtä dirire juta kwatirekwatire te. Abti nikani nebe juta Cesareate.

## 9

### Saulokwe tödekani Jesubti (Hechos 22.6-16; 26.12-18)

<sup>1</sup> Kä ye ngwane abko, Saulo namani jadüke ñakare, gata kabä mike nitre ja töitikaka ni Dänkien Jesukwe rüere, aisetet Saulo nikani ni blitaka Ngöböbe ni mda mda diäre dänkien ye känti, <sup>2</sup> käkwe tärä käräbare ie ngwiandre sinagoga kwatirekwatire ye dänkientreye juta Damascote. Ni merire amne ni brare kwandré näin Ji Jesukwebti Sauloye juta Damasco ne ngwane, niara di rabadre ngwiankrä ngite Jerusalénte, abkokäre tärä käräbare kwe. <sup>3</sup> Ye erere bkänä, tärä bianina ie, abti nikani juta Damasco. Nikani, nikani, nikani mate ja ken juta Damasco. Te batibe ñotraträ dirare kä käinbtí jatani. Ye abkoträ niabare dirare jökrä Saulo bäre temen. <sup>4</sup> Angwane Saulo nikarinbe ngitiekä temen amne, btäräbe ni kukwei jarabare krörö ie:

¿Saulo, ñobtä mata näin kisere kore ti jiebti ti mikakäre ja tare nike yere? niebare kwe.

<sup>5</sup> Angwane Saulo käkwe niebare mda:

¿Ma abko nire ti Dänkien? niebare kwe.

Ye btäräbe ni ye käkwe niebare mda Sauloye:

Ti abko Jesu ara, aisetet nitre tödekaka tibti jiebti mata näin kisere mikakäre ja tare nike, ye ñan niaratre jiebti mata näin, akwa ti ne ara jire jiebti mata näin. [¡Ye ñobtä mata kukwe nuene käme ja rüere au! niebare mda kwe ie.

<sup>6</sup> Angwane Saulo abko namani grükekä jökrä ngrabare amne kä jürä namani krübäte btä, käkwe niebare:

¿Tikwe dre nuendre, ie ma tö nibi ti Dänkien? niebare kwe.]\*

Angwane ni Dänkien käkwe niebare mda ie:

Näin krö, bti ma rika nebe juta Damascote. Ye känti makwe dre nuendre, erere niedi mae, niebare kwe Sauloye.

<sup>7</sup> Angwane nitre nämane näin Saulobe, ye ie ni kukwei jarabare akwa, ni jatabare ñakare ietre. Yebtä abko kä jürä namani krübäte btätre amne namanintre nünaninkä kwe kwe jökrä. <sup>8</sup> Yebti Saulo nämane temen, nükani dikekäta krö, käkwe okwä ngianinte ngwane, kä namani iko okwätte amne kä namani tuen ñakare ie, aisetet nitre nänkä ben ye käkwe kani küdebtí, nikantire ngwena nebe juta Damascote. <sup>9</sup> Ye känti Saulo namani köbömä jire angwane, kä namani tuen ñakare ie. Angwane köbö ye näire ja bainbare kwe ñöye amne mröye arato.

<sup>10</sup> Juta Damasco yete abko, ni tödekaka Jesubti nämane nüne iti. Ni ye abko kädian nämane Ananías. Ananías ye abko, ie ni Dänkienkwe ja mikani tuare köbörre mda, käkwe niebare krörö ie:

¡Ananías! niebare kwe ie.

Jötrö Ananíakwe niebare:

¿Ye dre, ti Dänkien? niebare kwe mda.

---

\* 8:37 Kukweta tikani corcheta ngätäite ñan tä tikani manuscrito bári kuinkuinbtä. \* 9:6 Kukweta tikani corcheta ngätäite ñan tä tikani manuscrito bári kuinkuinbtä.

<sup>11</sup> Angwane ni Dänkien käkwe niebare ie:

Ji kädianta Ji Metre, yebti nän amne, ma rika nebe ni kädianta Judas ye gwiriete. Ma raba ju yete angwane, ni juta Tarsobo kädianta Saulo abko tä yete, ye ngwiantari makwe. Niara tä blite Ngöböbe amne <sup>12</sup> ni iti kä Ananías niki nebe niara känti, käkwe kise miri bti, kä mikakäre tuenta ie abko nibi tuen köböre kwrere ie, aisetē nän känti, niebare ni Dänkienkwe Ananíaye.

<sup>13</sup> Ni Dänkien kukwei jarabare kore Ananíaye angwane, niebare krörö kwe:

Ti Dänkien, nitre deme makwe nünanka Jerusalén abko ni ye tä mike ja tare nike krübäte, ye abko ni kwati käta niere tie. <sup>14</sup> Mdakäre abko, nitre tödekaka mabti tä nüne nete abko järikadre ngite kwe Jerusalén, abkokäre tärä kärääbare kwe nitre blitaka Ngöböbe ni mda mda diäre dänkienye, ye erere tärä biandi ie mikakäre ütiäte. Yebti jatani nüke nete. ¿Se abko ti rikadre ño känti se? niebare Ananíakwe.

<sup>15</sup> Akwa ni Dänkien käkwe niebaretä mda Ananíaye:

Nitre kä mdabti ñakare israelitare abko ie ni nekwe ti mikadi gare, abkokäre tikwe dianinkä. Erere arato, nitre ñakare israelitare ngätäite jrei tärä, ye ie ti mikadre gare kwe arato, abkokäre tikwe dianinkä. Mdakäre abko, niara arabe rikadre ti miketa gare nitre israelitaye arato, abkokäre tikwe dianinkä jenena jakrä, aisetē nän känti, tita niere mae Ananías. <sup>16</sup> Ni ne käkwe ja tare nikadi kri tikrä, ye abko tikwe mikadi gare ie arato, niebare ni Dänkienkwe Ananíaye.

<sup>17</sup> Ye erere bkänä, Ananías nikani Saulo känti. Namanina yete angwane, nikani gwä, käkwe kise mikani Saulobti, bti niebare krörö kwe ie:

Ti mräkä Saulo, Jesu käkwe ja mikani tuare mae ji ngrabare, ye mden käkwe ti juni nete. Kä rabadre tuenta mae amne Ngöbö Üai Deme rabadre täte mabtä, abkokäre ni Dänkien Jesu ara käkwe ti juni ma känti nete, niebare Ananíakwe Sauloye.

<sup>18</sup> Ye btäräbe jäandrän gwa drukwata kwrere nämane Saulo okwäte abko betaninkä mento, namani ruen ie angwane, kä namani tuenta kuin ie. Yebti nikani amne Ananías käkwe ngökani ñöte. <sup>19</sup> Yebti Saulokwe mröbare mda amne namaninta dite ngrabare.

#### *Saulo käkwe blitabare Jesubtä Damascote*

Nebti Saulokwe nünabare bä jótrö mda juta Damascote nitre tödekaka Jesubtibe. <sup>20</sup> Ye btäräbe sinagoga käntikänti Saulo nikani niere krörö:

Jesu abra Ngöbö Odei era metre, nikani niere.

<sup>21</sup> Yebtä abko nitre Saulo kukwei nuaka nuaka ñan töi namani krütare btä, kä namani niere:

Nitre tödekaka Jesubti, jiebti ni noko nämane näin kisere Jerusalén yete. Erere arato, niara jatani nete nitre tödekaka Jesubti kaen ngite ngwiankäre nebebe Jerusalén biandre nitre blitaka Ngöböbe ni mda mda diäre ye dänkientreye kitakäre ngite. ¿Se ño abko tä blite kore mtare se? ni jökrä namani niere kore.

<sup>22</sup> Akwa Saulo abko namani blite bäri ja dibti amne, Jesu abko Ni Dianinkä Ngöbökwë bkänä abko Saulo namani bä mike metre jökrä. Yebtä abko, nitre israelita nämane nüne Damasco käkwe dre niedre Jesubtä Sauloye abko ñan namani nüke gare ietre.

<sup>23</sup> Abti kä nikanina raire ta angwane, batibe nitre israelita käkwe ja töi diani kwärikwäri Saulo kämikakäre. <sup>24</sup> Akwa Saulo rätäkä namani nitre israelitakwe, ye abko Saulokwe gani, akwa juta jukwebtä, ye känti nitre israelita namani niara kraire jite dibire rare kämikakäre. <sup>25</sup> Akwa nitre ja tötitakaka Saulobe käkwe Saulo mikani kutia krite, bti gibianinkä kibti ta timon kwetre deo, bti Saulo ngitianinta.

#### *Saulo mikani gare nitre Jesu kukwei ngwiankaye Jerusalén*

<sup>26</sup> Abti Saulo nikani nebata Jerusalén angwane, nitre tödekaka Jesubti, ben Saulo tö namani ja getai. Akwa ni jökrä btä niara jürä namani, ñobtä ñan angwane Saulokwe Jesu kani ngäbti arato, ye abko ñan namani nebe era kräke, aisetē kä jürä namani btätre. <sup>27</sup> Akwa ni tödekaka Jesubti kädian nämane Bernabé abko nikani Saulo ngwena, bti mikani gare kwe nitre Jesu kukwei ngwiankaye. Angwane Saulo nikani Damasco angwane, Dänkien Jesukwe ja mikani tuadre ji ngrabare ie. Erere arato ni Dänkien käkwe

blitabare ben amne, kä jürä namani ñakare Saulobtä blitakäre Jesubtä juta Damascote, niebare Bernabékwe nitre Jesu kukwei ngwiankaye. <sup>28</sup> Yebti nitre Jesu kukwei ngwianka kákwe Saulo kani ngäbti amne, nitre ye ben Saulo namani nüne Jerusalén. Angwane namanintre nikken gware kwäräkwärä amne kä jürä namani ñakare btä blitare Jesubtä. <sup>29</sup> Nitre israelita kukwe griegore, ben Saulo namani blite Jesubtä amne namani ja kwete bentre, akwa niaratre ye abko tö namani Saulo kämikai arato. <sup>30</sup> Ye abko Saulo mräkätre tödekaka Jesubti kákwe gani angwane, nikanintre Saulo ngwena ngitie nebe juta Cesareate. Ye känti abko, Saulo juaninta kwetre nebata ja käite juta Tarsote. <sup>31</sup> Yebti abko, nitre gätäkä Jesu käbti nämane nüne kä Judeate, Galileate amne Samariate ye abko namanintre nüne jáme jökrä amne Ngöböökwe die mikani nüne dite kukwe kuin Jesukwe nebtä. Erere arato, namanintre Dänkien Jesu mike ütiäte jae amne Ngöbö Üai Deme namani die mike angwane, ni kwati jatani mda tödeke Jesubti siba.

*Pedro abko kákwe Eneas mikaninta kuinta Jesu diebti*

<sup>32</sup> Pedro abko nämane näin basare kwäräkwärä mräkä Jesu käbtiye angwane, nikani arato juta Lidata mda ja tuakäre nitre deme Ngöböökwe nämane nüne juta yete yebe.

<sup>33</sup> Pedro namani juta Lidata angwane, ni iti kädian nämane Eneas, känti Pedro nikani. Ni ye abko, kä kwä kwära namani ruen ñakare ngrabare abko kisete nämane bren. Abtä nämane jänbtibe, btä Pedro namani. <sup>34</sup> Angwane Pedrokwe niebare Eneaye:

Eneas, Jesukristo tä ma miketa kuinta, aisetet näin krö. Jän makwe ye ükete au jakrä, niebare kwe ie.

Ye btäräbe Eneas nükaninbe dikekä krö. <sup>35</sup> Eneas namaninta kuinta kore, ye abko ni kwati nünanka juta Lidata amne nitre nünanka kä Sarónte kákwe tuani angwane, kukwe kuin ni Dänkien Jesubtä kani ngäbti kwetre arato.

*Jesu diebti Pedrokwe Dorcas mikaninta nire*

<sup>36</sup> Kä ye ngwane abko, meri tödekaka Jesubti nämane nüne iti juta Jopete. Meri ye abko kädian nämane Tabita. (Kukwe Tabita ne abko Dorcas nieta griegore.) Meri ne abko käre nämane jändräb kuin nuene ni mda mdakrä amne käre nämane ni bobre bobre die mike arato. <sup>37</sup> Akwa kä ye ngwane Dorcas näkäni bren jume amne krütani. Dorcas krütani angwane, jükaninte, bti ngwäkä jänkäni nebe ju käin ninkri yete, känti mikani gwi kwetre uliekäre. <sup>38</sup> Juta Jope ye abko nämane känime juta Lida ken. Pedro nämane juta Lida ye känti gani nitre tödekaka Jesubtikwe juta Jopete angwane, ni juani nibu kwetre Pedro kärere. Ye erere ni nibu ye nikani, namani Pedro känti, kákwe niebare ie:

Brän jötrö nunbe juta Jopete abko nunta ribere mae, niebare kwetre Pedroye.

<sup>39</sup> Ye erere bkänä, Pedro nikani bentre. Namanintre juta Jopete angwane, Dorcas ngwäkä nämane mikani gwi, ye känti nikani Pedro ngwena amne, meri kän brare krütanikrütani nämane yete abko müare kwärä ja ükaninkrö jökrä Pedro bäre kwetre, bti Dorcas nämane nüne angwane, Dorcakwe dän ño ño dikani ni bobre bobre kräke, erere namani mike tuare jökrä Pedroye. <sup>40</sup> Akwa Pedro abko kákwe juani jökrä ju bäre, bti namani ngukudokwäbti temen blite Ngöböökwe. Pedrokwe blitabare ünän Ngöböökwe, bti Dorcas ngwäkä mikani ñärae kwe, kákwe niebare krörö ie:

¡Tabita, näin krö! niebare kwe ie.

Btäräbe Tabitakwe okwä ngianiinte amne okwä namani Pedrobtä se kwrere, bti namani täkänintbe. <sup>41</sup> Angwane Pedrokwe kani küdebt, ganinkrö krö kwe. Tabita namani nünankä krö angwane, nitre tödekaka Jesubti nämane yete amne meri kän brare krütanikrütani nämane yete ju bäre, ye Pedrokwe käräbareta gwä, bti meri nükantia nire, ye mikani tuadre kwe ietre. <sup>42</sup> Meri mikaninta nire Pedrokwe ye abko nitre kwati nünanka juta Jopete kákwe gani angwane, ni kwati kákwe tödekani Jesubti arato. <sup>43</sup> Yebti ni sribikä iti nbi kwatabtä kädian nämane Simón nämane nüne arato juta Jopete, ye känti Pedro namani nüne bärre mda.

## KUKWE KUIN JESUBTÄ NIEBARE NITRE ÑAKARE ISRAELITARE NGÄTÄITE (10.1–28.31)

### 10

#### *Corneliokwe Pedro käräbare*

<sup>1</sup> Kä ye ngwane abko, juta Cesareate ni nämane iti kädian nämane Cornelio. Ni ye abko rükä romano amne, nämane mikani nitre rükä kädian nämane Batallon Italiano ye dänkiene. <sup>2</sup> Cornelio amne mräkä kwe kwe nämane Ngöbö tarere amne nämane Ngöbö mike ütiäte arato. Erere arato, Cornelio käre nämane ngwian bien kabre nitre israelita bobreye die mikakrä amne käre nämane blite Ngöböbe arato. <sup>3</sup> Bati ñänä okwä krämä näre dere angwane, batibe kukwe namani tuen köböre kwrere krörö ie: Angele Ngöböökwe jatani, nükani gwi niara känti, namani tuen metre kwrere ie, kä namani niere ie:

¡Cornelio! niebare ie angelekwe.

<sup>4</sup> Angwane Cornelio okvä namani kwe kwe angelebtä amne kä jürä namani krübäte btä, käkwe niebare mda:

¿Ma tö nibi dreye, ti dänkien? niebare kwe.

Angwane angelekwe niebare ie:

Mata blite Ngöböbe amne mata jäandrän bien nitre bobre bobre die mikakrä, ye abko gare kuin Ngöböye. Abtä Ngöbö tö ma die mikai mtare. <sup>5</sup> Ne aise te makwe ni mda mda juandre jötrö nebe juta Jopete. Ni kädianta Simón, arabe ie Pedro nieta, ye kärere nüke ja känti nete. <sup>6</sup> Niara tä nünentbe Simón mdara jire känti mren köräbti. Simón ye abko sribikä nbi kwatabtä. Abko kore se, niebare angelekwe Cornelioye.

<sup>7</sup> Yebti angele blitaka Cornelioye, ye nikantia angwane, Cornelioökwe sribikä kwe kwe käräbare nibu amne ni rükä kä namani Ngöbö tarere arato amne namani Cornelio die mike sribibä käräbare iti kwe. <sup>8</sup> Bti angelekwe dre niebare ie, ye erere niebare jökrä kwe ietra, bti juani kwe juta Jopete Pedro tuen.

#### *Ngöböökwe kukwe mikani tuen köböre kwrere Pedroye*

<sup>9</sup> Yebti jäandrinate ñänä jatanina nüke ruäre angwane, nitre juani Cornelioökwe ye abko namani mate ja ken juta Jopete angwane, Pedro abko nikani jubti käin blitakäre Ngöböbe.

<sup>10</sup> Angwane mrö namani krübäte Pedroye, tö namana tui mröi akwa, mrö scribe nämane krire kräke angwane, Ngöböökwe jäandrän mikani tuare köböre kwrere krörö ie: <sup>11</sup> Kä käinbti ngitiani, namani tuen ie amne, yete ta dän kwata kri nämane mäkäninte körä kräbkä btä kwärikwäri abko gibianinkä timon, nükani mate dobobtä temen okwäbti.

<sup>12</sup> Dän kwata kri yete abko jäandrän ngwarbe ngoto kräbkä kräbkä bätäkä ngwarbe nämane. Erere arato, jäandrän yorekä tementa tementa bätäkä ngwarbe nämane amne nukwä bätäkä ngwarbe nämane arato abko namani tuen Pedroye. <sup>13</sup> Ye btäräbe Ngöbö kukwei jarabare krörö ie:

Pedro, jäandrän nibi tuen mae yete, ye nän kämike kwetadre jae, niebare kwe ie.

<sup>14</sup> Pedro käkwe niebare mda:

Ti Dänkien, jäandrän mden mden ñan dbe kwetadre makwe niebare, ye erere tita kwete ñakare, akwa jäandrän ñan dbe kwetadre aibe tä dän kwata kri te, aise te tikwe ñan kwetadre, niebare Pedrokwe.

<sup>15</sup> Ye btäräbe, Ngöbö kukwei jarabare Pedroye, käkwe niebare ie:

Jäandrän mikani dbe Ngöböökwe, ye dbe ñakare makwe ñan tö ngwian niere jire chi, niebare kwe ie.

<sup>16</sup> Jäandrän tuani Pedrokwe, ye abko kwetadre kwe niebare bämä jire ie, bti dän kwata kri ye jänikaninta kä käinbti niara okwäbti tuani kore kwe köböre kwrere. <sup>17</sup> Yebti abko, Pedro namani töbige kri mda, ñobtä ñan angwane drekäre tuani köböre kwrere kwe abko ñan namani nüke gare ie, aise te namani töbige kri. Ye btäräbe ni juani Cornelioökwe abko nükani jukwebtä käkwe Simón ngwianintari. <sup>18</sup> Yebti namana tui jukwebtä Simón känti angwane, ñäkäbare jume ja dibti krörö kwetre:

*¿Ni kädianta Simón akwa, Pedro nieta ie arato, ye tä nüne nete ya? niebare kwetre.*

*<sup>19</sup> Angwane Pedro abko nämane töbika kukwe tuani kwe yebtä jubti käin angwane, Ngöbö Üai Deme kákwe niebare ie:*

Pedro, ni nü nimä, käta näin ma känentari abko tä nokote. *<sup>20</sup> Ne aisetet nänta jötrö timon amne ma rika bentre. Akwa makwe ñan töbika dikaro rikakäre bentre, ñobtä ñan angwane tikwe niaratre juni ma tuen, niebare Ngöbö Üaikwe ie.*

*<sup>21</sup> Ye erere bkänä, Pedro nämane jubti käin, jataninta timon, kákwe niebare nitre yeye:*

Ti ne mden känänta munkwe ye. *¿Drekäre munta näin ti känene? niebare Pedrokwe ietre.*

*<sup>22</sup> Angwane nitre ye kákwe niebare mda ie:*

Nitre rükä dänkien kädianta Cornelio kákwe nun juanba ma tuen nete. Niara abko tä nüne metre Ngöbö ngwärekri amne tä Ngöbö mike ütiäte jae arato amne, nitre israelita kwati käta mike ütiäte jae amne tätre tarere arato. Cornelio ye mden känti angele deme Ngöbökwe nükani, kákwe ma kärämna amne ma rikadre niara gwiriete amne, makwe dre niedre abko niarakwe kukwe nuadre abkokäre, niebare kwetre Pedroye.

*<sup>23</sup> Angwane Pedrokwe käräbare gwä. Ye känti kibiabare kwetre.*

#### *Pedro nikani Cornelio känti*

Yebti jändrinane, Pedro nikani bentre angwane, ja mräkätre tödekaka Jesubti nünanka juta Jopete nikani ruäre Pedro mukore siba. *<sup>24</sup> Yebti jändrinane angwane, Pedro nikani mate juta Cesareate. Cornelio abko nämane ngibiare amne, Cornelio kwe mräkä kwekwe amne kukwe muko kwekwe ükaninkrö kwati, ben nämane Pedro ngibiare ngäbti angwane, Pedro nikani nebe. <sup>25</sup> Pedro nikani mate gwäkäre se kwrere angwane, Cornelio kwe kani ngäbti, kákwe ja mikani ngukudokwäbti temen Pedro mikakäre ütiäte jae.* *<sup>26</sup> Akwa Pedro kákwe niebare Cornelioye:*

Ti abko ja kwrere mabe, aisetet makwe ñan ti mika ütiäte Ngöbö kwrere jae. Näinta krö, niebare kwe ie.

*<sup>27</sup> Yebti blitare kwärä, nikanintre gwä angwane, ni nämane ja ükaninkrö kwati gwi Pedro ngibiare ngäbti, btä Pedro namani. <sup>28</sup> Angwane Pedrokwe niebare krörö ietre:*

Ni menteni, ñakare israelita mun kwrere, ben nun israelita ti ne kwrere kákwe ñan ja getadre jire chi amne ñan rikadre jire juete abko tä ükaninte kore nunkwe, ye gare kuin munye ruen tie. Akwa ni menteni ñakare israelitare abko ñakaredbe Ngöbökrä abko tikwe ñan niedre jire abko Ngöbökwe mikaba gare tie. *<sup>29</sup> Ye mden kisete, ti käräbare nüke nete nieba tie angwane, ti jataba jirekäbe. Tikwe ñäkäba ñakare mda, bti ti jataba, aisetet ¿drekäre munkwe ti käräbare nüke nete abko ti tö nibi gai mda? niebare Pedrokwe ietre.*

*<sup>30</sup> Abtä Cornelio kákwe niebare mda ie:*

Mäkäira ñänä okwä ne näre angwane, ti näma blite Ngöböbe ñänä okwä krämä näre dere ja juete nete angwane, batibe ni rükaba iti ti känti. Ni ye abko btä dän trä ngitiekä rükaba ti känti, *<sup>31</sup> kákwe nieba krörö tie: Cornelio, mata blite Ngöböbe, ye abko jarabare Ngöböye amne, mata ni bobre bobre die mike ño, ye abko garera ie arato, <sup>32</sup> aisetet makwe ni mda juandre nebe juta Jopete. Ni kädianta Simón, arabe ie Pedro nieta, ye kärere nüke ja känti nete. Niara tä nünentbe Simón mdara jire känti mren körabti. Simón ye abko sribikä nbi kwatabtä, nieba kwe tie. <sup>33</sup> Ye kwrere bkänä, jötrö tikwe nitre nimä se juanba ma kärere amne, ma jatani ja moto kuinbti, ye abko käi nibi nuäre tibtä. Mtare nita jökrä ketetibe Ngöbö ngwärekri nete amne, makwe dre niedre nunye niebare ni Dänkienkwe mae, ye erere nunga biare ma kukwei nuakäre, niebare Cornelio kwe Pedroye.*

*<sup>34-35</sup> Angwane Pedro nikani blite, kákwe niebare mda:*

Ni jökrä ütiäte ja kwrere Ngöbökrä, aisetet tä ni kitete ñakare ni mda mda ngätäite, akwa ni nünanka juta mdente mdente käta Ngöbö mike ütiäte jae amne tä nüne metre abko Ngöböta juto biare kaen ngäbti jökrä, ye abko nena gare tie mtare. *<sup>36</sup> Kukwe ye abko Ngöbökwe mikani gare nun israelitaye abko krörö: Jesukristo ni jökrä Dänkien ye köböire ni jökrä rabadre ja mäketa amne nünenta jáme jökrä. <sup>37</sup> Ye rabadre gare, abkokäre Juan*

Bautista jatani ja ngökamna ñöte nie angwane, dre nakaninkä kä Galileate niken nebe kä Judeate jökrä, ye gare kuin munye abko krörö: <sup>38</sup> Jesu Nazarebo, ie Ngöböökwe ja di biani kri amne Ngöböökwe ja Üai Deme mikani täte btä abko diebti nämane näin jändrän kuin nuene amne ni bren bren nämane ja tare nike diablu ngoto täni abko mikaninta kuinta kwe. Ngöbö nämane Jesube abko diebti jändrän ye namani bare ie, ye abko gare kuin munye arato.

<sup>39</sup> Jesukwe sribi ño ño nuenbare nun israelita käite amne juta Jerusalénte, ye abko nun Jesu kukwei ngwianka käkwe tuani ja okwä jenbti. Jesu müre ketani krusobtä nitre israelitakwe, <sup>40</sup> akwa köbömäkäre angwane, Ngöböökwe mikaninta nire, bti Ngöböökwe mikani tuadre nun ngätäite. <sup>41</sup> Akwa Ngöböökwe ñan mikani tuadre nitre israelita jökräye, akwa nun dianinkära kena Ngöböökwe, nunye Ngöböökwe Jesu mikani tuadre. Jesu nukaninta nire, abti nun ne aibe käkwe mröba amne tomna ñaba ketetibe ben amne, nun aibe Ngöböökwe tuanimetre tuen. <sup>42</sup> Ngöböökwe niara mikani Kritobore ni nire kräke amne ni krütani kräke, ye abko nun juanba niere kwe ni jökräye. <sup>43</sup> Jesu ne mdentä abko nitre Ngöbö kukwei niekä kirakira käkwe blitarera angwane, niebare krörö kwetre: Nire nire ngite kukwe käme nuenbtä abko käkwe tödekadre Jesubti angwane, Ngöböökwe niara ngite diandikä btä Jesu köböire, niebare kwetre, Pedro namani nire.

### *Ngöbö Üai Deme nükani kena nitre ñakare israelitarebtä*

<sup>44</sup> Pedro nämane blite kore angwane, batibe nitre Pedro kukwe nuaka nuaka, yebtä Ngöbö Üai Deme nükani se kwrere. <sup>45</sup> Nitre ñakare israelitare, ie Ngöböökwe ja Üai Deme biani arato, yebtä abko nitre israelita tödekaka Jesubti nükani siba Pedro mukore, ye ñan töi namani krütare btätre, <sup>46</sup> ñiobtä ñan angwane ni jökrä namani blite kukwe jenenanbti btä ja tötitikani ñakare kwetre amne namanintre Ngöbö käikitekä jökrä okwäbti. Yebtä abko, Ngöbö Üai Deme nükani btätre gani kwetre. <sup>47</sup> Angwane Pedrokwe niebare mda:

Nun israelita, ie Ngöböökwe ja Üai Deme biani, ye kwrere Ngöböökwe bini arato nitre neye, aisetekwetare ngökadre ñöte Jesu käbti ruen tie, niebare Pedrokwe.

<sup>48</sup> Bti Cornelio amne mräkä kwekwe amne kukwe muko kwekwe btä Ngöbö Üai Deme nükani, ye Pedrokwe ngökamna jökrä ñöte Jesukristo käbti ni mda mdaye. Erere ngökanintre ñöte kwetre, bti Pedro rabadre nüne köböbu, köbömä mda bentre abko ribebare kwetre Pedroye.

## 11

### *Dre nakaninkä Cornelio känti abko Pedrokwe niebare*

<sup>1</sup> Pedro ngämi nüketa Jerusalén, ye känenkri nitre ñakare israelita käkwe Ngöbö kukwei kuin Jesubtä kani ngäbti arato, ye abko gani nitre Jesu kukwei ngwianka mda mdakwe amne nitre tödekaka Jesubti nämane nüne kä Judeate ye käkwe gani arato.

<sup>2</sup> Abtä Pedro nikani nebata Jerusalén angwane, nitre israelita ruäre tödekaka Jesubti nünanka kä Judeate namani ñäke Pedro rüere, <sup>3</sup> käkwe niebare krörö Pedroye:

Nitre ñakare israelitare abko gwiriete ni israelita ñan janandre basare jire chi nita niere. ¡Se ñiobtä abko ma jananbare mröre ketetibe nitre se ben gware! niebare kwetre ie.

<sup>4</sup> Abtä kukwe nakaninkä ño ja täritäri, ye erere Pedro nikani niere jökrä abko krörö:

<sup>5</sup> Ti näma juta Jopete blite Ngöböbe angwane, jändrän dän kwata kri mäkäninte kwärirkwäri körä ketabkä btä, kwrere jire nämane kä käinbti, rababa kite nüke ti näma ye känti abko tikwe tuaba köböre kwrere. <sup>6</sup> Akwa jändrän yete abko dre nämane ti tö rababa tuai, käkwe mikaba ñäräre kuin angwane, jändrän ñakare dbe kwetadre nikwe aibe näma te abko krörö: Jändrän ngwarbe ngoto kräbkä kräbkä bätäkä ngwarbe näma te. Erere arato, jändrän ngwarbe känsenta bätäkä ngwarbe näma te. Mdakäre abko, jändrän yorekä tementa amne nukwä bätäkä ngwarbe näma te arato, btä ti okwä rababa.

<sup>7</sup> Ye btäräbe Ngöbö kukwei jaraba krörö tie: Pedro, jändrän nibi tuen mae yete, ye nän kämike kwetadre jae, nieba kwe tie. <sup>8</sup> Abtä tikwe nieba krörö ie: Ti Dänkien, jändrän mden mden ñan dbe kwetadre makwe niebare kira, ye erere tikwe ñan kwetabare jire chi,

aisete tikwe ñan kwetadre, tikwe nieba ie. <sup>9</sup> Angwane Ngöbö kä käinbti käkwe niebata krörö mda tie: Jändräñ mikani dbe Ngöbökwe, ye dbe ñakare makwe ñan tö ngwian niere jire chi, nieba kwe tie. <sup>10</sup> Ngöbökwe ñäkäba bämä jire kore tie. Yebti dän kwata kri ye järikabata kä käinbti ti okwäbti.

<sup>11</sup> Ye btäräbe, ni Cesareabo juani nimä ti tuen, ye rababara mate jukwebtä ti känti. <sup>12</sup> Angwane tikwe ñan kä jürä ngwiandre niken bentre, Ngöbö Üai Deme käkwe nieba tie. Ye erere ti rikaba bentre amne, ti mräkä ni ti tä tibe nete noko rikaba siba tibe. Nun rikaba nebe juta Cesareate angwane, ni näma iti yete känti nun rikaba jökrä nebe gwi. <sup>13</sup> Angwane ni ye käkwe angele tuani ño köböre kwrere abko rikaba niere nunye, käkwe nieba krörö: Angele rükaba nünankä nete, käkwe nieba krörö tie: Ni kädianta Simón akwa, Pedro nieta ie arato abko tä juta Jopete, ye ni mda juen kärere jötrö nüke ja känti nete, <sup>14</sup> ñobtä ñan angwane Ngöbökwe ma dianditari ño ma mräkäbe gware abko niarakwe niedi mae, abkokäre makwe kärä, niebare angelekwe ie, nieba kwe nunye. <sup>15</sup> Angwane kukwe kuin Jesukristobtä ye ti rikaba niere krire ietre angwane, btäräbe Ngöbö Üai Deme rükaba ño kena nibtä, ye kwrere rükaba btätre arato ti okwäbti se kwrere. <sup>16</sup> Ye ngwane ni Dänkien Jesu käkwe blitaba nibe abko rükaba töreta tie krörö: Juankwe ni ngökaní ño aibe te akwa, mun abko ie Ngöbökwe ja Üai Deme biandi nünakäre munbtä, niebare kore ni Dänkienkwe nie. <sup>17</sup> Ye mdenbtä abko, ni israelita käkwe tödekani ni Dänkien Jesukristobti abko ie Ngöbökwe ja Üai Deme biani, ye kwrere biani kwe nitre ñakare israelitareye arato, ¿se tikwe ja mikadre ño Ngöbö rüere? ti rababa nütüre, niebare Pedrokwe.

<sup>18</sup> Yebtä abko, ja mräkätre Jerusalénbo namani ñäke Pedro rüere ye käkwe Pedro kukwei nuani ünän angwane, namanintre kwekbe kada ketani jökrä amne, nikanintre Ngöbö käkitekä mda, käkwe niebare:

¡Nitre ñakare israelitare rabadre nüne kärekäre Ngöböbe, abkokäre Ngöbö tä kä bien ietre kukwe käme kitakäre temen amne tödekakäre Jesubti ñan ñan! namanintre niere.

#### *Nitre ñakare israelitare kwati käkwe tödekani Jesubti juta Antioquíate*

<sup>19</sup> Esteban kämikani, yebti nitre israelita tödekaka Jesubti nünanka Jerusalén abko ni israelita mda mda namani mike ja tare nike krübäte tödekabtä Jesubti. Abtä ngitianí jökrä kwäräkwärä. Ruäre nikani Fenicia, ruäre abko nikani Chipre amne ruäre nikani juta Antioquia. Nikanintre ye käntikänti nikani kukwe kuin Jesubtä ye niere mräkätre israelitare akwa, ni ñakare israelitare abko ie niebare ñakare kwetre. <sup>20</sup> Akwa nitre nünanka Chipre amne juta Cirenete tödekaka Jesubti arato abko nikani ruäre juta Antioquia, ye abko käkwe kukwe kuin ni Dänkien Jesubtä niebare nitre ñakare israelitareye arato. <sup>21</sup> Angwane ni Dänkien Jesu namani die mike kri, ye mdenbtä abko ni kwati käkwe ja töi kwitaninta amne namanintre tödeke ni Dänkienbti. <sup>22</sup> Ye abko nitre gätäkä Jesu käbti nämane Jerusalén käkwe gani angwane, Bernabé juani tuakäre kwetre Antioquia mda. <sup>23</sup> Ye erere bkänä, Bernabé nikani, namani juta Antioquíate angwane, nitre tödekaka Jesubti nünanka Antioquíate abko kräke Ngöbökwe ja moto mikani kuin namani tuen Bernabéye. Ye abko käi namani nuäre kri btä, käkwe ja töi mikamna kwatibe janknu Jesubtä nitre tödekaka btin Jesubti yeye niaratre die mikakäre. <sup>24</sup> Bernabé ne abko ni moto kuin amne, Ngöbö Üai Deme nämane täte btä amne nämane tödeke kwatibe Jesubti arato. Ne aiseñe niara nämane kukwe kuin Jesubtä niere angwane, ni kwati namani tödeke ni Dänkienbti mda.

<sup>25</sup> Abti Bernabé nikani juta Tarsote mda Saulo känene. <sup>26</sup> Saulo kwani ie angwane, nikani ngwena sribire jabe juta Antioquíate. Ye känti gätäbare kä kwati täte kwetre nitre tödekaka Jesubti ben, niaratre die mikakäre amne Ngöbö Kukwei diribare kwetre ni kwatiye arato. Juta Antioquia ne mden känti abko nitre tödekaka Jesubti kädiani Kristiano kena.

<sup>27</sup> Kä ye ngwane abko, nitre Ngöbö kukwei niekä nämane Jerusalén abko nikani ruäre nebe juta Antioquíate. <sup>28</sup> Nitre ye abko, iti kädian nämane Agabo. Bati nämane gätäbtä angwane, namani nünankä krö amne, Ngöbö Üai Deme köböire niebare krörö kwe:

Nitre romanobo tä gobrane, ye käntikänti mrö nikadi kri krübäte kä ngrabare temen, niebare kwe.

Ye erere bkänä, emperador Claudio nämane gobrane angwane abko mrö nika namani krübäte kä ngrabare temen. <sup>29</sup> Abtä nitre tödekaka Jesubti nämane juta Antioquíate ye käkwe ja töi mikani ngwian juen ja mräkätre tödekaka Jesubti nünanka kä Judeate ye die mikakäre. Ye erere ni itire itire, ie ja namani nüke töre ngwian bien nuäi, ye erere namanintre bien. <sup>30</sup> Ngwian ükaninkrö kore ja mräkätre die mikakäre, ye abko Bernabé amne Saulo nikani ngwena biandre nitre tödekaka Jesubti jie ngwianka ye ye dräidre ni jökräbti.

## 12

### *Santiago kämikani amne Pedro abko kitani ngite*

<sup>1</sup> Kä ye ngwane abko, nitre gätäkä Jesu käbti Jerusalén abko ruäre jrei Herodes Agripa namani kite ngite kä teri mikakäre ja tare nike tödekabtä Jesubti. <sup>2</sup> Angwane Juan etba Santiago abko jrei Herodekwe kämikamna ngitrabti, ye erere Santiago kämikani. <sup>3</sup> Santiago kämikani kore, ye abko namani dbe nitre israelitakrä, namani tuen jrei Herodeye, aiseete Pedro kamna ngite kwe arato. Pedro kani ngite ye ngwane abko bieta kädianta Pascua näire ban te lebadura ñakare kweta nämane, ye näire Pedro kani ngite. <sup>4</sup> Pedro kani ngite angwane, jrei Herodekwe kitamna ngite kä teri mda. Ye känti guardia mikani nibkä nibkä, bäbkä ja täritäri Pedro ngibiarebti. Yebti bieta Pascua rikadre ta angwane, Pedro mikadre ni jökrä ngwärekri kukwe ükatekäre btä amne kämikakäre, Herodes namani nütüre. <sup>5</sup> Ne aiseete Pedro nämane ngite kä teri angwane, guardia namani ngibiare kuin ñan gitiadre abkokäre. Akwa nitre gätäkä Jesu käbti abko namani jadüke ñakare, ja di kärere Ngöböye Pedrokrä.

### *Angele käkwe Pedro tikaninteta*

<sup>6</sup> Herodekwe Pedro mikadre ni jökrä ngwärekri kukwe ükadrete kämikakäre, ye känenkri deo angwane, kadena nämane kitani krobu niara küdebtä amne kadena arabe nämane mäkäninte guardia nibubtä. Guardia nibu ye ngätäite niara nämane kibien kuin temen angwane, jukwebtä abko guardia nämane nibu arato jukwe ngibiarebti. <sup>7</sup> Angwane batibe angele ni Dänkienkwe nükani gwi, Pedro nämane ye känti angwane, käträ ngitianinkä ngwen jökrä gwita temen, Pedro nämane ngite ye känti. Angwane angele ye käkwe Pedro nuaninbtä kronabtä, käkwe ganinkrö, bti niebare kwe ie:

Näin jötrö krö, niebare kwe ie.

Ye btäräbe, kadena nämane kitani Pedro küdebtä ye ngitianintbe jökrä Pedro küdebtä se kwrere. <sup>8</sup> Angwane angele ye käkwe niebare mda Pedroye:

Ja ngwä kite jötrö amne sabato kite jötrö ja ngotobtä, niebare kwe ie.

Ye erere Pedrokwe nuenbare. Angwane angelekwe niebareta mda ie:

Dän ngetbo tä mda makwe, ye kita jabtä arato, bti ma jata ti jiebti, niebare kwe ie.

<sup>9</sup> Ye erere bkänä, Pedro nikani angele jiebti. Akwa Pedro nämane näin era metre angelebe ya abko ñan namani nüke gare ie, ñobtä ñan angwane nämane angele tuen köböre namani ruen ie. <sup>10</sup> Akwa guardia nämane käne jukwebtä bäre nikani ta, bti guardia mda nämane jukwe mdara jire känti, ye bäre nikani ta, bti jukwe jierore nämane mikani jite ji ken, ye känti Pedro namani angelebe angwane, jukwe ye ngitianinbe au angwane, jukwe namani tikani, yete ta Pedro nikani angelebe. Yebti nikani bä mente se kwrere angwane, angelekwe Pedro mikaninte kaibe.

<sup>11</sup> Angwane batibe angele nükani era metre bkänä gani Pedrokwe angwane, niebare krörö kwe:

Herodes amne nitre israelita ji dokwäte tö kukwe nuein käme tibtä abko ngäniene ti Dänkienkwe angele juni ti tikete, ne abko era metre bkänä ñan ñan, Pedro namani niere jae au.

<sup>12</sup> Pedro tikaninteta, ye gani kwe angwane, nikani nebe María juete. María ye abko ni kädian nämane Juan amne arabe kädian nämane Marcos abkomeye. Ye känti Pedro

nikani. Kä ye känti abko, ni nämane ja ükekrö kwati blite Ngöböbe Pedrokrä. <sup>13</sup> Pedro nikani nebe ki jukweibtä, käkwe ñäkäbare gwäkäre amne, nire nämane ñäke jukwebtä abko meri sribikä bati kädian nämane Rode nikani tuen. <sup>14</sup> Angwane Pedro kukwe nükani gare ie, ye abko käi namani nuäre krübäte btä, aisetet jukwe tikadre kwe Pedroye näre abko nikaninta betekäta jirekäbe nementa gwi, käkwe niebare:

¡Pedro tä jukwebtä! niebare kwe.

<sup>15</sup> Abtä nitre nämane gwi ye käkwe niebare mda ie:

¡Ma ngwarbe kä kwitekä jabti nete! niebare kwe ie.

Akwa ja nämane kukwe era niere, meri ye namani niere ietre. Abtä niebare krörö mda kwetre:

Angele Pedro ngibiaka aibe tä näin. Ye ñan niara ara jire tä näin, namanintre niere.

<sup>16</sup> Akwa Pedro abko namani ñäke janknu jukwebtä amne, ni mda mda nikani, käkwe jukwe tikani, bti Pedro nämane yete bkänä, btä okwä namani angwane, töi ñan namanintre krütare btä. <sup>17</sup> Akwa niaratre käkwe kada ketadre niebare Pedrokwe kisebti ietre, ye erere namanintre kwekbe jökrä angwane, ni Dänkienkwe tikaninteta ño abko niebare kwe. Yebti niebare krörö kwe:

Kukwe nakaka ño tibtä, tikwe nini munye, ye erere munkwe nie jökrä Santiagoye amne ja mräkä tödekaka Jesubti mda mdaye arato, niebare kwe.

Yebti kä mikaninkä kwe yete amne nikani kä mdabti ngitie Herodes ngäniene.

<sup>18</sup> Yebti kä jatani ngwen dekä angwane, kä namani nokre jabtä nitre rükäkwe, ñobtä ñan angwane Pedro jrainbare ñan namani nüke gare ietre, aisetet namanintre ja mike ngite jirekäbe kwärikwäri. <sup>19</sup> Angwane Herodekwe Pedro känäntarimna ietre, akwa ñan kwanintarita ietre, abtä niaratre mikani ngite mda Herodekwe, bti kämikamna kwe.

### *Herodes krütani*

Yebti Herodes nämane kä Judeate, abti nikani neme juta Cesareate mda. <sup>20</sup> Herodes ngämi niken juta Cesareate, känenkri niara namani romon nitre nünanka juta Tirote kräke amne nitre nünanka juta Sidónte kräke, aisetet namani ja kwete bentre. Abtä nitre ütiäte ütiäte nünanka juta kubute ye käkwe ja töi diani rikakäre gware Herodes känti juta Cesareate kukwe ükete ben, ñobtä ñan angwane nitre Tirobo amne nitre Sidónbo nämane mrö kökö jae kä Herodekwe känti, aisetet tö namanintre kukwe ükete. Ye erere bkänä, ni sribikä ütiäte nämane sribire iti Herodekrä abko kädian nämane Blasto abko ben nitre Tirobo amne Sidónbo käkwe blitabare, ye köböire abko Herodes rabadre ja mäketa jäme bentre, abkokäre blitabare kwetre Blastobe. <sup>21</sup> Yebtä abko, Herodekwe gätä köböi kitani mda kräke. Ye erere gätä köböi nükani angwane, Herodekwe dän bäri nuäre, ütiäte kri kitani jabtä ja jreire bá mikakrä, bti namani täkänintbe ja täkrä gobrankräbti angwane, kukwe niebare kwe ietre. <sup>22</sup> Angwane Herodes kukwe nuaka nuaka ye nikani ñäke jume ja dibti niara moto mikakäre jäme jakrä, kä namani niere krörö:

Ni tä blite se ñan ni ngwarbe akwa, ngöbö ara nü iti, käta blite se, namanintre niere kore ie.

<sup>23</sup> Ye btäräbe angele ni Dänkienkwe käkwe Herodes mikani bren, ñobtä ñan angwane Herodes mikani ütiäte ngöbö kwrere jae ni mda mdakwe, ye namanidbe Herodekrä amne Ngöbö era metre abko mikani ütiäte ñakare kwe. Yebtä angelekwe mikani bren angwane, ngin aibe käkwe Herodes kitaninkä ja tubtä. <sup>24</sup> Niara krütani kore, ye täbti Ngöbö Kukwei nikani niren bäri mda kä ye käntita temen amne, Ngöbö Kukwei diri namani kä jökräbti arato kä ye käntita.

<sup>25</sup> Abti Bernabé amne Saulo käkwe sribibare ünän jökrä Jerusalén, bti nikaninta juta Antioquiate. Nikaninta angwane, nikani Juan ngwena jabe. Juan ye mden abko kädian nämane Marcos arato abko jänikani kwetre jabe.

<sup>1</sup> Nitre gätäkä Jesu kähti nämane juta Antioquíate, ye ngätäite nitre Ngöbö kukwei niekä nämanena amne nitre Ngöbö Kukwei dirikä nämanena abko kädian nämane krörökrörö: Bernabé, Simón (Simón ne mden abko kädian nämane Chen arato), Lucio juta Cirenebo amne Manaen. Manaen ne abko rirabare gware jrei Herodes Antipabe. (Jrei Herodes Antipas ne abko kákwe gobranbare Galilea). Angwane Saulo nämane arato. <sup>2</sup> Batira jire niaratre nämane ja ükaninkrö Ngöbö käikitakakäre amne ja bainkäre Ngöbökrä angwane, batibe Ngöbö Üai Deme kákwe niebare krörö ietre:

Bernabé amne Saulo tikwe käräbarera sribi nuene jakrä, ye kräke niaratre denkä jenena munkwe juankäre sribi ye nuene, niebare Ngöbö Üai Demekwe.

<sup>3</sup> Angwane blitabare ünän kwetre Ngöböbe amne ja bainbare ünän kwetre Ngöbökrä, bti kise mikani kwetre Bernabébtí amne Saulobti ja di biankäre ietre, bti juani kwetre mda.

#### *Bernabé btä Saulo kákwe blitabare Jesubtä Chiprete*

<sup>4</sup> Abti Ngöbö Üai Deme kákwe Bernabé amne Saulo juani kore angwane, nikanintre nebe mren köräbti juta Seleucia. Ye känti nakwani rute, bti nikani kä butubti Chipre. <sup>5</sup> Ye ngwane abko Juan nikani siba Bernabébe amne Saulobe niaratre die mikakäre. Juan ne mden abko kädian nämane Marcos arato. Nikanintre nebe mren köräbti juta Salamine, Chipre känti angwane, sinagoga nämane Salamina, ye käntikänti nikanintre blite Ngöbö kukwei kuin Jesubtä.

<sup>6</sup> Niaratre kákwe dikakabare jökrä kä butubti Chipre Ngöbö kukwei kuin Jesubtä niekäre. Abti nikani nebe juta Pafote mda. Kä ye känti abko ni israelita sukiare nämane iti. Ni ye abko ni ni ngökaka, akwa nämane ja mike ni Ngöbö kukwei niekä kwrere. Ni ye abko kädian nämane Bar-Jesu abko ben Bernabé amne Saulo namani ngätäi. <sup>7</sup> Chipre yete ni iti kädian nämane Sergio Paulo nämane gobrane emperador romano kräke. Amne Sergio Paulo abko ben ni kwrare ye nämane ja gete. Gobrane abko töbtä krübäte abko tö namani Ngöbö kukwei nuai, kákwe Bernabé amne Saulo käräbare blite jabe Ngöbö kukweibtä. Erere nükanintre känti. <sup>8</sup> Akwa ni kwrare ne arabe kädian nämane Elimas arato abko ñan tö namani gobrane Sergio tuai tödeke Ngöböbtí, kä namani Ngöbö Kukwei mikamna ütiäte ñakare kisere gobrane Sergioye. <sup>9</sup> Angwane Saulo abko arabe kädian nämane Pablo arato btä Ngöbö Üai Deme namani täte, kákwe okwä ketaninte kwekbe ni kwrare yebtä, <sup>10</sup> kákwe niebare krörö ie:

Ma ni ngökö. Ma töi käme. Ma diablu kwrere amne käre mata ja mike jäandrän kuinkuin rüere. Mata rüre ni Dänkien kukwei kuin era metre rüere, ye abko ñan rabadre bare jire chi mae, mata nütüre aisetet, <sup>11</sup> mtare ni Dänkien Jesu kákwe ma mikadi ja ngie nuen krörö: Ni Dänkien bike ma okwä mike kä ikote, aisetet kä ñan rabadi tuen mae, ne ben makwe nünandi bá raire kore. Abko kore se, niebare Pablokwe Elimaye.

Ye btäräbe, kä ngidianinte iko Elimas okwäte amne kä namani iko jökrä okwäte se kwrere. Angwane ni mdakwe kadre küdebtí rikadre ngwena, ie niara tö namani, ñobtä ñan angwane kä namani tuen ñakare ie aisetet. <sup>12</sup> Elimas namani kä ikote kore gobrane okwäbtä, yebtä abko kukwe kuin ni Dänkien Jesubtä diri namani, yebtä gobrane ñan töi namani krütare, kákwe Ngöbö kukwei Jesubtä mikani era abko kukwe nakaninkä kore Bernabé amne Pablobtä kä butubti Chiprete.

#### *Saulo btä Bernabé kákwe kukwe kuin Jesubtä niebare juta Antioquía kä Pisidiate*

<sup>13</sup> Nebti Pablo amne kukwe muko mda mda nämane näin ben abko nakwani rute mren köräbti juta Pafote mda, bti nikani juta Pergete kä Panfiliate. Ye känti Juan Marcos kákwe kä mikaninkä btätre, kä nikaninta ja jiebti nebata Jerusalén. <sup>14</sup> Pablo nämane kukwe muko mda mdabe juta Pergete, bti nikani ta angwane, nikani nebe juta Antioquía kä Pisidiate mda. Ye känti köbö jadükakrä nitre israelitakwe nükani angwane, nikanintre sinagigate, känti nämane täkänintbe. <sup>15</sup> Abti Kukwe Biani Ngöböökwe Moiséye amne tärä tikani nitre Ngöbö kukwei niekäkwe, yebtä ñäkäbare ünän jökrä angwane, nitre ji dokwäte sinagigate kákwe niebare krörö ietre:

Ja mräkätre, kukwe tärä munkwe niedre ja mräkätre die mikakrä ne ngwane, kä tärä blitakrä munye mtare, niebare kwetre.

<sup>16</sup> Angwane Pablo namani nünaninkä krö amne, ni jökrä kákwe niara kukwei nuadre abko niebare kisebti kwe ietre, bti niebare krörö kwe ietre:

Mun israelita amne mun ñakare israelitare tä nete arato käta Ngöbö mike ütiäte jae, olo ketete ti kukweiye munkwe. <sup>17</sup> Ngöbö ni israelitakwe kákwe ni mräkä kirakira dianinkä jen jakrä, bti ni mräkä kirakira nämane nüne ni menteni kwrere kä jenenante Egipto abko mikani niren kwati kwe. Abti ja di kribti Ngöbö ara jire kákwe ni mräkä dianinkäta kä Egiptote mento. <sup>18</sup> Abti ni mräkä kirakira kákwe nünabare blo kä gre ketebu jire kä kaibete, akwa Ngöbö moto namani romon ñakare jötrö kräke. <sup>19</sup> Angwane ni mräkä kirakira, ye köböire Ngöböökwe juta keta kükü jire juani ngwarbe Canaán, bti kä ye biani kwe ni mräkä kirakiraye jakrä. <sup>20</sup> Niaratre nikani nüne Egípto abti nükaninta nüne Canaán ye abko bäsí kä siento kräbkä bti kä gre ketebubti kwä jäätä (450) nikani ta, niebare Pablokwe.

Pablokwe niebareta mda:

Yebti Ngöböökwe nitre rükä jie ngwianka mikani gobrane mda ni mräkä kirakira ngätäite. Ne abko namani kore nebebe Ngöbö kukwei niekä Samuel näire. <sup>21</sup> Yebti ni mräkä kirakira kákwe jrei käräbare Samueliye mda abko rabadre gobrane niaratre ngätäite abkokäre. Ye erere bkänä, Ngöböökwe Saúl tukwe mikani jreire kä gre ketebu jire niaratre ngätäite. Saúl ne abko Cis ngobo. Cis ne abko jatani Benjamín mräkäkri. <sup>22</sup> Abti Ngöböökwe Saúl dianinkä mento angwane, David tukwe mikani jreire mda Saúl täte kwe amne, Ngöböökwe niebare krörö Davibtä: Isaí ngobo David ne abko kákwe nünandre ño, ie ti tö, erere tä nüne amne, dre nuendre kwe, ie ti tö, erere tä biare nuene arato, niebare Ngöböökwe btä. <sup>23</sup> David ne mden mräkäkri ni Diantarikä iti kädianta Jesu jatani ni israelita kräke. Jesu ne mden abko Ngöböökwe köböi mikani nitre israelita diantarikäre, <sup>24</sup> aisetet Jesu ngämi sribi kömiketbe, känenkri ni kä Juan jatani. Angwane nitre israelita kákwe kukwe kämekäme kitadre jire jökrä temen, bti tödekadre Ngöböbiti, bti ja ngökadre ñöte kwetre abko Juan namani nire ietre. <sup>25</sup> Yebti kä jatani neme braibe nünankrä Juanye angwane, Juankwe niebare krörö: Ti Ni Dianinkä Ngöböökwe, munta nütüre tibtä akwa, ye ñakare kore. Akwa ni jatadi iti ti jiebti abko bärí ütiäte tikrä, aisetet ja nüke töre ñakare tie sandalia tikete niara ngotobtä ye abko Ni Dianinkä Ngöböökwe ara, niebare Juankwe.

<sup>26</sup> Ja mräkätre därebare ja täritäri Abrahamkri amne mun ñakare israelitare käta Ngöbö mike ütiäte jae, Ngöbö kukwei kuin Jesubtä ne abko Ngöböökwe juani nikrä.

<sup>27</sup> Jesu abko ni Dianinkä juani Ngöböökwe nükani gare ñakare nitre nünanka Jerusalénye amne nitre ji dokwáte Jerusalénbo yeye. Erere arato, nitre Ngöbö kukwei niekä kákwe kukwe niebare Ni Dianinkä Ngöböökwebtä btä ñäkäta niken köbö jadükakrä näire bämän kratirekratire, aisetet rükadre gare ietre. Akwa ye abko nükani gare ñakare ietre arato, aisetet Jesu kitani ngite müre ketadre kwetre angwane, kukwe rakadrekä ño Ni Dianinkä Ngöböökwebtä nämane tikani, btä ñäkäta niken bämän kratirekratire ye abko niaratre ara jire kákwe mikani neme bare jökrä. <sup>28</sup> Kukwe kwani ñakare ietre Jesu kitakrä ngite müre ketadre akwa, Pilatokwe Jesu müre ketamna abko namani ribere Pilatoye. <sup>29</sup> Erere bkänä, Pilatokwe Jesu müre ketamna angwane, Jesu krütani ye btäräbe Ngöbö Kukwei nämane tikani ño Ni Dianinkä Ngöböökwebtä, ye erere namani bare. Jesu krütani angwane, dianinta krusobtä timon, bti doboi mikani. <sup>30</sup> Akwa Ngöböökwe niara mikaninta nire. <sup>31</sup> Yebti nitre kákwe dikakabare Jesube kä Galileate nebebe juta Jerusalén, ye ie Jesukwe ja mikaninta tuadre bäre bäre, aisetet niaratre Jesu tuakatuaka ye mden abko tätre kukwe era erere niekä ni mräkä israelitaye mtare. <sup>32</sup> Ne mden kisete, kukwe kuin Jesubtä nunta näin nire munye abko krörö: Ngöböökwe kukwe ükaninte jabe kwärikwäri ni mräkä kirakirabe, <sup>33</sup> nita nüne mtare ne abko ni mräkä kirakira bkün ja täritäri amne, Ngöböökwe ja kukwei mikani täte nibe. Ngöböökwe Jesu mikaninta nire angwane, kukwe ükaninte kwe, ye namani bare jökrä, ye mden tä tikani Salmos krobubtä krörö:

Ma abko ti Odei jen tikwe. Ti ma rün makwe mtare,  
abko tä tikani kore Salmos krobubtä.

*Salmos 2.7*

<sup>34</sup> Ngöbökwe Jesu mikadita nire ne abko niebarera kwe, aise te Jesu ñan ngwäkä gütadrekä, ye mden abko tikamna täräbtä kwe:

Tikwe ja kukwei kuin deme biani ja die biánkäre Daviye, ye abko tikwe mikadi tät e jökrä munkrä,  
abko tä tikani Ngöbö kukweibtä.

<sup>35</sup> Ne mden kisete tärä mdara jire btä tä tikani krörö:  
Ni Deme makwe, ye makwe ñan ngwäkä tuadimetre ngütekä,  
abko tikamna kore täräbtä Daviye Ngöbökwe.

*Salmos 16.10*

<sup>36</sup> Akwa Davikwe kukwe ye tikani angwane, ñan tikani jabtä kwe gare kuin nie, ñobtä ñan angwane Davikwe sribidre ño niebare Ngöbökwe ie, ye erere sribibare kwe. Yebti niara krütani angwane, doboi mikani mräkä känkäne ngätäite amne niara ngwäkä ngütaninkä jökrä, aise te kukwe ye ñan nämane tikani Davibtä gare kuin nie. <sup>37</sup> Akwa Jesu mikantia nire Ngöbökwe ye abko ngwäkä ngütaninkä ñakare, <sup>38</sup> aise te Jesu aibe köböire Ngöböta ni ngite kukwe käme nuenbtä denkä mento nibtä abko nun tö mikai gare mtare munye ja mräkätre. <sup>39</sup> Kukwe Biani Ngöbökwe Moiséy, ye mikabtä tät e Ngöbö ñan namani mun ngite denkä munbtä amne, mun ñan namani tuen kuin metre Ngöböye. Akwa ni jökrä kákwe tödekadre Jesubti abko ñakare ngite mda ja ngwäre kri abko Ngöbökwe niedre btä abko rabadre gare munye, abkokäre nunta blite Jesubtä munbe, <sup>40</sup> ñobtä ñan angwane nitre Ngöbö kukwei niekä kákwe tärä tikani kira abko erere ñan rakadrekä munbtä, abkokäre munkwe mokredre jabti, kukwe tikani krörö ne ngäniene:

<sup>41</sup> Mun Ngöbö Kukwei mikaka ngwarbe jae ye kákwe sribi tikwe mika ñäräre kuin, bti munkwe töbika kuin btä arato, abti mun krüta mrä, ñobtä ñan angwane mun näire tikwe jändrän nuendi, ye abko ni mda mdakwe niedi munye akwa, ñan mikadi era munkwe,  
abko tä tikani kore. Abko kore se, niebare Pablokwe.

*Habacuc 1.5*

<sup>42</sup> Bti Pablo amne Bernabé jatani nikenta ju bäre angwane, jatadre bliteta kukwe nebtä bämän mdabtä köbö jadükakräte abko ni jökrä namani ribere ietre. <sup>43</sup> Yebti gätä ngidianinkä angwane, nitre israelita kwati amne nitre ñakare israelitare kwati kákwe ja mikani ketetibe nitre israelitabe Ngöbö mikakäre tät e, kákwe tödekan i Jesubti abko namani nekete jökrä Pablobtä amne Bernabébtä. Angwane niaratre abko kákwe ja mräkätre tödeka krile Jesubti, ye kitani bäre bäre nünenkä dite Jesubtä, ñobtä ñan angwane Ngöbökwe ja moto mikani kuin niaratrekrä, yebtä nünandrekä dite kwetre, niebare Pablokwe amne Bernabékwe ietre.

<sup>44</sup> Yebti köbö jadükakrä bämän mdabtä nükani angwane, bäsí ni jökrä nünanka kä ye känti kákwe ja ükaninkrö Ngöbö kukwei kuin ni Dänkienbtä kukwe nuakäre. <sup>45</sup> Akwa ni kwati ñakare israelitare nükani ja ükekrö namani tuen nitre israelitaye angwane, niaratre namani mokrere krübäte, aise te Pablo nämane kukwe dirire, ye rüere nikanintre ñäke bari diänbe Pablo rüere. <sup>46</sup> Angwane Pablo amne Bernabé, btä kä jürä namani ñakare blitakäre, kákwe niebare krörö ietre:

Mun israelita, ie nunkwe Ngöbö kukwei kuin Jesubtä mikadre gare käne, ye abko Ngöbökwe mikani nun kisete kore. Akwa mutta trö kwite Ngöbö kukweiy, abtä munkwe nünandré kärekäre Ngöböbe, akwa ja ruen ütiäte ñakare munye nüne kärekäre Ngöböbe, aise te nitre ñakare israelitare abko ie nun näin Ngöbö kukwei niere jirekäbe mda, <sup>47</sup> ñobtä ñan angwane Ngöbökwe nun juani sribi ne nuene angwane, nunkwe sribidre krörö nieba kwe nunye:

Nitre ñakare israelitare tät nüne kä jökräbti temen abko rabadre dianintari jökrä, abkokäre tikwe ma mikani ñotra kwrere niaratrekrä, niebare kore Ngöbökwe nunye, niebare Pablokwe amne Bernabékwe nitre israelitaye.

*Isaías 49.6*

<sup>48</sup> Pablo amne Bernabé kákwe blitabare kore, yebtä abko nitre ñakare israelitare btä kä namani nuäre amne Ngöbö kukwei mikani ütiäte kwetre. Angwane nire mikani

nünakäre kärekäre jabe Ngöbökw, ye erere kákwe tödekaní Jesubti. <sup>49</sup> Yebti Ngöbö kukwei kuin Jesubtä ye kädriebare jökrä kä ngrabare temen juta Antioquía Pisidia bäre temen. <sup>50</sup> Akwa kä ye känti abko, meri ruäre nämane Ngöbö mike ütiäte jae nitre israelitabe abko ben nitre israelita ütiäte ütiäte kákwe blitabare Pablo amne Bernabé rüere. Erere arato, nitre ji dokwáte nünanka kä ye känti abko ben blitabare kwetre arato. Angwane nitre ye abko kákwe ja töi mikani rüre Pablo rüere amne Bernabé rüere, niaratre juantarikäre kä ye bäre mento. <sup>51</sup> Abtä Pablo amne Bernabé kákwe dobro mnü ja ngotobtängrükaninte nitre israelita ye ngwärekri, ñobtä ñan angwane niaratre nämane kukwe nuene blo abko ñan namanidbe Pablokrä amne Bernabékrä abko bää mikani kwetre ie, bti nikanintre juta Iconio mda. <sup>52</sup> Angwane nitre kákwe kukwe kuin Jesubtä kani ngäbti abko btätre Ngöbö Üai Deme namani täte amne kä namani bări nuäre btätre arato.

## 14

### *Pablo btä Bernabé kákwe blitabare Jesubtä juta Iconiote*

<sup>1</sup> Abti Pablo amne Bernabé nikani nebe juta Iconiote angwane, köbö jadükakrä näire nikanintre sinagoga yete, känti blitabare nuäre kwetre kukwe kuin Jesukwe yebtä. Abtä ni israelita kwati kákwe tödekaní Jesubti. Erere arato, ni ñakare israelitare kwati kákwe tödekaní bti. <sup>2</sup> Akwa nitre israelita ñan tö namani tödekai bti abko kákwe nitre ñakare israelitare moto mikani romon ja mräkätre tödekaka Jesubti rüere. <sup>3</sup> Akwa Pablo amne Bernabé namani núne raire Iconiote angwane, ñan namani rüe jürä ngwen jadtä akwa, namanintre kukwe kuin Jesubtä niere janknu. Angwane ni Dänkien namani ni tarere ja moto kuinbti namanintre niere ni jökräye angwane, kukwe niebare kwetre ye rabadre era ni mda mdakrä, abkokäre ni Dänkien namani niaratre die mike, kä namani sribi kri ñan tuabare nuene niaratre köböire. <sup>4</sup> Akwa ye ngwane abko nitre nünanka juta Iconiote abko kákwe ja ñäkänintbe mda, aisetni ruäre namani nekete nitre israelita tödekaka ñakare Jesubti yekri amne ni ruäre abko namani nekete Jesu kukwei ngwianakri. <sup>5</sup> Abtä nitre israelita tödekaka ñakare Jesubti amne nitre ñakare israelitare kákwe ja töi mikani kwatibe nitre gobrankabe Pablo amne Bernabé mikakäre ja tare nike amne kämikakäre jätbi. <sup>6</sup> Akwa Pablo amne Bernabé kämika brai nämane, ye gani kwetre angwane ngitiani juta Listrate amne Derbete. Juta ye abko nämane kákä Licaoniate, ye käntita temen Pablo amne Bernabé ngitiani. <sup>7</sup> Angwane Ngöbö kukwei kuin Jesubtä ye kädriebare kwetre kä ye käntita arato.

### *Pablo amne Bernabé kákwe blitabare Jesubtä juta Listrate amne juta Derbete*

<sup>8</sup> Abti bati Pablo amne Bernabé nämane juta Listrate angwane, ni nakwente nämane iti juta yete. Ni ye abko därebaré ngüre bren, aisetni nämane dikekä ñakare kröta abko nämane täkänintbe siba yete. <sup>9</sup> Pablo nämane blite angwane, niara nämane kwekbe Pablo kukwei nuen. Te batibe, Pablo okwä namani kwekbe btä angwane, Jesukwe mikadreta kuinta, bti namani tödeke kwatibe namani tuen Pabloye. <sup>10</sup> Angwane Pablokwe ñäkäbare jume ja dibti krörö ie:

¡Näin krö amne nünenkä metre krö! niebare kwe ie.

Ye btäräbe, ni ye kákwe ja täkänintbe käinta, nükaninbe dikekä krö, bti nikani dikekä kwäräkwärä ni mda mda okwäbti se kwrere. <sup>11</sup> Pablokwe ni ngüre bren mikaninta kuinta kore, ye jatani ni jökräye angwane, namani ngrente krikri ja kukwe Licaoniare, kä namani niere krörö:

¡Ngöbötre nikwe nikwitani ni bää kwrere abko nükani ni ngätäite mtare! namanintre niere.

<sup>12</sup> Bernabé abko ngöbötre jire jökrä dänkien kädian nämane Júpiter niebare kwetre amne Pablo abko nämane blite, aisetni niara abko ngöbö kädian nämane Mercurio\* niebare kwetre ie. <sup>13</sup> Abtä ni blitaka ngöbö Júpiterebe ni mda mdakrä abko kwe ju

\* <sup>14:12</sup> Júpiter amne Mercurio. Júpiter abko ngöbötre dänkien abko nitre romano nämane nütüre. Amne Mercurio abko ngöbö mda abko Júpiter nämane juen kukwe mikakäre gare ni mda mdaye abko nitre romano nämane nütüre.

nämane kämikadre ietre niaratre mikakäre ütiäte jae. Erere arato, jatani kri blü dätebare koronare ngwena kräke mikakäre ütiäte jae. Ne kwrere niara amne ni jökrä tö namani jändrän kukwai Bernabé amne Pablo mikakäre ütiäte ngöbö kwrere jae.

<sup>14</sup> Nitre Jesu kukwei ngwianka Bernabé amne Pablo mika tö namani ütiäte ngöbö kwrere ni jökrakwe, ye gani kwetre angwane, ñakare namani tuen dbe ietre, ye bää mikakäre dän ngianinkä jadtä kwetre se kwrere, bti nikanintre betekä ni mda mda ngätäite tata, ngrarete kwärä kä nikanintre niere krörö:

<sup>15</sup> Ja mräkä, nun abko ñakare ngöbö, akwa nun ja kwrere munbe. ¡Se ñobtä mun tö nibi nun mikai ütiäte kore jae se! Munta ngöbötre ngwarbe mike ütiäte jae, ye mikadre jökrä temen munkwe, abkokäre nun jatani Ngöbö kukwei kuin Jesubtä mike gare munye. Ngöbö nire kä käinta amne kä tementa dätekä, arabe käkwe mren dätebare amne jändrän jökrä tä näne kä käinta, kä tementa amne mrente dätebare kwe arato. Ngöbö ye aibe munkwe kadre ngäbti, abkokäre nun jatani Ngöbö kukwei kuin mike gare munye. <sup>16</sup> Kira abti kä näke mtare, ni jökrä tö namani dre nuein, erere Ngöbökwe tuanimetre nuene jökrä. <sup>17</sup> Akwa Ngöbö abko moto kuin, aisetet käre jändrän kuin nuenbare kwe ja mikakrä gare munye abko krörö: Ngöbö ara käta ñü mike näkäen temen munkrä amne, nura jökrä abko Ngöböta ngwä mike neme kuin munkrä. Ye kwrere Ngöbö ara käta mrö bien kabre kwetadre munye, kä tädre nuäre munbtä abkokäre, niebare kore Pablokwe.

<sup>18</sup> Akwa Pablokwe ñäkäbare kore, ye abko bäsí namani ütiäte ñakare nitre ye kräke. Ye aisetet tö namanintre jändrän kämikai Bernabé amne Pablo mikakäre ütiäte, akwa ye abko namani tare krübäte dokwä täke kän, akwa mrä abko dokwä täkäni kwetre abko nakaninkä kore.

<sup>19</sup> Abti nitre israelita nünanka juta Antioquía Pisidiate amne Iconiote nükani juta Listrate ye käkwe ni mda mda töi kwitani Pablo amne Bernabé rüere angwane, nikani Pablo täke jäbti kwäräkwärä se kwrere, bti Pablo krütanina namani tuen ietre angwane, jäkäni mento juta bäre kwetre. <sup>20</sup> Akwa nitre tödekaka Jesubti käkwe ja ükaninkrö Pablo bäre temen angwane, Pablo nükaninta krö, bti nikaninta nebetta jutate. Abti jändrinane angwane, Pablo nikani juta Derbete mda Bernabébe abko kukwe nakaninkä kore btätre juta Listrate.

#### *Pablo amne Bernabé nikanintre ja jiebti juta Antioquía, Siriate*

<sup>21</sup> Pablo amne Bernabé käkwe kukwe kuin Jesubtä diribare juta Derbete, ye känti ni kwati käkwe kukwe kuin Jesubtä ye mikani era. Abti Pablo amne Bernabé nikaninta ja jiebti nebetta juta Listrate, Iconiote amne juta Antioquía. <sup>22</sup> Niaratre nikani juta kwatirekwatire te, ye käntikänti nitre tödekaka Jesubti kitani nünenkä dite kwetre Jesubtä amne, Ngöbö ngämi gobrane nibti kä käinbti, ye känenkri nikwe ja tare nikadi kri kä nebtä, niebare kwetre. <sup>23</sup> Erere arato, Pablo amne Bernabé käkwe ni mikani nitre tödekaka Jesubti jie ngwianka juta kwatirekwatire känti, bti nitre tödekaka Jesubti amne nitre ni jie ngwianka abko kräke blitabare kwetre Ngöböbe amne ja bainbare kwetre Ngöbökrä angwane, ni Dänkien, bti nämane tödeke ye ie Pablo amne Bernabé käkwe ja mräkätre mikani gare, bti nikanintre.

<sup>24</sup> Pablo amne Bernabé nikani kä Pisidia känti ta, bti nikani nebe kä Panfiliate. <sup>25</sup> Kä ye känti, kukwe kuin Jesubtä diribare kwetre juta Pergete. Abti nikaninta nebe juta Ataliate mren köräbti. <sup>26</sup> Ye känti nikani rute angwane, nikaninta juta Antioquía, Siriate. Juta Antioquía ne mdan känti nitre gätäkä Jesu käbti käkwe niaratre juani sribire Ngöbö moto kuin ye köböire. Sribi ye mdan abko namanina bare ietre angwane jataninta. <sup>27</sup> Pablo amne Bernabé nükaninta juta Antioquía, Siriate angwane, ja mräkätre tödekaka Jesubti kä ye känti ükaninkrö jökrä kwetre, bti ni Dänkienkwe kukwe nuenbare kuin kräke, ye erere niebare jökrä kwetre ietre amne, nitre ñakare israelitare, kräke ni Dänkienkwe kä biani arato tödekakrä Jesubti abko niebare kwetre ietre. <sup>28</sup> Yebti Pablo amne Bernabé namani näne raire mda nitre tödekaka Jesubtibe juta Antioquía, Siriate. Ne abko nakaninkä kore Pablobtä amne Bernabébtä.

## 15

*Gätäbare kri Jerusalén*

<sup>1</sup> Kä ye ngwane abko, ni nämene nüne Judeate abko nikani ruäre nebe juta Antioquíate abko nikani dirire krörö ja mräkätre tödekaka Jesubtiye:

Ja ñäräkrä mikadre ja kwatabtä niebare Moisékwe, se kwrere mun jökrä ñakare israelitare kákwe ñan nuendre ne ngwane, Ngöbökwe ñan mun diandretari jire chi, namanintre dirire kore.

<sup>2</sup> Yebtä abko, Pablo amne Bernabé namani ja kwete krübäte nitre yebe. Abtä mrä angwane, nitre tödekaka Jesubti kákwe Pablo, Bernabé amne ni mda mda dianinkä ja ngätäite, bti juani kwetre Jerusalén blite nitre Jesu kukwei ngwianka mda mdabe amne nitre ni jie ngwianka nämene Jerusalén yebe. <sup>3</sup> Nitre tödekaka Jesubti juta Antioquíate kákwe Pablo amne Bernabé juani ni mda mdabe, ye erere bkänä nikanintre. Angwane nikani kä Fenicia känti ta amne kä Samaria känti ta angwane, Ngöbö era metre mikani era kwetre, ye abko niebare jökrä kwetre. Yebtä nitre tödekaka Jesubti nünanka kä Fenicia känti amne Samaria känti, btä kä namani nuäre krübäte Pablo amne Bernabé kukwe nuare. <sup>4</sup> Bti Pablo amne Bernabé nikani mate Jerusalén. Angwane nitre gätäkä Jesu käbti, nitre Jesu kukwei ngwianka mda mda amne nitre ni jie ngwianka ye kákwe ja ükaninkrö jökrä angwane, Ngöbökwe dre dre nuenbare niaratre köböire abko niebare jökrä kwetre ja mräkätreye. <sup>5</sup> Angwane batibe ni bariseo tödekaka Jesubti nämene ruäre yete abko namanintre nünaninkä krö, kákwe niebare krörö:

Ja mräkätre ñakare israelitare käta tödeke Jesubti abko ñäräkrä mikadre jökrä kwatabtä amne, kukwe mikani nuendre Moisékwe abko niaratrekwe mikadre täte ni kwrere niedre ietre abko nunta nütüre. Abko kore se, niebare kwetre.

<sup>6</sup> Abti nitre Jesu kukwei ngwianka amne nitre ni tödekaka Jesubti jie ngwianka kákwe ja ükaninkrö jenena blitakäre kukwe yebtä. <sup>7</sup> Blitabare raire kwetre angwane, Pedro namani nünaninkä krö, kákwe niebare krörö kukwe yebtä:

Ja mräkätre, Cornelio amne mräkä kwekwe ñakare israelitare, ie ti rikadre kukwe kuin Jesubtä niere amne, niaratre kákwe tödekadre Jesubti, abkokäre Ngöbökwe ti dianinkä mun ngätäite, ye gare kuin munye. <sup>8</sup> Amne ni jökrä töi ño gare jökrä Ngöböye. Ngöbö ye ara kákwe niaratre kani ngäbti, ye bä mikakrä ja Üai Deme biani kwe nie, ye kwrere biani kwe ietre arato. <sup>9</sup> Ye abko, Ngöbö ñan tä nitre ñakare israelitare mike ñäräre bärí bärí káme ni israelitakrä, akwa ni ja kwrere jökrä Ngöbö ngwärerekri, ñobtä ñan angwane nitre ñakare israelitare tödekani Jesubti angwane, Ngöbökwe niaratre ngite dianinkä btätre arato. <sup>10</sup> Ye garera munye, aisetet *¿se ñobtä abko mun tö Ngöbö moto mikai romon, amarebti Kukwe Biani Ngöbökwe Moiséye abko ni mräkä kirakira die namani ñakare mikakrä täte amne, mtare ni die ñakare mikakrä täte arato, abko nitre ñakare israelitare kákwe mikadre täte jökrä, ie mun tö se?* <sup>11</sup> Ye abko ñakare kuin, ñobtä ñan angwane ni Dänkien Jesu moto kuin, ye köböire niarata ni israelita dentari, ye gare kuin nie mtare. Ye kwrere nitre ñakare israelitare käta tödeke bti abko Ngöböta dentari ni kwrere arato. Ne mden kisete, nikwe ñan nitre ñakare israelitare mikadre ja ñäräkrä mike ja kwatabtä amne nikwe ñan mikadre Kukwe Biani Ngöbökwe Moiséye mike täte. Abko kore se, niebare Pedrokwe.

<sup>12</sup> Pedrokwe blitabare ünän kore, bti ni jökrä namani kwekbe amne, Ngöbökwe sribi kri ñan tuabare nuenbare ño Bernabé amne Pablo köböire ja kukwei mikakäre ütiäte nitre ñakare israelitare ngätäite abko ni jökrä namani kukwe nuen. <sup>13</sup> Bernabé amne Pablo kákwe blitabare ünän jökrä kore angwane, Santiago abko kákwe niebare krörö mda:

Ja mräkätre, ti kukwei nuen munkwe. <sup>14</sup> Nitre ñakare israelitare tarebare ño kena Ngöbökwe angwane, niaratre ngätäite ni dianinkä jen jakrä kwe mikakäre juta jakwere, nini Simón Pedrokwe nie. <sup>15</sup> Ne mden abko nämene tikani kore nitre Ngöbö kukwei niekä kirakirakwe, mden erere tä tikani krörö Ngöbö Kukweibtä:

<sup>16</sup> Ni Dänkien Ngöbö kákwe niebare kore:

David btä mräkä kwekwe ja täritäri nämene gobrane akwa, juani ngwarbe rükwe.

Akwa ti jatadita angwane, tikwe ükadita amne ju ngwarbe ükateta kuin täte, ye kwrere tikwe ükaditeta, käkwe David mräkä mikadi gobrane mda David täbtä.

<sup>17</sup> Ye abko tikwe nuendre nitre ñakare israelitare nünanka kä mda mda känti mden tikwe diandikä jen jakrä rabadi ti känentari abkokäre, <sup>18</sup> niebare ni Dänkien Ngöböökwe. Ni Dänkien Ngöböökwe ja kukwei niebare kira, ye mden abko kitera mike bare mtare, [Amós 9.11-12](#) ne mden abko mikanina gare kwe nie ja kukwei köböire.

<sup>19</sup> Ne aisetetita töbike krörö, erere ti bike niere. Nitre ñakare israelitare käta Ngöbö kaen ngäbti, niaratre ye kötärä nikwe ñan kukwe taretare mikadre nuendre ietre ruen tie, aisetet Kukwe Biani Ngöböökwe Moiséye, ye abko nikwe ñan mikamna täte ietre.

<sup>20</sup> Akwa kukwe krörö tikadre täräbtä juandre kräke abko rabadredbe ruen tie: Käne, jäandrän jökrä bianta ngöbö ngwarbeye mikakäre ütiäte jae, ye abko ñan kwetadre kwetre amne ñan ja mikadre gure bati bati kwetre, niedre ietre. Erere arato, jäandrän müre nötaninkä köte därie ngöi, ye ñan kwetadre jire kwetre, niedre ietre. Mräkäre abko jäandrän därie ñan kwetadre kwetre arato abko aibe niedre ietre, <sup>21</sup> ñobtä ñan angwane Kukwe Biani Ngöböökwe Moiséye, ye abko nitre ñakare israelitare raba kukwe nuen bämän kratirekratire, ñobtä ñan angwane kira abti kä nüke mtare juta kwatirekwatire te nitre ñakare israelitare ngätäite Kukwe Biani Ngöböökwe Moiséye, yebtä ni kwati tä ñäke sinagogate bämän kratirekratire köbö jadükakrä näire. Ne aisetet kukwe ye garera ietre. Ye mdenbtä abko, tärä tikadre jirekäbe juandre ja mräkätreye ruen tie. Abko kore se, niebare Santiagokwe.

#### *Tärä juani kwetre nitre ñakare israelitare tödekaka Jesubtiye*

<sup>22</sup> Ye kwrere bkänä, nitre Jesu kukwei ngwianka amne nitre ni tödekaka Jesubti jie ngwianka käkwe ja töi mikani gwaire nitre tödekaka Jesubtibe, käkwe ni mda mda dianinkä juandre Pablobe amne Bernabébe nebe juta Antioquiate. Ni dianinkä juandre bentre abko nere: Judas, ni ne arabe kädian nämane Barsabás arato amne ni mda abko kädian nämane Silas. Nitre nibu ne abko ütiäte nitre tödekaka Jesubti ngätäite Jerusalén <sup>23</sup> abko ietre tärä biani ngwiandre. Tärä ye abko btä kukwe tikani krörö:

Mun ñakare israelitare tä nüne juta Antioquiate, kä Siriate amne kä Ciliciate, mun ye abko ja mräkäre nunbe, aisetet nun Jesu kukwei ngwianka amne nun nitre tödekaka Jesubti jie ngwianka käta köbö kuin juen munye. <sup>24</sup> Ja mräkä, ni ruäre ja ükakröä ketetibe nunbe nete abko nunkwe juani ñakare, akwa nikani ja töi jenbti, käta dirire munye amne tä mun nike krübäte amne tä mun töi kwite ngwarbe kwäräkwärä abko nunkwe gani nete. <sup>25</sup> Ye mdenbtä abko, Bernabé amne Pablo, nun mräkä tare kri nunkwe, abko ben nunkwe ja mräkätre nete juandre ruäre nebe mun känti yete blitakäre munbe abko rabadre bäri kuin rababa tuen nunye. Ye erere rababadbe nun jökrä kräke. Bernabé amne Pablo, <sup>26-27</sup> ne abko nämane biare krütakäre tödekabtä ni Dänkien Jesukristobti. Ye abko, nunkwe Judas amne Silas dianinkä ja ngätäite nete juandre nebe mun känti yete, aisetet nunta niaratre juen blite gwärere munbe tärä juanta nunkwe nebe, <sup>28</sup> ñobtä ñan angwane kukwe mdara jire ñan mikadre mun kötärä abko namani tuen kuin Ngöbö Üai Demeye amne nunye, akwa kukwe mda kuinkuin nuendre munkwe, ie nun tö amne Ngöbö Üai Deme tö abko krörö: <sup>29</sup> Jäandrän kämikani kukwadre ngöbö ngwarbeye, ye munkwe ñan kweta. Erere arato, jäandrän därie amne jäandrän müre nötaninkä köte därie ngöi abko munkwe ñan kweta. Erere arato, munkwe ñan ja mika gure bati bati abko ie nun amne Ngöbö Üai Deme tö.

Munkwe kukwe ne mikadre täte ne ngwane, munkwe nünandi era metre. Ne ngörä. Ne abko tikani ja mräkätrekwe täräbtä.

<sup>30</sup> Nebti ni nibu ye juani kwetre Bernabé amne Pablo mukore tärä mike Antioquiate, ye erere nikanintre. Namani juta Antioquiate angwane, nitre tödekaka Jesubti ye ükaninkrö jökrä kwetre, bti tärä biani kwetre ietre ñäkäkäre btä. <sup>31</sup> Nitre ye käkwe ñäkäbare tärä yebtä angwane, kukwe namani tuen kuin ietre niaratre die mikakäre abko käi namani nuäre kri btätre. <sup>32</sup> Erere arato, Judas amne Silas abko Ngöbö kukwei niekä arato, aisetet

blitabare kwetre Ngöbö kukweibtä, ye abko kákwe ja mräkätre tödekaka Jesubti die mikani kri arato. <sup>33</sup> Yebti kä nikani bä raire ta angwane, nitre Judas amne Silas juanka, ye känti rikadreta Jerusalén, abkokäre ja mräkätre Antioquíabo kákwe niebare ietre:

Mun rikata kuin jäme Ngöbö diebti, niebare kwetre ietre.

<sup>34</sup> [Akwa Silas abko tö namani rabai, aisetet nikaninta ñakare.]<sup>\*</sup> <sup>35</sup> Angwane abko, Pablo btä Bernabé namani juta Antioquíate, kä nikani kukwe kuin ni Dänkienkwe dirire gware ja mräkätre mda mdabe amne, nikani kukwe kuin Jesubtä kädriere ni mda mdabe.

#### *Pablo btä Bernabé kákwe ja kwetani Juan Marcobtä*

<sup>36</sup> Yebti kä nikani bä raire ta angwane, Pablokwe niebare krörö Bernabéye:

Juta kwatirekwatire te nikwe kukwe kuin ni Dänkienbtä kädriebare ja mräkätrebe, yebti niaratre tä ño mtare abko gare ñakare nie, aisetet bränta basare ietre, niebare kwe ie.

<sup>37</sup> Angwane ni iti kädian nämane Juan, arabe kädian nämane Marcos abko Bernabé tö namani ngwiainta siba jabe käne kwrere. <sup>38</sup> Akwa Marcos rikadreta siba abko ñan namani tuen dbe Pabloye, ñobtä ñan angwane nämanentre Ngöbö kukwei niere käne angwane, Marcokwe kä mikaninkä btätre juta Panfiliate. Yebti Marcos nikani sribire ñakare mda bentre, aisetet ñan rikadreta siba, ie Pablo tö namani. <sup>39</sup> Marcos rikadreta siba ñan nükaninbti Pabloye, ye abko namani blo Bernabékrä. Abtä nikanintre jene jene kwäräkwärä krörö: Bernabé nikani rute Marcobe, bti nikani rute nebebe kä butubti Chiprete. <sup>40</sup> Akwa Pablo abko kákwe Silas ngwiani jabe. Angwane ja mräkätre tödekaka Jesubti kákwe mikani gare Ngöbö moto kuin yeye, bti juani kwetre. <sup>41</sup> Pablo nikani Silabe angwane, nikanintre gürere kä Sirate ta, bti nikani kä Cilicia ta, käntikänti nikani nitre gätäkä Jesu kähti die mike nüne käre Jesukrä.

## 16

#### *Pablokwe Timoteo ngwiani sribire jabe*

<sup>1</sup> Pablo namani juta Derbete, bti nikani nebe juta Listrate. Ye känti ni tödekaka Jesubti kwani iti ie. Ni ye abko kädian nämane Timoteo. Timoteo meye abko meri israelita tödekaka Jesubti, akwa Timoteo rün abko griego. <sup>2</sup> Akwa ja mräkätre Listrabo amne Iconiobo abko namani blite kuin Timoteobtä. <sup>3</sup> Angwane Pablo tö namani Timoteo ngwiaint siba ja mukore, akwa Timoteo rün griego nämane gare ni jökräye, aisetet nitre israelita kákwe ñan ñäkädre blo Timoteo rüere, abkokäre Pablokwe ñäräkrä mikani käne kwatabtä. <sup>4</sup> Yebti juta käntikänti namanintre nikken, ye känti nitre Jesu kukwei ngwianka amne nitre ni jie ngwianka Jerusalénbo kákwe kukwe ükaninte nuendre nitre ñakare israelitare kräke, bti juani kwetre, ye kwrere namanintre dirire. <sup>5</sup> Ye abko namanintre ja mräkä tödekaka Jesubti die mike tödeke bari Jesubti amne, köbö kwatirekwatire ni kwati mda namani Jesu kukwei kaen ngäbti.

#### *Pablokwe ni Macedonia tuani köböre*

<sup>6</sup> Abti sribi namani bare yete angwane, Pablo amne ni mda mda nämane nikken mukore ye rikadre kukwe kuin Jesubtä niere kä Asiate, ye abko Ngöbö Üai Deme kákwe dokwä täkäni ben. Abtä niaratre nikani menteninta temen angwane, nikani kä Frigia känti ta amne kä Galacia känti ta nikani. <sup>7</sup> Bti nikanintre, namani känime brontera kä kädian nämane Misia ken, ye känti tö namani rikai mda kä Bitinate, akwa Jesu Üai kákwe ñan tuanimetre nikken arato. <sup>8</sup> Abtä nikanintre jirekäbe jibe bti ta Misia bäre temen, bti nikaninta angwane, nikani mate mren köräbti juta Troate. Kä ye känti ru nämane nebe.

<sup>9</sup> Niaratre nämane juta Troate angwane, batibe deo Pablokwe köbóbare krörö: Ni nünanka kä Macedonia nämane iti abko namani nünankä krö, kä namani ribere krörö ie: Jakwe Macedonia känti nun die mike, ni ye namani niere kore Pabloye. <sup>10</sup> Kä jataba ngwen dekä angwane, Pablokwe köbóbare kore niebare kwe angwane, Pablo, Silas, Timoteo amne ti Lucas tärä ne tikaka, nunkwe ja mikaba juto rikakäre Macedonia,

\* 15:34 Versículo 34 ye abko ñan tä tikani manuscrito bari kuinkuintä.

ñobtä ñan angwane Ngöbö nämane nun kärere kukwe kuin Jesubtä mikakäre gare kä Macedoniate abko gaba nunkwe.

*Meri iti kä Lidia kákwe tödekan Jesubti juta Filipote*

<sup>11</sup> Nun näma juta Troate, ye känti nun rankwaba rute angwane, nun rikaba metre ta nebe kä butubti Samotraciate. Ye känti nunkwe kibiaba, bti jändrinane angwane, nun rikaba nebe juta Neápolite mda, känti nun rikaba jate. <sup>12</sup> Ye känti nun rikaba gürere juta Filipote mda. Juta Filipos ne abko juta ütiäte kä Macedoniate abko känti nitre romanobo nämane nüne kwati arato. Ye känti nun rababa nünentbe bä raire.

<sup>13</sup> Abti köbö jadükakrä näire, nun rikaba juta bäre mento angwane, nun rikaba nebe ñö köräbti. Ye känti abko, kä nämane nitre israelitakwe blitakrä Ngöböbe, nun rababa nütüre, aisetet nun rikaba yete. Ye känti nun rababa täkänintbe angwane, nitre merire merire aibe kákwe ja ükaninkrö kwati yete abko ben nunkwe blitaba kukwe kuin Jesukwebtä. <sup>14</sup> Meri nämane ja ükaninkrö, ye ngätäite abko meri näma iti abko kädian nämane Lidia. Lidia ye abko juta Tiatirabo, akwa nämane dän bari kuin amne ütiäte bä tain rürümoine juta Filipote. Meri ye abko nämane Ngöbö mike ütiäte, aisetet näma Ngöbö kukwei nuen, aisetet Pablo näma blite Jesubti angwane, Ngöböökwe niara töi mikaba tödeke Jesubti. <sup>15</sup> Yebti Lidia amne mräkä kwekwe btä sribikä kwekwe ngökaba jökrä ñöte Jesu käbti nunkwe angwane, Lidiakwe ribeba krörö nunye:

Tita tödeke bkänä Jesubti munta nütüre tibtä ne ngwane, brän jadüke ti juete, nieba kwe nunye.

Ye kákwe nun ketateba nebe yete.

*Pablo amne Silas kitani ngite kä teri*

<sup>16</sup> Yebti kä blitakrä Ngöböbe känti nun rikabata angwane, meri bati btä üai käme nämane, kä nämane mike sukiare abko ben nun ngätäba ji ngrabare yete. Meri ye abko klabore. Dre dre rakadrekä abko nämane niere amne bkänkä nämane ngwian den kabre niara köböire. <sup>17</sup> Meri bati ye abko rikaba Pablo jiebti amne nun jiebti, kä rikaba ngrente krikri krörö nun jiebti:

¡Ngöbö Kri Kä Käinbti kräke nitre ne tä sribire amne, ni rabadre dianintari ño tätre näin niere munye! meri ye rababa näin ngrente kore.

<sup>18</sup> Ye abko nuenba raire kwe köbö kwatirekwatire, abtä bati Pablo moto ñan rababara neme nuäre meri ye kukwe nuare kore angwane, batibe Pablo rikwitataba, kákwe nieba üai käme nämane meribtä ye ye krörö:

Jesukristo käbti nän mento meri nebtä, tita niere mae, nieba Pablokwe ie.

Ye btäräbe üai käme ye kákwe kä mikakaba meri yebtä.

<sup>19</sup> Akwa meri ye bkänkätre kákwe ñan ngwian diandre mda niara köböire gaba kwetre angwane, Pablo btä Silas reketateba ietre, kä rikaba ngwena nebe kritobo ngwärekri juta te ruäre, ni mda mda nämane jändrän rürümoine, ye känti järikaba kwetre. <sup>20</sup> Pablo amne Silas järikaba kritobo nibu ye ngwärekri kwetre angwane, mikaba tuadre kwetre ietre, bti nieba kwetre mda:

Nitre israelita nibu ne nükani kukwe dirire nete abko käta kä ngwen nokre krübäte gobran rüere ni ngätäite nete, <sup>21</sup> ñobtä ñan angwane kukwe bä jene dirita kwetre abko ni ñan rabadre kaen ngäbti amne ni ñan rabadre nuene jire chi, ñobtä ñan angwane ni abko romanobo, nieba kwetre ie.

<sup>22</sup> Angwane ni jökrä rababa romon Pablobrä amne Silakrä. Nitre kritobore abko kákwe dän tikatemna Pablobtä amne Silabtä, bti kwata metamna kritobti kwetre. <sup>23</sup> Ye kwrere bkänä, Pablo amne Silas kwata metaba bäre bäre, bti kitaba ngite kä teri angwane, ni nitre ngite ngibiabtikä ye kákwe niaratre ngibiadre kuin, ñan gitiadre abkokäre, nieba kwetre ie. <sup>24</sup> Ni nitre ngite ngibiabtikä, ie Pablo amne Silas ngibiamna kuin. Ye kwrere bkänä, Pablo amne Silas kitaba bari gwirikri kwe, bti ngüre mikani krite kwe kä teri.

<sup>25</sup> Akwa kä jatanina ruäre deo angwane, Pablo btä Silas nämane blite Ngöböbe amne nämane kantare Ngöböye se kwrere angwane, ni mda mda nämane ngite arato abko nämane kukwe nuen. <sup>26</sup> Ye btäräbe abko dobo nakaninkä kri krübäte, kä namani ju ni

ngitekrä ye ngrükete krübäte, käkwe jukwe tikaninbe batibe jökrä amne kadena nämane kitani nitre ngite ngitebtä, ye ngitianintbe jökrä btätre se kwrere. <sup>27</sup> Yebti ni nitre ngite ngibiabtikä nükaninta ngwäte, käkwe nikrabare amne, jukwe nämane tikani jökrä, btä okwä namani. Angwane nitre nämane ngite kä teri yete, ye abko ngitianina jökrä namani nütüre, käkwe ngitra kwatate diani ja kämikakäre au, <sup>28</sup> akwa Pablokwe ñäkäbare ja dibti krörö ie:

Nun tä jökrä nete. Makwe ñan ja kämika, niebare kwe ie.

<sup>29</sup> Angwane ni nitre ngite ngibiabtikä ye käkwe ñotra käräbare, erere ñotra biani ie amne, nikani betekä neme gwi amne kä jürä namani krübäte btä, aibe kisete namani grükekä jökrä ngrabare, nikani namani kitanintbe Pablo amne Silas ngotobtä temen.

<sup>30</sup> Bti Pablo amne Silas ngwiani kwe ju bäre, bti niebare kwe ietre:

¿Ja mräkä, tikwe ja nuendre amne ti rabadre dianintari? niebare kwe ietre.

<sup>31</sup> Abtä niaratre käkwe niebare mda ie:

Tödeke ni Dänkien Jesubti angwane, ma rabadi dianintari, ma mräkäbe gware jökrä, niebare kwetre ie.

<sup>32</sup> Angwane Ngöbö kukwei kuin ni Dänkienbtä ye kädriebare ben kwetre amne niara mräkä nämane nüne ben gwi yebe arato. <sup>33</sup> Kóbö ye näire deo, ni nitre ngite ngibiabtikä ye käkwe Pablo amne Silas ngwiani ja känti, käkwe träin bätäninte ietre. Yebti ni nitre ngite ngibiabtikä ye ngökani ñöte Pablokwe amne Silakwe mräkä kwekwe ben gware jökrä. <sup>34</sup> Bti Pablo amne Silas ngwianinta ja gwiriete kwe, känti bukani kwe angwane, ni nitre ngite ngibiabtikä amne mräkä kwekwe käkwe tödekani Ngöböbti ye abko käi namani bäri nuäre btätre.

<sup>35</sup> Abti jäandrinane dekä, Pablo amne Silas tikadreteta abko nitre kritobore käkwe guardia juani niere ni nitre ngite ngibiabtikä ye. <sup>36</sup> Ye kwrere bkänä, ni nitre ngite ngibiabtikä käkwe niebare mda Pabloye:

Nitre kritobore käkwe mun tikatemnata tie, aisetu mun raba nikenta. Mun rika kuin amne jáme, ie ti tö, niebare kwe ietre.

<sup>37</sup> Akwa Pablo käkwe niebare krörö mda guardiatreye:

Nun nibu ne abko romanobo, akwa nunkwe ja mikani ngite ya, ñakare ya abko ngwianintari ñakare, akwa nun kwata metaba ja ngwärekri jökrä, bti nun kitaba ngite kä teri nete. ¿Abti mtare nitre kritobore tö nun tikaiteta tiebe ya? Akwa ñakare kore. Nitre kritobore ye ara jire jata nun tiketeta au abko ie nun tö, niebare Pablokwe ietre.

<sup>38</sup> Pablokwe dre niebare, ye erere guardiatre käkwe niebare kritobotreye angwane, niaratre nekwetaninkä, ñobtä ñan angwane Pablo amne Silas abko ni romanobo niebare ietre, aisetu niaratre ngite ya, ñakare ya, ye abko ngämi ngwentari metre, känenkri ñan kwata metadre abko erere nuenbare kwetre. Yebtä abko kä jürä namani btätre. <sup>39</sup> Ye mden kisete nikanintre, käkwe ja ngite niebare gwärere Pabloye amne Silaye. Bti Pablo amne Silas nämane ngite kä teri ye dianinta ta kwetre amne rikadreta jötrö juta ye bäre mento, niebare kwetre ietre. <sup>40</sup> Pablo amne Silas nämane ngite kä teri, bti tikaninteta angwane, nikaninta nebata Lidia juete. Ye känti ja mräkätre tödekaka Jesubti nämane abko ben blitabare kwetre niaratre die mikakäre nüne Jesukrä, yebti nikani kä mdabti abko nakaninkä kore se.

### Pablo nükani juta Tesalónicate Silabe

<sup>1</sup> Abti Pablo amne Silas nikaninta angwane, nikani juta Anfípolis känti ta amne nikani juta Apolonia känti ta arato. Yebti nikani nebe juta Tesalónicate mda. Ne känti sinagoga nämane kwati nitre israelitakwe. <sup>2</sup> Gätä yebtä Pablo nämane nikén käre kä ketareketare temen, ye kwrere nikaninta juta Tesalónicate angwane, köbö jadükakrä bämän krämä jire Pablokwe blitabare Jesubtä nitre israelitabe niaratre töi diankäre tödeke Jesubti abko krörö: <sup>3</sup> Ni Dianinkä Ngöbökwe abko krütadi, akwa rükadita nire abko nämane tikani kira Ngöbö Kukweibtä, ye abko Pablo namani bá mike ietre. Erere arato, namani niere krörö:

Tita blite Jesubtä munbe, niara abko Ni Dianinkä Ngöbökwe ara, Pablo namani niere.

<sup>4</sup> Angwane nitre israelita kwati kákwe ja töi kwitani Jesubtä, kákwe tödekani bti, amne nitre griego kwati kä nämane Ngöbö mike ütiäte jae amne meri kwati ütiäte ütiäte kákwe tödekani bti arato. Yebtä niaratre nämane nekete Pablo amne Silakri. <sup>5</sup> Yebtä abko, nitre israelita kwati, kräke kukwe kuin Jesubtä ye ñan namani era, ye abko namani mokrere Pablobe amne Silabe, ñobtä ñan angwane ni kwati nämane nekete ben, aisetetniaratre kákwe ni diän diän amne krene krene nämane dikekä ngwarbe krö ji ngrabare ye känabare kwetre, bti ben gware kä mikani nokre kwetre juta ngrabare. Nikani betekä nebe Jasón juete Pablo amne Silas känene. Niaratre kwandre ietre ne ngwane, rikadre ngwena ni jökrä ngwärekri abkokäre. <sup>6</sup> Akwa Pablo amne Silas kwani ñakare ietre yete. Abtä Jasón amne ja mräkä mda mda tödekaka Jesubtä nämane Jasónbe gwi, ye neketaninte ietre, nikani jake amne kitekä ja käne, nikani nebe ngwena juta gobranka ngwärekri, kä namani ngrente krörö:

Ni nükani nete ne käta kukwe miketbe blo gobran romanobo rüere kä jökräbti temen, erere nükanina ni ngätäite nete mtare. <sup>7</sup> Nitre ye abko Jasónkwe kani ngäbti ja juete. Niaratre jökrä tä emperador kukwei kite temen amne jrei mda tärä kädianta Jesu tätre niere kore, namanintre niere.

<sup>8</sup> Yebtä abko nitre juta gobranka amne ni mda mda, kräke ñan namanidbe, aisetetni jökrä namani ja ngwen ruen tare kukwe yebtä. <sup>9</sup> Akwa Jasón amne nitre tödekaka Jesubtä mda kákwe ja ütiä biamna, bti tikaninteta gobrankwe.

#### *Pablo amne Silas nikani juta Bereate*

<sup>10</sup> Yebti kä jatanina iko angwane, nane nitre israelita jatadreta Pablo amne Silas kämike, ye ngäniene ja mräkätre tödekaka Jesubtä kákwe Pablo amne Silas juani jötrö ngwarbe ngitie nebe juta Bereate mda. Namani yete abti sinagoga nitre israelitakwe nämane yete abko känti nikani blitakäre Jesubtä bentre. <sup>11</sup> Angwane nitre israelita nämane juta Bereate abko bári moto jáme nitre israelita Tesalónicabokrä, aisetekukwe kuin Jesubtä diri nämane Pablockwe amne Silakwe, ye käi namani nuäre btätre kare ngäbti. Akwa Pablo amne Silas namani kukwe dirire, ye abko era ya abko tö namanintre gai, aiseteköbökäkwatire namani ja töitike Ngöbö Kukweibtä. <sup>12</sup> Angwane nitre israelita kwati kákwe tödekani Jesubtä. Erere arato, nitre merire merire griegore ütiäte ütiäte amne ni brare brare griegore kwati kákwe tödekani bti arato. <sup>13</sup> Akwa Pablo nämane Ngöbö kukwei kuin Jesubtä dirire juta Bereate, ye gani nitre israelita Tesalónicabokwe angwane, nikani nebe juta Bereate, kä nikani ni kwati moto mike romon Pablo rüere. Yebtä abko kä namani nokre batibe. <sup>14</sup> Akwa ja mräkätre tödekaka Jesubtä juta yete kákwe Pablo juaninta jötrö mda juta ye bäre mento amne Pablo nikani motokwäre mren kukwäre, akwa Silas amne Timoteo abko namani juta Bereate. <sup>15</sup> Angwane nitre tödekaka Jesubtä nikani Pablo mukore, ye abko jananbare Pablo mikete juta Atenate. Yebti jataninta ja jiebti amne Pablockwe ja kukwei juani krörö ietre:

Silas amne Timoteo jata jötrö nüke ti jiebti nete, munkwe nie ietre, niebare Pablockwe ietre.

#### *Pablockwe blitabare Jesubtä juta Atenate*

<sup>16</sup> Pablockwe Silas amne Timoteo käräbare jötrö ja jiebti, bti namani ngibiare juta Atenate. Juta ye känti abko, jä sribebare ngöbö ngwarbere nämane kabre. Abtä Pablo moto namani ulire krübäte ngöbötre ngwarbe ye tuare. <sup>17</sup> Yebtä abko, nitre israelita amne ni griegore nämane Ngöbö mike ütiäte, ye ben Pablo namani blite jabe kwärikwäri kukwe kuin Jesukwebtä sinagoga nitre israelitakwe yete. Erere arato, jändrän rürümo nämane ye känti Pablo namani blite arato Jesubtä köbökäkwatire nitre nämane ja ükaninkrö yete yebe. <sup>18</sup> Erere arato, nitre töbtä krikri ye nämane ni iti kädian nämane Epicúreo tukwe ye kukwei mike ütiäte abko nükani blite Pablobe. Erere arato, ni mda mda abko kädian nämane estoicos, ye abko nükani blite ben. Drekäre nita nüne kä nebtä amne dre abko era metre, yebtä abko niaratre nämane ja töitike. Niaratre ye ngätäite abko ni ruäre namani ñäke krörö Pablobtä mikakäre yakrä jae:

¡Ni ngwarbe kä jáme dokwäbti tä näin blite ngwarbe kwäräkwärä se drebtä tä blite dikaro kore se! namanintre niere.

Angwane ni ruäre abko namani niere:

Ngöbö chui menteninkwe mikaka gare kwrere se, namanintre niere Pablobtä.

Namanintre ñäke kore, ñobtä ñan angwane Pablo namani blite kukwe kuin Jesubtä yebtä amne, ni krütadre akwa, ni rükadreta nire nie namani Pablokwe. Yebtä Pablo namani tuen töi ñakare ietre, aisetet namanintre ñäke kore. <sup>19</sup> Abtä Pablo jänükani kwetre junta kädian nämame Areópago ye ngwärekri. Angwane niebare krörö kwetre Pabloye:

Kukwe ño btin dirita näin makwe nunye, ye makwe mika gare bäri mda nunye abko ie nun tö. <sup>20</sup> Kukwe bää jene btä mata blite, ye abko dre nieta makwe abko nun tö nibi gai bäri mda, niebare kwetre Pabloye.

<sup>21</sup> (Ye abko, nitre Atenabo amne ni menteni menteni nämame näne Atenas abko, käre tö nämame nebe kukwe btin btin kukwe nuai amne dre nämame näkenkä btin btin aibebtä nämame ja näkwite, aisetet namani kukwe ngwentari kore Pabloye.) <sup>22</sup> Kukwe ngwianintari kore kwetre angwane, Pablo namani nünaninkä krö niaratre ngätäite, käkwe niebare krörö ietre:

Mun Atenabo, munta ngöbötre munkwe mike bäri ütiäte, ye abko tuen kuin munbtä tie, <sup>23</sup> ñobtä ñan angwane kä jökrä käntikänti munta gätäre ngöbötre munkwe kräke, känti tita niken angwane, bati kukwe nämame tikani krörö jäbtä tikwe tuaba: NGÖBÖ GARE ÑAKARE NIE ABKO KRÄKE KÄ NETA NETE, nämame tikani kore tikwe tuaba. Akwa ye abko tä dbe, ñobtä ñan angwane Ngöbö gare ñakare munye, akwa munta käkitekä, Ngöbö ye mdan abko ti bike mike gare munye.

<sup>24</sup> Ngöbö kä temen ne dätekä amne jändräñ jökrä tä näne kä temen nebtä dätebare kwe arato. Niara abko kä käinta Dänkien amne kä temen ne Dänkien, aisetet ju mikata ni kä nebtäkwe, te niarata näne ñakare, ñobtä ñan angwane bäri chi kräke. <sup>25</sup> Mdakäre abko, ni kä nebtäkwe jändräñ nuendre kräke abko tä ribere ñakare nie, ñobtä ñan angwane ñan tä jändräñ mdei nike jire chi, akwa niara käta kä bien nünankrä nie amne tä müre bien nie amne jändräñ jökrä mda mda bianta kwe nie. <sup>26</sup> Erere arato, ni dätebare itibe kwe, ye mdenkri abko ni nena keta kabre kä nebtä, ye rabadre näne kä jökräbti temen kä nebtä abkokäre. Erere arato, nikwe nünandre kä kobe amne nikwe nünandre mdente mdente metre, ye abko ükaninte kwe ni jökrä kräke. <sup>27</sup> Ngöbökwe kukwe ükaninte kore ni jökrä rabadre Ngöbö aibe känenentari amne Ngöbö känändretari angwane, nane kwandretari nie abkokäre. Niara tä känime ni jökrä ken. Niara ñan tä mente nie. <sup>28</sup> Ne aisetet “Ngöbö köböire nita näne amne niara arabe köböire nita dikekä kwäräkwärä,” niebare ni griego itikwe. Ye mdan kisete, ni tärä tikaka mun ngätäite nete käkwe tärä tikani, btä niebare krörö kwe: “Ni abko Ngöbö ngäbriänkä kwe,” abko tikani kwe täräbtä.

<sup>29</sup> Ni Ngöbö ngäbriänkäre, aisetet Ngöbö nikwe abko oro, plata amne jä sribebare ngöböre ye nikwe ñan nütüdre, ñobtä ñan angwane Ngöbö ye abko ñan jä ngwarbe sribebare ja töi jenbti ni kä nebtäkwe abko nikwe nütüdre Ngöbötä. <sup>30</sup> Kira abti kä nüke mtare, ni jökrä töi nämame mräme kore Ngöbötä. Akwa niaratre töi mräme Ngöbötä, abtä kä nämame ja mike ngite, aisetet Ngöbökwe mikani ja ngie nuen ñakare kukwe yebtä. Akwa mtare ni nünanka kä jökräbti temen abko käkwe kukwe käme kitadre jökrä temen amne tödekadre Ngöbötä kwetre abko Ngöbota niere kore nie, <sup>31</sup> ñobtä ñan angwane mtare Ngöbökwe köbö kitanina kukwe ükatekäre kuin era metre ni jökräbe, aisetet Ngöbökwe ni dianinkä iti, köböire niarakwe kukwe ükadite ni jökräbe. Ni ye abko ni ngite Ngöbö rüere ya, ñakare ya abko niedi metre kwe ni jökrä kräke. Ni ye mdan abko krütani akwa, Ngöbökwe mikaninta niere, niarakwe ni ye dianinkä sribi ye nuenkä bää mikakäre, niebare Pablokwe.

<sup>32</sup> Ni krütani akwa rükadreta nire niebare Pablokwe, yebtä abko ni ruäre namani Pablo kukwei mike yakrä jae amne, ni ruäre abko namani niere:

Nebti nun rükadita ma kukwei nuenta bobuta mda, namani niere mda Pabloye.

<sup>33</sup> Angwane Pablokwe kä mikaninkä niaratre ngätäite. <sup>34</sup> Akwa ni ruäre nikani siba ben abko käkwe tödekani Jesubti. Nitre ye ngätäite abko ni iti kädian nämame Dionisio käkwe

tödekaní Jesubti. Niara abko sribikä ütiáte kri Junta Areópagobe arato. Erere arato, ni merire iti käkwe tödekaní Jesubti abko kädian nämene Dámaris. Angwane ni mda mda käkwe tödekaní Jesubti arato abko nakaninkä kore Pablobtä juta Atenate.

## 18

### *Pablokwe sribibare juta Corintote*

<sup>1</sup> Pablo nämene juta Atenate. Yebti nikani mda nebe juta Corintote. <sup>2</sup> Juta yete abko, ni israelita kädian nämene Aquila nämene nüne. Aquila ne abko ni Pontobo, akwa nämene nüne juta Romate kä Italia känti merire kwe Priscilabe. Niaratre nibu ye abko nükani krire juta Corintote, ñobtä ñan angwane nitre israelita nämene nüne Roma abko käkwe kä mikadrekä jökrä juta yete, niebare emperador romanobo Claudiokwe. Ye mdentbä abko, Aquila amne Priscila nämene juta Corintote angwane kwani Pabloye. <sup>3</sup> Pablo abko jändrän kwata sribekä jure, ye kwrere niaratre nämene sribere arato, aise Pablo namani nüne niaratrebe sribikäre ketetibe bentre. <sup>4</sup> Angwane köbö jadükakrä bämän kratirekratire Pablo namani niken sinagoga nitre israelitakwe yete amne, nitre israelita btä nitre griegore abko ben Pablo namani blite kisere Jesubtä. Niaratrekwe kukwe kuin Jesubtä ye mikadre era, abkokäre Pablo namani blite kore bentre.

<sup>5</sup> Abti Silas amne Timoteo nämene kä Macedonia känti abko namani Pablo jiebti mda. Ye ngwane mentokwäre Pablokwe ja töi mikani kwatibe kukwe kuin Jesubtä ye niere amne, Ni Dianinkä Ngöbökwe abko Jesu ara abko Pablo namani bä mike metre jökrä nitre israelita ye okwätä. <sup>6</sup> Akwa nitre israelita kwati abko jatani nebe romon Pablokrä kukwe diribtä, kä namani ñäke diänbe ie. Ye abko ñan namanidbe Pablokrä, abtä dän jabtä bämän grükaninte kwe niaratre rüere, niebare kwe:

Munkwe ja ngie nuadi, yebtä abko mun ara jire rabadi ngite au, aise Pablo jiebti mda. Ye ngwane mentokwäre Pablokwe ja töi mikani kwatibe kukwe kuin Jesubtä ye niere amne, Ni Dianinkä Ngöbökwe abko Jesu ara abko Pablo namani bä mike metre jökrä nitre israelita ye okwätä. <sup>6</sup> Akwa nitre israelita kwati abko jatani nebe romon Pablokrä kukwe diribtä, kä namani ñäke diänbe ie. Ye abko ñan namanidbe Pablokrä, abtä dän jabtä bämän grükaninte kwe niaratre rüere, niebare kwe:

<sup>7</sup> Bti sinagoga nitre israelitakwe, te Pablo nämene dirire, akwa nikaninta amne ni iti kädian nämene Tisio Justo nämene nüne känime sinagoga ye kwäräkri abko känti Pablo nikani dirire mda. Tisio Justo ye abko Ngöbökwe käikitakaka, känti Pablo nikani. <sup>8</sup> Ye ngwane abko, ni iti kädian nämene Crispo nämene mikani sinagoga ye dänkiene abko käkwe kukwe kuin ni Dänkienkwe mikani era, käkwe tödekaní Jesubti mräkä kwe kwe ben gware jökrä. Erere arato, nitre Corintobo kwati käkwe kukwe kuin Jesubtä kukwe nuani amne tödekaní kwetre Jesubti amne ngökani ñöte.

<sup>9</sup> Bati kä ye ngwane deo, ni Dänkien nükani blite köböre kwrere Pablobye, käkwe niebare krörö ie:

Pablo, makwe ñan kä jürä ngwian jabtä amne, kukwe kuin tibtä ye ma rika niere janknu. Makwe ñan kada keta jire chi, <sup>10</sup> ñobtä ñan angwane titä mabe amne ni jen tikwe abko tä nüne kwati Corinto nete arato, aise Pablo nikani dirire mda. Ye ngwane abko, ni iti kädian nämene Crispo nämene mikani sinagoga ye dänkiene abko käkwe kukwe kuin ni Dänkienkwe mikani era, käkwe tödekaní Jesubti mräkä kwe kwe ben gware jökrä. Erere arato, nitre Corintobo kwati käkwe kukwe kuin Jesubtä kukwe nuani amne tödekaní kwetre Jesubti amne ngökani ñöte.

<sup>11</sup> Ye mdentbä, Pablokwe nünabare jäme kä kwati bti ötare nitre Corintobo ngätäite, käkwe Ngöbökwe kükwe diribare ietre.

<sup>12</sup> Abti bati Jesukwe kukwe niebare Pabloye, ye namani bare krörö: Ni iti kädian nämene Galión namani gobrane kä Acayabti gobran romanobo kräke angwane, nitre israelita käkwe ja ükaninkrö Pablo rüere, kä nikanintre ngwena nebe gobran ngwärerekri.

<sup>13</sup> Angwane niebare krörö kwetre Galiónye:

Ngöbökwe mikadre ütiáte bämän jene abko ni ne tä näin niere ni jökrä töi kwitakäre, aise Pablo jändrän kwata sribekä jure, ye kwrere niaratre nämene sribere arato, aise Pablo namani nüne niaratrebe sribikäre ketetibe bentre.

<sup>14</sup> Yebtä abko Pablo jababare blite au jakrä, akwa Galión ara jire käkwe ñäkäbare käne mda nitre israelitaye:

Ni ne kákwe ja mikani ngite krübäte angwane, kukwe nuenbare kwe ni mda rüere ne ngwane, tikwe mun israelita kukwei nuadre. <sup>15</sup> Akwa niara tä kukwe dirire amne ni kä ño ño amne, kukwe ükaninte ño nuendre mun israelitaye, aibebtä tä blite. Ye abko munkwe ükate ja ngätäite, ñobtä ñan angwane ti ñan tö ja mikai kukwe munkwete ta, niebare kore Galiónkwe.

<sup>16</sup> Bti nitre israelita ye kitamnanta jökrä künken gobrankwe. <sup>17</sup> Angwane ni nämane mikani sinagoga dänkiene kädian nämane Sóstenes, ye neketaninte nitre griegoye amne nikanintre mete ja käne kwäräkwärä se kwrere gobran Galión ngwärekri. Akwa Galión abko namani töbikaire ñakare amne namani kwekbe jirekäbe.

#### *Pablo nikantia juta Antioquía, Siriate*

<sup>18</sup> Yebti Pablo namani nüne bä raire mda juta Corintote. Abti köbö ngwianintari mrä kwe ja mräkätre tödekaka Jesubtiye, bti nikani juta Cencreate Corinto ken, känti nakwani rute rikakäre kä Siriate mda. Ye ngwane abko, Priscila amne Aquila nikani siba ben. Akwa Pablo ngämi niken rute, ye känenkri abko ja kukwei biani kwe Ngöböye, ye bä mikakäre abko ñan namani ja dokwä drüen tikekä, akwa kukwe mikani bare täte kwe, aisetet ja dokwä drüen tikaninkä jökrä kwe jae Cencreate, bti nikantia rute. <sup>19</sup> Ru nikani, nikani, bti nikani mate juta Efesote angwane, Pablokwe Priscila amne Aquila mikaninte, bti niara abko nikani sinagoga nitre israelitakwete. Ye känti nitre israelita nämane ja ükaninkrö abko ben Pablokwe blitabare Jesubtä. <sup>20</sup> Angwane Pablo rabadre bäri raire yete, ie nitre israelita tö namani, kä namani ketete, akwa ñan nükaninbti ie. <sup>21</sup> Ye aisetet, köbö ngwianintari mrä kwe ietre, kákwe niebare krörö:

Ti rükadreta basare munye nete, ie Ngöbö tö ne ngwane, nikwe ja tuaita, niebare kwe ietre.

Bti Pablo nakwaninta rute, nikantia juta Efeso bäre mento. <sup>22</sup> Angwane ru nikani, nikani, bti nikani nebe juta Cesareate mda. Ye känti nikani jate, kä nikani Jerusalén köbö ngwentari ja mräkätre tödekaka Jesubti Jerusalénbo yeye. Yebti nikani ta nebe juta Antioquía, Siriate mda.

#### *Apolos kákwe sribibare juta Efesote*

<sup>23</sup> Yebti kä nikantina bä raire ta angwane, Pablo nikantia basareta kwäräkwärä amne, nikani juta kwatirekwatire te kä Galacia känti amne kä Frigia känti ja mräkätre tödekaka Jesubti die mike nüne käre Jesukrä.

<sup>24</sup> Kä ye ngwane abko, ni israelita nükani iti juta Efesote. Niara abko kädian nämane Apolos. Akwa Apolos ye abko ni juta Alejandríabo abko nämane blite kuin amne ja tötitikani kuin Ngöbö Kukweibtä kwe arato. <sup>25</sup> Erere arato, Ji ni Dänkienkwe diribarera kuin ie amne, kä namani nuäre btä kukwe kuin Jesubtä dirire kuin era metre. Akwa kukwe diribare Juan Bautistakwe aibe nämane gare ie. <sup>26</sup> Ye aisetet, bati sinagoga nitre israelitakwe känti Apolos nämane dirire angwane, kukwei nuani Priscilakwe amne Aquilakwe. Yebti Priscila amne Aquila nikani Apolos ngwena jenena temen, bti Ji Ngöbökwe mikani gare bäri metre mda kwetre ie. <sup>27</sup> Abti Apolos tö namani rikai kä Acayate mda angwane, ja mräkätre tödekaka Jesubti kákwe niara die mikani niken Ngöbö diebti amne ja mräkätre tödekaka Jesubti Acayate kákwe Apolos kadre ngäbti kuin, abkokäre tärä tikani ja mräkäkwe ngwiandre ie. Ye erere Apolos nikani, namani Acaya angwane, ja mräkätre tödekaka Jesubti ye die mikani kri kwe. Ngöbö moto kuin köböire ja mräkäkwe tödekani Jesubti abko die mikani Apolokwe abko krörö: <sup>28</sup> Jesu abko Ni Dianinkä ñakare Ngöbökwe abko nitre israelita nämane dirire, akwa ni jökrä ngwärekri, Jesu abko Ni Dianinkä Ngöbökwe ara abko Apolos namani bä mike metre tärä Ngöbökwebti, aisetet nitre israelita ñan rabadre kukwe ye rükente abko nakaninkä kore kä Acaya känti.

<sup>1</sup> Abti Apolos nämane juta Corintote angwane, Pablo nämane kä Galacia känti amne kä Frigia känti, nikani mintrinta temen ngudre ngrabare amne nikani nebe juta Efesote mda. Ye känti bati nitre ja töitikaka Jesu kukweibä nämane ruäre abko ben namani ngätäi. <sup>2</sup> Angwane niebare kwe ietre:

¿Munkwe tödekaní Jesubti, ye ngwane Ngöbö Üai Deme nükani munbtä ya? niebare kwe ietre.

Angwane niaratre käkwe niebare mda Pabloye:

Nunkwe ñan ni kukwei nuabare blite Ngöbö Üai Deme btä, niebare kwetre.

<sup>3</sup> Angwane Pablokwe niebareta krörö mda ietre:

¿Se abko, nirekwe mun ngökani ñöte? niebare Pablokwe ietre.

Angwane niaratre käkwe niebare mda:

Ja ngökadre ñöte diribare Juan Bautistakwe, ye kwrere nunkwe nuenbare, niebare kwetre ie.

<sup>4</sup> Abtä Pablokwe niebare mda ietre:

Ni jökrä kä nämane kukwe kämekäme kite jökrä temen amne nämane Ngöbö mike tätä, ye bä mikakäre Juan nämane ni ngökö ñöte. Akwa ni mdara jire jatani niara jiebti abko bti tödekadre, niebare kwe. Ni ye abko Jesu ara, btä blitabare kore Juankwe, niebare Pablokwe ietre.

<sup>5</sup> Pablokwe blitabare, ye jarabare ja mräkätre yeye angwane, ngökanintre jökrä ñöte kwe ni Dänkien Jesu käbti. <sup>6</sup> Angwane Pablokwe kise mikani btitre, ye btäräbe Ngöbö Üai Deme nükaninbe btätre angwane, namani blite kukwe jenenanbti btä ja töitike ñakare ñakare amne namanintre Ngöbö kukwei niere arato. <sup>7</sup> Nitre namani yete ye abko bäsí ni brare be ni jätäbti nibu näre nämane ja ükaninkrö abko btä kukwe nakaninkä kore.

<sup>8</sup> Abti sö krämä jire Pablo namani niken sinagoga nitre israelitakwe te köbö jadükakrä näire. Angwane kä jürä namani ñakare btä blitare Ngöböbtä amne, ni Dänkienta gobrane ño ni kwekwe ngätäite abko ni mda mda käkwe mikadre era, abkobtä Pablo namani blite kisere bentre niaratre töi kwitakrä Jesukri. <sup>9</sup> Akwa sö krämä nikani ta angwane, ni ruäre käkwe ja dokwä mikani ribi abko kräke Pablo kukwei ñan namani era, aiseté ni jökrä okwäbti namanintre ñäke blo Ji Btin ye rüere. Abtä Pablokwe kä mikaninkä btätre sinagogabtä amne, nitre ja töitikaka kukwe kuin Jesukwebtä aibe Pablokwe ngwiani jabe amne nikanintre nebe kwela Tiranokwete. Ye känti Pablo namani dirire köbö kwatirekwatire ietre. <sup>10</sup> Pablokwe diribare kore kä kubu jire kä ye känti, aiseté nitre israelita amne nitre ñakare israelitare nämane nüne kwati kä Asiate, ye käkwe kukwe kuin ni Dänkien Jesubtä kukwei nuani kuin jökrä.

<sup>11</sup> Kä ye ngwane abko, Ngöbökwé sribi kri ñan tuabare nuenbare kri krübäte Pablo köböire, <sup>12</sup> aiseté dän kukwän ja dokwä amne ja ngüre jue mriatekrä namani neketekä jirekäbe Pablötä, ye abko jänamani niken amne mika namani ni bren brenbti angwane, ni bren ye namani nebetta kuinta batibe Ngöbö diebti amne, üai käme namani ni brenbtä, ye namani niken jötrö ngwarbe mento btä arato, aiseté namani nebetta kuin jökrä.

<sup>13</sup> Akwa bati kukwe nakaninkä krörö: Ni israelita ruäre nämane näin kwäräkwärä üai kämekäme juentari ni mda mdabtä abko tö namanintre sribi nuein ni Dänkien Jesu käbti, kä namanintre niere krörö üai kämeye: Jesu ye, btä Pablota kukwe dirire, Jesu ye käbti näin mento ni nebtä, namanintre niere üai kämeye. <sup>14</sup> Ni israelita iti blitaka ni mda mda diäre Ngöböbe dänkien kädian nämane Esceva abko ngäbriänkä ni kükü kä nämane üai käme juentari kore. <sup>15</sup> Akwa bati ni ni kükü ye nämane ni bren gwiriete üai käme juantarikäre kore angwane, batibe üai käme käkwe niebare krörö ietre:

Jesu garera kuin tie amne Pablo abko nire garera tie arato, akwa ¿mun abko nire amarebti kite ti juentari kore ye? niebare kwe ietre.

<sup>16</sup> Ye btäräbe, ni btä üai käme nämane ye nakwani nitre yebtä, kä nikani mete ja dibti kwäräkwärä se kwrere, käkwe niaratre mikani bren jökrä ngrabare amne, ngitiani bütiere jökrä ju ye känti mentokwäre amne namani träinträin jökrä ngrabare. <sup>17</sup> Abtä nitre israelita amne nitre ñakare israelitare nünanka juta Efesote käkwe kukwe ye gani

angwane, kä jürä namani kri btätre. Ne kwrere ni Dänkien Jesu kä nikani nebe bari ütiäte kä ngrabare temen.

<sup>18</sup> Kä ye ngwane abko, ni kwati käkwe tödekaní Jesubti, käkwe kukwe nuenbare kämekäme aune ngürün mikani ni mdabtä ja kukweibti, ye namani nüke niere metre ja ngwärerekri jökrä. <sup>19</sup> Erere arato, ni kwati kwrarekwrate amne ni kwati nämane ja mike sukiare abko käkwe täräkwata ja tötitikakrä kwetre rabakäre kwrare amne sukiare, ye ükaninkrö jökrä, bti jatani ngwena, bti kukwani jökrä kwetre ni jökrä okwäbti. Tärä kukwani kwetre ye abko ngwian kitankä, nuäi btä kwetre abko tanbare angwane, ngwian ganinte 50 mili kwetre tärä yebtä. <sup>20</sup> Ye kwrere kukwe kuin ni Dänkienkwe nikani niren bari mda amne Ngöbö di kri nikani neme gare ni jökräye arato.

<sup>21</sup> Kukwe nakaninkä kore, yebti Pablo jatani yäketa basare ja mräkätreye Macedoniate amne Acatayate mda. Ye känti rikadre neme mda Jerusalén. Jerusalén känti abko rikadre ta neme juta Roma niebare kwe. <sup>22</sup> Akwa niara ngämi niken, ye känenkri sribi muko kwe juani nibu käne kwe nebe kä Macedonia känti. Nitre juani nibu Pablokwe ye abko Timoteo amne Erasto juani käne kwe, akwa Pablo abko namani bäräraire mda kä Asiate.

### *Ngöbö ngwarbe mikaka era käkwe rübare Pablobe*

<sup>23</sup> Kä ye ngwane abko, Ji Btin diribare Pablokwe, yebtä abko ni ruäre Efesobo namani ngüdrekä krübäte ja ngätäite, <sup>24</sup> ñobtä ñan angwane ni iti kädian nämane Demetrio nämane plata sribere ju ngöbö Dianakwe bärä kwrere abko käkwe kukwe mikanintbe Pablo rüere, aise te ni jökrä namani ngüdrekä kore. Demetrio ye abko nämane plata sribere kia nuärebe abko btä nämane ju ngöbö Dianakwe bärä mike nuäre. Yebti abko nämane ngwian ganaine kabre amne nitre sribikä niara kwrere nämane ngwian ganaine kabre arato. <sup>25</sup> Ne aise te ni mda mda nämane sribere ja kwrere Demetriobe abko Demetriokwe ükaninkrö jökrä ja känti, bti niebare kwe ietre:

Ja mräkä, sribi nikwe, nebti nita nüne kuin, ye garera munye. <sup>26</sup> Akwa ni nükani iti nete kädianta Pablo. Ye nena gare munye amne munta tuen. Niara ye abko tä näin niere krörö: Jändrän sribeta ngöböre ni kä nebtäkwe abko ñakare ngöbö era metre, tä niere. Yebti tä ni kwati töi kwite jakri, ne ñan ni juta Efesote nete aibe töi kwitata kwe amne, ni kä Asiate abko töi kwitata kwati krübäte kwe arato. <sup>27</sup> Ye abko, kukwe tare krübäte nikrä, ñobtä ñan angwane jändrän rürümointa nikwe, ye juandi ngwarbe jökrä kwe nikän. Erere arato, ju ngöbö Diana ñan mikadre ütiäte mda, akwa mikadre ngwarbe jae nitre Asiabokwe amne, ni kä jökräbti kräke rabadre ütiäte ñakare mda arato ruen tie, niebare Demetriokwe.

<sup>28</sup> Abtä nitre Demetrio kukwe nuaka moto namani romon krübäte, käkwe ngratebare krikri krörö:

¡Diana ngöbö nitre Efesobokwe aibe ütiäte kri! namanintre niere.

<sup>29</sup> Yebtä abko, ni jökrä kwe kä namani nokre juta Efesote angwane, ni Macedoniabo nämane näin nibu Pablo mukore kädian nämane Gayo amne Aristarco, ye abko neketaninte nitre yeye, bti nikani jäke, nikani kitekä ja käne nebe kä gätäkrä ye känti. <sup>30</sup> Abtä Pablo tö namani rikai kä ye känti ñäkäkäre nitre yeye akwa, ja mräkätre tödekaka Jesubti käkwe ñan Pablo gibianinkä niken yete. <sup>31</sup> Erere arato, Pablo kukwe muko ruäre nämane sribire gobrane kä Asiate käkwe kukwe juani krörö Pablokä: Kä gätäkrä ye känti ma ñan rikadre abko niemna kwetre Pabloye.

<sup>32</sup> Akwa gätä nämane, ye känti abko ni jökrä namani ñäke ngwarbe ja te tata kwäräkwärä, ñobtä ñan angwane ni jökrä nämane kä mike nokre, akwa drekäre ja ükaninkrö kwetre abko ñan nämane gare ni kwatiye akwa, nämane siba yete. <sup>33</sup> Abtä nitre israelita käkwe ja mräkä iti kädian nämane Alejandro kitankä nebe blite ni jökrä ngwärerekri nitre israelitakrä. Angwane dre niedre abko ni ruäre käkwe niebare Alejandro. Angwane ni jökrä rabadre kwe amne, Alejandro muko blitadre nitre israelitakrä abko niebare kisebti kwe ni jökräye. <sup>34</sup> Akwa Alejandro abko ni israelita gani nitre ñakare israelitare Efesobokwe btä angwane, ñan tö namani niara kukwei nuai,

aisete namani ngrente krikri bäsí ñänä okwä krobu näre krörö: ¡Diana nitre Efesobokwe aibe ütiäte kri! namanintre niere.

<sup>35</sup> Abtä ni mikani sribire alcalde kwrere nitre romanobokwe juta Efesokrä käkwe nitre ye kukwe ötani jökrä, bti niebare krörö kwe ietre:

Mun nünanka juta Efesote nete, ngöbö merire ütiäte kri Diana abko kwe juta nete amne niara bäsí ara jire mikani jäbtä nämane kä käimhti abko nükani temen kä nebtä, ye abko ni nünanka juta nete tä mikani ngibiatikä, ye garera ni kä jökräbti yeye. <sup>36</sup> Ye aisetet ni mda ñan rabadre kukwe ye rükente jire chi, aisetet mun rabadre kwekbe jirekäbe amne munkwe ñan jändrän nuen ngwarbe okwä kware. <sup>37</sup> Ni nibu jänü munkwe nete noko käkwe kukwe blo nuenbare ñakare ju ngöbö Dianakwe rüere amne ñäke ñakare arato ngöbö Diana rüere.

<sup>38</sup> Akwa Demetrio amne sribikä mda mda niara kwrere, kwe kukwe tärä ni mda mda rüere ne ngwane, ju tärä kukwe ükatekrä kritobo krikri ngwärekri, aisetet niaratre rikadre kukwe kwe ngwena nebe kritobo krikri ngwärekri amne ja kweta kwärikwäri kwetre kukwe jen kwe yebtä. <sup>39</sup> Akwa mun tö blitai kukwe mda mdabtä ne ngwane, kukwe ye järikadre nebe gätäte amne blitadre ja ngwärekri jökrä btä abko tita niere munye, <sup>40</sup> ñobtä ñan angwane kukwe nakaka mtare, sebtä nita ngüdrekä ngwarbe amne nita kä mike nokre niedre nibtä, abtä ni rabadre ngite nitre romanobo okwäbti amne kukwe ñan kwandre niedre nie jabtä. Erere arato, ¿ñobtä nita ngüdrekä amne ñobtä nita kä mike nokre ngwiandretari nie, yebtä nikwe dre niedre? Abko kore se, niebare kwe ietre. <sup>41</sup> Yebti ni jökrä juaninta kwe ja gwiriete gwiriete kwäräkwärä.

## 20

### *Nitre tödekaka Jesubti kä Macedonia amne kä Acayate, ie Pablo nikaninta basare*

<sup>1</sup> Kä namani nokre juta Efesote, ye tähti Pablokwe nitre tödekaka Jesubti kärääbare jökrä ja känti, käkwe blitabare amne niaratre kitani nüne janknu Jesukrä. Yebti Pablokwe köbö ngwianintari mrä ietre, bti nikani Macedonia mda. <sup>2</sup> Pablo namani Macedonia angwane, nikani basare kä jökräbti temen ja mräkätre tödekaka Jesubti Macedonia amne, käkwe blitabare kabre ja mräkätre yebe kä mikakäre nuäre btätre. Abti Pablo nikani nebe kä Acaya, Grecia känti mda. <sup>3</sup> Namani Grecia, ye känti nünabare sö krämä kwe. Abti jatanina niken rute rikakäre kä Siriata angwane, nitre israelita nämane kämika braire abko gani kwe. Abtä nikaninta jirekäbe gürere ja jiebti Macedonia känti ta. <sup>4</sup> Ye ngwane abko ja mräkätre rikaba ruäre Pablo mukore abko nere: Sópater nikani. Sópater ye abko ni juta Bereabo. Niara abko Pirro ngobo kwe. Erere arato, Aristarco btä Segundo Tesalónicabo rikaba. Mdakäre abko, Gayo juta Derbebo amne Timoteo, Tíquico btä Trófimo kä Asiabo rikaba siba Pablo mukore nebebe Macedonia känti. <sup>5</sup> Ye känti ja mräkätre ye abko rikaba käne rute, rababa nun ngibiare juta Troate. <sup>6</sup> Akwa nun abko käkwe Pascua mikaba niken ta juta Filipote. Pascua rikaba ta, tähti nun rankwaba rute juta Filipote angwane, nunkwe nuaba köbörake jire amne, nun rikaba ngätäi ja mräkätre rikaba käne rute yebe juta Troate. Kä ye känti nun rababa bämän kratit.

### *Ni iti kädian nämane Eutico mikaninta nire juta Troate*

<sup>7</sup> Yebti köbö kena bämänte, nunkwe ja ükakröba jökrä mrökäre jabe Jesu ngatani ngwiankäreta töre jae amne, nitre tödekaka Jesubti, ie Pablo näma dirire. Pablo rababarata yäketa jetbe se kwrere, aisetet rikaba blite janknu abko kä jataba nüke ruäre deo. <sup>8</sup> Angwane kukwe rakakaba krörö: Ju mikani komä jabti kukwäne abko känti nun näma amne, ju mrä käin ninkri, känti nun näma ja ükaninkrö amne, ñotra näma mikani kabre gwita temen, känti nun näma. <sup>9</sup> Angwane ni batí kädian nämane Eutico abko näma siba yete, akwa näma täkänintbe bentanante ni kukwe nuen. Pablokwe blitaba raire, aisetet köbö namani krübäte Eutico okwäte. Rikaba kibien nguseta bentanante yete, känti betakaba timon ju komä jabti kukwäne känti nun nämane mrä käin ninkri, ye känti Eutico betakaba timon, aisetet rikaba ngitiekä ngwákäre temen. Yebti gakrögata amne

rababa kwekbe. <sup>10</sup> Angwane Pablo rikabata timon, käkwe ni bati ye ngwäkä ketaba jabtä ja kisete, bti nieba krörö kwe ja mräkätreye:

Ni ne tä nire, aisetet mun ñan rekwtaka jiebti, nieba kwe ietre.

<sup>11</sup> Yebti Pablo rikabata kukwäne rababata gwi angwane, nunkwe mröba gware Jesu ngatani ngwiankäreta töre jae. Angwane Pablo rikaba blite janknu, aisetet kä rükaba ngwen ie blitabtä. Yebti dekä angwane rikabata. <sup>12</sup> Akwa ni betakaba timon ye abko näma nire amne järikabata mräkäkwe, aisetet kä rababa nuäre krübäte ja mräkätrebtä yete. Ne abko rakakaba kore juta Troate.

### *Pablokwe köbö ngwianintari mrä ja mräkä juta Efesoboye*

<sup>13</sup> Yebti nun rankwaba rute amne nun rikaba nebe käne juta Asónte Pablo ngäbti. Nun janama Pablo tuen ngäbti kore, ñobtä ñan angwane niara tö rababa näin gürere jateta temen abko erere rikaba. <sup>14</sup> Ne aisetet nun rababa ngätäi ben juta Asónte angwane, rankwaba rute nunbe, bti nun rikaba nebe juta Mitilenete mda. <sup>15</sup> Yebti jändrinane angwane, nun rikaba ta angwane, nun rikaba känime kä butu kädian nämane Quío ngware ta. Abti jändrinane angwane, nun rikaba mate mren köräbti juta Samote. Yebti nun rikaba mate kä Trogilio känti. Abti jändrinane angwane, nun rikaba mate juta Miletote. <sup>16</sup> Nun rikaba jötrö kore, ñobtä ñan angwane Pablo ñan tö namani rabai neketebtä raire dikaro kä Asiate, aisetet nun ñan rikaba juta Efesote. Pablo tö rababa rikai jötrö nebe Jerusalén, ñobtä ñan angwane Pentecostés köböi, btä niara tö rababa kwain arato juta Jerusalén, aisetet nun rikaba metre ta kore.

<sup>17</sup> Pablo näma juta Miletote angwane, nitre ni tödekaka Jesubti jie ngwianka Efesote abko Pablokwe ni juanba iti niaratre kärere nüke ja känti. <sup>18</sup> Erere bkänä, nitre tödekaka Jesubti jie ngwianka ye rükaba nun känti angwane, nieba krörö kwe ietre:

Ti rükaba kena mun ngätäite kä Asiate nete abti kä nüke mtare tikwe nünanba ño mun okwäbti ye töre kuin munye abko krörö: <sup>19</sup> Nitre israelita käre näma kukwe miketbe taretare ti rüere, kä näma ti nike krübäte akwa, käre ti näma sribire ja moto jämenbti ni Dänkienkrä mun ngätäite. Ti näma bike tidrä ni mda mdabtä amne ti näma ja müaire arato. <sup>20</sup> Akwa tikwe kada ketaba ñakare, käkwe kukwe kuin mun die mikakrä, ye abko tikwe diriba täte janknu munye, amne ti näma dirire ja ngwärekri jökrä amne ju kwatirekwatire te munye. <sup>21</sup> Ne mden aisetet, nitre israelita amne ni ñakare israelitare käkwe kukwe käme kitadre temen amne jatadreta Ngöböye, käkwe tödekadre ni Dänkien Jesubti abko ti näma dirire ietre abko erere ti näma sribire mun ngätäite.

<sup>22</sup> Mtare Ngöbö Üai käta ti juenta Jerusalén, aisetet ti bike nikenta akwa, dre rakadikä tibtä yete abko gare ñakare tie. <sup>23</sup> Akwa juta kwatirekwatire te ti näin abko ti kitadi ngite kä teri amne tikwe ja tare nikadi krübäte abko Ngöbö Üai Deme käta niere, ne aibe gare kore tie. <sup>24</sup> Akwa kukwe kuin Jesubtä, mden käta Ngöbö ni tarekä ja moto kuinbti niere, ye tikwe kädriedre ni jökräbe abko sribi mikani ti kisete ti Dänkien Jesukwe, ye aibe abko ti tö mikai neme bare täte jökrä kä ngwiane nuäre jabtä, aisetet titä nüne ya, ñakare ya abko ütiäte ñakare tikrä.

<sup>25</sup> Mtare Ngöbota gobrane ño ni kwekwe ngätäite, ye tikwe diribare munye. Mun ye abko käkwe ñan ti tuadreta mda abko gare kuin tie. <sup>26</sup> Ye aisetet nire nire kä Asiate käkwe ñan Ngöbö kukwei mikani era jae, abtä ja ruen ngite ñakare tie, <sup>27</sup> ñobtä ñan angwane Ngöbota kukwe miketbe ño ni diantarikäre Jesu köböire abko tikwe niebare jökrä munye amne tikwe kukwe era erere rükaninte ñakare munye arato. <sup>28</sup> Ne aisetet munkwe ja ngibia au amne, nitre tödekaka Jesubti kökani Ngöbökwe Jesu däriebti jakrä abko Ngöbö Üai Deme käkwe mun mikani ngibiaka, ye munkwe ngibia kuin arato, <sup>29</sup> ñobtä ñan angwane ti näinta, abti lobo romon tä kite obeja kämike kwetadre jae, ye kwrere jire ni jatadi bätäkä ngwarbe nitre tödekaka Jesubti rüere juankäre ngwarbe. <sup>30</sup> Ne abko ni ruäre mun ngätäite akwa, jatadi ni ngökö arato, nitre tödekaka Jesubti diankäre jakri, ye abko gare kuin tie. <sup>31</sup> ¡Ye aisetet munkwe mokre jabti! Kä komä jire, dibire rare müare

kwärä, tikwe mun mikaba mokre kukwe ne kwrere känenkri, ye abko mun itire itire käkwe ngwianta töre jae.

<sup>32</sup> Ja mräkätre, mtare ti bike mun mike gare Ngöböye. Erere arato, ti bike mun mike gare kukwe kuin Ngöböke yeye. Ngöböta ni tarere ja moto kuinbti, ye abko niara kukwei kuin tä mike gare nie. Kukwe kuin Ngöböke ye raba mun die mike nüne bäri dite Ngöbökrä amne, nitre mikani deme Ngöböke, kräke Ngöböke kukwe ükaninte die mikakäre kä mrä angwane, ye ben gware mun die mikadi siba kwe abko kukwe kuin Ngöböke tä mike gare nie. <sup>33</sup> Ti näma Ngöbö Kukwei dirire mun ngätäite angwane, tikwe ñan ngwian amne dän ni mda mdakwe ribeba jae. <sup>34</sup> Akwa tikwe sribiba ja kise jenbti jakrä amne, ni mda mda näma sribire tibe, ye kräke tikwe sribiba, ye gare kuin munye. <sup>35</sup> Ne aisetet sribidre ño jen jakrä amne ni mda mdakwe jäandrän ñakare abko die mikadre bti, ye abko tikwe diriba munye. Kukwe ne kwrere, btä ni Dänkien Jesu käkwe blitabare bati, ye abko tädre töre käre nie, abkokäre niebare krörö kwe: Nita jäandrän bien ni mdaye, btä käta neme bäri nuäre nibtä ni jäandrän kaka ngäbti ye ngwä, niebare ni Dänkienkwe. Abko kore se, nieba Pablokwe ietre.

<sup>36</sup> Pablokwe blitaba ünän jökrä kore, bti rababa ngukudokwäbti temen, käkwe blitaba Ngöböbe ja mräkätre näma ben yete yebe. <sup>37</sup> Angwane müare kwärä, ni jökrä käkwe küde kitaba mrä Pablo ngärä, kä rababa Pablo demaine ngwärebtä kwärikwäri. <sup>38</sup> Akwa Pablo ñan tuadreta mda nieba kwe, yebtä abko ni jökrä moto rababa ulire ulire. Nebti rikaba Pablo mukore nebe ru känti.

## 21

### *Pablo nikani Jerusalén*

<sup>1</sup> Ja mräkätre Efesobo rababa nunye angwane, nun rankwabata rute, bti nun rikaba metre nebe kä butu kädian nämane Cos känti. Bti jändrinane nun rikaba ta nebe juta Rodate. Ye känti nun rikaba mda nebe mren köräbti juta Pátarate. <sup>2</sup> Pátarate yete abko, ru näma krati mda abko jataba niken kä Fenicia känti abko te nun rankwaba mda.

<sup>3</sup> Angwane nun rikaba amne kä butu Chipre yebtä nun okvä rababa amne, nun rikaba janknu ta kä butu Chiprete, ye rabakaba nun küde ngeberekri amne, nun rikaba mate juta Tiro kä Siriate angwane, tribe mikateba kwetra yete. <sup>4</sup> Juta yete ja mräkätre tödekaka Jesubti kwanba nunye amne, nun rababa bämän krati niaratrabe yete. Angwane Ngöbö Üai Deme köböire Pablo ñan rikadre nebe Jerusalén abko ja mräkä ye rababa niere kisere Pabloye. <sup>5</sup> Akwa kä rikaba bämän krati ta angwane, nun jataba yäketa angwane, ja mräkätre yete merire, brare amne ngäbäkre kwe kwe rikaba jökrä nun mukore neme mren köräbti juta bäre mento. Ye känti nun rababa ngukudokwäbti temen, käkwe blitaba Ngöböbe. <sup>6</sup> Bti nunkwe köbö ngwiantariba mrä jae kwärikwäri angwane, nun rankwabata rute amne ja mräkätre abko rikabata jökrä ja gwiriete.

<sup>7</sup> Nun näma juta Tirote, bti nun rikaba ta amne nun rikabata mrä rute mrenbti amne nun rababa juta Tolemaida. Ye känti nun rikaba jate nebe jutate amne, ja mräkätre tödekaka Jesubti näma yete abko, ie nunkwe köbö ngwiantariba, bti nun rababa kibien yete. <sup>8</sup> Jändrinane dekä, nun rikaba gürere ta nebe juta Cesareate mda. Angwane ni kukwei kuin Jesubti kädriekä ni mda mdabe näma iti yete abko kädian nämane Felipe, känti nun rababa. Felipe ye abko ni dianinkä ni kükü ni mda mda die mikaka juta Jerusalénte ye mden abko nämane yete, känti nun rababa. <sup>9</sup> Felipe abko ngänkän batí kaibekaibe näma nibkä gwi. Niaratre abko Ngöbö kukwei niekä.

<sup>10</sup> Nun rababara raire yete angwane, ni Ngöbö kukwei niekä kä Judeabo kädian nämane Agabo rükaba nun känti. <sup>11</sup> Rükaba nun ngwärekri noko kwrere, käkwe dän kukwän ja mäkätekrä ötöbu ta nämane Pablottä, ye diankaba kwe, bti ja kise amne ja ngoto mäkäteba jökrä kwe, bti nieba krörö kwe:

Dän kukwän ja mäkätekrä ne bkänkä abko nitre israelita käkwe mäkädite krörö Jerusalén, bti biandi nitre ñakare israelitareye kitadre ngite abko nieta kore Ngöbö Üai Demekwe. Abko kore se, nieba Agabokwe.

<sup>12</sup> Agabokwe blitaba kore, ye kukwei jaraba nunye amne ja mräkätre Cesareaboye angwane, Pablo ñan rikadre Jerusalén abko nun rababa ribere kisere ie. <sup>13</sup> Akwa Pablo käkwe nieba krörö mda nun käre:

Ti mäkadrete kräke tita biare. Erere arato, ti müre ketadre Jerusalén ti Dänkien Jesu dokwäre, kräke tita juto biare arato. ¿Ye ñobtä mun nibi müen amarebti mun nibi ti moto mike bäri ulire mda yere? nieba kwe nunye.

<sup>14</sup> Pablo töi rikwitaba ñakare nunye, abtä rababa jirekäbe nunye amne nunkwe nieba krörö mda:

Ni Dänkien tö dreye, ye erere raba bare, nunkwe nieba.

<sup>15</sup> Abti nunkwe ja mikaba juto jökrä, bti nun rikaba Jerusalén. <sup>16</sup> Angwane ja mräkätre Cesareabo tödekaka Jesubti rikaba ruäre nun mukore. Niaratre ye abko rikaba nun ngwena nebe ni iti kädian nämane Mnason juete, känti nun rababa. Mnason ne abko ni Chiprebo amne, nitre tödekaka Jesubti ngätäite niarakwe tödekani bäri käne Jesubti ni mda mda ben gware arato.

#### *Pablo nükani Jerusalén, känti gätäba Santiagobe*

<sup>17</sup> Yebti nun rikaba nebe Jerusalén. Angwane ja mräkätre tödekaka Jesubti, btä kä rababa nuäre nun kare ngäbti. <sup>18</sup> Abti jändrinane angwane, Pablo rikaba nunbe basare Santiagoye. Nun rikaba Santiago känti amne, ja mräkätre tödekaka Jesubti jie ngwianka näma ja ükaninkrö jökrä yete, känti nun rababa. <sup>19</sup> Angwane Pablokwe köbö ngwiantariba jökrä ietre, bti sribi Pablokwe ye köböire Ngöbökwe dre nuenbare nitre ñakare israelitare ngätäite, ye Pablokwe nieba jökrä ja täritäri ietre. <sup>20</sup> Pablokwe blitaba kore, yebtä abko ja mräkätrekwe Ngöbökwe käkitakaba, bti nieba krörö kwetre Pabloye:

Ja mräkä, nitre israelita mili kabre käta tödeka Jesubti nete tä tuen mae. Ye abko Kukwe Biani Ngöbökwe Moiséye abko erere mikadre täte jökrä, tätre niere. <sup>21</sup> Akwa Kukwe Biani Ngöbökwe Moiséye abko nitre israelita nünanka kä mdabti nitre ñakare israelitare ngätäite käkwe ñan mikadre täte abko mata dirire ietre abko ni mda mda käta niere ngwarbe ma rüere ietre. Erere arato, ngäbäkre brare kiakia abko ñäräkrä mikadre ñakare kwatabtä mata niere amne, nitre israelita tä nüne ño, ye kwrere ñan nuendre mda, mata niere abko ni mda mda käta niere ngwarbe ma rüere ietre arato.

<sup>22</sup> ¿Aisetekwe dre nuendre kukwe ye bä mikakrä ngwarbe? Ma nükaninta nete gadi ja mräkätrekwe. <sup>23</sup> Aisetekwe makwe jändrän krörö nuendre abko rabadre bäri kuin ruen nunye: Ni brare nibkä tä nun ngätäite nete käkwe ja kukwe biani Ngöböye abko erere mikadre täte kwetre. <sup>24</sup> Ni ye abko ma rika ngwena jabe, ben makwe ja mika dbe Ngöbökwe ngwärekri, Moisékwe nuemna ño ye kwrere amne, jändrän kukwadre Ngöbökwe käkitakakäre, ye makwe ütiä bian jökrä kräke. Niaratre käkwe kukwe nuendre täte jökrä, ye bä mikakäre niaratrekwe ja dokwä drüen mikadi tikadrekä jökrä. Makwe nuendre kore kräke, ne köböire blitata ngwarbe ma rüere gadi ni jökräkwe mabtä. Erere arato, Kukwe Biani Ngöbökwe Moiséye abko mata mike täte, ye abko gadi kwetre arato. <sup>25</sup> Akwa nitre ñakare israelitare käkwe tödekani Jesubti abko kräke nunkwe kukwe ükaninte ño, ye erere nunkwe juanina kräke abko krörö: Ngri biani ngöbökwe ngwarbe mikakrä ütiäte ñan kwetadre kwetre. Ngri därie amne jändrän kämikaní köbti ñan kwetadre kwetre arato. Mdakäre abko, ñan ja mikadre gure batibati kwetre. Ne abko nunkwe tikani kore kräke, aisetekwe kukwe ne aibe mikadre täte kwetre. Abko kore se, niebare Santiagokwe Pabloye.

<sup>26</sup> Ye erere bkänä, Pablo nikani ni nibkä ye ngwena jabe. Abti jändrinane, ja mikani dbe gware bentre kwe, bti ja kukwei biani kwetre Ngöböye, ye rabadre bare ñongwane amne, jändrän biandre kwetre kämikadre Ngöböye ja kukwei mikani täte bä mikakäre, ye abko biandre ñongwane kwetre abko nikani niere ju blitakrä Ngöböbe ye känti.

#### *Pablo kitani ngite kä teri*

<sup>27</sup> Yebti kä jatanina niken bämän krati ta ietre ja mikakrä dbe angwane, batibe nitre israelita nünanka kä Asiate nämane ruäre, ye ie Pablo jatabare ju blitakrä Ngöböbe känti

angwane, jötrö ngwarbe ni jökrä moto mikani romon kwetre Pablo rüere. Ye btäräbe nakwani jökrä Plobotä, <sup>28</sup> kä namani ngrente krörö:

¡Mun israelita ye erere jakwe jökrä nun die mike nete! Ni ne mden tä dirikä kä jökräbti temen, kukwe dirire blo juta nikwe rüere amne, Kukwe Biani Ngöböwe Moiséye, ye rüere tä ñäke blo arato. Mdakäre abko, nitre ñakare israelitare jänükani kwe ju deme blitakrä Ngöböbe känti nete arato, kä mikakäre deme ñakare. Ye mden kisete, mun israelita tä nete, ye erere jakwe jökrä nun die mike kite künken ju bäre mento nete, namanintre ngrente. <sup>29</sup> Namanintre ngrente kore, ñobtä ñan angwane ni ñakare israelitare Efesobo kädian nämane Trófimo abko ben Pablo tuani dikekä kwetre dekä juta ngrabare, aiset Pablo nükani ngwena nebe ju blitakrä Ngöböbe känti, namanintre nütüre, aiset Pablo nükani ñäke kore.

<sup>30</sup> Abtä ni jökrä kwe kä namani nokre. Angwane ni mda mda jatani betekä, nükani mate, ye ie Pablo neketaninte, nikani Pablo kitekä ja käne kwäräkwärä ju blitakrä Ngöböbe bäre mento se kwrere, bti jukwe dikaninta jötrö jite kwetre. <sup>31</sup> Bti jatanina Pablo kämike angwane, nitre israelita namani krübäte jökrä, kä namani kä mike nokre Jerusalén abko kukwe jänükani rükätre romanobo dänkien kriye. <sup>32</sup> Angwane rükätre dänkien kri ye käkwe rükä kwekwe ükaninkrö jötrö ngwarbe rükätre dänkien mda mdabe, bti nikanintre betekä nebe nitre nämane kä mike nokre ye känti. Rükätre dänkien kri nükani mate rükätrebe, ye jatabare ietre angwane, Pablo metani ñakare mda kwetre.

<sup>33</sup> Angwane rükätre dänkien kri ye käkwe krötabare Pablo ken, käkwe Pablo kani ngite, bti mäkätemna kadena krobubti kwe nitre rükäye, bti niebare krörö kwe:

¿Ni ne abko nire amne tä dre nuene? niebare kwe ietre.

<sup>34</sup> Angwane ni jökrä namani ñäke ngwarbe ja te tata nekwäre sekware, aiset Pablo nikanintre kri ye. Abtä Pablo ngwiamna jirekäbe kwe kitadre ju nitre rükäkwe känti. <sup>35</sup> Ye kwrere bkänä, Pablo jänikani, jänikani nebe kalerabtä ju nitre rükäkwe känti angwane, ni namani nakwen Pablo jiebti kämikakäre, abtä nitre rükä käkwe Pablo kaninkä käinta niaratre ngäniene, <sup>36</sup> ñobtä ñan angwane ni jökrä nikani Pablo jiebti, ye abko namani ngrente kri, kä namanintre niere:

¡Ni ye kämike, ni ye kämike! namanintre ngrente.

### Pablokwe blitabare jakrä

<sup>37</sup> Yebti Pablo jatanina niken gwä angwane, niebare krörö kwe rükä dänkien kri ye:

¿Ti rabadre blite chi mabe ya? niebare kwe ie.

Angwane rükä dänkien kri ye käkwe niebare mda ie:

¿Blita gare griegore mae ñan ñan? niebare kwe Pabloye.

<sup>38</sup> ¿Ni Egiptobo nükani iti Jerusalén nete, ne käkwe ni mili kräbkä töi kwitani gobran romanobo rüere, bti nikani ngwena kä kaibete rükäre gobran romanobo rüere abko ma ñakare ya? niebare rükä dänkien krikwe Pabloye.

<sup>39</sup> Angwane Pablokwe niebare ie:

Ti abko israelita nünanka juta Tarsote, juta ütiäte kri kä Cilicate ye känti, akwa makwe kä bian chi tie blitakrä ja mräkätre nokobe, ie ti tö nibi, niebare Pablokwe ie.

<sup>40</sup> Angwane nitre rükä dänkien kri ye käkwe kä biani Pabloye blitakrä amne, Pablo namani nünankä krö kalerate angwane, ni jökrä rabadre kwekbe niara kukwe nuen niebare kisebti kwe ietre. Ye erere ni jökrä namani kwekbe angwane, Pablo nikani blite hebreore, käkwe niebare krörö:

<sup>1</sup> Ti mräkätre amne ti ruaitre tikwe, ti bike blite au jakrä, aiset Pablo nükani nuen kuin munkwe.

<sup>2</sup> Pablo abko namani blite niaratre kukwere hebreo bentre, yebti namani bári kwekbe jökrä Pablo kukwei nuen angwane, niara nikani blite janknu krörö:

<sup>3</sup> Ti abko israelita. Ti därebare juta Tarsote kä Ciliciate, akwa ti rirabare Jerusalén nete amne Kukwe Biani Ngöbökwe Moiséye, yebtä abko tikwe ja töitikani metre täte jökrä Gamalielibe. Erere arato, käre ti töita sribibta Ngöbökrä, munta sribire ño mtare, ye kwrere ti töita. <sup>4</sup> Ne aisetet, kena ni merire amne ni brare nämane niken Ji nebiti, ye ti nämane gain angwane, ti nämane niken kisere jiebti. Ti nämane kaen ngite, bti ti nämane kite ngite kä teri kämikakäre. Ne abko ti nämane nuene kore kena. <sup>5</sup> Tita kukwe niere munye ne abko ni blitaka Ngöböbe ni mda mda diäre dänkien amne nitre unbre ji dokwáte ie gare kuin jökrä, aisetet niaratre raba blite metre kukwe nebtä, ñobtä ñan angwane ni mräkätre israelita Damascobo nämane tödeke Jesubti, ye rüere tikwe tärä käräba ietre, bti ti rikaba ja mräkätre tödekaka Jesubti ye kaen ngite, bti ti jatadre ngwena nüke Jerusalén nete mikakäre ja tare nike, abkokäre ti rikaba.

<sup>6</sup> Akwa ti rikaba ji ngrabare, ti rababara mate ja ken juta Damascobe amne ñänä rükabara ruäre käin. Ti näma näin jáme angwane, batibe kä trä gitiaha ngwen bürere ti bäre temen. <sup>7</sup> Angwane ti rikaba mate temen amne ni kukwei jaraba krörö tie: ¿Saulo, ñobtä mata näin kisere kore ti jiebti ti mikakäre ja tare nike yere? nieba tie. <sup>8</sup> Angwane tikwe nieba: ¿Ma abko nire ti Dänkien? tikwe nieba. Angwane ni kukwei jaraba tie, ye käkwe nieba krörö tie: Ti abra Jesu Nazarebo. Ti ne mdan jiebti mata näin kisere ti mikakäre ja tare nike ye, nieba kwe tie. <sup>9</sup> Ye ngwane abko ja mräkätre nämane näin ti mukore, ye ie kä trä jataba, akwa ni kukwei ye rükaba gare ñakare ietre. <sup>10</sup> Angwane ti abko käkwe nieba krörö mda: ¿Tikwe dre nuendre, ie ma tö nibi ti Dänkien? tikwe nieba. Angwane ti Dänkien käkwe nieba tie: Näinta krö, bti ma rika janknu nebe Damasco. Ye känti kukweta ükaninte ño nuendre mae abko ni tädi iti yete käkwe niedi jökrä mae, nieba kwe tie. <sup>11</sup> Akwa kä trä gitiaha ngwen dikaro, ye käkwe kä ötateba ti okwáte, aisetet kä rababa tuen ñakare tie. Abtä ja mräkätre näma näin tibe, ye käkwe ti kaba küdebtí, bti rikaba ti ngwena nebe Damasco.

<sup>12</sup> Juta Damascote yete abko ni iti kädian nämane Ananías nämane nüne. Niara abko nämane nüne metre Ngöbö okwábtí amne Kukwe Biani Ngöbökwe Moiséye, ye abko niara nämane mike täte kuin. Ye mdanbtä abko, nitre israelita nünanka juta Damascote nämane blite kuin jökrä niarabtä. <sup>13</sup> Ananías ye abko jataba ti känti, rükaba angwane nieba kwe tie: Ti mräkä Saulo, kä raba tuenta mae, nieba kwe tie. Ye btäräbe kä trä gitiahaba ti okwáte, käkwe niara mikaba ñäräre. <sup>14</sup> Angwane nieba mda kwe tie: Ngöbö mika nämane ütiäte ni mräkä kirakirakwe, Ngöbö ye arabe tö dre nuein abko rabadre gare mae, abkokäre ma dianinkä kwe. Amne Jesu abko Ni Era Metre abko makwe tuadre, abkokäre ma dianinkä kwe. Erere arato, Ngöbötä blite ja kada jenbtí, ye abko kukwei jaradre mae, abkokäre ma dianinkä kwe jakrä. <sup>15</sup> Makwe dre dre tuani amne makwe niara kukwei nuani ño ño, ye erere makwe niedi ni jökrä ngwärekri arato. <sup>16</sup> Ne aisetet gwängware näin krö, bti ma rika ja mike ngökadre ñöte amne tödeka makwe ni Dänkienbti angwane, Ngöbökwe ma ngite kukwe kämekäme nuenbtä bätädrete jökrä mabtä, nieba niarakwe tie. Ye erere tikwe nuenba.

<sup>17</sup> Yebti ti rükabata Jerusalén nete angwane, ju blitakrä Ngöböbe, känti ti rikaba blite Ngöböbe amne ye känti, köböre kwrere tikwe kukwe tuaba krörö: <sup>18</sup> Ni Dänkien tuaba tikwe, käkwe nieba krörö tie: Mata blite tibtä ye abko ñan mikadre era nitre Jerusalénbokwe, aisetet gwängwarbe makwe kä mikaka Jerusalén nete, nieba kwe tie. <sup>19</sup> Abtä tikwe niebare: Ti Dänkien, sinagoga käntikänti ti nämane niken, kä nämane nitre tödekaka mabti kaen ngite, bti ti nämane kite ngite kä teri amne ti nämane mete arato. <sup>20</sup> Erere arato, sribikä makwe Esteban nämane blitaka makrä, ye kämikani amne ti näma yete arato amne, niara kämikadre abko rababa dbe tirkä, aisetet nitre niara kämikaka, kräke ti nämane dän ngibiare. Ye mdanbtä nitre Jerusalénbo käkwe ti kukwei mabtä mikadre bäri ütiäte jae ruen tie, tikwe nieba ti Dänkienye. <sup>21</sup> Akwa ti Dänkien käkwe nieba krörö tie: Nitre ñakare israelitare tä nüne mente temen, ye känti ti bike ma juen, aisetet nän jötrö, nieba kwe tie, niebare Pablokwe.

<sup>22</sup> Pablo juani ni Dänkienkwe nitre ñakare israelitare ngätäite niebare kwe, yebtä abko ni jökrä ñan tö namani Pablo kukwei nuai mda, kä namani ngrrente krikri be amne, namani niere:

¡Ni ye käkwe ñan nünandre mda! ¡Niara denkä kä nebtä! namanintre niere romone.

<sup>23</sup> Ni jökrä namani ngrrente janknu kore amne, namani dän jabtä ngrükete amne namani dobro mnü kite käintabe romone. <sup>24</sup> Abtä nitre rükä dänkien kri käkwe Pablo kitamna ju nitre rükäkwe känti angwane, Pablokwe kukwe era erere niedre, abkokäre Pablo kwata metadre niebare kwe, ñobtä ñan angwane ni jökrä namani ñäke Pablo rüere, yebtä abko niebare kore kwe.

<sup>25</sup> Akwa Pablo mäkäninante biare kwata metadre angwane, ni rükä dänkien nämane yete, ye ie Pablokwe niebare krörö:

¿Ni romano já ngämi nebe kritobo ngwärekri, ye känenkri kwata metadre, ye abko köböl bianina munye ya? Ñakare ruen tie, niebare Pablokwe.

<sup>26</sup> Pablokwe ñäkäbare kore, ye jarabare rükä dänkienye angwane, nikani jötrö, käkwe niebare rükä dänkien bäri kriye:

Ni ne abko romano aisete, ¿makwe dre nuendi mda btä? niebare kwe ie.

<sup>27</sup> Angwane nitre rükä dänkien kri käkwe krötabar Pablo ken, käkwe niebare ie:

¿Ma abko ni romano bkänä ya? niebare kwe ie.

Angwane Pablokwe niebare mda ie:

Jän, ti abko romano, niebare kwe ie.

<sup>28</sup> Nitre rükä dänkien kri käkwe niebare mda Pabloye:

Ti tö namani rabai romanore angwane, tikwe ja ütiä biani kri, köböire ti namani ni romanore, niebare kwe.

Abtä Pablokwe niebare mda ie:

Akwa ti abko därebare romanore, niebare kwe.

<sup>29</sup> Yebtä abko, nitre rükä namani biare Pablo kwata metakäre, yebtä kä jürä namani, käkwe kä mikaninkä jökrä Pablobtä. Erere arato, Pablo abko romano gani rükä dänkienkwe angwane, Pablo mäkäninte kwetre kadenanbti, yebtä abko kä jürä namani kri btätre, ñobtä ñan angwane ni romano ngämi kwen ngite, känenkri ñan mäkädrete jire chi aisete.

### Pablo jänikani Sanedrin ngwärekri

<sup>30</sup> Jändrinane angwane, drebä nitre israelita nämane Pablo kite ngise abko nitre rükä dänkien kri tö namani gai metre, käkwe kadena tikaninte Pablobtä, bti nitre blitaka Ngöböbe ni mda mda diäre dänkien ye ie ja ükakrömna jökrä kwe amne, ni mda mda nämane sribire Sanedrinbe, ie ja ükakrömna jökrä kwe. Bti Pablo nämane kä teri diamna ju bäre kwe, bti mikani ni jökrä ngwärekri mda kwe.

## 23

<sup>1</sup> Angwane Pablokwe Sanedrin mikani ñäräre kwe kwe ja käne, käkwe niebare krörö ietret:

Ja mräkätre, ti nämane nüne kena, erere tita nüne abti kä nüke mtare amne ja ruen ngite ñakare Ngöbö ngwärekri tie, niebare kwe.

<sup>2</sup> Angwane nitre nämane känime Pablo bäre temen, ye ie Ananíakwe Pablo metamna kada mkäte ta. Ananías ne abko, ni blitaka Ngöböbe ni mda mda diäre dänkien abko käkwe Pablo metamna, <sup>3</sup> akwa Pablo käkwe ñäkäbare tare mda ie:

¡Mata ja bä mike kuin! Ngöbökwé ti ngie mikadi ma rüere. Mata täkänintbe yete, ye tö kukwe ükaite tibe Kukwe Biani Ngöbökwé Moiséye yebti bä amarebti, ¡ye ñobtä Kukwe Biani Ngöbökwé Moiséye abko rüere ma tö nibi ti mete yere! niebare kwe Ananíaye.

<sup>4</sup> Abtä nitre nämane yete ye käkwe niebare Pabloye:

¿Ñobtä ni blitaka Ngöböbe ni mda mda diäre dänkien, ie mata ñäke kore yere? niebare kwetre Pabloye.

<sup>5</sup> Angwane Pablokwe niebare mda:

Ja mräkä, ni noko abko ni blitaka Ngöböbe ni mda mda diäre dänkien abko gare ñakare tie, aisetekwe ñäri kore ie, ñobtä ñan angwane tärä Ngöböökwe käta niere krörö: Ni gobranka juta makwebti, rüere makwe ñan ñäkädre blo, nieta Ngöbö Kukweibtä, niebare Pablokwe.

<sup>6</sup> Yebti nitre nämame sribire Sanedrinbe abko ruäre saduseo amne ruäre abko bariseo, ye gani Pablokwe. Angwane Pablokwe ñäkäbare jume ja dibti, käkwe niebare:

Ja mräkä, ti abra bariseo. Ti mräkä abko bariseo jökrä akwa, ni krütani rükadreta nire abko tita mike era jae, ye mdenbtä abko ti mikata ngite mtare, niebare Pablokwe.

<sup>7</sup> Pablokwe ñäkäbare kore, yebtä abko nitre bariseo amne nitre saduseo nikani ja kwete kwärikwäri. Abtä nitre nämame gätäbtä, ye käkwe ja ñäkänintbe jene jene mda,

<sup>8</sup> ñobtä ñan angwane ni krütani ñan rükadreta nire abko nitre saduseo käta niere. Erere arato, angele amne üai ñakare, tätre niere. Akwa nitre bariseo abko käta kukwe ye mike era jökrä, aisetekwe namani ja kwete jökrä kore. <sup>9</sup> Angwane ni jökrä namani ngrente amne Kukwe Biani Ngöböökwe Moiséye dirikätre nämame ruäre abko nämame nekete nitre bariseokri abko namani nünaninkä krö käkwe niebare:

Ni neta ja mike ngite ñakare, ñobtä ñan angwane nane ni üai nükani blite ben o angele nükani blite ben kukwe nebtä, niebare nitre bariseokwe.

<sup>10</sup> Akwa ni jökrä namani kä mike nokre krübäte. Yebtä nitre rükä dänkien kri, btä kä jürä namani krübäte, ñobtä ñan angwane nane Pablo dikandrete oto kiakia jökrä ja ñäte ni jökräkwe, ye abko jürä namani btä. Abtä nitre rükä juani ruäre kwe nebe Pablo tuen, bti Pablo jänikaninta kitadreta ju nitre rükäkwe känti bobuta.

<sup>11</sup> Yebti deo, ni Dänkien Jesu nükani ja mike tuadre Pabloye, käkwe niebare ie:

Pablo, makwe ñan kä jürä ngwian jabtä, ñobtä ñan angwane makwe blitabare tibtä Jerusalén nete, ye kwrere makwe blitadi tibtä juta Romate sete arato, niebare ni Dänkienkwe ie.

#### *Nitre israelita käkwe kukwe mikantbe Pablo kämikakäre*

<sup>12-13</sup> Abti jändrinane, nitre israelita ni gre ketebu jire käkwe ja töi mikani gware Pablo kämikakäre, käkwe ja kukwei biani krörö ja rüere Ngöböye: Ni ngämi Pablo kämike, känenkri nikwe ñan mrödred amne nikwe ñan tomna ñadre, niebare kwetre jae kwärikväri amne Ngöböye. <sup>14</sup> Bti nikaninta mda nitre blitaka Ngöböbe ni mda mda diäre dänkien känti amne nitre unbre ji dokwate känti, käkwe niebare ietre:

Nun ngämi Pablo kämike, känenkri nunkwe ñan mrödred jire abko nunkwe ja kukwei biani kore ja rüere Ngöböye. <sup>15</sup> Ne aisetekwe mun sribikä ütiäte krikri Sanedrinte ye käkwe Pablo käräta jetbe rükätre dänkien kriye amne, kukwe ño metre abko Pablokwe niedre nete, abkokäre mutta kärere nüke ja ngwärekri, munkwe nie. Akwa Pablo ngämi nüke mun känti nete, ye känenkri nunkwe kämikadi, niebare kwetre.

<sup>16</sup> Akwa Pablo kämika brai namani, ye Pablo nüräkwe gani angwane, Pablo nämame ngite, ye känti nikani niere Pabloye. <sup>17</sup> Blitabare ünän kwe Pabloba, angwane nitre rükä dänkien nämame yete Pablokwe käräbare, bti niebare kwe ie:

Ni bati ne tö kukwe ütiäte kri niei dänkien kriye, aisetekwe ngwena nebe niara känti, niebare Pablokwe ie.

<sup>18</sup> Ye erere bkänä, rükätre dänkien nikani Pablo nürä ye ngwena nebe rükätre dänkien kri känti, käkwe niebare ie:

Ni kädianta Pablo tä ngite ye käkwe ti käräniri, bti ti juni ma känti kwe ni bati nebe, ñobtä ñan angwane ni ne abko tö kukwe ütiäte kri niei mae, aisetekwe ti juni kwe nüke ma känti nete, niebare kwe.

<sup>19</sup> Angwane nitre rükä dänkien kri ye käkwe Pablo nürä kani küdebtä, nikani ngwena jenena temen, käkwe niebare krörö ie:

*¿Ma tö nibi dre niei tie? niebare kwe ie.*

<sup>20</sup> Angwane Pablo nürä käkwe niebare:

Nitre israelita käkwe ja töi mikani gware Pablo käräkäre mae jetbe nebe nitre sribikä Sanedrinte ye ngwärekri, kukwe era erere ngwiantarikäre ja täritäri Pabloye, nieta kwetre. <sup>21</sup> Akwa makwe ñan niaratre kukwei mika era, ñobtä ñan angwane ni gre

ketebu bti bärire mda tädi ja rükaninte jibta Pablo kaire jite. Niaratre käkwe ñan Pablo kämikadre angwane, ñan mrödre kwetre amne ñan tomna ñadre kwetre, niebare ja rüere kwetre Ngöböye, aisetet makwe dre niedi ye abko niaratre tä biare ngibiare ngäbti, niebare Pablo nüräkwe.

<sup>22</sup> Angwane rükätre dänkien kri käkwe ni bati ye juaninta, akwa kukwe ye abko ñan niedre jire ni mda mdaye kwe, niebare kwe ie.

### *Pablo jänikani nebe gobernador Félix känti*

<sup>23</sup> Yebti rükätre dänkien kri käkwe rükä dänkien kärabare nibu, bti niebare kwe ietre:

Nitre rükä känen siento krobu abko rika gürere amne, rükä ni gre ketamä bti ni jäta abko rika mdäbti amne ni siento krobu abko rika buko nga ngwena kisete rikakäre juta Cesareate ñänä okwä krä ökän deo, niebare kwe ietre.

<sup>24</sup> Erere arato, rükä dänkien kri käkwe mdä mikamna biare krati nänkrä Pabloye amne Pablo järikadre kuin nebe gobernador Félix ngwärekri abko niebare dänkien krikwe kore.

<sup>25</sup> Angwane tärä tikani krörö kwe gobernador Félikrä:

<sup>26</sup> Nantöre Félix. Ma gobernador ütiäte kri, kräke ti Claudio Lisias käta tärä ne tike.

<sup>27</sup> Nitre israelita käkwe ni ne kani ngite angwane, tö namani kämikai, akwa ni ne abko romano tikwe gaba angwane ti janama denkäta nitre israelita kisete rükätre tikwebe.

<sup>28</sup> Erere arato, drebtä niara kita nämane ngise abko ti tö rababa gai, kä rikaba ngwena nebe Sanedrin ngwärekri. <sup>29</sup> Angwane kukwe ükaninte nuendre kwetre abko ni ne ñan tä mike täte, abtä tätre kite ngise akwa, ni ne käkwe ja mikani ngite ñakare, aisetet kukwe ye dokwäre ni ñan raba niara kämike jire chi. Erere arato, ñan rabadre ngite jire chi kukwe ye dokwäre ruen tie. <sup>30</sup> Akwa mtare nitre israelita tö niara kämikai abko tikwe gani, aisetet titi juen jirekäbe nebe ma känti. Erere arato, nitre niara kitaka ngise abko rikadre nebe ma känti blitakäre niara rüere mabe, abkokäre titi juen, tikani rükätre dänkien krikwe täräbtä.

<sup>31</sup> Nitre rükä dänkien kri ye käkwe dre niebare rükätreye, ye erere nuenbare kwetre, kä nikanintre Pablo ngwena deo nebe juta Antípatrite. <sup>32</sup> Yebti jändrinane angwane, kukwe nakaninkä ñakare btätre, aisetet rükätre nämane näin gürere, ye nikaninta ja jiebti nebata ja känti amne rükätre nämane näin mdäbti mdäbti aibe nikani janknu Pablobe.

<sup>33</sup> Nikanintre nebe juta Cesareate angwane, tärä biani kwetre gobernadoreye, käkwe Pablo mikani gare ie arato. <sup>34</sup> Abti gobernador käkwe ñäkäbare ünän jökrä täräbtä, bti niebare kwe Pabloye:

¿Ma kä mdenbo? niebare kwe ie.

Angwane, Ja Ciliciabo, niebare Pablokwe ie.

<sup>35</sup> Abtä niarakwe niebare mda Pabloye:

Nitre ma kitaka ngise rükadi nete angwane, batibe tikwe ma kukwei nuadi, niebare kwe ie.

Yebti Pablo mikani ngibiadre kwe ju kri jrei Herodekwete abko nakaninkä kore.

## 24

### *Pablokwe blitabare ja dokwäre gobernador Félix ngwärekri*

<sup>1</sup> Abti kä nikanina köbörake ta angwane, ni blitaka Ngöböbe ni mda mda diäre dänkien kädian nämane Ananías nikani nebe Félix känti amne nitre unbre ji dokwätte nikani ruäre ben. Erere arato, ni iti blitaka ni mdakrä kädian nämane Tértulo nikani siba nebe gobran Félix känti Pablo kitakäre ngite gobranye. <sup>2</sup> Pablo jänükani niaratre ngwärekri angwane, Tértulo nikani niere krörö gobernador Féliye Pablo rüere:

Ti dänkien bäri ütiäte kri, mata gobrane kuin nete, yebtä ti tö kuin niei mae, ñobtä ñan angwane mtare ni israelita tä nüne jáme ma köbörake. Erere arato, ma töbtä, aisetet mata sribire kuin, abko köbörake makwe jändräketa kabre ükaninte juta nikwete nete.

<sup>3</sup> Ne aisetet, jändräketa ne abko nunta kaen ngäbti käre amne kä jökräbti arato, aisetet nun tö kuin niei mae sribi jökräbtä. <sup>4</sup> Akwa ti ñan tö kä diainkä dikaro makän, aisetet ti bike blite chi mabe amne makwe ti kukwei nua ja moto jämenbti abko ti ribere mae.

<sup>5</sup> Ni ne abko tä ni jökrä nike krübate gobran romanobo rüiere amne, kä jökräbti temen niarata näin nitre israelita ñaketbe jene jene amne, nitre reketaka ni Nazarebokri abko bti niarata mikani ji dokwáte abko kwanba nunye. <sup>6</sup> Mdakäre abko niara tö rababa ju Ngöböökwe dain jändrän kämenbti. Abtä nunkwe kaba ngite, [kukwe ükaninte nuendre nunkwe tä niere, ye kwrere. <sup>7</sup> Akwa nitre rükä dänkien kri Lisias kákwe diankabata jötrö amne romone nun kisete, bti Pablo kitaka ngise juamna blite mabe nete.]<sup>\*</sup> <sup>8</sup> Akwa mtare nunta kite ngite ma ngwärekri nete, aisetekukwe ne abko era ya, ñakare ya abko makwe ngwantari au ie. Abko kore se, niebare Tértulokwe.

<sup>9</sup> Kukwe niebare Tértulokwe, ye abko nitre israelita nämane yete kákwe era niebare arato. <sup>10</sup> Angwane Pablokwe blitadre niebare kisebti ie gobernadorekwe amne Pablokwe niebare krörö:

Kä raire mata mikani kukwe ükatekä juta nebe, aisetekukwe kä nibi nuäre tibtä blite jakrä ma ngwärekri nete. <sup>11</sup> Köbö jätäbti kubube ti rikaba Jerusalén yete Ngöbö käikitakakäre. Ye abko era ya abko makwe ngwantari au gadre jae. <sup>12</sup> Ti näma nete angwane, nitre ti kitaka ngise, ie ti kwanba ja kwete ñakare ni mda mdabe. Erere arato, ti köböite ni kwati ñan käta kä ngwen nokre ju blitakrä Ngöböbete amne, sinagoga kwatirekwatire te amne kä mdabti juta Jerusalénte. <sup>13</sup> Ne aisetekukwe ne ñan tä ti kite ngise kukwe erabtä amne tätre ni ngökö ngwarbe ti rüiere.

<sup>14</sup> Akwa kukwe era erere ti bike niere metre abko krörö: Ngöbö mikani ütiäte ti mräkä kirakirakwe, Ngöbö ye arabe kräke tita sribire Ji Btinbti mtare. Ye mden abko kukwe ngwarbe nieta kwetre. Erere arato, Kukwe Biani Ngöböökwe Moiséye, ye abko tita mike era jökrä amne nitre Ngöbö kukwei niekä kirakira kákwe Ngöbö Kukwei tikani kira, ye tita mike era jökrä arato. <sup>15</sup> Mdakäre abko, ni kuin amne ni käme krütanikrütani abko Ngöböökwe mikadita nire abko, bti nitre noko tä tödeke, ye kwrere bti tita tödeke arato. <sup>16</sup> Aisetekukwe ruen ngite ñakare tie Ngöbö ngwärekri amne ni mda mda ngwärekri, abkokäre käre tita nüne kuin metre.

<sup>17</sup> Akwa kukwe rakakaba krörö tibtä juta Jerusalénte: Kä raire ti nämane dikekä kä mdabti. Abti ti jatabata Jerusalén ngwian ngwena biankäre nitre israelita bobre bobre kräke amne jändrän biankäre Ngöböye. <sup>18-19</sup> Kä ye ngwane, kukwe ükaninte nuendre, erere ti näma nuene, aisetekukwe rüeblite tie ngite niere ruen tie. Abko kore se, niebare Pablokwe Féliye.

<sup>20</sup> Niaratre ye abko kákwe ti kitaka ngite käne, aisetekukwe ruen tie. <sup>21</sup> Ñakare ne ngwane ti rababa Sanedrin ngwärekri angwane, drebtä tikwe ja mikani ngite, ye nitre nete noko kákwe niedre metre arato mae. Akwa nuenba ñakare kwetre. <sup>22</sup> Akwa ti näma niaratre ngätäite angwane, tikwe ñäkäba jume ja dibti, kákwe nieba krörö:

Ni krütani abko Ngöböökwe mikadita nire abko tita mike era, yebtä munta kukwe ükete tikrä mtare, tikwe nieba kore. Nebtä aibe nitre noko tö ti kitai ngise ruen tie. Abko kore se, niebare Pablokwe Féliye.

<sup>23</sup> Gobernador Félix abko, ie Ji Btin gare kuin, aisetekukwe ñäkäbare kore, yebtä abko kukwe Pablokwe tuanimetre ükadrete köbö mdabti kwe, kákwe niebare krörö nitre israelitaye:

Nitre rükä dänkien kri Lisias rükadi ti känti nete, kákwe kukwe ño niedi metre tie angwane, tikwe kukwe munkwe tuadi känti. Abko kore se, niebare Félikwe ietre.

<sup>24</sup> Abti Félikwe nitre rükä dänkien juani Pablo kiteta ngite kä teri akwa, kä biandre ruäre dikakakrä Pabloye amne Pablo kukwe muko, ie kä biandre nüke basare Pabloye niara die mikakäre, niebare Félikwe.

<sup>25</sup> Yebti köbö mdara jire te, Félix jatani merire kwe Drusilabe. Drusila abko meri israelita abko ben Félix jatani, kákwe Pablo kärämna angwane, tödekadre ño Kristo Jesubti abko Pablokwe niebare ie, niara kákwe Pablo kukwei nuani.

\* 24:7 Kukwe ne ñan tä tikani manuscrito kira bári kuinkuintä.

ño metre Ngöbö ngwärekri amne, ni ñan rankwadre jötrö jändrän käme jiebti amne mrä Ngöbö rükadi kritobore ño nibtä abko niebare Pablokwe Féliye. Yebtä abko, Félix nekwetaninkä, käkwe niebare Pabloye:

Nänta jötrö. Kä rabadita ngwarbe tie angwane, tikwe ma kärädita mda, niebare kwe Pabloye.

<sup>26</sup> Akwa Pablokwe ngwian biandre ja ütiäre Féliye abko ie Félix tö namani, aise te käre namani nüke Pablo kärere blite jabe. <sup>27</sup> Pablo namani ngite kä kubu angwane, käre kukwe namani nakenkä kore. Yebti Félix ñan namani gobernador mda, aise te ni iti mda kädian nämane Porcio Festo namani gobernador Félix täte, akwa Félix abko tö namani rabai kuin jabtä nitre israelita krikri be, aise te Pablo tuanimetre ngite kwe.

## 25

### *Pablokwe blitabare jakrä Festo ngwärekri*

<sup>1</sup> Festo nikani nebe kä Judeate sribikäre gobernador kwrere. Juta Cesareate, ye känti namani köbömä, bti nikani juta Jerusalénte köbö ngwiantarikäre nitre israelita ji dokwäteye. <sup>2</sup> Namani Jerusalén angwane, ni blitaka Ngöböbe ni mda mda diäre dänkientre amne nitre israelita ji dokwäte nikani, käkwe Pablo kitani ngise ie. <sup>3</sup> Ja moto kuinbti Festokwe Pablo juandreta Jerusalén kukwe ükatekäre yete abko ribebare kisere kwetre ie, ñobtä ñan angwane niaratre nämane Pablo kämika braire ji ngrabare, abkokäre namani kärereta ie. <sup>4</sup> Akwa Festo abko käkwe niebare ietre:

Pablo rabadi ngite janknu juta Cesareate amne ti ara jire kebera yäketa arato nebata juta yete. <sup>5</sup> Niara käkwe ja mikani ngite krübäte bkänä ne ngwane, mun ji dokwäte dokwäte nete, ye ara jire rikadre tibe nebe sete, niara kitakäre ngise tie sete abko rabadre bäri kuin. Abko kore se, niebare kwe ietre.

<sup>6</sup> Yebti Festo namani köbö kwä amne köbö jätä näre mda juta Jerusalénte, bti nikantia juta Cesareate. Jändrinane angwane ja täkrä gobrankrä, bti nämane täkänintbe, käkwe Pablo ngwiamna nebe ja känti. <sup>7</sup> Erere bkänä, Pablo nikani gwäkäre angwane, nitre israelita nämane Jerusalén, nükanina Festobe, ye käkwe krötabare Pablo ken, käkwe Pablo kitani ngise kukwe kämekäme bätäkä ngwarbe btä. Akwa kukwe era erere kwani ñakare Pablo rüere ietre.

<sup>8</sup> Angwane Pablo abko käkwe ñäkäbare au jakrä:

Kukwe Biani Ngöbökwe Moiséye nuendre nitre israelitaye, ye rüere ti ja mike ngite ñakare. Erere arato, ju blitakrä Ngöböbe amne emperador romanobo rüere, ti ja mike ngite ñakare arato, niebare Pablokwe Festoye.

<sup>9</sup> Akwa nitre israelita ñan moto rabadre romon Festokrä, abkokäre tö namani niaratre näkwitai, abkokäre niebare krörö kwe Pabloye:

¿Ma tö rikai nebe Jerusalén, känti tikwe kukwe ükadite makrä ya? niebare kwe ie.

<sup>10</sup> Pablokwe niebare mda ie:

Ma kukwe ükatekä emperador käbti abko ngwärekri tita nete. Ne känti makwe kukwe ükadrete tikrä, ñobtä ñan angwane ti ja mike ngite ñakare nitre israelita rüere, ye gare kuin mae. <sup>11</sup> Akwa nane tikwe ja mikani ngite era bkänä, dokwäre ti kämika tö rabadre angwane, tita juto biare krüte. Akwa tikwe ja mikani ngite ñakare nitre israelita rüere ne ngwane, ni mda ñan raba ti bien jire chi kämikadre nitre israelita seye, aise te emperador ara jire käkwe kukwe ükate tikrä, ie ti tö, erere tita ribere mae. Abko kore se, niebare kwe Festoye.

<sup>12</sup> Abtä nitre töbtä töbtä nämane yete niara die mikakäre, ye ie Festokwe kukwe ngwianintari, bti niebare kwe mda Pabloye:

Ma abko romanobo, aise te emperador ara jire käkwe kukwe ükadrete makrä abko mata ribere tie aise te, ma näin niara känti juta Romate jirekäbe, kukwe makwe ye ükatekäre. Abko kore se, niebare Festokwe.

*Festokwe ja di käräbare Pablobtä jrei Agripaye*

<sup>13</sup> Yebti köbö nikanina bā raire ta angwane, jrei Agripa nikani ngwai Berenicebe nebe Cesareate köbö ngwiantarikäre Festoye. <sup>14</sup> Ye känti namaninta nüne bā raire Festo känti angwane, Festokwe blitabare kukwe Pablokwebtä jrei Agripabe, kákwe niebare ie:

Ni iti mikaninte ngite Félikwe abko tä ngite nete. <sup>15</sup> Ti näma Jerusalén angwane, ni blitaka Ngöböbe ni mda mda diäre dänkientre amne nitre israelita unbre ji dokwäte kákwe ni ye kitaba ngite ti ngwärekri amne müre ketamna kwetre tie. <sup>16</sup> Abtä tikwe nieba krörö ietre: Ni kitata ngite abko ngämi ja kwete gwärere ni niara kitaka ngitebe, ye känenkri ni ngite ye kämikadre ñakare jire abko tä ükaninte kore nun romanobo ngätäite, tikwe nieba ietre. <sup>17</sup> Niaratre jatabata tibe nete, ye mdenbtä abko jändrinane tikwe nitre kukwe ükatekä mda mda tibe käräba jötrö, bti tikwe ni ngite ye ngwiamna nüke ja känti nete. <sup>18</sup> Akwa kukwe nuenbare blo kwe, btä mika nämame ngite, ti nämame nütüre, ye kwrere btä nitre niara kitaka ngite kákwe niara mikaba ngite ñakare ti ngwärekri. <sup>19</sup> Akwa Ngöbö mikadre täte ño, yebtä nämame ja kwete amne ni kädian nämame Jesu abko krütani akwa tä nire abko Pablo namani niere, ye aibebtä mika rababa ngite.

<sup>20</sup> Tikwe kukwe ye ükadrete ño ñan rababa nüke gare tie. Abtä Pablo rikadreta jirekäbe Jerusalén, känti tikwe kukwe ükadrete kräke ya abko tikwe ngwiantariba ie mda. <sup>21</sup> Akwa emperador abko kákwe kukwe ükadrete kräke nieba kwe, aisetetä ngite nete. Abti tikwe juandi nebe emperador känti, niebare Festokwe Agripaye.

<sup>22</sup> Angwane Agripakwe niebare mda Festoye:

Ti tö ni ye kukwe nuai arato, niebare kwe.

Amne Festokwe niebare ie:

Jetbe makwe niara kukwei nuadi, niebare mda kwe ie.

#### *Pablokwe blitabare jrei Agripa ngwärekri*

<sup>23</sup> Ye erere bkänä, jändrinane Agripa amne Berenice kákwe ja ükaninte kuin ja bā mikakäre ütiäte, bti nitre rükä dänkien krikri amne nitre gobranka gobranka juta Cesareate, ye ben nikanintre gware nebe gwi kä kukwe ükatekrä ye känti. Angwane Festokwe Pablo ngwiamna nebe ye känti. <sup>24</sup> Bti niebare kwe ni jökräye:

Jrei Agripa amne mun ütiäte ütiäte tä ja ükaninkrö ketetibe nunbe nete, ni iti tä ngite abko jänüra mun ngwärekri nete tuen munkwe. Nitre israelita Jerusalénbo amne Cesareabo kwati tä nüke ni ne mike ngite ti ngwärekri nete, käta nebe ngwänenkä krikri be, käta nebe niara müre ketamna tie. <sup>25</sup> Akwa ni ne ja mike ngite ñakare, aisetetä müre ketadre ñakare tä nebe tuen tie. Akwa emperador kákwe kukwe ükadrete kräke abko ribebare kwe tie, aisetetä tikwe juandi jirekäbe nebe emperador känti. <sup>26</sup> Akwa kukwe era erere ñakare tikadre tie juandre ti dänkien emperadoreye ni nebtä, aisetetä ti ki ngwena mun ngwärekri nete amne jrei Agripa ngwärekri, ne känti abko jreikwe kukwe ngwentari ie amne dre niedi kwe abtä kukwe kwandi tie tikakäre emperadoreye, <sup>27</sup> ñobtä ñan angwane ni juandre ngite akwa, drebtä rikadre ngite abko niedre ñakare, ye abko ñan tuen dbe tie, niebare Festokwe ni jökräye.

## 26

<sup>1</sup> Angwane Agripakwe niebare Pabloye:

Mtare ma raba blite jakrä, niebare kwe ie.

Ye btäräbe Pablokwe kise kaninkä käin, kákwe niebare krörö:

<sup>2</sup> Jrei Agripa, ma ütiäte kri. Ma ye ngwärekri kä nibi nuäre tibtä blitare jakrä, aisetetä kukwe ño ño btä nitre israelita tätre ti mike ngite, ye abko kä nibi nuäre tibtä niere mae, <sup>3</sup> ñobtä ñan angwane ma ti dänkien ütiäte kri, akwa nitre israelita tätre nüne ño, ye garera kuin mae amne, drebtä tätre ja kwete jabe kwärikwäri, ye garera kuin mae arato, aisetetä makwe ti kukwei nua jáme abko ti bike ribere mae.

<sup>4</sup> Ti nämame batí abti kä nüke mtare, tikwe nünabare ño ja käite amne Jerusalénte, ye abko gare kuin jökrä ietre. <sup>5</sup> Erere arato, kä raire ti gare ietre, aisetetä ti ne abko bariseo kena, ye gare kuin nitre israelitaye. Ye erere niaratre raba niere metre tibtä, ñobtä ñan

angwane nitre bariseo abko bári tä Ngöbö Kukwei mike täte era metre jökrä abko erere ti nämane mike täte arato. <sup>6</sup> Kukwe mikata ütiäte nitre bariseokwe, ye tita mike ütiäte jae, abtä nitre israelita tä ti mike ngite mtare abko krörö: Ngöböökwe ni krütani mikadita nire abko kukwe niebare metre kwe ni mräkä kirakiraye, yebti tita tödeke arato nitre bariseo jökrä kwrere, abtä ti mikata ngite. <sup>7</sup> Mdakäre abko, Ngöböökwe jäandrän köböi mikani kira ni mräkä israelita juta keta jätäbti ketebuye, ye mden ngibiata ngäbti kisere kwetre, käta sribi nuene Ngöbökrä amne Ngöbö käikitekä kore köbö kwatirekwatire dibire rare, ye arabebti tita tödeke arato, abtä nitre israelita käta ti mike ngite mtare ma ngwärekri jrei Agripa. <sup>8</sup> ¿Se ñobtä abko ni krütani mikadreta nire Ngöböökwe abko mun ñan tä mike era se?

<sup>9</sup> Käne ti ne ara jire käkwe kukwe nuendre bätäkä ngwarbe Jesu Nazarebo rüere, ti nämane nütüre. <sup>10</sup> Ye erere tikwe nuenbare Jerusalén. Nitre blitaka Ngöböbe ni mda mda diäre dänkientre nämane ja di bien tie abko käbti tikwe nitre tödekaka Jesubti kitani ngite kwati kä teri. Erere arato, nitre tödekaka Jesubti kämika nämane ti okwäbti angwane, nämane nükebti tie arato. <sup>11</sup> Mdakäre abko, nitre tödekaka Jesubti käkwe ñäkädre blo Jesu rüere, abkokäre ti nämane mike ja tare nike krübäte. Ne abko sinagoga kwatirekwatire te ti nämane nuene kore angwane, ti moto nämane nebe romon krübäte kräke, aisetet i nämane nikken mobe juta mda mdate ni menteni ngätäite nitre tödekaka Jesubti ye jiebti.

<sup>12</sup> Ye erere, batí ti rikaba juta Damascote angwane, nitre blitaka Ngöböbe ni mda mda diäre dänkientre käkwe ja di bianba tie abko käbti ti rikaba. <sup>13</sup> Akwa ti rikaba ji ngrabare angwane, kukwe rakakaba tibtä abko ti bike niere mae jrei abko krörö: Ti näma dikekä ji ngrabare juta Damasco kukwäre angwane, ñänä ruäre käin angwane, batibe käträ gitia dirare kä käinbti se kwrere. Käträ ye abko rababa bári dirare ñänäträkrä abko rikaba mate jökrä nun bäre temen ti kukwe muko tikwebe. <sup>14</sup> Angwane nun rikaba ngitiekä jökrä temen. Ye btäräbe ni kukwei jaraba krörö hebreore tie: ¿Saulo, ñobtä mata näin kisere ti jiebti ti mikakäre ja tare nike kore yere? ¿Ye ñobtä mata kukwe nuene käme ja rüere au? abko ni kukwei jaraba kore tie.

<sup>15</sup> Angwane tikwe nieba: ¿Ma abko nire ti Dänkien? tikwe nieba. Angwane ti Dänkien käkwe nieba krörö mda tie: Ti abko Jesu ara. Ti ne mden jiebti mata näin kisere mikakäre ja tare nike ye. <sup>16</sup> Akwa näinta krö, tita ja mike tuare mae, ma mikakäre sribire jakrä amne blitakäre jakrä. Ne aisetet makwe dre turi mtare tibtä amne makwe dre tuadi mda tibtä, yebtä makwe blitadi tikrä. <sup>17</sup> Angwane nitre israelita btä nitre ñakare israelitare, ngätäite ti bike ma juen akwa, tikwe ma ngibiadi niaratre ngäniene. <sup>18</sup> Nitre israelitare amne nitre ñakare israelitare, känti ti bike ma juen abko makwe käträ tikadrekä okwätte kukwe kuin Ngöböökwebtä. Niaratre rabadre dikekä ñakare mda kä iko diablukwete akwa, rabadre dikekä Ngöböträ ngwente, ñan nünandre mda kwetre Satana ngoto täni akwa, rabadre nüne Ngöböbe amne tödekadre tibti kwetre abko köböire Ngöböökwe niaratre ngite diandrekä jökrä btä amne, ni deme Ngöböökwe abko ben rabadre nüne ketetibe, abkokäre tita ma juen känti, nieba ti Dänkien Jesukwe tie.

<sup>19</sup> Ne aisetet jrei Agripa, kukwe kä käinbti jataba köböre kwrere tie, ye tikwe ñan kitaba temen akwa, tikwe mikaba täte. <sup>20</sup> Ye mden kisete, nitre israelita amne ni ñakare israelitare käkwe kukwe käme kitadre temen, bti Ngöbö kadre ngäbti kwetre abko ti rikaba niere ietre. Erere arato, Ngöbö kani ngäbti kwetre abko bá mikadre sribi kuin nuenbti kwetre, ti rikaba niere ietre. Kukwe ne abko ti rikaba niere käne juta Damascote abti Jerusalénte. Yebti ti rikaba niere kä ketareketare te kä ngrabare Judeate. <sup>21</sup> Ye mdenbtä abko, nitre israelita käkwe ti kaba ngite ju blitakrä Ngöböbe ye känti, bti tö rababa ti kämikai. <sup>22</sup> Akwa käre Ngöböta ti die mike abti kä nüke mtare, aisetet ti tä nünaninkä dite mtare. Ne aisetet ni bobre bobre amne ni ütiäte krikri, ie tita Ngöbö kukwei mike gare jökrä. Akwa kukwe rakadrekä ño niebare nitre Ngöbö kukwei niekä kirakirakwe amne Moisékwe, ye aibe tita niere, aisetet tita kukwe bá jene dirire ñakare.

<sup>23</sup> Ni Dianinkä Ngöböökwe abko krütadre akwa, rükadreta nire käne ni jökrä kä nebtä

ngätäite amne, niara arabe käkwe blitadi ni diantaribä ni mräkä israelitaye amne nitre ñakare israelitareye, kukwe ne mden abko ti nämane dirire. Abko kore se, niebare Pablokwe.

<sup>24</sup> Pablokwe ñäkäbare kore ni krütani nükanina nire btä angwane, ye namani tuen jene jene Festoye. Abtä niarakwe ngratebare kri, käkwe niebare:

Pablo, makwe ja töitikani kabre krübäte abko kisete kä jáme ma dokwäbti ñan ñan, niebare kwe ie.

<sup>25</sup> Abtä Pablokwe niebare mda Festoye:

Festo, ma abra ni ütiäte kri, käta kä jáme ti dokwäbti niere tie, akwa ye kwrere ñakare, ñobtä ñan angwane kä ruen kuin tibti. Kukwe era erere tita niere metre amne <sup>26</sup> kukwe nieta tikwe ne gare kuin jökrä jrei Agripa seye. Ye mdenbtä abko tita blite niara ngwärekri, ñobtä ñan angwane kukwe ne abko ñan nakaninkä kaibe kä kaibete, akwa nakaninkä ni jökrä ngwärekri, aisetet gare jökrä ie, ye abko gare kuin tie. <sup>27</sup> Ne aisetet ni Ngöbö kukwei niekä niekä käkwe kukwe niebare, ye era makrä ti dänkien Agripa ruen tie. Mata mike era ruen tie, niebare Pablokwe Agripaye.

<sup>28</sup> Abtä Agripakwe niebare mda Pabloye:

Jötrö ngwarbe ma tö nibira ti töi kwitai tödeke Jesubti ñan ñan, niebare kwe ie.

<sup>29</sup> Angwane Pablokwe niebareta Agripaye:

Jötrö ngwarbe ya, raire ya, Ngöbö diebti ñan ma ti dänkien aibe rabadre tödeke Jesubti, akwa ni jökrä tä ti kukwei nuen nete noko rabadre tödeke siba Jesubti ti kwrere näre. Akwa ñan rabadre mäkäninte kadenanbti ti kwrere abko rabadre bäri kuin, niebare kwe.

<sup>30</sup> Angwane jrei Agripa btä gobernador Festo nükani krö Berenicebe amne ni mda mda nämane bentre yete yebe, <sup>31</sup> nikani mento kä bäre, kä nikani blite krörö jabe kwärikwäri:

Ni ne ja mike ngite ñakare, se drebtä kämikadre. Erere arato, kukwe nuenbare ñakare blo, abtä tädre ngite kä teri nete, namani niere jae kwärikwäri.

<sup>32</sup> Angwane Agripakwe niebare Festoye:

Ni ne käkwe ñan kukwe ükatemna au jakrä emperadoreye akräke niara tikadrete. Akwa niara ara jire käkwe kukwe ükatemna kore, aisetet ni ñan raba tikete, niebare kwe ie.

## 27

### *Festokwe Pablo juani rute juta Roma*

<sup>1</sup> Yebti köbö kitani nun juankrä Italia, ye rükaba angwane, Pablo btä ni mda mda näma ngite arato abko mikaba gare ni ngite ngibiabtikä dänkien kädian nämane Julio yeye. Julio abko nämane sribire batallon kädian nämane Batallon Augusta yebe. <sup>2</sup> Nun juanba Italia kukwäre angwane, ru juta Adramitiobo näma krati mren köräbti abko jataba nikken provincia Asiate mren köräbti abko te nun rankwaba. Angwane abko, Aristarco nünanka juta Tesalónicate, kä Macedoniate ye näma näin siba nunbe abko ben nun rikaba.

<sup>3</sup> Yebti jändrinane angwane, nun rikaba nebe juta Sidónte. Ye känti Juliokwe jändrän kuin nuenba Pablokrä, käkwe Pablo tuametreba basare kukwe muko tödekaka Jesubtiye amne niaratre käkwe Pablo kadre ngäbti ja juete abkokäre. <sup>4</sup> Abti nun näma Sidón, känti nun rikaba ta angwane, nun rikaba rute akwa, müre rababa mate ribi nun ngäbti, abtä kä butu Chiprete btä kwäräkrita nun rikaba müre ngäniene. <sup>5</sup> Angwane nun rikaba mren köräbti nikken Cilicia bäre temen amne Panfilia bäre temen, bti nun rikaba nebe juta Mirate, kä Liciate. <sup>6</sup> Ye känti nitre rükä dänkien, ie ru Alejandríabo kwanba krati. Ru ye abko jataba nikken Italia abko te nun juanba mda kwe, nun rikadre janknu mentokwäre abkokäre. <sup>7</sup> Ye erere nun rikaba angwane, nun rikaba bätärekä, aisetet nun rababa raire mrenbti amne näma tare krübäte nänkrä müre ngäbti. Abti nun rikaba mate juta Gnido ngware ta. Kä ye ngwane abko müre näma mate nun ngäbti, aisetet nun rikaba nikken kä Salmón, Cretate ngware ta angwane nun rikaba bäre känime menteninta temen nikken kä butu Cretate bäre temen. <sup>8</sup> Amne nun rikaba janknu, akwa nunkwe dikakaba tare krübäte mren köräbäre mötarita temen. Abti kä mren köräbti kädian nämane Ñö Körä Kuin Rukrä, känti nun rikaba nebe, känime juta Lasea ken.

<sup>9</sup> Ye ngwane nun jataba bări bătäre amne, kä ja băinkrä Ngöbökrä nitre israelitakwe sö septiembrebtä rikabara ta amne kä ñüre jatabara nüketa känime, aisetet kä namani krübäte rikakäre rute mrenbti. Abtä Pablokwe nieba krörö nitre ru bkänkäye amne nitre ru ngwiankaye:

<sup>10</sup> Ja mräkä, kä nena krübäte nänkrä mrenbti, aisetet nane ru amne tribe rika ngwarbe munkän amne nane ni müre reketedre mrente arato nibi tuen tie, aisetet ni ñan rikadre janknu mentokwäre näre, niebare Pablokwe.

<sup>11</sup> Akwa nitre rükä dänkien kákwe ru bkänkä kukwei mikani bări era amne ru ngwianka kukwei mikani bări era kwe arato, aisetet Pablo kukwei mikaba ütiäte ñakare kwe. <sup>12</sup> Akwa kä ñüre näire ñö köräte kä ye känti abko ñakare kuin rabakäre, aisetet ni jökrä tö namani rikai ta nebe mren köräbti juta Fenicete. Fenice ne abko ni nämene nebe mren köräbti Cretate amne, nämene nebe tuen ngwitäräkri amne mötarikri arato, känti kä ñüre angwane, müre mate ribi ñakare, aisetet nun rikaba nebe yete.

#### *Kä nämane krübäte mrenbti*

<sup>13</sup> Yebti müre mötarikri rababa mate bă räre angwane, nun rikadre janknu mentokväre nitre ru ngwianka rababa nütüre, aisetet rikaba ru ngwena bă känime mren köräbäre nikken kä butu Cretate käntita temen. <sup>14</sup> Nun rikaba, yebti bă jötrö angwane, batibe müre kä driri kädian nämene Euroclidón jataba mate ribi krübäte rubtä, <sup>15</sup> ye kä rikaba ru mniente ngwarbe kwäräkwärä nunbe se kwrere angwane, ru rababa neketebtä ñakare mentokväre müre ngäbti nunye, aisetet nunkwe ja tuametreba ngwiandre rube ngöi müre yeye. <sup>16</sup> Müre rikaba nun ngwena kore rube angwane, kä butu chi kädian nämene Clauda, ye ngüre bäre temen nun rikaba angwane, müre rababa mate bă räre yete, akwa ja tare nikare kwärä nunkwe ru chi nämene mäkäninte krati ru kribtä, ye nitre ru ngwianka dianbata kwe ru krite. <sup>17</sup> Ru kiakia dianbarata käin kwe, bti ru kri abko ñan juandre ngwarbe ñökwe amne mürekwe, abkokäre mäkäteba jökrä bäre ta köbti. Nebti, üman kabre jabti kädian nämene Sirte abko te nane ru rabadrekä abko käi rababa tare okwätetre, aisetet nitre ru ngwianka kákwe dänkwän kwata kri ru mikakrä nikken bätärekä amne metre ta ye kitaba timon mrente bti ru tuametreba ngwiandre müre aibeye kwetre.

<sup>18</sup> Yebti jändrinane angwane, müre näma mate ribi krübäte, aisetet tribe näma rute, ye kita rikaba ruäre timon mrente kwetre. <sup>19</sup> Yebti mukirare angwane, jändräni mda mda ru ngwiankrä näma rute, ye nitre ru ngwianka kákwe kitaba jökrä mrente ja kise jenbti au, ru ñan rikadre nguse abkokäre. <sup>20</sup> Yebti köbö raire te nunkwe ñänä tuaba ñakare amne muke jataba ñakare nunye arato amne müre rababa mate ribi nunbtä janknu se kwrere, aisetet nun krütadre jökrä rababa ruen nunye, aisetet nunkwe ñan nünandre mda, nun rababa nütüre.

<sup>21</sup> Nun näma ja tare nike kore, ye ngwane abko kä raire nunkwe mröba ñakare. Abtä batibe Pablo rababa nünaninkä ni jökrä ngwärekri, kákwe nieba krörö:

Ja mräkä, ti tö kukwe niei munye abko krörö: Munkwe ti kukwei mikadre täte angwane, mun rabadre janknu Cretate, akräke jändräni nikwe se rikadre ngwarbe ñakare nikän amne, ni riadrete ñakare arato. <sup>22</sup> Akwa mtare ja die mike munkwe, ñobtä ñan angwane ru ne rikadi ngwarbe jökrä akwa, ni ñan krütai jire iti abko ti tö nibi niei munye.

<sup>23</sup> Ye gare tie, ñobtä ñan angwane Ngöbö ti bkänkä, kräke tita sribire, Ngöbö ye ara kákwe angele kwe juni iti nüke ti känti deo, <sup>24</sup> kákwe nini krörö tie: Pablo, makwe ñan kä jürä ngwian jabtä, ñobtä ñan angwane ma rabadi emperador ngwärekri juta Romate kukwe makwe ükatekäre, aisetet ma köböire ni jökrä tä rute mabe, ye Ngöbökwé ngibiadibti, aisetet ñan krütadre jire iti, nini angelekwe tie. <sup>25</sup> Ne mdén kisete ja mräkä, angelekwe kukwe nini tie, ye erere Ngöbökwé ngwiandi bare ja täritäri, abkobti tita tödeke. <sup>26</sup> Akwa ru ne abko näin ngwarbe kä butubti. Ye känti ni näin jökrä timon, känti ni rabai, nieba Pablokwe nunye.

#### *Ru nikani ngwarbe kä butubti*

<sup>27</sup> Bati deo kä rikabara bämän krobu ta angwane, ru ngwian näma mürekwe nekwäre, sekwäre janknu mren Adriático känti angwane, batibe kä ruäre deo nun rababa bă ja

ken kä jateye, rababa ruen nitre ru ngwiankaye. <sup>28</sup> Angwane mren namani nuäi nguse abko ñäkäba kwetre amne, mren ye abko näma mente nguse, aise te rababa ngwra gre jire. Abtä rikaba bä mente mda se kwrere angwane mren ñäkäbata bobuta angwane, mren rababa ngwra jätäbti ngwrarike nguse. <sup>29</sup> Angwane nane ru matadre jäkwata te abko jürä rababa nitre ru ngwiankabtä, käkwe jä kitaba kobkä jire mrente ru körekri ru ketabtäkäre. Yebti kä rabadre tuen ietre amne kä rabadre ngwen jöträ abko rababa ribere Ngöböye. <sup>30</sup> Akwa ye ngwane abko nitre ru ngwianka tö rababa gitiai ru chi yete, akwa jatanintre jä ükete ru känenkri abko rababa bä mike, akwa tö rababa gitiai kore rute mentokwäre. <sup>31</sup> Akwa Pablo käkwe gaba angwane, nieba krörö kwe nitre rükä dänkienye amne nitre rükäye:

Nitre ru ngwianka noko ñan rabadre rute nete, ne ngwane mun ñan rabadita jate akwa mun krütadi jökrä, niebare Pablokwe.

<sup>32</sup> Abtä ru chi nämane mäkäninte krati gitiakrä jae nitre ru ngwiankakwe, yebtä nitre rükä käkwe kö tikaninkä angwane, ru kiakia ye nikani mrenbti.

<sup>33</sup> Yebti kä jatanina ngwen ja ken dekä angwane, ni jökrä kákwe mrödre niebare Pablockwe ietre, kákwe niebare krörö mda:

Bämän krobura jire, dre rakadikä nibtä abko munta ngibiare jirekäbe abtä bäsí munta mröre ñakare,<sup>34</sup> aisetē mtare munkwe mrödre abko ti tö nibi ribei munye, ñobtä ñan angwane nita nete ne ñan rabadre bren jire chi iti, aisetē mun tö tä nünanbtä ne ngwane, munkwe mrö kweta ja dikrä ye abko rabadre bärí kuin, niebare kwe.<sup>35</sup> Niarakwe ñäkäbare kore, ye btäräbe ban diani kwati kisete kwe, bti kuin nieba kwe btä Ngöböye ni jökrä okwäbti, bti rikaba kwete mda.<sup>36</sup> Yebti ni jökrä, moto rababa jáme amne mröba jökrä kwetre arato.<sup>37</sup> Ru te nun näma näin, ye abko te ni näma siento krobu bti gre ketamä bti ni jätabti ni ti (276) jökrä kákwe mröba.<sup>38</sup> Nunkwe mröba ünän jökrä kore, bti ru rabadre bärí juto, abkokäre trigo näma rute, ye kitaba jökrä timon mrente.

<sup>39</sup> Yebti kä rababara ngwen dekä angwane, kä jate jataba nunye akwa, nun näma mdente ñan rababa nüke gare nitre ru ngwiankaye. Akwa mren nikén ñö köräbti rababa tuen kuin mren köräbti jate, ye kukwäre rikaba ru ye ngwena mda, <sup>40</sup> kákwe kö jäbtä ye tikakaba, bti jä kobkä mikateba kwetre mrente amme, ru kökwitatekrä abko jue tikaba kwetre, bti vela abko kakabata käin mürete kwetre ru känenkri, angwane ru rikaba mate ja ken mren köräbti. <sup>41</sup> Ru rikabara mate ja ken mren köräbti se kwrere angwane, üman näma kabre jabti ye te ru ison rikaba ne nguse, känti rabakaba ümante. Ru ison känenkri rabakaba dime ümante, aiseté rababa juen ngitiekä ñakare mda. Angwane ru körekri abko btä mren rababa nüke mate dite krübäte, ye abko rikaba ru dikente kiakia jökrä.

<sup>42</sup> Angwane nane nitre ngite rikadre jübenkä mrenbti amne gitiadre abko jürä rababa nitre rükäbtä, aisetö rababa nitre ngite kämikai jökrä yete. <sup>43</sup> Akwa nitre rükä dänkien tö rababa Pablo ngibiai, aisetö nitre rükä ñan tuametreba kwe nitre ngite kämike, kákwe nieba:

Nireye jübaka gare abko rankwa jökrä mrente, bti rika jübenkä nebe käne jate.<sup>44</sup> Amne ni mda mda abko rikadre kri otobti amne ru oto kiakiabti köre, nieba kwe.

*Dre nakaninkä Pablobtä kä butu kädianta Maltate*

<sup>1</sup> Nun rababara kuin jökrä jate kore angwane, kä butu känti nun rababa ye abko kädian nämane Malta, nieba nitre nünanka yete kwe nunye. <sup>2</sup> Angwane nitre nünanka kä butubti yete abko kákwe nun kaba ngäbti bäri kuin jökrä. Nü rababa näkäen temen, aisetekä rababa tibo krübäte nunbtä, yebtä nitre nünanka yete ye kákwe ūukwā bukateba kri, bti nun käräba kwetre ūukwā träse siba. <sup>3</sup> Ye ngwane abko Pablokwe ngi nöta nöta ükakrōba ruäre, näma kite ūukwätē angwane, batibe tbi näma krite yete abko gitiaha ūukwā käi ngäniene, rikaba kákwe Pablo kwetaha kisebtä amne rihraba jökrä

Pablo kisebtä se kwrere. <sup>4</sup> Tbikwe Pablo kwetaba kore nitre nünanka yete ye okwähti angwane, rababa niere jae kwärikwäri:

Ni ne ni kämikaka bkänä, aisetate nane müre neke ñakare mrente, akwa ngöbötre ara jire btä ñan kwäräbedre kwe mda, rababa niere Pablötä.

<sup>5</sup> Akwa Pablo abko käkwe tbi ngrükateba ja kisebtä, bti kitaba ñukwätä kwe amne niara namani bren ñakare köbti. <sup>6</sup> Akwa Pablo kise rikadi nüen ñongwane amne ñongwane näin ngitiekä ngwákäre temen abko ni jökrä rababa ngibiare. Akwa kä rikaba raire ta angwane Pablo näma jáme, rababa bren ñakare. Yebtä abko, ni jökrä töi rikwitabata bää jene amne, Pablo abko ni ngöböre rababatre niere.

<sup>7</sup> Kä ye känti abko, ni ütiäte kri kä butubti yete kädian nämane Publio abko nämane kä bkäne käname yete, känti nun näma. Publio ne abko kä butu Malta ye gobranka nitre romanobokrä. Niara abko käkwe nun kaba ngäbti kuin amne nun bukaba köbömä jire kwe. <sup>8</sup> Ye ngwane abko Publio rün bren drangwan kisete amne grie kisete, abtä näma jänbti temen abko Pablo rikaba basare känti, käkwe blitaba Ngöböbe kräke, kise mikare kwärä bti amne rababata kuinta Ngöbö diebti. <sup>9</sup> Publio rün rababata kuinta kore angwane, ni mda mda bren bren nünanka kä butubti yete, ye rükaba kwati amne Pablökwe mikabata kuinta jökrä Ngöbö diebti. <sup>10</sup> Yebtä niaratrekwe nun mikani ütiäte kri jae bätäkä ngwarbe, abti nun jataba nikken ta kä rikaba rute angwane, jändrän mda mda bianba kabre nunye ngwiandre jabtä.

### *Pablo nükani juta Romate*

<sup>11</sup> Nun rababa kä butubti, ye känti nun rababa sö krämä angwane, ru Alejandríabo näma yete kä ñüre mike nikken ta abko jataba nikken ta Italia kukwäre abko te nun rikaba. Ru ye abko btä ngöbötre kädian nämane Cástor amne Pólux bää nämane mikani känenkri abko te nun rikaba. <sup>12</sup> Ru te nun rikaba, ye rikaba nun ngwena nebe mren köräbti juta Siracuse kä butu Siciliane. Ye känti nun rababa köbömä. <sup>13</sup> Yebti nun rikaba ta angwane, nun rikaba nebe mren köräbti juta Regiote, Italia. Abti jändrinane angwane, müre rababa mate mötarikri. Yebti mukirare angwane, nun rikaba nebe mren köräbti mda juta Puteolite. <sup>14-15</sup> Ye känti ja mräkätre tödekaka Jesubti näma ruäre, käkwe nun ketateba nünentbe bämän krati jabe. Ye erere nun rababa bämän krati känti. Abti nun rikaba gürere ta juta Roma kukwäre. Angwane abko, juta Romate yete nun rabadre, niebare ja mräkätre, aisetate nun ngämi nebe juta Romate, känenkri nikani nun ngäbti nebe kä kädian nämane Foro Apio amne kä kädian nämane Ju Komä jadükakrä ni basakaye. Ye känti nikani nun ngäbti, aisetate ja mräkätre ye näma nun ngibiare ngäbti, btä Pablo okwä rababa angwane, kuin niebare kwe btätre Ngöböye amne ja rababa ruenta dite ie niaratre tuare. Abti nun rikaba gürere ta angwane, nun rababa juta Romate. <sup>16</sup> Nun rababa juta Romate angwane, Pablo kitani ngite ñakare kä teri, akwa tuanimetre nüne kaibe ju mdate, akwa ni rükä mikaba iti niara ngibiabtikä.

<sup>17</sup> Pablo rababa juta Romate, bti kä rikaba köbömä ta angwane, Pablökwe nitre israelita ütiäte ütiäte nünanka Roma yete kärämna gätäbtä jae. Ye erere rükaba jökrä amne Pablökwe nieba krörö ietre:

Ja mräkä, ti tö kukwei niei munye abko krörö: Ti kukwe nuene ñakare blo ja mräkätre israelita rüere. Erere arato, kukwe ükaninte ño ni mräkä kirakirakwe, ye rüere ti ja mike ngite ñakare. Akwa nitre israelita käkwe ti kitaba ngite nitre romanobo kisete Jerusalén sete. <sup>18</sup> Ti kitaba ngite angwane, nitre romanobo käkwe kukwe ngwiantariba ünän jökrä tie, abti tö rababa ti tikaiteta, ñobtä ñan angwane ti ja mike ngite ñakare abtä ti kämikadre kwetre, ye abko gaba kwetre, abtä tö rababa ti tikaiteta. <sup>19</sup> Akwa nitre israelita ji dokwätä, ie kukwe ye ñan rükabtiba. Abtä emperador käkwe kukwe ükadrete jirekäbe tikrä abko tikwe ribeba mda. Kukwe ñakare tikwe ni mräkätre ti käite rüere akwa, tikwe kukwe ribeba kore jakrä. <sup>20</sup> Ne mdentä abko, tikwe mun kärämna gätäbtä jae blitakäre kukwe nebtä munbe, ñobtä ñan angwane kukwe bti nitre israelita tä tödeke, arabebti titä tödeke arato, ye mdentä titä ngite mäkäninte kadenanbti nete. Abko kore se, niebare Pablökwe ietre.

<sup>21</sup> Abtä nitre israelita ütiäte ütiäte ye käkwe niebare mda ie:

Nitre israelita nünanka Judeate abko tärä juen ñakare ma rüere nunye. Erere arato, ja mräkätre Judeabo tä nüke ruäre nete käta blite ñakare blo ma rüere nunbe. <sup>22</sup> Akwa ma abko tä töbike ño abko nun tö nibi kukwe nuai, ñobtä ñan angwane kukwe btin dirita mda, ye rüere abko ni käjökräbtä tä ñäke blo, aisetet makwe blitadre btä, ie nun tö, niebare kwetre Pabloye.

<sup>23</sup> Abtä gätä köböi kitani kwetre mda. Ye erere gätä köböi nükani angwane Pablo nämane nüne, ye känti ni nükani ja ükaninkrö kwati. Angwane Ngöböta gobrane ño ni ngätäite abkobtä Pablokwe blitabare bentre köböiti kä de. Moisés käkwe dre niebare Jesubtä amne nitre Ngöbö kukwei niekä kirakira käkwe dre tikani Jesubtä, ye abko rabadre era nitre israelitakrä, abkokäre Pablo namani kädriere bentre. <sup>24</sup> Pablo namani blite kore ye abko ni ruäre kräke namani era amne ni ruäre abko käkwe ñan mikani era.

<sup>25</sup> Angwane niaratre ñan töi namani nebe ja näre angwane, namani nikenta angwane, Pablokwe niebare mda ietre:

Mun kore, ye mden kisete Ngöbö Üai Deme köböire ni Ngöbö kukwei niekä Isaías käkwe niebare krörö mun mräkä kirakiraye munbtä:

<sup>26</sup> Nän niere krörö nitre israelita neye:

Munkwe ti kukwei nuadi blite bari, akwa titä dre niere ñan rükadi gare munye. Erere arato, titä sribi nuene mun okwäbti, ye abko munkwe tuadi bari, akwa drekäre titä sribi ye nuene abko ñan jatadre munye,

<sup>27</sup> ñobtä ñan angwane juta ne käkwe ja dokwä mikani ribi ti kukwei kräke, aisetet ñan tö namani ti kukwei nuai, käkwe ja olo gu dikani ti kukwei ngäniene amne, sribi tikwe ñan jatadre ietre, abkokäre ja okwä jue mikani kwetre.

Mdakäre abko, ti kukwei ñan rükadre gare ietre amne tikwe ñan diandretari, abkokäre nuenbare kore kwetre,  
<sup>Isaías 6.9-10</sup>  
abko tikani kore Isaíakwe munbtä.

<sup>28</sup> Ne aisetet mtare mentokwäre Ngöböta juto biare nitre ñakare israelitare dentari amne, niaratre abko käkwe Ngöbö kukwei nuadi, käkwe kadi ngäbti, ye abko rabara gare munye, niebare Pablokwe ietre.

<sup>29</sup> [Pablokwe ñäkäbare kore, yebtä abko nitre israelita namani nikenta akwa, naman-intre ja kwete krübäte kwärikwäri kukwe yebtä.]<sup>\*</sup> <sup>30</sup> Abti ju ütiä bian nämane Pablokwe nünankrä jae juta Romate, ye känti Pablokwe nünabare ngite ju yete kä kubu täte amne, nire nire nämane nüke basare ie, ye niara nämane kaen ngäbti ja känti ju yete. <sup>31</sup> Angwane Ngöbö nämane gobrane ño ni kwekwe ngätäite, yebtä Pablo namani dirire jáme. Erere arato, Pablo namani blite ni Dänkien Jesukristobtä amne niara kada keta namani ñakare blitabtä Jesukristobtä. Ne abko nakaninkä kore. Ne ngörä.

---

\* 28:29 Kukwe corcheta ngätäite ñan tä tikani manuscrito bari kuinkuinbtä.

## Tärä Tikani Pablokwe Nitre Romanobokrä Romanos

Tärä ne tikaka abko Pablo. Niara nämane nüne juta Corinto kä 57 angwane, tärä ne tikani kwe nütüta. Bäri niara tö namani rikai basare nitre tödekaka Jesubti nünanka Romate yeye, akwa kä ñan namani kwen ie nänkrä. Ye mdən kisete, tärä ne tikani kwe nitre tödekaka Jesubti nünanka juta Romate kräke, Jesukristo kákwe dre dre nuenbare kräke mikakäre gare ietre. Bäsi niaratré jökrä abko ñakare israelitare, akwa niaratré yekri ni israelita tödekaka Jesubti nämane gätäre ben arato. Nitre israelita tödekaka Jesubti ye abko nämane bike kri nitre tödekaka Jesubti ñakare israelitare yebtä, ñobtä ñan angwane Ngöbökwe nitre israelita dianinkä kane aise. Ye mdən kisete kukwe namani nokre nitre tödekaka Jesubti ngätäite Roma yete.

Ne aise, ni jökrä israelita ya, ñakare ya abko ja kwrere jökrä Ngöbö ngwärekri, ye abko Pablo tö namani mikai gare tärä nebtä. Bäri kane abko, ni jökrä kákwe Ngöbö mikani ngwarbe jae, aise ngite Ngöbö ngwärekri abko Pablokwe mikani gare ietre. Yebti, Ngöbö kukwei kuin Jesubtä, ye aibebti Ngöbota ni israelita amne ni ñakare israelitare dentari ja kwrere jökrä abko Pablo tö namani mikai gare ietre. Erere arato, nita tödeke Jesubti, ye aibe köböire ni ñakare ngite mda Ngöbota nire nibtä amne tä ni kaen ngäbti abko Pablo tö namani mikai gare metre. Kukwe Biani Ngöbökwe Moiséye, ye mikabtä tätä abko Ngöbökwe ni kadre ngäbti abko nitre israelita nämane nütüre, akwa ñakare kore Pablokwe niebare ietre. Ni ñan raba jäandrän nuene jire chi Ngöbö moto mikakäre nuäre jakrä, abtä Ngöbökwe ni diandretari, akwa tödeka Jesubti, aibe köböire Ngöbota ni dentari abko Pablota nire tärä nebtä.

### *Pablota köbö kuin juen*

<sup>1</sup> Ti Pablo abko ni klabore Kristo Jesukwe. Ti ne mdən käta köbö kuin juen munye. Ti kärabare Ngöbökwe Jesu kukwei ngwianka amne ti dianinkä jenena Ngöbökwe ja kukwei kuin Jesubtä mikakäre gare. <sup>2</sup> Ngöbökwe ja kukwei kuin Jesubtä ne mikadi gare abko niebare kira kwe ja kukwei niekä niekä köböire, ye mdən abko tä tikani Ngöbö Kukwei Demenbtä. <sup>3-4</sup> Ngöbö kukwei kuin abko tä blite Ngöbö Odei Jesukristo ni Dänkienbtä. Niara därebare ni bobre, di ñakare kä nebtä kwrere jrei David tukwe mräkäkri. Amne Ngöbökwe mikaninta nire angwane, mikani ütiäte kri kwe amne niara abko Ngöbö Odei Di Kri abko Ngöbökwe mikani gare ja Üai Deme köböire. <sup>5</sup> Jesukristo ne köböire Ngöbökwe ja moto mikani kuin tikrä, kákwe ti mikani ja kukwei ngwianka. Angwane ti mikani sribikä jakrä kwe nitre ñakare israelitare kä jökräbti temen käräkäre tödeke Jesukristobti amne Jesukristo mikakäre tätä. <sup>6</sup> Nitre kärabare Ngöbökwe rabakäre Jesukristokwe, ye ngätäite mun nünanka juta Romate tä siba rabakäre Jesukristokwe. <sup>7</sup> Ngöbota mun tarere amne mun kärabare kwe nünakäre deme jakrä. Mun ye abko kräke Ngöbö ni Rün nikwe amne Jesukristo ni Dänkien raba ja moto mike kuin amne raba kä jáme mike mun jökräbtä, ie ti tö.

### *Pablo tö näin basare juta Romate*

<sup>8</sup> Bäri kane ti mräkätre, Jesukristo köböire titä kuin nire Ngöbö tikweye mun itire itire btä, ñobtä ñan angwane mutta tödeke Jesukristobti abko kädrieta kä jökräbti temen.

<sup>9-10</sup> Tita sribire Ngöbokrä ja di ngöi jökrä. Tita kukwe kuin niara Odeibtä mike gare angwane, käre titä blite ben angwane, mutta nüke töre käre tie abko gare kuin ie. Tita blite Ngöböbe angwane, Ngöbö tö ne ngwane, kä biandre kwe tie nebe basare mun känti yete abko käre titä kärere Ngöböye. <sup>11</sup> Tita blite kore ben, ñobtä ñan angwane bari ti tö mun tuai angwane, ti köböire Ngöbö Üai rabadre ja di bien munye, mun moto mikakäre nuäre amne mun mikakäre nüne bari dite Ngöbokrä, abkokäre ti tö näin mun känti yete.

<sup>12</sup> Ye abko, ñan mun aibe rabadre dite Ngöböbtä, ie ti tö, akwa nikwe ja die mikadre

kwärikwäri abko ie ti tö. Munta tödeke Jesukristobti amne titä tödeke bti arato, yebti nikwe ja die mikadre abko ie ti tö.

<sup>13</sup> Ti mräkätre, ti namanina yäke bäre bäre nebe basare munye yete, akwa käre kukwe mda mda tä nebe ti jiete, abtä ti ngämi nebe mun känti. Ti mräkätre tikwe, nitre ñakare israelitare nünanka kä mda känti, tikwe ngwiani tödeke Jesubti, ye kwrere ti tö rikai nitre mun känti yete ngwiain tödeke Jesubti arato, abkokäre ti tö rikai nebe Roma yete. <sup>14</sup> Jata nebe ruen kore tie, ñobtä ñan angwane rürümon ütiä kri tibti Ngöböökwe ruen tie, aisetetitre griegore amne nitre ñakare griegore, nitre töbtä amne nitre ñakare töbtä abko <sup>15</sup> ie ti tö Ngöbö kukwei kuin Jesubtä mikai gare kisere abko erere ti tö näin niere mun nünanka juta Romate yeye. <sup>16</sup> Ngöbö kukwei kuin Jesubtä ye titä gaire ñakare, ñobtä ñan angwane kukwe kuin Jesubtä ye abko Ngöbö di kri ni diantarikrä. Ye abko nire nire käta Ngöbö kukwe kuin Jesubtä ye mike era jae, käta tödeke kwatibe Jesubti abko Ngöböta dentari, aisetetitre Ngöbö kukwei kuin Jesubtä abko Ngöbö di kri ni diantarikrä—nitre israelita ara jire käne, yebti ni mda mda ñakare israelitare abko Ngöböta dentari kore arato. <sup>17</sup> Kukwe kuin Jesubtä abko Ngöbö di kri ni diantarikrä, ñobtä ñan angwane ni ngite ñakare mda Ngöböta niere abko mikata gare kukwe yebti. Nire nire käta tödeke kwatibe Jesubti, ni ye aibe ngite ñakare mda Ngöböta niere. Ne aisetetitre tödeka kwatibe Jesubti aibe ütiäte, mden erere tä tikani krörö Ngöbö Kukweibtä:  
Tödeka kwatibe Ngöböbiti, ye köböire ni ngite ñakare mda nieta Ngöböökwe. Ni ye aibe  
käkwe nünandi Ngöböbe.  
abko tä tikani Ngöbö Kukweibtä.

*Habacuc 2.4*

### *Ngöbö moto romon tä mike gare*

<sup>18</sup> Mdakäre abko, ni jökrä käta kukwe nuene kämekäme amne tä kukwe diän diän nuene bätäkä ngwarbe, erere tä ja mike ngite Ngöbö rüere. Erere arato, ni ye käta kukwe käme nuene angwane, tä kukwe era metre Ngöböbtä ketebti jökrä. Ni ye rüere Ngöbö kä käinbi käta ja moto romon mike gare. <sup>19</sup> Ngöböta ja moto romon mike gare kore, ñobtä ñan angwane kukwe rabadre gare nuäre Ngöböbtä erere gare kuin ni jökraye, ñobtä ñan angwane Ngöbö ara jire käkwe mikani gare krörö: <sup>20</sup> Kena dekä abti kä näuke mtare jändrän dätebare Ngöböökwe, ye mdenbti kukwe tiebe tua ñakare Ngöböbtä abko tä näuke gare nie amne Ngöbö abko Ngöbö ño tä näuke gare nie arato. Ye mden kisete jändrän jökrä dätebare Ngöböökwe kena, yebtä nita töi ngitiekä kuin metre angwane, Ngöbö di kri rabadi kärekäre amne niara abko Ngöbö era metre rükadre gare nie. Ne aisetetitre ni kukwe kämekäme nuenkä ñan raba ja ngite ñakare niere jire chi Ngöböye, <sup>21</sup> ñobtä ñan angwane Ngöbö nämanena gare ietre, akwa ñan mikani ütiäte Ngöbö kwrere kwetre. Erere arato, jändrän nuenbare Ngöböökwe kräke, yebtä kuin niebare ñakare kwetre ie, akwa jändrän ngwarbe ütiäte ñakare abko jiebti nikanintre töbige ngwarbe mda amne, niaratre nikani töbige kukwe diän diän aibebtä.

<sup>22</sup> Ja töbtä kri nämanentre niere, akwa ni töi ñakare kwrere jire namani, <sup>23</sup> ñobtä ñan angwane Ngöbö nünanka kärekäre, ne krüte ñakare amne di kri bärnuäre abko mikani ütiäte ñakare kwetre, akwa ni ngwarbe kä nebtä tä krüte abko bär sribebare ngöböre kwetre jae. Erere arato, nukwä, jändrän ngwarbe ngwarbe ngwarbe känsenta, gwita amne jändrän yorekä tementa abko bär sribebare ngöböre kwetre jae. <sup>24</sup> Niaratre töi käme kore, ye mdenbti abko Ngöböökwe gibianinkä kaibe jae, amne kukwe kämekäme mdei nämane krübäte niaratre töibtä, ye jiebti Ngöböökwe tuanimetre nikani abko erere nikani ja mike gure batibati amne kukwe diän diän mda nuen nämane.

<sup>25</sup> Niaratre nikani kukwe ñakare era metre ye jiebti abko krörö: Jändrän dätebare Ngöböökwe abko mikani ütiäte ngöböre jae kwetre amne käkitaninkä Ngöbö täte kwetre, akwa Ngöbö Jändrän Dätekä era metre ara jire abko mikani ütiäte ñakare kwetre amne käkitaninkä ñakare kwetre. Akwa Ngöbö ye aibe abko rabadre käkitaninkä kärekäre. Abko kore se. Amen. <sup>26</sup> Ye mdenbti Ngöböökwe gibianinkä kaibe jae, kukwe gaidre kri ye aibe mdeita nebe krübäte ietre. Ne aisetetitre merire käkwe ja mikadre gure ni brare ben abko mikanintbe Ngöböökwe nitre merire kräke, ye abko nitre merire käkwe mikani ngwarbe,

kä nikani bike brare jae kwärikwäri. <sup>27</sup> Ne kwrere arato, ni brare käkwe ja mikadre gure ni merire ben abko mikanintbe Ngöböökwe akwa, ye abko kitani temen nitre brarekwe. Abti nitre brare ruäre abko ja mdeita neme krübäte kwärikväri ietre, käta kukwe käme gaidre kri nuene jadtä kwärikväri. Ye dokwäre abko, Ngöbö ara jire käta mike ja ngie nuen metre.

<sup>28</sup> Ngöbö nämanena, ye nämane gare ni jökräye, akwa ñan tö namani mikai ütiäte janknu, abtä Ngöböökwe gibianinkä kaibe jae töbike kukwe kämekäme aibebtä amne, kukwe käme ñan nuendre abko erere nuendre kwetre abkokäre. <sup>29</sup> Ye erere tätre kukwe diän diän nuene bätäkä ngwarbe, amne kukwe bätäkä ngwarbe blo blo tätre nuene. Erere arato, tätre töbike kaibe jändrän kuinbtä jakrä amne töita jändrän ngututure aibebtä. Erere arato, jändrän ni mdakwe abko ie töta nebe bari kabre jakrä amne, ni ni mda kämikaka, ni ngüdrekä ngwarbe, ni ni ngökö ngwarbe, ni diän diän amne ni blitaka ngwarbe ni mda rüere. <sup>30</sup> Amne tätre ñäke diän diän ni mda mda rüere amne mätä kri Ngöböbtä tätre ja mike ütiäte ni mda mdabtä, jata nebe ruen kri ietre au, käta bike kri ni mda mdabtä, tätre kukwe kämekäme miketbe btin mda Ngöbö rüere amne ñan tätremeye amne rün kukwei mike täte. <sup>31</sup> Erere arato, Ngöbö tö dreye abko ñan tö mikai gare jae amne ñan tätre ja kukwei mike täte amne, tätre ni mda mda tarere ñakare amne ni mda mda ruentari tare ñakare ietre. <sup>32</sup> Ni jökrä kukwe nuenkä korekore abko dokwäre krütadre kärekäre amne rabadre Ngöbö okwä bäre mento kärekäre abko Ngöböökwe mikanintbe metre kore, ye abko gare kuin ni jökräye. Akwa tätre kukwe nuene kämekäme janknu. Erere arato, ni mda mda tä nebe kukwe nuene kämekäme kore okwäbti abko käita neme nuäre btätre tuare.

## 2

*Ngöböta kukwe ükete metre ni jökrä kräke*

<sup>1</sup> Akwa ma abko ni israelita, mata bike deme, käta nitre ñakare israelitare kite ngise kukwe käme nuenbtä. Akwa ma abko ngite ñakare Ngöbö ngwärekri, ye makwe ñan nütü jadtä, ñobtä ñan angwane mata ni mda mda kite ngise, akwa mata ja miketa ngite au arato, ñobtä ñan angwane ni mda mda tä ja mike ngite, ye kwrere jire mata ja mike ngite siba. <sup>2</sup> Akwa ni ja mikaka ngite, ye rüere Ngöböta kukwe ükete amne, kukwe era metre btä tä kukwe ükete, ye gare kuin nie. <sup>3</sup> Akwa ma abko tä ni mda mda kite ngise kukwe käme nuenbtä angwane, mata ja mike ngite ja kwrere niaratrebbe, yebtä abko Ngöböökwe kukwe ükadite munkrä, ye näire ni mikadi ja ngie nuen kwe angwane, makwe kwäräbedi abko makwe ñan nütü jadtä. <sup>4</sup> Ngöbö bari moto kuin abko mata mike ngwarbe jae angwane, mata dre dre nuene btä Ngöböta neme romon ñakare jötrö makrä. Akwa makwe kukwe kämekäme kitadre temen amne makwe tödekadre bti, abkokäre Ngöböta ja moto mike kuin makrä, käta ma ngibiare raire, ¿ye abko mata gain ñakare? <sup>5</sup> Akwa ma tä töbike kore angwane, ma tä ja dokwä mike ribi Ngöbökrä amne, ma ñan tö ja töi kwitaita Ngöbö kukwäre, aisetet Ngöböökwe ni mikadi ja ngie nuen, ye ngäbti mata Ngöbö mätä ükekrö bari jakrä. Ye näire Ngöböökwe kukwe ükadite era metre ni jökrä kräke angwane, <sup>6</sup> ni itire itire tä dre dre nuene, ye erere Ngöböökwe ütiä biandi krörö nie: <sup>7</sup> Ni ruäre rabadre käkitaninkä Ngöböökwe amne rabadre mikani ütiäte jae Ngöböökwe amne tö rabai nuñe kärekäre Ngöböbe, abtä ja töi mikani kwatibe jändrän kuin nuene kärekäre Ngöbökrä, ni ye abko Ngöböökwe mikadi nuñe kärekäre. <sup>8</sup> Akwa ni ruäre abko käta töbike jändränbtä kaibe jakrä, käta trö kwite kukwe era metre Ngöböökwe yeye amne tä nekete kukwe kämenkri, ni ye abko btä Ngöbö mätä rabadi kri, käkwe mikadi ja ngie nuen. <sup>9</sup> Ne aisetet ni kukwe nuenkä kämekäme erere käkwe ja tare nikadi kri amne moto rabadi nötöte krübäte ja jiebti arato ja tare nikabtä, ye abko nitre israelita ara jire käkwe ja tare nikadre käne kore. Erere arato, nitre ñakare israelitare käkwe ja tare nikadre. <sup>10</sup> Akwa nire nire käkwe jändrän nuenbare kuin kärekäre Ngöbökrä abko Ngöböökwe käkitadikä, käkwe mikadi ütiäte amne mikadi nuñe jáme kwe, ye abko nitre israelita kräke käne amne nitre ñakare israelitare kräke arato. <sup>11</sup> Ye kwrere Ngöböökwe kukwe ükadite ni jökrä kräke,

ñobtä ñan angwane ni ja kwrere jökrä Ngöbökrä amne ñan Ngöböta nitre israelita tarere bäri nitre ñakare israelitare kräke.

<sup>12</sup> Nitre ñakare israelitare abko ie Kukwe Biani Ngöbökwé Moiséye gare ñakare, käta ja mike ngite, ye abko Ngöbökwé mikadi ja ngie nuen, akwa ñakare Kukwe Biani Ngöbökwé Moiséye yebti; akwa nitre israelita abko ie Kukwe Biani Ngöbökwé Moiséye gare bäri kuin, käta mike ñakare ütiäte jae amne, tä ja mike ngite, nitre ye abko Ngöbökwé mikadi ja ngie nuen Kukwe Biani Ngöbökwé Moiséye yebti. <sup>13</sup> Ngöbökwé kukwe ükadite kore, ñobtä ñan angwane ñan nita Kukwe Biani Ngöbökwé Moiséye ye kukwei nuen jirekäbe abko köböire ni ñakare ngite mda Ngöböta niere nibtä; akwa Kukwe Biani Ngöbökwé Moiséye ye nita mike täte metre ta abko köböire ni ñakare ngite mda Ngöböta niere nibtä. <sup>14</sup> Nitre ñakare israelitare abko kwe Kukwe Biani Ngöbökwé Moiséye ñakare, akwa kukwe ye tä dre nuemna, erere nitre ñakare israelitare tä nuene nierare ja töi jenbtí angwane, kukwe nuenta kwetre ye abko kukwe biani nuendre Ngöbökwé nie ara jire kwrere. <sup>15-16</sup> Ye ñobtä ñan angwane Kukwe Biani Ngöbökwé Moiséye käta dre nuemna, ye erere nitre ñakare israelitare tätre nuene nierare ja töi jenbtí angwane, kukwe ye tä niaratre töibtä tätre bå mike, aisetet nongwane tätre ja mike ngite amne nongwane tätre ja mike ngite ñakare tä nüke gare au jabtä ietre. Ne aisetet Jesukristo köböire Ngöbökwé kukwe ükadite ni jökrä kräke, ye näire kukweta kaibe tiebe nitre ñakare israelitarekwe, yebti abko Ngöbökwé ükadite kräke. Angwane niaratre kákwe ja mikani ngite angwane, töi käme ara jire kákwe niaratre kitadi ngite o niaratre töi metre kákwe bå mikadi metre Ngöbö ngwärekri. Ne abko Ngöbö kukwei kuin Jesubtä dirita tikwe käta niere.

#### *Nitre israelita amne Kukwe Biani Ngöbökwé Moiséye*

<sup>17</sup> Mata ja israelita niere amne Kukwe Biani Ngöbökwé Moiséye, bti mata tödeke amne, mata ja gete Ngöböbe, bti ja ruen ütiäte kri mae. <sup>18</sup> Erere arato, makwe dre dre nuendre nünakäre metre, ie Ngöbö tō, ye garera mae, ñobtä ñan angwane Kukwe Biani Ngöbökwé Moiséye käta mike gare mae. <sup>19</sup> Abtä nitre ñakare israelitare, ie Ngöbö gare ñakare abko ma raba nikén jie ngwena Ngöböye, ruen mae. Erere arato, nitre ie Ngöbö gare ñakare abko okwáte ma raba kä trå tikekä ngwiankäre Ngöböye, ruen mae. <sup>20</sup> Mdakäre abko, nitre ñakare israelitare töbtä ñakare Ngöböbtä abko, ie Ngöbö gare ñakare abko ie ma raba dirire, ruen mae. Erere arato, nitre ñakare israelitare töi mräme Ngöböbtä ngäbäkre kwrere abko ma raba töi tike Ngöböbtä ruen mae, ñobtä ñan angwane Kukwe Biani Ngöbökwé Moiséye käta ma töi tike amne tä kukwe era metre Ngöböbtä mike gare mae, aisetet mata töbige kore jabtä.

<sup>21</sup> Akwa ma abko israelita, aisetet ma rabadre Kukwe Biani Ngöbökwé Moiséye dirire nitre ñakare israelitare ye ye mata nütüre, erere mata nuene. ¿Ye ñobtä abko ma ara jire ñan tä kukwe ye dirire käne au jae? ¡Niaratrekwe ñan godre dirita makwe ietre amarebti mata gore! <sup>22</sup> Erere arato, meri ni mdakwe ñan mikadre ja ken, mata dirire nitre ñakare israelitareye, amarebti ma ara jire käta meri ni mda mdakwe mike ja ken kän. Mdakäre abko, ngöbö ngwarbe tä neme tuen käme krübäte mae amarebti jändräñ ütiäte ütiäte tä ngöbö ngwarbe juete abko mata goire. <sup>23</sup> Erere arato, Kukwe Biani Ngöbökwé Moiséye tä makwe, bti mata bike kri, akwa Kukwe Biani Ngöbökwé Moiséye, ye ñan mikata täte metre makwe, aisetet kukwe ye arabe bti mata Ngöbö mike ngwarbe jae. <sup>24</sup> Ye mden kisete, Ngöbö Kukwei tä tikani krörö mabtä:

Mun israelita ye mden köböite nitre ñakare israelitare tä ñäke blo Ngöbö rüere. *Isaías 52.5; Ezequiel 36.22*

abko tä tikani Ngöbö Kukweibtä mun israelitabtä.

<sup>25</sup> Mdakäre abko, mata ñäräkrä mike ma kwatabtä, Ngöböta ma bkäne bå mikakäre, akwa ti tö kukwe niei krörö mae: Kukwe Biani Ngöbökwé Moiséye, ye mata mike täte era metre jökrä, ye aibe angwane ñäräkrä mikani kwatabtä abko ütiäte Ngöbö ngwärekri; akwa Kukwe Biani Ngöbökwé Moiséye ye ma ñan tä mike täte jökrä, ye ngwane ñäräkrä mikani ma kwatabtä abko ñakare ütiäte Ngöbökrä. Amne ni ñakare israelitare ñäräkrä

ñakare kwatabtä, ye kwrere jire ma tä nebe Ngöbö ngwärekri. <sup>26</sup> Akwa ni ñakare israelitare abko kákwe Kukwe Biani Ngöböökwe Moiséye ye mikare täte jökrä angwane, ñäräkrä mikani ñakare kwatabtä, akwa nitre israelita ñäräkrä mikani kwatabtä, kwrere jire bä rabadre Ngöbö ngwärekri. <sup>27</sup> Ye abko, era metre ma abko israelita, aise ñäräkrä mikani ma kwatabtä amne mata Kukwe Biani Ngöböökwe Moiséye ye bkäne, akwa mata mike ñakare täte, aise ñakare israelitare ñäräkrä mikani ñakare kwatabtä, akwa Kukwe Biani Ngöböökwe Moiséye mikata täte kwe, ni ye abko kákwe ma kitadi ngite, <sup>28</sup> ñobtä ñan angwane nita därrere ni mräkä israelitakri, ye aibe köböire ñan nita nebe israelitare era metre Ngöbö ngwärekri. Erere arato, ni ñäräkrä mikani kwatabtä, ye ñan aibe köböire abko nita nebe ñäräkrä mikani era metre Ngöbö ngwärekri, <sup>29</sup> ñobtä ñan angwane ni töi kuin amne ni moto kuin Ngöbö ngwärekri, ni ye abko ni israelita era metre Ngöbö ngwärekri amne, ni töi kuin era metre ye abko käta ni ñäräkrä mikani ni kwatabtä kwrere. Ne aise ñäräkrä era metre ni kwatabtä abko Ngöbö Üai tä nuene ni töibtä, käta ni töi mike kwatibe Ngöböbtä, ye abko ñan Kukwe Biani Ngöböökwe Moiséye tä tikani täräbtä, ye käta ni töi mike kore. Ne aise ñan mikani kwatibe Ngöböbtä kore Ngöbö Üai köböire, ye abko ñan ni mda mdakwe käkitadikä, akwa Ngöbö ara jire kákwe ni ye käkitadikä, kákwe mikadi ütiäte jae.

## 3

*Ngöböta ja kukwei mike täte era metre*

<sup>1</sup> Ye abko, ma därebare ma mräkä israelitakri amne ñäräkrä mikanina ma kwatabtä ye ütiäre Ngöböökwe ñan ma mikadre metre ja ngwärekri, aise ma abko israelita amne, makwe ñäräkrä mikani ma kwatabtä, ¿ye abko ütiäte makrä ya? <sup>2</sup> ¡Jänri, ye abko ütiäte kri! Kukwe keta kabre btä ye ütiäte, ñobtä ñan angwane käne Ngöböökwe tödekaní nitre israelitabti, kákwe ja Kukwei biani ietre. <sup>3</sup> Yebti ¿dre rakadrekä mda? Nitre israelita ruäre kákwe Ngöbö kukwei mikadi täte, niebare kwetra Ngöböye. Abti ja kukwei kitaninta temen kwetra. ¿Yebtä abko Ngöböökwe ja Kukwei mikadi täte niebare ni mräkä israelita kirakiraye, ye Ngöböökwe kitadita temen niaratra kwrere arato ya? <sup>4</sup> ¡Ñakare jire! ¡Ngöböökwe ñan ja kukwei kitadre jire chi temen! Ni jökrä rabadre ni ngökö, kákwe ja kukwei kitadre temen, akwa Ngöbö abko käre tä kukwe niere, erere tä mike täte jökrä. Ne aise Ngöbö Kukwei käta niere krörö:

Ma kukwei abko raba mikani era Ngöbö amne mata kukwe ükete nikrä angwane, ma  
kukwei era metre rükadi gare mabtä, *Salmos 51.4*  
abko tä tikani Ngöbö Kukweibtä.\*

<sup>5</sup> Akwa ni ruäre tä ñäke ngwarbe krörö Ngöbö rüere: Nita ja mike ngite Ngöbö rüere angwane, Ngöbö abko bäri metre ta mikata gare btä amne Ngöbö käkitakata bäri. Kore ne ngwane, Ngöböökwe ni mikadre ja ngie nuen angwane, Ngöböta kukwe nuene blo abko ni ruäre tä niere ngwarbe. <sup>6</sup> Akwa ni ñan raba ñäke jire chi kore Ngöböbtä, ñobtä ñan angwane Ngöbö ñakare kukwe ükete era metre ni israelitakrä, kákwe ni mikadre ja ngie nuen kukwe kämekäme dokwäre, ¿se abko kukwe ükadrete ño kwe ni ñakare israelitare kä jökräbti kräke, mikakäre ja ngie nuen se? Akwa niara abko era metre, aise tä kukwe ükete kore ni israelitakrä arato. <sup>7</sup> Erere arato, ni ruäre käta niere ngwarbe krörö: Tikwe blitadre ngwarbe ni ngökakäre, ye ngwane Ngöbö moto bäri kuin amne Ngöbö di kri bärnuäre mikata gare tibtä angwane, ¿se ñobtä abko ti ngite, aise Ngöböökwe ti mikadre ja ngie nuen? abko ni ruäre tä niere. <sup>8</sup> Ye abko ngwarbe era metre, akwa nane rabadre metre, ye ngwane jari kukwe kämekäme nuene ye köböire Ngöbö di kri bärnuäre mikadre gare bäri abkokäre! abko rabadre kuin. Ye abko dirita kore tikwe abko ni ruäre tä niere tibtä ti bärnuäre mikakäre käme, akwa ye dokwäre Ngöböökwe nitre ye mikadi ja ngie nuen era metre.

*Ni ñakare jire iti metre amne ngite ñakare Ngöbö ngwärekri*

\* <sup>3:4</sup> Meri kädian nämane Betsabé, ben jrei David kákwe ja mikani ngite, abti Salmos 51 tikani kwe ja ngite niekäre Ngöböye.

<sup>9</sup> ¿Nikwe dre niedre mrä? ¿Ni israelita ne abko béri kuin era metre nitre ñakare israelitare ngwä abko Ngöböta nütüre ya? ¡Ñakare jire! ñobtä ñan angwane ni israelita ya, ñakare ya akwa ni jökrä ngite ja kwrere Ngöbö ngwärekri, ye mden abko nunkwe bär mikanina. <sup>10</sup> Ye mden erere Ngöbö Kukweita niere arato abko krörö:

Ni ñakare jire iti era metre Ngöbö ngwärekri.

<sup>11</sup> Ni ñakare jire iti abko ie kukwe gare era metre Ngöböbtä.

Ni ñakare jire iti käta Ngöbö känentari.

<sup>12</sup> Ni jökrä käkwe trö kwitani Ngöböye, bti nikani ji blobti amne nikaninta kukwe kämekäme nuene ja kwrere jökrä Ngöbö rüiere.

Ni ñakare jire iti kukwe kuin nuenkä.

Ni ñakare jire iti.

*Salmos 14.1-3; 53.1-3*

<sup>13</sup> Mdakäre abko, ni krütani doboi mikani, bti jue diandrekäta amne rä kure, ye kwrere jire ni töi käme abko erere blitata käme kwe.

Ere arato, ni tüdrä abko tä blite ngwarbe ni mda mda ngökakäre. *Salmos 5.9*

Tbi tu krübäte käta ni mike bren, ye kwrere jire ni ñäke taretare krübäte käta ni mda mda juen ngwarbe. *Salmos 140.3*

<sup>14</sup> Erere arato, ni kada abko tä biare ñäkäkäre blo ni mda mda rüere amne käre nita blite romone. *Salmos 10.7*

<sup>15</sup> Ni jökrä tä juto biare ni mda mike bren amne ni mda kämike.

<sup>16</sup> Nitre ye abko tä jäandrän jökrä juen ngwarbe amne tä ni mda mike ja tare nike.

<sup>17</sup> Nünandre jáme Ngöböbe amne ni mda mdabe, ye abko gare ñakare ietre. *Isaías 59.7-8*

<sup>18</sup> Ne aise, ni ñakare jire iti kä nebtä käta Ngöbö jürä ngwen jabtä, käta Ngöbö mike ütiäte jae. *Salmos 36.1*

<sup>19</sup> Ye kwrere abko Ngöbö Kukweita ni ngite mike gare nie kore. Mdakäre abko, kukwe ye tä nitre ñakare israelitare aibe kite ngite, makwe ñan nütü, ñobtä ñan angwane mun israelita abko kräke Ngöbökwé ja Kukwei biani mun ngite mikakäre gare munye abko gare kuin nie. Ye mden kisete, kä mrä angwane, Ngöbökwé kukwe ükadite nikrä angwane, ni jökrä israelita amne ñakare israelitare ye rabadi kada ketani amne rabadi kwekbe jökrä, ñobtä ñan angwane ngite ñakare, ye ñan rabadre niere Ngöböye, <sup>20</sup> ñobtä ñan angwane ni ñakare jire iti käkwe Kukwe Biani Ngöbökwé Moiséye mikadre täte jökrä abko ütiäre ngite ñakare mda Ngöbökwé niedre btä. Akwa Kukwe Biani Ngöbökwé Moiséye ye köböire ni jökrä abko kukwe kämekäme nuenkä abtä ngite Ngöbö ngwärekri tä nüke gare nie.

### *Tödeka kwatibe Jesubti aibe köböire ni ngite ñakare mda Ngöböta niere*

<sup>21</sup> Akwa mtare, ñokwe ni ngite ñakare mda Ngöböta niere abko niarakwe mikanina gare ni jökräye. Akwa ñan Kukwe Biani Ngöbökwé Moiséye ye köböire Ngöböta ni ngite ñakare mda niere nibtä abko Kukwe Biani Ngöbökwé Moiséye käta niere metre amne, Ngöbö kukwei mda mda tikani nitre Ngöbö kukwei niekäkwe käta niere arato. <sup>22</sup> Ni jökrä israelita ya, ñakare ya, akwa tä tödeke era metre Jesukristobti abko erere ngite ñakare mda Ngöböta niere btätre. Ne abko Ngöböta nuene ja erebe ni jökrä kräke, <sup>23</sup> ñobtä ñan angwane ni jökrä käta ja mike ngite Ngöbö rüere, abtä Ngöböta kukwe nuemna nie, ye abko ni jökrä ñan tä mike täte metre jire chi. Ye aise, ni ñakare jire iti abko metre Ngöbö kwrere. <sup>24</sup> Akwa Kristo Jesu krütani krusobtä angwane, niarakwe ni kökanintarita ni tikatekäre, ye köböire ni jökrä tödekaka Jesukristobti abko ngite ñakare mda Ngöböta niere ja moto kuinbti amne ñan tä ni ngite ütiä kärere jire chi nie. <sup>25</sup> Ngöbö ara jire käkwe Kristo Jesu biani müre ketadre ni kwati ngwärekri angwane, Kristo Jesu därie käkwe Ngöbö töi kwitani, aise Ngöbö mätä kri ni ngite ngite rüere ñakare mda, amne Kristo Jesu därie käkwe Ngöbö moto mikaninta jáme nikrä. Ye ngwane abko, Kristo däriebti Ngöbökwé ni ngite dianinkä mento nibtä, yebti nikwe tödekadre kwatibe. Mdakäre abko, Ngöbö abko metre ta, käta kukwe ükete metre nikrä, ye mikakäre gare, Ngöbökwé Kristo Jesu biani müre ketadre kore, ñobtä ñan angwane Jesukristo müre keta ngämi, känenkri Ngöbökwé ni mikadre ja ngie nuen täte jökrä kukwe kämekäme dokwäre, akwa

nuenbare ñakare kwe. <sup>26</sup> Erere arato, niarata kukwe ükete metre ni jökrä kräke mtare, ye rabadre gare nie, abkokäre Kristo Jesu biani kwe müre ketadre ni jökrä kräke. Ngöbö rabadre kukwe ükete metre ni jökrä kräke amne rabadre nitre tödekaka Jesubti ngite denkä mento btä arato, abkokäre nuenbare kore kwe.

<sup>27-28</sup> Ngöbökwe sribi kuin nuenbare kore nikrä, ¿yebti ni abko bari metre au, bti nikwe bikadre kri sribi jen nikwebti ya? ¡Ñakare jire! Jändrän ñakare bikakrä kri nie, ñobtä ñan angwane ñan Kukwe Biani Ngöbökwe Moiséye abko mikani täte jökrä metre nikwe abko ütiäre ni ngite ñakare mda Ngöböta niere amne ni kaen ngäbti, akwa tödeka kwatibe Jesukristobti, ye köböire ni ngite ñakare mda Ngöböta niere amne tä ni kaen ngäbti.

<sup>29</sup> Ti bike kukwe mda ngwentari abko krörö: ¿Ngöbö ye abko, Ngöbö kaibe nitre israelita aibe kräke ya? amne ¿ni mda mda ñakare israelitare abko ñakare Ngöbö ye bkäne siba ya? ¡Ñakare jire! Ngöbö abko Ngöbö ni kä jökräbtikwe, aisetet ni israelita amne ni ñakare israelitare arato abko Ngöböta kaen ngäbti, <sup>30</sup> ñobtä ñan angwane Ngöbö abko itibe. Nebti Ngöbö mda ñakare jire. Nire nire tödekaka Ngöböbti abko ñakare ngite mda abko Ngöböta niere btä. Mden kisete, ni israelita ñäräkrä tärä kwatabtä ya, ni ñakare israelitare ñäräkrä ñakare kwatabtä ya, ye ñan mikata ñäräre Ngöbökwe nibtä.

<sup>31</sup> ¿Ne aisetet nita tödeke Jesubti, abtä Kukwe Biani Ngöbökwe Moiséye abko ütiäre ñakare nikrä ya? ¡Ñakare jire! ñobtä ñan angwane nita tödeke Jesubti, ye ngwane Kukwe Biani Ngöbökwe Moiséye ye tä nebe bare täte jökrä nibtä.

## 4

### *Abrahamkwe tödekani Ngöböbti*

<sup>1</sup> ¿Mdakäre abko, nikwe dre niedre ni mräkä käne Abrahamtä? ¿No köböire ni ngite ñakare mda Ngöböta niere, abkobtä dre nükani gare Abrahamye? <sup>2</sup> Abraham kákwe jändrän kuin nuendre au ja di jenbti abko ütiäre niara ngite ñakare Ngöbö ngwärekri, ye ngwane rabadre bike kri, akwa namani bare ñakare kore ie, aisetet ñan namani bike kri Ngöbö ngwärekri. <sup>3</sup> Ne aisetet, Ngöbö Kukwei käta niere krörö btä:

Abrahamkwe tödekani Ngöböbti,

aisete Ngöbökwe niara ngite kukwe käme nuenbtä dianinkä mento btä angwane,  
ngite ñakare mda Ngöbökwe niebare. *Génesis 15.6*

abko tä tikani Ngöbö Kukweibtä.

<sup>4</sup> Ye abko nita sribire angwane, sribi bkänkä käta sribi ütiä bien nie, ye abko ñan tä bien ngwarbe ja moto kuinbti nie, akwa nita sribire abko ütiä bianta kwe nie. <sup>5</sup> Akwa ni ñan raba sribi nuene jire chi abko ütiäre Ngöbökwe niedre nie: Ma ngite ñakare mda ti ngwärekri. Akwa ni ngututu ngite ngite Ngöbö rüere käta Ngöbö mike era amne tä tödeke Ngöböbti, ni ye abko ngite ñakare mda Ngöböta niere. <sup>6</sup> Ñan jändrän kuin nuenbare nikwe Ngöbö moto mikakäre jäme jakrä abko ütiäre ni ngite ñakare mda Ngöböta niere akwa, tödekabtä Ngöböbti abko köböire ni ngite ñakare mda Ngöböta niere. Ni ye abko btä käta neme nuäre krübäte abko jrei David tukwe kákwe tikani arato abko krörö:

<sup>7</sup> Nireta Ngöbö kukwei kite temen, bti tä ja mike ngite ja töibti Ngöbö rüere amne käta kukwe käme nuene Ngöbö rüere,

akwa Ngöböta ngite denkä jökrä btä, ni ye abko btä kä rabadre bari nuäre.

<sup>8</sup> Erere arato, ni ngite Ngöbö ngwärekri akwa, ye dokwäre ni Dänkien Ngöböta mike ñakare ja ngie nuen, ni ye abko btä kä rabadre bari nuäre, *Salmos 32.1-2*

abko tikani Davikwe.

### *Ñan ñäräkrä mikani kwatabtä abkobtä Abraham ngite ñakare Ngöbö ngwärekri*

<sup>9</sup> Mdakäre abko, ni ngite ñakare mda Ngöböta niere, niebare Davikwe, ¿ye abko ni ñäräkrä mikani kwatabtä aibe kräke ya o ni ñäräkrä ñakare kwatabtä abko kräke arato ya? Abrahamkwe tödekani Ngöböbti, aibebtä ngite ñakare mda niebare Ngöbökwe btä, ye nita niere aisetet titä kukwe ngwentari kore. <sup>10</sup> ¿Akwa Abraham ñäräkrä mikanina

kwatabtä angwane, niara ngite ñakare mda niebare Ngöböökwe btä ya o ngämi ñäräkrä mike ja kwatabtä, ye känenkri niebare kwe btä ya? ¿Ñongwane Abraham ngite ñakare mda Ngöböökwe niebare btä? ¡Abraham ngämi ñäräkrä mike ja kwatabtä, känenkri ngite ñakare mda Ngöböökwe niebare btä! <sup>11</sup> Abti Abrahamkwe ñäräkrä mikani ja kwatabtä. Abrahamkwe tödekani Ngöbööti, abtä ngite ñakare mda Ngöböökwe niebare btä, ye mden bā mikakäre Ngöböökwe ñäräkrä mikamna ja kwatabtä Abrahamye. Ne aise te ni ñäräkrä ñakare kwatabtä, akwa tä tödeke Jesukristobti abko tä tödeke Ngöbööti Abraham kwrere, aise te Abrahamta nebe rün kwrere arato. Ye aise te ni ñäräkrä ñakare kwatabtä akwa tä tödeke Ngöbööti, yebtä abko ngite ñakare mda Ngöbööta niere. <sup>12</sup> Erere arato, ni mräkä israelita ñäräkrä kwatabtä, ye käta tödeke Ngöbööti arato, ye abko tä tödeke Ngöbööti Abraham kwrere, aise te Abraham tä niaratre rün kwrere arato.

### *Ñan Kukwe Biani Ngöböökwe Moiséye mikabtä tätē abko ütiäre Abraham ngite ñakare*

<sup>13</sup> Mdakäre abko, Abraham amne Abraham mräkätre ja täritäri rabadi kä jökrä bkäne Ngöböökwe niebare ietre, ye abko ñan Kukwe Biani Ngöböökwe Moiséye mikabtä tätē abko Ngöböökwe niebare ietre, akwa Abrahamkwe tödekani kwatibe Ngöbööti angwane, ngite ñakare mda Ngöböökwe niebare btä. Abtä niara amne mräkätre ja täritäri rabadi kä jökrä bkäne niebare Ngöböökwe ie. <sup>14</sup> Ne ñan ñobtä ñan angwane Kukwe Biani Ngöböökwe Moiséye ye nita mike tätē jökrä abko ütiäre ni rabadre kä ne bkäne jökrä, ye ngwane ni rabadre kä gana ine au ja di jenbt, aise te tödeka Ngöbööti abko ütiäre ñakare jire chi. Erere arato, Ngöböökwe jändrän bian braibare nie ne rabadre ütiäre ñakare arato, <sup>15</sup> ñobtä ñan angwane Kukwe Biani Ngöböökwe Moiséye ye kitabtä temen nita neme ngite Ngöbö ngwärekri, dokwäre Ngöböökwe ni mikadre ja ngie nuen kri; akwa kukwe biani nuendre ye ñakare angwane, ni ñan raba kukwe ye kite temen ja töi jenbt, erere ja mike ngite ñakare.

<sup>16</sup> Ne aise te, Ngöböökwe kä köböi mikani Abrahamye amne Abraham mräkätre ja täritäriye ye abko rabadre ütiäre, abkokäre Ngöböökwe biani ngwarbe ie. Ye abko tödekabtä Ngöbööti, aibe köböire Ngöböökwe Abraham mikadi kä bkäne abko köböi mikani kore kwe ie. Ye abko, ñan nitre israelita Kukwe Biani Ngöböökwe Moiséye mikaka tätē aibe kräke Ngöböökwe kä ye köböi mikani, akwa ni jökrä israelita ya, ñakare ya käta tödeke Ngöbööti Abraham kwrere, ye kräke Ngöböökwe kä köböi mikani kore arato. Ne aise te Abraham abko ni jökrä israelita ya, ñakare ya rün kwrere. <sup>17</sup> Mden erere, Ngöbö Kukwei tä niere krörö:

Tikwe ma mikani juta kwati bätäkä ngwarbe rünre kä nebtä, *Génesis 17.5*  
niebare Ngöböökwe Abrahamye. Ngöbö ni krütanikrütani mikaka nire amne, jändrän ñäre ñakare abko Ngöbööta mike nire, Ngöbö ye mden abko bti Abrahamkwe tödekani.

<sup>18-19</sup> Ngöbö ye mden kákwe niebare krörö Abrahamye:

Muke kabre ñan tanre, ye kwrere jire ma bkün rabadi kä nebtä. *Génesis 15.5*  
niebare Ngöböökwe ie. Ye ngwane abko, Abraham ñan di namanina ngäbäkre ngibiare namani nütüre, ñobtä ñan angwane kä namanina bäsí siento krati ie aise te. Erere arato, merire kwe Sara namanina unbre, kise mriani jadtä, aise te ñan rabadre ngäbäkre ngibiare, namani nütüre, akwa Ngöböökwe kukwe niebare ie, yebti tödekani kwe amne mikani era kwe. <sup>20</sup> Ngöböökwe kukwe niebare Abrahamye, ye namani era kräke angwane, tödekani bäri Ngöbööti kwe amne, ñan Ngöbö kukwei mikani ngwarbe jae kwe, kákwe Ngöbö kääkitaninkä, <sup>21</sup> ñobtä ñan angwane Ngöbö abko di nämane tätē ja kukwei mikakäre tätē, ye abko namani era Abrahamkrä. <sup>22</sup> Abrahamkwe tödekani kore Ngöbööti, ye mdentä abko ngite ñakare mda abko Ngöböökwe niebare btä amne kani ngäbti kwe. <sup>23</sup> Abrahamkwe tödekani Ngöbööti, yebtä ngite ñakare mda niebare Ngöböökwe btä abko tikani täräbtä, ye ñan tikani niara aibe kräke, <sup>24</sup> akwa Ngöbö Jesu mikakata nire nitre ngwäräkare ngätäite, Ngöbö yebti nirekwe tödekadre, ni ye abko ngite ñakare mda Ngöböökwe niedi amne kadi ngäbti kwe. Ni ye kräke kukwe ye nämane tikani. <sup>25</sup> Jesu ye abko biani Ngöböökwe müre ketadre ni ngite diankakäre mento nibtä, ñobtä ñan angwane

ni nämane ngite Ngöböye kukwe käme nuenbtä amne, ni ngite ñakare mda, ye Ngöbö rabadre niere nibtä, abkokäre Ngöböökwe mikaninta nire.

## 5

*Nita nüne jämé Ngöböbe abko käita neme nuäre nibtä*

<sup>1</sup> Nikwe tödekan Jesukristobti ye köböire ni ngite ñakare mda niebarera Ngöböökwe, aisetet nita ja mäketa jämé Ngöböbe ni Dänkien Jesukristo köböire. <sup>2</sup> Nikwe tödekan bti angwane, niarakwe ni mikani krötö Ngöbö moto kuin ye ken amne mtare Ngöbö moto kuin täte jökrä nikrä amne Ngöböökwe ni mikadita bäsí ja kwrere, ye nita ngibiare kisere abko käita neme nuäre nibtä. <sup>3</sup> Ye abko ñan jändrän aibe käita nuäre nibtä, akwa nita ja tare nike bätäkä ngwarbe abko käita bärí nuäre nibtä arato, ñobtä ñan angwane ja tare nika ye abko käta ni mike nünenkä bärí dite janknu mda, nikwe ñan Jesu gibiadrekä jire abkokäre. <sup>4</sup> Erere arato, nita nebe nünenkä bärí dite tödektä Jesubti, ye käta ni töi mike bärí metre Ngöbö okwate amne ye käta ni die mike Jesu ngibiare ngäbti kisere bätärekä, käi ngwiane nuäre jabtä bärí mda. <sup>5</sup> Ñan nita Jesu ngibiare ngäbti ngwarbe abko gare kuin nie, ñobtä ñan angwane Ngöböökwe ja Üai Deme biani nie amne, Ngöböta ni tarere kri ja moto kuinbti abko Ngöbö Üai Deme tä mike gare nie.

<sup>6-7</sup> Ye abko, bäsí ni ñakare jire iti abko tä biare ja mike müre ketadre ni metre diäre. Nane ni mda kákwe jändrän bärí kuin nuenbare nikrä angwane, nikwe ja mikadre müre ketadre ni ye diäre. Akwa ni nämane nüne Ngöbö riure amne ni di ñakare ja diantarikrä au angwane, kä bärí kuin, ye näire Kristo Jesu nükani amne krütani ni diäre amne ni kräke. <sup>8</sup> Ye mdenbtä abko, Ngöböta ni tarere kri tä mike gare krörö nie: Ni nämane kukwe nuene kämekäme Ngöbö rüere abtä ni nämane ngite Ngöbö ngwärekri, ye ngwane Kristo krütani ni diäre amne ni kräke.

<sup>9</sup> Mtare Kristo krütanina ni kräke, ye köböire ni ngite ñakare mda Ngöböökwe niebarera. Yebtä mtare bärí Kristo köböire ni rabadi dianintari amne, Ngöböökwe ñan ni mikadre ja ngie nuen kä mrä angwane, <sup>10</sup> ñobtä ñan angwane ni nämane ja rüere Ngöböökwe angwane, Ngöbö Odei krütani ye köböire niara ara jire kákwe ja mäkäninta nibe, aisetet mtare bärí Ngöböökwe ni mikanina ja mäketa jabe, aisetet Kristota nire, käta ni mike nüne kärekäre jabe, ye mdenbtä ni rabadi dianintari. <sup>11</sup> Ne abko, ni rabadi dianintari mrä, ñan ye aibebtä nita kuin niere Ngöböye amne käita neme nuäre nibtä, akwa nita Ngöbö ara käi ngwen nuäre jabtä ni Dänkien Jesukristo köböire. Niara köböire nita ja mäkäninta Ngöböökwe mtare.

*Adán amne Kristo*

<sup>12</sup> Mdakäre abko, kena ni itibe kädian nämane Adán abko kákwe ja mikani ngite Ngöbö riure angwane, kukwe käme Ngöbö rüere nükani kä nebtä amne kukwe käme köböite ni jökrä nikani krüte, ñobtä ñan angwane ni jökrä kákwe ja mikani ngite Ngöbö rüere arato.

<sup>13-14</sup> Akwa ñan ja mikani ngite kwetre ja kwrere Adánbe. Adán näire abti kä nüke Moisés näire, Ngöbö ngämi ja kukwei bien Moiséye nuendre nie, ye känenkri kukwe käme Ngöbö rüere namanina kä nebtä, aisetet ni jökrä nämane gata ngoto täni, aisetet nämane krüte. Akwa Adánkwe Ngöbö kukwei ara jire kitani temen, ye kwrere nuenbare ñakare kwetre, ñobtä ñan angwane niaratre abko ie Ngöbö ngämi ja kukwei bien nuendre, aisetet ñan ja mikani ngite kwetre Adán kwrere, ñobtä ñan angwane kukwe bian ngämi nuendre nie, känenkri nita nebe tuen ngite ñakare kukwe yebtä. Adánkwe ja mikani ngite, ye köböite ni jökrä namani ngite Ngöbö ngwärekri, akwa ye kwrere ni mdara jire abko Jesukristo rükadre kukwe kuin nuene ni jökrä kräke abko bärí mikani Adánbtä.

<sup>15</sup> Akwa Adánkwe ja mikani ngite, yebti ta abko Ngöböökwe jändrän bärí ütiäte kri nuenbare nikrä, ñobtä ñan angwane ni itibe Adán kákwe ja mikani ngite, ye köböite ni kwati nikani krüte amne namani mente Ngöböye. Akwa ja moto kuinbti Ngöböökwe jändrän kuin nuenbare ngwarbe nikrä ni itibe Jesukristo moto kuin köböire, ye abko bärí ütiäte kri amne kuin ni kwati kräke. <sup>16</sup> Ye abko ti bike niereta bobukäre: Ni itibe Adán kákwe ja mikani ngite amne Ngöböökwe jändrän kuin nuenbare ngwarbe nikrä,

jändrän ketebu ye abko ñakare ja kwrere, ñobtä ñan angwane ni itibe Adán, köböite Ngöbökwe ni jökrä mikani ja ngie nuen. Akwa ni kwati kukwe nuenkä kämekäme käkwe ja mikani ngite kabre krübäte Ngöbö rüere abko kräke Ngöbökwe jändrän kuin nuenbare ngwarbe Jesukristo köböire. Yebtä abko ni ngite ñakare mda Ngöböta niere.<sup>17</sup> Ye abko, ni itibe Adán käkwe ja mikani ngite abko köböite ni jökrä namani gata ngoto täni, aisetet nämane krüte amne namani mente Ngöböye. Ye kwrere arato, Ngöbökwe jändrän kuin nuenbare ngwarbe nikrä ja moto kuinbti, ye abko bäri ütiäte kri, aisetet ni mikadita metre ja ngwärekri kwe nikwe nünandre kärekäre ni itibe Jesukristo köböire abkokäre.

<sup>18</sup> Ni itibe Adán käkwe ja mikani ngite batibe Ngöbö ngwärekri, dokwäre Ngöbökwe ni jökrä mikani ja ngie nuen. Ye kwrere arato, ni itibe Jesukristo käkwe jändrän nuenbare kuin metre krusobtä, ye köböire ni jökrä tödekaka Jesubti abko ngite ñakare mda abko Ngöböta niere. <sup>19</sup> Ni itibe Adán käkwe Ngöbö kukwei kitani temen, ye köböite ni kwati nikani kukwe nuene kämekäme. Abtä namani ngite Ngöbö ngwärekri, akwa ye kwrere arato, ni itibe Jesukristo käkwe Ngöbö kukwei mikani täte jökrä, käkwe ja biani müre ketadre abko köböire ni kwati ngite ñakare mda Ngöbökwe niedi.

<sup>20</sup> Nita kukwe käme nuene bäri Ngöbö rüere rabadre gare bäri metre nie, abkokäre Ngöbökwe ja kukwei biani Moiséye. Akwa kukwe kämekäme nuen namani bäri, yebti ta Ngöbökwe ja moto mikani bäri kuin nikrä. <sup>21</sup> Ye aisetet ni jökrä nämane gata ngoto täni angwane, kukwe käme ye mdei nämane niaratre dänkiene, erere nämane ja mike ngite kärekäre, ye kwrere arato mtare Ngöböta ja moto mike bäri kuin nikrä amne ni ngite ñakare mda Ngöböta niere, käta kä bien nünankrä kärekäre nie ni Dänkien Jesukristo köböire.

## 6

### *Kukwe kämekäme ñan tä ni dänkiene mda*

<sup>1</sup> Ngöbökwe kukwe kuin nuenbare kore ni jökrä kräke Jesukristo köböire ni ngite diankakäre nibtä, ¿nebti Ngöbökwe ja moto mikadre bäri kuin ni kräke, abkokäre nikwe kukwe nuendre bäri kämekäme janknu ja mikakäre ngite ya? <sup>2</sup> ¡Ñakare jire! Nikwe ñan ja mikadre ngite jire chi mda, ñobtä ñan angwane nikwe tödekani Jesubti angwane, ni namani ni krütani kwrere Ngöbö ngwärekri amne, kukwe kämekäme ñan tä ni krütanikrütani dänkiene mda gare nie, ñobtä ñan angwane ni ngwákä ñan raba ja mike ngite mda Ngöbö rüere. Ye mden kisete, ¿kukwe kämekäme ñan tä ni tödekaka Jesubti dänkiene mda, se abko nikwe kukwe kämekäme nuendre janknu Ngöbö rüere ya? ¡Ñakare jire! <sup>3-4</sup> Ni jökrä tödekaka Kristo Jesubti namani ngökaní ñöte, ye abko tä ni krütani gware Jesube amne tä ni doboi mikani gware Jesube bá mike. Yebti nikwe ja töi kämekäme amne kukwe kämekäme mikaninte ja jiebtä abko nikwe bá mikani, ye garera munye. Erere arato, Kristo Rün käkwe niara mikaninta nire ja di kri bá nuärebiti, ye kwrere ni rabadre nüne btin Kristo ben gware, abkokäre ni krütani Kristo ben gware, bti ni doboi mikani ben gware arato. <sup>5</sup> Ni krütani ketetibe gware Kristobe, aisetet Ngöbö diebti Kristo nükaninta nire, ye kwrere Ngöbökwe ni mikadi nüne btin. Abti kä mrä angwane, Ngöbökwe ni mikadita nire nünakäre kärekäre jabe.

<sup>6</sup> Ne aisetet, ni ngämi tödeke Jesubti, känenkri ni nämane töi ngitiekä kukwe kämekäme aibebtä, ye abko Kristo metani krusobtä angwane, Ngöbökwe ni töi kämekäme ye metani gware krusobtä ben kwrere, ni töi kämekäme juankäre ngwarbe, kukwe käme ñan rabadre ni dänkiene mda ni ngrabare yebti, nikwe ñan ja töi kämekäme mikadre täte mda abkokäre. <sup>7</sup> Ye abko, ni krütani ñan raba kukwe käme nuene mda Ngöbö rüere amne kukwe käme ñan tä niara dänkiene mda. Ye kwrere, ni tödekaka Jesubti abko krütani gware Jesube, ne aisetet kukwe käme ni töibtä, btä ni nämane töi ngitiekä, ye ñan tä neme ni dänkiene mda amne Ngöbökwe ni tikaninte kukwe käme ye kisete.

<sup>8</sup> Nikwe tödekani Kristobti angwane, ni krütani gware ben amne, Ngöbökwe Kristo mikaninta nire, ye kwrere ni mikadita nüne gware ben arato abko gare kuin nie.

<sup>9-10</sup> Kukwe gare metre nie abko krörö: Kristo krütani ye abko krütani batibe ni ngite

diankakäre mento nibtä, bti Ngöböökwe mikaninta nire, aisetekukwe kämekäme ñan raba niara nuente mda. Yebti ñan krütadita jire mda, ñobtä ñan angwane gata ñan raba niara dänkiene mda, ñobtä ñan angwane Ngöböökwe mikaninta nire amne mtare tä nüne Ngöbö mikakäre ütiäte. <sup>11</sup> Kristo Jesu krütani batibe, yebti ñan krütadita jire mda, ye kwrere mun krütanina ben gware, aisetekunkwe töbikadi ñakare mda kukwe kämekämenbtä abko munkwe nütü jabtä, akwa mutta nünenta ketetibe Kristo Jesube Ngöbökrä abko munkwe nütü jabtä. <sup>12</sup> Ye mdentä, mun ngrabare mden krütai, ye ie munkwe ñan kä bian kukwe kämekäme nuenkäre mda Ngöbö rüere. <sup>13</sup> Munkwe ñan kä bian mda ja ngrabareye kukwe kämekäme nuenkäre, akwa ni krütani mikaninta nire Ngöbö diebti käta töi ngitiekä jäandrän kuin nuenbtä, ye kwrere munkwe ja mika Ngöbö kisete angwane, mun ngrabare ye munkwe mika jökrä Ngöbö kisete jäandrän kuin nuenkäre niarakrä, <sup>14</sup> ñobtä ñan angwane mtare abko kukwe käme mdei tä mun töibtä ñan tädi mun dänkiene mda, ñobtä ñan angwane mun ñan tä Kukwe Biani Ngöböökwe Moiséye ye ngoto täni mda, akwa Ngöböökwe ja moto mikani kuin mun kräke Jesukristo köböire, käta mun die mike kukwe kämekäme mikete ja jiebti.

#### *Nikwe nünandre ni klabore kwrere Ngöbökrä*

<sup>15</sup> Mtare ni ñan tä nüne Kukwe Biani Ngöböökwe Moiséye mikakäre täte mda, tikwe nini angwane, Ngöböökwe ja moto mikani kuin nikrä abko köböire nita nüne tikwe nini, ye aisetekukwe käme nuendre bäri ja mikakäre ngite ya? Ñakare jire! <sup>16</sup> Ne ñobtä ñan angwane nita ja mike klabore ni bkänkä kräke, ye ngwane ni tärä nebe biare ni ye kukwei mikakäre täte, aisetekita sribire ni bkänkä ye kräke angwane, nita niara kukwei mike täte. Ye kwrere arato kukwe kämekäme tä ni dänkiene ye abko käta ni mike mente kärekäre Ngöböye. Akwa nita ja mike klabore Ngöbö kukwei kuin mikakäre täte, ye ngwane nita ngite ñakare mda Ngöböta nire, ye abko gare munye ruen tie. <sup>17</sup> Akwa mtare titakuin niere Ngöböye munbtä, ñobtä ñan angwane käne mun ngämi tödeke Jesubti, känenkri mun nämane klabore kukwe kämekäme kräke, akwa mtare kukwe kuin diribare nunkwe, erere munkwe kani ngäbti amne mutta mike täte ja töi ngöi jökrä, yebtä titakuin niere Ngöböye. <sup>18</sup> Käne kukwe kämekäme nämane mun dänkiene, akwa Ngöböökwe mun tikaninte amne mun mikanina sribikäre jakrä kwe kukwe era metre nuenkäre.

<sup>19</sup> Mun abko töi braibe Ngöbö Kukweibtä, aisetekukwe rükadre gare metre munye, abkokäre ni klabore btä titakuwe bärä mike kore munye. Ni klaboreta ja ngrabare bien sribikäre ja töi ngöi jökrä bkänkä mikakäre täte, ye kwrere mun nämane ja ngrabare bien ja töi kämekämeye, mden nämane mun kite kukwe kämekäme nuene, erere mun nämane kukwe kämekäme nuene bäri diän diän mda ja täritäri. Akwa mtare abko, munkwe ja ngrabare mika sribi kuin nuenkäre Ngöbökrä angwane, mun rabadi nüne bäri deme Ngöbökrä. <sup>20</sup> Kukwe kämekäme nämane mun dänkiene, kräke mun nämane sribire ni klabore kwrere kukwe kämekäme nuenkäre, angwane mun nämane sribire ñakare kukwe kuinbtä Ngöbökrä. <sup>21</sup> Akwa kukwe kämekäme nuen nämane munkwe, ye ütiäre dre nükani munye amarebti kukwe nuenbare munkwe, abkobtä mutta nebe ja gaire ye? Kukwe kämekäme nuen nämane munkwe, ye ütiäre mun nämane krüte abti mrä angwane mun rabadre mento kärekäre Ngöböye. <sup>22</sup> Akwa mtare mun namanina tikaninte Ngöbö diebti, aisetekukwe kämekäme ñan tä mun dänkiene mda angwane, Ngöböökwe mun mikanina klabore jakrä sribi kuin nuenkäre jakrä, ye abko bäri ütiä rükadi kuin krörö munye: Munkwe nünandi kuin deme Ngöbökrä abti mrä angwane, munkwe nünandi kärekäre ben. <sup>23</sup> Akwa kukwe kämekäme nuenta nikwe abko ütiäre nita krüte amne nita mente kärekäre Ngöböye, akwa ja moto kuinbti Ngöböta ni mike nüne kärekäre jabe ni Dänkien Kristo Jesu köböire, ye abko tä nuene ngwarbe ni kräke amne ñan tä ütiä kärere nie.

<sup>1</sup> Ti mräkätre, Kukwe Biani Ngöböökwe Moiséye ye gare kuin munye ruen tie, aisetet nüne angwane, kukwe biani nuendre ye abko ütiäte nikrä, akwa ni krütadre angwane, rabadre ngwarbe nikrä abko garera munye. <sup>2</sup> Kukwe biani nuendre ye abko ti bike bā mike krörö munye: Meri tä ja mike gure angwane, brare kwe tädre nire angwane, kukwe biani nuendre nie, yebti tä ja mäkäninte kwäräkwäri, akwa kwäräi kwe krütadre kän, ye ngwane rabadre tikaninte amne ñan rabadre mäkäninte mda kwäräi kwebe, kukwe biani nuendre yebti. <sup>3</sup> Ne aisetet meri gure amne kwäräi kwe tädre nire, akwa niara rabadre ni brare mdabe, ye ngwane ja mikadre ngite kwe Ngöbö rüere. Akwa meri ye kwäräi kwe krütadre kän, ye ngwane rabadreta tikaninte kukwe biani nuendre yeye, aisetet ja mikadreta gure kwe angwane, ñan ja mikadre ngite kwe.

<sup>4</sup> Ti mräkätre, mun ngämi tödeke Jesubti, känenkri mun nämane mäkäninte Kukwe Biani Ngöböökwe Moiséye yebe amne mun nämane mike täte kärekäre, merita gure käta näin käre brarebe ye kwrere. Akwa Jesukristo krütani angwane, mun nämane ketetibe ben abko erere mun krütani kwrere arato, aisetet mutta tikaninte Kukwe Biani Ngöböökwe Moiséye yebtä. Mtare Kristo nükaninta nire abko tä mun bkäne, mun rabadre kukwe kuin nuene Ngöbö moto mikakäre nuäre. <sup>5</sup> Kukwe kämekäme mdei nämane ni dänkiene angwane, ni kukwe kämekäme nuenkä kwrere ni nämane nüne angwane, Kukwe Biani Ngöböökwe Moiséye ye käkwe ni töi tikani bäri mda kukwe käme nuene ni ngrabarebti. Akwa kukwe käme nuen nämane nikwe, ye ütiäre abko gata aibe nämane nüke nie amne nämane ni mike mente kärekäre Ngöböye. <sup>6</sup> Akwa mtare Ngöböökwe ni tikaninte Kukwe Biani Kwe Moiséye ye kisete amne ni ñan tä kukwe ye mike täte mda, aisetet Ngöböökwe kukwe ükaninte btin nünankrä nie ja Üai köböire, ye erere ni raba sribire Ngöbökrä. Ni nämane sribire Kukwe Biani Ngöböökwe Moiséye ye mikakäre täte, erere ni ñan tä mike täte mda mtare ja mikakäre metre au.

### Kukwe käme mdei nie abko rüere nita rüre

<sup>7</sup> ¿Kukwe Biani Ngöböökwe Moiséye ye abko käta ni töi tike bäri mda kukwe kämekämenbtä tikwe nini, yebtä Kukwe Biani Ngöböökwe Moiséye abko kukwe käme kwrere ya? ¡Ñakare jire! akwa Kukwe Biani Ngöböökwe Moiséye ye ñakare, akräke kukwe mden mden nuenta tikwe abko käme Ngöbö ngwärekri ñan rabadre gare jire chi tie abko krörö: Kukwe Biani Ngöböökwe Moiséye ye käkwe ñan niedre, "Jändräni mdakwe, ye ma ñan tö raba ie jakrä," ñan niedre kore, ye ngwane ti tö rabadre jändräni mdakwe ie jakrä abko käme Ngöbö ngwärekri ñan rabadre gare tie. Akwa Kukwe Biani Ngöböökwe Moiséye ye aibebti tä nüke gare tie. <sup>8</sup> Akwa Kukwe Biani Ngöböökwe Moiséye käta niere kore, ye käkwe kä biani ti töi kämeye, aisetet jändräni bätäkä ngwarbe ni mdakwe, ie ti tö rababa jakrä. Käne Kukwe Biani Ngöböökwe Moiséye ye arabe käkwe kä biani kukwe kämeye ti kite kukwe kämekäme bätäkä ngwarbe jiebti. Akwa Kukwe Biani Ngöböökwe Moiséye ye gare ñakare nie angwane, kukwe kämekäme abko käme Ngöbö ngwärekri gare ñakare metre tie. <sup>9</sup> Bati Kukwe Biani Ngöböökwe Moiséye ye gare ñakare tie angwane, ti nämane nüne kuin ti nämane nütüre. Ja nämane nebe ruen ngite ñakare tie Ngöbö ngwärekri, akwa Kukwe Biani Ngöböökwe Moiséye ye nükani gare tie, ye käkwe ti ngite Ngöbö ngwärekri kukwe kämekäme nuenbtä mikani gare batibe tie. Kukwe namani gare kore tie angwane, ti nämane nianinte, mente Ngöböye nükani gare tie. <sup>10</sup> Ne aisetet Kukwe Biani Ngöböökwe Moiséye ye käkwe ti mikadre nüne kärekäre Ngöböbe, ti nämane nütüre, akwa era metre ti nämane mente Ngöböye mikani gare kwe tie, <sup>11</sup> ñobtä ñan angwane Kukwe Biani Ngöböökwe Moiséye ye mikabtä täte ti rabadre ja mike metre au Ngöbö ngwärekri ti nämane nütüre. Yebtä abko kukwe kämekäme tibtä käkwe ti ngökani, abti ti ngite Ngöbö ngwärekri nükani gare tie, aisetet ti nämane mente Ngöböye abko kukwe ye arabe käkwe mikani gare metre tie. <sup>12</sup> Akwa Kukwe Biani Ngöböökwe Moiséye ye abra deme amne jändräni ni mdakwe ie ni ñan tö rabadre jakrä, tikwe nini, kukwe ye biani nuendre ye abko deme era metre amne kuin abko ti tö niei mrä kore.

<sup>13</sup> Kukwe Biani Ngöbökw Moiséye ye abko kuin deme, *¿*akwa ye köböite abko ti rabadre mente kärekäre Ngöböye tita niere ya? *¡*Nakare jire! Kukwe kämekäme ti töibtä abko mdeita nebe tie, ye käkwe ti mikani kukwe käme nuene bări mda abko köböite ti rabadre mente kärekäre Ngöböye. Akwa kukwe kämekäme nuenbare tikwe abko era metre käme krübäte Ngöbö ngwärerekri, ye abko nükani gare metre tie Kukwe Biani Ngöbökw Moiséye köböire. Ne aisetek, Kukwe Biani Ngöbökw Moiséye abko kuin deme, akwa kukwe ye köböire kukwe kämekäme abko bări käme krübäte era metre nükani gare tie. <sup>14</sup> Kukweta kore ñobtä ñan angwane Kukwe Biani Ngöbökw Moiséye ye abra jatani Ngöbökr garera nie, akwa ti abko moto käme abko ti tö bă mikai krörö: Ni klabore ñan raba jäandrän nuene jire chi keteti ja töi jenbti, akwa tä bkänkä aibe kukwei mike täte, ye kwrere ti abko ni klabore kwrere, aisetek kukwe kämekäme tä ti töibtä abko mdeita nebe tie aibe mikata täte tikwe. <sup>15</sup> Ñobtä tita kukwe kämekäme nuene ñan tä nebe nüke gare tie, ñobtä ñan angwane ti töta nebe jäandrän kuin nuein, erere tita nuene ñakare; akwa kukwe kämekäme btä ti mätä kri, ara jire tita nuene. <sup>16</sup> Akwa kukwe kämekäme nuenta tikwe, ye abko ti ñan tö nuein era metre angwane, Kukwe Biani Ngöbökw Moiséye ye abko kuin deme abko era tirkä abko tita bă mike jabtä. <sup>17</sup> Ne aisetek, tita kukwe nuene kämekäme, ye ñan tita nuene ja töi jenbti au, akwa kukwe kämekäme tä ti töibtä abko mdeita nebe tie, ye tä ti kite nuene abkokänti tä nebe bare tie. <sup>18</sup> Ti moto amne kukwe kämekäme mdeita ti töibtä, ne käme jökrä, aisetek jäandrän kuin ñakare tibtä, ye gare kuin tie. Mden kisete ti töta nebe jäandrän kuin nuein, akwa erere ñan tä nebe bare jire chi tie. <sup>19</sup> Ti töta nebe jäandrän kuin nuein abko erere ñan tä nebe bare tie, akwa kukwe kämekäme Ngöbö rüere ti ñan tö nuein, ara jire tä nebe bare tie. <sup>20</sup> Mtare ti töta nebe jäandrän kuin nuein abko erere ñan tä nebe bare tie, akwa ye ñan tita nuene ja töi jenbti au akwa, kukwe kämekäme tä ti töibtä abko mdeita nebe tie abko käta ti kite kukwe kämekäme nuene, erere tita nuene.

<sup>21</sup> Ye mdenbtä abko, kukweta nakenkä krörö tibtä: Ti töta nebe jäandrän kuin nuein akwa, kukwe kämekäme ara jire tä nebe käne ti jiete. <sup>22</sup> Akwa ti töite nete abko Kukwe Biani Ngöbökw Moiséye ye tä nebe tuen kuin nuäre nuendre tie, <sup>23</sup> akwa tibtä nete abko kukweta nakenkä mda mda käta ti töi miketa bă jene, ye abko kukwe käme tä ti töibtä, ye mdeita nebe tie abko käta rüre jäandrän kuin ti tö nuein yebe, aisetek ni ngite kä teri ñan raba kwärabere au, ye kwrere jire tita kukwe kämekäme kisete. <sup>24</sup> *¡*Aingwaree, ti bobre jakän! Käre tita ja mike ngite ti ngrabare nebti abtä tita mente Ngöböye. *¿*Ne kisete nirekwe ti tikadrete se? <sup>25</sup> *¡*Ngöbö aibe abko ie tita kuin niere ni Dänkien Jesukristo köböire, ñobtä ñan angwane niarakwe ti tikadite!

Nebti kukwe mrä abko nüke gare krörö tie: Ti tö Kukwe Biani Ngöbökw Moiséye aibe mikai täte, akwa kukwe kämekäme tä ti töibtä abko mdeita nebe tie abko käta ti mike kukwe kämekäme nuene.

## 8

### *Mtare nita nüne Ngöbö Üai diebti*

<sup>1</sup> Akwa mtare, ni jökrä tä tödeke Kristo Jesubti abko Ngöbökw ñan kitadre ngite jire chi mda amne ñan mikadre ja ngie nuen jire chi, <sup>2</sup> ñobtä ñan angwane kukwe kämekäme nämane mun töibtä kä nämane mun mike ja mike ngite Ngöbö rüere abtä Ngöbökw mun mikadre ja ngie nuen, ye ngäniene abko Ngöbö Üai käkwe mun tikaninte, käkwe mun mikani nüne btin, sribi nuenbare Kristo Jesukwe krusobtä ye köböire. <sup>3</sup> Kukwe kämekäme ni töibtä abko mdeita nebe nie, ye kisete Kukwe Biani Ngöbökw Moiséye ye ñan di namani täte ni tikatekäre, ñobtä ñan angwane ni di ñan namani kukwe ye mikakäre täte. Akwa Ngöbö aibe di namani tikatekäre, käkwe ja Odei Jesu juani kä nebtä. Ni jökrä abko kukwe käme nuenkä, akwa niara därebare ja kwrere nibe. Ye kwrere Ngöbökw juani nüke krütakäre nikrä amne ni ngite Ngöbö ngwärerekri ye ütiä biankäre krusobtä ni diäre amne ni täte. <sup>4</sup> Ngöbökw Jesu juani krüte kore ni kräke, ye köböire abko kukwe kuin era metre biani nuendre nie Ngöbökw abko tä nebe bare nikrä mtare,

abkokäre Ngöböökwe ja Odei juani. Ne aisetekukwe kämekäme tä ni töibta abko mdeita nebe nie, yebtä abko ni tödekaka Jesubti ñan tä ja kite mda, akwa Ngöbö Üai tö dreye, erere nita nuene.

<sup>5</sup> Mdakäre abko, nire nire tödekaka ñakare Jesubti käta töbike kukwe kämekäme aibebtä amne aibe mdeita nebe ie abko erere tä nuene. Akwa Ngöbö Üai tö dreye, yebtä nire nire tä ja töi mike kwaitibe, ni ye abko tä Ngöbö Üai kukwei mike täte. <sup>6</sup> Kukwe kämekäme tä ni töibta amne mdeita nebe nie, ye erere nita niken jiebti abko tä niken ni ngwena mente Ngöböye abta Ngöböta ni mike ja ngie nuen. Akwa nita töbike jändrän kuin Ngöbö Üaikwebtä abko käta niken ni jie ngwena, ye ngwane nita nüne kärekäre Ngöböbe amne nita nüne jáme Ngöböbe arato. <sup>7</sup> Akwa nire nire tödekaka ñakare Jesubti töi kämekäme abko mdeita nebe ie, aisetekukwe biani Ngöböökwe nuendre nie, ye niara ñan tö mikai täte amne, niara di ñakare kukwe ye mikakäre täte arato. <sup>8</sup> Ye mden kisete, kukwe kämekäme tä ni tödekaka ñakare Jesubti ye töibta amne kukwe kämekäme ye mdeita nebe ie, aisetekukwe biani Ngöböökwe nuendre nie, ye niara ñan raba jändrän kuin nuene jire chi abta Ngöbö raba käkitekä.

<sup>9</sup> Akwa mun abko, kukwe kämekäme nämane mun töibta, kä nämane mun mike kukwe kämekäme nuene, akwa ye kwrere muta nüne ñakare mda, ñobtä ñan angwane Ngöbö Üai tä nüne munbtä mtare ne ngwane, Ngöbö Üai tä mun kite nüne Ngöbökrä. Nire nire btä Kristo Üai tä nüne ñakare, ni ye abko ñakare ni jen Kristokwe. <sup>10</sup> Era metre mun ngrabare yebti munkwe kukwe nuenbare kämekäme Ngöbö rüere, ye dokwäre mun krütadi, akwa Kristo tä nüne munbtä mtare ne ngwane, mun üai käkwe nünandi kärekäre Ngöböbe, ñobtä ñan angwane munkwe tödekani Jesubti angwane, mun ngite ñakare mda niebare Ngöböökwe munbtä. <sup>11</sup> Angwane Ngöböökwe Jesu mikaninta nire abko Üai arabë tä nüne munbtä, ye ngwane Ngöbö Kristo mikakata nire arabë käkwe mun ngrabare ye mikadita nire arato niara Üai köböire kä mrä angwane. <sup>12</sup> Ne aisetekukwe biani Ngöböökwe nuendre jire chi mda, <sup>13</sup> ñobtä ñan angwane kukwe kämekäme tä mun töibta, ye munkwe nuendi janknu amne ñan kitadre temen munkwe, ye ngwane mun rabadi mente Ngöböye amne Ngöböökwe mun mikadi ja ngie nuen kä mrä angwane; akwa kukwe kämekäme nuenta munkwe ja ngrabarebti, ye munkwe kitadre temen Ngöbö Üai diebti, ye ngwane munkwe nünandi kärekäre Ngöböbe.

<sup>14</sup> Ye abko, nire nire jie ngwianta Ngöbö Üaikwe, ni ye abko Ngöbö ngäbriänkä kwe abko raba gare munye, <sup>15</sup> ñobtä ñan angwane Ngöbö Üai tä mun itire itire btä, ye abko käkwe ñan Ngöbö käi mikadita tare mun okwätä, ni klabore ütiäte ñakare käta bkänkä jürä ngwen jabtä ye kwrere; akwa Ngöbö Üai käta mun mike Ngöbö ngäbriänkäre amne Ngöbö Üai ye mden köböire Ngöbö abko ni Rün nikwe käita nebe nuäre nibtä, käta ¡Abba! ¡Tata tikwel! niere Ngöböye. <sup>16</sup> Ye abko, ni tödekaka Jesubti abko Ngöbö ngäbriänkä era metre abko Ngöbö Üai ye arabë tä mike gare nie amne, <sup>17</sup> ni Ngöbö ngäbriänkä bkänä ne ngwane, jändrän kuinkuin biandre Ngöböökwe Kristoye, ye ni rabadi bkäne siba Kristobe gware. Akwa Ngöböökwe jändrän kuinkuin nuendre ni kräke siba, abkokäre Kristokwe ja tare nikani, ye kwrere nikwe ja tare nikadi arato tödekabtä Kristobti.

### *Ngöböökwe jändrän kuinkuin nuendi ni kräke abko nita ngibiare ngäbti kisere*

<sup>18</sup> Tödekabtä Kristobti nita ja tare nike mtare ye abko tare krübäte bkänä, akwa jändrän kuinkuin nuendi Ngöböökwe ni kräke ye abko bäri ütiäte nikrä ruen tie. <sup>19</sup> Ni ne abko Ngöbö ngäbriänkäre. Amne ni rabadre bä mikani era metre kä mrä angwane, ye abko jändrän jökrä dätebare Ngöböökwe käta ngibiare kisere, <sup>20</sup> ñobtä ñan angwane Ngöböökwe jändrän jökrä dätebare, abti drekäre Ngöböökwe jändrän jökrä dätebare abko erere namani bare ñakare btä. Ye ñan jändrän ketareketare tö namani dreye ja töi jenbti, erere namani bare akwa, Adán amne Eva käkwe Ngöbö kukwei kitani temen krire kena, bti Ngöbö ara jire käkwe ükaninte kore, aisetekukwe namani bare kore jändrän jökräbtä.

<sup>21</sup> Jändrän jökrä dätebare Ngöböökwe tä ngadaen amne tä niken ngwarbe, abtä tätre ja tare nike, ye kwrere ñan rabadre nakenkä mda btä abko tä ngibiare kisere. Ye kwrere arato, ni Ngöbö ngäbriänkä abko kräke Ngöböökwe kukwe kuin nuäre nuendi, käkwe ni ngrabare kwitadi, ñan krütadre mda abkokäre, ye abko jändrän dätebare Ngöböökwe tä ngibiare kisere arato.

<sup>22</sup> Ngöböökwe jändrän jökrä kwitadi ye ngibiatä kisere abko jändrän dätebare Ngöböökwe abko tä ja tare nike, käta täkekä jabe bäsí merita niken ja ngibiare käta ja tare nike ngäbäkre ngibiatä, ye kwrere jire kira abti kä nüke mtare jändrän jökrä tä ja tare nike, ye gare kuin nie. <sup>23</sup> Ye abko ñan jändrän mda mda dätebare Ngöböökwe aibe käta täkekä jabe akwa, nitre tödekaka Jesubti käta ja tare nike kore, käta täkekä jabe arato, ñobtä ñan angwane ni ngrabare btin krüte ñakare mda biandi Ngöböökwe nie, ye nita ngibiare ngäbti kisere, abtä nita täkekä jabe mtare. Akwa Ngöböökwe ni kanina ngäbti ja ngäbriänkä kwrere, akwa ye rabadre bare täte angwane, Ngöböökwe ni ngrabare btin biandi nie, ye mikakäre era, abkokäre ja Üai biani kwe nie. <sup>24</sup> Ngöböökwe ni dianintari näire mentokwäre ni ngrabare btin biandre mda kwe nie abko nita ngibiare kisere. Ye abko, jändrän tärä nebe ni kisete, ye abko ngibiata ñakare mda, <sup>25</sup> akwa jändrän ngämi nebe ni kisete abko nita ngibiare kisere, ye abko rükadre nie, abkokäre nikwe ngibiadre jáme bätärekä abti rükadre ni kisete.

<sup>26</sup> Ngöböökwe kukwe nuendi kuin nikrä abko nita ngibiare kisere, ye abko käta ni die mike. Ye kwrere arato, jata nebe ruen bobre di ñakare nie blitakäre Ngöböbe amne nikwe dre niedre Ngöböye ñan tä nebe nüke gare nie, yebtä abko Ngöbö Üai käta ni die mike blite Ngöböbe, käta täkekä jabe blitare kwärä ja kukwei jenbti Ngöböbe amne, kukwe Ngöbö Üaikwe abko ni ñan raba nire jire ja kukwe jenbti. <sup>27</sup> Akwa Ngöbö abko ie ni töi ño ño gare kuin metre jökrä, amne Ngöbö Üai töta nebe dre dre kärere nikrä Ngöböye, ye garera jökrä Ngöböye, ñobtä ñan angwane Ngöbö tö dreye, ye kwrere Ngöbö Üai tä blite juta deme Ngöböökwe ye kräke.

### Jändrän jökrä ni rüere, ye nita ganaine kwäräbe

<sup>28</sup> Ni jökrä käräbare Ngöböökwe jakrä mikakäre ja odeire käta Ngöbö tarere, kräke Ngöböökwe kukwe ükaninte Kristo köböire abko erere ngwiandi bare kwe, abkokäre kukwe kuin rakadrekä btätre ya o kukwe tare rakadrekä btätre ya, akwa Ngöböta ükete kuin kräke abko krörö: <sup>29</sup> Kena dekä Ngöbö ngämi ni dätere, känenkri nire nire rabadre nüne kärekäre ben ye namanina gare ie, erere mikanintbe kwe kwitakäre bäsí ja Odei jen kwe Jesukristo kwrere. Ye abko Ngöbö Odei jen kwe rabadre bäri ütiäte etbakantre kwati ngätäite abkokäre. <sup>30</sup> Erere arato, nire nire kräke Ngöböökwe kukwe mikanintbe kore abko erere käräbare kwe diantarikäre jakrä, ye abko ngite ñakare mda niebare kwe amne kani ngäbti kwe amne, ni ye abko mikadi nüne jabe kwe kä nuärete arato.

<sup>31</sup> Ngöböökwe kukwe kuin nuenbare keta kabre kore ni kräke Jesukristo köböire, tikwe nini ¿yebtä nikwe dre niedre mda? Ngöböta ni tarere kore amne tä kukwe nuene kuin kore ni kräke, ye ngwane ni amne jändrän mda mda ñakare jire rabadre ni ganaine, <sup>32</sup> ñobtä ñan angwane Jesu abko Ngöbö Odei jen kwe, aisetetare kri Ngöböökwe, akwa namani ruentari tare ñakare ie, käkwe biani müre ketadre ni jökrä kräke, ¿ye abko jändrän mda mda kwe abko niarakwe ñan biandre ngwarbe nie ja moto kuinbti ja Odei ben gware ya? ¡Jänri, Ngöböökwe jändrän jökrä kwe biandi nie! <sup>33</sup> Ngöbö ara jire käkwe ni dianinkä jakrä amne ni ngite ñakare mda niebare kwe, aisetetare kri ñakare jire iti raba ni kite ngise Ngöböye abko Ngöböökwe kukwei mikadre era. <sup>34</sup> Mdakäre abko, Kristo Jesu krütani ni kräke, bti nükaninta nire amne tä kä bäri ütiäte te Ngöbö kise ruenkri, käta blite käre Ngöböbe ni kräke, ¿ye abko ni mda tädrera käkwe ni kitadi ngise Ngöbö ngwärekri ya? ¡Ñakare jire! <sup>35</sup> ¿Kristo käta ni tarere kri, ye abko nirekwe töi kwitadre amne niara ñan rabadre ni tarere mda? Ni ñakare jire iti amne jändrän ñakare jire kä raba Kristo töi kwite ni rüere. Ye aisetetare, nikwe ja tare nikadre tödekabta Jesubti ya o ni mda käkwe rüdre krübäte ni rüere ya amne kukwe jatadre krübäte ni rüere ya o ni rabadre mrö nike ya o

dän ñan rabadre nie ya amne ni rüe jatadre krübäte ya o ni kämika tö rabadre tödekaftä Jesubti ya, akwa ḡyebtä Kristokwe ñan ni taredre mda ya? ¡Ñakare jire! Niarakwe ni taredi janknu. <sup>36</sup> Ye abko nikwe ja tare nikadre tödekaftä Jesubti rabadre gare metre nie, ñobtä ñan angwane Ngöbö Kukwei käta ni bä mike obeja kwrere, käta niere krörö nibtä: Obeja jäta niken biare kämikadre,

ye kwrere jire nunta mikani biare kämikadre käre.

Ne aisetet, tödekaftä mabti,

käre nun rätäkäta gatabti köbö kwatirekwatire,

abko nieta Ngöbö Kukweibtä.

*Salmos 44.22*

<sup>37</sup> Akwa Ngöbö ni tarekä kri, ye köböire nita kukwe bätäkä ngwarbe ye ganaine kwäräbe jökrä. <sup>38-39</sup> Tita nütüre kore, ñobtä ñan angwane jändrän ñakare jire kä raba Ngöbö töi kwite abtä niara ñan raba ni tarere mda, ye abko gare kuin tie, ñobtä ñan angwane ni krütadre ya o ni tädre nüne ya, akwa Ngöböökwe ni taredre janknu. Erere arato, angele köböire amne üai kämekäme köböire Ngöböökwe ñan ni kitadrekä ja okwä bäre mento, akwa ni taredre janknu kwe. Mdakäre abko, kukwe mtare amne kukwe jatadi ni rüere, ye abko ñan raba Ngöbö töi kwite abtä niara ñan raba ni tarere mda, akwa Ngöböökwe ni taredre janknu arato. Erere arato, jändrän kä käinbtí ya o jändrän bäri mente nguse sete kä raba Ngöbö töi kwite abtä niara ñan raba ni tarere mda. Ne aisetet Kristo Jesu köböire Ngöböökwe ni taredi kärekäre amne jändrän ñan raba Ngöbö töi kwite jire chi abtä ñan rabadre ni tarere mda.

## 9

### *Ja töi jenbtí Ngöböta ni denkä jakrä*

<sup>1-3</sup> Mdakäre abko ti mräkätre, ti moto ulire krübäte amne ti motota nötöte käre, ñobtä ñan angwane ti mräkätre israelita tikwe ye abko käkwe tödekadre Kristobti abko köböire rabadre dianintari, ie ti tö béri. Ngöböökwe ngürün mikadre tibta, abtä ti ne ara jire rabadre mikaninkä Ngöbö okwä bäre mento ja ngie nuakäre kärekäre amne ti mräkätre tikwe rabadre dianintari, ie ti töta nebe, ne abko Kristo Jesu ngwärekri tita kukwe era erere niere. Ñan tita ni ngökö gare tie, ñobtä ñan angwane tita mun ngökö ñakare abko Ngöbö Üai Deme käta mike gare tie, aisetet tita kukwe era erere niere kore. <sup>4</sup> Tita niere kore, ñobtä ñan angwane nitre israelita jatani jökrä Israelikri amne Ngöböökwe kani ngäbti ja ngäbriänkä kwrere. Erere arato, Ngöbö nämane ja di kri bá nuäre ye mike tuare ietre amne kukwe ükaninte bätäkä ngwarbe kwe bentre. Erere arato, ja kukwei biani kwe Moiséye kräke. Mdakäre abko, nitre israelita käkwe jändrän kukwadre Ngöbö käikitakäre ju blitakrä Ngöböökwe känti abko Ngöböökwe ükaninte bentre. Ngöböökwe kukwe mda mda nuendre nitre israelitakrä abko niebare metre kwe ietre arato. <sup>5</sup> Erere arato, ni mräkä kirakira ütiäte krikri, yekri niaratre jatani arato amne niaratrekri Ni Dianinkä Ngöböökwe abko Jesukristo ara därebare arato. Jesukristo abko Ngöbö ara jire amne tä jändrän jökrä gobraine. Niara abko raba käkitaninkä kärekäre. Abko kore se. Amen.

<sup>6</sup> Ngöböökwe jändrän kuin nuenbare kore nitre israelitakrä, akwa niaratre kwati käkwe trö kwitani Kristoye, käkwe ñan mikani ütiäte jae, ḡyebtä abko Ngöböökwe ñan ja kukwei mikani täte ya? Ñakare jire, ñobtä ñan angwane ñan nitre israelita jökrä därebare ni israelitakri abko Ngöböta tuen israelitare era metre ja ngwärekri. <sup>7</sup> Erere arato, ñan ni jökrä därebare Abrahamkri abkobtä Abraham ngäbriänkä era metre Ngöbö ngwärekri abko gare nie, ñobtä ñan angwane Abraham ngäbriänkä nämane kwati, akwa Ngöböökwe niebare krörö Abrahamye:

Ma ngäbriänkä era metre abko jatadi ma ngobo Isaac aibekri,  
niebare Ngöböökwe ie.

*Génesis 21.12*

<sup>8</sup> Ye mdenbtä abko, ñan nita därrere ni mräkä mdenkri abko käta ni mike Ngöbö ngäbriänkäre abko niebare Ngöböökwe Abrahamye Isaabtä käta mike gare nie, akwa Ngöböökwe ngäbäkre köböi mikani Abrahamye abkokri ni därebare ja täritäri, ni ye abko

Abraham bkün era metre. <sup>9</sup> Ye erere, bati Ngöbökwe ngäbäkre biandre Abrahamye abko niebare krörö kwe ie:

Kä krörö kä mdate ti rükadita angwane, ngäbäkre rabadira Sarakwe, <sup>Génesis 18.10,14</sup> abko Ngöbökwe nuendre Abrahamkrä, niebare kwe ie Isaabtä. Ye aisetet Ngöbökwe Isaac dianinkä jakrä amne ñan Ismael dianinkä jakrä nämane gare Abrahamye.

<sup>10</sup> Akwa kukwe ye abko ñan aibe nakaninkä kore akwa, kukwe mdara jire nakaninkä abko köböire nita därrere ni mräkä mdenkri abko ñan tä ni mike Ngöbö ngäbriänkäre abko tä näke gare nie abko krörö: Rebeca ngobo munkine kädian nämane Esaú amne Jacob, ye abko därebare rün itibe Isaakri. <sup>11-13</sup> Akwa niaratre nibu ngämi därrere amne ngämi kukwe kuin nuene amne ngämi jäandrän käme nuene Ngöbö rüere, ye känenkri Ngöbökwe niebare Rebecaye:

Ngäbäkre mubai abko rabadi sribikä etba mrä kräke, <sup>Génesis 25.23</sup> niebare Ngöbökwe Rebecaye.

Ye mden erere Ngöbökwe niebare abko tä tikani krörö Ngöbö Kukweibtä:  
Tikwe Jacob tarebare,

akwa Esaú abko tikwe tarebare ñakare, <sup>Malaquías 1.2-3</sup> abko niebare Ngöbökwe. Ye mden abko namanina kwatibe kore, ñobtä ñan angwane Ngöböta kukwe miketbe ño ño, töta nebe nire nire diainkä jakrä ja töi jenbti ye erere tä denkä, ye abko ñan nita jäandrän kuin nuene ya o nita jäandrän käme nuene Ngöbö rüere abko Ngöböta mike ñäräre, käta ni denkä jakrä, akwa Ngöbö töta nebe nire diainkä jakrä, erere tä denkä.

<sup>14</sup> ¿Ne aisetet, Ngöbö abko kukwe ükatekä blo nikwe niedre ya? ¡Ñakare jire! <sup>15</sup> ñobtä ñan angwane bati kira Ngöbökwe niebare krörö Moiséye:

Ti tö rabadi nire nire ngwiain ruentari tare jae, ye erere rabadi ruentari tare tie amne, ti tö rabadi ja moto mikai kuin nire nire kräke, ye erere kräke tikwe ja moto mikadi kuin, <sup>Exodo 33.19</sup>

niebare Ngöbökwe Moiséye. <sup>16</sup> Kukwe ye abko käta kukwe krörö mike gare nie: Ye abko ñan ni töta nebe dreye amne ñan nita jäandrän nuene ja di ngöibti abko köböire nita nebe ruentari tare Ngöböye, akwa ja töi jenbti nita nebe ruentari tare Ngöböye.

<sup>17</sup> Erere arato, Ngöbökwe ñäkäbare Faraónye abko tä tikani Ngöbö Kukweibtä, käta niere krörö:

Ma köböire ti di kri rabadre gare kä jökräbti temen, abkokäre tikwe ma mikani jreire Egipto nete, <sup>Exodo 9.16</sup>

niebare Ngöbökwe Faraónye. <sup>18</sup> Kukwe ye abko käta kukwe krörö mike gare nie: Ngöbö töta nebe nire nire ngwiain ruentari tare jae, erere tä nebe ruentari tare ie amne, Ngöbö töta nebe nire nire dokwä mikai ribi ja kukweikrä, erere tä dokwä mike ribi. Ye mden abko bää mikani kwe.

<sup>19</sup> Akwa kukwe nebtä ni ruäre kákwe niedre tie: ¡Ngöbö töta nebe dre dre nuein nibtä, erere tä neme bare nibtä, se ñobtä abko nita nebe ngite Ngöböye se! ni ruäre kákwe niedre kore. <sup>20</sup> Akwa tita niere kore ni yeye: ¿Mun abko dätebare Ngöbökwe, ye ñobtä abko mun tö ñäkäi kore Ngöbö rüere ye? Ni kantra dätekä abko, ie kantra raba niere: ¿Drekäre makwe ti dätebare kore se? ¡niedre kantrakwe ie ya? ¡Ñakare jire! <sup>21</sup> ñobtä ñan angwane ni kantra dätekä ye tö rabadre dobro ye dätei ño ño ja töi jenbti, erere raba nuene. Ye mden kisete, dobrobti ni kantra dätekä ye raba kantra dätere jäandrän ütiäte kräke, akwa dobro ye arabebti raba kantra dätere arato jäandrän ütiäte ñakare kräke. Ye kwrere arato, Ngöbökwe ni dätebare, aisetet tö rabadre dre dre nuein nibtä erere raba nuene.

<sup>22</sup> Ne aisetet, nitre kukwe kämekäme nuenkä Ngöbö rüere, kräke Ngöbökwe kukwe ükaninte mikakäre ja ngie nuen, aisetet ñan tö namani mikai ja ngie nuen jötrö, akwa ngibiabare raire kwe, ye abko Ngöbö raba nuene ja töi jenbti. <sup>23</sup> Erere arato, Ngöbökwe ni ngibiabare raire kore, kákwe ñan ni ye mikani ja ngie nuen jötrö, ñobtä ñan angwane niara töta nebe ja di kri bää nuäre mikai tuadre nitre tödekaka Jesubti yeye. Ngöbökwe nitre tödekaka Jesubti dianinkä kira jakrä, kákwe ngwiani ruen bobre jae, mikakäre nüne

kärekäre jabe kä bări nuäre te. <sup>24</sup> Ngöböökwe ni käräbare jakrä abko ruäre nitre israelita ngätäite, ruäre abko nitre ñakare israelitare ngätäite. <sup>25</sup> Ngöböökwe ni kärädre kore abko tä tikani krörö Ngöbö Kukweibtä tärä Oseabtä:

Nitre ñakare juta jen tikwe abko batira jire rabadi juta jen tikwe abko tikwe niedi nitre yebtä.

Erere arato, nitre tita tarere ñakare metre mtare abko batire jire tita tarere arato abko tikwe niedi btä, <sup>Oseas 2.23</sup>  
niebare Ngöböökwe.

<sup>26</sup> Erere arato, Ngöböökwe niebare mda tärä Oseabtä:

Mun ñakare juta jen tikwe, tikwe niebare munye.

Kä ye känti tikwe nieba kore munye, akwa kä ye arabe känti tikwe niedi krörö:

Mun abko Ngöbö nire ngäbriänkätre, tikwe niedi munbtä, <sup>Oseas 1.10</sup>  
abko tä tikani tärä Oseabtä.

<sup>27</sup> Akwa nitre israelita ngätäite abko ni ruäre aibe rabadre dianintari abko Ngöböökwe niebare ietre kira abko tä tikani krörö tärä Isaíabtä:

Nitre israelita rabadre bări kwati abtä ñan rabadre tanre üman mren köräbare kwrere,  
akwa niaratre braibe rabadi dianintari,

<sup>28</sup> ñobtä ñan angwane ni Dänkien Ngöbö kákwe kukwe ükaninte ño nibtä, erere kebera  
mike täte metre, bti ja töi kwitadi ñakare jire chi kwe, <sup>Isaías 10.22-23</sup>  
abko nieta tärä Isaíabtä.

<sup>29</sup> Ye mdən abko Ngöböökwe niebare käne Isaías ara köböire arato abko krörö:

Ni Dänkien Di Kri Jändrän Jökrä Nuenkä kákwe ñan ni mräkä israelita mikadrete nüne  
ruäre, akrake Ngöböökwe nitre Sodomabo amne Gomorrabo ganinkä jökrä, ye  
kwrere ni israelita rabadre arato, <sup>Isaías 1.9</sup>  
niebare Ngöböökwe Isaías köböire.

#### *Nitre israelita kákwe tödekaní ñakare Jesubti*

<sup>30</sup> Ye kwrere Ngöböökwe nitre ñakare israelita diandretari kwati abko niebare kwe  
akwa, nitre israelita braibe rabadre dianintari abko Ngöböökwe niebare kira, ¿sebtä abko  
nikwe dre niedre? Niaratre abko ngite ñakare mda niebare kwe, ye abko nitre ñakare  
israelitare nämane känentari ñakare jakrä, akwa tödekaabtä Jesubti niaratre ngite ñakare  
mda niebare kwe btätre amne kadre ngäbti kwe abko Ngöböökwe mikani gare ietre.

<sup>31</sup> Akwa nitre israelita abko rabadre ja mike metre au ja di jenbti Ngöbö ngwäreökri Kukwe  
Biani Ngöböökwe Moiséye ye mikabtä täte, ye abko nitre israelita nämane känentari  
kisere, akwa yebtä niaratre abko metre ja ngwäreökri abko Ngöböökwe niebare ñakare  
amne ñan kani ngäbti kwe. <sup>32</sup> ¿Se ñobtä Ngöböökwe nuenbare kore? Ye ñobtä ñan  
angwane Kukwe Biani Ngöböökwe Moiséye ye mikabtä täte ja di jenbti au abko köböire  
niaratre ñakare ngite mda abko Ngöböökwe niedre abko aibe nitre israelita nämane mike  
era jae, akwa tödekaní ñakare kwetre Ngöböbti. Ye mdən kisete, ngite ñakare mda  
abko Ngöböökwe niebare ñakare ietre. Nitre israelita kákwe tödekaní bări ja di jenbti ja  
mikakäre metre au Ngöbö ngwäreökri amne ñan tö namani tödekaabtä Jesubti. Jesu ye abko  
jä kwrere btä ni kwati tä ngoto ritete. <sup>33</sup> Ye rakadrekä abko nämane tikani kira Ngöbö  
Kukweibtä, känti Ngöböökwe Jesukristo bă mikani jä kwrere abko krörö:  
¡Munkwe mika ñäräre!

Tita jä mike jite mun Siónbo ngätäite.

Jä ye abko rabadi ñakare ütiäte mun kräke, aisetetä jä yebtä ni kwati ngoto ritadite amne  
ñan tödekaabtä kwetre bti.

Akwa nire nire kákwe tödekaabtä ni yebtä abko Ngöböökwe ñan mikadi ja ngie nuen, aisetetä  
ñan rabadre ja gaire, <sup>Isaías 8.14; 28.16</sup>  
abko tä tikani Ngöbö Kukweibtä ni Dänkien Jesukristobtä.

<sup>5</sup> Kukwe Biani Ngöbökwé Moiséye ye mikabtä täte nire nire tö rabai metre Ngöböngwärekri abko kräke Moisékwé kukwe tikani krörö:

Kukwe Biani Ngöböökwe Moiséye, ye nirekwe mikadre täte jire jökrä abko köböire nünandi kwe, Levítico 18,5  
abko tä tikani Moisékwe Ngöbö Kukweibta. Akwa ni ñan raba kukwe ye mike täte kore,  
<sup>6</sup> aiseite nita tödeke Jesubti, köböire ni ngite ñakare mda abko Ngöböta niere nibtä, ni ye kräke Ngöbö Kukwei käta niere krörö: Makwe ñan töbika krörö: “*¿Nire näin kä käinbti*” Kristo känti, niara kärereta kä nebtä ni die mikakäre? Ye kwrere makwe ñan töbika, ñobtä ñan angwane Kristo nükanina kä nebtä aiseite. <sup>7</sup> Erere arato, makwe ñan töbika krörö: “*¿Nire näin nguse kä nakebtä ni krütanikrütani ngätäite,*” Kristo rükadreta nire ni die mikakäre? Ye kwrere munkwe ñan töbika, ñobtä ñan angwane Kristo krütanina bti Ngöböökwe mikamina nire ni kräke. <sup>8</sup> Akwa kukwe bti ni rabadre dianintari abko tä käname mun ken. Kukwe ye abko krörö: Tödekadre Kristobti aibe köböire ni ngite ñakare mda Ngöböta niere abko dirita nunkwe. Yebtä Ngöbö Kukwei tä niere krörö:

Kukwe ye abko tä känlime mun ken abko mun raba niere ja kada jenbt amne, mun töibti  
mun raba mike era jae, Deuteronomio 30.14

abko Ngöbö Kukwei tä niere. <sup>9</sup> Kukwe mun diantarikrä abko tä ja ken munbe, ñobtä ñan angwane Jesu abko ma Dänkien makwe niedre ja kada jenbti amne Ngöökwe Jesu mikaninta nire, yebti makwe tödekadre amne makwe mikadre era ja töibti angwane, ma rabadi dianintari. <sup>10</sup> Ye abko, Jesu mikata era ja töibti amne tödekata bti, yebtä ni ngite ñakare mda abko Ngööta niere nibtä amne, Jesukristo abko ni Dänkien nita nire ja kada jenbti, ye ngwane nita nebe dianintari. <sup>11</sup> Yebtä abko Ngöbö Kukwei tä niere krörö arato: Nire nire kákwe tödekadre niarabti abko ñan rabadre mikani ja ngie nuen, aisetet ñan rabadre ja gaire.

abko nieta Ngöbö Kukweibtä. <sup>12</sup> Nieta kore, ñobtä ñan angwane ni israelita ya o ni ñakare israelitare akwa ni ja kwrere jökrä Ngöbö ngwärekri. Ye aisetè ni ñakare bë jene jene amne ni Dänkien Kristo abko ni jökrä Dänkien amne, nire nire käta ja di kärere ie rabakäre dianintari ye erere die mikata kri kwe <sup>13</sup> abko gare metre nie, ñobtä ñan angwane nieta krörö Ngöbö Kukweibtä:

Nire nire käkwe ja di kärädre ni Dänkienye rabakäre dianintari, ni ye abko Ngöböökwe  
dianditari,  
abko nieta Ngöbö Kukweibta. Joel 2.32

<sup>14</sup> ¿Akwa ni tödekaka ñakare Kristobti kákwe ja di kärädre ño Ngöböye jakrä? Erere arato, ¿ni ni kukwei nuen ñakare blite Kristobtä abko tödekadre ño kwe bti? ¿Amne ni ñakare kukwe kuin Kristobtä niere, ye abko nikwe kukwe Kristobtä kukwei nuadre ño?  
<sup>15</sup> Mdakäre abko, ¿ni juanta ñakare kukwe kuin Jesubtä niere ni mdaye, ye abko rikadre blite ño kukwe kuin vehtä? Ye mdenbtä abko Ngöbö Kukweita niere krörö:

Ni kukwue kuij pwgianka tä kito nüke, va abko kääti neba nuäre kriibäte riibtä njara tuaro.

## Ni kükwe kuiñ ng *Isaías 52:7*

*Isadas 52.7*  
abko nieta Ngöhö Kukweijtä.

<sup>16</sup> Kukwe kuin Kristobtä ye niebare nitre israelitaye, akwa ni kwati kákwe ñan mikani era, kákwe tödekani ñakare Jesubti. Kukwe rakadrekä kore abko Ngöbökwe niebare kira krörö Isaías köbhöire:

Ni Däńkien, nunkwe kukwe kuin niebare, ye bási ni ñakare jire kákwe mikani era, *Isaías 53:1*

abko nieta Ngöbö Kukweibtä sribi nunkwebtä. <sup>17</sup> Ye abko, kukwe kuin Kristobtä, ye nita kukwe nuen angwane, nita kite tödeke Kristobti. Kukwe kuin ye abko Kristobtä.

<sup>18</sup> Akwa ti raba ngwentari munye: ¿Nitre israelita ye kákwe kukwe kuin Kristobtä kukwei nuani metre ya, ñakare ya? Jänri, niaratrekwe kukwe kuin ye kukwei nuani. Ye mdenbtä abko, Ngöbö Kukwei käta niere krörö:

Nitre kukwe kuin ngwianka, ye nikani kukwe kuin ye ngwena kä jökräbti temen amne, kukwe kuin ye abko niaratre nikani ngwena kä ketareketare te jökrä kwäräkwärä,  
*Salmos 19.4*

abko nieta Ngöbö Kukweibtä. <sup>19</sup> Akwa ti tö kukwe ngwaintarita mda munye abko krörö: ¿Kukwe kuin niebare nitre israelitaye, ye abko ñan nükani gare metre ietre ya? Käne Moisékwe niebare krörö nitre israelitabtä:

Juta ñakare jen tikwe, ye ben tikwe mun israelita mikadi mokrere.

Erere arato, juta ie ti nüke gare ñakare mtare, juta ye kräke tikwe mun israelita mikadi romon,

*Deuteronomio 32.21*

<sup>20</sup> ñobtä ñan angwane kukwe niebare Ngöbö Kukweibtä Isaíakwe abko tä nakenkä mtare abko krörö:

Juta mda mda ñakare israelitare nämane ti känentari ñakare abko ie ti kwani.

Amne juta nämane ti kärere ñakare abko ie tikwe ja mikani gare,

*Isaías 65.1*

abko nieta Ngöbö Kukweibtä nitre ñakare israelitarebtä, ñobtä ñan angwane niaratre kwati tä tödeke Jesubti aisetet.

<sup>21</sup> Akwa nitre israelitabtä abko Isaíakwe niebare krörö:  
Juta ne ñan tä ti kukwei mike täte amne, dokwä ribi ti kukwei ngäbti,  
akwa ti nämane biare kise ngianinte köbö kwatirekwatire niaratre ngäbti,

*Isaías 65.2*

niebare Ngöbökwe Isaías köböire.

## 11

### *Ngöbökwe nitre israelita dianinkä braibe jakrä*

<sup>1</sup> Kukwe yebtä, ti rabadre kukwe ngwentari krörö: ¿Nitre ñakare israelitare, kräke Ngöbökwe ja moto mikani kuin, yebtä abko juta israelita abko ie Ngöbökwe trö kwitani ya? Ñakare jire, ñobtä ñan angwane ti abko israelita. Ti därebare Abrahamkri amne ti därebare juta Benjamín mräkäkri arato. <sup>2</sup> Käne abko, Ngöbö ngämi kä ne dättere, ye känenkri Ngöbökwe juta israelita diandikä juta jen jakwe kwrere abko mikanintbe kwe, aisetet mtare Ngöbökwe ñan trö kwitani juta jen kweye. ¿Ye abko era metre abko kukwe nakaninkä ni Ngöbö kukwei niekä kädian nämane Elíabtä abko käta bä mike abko gare ñakare munye ya? Bati Elías nämane blite Ngöböbe angwane, niebare krörö kwe nitre israelita kitakäre ngite Ngöböye:

<sup>3</sup> Ti Dänkien, nitre ma kukwei niekä abko kämikanina jökrä jreikwe.

Erere arato, ñukwä grä jäandrän kukwakrä mae ye dikaninte jökrä kwetre.

Mtare ti aibe tä nire kaibe, akwa niaratre tö ti kämikai arato,

*1 Reyes 19.10,14*

niebare Elíakwe Ngöböye. <sup>4</sup> Abtä Ngöbökwe niebare mda ie:

Nitre israelita kwati ngämi nebe ngukudokwäbti temen ngöbö ngwarbe Baal ngwärekri, akwa tä ti mike era janknu abko tikwe dianinkä mili krä kükü jenena jakrä, aisetet

ma ñakare tä kaibe,

*1 Reyes 19.18*

niebare Ngöbökwe Elíaye. <sup>5</sup> Ye kwrere arato mtare, Ngöbökwe nitre israelita dianinkä ruäre jen jakrä ja moto kuinbti, käta tödeke Jesubti. <sup>6</sup> Ja moto kuinbti Ngöbökwe nitre israelita dianinkä ruäre jen jakrä, ye abko ñan jäandrän kuin nuenbare kwetre abko ütiäre Ngöbökwe dianinkä jakrä, akwa Ngöbö ara jire kákwe ja moto mikani kuin, köböire ni dianinkä kwe jakrä. Akwa nikwe jäandrän kuin nuendre abko ütiäre Ngöbökwe ni diandrekä jakrä, ye ngwane ñakare Ngöböta ni denkä jakrä ja moto kuinbti.

<sup>7</sup> ¿Yebtä abko, nikwe dre niedre mda? Nitre israelita rabadre metre Ngöbö ngwärekri ja di jenbti abko niaratre namani känene kisere, akwa erere ñan namani bare. Akwa nitre israelita dianinkä jakrä Ngöbökwe abko käta tödeke Jesubti angwane, niaratre abko ngite ñakare mda Ngöböta niere, akwa nitre israelita mda abko Ngöbö ara jire kákwe

dokwä mikani ribi. <sup>8</sup> Ye kwrere kukwe rakadrekä abko Ngöböökwe niebare kira abko tä tikani krörö Ngöbö Kukweibtä:

Ni kwata ruen ñakare, kwrere jire Ngöböökwe mun töi mikani abko erere mun tä abti kä nüke mtare.

Ngöböökwe mun okwä mikani, akwa kukwe era metre Kristobtä tuen ñakare munye. Erere arato, mun olo mikani Ngöböökwe, akwa ni kukwei kuin Kristobtä ruen ñakare mtare munye,

*Deuteronomio 29.4; Isaías 29.10*

abko nieta Ngöbö Kukweibtä nitre israelita kwati btä.

<sup>9</sup> Erere arato, Davikwe niebare krörö niara rüebtä Ngöböye, erere tä nakenkä mtare nitre israelita kwati btä:

Jändrän jökrä kuin mrö kwrere, ye abko rikwitadreta niaratré rüere näre.

Yebtä abko rabadre ritete abtä mikadre ja ngie nuen näre.

<sup>10</sup> Erere arato, kä ñan rabadre tuen ietre, abkokäre okwä raba kä ikote näre amne, ñan rabadre jändrän nuen kä, abkokäre trö raba tänene kärekäre näre,

*Salmos 69.22-23*

abko niebare Davikwe. Ye kwrere tä nakenkä mtare nitre israelita kwati btä.

### *Ngöböökwe nitre ñakare israelitare dianintari arato*

<sup>11</sup> Mtare ti bike kukwe mda ngwentari krörö: ¿Nitre israelita nikani janknu temen rabakäre kärekäre Ngöbö okwä bäre mento ya? Ñakare jire, ñobtä ñan angwane nitre israelita käkwe ñan Ngöbö kukwei mikani täte, käkwe trö kwitani ie, ye köböire abko ni mda mda ñakare israelitare abko namani dianintari Ngöböökwe arato, nitre israelita rabadre mokrere Ngöböbti abkokäre. <sup>12</sup> Akwa nitre israelita tä kukwe kuin Jesubtä kite temen, köböire tä ja mike ngite au Ngöbö rüere mtare, ye köböire abko ni mda mda ñakare israelitare tä jändrän kuinkuin Ngöböökwe bkäne kabre Jesukristo köböire. Akwa mrä nitre israelita käkwe tödekadre täte jökrä Jesubti angwane, jera metre Ngöböökwe ni jökrä die mikadre bari kri mda ñan ñan!

<sup>13</sup> Akwa mun ñakare israelitare abko ie ti bike niere krörö: Mun ye ie Ngöbö ara jire käkwe ti juani ja kukwei ngwena, aisetetita sribi ne mike bari ütiäte jae, <sup>14</sup> ñobtä ñan angwane titatibire munbe angwane, ti mräkätre israelita tikwe jatadre mokrere munbe, ye köböire abko ti rükadre ngwenante Ngöböye amne rabadre dianintari arato abkokäre. <sup>15</sup> Ye abko, Ngöböökwe nitre israelita tuanimetre angwane, Ngöböökwe jändrän kuin krübäte nuenbare ni mda mda ñakare israelitare kä jökräbti kräke, käkwe kä biani ietre ja mäkäkäreta jabe Jesu köböire. ¿Ye abko nitre israelita jen Ngöböökwe käkwe tödekadre Jesubti angwane, Ngöböökwe kadreta ngäbti abko Ngöböökwe ñan jändrän bari kuin krübäte nuendre kräke ya? ¡Jänri! Ngöböökwe mikadre nüne kärekäre jabe,

<sup>16</sup> ñobtä ñan angwane arina mritata, bti diankata chi jenena Ngöbökrä, ye abko tuen deme amne ütiäte Ngöböye, ye ngwane arina mda tä nebe deme amne ütiäte jökrä arato. Ye kwrere abko nitre israelita mräkä känekäne abko arina chi dianinkä jenena kwrere amne nitre israelita jökrä abko arina mda kwrere abko krörö: Ngöböökwe nitre israelita mräkä känekäne Abraham, Isaac amne Jacob mikani jenena deme jakrä, ye köböire nitre israelita jökrä tä mikani jenena, Ngöböökwe kukwe kuin nuendre kräke abkokäre. Ye kwrere arato, kri ngätri tä mikani kuin deme jenena, ye ngwane kri küde tä neme kuin deme jökrä arato. Ye abko Ngöböökwe nitre israelita känekäne mikani deme jenena jakrä kri ngätri kwrere, ye köböire nitre israelita mda mda ja täritäri tä mikani jenena Ngöböökwe, kukwe kuin nuenkäre kräke arato.

<sup>17</sup> Yebtä abko, ti bike kukwe mda bär mike krörö: Nitre israelita abko olibo krie kwrere, akwa olibo krie ye abko küde tikaninkä ruäre. Olibo krie küde tikaninkä ye täte abko olibo krie ngwarbe känsenta küde mikani. Olibo krie ngwarbe känsenta ye abko ma ñakare israelitare ara. Olibo küde era metre tikaninkä abko täte ma mikani, ye mdén köböire abko namani neketaninkä olibo ngätri era metre btä amne olibo nire abko ara jire btä ma namani siba, käta ma die mike. Olibo ngätri era metre abko nitre israelita mräkä känekäne Abraham, Isaac amne Jacob ara. <sup>18</sup> Akwa yebtä makwe ñan bika kri olibo küde

era metre btä, ñobtä ñan angwane makwe bikadre kri angwane, ñan olibo ngätri tä nire ma köböire akwa, ma abko tä nire olibo ngätri köböire, ye makwe ngwianta töre jae. <sup>19</sup> Akwa mun ruäre ñakare israelitare käkwe niedre mda: Olibo küde era metre tikaninkä abko täte ti mikani, munkwe niedre kore bikakäre kri, <sup>20</sup> ye abko tä dbe. Akwa nitre israelita abko olibo küde era metre, käkwe ñan tödekani Jesubti abtä Ngöbökwe tikaninkä amne ma abko käkwe tödekani Jesubti, aibe köböire Ngöbökwe ma mikani olibo küde era metre ye täte. Ne aisetet, makwe Ngöbö jürä ngwian jirekäbe jadtä angwane, makwe ñan bika kri, <sup>21</sup> ñobtä ñan angwane nitre israelita abko olibo küde era metre, akwa tödekani ñakare kwetre Jesubti, ye abko Ngöbökwe diani ñakare niaratrebtä ta, aisetet jma bärira jire käkwe ñan tödekadre janknu Jesubti angwane, Ngöbökwe ñan diandre jire mabti ta!

<sup>22</sup> Yebtä abko, makwe nikra kuin ja käne, ñobtä ñan angwane Ngöbö abko moto kuin, akwa motota nebe romon arato. Ye mden kisete, nitre israelita namani ritete nikani temen, ñobtä ñan angwane kukwe kuin Jesubtä mikani ñakare era jae kwetre, ye kräke Ngöbö moto namani romon angwane, ja moto mikani kuin kwe makrä. Akwa makwe nünandre ño, ie Ngöbö tö ye kwrere makwe nüna käre angwane, Ngöbö moto rabadi kuin käre makrä, akwa makwe ñan nünandre Ngöbö töi erere, ye ngwane ma tikadikäta olibo kriebtä arato. <sup>23</sup> Mdakäre abko, nitre israelita ñan tä Ngöbö kukwei Jesubtä mike era jae, ye mikadre temen kwetre angwane, tödekadre Jesubti kwetre angwane, Ngöbökwe ketarekäta olibo krie metrebtä, ñobtä ñan angwane Ngöbö di tärä olibo küde ye ketarekäta olibo kriebtä. <sup>24</sup> Mun abko olibo krie ngwarbe känsenta abko küde tikaninkä, bti ketaninkä olibo küde era metre ye täte ðye abko nitre israelita olibo küde era metre tikaninkä abko Ngöbökwe ñan mikadreta täte olibo kriebtä ya? Jänri! Niaratre abko olibo küde era metre, aisetet bari Ngöbökwe ketarekäta täte.

#### *Nitre israelita rabadi dianintari*

<sup>25</sup> Ja mräkätre, Ngöbökwe kukwe ükaninte kore mun ñakare israelitarebtä amne nitre israelitabtä, ye abko kukwe ükaninte kira tiebe Ngöbökwe ni kräke, akwa mtare Ngöböta mike gare nie, ye abko btä mun ñakare israelitare ñan tädre töi ngitiekä ngwarbe kwäräkwärä abtä bikadre kri nitre israelitabtä, abkokäre titä mike gare munye abko krörö: Mun ñakare israelitare rabadre tödeke täte jökrä Kristobti, abkokäre nitre israelita ruäre dokwä ribi, käkwe trö kwitani Jesukristoye. <sup>26</sup> Akwa kukwe ye rabadi bare kore angwane, nitre israelita rabadi dianintari, erere rabadi dianintari jökrä abko rakadikä kore tä gare nie, ñobtä ñan angwane Ngöbö Kukweita blite krörö btä:

Ni Diantarikä tä Síonte abko jatadi nitre israelita dentari, ye käkwe Jacob mräkä ngite Ngöbö rüere diandikä jökrä btä.

<sup>27</sup> Nitre israelita ngite ye diandikä jökrä kore btätre angwane, Ngöbökwe kukwe ükaninte kira nitre israelitabtä ye rabadi bare, *Isaías 59.20-21; 27.9*  
abko nieta Ngöbö Kukweibtä.

<sup>28</sup> Akwa mtare ti mräkätre, nitre israelita kwati tä Ngöbö kukwei kuin Jesubtä ye rüiere, abtä tätre ja rüere Ngöböbe. Ye mden köböire abko nitre israelita tä kä bien mun ñakare israelitareye tödekakäre Kristobti mtare. Akwa Ngöbökwe nitre israelita mräkä känekäne Abraham, Isaac amne Jacob ye dianinkä jakrä amne kukwe ükaninte kwe bentre, yebtä abko Ngöbö tä nitre israelita tarere janknu arato, <sup>29</sup> ñobtä ñan angwane Ngöböta jändrän bien nie, ye abko ñan tä denkäta nikän. Erere arato, tä ni kärere diantarikäre, yebti ñan tä ja kukwei kiteta temen, aisetet tä ja kukwei mike täte jökrä, aisetet Ngöböta nitre israelita tarere janknu. <sup>30</sup> Angwane mun ñakare israelitare abko mekera mun nämane Ngöbö kukwei mike ñakare täte, akwa mtare nitre israelita käta Ngöbö kukwei kuin Jesubtä mike ñakare täte, ye köböire abko tätre kä bien munye, mun rabadre ruentari tare Ngöböye, käkwe mun diandretari Jesu köböire abkokäre.

<sup>31</sup> Ye kwrere arato, nitre israelita ñan tä Ngöbö kukwei kuin Jesubtä mike täte mtare, ye köböire abko mun rabadre ruentari tare Ngöböye abkokäre. Ye mdenbtä, mrä nitre israelita rabadi ruentari tare Ngöböye, ñobtä ñan angwane Ngöböta mun ñakare israelitare ngwen ruentari tare jae mtare. <sup>32</sup> Ne aisetet, ni jökrä rabadre tödeke Jesubti

amne rabadre ruentari tare Ngöböye, käkwe dianditari, abkokäre Ngöböökwe ni jökrä israelita ya, ñakare ya tuanimetre ja dokwä mike ribi amne ñan Ngöbö kukwei Jesubtä mikadre täte kwetre abko Ngöböökwe nuenbare kore, akwa ye köböire abko ni israelita ya, ñakare ya akwa Ngöbö rabadre ngwen ruentari tare jae amne rabadre dianintari, abkokäre Ngöböökwe nuenbare kore.

### *Pablotá Ngöbö käikitekä*

<sup>33</sup> Yebtä abko, ti tö kukwe niei krörö Ngöböbtä: Jo! Ngöbö abra kwe jändrän kuinkuin tärä kabre krübäte nikrä, amne Ngöbö abra töbtä kri krübäte, käkwe jändrän kuinkuin mikanintbe ja töi jenbti ni kräke. Ye aisetet Ngöböta töbige ño ño, ye ni ñan raba niere jire chi amne Ngöbö töi ji mdentä ye ni ñakare jire iti ie rabadre gare. <sup>34</sup> Ne aisetet, *¿ni Dänkien töi ño, ye tä gare ni mda mdaye ya? ¡Ñakare!* ¿Angwane ni mda mda raba Ngöbö töi tike ya? ¡Ñakare! <sup>35</sup> Mdakäre abko, *¿ni tärä iti käkwe jändrän biani kane ni Dänkienye abko ütiä biandreta kwe ie ya? ¡Ñakare!* <sup>36</sup> Nobtä ñan angwane jändrän jökrä tä kite Ngöböökri amne jändrän jökrä tä niara köböire amne jändrän jökrä abko jen Ngöböökwe, aisetet *¡Ngöbö aibe raba käikitankä kärekäre!* Abko kore se. Amen.

## 12

### *Ni kwitanina btin Ngöböökwe, erere nikwe nünandre*

<sup>1</sup> Ngöböökwe ni ngwiani ruentari tare kore jae, käkwe jändrän kuin nuenbare bätäkä ngwarbe ni kräke, ye mden kisete ti mräkätre tikwe, jändrän kämikata Ngöbö käkitakakäre abko bianta ngöi ie, ye kwrere munkwe ja ngrabare mika ngöi jökrä Ngöbökrä amne munkwe nüna kuin deme Ngöbö aibe kräke amne, dre tuen dbe Ngöböye, ye erere munkwe nuen abko ti tö nibi niei kisere munye. Munkwe nuendre kore angwane, munkwe Ngöbö mikadi ütiäte amne munkwe käikitadikä era metre. <sup>2</sup> Erere arato, nitre moto kämekäme tä nüne ño kä ne ngwane, ye kwrere munkwe ñan nüna mda. Akwa mun rabadre kwitani Kristo kwrere, abkokäre munkwe Ngöbö tuametre ja töi kwite btin. Ye ngwane Ngöbö tö dreye, ye rüka gare munye amne jändrän kuin Ngöbökrä amne jändrän nuäre Ngöbökrä amne jändrän era metre Ngöbö okwäbti, Ngöbö tö dreye, ye rüka gare munye.

<sup>3</sup> Ni kwitanina Ngöböökwe käkwe nünandre krörö abko ti bike niere munye. Ngöböökwe ja moto mikani kuin tikrä, käkwe ti mikani Jesu kukwei ngwianka, aisetet ti bike kukwe niere krörö mun itire itireye: Munkwe ñan bika kri ni mda mdabtä, akwa munkwe töbika era metre au jabtä, ñobtä ñan angwane Ngöböökwe mun itire itire mikani tödeke ja kwrere jabti, aisetet ye kwrere munkwe nüna. <sup>4</sup> Ni abko itibe akwa ni kiakia ngrabare abko kabre, akwa ni kiakia ngrabare ye ñan tä sribi ketetibe nuene, akwa tä sribi bätäkä ngwarbe nuene ni ngrabare die mikakäre. <sup>5</sup> Ye kwrere arato, ni itire itire tödekaka Kristobti tä nekete niarakri abko ni kwati, akwa ni abko Kristo ngrabare itibe, aisetet nita nekete gware jakri ja die mikakäre kwärikwäri. <sup>6</sup> Akwa ni itire itire, ie Ngöbö tö namani ja di biain sribi ño ño nuenkäre, ye erere biani kwe nie. Ye aisetet, Ngöböökwe ja di biani ni itiye ja kukwei niekäre ni mda mdaye angwane, ni ye käta tödeke ño Ngöböbtä, ye kwrere Ngöbö kukwei niedre. <sup>7</sup> Erere arato, Ngöböökwe ja di biani ni mdaye sribikäre ni mda mda die mikakrä angwane, sribidre kuin kräke kwe. Amne Ngöböökwe ja di biani ni mdaye ja kukwei dirikäre, ye kwrere diri janknu kwe ni mda mdaye. <sup>8</sup> Erere arato, Ngöböökwe ja di biani ni mdaye ni mda mda kitakäre nüne bari Ngöbökrä, ye kwrere kita nüne bari Ngöbökrä kwe. Erere arato, Ngöböökwe ja di biani ni mdaye jändrän biankäre ngwarbe ni mda mdaye angwane, jändrän bian ja moto kuibti kwe. Erere arato, Ngöböökwe ja di biani ni mdaye rabakäre ji dokwate nitre gätäkä Jesu käbti ngätäite angwane, sribi ye nuen kuin täte jökrä kwe. Erere arato, Ngöböökwe ja di biani ni mdaye ni bobre bobre amne ni ja tare nikaka nikaka die mike angwane, kä rabadre nuäre btä sribi ye nuenkäre.

### *Nikwe ni mda mda taredre*

<sup>9</sup> Kukwe mda ti bike niere munye abko krörö: Munkwe ja tare era metre kwärikwäri. Erere arato, munkwe bätä ngwiandre kri krübäte kukwe kämekäme yebtä amne munkwe kukwe kuinkuin ye ketadrete dime ja kisete. <sup>10</sup> Ni ja etbare käta ja tarere, ye kwrere munkwe ja taredre kwärikwäri amne, munkwe ñan ja mikadre ngwarbe jae kwärikwäri, akwa munkwe ja mikadre bäri ütiäte jae kwärikwäri. Yebtä munkwe ja kitadre bäri. <sup>11</sup> Mdakäre abko, sribi jökrä jiebti mun rankwadre kisere, akwa munkwe ñan kängwiandre krene jabtä amne munkwe sribidre ja di ngöi jökrä ni Dänkienkrä.

<sup>12</sup> Erere arato, Ngöbökwé jändräñ kuin nuendi munkrä, ye abko munkwe käi ngwiandre nuäre jabtä, akwa mun raba ja tare nike angwane, munkwe nünandrekä dite jabtä amne ja tare nika yebtä munkwe ñan ngra ngradre akwa, munkwe blitadre janknu Ngöböbe. <sup>13</sup> Nitre tödekaka Jesubti käta jändräñ mdei nike, ye abko munkwe die mikadre. Erere arato, nitre basaka kadre ngäbti kuin, ye jiebti mun rankwadre kisere.

<sup>14</sup> Mdakäre abko, nire nire tä näin kisere mun jiebti mun mikakäre ja tare nike tödekabtä Jesubti, ye kräke munkwe ja di kärä Ngöböye amne munkwe ñan ngürün mika btä ja dokwäre. <sup>15</sup> Erere arato, nire nire btä käta nuäre, ye ben munkwe kängwiandre nuäre gware jabtä amne, nire nire tä ulire amne tä ja müaire abko ben munkwe ja müaidre gware siba.

<sup>16</sup> Erere arato, munkwe nünandre jáme jabe kwärikwäri amne munkwe ñan bikadre krikri, akwa munkwe ja getadre jáme ni bobre bobre ben amne ja ñan rabadre ruen bäri töbtä ni mda mdabtä munye.

<sup>17</sup> Mdakäre abko, ni mda mdakwe kukwe nuen käme mun rüere, akwa munkwe ñan kukwe nuenta käme btä ja dokwäre, akwa dre dre tuen kuin ni jökräye, ye jiebti mun rankwa. <sup>18</sup> Erere arato, munkwe ja die mikadre käre nünakäre jáme ni jökräbe.

<sup>19</sup> Ti mräkätre tare tikwe, ni mdakwe kukwe nuen käme mun rüere angwane, munkwe ñan ja ngie mika au, akwa munkwe mun rüe ye tuametre Ngöbö kisete, ñobtä ñan angwane Ngöbö Kukwei käta niere krörö:

Ni mikadre ja ngie nuen, ye abko tä ti kisete.

Ne aise ni kukwe nuenkä kämekäme mun rüere, ye dokwäre tikwe mikadi ja ngie nuen, *Deuteronomio 32.35*

niebare ni Dänkienkwe. <sup>20</sup> Ne aise, nikwe Ngöbö Kukwei mikadre täte krörö:

Ma rüe, ie mrö raba angwane, makwe buka.

Erere arato, tomna raba ie angwane, makwe tomna bian ie.

Yebtä abko rabadre ja gaire amne ngwäre kwata rabadre tain bürere jökrä ie ja gaibtä, abkokäre makwe nuen kore. *Proverbios 25.21-22*

abko tä tikani Ngöbö Kukweibtä. <sup>21</sup> Ye abko, makwe ñan ja ganaimna kukwe kämeye, akwa makwe kukwe kuin nuen ma rüekrä, köböire makwe kukwe käme ganaindi.

## 13

### *Nitre gobranka kukwei mikadre täte*

<sup>1</sup> Mdakäre abko, ni jökrä tä nebe gobrane ye abko Ngöbö ara jire tä mike. Ni ñakare jire iti abko tä ja mike gobrane ja töi jenbti, aise niere nitre gobranka mikadre täte. <sup>2</sup> Ye aise niere nire tä nebe nitre gobranka rüere, ye abko Ngöbö kukwei ara jire rüere nita rüre, aise niere nire tä rüre nitre gobranka rüere ye abko kákwe ja ngie nuadi. <sup>3</sup> Ye abko, ni töi kuin era metre abko kräke ñan nitre gobranka tä mikani jürä ngwiandre, akwa nitre kukwe kämekäme nuenkä abko kräke gobranta mikani jürä ngwiandre ie. <sup>4</sup> Ye aise niere gobrana ñan jürä rabadre mabtä, ie ma tö ya? Gobrana jürä ñan rabadre mabtä, ie ma tö ne ngwane nüna kuin era metre amne makwe ñan ja mika ngite angwane, nitre gobranka kákwe ma mikadi ütiäte, <sup>5</sup> ñobtä ñan angwane nitre gobranka tätre sribire Ngöbökrä jändräñ kuin nuenkä makrä. Akwa makwe nünandre käme abtä makwe ja mikadre ngite gobrana rüere, ye ngwane abko gobrana jürä rabadre mabtä, ñobtä ñan angwane ñan ngwarbe nitre gobranka ye tä ni mike ja ngie nuen. Nitre gobranka ye abko tä sribire Ngöbökrä, kukwe kämekäme nuenkä mikakäre ja ngie nuen Ngöbö täte. <sup>6</sup> Ye mden kisete,

ni jökrä käkwe nitre gobranka mikadre täte. Ye abko ñan ni mikadre ja ngie nuen kwe abtä mikadre täte, akwa ja ñan rabadre ruen ngite nie Ngöbö ngwärekri, abkokäre nikwe mikadre täte.

<sup>6</sup> Nitre gobranka ye tä sribire Ngöbökrä amne tä sribi ye nuene köbö kwatirekwatire, aisetet mun jökrä tä ja ütiä bien ietre. <sup>7</sup> Ye mdenbtä abko, gobran itire itire, ie dre biandre ja ütiäre, ye erere bian ie munkwe, aisetet nireye rürümön ütiä biandre ño ño, ye ie ja ütiä biandre metre. Erere arato, nire nire jürä ngwiandre, ye erere munkwe jürä ngwian amne, nire nire mikadre ütiäte jae, erere munkwe mika ütiäte jae.

### *Ja taredre kwärikwäri*

<sup>8</sup> Munkwe ñan ja ütiä ya o rürümön ütiä mika jire chi jabti, akwa käre rürümön ütiä tädre ketetibe mun itire itire bti abko munkwe ja taredre kwärikväri, ñobtä ñan angwane nire nire käta ni mda mda tarere ye abko käta Kukwe Biani Ngöböökwe Moiséye mike täte jökrä. <sup>9</sup> Ye abko Kukwe Biani Ngöböökwe Moiséye käta niere krörö: Ma gure ne ngwane, makwe ñan ja mika gure batibati ni mdabe, makwe ñan ni kämika, makwe ñan go, makwe ñan jändrän ni jenenankwe ribe jae. Ye abko, kukwe ketetibe mda munkwe mikadre täte ne ngwane, kukwe jökrä biani nuendre nie Ngöböökwe ye rabadre bare munye. Kukwe keteti mda ye abko krörö:

Mata ja tarere au,

ye kwrere makwe ni mda mda tare arato,

*Levitico 19.18*

<sup>10</sup> ñobtä ñan angwane nire nire käta ni mda tarere ye abko ñan tä kukwe nuene käme rüere. Ne aisetet nita ja tarere kwärikväri, ye ngwane Kukwe Biani Ngöböökwe Moiséye tä nebe bare täte jökrä nie.

<sup>11</sup> Munkwe ni mda mda taredre kore, ñobtä ñan angwane ni Dänkien Jesukristo jatadita ni diantarikäre abko köböi nükera. Munkwe ñan nüna ni kibiaka kwrere, ñobtä ñan angwane Jesukristo jatadita abko köböi nükerate bäri ja ken, munkwe tödekan Jesubiti krire ye kräke. <sup>12</sup> Kä ne ngwane abko kä iko kwrere amne ni jökrä käta kukwe nuene kämekäme, akwa kä iko ye kitera niken ta amne Jesu kebera nüketa, ye abko kä ngwen kwrere kitera nüke. Ye mdenbtä abko, ari kukwe kämekäme kite temen amne ari ja töi mike kwatibe kukwe kuin nuene. Ye kwrere ni rabadi juto biare ni Dänkien kaen ngäbti, ni rükä tä ja mike juto niara rüe kraire jabti ye kwrere. <sup>13</sup> Ne aisetet, jändrän nuenta era metre kä ngwenbti, ye kwrere nikwe nünandre era metre. Akwa ni ñan rikadre kä ngwen nuäre ngwarbe jabta kwärikväri amne, ni ñan rika dröbare. Erere arato, nikwe ñan ja mikadre gure batibati amne nikwe ñan ja näkwitadre ngwarbe kukwe kämekäme btä; nikwe ñan rüdre ngwarbe jabe kwärikväri amne ni mda rabadre jändrän bkäne, yebtä nikwe ñan mokredre jire ben. <sup>14</sup> Munkwe ñan nüna kore amne ñan kukwe kämekäme mdei ngwian jae munkwe amne, munkwe töbika ñakare btä, akwa ni Dänkien Jesukristo käkwe nünabare ño kä nebtä amne blitabare ño kä nebtä kwe, ye kwrere munkwe nüna amne munkwe blita ni mda mdabe.

## 14

### *Ja kadre ngäbti kwärikväri*

<sup>1</sup> Mdakäre abko, kukwe diribare Jesukwe mröbtä, yebtä töbikata jene jene. Akwa kukwe ye mikakäre era abko ni mräkä di braibe käta ngri kwete ñakare, ni ye abko munkwe ka ngäbti kuin amne tä töbige ño, yebtä munkwe ñan kita ngite, <sup>2</sup> ñobtä ñan angwane jändrän jökrä abkodbe kwetadre niebare ni Dänkien Jesukwe abko ni ruäre tä nütüre, akwa ni ruäre abko di ñakare kukwe ye mikakäre era abko käta ka bätäkä ngwarbe aibe kwete. <sup>3</sup> Ye abko ni ruäre käta jändrän jökrä kwete ye ñan käkwe ni mda mda ngri kwete ñakare ye mika ngwarbe jae. Erere arato, ni ruäre ñan tä jändrän jökrä kwete ye käkwe ñan ñäkä jire ni jändrän jökrä kwetaka yebtä, ñobtä ñan angwane Ngöböökwe ni nibu ye kani ngäbti, aisetet ni ye käkwe ja kadre ngäbti kuin arato. <sup>4</sup> Ni ruäre käta jändrän jökrä kwete abko sribikä ni Dänkien Jesukwe, ¿akwa ñobtä mata blite bkänkä kwrere amarebti ni sribikä bkänkä kräke abko rüere mata ñäke ye? Sribikä bkänkä kräke

ye abko tä nüne kuin ya, ñakare ya akwa ye tä gare bkänkäye, aisetet ni ye kákwe nünandi kuin bkänkä okwäbti, ñobtä ñan angwane ni Dänkien Jesu di kri abko kákwe mikadi kuin.

<sup>5</sup> Mdakäre abko, nitre israelita käta köbö jadükakrä mike bari ütiäte köbö mda mdakrä, ye kwrere jire ni ruäre mun ngätäite tä köbö ruäre mike bari ütiäte köbö mda mda kräke, akwa ni mda abko ie köbö kwatirekwatire tä nebe tuen ja kwrere jökrä. Ne aisetet ni itire itire käta töbige ño ye abko dbe raba ruen ie, ne ngwane mika era kwe. <sup>6</sup> Ni ruäre abko tö köbö ruäre mikai jenena ütiäte jae, ye abko tä mike ütiäte jae ni Dänkien mikakäre ütiäte jae. Erere arato, ni ruäre käta kuin niere Ngöböye, bti tä jändrän jökrä kwete, ye abko tä kwete Ngöbö mikakäre ütiäte jae. Mdakäre abko, ni ruäre ñan tä ngri kwete, ye abko tä ja üke bain ngri yeye, akwa tä nuene Ngöbökrä, käta kuin niere Ngöböye amne tä mike ütiäte jae arato. <sup>7</sup> Ne aisetet ni tödekaka Jesubti ñakare jire iti käta nüne au jakrä. Erere arato ni tödekaka Jesubti ñakare jire iti abko tä krüte au jakrä, <sup>8</sup> ñobtä ñan angwane nita nüne ye abko nita nüne ni Dänkien kräke. Erere arato, ni krütadre angwane, ni krütadre ni Dänkien kräke, niara mikakäre ütiäte jae, aisetet nita nire ya, ni krütadre ya, akwa ni Dänkienta ni bkäne. <sup>9</sup> Ni Dänkien rabadre ni bkäne, abkokäre niara krütani, bti nükaninta nire rabakäre ni krütani amne ni nire Dänkiene.

<sup>10</sup> ¿Kore ne ngwane, se ñobtä ma mden kräke ngri ñakare dbe kwetadre käta ñäke ma mräkä jändrän jökrä kwetaka rüere? Erere arato, ¿se ñobtä ma jändrän jökrä kwetaka käta ñäke ma mräkäbäta mikakäre ngwarbe töbikabtä bá jene kore? Mrä ni rabadi jökrä Ngöbö ngwärekri angwane, kukwe ükadite kwe nibe, aisetet jse ñobtä mata ñäke ma mräkä rüere kitakäre ngise ye! <sup>11</sup> Kukwe kore ye mdenbtä Ngöbö Kukwei käta niere krörö:

Tita nüne, aisetet ti ne ngwärekri ni jökrä rabadi ngukudokwäbti temen ti mikakäre ütiäte jae amne, ti Ngöbö aibe käikitadikä kwetre, niebare ni Dänkienkwe, *Isaías 45.23* abko nieta Ngöbö Kukweibtä. <sup>12</sup> Ye mden kisete, ni itire itire kákwe dre dre nuendi, ye abko nikwe niedi au jökrä jakrä ni Dänkiene.

<sup>13</sup> Ye mden kisete, munkwe ñan ñäkädre jire jabtä kwärikwäri, akwa nikwe töbikadre kuin ja käne, kákwe ñan kukwe mikadre ni mräkä tödekaka Jesubti ye jiete abtä ja mikadre ngite kwe Ngöbö rüere. <sup>14</sup> Akwa ni Dänkien Jesu nämane nüne kä nebtä angwane, kukwe diribare kwe abko kukwe era metre gare kuin tie abko krörö: Jändrän jökrä kwetadre abko ñakare jire käme Ngöbö ngwärekri, aisetet munta jändrän jökrä kwete abko tä töbige era metre tuen tie, akwa ni ruäre abko ie jändrän ruäre ñan tuen dbe kwetadre, ye abko ñakare dbe niarakrä. <sup>15</sup> Akwa mtare mun abko tä mrö ño ño kwete, ye ñan tuen dbe mun mräkäye, akwa munta kwete janknu okwäbti, abtä jata nebe ruen ngite ie, ye ngwane munta mun mräkä tarere ñakare. Ne aisetet munta mrö ño ño kwete, ye köböite munkwe ñan mun mräkätre, kräke Kristo krütani, ye mikata ja mike ngite Ngöbö rüere. <sup>16</sup> Ne aisetet, munkwe ñan kä bian jire chi ñäkäkäre blo mrö kuin kwetadre ye rüere, <sup>17</sup> ñobtä ñan angwane Ngöböta gobrane nibti amne Ngöbökrä abko jändrän kwetadre amne ñadre abko ñakare ütiäte. Akwa ni jökrä bti Ngöböta gobrane abko tä nüne era metre jabe kwärikwäri amne tä nüne jäme jabe kwärikwäri amne kä tädre bari nuäre nibtä Ngöbö Üai Deme köböire, ye abko ütiäte Ngöbökrä, <sup>18</sup> ñobtä ñan angwane nire nire tä nüne kore sribikäre Kristokrä ye käta kä mike nuäre Ngöböbtä amne tä nebe tuen dbe ni mda mda okwäte arato.

<sup>19</sup> Ye aisetet, jändrän jökrä käta ni die mike nüne jäme jabe kwärikwäri amne tä ni die mike gwaire jökrä, ye abko ari känentari bari ja käne. <sup>20</sup> Angwane makwe ñan sribi Ngöbökwé tä mun jökrä ngätäite juan ngwarbe mrö aibebtä. Akwa kukwe era metre abko nere: mrö jökrä abko kuin deme amne dbe kwetadre Ngöbökwé niebare. Akwa mrö ñan tuen dbe kwetadre ni mräkäye abko nikwe kwetadre okwäbti abtä ja mikadre ngite kwe Ngöbö rüere, ye abra käme. <sup>21</sup> Ne aisetet nikwe ngri kwetadre amne nikwe uba doi ñadre, köböite ni mräkä kákwe ja mikadre ngite Ngöbö rüere ne ngwane, nikwe ñan ngri kwetadre amne nikwe ñan uba doi kwaka ñadre, ye abko rabadre bari kuin. Erere arato,

jändrän mden mden nikwe nuendre käkwe ni mräkä mikadre ja mike ngite Ngöbö rüere, ye abko nikwe ñan nuendre jire chi mda.

<sup>22</sup> Ne aisetet dre tuen kuin mae, yebtä abko makwe töbika kaibe jakrä Ngöbö ngwärekri amne ñan kwetamna amne ñan ñamna ni mda mdaye. Ye mdenbtä abko nieta krörö: “Nire nire tä tikaninte, käta kukwe mden mike era, erere tä nuene amne jata nebe ruen ngite ñakare Ngöbö ngwärekri, ni ye abko btä käta nebe nuäre.” <sup>23</sup> Akwa jändrän ño ño kwetadre amne ñadre ye ñan tä nebe tuen dbe ie, akwa bti ta tä kwete, ye ngwane tä ja mike ngite Ngöbö ngwärekri, ñobtä ñan angwane jändrän kwetadre abko ñan tä nebe nüke gare metre ie akwa tä nuene, ye ngwane tä ja mike ngite, aisetet jändrän jökrä nuendre, ye abko era metre ya, ñakare ya, akwa nita nuene, ye ngwane nita ja mike ngite.

## 15

<sup>1</sup> Akwa ni jändrän jökrä kwetaka abko di tära kukwe diribare Jesukwe mröbtä mikakäre era täte jökrä, angwane ni mräkä di braibe käta ngri kwete ñakare, ye abko nikwe kadre ngäbti amne nikwe ñan töbikadre jändrän kuin känakäre kaibe au jakrä ja mikakäre nuäre. <sup>2</sup> Ni jökrä käkwe jändrän kuin nuendre ni mräkä tödekkaka Jesubti mda mda kräke, niara moto mikakäre nuäre amne ja die mikakäre kwärikwäri, <sup>3</sup> ñobtä ñan angwane Kristo ara jire käkwe ñan jändrän kuin känabare kaibe au jakrä ja mikakäre nuäre, akwa Ngöbö Kukwei namani tikani niarabtä, ye erere namani bare krörö ie:

Ñakä nämane bätäkä ngwarbe ma rüere Ngöbö, ye abko nikani jökrä ti kötärä, *Salmos 69.9*

abko tä tikani Kristobtä. <sup>4</sup> Kukwe jökrä tikani kore Ngöbö Kukweibtä, ye abko tikani ni töi tikakrä amne kukwe tikani kira, ye abko btä nikwe nünandrekä dite käre amne tä kä mike nuäre nibtä, ye köböire ni rabadre tödeke kärekäre Ngöböbti, abkokäre namani tikani kira kore. <sup>5</sup> Angwane Ngöbö ni mikaka nünenkä dite käre amne kä mikaka jäme ni motobtä käkwe mun die mika ja töi mike ja näre jökrä, Kristo Jesu tö ie ye kwrere, <sup>6</sup> mun töi rabadre kwaitibe jökrä, käkwe Ngöbö ni Dänkien Jesukristo Rün kwe ye käkitadrekä gware jökrä abkokäre.

<sup>7</sup> Kristokwe mun itire itire kani ngäbti kuin, ye kwrere munkwe ja ka ngäbti kuin kwärikväri Ngöbö rabadre käkitaninkä abkokäre. <sup>8</sup> Mdakäre abko, ti tö kukwe krörö nieita munye: Ngöbökwе kukwe ükaninte nitre israelita mräkä känekäne ben, ye mikakäre bare täte Kristo nükani ni klabore kwrere nitre israelitakrä, ye köböire abko Ngöbö tä ja kukwei mike täte abko bärä mikani kore kwe. <sup>9</sup> Erere arato, nitre ñakare israelitare namani ruentari tare Ngöböye, aisetet Ngöbö käkitadrekä kwetre, abkokäre Kristo nükani Ngöbö Kukwei mike bare. Kukwe yebtä Ngöbö Kukweita tikani krörö:

Tikwe ma käkitadikä nitre ñakare israelitare ngätäite amne tikwe ka niedi ma mikakäre ütiäte. *2 Samuel 22.50; Salmos 18.49*

<sup>10</sup> Angwane tära mda känti abko nieta krörö:

Mun ñakare israelitare ye käkwe kä ngwian bärä nuäre jabtä juta Ngöbökwе ye ben gware. *Deuteronomio 32.43*

<sup>11</sup> Amne tära mdara jire Ngöbö Kukweibtä abko nieta krörö:

Mun ñakare israelitare juta kwatirekwatire te ye käkwe ni Dänkien Ngöbö käkitaka gware jökrä. *Salmos 117.1*

<sup>12</sup> Erere arato, Isaías käkwe kukwe tikani krörö Jesukristobtä:

Isaí bkün jatadi iti, ye abko rabadi gobrane nitre ñakare israelitarebti angwane tödekadi kwetre bti, abko tikani kore Isaíakwe. *Isaías 11.10*

<sup>13</sup> Angwane Ngöbö tödekkakrä nikwe ye käkwe kä mika bärä nuäre munbtä amne mun mika nüne jäme kwe, mutta tödeke bti ye ngwane. Erere arato, Ngöbökwе jändrän kuin nuendre mda munkrä, yebtä munkwe ja töi mika ngibiare bätäre Ngöbö Üai Deme di kri ye köböire.

<sup>14</sup> Ti mräkätre tikwe, mun moto nena kuin krübäte ni mda mdakrä amne, kukwe bätäkä ngwarbe nena gare kabre munye amne mäträre metre jadtä kwärikwäri ye garera kuin munye abko nena gare tie. <sup>15</sup> Akwa tita tärä tike, nebtä abko kukwe ruäre ñan käi rikwitadrekä munbti, abkokäre tita tärä ne tike era metre gwärere munye. Tita tärä tike kore, ñobtä ñan angwane Ngöböökwe ja moto mikani kuin tikrä, käkwe ti mikani sribire kore. <sup>16</sup> Ye aisetet, mtare tita sribire Kristo Jesukrä nitre ñakare israelitare ngätäite. Erere arato, nitre blitaka Ngöböbe ni mda mda diäre käta jäandrän kämike, bti tä mike gare Ngöböye, ye kwrere tita sribire nitre ñakare israelitarebe, käta niken Ngöbö kukwei kuin Jesubtä ngwena ietre, abti niaratre tä Ngöbö kukwei kuin ye kaen ngäbti angwane, tita niaratre mike gare Ngöböye amne tä nebe dbe Ngöbö ngwärekri amne Ngöbö Üai Deme käta mike deme jenena Ngöbökrä.

<sup>17</sup> Tita sribi nuene kore Ngöbökrä, yebtä abko ja rabadre ruen ütiäte kri tie Kristo Jesu köböire ruen tie. <sup>18</sup> Akwa ti abko ie ja nüke töre ñakare blite kukwe mda mda bä jene btä angwane, Kristo ara jire käkwe dre dre nuenbare ti köböire amne ñokwe ti mikani nitre ñakare israelitare ngwena tödeke Jesubti, ye aibebtä ti tö blitai, aisetet namani bare ja kukweibti tie amne nämane bä mikani arato. <sup>19</sup> Ne aisetet tikwe Ngöbö kukwei kuin Kristobtä diribare, ye abko sribi kri ñan tuabare, bti nämane mikani era metre Ngöbö Üai Deme diebti. Ngöbö kukwei kuin Kristobtä, ye abko tikwe mikani gare kuin täte jökrä niken juta Jerusalénte amne juta mda mdate nebe kä Ilíriate. <sup>20</sup> Ngöbö kukwei kuin Jesubtä kädrie ngämi, käi känti käre ti töta nebe rikai Ngöbö kukwei ngwena, ñobtä ñan angwane ni mdakwe sribi kömikanintbe, ye känti ti ñan tö sribire ni mda jiebti. <sup>21</sup> Ne aisetet Ngöbö Kukwei tikani kira rabadre bare, abkokäre tita sribire jirekäbe kore. Ngöbö Kukwei ye abko tä niere krörö:

Ni mda mda ñakare israelitare abko ie kukwe nie ñakare niarabtä abko ie rükadi gare. Angwane ni mda mda ñakare israelitare abko olote blita ñakare niarabtä abko ie niara rükadi gare,

*Isaías 52,15*

abko tä tikani Ngöbö Kukweibtä. <sup>22</sup> Ye mden kisete, nitre ñakare israelitare, ben ti nämane sribire kore kä mda mda känti, abtä ti ngämi nebata basare munye. Tikwe ja köböi kitani bäre bäre niken mun känti yete, akwa kukwe namani ti jiete.

### *Pablo tö näin basare juta Romate*

<sup>23</sup> Akwa mtare tita sribire, ye känti tikwe sribibarera ünän jökrä angwane, ti tö namani rikai basare munye yete, ye abko käi nikanina kabre ta, <sup>24</sup> aisetet ti näin España, ye ngwane ti tö rikai nebe basare jire mun känti yete. Ti rabadi bä jötrö mun känti Roma yete akwa, kä rabadi nuäre tibtä mun tuare. Yebti munkwe ti die mikadre abko bti ti näin, ruen tie.

<sup>25</sup> Akwa gwängwarbe abko ja mräkätre nete käkwe jäandrän biani ja mräkätre tödekaka Jesubti Jerusalénbo kräke abko ti bike niken bien ietre, aisetet ti bike nikenta käne Jerusalén, <sup>26</sup> ñobtä ñan angwane ja töi jenbti ja mräkätre Macedonia, Acayabo käkwe ngwian ükaninkrö juandre ni bobre bobre ja mräkätre tödekaka Jesubti Jerusalénbo ngätäite kräke. <sup>27</sup> Niaratrekwe ngwian ükaninkrö ja töi jenbti ja mräkätre Jerusalénbo kräke, akwa era metre niaratre rabadre jäandrän ye nuene nierare, ñobtä ñan angwane nitre ñakare israelitare, ben nitre israelita käkwe jäandrän jökrä kuin Ngöböökwe nikrä dräibare jabti niaratre die mikakäre, ye kwrere arato nitre ñakare israelitare käkwe nitre israelita tödekaka Jesubti die mikadre arato jäandrän jakwebti ruen tie. <sup>28</sup> Ne aisetet ti näin Jerusalén, käkwe ngwian biandi ünän jökrä ja mräkätreye, yebti ti näin España mda angwane, ti näin basare jire mun känti yete. <sup>29</sup> Akwa ti rabadi yete angwane, jäandrän kuin Kristokwe, yebti nikwe ja die mikadi kwärikväri ye abko gare kuin tie.

<sup>30</sup> Ti mräkätre, ni Dänkien Jesukristo köböire amne Ngöbö Üai ni mikaka ja tarere kwärikväri, ye köböire munkwe ja geta gware tibe sribi tare krübäte tikrä nebtä amne munkwe blita tikrä Ngöböbe. <sup>31</sup> Angwane nitre israelitare käta tödeke ñakare Jesubti tä nüne Judea, ne ngäniene Ngöböökwe ti ngibiadre abko munkwe ribe ie tikrä. Erere arato, ti näin ngwian ngwena ja mräkätre Jerusalénbo kräke, ye abko niaratrekwe kadre ngäbti kuin abko munkwe ribe Ngöböye arato. <sup>32</sup> Yebti Ngöbö tö ne ngwane, kä rabadi nuäre kri

tibta rikare ja tuen munbe amne tikwe jadükadre basare kwärä munye yete. <sup>33</sup> Ngöbö kä jäme bianka nie, ye raba mun jökrä ben. Abko kore se. Amen.

## 16

### *Pablota köbö kuin juen mrä*

<sup>1</sup> Mrä abko, ti mräkä merire Febe bike niken mun känti. Niara abko nitre tödekaka Jesubti die mikaka abko tä näne juta Cencreate. Ye mden bike niken mun känti. <sup>2</sup> Ne aisetet ni Dänkien köböire ni tödekaka Jesubti tä ja kaen ngäbti, ye kwrere munkwe niara ka ngäbti angwane, kukwe mda mda kwe, btä munkwe die mika, ñobtä ñan angwane niarata ni kwati die mike amne ti ara jire die mikata krübäte kwe abti kä näke mtare arato, aisetet munkwe die mika.

<sup>3</sup> Amne Priscila btä brare kwe Aquila abko sribi muko tikwe Kristo Jesukrä, ye kräke titä köbö kuin juen abko munkwe nie ietre. <sup>4</sup> Niaratre nibu ye abko bäsí krütani ti diantarikäre. Yebtä abko ñan ti aibe tä kuin niere ietre, akwa ni mräkä jökrä ñakare israelitare käta tödeke Kristo Jesubti kä ketareketare temen käta kuin niere Ngöböye btätre siba. <sup>5</sup> Mdakäre abko, nitre tödekaka Jesubti tä ja ükekrö Priscila amne Aquila gwiriete, ye kräke titä köbö kuin juen abko munkwe nie ietre.

Erere arato, ti kukwe muko tare kri tikwe Epeneto, kräke titä köbö kuin juen, munkwe nie ie. Niara ye abko kákwe tödekani bäri käne Kristobti provincia Asiate. <sup>6</sup> Amne María kákwe sribibare kri munkrä, ye kräke titä köbö kuin juen arato, munkwe nie ie.

<sup>7</sup> Erere arato, ti mräkätre israelita Andrónico amne Junias nämane ngite gware tibe kä teri amne, niaratre ütiäte kri nitre Jesu kukwei ngwianka ngätäite amne niaratre kákwe tödekani bäri käne Kristobti ti ngwä. Niaratre ye kräke titä köbö kuin juen arato, munkwe nie ietre. <sup>8</sup> Amne Amplias ti kukwe muko tare tikwe ni Dänkien köböire, ye kräke titä köbö kuin juen arato, munkwe nie ie. <sup>9</sup> Erere arato, Urbano sribi muko nunkwe Kristokrä ye kräke titä köbö kuin juen, amne Estaquis tare tikwe, ye kräke titä köbö kuin juen, munkwe nie ietre. <sup>10</sup> Mdakäre abko, Apeles käta tödeke kwaitibe Kristobti, ye abko bäsí mikani kwe ja tare nikabtä, niara ye kräke titä köbö kuin juen arato, munkwe nie ie. Erere arato titä köbö kuin juen Aristóbulo mräkäkrä, munkwe nie ietre. <sup>11</sup> Amne ti mräkä israelita nünanka ti käite Herodión, kräke titä köbö kuin juen, munkwe nie ie. Erere arato, Narciso mräkä käta ni Dänkien mike era, kräke titä köbö kuin juen, munkwe nie ietre. <sup>12</sup> Mdakäre abko, Trifena amne Trifosa käta sribire ni Dänkien kräke, niaratre ye kräke titä köbö kuin juen, munkwe nie ietre. Erere arato, Pérsida tare nikwe ye käta sribire kri ni Dänkien kräke, niara ye kräke titä köbö kuin juen arato, munkwe nie ie.

<sup>13</sup> Amne Rufo tä Ngöbö kukwei mike era abtä ütiäte kri Ngöbö ngwärekri abko kräke titä köbö kuin juen, munkwe nie ie. Erere arato, Rufo meye namani ti meye kwrere tikrä abko kräke titä köbö kuin juen arato, munkwe nie ie. <sup>14</sup> Mdakäre abko, titä köbö kuin juen Asíncrito kräke amne Flegonte kräke, erere arato titä köbö kuin juen Hermas kräke, Patrobas kräke amne Hermes kräke amne ja mräkätre mda mda tödekaka Jesubti tä ja gete bentre, kräke titä köbö kuin juen, munkwe nie ietre. <sup>15</sup> Erere arato, titä köbö kuin juen Filólogo kräke, Julia kräke amne Nero kräke, erere arato Nero ngwai merire, kräke titä köbö kuin juen, munkwe nie ietre. Amne Olimpas kräke titä köbö kuin juen amne ja mräkätre tödekaka Jesubti tä bentre yete, ye kräke titä köbö kuin juen jökrä, ye abko munkwe nie kore ietre.

<sup>16</sup> Akwa mun abko kákwe ja demain era metre kwärikwäri Ngöbö käbti abko titä niere munye. Ja mräkätre jökrä tä gätäre Kristo käbti nere temen tä köbö kuin juen mun jökrä kräke.

<sup>17</sup> Ti mräkätre, mräkäre abko kukwe mda ti tö niei munye abko krörö: Ngöbö kukwei kuin Jesubtä diribare munye abko munkwe kani ngäbti, kukwe ye rüere ni mda mda jatai dirire bäsí jene mun mikakäre rüre jabe kwärikväri amne mun mikakäre Kristo gibiekäta. Ni ye kwrere ngäniene munkwe nikra kuin ja käne amne munkwe ñan ja geta jire chi bentre, <sup>18</sup> ñobtä ñan angwane niaratre ñan tä sribire ni Dänkien Kristokrä akwa, tä sribire au jakrä, käta ñäke nuäre nuäre dirikäre, ye käta nitre mokrere ñakare jabti ngökö, aisetet

munkwe mokre jabti. <sup>19</sup> Amne mun jökrä käta dirikätre munye mike täte, ye abko bäri käi nuäre tibtä, akwa yebtä munkwe ñan dirikätre blo mikadre täte arato, akwa mun rabadre töbtä jäandrän kuinkuin nuenkäre, ie ti tö, akwa kukwe kämekäme ñan rükadre gare munye, abkokäre munkwe ñan ja kitadre btä, ie ti tö. <sup>20</sup> Ye abko munkwe nuendre kuin kore, ye ngwane Ngöbö kä jáme bianka nie, ye käkwe Satana mikadi tükarekä jötrö ngwarbe ja ngoto täni munye. Erere arato, ni Dänkien Jesu käkwe ja moto mika kuin mun jökrä kräke.

<sup>21</sup> Mdakäre abko, sribi muko tikwe Timoteo käta köbö kuin juen mun kräke. Erere arato, Lucio, Jasón amne Sosípater ti mräkätre israelita käta köbö kuin juen mun jökrä kräke. <sup>22</sup> Amne ti kä Tercio, ti ne abko Pablokwe mikani tärä ne tikaka jakrä juandre munye, ti ne käta köbö kuin juen mun kräke ni Dänkien käbti arato. <sup>23</sup> Amne Gayo käta kä bien nitre tödekaka Jesubtiye ja gwiriete, ye erere tita mtare Gayo gwiriete nete, Gayo ye käta köbö kuin juen mun kräke. Erere arato, Erasto ngwian ngibiaabtikä juta Corinto nete käta köbö kuin juen mun jökrä kräke amne, ni mräkä Cuarto käta köbö kuin juen mun jökrä kräke arato.

<sup>24</sup> [Amne ni Dänkien Jesukristo käkwe ja moto mika kuin mun jökrä kräke. Amen.]\*

<sup>25</sup> Ngöbö kukwei kuin Jesukristobtä tita näin mike gare, ye köböire Ngöbökwe mun mika nünenkä dite abko ie ti tö, aise te ari Ngöbö käkitekä, ñobtä ñan angwane kukwe ye nämane kaibe tiebe Ngöbökwe, akwa niara tö namani mikai gare nie. Ngöbö ngämi kä ne dättere, känenkri kukwe ye mikanintbe kwe, bti ükani kaibe tiebe kwe, <sup>26</sup> akwa nitre Ngöbö kukwei niekä käkwe tärä tikani abko köböire Ngöbö nena mike gare nie, ye abko Ngöbö nünanka kärekäre käkwe mikanintbe kore, erere namani bare. Ne aise te mtare nitre ñakare israelitare kä jökräbti temen, ie Ngöbökwe kukwe tiebe ye mikani gare kuin amne niaratre käkwe Ngöbö kukwei mikadre era, käkwe tödekadre Jesubti amne mikadre täte kwetre, abkokäre mikani gare ietre. <sup>27</sup> Ne aise te, Ngöbö itibe töbtä ye aibe raba mikani ütiäte kri kärekäre Jesukristo köböire. Abko kore se. Amen. Ne ngörä.

---

\* <sup>16:24</sup> Kukweta tikani corcheta ngätäite ñan tä tikani manuscrito bäri kuinkuinbtä.

## Tärä Tikani Käne Pablokwe Nitre Corintobokrä 1 Corintios

Pablo nämane sribire juta Efesote angwane, niarakwe tärä ne tikani nitre tödekaka Jesubti nünanka juta Corintote ye kräke. Pablo näire juta Corinto ye abko juta bäri ütiäte käkä Grecia ye känti. Ni mili 650 nämane nüne yete amne nitre ye ngätäite abko ni mili 400 abko ni klabore ni mdakwe. Pablo ara käkwe kukwe kuin Jesubtä diribare käne juto Corinto yete abko tä tikani Hechos 18.1-21 yebtä.

Pablokwe tärä ne tikani, ñobtä ñan angwane ni iti kädian nämane Cloé abko mräkä nükani basare Pabloye juta Efesote angwane, nitre tödekaka Jesubti nämane ja kwete krübäte Corinto yete amne ni kwati nämane kukwe nuene diän diän abko niebare kwe Pabloye. Erere arato, nitre tödekaka Jesubti Corinto yete käkwe tärä juani Pabloye angwane, kukwe ngwianintari kwetre ie, ye abko Pablo tö namani kukwe ye kain ngäbti, aisetet tärä ne tikani kwe nitre tödekaka Jesubti nünanka Corinto töi diankäre amne die mikakäre.

Kukwe kwati abko, juta Corinto yete ni kwati nämane ngöbö ngwarbe mike ütiäte jae. Nitre tödekaka Jesubti ngämi tödeke Jesubti, känenkri niaratre nämane ngöbö ngwarbe keta kabre mike ütiäte jae, kä nämane jäandrän kämikani ngöbö ngwarbeye abko ngrie kwete ni mda mdabe, ngöbö ngwarbe ye mikakäre ütiäte jae. Kukwe yebtä Pablota blite tärä nebtä.

Erere arato, ju blitakrä ngöbö ngwarbebe, ye känti meri bti kä ngwarbe nämane abko ben nitre brare nämane neme. Ni brare brare käkwe tödekani Jesubti angwane, dre dre nuendre kwetre ñan nämane gare ie, aisetet ni gure gure käkwe nünandre ño amne ni gure ñakare käkwe nünandre ño, yebtä Pablota blite tärä nebtä arato.

Mdakäre abko, ni ruäre nükani gätäre nitre tödekaka Jesubtibe juta Corintote, kä nämane kukwe dirire blo Ngöböbtä abkobtä Pablokwe kukwe tikani arato.

### *Pablota köbö kuin juen*

<sup>1-2</sup> Ti Pablo käta köbö kuin juen munye ti mräkä Sóstenebe. Ngöbö tö namani ti mikai sribire Kristo Jesu kukwei ngwianka, erere ti käräbare kwe. Ngöböta mun gätäkä Jesukristo kähti juta Corintote ye bkäne amne mun ye ie tita tärä ne tike. Kristo Jesu köböire Ngöböökwe mun käräbare jakrä nünakäre deme. Ni kä jökräbti käta tödeke ni Dänkien Jesukristobti, käta ja di kärere ie, ye ben gware Ngöböökwe mun käräbare jakrä. Jesukristo abko ni Dänkien nikwe amne niaratre Dänkien arato. <sup>3</sup> Ngöbö ni Rün nikwe amne ni Dänkien Jesukristo käkwe ja moto mika kuin munkrä amne mun mika nüne jäme kwetre, ie ti tö.

### *Pablota kuin niere Ngöböye kräke*

<sup>4</sup> Ja mräkätre, käre tita kuin niere Ngöböye munkrä, ñobtä ñan angwane Ngöböökwe ja moto mikani kuin munkrä Kristo Jesu köböire. <sup>5</sup> Ngöböökwe mun mikani ja di bkäne bätäkä ngwarbe krörö ja moto kuinbti: ja di biani kwe munye angwane, ütiä käräbare ñakare kwe munye, käkwe mun mikani dite blitakäre bätäkä ngwarbe niara kukweibtä amne mun mikani töitä kukwe bätäkä ngwarbeitbä kwe. <sup>6</sup> Ngöböökwe ja di biani kri kore munye, ñobtä ñan angwane kukwe kuin Kristobtä diribare tikwe, ye rabadre era mun kräke, ie Ngöbö tö namani, aisetet ja di biani kri kore kwe munye. <sup>7</sup> Ngöböökwe ja di biani kore munye, aisetet mutta ni Dänkien Jesukristo köböi ngibiare ngäbti angwane, mutta Ngöbö die mdei nike ñakare mda. <sup>8</sup> Jesukristo jatadita, ye näire mun ñan rabadre ngite niara ngwärekri, abkokäre Ngöböökwe mun mikadi nünenkä dite jabtä niara ngibiare ngäbti. <sup>9</sup> Ngöböta kukwe niere, erere tä mike täte metre jökrä. Ngöbö ye mden käkwe mun käräbare nüne kuin ketetibe ja Odei Jesukristo ni Dänkienbe.

*Ñan rüdre jabe kwärikwäri*

<sup>10</sup> Ti mräkätre, ni Dänkien Jesukristo käbti ti tö kukwe ne ribei kisere munye abko nere: Kukwe jökrä rükabti ruäre mun jökräye, munkwe ñan ja diandrekä jenena amne munkwe nünandre jäme jabe kwärikwäri abkokäre. Erere arato, munkwe töbikadre ja kwrere jökrä amne ja rabadre ruen ja kwrere jökrä munye, kákwe ja töi mikadre ja näre jökrä, abkokäre kukwe jökrä rükabti ruäre mun jökräye. <sup>11</sup> Ti mräkätre tikwe, monta ja rüere kwärikwäri abko Cloé mräkä rükaba kukwe ngwena tie, ye mdentä tita kukwe ne niere munye. <sup>12</sup> Monta ja rüere krörö tita niere: mun ruäre käta niere: ¡A! Tita nekete Pablokri. Mun ruäre abko käta niere: Tita nekete Apolokri, amne mun ruäre abko tä niere: Tita nekete Pedrokri, amne mun ruäre abko käta niere: Tita neke Kristokri. Abtä monta ja rüere, nieba kwetra tie.

<sup>13</sup> Yebtä abko ti tö kukwe ngwiaintari munye. Monta ja denkä jene jene ni mdakri, ¿ye kwrere Kristota ya? ¡Ñakare! ¿Ti Pablo ne metani krusobtä mun kräke ya? ¡Ñakare! ¿Mun ngökani ñöte ti Pablo ne käbti ya? ¡Ñakare jire! Ne aisetet i ñakare ütiäte abkokri monta ja denkä jene jene. <sup>14</sup> Tikwe Crispo amne Gayo aibe ngökaba ñöte, nebti mun mda mda tikwe ngökaba ñakare ñöte. Yebtä tita kuin niere Ngöböye, <sup>15</sup> ñobtä ñan angwane ye kwrere mun ngökani ñöte ti käbti mun ñan rabadre niere jire chi bikakäre kri. <sup>16</sup> ¡An! Tikwe Estéfanas mräkä aibe ngökaba ñöte arato, yebti tikwe ni mda mda ngökaba ñakare ñöte ruen tie. <sup>17</sup> Tikwe ni mda mda ngökaba ñakare ñöte, ñobtä ñan angwane Kristokwe ñan ti juani ni mda mda ngökakäre ñöte, akwa bäri ti juani kukwe kuin jabtä niere kwe. Erere arato, ñan ti juani kwe kukwe kuin Jesubtä niere nuäre nuäre bikakäre töbtä, ñobtä ñan angwane tikwe blitadre kore angwane, Kristo krütani krusobtä nikrä dirita tikwe abko kukwe di kri ni diantarikrä abko tikwe bärä mikadre ütiäte ñakare mun okwätä aisetet, ye ngäniene tikwe ñan blitaba kore.

### Kukwe töbtä Ngöböökwe ñakare ja kwrere kukwe töbtä ni kä nebtäkwe

<sup>18</sup> Nire nire tä nüne Ngöbö rüere, abtä tä nianinte abko kräke Jesu krütani krusobtä diantarikäre, ye abko tä nebe tuen kukwe ngwarbe kwrere ietre; akwa nire nire rabai dianintari abko kräke Jesu krütani krusobtä ni diantarikäre, ye abko kräke kukwe kuin, ñobtä ñan angwane kukwe ye abko Ngöbö di kri ni diantarikrä abko garera nie. <sup>19</sup> Ngöbö Kukwei arato käta niere ja kwrere abko krörö:

Nitre töbtä abko tikwe töi juandi ngwarbe jökrä, amne nitre töi ngitiekä krikri ñan rabadi töi ngitiekä mda, aisetet ni töbtä kri riadikä jökrä, Isaías 29.14  
abko Ngöbö Kukwei tä niere nitre bikaka töbtä yebtä.

<sup>20</sup> Kore ye ngwane, ¿ni töbtä era metre tärä ya? amne, ¿Kukwe Biani Ngöböökwe Moiséye dirikätre era metre tärä ya? amne, ¿ni töbtä era metre ja kwetaka kukwe kä nebtä btä abko tärä ya? ¡Ñakare jire! Kukwe dirita ni yekwe bärä töbtä, akwa era metre kukwe ye abko kukwe ngwarbe abko Ngöböökwe mikani gare, <sup>21</sup> ñobtä ñan angwane ni bikaka töbtä töbtä, ie Ngöbö ñan nükani gare rabakäre dianintari ja töi jenbti. Ye abko, Ngöbö bäri töbtä era metre tö namani dre dre nuein abko erere kukwe mikanintbe kwe. Akwa kukwe kuin Jesubtä diribare nunkwe abko tä nebe tuen kukwe töbtä ñakare kwrere ni bikaka töbtä töbtäye, akwa kukwe yebti nire nire tä tödeke Jesubtä abko tä nebe dianintari. <sup>22</sup> Nitre israelita töta nebe sribi kri ñan tuabare tuai Ngöbö diebti amne nitre ñakare israelitare abko tä näin kukwe töbtä töbtä jiebti. <sup>23</sup> Akwa Kristo müre ketani krusobtä ni diantarikäre, ye abko nunta näin mike gare ni jökräye. Akwa ye tä nebe mate tare nitre israelitabtä amne nitre ñakare israelitare abko ie tä nebe tuen kukwe ngwarbe kwrere. <sup>24</sup> Akwa Kristo müre ketani krusobtä ye köböire Ngöböta ja di kri amne ja töi töbtä kri ye mike tuare, ye abko tä gare metre nitre israelita amne nitre ñakare israelitare käräbare Ngöböökwe rabakäre dianintari yeye. <sup>25</sup> Kukwe kuin Ngöböökwe Jesubtä tä nebe tuen kukwe töbtä ñakare kwrere ni bikaka töbtäye, akwa kukwe kuin Jesubtä ye abko bäri töbtä kukwe jökrä ükaninte kä nebtä bti ta. Erere arato, kukwe kuin Ngöböökwe Jesubtä tä nebe tuen ngwarbe, di ñakare nitre bikaka töbtäye, akwa kukwe ye abko bäri dite ni jökrä dite dite kä nebtä bti ta.

<sup>26</sup> Ti mräkätre, Ngöböökwe mun käräbare jakrä angwane, mun nämane ño, yebtä töbikadre munkwe, ñobtä ñan angwane ni töbtä kä nebtä, ye kwrere mun kwati ñakare töbtä kri. Erere arato, mun kwati ñakare di krikri gobran kwrere. Erere arato, mun kwati ñan därebare ni ütiäte krikri mräkäkri. <sup>27</sup> Akwa Ngöböökwe ni töi ñakare mun kwrere dianinkä jakrä ni töbtä bä mikakäre ngwarbe. Erere arato, ni di ñakare kä nebtä mun kwrere abko Ngöböökwe dianinkä jakrä, ni dite krikri bä mikakäre ngwarbe. <sup>28</sup> Erere arato, ni tuen ngwarbe, ütiäte ñakare jire mun kwrere abko Ngöböökwe dianinkä jakrä, ni ütiäte töbtä kä nebtä mikakäre ngwarbe. <sup>29</sup> Ne kwrere ni ñakare jire iti, abko ie ja rabadre ruen ütiäte abtä Ngöböökwe mikadre metre ja ngwärekri, abkokäre Ngöböökwe ni mun kwrere dianinkä jakrä. <sup>30</sup> Akwa Ngöbö ara jire kákwe mun mikani ketetibe Kristo Jesube amne Ngöbö ara kákwe Kristo mikani kukwe töbtäre nikrä abko krörö: Kristo köböire ni ñakare ngite mda ja ngwärekri Ngöböta niere nibtä amne Ngöböta ni kaen ngäbti amne nita tuen deme niara ngwärekri amne tä ni tikete kukwe kämenbtä arato. <sup>31</sup> Ne aisetet, Ngöbö Kukwei käta niere, kwrere nikwe töbikadre abko krörö:

Nire nire tö ja käkitaikä au kákwe ni Dänkien Ngöbö käkitaka jirekäbe, *Jeremías 9.24*  
ye abko tä tikani kore Ngöbö Kukweibtä.

## 2

<sup>1</sup> Ti mräkätre, Ngöbö kukwei kuin Jesukristobtä, yebtä ti janama blite munbe angwane, ñan tikwe blitaba kukwe töbtä töbtäbti amne ñan tikwe blitaba kukwe nuäre nuärebsi ni töbtä kwrere ja mikakäre ütiäte mun okwätä, <sup>2</sup> ñobtä ñan angwane ti näma mun ngätäite yete angwane, Jesukristo müre ketani krusobtä ni diantarikäre, ye aibebtä tikwe ja töi mikani blitakäre munbe. <sup>3</sup> Akwa ti näma mun ngwärekri yete angwane, ti di rababa ñakare amne, kä jürä rababa kri tibtä amne ti rababa grükekä jökrä ngrabare. <sup>4-5</sup> Akwa munkwe tödekadre Jesubti Ngöbö Üai di kri köböire amne ñan munkwe tödekadre kukwe töbtä töbtä nuäre nuäre ni töbtäkwe yebti, abkokäre kukwe kuin Jesubtä, yebtä tikwe blitaba munbe. Angwane ñan kukwe töbtä töbtä nuäre nuäre, bti tikwe blitaba munbe mun töi kwitakäre Ngöbö kukwäre, akwa Ngöbö Üai di kri ara jire bti tikwe kukwe kuin Jesubtä mikaba gare metre mun okwätä.

### Kukwe töbtä Ngöböökwe tä nüke gare Ngöbö Üai köböire

<sup>6</sup> Akwa ni tödekkaka Jesubti ünän ünän Ngöbö Kukweibtä ne ben nita kukwe töbtä era metre mike gare, akwa kukwe ye abko ñan kukwe töbtä kä nebtä kwrere. Erere arato, ñan kukwe mikani ütiäte ni ütiäte ütiäte kä nebtäkwe, btä tita blite. Ni ye abko kitera niken ta. <sup>7</sup> Akwa kukwe kuin töbtä Jesukristobtä mikani gare nunkwe abko nämane ükani kaibe tiebe Ngöböökwe, akwa mtare mikanina gare kwe nie. Ngöbö ngämi kä ne dätere, känenkri niarakwe kukwe ye mikanintbe ni tödekkaka Jesubti mikakäre ütiäte kri jabe gwaire. <sup>8</sup> Kukwe ne mden abko nitre gobranka kä ne ngwane, ie ñan nükani gare, ñobtä ñan angwane rükadre gare ietre, ye ngwane ni Dänkien bä nuäre kri ñan müre ketadre kwetre krusobtä. <sup>9</sup> Yebtä Ngöbö Kukwei käta niere krörö:

Jändrän ñan tuabare ni mdakwe amne, ñan kukwe nuabare ni mdakwe amne, ñan töbikabare btä ni mdakwe,  
ye abko Ngöböta ükete ni niara tarekä tarekä kräke, *Isaiás 64.4*  
abko nieta Ngöbö Kukweibtä.

<sup>10</sup> Ni Ngöbö tarekä tarekä, ie Ngöböökwe jändrän ye mikani gare ja Üai köböire, ñobtä ñan angwane kukwe kaibe tiebe Ngöböökwe abko tä gare jökrä Ngöbö Üaiye, aisetet Ngöbö Üai kákwe jändrän Ngöböökwe mikani gare nie. <sup>11</sup> Ye abko, nita töbika ño kaibe, ye gare kaibe nie, akwa ni mdaye gare ñakare. Ye kwrere arato, Ngöbö töi ño, ye gare kaibe Ngöbö Üai aibe ie, aisetet Ngöbö Üaikwe kukwe tiebe Ngöböökwe mikani gare nie.

<sup>12</sup> Akwa Ngöböökwe ja Üai biani nie angwane, ñan biani kwe kukwe kä nebtä mikakäre gare nie, akwa ja moto kuinbti Ngöböökwe jändrän kuin biani nie, ye abko rükadre gare nie, abkokäre Ngöböökwe ja Üai biani nie. <sup>13</sup> Amne jändrän kuin biani nie Ngöböökwe, yebtä nunta blite. Ne ñan kukwe ükaninte ni töbtäkwe, btä nunkwe ja tötitikani au, bti

nunta blite jäandrän Ngöböökwebtä, akwa Ngöbö Üai tä dre niere, ye erere nunta mike gare Ngöbö Üai köböire. <sup>14</sup> Ye abko, nire nire btä Ngöbö Üai ñan tä nüne abko ñan tä kukwe diribare Ngöbö Üaikwe kaen ngäbti, ñobtä ñan angwane kukwe töbtä ñakare kwrere tuen ietre. Erere arato, kukwe diribare Ngöbö Üaikwe ñan tä nüke gare ietre, ñobtä ñan angwane kukwe ye abko tä nüke gare Ngöbö Üai aibe köböire nie. <sup>15</sup> Akwa ni btä Ngöbö Üaita abko ie jäandrän kabre Ngöböbtä tä nüke gare, aisetet ni ye abko di tärä töi ngitiekä jäandrän kabrebtä akwa, nire nire abko btä Ngöbö Üaita ñakare abko di ñakare kukwe niere jire ni jen Ngöböökwe rüere, <sup>16</sup> ñobtä ñan angwane Ni Dänkien Ngöbö töi ño gare ñakare nie, aisetet ni di ñakare niara töitikakrä, *Isaías 40.13* abko Ngöbö Kukwei käta niere.

Akwa Ngöbö Üaita nüne ni nitre tödekaka Jesubti btä, aisetet Kristo töi ño abko tä nüke gare nie.

### 3

#### *Pablota mäträre nitre Corintobobtä*

<sup>1</sup> Ti mräkätre, tikwe blitaba munbe angwane, ni ünän ünän Ngöbö Kukweibtä tä kä bien Ngöbö Üaiye ja jie ngwianka, ben blitadre ño, ye kwrere tikwe blitaba ñakare munbe. Akwa ni tä kä bien ñakare Ngöbö Üaiye ja jie ngwianka metre, ben blita ño, kwrere jire tikwe blitaba Kristobtä munbe. Erere arato, ngäbäkre kiakia ben blita ño, kwrere jire tikwe blitaba Kristobtä munbe. <sup>2</sup> Ngäbäkre kiakia tä kian aibe duen amne ñan raba mrö ribi ribi kwete, ye kwrere jire kukwe taretare Kristobtä, yebtä ñan tikwe blitaba munbe amne kukwe nuäre nuäre, btä tikwe blitaba munbe, ñobtä ñan angwane kukwe taretare ni ünän ünän Ngöbö Kukweibtä kräke, btä tikwe blitadre munbe abko ñan rükadre gare munye rababa tuen tie. Ye kwrere mtare kukwe taretare, btä ti ñan raba blite munbe, <sup>3</sup> ñobtä ñan angwane munta kä bien ñakare Ngöbö Üaiye ja jie ngwiankrä abko erere mun tä nüne mtare. Ye mdan kisete, mun tä mokrere amne mun tä ja rüere jabe kwärikwäri, ye abko ñunta kä bien ñakare Ngöbö Üaiye ja jie ngwiankrä ya ño yere? Ni mda mda, ie Ngöbö gare ñakare tä töbike, kwrere jire mun tä töbike. <sup>4</sup> Ne aisetet mun tä niere krörö: Tita nekete Pablokri, nieta ni ruärekwe. Ni mda abko käta niere: Tita nekete Apolokri, abko kore mun tä ja kwete kore kwärikväri ne ngwane, ni mda mda, ie Ngöbö gare ñakare tä töbike, kwrere jire mun tä töbike.

<sup>5</sup> ¿Akwa yebti abko Apolos abko ütiäte ya? ¿Amne ti Pablo abko ütiäte ya? ¡Ñakare! ñobtä ñan angwane nun abko sribikä jirekäbe Ngöböökwe. Nun ne mdan kákwe kukwe diribare munye, köböire munkwe tödekani Jesubti amne, nun Dänkienwe sribi ño ño mikani nun itire itire kisete, ye aibe nunta nuene krörö: <sup>6</sup> Mun abko tire Ngöböökwe kwrere. Tikwe Ngöbö Kukwei nieba munye, ye abko nura nökata kwrere namani munbtä amne, Apolos abko ñö metakaka nurabti kwrere nükani kukwe dirire munye. Akwa Ngöbö ara jire abko kákwe ja kukwei mikani niren munbtä. <sup>7</sup> Ne aisetet ni nura nökaka amne ni ñö metakaka nurabti abko sribikä ja kwrere. Akwa Ngöbö abko käta nura mike niren, aisetet Ngöbö aibe ütiäte. <sup>8</sup> Ni nura nökaka amne ni ñö metakaka nurabti abko sribi ketetibe kwetre, akwa ni itire itire käta sribire ño, ye erere Ngöböökwe ütiä biandi jene jene nie. <sup>9</sup> Ne aisetet, nun abko sribikä jen Ngöböökwe amne nunta sribire munbe, akwa mun abko tire Ngöböökwe, aisetet munkwe ñan nun mika ütiäte amne mun ñan reketa nunkri.

Erere arato, mun abko ju Ngöböökwe amne, <sup>10</sup> ti abko ni töbtä ju mikabtä kwrere. Ja moto kuinbti Ngöböökwe ja di biani tie. Di yebti ürä kä te ruäre, ye tikwe mikani käne ju mikakrä, erere tikwe ju kömikani kore. Ju kömikani tikwe, ürä yebti ni mda mda tä ju mike janknu mda. Akwa ni itire itire käta ju mike ño, ye kákwe sribidre era metre, <sup>11</sup> ñobtä ñan angwane ürä krati nökanina tikwe kä te ruäre ju mikakrä ye abko Jesukristo ara. Yebti ni ñan raba ürä mda nökö jire. <sup>12</sup> Ürä mikanina jukrä, yebti ni rabadre oro, plata, amne já ütiäte ütiäte mike jure, ye abko nita kukwe dirire metre Jesukristobtä kwrere. Erere arato, kri kukwän, mikä amne trärä ni raba mike jure arato,

ürä nökanina yebti, ye abko kukwe bä töbtä aibe dirita ni mda mdakwe mun ngätäite ye kwrere. <sup>13</sup> Akwa Ngöbökwе kukwe ükadite ni jökrä kräke kä mrä, ye näire abko nikwe sribibare ño abko gadi era metre jökrä, ñobtä ñan angwane Ngöbö jatadi ñukwä kwrere angwane, ni itire itire kákwe sribibare kuin ya, ñakare ya abko rabadi gare Ngöbö diehti, <sup>14</sup> aise te ni itire itire kákwe jändrän mikani jure ñan rukwadre ne ngwane, Ngöbökwе ütiä biandi ie. <sup>15</sup> Akwa kukwe diribare blo, kákwe jändrän blo blo mikani jure ye rukwadre ne ngwane, sribi kwe rikadi ngwarbe kän. Angwane ni iti käta ngitie ñukwä ngäniene, käta kwäräbere, ye kwrere kwäräbedi kwe amne rabadi dianintari, akwa sribi kwe abko rukwadi kän.

<sup>16</sup> ¡Akwa mun abko ju Ngöbökwе amne Ngöbö Üaita nüne munbtä, ye gare ñakare munye ya ño amarebti ye! <sup>17</sup> Ne aise te nirekwe mun mikadre ja denkä jene jene abko erere ju Ngöbökwе ye juandre ngwarbe kwe Ngöböökän, ni ye abko Ngöbökwе juandi ngwarbe arato, ñobtä ñan angwane ju Ngöbökwе abko deme amne ütiäte kräke amne mun abko ju Ngöbökwе ye ara.

<sup>18</sup> Munkwe ñan ja ngöka krörö au: Mun mden mden, ie ja ruen töbtä kukwe kä nebtäti kákwe ja töi kwita amne munkwe ja mikata ni töbtä ñakare kwrere angwane, mun rabadi töbtä era metre Ngöbö ngwärekri. <sup>19</sup> Munkwe nuendre kore, ñobtä ñan angwane kukwe tuen töbtä nitre kä nebtäye, ye tuen töbtä kri munye, akwa kukwe ye abko töbtä ñakare Ngöbökrä. Ye aise te Ngöbö Kukwei btä nieta krörö: Nitre tä bike töbtä käta kukwe ükete bätäkä ngwarbe, kukwe ye arabe Ngöböta kiteta niaratre dokwäbtä mikakäre ngite. <sup>20</sup> Erere arato nieta: Kukwe tuen bări töbtä ni kä nebtäye, abkobtä ni töbtä töbtä tä töbike, ye abko kukwe ngwarbe, ütiäte ñakare gare kuin ni Dänkienye, nieta Ngöbö Kukweibtä. <sup>21</sup> Ye mden kisete, munta nire nire mike ütiäte jae, yebti munkwe ñan bikadre kri, ñobtä ñan angwane mun tärä jändrän jökrä bkäne amne jändrän jökrä abko munkrä abko krörö: <sup>22</sup> Ti Pablo amne Apolos amne Pedro, nun abko Ngöbökwе biani munye sribikäre mun die mikakrä, aise te nun abko munkwe. Erere arato, kä temen, te munta nüne abko mun die mikakrä amne, munta nüne angwane jändrän jökrä ye abko munkwe amne, mun krütadre angwane, mun tädi jändrän jökrä bkäne janknu. Mdakäre abko, dre dre tä nakenkä mtare amne dre dre rakadrekä köbö mdabti ye abko mun die mikakrä arato. <sup>23</sup> Ye kwrere jändrän jökrä abko munkwe amne mun abko Kristokwe amne Kristo abko Ngöbökwе.

## 4

*Nitre Jesu kukwei ngwianka*

<sup>1</sup> Ye abko, nun Jesu kukwei ngwianka abko sribikä jirekäbe Kristokrä amne, kukwe nämane kaibe tiebe Ngöbökwе Kristobtä, ye abko Ngöbökwе mikani nun kisete dirikäre ni mda mdaye, aise te nun abko sribi ye nuenkä munkwe nütü kore nunbtä. <sup>2</sup> Akwa jändrän mikata ni kisete sribikäre kore angwane, ni yebti bkänkäta tödeke abko bă mikadre kwe jabtä. <sup>3</sup> Akwa munkwe töbikadre ño tibtä amne sribi tikwebtä amne, ni mdakwe töbikadre ño tibtä, ye abko ñakare bări ütiäte tikrä. Erere arato, ti ara käta töbike ño jabtä au, ye ütiäte ñakare tikrä arato. <sup>4</sup> Ti ne abko, ie ja ruen ngite ñakare, akwa ñan ti töi metre jökrä tita niere, akwa ti Dänkien aibe kákwe ti ngite ya ño niedre tibtä abko tita niere. <sup>5</sup> Ne aise te munkwe ñan töbika jire ni mda riüere kitakäre ngise kä ne ngwane, akwa kukwe rükaninte tiebe nikwe amne ni töi ño ño, ye ni Dänkien jatadita angwane mikadi gare jökrä kwe, aise te ye ngibia munkwe angwane, kä mrä ni itire itire kákwe dre dre nuenbare abkobtä Ngöbökwе kukwe ükadite kräke, ye abko ngibia munkwe.

<sup>6</sup> Ti mräkätre, tita kukwe ne tike kore Apolobtä amne jabtä mun die mikakäre, munkwe ja tötitikadre nunbtä angwane, kukwe krörö nieta ni kwatikwe rükadre gare metre munye: Kukwe tä tikani Ngöbö Kukweibtä, ye aibe mikadre täte munkwe. Munkwe kukwe ye mikadre täte ne ngwane, ja ñan rabadre ruen bări kri ni mdabtä, kákwe ni iti mikadre ütiäte amne ni mda abko mikadre ngwarbe. <sup>7</sup> Munkwe ñan bikadre kri ni

mda mdabtä, ñobtä ñan angwane jnirekwe mun mikani bari ütiäte ni mda mdakrä? Mun abko ja kwrere ni mda mdabe. jAmne jäandränta munkwe, ye mden abko Ngöböökwe biani ñakare munye? Jäandrän jökrä munkwe abko Ngöböökwe biani munye, jye ño abko nükani ja di jenbti munye, munta nütüre!

<sup>8</sup> Jäandrän ie mun töta nebe, erere nena jökrä munkwe amne mun nena jäandrän Ngöböökwe bkäne kabre amne mun nena jreire kaibe Ngöböbe munta nütüre jabtä, aisetet nun Jesu kukwei ngwiankatre abko ngwarbe, ütiäte ñakare ruen munye. jMun rabadre jreire bkänä näre, ye rabadre bari kuin nunkrä, ñobtä ñan angwane nun rabadre jreire munbe siba! Akwa ñakare kore. <sup>9</sup> Akwa bäsni ngite ütiäte ñakare mikani kämikadre, ye jäta niken ngite mikata mrä köre, kwrere jire Ngöböökwe nun Jesu kukwei ngwianka mikani abko ruen tie. Amne bäsni mikani kämikakäre, kwrere jire nunta angeletre okwäbti amne ni jökrä okwäbti, tuen kore tie.

<sup>10</sup> Mdakäre abko, sribbtä Kristokrä nunta nebe tuen töi ñakare ni mda mdaye, akwa munta ketetibe Kristobe, aisetet jata nebe tuen töbtä munye. jNun abko di ñakare, akwa mun abko dite dite tä nebe ruen munye! jMun mikata ütiäte akwa, nun abko mikata ütiäte ñakare! <sup>11</sup> Mekera abti kä nüke mtare, nunta mrö nika. Nun Jesu kukwei ngwianka tä tomna nika amne dän ngututure chekacheka nunkwe. Nun mikata ene ja kisete ni mdakwe amne ju ñakare jen nunkwe. <sup>12</sup> Erere arato, nunta neme dräre sribire ja kise jenbti mrökrä jae. Ni mda mda tä ñäke taretare nunye, akwa nunta ja di kärere kräke Ngöböye. Sribbtä Jesukrä nun rüe tä näin kisere nun jiebti, akwa nunta neme kwekbe jirekäbe. <sup>13</sup> Ni mda mda käta kukwe känene ngwarbe nun rüere akwa, nunta kukwe kaen ngäbti ja moto kuinbti. Erere arato, jäandrän käme kitakata, kwrere jire nunta nebe tuen ni mda mdaye abti kä nüke mtare.

<sup>14</sup> Tita tärä tike kore munye, ye abko ñan mun rabadre ja gaire abkokäre tita tike, akwa mun tare kri tikwe, aisetet ngäbäkre nikwe btä mäträta, ye kwrere tita mäträre munbtä, <sup>15</sup> ñobtä ñan angwane nane mun tödekaka Jesubti, kräke ni rabadre mili krä jätä dirikäre Kristobtä munye, akwa ni mun rün kwrere abko ñakare mda. Ti ara käkwe kukwe kuin Jesubtä mikani gare käne munye, ye köböire mun nikani nüne ketetibe Kristo Jesube angwane, ti ne aibe mun rün kwrere. <sup>16</sup> Ye aisetet tita nüne ño, ye kwrere munkwe nüna abko tita ribere kisere munye. <sup>17</sup> Ne aisetet, ti ngobo tare tikwe ni Dänkien käbti Timoteo tä näin metre ni Dänkienbe abko tikwe juanba nebe mun känti yete. Tita nüne ño Kristo Jesu ngwärekri, ye kwrere tita nünamna ni mda mdaye kä ketareketare temen nitre gätäkä Jesu käbtiye, ye abko Timoteokwe mikadita töre munye, abkokäre tikwe juanba.

<sup>18</sup> Akwa mun ngätäite yete abko, ti ñan rikadreta jire ni ruäre tätre nütüre, aisetet tä jäme amne tä bike krikri. <sup>19</sup> Akwa ti rikadreta basare munye yete, ie ti Dänkien tö ne ngwane, bär jötröra ti näin nebe mun känti yete. Ye ngwane, nire nire ie ja ruen bari ütiäte krikri abko käta ñäke, akwa Ngöbö di tärä kri ni yebtä ya tikwe tuadi, <sup>20</sup> ñobtä ñan angwane ni bti Ngöböta gobrane ye ngätäite kukwe nuäre nuäre jirekäbe abko ñakare ütiäte akwa, Ngöbö di krita nibtä ye abko ütiäte. <sup>21</sup> Ye abko, jti rikadre ño nebe mun känti, ie mun tö? jTi rikadre romone mäträkäre munbtä, ie mun tö ya? o jti moto jäme, bti ti rikadre nebe, ie mun tö ya?

## 5

### *Ni iti nämane meyekrä mike jabe abko juandretari*

<sup>1</sup> Ti mräkätre, mun ngätäite yete nita iti abko meyekrä rünbe tä mike jabe abko tikwe gaba. Nitre tödekaka ñakare Jesubti käta kukwe käme diän diän ye kwrere nuene ñakare jire abko erere nuenta mun ngätäite yete. <sup>2</sup> Yebtä mun moto rabadrera ulire amne ni kukwe käme nuenä meyekräbe kore tä mun ngätäite, ye juandretarira ja ngätäite munkwe, akwa mun abko tä bike krikri jirekäbe, ñobtä ñan angwane munta nekete bari ja ken Ngöböökri, aisetet kukwe käme kore abko ñan tä mun mike ngite Ngöböye abko munta nütüre jabtä. <sup>3</sup> Tita ñakare ketetibe munbe yete akwa, ti töi abko tä ketetibe munbe,

aisete tita ketetibe munbe kwrere käkwe kukwe ükatebara ni kukwe nuenä käme kore btä. <sup>4</sup> Ne aisetet munkwe gätädi Jesu kähti angwane, ti töi tä ketetibe munbe, erere arato ni Dänkiens Jesu die tädi munbe angwane, <sup>5</sup> ni kukwe nuenä käme meyekräbe ye munkwe mika gare Satanaye, niarakwe ja tare nikadre kri, akwa mrä Jesu jatadita angwane, niara üai rabadre dianintari abkokäre munkwe mika gare Satanaye.

<sup>6</sup> Tita niere kore, ñobtä ñan angwane mutta bike krikri btä, akwa ye abko käme. Lebadura abko käta kukwe käme bä mike, aisetet lebadura mikata chi arinante abko tä niken jökrä arinante ta. <sup>7</sup> Ni kukwe nuenä käme ye abko lebadura kwrere, käkwe mun töi mikadre käme jökrä. Ye ngäniene munkwe ni ye juantari mento angwane, arina btin mikata sribedre banre, te lebadura ñakare, ye kwrere mun rabadi deme. Akwa era metre mun nena arina btin kwrere, ñobtä ñan angwane kordero Pascuakrä kämikata ni ngite diankakäre, ye kwrere Kristo krütanina ni ngite diankakäre nibtä, aisetet niara abko Kordero nikwe. <sup>8</sup> Pascua näire abko ju kwatirekwatire, känti arina te lebadura tä gwi, ye abko kitakata jire jökrä ju bäre, ye kwrere kukwe käme diän diän ye nikwe ñan tuadremetre ja ngätäite, ñobtä ñan angwane Kristo krütanina nikrä, akwa nikwe nünandre era metre amne ñan nikwe ni mda ngökadre angwane, ni rabadi arina btin kwrere.

<sup>9</sup> Mdakäre abko, tikwe tärä mdara jire tikaba munye, btä tikwe nieba krörö munye: Ni merire brare bti kä ngwarbe, ye tä ja mike gure bati bati abko ben munkwe ñan ja getadre jire, tikwe nieba. <sup>10</sup> Akwa ye abko, ñan ni tödekaka ñakare Jesubti abkobtä tikwe tärä tikaba kore munye amne, ñan ni jäandrän jenena ribekä jae amne ñan nitre ni ngökö amne ñan nitre jäandrän ngwarbe mikaka ngöböre jae abkobtä tikwe tärä tikaba kore munye. Ñan tikwe tärä tikaba ni korekorebtä, ñobtä ñan angwane ni korekore tödekaka ñakare Jesubti, ben munkwe ñan ja getadre ne ngwane, munkwe ñan nünandre kä nebtä mda niaratre ngätäite. <sup>11</sup> Akwa nitre tödekaka Jesubti tä niere, akwa tä kukwe nuene kämekäme, käta ja mike gure bati bati, tä jäandrän jenena ribere jirekäbe jakrä, tä jäandrän ngwarbe mike ngöböre jae, tätre kukwe känene ngwarbe ni mda mda rüere amne, tä dröbare amne tä gore, ni ye kwrere abko ben munkwe ñan ja getadre amne nin munkwe mrödre jire ketetibe ben abko tikwe nieba munye. <sup>12-13</sup> Ni ñakare tödekaka Jesubti abko kräke ñan titi kukwe ükatekä. Ngöböökwe kukwe ükadite bentre. Akwa nitre tödekaka Jesubti tä mun ngätäite, kräke mun nena kukwe ükete, aisetet ni kukwe käme nuenä meyekräbe, ye munkwe dianka mento ja ngätäite yete.

## 6

*Nitre tödekaka Jesubti ñan rikadre ja ngwena kritoboye*

<sup>1</sup> Kukwe mda btä ti tö nibi blitai munbe arato. Kukweta neme ja rüere kwärikwäri munkwe angwane, kritobo tödekaka ñakare Jesubti, känti mutta nikken ja ngwena, jye ñobtä mun ñan tä nikken kukwe ngwena jirekäbe nitre tödekaka Jesubtiye ükatekäre jakrä ja ngätäite amarebti se! <sup>2</sup> Kä mrä angwane, nitre tödekaka Jesubti käkwe kukwe ükadite nitre ñakare tödekaka Jesubti yekrä, jye gare ñakare munye ya! ¿Munkwe kukwe ükadite kore ni mda mdakrä amarebti kukwe kiakia tä nakenä kä ne ngwane abko ja ñan nükke töre munye ükete jakrä ye? <sup>3</sup> Mdakäre abko, nikwe kukwe ükadite angeletrekrä arato. ¡Ye aisetet ni di tärä täte kukwe kiakia kä nebtä ükatekäre jakrä! <sup>4</sup> Ye aisetet, jäandrän munkwe btä mutta rüre jabe kwärikväri angwane, nitre tödekaka ñakare Jesubti abko ie mutta nikken kukwe mike ükadrete jakrä, ye kwrere munkwe ñan nuendre jire chi. <sup>5</sup> Mun rabadre ja gaire kri, abkokäre titi kukwe ne niere munye. ¿Ni töbtä tödekaka Jesubti ñakare jire iti mun ngätäite käkwe kukwe ükadrete ja mräkätrekrä ya? Ni töbtä tärä mun ngätäite käkwe kukwe ükadrete ruen tie. <sup>6</sup> Akwa mtare ja mräkä iti tödekaka Jesubti käta niara mräkä Jesu kähti kite ngise kritoboye akwa, ¡kritobo tödekaka ñakare Jesubti ngwärekri mutta nikken ja ngwena kwärikväri!

<sup>7</sup> Mutta rüre jirekäbe jabe kwärikväri, aisetet nane kritobo käkwe kukwe ükadrete kuin makrä, akwa era metre ma ganandre ñakare Ngöbö ngwärekri, ñobtä ñan angwane

munta Jesu mike ngwarbe ni jökrä ngwärekri. Ye abko kukweta neme mun rüere angwane, mun rabadre neme kwekbe jirekäbe abko rabadre bäri kuin. Erere arato, jäandrän goita munkän angwane, mun rabadre neme kwekbe jirekäbe abko rabadre bäri kuin, <sup>8</sup> amarebti mun ara jire käta kukwe nuene käme mun mräkäbtä käta jäandrän goire mun mräkä kän. <sup>9-10</sup> Abtä ti tö mun mikai mokre abko krörö: Jesu jatadita abti Ngöbö rabadi gobrane, ben ni kukwe käme nuenkä ñan rabadi, ye garera munye. Munkwe ñan ja ngökamna, ñobtä ñan angwane Ngöbö rabadi gobrane, ben ni ja mikaka gure batibati ñan rabadre jire. Erere arato, ni jäandrän ngwarbe mikaka ngöböre jae, ni gure akwa tä ja mike gure tiebetiebe ni mdabe amne, ni brare bikaka merire jae kwärikwäri amne ni gokä, ni käbare amne ni dröbaka, ni blitaka ngwarbe ni mda mda rüere amne, ni jäandrän diankaka ni mda mdakän, ye käkwe ñan nünandre kärekäre Ngöböbe. <sup>11</sup> Käne, mun ngämi tödeke Jesubti, känenkri mun ruäre nämane nüne kore, akwa mtare Ngöböökwe mun ngite dianinkära munbtä, käkwe mun mikani jenena nünakäre deme amne metre jakrä amne mun ñakare ngite mda ja ngwärekri niebare kwe munbtä amne mun kani ngäbti kwe ni Dänkien Jesukristo käbti amne Ngöbö Üai Deme köböire.

#### *Nikwe ñan ja mikadre gure batibati*

<sup>12</sup> Mun ngätäite mutta niere: Ti tö rabadre dre dre nuein, ye erere Ngöböta kä bien tie nuene jökrä, mutta niere. Akwa jäandrän jökrä nuendre abko ñakare kuin ni die mikakrä. Ne aisetet, nane ti rabadre jäandrän jökrä nuene, akwa jäandrän nuendre, ye abko ñan tikwe mikadre ja dänkiene. <sup>13</sup> Mdakäre abko, mutta niere: mrö abko ni bülekrä amne ni büle abko mrökrä, mutta niere. Ye abko era, akwa kä mrä angwane, Ngöböökwe mrö amne ni büle juandi ngwarbe jökrä. Akwa ni ngrabare abko ñakare ni büle kwrere. Ni ngrabare abko ñakare ja mikakäre gure batibati, akwa ni ngrabare abko nünakäre metre ni Dänkienkrä amne ni Dänkien abko käta ni ngrabare mike ütiäte jae. <sup>14</sup> Ye abko tä gare nie, ñobtä ñan angwane ja di jenbti Ngöböökwe ni Dänkien mikaninta nire, ye kwrere ni mikadita nire ni ngrabare ben gware, aisetet ni ngrabare ütiäte ni Dänkienkrä gare nie. <sup>15</sup> Mun ngrabare ye abko Kristo kiakia ngrabare ye garera kuin munye, aisetet *¿*Jesu kiakia ngrabare ye abko meri bti kä ngwarbe abko ben mikadre ketetibe ya? *¡*Ñakare jire! <sup>16</sup> Meri bti kä ngwarbe abko ni brare tä mike jabe angwane, niaratre nibu tä neme ni itibe kwrere abko gare kuin nie, ñobtä ñan angwane Ngöbö Kukweita blite ni merire, brare käta ja mike gure yebtä angwane tä niere krörö:

Niaratre ni nibu,

*Génesis 2.24*

ye abko rabadi ni itibe kwrere,  
nieta Ngöbö Kukweibtä, aisetet meri bti kä ngwarbe abko ni brare tä mike jabe angwane,  
niaratre nibu tä neme ni itibe kwrere, ye garera kuin munye. <sup>17</sup> Akwa nita tödeke ni  
Dänkienbti abko ben ni üaita neme ketetibe niara Üaibe.

<sup>18</sup> Ye mdenbtä, meri mden ben mun tö ja mikai gure batibati, ye ngäniene mun gitia, ñobtä ñan angwane kukwe bätäkä ngwarbe btä nita ja mike ngite, ye abko tä ni ngrabare bäre mento, akwa nita ja mike gure batibati, ye abko ja mikata ngite ja ngrabare rüere au. <sup>19</sup> Ye abko mun brare käkwe ñan nuendre jire chi, ñobtä ñan angwane Ngöböökwe ja Üai biani mun itire itireye, aisetet Ngöbö Üaita nüne mun itire itire btä, aisetet mun itire itire abko ju nünankrä Ngöbö Üai Demekwe, *¿*ye gare ñakare munye ya? Ne aisetet mun tö dre dre nuein ja ngrabarebti, ye abko mun ñan raba nuene, ñobtä ñan angwane mun ñakare ja bkänkä au, <sup>20</sup> ñobtä ñan angwane Ngöböökwe mun kökani jakrä, aisetet mun ngrabare amne mun üai, yebti munkwe Ngöbö mika ütiäte.

#### *Ja mikadre gure ya, ñakare ya abkobtä Pablokwe diribare*

<sup>1</sup> Mtare abko, munkwe kukwe ngwianintari täräbti tie, yebtä ti bike mun kukwei kaen ngäbti krörö: Mutta kukwe ngwentari krörö: *¿*Ni brare brare käkwe ñan ja mikadre gure ni mdabe töi kwe rüere abko rabadre bäri kuin ya, ñakare ya? abko mutta ngwentari tie.

<sup>2</sup> Ti abko tä niere krörö: Ni kwati merire brare tä ja mike ngite jabe kwärikwäri mun ngätäite, aisetet ye ngäniene ni brare gure gure kákwe kibia meri jen kwebe. Erere arato, ni merire gure gure kákwe kibia brare jen kwebe. <sup>3</sup> Ye abko, ni brare kákwe ñan ja kábäi merire kwe kän akwa kibiadre kwe ben amne, ni merire kákwe ñan ja kábäi kwäräi kwe kän, akwa kibiadre kwe ben, <sup>4</sup> ñobtä ñan angwane ni merire ñan tä nebe ja ngrabare bkäne au akwa, kwäräi kwe tä nebe niara ngrabare bkäne arato. Erere arato, ni brare ñan tärä nebe ja ngrabare bkäne au akwa, merire kwe tä nebe niara ngrabare bkäne arato.

<sup>5</sup> Ne aisetet ni brare amne ni merire tä jabe, ye kákwe ñan ja kábäi jakän kwärikwäri. Akwa nane mun tö raba kää diainkä jenena blitakäre Ngöböbe, kákwe ja töi mikadre ruäre blitakäre Ngöböbe, ye ngwane mun ñan tö raba kibai jabe ne ngwane, munkwe ñan kibia jabe. Akwa yebti mun rika kibienta jabe, ñobtä ñan angwane nane ja bainbtä jae kwärikwäri Satanakwe mun töi mikadre ja mike ngite. <sup>6</sup> Tita kukwe niere, ne kwrere mun tö nuein ne ngwane, tä dbe akwa ñan tita nuemna munye, <sup>7</sup> ñobtä ñan angwane ni jökrä rabadre kaibe ti kwrere abko rabadre bari kuin, tita nütüre, akwa ni itire itire, ie Ngöböta ja di bien jene jene, aisetet ni jökrä ñan raba neme kaibe ti kwrere.

<sup>8</sup> Mdakäre abko, ni brare batte gure ñakare ya o ni brare kän meri krütani ya amne meri kän brare krütani, kákwe ñan ja mikadreta gure amne, rabadre kaibe ti kwrere, ye rabadre bari kuin ruen tie abko ti tö niei munye. <sup>9</sup> Akwa mun ñan raba neme nuäre nüne kaibe ne ngwane, munkwe ja mikata gure jirekäbe, ñobtä ñan angwane mun ñan tädre neme ngware jirekäbe jabe, ye abko rabadre bari kuin ruen tie.

<sup>10</sup> Mdakäre abko, ni gure gure, ie tita kukwe nuemna krörö, ne abko ñan ti kukwei akwa, ni Dänkien ara jire nämane nüne kä nebtä angwane, niarakwe kukwe nuemna abko krörö: Ni merire kákwe brare kwe tuametre ñakare jire, <sup>11</sup> akwa nane ni merire kákwe brare kwe tuametre ne ngwane, raba kaibe jirekäbe. Akwa tö raba ja mikaita gure ne ngwane, ja mäkäta kwe brare kwebe. Ye kwrere arato, ni brare kákwe merire kwe tuametre ñakare jire abko ti tö niei munye.

<sup>12</sup> Ni mda mda abko, ie ti bike kukwe mda niere. Kukwe ne abko ni Dänkienkwe diribare ñakare btä akwa, tita niere krörö munye: Ni mräkä brare tödekaka Jesubti tä gure ni merire ñakare tödekaka Jesubti ben, akwa meri kwe tö nünai janknu ben ne ngwane, meri kwe ye ñan tuametre kwe. <sup>13</sup> Erere arato, ni mräkä merire tödekaka Jesubti tä gure ni brare ñakare tödekaka Jesubti ben, akwa brare kwe tö nünai janknu ben ne ngwane, brare kwe ye ñan tuametre kwe, <sup>14</sup> ñobtä ñan angwane meri tödekaka Jesubti, ye köböire nane brare kwe ñan tä tödeke Jesubti, ye kákwe tödekadre Jesubti, abkokäre Ngöböökwe mikani jenena jakrä. Erere arato, brare tödekaka Jesubti, ye köböire nane meri kwe ñan tä tödeke Jesubti, ye kákwe tödekadre Jesubti, abkokäre Ngöböökwe mikani jenena jakrä. Ye kwrere ngäbäkre munkwe ñan tä tuer ngite Ngöböye, akwa nane tödekadre kwe Jesubti arato, abkokäre Ngöböökwe mikani jenena jakrä arato.

<sup>15</sup> Akwa nane ni ja kwäräire iti ñan tä tödeke Jesubti abko tö raba ja tuametre ni tödekaka Jesubti ben, ne ngwane ja tuametre kwetre. Munkwe nuendre kore angwane, ni mräkä brare amne ni ngwai Jesu käbti rabadreta kaibe jirekäbe, ñobtä ñan angwane Ngöböökwe ni käräbare nünakäre jáme jabe kwärikwäri. <sup>16</sup> Ne aisetet, mun merire tödekaka Jesubti, ye köböire mun kwäräi ñakare tödekaka Jesubti ye rabadre dianintari ya ño gare ñakare munye. Erere arato, mun brare tödekaka Jesubti, ye köböire meri munkwe tä tödeke ñakare Jesubti, ye rabadre dianintari ya ño gare ñakare munye, aisetet munkwe nünandre janknu jabe abko rabadre bari kuin.

<sup>17</sup> Akwa mun nämane nüne nirebe angwane Ngöböökwe mun käräbare jakrä, ye ben munkwe nüna janknu, ñobtä ñan angwane ni Dänkien Kristo kákwe kukwe mikanintbe kore munkrä, ye abko nitre gätäkä Jesu käbti kä ketareketare temen, kräke tita kukwe ükete nuendre kore. <sup>18</sup> Ye abko, ni Dänkienkwe kukwe mikanintbe kore ni kräke, ne aisetet mun ruäre abko ñääräkrä mikanina mun kwatabtä angwane, Ngöböökwe mun käräbare jakrä ne ngwane, munkwe ñan töbika ja kwata miketa täte. Erere arato, mun ñääräkrä mikani ñakare mun kwatabtä abko angwane, Ngöböökwe mun käräbare jakrä ne ngwane,

mun ñan ja ñäräkrä mika ja kwatabtä, <sup>19</sup> ñobtä ñan angwane ni ñäräkrä tärä ni kwatabtä ya, ñakare ya, yebti abko ni ñan tä neme dianintari, aise te ñakare bäri ütiäte. Akwa nita Ngöbö Kukwei mike täte ya, ñakare ya, ye abko bäri ütiäte kri. <sup>20</sup> Ne aise te mun nämane nüne ño angwane, Ngöbökwé mun käräbare jakrä, ye kwrere munkwe nüna.

<sup>21</sup> Ye abko, ma nämane ni klabore ni mdakwe angwane, ma käräbare Ngöbökwé jakrä, yebtä makwe ñan töbika dikaro, akwa ma rabadreta tikaninte raba tuen mae ne ngwane, makwe ñan tuametre niken ja bäre. <sup>22</sup> Akwa ma nämane klabore ni mdakwe angwane, Ngöbökwé ma käräbare nüne ketetibe ni Dänkien Kristobe, yebtä makwe ñan töbikadre dikaro, ñobtä ñan angwane mtare mata tikaninte ma ngitebtä amne ni Dänkien käta ma bkäne. Ye kwrere arato, ma ñan nämane klabore ni mdakwe angwane, Ngöbökwé ma käräbare jakrä ye ngwane, ma abko klabore Kristokwe mtare. <sup>23</sup> Ngöbökwé mun kökani jakrä, aise te munkwe ñan ja mikata klabore ni mda mdakwe. <sup>24</sup> Ne aise te ti mräkätre, mun nämane nüne ño angwane, Ngöbökwé mun käräbare jakrä, ye kwrere munkwe nüna janknu.

*¿Ni kaibekaibe kákwe ja mikadre gure ya, ñakare ya?*

<sup>25</sup> Mtare, meri kaibekaibe abkobtä ti tö blitai, yebtä abko ni Dänkien kákwe kukwe diribare ñakare, akwa ni Dänkienkwe ti ngwiani ruentari tare jae, aise te titä töbika ño ye abko ütiäte, abtä munkwe tödekadre ti kukweibti ruen tie. <sup>26</sup> Nita nüne ne näire kukwe taretare tä nakenkä krübäte ni rüere, aise te mun brare kaibekaibe tä nüne ño mtare, ye kwrere munkwe nünandre janknu abko rabadre bäri kuin tuen tie. <sup>27</sup> Akwa mata gure ne ngwane, makwe ñan meri makwe tuametre; akwa ma gure ñakare ne ngwane, makwe ñan meri känä jakrä. <sup>28</sup> Akwa mun brare brare kákwe ja mikadre gure ne ngwane, munkwe ñan ja mikadre ngite Ngöbö rüere. Erere arato, meri kaibekaibe kákwe ja mikadre gure angwane, ja mikadre ngite ñakare kwetre Ngöbö rüere. Akwa nita ja mike gure abko kisete kukweta kite kri mda, ye abko ñan rakadrekä munbtä, abkokäre titä niere kore.

<sup>29</sup> Ti mräkätre, ñobtä titä niere krörö: Ni Dänkien kebera kiteta amne kä kitera neme braibe ni käne, aise te ni gure gure kákwe nüna ni kaibekaibe kwrere sribikäre Ngöbökrä.

<sup>30</sup> Erere arato, ni bti kä drangwane drangwane abtä tä neme ulire ulire, yebtä ñan töbika kri kwe, akwa nünandre janknu kwe Ngöbökrä; nire nire käta kä ngwen nuäre jabtä, yebtä ñan töbika kri kwe, akwa nünandre janknu kwe Ngöbökrä; ni jäandrän kökaka kökaka abko ñan töbikadre kri jäandrän yebtä kwe, akwa nünandre janknu kwe Ngöbökrä; <sup>31</sup> nire nire tä jäandrän kä nebtä bkäne, yebtä ñan töbikadre kri kwe, akwa nünandre janknu kwe Ngöbökrä, ñobtä ñan angwane nünandre Ngöbökrä abko bäri ütiäte jäandrän jökrä ngwä, ñobtä ñan angwane kä tuata nikwe ne abko näin jökrä ta aise te.

<sup>32</sup> Akwa munkwe ñan töbikadre dikaro kukwe bätäkä ngwarbebtä, aise te titä blite kore munbe. Ye abko, ni brare kaibe käta töbika bäri jäandrän ni Dänkienkwe yebtä amne, ni Dänkien moto mikadre ño nuäre kwe, yebtä tä töbika. <sup>33</sup> Amne ni brare gure abko tä töbika bäri jäandrän kä nebtä btä, aise te merire kwe moto mikadre ño nuäre kwe, yebtä tä töbika. <sup>34</sup> Ye kwrere töita jäandrän ketebu btä. Ye kwrere arato, meri kwäräi ñakare kwe amne meri kaibekaibe tä töbika bäri jäandrän ni Dänkienkwe yebtä, käta ja ngrabare amne ja üai mike deme ni Dänkienkrä. Amne meri gure gure abko jäandrän kä nebtä, btä tä töbika bäri, aise te kwäräi moto mikadre ño nuäre kwe, btä tä töbika bäri arato. <sup>35</sup> Ne ñan ti tö kukwe tare mikai mun kötarä, käta ja mikamna gure ñakare munye, akwa munkwe sribidre jáme ni Dänkienkrä amne kukwe mda mda ñan rabadre mun jiete abko ie ti tö, käta niere kore munye.

<sup>36</sup> Mdakäre abko, ni ruäre kwe meri bat, ben tä mikani jakrä kwärikwäri, ye ben tö ja mikai gure ne ngwane, ja mikai gure kwe, ñobtä ñan angwane meri ye nena ünän amne ja mikadre gure kwe abko käi nena ie. Ne aise te ja mikadre gure kwe raba ruen ie angwane, dre nuendre abko rabadre bäri kuin raba ruen ie, erere nuen kwe, aise te ni tö raba ja mikai gure, kákwe ja mikai gure. Yebtä abko ñan ja mikadre ngite kwe Ngöbö rüere. <sup>37</sup> Akwa ni mda abko kwe meri bat, ben tä mikani jakrä kwärikväri, ye ben ñan

tö raba ja mikai gure amne ni mdakwe ñan töi diandre rabakäre kaibe, akwa tä töbike kватibe kore ja töi jenbtı, ne ngwane ja ñan mika gure kwe jirekäbe abko rabadredbe.  
<sup>38</sup> Ne aisetet, meri ben ni brare tä mikani jakrä kwäríkwäri ye ben ja mikadre gure kwe abko rabadre kuin, akwa ñan ja mikadre gure ben kwe abko rabadre bäri kuin.

<sup>39</sup> Mdakäre abko, ni merire gure gure abko brare kwe tä nüne, ye ngwane brare ñan tuametre kwe, akwa brare kwe krütadre kän ne ngwane, rabadreta kaibe ja mikakäreta gure, akwa ni tödekaka Jesubti aibe ben ja mikadreta gure kwe. <sup>40</sup> Akwa ja ñan mikadreta gure kwe angwane, kä tädre bäri nuäre btä ruen tie. Ne abko Ngöbö Üai tä tibta, aisetet titä töbike kore, ye abko kuin ruen tie.

## 8

*Ju blitakrä ngöbö ngwarbebe, ye känti mrödre ñakare*

<sup>1</sup> Jändrän kämikata ngöbö ngwarbe mikakäre ütiäte abko ngrie kwetadre ya, ñakare ya, abkobtä munkwe kukwe ngwianintari tie, yebtä ti bike blite mda. Mun jökrä käta niere krörö kukwe nebtä: Kukweta ükaninte ño era metre Ngöböökwe abko garera kuin jökrä nunye, mutta niere jabtä. Akwa titä niere krörö: Kukweta ükaninte ño tä nüke gare kuin nie, nita nüture angwane, nita nebe bike kri. Akwa nita ni mda mda tarere abko bäri ütiäte Ngöbökrä, ñobtä ñan angwane nita ni mda mda tarere angwane, nita die mike abko titä nüture. <sup>2</sup> Ni ruäre, ie kukweta ükaninte ño nena gare kuin tä nüture, ye ngwane kukwe era metre ngämi nebe gare täte ietre. <sup>3</sup> Akwa nire nire käta Ngöbö tarere, ni ye abko gare kuin Ngöböye.

<sup>4</sup> Jändrän kämikata ngöbö ngwarbe mikakäre ütiäte, jändrän ye abko ngrie kwetadre ya, ñakare ya, btä ti bike blite mda. Era metre ngöbö ngwarbe ñakare jire amne era metre Ngöbö tärä itibe, ye gare kuin nie. <sup>5</sup> Akwa kä käinbtı ya, kä temenbtä ya, yete ngöbötre tärä abko ni ruäre käta niere. Ye kwrere bkänä, ni ñakare tödekaka Jesubti, kräke ngöbö tärä kwati amne dänkien tärä kwati arato. <sup>6</sup> Akwa ni tödekaka Jesubti abko kräke Ngöbö tärä itibe. Niara abko ni Rün amne niarakwe jändrän jökrä dätebare amne nita nüne niarakrä. Erere arato, ni Dänkienta itibe ni kräke abko Jesukristo. Jesukristo ye mden köböire jändrän jökrä dätebare Ngöböökwe amne niara mikani ni dätekä kwe arato.

<sup>7</sup> Akwa mun ngätäite ni tödekaka Jesubti ruäre abko ie kukwe ye gare ñakare, ñobtä ñan angwane niaratre ngämi tödeke Jesubti, känenkri nämane ngöbötre ngwarbe ye mike ütiäte jae, amne jändrän kämika nämane kukwadre ngöbö ngwarbe mikakäre ütiäte, bti jändrän ye ngrie kweta nämane ju blitakrä ngöbö ngwarbebe yete. Ne aisetet mtare ngöbötre ngwarbe tärä era metre nüüta janknu kwetre, abkokänti niaratre tä niken ngri kukwani ngöbö ngwarbeye ye kwete, tätre ngöbö ngwarbe mike ütiäte nüüta kwetre amne, töi braibe Jesubtä ñobtä ñan angwane kukwe metre ngöbö ngwarbeitä ngämi gare metre ietre, aisetet jötrö ngwarbe jata nebe ruen ngite ietre ngri ye kwetabtä. <sup>8</sup> Akwa nita mröre, yebtä ñan Ngöböta ni kaen ngäbti bäri, aisetet nikwe mrödre ye kákwe ñan ni mikadre kuin Ngöbö ngwärekri. Erere arato, nikwe ñan mrödre, ye kákwe ñan ni mikadre käme Ngöbö ngwärekri.

<sup>9</sup> Ye mdenbtä, mun abko kräke ngöbö ngwarbe tärä ñakare era metre, aisetet jändrän jökrä tuendbe kwetadre, ye kákwe ñan ni mda mda töi braibe Jesubtä ye mikadre ja mike ngite. Ne aisetet, mun ngämi niken mröre ju blitakrä ngöbö ngwarbebe yete, känenkri munkwe töbika kuin ja käne. <sup>10</sup> Ye ñobtä ñan angwane mun ie kukwe gare kuin abko käbti ju blitakrä ngöbö ngwarbebe, känti nane mun rikadre mröre angwane, ni ruäre tödekaka Jesubti kräke ngöbö ngwarbe tärä amne töi braibe Jesubtä kákwe mun tuadre angwane, mröre ngöbö ngwarbe mikakäre ütiäte abko dbe nüütdre, aisetet tö rabadre näin ngri ngöbö ngwarbe mikakäre ütiäte ye kwetä. <sup>11</sup> Ye angwane kukwe gare mae, ye kákwe ma mräkä Jesu käbti töi braibe amne di ñakare bökän Jesubtä ye mikadi ja mike ngite, yebtä abko riadrete. Kristo krütani niarakrä arato, aisetet ma köböite niara ñan rikadre ji blohti. <sup>12</sup> Mun mräkä Jesu käbti töi braibe Jesubtä, rüere munkwe ja mikadre ngite kore, ye ngwane Kristo ara jire rüere mutta ja mike ngite arato. <sup>13</sup> Ne aisetet jändrän kämikani

kukwadre ngöbö ngwarbe mikakäre ütiäte abko ngrie, ye tikwe kwetadre kákwe ti mräkä Jesu kähti mikadre ja mike ngite, ye ngwane ngri ye tikwe ñan kwetadre jire chi mda, ti mräkä kákwe ñan Jesu tuadremetre abkokäre.

## 9

*Pablo abko Jesu kukwei ngwianka era metre niebare kwe*

<sup>1</sup> ¿Ti mräkätre, ti abko di ñakare kukwe nuene ja töi jenbtí ya? ¡Jänri, ti di tärä! ¿Ti ñakare Jesu kukwei ngwianka era metre abko mun ruäreta nütüre ñan ñan? ¡Jänri, ti abko Jesu kukwei ngwianka era metre! ¿Tikwe ni Dänkien Jesu tuaba ñakare ya? ¡Jänri, tikwe tuaba! ¿Sribi tikwe köböire mun ara jire kákwe tödekaní Jesubti ya? ¡Jänri, munkwe tödekaní Jesubti sribi tikwe köböire! <sup>2</sup> Nane ni mda mdakrä ti ñakare Jesu kukwei ngwianka era metre, akwa munkrä abko ti Jesu kukwei ngwianka era metre rükadre gare munye, ñobtä ñan angwane munta nekete ni Dänkien Jesubtä, ye abko käta ti Jesu kukwei ngwianka era metre bää mike.

<sup>3</sup> Nitre ñäkäkä blo ti rüere abko ie ti tö niei krörö: <sup>4</sup> ¿Nitre Jesu kukwei ngwianka mda mda, ye ngätäite nun ne aibe abko kákwe ñan mrö amne tomna ribedre munbtä sribi ütiäre ya? ¡Jänri, nun raba jäandrän ye ribere munbtä! <sup>5</sup> Erere arato, ¿ni Jesu kukwei ngwianka mda mda, ni Dänkien etbakantre amne Pedro arato tä nikén meri kwekwé ngwena jabe, ye kwrere nun ñan raba nikén meri tödekká Jesubti ngwena ja nän mukore ya? ¡Jänri, nun tö rabadre, ne ngwane nun raba meri jakwe ngwena jabe! <sup>6</sup> Mdakäre abko, ¿Bernabé amne ti, nun ne aibe kákwe sribi mda mda nuendre mrökrä jae ya? ¡Ñakare jire!

<sup>7</sup> Yebtä ti bike kukwe bää mike krörö munye: ¿Nitre rükä käta sribire gobrankrä, ye käta sribi ütiä bienta au jae ya? ¡Ñakare jire! ¿Amne ni uba nökaka ñan tä uba ngwä kwete ya? ¡Jänri, tä nökö kwetadre jae! Erere arato, ¿ni obeja ngibiaka käta kian kwainte, ye ñan tä ñaen ya? ¡Jänri, tä obeja ngibiare kian ñadre jae! <sup>8</sup> Ne abko ñakare ni kä nebtä aibe tä töbike kore abko erere tita niere, akwa Ngöbö Kukwei tikani Moisékwe käta niere arato, <sup>9</sup> aise Kukwe Biani Ngöböökwe Moiséye btä tä tikani krörö: Buey trigo münantekä, ye munkwe ñan kö kita ngwärebä abko tä tikani kore. ¿Ye abko, Ngöbö töi nämane buey aibe die mike, kákwe kukwe niebare kore ya? Ñakare. <sup>10</sup> Ngöbö töi nämane ni ne die mike arato, kákwe niebare kore. Ni ne kräke Ngöböökwe ja kukwei tikamna, ñobtä ñan angwane ni nura nökaka amne ni nura ngwä ötaka abko rabadre mrö bkäne tätre nütüre, aise tä sribi nuene. <sup>11</sup> Ye kwrere arato, Ngöbö kukwei kuin Jesubtä nunkwe nökani nura kwrere mun ngätäite, ye ütiäre abko nunkwe jäandrän munkwe mätäidre munbtä abko ñakare blo, <sup>12</sup> ñobtä ñan angwane ni mda mda akwa käta jäandrän mätäire munbtä angwane, nun bärira jire kákwe jäandrän mätäidre munbtä.

Akwa nun jäandrän mätäire ñakare munbtä abti kä nüke mtare, ñobtä ñan angwane nun ñan tö jäandrän nuein jire chi ja mikakäre ngite ni mda mda okwäbti abtä trö kwitadre kwe Ngöbö Kukwei kuin Kristobtä yeeye, akwa ni jökräkwe kadre ngäbti jäme, abkokäre nunta ja tare nike bätäkä ngwarbe Ngöbö kukwei mikabtä gare munye. <sup>13</sup> Angwane abko mrö bianta Ngöböye, ye ruäre ni sribikä ju blitakrä Ngöböbete käta mrö den jae sribi ütiäre ju yete, ye garera munye. Erere arato, ni jäandrän kukwaka Ngöböye käta ngri den ruäre nünankrä jae. <sup>14</sup> Ye kwrere arato, ni Dänkien kákwe kukwe ükaninte krörö ni niara kukwei mikaka gare kräke: Nire nire tä näin Ngöbö kukwei kuin Jesubtä mike gare, ye köböire nünandre kwe, niebare ni Dänkienkwe.

<sup>15</sup> Ye kwrere ti di tärä jäandrän mätäikä munbtä, akwa tikwe ñan jäandrän mätäiba munbtä, niebare ni Dänkienkwe ye kwrere. Erere arato, ñan munkwe jäandrän biandre tie, abkokäre tita tärä ne tike munye. Tikwe jäandrän mätäidre munbtä jakrä, ye känenkri ti krütadre abko rabadre bäri kuin tikrä, aise tita sribi nuene kore, ye abko bäri käi nuäre tibtä, aise ni mda ñan raba ti töi kwite jene mda. <sup>16</sup> Ne aise, tita kukwe kuin Jesubtä dirire, yebti ñan tita bike kri, ñobtä ñan angwane sribi ye abko Ngöböökwe mikani ti kisete, aise tikwe ñan nuendre angwane jaingwaree, ti bobre jakän! <sup>17</sup> Tikwe kukwe

kuin Jesubtä ye diridre ja töi jenbti akräke tikwe ütiä mätäidre munbtä, akwa sribi mikani ti kisete Ngöbökwe, erere tita nuene, aisetetita ütiä kärere ñakare, ñobtä ñan angwane ti sribikä Kristokwe jirekäbe aibe aisetetita. <sup>18</sup> Akwa tita kukwe kuin Jesubtä dirire ngwarbe, ye abko sribi ütiä kwrere tirkä. Amne tita ütiä mätäire ñakare munbtä, ye abko sribi ütiä kwrere tirkä arato. Ye abko bäri käi nuäre tibtä, ñobtä ñan angwane kukwe kuin Jesubtä dirita tikwe, ye käbti ti ñan tö nüni.

<sup>19</sup> Ne mdən kisete, ni ñakare jire iti kä nebtä käta sribi tikwe ne ütiä bien tie, aisetetita ñakare klabore, akwa ni kwati jatadre Kristoye, abkokäre tita ja mike klabore ni jökrä kräke abko krörö: <sup>20</sup> Nitre israelita ngätäite ti nämane angwane, tikwe ja mikani niaratre kwrere ganainkäre Kristokrä. Amne nitre israelita käta Kukwe Biani Ngöbökwe Moiséye ye mike täte abko ngätäite ti nämane angwane, tikwe ja mikani Kukwe Biani Ngöbökwe Moiséye mike ütiäte ganainkäre Kristokrä. Akwa era metre Kukwe Biani Ngöbökwe Moiséye, ye ñan mikata ütiäte tikwe ja mikakäre metre Ngöbö ngwärekri, akwa nitre kukwe mikaka ütiäte ütiäte jatadre tödeke Kristobti, abkokäre tikwe ja mikani niaratre kwrere.

<sup>21</sup> Akwa ni mda mda käta Kukwe Biani Ngöbökwe Moiséye mike ñakare ütiäte abko ngätäite ti nämane nebe angwane, tikwe ja mikani niaratre kwrere. Akwa ti abko tä Ngöbö Kukwei mike ütiäte, ñobtä ñan angwane kukwe biani nuendre nie Kristokwe abko erere tita mike täte. <sup>22</sup> Angwane ni ie Kristo gare ñakare kuin abko ngätäite tikwe ja mikaba ni ie Kristo gare ñakare kuin kwrere, niaratre ganainkäre Kristokrä. Tita ja mike ni mda mda kwrere, ye köböire abko ni ruäre rabadre dianintari, abkokäre tita nuene. <sup>23</sup> Ye abko, Ngöbö kukwei kuin Jesubtä, kräke tita sribi nuene ne köböire Ngöbökwe kuin nuendre tirkä abkokäre.

<sup>24</sup> Ti bike kukwe mda bä mike krörö munye: Nitre tä ja gaen angwane, ni kwati tä neen akwa, ni itibe tä ganane abko ütiäre jändrän bianta ie. Ye kwrere arato, Ngöbökwe jändrän biandre munye, ne ngwane ni niaka tä nüne ño ganakäre, ye kwrere munkwe nüna. <sup>25</sup> Nitre ja gaka tä niket ja mike biare ja gakäre angwane, jändrän ño ño käme kräke, ye ie tä ja üke bän ganakäre, akwa jändrän tä niket ngwarbe jötrö abko ganainkäre tädre ja mike juto kore. Akwa Ngöbökwe jändrän kuin ütiäte biandre nie abko ganainkäre nita ja die mike jändrän ño ño käme ni kräke, ye ie nita ja üke bän ganakäre. <sup>26</sup> Ne aisetetita abko ñan tä näin betekä okwä kware amne ñan tita kuso braire ngwarbe kä tökarete kwäräkwärä. <sup>27</sup> Akwa tita ja ngrabare ara jire mike ja tare nika amne tita ja ngrabare ne mike ja kukwei mike täte, ñobtä ñan angwane tikwe diribare ni mda mdaye abti mrä ti ütiäte ñakare ñan niedre tie Kristokwe, abkokäre tita ja ngrabare mike ja tare nika.

## 10

### *Pablokwe nitre Corintobo mikani mokre*

<sup>1</sup> Ti mräkätre, ti tö kukwe nakaninkä nitre israelitabtä mikaita töre munye abko krörö: Ni mräkä israelita kirakira nämane Egipto, nikaninta angwane, namani dikekä jökrä müta Ngöbökwe täni amne nikani jökrä Mren Tainte ta arato. <sup>2</sup> Niaratre namani dikekä müta Ngöbökwe täni amne nikani Mren Tainte ta, ye abko namani ngökani ñöte amne namani mikani ketetibe Moisébe kwrere, Ngöbö nämane ben niaratre ngibiakäre bä mikakäre, nita ngökani ñöte amne mikani ketetibe Jesube, niarata ni dänkiene bä mikakäre ye kwrere. <sup>3</sup> Angwane mrö biani Ngöbökwe, arabe kwetani jökrä kwetre kä kaibete amne, <sup>4</sup> ñö biani tomnane Ngöbökwe, arabe ñani jökrä kwetre, ñobtä ñan angwane ñö mikani neen jäkwata käin Ngöbökwe, ye ñani kwetre, ñan krütadre tomna miare abkokäre. Kristo ara jire jäkwata ye kwrere abko nämane näin bentre, ñobtä ñan angwane mrö amne ñö biani Ngöbökwe niaratre ngrabare die mikakäre, ye abko Kristo nämane die mike nüne Ngöbö ngwärekri bä mike, aisetetita Kristo abko jäkwata kwrere, kä nämane juto biare nitre israelita mike nüne Ngöbö ngwärekri. <sup>5</sup> Akwa bäsii niaratre

jökrä käkwe ñan Ngöbö mikani ütiäte, aisetet Ngöbö namani romon kräke, abtä bäsö jökrä krütani bätärekä ja täritäri kä kaibete ji ngrabare temen.

<sup>6</sup> Kukwe nakaninkä kore nitre israelita kirakirabtä, ye abko ja töikrä nie. Yebtä abko, nikwe ñan ja töi mikadre kukwe käme diän diän nuenbtä ño niaratre käkwe nuenbare ye kwrere abko krörö: <sup>7</sup> Bäri käne nitre israelita kirakira ruäre käkwe ngöbö ngwarbe mikani ütiäte jae, ye abko tä tikani krörö Ngöbö Kukweibtä:

Niaratre namani täkänintbe temen, mröre, tomna ñaen ngöbö ngwarbe mikakäre ütiäte jae, bti nikanintre ja mike gure batibati,

*Exodo 32.6*

abko tä tikani Ngöbö Kukweibtä, ye kwrere munkwe ñan ngöbötre ngwarbe mika ütiäte jae. <sup>8</sup> Bobukäre abko, niaratre ruäre nikani ja mike gure batibati ngöbö ngwarbe mikakäre ütiäte jae, abtä Ngöbö mätä namani btätre abko dokwäre ni krütani mili gre bti krämä (23,000) köböitibe, aisetet munkwe ñan ja mikadre gure batibati niaratrekwe nuenbare ye kwrere. <sup>9</sup> Bämäkäre abko, nitre israelita käkwe kukwe nuendre käme Ngöbö rüiere angwane, ni Dänkien käkwe mikadre ja ngie nuen ya, ñakare ya abko nitre ruäre tö namani gai. Abtä Ngöböökwe tbi juani, käkwe kwetani, abtä namanintre bren tbibti amne krütani. Ne aisetet munkwe ñan töbika amne nikwe ñan ja gadre Kristobe, nitre israelitakwe nuenbare ye kwrere. <sup>10</sup> Mräkäre abko, ni ruäre käkwe ñäkäbare Ngöbö rüiere, dokwäre Ngöböökwe angele ni kämikaka juani, käkwe niaratre kämikani, aisetet nikwe ñan ñäkädre Ngöbö rüiere, niaratre käkwe nuenbare ye kwrere.

<sup>11</sup> Ye abko, ni tödekaka Jesubti, kräke kukwe kuin ne nämane tikani kira Ngöbö Kukweibtä abko tä neme bare kä mrä ne näire, aisetet kukwe nakaninkä jökrä kore nitre israelita kirakirabtä ja töikrä nie, yebtä nikwe töbikadre ja käne, abkokäre tä tikani Ngöbö Kukweibtä. <sup>12</sup> Ne aisetet nire nire käta bike kri, ie ja nena ruen dite Jesu kukweibtä, ne abko käkwe ja ngibia kuin amne ja ñan tuametre nötadre temen kwe.

<sup>13</sup> Akwa kukwe krörökrörö ngwiandre töre jae munkwe: Kukwe kämekäme tä kite ni jökrä nuente ja käne, kwrere arato kite mun rüiere. Akwa kukwe bäri tare jatadre mun rüiere angwane munkwe nünandrekä dite jabtä, ñobtä ñan angwane Ngöböta ja kukwei mike täte amne, tä juto biare mun die mike, aisetet kukwe bäri tare käkwe mun nötadre temen, ye ngäniene munkwe kwäräbedre ño abko Ngöböökwe mikadi gare munye, mun rabadre nünenkä dite abkokäre.

### *Mrö ngöbö ngwarbe juete abko Pablokwe dokwä täkäni*

<sup>14</sup> Ne aisetet, ti mräkätre tare tikwe, munkwe ñan ngöbö ngwarbe mika jire chi ngöböre jae amne ye ngäniene mun gitia. <sup>15</sup> Mun abko ni töbtä töbtä munta nütüre jabtä ruen tie, aisetet titä kukwe era erere niere rükadre gare munye abtä munkwe töbika. <sup>16</sup> Nita mröre Kristo ngatani ngwiandre töre jae angwane, uba doi, btä nita kuin niere Ngöböye, bti nita ñaen angwane, jäandrän jökrä nuenbare Ngöböökwe Kristo däriebti ni kräke abko nita den jakrä ben gware. Erere arato, ban kuntibe dikanteta oto kiakia, bti nita kwete, ye abko nita ja gete ketetibe gware Kristo ngrabarebe abko nita bä mike, <sup>17</sup> ñobtä ñan angwane ban kuntibe mun jökrä tä kwete, aisetet ban oto kiakia kabre jatani ban kuntibete, ye kwrere mun abko ni kabre akwa ni ngrabare itibe kwrere.

<sup>18</sup> Ye abko, nire nire käta mröre ngöbö ngwarbe käkitakakäre abko ñan tä mröre ketetibe ngöbö ngwarbebe abko munta nütüre akwa, nitre israelita tä dre nuene mika ñäräre munkwe: Niaratre käta jäandrän kämike kukwadre Ngöbö käkitakakäre, bti ben gware tä kwete yete Ngöbö ngwärerekri. <sup>19</sup> Ne abko, ñan ngöbö ngwarbe ütiäte Ngöbö kwrere titä niere abko mun raba nütüre. Erere arato, ñan ngri kukwani ngöbö ngwarbe mikakäre ütiäte abko bäri ütiäte ngri mda mdakrä titä niere abko mun raba nütüre.

<sup>20</sup> Akwa nitre ñakare tödekaka Jesubti käta jäandrän kämike kukwadre jäandrän kädianta jirekäbe ngöbö ngwarbe yeye, ye abko ñan tä bien Ngöbö era metre yeye, akwa era metre tä bien üai käme bikaka ngöböre yeye abko titä niere, aisetet munkwe ñan ja getadre jire chi üai kämenbe, ie ti tö, <sup>21</sup> ñobtä ñan angwane mun ñan raba dö ñaen siä kwatibe te ni Dänkien Jesube amne üai kämenbe. Erere arato, mun ñan raba mröre mun mräkä Jesu käbti ben gware Jesu ngatani ngwiandre töre jae niara mikakäre ütiäte jae amne

mröre nitre tödekaka ñakare Jesubti ben gware üai käme mikakäre ütiäte jae. <sup>22</sup> Nikwe nuendre kore, yebtä ni Dänkien mätä rabadre kri nibtä, ñobtä ñan angwane ni rabadre Jesu bärä mike ngwarbe nitre tödekaka ñakare Jesubtiye. Erere arato, ni Dänkien bärä dite nikrä abko jürä rabadre nibtä, aise te nikwe ñan ja getadre jire chi üai kämenbe.

*Ni tödekaka Jesubti raba ngri mda kwete, niebare Pablokwe*

<sup>23</sup> Mdakäre abko munta niere krörö tie kukwe nebtä: Ni tö rabadre dre dre nuein mröbtä, erere tädbe Ngöbökrä abko munta niere. Ye abko era, akwa jäandrän jökrä abko ñakare kuin nuendre abko tita niere. Erere arato, munta niere krörö: Ni tö rabadre dre dre nuein, erere ni raba nuene, akwa ti abko käta niere krörö: Jäandrän jökrä nita nuene ye abko ñakare kuin ni mda mda die mikakrä abko tita niere. <sup>24</sup> Ne aise te, nikwe ñan töbikadre jäandrän kuin nuenbtä kaibe jakrä, akwa nikwe töbikadre jäandrän kuin nuenbtä ni mda mdakrä.

<sup>25</sup> Ne aise te, kä ngri rürümoinkrä, känti munkwe ngri ño ño köka, ye erere munkwe kweta jáme. Akwa ngri ye biani ngöbö ngwarbe mikakäre ütiäte ya, ñakare ya, ye munkwe ñan ngwiantari, ñobtä ñan angwane nirekwe biani rürümoindre abko ñakare ütiäte, <sup>26</sup> ñobtä ñan angwane Ngöbö Kukwei tä niere krörö:

Kä temen ne amne jäandrän jökrä tä kä nebtä abko ni Dänkien Ngöböta bkäne, *Salmos 24:1* aise te munkwe ñan töbika dikaro btä.

<sup>27</sup> Nane ni ñakare tödekaka Jesubti käkwe mun nübäi mröre jabe, ye känti mun tö raba näin amne, mrö ño ño mika kwetadre kwe, ye munkwe kweta kä bube jirekäbe amne, mrö ye jatani mdenkri, munkwe ñan ngwiantari. <sup>28</sup> Akwa nane ni tädre yete käkwe niedre krörö munye: Ngri ne biani ngöbö ngwarbe mikakäre ütiäte, nie kwe munye angwane, munkwe ñan kweta jirekäbe ni kukwe niekä ye okwäbti, niara töi mikakäre nuäre. <sup>29</sup> Ne abko, munkwe ñan ni mda töi mikadre bärä jene Kristo rüere, abkokäre munkwe ñan ngri ye kwetadre tita niere, akwa ne ñan mun töi ño ngri kwetabtä, abkobtä tita blite. Ne aise te tikwe dre nuendre, ye abko tädbe tikrä, akwa ni mda mdakwe ñan ti mikadre ngite kukwe nuenta tikwe yebtä, <sup>30</sup> ñobtä ñan angwane jäandrän jökrä kwetata tikwe, btä tita kuin niere Ngöböye, ne aise te tita jäandrän kwete, yebtä ni mda mda käkwe ñan ñäkädré blo ti rüere.

<sup>31</sup> Ne aise te, munkwe mrö ya, munkwe tomna ña ya, munkwe dre dre nuen, erere munkwe nuen jökrä Ngöbö rabadre käkitaninkä abkokäre. <sup>32</sup> Akwa ni israelita amne ni ñakare israelitare, okwäbti munkwe ñan kukwe nuen abtä ja mikadre ngite krübäte kwetre Kristo rüere, abtä ñan tö rabadre tödekai Jesubti. Erere arato, nitre tödekaka Jesubti, okwäbti munkwe ñan kukwe nuen, abtä ja mikadre ngite krübäte kwetre Kristo rüere. <sup>33</sup> Amne ti abko käre tö ni mda mda moto mikai nuäre, aise te käre tita jäandrän kuin känene ñakare au jakrä, akwa ni mda mda rabadre dianintari arato, abko ie ti tö, aise te tita jäandrän kuin känene bärä ni mda mdakrä.

## 11

<sup>1</sup> Ye abko, Kristo käkwe nünabare ño, ye kwrere tita nüne, aise te tita nüne ño, ye kwrere munkwe nüna.

*Nitre merire käkwe dre nuendre gätäte*

<sup>2</sup> Ti mräkä, käre tita töre munye amne kukwe diribare tikwe munye, erere munta mike täte jökrä, yebtä tita mun käkitekä. <sup>3</sup> Akwa kukwe rükadre gare metre munye, ie ti tö abko krörö: Ni dokwäta ni ngrabare mike nüne, ye kwrere Kristo täji dokväta ni brare jökrä kräke amne ni brare abko täji dokväta ni merire kräke amne Ngöbö abko täji dokväta Kristo kräke. <sup>4</sup> Ye aise te, ni brare rikadre blite Ngöböbe amne rikadre Ngöbö kukwei niere gätäte käkwe dän kitadre ja dokwäbti angwane, Kristo täji dokväta niarakrä abko mikata ütiäte ñakare kwe. <sup>5</sup> Akwa meri abko rikadre blite Ngöböbe amne rikadre Ngöbö kukwei niere gätäte ni jökrä ngwärerekri angwane, dän ñan kitadre ja dokwäbti kwe ye ngwane, ja dokwä mikata ütiäte ñakare kwe angwane, meri dokwä mikata mutiolire ye kwrere jire bärä neme, <sup>6</sup> ñobtä ñan angwane meri ñan tö dän kitai

ja dokwäbti blitakäre Ngöböbe amne Ngöbö kukwei niekäre gätäte angwane, tö ja gaire ruen tie. Kore ne ngwane, ja dokwä mikadre mutiolire jirekäbe rabadre ja gaire bäri abkokäre. Akwa dokwä mikadre mutiolire, ye gaidre kräke ne ngwane, dän kita ja dokwäbti kwe.

<sup>7</sup> Akwa ni brare abko kákwe ñan ja dokwä jue mika, ñobtä ñan angwane ni brare abko dätebare bäsja kwrere Ngöböökwe amne ni brare kákwe nünandre Ngöbö mikakäre ütiäte. Akwa ni merire abko kákwe ja dokwä jue mikadre, ñobtä ñan angwane ni merire dätebare Ngöböökwe ni brare bä mikakäre ütiäte, <sup>8</sup> ñobtä ñan angwane ni brare ñan jatani merikri, akwa meri abko jatani ni brarekri. <sup>9</sup> Erere arato, ñan Ngöböökwe ni brare dätebare ni merire kräke, akwa ni merire dätebare ni brare kräke Ngöböökwe. <sup>10</sup> Ne aisetet ni merire kákwe ja dokwä jue mikadre brare kwe bä mikakäre ütiäte amne angeletre kisete ni merire kákwe ja dokwä jue mikadre arato.

<sup>11</sup> Ye abko era metre, akwa ni tödekkaka Jesubti ngätäite abko, ni brare tä nüne ni merire köböire, aisetet tare nüne kaibe ni brare kräke amne, ni merire tä nüne ni brare köböire, aisetet tare nüne kaibe. <sup>12</sup> Ye abko, kira kena ni merire dätebare ni brarekri ye abko era bkänä akwa, ni brare abko tä därrere ni merirekri amne, ni jökrä amne jändräñ jökrä abko jatani Ngöböökri. <sup>13</sup> Ne abko ni merire rikadre blite Ngöböökwe gätäte angwane, ja dokwä jue mikadre ñakare kwe ye abko tädbe ya, abkobtä munkwe töbika. <sup>14</sup> Akwa ni brare kákwe ja dokwä drüen ngibiadre nga, ye abko tuen gaidre kri abko erere kukweta ükaninte ni ngätäite. <sup>15</sup> Akwa ni merire abko kákwe ja dokwä drüen ngibiadre nga, ye abko tä nebe tuen kuin nuäre, ñobtä ñan angwane ni merire abko ie dokwä drüen biani nga Ngöböökwe ja dokwä jue mikakrä. <sup>16</sup> Akwa nane mun ruäre tö raba ja kwetai tibe kukwe nebtä ye abko raba gare munye, akwa nun amne ni mda mda gätäkä Jesu kähti kä mda mdate, ie kukwe mda mda bä jene tärä ya abko gare ñakare nunye, aisetet nitre merire tä gätäte angwane, tä blite Ngöböökwe amne Ngöbö kukwei niere angwane, dän kitadre dokwäbti kwetre. Abko kore se.

### *Mrö Jesu ngatani ngwiankrä töre jae, btä Pablockwe blitabare*

<sup>17</sup> Ti mräkätre, kukwe mda btä tita tärä tike munye, nebtä abko ti ñan bike mun käikitekä, ñobtä ñan angwane mutta gätäre Jesu kähti, ye nin tä mun die mike tödeke bäri Jesubti, akwa tä mun die gaenkä bäri. Yebtä abko, tita tärä tike krörö mda munye: <sup>18</sup> Mutta ja ükekrö gätäkäre Jesu kähti angwane, mutta ja ñäketbe jene jene, ye niebare käne tie amne ruäre tä nebe era tikrä. <sup>19</sup> Mutta ja ñäketbe jene jene, ye abko rakadrekä kore ruen tie, ñobtä ñan angwane ye kwrere mun mdn mden tä tödeke era metre Jesubti rükadre gare abkokäre. <sup>20</sup> Akwa mutta gätäre Jesu kähti angwane, mutta mröre, ye abko ñan mutta mröre ni Dänkien ngatani ngwiankrä töre jae era metre, <sup>21</sup> ñobtä ñan angwane mröta nikken Jesu ngatani ngwiankrä töre jae angwane, mun ngwian bkänä krikri ara jire tä nikken mrö jakwe kweteta käne amne ni ruäre abko tä neme mröi. Erere arato, ni ruäre tä dö ñaen kabre amne tä neme dröbare. <sup>22</sup> Ju munkwe ñakare mrökrä amne dö ñakrä käne ya? ¡Se ñobtä mutta nitre Ngöböökwe mike ngwarbe kore jae amne nitre bobre bobre tödekkaka Jesubti abko mutta mike ja gaire kore se! ¡Mutta kukwe nuene kore, sebtä tikwe dre niedre munye? ¡Tikwe mun käkitadrekä ya? ¡Ñakare jire! Kukwe kore btä tikwe ñan mun käkitadrekä jire chi.

<sup>23</sup> Ye abko, ti Dänkien kákwe diribare tie abko erere tikwe diribareta munye abko krörö: Ni Dänkien Jesu kitani ngise, ye näire deo, ban diani kundi kisete kwe, <sup>24</sup> kákwe kuin niebare btä Ngöböye, bti ötaninbtä kwe, kákwe niebare krörö: Ban ne abko ti ngätä tikwe. Ne mdn abko tita bien müre ketadre mun kräke. Käre munkwe ban kweta kore ti ngwiankrä töre jae, niebare kwe. <sup>25</sup> Ye kwrere arato, mröbare ünän jökrä kwetre angwane, uba doi basote diani kisete kwe, bti niebare krörö kwe: Uba doi ne abko kukwe ükaninte btin Ngöböökwe abko rabadre bare täte jökrä ti däriebti ye bä mikakrä. Ne aisetet munkwe uba doi ña batire batire ti ngwiankrä töre jae, niebare ni Dänkienkwe. <sup>26</sup> Ne aisetet, ni Dänkien jatadreta, ye ngibiare kwärä munkwe ban kweta amne munkwe uba

döi ña angwane, ni Dänkien krütani ni täte amne ni kräke abko mun tädi bä mike batire batire abti ni Dänkien jatadi nüketa.

<sup>27</sup> Ne aisetet, ban kwetata amne uba döi ñata ni Dänkien ngatani ngwiankrä töre jae, akwa tä ni mräkä Jesu kähti mda mda mike ngwarbe jae, ye nirekwe kwetadre kore angwane, ja mikadre ngite kwe ni Dänkien ngrabare rüere amne ni Dänkien därie rüere arato. <sup>28</sup> Ye mden kisete, mun rika ban kwete amne uba döi ñaen ni Dänkien ngatani ye ngwiankrä töre jae, känenkri munta ja mike ngite kore mun mräkä Jesu kähti rüere ya, abkobtä munkwe töbika kuin käne, <sup>29</sup> ñobtä ñan angwane ban kwetadre amne uba döi ñadre ni Dänkien ngatani ngwiankrä töre jae, akwa nita ni Dänkien ngrabare ara jire mike ngwarbe, ye ngwane, ja rüere nita ja mike ngite au Ngöböye, dokwäre Ngöbökwé ni mikadi ja ngie nuen. <sup>30</sup> Ye mden kisete mun kwati bren amne mun di ñakare amne ni ruäre abko krütanina. <sup>31</sup> Ne aisetet, nikwe dre nuendre, yebtä nikwe töbikadre kuin ja käne au angwane, ni Dänkien käkwe ñan ni mikadre ja ngie nuen. <sup>32</sup> Akwa ni Dänkien käta ni mike ja ngie nuen, ye abko tä ni töi den kore mtare, niarakwe ñan ni mikadre ja tare nike ni ñakare tödekaka Jesubti ben gware kä mrä angwane, abkokäre tä ni töi den kore mtare.

<sup>33</sup> Ne aisetet ti mräkätre tikwe, mun rika gätäre mrökäre ni Dänkien ngatani ngwiankrä töre jae angwane, munkwe ja ngibia ngäbti kwärikwäri, abti munkwe mrö kweta ketetibe gware jökrä. <sup>34</sup> Akwa ni ruäre, ie mrö raba krübäte angwane, mrö kweta kwe ja gwiriete, bti jata gätäbtä. Ye kwrere gätätre kwe abtä Ngöbökwé ñan mikadre ja ngie nuen. Kukwe mda mda tä ükarete abko ti näinta nebe mun känti yete angwane, tikwe ükadite jökrä.

## 12

### *Ngöbö Üaita ja di bien bätäkä ngwarbe*

<sup>1</sup> Ti mräkätre, Ngöbö Üaita ja di bien bätäkä ngwarbe ja moto kuinbti nitre tödekaka Jesubti itire itireye, btä munkwe kukwe ngwianintari tie täräbtä. Kukwe yebtä mun ñan töi rabadre mräme, akwa ye abko rabadre gare metre munye, ie ti tö abko krörö: <sup>2</sup> Bäri käne abko, mun ngämi tödeke Jesubti, känenkri ngöbö ngwarbe, ye jiebti mun nämane ja ngwiamna ni mda mdaye, ye gare kuin munye. Ngöbö ngwarbe ye abko blite ñakare. <sup>3</sup> Ye aisetet, mtare kukwe rabadre gare krörö munye, ie ti tö: Nire nire käta blite Ngöbö Üai köböire ñan raba niere: ¡Ngürün raba Jesubti näre! abko ñan raba niere jire. Erere arato, Ngöbö Üai Deme köböire aibe ni raba niere: ¡Jesu abko Dänkien Ngöbö! abko ni raba niere kore, ye abko rabadre gare munye.

<sup>4</sup> Mdakäre abko, nitre tödekaka Jesubti abko bti Ngöbö Üaita ja di dräire bätäkä ngwarbe jene jene, akwa Ngöbö Üai itibe käta ja di bien kore. <sup>5</sup> Erere arato, sribi tärä bätäkä ngwarbe Ngöbökrä, akwa sribi ye abko nuenta ni Dänkien itibe köböire amne niara kräke. <sup>6</sup> Ye kwrere arato, sribita neme bare bätäkä ngwarbe ni mda mdakrä, akwa Ngöbö itibe käta sribi ngwena bare ni köböire amne niara tä ja di mike ni jökräbtä abko krörö:

<sup>7</sup> Ni itire itire, ie Ngöbö Üai käta ja di bien ja moto kuinbti ni jökrä die mikakäre abko krörö: <sup>8</sup> Ni iti, ie Ngöbö Üai käta kukwe töbtä mike gare blitakäre btä amne, ni mdaye abko Ngöbö Üai arabe käta ja di bien kukwe keta kabreta ükaninte ño ño rabadre gare. <sup>9</sup> Erere arato, Ngöbö Üai arabe käta ja di bien ni mdaye tödekakrä kwatibe Ngöböbtí amne, Ngöbö Üai arabe käta ja di bien bätäkä ngwarbe ni mdaye ni bren bren mikakäreta kuinta. <sup>10</sup> Ni mdaye abko Ngöbö Üaita ja di bien sribi kri ñan tuabare bätäkä ngwarbe nuenkäre amne, ni mdaye abko ja di bianta Ngöbö kukwei niekäre nitre Ngöbö kukwei niekä kwrere amne, ni mdaye abko ja di bianta üai käme mikata nüke gare amne Ngöbö Üai era metre mikata nüke gare ie arato. Erere arato, Ngöbö Üai käta ja di bien ni mdaye blitakäre kukwe jenenanbti btä ja töitikani ñakare kwe amne, ni mda abko ie ja di bianta kukwe jenena ye rükadre gare, abkokäre Ngöbö Üai käta ja di bien ie. <sup>11</sup> Di jökrä bätäkä ngwarbe ne abko Ngöbö Üai itibe ye ara käta bien nie, akwa tä ütiä kärere ñakare nie.

Ngöbö Üai töta neme ja di biain ño ño nie, ye erere tä dräire ni tödekaka Jesubti itire itire bti.

*Jesu ngrabare itibe akwa kiakia ngrabare kabre*

<sup>12</sup> Ñobtä Ngöbö Üai käta ja di bien bätäkä ngwarbe jene jene abko ti bike bä mike ni ngrabarebtä. Mun tödekaka Jesubti abko ti bike bä mike ni kiakia ngrabare kwrere abko nere: Ni ngrabare abko itibe, akwa ni kiakia abko kabre amne, ni kiakia ngrabare kabre, ye tä ni itibe ngrabare. Ye kwrere, Kristo ngrabare itibe, akwa nitre tödekaka Jesubti itire itire tärä kabre abko niara kiakia ngrabare. <sup>13</sup> Ne aise, era metre ni abko bätäkä ngwarbe jene jene. Ruäre abko ni israelitare amne ruäre abko ñakare israelitare; ruäre klabore amne ruäre abko klabore ñakare, akwa ni jökräbtä Ngöbö Üai itibe nükani täte ni mikakäre Jesukristo ngrabare itibe kwrere amne, Ngöbö Üai itibe abko ni jökrä kákwe kani ngäbti. <sup>14</sup> Era metre ni ngrabare itibe akwa, ni kiakia ngrabare abko tärä kabre ni ngrabare mikakrä täte.

<sup>15</sup> Ye abko ti bike bä mike krörö: Ni ngoto kákwe niedre, ¡A! Ti ñakare ni kise, aise titi ni ngrabare bäre mento, niedre kwe, ¿ye ngwane rabadre ni ngrabare bäre mento ya? ¡Ñakare! <sup>16</sup> Erere arato, ni olo kákwe niedre, ¡A! Ti ñakare ni okwä, aise titi ni ngrabare bäre mento, niedre kwe, ¿ye ngwane rabadre ni ngrabare bäre mento ya? ¡Ñakare! <sup>17</sup> Ye abko, ¿ni ngrabare rabadre ni okwärebe jökrä angwane, ni kukwei jaradre ño nie? Erere arato, ¿ni ngrabare rabadre ni olorebe jökrä angwane, jäandrän rä rabadre ruen ño nie? <sup>18</sup> Akwa ni kiakia ngrabare, ye Ngöbö tö namani mikai mdente mdente, erere mikani kwe au ja töi jenbti. <sup>19</sup> Akwa ni kiakia ngrabare rabadre ketetibe ja bä kwrere jökrä angwane, ni ngrabare ñan rabadre kuin täte. <sup>20</sup> Ye mden aise, ni kiakia ngrabare tärä kabre bätäkä ngwarbe, akwa ni ngrabare abko itibe, btä ni kiakia ngrabare tä ketetibe jökrä. Ye kwrere Ngöbökwе kukwe mikanintbe munbtä arato.

<sup>21</sup> Ye aise, ni okwä ñan raba niere ni kiseye: ¡A! Ma ütiäte ñakare nünankrä tie, ñan raba niere kore. Erere arato, ni dokwä ñan raba niere ni ngotoye: ¡A! Ma ütiäte ñakare nänkrä tie, ñan raba niere kore, <sup>22</sup> ñobtä ñan angwane ni kiakia ngrabare tä nebe tuen di ñakare nie, akwa ye abko bäri ütiäte nikrä. <sup>23</sup> Amne ni kiakia ngrabare ñan tä nebe tuen nuäre nie, ye nita ükete bäri nuäre. Erere arato, ni kiakia ngrabare, btä nita ja gaire, ye ni ñan tö mikai tuare ni jökräye, abkokäre nita ngwä kite bäri kuin amne nita ja jue mike kuin bäre bäre, <sup>24</sup> akwa ni ngrabare tuen kuinkuin abko ngibiata ñakare kore nikwe amne nita ja jue mike ñakare arato. Ye abko, Ngöbökwе ni ngrabare ükaninte, ni kiakia ngrabare tuen ütiäte ñakare nie rabadre mikani bäri ütiäte nikwe. <sup>25</sup> Erere arato, ni kiakia ngrabare ñan rabadre ja ñäketbe jene jene, akwa ni kiakia ngrabare mden mden tuen ütiäte amne mden mden tuen ütiäte ñakare, ye töi rabadre ja di mikabtä kwärikwäri, abkokäre Ngöbökwе ükaninte kore. <sup>26</sup> Ne aise, ni kia ngrabare keteti tä ja tare nike angwane, ni ngrabare tä ja tare nike jökrä gware. Ye kwrere arato, ni kia ngrabare keteti mikata ütiäte angwane, ni ngrabare jökrä btä käta nebe nuäre gware jökrä.

<sup>27</sup> Ye kwrere mun jökrä gware abko Kristo ngrabare ara amne, ni kiakia ngrabare tärä, ye kwrere mun itire itire tä Jesu ngrabare kiakiare. <sup>28</sup> Ye aise, nitre gätäkä Jesu käbti ngätäite Ngöbö tö namani ni krörökrörö tuai abko erere mikani kwe abko krörö: Mtare Jesu kukwei ngwianka mikani käne kwe. Bobukäre abko, nitre Ngöbö kukwei niekä. Bämäkäre abko, nitre Ngöbö Kukwei dirikä mikani kwe. Yebti nitre sribi kri ñan tuabare nuenkä, nitre ni bren bren mikaka kuinta amne, nitre ni mda mda die mikaka amne, nitre ni mda mda jie ngwianka, amne nitre blitaka kukwe jenenanbti, ye abko mikani jökrä kore nitre gätäkä Jesu käbti ngätäite. <sup>29</sup> Ye abko, ñan ni jökrä tä Jesu kukwei ngwianka amne ñan ni jökrä Ngöbö kukwei niekä amne ñan ni jökrä tä Ngöbö Kukwei dirikä amne, ñan ni jökrä tä sribi kri ñan tuabare nuene. <sup>30</sup> Erere arato, ñan ni jökrä ni bren bren mikakata kuinta amne, ñan ni jökrä tä blite kukwe jenenanbti amne, ñan ni jökrä abko ie kukwe jenena tä nüke gare niekäre ni mda mdaye. <sup>31</sup> Akwa Ngöbö Üai di bäri ütiäte ütiäte mun die mikakäre, ye munkwe känäntari kisere jakrä.

*Ja taredre kwärikwäri abko bäri ütiäte*

Akwa jäandrän bäri kuin ütiäte Ngöbö Üai di bätäkä ngwarbe ye kräke, jiebti ti bike ji tike käne abko krörö:

**13**

<sup>1</sup> Ni kukwe bätäkä ngwarbe kä nebtä, erere ti rabadre blite amne angeletre kukwe ño ño, erere ti rabadre blite, akwa tita ni mda mda tarere ñakare ne ngwane, balinkwata ngö kri ngwarbe, kwrere jire ti rabadre amne bandereta ngö mikata ngöbö ngwarbe mikakrä ütiäte, kwrere jire ti rabadre ngwarbe. <sup>2</sup> Erere arato, Ngöbö Üai köböire ti di rabadre Ngöbö kukwei niekäre amne Ngöbö Üai köböire kukwe tiebetiebe Ngöböökwe rabadre gare jökrä tie amne, Ngöbö Üai köböire kukwe kabre bätäkä ngwarbe tä ükaninte ño rabadre gare jökrä tie amne Ngöbö Üai köböire tita tödeke kватibe Ngöbööbi, köböire ti rabadre ngitio kri juen nebe kä mdabti, akwa tita ni mda mda tarere ñakare ne ngwane, ti ütiäte ñakare jire. <sup>3</sup> Mdakäre abko, jäandrän tädre tikwe, erere tikwe dräidre jire jökrä ni bobre bobrehti amne, tikwe ja ne ara jire biandre kukwadre sribi Ngöböökwekrä, akwa tita ni mda mda tarere ñakare ne ngwane, *¿tikwe dre ganaindre jakrä?*

<sup>4</sup> Nita ni mda mda tarere metre abko nere: Nita ni mda mda tarere angwane, nita jäandrän jökrä ngibiare bätärekä ni mdabtä amne nita ja moto mike kuin ni mdakrä. Nita ni mda mda tarere angwane, ñan nita nüne ni ja ribare kwrere jäandrän jökräftä jäandrän diankakäre jakrä amne, ñan nita ja bä mike ütiäte amne ñan nita bike kri. <sup>5</sup> Nita ni mda mda tarere angwane, ñan nita ñäke diän diän ni mdaye mikakäre ja gaire amne ñan nita jäandrän kuin känene kaibe jakrä. Erere arato, nita ni mda mda tarere angwane, ñan nita nebe romon jötrö ngwarbe ni mdakrä amne ñan ni mätäta neme kärekäre ja dokwäre ni mdabtä. <sup>6</sup> Mdakäre abko, nita ni mda mda tarere angwane, kukwe diän diän Ngöbö rüere amne ni mda mda rüere, ye käita neme nuäre ñakare nibtä, akwa kukwe kuin era metre abko käita nebe nuäre nibtä. <sup>7</sup> Nita ni mda mda tarere angwane, nita juto biare jäandrän jökrä ni rüere kaen ngäbti ni mda mda ngibiakrä amne, nita tödeke janknu Ngöbööbi amne ni mda mdabti. Erere arato, nita ni mda ngibiare bätärekä jäandrän jökräftä amne nita di krüte ñakare jäandrän jökräftä.

<sup>8</sup> Nita ja tarere kwärikwäri ye abko rabadi kärekäre, akwa kukwe niebare nitre Ngöbö kukwei niekäkwe abko köböitira jire näin ta amne, ñan blita rabadre kärekäre kukwe jenenanbti Ngöbö Üai köböire. Erere arato, ni ye ie kukwe kabre tä ükaninte tä gare Ngöbö Üai köböire, ye näin ta, <sup>9</sup> ñobtä ñan angwane ni ye ie kukweta neme gare braibe amne, ni Ngöbö kukwei niekä ye abko gare ñakare täte. <sup>10</sup> Ne aisetet, ni Dänkien Jesu rükadita angwane, kukwe era erere mikadi gare täte kwe nie, aisetet kukwe ñakare täte era metre Ngöbööbtä, ye ñan rabadi ütiäte mda. <sup>11</sup> Ye abko, ti bike bä mike krörö: Ti nämane chi angwane, ti nämane blite, ti nämane töbike amne ti nämane töi ngitiekä ngäbäkre chi kwrere. Akwa ti namanina ünän angwane, jäandrän ngäbäkre chikwe namani jökrä ja jiebti tie. Ye kwrere, kukweta gare mtare tie abko kukwe braibe amne, Jesu rükadita angwane, rabadi jökrä ja jiebti tie. <sup>12</sup> Mdakäre abko, ti bike bä mike jene mda abko krörö: Mtare jäandrän jökrä tuen ñakare kuin nie, aisetet ñäi ngututure te jäandrän bä tuen diore kwrere, aibe tuen diore nie, ye kwrere kukwe keta kabre gare ñakare metre nie mtare, akwa köböitira jire nikwe ja tuadi gwärere Ngöböbe angwane, kukwe rabadi gare metre nie. Mtare abko ti töi braibe Ngöbööbtä, akwa köböitira jire Jesu rükadita angwane, ti gare kuin metre Ngöböye mtare, ye kwrere Ngöbö rükadi gare tie. <sup>13</sup> Ye abko, jäandrän ketamä rabadre ütiäte kärekäre abko krörö: tödekadre kwatibe Ngöbööbi, Kristo jatadreta ye ngibiadre ngäbti amne ja taredre kwärikwäri. Akwa jäandrän ketamä, ye ngätäite abko ja taredre kwärikwäri abko bäri ütiäte.

**14**

*Kukwe jökrä nieta gätäte rükadre gare ni jökräye*

<sup>1</sup> Ja taredre kwärikwäri, ye jiebti mun rankwa kisere janknu. Erere arato, Ngöbö Üai di bätäkä ngwarbe, ye känäntari munkwe jakrä, akwa Ngöbö Üai di Ngöbö kukwei niekäre, ye abko bäri känäntari munkwe, <sup>2</sup> ñobtä ñan angwane ni blitaka kukwe jenenanbti ye abko tä blite Ngöbö aibe ben amne ñakare tä blite nitre gätäkä yebe. Niarata kukwe ütiäte ükani tiebe jenena niere Ngöbö Üai diebti, akwa kukwe ñan tä nebe nüke gare ni mda mdaye gätäte. <sup>3</sup> Akwa ni Ngöbö kukwei niekä abko tä blite nitre gätäkä Jesu kähti kukwere angwane, kukwe dirita kwe ye tä nitre gätäkä Jesu kähti die mike nüne bäri Jesukrä, amne tä töi den näin janknu Jesube amne tä kä mike nuäre btätre. <sup>4</sup> Akwa ni blitaka kukwe jenenanbti Ngöbö Üai diebti abko tä blite angwane, tä ja die mike au, akwa ni Ngöbö kukwei niekä tä blite nitre gätäkä Jesu kähti die mike jökrä. <sup>5</sup> Mun jökrä rabadre blite kukwe jenenanbti näre, akwa munkwe Ngöbö kukwei niedre abko ie ti tö bäri, ñobtä ñan angwane Ngöbö kukwei niedre ye abko bäri ütiäte blitadre kukwe jenenanbti ye kräke. Akwa ni blitaka kukwe jenenanbti tä dre niere, ye kwitadre nitre gätäkä Jesu kähti kukwere niaratre die mikakäre, ne ngwane rabadre kuin.

<sup>6</sup> Ti mräkätre, ti bike kukwe bä mike mda munye abko krörö: Ti rikadre basare munye angwane, Ngöbö Üai diebti kukwe jenena nüke gare ñakare munye, bti tikwe blitadre munbe, ye kákwe ñan mun die mikadre jire chi nüne bäri Jesukrä, ñobtä ñan angwane kukwe jenena ye gare ñakare munye. Akwa Ngöbökkwe kukwe tiebe mikani gare tie, ye tikwe niedre munye mun kukwere amne, kukwe töbtä Ngöbö Kukweibtä, yebtä tikwe blitadre munbe mun kukwere amne tikwe Ngöbö kukwei niedre munye, ye kákwe diridre munye mun kukwere, ye abko rabadre mun die mike nüne bäri Jesukrä. <sup>7</sup> Erere arato, drü bätäkä ngwarbe abko käta kukwe ye bä mike arato abko krörö: Tolero jükadre ngwarbe amne arpa täkätre ngwarbe, ye ngwane dre jükata metre amne dre täkäta metre ñan rükadre gare nie. <sup>8</sup> Erere arato, ¿nitre rükä, kräke trombeta jükata mikakäre juto rikakäre rüre, akwa ñan jükadre metre angwane, ja mikadre ño juto kwetre? <sup>9</sup> Ye kwrere tä nakenä munbtä. ¿Kukwe nüke gare kuin, bti munkwe ñan blitadre, ye abko munta dre niere abko rükadre gare ño ni mda mdaye gätäte? Mun kukwei ñan rükadre gare, ye ngwane munta blite kaibe ngwarbe kwäräkwärä. <sup>10</sup> Mdakäre abko, ni kukwei tärä keta kabre kä nebtä, akwa ni kukwei kwatirekwatire, bti dre nieta abko tä mike gare. <sup>11</sup> Akwa ni mdakwe ñäkadre ja kukwere akwa, dre niedre kwe tie ñan rükadre gare tie, ye ngwane ti rabadre chui menteni kwrere kräke amne, niara rabadre chui mentenine tikrä arato. <sup>12</sup> Ne aisetet, mun tö Ngöbö Üai di tuai bätäkä ngwarbe jakrä, ye abko kuin, akwa mun di rabadre nitre gätäkä Jesu kähti die mikakäre bäri abko munkwe kärä kisere jakrä Ngöböye.

<sup>13</sup> Ne aisetet, Ngöbö Üai diebti nire nire kákwe blitadre kukwe jenenanbti angwane, Ngöbö Üai kákwe ja di biandre mae kukwe ye kwitakäre mun kukwere, munta dre niere rükadre gare munye abko munkwe kärä Ngöböye. <sup>14</sup> Ti mräkätre, Ngöbö Üai diebti tikwe blitadre kukwe jenenanbti Ngöböbe, ye ngwane tita blite ja üai aibebti Ngöböbe, akwa ñakare tita blite ja töibti. <sup>15</sup> ¿Yebtä abko, tikwe ja nuendre? Tikwe blitadre Ngöböbe angwane, tikwe blitadre ben ja üai aibebti kukwe jenenanbti. Erere arato ja üaibti amne ja töibti ben gware ja kukwere tikwe blitadre ben arato. Erere arato, tikwe kantadre Ngöböye kukwe jenenanbti ja üai aibebti, erere arato ja üaibti amne ja töibti ben gware ja kukwere arato. <sup>16</sup> Makwe ñan nuendre kore ne ngwane, ma tädre Ngöbö käikitekä ja üaibebti kukwe jenenanbti angwane, ni tödekaka Jesubti mda mda, ie kukwe makwe ñan tä nüke gare tädre gätäbtä ma kukwei nuen, kákwe ma kukwei nuadre, ye ngwane niara ñan raba ja töi mike gware mabe kuin niekäre Ngöböye, ñobtä ñan angwane mata dre niere ñan rükadre gare ie aisetet. <sup>17</sup> Ye aisetet, nane mata blite bä nuäre Ngöböbe amne mata kuin niere ie kukwe jenenanbti, akwa rabadre tuen ngwarbe ni mda mdaye amne mata die mike ñakare.

<sup>18</sup> Ye abko, Ngöbö Üai kákwe ja di biani tie, aisetet kukwe jenenanbti tita blite bäri kabre mun ngwä, yebtä tita kuin niere Ngöböye. <sup>19</sup> Akwa gätäte abko, bäri ti töta neme kukwe niei kwärikebe ja kukwere, kukwe ye rükadre gare kuin ni jökräye abko rabadre

bäri kuin, ñobtä ñan angwane kore kukwe dirita tikwe rükadre gare metre ni mda mdaye aise. Akwa tikwe kukwe niedre mili kwä jäätä kukwe jenenanbti, ye abko ñan rükadre gare, aise ni mda mda ñan die mikadre kore kwe. <sup>20</sup> Ti mräkätre, blitadre ni kukwe jenenanbti amne Ngöbö kukwei niedre ño, yebtä munkwe ñan töbika ngäbäkre kiakia kwrere, akwa jäandrän kämekäme Ngöbö rüere, yebtä ngäbäkre kiakia tä töbika ñakare, erere mun töi raba ngäbäkre kiakia kwrere. Amne ni ünän ünän käkwe töbika kuin ja käne, ye kwrere munkwe töbika blite ni kukwe jenenanbti yebtä amne Ngöbö kukwei niebtä arato, <sup>21</sup> ñobtä ñan angwane Ngöbö Kukweita tikani krörö kukwe jenenanbtä: Ni menteni kukwe bär jene, bti tikwe blitadi nitre israelitabe niaratre mikakäre mokre, ñobtä ñan angwane ni menteni, ye köböire ti bike nitre israelita mike ja tare nike. Amne ni nünanka kä mdate, yebti tikwe blitadi nitre israelitabe, akwa ti kukwei ñan mikadre ütiäte kwetre, niebare ni Dänkien Ngöböökwe, <sup>Isaías 28.11-12</sup> abko nieta Ngöbö Kukweibtä.

<sup>22</sup> Ne aise, nita blite kukwe jenenanbti, ye abko ni ñakare tödekaka Jesubti, kräke blitata kore abko Ngöböta yete niaratre ngätäite bär mikata, aise ye abko ñakare ni tödekaka Jesubti kräke. Akwa Ngöbö kukwei nieta ye abra ni tödekaka Jesubti kräke amne Ngöböta ja moto mike kuin kräke bär mikata, aise ye abko ñan blitata ni ñakare tödekaka Jesubti kräke. <sup>23</sup> Tita niere kore, ñobtä ñan angwane nitre tödekaka Jesubti tä ja ükekrä jökrä gätäbtä Jesu käbti angwane, ni jire jökrä tädre blite kukwe jenenanbti, ye btäräbe ni ie Ngöbö Kukwei gare ñakare rükadre nebe yete amne ni ñakare tödekaka Jesubti rikadre nebe arato angwane, mun jökrä dokwäbti kä jáme nitre ñäkäkä bär jene kore ngöbötre ngwarbe käkitakakäre kwrere jire rabadre nütüre munbtä. <sup>24</sup> Akwa mun jökrä tädre Ngöbö kukwei niere angwane, ni ñakare tödekaka Jesubti amne ni ie Ngöbö Kukwei gare ñakare rükadre gätäte, käkwe mun kukwei nuadre ja kukwere angwane, mun kukwei rabadi era kräke amne, mun jökrä tädi dre niere, ye rükadi gare ie amne rabadi töbige jabtä au, ja rabadre ruen ngite ie Ngöbö ngwärekri amne, <sup>25</sup> kukwe kämekäme tä kaibe töibtä ye abko rabadre kä merete jökrä Ngöbö ngwärekri, rabadre ruen ie amne, rabadi ngukudokwäbti temen Ngöbö mike ütiäte jae. Ye ngwane, Ngöböta era metre bkänä mun ngätäite niedi kwe, käkwe tödekadi Ngöböbti, aise munkwe Ngöbö kukwei niedre abko bär ütiäte blita kukwe jenenanbti ye kräke.

### Ni jökrä käkwe blitadre itire itire ja täritäri

<sup>26</sup> Ne aise, ti mräkätre, munta gätäre Jesu käbti angwane, munkwe dre nuendre abko ti bike niere munye abko krörö: Ni ruäre käkwe kanta, ni ruäre abko käkwe Ngöbö kukwei diri amne, ni mda abko ie Ngöböökwe kukwe tiebe mikani gare abko mika gare kwe amne, ni mda abko käkwe blita kukwe jenenanbti amne ni mda abko käkwe kukwe jenena ye kwita mun kukwere ni mda mda kräke. Akwa jäandrän jökrä, ye munkwe nuen ja die mikakäre kwärikwäri. <sup>27</sup> Akwa mun rika blite kukwe jenenanbti, ye ngwane ni nibu, ni nimä aibe käkwe blita itire itire ja täritäri, akwa ñakare gware jökrä batibe. Angwane kukwe jenena ye kwitadre mun kukwere. <sup>28</sup> Akwa ne kwrere ni ñakare kukwe jenena ye kwitaka mun kukwere, ye ngwane ni blitaka kukwe jenenanbti ye käkwe ñan blita ni jökrä okwäbti gätäte, akwa blita kaibe kwe Ngöböbe.

<sup>29</sup> Ne kwrere arato, nitre Ngöbö kukwei niekä abko tärä, ye ngwane ni nibu, ni nimä käkwe Ngöbö kukwei nie itire itire ja täritäri amne, nitre Ngöbö kukwei niekä ye tä Ngöbö kukwei niere metre ya abko ni mda mda käkwe mika ñärräre. <sup>30</sup> Akwa nane nita täkänintbe temen yete, ye ie Ngöböökwe ja kukwei tiebe mika gare ni jökrä kräke mda angwane, ni Ngöbö kukwei niekä käne ye käkwe kada keta jirekäbe, käkwe kä biandre ni mda yeye. <sup>31</sup> Ne kwrere ni jökrä käkwe nuendre angwane, ni itire itire ie kä rabadre Ngöbö kukwei niere ye abko käkwe nitre gätäkä Jesu käbti ye töi tikadi amne die mikadi nüne bär Ngöbökrä. <sup>32</sup> Akwa nire nire ie ja di bian Ngöbö Üaikwe Ngöbö kukwei niekäre, nitre ye abko di tärä ja töi ngibiare blitakäre jáme ja täritäri amne ñakare batibe jökrä gware, <sup>33</sup> ñobtä ñan angwane Ngöbö abko Ngöbö jáme, akwa ñakare Ngöbö kä

ngwiankrä nokre ni töi kwitakäre kwäräkwärä aisetet. Ye kwrere nitre gätäkä Jesu kähti kä ketareketare temen käta nuene kore, aisetet munkwe nuendre kore arato.

### *Kukwe nitre merire kräke*

<sup>34</sup> Kukwe mdara jire ti bike niere abko krörö: Nitre tödekaka Jesubti tä gätäre Jesu kähti, ye känti nitre merire kákwe ni kukwei nua kä bube jirekäbe, ñobtä ñan angwane nitre merire kákwe ñan blitadre gätäte abko Kukwe Biani Ngöböökwe Moiséye käta niere, ye kwrere nitre merire raba kwekbe ni kukwei nuen. <sup>35</sup> Akwa nitre merire tö raba kukwe ño ño gai angwane, ngwantari kwe kwäräyi ja gwiriete, ñobtä ñan angwane nitre tödekaka Jesubti tä gätäre Jesu kähti, ye känti merikwe blitadre abko gaidre kri.

### *Kukwe nämane nakenkä gätäte, yebtä Pablokwe blitabare mrä*

<sup>36</sup> Angwane Ngöbö Kukwei ye abko jatani kena mun köböire munkwe ñan nütü. Erere arato, ñan mun aibe kákwe Ngöbö Kukwei kani ngäbti, mun raba nütüre. <sup>37</sup> Mun mden ie ja ruen Ngöbö kukwei niekä amne Ngöbö Üai tä täte munbtä raba ruen munye, ye ngwane tita kukwe tike tärä nebtä ne abko ñan tita nuemna akwa, ni Dänkien käta nuemna era metre, ye rükadi gare munye. <sup>38</sup> Akwa ñan rükadre gare munye angwane, munkwe trö kwitadre ni Dänkienye, ye ngwane ni Dänkienwe trö kwitadi munye arato. <sup>39</sup> Ne aisetet ti mräkätre tikwe, Ngöbö Üai di rabadre munkrä Ngöbö kukwei niekäre, ye abko munkwe känäntari kisere amne, nire nire rika blite kukwe jenenanbti, ye munkwe ñan dokwä täkä kän. <sup>40</sup> Akwa munkwe jäandrän jökrä nuen kuin era metre jökrä ja täritäri.

## 15

### *Jesu nukaninta nire era metre*

<sup>1</sup> Ti mräkätre, mtare kukwe kuin Jesubtä tikwe mikani gare munye, ye ti tö mikaita töre munye. Ngöbö kukwei kuin Jesubtä, ye mden munkwe kani ngäbti amne mun tä näin janknu btä mtare. <sup>2</sup> Ye kwrere munkwe nändre janknu kore ne ngwane, Ngöbö kukwei kuin Jesubtä tikwe diribare munye, ye köböire mun rabadi dianintari. Akwa munkwe ñan nändre janknu ne ngwane, munkwe kukwe kuin Jesubtä mikani era jae akwa ngwarbe. <sup>3</sup> Kukwe mikata ütiäte Jesubtä ni jökräkwe diribare tie abko erere tikwe diribare munye abko krörö: Kristo krütani ni ngite Ngöbö rüere ye diankakäre nibtä abko nämane tikani kore Ngöbö Kukweibtä, ye kwrere nakaninkä. <sup>4</sup> Erere arato, Kristo doboi mikani, abti köbömäkäre Ngöböökwe mikaninta nire abko nämane tikani kore Ngöbö Kukweibtä, ye kwrere nakaninkä. <sup>5</sup> Yebti Kristokwe ja mikani tuadre Pedroye, bti ja mikaninta tuadre kwe nitre ja töitikaka ben ni jätäbti nibu yeye.

<sup>6</sup> Abti ja mräkätre Jesu kähti siento krärike jire, ie ja mikani tuadre batibe jökrä kwe. Ja mräkätre Kristo tuakatuaka ye tä nüne kwati akwa, ruäre abko krütanina. <sup>7</sup> Yebti ja mikani tuadre kwe Santiagoye amne nitre niara kukwei ngwianka mda mdaye. <sup>8</sup> Mrä, Kristokwe ja mikani tuadre tie arato, aisetet ngäbäkrebäredre käi ngämi nüke angwane, tä därrere käme, ye kwrere nakaninkä tibtä.

<sup>9</sup> Ye mden kisete, nitre Jesu kukwei ngwianka jökrä, ye ngätäite ti abko bäri ütiäte ñakare. Ti abko Jesu kukwei ngwianka ñan niedre tibtä, ñobtä ñan angwane nitre gätäkä Jesu kähti, jiebti ti nämane näin kisere mikakäre ja tare nike. <sup>10</sup> Akwa tita ño mtare ne abko Ngöböökwe ja moto mikani kuin tikrä abko köböire tita kore. Ngöböökwe ja moto mikani kuin tikrä, ye abko ñakare nuenbare ngwarbe kwe, ñobtä ñan angwane tita sribire bäri nitre Jesu kukwei ngwianka mda mda ngwä, ye abko ñan tikwe nuenbare kaipe ja di jenbti, akwa Ngöböökwe ja moto mikani kuin tikrä kákwe ti die mikani. <sup>11</sup> Akwa tikwe sribibare bäri ya o niaratre ya abko ñakare ütiäte, akwa kukwe bäri ütiäte abko ti amne nitre Jesu kukwei ngwianka mda mda kákwe kukwe diribare ja kwrere jökrä, ye mden abko munkwe mikani era.

### *Nitre tödekaka Jesubti abko Ngöböökwe mikadita nire era metre*

<sup>12</sup> Akwa Kristo mikaninta nire Ngöböökwe abko nunta dirire, ¿ye ñobtä abko ni krütanikrütani ñan rükadreta nire abko mun ruäreta niere? <sup>13</sup> Ni krütanikrütani ñan

rükadreta nire, ye ngwane Ngöböökwe Kristo mikaninta nire ñakare arato. <sup>14</sup> Amne Ngöböökwe Kristo mikaninta nire ñakare, ye ngwane kukwe dirita nunkwe abko ngwarbe, ütiäte ñakare. Erere arato, munta tödeke ngwarbe Kristobti. <sup>15</sup> Ngöböökwe Kristo mikadreta nire ñakare bkänä, akräke nun rabadre kukwe ngwarbe niekä Ngöböbtä, ñobtä ñan angwane Ngöböökwe Kristo mikaninta nire ñakare, akwa mikaninta nire kwe nun tädre niere, ye ngwane nun tädre ñäke ngwarbe Ngöbö rüere. Mdakäre abko, ni krütanikrütani ñan rükadreta nire bkänä, ye ngwane Ngöböökwe Kristo mikaninta nire ñakare arato, <sup>16</sup> ñobtä ñan angwane ni krütanikrütani ñan rükadreta nire bkänä, ye ngwane Ngöböökwe Kristo mikaninta nire ñakare arato. <sup>17</sup> Erere arato, Ngöböökwe Kristo mikaninta nire ñakare, ye ngwane munta tödeke ngwarbe bti amne mun tä ngite janknu Ngöböye abti kä ñüke mtare. <sup>18</sup> Mdakäre abko, Ngöböökwe Kristo mikaninta nire ñakare, ye ngwane nitre tödekaka Kristobti krütanikrütani ye abko ñakare dianintari, akwa tä nianinte janknukäre arato. <sup>19</sup> Kore ne ngwane, nikwe nünandre kä nebtä aibe kräke nita tödeke Kristobti ne ngwane, ni jökrä ngätäite, ni abko bäri bobre jakän.

<sup>20</sup> Akwa Ngöböökwe Kristo mikaninta nire, ye abko era bkänä amne, Ngöböökwe nitre tödekaka Jesubti krütanikrütani mikadita nire bkänä, abkokäre Jesu mikaninta nire ni jökrä tödekaka niarabti ye känenkri. <sup>21</sup> Ngöböökwe nitre tödekaka Jesubti krütanikrütani mikadita nire arato abko gare krörö nie: Kena ni iti kä Adán kákwe ja mikani ngite Ngöbö rüere, ye köböite ni jökrä tä krüte, ye kwrere arato ni itibe köböire Ngöböökwe ni tödekaka Jesubti krütanikrütani erere mikadita nire. <sup>22</sup> Ye abko, Adán köböite ni jökrä kä nebtä tä krüte, ye kwrere arato Kristo köböire Ngöböökwe ni jökrä tödekaka Kristobti mikadita nire. <sup>23</sup> Akwa Ngöböökwe kukwe ükaninte, erere rabadi bare ja täritäri abko krörö: Ngöböökwe Kristo mikaninta nire käne, yebti Kristo jatadita angwane, ni kwekwe tödekaka niarabti abko rükadita nire mda abko rabadi bare ja täritäri. <sup>24</sup> Kristo jatadita angwane, üai käme tä dänkiene nibtä kä nebtä amne jäandrän mda mda üai käme kwrerekwrere abko gadikä jire jökrä kwe. Abti kä mrä angwane, gobran mikanina gare Ngöböökwe ie, ye mikadita Rün Ngöbö kisete kwe. <sup>25-27</sup> Ngöböökwe jäandrän jökrä mikani gare Kristoye, aisetet Kristo rabadi gobrane abti rüe jökrä ye mikadi ja ngoto täni kwe. Yebti Kristokwe gata mikadi mrä ja ngoto täni ne abko Kristo rüe mrä ganaindi kwe. Akwa jäandrän jökrä rabadi Kristo ngoto täni tita niere ne abko, ñakare tita blite Ngöbö ara jire btä, ñobtä ñan angwane Ngöböökwe jäandrän jökrä mikani gare Kristoye. <sup>28</sup> Ne aisetet jäandrän jökrä rabadi Kristo ngoto täni angwane, Kristo Ngöbö Odei ara jire kákwe ja mikadita gare Ngöböye, ñobtä ñan angwane Ngöböökwe jäandrän jökrä mikani Kristo ngoto täni. Ye ngwane, Ngöbö aibe rabadre gobrane jäandrän jökräbti.

<sup>29</sup> Mdakäre abko, ¿ni krütanikrütani ñan rükadreta nire ni ruäre tä niere, se drekäre abko ni ruäre tä ja ngökö ñöte ni krütani diäre? ¡Se ñan tä ja ngökö ngwarbe ñöte ya!

<sup>30</sup> Erere arato, ¿Ngöböökwe ñan ni krütanikrütani mikadreta nire angwane, drekäre köbö kwatirekwatire nunta ja kite kukwe krübätete? <sup>31</sup> Ye abko, munta näin Kristo Jesu ni Dänkienbe, ye käita nebe nuäre tibtä era metre. Ye kwrere jire, era metre käre köbö kwatirekwatire tita kä krübätete rätäninkä gatabti. <sup>32</sup> Ye abko, jäandrän ngwarbe romon romon, ben rüdre, kwrere jire tikwe rübare nitre krübäte krübäte ben juta Efeso nete, ¿ye tikwe nuendre ngwarbe ja mikakäre kri, ye ngwane dre rükadre tie rübtä kore? ¿Ngöböökwe ñan ni krütanikrütani mikadreta nire angwane, ye ñan tikwe rüdre ngwarbe ya? Ngöböökwe ñan ni krütanikrütani mikadreta nire angwane,

¡Nane ni krütadre jetbe, aisetet ari mröre kri, ari dö ñaen kabre!

abko ni ruäre tä niere. <sup>33</sup> Akwa munkwe ñan ja ngökamna kukwe yebtä, ñobtä ñan angwane “ni kukwe muko diän diän ben ni töi kuin metre tä ja gete angwane, ni töi kuin metre abko tä neme diän arato,” nieta era metre, aisetet munkwe ñan ja ngökamna kore. <sup>34</sup> Akwa munkwe töbikata kuin ja käne, kákwe ñan ja mika ngite mda, ñobtä ñan angwane mun ruäre, ie Ngöbö gare ñakare. Yebtä mun rabadre ja gaire, abkokäre tita ñäke kore munye.

*Ni rükadita nire angwane, ni ngrabare rabadi ño*

<sup>35</sup> Mdakäre abko, mun ruäre käta kukwe ne ngwentari krörö jae kwärikwäri: ¿Ni krütanina se abko rükadreta nire ño sere? ¿Ni krütani rükadreta nire angwane, rabadi ño ngrabare ruen? abko munta ngwentari jae. <sup>36</sup> Ye ño abko mun töi ñakare dikaro käta kukwe ngwentari kore jae ye! Ye abko ti bike nura bä mike ni ngrabarebtä. Nura nökata ye gütadrete ñakare angwane, mu ñan rükadre. <sup>37</sup> Ye abko, trigo nurai amne nura mda mda nökata, ye abko ñan nura mu ara jire nökata, akwa nura ara jire nökata. <sup>38</sup> Yebti nura ketareketare Ngöbö töta nebe mu mike niren ño ño, erere tä mike niren jene jene, aise te ñakare ja kwrere jökrä ngrabare. <sup>39</sup> Jändrän jökrä abko ñakare ja kwrere jökrä ngrabare garera nie abko krörö: Ni, jändrän ngwarbe, nukwä amne gwa ye abko bä jene jene jökrä ngrabare. <sup>40</sup> Ye kwrere arato, jändrän kä käinbti amne jändrän kä temenbtä abko bä ñakare ja kwrere jökrä, akwa bä jene jene. Akwa jändrän kä käinbti abko bä nuäre nuäre, ye abko bä jen kwetre. Erere arato, jändrän kä temenbtä abko bä nuäre nuäre, akwa bä ye abko bä jen kwe. <sup>41</sup> Erere arato, ñänä trä ñakare ja kwrere sö träbe amne muke abko trä bä jene jene arato. Erere arato, muke kwatirekwatire abko trä tärä bä jene jene.

<sup>42</sup> Ye kwrere, ni krütanikrütani mikadita nire Ngöbökwé angwane, rakadikä kore arato nibtä: Ni ngätä tä niken ngwarbe abko doboi mikata, akwa Ngöbökwé ni mikadita nire angwane, ni ngätä niken ngwarbe ñakare jire chi mda abko biandi kwe nie. <sup>43</sup> Ni ngrabare käme bobre doboi mikata, akwa Ngöbökwé ni mikadita nire angwane, ni rabadi bä nuäre ngrabare. Erere arato, ni ngrabare di ñakare ye doboi mikata akwa, Ngöbökwé mikadita nire angwane, ni rabadi bäri dite ngrabare. <sup>44</sup> Erere arato, ni ngrabare kä nebtä ne abko jatani dobokri abko doboi mikata, akwa Ngöbökwé ni ngrabare mikadita nire angwane, ni ngrabare kä käinbtkri biandi kwe nie. Erere arato, ni ngrabare jatani dobokri tärä ne ngwane, ni ngrabare kä käinbtkri ye tärä arato.

<sup>45</sup> Ye mdén kisete Ngöbö Kukwei tä niere krörö:

Ni käne kädian nämane Adán abko Ngöbökwé mikani nire, *Génesis 2.7*  
 akwa Adán mrä kädianta Kristo ne abko Üai kwe köböire tä ni miketa nire. <sup>46</sup> Akwa ni ngrabare nünakäre kärekäre kä käinbti, ye abko ñakare käne nikwe akwa, ni ngrabare nünakäre kä nebtä abko rabadre käne nikwe, yebti ni ngrabare nünakäre kä käinbti rabadre nikwe mda. <sup>47</sup> Ni dätebare käne kä Adán abko dobro temen ne dätebare, akwa ni mda abko Kristo ye abko kä käinbti jatani. <sup>48</sup> Ne aise te, ni kä nebtä abko dobro dätebare nire abko bä namani ño ngrabare, ye kwrere ni jökrä bä ja täritäri; akwa ni kä käinbti bä ño ngrabare, ye kwrere Ngöbökwé ni krütanikrütani mikadita nire angwane, ni ngrabare bä rabadi arato. <sup>49</sup> Ne aise te, dobro dätebare nire abko kwrere ni bätä ja täritäri mtare kä nebtä, ye kwrere Ngöbökwé ni mikadita nire angwane, ni kä käinbti kä Kristo bä ño ngrabare, ye kwrere ni ngrabare bä rabadi arato.

<sup>50</sup> Yebtä abko, ti tö niei krörö munye ti mräkätre tikwe: Ngöböta gobrane, ye känti ni ngrabare tä niken ngwarbe ye ñan raba nebe nüne jire chi, ñobtä ñan angwane kä käinbti ye känti jändrän ñakare jire tä niken ngwarbe raba neme. <sup>51</sup> Akwa kukwe nämane tiebe kaibe Ngöbökwé kira, ye mikanina gare kwe nie mtare abko ti bike niere, aise te ti kukwei nuen munkwe: Nitre tödekaka Jesubti ñan krütadre jökrä angwane niara jatadita, akwa Ngöbökwé ni jökrä kwitadi. <sup>52</sup> Trombeta jükadi ngö rabadi kä mrä mikakäre gare angwane, nitre tödekaka Jesubti jökrä rikwitadi jötrö ngwarbe Ngöbö diebti, nita okwä kwata metete jötrö ngwarbe, ye kwrere jire ni rikwitadi batibe jökrä se kwrere. Trombeta ngö rabadi, ye ngwane nitre tödekaka Jesubti krütanikrütani abko rükadita nire jökrä amne ñan krütadreta mda amne, ni tödekaka Jesubti tädi nire nire abko Ngöbökwé kwitadi jökrä arato.

<sup>53</sup> Ni ngrabare tä niken ngwarbe, ne täte abko ni ngrabare niken ngwarbe ñakare abko rabadi nikwe. Erere arato, ni ngätä tä ngataen, ne täte abko ni ngätä ngataen ñakare rabadi nikwe. <sup>54</sup> Ni rikwitadi jökrä kore angwane, Ngöbö Kukwei tä tikani krörö rabadi bare:

Gata, Ngöbökwé ma ganaibarera,

aisete ma ñan rabadre jire chi mda, aisetet ni ñakare jire iti krütadre mda. *Isaías 25.8*  
<sup>55</sup> Aisete Gata, ¿ma di kri abko tä mdente?

¿Tbi tu krübäte kwrere jire, ma krübäte, ye abko tä mdente, Gata? *Oseas 13.14*  
 abko nieta Ngöbö Kukweibtä. <sup>56</sup> Ne aisetet kukwe kämekäme nuenta nikwe Ngöbö rüere  
 abtä nita krüte, ne abko tbi tu krübäte kwrere amne, Kukwe Biani Ngöböökwe Moiséye ye  
 köböire kukwe kämekäme tä sribire abko käta ni kukwe kämekäme nuenkä mike gare nie.  
<sup>57</sup> Akwa ni Dänkien Jesukristo, köböire Ngöböta ni die mike kukwe kämekäme ganaine  
 amne gata ganaine. Yebtä abko nikwe kuin niedre Ngöböye.

<sup>58</sup> Ne aisetet ti mräkätre tare tikwe, munkwe tödeka ni Dänkienbti, yebtä munkwe  
 nünanka dite jabtä käre köbö kwatirekwatire. Mdakäre abko, sribi ni Dänkienkwe, yebtä  
 munkwe ja kita ja di ngöibti, ñobtä ñan angwane ñan munta sribire ngwarbe kräke.

## 16

### *Ja mräkä tödekaka Jesubti kräke ngwian ükaninkrö*

<sup>1</sup> Kukwe mdara jire abkobtä ti tö nibi blitai munbe abko krörö: Nitre Ngöböökwe, kräke  
 ngwian ükakrötä munkwe, ye abko ja mräkätre tä gätäre Jesu kähti kä Galaciate käkwe  
 ngwian ükarekrö ño tikwe niebare ietre, ye kwrere munkwe nuen abko krörö: <sup>2</sup> Käre  
 bämän kratirekratire bämänte, munkwe ngwian mika biare jenena biandre ngwarbe ja  
 mräkätrekrä. Ngwian amne jäandrän nükani nuäi mun kisete, ye erere munkwe dianka  
 biare jenena, bti munkwe üka. Yebti ti rikadre nebe yete angwane, munkwe ñan ngwian  
 ükarekrö ye näire. <sup>3</sup> Mdakäre abko, ti näin nebe yete angwane, nire nire tädi mikani  
 biare munkwe juandre Jerusalén, nitre ye abko kräke tikwe tärä tikadi, bti tikwe juandi  
 ngwian ükakrötä, ye munkwe bian ja mräkätre bobre bobreye Jerusalén. <sup>4</sup> Akwa nane ti  
 rikadre Jerusalén ye abko rabadredbe ne ngwane, ja mräkätre juandre munkwe ngwian  
 mike Jerusalén ye näin tibe.

<sup>5</sup> Tita juta Efesote nete, akwa ti näin angwane, ti näin käne kä Macedoniate. Yebti ti  
 näin nebe mun känti Corintote yete. <sup>6</sup> Ye känti ti rabadi nünentbe bäriraire munbe ruen  
 tie, akwa nane kä ñüre näire ti rabadi yete ruen tie. Yebti ti jatadi niken mdente angwane,  
 munkwe ti die mikadi rikakäre ta, abkokäre ti rabadi yete. <sup>7</sup> Ti ñan tö näin gwängwarbe,  
 ñobtä ñan angwane ti ñan tö ja tuai jötrö munbe dikarekä kwärä, aisetet ni Dänkien tö ne  
 ngwane, ti rabadi nünentbe bäriraire munbe yete ja tuakäreta munbe. <sup>8</sup> Akwa gwängware  
 abko, ti rabadre Efeso nete nemebe köbö Pentecostés näire, <sup>9</sup> ñobtä ñan angwane ni kwati  
 tä ja rüere tibe, akwa gwängware kä tärä kri amne kuin sribikrä tie ni Dänkienkrä nete,  
 aisetet ti rabadi bäriraire mda nete. <sup>10</sup> Akwa nane Timoteo rüka mun känti yete angwane,  
 rabadre jáme mun ngätäite, abkokäre munkwe ka ngäbti kuin, ñobtä ñan angwane titä  
 sribire, ne kwrere niarata sribire arato ni Dänkienkrä. <sup>11</sup> Ne aisetet, mun ñakare jire iti  
 käkwe niara mika ngwarbe jae, akwa jatadre jáme ta, abkokäre munkwe die mika, ñobtä  
 ñan angwane titä niara amne ja mräkätre mda mda ngibiare ngäbti.

<sup>12</sup> Angwane ti mräkä Apolos abko rikadre ja mräkätre mda mdabe basare munye abko  
 tikwe ribeba kisere ie, akwa ye ngwane niara ñan tö rababa rikai, aisetet ñan rikaba, akwa  
 nebti kä tädira ie angwane, näin nebe basare munye yete.

<sup>13</sup> Angwane mun abko käkwe ñan dikaka okwä kware amne munkwe nünanka dite  
 tödekabtä ni Dänkienbti. Erere arato, munkwe ja die mika kri nünenkä dite Satana rüere.

<sup>14</sup> Angwane munkwe jäandrän jökrä nuen, ye abko munkwe nuen ja moto kuinbti ni mda  
 mda tarere kwärä.

<sup>15</sup> Ja mräkätre, käne Estéfanás amne mräkä kwe aibe käkwe kukwe kuin Jesubtä kani  
 ngäbti käne kä Acaya yete angwane, niaratre nikaninbe sribire nitre tödekaka Jesubti  
 kräke, ye tä töre munye ruen tie. <sup>16</sup> Ne aisetet, niara amne ni mda mda sribikä niaratre  
 kwrerekwre abko munkwe kukwei mika ütiäte jae, ie ti tö. Erere arato, ni mda mda tö  
 sribire ni Dänkienkrä, ye munkwe mika ütiäte jae. <sup>17</sup> Estéfanás rükaba Fortunatobe amne  
 Acaicobe ti känti nete, ye abko käi nuäre kri tibtä, ñobtä ñan angwane niaratre käkwe ti

moto mikaninta jäme mun diäre. <sup>18</sup> Ne kwrere arato, ti moto amne mun moto tä jäme niaratre köböire ruen tie, aisetet ni niaratre ne kwrere abko munkwe mikadre ütiäte jae.

*Kukwe mrä Pablokwe*

<sup>19</sup> Ti mräkätre, ja mräkätre gätäkä Jesu kähti kä Asiate nete käta köbö kuin juen mun kräke. Erere arato, Aquila amne Priscila btä ja mräkätre mda mda tä ja ükekrö niaratre gwiriete ye käta köbö kuin juen kri mun jökrä kräke ni Dänkien kähti. <sup>20</sup> Ja mräkätre jökrä nete tä köbö kuin juen mun jökrä kräke. Munkwe ja demain kwärikwäri ja moto kuinbti.

<sup>21</sup> Ti Pablo ne mden käta kukwe mrä ne tike ja kise jenbti munkrä, ti ara käta tärä ne tike rükadre gare munye abkokäre. <sup>22</sup> Nire nire ñan tä ni Dänkien tarere, yebtä Ngöbökwe ngürün mikadre näre, käkwe kitadrekä kärekäre ja okwä bäre mento. ¡Ni Dänkien, ma jata jötrö, ie ti tö! <sup>23</sup> Ni Dänkien Jesu käkwe ja moto mika kuin mun jökrä kräke. <sup>24</sup> Ti Pablo käta mun jökrä tarere kärekäre Kristo Jesu kähti. Abko kore se. Ne ngörä.

## Tärä Tikani Bobukäre Pablokwe Nitre Corintobokrä 2 Corintios

Pablo nämane sribire kä Macedonia känti angwane tärä 2 Corintios ne tikani kwe nitre tödekaka Jesubti nünanka juta Corinto yete amne Corinto bäre temen kräke. Tito sribi muko Pablokwe nämane Corinto, nükaninta Pablo känti angwane, kukwe kri nitre tödekaka Jesubti ngätäite Corinto yete abko Titokwe niebare Pabloye. Ye mden kisete Pablokwe tärä ne tikani. Kukwe nämane nakenä abko krörö: Nitre bikaka Jesu kukwei ngwianka ütiäte kri nükani Corinto yete, ye abko nitre tödekaka Jesubti nämane kaen ngäbti. Nitre ye abko dirikä blo arato. Niaratré nämane bike kri Pablobtä amne nämane Pablo bää mike bobre, ütiäte ñakare abko erere nämane nitre Corintobo tödekaka Jesubti ngökö. Pablo nämane nitre tödekaka Jesubti tarere kri amne ñan tö namani nitre Corintobo tuai nikken ji blobti nitre ni ngökaka jiebti. Ye mden kisete, Pablokwe tärä ne tikani nitre tödekaka Jesubti mikakäre mokre nitre ni ngökaka ngäniene amne mäträkäre btä ja moto kuinbti. Erere arato, niara abko Jesu kukwei ngwianka era metre rabadre gare metre ietre abko niebare kwe ietre.

Mdakäre abko, Pablo ngämi tärä ne tike, känenkri niarakwe ngwian käräbare biankäre nitre bobre bobre tödekaka Jesubti Jerusalén yete yeye. Ngwian ye abko Pablo nämane den jakrä abko nitre ni ngökaka nämane niere, akwa ñakare kore, Pablokwe niebare. Ja rikadre basare jötrö ietre, Pablokwe niebare, aise te nitre tödekaka Jesubti nünanka Corinto yete käkwe ngwian biandre janknu niara ngäbti ngwiankäre Jerusalén.

### *Pablota köbö kuin juen*

<sup>1</sup> Ti Pablo käta tärä ne tike. Ngöbö tö namani ti mikai Jesukristo kukwei ngwianka abko erere tita sribire kräke. Ti ne mden käta köbö kuin juen ti mräkä Timoteo ben gware mun nünanka juta Corintote käta gätäre Ngöbö käbti, ye kräke nunta köbö kuin juen. Erere arato, mun nünanka kä jökräbti temen kä Acayate, kräke nunta köbö kuin juen. <sup>2</sup> Ngöbö ni Rün nikwe amne ni Dänkien Jesukristo käkwe ja moto mika kuin munkrä amne mun mika nüne jäme kwetre, ie ti tö.

### *Pablota Ngöbö käikitekä*

<sup>3</sup> Ngöbö ni Dänkien Jesukristo Rün aibe raba käkitaninkä ni jökräkwe. Nita nebe ruentari tare kärekäre ie amne kukwe jire jökrä nikwe, btä niara tä ni die mike amne tä kä miketa nuäre nibtä. <sup>4</sup> Nita ja tare nike bätäkä ngwarbe angwane, Ngöböta ni die mike amne tä kä miketa nuäre nibtä, ni mda mda tädre ja tare nike ño ño angwane, ni rabadre ni ye die mike amne kä miketa nuäre btä abkokäre. <sup>5</sup> Ngöböta nuene kore, ñobtä ñan angwane Kristo käkwe ja tare nikani kri krübäte, ye kwrere ja tare nika tä krübäte ni kisete. Erere arato, Kristo köböire Ngöbökkwe ni die mikadi kri krübäte amne kä mikadita nuäre kwe nibtä. <sup>6</sup> Ye abko, mun rabadre die mikani Ngöbökkwe amne kä rabadreta nuäre munbtä amne mun rabadre dianintari, abkokäre nunta ja tare nike sribi Jesukristokwe ye dokwäre. Ngöböta nun die mike amne tä kä miketa nuäre nunbtä, nunkwe mun die mikadre amne nunkwe kä mikadreta nuäre munbtä siba angwane, nunta ja tare nike, ye kwrere mun tädre ja tare nike tödekaabtä Jesubti angwane, munkwe nünandrekä dite jabtä, abkokäre Ngöböta nun die mike amne tä kä miketa nuäre nunbtä. <sup>7</sup> Ye abko, munta ja tare nike gware nunbe, ye kwrere arato Ngöbökkwe mun die mikadre amne kä mikadreta nuäre kwe munbtä gware nunbe gare nunye, aise mun rabadi dianintari metre gare kuin nunye.

<sup>8</sup> Ti mräkätre, tita tärä tike kore munye, ñobtä ñan angwane provincia Asiate kukwe rakakaba taretare krübäte nun rüere, ye abko rabadre gare munye, ie ti tö. Jä oto doboko rika ngitiekä nibti, käkwe ni ketate temen, ye kwrere jire kukwe jataba doboko krübäte nun rüere, käkwe nun di gakaba jökrä amne, nunkwe ñan nünandre mda rababa ruen nunye. <sup>9</sup> Angwane nun krütadre era metre rababa ruen nunye, akwa kukwe rakakaba

kore nunbtä, ye köböire abko nunkwe ñan tödekadre ja di jenbti au akwa, Ngöbö ni krütanikrütani mikakata nire, ye aibebti nunkwe tödekadre abko rükaba gare nunye.

<sup>10</sup> Amne Ngöböökwe nun diantariba gata ye ngäniene, ye kwrere kukwe jatadita nun rüere angwane, Ngöböökwe nun dianditarita gata ngäniene. Ngöböökwe nun ngibiadi kärekäre abkobti nunta tödeke, <sup>11</sup> amne munta blite Ngöböbe, yebti mun rabadre nun die mike kri. Ye abko, mun kwati tä blite Ngöböbe nunkrä ne ngwane, nun die mikata Ngöböökwe, ye rükadi gare munye angwane, ni kwati kákwe kuin niedi Ngöböye nunbtä.

### *Ñobtä Pablo ñan nikani basare nitre Corintoboye*

<sup>12</sup> Mdakäre abko, kukwe krörökrörö abko nun tö mikai gare bäri munye: Ngöbö diebti nunkwe nünanba deme ni mda mda ngätäite kä nebtä amne mun bäri, ben nunkwe nünanba kore abti kä nüke mtare. Erere arato, Ngöbö diebti nunkwe ni mda mda ngökaní ñakare jire, ye abko gare kuin nunye amne jata nebe ruen ngite ñakare jire chi nunye Ngöbö ngwärekri, ñobtä ñan angwane ñan ni kä nebtä töi abko erere nunta näin, akwa Ngöböta ja moto mike kuin nunkrä abko diebti nunta näin kore. Ye mdenbtä nun tö ja dikaire. <sup>13</sup> Amne nunkwe tärä tikani munye, ye abko munkwe ñäkädre btä amne rükadre gare kuin munye abko erere nunkwe tikani, aisetet tärä yebtä munkwe ñäkä amne, rükadi gare kuin jökrä munye abko titä nüture. <sup>14</sup> Angwane nun abko tä nüne ño, ye nükanina gare ruäre munye, akwa mtare rükadre gare täte munye, ie ti tö, ni Dänkien Jesu jatadi nüketa angwane, ja rabadre ruen ütiäte nunbti munye, ye kwrere arato ja rabadre ruen ütiäte munbti munye ni Dänkien Jesu ngwärekri abkokäre.

<sup>15-16</sup> Ti näma tödeke kore munbti, aisetet ti näin Macedonia angwane, ti näin käne nebe basare munye yete, ti näma nüture abko erere tikwe nieba munye. Erere arato, ti jatadreta ja jiebti angwane, ti rükadre basareta jire munye yete, ti näma nüture. Tikwe basadi bobu kore munye, abti munkwe ti die mikadre nikenta nebe Judeate ti näma nüture, akwa ti ñan rababa basare munye yete. <sup>17</sup> ¿Tikwe köbö kitaba basakrä munye, yebti tikwe töbikabare ñakare kuin ja käne munta nüture ya? Mdakäre abko, ¿titä kukwe kubu niere kukwe kusatibe kräke amne ti töi abko tä jäandrän mdabtä, aisetet titä jän niere, akwa titä ni ngökö abko munta nüture tibtä ya?

<sup>18</sup> Ngöböta ja kukwei bien kusatibe, bti tä mike täte, ye kwrere nunta kukwe kuin Jesubtä niere munye angwane, nunta blite kusatibe, aisetet ñan nunta “jän” niere, yebti nuna “ñakare” niereta batibe munye, <sup>19</sup> ñobtä ñan angwane kukwe kuin Jesukristo Ngöbö Odeibtä abko Silvano, Timoteo amne ti kákwe mikani gare munye angwane, nunkwe ñan niebare krörö munye: Nane Ngöbö kukwei Jesubtä abko era, nane era ñakare abko nunkwe niebare ñakare kore munye. Akwa Ngöbö kukwei Jesukristobtä abko kukwe era erere niebare kusatibe nunkwe munye, aisetet nunkwe blitabare ñakare ketebu batibe. Ngöböökwe ja kukwei mikadre täte, yebtä “jänri” niebare kusatibe kwe Jesukristobtä abko erere rabadi kärekäre, <sup>20</sup> ñobtä ñan angwane Ngöböökwe ja kukwei biani kabre kukwe nuenkäre ni kräke abko mikani bare täte jökrä Kristo köböire kwe. Ye mden kisete, nita Ngöbö käkitekä angwane, Ngöböökwe ja kukwei mikani täte Kristo köböire, yebtä nita “Amen,” niere abko erere raba bare kore nita niere Ngöböye Kristo Jesu köböire. <sup>21</sup> Ti mräkätre, Ngöbö ara jire kákwe nun amne mun mikani nünenkä dite ketetibe gware Kristobtä. Ye abko, Ngöbö ara jire kákwe ni mikani deme jenena jakrä. <sup>22</sup> Erere arato, Ngöböta ni bkäne abko bä mikani krörö kwe: Niarakwe ja Üai Deme mikani nüne nibtä, angwane jäandrän tärä bäri mda kwe nikrä abko mikani gare nie arato, ye köböire abko Ngöböta jäandrän mda mda ngibiare ni kräke abko tä mike gare nie.

<sup>23</sup> Tita kukwe era erere niere munye, ye abko gare kuin Ngöböye, aisetet ti rikadre Corinto mun känti yete ti näma nüture, akwa ti ngämi niken, ñobtä ñan angwane mun tare kri tikwe, aisetet ti ñan tö ñäkäita taretare munye, aisetet ti ngämi niken. Tita kukwe niere munye, nebtä titä mun ngökö ne ngwane, Ngöbö ara jire raba niere ti rüere mun ngökabtä kore. <sup>24</sup> Mun abko tä tödeke Kristobtä, yebtä abko ñan nunga ja mike mun dänkiene, akwa nunga sribi nuene jirekäbe gware munbe abko kákwe kä mikadre bäri

nuäre munbtä, abkokäre nunta sribire kore, ñobtä ñan angwane mun nena nünenkä dite jabtä tödekabtä Kristobti aisetē.

## 2

<sup>1</sup> Ti tö rababa kä mikai bări nuäre munbtä, aisetē ti ñan tö rababa näin ñäkäkäre taretare munye bobukäre mun moto mikakäre ulire, aisetē ti ngämi nebata basare munye. <sup>2</sup> ¿Tikwe mun moto mikadre ulire, ye ngwane ñan mun moto mikani ulire tikwe, ye ara kækwe kä mikadre nuäre tibtä ya? ¡Jänri! Mun ye aibe raba kä mike nuäre tibtä. <sup>3</sup> Tikwe tärä tikaba tare kore munye, ñobtä ñan angwane munkwe kä mikadre nuäre tibtä näre abko munkwe ti moto mikadre ulire rababa ruen tie, ñobtä ñan angwane mun ñan tö namani ti kukwei mikai täte, aisetē ti ñan tö rababa rikai yete. Ti rikadre yete angwane, munkwe kä ngwiandre nuäre gwaire jabtä tibe rababa ruen tie, akwa tikwe tärä tikaba jirekäbe kore munye. <sup>4</sup> Ti näma tärä ye tike munkrä angwane, ti töi ñan rababa krütare munbtä amne, ti moto rababa nötöte krübäte mun jiebti amne ti rababa mun müaire krübäte jakän tärä ye tikare kwärä, akwa tikwe tärä tikaba taretare kore munkrä, ye abko ñan tikwe tikaba mun moto mikakäre ulire, akwa mun tare kri tikwe, ye rükadre gare munye, ie ti tö rababa, aisetē tikwe tärä tikaba kore.

*Ni kukwe käme nuenkä kadreta ngäbti*

<sup>5</sup> Mdakäre abko, ni iti kækwe ti moto mikani ulire, ye abko ñan ti ne aibe moto mikani ulire kwe, akwa bări mun moto mikani ulire kwe arato ruen tie. <sup>6</sup> Akwa ni ja mikaka ngite, btä mun kwati kækwe mäträbare krübäte, ye abko namaninadbe, <sup>7</sup> aisetē mtare kukwe btä ja mikani ngite kwe, ye munkwe dianka bti ta amne, munkwe die mikata amne kä mikata nuäre btä munkwe, niara ñan moto rabadre ulire dikaro abkokäre. <sup>8</sup> Amne monta ni ja mikaka ngite ye tarere kri abko munkwe bă mikata tuadre ie abko ti tö ribei kore munye. <sup>9</sup> Kukwe nämane nakenkä mun ngätäite yete, abtä tikwe tärä tikaba munye, ye abko tita kukwe niere abko erere munkwe mikadre täte jire jökrä ya ño abko ti tö rababa gai, kækwe tärä tikaba kore. <sup>10</sup> Ye abko, nire nire tä ja mike ngite, akwa monta denta bti ta, ni ye abko tita ngite den bti ta arato, aisetē ni ye kækwe ja mikani ngite ño erere ne ngwane, tikwe diandi bti ta arato mun die mikakäre nüne metre Kristo ngwärekri, <sup>11</sup> ñobtä ñan angwane Satana käre tä juto biare kukwe miketbe ni rüere, ye abko garera nie, aisetē Satanakwe ñan ni ngökadre ni ja mikani ngite yebtä, abkokäre nikwe ja ngite diandre jabti ta kwärikwäri.

*Kukwe ükaninte btin Ngöbökwé, kräke Pablota sribire*

<sup>12</sup> Tikwe tärä tikaba kore munye, bti ti rikaba nebe juta Troate kukwe kuin Kristobtä mikakäre gare angwane, Ngöbökwé kä bianba kuin tie sribikäre ni Därkien Kristokrä.

<sup>13</sup> Akwa ti ñan rababa nebe nuäre, ñobtä ñan angwane ti mräkä Tito ñan kwanba tie juta Troate, aisetē ja mräkätre tödekaka Jesubti Troate, ie tikwe köbö ngwiantariba, bti ti rikaba Macedonia mda.

<sup>14</sup> Tita kuin niere Ngöböye, ñobtä ñan angwane Kristo krütani krusoftä angwane, ni ganainbare kwe Ngöbökrä amne Ngöbökwé ni dianinkä sribikäre jakrä Kristo köböire. Ni ganainbare rübtä abko tä näin ni ganainkä jiebti, ye kwrere mtare nunta näin Kristo jiebti. Nun köböire abko Ngöböta kukwe kuin Kristobtä mike gare ni mda mdaye, aisetē jändrän rä băne, ye kwrere kukwe kuin ye rä kite nikén kä jökräbti temen. <sup>15</sup> Ne aisetē Kristokwe nünabare ño, kækwe ja tare nikani, ye kwrere tita nüne. Ye abko, Kristo namani kuindbe Ngöbö ngwärekri, ye kwrere tita Ngöbö ngwärekri, jändrän rä băne ye kwrere. Amne ni mda mda rabadre dianintari ya, ñakare ya, akwa jändrän rä băne ye tä näin jökrä ni ngätäite kä ngrabare temen, ye kwrere jire tita niaratré okwätē. <sup>16</sup> Akwa nire nire rabadi nianinte, ye ie abko ti rabai tuen jändrän ngwákäre rä käme kwrere, akwa nire nire rabadi dianintari Ngöbökwé, ni ye ie ti rabai tuen jändrän rä băne kwrere, ñobtä ñan angwane tita kukwe kuin Jesubtä mike gare ietre aisetē. ¡Sribi ye abko ni ñakare jire chi rabadre nuene ja di jenbti au ñan ñan! <sup>17</sup> Ye abko ni kwati tä näin Ngöbö kukwei kuin dirire ngwian diankrä jae, ye kwrere tita näin ñakare, akwa ti abko tä näin Ngöbö

kukwei mike gare era metre. Ni juani Ngöböökwe tä blite era metre töi kuinbti, ye kwrere titä blite Kristobtä Ngöbö okwäbti Kristo köböire.

3

<sup>1</sup> Tita sribire kuin Ngöbökrä rükadre gare metre munye, abkokäre tita blite kore, ñyebtä abko ti kiterate ja käkitekä au tuen munye ya? ñO ni ruäre kukwei mikadre ütiäte, abkokäre tä tärä kärere ngwiandre jadtä, ye kwrere ti rikadre ngwena munye, munta nütüre ya? ñO ni ruäre kukwei mikadre ütiäte kä mdabti, abkokäre tä tärä kärere munye, ye kwrere tikwe tärä kärädre munye ja kukwei mikakäre ütiäte ni mda mdaye ya? Ñakare jire chi munkwe biandre, ñobtä ñan angwane ni mda tä biamna munye, <sup>2</sup> akwa tärä ye kwrere abko ütiäte ñakare tikrä, ñobtä ñan angwane mun ara jire tä tärä ti kukwei mikakrä ütiäte ye kwrere tikrä. Käre munta töre tie amne tita mun tarere bäri. Ye abko, ni mda mda käta mun mike ñäräre angwane, munta tödeke Kristobti sribi tikwe köböire abko tä nüke gare ietre. Mdakäre abko, tita mun tarere ño, ye abko tä tuen ni jökraye, aisetetä ni kukwei mikakrä ütiäte btä ñäkäta, ye kwrere jire munta ni jökrä ngwärekri.

<sup>3</sup> Amne sribi tikwe köböire munkwe tödekani Kristobti, aisetet mun abko tärä ni kukwei mikakrä ütiäte kwrere tikrä, ye abko ni jökrä raba tuen, aisetet Kristo ara jire käkwe mun mikani tärä ye kwrere abko tita mike tuadre ni mda mdaye. Mdakäre abko, mun abko ñakare tärä tikata plumabti kwrere, ñobtä ñan angwane tärä ye kwrere abko nire ñakare, akwa Ngöbö nire abko Üai ara jire käkwe mun mikani tärä ye kwrere. Erere arato, mun abko ñakare tärä okwä tikani jä otobtä Ngöbökwe biani Moiséye kira ye kwrere. Akwa mun nire ye ara jire töi abko Ngöbökwe mikani tärä kwrere sribi nunkwe köböire.

<sup>4</sup> Amne Kristo köböire nunta tödeke kri Ngöböti, aisetekukwe nieta nunkwe jabtä ne abko era metre abko erere nunta niere. <sup>5</sup> Ye abko ñan nun di tärä täte jökrä bikakäre kri sribi nunkwebti, akwa Ngöbö diebti sribi Kristokrä tä nebe bare nie. <sup>6</sup> Ne aisetekukwe ükaninte btin Ngöböökwe Kristo köböire, ye mikakäre gare ni mda mdaye, Ngöbö ara käkwe ja di biani nunye. Akwa kukwe ükaninte btin ye abko ñakare tä ükaninte Kukwe Biani Ngöböökwe Moiséye ye kwrere, akwa Ngöbö Üai ara jire tä sribire kukwe btin yebti, käta ni mike nüne kärekäre Ngöböbe. Akwa Kukwe Biani Ngöböökwe Moiséye ye abko nikwe ñan mikadre täte jökrä angwane, tä ni kite ngise amne tä ni mike kärekäre Ngöbö okwä bäre mento.

*Kukwe ükaninte btin Ngöökwe abko bäri ütiäte kri*

<sup>7</sup> Kukwe Biani Ngöböökwe Moiséye, ye nikwe ñan mikadre täte jökrä angwane, ni kitadre ngise kwe amne ni rabadre kärekäre Ngöbö okwä bäre mento. Kukwe ye abko nämane tikani jäbtä abko Ngöböökwe biani Moiséye kira angwane, Ngöbö trä namani bä nuäre ye abkoträ namani jökrä Moisés ngwärebta. Yebti Moisés jataninta gwäkäre angwane, Ngöbö trä ye jatani nebata bä diore Moisés ngwärebta, akwa nitre israelita ñan namani Moisés tua kä ngwärebta Ngöbö trä kisete. <sup>8</sup> Se abko kukwe ükaninte btin Ngöböökwe angwane, Ngöbö Üai ara käta sribire nibtä, ¿se abko ñan bä rabadi bäri nuäre ya? Jänri, bäri rabadi nuäre! <sup>9</sup> Kukwe Biani Ngöböökwe Moiséye, ye abko ñan mikata täte ne ngwane, tä ni kite ngise jirekäbe, akwa Ngöböökwe biani angwane, Ngöbö trä namani bä nuäre, se abko Ngöböökwe kukwe ükaninte btin, yebti ni ngite ñakare mda Ngöböta niere amne tä ni kaen ngäbti nieta nie ¿se abko ñan bä rabadi bäri nuäre krübäte ya? Jänri! <sup>10</sup> ñobtä ñan angwane Ngöböökwe kukwe ükaninte käne nitre israelitabe angwane, kukwe biani Moiséye angwane, kä trä namani bä nuäre; akwa mtare kukwe ükaninte btin Ngöböökwe ye nikwe mikadre ñäräre angwane, kä trä rabadi tuen bäri nuäre nie, kä trä namani nuäre käne yebti ta. <sup>11</sup> Ngöböökwe kukwe ükaninte käne nitre israelitabe abko biani kwe Moiséye, kukwe ye abko jatani niken bätärekä ta abko Ngöböökwe biani Moiséye angwane, kä trä namani bä nuäre, aisetekw Ngöböökwe ükaninte btin nibe Kristo köböire abko rabadi kärekäre, ¿se abko ñan bäri ütiäte, aisetekw trä rabadi dirare kärekäre ya? Jänri, bäri trä rabadi dirare kärekäre!

<sup>12</sup> Kukwe ükaninte btin Ngöböökwe ye rabadi kärekäre amneträ rabadi dirare käre, ye gare metre nunye, aisetetita blite ja di ngöi jökrä kukwe yebtä ni jökrä ngwärerekri. <sup>13</sup> Akwa ñan tita blite ni jökräbe Moisés kwrere. Ngöböträ bäänuäre namani Moisés ngwärebtä, ye abko jataniträ nenkäta amneträ jatani nebe diore Moisés ngwärebtä abko nitre israelita käkwe ñan tuadre, abkokäre Moisékwe dän kukwän kitani ja ngwärebtä. <sup>14</sup> Akwa Ngöbö ara jire käkwe nitre israelita dokwä mikani ribi, aisetekira abti kä nüke mtare Kukwe Biani Ngöböökwe Moiséye, yebtä nitre israelita tä ñäke angwane, dän kukwän ni okwäbti kisete käta nebe tuen ñakare nie, ye kwrere jire käta nebe nitre israelita töibti. Niaratre töi mräme tä dän kukwän kwrere niaratre okwäbti, ye abko dianka ngämi, ñobtä ñan angwane niaratre käkwe tödekadre Kristobti angwane, Kristo aibe käkwe jäandrän ye diandrekä btätre, niaratre rabadre töi ngitiekä metre abkokäre. <sup>15</sup> Ye mden kisete, kira abti kä nüke mtare, Kukwe Biani Ngöböökwe Moiséye, yebtä nitre israelita tä ñäke angwane, dän kukwän ni okwäbti kisete käta nebe tuen iko nie, ye kwrere käta nebe nitre israelita töibti, aisetekukwei ñan tä ñüke gare ietre. <sup>16</sup> Akwa nita ja töi kwite ni Dänkien kukwäre, käta tödeke Jesubti angwane, ni töi mräme abko tä dän kukwän kwrere ni töibti ye abko ni Dänkien tä denkä mento nibtä, <sup>17</sup> ñobtä ñan angwane ni Dänkien tä, ye känti Ngöbö Üai tä ben amne nire nire, btä ni Dänkien tä Ngöbö Üaibe, ye känti nita tikaninte. <sup>18</sup> Ne aisetetita jökrä töi mräme mräme abko nämane dän kukwän ni ngwärebtä, kä nämane ni okwä jue mike, ye abko ni Dänkien käkwe dianinkära mento nibtä. Ne aisetekäträ tä nebe tuen ñäite, ye kwrere jire ni Dänkien Kristoträ bäänuäre tä kite tuen nibtä mtare ni mda mdaye. Ye ñobtä ñan angwane ni Dänkien Üai tä nikeni kwite bäri köbö kwatirekwatire ni mikakäre bäsija kwrere ni Dänkienbe, aiseteköbö kwatirekwatire ni Dänkienträ bäänuäre ye tä kite tuen bäri mda nibtä.

## 4

*Jäandrän ütiäte kri*

<sup>1</sup> Ye abko, Ngöböökwe ja moto mikani kuin ti kräke, käkwe sribi bäri ütiäte biani tie, ye tita naente ñakare nuene. <sup>2</sup> Akwa kukwe käme gaidre kri nuenta kaiibe tiebe, ye abko tikwe kitani jökrä temen amne ñan tita näin kukwe miketbe ni mda mda ngökakrä. Erere arato, ñan tita näin Ngöbö Kukwei mrite kukwe mda mdabe dirikäre; akwa kukwe era erere tita niere kwatibe, aisetekukwei ñan Kristobtä mikata gare tikwe, yebtä ni ruäre töi mräme, aisetekä nüke gare ñakare ietre, ne ngwane ni riadite kärekäre Ngöbö okwä bäre mento, ye aibe ie ñan rükadre gare, <sup>4</sup> ñobtä ñan angwane niaratre ñan tä tödeke Kristobti, aisetetita rüe Satana tä ngöböre kä nebtä käkwe niaratre töi mikani ngwarbe kä drünente ta amne, Ngöbö kukwei kuin Kristobtäträ ngitiekä dirare abko ñan jatadre ietre amne Kristo abko ja kwrere Ngöböbe abko ñanjatadre ietre, abkokäre töi mikani kä drünente kore. <sup>5</sup> Amne ti abko tä Ngöbö kukwei kuin Kristobtä mike gare angwane, ñan tita blite kuin jabtä au, akwa Jesukristo ni Dänkien, ye aibe mikata gare tikwe. Mdakäre abko, tita Jesu tarere, aisetetita abko sribikä munkrä, aibe tita niere jabtä, <sup>6</sup> ñobtä ñan angwane kena dekä Ngöböökwe kä ne dätebare angwane, kä nämane iko jökrä angwane, Ngöböökwe niebare: Käträ raba ngwen, niebare kwe, ye erere käträ namani, aisetekukwei ye ara käkwe käträ kwe mikaniträ ngitiekä ti töibti angwane, kukwe kuin Kristobtä mikani gare tie. Ngöböträ dirare bäänuäre täträ ngitiekä Jesukristobtä, ye abko tikwe mikadre gare ni mda mdaye, abkokäre Ngöböökwe käträ tikaninkä ti töibti.

<sup>7</sup> Ye abko, jäandrän ütiäte kri mikata ñakare dobro unkweinte, akwa kore tä nakenkä nunbtä abko krörö: Ngöbö di kri bäänuäre, ütiäte kri, bti nunta sribire, ye abko tä nunbtä. Akwa tä kite Ngöböökri amne ñan nunkri, ye rabadre gare ni jökräye, abkokäre nun abko di ñakare amne nun ngrabare abko därebe amne mutro dobro sribebare unkwenre kwrere, akwa nunbti Ngöböta sribire. <sup>8</sup> Ye abko, kukwe tärä kri nun kisete, akwa ñan

kukwe ye käta ji dike nun jiete; erere arato töbika kukwe kri nun kisete, akwa ñan yebtä nulta naente. <sup>9</sup> Mdakäre abko, nun rüe tätre näin kisere nun jiebti, akwa Ngöböta nun mikete ñakare kaibe amne, nun nitata temen nun rükwe, akwa niaratre ñan tä nun gaenkä. <sup>10</sup> Ye abko, nulta niken mdente erere ye känti, Jesu kämikaní, ye kwrere bäsí nun kämikata kore, Jesuta nire kärekäre abko käta nun ngibiare amne nun mikadita nire kwe, ye bäsí mikakäre nunbtä. <sup>11</sup> Ne aisetet, nun tä nüne, ye ngwane nun rüe tö nun kämikai Ngöbö kukwei kuin Jesubtä diri dokwäre, akwa nun ngrabare gatadre, nebtä Jesu tä nire kärekäre, ye bäsí rabadi arato, abkokäre nulta ja tare nike kore. <sup>12</sup> Ne abko, nun rüe tö nun kämikai kore Ngöbö kukwei kuin Jesubtä diri dokwäre, ye köböire abko munkwe tödekaní Jesubtä abko rabadi nüne kärekäre Ngöböbe.

<sup>13</sup> Ngöbö Kukwei käta nire krörö:

Tikwe tödekaní kwatibe Ngöböbti abko erere tikwe blitabare btä, *Salmos 116.10*  
 abko tä tikani kore Ngöbö Kukweibtä. Ye mden kwrere, nun abko käta tödeke kwatibe Ngöböbti, abtä nulta blite Jesubtä, käta sribire, <sup>14</sup> ñobtä ñan angwane Ngöbö käkwe ni Dänkien Jesu mikaninta nire, ye ara käkwe nun mikadita nire munbe gware Jesu köböire, abti näin ni ngwena nebe ja ngwärerekri kä käinbti, ye abko gare kuin nunye, aisetet nulta biare ja tare nike Jesukrä. <sup>15</sup> Kukwe tä nakenkä jökrä kore nunbtä, akwa ye abko kuin munkrä, ñobtä ñan angwane Ngöbö moto kuin rükai gare ni kwatiye mun känti angwane, ni kwati rabadi kuin nire Ngöböye angwane, Ngöbö rabadi käkitaninkä bari mda.

<sup>16</sup> Ne mden kisete, nun naente ñakare sribi nuene Ngöbökrä. Nun ngrabare ye abko kide niken ngwarbe janknu mentokwäre, akwa nun üai abko Ngöböta kwite bari btin köbö kwatirekwatire. <sup>17</sup> Ne aisetet, nulta nüne kä nebtä angwane, nulta ja tare nike, akwa ye jötrö amne ñakare tare, aisetet gwä näin ta. Ja tare nika kore, ye ütiäre abko jäandrän bari ütiäre kri Ngöbökwе rabadi kärekäre nunkwe. <sup>18</sup> Ne mden kisete, jäandrän tuen kä nebtä, yebtä nulta okwä ketete ñakare, akwa jäandrän kuin Ngöbökwе tuen ñakare, yebtä nun töita, ñobtä ñan angwane jäandrän tuen nie kä nebtä, ye abko tä jötrö, gwä näin ta, akwa jäandrän kuin Ngöbökwе tuen ñakare, ye abko rabadi kärekäre, aisetet bari ütiäre.

## 5

### *Ngöbökwе ni ngrabare biandi btin nie*

<sup>1</sup> Mdakäre abko, ju nuäre ngwiandre tä niken ngwarbe jötrö, ye kwrere ni ngrabare tä jötrö kä nebtä. Akwa ju nuäre ngwiandre tä niken ngwarbe, ye kwrere ni ngrabare ne näin ngwarbe angwane ni krütadi, ye ngwane ni ngrabare btin abko ju bari kuin niken ngwarbe ñakare ye kwrere abko Ngöbökwе biandi nie kä käinbti abko te ni näin nüne. Ju ye abko mikani ñakare ni kä nebtäkwe abko te ni näin nüne kärekäre. <sup>2</sup> Ni ngrabare tä ju nuäre ngwiandre kwrere ni kräke, te nita nüne angwane, nita täkekäbe jabe ja tare nika kisete, ñobtä ñan angwane Ngöbökwе ni kwitadre jötrö ju mdate kä käinbti angwane, ni ngrabare biandre btin kwe nie, ie ni tö bari, <sup>3</sup> ñobtä ñan angwane ni ngrabare tä dän kwrere nibtä ni üaikrä, ne rikadre ngwarbe angwane, Ngöbökwе ni ngrabare biandi btin nie kä käinbti, ni ñan rabadre ni bütiere kwrere abkokäre. <sup>4</sup> Ni ngrabare tä niken ngwarbe jötrö, ye abko ju nuäre ngwiandre kwrere amne nita nüne te kä nebtä angwane, nita täkekäbe jabe kukwe taretare kisete. Akwa ni ñan tö ja tuai ni bütiere kwrere, aisetet Ngöbökwе ni ngrabare mdara jire biandre btin nie abko ie ni tö. Ni ngrabare btin biandre nie Ngöbökwе, ye abko rabadre kärekäre, käkwe ni ngrabare tä krüte ye gadrekä jökrä. <sup>5</sup> Amne Ngöbö ara jire käkwe ni dätebare nünakäre kärekäre jabe, aisetet Ngöbökwе ni ngrabare btin köböi mikani nie, yebtä ja kukwei mikadi täte jökrä kwe bäsí mikakäre abko ja Üai Deme biani kwe nie.

<sup>6</sup> Ye mden kisete, nita nebe ulire ñakare nüne ni ngrabare nebtä, akwa nita tödeke käre Ngöböbti. Akwa ni ngrabare nebtä ni tä nüne kä nebtä angwane, ni tä nüne mente Ngöböye, aisetet nita nüne ñakare ni Dänkien Jesu känti. <sup>7</sup> Akwa mtare jäandrän tuen ñakare nie Ngöbö känti, bti nita tödeke nünane kwärä kä nebtä, akwa jäandrän tuen nie, yebtä nita tödeke ñakare. <sup>8</sup> Ye abko, Ngöbökwе ni ngrabare btin biandi nie, bti nita

tödeke, yebtä abko ti töta nebe ja ngrabare ne mikaito jötrö rikakäre nüne kärekäre ni Dänkien Jesube kä käinbti. <sup>9</sup> Ye mden kisete, ni tädre nüne janknu ja ngrabare nebti kä nebtä ya o ni rikadrera nüne kä käinbti ya, akwa käre nita dre dre nuene, yebtä ni tö ni Dänkien moto mikai nuäre, <sup>10</sup> ñobtä ñan angwane batira jire ni jökrä rabadi Kristo ngwärekri, känti kukwe ükadite kwe nikrä angwane, ni nämene nüne kä nebtä käkwe jäandrän kuin nuenbare ya o jäandrän käme nuenbare, ye erere Kristo käkwe ütiä biandi nie, aisetetni itire itire käkwe dre nuenbare, ye erere ütiä rabadi kisete.

### *Ngöböta ja mäketa nibe abko Pablokwe mikadre gare*

<sup>11</sup> Ye mden kisete, nita ni Dänkien mike ütiäte jae, aisetetni sribire ni jökrä töi kwitakäre Ngöböki, niaratre käkwe tödekadre Jesubti abkokäre. Tita sribire era metre, ye abko gare kuin Ngöböye, ye kwrere arato rabadre gare kuin munye abko ie ti tö. <sup>12</sup> Ye abko, ñan ti tö ja käkitaikäta au, käta blite kore, akwa ja rabadre ruen ütiäte mda bati munye sribi tikwe köböire, abkokäre tita blite kore. Akwa nitre dirikä blo tä yete mun ngätäite abko tä näin sribi kwekwe aibe käkitekä au, akwa töi ño amne moto ño Ngöbö ngwärekri abko tätre mike ütiäte ñakare, ye okwäbti abko munkwe sribi tikwe mikadre ütiäte, abkokäre tita blite kore. <sup>13</sup> Akwa sribibä Ngöbökrä käta nebe tuen jáme ti dokwäbti, ye abko Ngöbökrä; akwa kä ruen kuin ti dokwäbti, ye abko mun die mikakrä nüne Kristokrä. <sup>14</sup> Tita kore ñobtä ñan angwane Kristota nun tarere, ye käta ti kide nüne Kristo kräke ja di ngöi jökrä, ñobtä ñan angwane Kristo krütani ni jökrä täte, aisetetni ngwäkäre käta töbige ñakare mda kukwe kämekämenbtä, ye kwrere jire ni jökrä tödekaka Jesubti käkwe trö kwitadre kukwe kämeye amne, ñan nünandre jakrä kwetre, ye abko tä gare metre tie, aisetetni tita nüne kore Kristo kräke. <sup>15</sup> Kristo abko krütani ni jökrä kräke, aisetetni nikwe ñan nünandre jire chi mda jakrä, akwa Kristo krütani nikrä, abti Ngöböki mikaninta nire, ye aibe kräke nikwe nünandre, abkokäre krütani ni jökrä kräke.

<sup>16</sup> Kristo krütani ni jökrä kräke, ye mden kisete ni tödekaka ñakare Jesubti käta töbige ño ño ni mda mdabtä, ye kwrere nita töbige ñakare mda mtare. Käne ni ngämi tödeke Kristobti angwane, Kristo abko ni ngwarbe ni mda mda kwrere ni nämene nüture btä, akwa mtare nita töbige ñakare kore mda. <sup>17</sup> Ne aisetetni nire nire tä ketetibe Kristobe abko töita nebe ni btin kwrere amne, jäandrän jökrä kira kämekäme nämene btä, ye abko nikanina ta. Ye täte Ngöböki ni kwitanina btin ketetibe Kristobe, aisetetni töita nebe btin mda. <sup>18</sup> Sribi jökrä, ye abko sribi Ngöböki amne Ngöbö ara jire käkwe ni mikani ja mäketa jabe Kristo köböire. Erere arato, ni jökrä käkwe ja mäkädreta Ngöböbe, ye abko tikwe mikadre gare ni mda mdaye abko sribi ye mikani ti kisete kwe abko krörö: <sup>19</sup> Kristo krütani ni kräke, ye köböire Ngöbö ara jire namani ja mäketa ni jökräbe amne, nita tödeke Kristobti, ye ngwane Ngöböta ni ngite niara rüere denkä mento nibtä. Amne Ngöbö tö ni tuai ja mäketa jabe, ye abko ti mikani niekä kwe ni mda mdaye. <sup>20</sup> Ne aisetetni, Kristo ara jire käkwe ti juani blite niara käbti amne niara diáre amne, Ngöbö ara jire käkwe blitadre, ye kwrere jire Ngöböta kukwe ribere ti köböire munye. Kristo diáre tita kukwe krörö ribere kisere munye: Munkwe ja mäkädreta Ngöböbe, ye abko tita mätäire munbtä Kristo käbti. <sup>21</sup> Kristo käkwe ja mikani ngite ñakare jire chi Ngöbö rüere, akwa Ngöböki niara mikani ngite ni kwrere, niara köböire ni rabadre tuen metre Ngöbö ngwärekri abkokäre.

### 6

<sup>1</sup> Mtare ti abko sribikä Ngöböki, aisetetni tita ribere krörö munye: Ngöböki ja moto mikani kuin munkrä abko munkwe kanina ngäbti, akwa mtare munkwe ñan trö kwita ie,

<sup>2</sup> ñobtä ñan angwane Ngöbö Kukwei käta niere krörö:

Kä kuin näire munkwe ja di käräbare tie angwane, tikwe mun kukwei kani ngäbti.  
Erere arato, köbö ye näire mun rabadre dianintari, ye angwane tikwe mun die mikani käkwe mun dianintari,

*Isaías 49:8*

abko nieta kore Ngöbö Kukweibta. Ne aisetet mta abko kä kuin nüra munkrä amne mun rabadre dianintari abko köböi nüra mta.

### *Pablokwe ja tare nikani kri*

<sup>3</sup> Nunta sribire ye rüere ni mda mdakwe ñan ñäkädre blo, abkokäre nunta nüne ñakare blo ni mda mda okwäbti. <sup>4</sup> Akwa nun abko sribikä era metre Ngöböökwe abko nunta bää mike krörö jadtä: Nunta ja tare nike kri krübäte angwane, nunta ja tare nika ye mike niken bätärekä ta. Erere arato, nunta jäandrän jökrä mdei mike kri amne kukwe bätäkä ngwarbe tä kite nun rüere kwärikwäri sribibta Jesukristokrä abko kisete nunta ja tare mike. <sup>5</sup> Erere arato, kukwe kuin Jesukwe dokwäre nun kwata metata, nun kitata ngite kä teri amne, juta kwatirekwatire te ni kwati käta kä mike nokre nun rüere. Mdakäre abko, nunta sribire tare krübäte au jakrä amne nunta kibien ñakare sribibta amne nunta mrö mike kri arato. <sup>6</sup> Mdakäre abko, nun sribikä era metre Ngöböökwe abko nunta bää mike krörö arato: nunta nüne deme Ngöbökrä amne kukwe kuin era metre Ngöböökwe Jesubtä abko gare kuin nunye. Erere arato, nun motota nebe romon ñakare jötrö jötrö nun rüe kräke, akwa nunta tarere bätärekä ja täritäri. Erere arato, Ngöbö Üai Deme tä nüne nunbtä, köböire nunta ni mda mda tarere era metre jökrä. <sup>7</sup> Amne nunta kukwe era metre Ngöböökwe niere amne, Ngöbö di kri tä nunbtä, ye köböire abko nun sribikä era metre Ngöböökwe abko nunta bää mike. Mdakäre abko, nunta nüne era metre Ngöbökrä ni mda mda okwäbti, ye abko jäandrän rükä kwrere amne jäandrän ja ngibiakrä ni rüe ngäniene, kwrere tä nun kisete kwärikwäri abko bti nunta rüre nun rüebe. <sup>8</sup> Erere arato, batira jire nun mikata ütiäte jae ni mda mdakwe amne batira jire abko ñäkäta taretare nunye arato. Erere arato, batira jire ni mda mda tä blite kuin nunbtä, akwa batira jire abko blitata blo nun rüere ni mda mdakwe. Erere arato, nunta kukwe era erere niere, akwa nun bää mikata ni ni ngökaka kwrere. <sup>9</sup> Erere arato, nun abko gare kuin ni mda mdaye, akwa nun gare ñakare ietra tä niere; bäsí nun kämikata batire batire, akwa nun tä nüne; nun kwata metata krübäte, akwa nun kämikata ñakare. <sup>10</sup> Mdakäre abko, nun motota nebe ulire, akwa käre käta nebe bäri nuäre nunbtä. Erere arato, nun bobre, jäandrän ñakare nunkwe, akwa nunta ni kwati mike jäandrän Ngöböökwe bkäne kabre; nun jäandrän kä nebtä bkäne ñakare, akwa nunta jäandrän jökrä Ngöböökwe bkäne, ye kwrere nun abko sribikä era metre Ngöböökwe abko nunta bää mike jadtä.

<sup>11-12</sup> Ti mräkätre Corintobo, nun näma töbige ño, erere nunkwe niebare kwtibe munye amne, nunta mun jökrä tarere kri krübäte, akwa munta nun tarere ñakare metre.

<sup>13</sup> Ye abko, ngäbäkre rün käta kukwe ribere ngobo kwe ie, ye kwrere ti bike ribere munye: Tita mun tarere kri abko ütiäre munkwe ti tare ja di ngöi jökrä abko ti tö ribei munye.

### *Nitre tödekaka ñakare Jesubti, ben ja mäkädre ñakare*

<sup>14</sup> Mdakäre abko, jäandrän ngwarbe bää jene jene, ye ni ñan raba mäkete krito kratibebtä mikakäre sribire gware abko tä tikani Ngöbö Kukweibta, ye kwrere arato nitre tödekaka ñakare Jesubti, ye ben munkwe ñan ja geta dikaro, ñobtä ñan angwane kukwe era metre Ngöböökwe abko ñakare ja kwrere jire chi kukwe käme yebe. Erere arato, kä iko abko ñakare jire chi kä ngwen kwrere, aisetet ñan rabadre ketetibe jire chi. <sup>15</sup> Erere arato, Kristo abko töi ñakare ja näre Belialibe (abko Satana ara), ye kwrere arato nitre tödekaka ñakare Jesubti abko ñakare töi ja näre nitre tödekaka Jesubti ben. <sup>16</sup> Erere arato, mun tödekaka Jesubti abko ju Ngöbö nire kwe ye kwrere amne, mun ñan rabadre jire chi ketetibe ngöbötre ngwarbe ben mikakäre ütiäte jae, ne abko gare metre munye. Ni tödekaka Jesubti abko ju Ngöböbe kwrere gare nie, ñobtä ñan angwane Ngöbö ara jire käwe niebare krörö ja Kukweibta:

Tikwe nünandi amne tikwe dikadikä niaratre ngätäite amne, ti rabadi Ngöböre kräke  
amne niaratre rabadi juta jen tikwe, *Levítico 26.12; Jeremías 32.38*

abko nieta Ngöbö Kukweibta. <sup>17</sup> Ne aisetet ni Dämkien Ngöbö käta niere krörö nitre tödekaka Jesubti arato:

Nitre tödeke ñakare tibti, ye ngätäite nän mento amne kä mikekä munkwe.

Amne jäandrändbe ñakare ti ngwärekri, yebtä munkwe ñan kise mika jire chi.

Munkwe nuendre kore ne ngwane, tikwe mun kadi ngäbti.

<sup>18</sup> Amne ti rabadi mun Rün munkwe amne mun merire brare abko rabadi ti ngäbriänkäre tikwe, ye abko ni Dänkien Ngöbö Di Kri Jändrän Jökrä Nuenkrä käta niere kore, <sup>2</sup> *Samuel 7.14; Isaías 52.11; Ezequiel 20.34,41*  
abko nieta Ngöbö Kukweibtä.

## 7

<sup>1</sup> Ti mräkätre tare tikwe, ni Dänkien kákwe jändrän kuin köböi mikani kore nie, ye mden kisete jändrän jökrä käta ni mike käme Ngöbö ngwärekri, ye ngäniene nikwe ja ngibiadre kuin deme Ngöbökrä. Ye abko, ni ngrabare amne ni üai abko nikwe ngibiadre deme jökrä amne, nita Ngöbö jürä ngwen jabtä, ye köböire abko ari ja töi mike kwatibe nünakäre bäri deme Ngöbökrä.

### *Nitre Corintobo käi namani nuäre Pablobtä*

<sup>2</sup> Ti mräkätre, munkwe ti tareta, ñobtä ñan angwane ni ñakare jire iti mun ngätäite abko rüere tikwe kukwe nuenbare blo amne, ni ñakare jire iti nikani ji blobti nünakäre Ngöbö rüere ti köböite. Erere arato, ni ñakare jire iti mun ngätäite abko tikwe ngökani ngwianbtä. <sup>3</sup> Tita blite kore ye abko ñan tita blite blo mun rüere mun bä mikakäre käme, akwa tikwe kukwe niebare käne munye, ye erere ti tö nieita munye: Mun tare kri tikwe, aiseite tita juto biare nüne amne krüte munbe gware. <sup>4</sup> Mun rikai janknu mentokwäre Jesukristo jiebti ruen tie bäri, aiseite tita blite kore munbe. Mun käi juto krübäte tibtä. Tita ja tare nike bätäkä ngwarbe, akwa ti töita nebe munbtä angwane, jata nebe ruen dite tie amne käta nebe nuäre krübäte tibtä.

<sup>5</sup> Kukwe rakakaba mda tibtä abko ti bike niere munye: Ti rükaba Macedonia nete, ye näire mentokwäre tita jadüke ñakare jire amne, kukwe taretare tä kite ti rüere kwärirkwäri. Yebtä abko, kä jüräta nebe kri tibtä, aiseite tita nüne ñakare jáme abti kä nüke mtare. <sup>6</sup> Akwa Tito rükabata angwane, Ngöbö kä mikabata nuäre ni moto ulire btä, Ngöbö ye abko kákwe kä mikabata nuäre tibtä Tito köböire. <sup>7</sup> Ye abko, ñan Tito rükabata aibe kákwe kä mikabata nuäre tibtä, akwa munkwe kä mikani nuäre Titobtä arato, ye abko käi rababa nuäre tibtä. Ye abko, mun tö ti tuaita krübäte amne munkwe ja mikani ngite, yebtä mun motota ulire ti jiebti amne munta töbike kri tibtä, ye nieba jökrä Titokwe tie abko bäri käi rababa nuäre tibtä mda.

<sup>8</sup> Ti mräkätre, tikwe tärä tikaba tare munye ye kákwe mun moto mikani ulire, akwa yebtä abko ja ruen ngite ñakare tie mtare. Tikwe tärä tikaba tare munye, ye kákwe mun moto mikani ulire bä jötrö, yebtä bäsí ja rababa ruen ulire tie kena, <sup>9</sup> akwa mtare käi nuäre tibtä. Ye abko ñan tikwe tärä tikaba munye, kákwe mun moto mikani ulire abko käi nuäre tibtä abko mun raba nütüre, akwa tikwe tärä tikani munye, ye kákwe mun moto mikani ulire Ngöbö ngwärekri, ye köböire abko munkwe ja töi kwitaninta Ngöbö kukwäre kákwe kukwe käme nuen nämane munkwe, ye munkwe kitani temen, ye abko käi nuäre tibtä. Ne aiseite, mun moto rabadre ulire kore, ie Ngöbö tö namani abko erere namani bare, aiseite mun ñan nikani jire Ngöbö bäre mento nun köböite. <sup>10</sup> Ye abko, nikwe kukwe käme kitadre temen, abkokäre ere angwane Ngöböta ni moto mike bäri ulire, ye abko käta ni töi kwiteta Ngöbö kukwäre amne nita kukwe käme ye kite temen ni rabadre dianintari abkokäre. Ye mden kisete, ni motota nebe ulire kore, ye ngwane ja ñan rabadre ruen ngite nie. Akwa nitre tödekaka ñakare Jesubti motota nebe ulire, akwa ñan tä kukwe käme kite temen, ye abko rabadi kärekäre Ngöbö okwä bäre mento. <sup>11</sup> Ngöbö tö namani mun tuai moto ulire, ye erere mun moto namani, ye köböire abko jändrän bäri kuin namani bare munye abko krörö: kukwe nämane nakenkä ti rüere, yebtä munkwe töbikabare kuin ja käne amne munkwe ti ngie mikani. Ni nämane rüre ti rüere, kräke mun moto namani romon amne nane Ngöbökwe mun mikadre ja ngie nuen ti dokwäre, yebtä kä jürä namani munbtä arato. Akwa yebti abko mun tö namani ti tuaita amne mun namani mokrere tibti, kákwe ni ja mikaka ngite ti rüere ye mikani ja ngie nuen ti dokwäre. Munkwe jändrän jökrä nuenbare kore, ye köböire abko mun ja mike ngite

ñakare siba ti rüere abko munkwe bā mikani jabtä. <sup>12</sup> Tikwe tärä tikaba tare munye, ye ngwane nirekwe ja mikani ngite amne nire rüere ja mikani ngite kwe, yebtä ñan ti töi näma, kákwe tärä tikaba munye, akwa Ngöbö ngwärekekri munta ti tarere ño, ye abko rabadre gare metre, abkokäre tikwe tärä tikaba kore munye. <sup>13</sup> Ye angwane, munta ti tarere abko munkwe bā mikani jabtä, ye abko kái nuäre kri tibtä mtare.

Mdakäre abko, munkwe kä mikaba nuäre tibtä, yebti ta abko kä nuäre kri Titobtä rükabata, ye abko bári kái rababa juto tibtä amne, mun jökrä kákwe Tito die mikani, aisete kä namaninta nuäre krübäte btä, ye abko bári kái juto tibtä. <sup>14</sup> Tito ngämi nikken mun känti yete, känenkri ti näma mun mike ütiäte jae, tikwe nieba ie. Ye kwrere bkänä munkwe ñan ti mikani ja gaire Tito okwäbti. Ye abko, ti näma munbe Corinto yete angwane, tikwe kukwe era erere aibe niebare munye, ye kwrere ti näma mun bā mike ütiäte Titoye, ye erere mun kwani ie. <sup>15</sup> Tito janama mun känti yete angwane, mun jökrä kákwe kani ngäbti kuin amne munkwe mikani bári ütiäte jae, kákwe niara kukwei mikani täte, ye abko tä nüke töreta ie, aisete mtare Titota mun tarere bári mda. <sup>16</sup> Ti raba tödeke kwatibe munbti, ye abko kái nuäre kri tibtä!

## 8

*Ngwian biandre ja moto kuinbti*

<sup>1</sup> Ti mräkätre, mtare ti bike blite kukwe mdabtä abko krörö: Nitre tödekaka Jesubti tä Macedonia nete abko kräke Ngöböökwe ja moto mikani kuin, kákwe die mikani kri abko ti tö nibi niei munye. <sup>2</sup> Tödekabtä Jesubti ja mräkätre nete kákwe ja tare nikani kri krübäte, akwa kä bári nuäre krübäte btätre. Erere arato, niaratre bári bobre bobre amne tä jäandrän kabre mdei nike, akwa bási ni ngwian bkänkä krikri käta ngwian bien kabre, ye kwrere jire ngwian bianba ja moto kuinbti kwetre Ngöbökrä. <sup>3</sup> Ye abko, niaratre di nuäi nuäi, ye erere btä ngwian bianba kwetre, akwa ja moto mikani bári kuin kwetre, kákwe ngwian biani bári mda arato. Ja mräkätre kákwe ngwian bianba kore ti okwäbti, aisete titä niere kore munye. Erere arato, ja töi jenbti <sup>4</sup> ja mräkätre Macedonia nete tö rababa juta deme Ngöböökwe die mikai ni tödekaka Jesubti nünanka kä mda mda känti ben gware, aisete tikwe kä biandre ietra arato ngwian biankäre abko rababa ribere kisere tie. <sup>5</sup> Ye erere bkänä, niaratre di nuäi nuäi, yebti ta ngwian bianba bári kabre kwetre, ye abko ngwian ñan biandre kore kwetre ti näma nütüre. Abti ngwian ye bärire mda abko niaratre ara jire kákwe ja mikaba au ni Dänkien Jesukristo kisete, bti nun kisete arato, Ngöbö tö namani ño, ye erere nuenba kwetre. <sup>6</sup> Ye mden kisete, Tito nämanena ngwian ükekrö käne, ye kwrere rikadreta ngwian ükekröta mun känti yete abko tikwe ribeba ie. <sup>7</sup> Mun abko tä ji ngwena käne jäandrän keta kabrebtä abko krörö: Ngöbö diebti mun nena tödeke kwatibe Ngöböbti amne mun nena blite nuäre nuäre Ngöbökrä. Erere arato, Ngöböökwe mun mikana töbtä amne mun tä juto biare ni mda mda die mikakäre. Amne ni mda mda taredre ño abko nunkwe bā mikani mun okwäbti amne nükanina gare munye. Erere arato munta ni mda mda tarere. Ye kwrere arato, munkwe ji ngwian käne ja moto mikabtä kuin ngwian biankäre. <sup>8</sup> Ne abko ñan titä ngwian biamna kisere munye, käta niere kore, akwa nitre tödekaka Jesubti mda mda tä juto biare ngwian bien abko ti tö mikai gare munye, käta niere kore. Munta ti tarere era bkänä ya abko ti tö gai, käta kä bien kore arato munye, <sup>9</sup> ñobtä ñan angwane ni Dänkien Jesukristo ngämi nüke kä nebtä, känenkri niara nämane jäandrän jökrä bkäne kä käinbti, akwa mun rabadre jäandrän Ngöböökwe bkäne kri, abkokäre niarakwe ja mikani bobre mun kräke, ye abko garera munye, aisete titä niere kore munye.

<sup>10</sup> Mdakäre abko, munkwe ngwian biandre ño metre, yebtä titä töbike ño abko ti bike niere krörö munye mun die mikakäre: Kä känenente mun nikani ngwian ükekrö, ye ngwane nitre gätäkä Jesu käbti nere temen, ngätäite munkwe ja töi mikani sribi kuin ne nuene käne amne, ñan mun nikani ngwian ükekrö jirekäbe, akwa kä namani juto munbtä sribi ye nuenkäre, akwa ñan namani bare täte munye. <sup>11</sup> Ne aisete, kä namani juto munbtä ngwian bien kena, ye kwrere munkwe kä mika juto jabtä sribi ye mikakäre bare täte

mtare. Ngwianta nuäi nuäi munkwe biandre, ye erere munkwe bian ja moto kuinbti, <sup>12</sup> ñobtä ñan angwane ni töta nebe jäandrän biain era metre ja moto kuinbti amne jäandrän tä nuäi nuäi nikwe abko erere nita bien, ye abko dbe Ngöbökrä amne Ngöböta kaen ngäbtä ja moto kuinbti nie arato. Jäandrän ñakare nikwe, ye abko Ngöböta kärere ñakare nie.

<sup>13</sup> Mdakäre abko, ñan munkwe jäandrän munkwe biandre jire jökrä ni mda mda die mikakäre abti mun rabadre jäandrän mdei nike abko tita niere, akwa mun amne ni mda mda rabadre jäandrän bkäne ja kwrere jökrä, ie ti tö, aisetetita niere kore munye. <sup>14</sup> Mtare mun jäandrän bkäne kabre krübate abko ñan tä nebe krüte munye. Jäandrän ye abko nitre tödekaka Jesubti nünanka juta Jerusalénte tä mdei nike, aisetetita kä tärä munye niaratre die mikakäre. Erere arato, köbö mdabti mun rabadre jäandrän ño ño mdei nike amne niaratre rabadre jäandrän ye bkäne kabre arato angwane, mun die mikadreta kwetre arato. Ye kwrere mun rabadre jäandrän bkäne ja kwrere jökrä. <sup>15</sup> Kukwe yebtä Moisékwe kukwe tikani abko erere Ngöbö Kukwei käta niere krörö:

Ni ruäre kákwe mana ükaninkrö kabre, akwa kwetani jökrä kwetre angwane, namaninte ñakare ietre.

Amne ni ruäre abko kákwe mana ükaninkrö braibe, akwa namani täte ietre arato amne mrö nikani ñakare kwetre, <sup>Exodo 16.18</sup> abko nieta kore Ngöbö Kukweibtä.

### Pablokwe Tito juaninta nebe Corinto

<sup>16</sup> Ti mräkätre, tita mun tarere, aisetetita käre ti töita munbtä, ye kwrere Ngöbökwet Tito töi mikani mun tarere, aisetetita niara töita käre munbtä, yebtä abko tita kuin niere Ngöböye. <sup>17</sup> Tito abko töi näma rikabtä basareta munye yete, aisetetita tikwe juanbata mun känti yete angwane, ja näin nieba kwe tie, aisetetita ja töi jenbti Tito bike nikenta basare munye. <sup>18</sup> Angwane tita ja mräkä tödekaka Jesubti juen iti Tito mukore nebe mun känti yete. Ja mräkä ye abko tä sribire kuin Ngöbö kukwei kuin yebtä, aisetetita ja mräkätre tödekaka Jesubti tä gätäre kä ngrabare temen Macedonia nete abko käta blite kuin jökrä niarabtä. <sup>19</sup> Mdakäre abko, ngwian bianta munkwe ja moto kuinbti, ye nun rikadre ngwian Jerusalén angwane, ja mräkä ye rikadre siba nunbe nun die mike, abkokäre nitre tödekaka Jesubti käkwe dianinkä sribi nuenkare nunbe. Sribi nuenta nunkwe, ye abko ni Dänkien Jesu mikakäre ütiäte jae amne nun tö ni mda mda die mikai abko nunta bä mike, aisetetita ja mräkä dianinkä sribi nuenkare kore nunbe abko tita juen Titobe yete. <sup>20</sup> Nunta ngwian ükekrö ño ño, ye dokwäre ni mda mdakwe ñan ñäkädre blo nun rüere, ie ti tö, aisetetita ja mräkä mda juen kore Titobe. <sup>21</sup> Erere arato, ngwian biani, nebtä ñan nun tö jäandrän jökrä nuein kuin metre ni Dänkien aibe okwäbti, akwa ni mda mda okväbti arato, aisetetita ja mräkä ye juen kore Titobe.

<sup>22</sup> Mdakäre abko, tita ja mräkä mdara jire juen Tito mukore amne ja mräkä mda yebe. Ni ye abko kä juto krübate btä sribire abko tä bä mike tuadre bätäkä ngwarbe jabtä ti okväbti amne, mtare bäri munkwe ja kukwei mikadi täte käkwe ngwian biandi abko ruen ie, aisetetita juen siba nebe yete. <sup>23</sup> Angwane Tito abko btä ni mdakwe kukwe ngwiantari munye angwane, Tito abko sribi muko tikwe amne tä sribire gware tibe mun die mikakäre, munkwe nie kore. Ja mräkä nibu yebtä kukwe ngwiantari munye angwane, niaratre abko nitre gätäkä Jesu käbti Macedonia nete käkwe dianinkä juandre nunbe amne, niaratre tä Kristo mike ütiäte jae abko munkwe nie. <sup>24</sup> Erere arato, nanta mun käkitekä, ye abko kukwe era erere nanta niere, ye kwrere rabadre gare ja mräkätre tödekaka Jesubti ie Macedonia nete, abkokäre munkwe ja moto mika kuin ja mräkä ye kräke amne, munkwe ñan ti mika ja gaire abko ti tö ribei munye.

### 9

<sup>1</sup> Munta ngwian ükekrö, yebtä tikwe ñan kukwe tikadre mda munye ruen tie, <sup>2</sup> ñobtä ñan angwane bäri mun tö ngwian biain abko gare kuin tie. Kä känente jire abti kä nüke mtare mun nünanka kä Acayate tö ngwian biain bäri ja mräkätre die mikakrä abko tita niere ja mräkätreye Macedonia nete. Munta juto biare ngwian bien, abtä tita mun

käikitekä, ye abko tä ja mräkätre Macedoniabo die mike, aisetet niaratre tö ja mräkätre die mikai bäri munbe gware. <sup>3</sup> Mun abko tä juto biare ngwian bien, yebtä tita mun käikitekä ja mräkätre nete okwäbti, akwa ti kukwei rabadre bäri ütiäte, abkokäre tita ja mräkä juen nibu Titobe yete ngwian ükekrö. Mun rabadre ja mike juto bkänä ngwian bien niaratre okwäbti, abkokäre tita juen, <sup>4</sup> ñobtä ñan angwane nunta tödeke kribäte munbti, käta mun käikitekä käre abti nane ja mräkätre Macedoniabo nete rikadre ruäre tibe nebe mun känti angwane, munkwe ñan ngwian biandre täte jökrä, ye ngwane munkwe nun mikadre ja gaire angwane, nun tätre blite ngwarbe kuin munbtä, kwrere nun bä rabadre. Yebtä abko rabadre gaidre kri munkrä au abko känenkri tita mun mike mokre. <sup>5</sup> Ti ngämi niken, ye känenkri munkwe ngwian biandi munkwe niebare, ye erere munkwe mikadre biare abko ja mräkätre nimä ye rikadre niere munye abko rabadre bäri kuin munkrä ruen tie, aisetet tikwe niaratre juanba käne basare munye yete. Munkwe ngwian biandre ja moto kuinbti, ie ti tö rababa amne ñan munkwe biandre käbäbti ta abko ie ti tö rababa, aisetet tikwe niaratre juanba kore mun mike mokre.

*Pablokwe ngwian bä mikani nurabtä*

<sup>6</sup> Ti bike ngwian bä mike nura kwrere mda, ne munkwe ngwian töre käre jae abko krörö: Nire nire käta nura nökö chi abko käta nura ngwä ötö chi amne, nire nire tä nura nökö kabre abko käta nura ngwä ötö kabre arato. Ye kwrere arato, munkwe jändrän biandre kabre Ngöbökrä, ye ngwane Ngöbökwé jändrän kuinkuin biandi kabre munye. <sup>7</sup> Ye abko, munkwe ngwian biandre nuäi nuäi btä munta töbike, ye erere munkwe bian, akwa munkwe ñan biandre ja moto ulire bti amne ñan ni mdata biamna, ñobtä ñan angwane kä nuäre nibtä ngwian bien, ni ye abko Ngöböta tarere. <sup>8</sup> Munkwe jändrän biandre kore Ngöbökrä angwane, Ngöbökwé mun die mikadre kri, käkwe jändrän bätäkä ngwarbe biandre kabre munye amne, mun rabadre jändrän jökrä bkäne täte nünankrä. Ye angwane, jändrän yebti mun rabadre ni mda mda die mike, abkokäre Ngöbökwé biandre munye. <sup>9</sup> Kukwe yebtä abko Ngöbö Kukweita niere krörö:

Ni bobre bobre, ie Ngöbökwé jändrän biani kabre ngwarbe amne, käre Ngöböta ja moto  
mike kuin ni mda mdakrä,  
abko nieta Ngöbö Kukweibtä.

*Salmos 112.9*

<sup>10</sup> Ngöböta jändrän bien kore nie, yebtä ti bike ngwian bä mike nura kwrere abko krörö: Ngöbö abko tä nura bien nökadre amne, mrö kwetata nikwe abko Ngöbö ara käta bien. Ye mden kisete, Ngöbö ara jire käkwe nura biandi kabre munye nökadre amne Ngöbö ara jire käkwe mikadi niren, aisetet mun di rabadi ja moto mikakrä kuin jändrän bien bäri Ngöbökrä, ye abko käkwe ni kwati die mikadi. <sup>11</sup> Munkwe jändrän biandre kabre ni mda mda die mikakrä, abkokäre Ngöbö diebti mun rabadre jändrän bätäkä ngwarbe bkäne kabre amne, munkwe biandre ja moto kuinbti amne, ngwian ükakröta munkwe abko munta bien ngwiandre nunye, ye rabadi ja mräkätre kisete angwane, käi rabadi nuäre btätre, käkwe kuin niedi Ngöböye. <sup>12</sup> Ñobtä ñan angwane munta ngwian juen, ye rabadi ja mräkätre Jerusalénbo kisete angwane, jändrän ñakare kwetre, ye rabadi kisete angwane, bäri jändrän ye köböire abko rabadi kuin niere kabre Ngöböye, <sup>13</sup> ñobtä ñan angwane Ngöbö kukwei kuin Kristobtä abko mikata täte munkwe munta niere, ye mden erere munta mike täte, käta jändrän juen ja mräkätre Jerusalénbo kräke amne ni mda mda kräke. Munta ja moto mike kuin, käta jändrän bien kore, yebtä niaratre käkwe Ngöbö käkitadrekä. <sup>14</sup> Mdakäre abko, Ngöböta ja moto mike kuin mun jökrä kräke, aisetet munta ja mräkätre die mike, yebtä abko niaratre tä mun tarere kri, käkwe blitadi Ngöböbe munkrä. <sup>15</sup> Ngöbökwé jändrän kuin ütiäte kri biani ngwarbe nie abko Jesukristo ara, yebtä abko kukwe ñan kwandre jire kwati bti ni raba kuin niere Ngöböye. Tita kuin niere Ngöböye Jesukristobtä.

<sup>1</sup> Kristo abko moto jäme ja mikaka bobre nibtä, ye kähti abko ti Pablo bike kukwe ribere krörö munye: Tita nebe mun känti yete angwane, mun jüräta nebe tibtä, abti tita nebata mente temen, käta tärä tike munye angwane, tita ja bää mike krübäte, munta niere tibtä. <sup>2</sup> Ye abko ti näinta basareta munye yete angwane, tita nüne ni tödekkaka ñakare Jesubti kwrere, käta jäandrän ükete jakrä au abko ni ruäre mun ngätäite tä niere tibtä. Ni ye kräke, ti rükadre ja bää mike krübäte ruen tie, akwa ye abko ti ñan tö nuein, aisetet munkwe ñan ti ngwian ja bää mike krübäte yete, käkwe ti kukwei mikadre täte mtare abko ti tö ribei munye. <sup>3</sup> Ti abko tä nüne kä nebtä mun kwrere bkänä, akwa ñan ni kä nebtä tä rüre, ye kwrere tita rüre Ngöbö rüe rüere. <sup>4</sup> Ye abko, jäandrän bti ni kä nebtä tä rüre, ye kwrere bti tita rüre ñakare, akwa Ngöbö di kri käta jäandrän jökrä ribi ribi niara rüere ye juen ngwarbe, ye aibebti tita rüre kukwe taretare ngwarbe ngwarbe rüere, aisetet ni mda mda tä ti kite ngise ngwarbe abko kukwei tita bää mike ngwarbe. <sup>5</sup> Erere arato, Ngöbö kukwei ñan rabadre gare ni mda mdaye, abkokäre nire nire käta bike kri amne tä kukwe mike Ngöbö Kukwei rüere, ye ben tita blite kukwe kwetre bää mikakäre ngwarbe. Mdakäre abko, ni jökrä käkwe tödekkadre metre Kristobti, abkokäre tita ni jökrä töi kwite tödeke bti. <sup>6</sup> Erere arato, mun jökrä käkwe Kristo mikadre täte era metre angwane, nire nire ñan tä Kristo kukwei mike täte abko erere ti tädi juto biare mike ja ngie nuen.

<sup>7</sup> Kukweta ño era metre, yebtä munkwe töbika kuin ja käne amne nire abko jen Kristokwe ruen era metre jabtä ie, ni ye abko ie ti jen Kristokwe arato abko rabadre gare metre. <sup>8</sup> Kristo käkwe ja di biani tie, ye tita niere bäre bäre ja bää mikakäre ütiäte, akwa yebtä tita nebe ja gaire ñakare, ñobtä ñan angwane Kristo käkwe ja di biani tie mun die mikakäre nüne bäri metre Kristokrä amne, ñan ja di biani kwe tie mun di käintbekrä. <sup>9</sup> Tita tärä tike munye, ye abko mun rekvetadrekä ti käne, abkokäre tita tike, mun ñan raba nütüre kore, <sup>10</sup> ñobtä ñan angwane ni ruäre yete käta niere krörö tibtä: Ti mobe temen käta tärä tike munye angwane, tita ñäke taretare munye amne tita kukwe taretare mike mun kötärä, akwa tita nebe mun ngwärekri angwane, ti ngwarbe, di ñakare amne, ti blite ñakare kuin ni töbtä kwrere, akwa täräbti abko tita ja bää mike krübäte abko tä niere tibtä. <sup>11</sup> Akwa nire tä ñäke kore tibtä, ye abko ie kukwe krörö rabadre gare arato: Tita mobe mun okwä bäre angwane, tita kukwe taretare tike täräbta munye abko nieta kore tibtä, akwa tita kukwe tike munkrä, ye nire nire käkwe ñan mikadre täte angwane, ti rabadi yete mun ngwärekri angwane, tita tärä tike ño, ye kwrere arato tikwe ja mikadi mun ngwärekri, aisetet munkwe ñan ja ngöka.

<sup>12</sup> Nitre ja dikaire au, ye abko ben ti ñan raba ja gaen jire chi amne, ti ñan raba ja bää mike jire chi niaratre kwrere, akwa niaratre abko käta kukwe niere ngwarbe, käta niken ja töi ñäke jakrä au amne tätre ja bää mike ja kwrere kwärikwäri, akwa tätre dre nuene metre ñan tä nebe gare ietre. <sup>13</sup> Akwa Ngöböökwe kä tärä mikani nebe mdente sribikäre tie, yebti ta ti ñan rikadre jire ja bää mikakäre ütiäte, nitre dirikä blo tä nuene ye kwrere, ñobtä ñan angwane Ngöbö ara jire käta kä tärä mike sribikrä tie, aisetet Ngöbö ara jire käkwe kä biani tie abko köböire ti namani mun känti Corinto yete. <sup>14</sup> Ye mden kisete, Ngöböökwe kä tärä mikani nebe mdente sribikrä tie, yebti ta tita niken ñakare, aisetet Ngöböökwe kä biandre ñakare tie sribikäre mun känti yete angwane, ti ñan rabadre nebe käne mun känti yete. Akwa Ngöböökwe kä tärä mikani nebe yete sribikäre tie, aisetet ti namani Ngöbö kukwei kuin Kristobtä ngwena käne munye yete. <sup>15</sup> Ngöböökwe kä tärä mikani sribikrä tie, yebti ta tita niken ñakare ja käikitakäre sribi ni mda mdakwe yebti. Akwa mun jatadre tödeke bäri mda Ngöbööti, abkokäre ti tö sribire bäri mda mun ngätäite yete, akwa Ngöböökwe kä tärä mikani mdente sribikrä tie, ye erere känti ti tö sribire. Erere arato, mun rabadre tödeke bäri Kristobti angwane, ti tö rikai bäri mentokwäre mda, <sup>16</sup> kukwe kuin Ngöböökwe Kristobtä mike gare ni mda mdaye arato. Akwa ni mda mda nebe dirire ñakare, ye känti ti tö rikai angwane, ti ñan tö bikai kri sribi ni mda mdakwe yebti, aisetet ni mda mda tä sribire, ye känti ti ñan tö rikai. Ni mda mda nükani mun ngätäite käta mun ngökö, ye kwrere ti ñan tö nuein, <sup>17</sup> ñobtä ñan angwane Ngöbö Kukwei käta niere krörö:

Nire nire tö ja käkitakä au käkwe ni Dänkien Ngöbö käkitaka jirekäbe, [Jeremías 9.24](#)

abko nieta Ngöbö Kukweibtä, <sup>18</sup> ñobtä ñan angwane nita ja käkitekä au, ye abko ñan tä ni mike ütiäte, akwa ni Dänkien ara jire tä ni käkitekä, ye abko bäri ütiäte kri.

## 11

### *Pablota blite nitre bikaka Jesu kukwei ngwianka yebtä*

<sup>1</sup> Ni töi ñakare käta blite ngwarbe kwäräkwärä, ye kwrere ti bike blite munbe, akwa munkwe ti kukwei nua bätärekä abko ti tö ribei munye. <sup>2</sup> Tita mokrere krübäte munbti, akwa tita mokrere munbti, ye abko tä kite Ngöböökri, ñobtä ñan angwane meri batí kaibe deme abko rün tö ngibiai deme brarekrä, ye kwrere ti tö mun ngibiai deme nitre dirikä blo ye ngäniene, mun mikakäre ni brare itibe kisete. Ni brare kisete tikwe mun mikadre, ni ye abko Kristo ara. <sup>3</sup> Mtare, ja töi metrebtí munta Kristo tarere metre, akwa kä jürä krübäte tibtä, ñobtä ñan angwane kira Satana kákwe ja bá mikani tbi kwrere abko nämane bäri töbtä ni ngökabti, kákwe Eva ngökani, nane ye kwrere munkwe ja ngökamna nitre dirikä bloye amne mun töi kwitadre kwetre amne mun töi ñan rabadre kwatibe Kristobtä abko jüräta nebe tibtä. <sup>4</sup> Tita niere kore munye, ñobtä ñan angwane Ngöbö kukwei kuin Jesubtä diribarera tikwe munye, yebti ni mda mda tä dirire bá jene munye Jesubtä, ye abko munta kaen ngäbti kuin amne munta kukwei mike ütiäte. Erere arato, Ngöbö Üai era metre kani ngäbti munkwe, yebti munta üai mda kaen ngäbti. Erere arato, Ngöbö kukwei kuin Jesubtä munkwe kanina ngäbti, yebti mtare munkwe Ngöbö kukwei mda kadre ngäbti nieta munye, erere munta kaen ngäbti. Ye mdenbtä tita niere kore munye. <sup>5</sup> Akwa nitre bikaka Jesu kukwei ngwianka krikri jatani ti jiebti, yebtä ja ruen ñakare bobre tie. <sup>6</sup> Ti abko ie blita gare ñakare kuin ni mda mda ngwärekri nitre bikaka Jesu kukwei ngwianka krikri ye kwrere, akwa Ngöbö kukwei kuin Jesubtä ye abko gare kuin metre tie. Ye mden kisete, ti nämane mun känti yete angwane, ti nämane dre dre nuene angwane, Ngöbö kukwei gare metre tie abko ti nämane bá mike jabtä mun okwäbti.

<sup>7</sup> Mdakäre abko, tikwe Ngöbö kukwei kuin Jesubtä mikani gare munye angwane, mun rabadre ütiäte, abkokäre tikwe bikaba tidrä, kákwe sribi ütiä käräba ñakare munye. <sup>8</sup> Yebtä tikwe ja mikani ngite ya? Ñakare jire chi. <sup>9</sup> Ja mräkätre tödekaka Jesubti kä mda mda känti, ye kákwe sribi ütiä biani kiakia tie, amne tikwe kani ngäbti ietre, ye köböire abko tikwe sribiba ngwarbe munbe. <sup>10</sup> Erere arato, ti nämane mun ngätäite yete angwane, ti nämane nebe jäandrän mdei nike ruäre angwane, tikwe sribi mikani ñakare mun iti kisete, ñobtä ñan angwane jäandrän mdei nika nämane tikwe abko ja mräkätre Macedoniabo nämane nüke angwane, nämane bien tie. Tikwe sribi mikani ñakare jire mun kisete, ye kwrere tikwe nuendi janknu. <sup>11</sup> Tita ñäke kore, yebtä abko tita mun tarere ñakare munta nütüre ya? Ñakare. Mun tare kri tikwe, ye abko gare kuin Ngöböye, aisetet mun tare ñakare tikwe, munkwe ñan nütü. <sup>12</sup> Ni mda mda tä nüke dirire mun ngätäite, ye abko ie ja ñan rabadre ruen ütiäte ti kwrere, abkokäre tikwe ñan kä biandre jire chi ietre sribikäre ti kwrere amne tita sribire, ye kwrere tikwe sribidi janknu munbe. <sup>13</sup> Tita niere kore, ñobtä ñan angwane nitre ye abko ñakare Kristo kukwei ngwianka era metre amne niaratré abko ni ngökaka, akwa tätre ja bá mike Jesu kukwei ngwianka kwrere. <sup>14</sup> Akwa niaratré tä näin kore, ye abko ñakare kukwe bá jene, ñobtä ñan angwane Satana ara jire käta ja bá mike angele kä trä ngwente Ngöböökwe kwrere. <sup>15</sup> Ye mden kisete, sribikätre Satanakwe abko tätre ja bá mike ni sribikä metre Ngöböökwe ye kwrere, yebtä munkwe ñan töbikadre kri. Akwa niaratré tä näin ni ngökö kore, ye dokwäre Ngöböökwe mikadi ja ngie nuen mrä.

### *Pablota ja tare nike, btä tä ja käkitekä*

<sup>16</sup> Ti bike niereta bobuta krörö munye: Ti abko töi ñakare, ye munkwe ñan nütü jire chi tibta, akwa ti töi ñakare muta nütüre janknu tibta ne ngwane, ni töi ñakare, ye kwrere jire ti bike blite angwane, munkwe ti kukwei sua. Ti tö blitai ni töi ñakare kwrere ja käikitakakäre chi. <sup>17</sup> Tikwe ja käikitarekä kore, ye kwrere ti Dänkien Jesu käkwe ñan ja käikitadrekä, akwa ti bike blite kore ni töi ñakare kwrere ja töi jenbti au, <sup>18</sup> ñobtä ñan angwane ni tärä mun ngätäite käta ja käikitekä au, ni tödekaka ñakare Jesubti tä ja käikitekä au ye kwrere, aisetet i bike ja käikitekä siba niaratre kwrere. <sup>19</sup> Mun abko töbtä kri amarebti nitre ni ngökaka töi ñakare tä mun känti yete abko ie muta olo ketete jäme. <sup>20</sup> Erere arato, tätre mun mike ja kukwei mike täte angwane, muta kaen ngäbti jäme. Mdakäre abko, tätre jändrän denkä ngwarbe munkän, tä mun ngökö amne tä bätä ngwen munbtä, tä mun mete ngwärebä, akwa muta kaen ngäbti jäme. <sup>21</sup> Akwa ti abko käkwe ja mikani ñakare krübäte jire chi dirikä mda mda ye kwrere, akwa tikwe ja mikani bobre, di ñakare mun okwäbti yete, yebtä abko tita nebe ja gaireta.

Akwa nitre mun ngökaka tä ja käikitekä au, aisetet ni töi ñakare käta ja käikitekä, ye kwrere ti bike ja käikitekä krörö arato: <sup>22</sup> Niaratre abko hebreore amne ti hebreo arato. Niaratre abko israelita amne ti israelita arato. Niaratre därebare Abrahamkri amne ti därebare Abrahamkri arato. <sup>23</sup> Mdakäre abko, ni töi ñakare käkwe blita, ye kwrere jire ti bike niere krörö mda: Niaratre abko sribikä Kristokwe tätre niere, akwa ti abko bäri sribikä Kristokwe niaratre ngwä abko ti bike bå mike krörö: Tikwe sribibare bäri tare nitre ni ngökaka tä mun ngätäite yete ye ngwä. Erere arato, sribibä Kristokrä ti kitani ngite bäre bäre niaratre ngwä amne, ti kwata metani bäri niaratre ngwä arato amne bäre bäre bäsü ti krütani arato sribikä Kristo kräke niaratre ngwä. <sup>24</sup> Erere arato, bärake jire nitre israelita käkwe ti kwata metani bä grebti bä jätäbti bä ökän batire batire amne <sup>25</sup> bämä jire nitre romanobo käkwe ti kwata metaba kri otobti amne batit i rätäka jäbti ti kämikakäre. Erere arato, ti nämane näin rute mrenbti angwane, bämä ru rikaba ñöte nguse ti ngöi jökrä, ye ngwane köböiti dibire rare tikwe jübakaba mrenbti amne bäsü ti müre reketaba ñöte. <sup>26</sup> Mdakäre abko, kukwe kuin Kristobtä titi ngwena ni mda mdaye, yebtä tikwe dikakabarera kabre kwäräkwärä amne dikakabtä kore ñö krikri jite käkwe ti rätäka bäre bäre amne nitre gokä käkwe ti rätäka bäre bäre ji ngrabare. Erere arato, nitre israelita mda mda tödekaka ñakare Jesubti ja rüere tibe ye käkwe ti rätäka amne nitre nünanka juta mda mdabti ye abko näma ti rätekä kri arato kukwe kuin Jesubtä diri dokwäre kore. Mdakäre abko, juta krikri te ni kwati käta ti rätekä. Erere arato, titi nikken kä mdabti juta bäre mento amne titi nikken mrenbti angwane, käre ti rätäkä amne nitre dirikä ngwarbe mda mda, ye käre tätre ti rätekä arato kukwe kuin Kristobtä ngwian dokwäre ti rätäkäta kore. <sup>27</sup> Erere arato, tikwe sribiba tare krübäte amne tikwe ja tare nikaba kri amne bäre bäre tikwe kibiaba ñakare sribibä. Mdakäre abko, tikwe mrö nikaba krübäte amne tikwe tomna mdei nikaba kri arato. Bäre bäre tikwe mröba ñakare amne tikwe kä tibo nikaba bäre bäre amne bäre bäre dän ñan rababa tie amne tikwe ja bütie nikaba arato. Kukwe kuin Kristobtä titi nikken ngwena kwäräkwärä, yebtä abko titi ja tare nike kore. <sup>28</sup> Kukweta nakenkä kore tibta, ye bärire mda abko kukwe mda mda tä kite ti rüere, ye abko tribe doboko kwrere jire tä kite mate ti kötarä angwane, nitre gätäkä Kristo käbti, yebtä abko titi nebe töbike kri mda krörö: <sup>29</sup> Mun ruäre dita krüte näin janknu Kristobe, ye ngwane ti dita krüte munbe gware siba. Amne ni tödekaka Jesubti ye tä nikken ji blobti ni mda köböite, ye ngwane ti motota nebe romon ni tödekaka Jesubti ye dokwäre.

<sup>30</sup> Amne tikwe ja käkitadrekä kore ne ngwane, ti bobre di ñakare, yebtä abko tikwe ja käkitadrekä. <sup>31</sup> Amne Ngöbö, ni Dänkien Jesu Rün kwe aibe ni rabadre käkitekä kärekäre, ye okwäbti titi kukwe era erere niere abko gare kuin ie. <sup>32</sup> Mdakäre abko, ti näma juta Damascote angwane, gobran sribikä jrei Aretas kräke ye käkwe nitre rükä mikani jukwebtä jutate yete ti kakäre ngite, <sup>33</sup> akwa nitre tödekaka Jesubti näma ruäre yete abko käkwe ti mikaba kutiate, käkwe ti gibakaba bentanante ta timon kite ta juta yete angwane, tikwe kwäräbeba kore nitre rükä yebtä.

## 12

*Ngöböökwe jäandrän mikani tuare köböre Pabloye*

<sup>1</sup> Kukwe rakakaba kore tibtä, akwa tikwe ja käikitadrekä au kukwe yebtä abko ñan rabadre ti mike bärí ütiäte ruen tie, akwa ni Dänkien Jesu käkwe kukwe mikani tuare bäre bäre köböre kwrere tie abko btä ti bike blite janknu abko krörö: <sup>2</sup> Kä kwä jätäbti kobkära, ti näma tödeke Kristobti angwane, ni Dänkien nikani ti ngwena mobe käin nebe Ngöbö ara jire känti kä käinbti. Ye känti ti jänikani abko gare kuin tie, akwa ti nikani metre kore ya o ti üai aibe jänikani ya abko gare ñakare tie, akwa Ngöbö aibe ie gare. <sup>3-4</sup> Akwa ni Dänkien nikani ti ngwena nebe kä kuin deme Ngöböökwe känti, ye abko nikani ti ngwena ño metre abko gare ñakare tie, akwa kä ye känti tikwe kukwe kaibe tiebe kukwei nuaba amne kukwe ye abko ti ñan raba niereta jire chi. <sup>5</sup> Kukwe nakaninkä kore tibtä, yebtä tikwe bikadre kri, akwa yebtä ñan tikwe bikadi kri au, akwa ti bobre, di ñakare, yebtä abko tikwe bikadi kri. <sup>6</sup> Ye abko, tikwe kukwe tuaba, ye tikwe niedre ni mda mdaye bikakäre kri, ye ngwane tikwe ñan kukwe niedre jire ni töi ñakare kwrere ruen tie, ñobtä ñan angwane tikwe kukwe era erere niedre. Akwa ti ñan tö bikai kri au kukwe kore btä, ñobtä ñan angwane kukwe kore, yebtä ni mda mdakwe ti mikadre ütiäte Jesu kukwei ngwianka kwrere, ie ti ñan tö, akwa tita nüne metre amne tita Ngöbö Kukwei mike gare metre, yebtä ni mda mda käkwe ti mikadre ütiäte, ie ti tö.

<sup>7</sup> Tikwe jäandrän tuani, yebtä tikwe ñan bikadre kri, abkokäre tita ja tare nike krörö: Kri tukwä, ye kwrere jire tä nebe ruen ngritekä ti ngrabare tie, ye abko Ngöbö ara jire käkwe Satana tuanimetre jäandrän juen ti mikakäre bren kore abko kisete tita ja tare nike. <sup>8</sup> Tita ja tare nike kore, ye abko ti Dänkien käkwe diandrekä tibtä abko tikwe ribebarera bämä jire ie, <sup>9</sup> akwa niarata niere krörö tie: Tita ma tarere ja moto kuinbti, ye aibe rabadre ütiäte makrä, ñobtä ñan angwane ni bobre di ñakare, yebtä abko ti di kri tuata, nieba ti Dänkienkwe tie. Ye mden kisete, ti bobre di ñakare, yebtä bärí ti tö rabadre ja käkitekä, Kristo di kri rabadre täte jökrä tibtä abkokäre. <sup>10</sup> Ye abko, tita nebe ruen bobre, di ñakare tie angwane, ni mda mda tä ñäke taretare tie amne tita jäandrän bätäkä ngwarbe mdei nike, erere arato tita ja tare nike ni mda mda kisete amne, tödekatä Jesubti tita ja tare nike bätäkä ngwarbe, ye abko käi nuäre kri tibtä, ñobtä ñan angwane tita nebe ruen bobre di ñakare tie, ye ngwane abko Kristo di tä nebe bärí kri tibtä, aisetet käta nebe nuäre tibtä.

*Pablota nitre Corintobo tarere kri*

<sup>11</sup> Ni töi ñakare, kwrere jire tita ja bärí mike mun okwäbti, akwa mun ara jire köböite tita nuene kore, ñobtä ñan angwane munkwe ti mikadre ütiäte, käkwe blitadre kuin tibtä, ye ngwane tikwe ñan ja bärí mikadre jire chi ni töi ñakare kwrere. Ti abra ütiäte ñakare bkänä, ñobtä ñan angwane Kristo aibe ütiäte, akwa nitre tä ja bärí mike Jesu kukwei ngwianka krikri, ye abko ñakare bärí ütiäte kri tikrä, aisetet ja ruen ñakare bobre niaratretbä tie. <sup>12</sup> Ni Jesu kukwei ngwianka era metre abko tä bärí mike sribi kwebti, ye erere tikwe bärí mikani krörö mun okwäbti: Ngöbö tä tibe, ye bärí mikakrä tikwe sribi kri ñan tuabare nuenba Ngöbö diebti amne, sribi kri nuenba tikwe, yebtä mun töi ñan rababa krütare. Tikwe nuenba kore angwane, tikwe nünankaba dite jabtä, käkwe ja tare nikaba bätärekä, yebtä abko ti abko Jesu kukwei ngwianka era metre abko tikwe bärí mikabi. <sup>13</sup> Akwa tikwe sribiba mun ngätäite yete angwane, tikwe ja mräkätre gätäkä Jesu käbti kä mda mda känti abko kötärä ti näma sribi mike, kä näma ti die mike, ye kwrere tikwe sribi mikabi ñakare mun kötärä. Ne aisetet sribi kore, aibebtä mun ñakare ja kwrere ja mräkätre mda mdabe tita niere. Tita kukwe nuene kore ne raba mate tare munbtä amne, tita ja mike ngite mun rüiere raba ruen munye ne ngwane, munkwe ti ngite ye dian jökrä jabti ta.

<sup>14</sup> Ti mräkätre, mtare ti nenante juto biare rikakäreta basare bämäkäre munye. Akwa ti näinta ne ngwane, tikwe ñan jäandrän kärädita jire chi munye arato, ñobtä ñan angwane ngwian amne jäandrän mda mda tä munkwe, ñan jäandrän yetari tita niken mun känti yete, akwa mun ye ara rabadre tödeke metre Kristobti, abkotari tita niken yete, ñobtä ñan angwane ti abko mun rün kwrere, amne ngäbäkre rün käta ngwian ükekrö ngäbäkre

kwekwe kräke amne, ñan ngäbäkre käta ngwian ükekrö rün btämeye kräke. <sup>15</sup> Ye mden kisete, ja moto kuinbti ti tö jändrän tikwe gainte jökrä munkrä amne, ti ne ara jire bike ja gaente au mun kräke, mun die mikakäre nüne bäri Kristokrä. Ti mräkätre, *¿tikwe mun taredre bäri mda ne ngwane, ti taredre bäri chi munkwe ya ño ruen?*

<sup>16</sup> Mdakäre abko, tita mun tarere kore, yebtä munta töbike ño abko erere munta töbike gare tie, akwa tikwe ngwian käräba ñakare munye, aise te tikwe sribi mikaba ñakare mun kötära, ye abkodbe munkrä ruen tie. Akwa tikwe bikaba bäri töbtä, abkokänti munkwe ja dokwä mikani kö okwate ti köböite abko ni ruäre tä niere tibta. <sup>17</sup> Ne aise te ti bike kukwe ngwentari krörö munye: *¿Tikwe ni juani ruäre basare munye yete, ye köböire tikwe ngwian dianinkä munkän ya? Ñakare jire chi.* <sup>18</sup> Erere arato, Tito rikadre basare munye yete abko tikwe ribeba ie, ye erere rikaba angwane, tikwe ja mräkä mda juanba ben nebe yete, *¿ye angwane Titokwe ngwian dianinkä munkän sribi ütiäre ya? Ñakare jire, ñobtä ñan angwane Tito amne ti, nun abko tä nüne ja kwrere amne nun töi ja kwrere arato, aise te nun jändrän denkä ñakare munkän sribi ütiäre.*

<sup>19</sup> Tita kukwe niere kore munye, yebtä abko nunkwe ja mikani ngite, aise te nunta ja bää mike ngite ñakare mun ngwärekri, munta nütüre nunbtä, akwa ñakare kore, ñobtä ñan angwane nunta blite era metre Ngöbö ngwärekri amne ni jen Kristokwe käta blite, ye kwrere nunta blite. Jändrän jökrä nuenta nunkwe, ye köböire abko mun jökrä rabadre niren kuin nünakäre bäri metre Kristokrä abko ie ti tö, ti mräkätre tare tikwe. <sup>20</sup> Ti mräkätre, tita blite kore munbe, ñobtä ñan angwane ti rikadre nebe basare munye yete angwane, nane ti tö mun tuai nüne kuin Kristokrä, erere ñan kwandre tie abko jürä kri tibta. Erere arato, mun tö rabadre ti tuai blite ño jabe, ye kwrere tikwe ñan blitadre munbe abko jürä tibta arato. Mdakäre abko, nane munta rüre jabe kwärikwäri amne munta mokrere ni mdabe jändrän kwe dokwäre amne mun moto nebe romon jötrö abko jürä tibta. Erere arato nane mun ruäre kääbärekäbäre amne ni ruäre tä blite ngwarbe ni mda mda rüere, nane ni ruäre abko tä ni mda mda kädriere amne ni ruäre abko tä bike krikri amne ni ruäre tä nüne käme abko tä kä mike nokre, ye abko jürä kri tibta arato. <sup>21</sup> Mdakäre abko, mun kwati kákwe ja mikani ngite, ye abko käi nikani raire ta, akwa nane mun ngämi kukwe käme ye kite temen amne, nane munta ja mike ngite janknu Ngöbö rüere krörö abko jürä nibi tibta: Ni brare tä bike merire jae kwärikväri amne meri tä bike brare jae kwärikväri, erere arato munta ja mike gure tiebetiebe gore ni mda mdabe amne, kukwe kämekäme kore Ngöbö rüere aibe mdei munye, aise te ti näinta basare munye yete angwane, nane mun tädre ja mike ngite janknu kore, yebtä tikwe mun kwati müaidre jakän amne ti rabadre tuen bobre Ngöböye mun ngwärekri abko jüräta nebe tibta arato.

## 13

### *Pablota nitre Corintobo mike mokre mrä*

<sup>1</sup> Ti mräkätre, ti bike nikenta basare bämäkäre munye, akwa mun mda tä ja mike ngite Ngöbö rüere, ye kräke tikwe kukwe ükaite, ñobtä ñan angwane ni nibu ya, ni nimä ya kákwe blitadre ja kwrere niara rüere, ye ngwane niara ngite rabadi gare metre abko Ngöbö Kukwei käta niere. Ne aise te Ngöbö Kukwei käta kukwe niere, ye kwrere tikwe kukwe ükadite. <sup>2</sup> Ti janama basare bobukäre munye yete angwane, tikwe mun mikani mokre ja ngwärekri yete abko erere tita mobe munye angwane, ti bike mun miketa mokre bobuta abko krörö: Ti näinta basare munye yete angwane, munkwe ja mikani ngite, ye abko tikwe ñan diandreta jire munbti ta, akwa tikwe mun mikadi ja ngie nuen, <sup>3</sup> ñobtä ñan angwane Kristo tä blite era metre ti köböire ya abko mun tö gai metre. Kristo abko tä ja mike di ñakare mun ngätäite abko mun ruäre tä niere, akwa Kristo abko tä ja di kri bää mike mun ngätäite. <sup>4</sup> Ye abko, era metre ni bobre di ñakare, kwrere jire Kristo kämikani krusobtä, akwa mtare tä nüne kärekäre Ngöbö di kri köböire. Kristo di namani ñakare, ye kwrere ti di ñakare, akwa tita ketetibe Kristobe kore ne ngwane, Ngöbö di kri köböire tikwe nünandi sribikäre mun kräke.

<sup>5</sup> Akwa mutta tödeke kusatibe Kristobti ya, ñakare ya, yebtä munkwe ja trä tua kuin au amne, mutta tödeke kuin metre ya, ñakare ya, ye munkwe mika ñäräre kuin jabtä au. Kristo Jesu tä nüne munbtä, akwa mutta tödeke ñakare bti ruen munye ne ngwane, Kristo tä nüne ñakare bkänä munbtä. <sup>6</sup> Akwa tikwe ñan sribibare ngwarbe mun ngätäite yete, aise te era metre mutta tödeke Kristobti, ruen tie. <sup>7</sup> Amne munkwe ñan kukwe kämekäme nuendre jire Ngöbö rüere abko tita ribere Ngöböye. Tita blite kore Ngöböbe munkrä, ye abko ñan tikwe sribibare kuin metre abko munkwe bä mikadre, ie ti tö akwa, munkwe jäandrän kuin nuendre metre Ngöbökrä aibe ie ti tö, käta blite Ngöböbe munkrä. Tikwe sribibare ngwarbe tä nebe tuen ni ruäreye, akwa munkwe jäandrän kuin nuendre abko tita ribere Ngöböye, <sup>8</sup> ñobtä ñan angwane kukwe era metre Kristobtä, ye rüere ti ñan raba kukwe mda nuene jire chi, akwa tikwe sribidre jirekäbe kukwe era metre ye kräke. <sup>9</sup> Ne aise te, ti dita nebe ruen ñakare tie, ye ngwane käta nebe nuäre tibtä, ñobtä ñan angwane mun abko rabadre dite dite nüne Kristokrä abko ie ti tö, ne aise te käta nebe nuäre tibtä. Mdakäre abko, Ngöböökwe mun mikadre nünenta kuin metre ja ngwärekri, ie ti tö, aise te tikwe blitadi janknu Ngöböbe mun jökrä kräke. <sup>10</sup> Ti mräkätre, ti ngämi niken basareta munye yete, känenkri tita tärä ne tike tare munye, mun mikakäre mokre, ñobtä ñan angwane ni Dänkien Jesu käkwe ja di biani tie, ye ñan biani kwe tie ni mda mda mikakäre ja ngie nuen, akwa ja di biani kwe tie ni mda mda die mikakäre nüne metre jakrä, aise te ti ngämi niken yete, känenkri tita mun mike mokre kore.

### *Kukwe mrä*

<sup>11</sup> Ti mräkätre, ti bike kukwe niere mrä krörö munye: Munkwe kä ngwian nuäre kri jabtä, ie ti tö amne, munkwe ja töi mika nüne kuin metre Ngöbö ngwärekri. Erere arato, tita kukwe niere munye, ye erere munkwe mika täte amne, munkwe ja töi mika ja näre jökrä amne munkwe nüna jáme jabe kwärikwäri angwane, Ngöbö ni tarekä kri amne kä jáme bianka nie, ye tädi kärekäre munbe.

<sup>12</sup> Mdakäre abko, mutta köbö ngwentari jae angwane, munkwe ja demain era metre kwärikväri. <sup>13</sup> Ja mräkätre jökrä tödekaka Jesubti tä Macedonia nete käta köbö kuin juen munkrä.

<sup>14</sup> Erere arato, ni Dänkien Jesukristo käkwe ja moto mika kuin munkrä amne Ngöbö käkwe mun taredre amne Ngöbö Üai Deme rabadre nekete ketetibe munbe, ie ti tö ti mräkätre. Abko kore se. Ne ngörä.

## Tärä Tikani Pablokwe Nitre Galaciabokrä Gálatas

Pablo kákwe tärä ne tikani nitre tödekaka Jesubti nünanka kä ketareketare temen kä Galaciate ye die mikakäre. Bäsi nitre tödekaka Jesubti Galaciabo jökrä abko ñakare israelitare, aisetetiaratre ngämi tödeke Jesubti, känenkri ñan nämante Kukwe Biani Ngöböökwe Moiséye mike täte. Pablo nikani kukwe kuin Jesubtä mike gare kä ye känti angwane, Kukwe Biani Ngöböökwe Moiséye mikabtä täte abko ni ñan rabadre dianintari abko Pablokwe diribare ietre.

Akwa niara nikanina, abti nitre israelita nükani ruäre Galacia yete nitre tödekaka Jesubti ngätäite abko namani dirire blo nitre tödekaka Jesubti ngökakäre. Nitre Galaciabo kákwe tödekadre Jesubti aibe köböire ñan rabadre dianintari metre, aisetetiaratre Kukwe Biani Ngöböökwe Moiséye, ye abko mikadre täte arato kwetre abko namani dirire ietre. Ye ngäniene Pablokwe tärä ne tikani nitre tödekaka Jesubti mikakäre mokre, ñobtä ñan angwane ni tödekaka Jesubti ruäre kákwe dirikätre blo kukwei mikani ütiäte jae. Pablo abko ñakare Jesu kukwei ngwianka era metre, ñobtä ñan angwane ñan nämante Kukwe Biani Ngöböökwe Moiséye mike ütiäte abko nitre dirikätre blo nämante niere Pablo rüiere.

Jesukristo ara jire kákwe Pablo käräbare sribikäre ja kukwei ngwianka kwrere abko Pablokwe mikani gare ietre. Erere arato, tödeka Jesubti aibe köböire ni ngite ñakare mda Ngöböta niere amne tä ni kaen ngäbti abko Pablokwe niebare amne, ñan Kukwe Biani Ngöböökwe Moiséye mikabtä täte abko Ngöböta ni dentari, akwa ja moto kuin aibebti Ngöböta ni dentari nünakäre Ngöbö Üai köböire abko Pablota mike gare tärä nebtä.

### *Pablota köbö ngwentari*

<sup>1</sup> Ti Pablo, ti ne abko Jesukristo kukwei ngwianka, akwa ñan ni mdakwe ti juani sribi ne nuene amne ñan ni mdakwe ti mikamna sribi ne nuene, akwa Jesukristo ara jire kákwe ti mikani ja kukwei ngwianka amne, Ngöbö Jesu Rün kwe kákwe Jesu mikaninta nire abko kákwe ti mikani Jesu kukwei ngwianka arato. <sup>2</sup> Mun gätäkä Jesu kähti tä kä Galaciate, ye kräke tita köbö kuin juen, ti mräkä tödekaka Jesubti tä nete tibe ben gware. <sup>3</sup> Ngöbö ni Rün nikwe amne Jesukristo ni Dänkien kákwe ja moto mika kuin munkrä amne mun mika nüne jáme kwetre, ie ti tö. <sup>4</sup> Jesukristo kákwe ja mikani müre ketare ni ngite kukwe kämekäme nuenbtä ye diankakäre nibtä. Erere arato, kä käme ne ngwane, ye ngäniene ni rabadre dianintari, abkokäre Jesukristo kákwe ja mikani müre ketadre, Ngöbö ni Rün nikwe tö namani ye kwrere. <sup>5</sup> ¡Ne aisetetiaratre Ngöbö raba käikitankä kärekäre! Abko kore se. Amen.

### *Kukwe kuin Jesubtä ñakare jire mda*

<sup>6</sup> Kristo krütani ni kräke, ye köböire Ngöböökwe ja moto mikani kuin munkrä, kákwe mun käräbare jakrä, ye abko kukwe kuin Ngöböökwe era metre. Akwa nitre ni ngökaka nükani mun känti amne, kukwe mdara jire bäri kuin tätre dirire abko mun kite kaen ngäbti mtare. Abtä Ngöbö mun käräkä abko mun kite gibiekäta jötrö ngwarbe, yebtä abko ti töi ñan tä nebe krütare mda. <sup>7</sup> Akwa kukwe kuin era metre abko ñakare jire mda. Akwa ni mdara jire tä mun töi kwite ngwarbe kwäräkwärä kukwe kuin Ngöböökwe Kristobtä rüere amne, tö kukwe kuin Kristobtä kwitai bä jene mun okwätä. <sup>8</sup> Akwa kukwe kuin Jesukristobtä diribare nunkwe munye, yebtä ta ni mda ya, angele Ngöböökwe kä käinbti ya o ti ne ara jire ya abko jata kukwe mdara jire kuin niere, yebtä abko Ngöböökwe ngürün mika kärekäre näre. <sup>9</sup> Tikwe kukwe niebare käne abko erere ti bike niereta abko krörö: Kukwe kuin Jesubtä kanina ngäbti munkwe, yebtä ni mdara jire jata blite kukwe kuin mdara jire btä angwane, Ngöböökwe ngürün mika kärekäre btä, rabadre Ngöbö bäre mento kä ja tare nikakrä känti kärekäre abko tita niere kore.

<sup>10</sup> ¿Tita blite tare kore munbe ni mda mda moto mikakäre nuäre jakrä, munta nütüre ya o ni mda mdakwe ti mikadre ütiäte, munta nütüre ya? ¿O Ngöböökwe ti mikadre ütiäte sribi tikwe nebtä abko jiebti tita nakwen, munta nütüre ya? Ñakare. Ti tö rabadre ni mda mda moto mikai nuäre jakrä, ye ngwane ti ñan rabadre sribire Kristokrä.

### *Ngöbö aibe käkwe Pablo mikani sribire*

<sup>11</sup> Ti mräkätre tikwe, kukwe rabadre gare munye, ie ti tö abko krörö: Kukwe kuin Jesubtä mikani gare tikwe munye, ye abko ñan kukwe mikanintbe ni kä nebtäkwe.

<sup>12</sup> Erere arato, kukwe kuin Jesubtä ye ñan ni mdakwe niebare tie amne ñan tikwe ja töitikani btä ni mda mdabe, akwa Jesukristo ara jire käkwe mikani gare au tie abko rabadre gare bäri munye, ie ti tö.

<sup>13</sup> Ti mräkätre, nitre israelita ye ngätäite ti ne töi nämane ño kena ye abko kädrie nämane krörö mun okwäbti ruen tie: Nitre Ngöböökwe tä gätäre Jesu käbti, ye rüere ti näma nikene kisere mikakäre ja tare nike kri. Bäri ti tö rababa gainkä jökrä. <sup>14</sup> Mdakäre abko, ti mräkätre israelita ti näire, ye kräke ti näma Ngöbö mike täte bäri metre, aisetet i mika näma bäri ütiäte nitre israelita krikrikwe, ñobtä ñan angwane ti mräkätre kirakira käkwe kukwe ükaninte nuendre nie Ngöbö mikakäre täte, ye abko ti näma mike täte bäri metre jökrä.

<sup>15-16</sup> Akwa ti ngämi därrere, känenkri Ngöböökwe ti dianinkä jenena jakrä. Erere arato, kä nämane nuäre Ngöböbtä ja Odei mike gare tie angwane, Ngöböökwe ja Odei mikani gare tie, käkwe ti käräbare tödeke bti. Mdakäre abko, nitre ñakare israelitare, ngätäite ti rikadre kukwe kuin Jesubtä nire, abkokäre Ngöböökwe ja Odei mikani gare tie. Ngöböökwe ti käräbare kore, ye ngwane tikwe ja di käräba ñakare ni mda mdaye. <sup>17</sup> Erere arato, nitre Jesu kukwei ngwianka bäri känekäne tikrä abko ben ti janama ja tuen ñakare Jerusalén, akwa tikwe tödekaka Jesubti, bti jötrö ngwarbe ti rikaba jirekäbe kä Arabiate. Yebti ti jatabata juta Damascote.

<sup>18</sup> Abti kä rikabara komä ta angwane, ti rikaba Jerusalén ja tuakäre Pedrobe. Ye känti ti rababa köbö jätäbti köbörikebe. <sup>19</sup> Akwa Jerusalén yete abko, ni Dänkien etba Santiago aibe ben tikwe ja tuaba mda, akwa ni mda mda Jesu kukwei ngwianka abko tikwe tuaba ñakare jire mda. <sup>20</sup> Ti mräkätre, Ngöbö okwäbti tita tärä like munye ne abko kukwe era erere tita like. <sup>21</sup> Yebti ti rikaba mda kä Siriate amne Cilicate. <sup>22</sup> Ye ngwane, ja mräkrätre gätäkä Kristo käbti kä Judeate abko ie ti gare ñakare era metre. <sup>23</sup> Angwane blita nämane tibtä aibe nämane gare ietre abko krörö: Ni ye nämane näin kisere ni jiebti ni mikakäre ja tare nike, ni ye abko tä näin kukwe kuin Jesubtä mike gare mtare abko kukwei nuani kwetre tibtä. <sup>24</sup> Abtä Ngöbö käikitankä kwetre tibtä.

## 2

### *Jesu kukwei ngwianka mda mda käkwe Pablo kani ngäbti kuin*

<sup>1</sup> Yebti kä rikabata kwä jätäbti kobkä ta angwane, ti rikabata Bernabébe Jerusalén. Angwane ti rikaba Tito ngwena jabe arato. <sup>2</sup> Ti rikadre abko Ngöböökwe mikaba gare tie, aisetet i rikaba. Ti rababa yete angwane, nitre ñakare israelitare, ngätäite ti nämane sribire ño kukwe kuin Jesubtä mikakäre gare, ye abko tikwe nieba kaibe nitre nämane tuen ütiäte krikri nitre tödekaka Jesubti yeye. Sribi nuenbare tikwe amne sribi nuenta tikwe, ye abko nane ti nämane sribire ngwarbe abko jürä nämane tibtä, aisetet nitre ütiäte krikri ye nämane töbige ño sribi tikwebtä abko ti tö rababa gai era metre, abkokäre tikwe gätäba kaibe bentre.

<sup>3</sup> Akwa ye ngwane abko, Tito nämane näin tibe. Tito abko ni ñakare israelitare. Niara ni griegore, aisetet ñäräkrä ñakare kwatabtä. Akwa nitre ütiäte krikri ye käkwe ñan ja ñäräkrä mikamna jire ja kwatabtä ie. <sup>4</sup> Ye abko, nun abko nenante tikaninte Kristo Jesu köböire, aisetet ñäräkrä nun kwatabtä abko ñakare ütiäte rabakäre ketetibe juta Ngöböökwebe. Akwa nun ne ngätäite abko ja mräkätre ruäre nämane bike tödekaka Kristo Jesubti kwrere abko nükani tiebe nun ngätäite, nunta töbige ño ñäräkrä kwatabtä

yebtä gain jakrä. Niaratre ye abko tö namani nun mikaita Kukwe Biani Ngöbökwé Moiséye ye miketa täte, abkokäre nükani tiebe nun ngätäite. <sup>5</sup> Akwa kukwe kuin era metre Jesukristobtä rabadre kärekäre munbtä, abkokäre nunkwe ñan ja tuametreba töi kwitadre jire chi ja mräkätre yeye.

<sup>6</sup> Akwa nitre tuen ütiäte krikri nitre tödekaka Jesubti mda mdaye, ben tikwe blitaba sribi tikwebtä angwane, rababa tuendbe ietre, aisetekukwe mdara jire nuemna ñakare kwetre tie. Akwa nitre tuen ütiäte krikri, ye nämane sribire nirebe, yebtä titä töbikë ñakare krübäte dikaro, ñobtä ñan angwane Ngöbö ngwärekri ni ja kwrere jökrä.

<sup>7</sup> Angwane Ngöbökwé Pedro mikani kukwe kuin Jesubtä mikaka gare nitre israelitaye, ye kwrere Ngöbö ara jire käkwe ti mikani kukwe kuin Jesubtä mikaka gare nitre ñakare israelitare yeye, ye abko rükaba gare nitre tuen ütiäte krikriye, <sup>8</sup> ñobtä ñan angwane Ngöbö käkwe Pedro mikani Jesu kukwei ngwianka nitre israelitaye, kä namani sribire Pedro köböire amne, Ngöbö ye arabe käkwe ti mikani kukwe kuin Jesubtä ngwianka nitre ñakare israelitare yeye käta sribire ti köböire arato. <sup>9</sup> Ngöbö ara jire käkwe ti mikani kukwe kuin Jesubtä ngwianka amne, ti rabadre sribi nuene kuin, abkokäre Ngöbökwé ja moto mikani kuin tikrä abko rükaba gare Santiagoye, Pedroye amne Juanye. Ye mden kisete, nun kaba ngäbti kwetre sribi muko jakwe kwrere, käkwe kise ngökaba Bernabéye amne tie, kukwe dirita tikwe abko kukwe metre mikäkäre gare. Niaratre nimä ye abko ürä dite dite käta nünenkä dite ju ketatekrä krö ye kwrere nämane nitre tödekaka Jesubti ngätäite amne, nun rikadre kukwe kuin Jesubtä ngwena nitre ñakare israelitare yeye amne niaratre nimä abko rikadre nitre israelita ngätäite abko rababadbe kräke. <sup>10</sup> Akwa nitre bobre bobre abko nunkwe ngwiandre töre jae, käkwe die mikadre, aibe nieba kwetre nunye. Ye erere ti tö rababara nuein arato.

#### *Pablokwe Pedro töi diani*

<sup>11</sup> Akwa bati gätä yebti Pedro janama juta Antioquíate, ti näma sribire ye känti angwane, kukwe ñan nuendre abko erere rababa nuene. Abtä tikwe ñäkäba metre gwärere kukwe krörö btä ie: <sup>12</sup> Nitre ñakare israelitare tödekaka Jesubti ñäräkrä ñakare kwatabtä abko ben Pedro rababa mröre jáme ketetibe. Yebti ni ruäre juani Santiagookwe rükaba nun ngätäite yete. Nitre ye rükaba angwane, Pedro rababa ja denkä jenena amne ñan rababa mröre mda nitre ñakare israelitare yebe, ñobtä ñan angwane ni ruäre nämane niere krörö: Ni brare brare ñakare israelitare tödekaka Jesubti ye ngämi ñäräkrä mike ja kwatabtä, känenkri Ngöbökwé ñan kadre ngäbti era metre. Ye mden kisete, ni ye kwrere abko ben nitre israelita käkwe ñan ja getadre abko ni ruäre nämane niere. Akwa nane nitre nükani ye käkwe ñäkäde rüere mröbtä ketetibe nitre ñakare israelitare ñäräkrä ñakare kwatabtä ben abko jürä rababa Pedrobtä. <sup>13</sup> Pedro rababa kukwe nuene blo kore abko köböite nitre israelita mda mda tödekaka Jesubti Antioquíabo ye ie kukwe nuen näma Pedrokwe, ye rükabtiba arato. Pedro rababa biketa kore, ye abko Bernabé käkwe ja ngwianbata nain ie siba arato.

<sup>14</sup> Angwane kukwe kuin era metre Jesubtä käta nünamna ño, ye kwrere Pedro rababa nüne ñakare ti okwäbti. Angwane nitre tödekaka Jesubti ngwärekri jökrä tikwe ñäkäba krörö ie: Ma abko israelita akwa, nitre reketa Santiagokri ngämi nüke nete, känenkri makwe ñan nünabare ni israelita kwrere, kä nämane mröre nitre ñakare israelitare tödekaka Jesubti ben gware. ¡Ye ñobtä abko nitre ñakare israelitare abko ma tö mikai nüne nitre israelita kwrere mtare se, käta ja denkä jenena niaratrebtä mento! <sup>15</sup> Ma btä ti, ni abko israelita, ye erere ni därebare amne ni abko ñakare kukwe kämekäme nuenkä ni ñakare israelitare kwrere abko ni israelita tä niere jabtä. <sup>16</sup> Akwa Kukwe Biani Ngöbökwé Moiséye, ye mikabtä täte Ngöbökwé ñan ni israelita mikadre metre ja ngwärekri, ye garera nie, akwa tödekabtä Jesukristobti aibe köböire ni ngite ñakare mda abko Ngöböta niere nibtä amne tä ni kaen ngäbti abko garera nie. Ye mdenbtä abko, ni ngite ñakare mda abko Ngöbökwé niedre nibtä amne ni kadre ngäbti kwe, abkokäre ni israelita ne ara jire käta tödeke Jesukristobti. Nita tödeke kwatibe Jesukristobti ye abko bäri kuin, amne ñan Kukwe Biani Ngöbökwé Moiséye mikabtä täte ni ngite ñakare mda Ngöböta niere

nibtä amne tä ni kaen ngäbti, ñobtä ñan angwane Kukwe Biani Ngöbökwe Moiséye ye mikabtä tätē ni ñakare jire iti abko ie Ngöbökwe niedi: Ma ngite ñakare mda, niedi kwe, bti kadi ngäbti kwe.

<sup>17</sup> Ne aisetē tödeka Kristobti, ye aibe köböire ni ngite ñakare mda Ngöböta niere nibtä, abkobti nita tödeke, ye ngwane ti amne nitre israelita jire jökrä ngite arato Ngöbö ngwärekri nitre ñakare israelitare kwrere abko tä nüke gare tie. <sup>18</sup> Nebtä abko Kristo käta nitre israelita mike kukwe kämekäme nuene niedre ya? <sup>19</sup> Ñakare jire! Ye ñobtä ñan angwane tikwe nünabare käme Ngöbö rüere amne ti töi nämane Ngöbö rüere ye tikwe mikadre temen, bti ti arabe rikadre kaen ngäbtita, ye ngwane ti ne ara jire käta ja miketa ngite. Ye kwrere Kukwe Biani Ngöbökwe Moiséye, ye tikwe mikadre temen tödekakäre Jesubti, akwa ja töi jenbti ti rikadreta Kukwe Biani Ngöbökwe Moiséye ye kaen ngäbtita ja mikakäre metre Ngöbö ngwärekri, ye ngwane ti ne ara jire käta ja miketa ngite. Ñan Kristo käta ti mike ngite, <sup>20</sup> ñobtä ñan angwane tita ngite Ngöbö ngwärekri abko Kukwe Biani Ngöbökwe Moiséye ye käkwe mikani gare tie. Abtä Kukwe Biani Ngöbökwe Moiséye, ye tikwe mikani temen tödekakäre Kristobti, ti rabadre nüne Ngöbökrä abkokäre. <sup>21</sup> Kristo müre ketani krusobtä, ben gwaire ti krütani, aisetē mtare tita nüne ñakare au jakrä ja töi jenbti akwa, Kristo tä nüne töbtä amne tä ti jie ngwena. Tita nüne ja ngrabare nebti mtare, akwa tita nüne tödekaré kwärä Ngöbö Odeibti. Niara käkwe ti ara jire tarebare amne ja biani müre ketadre kwe tikrä. <sup>22</sup> Ngöbökwe ja moto mikani kuin kore tikrä, ye abko ti ñan tö mikai ngwarbe, ñobtä ñan angwane Kukwe Biani Ngöbökwe Moiséye ye mikabtä tätē ni ngite ñakare mda Ngöbökwe niedre nibtä amne ni kadre ngäbti kwe, ye ngwane Kristo krütani nikrä rabadre ngwarbe, ütiäte ñakare.

## 3

*Tödektä Jesubti Ngöböta ni dentari*

<sup>1</sup> *Mun Galaciabo, mun abko töi ñakare dikaro!* Nunkwe kukwe diribare munye angwane, Jesukristo müre ketani krusobtä abko nunkwe mikaba gare metre ta mun okwäbti. *¿Ye ñobtä abko munkwe ja ngökamna ni mdaye?* <sup>2</sup> *Monika töbiketa bā jene, yebtä ti töukwe ngwaintari krörö munye:* *¿Kukwe Biani Ngöbökwe Moiséye ye mikabtä tätē Ngöbö Üai nükani nüne munbtä ya?* o *¿Kukwe nuani munkwe Kristobtä angwane, munkwe tödekaní kwatibe bti abko köböire Ngöbö Üai nükani nüne munbtä ya?* Ye niere tie munkwe. <sup>3</sup> *Mun töi ñakare dikaro ya ño amarebti munkwe tödekaní krire Jesubti angwane, mun namanina nüne Ngöbö Üai köböire abti mtare mun tö nünainta ja di jenbti, kā töukwe Biani Ngöbökwe Moiséye mikaita tätē ja mikakäre metre Ngöbö ngwärekri ye.* <sup>4</sup> *Munkwe tödekaní Jesubti angwane, kukwe nakaninkä bätäkä ngwarbe munbtä, ¿ye abko ütiäte ñakare munta nütüre ya?* Munkwe ja tare nikani tödektä Jesubti, ye abko ñakare ngwarbe raba ruen tie. <sup>5</sup> *Mdakäre abko, Ngöböta ja Üai bien munye amne tä sribi kri ñan tuabare nuene mun ngätäite angwane, ¿ñobtä tä nuene?* Ñan Kukwe Biani Ngöbökwe Moiséye mikabtä tätē abko köböire Ngöböta sribi ye nuene, akwa kukwe kuin Jesubtä niebare munye angwane, munkwe tödekaní Jesubti, ye aibebtä Ngöböta sribi nuene kore mun ngätäite.

<sup>6</sup> *Munkwe tödekaní Jesubti, ye kwrere Abraham käkwe tödekaní Ngöböti abko köböire niara ngite ñakare mda Ngöbökwe niebare btä amne kani ngäbti kwe.* <sup>7</sup> *Ye mdien kisete, nitre israelita käta ja Abraham mräkä niere, ñobtä ñan angwane Abrahamkwe Ngöbö mikani tätē metre nieta kwetre.* Akwa era metre, Ngöbö ngwärekri, nire nire tä tödeke Ngöböti Abraham kwrere, ye abko Abraham mräkä era metre raba gare munye, <sup>8</sup> *ñobtä ñan angwane kā ne ngwane nitre ñakare israelitare mun kwrere käkwe tödektä Jesubti angwane, niaratré ngite ñakare mda Ngöbökwe niedi btä amne kadi ngäbti kwe, ye nämanena gare kira Ngöböye, aisetē kukwe kuin ni jökrä kräke, ye abko Ngöbökwe niebare käne Abrahamye kira abko tä tikani krörö Ngöbö Kukweibtä:*

Ni kā jökräbti, ie tikwe ja di biandi ma köböire,

*Génesis 12.3*

niebare Ngöbökwé Abrahamye. <sup>9</sup> Ne aiseté Abrahamkwe tödekaní Ngöböbtí, ye kwrere abko nire nire tä tödeke Jesubti, ie Ngöböta ja di bien Abraham ben gware.

<sup>10</sup> Akwa Kukwe Biani Ngöbökwé Moiséye, ye nire nire tä mike tätē ja mikakäre metre Ngöbö ngwärekri, yebtä abko ngürünta nebe, ñobtä ñan angwane Ngöbö Kukwei käta niere krörö:

Kukwe Biani Ngöbökwé Moiséye, ye nire nire käkwe ñan mikadre tätē kuin jökrä ja täritäri kärekäre abkobtä ngürün raba mikani, *Deuteronomio 27.26*

abko tä tikani Ngöbö Kukweibtä. <sup>11</sup> Ye mden kisete, Kukwe Biani Ngöbökwé Moiséye ye mikabtä tätē ni ñakare jire iti abko tä nebe metre Ngöbö ngwärekri ye abko gare kuin nie, ñobtä ñan angwane Ngöbö Kukwei käta niere krörö:

Tödeka kwatibe Ngöböbtí, ye köböire ni ngite ñakare mda nieta Ngöbökwé. Ni ye aibe käkwe nünandi Ngöböbe *Habacuc 2.4*

abko tä tikani kore. <sup>12</sup> Akwa Kukwe Biani Ngöbökwé Moiséye ye abko ñan tä ni mike tödeke Ngöböbtí, aiseté Ngöbö Kukwei käta niere krörö:

Kukwe Biani Ngöbökwé Moiséye, ye nirekwe mikadre tätē jire jökrä abko köböire nünandi kwe, *Levítico 18.5*

abko tä tikani kore. <sup>13</sup> Ye abko, Kukwe Biani Ngöbökwé Moiséye, ye ni ñan raba mike tätē jire jökrä, abtä Ngöbökwé ngürün mikadre nibtä, akwa ngürün ñan rabadre kärekäre nibtä, abkokäre Kristo krütani krusobtä, ye köböire ni kökanintarita kwe Ngöbökrä ngürün ye ngäniene abko gare nie, ñobtä ñan angwane Ngöbö Kukweita niere krörö:

Ni jökrä jäkäta kribtä käin btä Ngöböta ngürün mike, *Deuteronomio 21.23*

nieta Ngöbö Kukweibtä. <sup>14</sup> Nitre ñakare israelitare abko ie Ngöbökwé ja di biandi abko Ngöbökwé köböi mikani Abrahamye, ye rükadre niaratre kisete Kristo Jesu köböire, abkokäre ni kökanintarita kwe Ngöbökrä. Erere arato, nikwe tödekadre Jesubti angwane, Ngöbökwé ja Üai juandre nüne nibtä, niarakwe köböi mikani Abrahamye ye rabadre bare, abkokäre Kristokwe ni kökanintarita Ngöbökrä.

### *Pablota kukwe bā mike*

<sup>15</sup> Ye abko ti mräkätre, ni ngätäite nita kukwe ükete ño jabe kwärikwäri, yebtä ti bike kukwe bā mike krörö mda munye: Ni iti tä kukwe ükete jabe kwärikväri ni mdabe angwane, kukwe ükateta kwe, yebtä tä ja käi tike ja kukwei mikakäre tätē. Yebti kukwe ükateta kwe ye abko ni ñan raba kukwe ye denkä mikakäre ngwarbe amne ñan ni raba kukwe mdara jire tike kukwe ye kwitakäre arato. <sup>16</sup> Ye kwrere Ngöbökwé kukwe ükaninte Abrahambe amne Abraham bkünbe. Tärä ye känti, Ngöbö Kukwei ñan tä blite ni kwatibtä, akwa tä blite ni itibe btä, käta niere krörö: "ma bkünje". Abraham bkün niebare Ngöbökwé Abrahamye, ye abko Kristo ara btä blitabare kore kwe. <sup>17</sup> Tita kukwe niere ye abko krörö: Ngöbökwé kukwe ükaninte Abrahambe, ye abko ükaninte era metre kwe mikakäre tätē. Yebti kä nikanina siento kräbkä bti kwä grebti kwä jätä (430) ta angwane, Ngöbökwé ja Kukwei Biani Moiséye, akwa Ngöbökwé kukwe ükaninte käne Abrahambe, ye abko Kukwe Biani Ngöbökwé Moiséye ye ñan raba denkä jire mento mikakäre ngwarbe, ñobtä ñan angwane kukweta ükaninte tätē, ye abko ni ñan raba kukwe ye kwite, tikwe nini ye kwrere. <sup>18</sup> Ne aiseté, Kukwe Biani Ngöbökwé Moiséye, ye nikwe mikadre tätē abko ütiäre Ngöbökwé ja di biandre nie, ye ngwane kukwe ükaninte Ngöbökwé Abrahambe ye rabadre ngwarbe, ütiäre ñakare mda. Akwa Ngöbökwé ja di biandre nie abko ükaninte kwe Abrahambe, ye abko biandre ngwarbe nie ja moto kuinbti niebare kwe Abrahamye. <sup>19</sup> ¿Angwane Kukwe Biani Ngöbökwé Moiséye abko drekäre biani kwe? Ni jökrä ngite Ngöbö ngwärekri, ye rabadre gare metre nie, abkokäre Ngöbökwé ja kukwei biani Moiséye. Ne aiseté Abraham bkün köböi mikani ie Ngöbökwé, ye ngämi nüke, känenkri Kukwe Biani Ngöbökwé Moiséye ye nämane ütiäre. Kukwe Biani Ngöbökwé Moiséye, ye abko angeletre Ngöbökwé nükani niere amne Moisés ye abko käkwe kukwe ye kani ngäbti nitre israelita mda mda kräke. <sup>20</sup> Akwa ni itibe tä kukwe ükete ni mdabe, ye ngwane ni ñakare blitaka ni nibu kräke kwärikväri, aiseté Ngöbö itibe ara jire käkwe kukwe ükaninte au Abrahambe.

<sup>21</sup> Ne aisetē, „Kukwe Biani Ngöböökwe Moiséye ye abko tä rüre kukwe ükaninte kwe Abrahambe ye rüere ya? „Nakare jire chi! ñobtä ñan angwane nane Ngöböökwe kukwe biani nuendre nie, ye mikabtä täte abko ütiäre nikwe nünandre kärekäre, ye ngwane kukwe ye mikabtä täte abko ütiäre ni ngite ñakare mda Ngöböökwe niedre nibtä arato.

<sup>22</sup> Akwa ñakare kore, ñobtä ñan angwane ni ngite kä teri abko di ñakare ja tiketeta au, ye kwrere ni jökrä kä nebtä tä ngite kukwe käme ngoto täni, aisetē di ñakare ja tikatekrä au. Akwa nikwe tödekadre Jesukristobti rabakäre dianintari amne rabakäre tikaninte, ye ngwane Ngöböökwe ja di biandre ni jökräye abko köböl mikani kwe Abrahamye, ye biandre kwe ni jökrä tödekaka Jesubtiye, abkokäre ni jökrä tä ngite kukwe käme ngoto täni.

<sup>23</sup> Käne Kristo ngämi näke tödekakrä nie, känenkri bäsí Kukwe Biani Ngöböökwe Moiséye nämane ni ni ngite ngibiabtikä kwrere ni kräke. Akwa Kristo nükani angwane, ñan nämane ni ngibiarebti ni ngite kwrere mda. <sup>24</sup> Erere arato, ni klabore mikata ngäbäkre ngibiare amne töi den, ye kwrere jire Kukwe Biani Ngöböökwe Moiséye nämane ni kräke, ni jie ngwiankäre Kristoye, nikwe tödekadre Kristobti angwane, Ngöbö rabadre ni ngite denkä mento nibtä abkokäre. <sup>25</sup> Akwa mtare Kristo tödekakrä nikwe nükanina, aisetē mtare Kukwe Biani Ngöböökwe Moiséye tä ñakare ni ngibiabtikä mda, <sup>26</sup> ñobtä ñan angwane tödektä Kristo Jesubti mun jökrä nena Ngöbö ngäbriänkäre, <sup>27</sup> ñobtä ñan angwane mun namani ngökaní ñote angwane, Ngöböökwe mun mikanina ketetibe Kristobe. <sup>28</sup> Ne aisetē ma abko ni israelita ya, ñakare ya; ni klabore ya, ñakare ya; ni brare ya o ni merire ya—ye abko ñakare ütiäre Ngöbö ngwärekri, ñobtä ñan angwane Ngöböökwe mun jökrä mikani ni itibe kwrere amne munta ketetibe jökrä Kristo Jesu ben gware. <sup>29</sup> Mun abko Kristokwe, aisetē mun Abraham bküntre amne Ngöböökwe ja di biandi Abrahamye amne bkünje niebare kwe ie, ye abko mun nena bkäne siba arato.

## 4

<sup>1</sup> Yebtä abko, ti tö kukwe mda bäsí mikai munye abko krörö: Ngäbäkre kiakia abko kräke jäandrän rünkwe tä neme jökrä. Akwa ngäbäkre ngämi ünän, känenkri niara tö rabadre dre dre nuein jäandrän yebtä abko ñan raba nuene, aisetē tä neme ni klabore kwrere. <sup>2</sup> Rün tä käi kite käne, ye kwrere kä ngämi näke ie, ye känenkri rünta ni ruäre mikete niara ngibiare amne jäandrän kwe kwe ngibiarebti kräke. Ni ye abko ngäbäkre käkwe kukwe mikadre täte. <sup>3</sup> Ye kwrere arato, kukwe nämane nakenkä nibtä abko krörö: Ngöbö ngämi Jesu juen kä nebtä nikrä, känenkri Kukwe Biani Ngöböökwe Moiséye ye Ngöböökwe mikani ni ngibiare ngäbäkre ngibiaka kwrere amne ni nämane nüne ni klabore kwrere. <sup>4</sup> Akwa kä kuin era metre niara Odei juankrä abko käi kitani Ngöböökwe, ye erere nükani angwane, Ngöböökwe juani. Niara nükani därrere merikwe amne Kukwe Biani Ngöböökwe Moiséye ye nükani mike täte jökrä ni mda mda kwrere, <sup>5</sup> nitre israelita Kukwe Biani Ngöböökwe Moiséye ye mikaka täte ye kökatarikäreta Ngöbökrä, Ngöbö rabadre ni mike ja ngobore jen kwe abkokäre. <sup>6</sup> Mtare mun tödekaka Jesubti nena Ngöbö ngäbriänkäre, aisetē Ngöböökwe ja Odei Üai juani nüne nibtä amne niara Üai tä nibtä, ye mden käta ngrente krörö Ngöböye: „Abba, Tata! <sup>7</sup> Ne aisetē mtare mun ñakare ni klabore kwrere mda, akwa mun abko nena Ngöbö ngäbriänkäre, aisetē jäandrän tä Ngöböökwe niara ngäbriänkäre kräke, ye abko mun rabadi bkäne arato.

*Pablota töbike kri nitre Galaciabotbä*

<sup>8</sup> Mdakäre abko, käne mun ngämi tödeke Jesubti, känenkri Ngöbö gare ñakare munye angwane, mun nämane jäandrän ngwarbe mike ngöböre jae amne mun nämane ni klabore kwrere kräke. <sup>9</sup> Akwa mtare Ngöbö era metre nena gare munye—o ti bike niere krörö jirekäbe, Ngöböökwe mun käräbare jakrä, aisetē mun nena gare Ngöböye mtare—aisete „ye ñobtä abko üai käme ngwarbe di ñakare ye ngoto täni mun tö ja mikaita klabore, <sup>10</sup> amarebti munta köbö ütiäre köbö jadükakrä kwrere mike ütiäre jae ja mikakäre metre Ngöbö ngwärekri? Erere arato, jse ñobtä amarebti munta sö ngidien, kä ruäre ütiäre amne kä kwatire kwatire mike ütiäre ja mikakäre metre Ngöbö ngwärekri! <sup>11</sup> Yebtä abko

nane tikwe ngoto nikani ngwarbe sribire mun ngätäite tä nebe ruen tie, aisetet kä jürä kri tibta mtare.

<sup>12</sup> Ti mräkätre, ti tö kukwe krörö ribei kisere munye: Kukwe Biani Ngöböökwe Moiséye, ye ti nämane mike täte jökrä ja mikakäre metre Ngöbö ngwärekri, akwa ye kwrere tita mike ütiäte ñakare mtare, kákwe ja mikani mun ñakare israelitare kwrere. Ye kwrere arato, munkwe ja mikadre ti kwrere abko ti tö ribei munye. Ñan munkwe kukwe nuenbare käme jire tibta, abta tita niere kore munye ti mräkätre. <sup>13</sup> Akwa tikwe kukwe kuin Jesubtä mikaba gare kena munye, ye ngwane ti nämane bren abko kákwe ti mikaba neme yete, ye abko gare kuin munye. <sup>14</sup> Ti bren ye abko namani tare munkrä, akwa munkwe ñan bätä ngwiani tibta angwane, munkwe ti kaba ngäbti kuin bäsí angele Ngöböökwe kwrere jire. Mdakäre abko, Kristo Jesu ara jire mun rababa ruen kaen ngäbti munye, aisetet kä rababa nuäre munbtä. <sup>15</sup> ¿Kä rababa nuäre kri krübäte munbtä, ye abko munkwe nuenbare mda? Ti ne ara jire raba kukwe niere krörö mun kräke. Mun rabadre ja okwä denkä ti die mikakäre angwane, munkwe diandrekä, akwa era metre ye kákwe ti die mikadre ñakare, aisetet munkwe nuenbare ñakare. <sup>16</sup> Akwa mtare, ¿titat kukwe era erere niere munye, nebtä abko ti kite nikwite mun rüere ya? Ñakare raba ruen tie.

<sup>17</sup> Angwane ni mda mda tä nüke dirire munye, ye abko töita krübäte munbtä, akwa niaratre töi ñakare kuin munkrä, ñobtä ñan angwane munkwe ja töi mikadre niaratretbä abko ie tö, aisetet töta mun diainkä nunkän. <sup>18</sup> Ni mdakwe töbikadre munkrä ye abra kuin, akwa töbikadre jäandrän kuinbtä mun kräke, ye abko ñan nuendre batibe, akwa nuendre kärekäre, akwa ñan ti tädre nete, aibe angwane ni mdakwe töbikadre munbtä. <sup>19</sup> Ti ngäbriänkätre kiakia tikwe, bäsí meri tä ja ngibiare tare, ye kwrere jire ti nämane ja tare nike käne munbtä. Mtare kukweta nakenkä mun ngätäite, köböite titat ja tare niketa mda munbtä amne mun ngämi näin metre Kristobe abko erere tikwe ja tare nikadi btä. <sup>20</sup> Gwängwarbe ti tädre mun känti yete, blitakäre bää jene munbe näre, akwa ti ñan raba neme, aisetet tikwe dre nuendre, abkobtä ti töi ñan tä nebe krütare jirekäbe.

#### *Kukwe bää mikata Agarebtä amne Sarabtä*

<sup>21</sup> Kukwe Biani Ngöböökwe Moiséye, ye mun Galaciabo tö mikaita täte ja mikakäre metre Ngöbö ngwärekri, mun ye ie ti tö kukwe ngwaintari kwati krörö: ¿Kukweta nakenkä mun ngätäite, yebtä Ngöbö Kukweita dre niere, ye gare ñakare munye? abko munkwe nie tie. Kukwe ye gare ñakare metre munye ruen tie, aisetet titat kukwe ngwentari kore munye. <sup>22</sup> Angwane kukwe yebtä abko nieta krörö: Abraham nämane meri nibu ben. Meri iti abko klabore meri era metre Abrahamkwe kräke. Meri klabore ye abko kädian nämane Agar abko kwe Abraham ngobo därebare iti. Meri mda abko meri era metre Abrahamkwe abko kädian nämane Sara abko kwe niara ngobo därebare arato. Sara abko ñakare klabore ni mdakwe. <sup>23</sup> Akwa meri klabore abko kwe Abraham ngobo Ismael därebare, ye abko Abraham töi erere niara därebare. Akwa Sara, meri era metre Abrahamkwe klabore ñakare abko di ñakare ngäbäkre ngibiare meri mda mda kwrere. Ne aisetet Ngöböökwe ngäbäkre köböi mikani Abrahamye erere därebare Sarakwe abko kädiani Isaac kwe.

<sup>24-25</sup> Kukwe ye nakaninkä kira ye abko tä kukwe krörö bää mike nikrä: Meri nibu abko tä kukwe ükaninte ketebu Ngöböökwe nikrä bää mike: Agar abko tä Kukwe Biani Ngöböökwe Moiséye Ngítio Sinaí känti bää mike. Agar abko klabore ni mdakwe, aisetet bkänkä kukwei aibe mikata täte kwe. Ye kwrere jire, nitre israelita käta Kukwe Biani Ngöböökwe Moiséye ye mike täte abko klabore ni mdakwe kwrere, aisetet nitre israelita abko Agar ngäbriänkätre kwrere. Ngítio Sinaí kä Arabia känti, ye mden abko juta Jerusalén ara mtare kwrere, ñobtä ñan angwane nitre israelita nünanka Jerusalén tä klabore jökrä Kukwe Biani Ngöböökwe Moiséye ye kräke. <sup>26</sup> Akwa nitre Ngöböökwe era metre tödekaka Jesubti abko tä tikaninte amne, juta Jerusalén tärä mda kä käinbtä kräke. Niaratre abko klabore ñakare Sara kwrere, aisetet nitre tödekaka Jesubti, ye abko Sara ngäbriänkätre kwrere, <sup>27</sup> ñobtä ñan angwane Ngöbö Kukwei käta juta Jerusalén bää mike meri ngäbäkre ngibiare ñakare Sara kwrere abko krörö:

Meri, ma ngäbäkre ngibiare ñakare, akwa makwe kä ngwian nuäre jabtä.  
 Angwane meri ie ja tare nika ño ngäbäkre ngibiabtä gare ñakare, ye abko kákwe ngrate  
 krikri kä ngwiane nuäre jabtä,  
 ñobtä ñan angwane meri kwe ngäbäkre ñakare, abtä tuanimetre brarekwe, ye abko  
 ngäbriänkä rabadi bäri kwati meri nünanka brarebe ye ngwä.  
 Ne aisetet, meri kwe ngäbäkre neme ñakare, ye kákwe kä ngwian nuäre jabtä, *Isaías 54.1*  
 nieta Ngöbö Kukweibtä.

<sup>28</sup> Ti mräkätre, munkwe tödekani Jesubti, aisetet mun abko Abraham ngäbriänkätre  
 köböl mikani Ngöböökwe arato, aisetet mun abko Isaac kwrere. <sup>29</sup> Sara abko kise mriani  
 jabtä, aisetet ngäbäkre ñakare kwe, akwa Ngöböökwe ngäbäkre köböl mikani ie, erere  
 ngäbäkre Isaac därebare Ngöbö Üai diebti. Akwa käne, meri klabore abko kwe ngobo  
 Ismael därebare, akwa ye abko Ngöböökwe köböl mikani ñakare, amne Ismael nämane  
 Isaac mike ja tare nike. Ye kwrere kukweta nakenkä mtare. Ngöbö Üai diebti nita tödeke  
 Jesubti amne nitre Kukwe Biani Ngöböökwe Moiséye mikaka täte tä Ismael kwrere, käta  
 ni mike ja tare nike tödekabtä Jesubti. <sup>30</sup> Akwa Ngöbö Kukwei käta niere krörö kukwe  
 yebtä abko ütiäte mtare mun kräke:

Ngöböökwe niebare Abrahamye:

Meri klabore ye juentari ngobo kwe yebe, ñobtä ñan angwane meri klabore ngobo  
 ye kákwe ñan jändrän rünkwe dräidre jire chi jabti, meri klabore ñakare tä nüne  
 brare kwebe abko ngobobe,

*Génesis 21.10*

abko Ngöböökwe niebare Abrahamye. <sup>31</sup> Ne aisetet ti mräkätre, ni abko ñakare meri  
 klabore ngobo Ismael kwrere, akwa ni abko meri Sara klabore ñakare ngobo kwrere,  
 aisetet nita klabore ñakare.

## 5

### *Nita tikaninte Kristo köböire*

<sup>1</sup> Nikwe nünandre ni tikaninte kwrere, abkokäre Kristo kákwe ni tikaninte. Ne aisetet  
 Kristokwe mun tikaninante, yebtä munkwe nünanka dite kärekäre amne munkwe ñan ja  
 mikata ni klabore kwrere Kukwe Biani Ngöböökwe Moiséye ngoto täni, kukwe ye mikakäre  
 täte, ja mikakäre metre Ngöbö ngwärekri abko tita niere munye.

<sup>2</sup> Ti mräkätre, olo ketete ti kukweiye munkwe. Ti Pablo kä bike niere krörö munye:  
 Ni brare brare tödekaka Jesubti kákwe ja ñäräkrä mikadre ja kwatabtä, ye abko mun  
 mden mden töta nebe nuein ja mikakäre metre Ngöbö ngwärekri, ye ngwane Kristo  
 krütani munkrä, ye ñan rabadre ütiäte mun kräke. <sup>3</sup> Ye abko ti bike niereta krörö mda  
 munye: Ja ñäräkrä mikadre ja kwatabtä tä ükaninte, ye mun brare mden mden kákwe  
 mika täte angwane, Kukwe Biani Ngöböökwe Moiséye, ye erere munkwe mikadre täte jire  
 jökrä angwane, ñan kukwe ketetibe mika täte munkwe. <sup>4</sup> Mdakäre abko, Kukwe Biani  
 Ngöböökwe Moiséye ye mikabtä täte mun tö rabai metre Ngöbö ngwärekri, ye ngwane  
 mun nikani Kristo bäre mento angwane, Ngöböökwe ja moto mikani kuin munkrä abko  
 ie munkwe trö kwitani. <sup>5</sup> Akwa ni abko tä tödeke Kristobti, yebtä ni ngite ñakare mda  
 Ngöböökwe niedi abko nita ngibiare kisere Ngöbö Üai köböire, <sup>6</sup> ñobtä ñan angwane nita  
 tödeke Kristo Jesubti, ye köböire abko ni ñäräkrä mikani kwatabtä ya, ñakare ya, akwa ye  
 abko ñakare ütiäte Ngöbökrä rabakäre metre niara ngwärekri, akwa nita tödeke Jesubti  
 aibe ütiäte kräke amne, nita tödeke era metre Jesubti abko käta ni kite ni mda mda tarere.

<sup>7</sup> Mun nämane näin kuin ji Jesukwe bti, ¿ye nirekwe kukwe mdara jire mikani mun  
 jiete amarebti kukwe era metre Jesubtä abko mun ñan tö mikai täte ye? <sup>8</sup> Ngöbö kákwe  
 mun käräbare jakrä ye ñan kákwe kukwe ye mikani mun jiete. <sup>9</sup> Kukweta nakenkä mun  
 ngätäite ye abko lebadura bante kwrere abko krörö: Lebadura mikata chi arinante abko  
 tä ngitie jökrä arina kabre te, ye kwrere jire kukwe dirita blo abko ni braibe tä mike ütiäte  
 mtare, ye käita ngitie mun ngätäite, käta ni jökrä töi kwite. <sup>10</sup> Akwa mun abko töi tädi  
 ja kwrere tibe ti Dänkien diebti, abkobti titä tödeke angwane, nire nire käta kukwe blo  
 mike mun jiete ye abko Ngöböökwe mikadi ja ngie nuen mun nika dokwäre.

<sup>11</sup> Angwane ti mräkätre, ni brare brare kákwe ja ñäräkrä mikadre ja kwatabtä, ye ti tädre mike ütiäte janknu ja mikakäre metre Ngöbö ngwärekri amne, ti tädre nuemna ni mdaye, ye ngwane Kristo kämikani krusobtä ni kräke tita niere, yebtä nitre ñan rabadre romon tikrä amne ñan rabadre näin kisere ti jiebti. <sup>12</sup> Akwa nire nire tä näin kukwe mike mun jiete käta ja ñäräkrä mikamna ja kwatabtä munye, jye ara jire kákwe ja diandrete gwängwarbe näre! Abko kore se.

### *Ja taredre kwärikwäri*

<sup>13</sup> Ti mräkätre, Ngöbökwе mun kärabare rabakäre tikaninte, akwa muta tikaninte, yebtä abko mun töi rabadre ngitiekä kämekäme, ye jiebti mun rikadre betekä, abkokäre muta tikaninte abko munkwe ñan nütü jire chi. Akwa munkwe ja taredre kwärikwäri, kákwe ja die mikadre kwärikwäri jändrän jökräbtä, <sup>14</sup> ñobtä ñan angwane Kukwe Biani Ngöbökwе Moiséye ye abko tä ükaninte ketetibe jökrä abko krörö:  
Mata ja tarere au,

ye kwrere makwe ni mda mda tare arato, *Levítico 19.18*  
abko nieta Ngöbö Kukweibtä. <sup>15</sup> Munkwe ja ngibia, ñobtä ñan angwane mun tädre rüre jabe kwärikwäri janknu amne mun tädre ja kwete kwärikwäri janknu, ye ngwane munkwe ja juandre ngwarbe, aisetetibe mun ñan rabadre ja gete mda jabe kwärikwäri Jesu käbti, ye abko rabadre blo, aisetetibe ja taredre munkwe tita niere.

### *Ngöbö Üai amne kukwe kämekäme mdeita ni töibtä*

<sup>16</sup> Tikwe kukwe nini, yebtä abko ti bike kukwe mdara jire niere krörö munye: Munkwe kä bian Ngöbö Üaiye ja jie ngwiankrä nüne metre Ngöbökrä kärekäre angwane, kukwe kämekäme tä mun töibtä abko mdeita nebe munye, ye munkwe ñan nuendre, <sup>17</sup> ñobtä ñan angwane kukwe kämekäme tä mun töibtä abko mdeita neme munye, ye abko tä rüre Ngöbö Üai rüere, munkwe ñan kä biandre Ngöbö Üaiye ja jie ngwena abkokäre. Erere arato, kukwe kämekäme mdeita neme munye, ye rüere Ngöbö Üai tä rüre, kukwe kämekäme tä mun töibtä, ye munkwe ñan mikadre täte abkokäre. Ye erere kukwe kämekäme mdeita neme munye amne Ngöbö Üai tä nüne munbtä, ye tätre rüre jabe kwärikwäri. <sup>18</sup> Akwa Ngöbö Üai tä mun jie ngwena era metre bkänä ne ngwane, Kukwe Biani Ngöbökwе Moiséye ye ngoto täni mun ñan rabadre klabore mda.

<sup>19</sup> Ni mda mda töi kämekäme abko erere mdeita neme ie käta nuene, ye abko tä nüke gare kuin btätre, aisetetibe kukwe krörökrörö nuenta kwetre: tä ja mike gure batibati, tätre kukwe kämekäme nuene jabtä kwärikwäri ja mikakäre nuäre amne, kukwe gaidre kri abko tätre gaire ñakare jire chi nukro kwrere. <sup>20</sup> Erere arato, jändrän ngwarbe mikata ngöböre jae, ni kwrare, ni sukiare, ni ngürüne käta kukwe nuene blo ni mdabtä, ni mätäta neme käre ni mdabtä amne ni rüre käre ni mdabe, ni mokrere ni mdabe jändrän kwe dokwäre. Erere arato, ni moto nebe romon jötrö ngwarbe amne ni ni mda mda mike ja rüere kwärikwäri, ni dirire ni ñäkäbtikäre jene jene amne ni ni mda diankaka jakri. <sup>21</sup> Erere arato, ni mda jändrän bkäne abko dokwäre ni mätä btä, ni dröba nika käre amne ni mröre kabre krübäte amne, kukwe mda diän diän ne kwrere nuenta kwetre, ye abko gare kuin, aisetetibe kukwe kämekäme nuenäkare, ni yebtä abko Ngöböta gobrane ñakare, aisetetibe ñan rabadre jire Ngöbö känti kä käinbti abko tikwe nieba munye, mden erere tita niereta munye mtare.

<sup>22</sup> Akwa Ngöbö Üai tä nüne nibtä angwane abko tä ni die mike kukwe krörökrörö nuene: nita ni mda mda tarere, käta neme bari juto nibtä, nita nüne jáme Ngöböbe amne ni mda mdabe, nita jändrän jökrä ngibiare bätärekä, nita ni mda mda kaen ngäbti ja moto jämenbti, nita ja moto mike kuin ni mda mdakrä, nita ja kukwei amne Ngöbö Kukwei mike täte abtä tödekata nibti, <sup>23</sup> amne nita bike tidrä ni mda mdabtä amne, ni töi kämekäme ye nita ketebtä au. Ye rüere abko kukwe ñakare jire kä nebtä. <sup>24</sup> Nire nire nena Kristo Jesukwe abko kákwe kukwe kämekäme ni töibtä ye mikanina jökrä krusobtä Kristobe gware amne, kukwe kämekäme mikanina jökrä temen nikwe. <sup>25</sup> Mtare ni nena nüne Ngöbö Üai köböire, aisetetibe ari kä bien Ngöbö Üaiye ja jie ngwiankrä arato. <sup>26</sup> Akwa

nikwe ñan bikadre krikri jabtä kwärikwäri. Erere arato, nikwe ñan ja kwitadre ja rüere kwärikwäri amne jändrän ni mdakwe, dokwäre nikwe ñan bätä ngwiandre btä.

## 6

*Nikwe ni mda mda die mikadre*

<sup>1</sup> Mdakäre abko ti mräkätre, mun mräkä tödekaka Jesubti kákwe ja mika ngite, ye ga munkwe angwane, mun mden mden käta kä bien Ngöbö Üaiye mun jie ngwena metre ye kákwe mun mräkä die mika, niara rikadreta ji metrebtii abkokäre. Akwa munkwe die mika ja moto jämenbti angwane, makwe ja ngibia kuin, ñobtä ñan angwane nane kukwe jatadre ma rüere amne makwe ja mikadre ngite arato, aiseete makwe ja ngibia. <sup>2</sup> Ye abko, kukwe mun itire itire kwe, ye ie munkwe kötä mika gware jökrä ja die mikakäre kwärikwäri kärekäre köbö kwatirekwatire. Munkwe ja die mikadre kore ne ngwane, nikwe nünandre ño ükaninte Kristokwe ye mikadi täte munkwe. <sup>3</sup> Akwa nire nire abko ütiäte ñakare, akwa ja rabadre ruen kri ie mräkä mda mdabtä mun ngätäite, aiseete ñan tö kötä mikai gware, ye ngwane ni ye tä ja ngökota au. Ni ye kákwe ni mda mda die mikadre.

<sup>4</sup> Ne aiseete, ni itire itire tä sribi nuene ño, ye mika ñäräre kuin kwe, yebtä blita au kwe jakrä angwane, jändrän nuenta kuin kwe raba tuen ie, yebtä tö raba ja käkitekä ne ngwane ja käkitaka kwe, akwa ni mda mda tä sribi nuene ño, yebtä ñan ñäkä kwe, <sup>5</sup> ñobtä ñan angwane ni itire itire kákwe töbikadre tribe jen kwe ngwianbtä kuin metre.

<sup>6</sup> Mdakäre abko, kukwe kuin Jesubtä ye nireta dirire munye, ni ye abko munkwe die mika jändrän jökrä kuinkuinbtä arato.

<sup>7</sup> |Angwane munkwe ñan ja ngöka au! Ni ñakare jire iti kákwe Ngöbö mikadre yakrä jae, ñobtä ñan angwane nita nura ño nökö, ye erere nita ngwä ötö, <sup>8</sup> ye kwrere nire nire töibtä kukwe kämekäme tä amne mdeita neme ie, erere tä nuene, ye abko nura nökata kwrere amne ye ütiäre abko rabadi kärekäre Ngöbö bäre mento, ye abko nura ngwä ötata kwrere. Akwa nire nire käta kä bien Ngöbö Üaiye ja jie ngwiankrä, erere tä näin Ngöbö Üai köböire, ye ütiäre abko rabadi nüne kärekäre Ngöböbe. <sup>9</sup> Aiseete ni ñan rabadre dräre jire jändrän kuin nuene ni mda mdakrä, ñobtä ñan angwane ni ñan di krütadre jändrän kuin nuene ne ngwane, köböitira jire Ngöböökwe sribi nikwe ye ütiä biandi nie. <sup>10</sup> Ne aiseete ni di tärä ne ngwane, käre ni tädre biare ni mda mda die mike, akwa ni mräkä tödekaka Jesubti ye abko bari die mikadre käne.

*Pablota kukwe nire mrä*

<sup>11</sup> Ti mräkätre, mtare ti ara jire käta kukwe ne tike krikri ja kise jenbti mun kräke, ti ara jire käta tärä ne tike rabadre gare metre munye abkokäre. <sup>12</sup> Tärä yebtä abko ti tö nieita krörö munye: Ni ruäre tä ja ñäräkrä mikamna kisere ja kwatabtä munye ja bä mikakäre kuin nitre israelita mda mda okwate angwane, Kristo ngatani krusobtä nikrä aibe ütiäte ni diantarikäre, ye aibe niedre kwetre, abtä nane nitre israelitakwe mikadre ja tare mike abko jürä btätre, aiseete tä ja ñäräkrä mikamna munye. <sup>13</sup> Akwa nitre israelita ñäräkrä mikani kwatabtä, ye abko ñan tä Kukwe Biani Ngöböökwe Moiséye ye mike täte jökrä, akwa mun abko kákwe ja ñäräkrä mikadre ja kwatabtä Kukwe Biani Ngöböökwe Moiséye ye mikakäre täte jökrä, ie niaratre tö. Yebti munkwe ja ñäräkrä mikadre ja kwatabtä angwane, rikadreta ja käkitekä munbti ni israelita mda mdaye, abkokäre tädre mun mike kisere kore.

<sup>14</sup> Akwa ti abko, jändrän ñakare jire tikwe bti ti raba bike kri ja mikakäre ütiäte. Angwane ni Dänkien Jesukristo ngatani krusobtä nikrä, ye aibe ütiäte tikrä mtare, ñobtä ñan angwane Kristo ngatani krusobtä tikrä, ye köböire abko jändrän kä nebtä ütiäte ñakare tikrä amne ti abko ütiäte ñakare ni kä nebtä okwate. <sup>15</sup> Ye abko, ni ñäräkrä mikani ni kwatabtä ya, ñakare ya, ye abko ñakare ütiäte Ngöbö ngwärekri, akwa ni dätebareta btin Jesukristo köböire, ye abko bari ütiäte Ngöbökrä. <sup>16</sup> Angwane nünandre ño Jesukristo köböire tita niere, ne kwrere mun mden tä nüne, mun yebtä abko

kä jäme Ngöböökwe raba amne mun jökrä raba ruuentari tare Ngöböye. Erere arato, nitre tödekaka Jesubti, yebtä kä jäme Ngöböökwe raba amne raba ruuentari tare Ngöböye.

<sup>17</sup> Mtare mentokwäre abko, ni mdakwe ñan ti nikadre jire chi mda diribtä, ie ti tö, ñobtä ñan angwane titä tödeke Jesubti, yebtä tikwe ja tare nikani kri abko träin tä jökrä ti ngrabare, ti sribikä Jesukwe bä mikakrä tibtä, aise te ti ñan nikadre, ie ti tö. <sup>18</sup> Ti mräkätre, ni Dänkiien Jesukristo käkwe ja moto mika kuin mun jökrä kräke. Amen. Abko kore se. Ne ngörä.

## Tärä Tikani Pablokwe Nitre Efesobokrä Efesios

Pablo käkwe tärä ne tikani angwane, niara nämane ngite kä teri juta Romate kukwe kuin Jesubtä diri dokwäre. Ne nakaninkä ño abko tä tikani Hechos 28.14-31 yebtä. Pablokwe tärä ne tikani nitre tödekaka Jesubti nünanka juta Efeso amne Efeso bäre temen kräke. Juta Efeso abko juta ütiäte amne ju ngöbö ngwarbe mikakrä ütiäte jae nämane kabre yete. Ju bäri ütiäte abko ngöbö ngwarbe kädianta Diana kräke (Hechos 19.23-31).

Pablo nämane niken Jesu kukwei ngwena angwane, niara nükani juta Efesote, käkwe kukwe kuin Jesubtä mikani gare btin ietre abko tä tikani Hechos 18.18-21 yebtä. Akwa namani jötrö yete, bti nikani ta. Abti nükaninta bobukäre angwane, nünabare kä komä kwe Efesote, Ngöbö Kukwei dirikäre yete abko tä tikani Hechos 19 yebtä.

Nitre tödekaka Jesubti nünanka Efeso känti abko kukwe ñakare bökan, btä Pablokwe kukwe tikani. Bäri, Ngöbökkwe kukwe nuenbare keta kabre bätäkä ngwarbe ni kräke ja moto kuinbti, yebtä Pablokwe kukwe tikani kabre tärä nebtä. Nikwe nünandre ño ni Dänkien Jesukristo mikakäre ütiäte jae, btä Pablokwe blitabare tärä nebtä.

Jesukristo köböire Ngöbökkwe ni jökrä, israelita amne ñakare israelita dianintari, käkwe mikani ja gete jabe. Kukwe mden mden btä nämane rüre jabe kwärikwäri, yebtä ñan rüdre mda kwetre, ñobtä ñan angwane Ngöbökkwe niaratre mikani ni itibe kwrere Jesukristo ben gware. Ngöbökkwe ye nuendre abko niarakwe ngibiabare tiebe, akwa mtare mikata gare kwe Jesukristo köböire. Ngöbökkwe nitre tödekaka Jesubti mikani ketetibe Jesukristobe, aisetet nünandre deme kwetre amne ja die mikadre kwärikväri kwetre nünenkä dite Jesubtä, ñobtä ñan angwane üai kämekäme tärä kabre abko tä rüre nitre tödekaka Jesubti rüere, aisetet Pablokwe tärä ne tikani kukwe yebtä.

### *Pablota köbö ngwentari*

<sup>1</sup> Ti Pablo käta tärä ne tike. Ngöbö tö namani ti mikai Jesukristo kukwei ngwianka abko erere tita sribire kräke. Mun deme deme tödekaka Kristo Jesubti käta nüne juta Efesote abko kräke tita köbö kuin juen. <sup>2</sup> Ngöbö ni Rün nikwe amne ni Dänkien Jesukristo käkwe ja moto mika kuin munkrä amne, mun mika nüne jáme kwetre, ie ti tö.

### *Ja moto kuinbti Ngöbökkwe ja di biani kri nie*

<sup>3</sup> Ngöbö, ni Dänkien Jesukristo Rün raba käkitaninkä, ñobtä ñan angwane jändräni jökrä kuinkuin kä käinbti biani kwe nie, ñobtä ñan angwane nita ketetibe Kristobe aisetet.

<sup>4</sup> Erere arato, kä däte ngämi känenkri Ngöbökkwe ni dianinkä jakrä rabakäre ketetibe gware Kristobe. Ngöbökkwe ni dianinkä kore jakrä nünakäre kuin deme amne ngite ñakare ja ngwärerekri. Ngöbökkwe ni tarebare, <sup>5</sup> aisetet köbö kitani kwe ni kakrä ngäbti ja ngobo jen kwrere Jesukristo köböire, ye abko niara tö namani nuein ja moto kuinbti amne käi namani nuäre btä ngwena bare. <sup>6</sup> Ngöbökkwe ni tarebare kuin bäs nuäre ja moto kuinbti, yebtä abko nikwe käikitadrekä käre. Niarakwe ni tarebare kuin bäs nuäre ja moto kuinbti, ye mikani gare nie niara Odei tarebare kri kwe ye köböire. <sup>7-8</sup> Erere arato, Kristo krütani krusobtä, därie nimianinte nikrä, ye köböire abko nita neme ketetibe Kristobe angwane, Ngöbökkwe ni kökanintarita jakrä, käkwe ni tikaninte. Amne ni ngite niara rüere, ye dianinkä jökrä mento nibtä kwe. Ye abko Ngöbökkwe nuenbare ja moto kuin nuäre yebti. Niara abko bäri töbtä amne kukwe jökrä tä nüke gare ie. <sup>9</sup> Kira Ngöbö tö namani kukwe mikaitbe ño tiebe, ye erere mikaintbe kwe, abti mikainaga gare kuin kwe nie. Ye abko, Ngöbökkwe ja moto mikani kuin amne, kukwe mikaintbe kore kaibe kwe angwane, tö namani kukwe ye ngwena bare abko erere namani bare ie Kristo köböire.

<sup>10</sup> Kä kitani nuäi kwe abko erere käi nükani angwane, kukwe mikaintbe kwe, ye erere namani bare täte jökrä Kristo köböire. Kukwe mikaintbe Ngöbökkwe ye abko krörö:

Jändrän jökrä kä käinbti amne kä temenbtä abko rabadre mikani gare jökrä täte Kristoye angwane, Kristo rabadre ji dokwäte jändrän jökräbti ta.

<sup>11-12</sup> Kira Ngöböökwe köbö kitani ni kakrä ngäbti abko erere ni dianinkä jen jakrä kwe, ye köböire ni rabadre jen Ngöböökwe, abkokäre nitre israelita ara jire käta tödeke bări käne Kristobti nitre ñakare israelitare känenkri, käkwe Ngöbö di kri bă nuäre ye käikitadrekä kärekäre, abkokäre Ngöböökwe kukwe mikanintbe ni diantarikäre jakrä. Ye abko Ngöbö tö namani nuein ño, erere nuenbare kwe. <sup>13</sup> Erere arato, Ngöbö kukwei kuin Kristobti ni diantarikrä ye abko Ngöbö kukwei era metre, ye mun ñakare israelitare käkwe kukwei nuani angwane, munkwe kani ngäbti, käkwe tödekani Kristobti angwane, Ngöböökwe mun mikani ketetibe gwaire Kristobe. Yebti, Ngöböökwe ja Üai deme mikani nüne munbtä, ye abko tä ñäräkrä kwrere munbtä, mun jen Ngöböökwe mikakäre gare. Ngöbö Üai Deme ye mden abko Ngöböökwe köböi mikani kira. <sup>14</sup> Akwa Ngöböökwe ni diandretari täte jökrä amne ni rabadre juta jen Ngöböökwe täte jökrä amne ni rabadre Ngöbö di kri bă nuäre ye käikitakä kärekäre abko bă mikakrä Ngöböökwe ja Üai Deme biani nie. Yebtä abko ni rabadre kuin niere Ngöböye.

### *Pablotä blite Ngöböbe*

<sup>15</sup> Mun abko tä tödeke kwatibe ni Dänkien Jesubti amne munta juta deme Ngöböökwe tarere, ye tikwe kukwei nuaba angwane, <sup>16</sup> ye näire mentokwäre tita blite Ngöböbe angwane, käre tita kuin niere ie munbtä. <sup>17</sup> Ngöbö ni Dänkien Jesukristokwe amne ni Rün bă nuäre ye ie käre tita kukwe ribere krörö munkrä: Ngöböökwe mun mikadre töbtä ja Üai köböire amne ja mikadre gare metre kwe munye ja Üai köböire, niara rükadre gare bări kuin munye abkokäre. <sup>18</sup> Erere arato, tita kukwe mdara jire ribere krörö Ngöböye munkrä: Ngöböökwe mun käräbare jakrä, aise te mtare jändrän kuin ngibiata Ngöböökwe munkrä kä käinbti mden munta ngibiare kisere, ye rükadre gare metre munye, abkokäre Ngöböökwe kä trå tikadre mun töite. Erere arato, juta deme Ngöböökwe abko rabadi bă nuäre amne ütiäte kri Ngöbökrä abko rabadre gare munye, abkokäre niarakwe kä trå tikadre mun töite abko tita kärere munkrä Ngöböye. <sup>19</sup> Erere arato, Ngöbö di kri ñan krütare, ye mden abko tä ni tödekaka Jesubti die mikakrä, ye rabadre gare munye, abkokäre Ngöböökwe kä trå tikadre mun töite abko tita ribere ie. Ngöbö di kri tä mun kräke abko Ngöböökwe mikani tuadre, <sup>20</sup> käkwe Kristo mikaninta nire ja di kribti amne kä bări ütiäte, känti Kristo mikani täkänintbe ja küde ruenkri kä käinbti kwe ja di kri yebti. <sup>21</sup> Ye abko, üai käme jökrä amne angele jökrä Ngöböökwe tä dänkiene, käta gobrane, käta ja di kri mike gare, yebti ta Ngöböökwe Kristo mikani bări ütiäte. Erere arato, jändrän jire jökrä tä kä ne ngwane amne jändrän jire jökrä jatadi kä mrä angwane, yebti ta Ngöböökwe Kristo mikani bări ütiäte. <sup>22</sup> Mdakäre abko, Ngöböökwe jändrän jökrä mikani Kristo ngoto täni amne, nitre gätäkä Kristo käbti, ye kräke Ngöböökwe Kristo ara jire mikani dänkiene ji dokwäte niaratre dokwä kwrere, <sup>23</sup> ñobtä ñan angwane nitre gätäkä Kristo käbti ye abko Kristo ngrabare kwrere amne Kristo ara btä Ngöbö tä nüne täte jökrä amne Ngöbö tä täte jändrän jökrä bti ta.

### *Ngöböökwe ni mikani nire Kristo ben gware*

<sup>1</sup> Mdakäre abko, käne mun ñakare israelitare ngämi tödeke Jesubti, känenkri mun nämane kukwe nuene kämekäme Ngöbö rüere amne mun nämane ja mike ngite Ngöbö rüere. Ye mden kisete, mun nämane ni ngwákäre kwrere Ngöbö ngwärekr. <sup>2</sup> Mun nämane nüne kore angwane, ni töi kämekäme tä nüne ño kä nebtä Ngöbö rüere, ye kwrere jire mun nämane nüne. Amne Satana tä gobrane kä drünente, ye abko tö namani nebe mun tuai dre dre nuein abko erere mun nämane ja mike ngite. Erere arato, nitre Ngöbö Kukwei kitaka temen, ye ngätäite Satana ara tä sribire Ngöbö rüere abti kä nüke mtare. Satana ye mden nämane mun töi mike nüne ño abko erere mun nämane nüne kena. <sup>3</sup> Ye kwrere arato, nun israelita ngämi tödeke Jesubti, känenkri nun jökrä nämane

nüne mun kwrere siba angwane, kukwe kämekäme mdei nämame nebe nunye abko jiebti nun nämame nakwen. Amne nun ngrabare, ie kukwe kämekäme mdei nämame nebe angwane, nun nämame nuene. Erere arato, nun töi nämame ngitiekä kämekäme abko jiebti nun nämame nakwen. Nun nämame nüne kore, ye dokwäre abko Ngöböökwe nun mikadre ja tare nike kri krübäte ni mda mda kwrere, ye abko rabadre dbe, ñobtä ñan angwane nun nämame ja mike ngite, dokwäre Ngöböökwe nun mikadre ja ngie nuen kore.

<sup>4-5</sup> Akwa Ngöbö abko bäri moto kuin käkwe ni tarebare kri krübäte abko krörö: Ni nämame ja mike ngite Ngöbö rüere, abtä ni nämame ni ngwákäre kwrere, kä nämame mente Ngöböye, ye ngwane Ngöböökwe ni mikani nire Kristo ben gware. Ngöbö moto kuin, ye mden köböire abko mun ñakare israelitare namani dianintari. <sup>6</sup> Amne Kristo ben gware Ngöböökwe ni mikanina nire amne, kä bäri ütiäte kri kä käinbtä känti Ngöböökwe Kristo mikani dänkiene, ye känti ni mikanina täkänintbe Kristo Jesu ben gware. <sup>7</sup> Ngöböökwe kukwe nuenbare jökrä kore, ye abko kä mrä näire Kristo jatadita angwane, Kristo Jesu köböire Ngöböökwe ja moto mikani bäri kuin nikrä, ye niara rabadre bä mike kärekäre, <sup>8</sup> ñobtä ñan angwane Ngöböökwe ja moto mikani kuin munkrä käkwe mun dianintari, munkwe tödekani Jesubti angwane. Ye abko ñan jändrän kuin nuenbare munkwe abko ütiä näkani kore munye, akwa Ngöbö ara jire käkwe mun dianintari ngwarbe ja moto kuinbti. <sup>9</sup> Mdakäre abko, ñan munkwe sribi kuin nuenbare au jakrä abko ütiäre mun namani dianintari, ye abko ni ñakare jire iti rabadre bike kri, abkokäre Ngöböökwe kukwe mikanintbe kore, <sup>10</sup> ñobtä ñan angwane Kristo Jesu köböire Ngöbö ara jire käkwe ni dätebare kuin bä nuäre. Amne nikwe sribi kuin nuendre kärekäre ni mda mda die mikakäre abko Ngöböökwe ükaninte kira, ye kwrere nikwe nuendre, abkokäre Ngöböökwe ni dätebare kore Kristo köböire.

### *Ni jökrä tödekaka Kristobti abko Ngöböökwe mikani ketetibe gware Kristobe*

<sup>11</sup> Ne aise, Kristo ngämi krüte krusobtä, känenkri mun ñakare israelitare abko nämame nüne ño, ye munkwe ngwianta töre jae. Käne nitre israelita ñäräkrä mikani kwatabtä ni kä nebtäkwe abko nämame mun kä den “nitre ñäräkrä ñakare kwatabtä,” nämame niere munbtä, mun mikakäre ngwarbe jae. <sup>12</sup> Kä ye ngwane abko Kristo gare ñakare munye amne mun nämame nüne jenena juta israelita bäre mento. Erere arato, Ngöböökwe kukwe ükaninte nitre israelitabe angwane, jändräñ köböi mikani kwe ietre, ye abko nämame ñakare munkrä amne, ni mda ni diantarikä abko nämame ñakare jire tödekakrä munkwe. Erere arato, Ngöbö era metre ye abko gare ñakare munye.

<sup>13</sup> Mun nämame nüne mente Ngöböye, akwa Kristo Jesu krütani krusobtä, därie nimianinte, ye köböire abko mun nena krötö Ngöbö ken ketetibe gware Kristobe.

<sup>14</sup> Kristo abko ni mikaka ja mäketa jabe kwärikwäri. Ni israelita amne ni ñakare israelitare mikani juta kwatibe kwe. Erere arato, nitre israelita amne nitre ñakare israelita mätä nämame kri jabtä kwärikväri, ye abko ki nämame ni jiete kwärikväri kwrere. Kristo krütani angwane, mätä kri ye abko kitani jökrä temen kwe. <sup>15</sup> Erere arato, Kristo krütani krusobtä angwane, ja ngrabare ye te niarakwe Kukwe Biani Ngöböökwe Moiséye ye mikani ütiäte ñakare mda ja mikakrä metre Ngöbö ngwärekri. Nitre israelita amne nitre ñakare israelitare nämame ja rüere kwärikväri, akwa Kristo krütani krusobtä niaratre mikakäre ketetibe gware ni itibe btin kwrere. Ye köböire abko juta ketebu ja rüere kwärikväri abko mikani nüne jáme jabe kwärikväri kwe. <sup>16</sup> Erere arato, Kristo krütani krusobtä, köböire juta ketebu mikani ketetibe gware ni itibe btin kwrere ye mikakäre gware Ngöböbe amne, nitre israelita amne nitre ñakare israelitare nämame rüre Ngöbö rüere, akwa Kristo käkwe mikani ja mäketa Ngöböbe. <sup>17</sup> Kukwe kuin ni mikakrä nüne jáme jabe kwärikväri abko Kristo jatani ngwena ni jökrä kräke, aise mun ñakare israelitare nämame nüne mente Ngöböye amne nitre israelita nämame nüne ja ken Ngöböbe, ye kräke Kristo jatani kukwe kuin ngwena kore. <sup>18</sup> Ne aise Kristo köböire ni ñakare israelitare amne ni israelita abko raba niken jáme nebe ni Rün ngwärekri Ngöbö Üai itibe köböire.

<sup>19</sup> Ye mden kisete, mun ñakare israelitare abko ñakare chui menteni kwrere Ngöbö ngwärekri mtare. Akwa nitre israelita abko juta deme Ngöböökwe, ye ben gware mun nena ütiäte amne nitre israelita abko Ngöbö ngäbriänkätre kwrere, ben mun nena ja mräkäre. <sup>20</sup> Mdakäre abko, mtare mun abko ju kwrere amne, kukwe diribare nitre Jesu kukwei ngwianakwe amne nitre Ngöbö kukwei niekäkwe, ye abko já mikata ju ketabtäkrä dite krö. Kukwe diribare kwetre yebtä abko munta ja ketebtä dite amne, Jesukristo abko já bari ütiäte kri ju mikakrä já mda mda ye ngwä, yebtä munta ja ketebtä dite arato. <sup>21</sup> Ye abko, ju mikata niken abko ketakata niken kiakia ja täritäri abti tä niken nebe bare, ye kwrere munta niren gware jökrä Kristo köböire abti ju deme Ngöböökwe tä mikani ketetibe gware ni Dänkienbe, ye kwrere mun rabadi. <sup>22</sup> Erere arato, Kristo köböire munta nekete jökrä jakri, ye köböire abko mun näin nebe ju Ngöböökwe kwrere abko te Ngöböta näne ja Üai köböire.

## 3

*Pablo juani sribire nitre ñakare israelitare ngätäite*

<sup>1</sup> Ti Pablo tä sribire mun ñakare israelitare kräke. Kristo Jesu mikabtä gare mun ngätäite, dokwäre tita ngite kä teri nete. <sup>2</sup> Ye abko, Ngöböökwe ja moto mikani kuin munkrä abko ti mikani niekä kwe munye, ye nena gare kuin munye ruen tie. <sup>3</sup> Ye abko tikwe tärä tikaba chi kane munye, yebtä abko kukwe nämane kaibe tiebe Ngöböökwe abko Ngöböökwe mikani gare tie abko tikwe tikaba munye. <sup>4</sup> Munkwe ñakädre tärä yebtä angwane, kukwe nämane kaibe tiebe Ngöböökwe Kristobtä ye abko nena gare metre jökrä tie abko rükadi gare munye. <sup>5</sup> Kukwe ngibiabare kaibe tiebe Ngöböökwe ye abko mikani gare ñakare kwe nitre kirakiraye mekera, akwa mtare nitre deme deme Jesu kukwei ngwianka amne nitre Ngöbö kukwei niekä abko ie Ngöböta mike gare ja Üai köböire. <sup>6</sup> Angwane kukwe nämane kaibe tiebe Ngöböökwe abko krörö: Ngöbö kukwei kuin Kristobtä, köböire Ngöböta nitre ñakare israelitare kärere jakrä, amne jändräñ Ngöböökwe nämane nitre israelitakrä abko nitre ñakare israelitare rabadre bkäne siba nitre israelitabe Kristo Jesu köböire. Erere arato, nitre ñakare israelitare abko rabadre ni itibe kwrere nitre israelitabe, amne jändräñ köböi mikani Ngöböökwe nitre israelitaye, ye abko nitre ñakare israelitare rabadre bkäne siba arato, ne abko nämane kaibe tiebe Ngöböökwe, akwa mtare nena gare nie.

<sup>7</sup> Ngöböökwe ja moto mikani kuin tikrä amne ti ngwiani ruen bobre kwe jae, kákwe ti mikani sribire kukwe kuin nebtä. Erere arato, Ngöbö ara kákwe ja di kri biani ngwarbe tie sribi nuenkäre. <sup>8</sup> Ni bari ütiäte ñakare nitre jen Ngöböökwe ngätäite, ye ngwä ti abko bari chi amne bari ütiäte ñakare, akwa kukwe kuin ütiäte kri ñan tanre Kristobtä, ye abko ti rikadre ngwena nitre ñakare israelitareye, abkokäre Ngöböökwe sribi biani tie. <sup>9</sup> Mdakäre abko, Ngöbö jändräñ jökrä dätekä abko kwe kukwe nämane kaibe tiebe kira, ye abko tikwe mikadre gare ni jökräye, abkokäre sribi ye biani kwe tie. <sup>10</sup> Amne nitre gätäkä Kristo kähti, ye köböire Ngöbö abko töbtä kri jändräñ bätäkä ngwarbebtä abko rabadi gare üai kämeye amne angeletre Ngöböökwe tä gobrane yeye, ye mdenkäre Ngöböökwe sribi ne biani tie. <sup>11</sup> Ye abko, Ngöböökwe kukwe mikanintbe kira, ye erere mikani nebe bare kwe ni Dänkien Kristo Jesu köböire amne, <sup>12</sup> mtare nita ketetibe gware Kristo Jesube amne nita tödeke kwatibe Kristo Jesubti, ye mden kisete mtare kä jürä ñakare jire chi nibtä krötö Ngöbö ken Kristo köböire. <sup>13</sup> Ye mden kisete abko tita ja tare nike munkrä, akwa kukwe yebtä mun ñan raba ulire amne mun ñan di krüta abko ti tö ribei munye, ñobtä ñan angwane ja rabadre ruen bari ütiäte munye, abkokäre tita ja tare nike kore munkrä.

*Pablota ja di ribere Ngöböye*

<sup>14</sup> Ne mden kisete abko tita nebe ngukudokwäbti temen ni Rün Ngöbö ngwärekri. <sup>15</sup> Ngöbö ni Rün nikwe kákwe mräkä kwekwe tä kä käinbti amne kä temenbtä dätebare. <sup>16</sup> Tita kukwe ribere krörö ni Rünye munkrä: Ni Rün jändräñ kuinkuin bä nuäre bkäne

kabre krübäte, jändrän yebti abko mun moto amne mun töi mikadre nünenkä dite kwe ja Üai köböire, <sup>17</sup> munkwe tödekadre kwatibe Kristobti, köböire niara rabadre nüne munbtä. Erere arato, Ngöböta mun tarere ño, ye kwrere mun rabadre ni mda mda tarere, yebti mun rabadre nüne abko tita ribere ni Rün Ngöböye munkrä. <sup>18</sup> Ye köböire abko Kristota ni tarere kri krübäte abko ni ñan raba ñäketbe jire chi ye abko rabadre gare täte jökrä munye, nitre deme deme tödekaka Kristobti ye ben gware abko tita ribere kore ni Rün Ngöböye munkrä. <sup>19</sup> Erere arato, ni töi mräme, aisetet Kristota ni tarere kri abko ñan raba nüke gare täte nie, akwa Kristo käta ni tarere bari kri krübäte abko rükadre gare munye, ye köböire abko Ngöbö rabadre nüne täte munbtä abko tita ribere ni Rünye munkrä.

<sup>20</sup> Amne mtare, Ngöbö aibe raba käkitaninkä, ñobtä ñan angwane nita jändrän kärere Ngöböye amne, jändrän btä ni töita ñakare, yebti ta abko Ngöböta jändrän bien bari kri krübäte nie, aisetet Ngöbö di kri tä nibtä, yebtä ari kuin niere Ngöböye. <sup>21</sup> Nitre gätäkä Jesu kähti abko ngätäite Ngöbö raba mikani ütiäte amne Kristo Jesu köböire Ngöbö raba käkitaninkä kärekäre. Abko kore se. Amen.

## 4

*Nikwe nünandre btin ni itibe kwrere*

<sup>1</sup> Tita ngite kä teri nete ti Dänkien dokwäre, ye mdenbtä abko ti tö ribei krörö munye: Ngöböwe mun käräbare jakrä ye abko bari ütiäte, aisetet ni käräta Ngöböwe käkwe nünandre ño Ngöbö mikakäre bari ütiäte, ye kwrere munkwe nüna abko krörö: <sup>2</sup> Munkwe ñan bika kri, akwa munkwe bika tidrä era metre ni mda mdabtä amne munkwe nüna jäme jabe kwärikwäri. Erere arato, kukwe ño ño amne ni ño ño erere btä munkwe ja ngibia bätärekä kwärikväri amne, mun itire itire abko töi ñakare ja kwrere, akwa munkwe ja ka ngäbti kwärikväri amne munkwe ja tare kwärikväri. <sup>3</sup> Mdakäre abko, Ngöbö Üai Deme köböire mutna ja mäke ni itibe kwrere, ye kwrere munkwe nünandre janknu, abkokäre munkwe nüna jäme jabe kwärikväri. <sup>4</sup> Nitre gätäkä Kristo kähti abko Kristo ngrabare, ye abko itibe amne Ngöbö Üai abko itibe amne Ngöböwe ni käräbare jändrän jökrä kuin niarakwe tä mikani nikrä ye ngibiakäre kisere. <sup>5</sup> Amne ni Dänkien abko itibe abko Jesukristo ara amne, kukwe kuin niarabtä aibe era metre tödekakrä amne, ni ngökadre ñöte diribare Jesukwe aibe metre amne, <sup>6</sup> Ngöbö abko itibe amne niara abko ni jökrä tödekaka Jesubti Rün. Ngöbö abko bari kri ni jökrä bti ta amne, ni jökrä tödekaka Jesubti, ye köböire tä sribire amne tä nüne btätre arato.

<sup>7</sup> Akwa ni itire itire, ie Kristo tö namani ja di biain ño ño, ye erere ja di biani kwe ja moto kuinbti, akwa nin ütiä käräbare kwe nie. <sup>8</sup> Ye mden kisete Ngöbö Kukwei käta niere krörö:

Niara nikaninta kä käinbti angwane, ni kani ngite ngite kwe abko erere nikan ngwena jökrä kä käinbti jabe, käkwe ja di biani ni kä nebtäye. *Salmos 68.18*

abko nieta Ngöbö Kukweibti. <sup>9</sup> ¿Ye ñobtä abko nikaninta kä käinbti nieta? Niara abko nükani nüne käne kä temen nebtä, abti nikaninta kä käinbti, aisetet nieta kore. <sup>10</sup> Erere arato, niara nükani kä nebtä, arabe nikaninta kä bari ütiäte kä käinbti yete, kä ketareketare kä käinbti amne kä temen nebtä rabadre gare ie gobrankäre bti, abkokäre nikaninta kä käinbti. <sup>11</sup> Niara arabe käkwe sribi biani ni ruäreye sribikäre nitre gätäkä Jesu kähti ngätäite abko krörö: ni ruäre mikani Jesu kukwei ngwianka kwe amne, ni mda abko mikani Ngöbö kukwei niekä kwe amne ni ruäre abko mikani Ngöbö kukwei kuin Jesubti mikaka gare kwe amne, ni ruäre abko mikani ni tödekaka Jesubti ngibiaka amne dirikä kwe arato. <sup>12</sup> Ni biani kore kwe juta deme Ngöböwe mikakäre juto biare sribi bätäkä ngwarbe nuene Ngöbökrä, Kristo ngrabare rabadre niren nebe täte jökrä abkokäre. <sup>13</sup> Ye köböire abko ni rabadre tödeke gwaire jökrä Kristobti amne Ngöbö Odei kwe abko rabadre gare kuin nie angwane, Kristo nena ünän täte jökrä, ye kwrere ni rabadre nebe ünän täte jökrä, abkokäre sribi biani kore Kristokwe ni ruäre yeze.

<sup>14</sup> Ni jökrä tödekaka Kristobti rabadre nebe ünän täte kore, ye ngwane abko ni ñan töi rabadre ngäbäkre kiakia kwrere mda. Ni ngäbäkre kiakia kwrere abko ie kukwe mda mda dirita niken angwane, töita nikwite jötrö kukwe mda ye jiebtii, abti mrä nitre ni ngökaka käta kukwe dirire blo abko ie tätre ja ngökamna. Amne bäsii ru mrenbti juankata nebe mürekwe nekwäre sekwäre, ye kwrere jire tä nakenkä nitre ngäbäkre kiakia kwrere yebtä. Ye kwrere nikwe ñan nünandre mda. <sup>15</sup> Akwa kukwe era metre ye abko nikwe niedre ni mda mdaye, niaratre tarere kwärä angwane, Kristo ni dokwä, kwrere jire ni rikadre niren gware jökrä abti mrä ni rabadi ünän täte jökrä. <sup>16</sup> Ye abko, ni ngrabare tä niren kuin amne ni kiakia ngrabare tä neketaninkä kuin jökrä jabtä, ye kwrere jire nita niren kuin gware jökrä Kristo köböire. Ye mden kisete, nita kuin jökrä ngrabare gware Kristobtä, ye ngwane ni itire itire käkwe sribi jen kwe nuendre niara mräkä mda mda die mikakäre angwane, ni rikai niren kuin gware jökrä jabtä, käta niken ja tarere kwärikwäri.

#### *Nikwe nünandre metre Ngöbö ngwärekri*

<sup>17</sup> Ye mden kisete, ti bike kukwe niere munye abko munkwe mika täte abko ti tö nibi niei munye ni Dämkien käbti abko krörö: Nitre ñakare israelitare tödekaka ñakare Jesubti töita ngwarbe kwäräkwärä abko erere tätre nüne, ye kwrere munkwe ñan nüna jire chi mda. <sup>18</sup> Erere arato, nitre ñakare israelitare töita kä ikote kukwe käme kisete amne Ngöbö ni mikaka nüne kärekäre, ie niaratre tä nüne mente, ñobtä ñan angwane Ngöbö gare ñakare jire chi ietre, ñobtä ñan angwane niaratre käkwe ja töi mikani ribi Ngöbökrä. <sup>19</sup> Ye abko, kukwe mden mden käme amne kukwe mden mden kuin gare ñakare ietre, aisetekukwe kämekäme bätäkä ngwarbe meribe amne brarebe, jiebtii tätre nakwen amne, tätre ja gaire ñakare, käta kukwe kämekäme nuene jökrä, akwa kukwe käme ye mdei tä neme bäri janknu ietre.

<sup>20</sup> Akwa Kristo nükani gare munye angwane, munkwe ja töitikani ñakare nünakäre kore. <sup>21</sup> Kukwe kuin Jesubtä abko kukwe era metre amne kukwe kuin ye munkwe kukwei nuani angwane, niara tö mun tuai nüne ño, yebtä munkwe ja töitikani ruen tie. <sup>22</sup> Ye mden kisete, mun nämane nüne ño ño käne, ye abko munkwe kitadre jökrä temen amne dän käme tikateta jabtä, bti kitakata, ye kwrere kukwe nuen nämane käne munkwe, ye munkwe kitaka jökrä, ñobtä ñan angwane kukwe kämekäme nämane mun ngökö abko käkwe mun mikani nüne käme abko diribare munye. <sup>23</sup> Amne mun töi nämane ño ño käne, ye abko Ngöbö Üai köböire mun töi rabadre kwitani ni btin kwrere abko diribare munye. <sup>24</sup> Amne nita dän btin kite jabtä, ye kwrere mun rabadre ni btin kwrere. Ngöbö abko kukwe nuenkä metre amne niara abko deme, ye kwrere Ngöböta mun kwite btin abko diribare munye.

<sup>25</sup> Ne aisetekukwe nämane ni ngökö ye käkwe ñan ni ngöka mda, amne munkwe kukwe era erere nie jae kwärikwäri mun mräkäbe, ñobtä ñan angwane mun abko tä ni itibe kwrere Jesubtä aisetekukwe. <sup>26</sup> Erere arato, mun moto raba romon, akwa munkwe ñan ja mika ngite amne mun moto romon, ye ben ngöi mun ñan rika kibien <sup>27</sup> amne, munkwe ñan kä bian diabluye kore. <sup>28</sup> Mdakäre abko, mun mden mden nämane gore ye käkwe ñan go mda amne ni mda mda käta jäandrän mdei nike ye abko mun rabadre die mike, abkokäremunkwe sribi era metre ja kise jenbti jakrä.

<sup>29</sup> Erere arato, munkwe ñan blita kämekäme, akwa ni mda mda käkwe mun kukwei nuadre blite angwane, rabadre mate nuäre olote, käkwe die mikadre nüne bäri metre Jesukristo kräke, abkokäre kukwe kuinkuin aibebti blita munkwe. <sup>30</sup> Amne munkwe ñan Ngöbö Üai Deme moto mika ulire. Ngöbökwе ja Üai Deme mikani nüne munbtä ñäräkrä munbtä kwrere, mun abko jen Ngöbökwе mikakäre gare munye. Kä mrä angwane, Ngöbökwе mun dianditari jökrä täte, ye mikakäre gare metre munye, ja Üai biani kwe munye. <sup>31</sup> Mdakäre abko, jäandrän krörökrörö munkwe kitaka jökrä mento jabtä: Mun mätä ni mdabtä amne mun moto romon jakrä kwärikväri, erere arato mun moto ngadaen jötrö amne munta ngrente krikri romone amne munta ñäke ngwarbe taretare ni mda mdaye amne munta ñäke kämekäme bätäkä ngwarbe ni mda mda rüere, ye munkwe

kitaka jökrä mento jabtä. <sup>32</sup> Amne munkwe ja moto mika kuin jakrä kwärikwäri amne ja raba ruentari tare kwärikwäri munye amne, Ngöböökwe ni ngite dianinkä ño nibtä Kristo köböire, ye kwrere munkwe ja ngite dian jabti ta kwärikwäri arato.

## 5

<sup>1</sup> Mun abko Ngöbö ngäbriänkä amne mun tare kri kwe, aisetet munkwe ja töi mika nüne Ngöbö kwrere. <sup>2</sup> Erere arato, Kristo kákwe ni tarebare kri, kákwe ja mikani müre ketadre krusobtä nikrä. Angwane jäandrän kukwata Ngöböye abko räta nebe kuin bäre bti, ye kwrere Kristo kákwe ja mikani müre ketadre nikrä abko namani kuin Ngöbökrä, aisetet Kristo kákwe ni tarebare kore, ye kwrere munkwe ni mda mda tare arato.

<sup>3</sup> Akwa ni deme Ngöböökwe kákwe nünandre ño, ye kwrere munkwe nüna abko krörö: ja mika gure batibati bätäkä ngwarbe amne kukwe mda kämekäme meri amne brare ngätäite amne, jäandrän jenena ie ni töta nebe jakrä, ye ñan kwandre jire chi mun ngätäite. <sup>4</sup> Erere arato, kukwe kämekäme diän diän, ye munkwe ñan dian kadate amne, ni töi ñakare tä blite kukwe ngwarbebtä, ye kwrere munkwe ñan blita jire chi. Amne kukwe ngwarbe kämekäme ni mikakrä kötö, yebtä munkwe ñan blita jire chi arato, ñobtä ñan angwane ni tödekaka Kristobti abko kákwe ñan blitadre jire chi kore, akwa munkwe kuin nie jirekäbe Ngöböye jäandrän jökräbtä. <sup>5</sup> Ye ñobtä ñan angwane nire nire käta ja mike gure batibati bätäkä ngwarbe amne tä kukwe mda mda nuene kämekäme bätäkä ngwarbe amne jäandrän jenena ie töta nebe jakrä, ye abko jäandrän ngwarbe mikata ngöböre kwe jae kwrere. Nitre ye btä Kristo amne Ngöbö tä gobrane abko ngätäite nitre jäandrän kore nuenäkä ñan rabadi nüne abko ti tö nibi niei metre munye. <sup>6</sup> Ne aisetet ni mda mda jata kukwe ngwarbe dirire kore, ye ie munkwe ñan ja ngökamna, ñobtä ñan angwane nitre ñan tä Ngöbö Kukwei mike täte kore, käta kukwe nuene kämekäme, ye dokwäre Ngöböökwe mikadi ja ngie nuen kri krübäte.

<sup>7</sup> Ye mden kisete, munkwe ñan kukwe käme nuen jire chi bentre, <sup>8</sup> ñobtä ñan angwane mun ngämi tödeke Jesubti, känenkri mun nämane nüne ngwarbe kä ikote, akwa mtare munta nekete ketetibe ni Dänkien Jesukristobe, aisetet munta nüne Ngöbö trä ngwente. Ye mden känti ni nünanka Ngöbö trä ngwente kákwe nünandre, ye kwrere munkwe nüna kuin metre. <sup>9</sup> Ye ñobtä ñan angwane ni nünanka Ngöbö trä ngwente, ye köböire abko nita kite nebe moto kuin ni mda mdakrä amne nita kite nüne metre amne, nita kukwe era erere niere arato. <sup>10</sup> Mdakäre abko jäandrän mden mden tuen dbe ni Dänkienye, ye munkwe mika ñäräre kuin ja käne abko erere munkwe nüna. <sup>11</sup> Amne nitre nünanka kä ikote abko tä kukwe mikete ngwarbe, yebtä munkwe ñan ja kita siba bentre, akwa kukwe nuenta kämekäme kwetre, ye munkwe mika gare ja ngwärekri jökrä Ngöbö trä ngwente, <sup>12</sup> ñobtä ñan angwane nitre Ngöbö Kukwei kitaka temen käta kukwe kämekäme nuene kaibe tiebe kä ikote, ye abko gaidre kri, aisetet ñan blitadre jire chi kukwe yebtä. <sup>13</sup> Akwa kukwe jökrä mikata gare Ngöbö trä ngwente, ye ngwane kukwe ño era metre abko tä nebe gare metre jökrä nie, <sup>14</sup> ñobtä ñan angwane jäandrän jökrä mikata Ngöbö trä ngwente, ye abko Ngöbö trä tä mate btä abko käta trä mike arato. Ye mden kisete nieta krörö: Ma tödekaka ñakare Kristobti abko tä ni kibien kwrere, aisetet nüketa ngwäte.

Erere arato, ni ngwäkäre kwrere mata, aisetet näinta krö amne, Kristo kákwe Ngöbö trä tikadikä ma okwäte abko nieta kore.

<sup>15</sup> Ye mdenbtä abko, mun tödekaka Kristobti tä nüne ño, yebtä munkwe töbika kuin ja käne, kákwe ja ngibia. Erere arato, munkwe ñan nüna ni diän diän töi ñakare kwrere, akwa munkwe nüna ni töbtä kwrere <sup>16</sup> amne, kä ne näire kukwe käme nuenta bäri, aisetet munkwe nüna kärekäre Ngöbökrä amne munkwe ñan kä gate jire chi ngwarbe. <sup>17</sup> Erere arato, Ngöbö tö mun tuai nüne ño, ye rükadre gare munye, ie ti tö, aisetet nitre töi ñakare, ye kwrere munkwe ñan nüna. <sup>18</sup> Mdakäre abko, munkwe ñan dö kwaka ña dröbakäre, ñobtä ñan angwane ni döre abko käta nebe jáme dokwäbti amne, tä nebe diän krübäte, aisetet munkwe ñan dröba. Akwa köbö kwatirekwatire munkwe Ngöbö Üai tuametre nüne täte jökrä jabtä. <sup>19</sup> Erere arato, munkwe blita jabe kwärikwäri salmobtä, amne

ka ükaninte niedre Ngöböye, ye munkwe nie amne ka mda mda kuin niedre Ngöböye, ye munkwe nie, aisetet munkwe ka nie amne Ngöbö käikitaka ja töibti munkwe. <sup>20</sup> Käre munkwe kuin nie ni Rün Ngöböye jändrän jökräbtä ni Dänkien Jesukristo käbti.

### *Kukwe ni gure gure kräke*

<sup>21</sup> Mdakäre abko, munta Kristo mike ütiäte jae, aisetet munkwe ja mika ütiäte jae kwärirkwäri. <sup>22</sup> Mdakäre abko, meri gure gure abko käta ni Dänkien mike ütiäte ño jae käta kukwei mike täte, ye kwrere arato ni brare kwe ye abko mika ütiäte kwe jae, kukwe mikakäre täte, <sup>23</sup> ñobtä ñan angwane nitre tödekaka Kristobti abko tä Kristo ngrabare kwrere amne Kristo abko tä ji dokwäte kräke, ye kwrere ni brare tä ji dokwäte meri kwe kräke. Kristo abko nitre tödekaka niarabti Diantarikä arato. <sup>24</sup> Nitre tödekaka Kristobti abko tä Kristo kukwei mike ütiäte jae amne tä mike täte, ye kwrere arato meri gure kákwe brare kwe kukwei mikadre ütiäte jae mikakäre täte arato.

<sup>25</sup> Amne Kristo kákwe nitre tödekaka bti tarebare, kákwe ja biani müre ketadre kräke, ye kwrere jire mun brare gure gure kákwe meri munkwe tare. <sup>26</sup> Kristo kákwe ja biani müre ketadre kore ni mikakäre merebe amne deme, ye abko mun namani ngökani ñöte Kristo käbti munkwe bää mikani jabtä amne munkwe tödekani niarabti munkwe niebare abko munkwe bää mikani jabtä arato. <sup>27</sup> Erere arato, Kristo kákwe ja biani müre ketadre kore, ye köböire abko nitre tödekaka bti abko bää rabadre bäri nuäre amne jändrän kämekäme tiebe ñan rabadre jire btä. Erere arato, ñan rabadre ni kwata näkwain näkwain kwrere kukwe kämekäme kisete amne, jändrän mda mda kämekäme ñan rabadre jire nitre ye ngätäite, akwa Kristo tö namani tuai deme amne era metre ja ngwärekri, abkokäre ja biani müre ketadre kwe kräke.

<sup>28</sup> Kristo kákwe ni tarebare kore, ye kwrere arato ni brare brare kákwe meri kwe taredre. Amne niara tä ja ngrabare tarere au, ye kwrere meri kwe taredre kwe, ñobtä ñan angwane nire nire käta meri kwe tarere, ni ye abko tä ja tarere au. <sup>29</sup> Ye abko ni ñakare jire iti käta bätä ngwen ja ngrabare btä au, akwa nita ngibiare kuin amne nita mröre ja ngrabare kräke. Ye kwrere arato, Kristo tä nuene nitre tödekaka niarabti kräke, <sup>30</sup> ñobtä ñan angwane nitre jökrä tödekaka Kristobti abko Kristo ngrabare kwe amne ni itire itire abko Kristo kiakia ngrabare. <sup>31</sup> Ne aisetet, Ngöbö Kukwei käta niere krörö: Ni brare kákwe ja mikadre gure angwane, rikadre nüne jenena rünbtä amne meyebtä mento merire kwebe.

Angwane ni nibu ye abko rabadi ni itibe kwrere, *Génesis 2.24*  
abko nieta kore. <sup>32</sup> Yebtä abko kukwe nebti jändrän ütiäte kri gare ñakare nie abko tä ükani tiebe Ngöböökwe abko tä nüke gare nie, akwa Kristo amne nitre tödekaka niarabti abko btä kukweta tiebe kore Ngöböökwe abko titä niere. <sup>33</sup> Amne mun brare brare abko ie ti bike niereta bobukäre krörö: Mun itire itire käta ja tarere au, ye kwrere jire munkwe meri munkwe tare amne, mun merire merire abko kákwe ni brare munkwe mika ütiäte jae abko titä niereta kore munye.

## 6

### *Kukwe ngäbäkre kräke amne rün btämeye kwe kräke*

<sup>1</sup> Mdakäre abko, mun ngäbäkrere, mun ye abko ni Dänkienkwe, aisetet munkwe mun rün btä mun meye kukwei mika täte, ñobtä ñan angwane ye abko kuin ni Dänkien okwäbti. <sup>2-3</sup> Ngöböökwe ja kukwei ne biani Moiséye nuendre ngäbäkreye, ben gware jändrän bäri ütiäte köböi mikani käne kwe abko krörö:

Munkwe nünandre jáme amne munkwe nünandre raire kä temen nebtä, abkokäre munkwe mun rün btä mun meye mika ütiäte jae, *Deuteronomio 5.16*  
abko nieta kore Ngöbö Kukweibtä.

<sup>4</sup> Amne mun ngäbäkre rünre rünre abko kákwe ñan ngäbäkre munkwe moto mika romon kukwe bätäkä ngwarbe btä, akwa munkwe ngäbäkre munkwe töi tikadre amne munkwe ji kuin Ngöböökwe mikadre gare ño ietre abko ie ni Dänkien tö, ye kwrere munkwe nuen.

### *Kukwe ni klabore kräke amne bkänkä kwe kräke*

<sup>5</sup> Mdakäre abko, mun klabore käkwe mun bkänkä kukwei mika täte ja töi kuinbti. Erere arato, monta sribire Kristo ara jire kräke raba ruen munye, käkwe mun bkänkä mika ütiäte jae amne munkwe jürä ngwian era metre, munkwe Kristo mikadre täte ye kwrere. <sup>6</sup> Ye abko, ñan mun bkänkä okwäbti aibe munkwe sribi nuen kuin ja bä mikakäre kuin, akwa sribikä Kristokrä ye kwrere munkwe sribi amne Ngöbö tö dreye, ye erere munkwe nuen jökrä ja töi metrebt. <sup>7</sup> Ye abko, munkwe sribi ja di ngöi jökrä mun bkänkä kräke, ye abko ñan monta sribire ni kä nebtä kräke, akwa monta sribire ni Dänkien ara jire kräke munkwe nütü, käkwe sribi kore, <sup>8</sup> ñobtä ñan angwane ni klabore ya o klabore ñakare ya, akwa ni itire itire käkwe dre dre nuenbare kuin, ye abko ni Dänkien käkwe ütiä biandi nie, ye abko raba gare metre munye.

<sup>9</sup> Mdakäre abko, ni klabore käta sribire ja töi kuinbti bkänkä kräke, ye kwrere jire mun mden mden käta ni klabore bkäne ye käkwe sribi ükadrete ja töi kuinbti kräke. Amne munkwe ñan rätäkä mikakäre ene, ñobtä ñan angwane mun amne niaratre abko tä sribire ni Dänkien itibe kräke. Ni Dänkien ye abko tä kä kainbti amne niara abko kräke ni ütiäte ja kwrere jökrä.

### *Jändrän rükä Satana rüere*

<sup>10</sup> Mtare mentokwäre abko ni Dänkien di kri, yebti munkwe nüna dite köbö kwatirekwatire abko krörö: <sup>11</sup> Jändrän jökrä bianta Ngöbökwe ja ngibiakrä ni rüe ngäniene, ye kite jabtä munkwe. Diablu ni ngökaka käkwe kukwe mikaditbe mun rüere, ye ngwane mun rabadre nünenkä dite jabtä diablu rüere, abkokäre kite jabtä munkwe, <sup>12</sup> ñobtä ñan angwane ñan nita rüre ni kä nebtä rüere, akwa üai kämekäme tä dikekä kabre käinta sete abko di kri amne tä kä käme iko kä jökräbti kä nebtä dänkiene amne gobrane ni ngätäite nete abko rüere nita rüre. <sup>13</sup> Ne aisetet jändrän jökrä bianta Ngöbökwe ja ngibiakrä ni rüe ngäniene, ye den kisete munkwe amne köbö te kukwe taretare jatadi mun nuente ja käne, ye näire mun rabadre nünenkä dite jabtä mun rüebe, abkokäre munkwe ja mika juto biare rükäre kore. Yebti munkwe nünanka dite jabtä. <sup>14</sup> Ye aisetet, nitre rükä käta koria mäkete dime ja mrökarabtä ja mikakäre biare rükäre, ye kwrere munkwe kukwe era metre Ngöbökwe mäkate jabtä rükäre Satana rüere. Erere arato, nitre rükä tä jändrän ribi mike ja mäträbtä ja ngibiakrä, ye kwrere munkwe nünandre era metre Ngöbökärä ye abko käkwe mun ngibiadre mun rüe Satana ngäniene. <sup>15</sup> Mdakäre abko, nitre rükä tä sandalia neketete kuin temen kite ja ngotobtä rükäre, ye kwrere munkwe ja ngoto mika juto biare nikken Ngöbö kukwei kuin Kristobtä ye niere ni mda mdaye. Ngöbö kukwei kuin Kristobtä, ye tä ni mike ja mäketa jäme Ngöböbe. <sup>16</sup> Akwa jändrän jökrä ja ngibiakrä yebti ta abko tödeka kwatibe Ngöböbti, ye abko munkwe dian kisete nitre rükä tä jändrän ribi ngwen kisete ja ngibiakrä, ye kwrere munkwe nuendre kore. Ye köböire abko üai kämekäme käkwe kukwe kämekäme kitadi buko jutra ngitiekä kwrere mun rüere angwane, munkwe kukwe käme ganaindi kwäräbe. <sup>17</sup> Amne monta dianintari, ye abko jändrän ribi mikata ja dokwäbti ja dokwä ngibiakrä rüe ngäniene ye kwrere. Amne Ngöbö Kukwei abko tä ngitra kwrere Ngöbö Üaikwe. Ngöbö Kukwei yebti munkwe rü, nitre rükä tä rüre ngitrapbti ye kwrere. Jändrän jökrä rükäre ye munkwe dian kisete rükäre jae diablu amne üai käme kwe ye rüere. <sup>18</sup> Erere arato, munkwe blita kärekäre Ngöböbe amne, Ngöbö Üai köböire munkwe ja di ribe Ngöböye amne munkwe jändrän kärä kärekäre ie arato. Erere arato, munkwe mokre käre jabti, akwa mun ñan rante blitare Ngöböbe, käkwe blita käre ben nitre deme deme kwe ye kräke.

<sup>19</sup> Mdakäre abko, Ngöbö kukwei kuin Jesubtä nämane tiebe ye abko tikwe niedre ño ño abko Ngöbökwe mikadre gare tie amne, kä jürä rabadre ñakare tibtä blitare, abkokäre munkwe blita Ngöböbe tikrä. <sup>20</sup> Ngöbö kukwei kuin abko tikwe mikadre gare, abkokäre Ngöbökwe ti juani blitaka jakrä. Ngöbö kukwei ye mden dokwäre tita ngite kä teri nete mtare, akwa kä jürä ñan rabadre jire chi tibtä blite Ngöbö kukweibtä, abkokäre munkwe blita tikrä Ngöböbe.

*Kukwe mrä*

<sup>21</sup> Mräkäre abko, Tíquico ni mräkä tare kri nikwe amne sribikä era metre ni Dänkienkwe abko tita juen nebe mun känti yete. Tita ño nete amne tita dre dre nuene ye abko niarakwe niedi jökrä munye. <sup>22</sup> Erere arato, nunta ño nete ye niedre kwe munye abko käkwe kä mikadre juto munbtä, abkokäre tita juen nebe yete.

<sup>23</sup> Ngöbö ni Rün nikwe amne Jesukristo ni Dänkien käkwe ja mräkätre yete mika nüne jáme amne, munkwe ja taredre kwärikwäri tödekare kwärä kwatibe Ngöböbti abko ie ti tö. <sup>24</sup> Amne nire nire käta ni Dänkien Jesukristo tarere era metre kärekäre, ye abko kräke Ngöbö raba ja moto mike kuin arato. Abko kore se. Ne ngörä.

## Tärä Tikani Pablokwe Nitre Filipobokrä Filipenses

Pablo kákwe tärä ne tikani angwane, niara nämane ngite kä teri juta Romate, kukwe kuin Jesubtä diri dokwäre. Ne nakaninkä ño abko tä tikani Hechos 28.14-31 yebtä. Akwa Pablo nikani Silas amne Timoteobe nebe juta Filipo känti kukwe kuin Jesubtä mikakäre gare ietre angwane, ni kwati kákwe tödekani Jesubti. Ye abko tä tikani Hechos 16.12-40 yebtä. Abti niara nämane ngite nükani gare nitre tödekaka Jesubti nünanka juta Filipote yeye angwane, niaratre kákwe ngwian amne jäandrän mda mda juani Pablo kräke ni iti kädian nämane Epafroditö köböire Pablo die mikakäre. Abtä Pablokwe tärä Filipenses ne tikani kuin niekäre ietre.

Mdakäre abko, Pablo namani ja tare nike, akwa kä namani nuäre btä abko mikani gare kwe nitre nünanka Filipo yeye, ñobtä ñan angwane nitre tödekaka Jesubti nünanka yete nämane ja tare nike arato tödekabtä Jesubti. Jesukristo kákwe nünabare ño, kákwe bikabare tidrä ni mda mdabtä, ye kwrere nitre tödekaka Jesubti kákwe nünandre ja die mikadre kwärikwäri nünenkä dite Jesubtä abko Pablokwe niebare ietre.

Mdakäre abko, Pablokwe nitre tödekaka Jesubti mikani mokre nitre israelita ruärebtä. Nitre israelita ruäre nämane niken kukwe dirire blo Jesukristobtä abko ngäniene ja ngibiadre Pablokwe niebare ietre. Tödeka kватibe Jesubti, aibe köböire ni ñan rabadre dianintari nitre israelita ne nämane dirire, akwa ñakare kore Pablokwe niebare, aisetet ja ngibiadre kuin niebare kwe.

### *Pablota köbö kuin juen*

<sup>1</sup> Ti Pablo käta tärä ne tike amne Timoteo tä tibe nete. Nun ne abko sribikä Kristo Jesukwe. Mun deme Ngöbökwe tä ketetibe Kristo Jesube juta Filipote amne mun ni Ngöbökwe jie ngwianka amne nitre ni mda mda die mikaka, ye kräke nunta köbö kuin juen. <sup>2</sup> Ngöbö ni Rün nikwe amne ni Dänkien Jesukristo raba ja moto mike kuin munkrä amne mun mika nüne jäme kwetre, ie ti tö.

### *Pablota kuin niere Ngöböye ja di käräre kwärä*

<sup>3</sup> Ja mräkätre, munta nüke töre batire batire tie angwane, tita kuin niere Ngöböye munbtä. <sup>4</sup> Erere arato, tita blite Ngöböbe angwane, käta neme bari nuäre tibtä blitare Ngöböbe mun jökrä kräke, <sup>5</sup> ñobtä ñan angwane munkwe tödekani kena Jesubti angwane, mun nikani ti die mike kukwe kuin Jesubtä kädriere abti kä nükebe mtare. Yebtä käta neme bari nuäre tibtä blitare Ngöböbe mun kräke. <sup>6</sup> Ye abko, Ngöbökwe sribi kuin kömikanintbe munbtä, sribi ye abko niara ara kákwe ngwiandi bare jökrä nebe Kristo Jesu jatadita kä mrä köbö ye näire, ye abko gare kuin tie. <sup>7</sup> Tikwe töbikadre kore mun jökräbtä abko kuin ruen tie, ñobtä ñan angwane mun tare kri tikwe. Ngöböta ja moto mike kuin tigrä ti die mikakäre, ben gware munta ti die mike arato, aisetet tita ngite mäkäninte kadenanbtä kä teri ya o tita kukwe kuin Jesubtä ngie mike amne bärä mike ütiäte gobran ngwärerekri, akwa ye känti munta ti die mike. <sup>8</sup> Ne aisetet nikwe ni mda mda taredre ño abko Kristo Jesu tä mike gare tie, yebti tita mun jökrä tarere kri, ye abko gare kuin jökrä Ngöböye.

<sup>9</sup> Ne abko, tita ja di ribere krörö Ngöböye munkrä: Mun tödekaka Jesubti kákwe ja taredre kwärikväri amne ni mda mda taredre bari mda munkwe arato köbö kwatirekwatire. Erere arato, Ngöbö rükadre gare bari munye amne mun jatadre neme bari töbtä Ngöböbtä, dre abko kuin Ngöbö ngwärerekri rükadre gare bari metre munye abko tita ribere Ngöböye munkrä. <sup>10</sup> Tita ribere kore Ngöböye, ñobtä ñan angwane kukwe rükadre gare kore munye, ye köböire dre dre ütiäte nünankrä bari metre Ngöbökrä rükadre gare munye amne mun rabadre nüne kuin deme amne, ni mda mda ñan rabadre mun kite ngise nebebe Kristo jatadita ye näire. <sup>11</sup> Ne abko munkwe nuendre angwane,

mun rabadre nüne metre Ngöbö ngwärekri Jesukristo diebti, ye köböire Ngöbö rabadi käikitankä amne rabadi mikani ütiäte kri.

#### *Kukwe kuin Jesubtä tä nüke gare ni kwatiye*

<sup>12</sup> Ja mräkätre, mtare ti tö kukwe mda niei munye abko krörö: Kukweta nakenä taretare tibtä, yebtä kukwe kuin Jesubtä kädrieta niken bäri janknu mentokwäre, ye abko rabadre gare munye abko krörö: <sup>13</sup> Tita ngite mäkäninte kadenanbtä kä teri tödekatbä Kristobti, ye abko nükanina gare era metre nitre guardiare emperador gwiriete ie, amne ni kwati mda mda, ie nükanina gare arato. <sup>14</sup> Ti kitani ngite tä gare ti mräkätre tödekaka ni Dänkienbtiye nete, ye abko käta bäsí niaratre jökrä kite blite bäri mda kukwe kuin Ngöbökwе yebtä amne kä jürä ñakare btätre blitare.

<sup>15</sup> Nitre ye ngätäite, ni ruäre tä kukwe kuin Kristobtä mike gare, akwa era metre tä mokrere tibe amne töita bikabtä kri tibtä, käta kukwe kuin Jesubtä mike gare ni mda mdaye. Akwa ni ruäre abko tä mike gare ja töi kuinbti. <sup>16</sup> Nitre ye tä ti tarere, aisetetätre kukwe kuin Kristobtä mike gare kore ja töi kuinbti, ñobtä ñan angwane Ngöbö ara jire käkwe ti mikani kukwe kuin ye ngie mikaka abko garera ietre. <sup>17</sup> Akwa ni tä mokrere tibe, ye abko tä kukwe kuin Kristobtä mike gare arato, akwa tätre bike kri au amne, ñan tä sribire ja töi metrebbti. Tita ngite ne ngwane, niaratre töta kukwe mikaitbe bäri ti rüere, aisetetätre käta näin kukwe kuin Jesubtä mike gare kore. <sup>18</sup> Akwa ye abko ñan mikata bäri ütiäte tikwe, ñobtä ñan angwane niaratre tä kukwe kuin Kristobtä mike gare töi kuinbti ya, ñakare ya abko tädbe tikrä, ñobtä ñan angwane tätre kukwe kuin ye mike gare jirekäbe. Ye abko bäri ütiäte, aisetetätre käta neme bäri nuäre tibtä.

Akwa kä rabadi bäri nuäre tibtä janknu, <sup>19</sup> ñobtä ñan angwane era metre tita ngite kä teri nete, akwa mutna blite tikrä Ngöböbë amne Ngöböta Jesukristo Üai juen ti die mikakäre, aisetetätre Ngöbökwе ti dianditari mrä abko gare kuin tie. <sup>20</sup> Ti tädi kukwe ükatekä romanobo ngwärekri angwane, Ngöbökwе ñan ti tuadremetre Kristo Jesu rükente abko tita ribere ie. Erere arato, ti rabadre baliente, käkwe Kristo mikadre tuare ütiäte kri ni kwati ngwärekri Ngöbö diebti abko tita ribere Ngöböye. Akwa kukwe ükatekä romanobo käkwe ti tikadrete nünakäre janknu ya o ti juandre müre ketadre kwe ya, mden erere tädbe tikrä, <sup>21</sup> ñobtä ñan angwane tita nire nünakäre Kristo aibe kräke, akwa ti müre ketadre ye abko rabadre bäri kuin tikrä. <sup>22</sup> Akwa ti tikadrete nünakäre janknu kä nebtä angwane, tikwe sribi kuinkuin nuendre bäri Ngöbökrä, aisetetätre dre abko rabadre bäri kuin tikrä abko ñan nüke gare tie. <sup>23</sup> Ye aisetetätre, jäandrän ketebu ne mden abko tikwe diandrekä jakrä abko tä neme tare tikrä töbige btä. Ti müre ketadre nitre romanobokwe tödekatbä Kristobti angwane, ti rikadre nüne Kristobe, ie ti tö bäri krübäte amne, ye abko rabadre bäri kuin tikrä. <sup>24</sup> Akwa nitre romanobo käkwe ti tikadrete nünakäre janknu kä nebtä abko bäri kuin munkrä ruen tie. <sup>25</sup> Ti tikadite nünakäre janknu mun jökrä die mikakäre näin bäri metre Jesube amne, kä mikakäre nuäre munbtä tödekatbä Jesubti, ye kräke ti rabadi mun jökräbe abko gare kuin tie. <sup>26</sup> Angwane ti rabadita bobuta munbe ketetibe angwane, ti käi rabadita bäri nuäre munbtä amne, munkwe Kristo Jesu käikitadikä, aisetetätre ti rabadre tikaninte rabakäre bobuta munbe abko tuen bäri kuin tie.

#### *Kukwe kuin Kristobtä bää mikadre ütiäte*

<sup>27</sup> Akwa kukwe ketetibe bäri ütiäte nuendre munkwe abko ti bike niere krörö munye: Kukwe kuin Jesubtä rabadre ütiäte ni mda mda okwäre, abkokäre munkwe nüna kuin metre. Munkwe nünandre kore ne ngwane, ti rabadita ja tuenta munbe ya, ñakare ya, o tikwe ni kukwei nuadita munbtä jirekäbe, akwa kukwe krörökrörö rabadi gare tie: Mun tä nünenkä dite jadtä töi ketetibe jökrä, ye köböire mutna ja die mike kwärikwäri kukwe kuin Kristobtä mikakäre gare bäri. <sup>28</sup> Erere arato, munkwe ñan ja ngwian nikenkä mun rüe käne, ñobtä ñan angwane niaratre tä rüre mun rüere, ye abko käta kukwe krörö mike gare: Niaratre juandi ngwarbe jökrä Ngöbökwе, ye abko tuen kuin btätre, akwa mun abko Ngöbökwе dianditari, ye abko tuen gare kuin munbtä arato. <sup>29</sup> Ye abko, Ngöbö moto kuin, ye köböire munkwe tödekatbä Jesukristobti. Akwa ñan munkwe tödekatbä jirekäbe bti, akwa Ngöbö moto kuinbti munkwe ja tare nikadre kräke abko kuin munkrä

arato abko rabadre gare munye. <sup>30</sup> Ye mden kisete mun amne ti, nita ja tare nike ja kwrere Jesukristo dokwäre mtare. Nita ja tare nike, ye mden kwrere tikwe ja tare nikani mun okwäbti ti näma kena juta Filipote, ye kwrere tita ja tare nike nete abko kukwe nuata mda bati munkwe kore.

## 2

*Nitre tödekaka Jesubti käkwe nünandre Jesu kwrere*

<sup>1</sup> Ti mräkätre, mutta ketetibe Kristobe, aisetet ja motota neme ruen nuäre nuäre munye amne, Ngöböta mun tarere, ye tä mun moto mike jáme. Erere arato, Ngöbö Üai tä munbtä abko tä mun mike ketetibe jökrä amne, mun ruuentari tare Ngöböye amne Ngöböta ja moto mike jáme mun kräke abko gare tie. <sup>2</sup> Ye mden kisete, munkwe kä mikadre bäri nuäre tibta, abkokäre munkwe nüna krörö: Munkwe ja töi mika ja näre jökrä. Munkwe ja tare ruäre kwärikwäri. Munkwe nüna jáme jökrä jabe kwärikväri. Erere arato, jändrän ketetibe btä munkwe töbika gware jökrä. <sup>3</sup> Munkwe ñan jändrän nuen jire kaibe jakrä amne ja dikaikäre, akwa bika tidrä ni mda mdabtä amne ni mda mda mika bäri ütiäte jakrä. <sup>4</sup> Mdakäre abko, munkwe ñan töbika jändrän kuinbtä kaibe jakrä akwa, munkwe töbika jändrän kuinbtä ni mda mdakrä arato.

<sup>5</sup> Ye kwrere Kristo Jesu käkwe töbikabare jabtä amne ni mda mdabtä amne nünabare kore kwe, aisetet ye kwrere munkwe töbika amne nüna munkwe arato abko krörö:

<sup>6</sup> Kristo abko Ngöbö arabe arato, akwa rabadre ütiäte janknu Ngöbö kwrere,  
yebtä abko ñan namani töbika kaibe jakrä amne namani ruuentari tare ñakare ie.

<sup>7</sup> Ye mden kisete, Kristo abko Ngöbö arabe, akwa niara käi ütiäte ütiäte kri abko mikaninte kwe ja töi jenbtä, käkwe ja dikaibare ñakare amne, ja mikani ütiäte ñakare kwe abko krörö:

Ni klabore kwrere jire nämane kä nebtä. Erere arato, niara därebare angwane, nämane ni kä nebtä kwrere.

<sup>8</sup> Mdakäre abko, niara namani tuen ni kä nebtä kwrere ni jökräye amne namani bike tidrä ni jökräbtä, käkwe Ngöbö kukwei mikani täte jökrä amne ja biani müre ketadre kwe Ngöbö kukwei mikakäre täte metre.

Akwa ñan müre ketani nuäre,  
akwa müre ketani krübäte krusobtä.

<sup>9</sup> Ye kwrere Jesukwe ja mikani ütiäte ñakare.

Ye mdenbtä Ngöbökkwe mikani bäri ütiäte ni jökrä amne jändrän jökrä bti ta amne, ni käi bäri ütiäte abko Ngöbökkwe biani ie arato.

<sup>10</sup> Ye mden kisete, Jesu ye ngwärerekri ni jökrä amne jändrän jökrä kä käinbtä, kä temenbtä amne dobo täni abko rabadi ngukudokwäbti niara mikakäre ütiäte jae,

<sup>11</sup> Jesukristo abko Dänkien Ngöbö niedre ie angwane, Ngöbö ni Rün rabadi mikani ütiäte kri arato.

*Ngöbö kukwei mikadre täte*

<sup>12</sup> Ne aisetet ti mräkätre tare tikwe, ti nämane mun känti juta Filipos yete angwane, käre mun nämane Ngöbö kukwei mike täte, ye kwrere arato mtare tita mobe munye akwa, mutta Ngöbö kukwei mike täte bäri era metre. Akwa ni dianinantari Ngöbökkwe käkwe Ngöbö kukwei mikadre täte ño, ye kwrere munkwe sribi Ngöbö kukwei mikakäre täte jökrä, Ngöbö mikare ütiäte kri kwärä, Ngöbökkwe mun dianinantari bä mikakrä metre.

<sup>13</sup> Munkwe nuendre, ñobtä ñan angwane Ngöböta sribire munbtä mun töi mikakäre biare sribi kuin nuenkäre amne, Ngöböta sribire mun mikakäre dite sribi kwe ye ngwiankäre bare.

<sup>14</sup> Jändräns jökrä nuenta munkwe, yebtä munkwe ñan ñäkä jabtä kwärikväri amne, munkwe ñan ja kweta kwärikväri. <sup>15</sup> Munkwe nünandre kore angwane, kukwe ñan kwandre jire ni mda mdaye mun kitakrä ngise amne mun töi amne mun moto rabadre metre abkokäre. Ye kwrere, munkwe nünandre Ngöbö ngäbriänkätre töi kuin metre kwrere nitre moto kämekäme amne diän diän ngätäite. Sö amne muke täträ ngitiekä kä käinbtä deo, ye kwrere jire mutta kä trä Ngöbökkwe mike tuare nitre kämekäme

amne diän diän ngätäite kä nebtä. <sup>16</sup> Ne aisetet Ngöbö kukwei kuin käta ni mike nüne kärekäre, ye munkwe ketate dime kisete niekäre ni jökräye. Munkwe nünandre kore ne ngwane, Kristo jatadita ye näire mun käi rabadi nuäre tibtä, ñobtä ñan angwane tikwe ñan ngoto nikani ngwarbe sribire mun ngätäite abko tikwe gadi aisetet. <sup>17</sup> Munta tödeke Ngöböbtä abtä mutta sribi kuin nuene Ngöbökrä. Ye abko, jändrän kämikata kukwadre Ngöböye niara käkitakakrä ye kwrere. Amne titä sribire mun ngätäite, ye dokwäre name ti kämikadre, ye ngwane jändrän biani kukwadre Ngöböye, bti dö kekata, ye kwrere ti rabai Ngöbö ngwärekri. Akwa ye abko Ngöbö moto mikakrä nuäre amne, ye kwrere jire tikwe mun käi ngwiandre nuäre gware jabtä. <sup>18</sup> Ne aisetet, munkwe kä ngwian nuäre gware jökrä jabtä tibe ja tare nikabtä kore.

*Timoteo amne Epafroditu juandi jötrö Pablokwe*

<sup>19</sup> Ja mräkätre, ni Dänkien Jesu tö, ne ngwane bää jötrö ti tö Timoteo juain nebe mun känti yete, ñobtä ñan angwane niara rabadreta mun känti angwane, kä rabadi nuäre munbtä niara tuare. Abti niara rükadreta kukwe ngwenante kuin munbtä tie, ye abko käkwe kä mikadre nuäre tibtä arato, abkokäre tikwe juandi. <sup>20</sup> Tikwe Timoteo juandi, ñobtä ñan angwane titä mun tarere metre, ye kwrere Timoteo aibe käta mun tarere, aisetet tikwe niara juandi mun känti mun die mikakäre. <sup>21</sup> Ni kwati mda abko käta töbige jändrän jakwebtä au, akwa Kristo Jesu tö dreye, yebtä töbikata ñakare kwetre. <sup>22</sup> Akwa Timoteo abko käta nüne metre, ye garera mun jökräye, ñobtä ñan angwane ni ngobo nikwe käta ni die mike ño sribibtä, ye kwrere jire Timoteokwe ti die mikani kukwe kuin Jesubtä mike gare ni mda mdaye, ye garera munye arato. <sup>23</sup> Ne aisetet kukwe rabai ño tigrä nete gadi tikwe angwane, tikwe Timoteo juandi nebe mun känti yete. <sup>24</sup> Amne ti abko tä ngite kä teri nete, akwa ti Dänkien Jesu diebti, bää jötrö ti tikadrete angwane, ti näin nebe mun känti arato abko titä nütüre.

<sup>25</sup> Akwa gwängwarbe abko, ti mräkä Jesu käbti Epafroditu, sribi muko tikwe amne ti die mikaka tikwe, ye abko munkwe juani ti die mikakrä nete abko ti bike juenta nebata mun känti. <sup>26</sup> Niara abko tä ulire mun miare amne, niara namani bren abko gani munkwe, yebtä abko bäri tä töbige kri mda. <sup>27</sup> Epafroditu abko namani bren jume bkänä amne bäsä krütani akwa, namani ruentari tare Ngöböye, aisetet Ngöböökwe mikaninta kuinta amne krütani ñakare. Tita ulire nete, ne bärire ti ñan rabadre ulire mda, abkokäre ti namani ruentari tare arato Ngöböye niarabe gware, aisetet niara krütani ñakare. <sup>28</sup> Ye mdenbtä abko, tita niara juenta jötrö ngwarbe nebata mun känti, kä rabadreta nuäre munbtä niara tuareta abkokäre amne, ti ñan tädre töbige kri janknu arato, abkokäre titä juenta. <sup>29</sup> Ne aisetet kä raba nuäre munbtä niara kare ngäbti ni mräkä nikwe kwrere ni Dänkien käbti. Ye kwrere arato, ni Epafroditu ne kwrerekwre, ye abko munkwe mila ütiäte jökrä arato, <sup>30</sup> ñobtä ñan angwane Epafroditu bäsä krütani sribibtä Kristokrä amne, ja kwata namani ruentari tare ñakare ie angwane, bäsä krütani sribibtä tigrä, sribi ñan rabadre bare jire munye tigrä, mden abko niara nämane nuene, abtä ja bren nikani kore kwe.

3

*Dre nuenta ja dijenbti abkobtä bikadre kri ñakare*

<sup>1</sup> Ti mräkätre tikwe, munkwe ni Dänkien käi ngwian bäri nuäre jabtä. Ti bike kukwe niere munye, ne kwrere tikwe tikanina munye akwa, tare ñakare tigrä tiketa mda munye, ñobtä ñan angwane kukwe ne kuin mun die mikakrä mun rüe ngäniene ruen tie, aisetet titä tiketa munye. <sup>2</sup> Ja mräkätre, nitre israelita käta Kukwe Biani Ngöböökwe Moiséye nuendre nie mikamna täte munye amne, käta ja ñääräkrä mikamna ja kwatabtä munye, ye ngäniene munkwe ja ngibia kuin, ñobtä ñan angwane niaratre abko ni ngututu kämekäme krübäte amne niaratre abko sribi diän diän nuenkä amne niaratre abko ni kwata tikakaka ngwarbe, aisetet nitre ye ngäniene munkwe ja ngibia kuin. <sup>3</sup> Ñääräkrä mikata ja kwatabtä, ye abko käta ni jen Ngöböökwe era metre bää mike nieta kwetre. Akwa ye abko ñakare metre, ñobtä ñan angwane ni abko ni jen Ngöböökwe era metre gare krörö

nie: Nita sribire Ngöbökrä amne nita niara käikitekä Ngöbö Üai köböire amne, nita Kristo Jesu aibe bä mike ütiäte kri. Erere arato, jändrän tuen ni ngrabarebtä, yebti nita tödeke ñakare amne jändrän nuenta au jakrä abko ni ñan tö bä mikai ütiäte kri, aibebti ni ne mden abko ni jen Ngöbökwé era metre gata nibtä. <sup>4</sup> Akwa ti tö rabadre ja bä mikai ütiäte kri ne ngwane, jändrän nuenta au jakrä, yebti ti rabadre ja bä mike ütiäte kri ruen tie.

Nitre ye abko tä jändrän nuene au jakrä ja mikakäre metre Ngöbö okwätä, ja bä mikakäre ütiäte kri. Akwa ti bäri kákwe kukwe nuenbare kuin täte abti ja rabadre ruen ütiäte kri tie abko krörö: <sup>5</sup> Ti därebare angwane, kwäirare ti ñäräkrä mikani ti kwatabtä amne, ti abko israelita, amne ti därebare juta Benjamínkri amne ti abko hebreo era metre. Erere arato, ti nämame nekete nitre bariseokri, aisetetukwe biani Ngöbökwé nuendre nie, ye abko ti nämame mike täte bäri metre nitre bariseo kwrere. <sup>6</sup> Ne aisetetukwe Biani Ngöbökwé Moiséye nuendre nie, yebti ti nämame mokrere krübäte, aisetetukwe tödekaka Jesubti abko rüere ti nämame näin kisere mikakäre ja tare nike. Erere arato, Kukwe Biani Ngöbökwé Moiséye nuendre nie, ye erere ti nämame mike täte bäri, aisetetukwe ti nämame näne bäri metre, ni mda mda nämame nütüre tibtä, aisetetukwe ti bäri kákwe ja bä mikadre ütiäte kri.

<sup>7</sup> Akwa Kristo rabadre mikani kri ti köböire, abkobtä jändrän jökrä nämame ütiäte kri kena tikrä, ye abko tuen ütiäte ñakare tie mtare. <sup>8</sup> Ne bärire mda abko, ti Dänkien Kristo Jesu rükadre gare bäri kuin tie ne abko bäri ütiäte tikrä. Ye mden kisete, jändrän jire jökrä mda mda, ye tuen ütiäte ñakare tie ti Dänkien kwrere, aisetetukwe niara kräke tikwe jändrän jökrä tuanimetre ja jiebti. Jändrän jökrä ye mden abko tuen jändrän ngwarbe rä kure kwrere tie, aisetetukwe mikete, ti Dänkien Kristo Jesu rükadre gare bäri kuin tie amne, <sup>9</sup> ti rabadre näne bäri ketetibe Kristobe abkokäre. Tikwe ja töi mikani Kukwe Biani Ngöbökwé Moiséye ye mike täte, akwa ñan ye köböire ti ngite ñakare mda Ngöbökwé niebare tibtä amne ti kani ngäbti kwe, akwa tödeka kwatibe Jesubti, ye aibe köböire ti ngite ñakare mda Ngöbökwé niebare tibtä amne ti kani ngäbti kwe. <sup>10</sup> Erere arato, Kristo rükadre gare metre ta tie, ie ti tö abko krörö: Ja di kribti Ngöbökwé Kristo mikaninta nire, niara di ye abko ie ti tö jakrä arato nünankrä Kristokrä. Erere arato, niarakwe ja tare nikani ño, ye kwrere ti tö ja tare nikai arato ni mda mda ngwiankäre Ngöböye. Ne kwrere arato, niarakwe ja biani müre ketadre ni mda mda kräke, ye kwrere ti tö ja biain müre ketadre ni mda mdakrä arato amne, <sup>11</sup> Ngöbökwé ti mikadita nire niara kwrere, ie ti tö, abkokäre ti tö nünai bäri ketetibe Kristobe.

<sup>12</sup> Nebtä abko ñan ti nena jändrän jökrä ye bkäne, tita niere. Erere arato, Ngöbökwé ni mikadi era metre kä käinbti, ye erere ti nena era metre ñan tita niere, akwa drekäre Kristo Jesukwe ti käräbare käne, ye aibebtä ti töita, aisetetukwe ye jiebti tita nakwen ja di ngöi jökrä. <sup>13</sup> Ti mräkätre, ne ñan ti nena jändrän jökrä bkäne täte jökrä ja di jenbti abko tita niere, akwa jändrän ketetibe btä tita ja töi mike kwatibe abko nere: Jändrän känekäne namani tie abko tita käikwitekä jabti, amne jändrän kuin tä ti käne Ngöbökwé abko jiebti tita nakwen janknu ja di ngöi jökrä. <sup>14</sup> Ne abko jändrän kuin kä käinbti biandre tie Ngöbökwé Kristo Jesu köböire abko erere ti rabadre bkäne, abkokäre Ngöbökwé ti käräbare näne kä käinbti ben, aisetetukwe tita nakwen kisere jiebti.

<sup>15</sup> Ye abko, nire nire nena ünän tödektä Jesubti abko käkwe töbikadre ja kwrere jökrä tibe. Akwa kukwe mda tärä, btä mun ruäre ñan tä töbikadre ti kwrere ne ngwane, töbikadre ño abko Ngöbökwé mikadi gare munye arato. <sup>16</sup> Akwa nikwe nünandre ño Ngöbö ngwärekri nena gare nie, ye kwrere nikwe nünandre.

<sup>17</sup> Ti mräkätre, nikwe nünandre ño abko erere tikwe nünanba mun okwäbti, ye kwrere mun jökrä käkwe näna. Erere arato, nunkwe nünabare ño mun okwäbti, ye kwrere ni mda mda tä näne ya abko munkwe mika ñäräre kuin abko erere munkwe näna arato.

<sup>18</sup> Tita niere kore, ñobtä ñan angwane ni ruäre abko ñan tä näne kore. Ye mdenbtä tikwe blitabarera bäre bäre munbe akwa, müare kwärä ti tö nieita bobuta munye abko krörö: Kristo krütani krusoftä ni kräke abko nire nire käta mike ngwarbe jae ni jökrä okwäbti, <sup>19</sup> yebtä abko Ngöbökwé gadikä jökrä amne, jändrän nuenta käi ngwiandre nuäre jabtä

kwetre, aibe jiebti tä nakwen. Erere arato, kukwe kämekäme nuenta kwetre abtä rabadre ja gaire kwrere akwa, abkobti jata nebe ruen bäri ütiäte krikri ietre. Jändrän kä nebtä aibebtä tätre töbige. <sup>20</sup> Akwa ni abko kä käinbti bkänkä, aisetet ni kä käinbti bkänkä kákwe nünandre ño, ye kwrere nikwe nünandre amne, ni Dänkien Jesukristo ni Diantarikä tä kä käinbti jatadita abko ngibiata ngäbti nikwe. <sup>21</sup> Angwane ni ngrabare ngwarbe ne abko niarakwe kwitadi kuin bää nuäre niara ngrabare kwrere. Ye abko nita ngibiare amne, Jesukristo di kri jändrän jökrä mikakäre ja ngoto täni ye kákwe ni ngrabare kwitadi jökrä kore ja di kribti.

## 4

<sup>1</sup> Ne aisetet ti mräkätre, munkwe nünanka dite ni Dänkienbtä abko tita niere munye. Mun tare kri tikwe. Ti tö ja tuaita kri munbe amne, mun abko tä sribi ütiä kwrere tikwe, ye abko käta kä mike nuäre kri tibtä ti mräkätre.

*Pablota kukwe ükete Evodia amne Síntique kräke*

<sup>2</sup> Angwane Evodia amne Síntique abko kákwe ja mäkäta ni ja mräkäre kwrere ni Dänkien käbti abko ti tö ribei kisere ietre. <sup>3</sup> Amne ma sribi muko tikwe abko kákwe ni ngwai nibu ye die mika ja mäketa abko tita ribere mae, ñobtä ñan angwane nun nämane sribire Clementebe amne sribikä mda mda nämane sribire tibe arato angwane, ti ngwai nibu ye kákwe sribibare kri gware nunbe kukwe kuin Jesubtä ye mikakäre gare, aisetet makwe die mika, ie ti tö. Mun abko kákwe nünandi kärekäre kä käinbti, ye erere mun kái nena tikani jökrä täräbtä Ngöböökwe.

*Pablota ni jökrä kite nüne bäri Ngöbö kräke*

<sup>4</sup> Ti mräkätre, käre munkwe ni Dänkien kái ngwian bäri nuäre jabtä. Käre munkwe kái ngwian bäri nuäre jabtä tita niereta mda munye. <sup>5</sup> Mun abko moto jäme ni mda mdakrä, ye rüka gare ni jökraye munbtä. Ni Dänkien nükerate ja ken, <sup>6</sup> aisetet munkwe ñan töbika ngwarbe dikaro, akwa munkwe blita Ngöböbe jakrä amne, kukwe jökrä mike gare ie munkwe amne, ja di käräre kwärä munkwe kuin nie Ngöböye arato. <sup>7</sup> Munkwe nuendre kore angwane, Ngöböökwe kä jäme jakwe mikadi mun motobtä. Kä jäme Ngöböökwe abko ñan rükadre gare jire ni kä nebtäye. Kä jäme biandi Ngöböökwe munye, ye kákwe mun moto amne mun töi ngibiadibti kuin Kristo Jesu köböire, munkwe ñan töbikadre dikaro ngwarbe abkokäre.

<sup>8</sup> Ti tö kukwe niei mrä munye ti mräkätre abko krörö: Kukwe era amne kukwe ütiäte, yebtä munkwe töbika. Erere arato, kukwe kuin amne dre abko deme Ngöbö ngwärekri, yebtä munkwe töbika. Amne kukwe mden bää nuäre nuäre amne kukwe mden tuen kuinkuin, yebtä munkwe töbika. Erere arato, jändrän jökrä kuinkuin amne jändrän kuin kä ngwiänkrä nuäre jabtä Ngöbö ngwärekri, yebtä munkwe töbika. <sup>9</sup> Angwane tikwe kukwe diriba ño munye, tikwe mun töi dianba ño ño amne munkwe ti kukwei nuaba blite ño ño amne munkwe ti tuaba dre dre nuene, ye kwrere munkwe nuen janknu. Tita jändrän nuemna munye, ne kwrere munkwe nuendre ne ngwane, Ngöbö moto jäme ye tädi käre munbe.

*Jändrän juani Pablo die mikakrä, btä Pablota kuin niere*

<sup>10</sup> Tita ti Dänkien kái ngwen bäri nuäre jabtä, ñobtä ñan angwane ti nükani töreta munye, kákwe ti die mikaninta. Ne abko ñan ti käikwitaninkä jabti munkwe abko tita niere akwa, kä raire munkwe ngwian juandre nireye tikrä ñan namani nüke gare munye, aisetet mun nämane ti die mike ñakare, akwa mtare munkwe ti die mikaninta. <sup>11</sup> Tita kukwe niere kore munye, ye abko ngwian amne jändrän ñakare tikwe, abtä tita niere kore akwa, ti abko kwe jändrän ño ño tädrera abko rabadre dbe tikrä abko garera tie. <sup>12</sup> Nüna gare bobre tie amne nüna gare jändrän kabrebe tie. Arato, nünandre ño erere, kräke tita biare, ne abko garera tie, aisetet ti tädre trine ya, ti tädre mröi ya abko btä tita töbige ñakare dikaro akwa, käta neme nuäre tibtä. Erere arato, jändrän tärä kabre tie ya, ñakare ya, yebtä tita töbige ñakare dikaro, akwa käta neme nuäre tibtä. <sup>13</sup> Kristo ti die mikaka, köböire ti raba jändrän jökrä nuene.

<sup>14</sup> Akwa munkwe ti die mikani ja tare nika känti nete, käkwe ngwian juani ti die mikakäre, ye abko bäri kuin ruen tie. <sup>15</sup> Ti näma Macedonia munbe, bti tikwe kä mikateba, kä rikaba kukwe kuin Jesubtä mike gare kä mdate angwane, mun Filipobo käkwe tödekaní krire Jesubti, akwa nitre gätäkä Jesu kähti kä Macedoniate, ye ngätäite mun aibe käkwe ti die mikaba. <sup>16</sup> Mdakäre abko, ti näma juta Tesalónicate angwane, mun aibe käkwe ngwian juanba bäre bäre ti die mikakäre. <sup>17</sup> Ne abko ñan munkwe jäandrän juandre bäri ngwarbe mda tikrä abko tita niere akwa, mun rabadre jäandrän bkäne bäri mda Ngöbö ngwärekri abko ie ti tö, käta niere kore munye. <sup>18</sup> Ngwian amne jäandrän jökrä bianta tie munkwe abko tikwe kani ngäbti, aise te jäandrän tära täte tikwe mtare. Mdakäre abko, munkwe ngwian biani Epafroditoye ngwiandre tikrä abko niara nükani ngwena tie amne, jäandränta bäri kabre tikwe mda. Ne aise te munkwe ngwian juani tikrä, ye abko namani kuin Ngöbökrä amne, jäandrän rä bäre bianta Ngöbökrä nitre israelitakwe abko käi namani nuäre Ngöböbtä, abko erere käi namani nuäre Ngöböbtä käre ngäbti arato. <sup>19</sup> Ye abko, Kristo Jesu di kri jäandrän jökrä bkäne, ye köböire jäandrän ñakare munkwe abko Ngöbö tikwe käkwe biandi munye. <sup>20</sup> Amne Ngöbö ni Rün nikwe aibe raba käikitankä kärekäre. Ne abko raba bare kore. Amen.

<sup>21</sup> Mräkäre ti mräkätre, nitre nünanka deme deme Ngöböökwe tä juta Filipote, ie munkwe köbö ngwiantari tikrä amne, ti mräkätre tödekaka Jesubti tä tibe nete käta köbö kuin juen ja mräkätre yete kräke arato. <sup>22</sup> Erere arato, nitre deme deme Ngöböökwe tä nete käta köbö kuin juen mun jökrä kräke akwa, jä mräkätre sribikä emperador romanobokwe abko bäri tä köbö kuin juen munkrä. <sup>23</sup> Ni Dänkien Jesukristo käkwe ja moto mika kuin mun jökrä kräke. Abko kore se. Amen. Ne ngörä.

## Tärä Tikani Pablokwe Nitre Colosabokrä Colosenses

Pablo käkwe tärä ne tikani angwane, niara nämane ngite kä teri juta Romate kukwe kuin Jesubtä diri dokwäre. Ne nakaninkä ño abko tä tikani Hechos 28.14-31 yebtä. Pablo ara käkwe kukwe kuin Jesubtä diribare ñakare juta Colosa yete. Ni iti kädian nämane Epafras käkwe mikani gare ietre. Abti Pablo nämane ngite kä teri juta Romate angwane, Epafras nikani basare ie, ye angwane kukwe kri Colosa känti, niebare kwe ie.

Pablokwe tärä ne tikani rükäre Ngöbö kukwei kuin Jesubtä ye dokwäre, ñobtä ñan angwane ni ruäre juta Colosa yete kä namani kukwe dirire blo Jesukristobtä abko Epafras käkwe niebare ie. Ngöbökwe jäandrän jökrä dätebare ñakare Jesukristo köböire abko nitre dirikä blo nämane niere. Erere arato, Ngöbö ñan nämane nüne täte jökrä Jesukristobtä abko nitre dirikä blo nämane niere. Ye kwrere abko nitre dirikä blo nämane Jesukristo bää mike ütiäte ñakare. Jesukristo täte abko nitre tödekaka Jesubti käkwe kukwe ütiäte nitre israelitakrä ye mikadre ütiäte jae abko dirikätre blo nämane niere.

Kukwe ye dokwäre Pablokwe tärä ne tikani. Ngöbökwe Jesukristo mikani ni jökrä amne jäandrän jökrä bti ta, aisetniara aibe di tärä ni diantarikrä täte jökrä abko Pablokwe niebare. Erere arato, kukwe diribare ni kä nebtäkwe, ye abko ngwarbe amne di ñakare jire chi ni diantarikrä, niebare kwe ietre. Mdakäre abko, nikwe nünandre ño Ngöbö ngwärekri, yebtä Pablokwe diribare arato.

### *Pablota köbö ngwentari*

<sup>1-2</sup> Ti Pablo käta tärä ne tike. Ngöbö tö namani ti mikai Jesukristo kukwei ngwianka abko erere tita sribire kräke. Ti ne mden käta köbö kuin juen ti mräkä Timoteo ben gware mun nünanka juta Colosate ye kräke. Mun abko juta deme Ngöbökwe amne mun ti mräkätre tä nüne era metre Kristokrä. Ngöbö ni Rün nikwe raba ja moto mike kuin munkrä amne mun raba nüne jáme niara diebti, ie ti tö.

<sup>3</sup> Nunta blite Ngöbö ni Dänkien Jesukristo Rün yebe angwane, käre nunta kuin niere munbtä Ngöböye, <sup>4</sup> ñobtä ñan angwane munta tödeke Kristo Jesubti amne, juta deme Ngöbökwe abko munta tarere jökrä arato, ye abko nunkwe kukwe nuaba, abtä nunta kuin niere Ngöböye. <sup>5</sup> Munta nüne kore, ñobtä ñan angwane kukwe kuin era metre Jesukristobtä diribare munye abko munkwe kukwei nuani angwane, jäandrän kuinkuin nämane ükani kä käinbti mun kräke, ye abko nükani gare munye abkobti munta tödeke, käta nüne kore. <sup>6</sup> Kukwe kuin Jesukristobtä, yebti bäri ni kwati tä tödeke kä jökräbti temen. Ye kwrere arato kukwe kuin Jesukristobtä, ye munkwe kukwei nuani mun känti yete angwane, ni kwati käkwe tödekani Jesubti amne Ngöböta ja moto mike kuin era metre ni kräke, ye nükani gare munye. <sup>7</sup> Kukwe kuin Jesukristobtä ye abko nun mräkä Epafras tare nunkwe käkwe diribare munye. Epafras ye abko sribi muko nunkwe. Niara abra sribikä era metre Kristokwe abko tä sribire munbe yete. <sup>8</sup> Epafras ye mden abko rükaba kukwe ngwena nunye abko köböire munta ja tarere ño kwärikwäri Ngöbö Üai köböire abko nunkwe gaba.

<sup>9</sup> Nunkwe kukwe gaba kore munbtä, ye näire mentokwäre käre nunta blite Ngöböbe munkrä, Ngöbö tö dreye munkrä, ye erere mikadre gare täte jökrä kwe munye abko tita ribere ie. Jäandrän jökrä Ngöbökwe, yebtä mun mikadre töbtä kwe amne mun rabadre töi ngitiekä kuin Ngöbö Üai köböire abko tita ribere munkrä Ngöböye. <sup>10</sup> Amne munkwe nünandre kuin metre ni Dänkien mikakäre ütiäte ni jökrä ngwärekri amne, käre jäandrän tuen kuinkuin ni Dänkienye abko erere mun rabadre nuene niara moto mikakäre nuäre abko krörö: Mun rabadre sribi kuinkuin nuene kabre amne Ngöbö rükadre gare ño metre, yebtä mun rabadre töi ngitiekä bäri, ie ti tö, käta kukwe ribere kore Ngöböye. <sup>11-12</sup> Erere arato, Ngöbö di kri bää nuäre, yebti Ngöbökwe mun mikadre dite kri, munkwe ja tare nikadre angwane, mun rabadre nünenkä dite jabtä bätärekä abkokäre. Erere arato,

kä tädre bäri nuäre munbtä, kákwe kuin niedre ni Rün Ngöböye, abkokäre ja di kri bää nuäre, yebti Ngöböökwe mun mikadre bäri dite nünakäre kore niarakrä abko tita ribere ie munkrä. Juta deme Ngöböökwe, kräke Ngöböta jäandrän kuinkuin ngibiare kä käinbiti, ye abko biandi kwe munye arato, abkokäre mun mikanina juto biare kwe jäandrän ye kaen ngäbti käträ ngwente kä käinbiti juta deme Ngöböökwe ben gware.<sup>13</sup> Ni nämane nüne kä ikote Satana ngoto täni, akwa ye ngäniene Ngöböökwe ni diamintari amne Kristo niara Odei tare kri kwe, ye ie ni mikani gare kwe. Mtare niara Odeita gobrane nibti.<sup>14</sup> Ngöbö Odei ye köböire abko Ngöböökwe ni kökanintarita, kákwe kukwe kämekäme btä ni nämane ngite ye dianinkä jökrä nibtä mento.

### *Kristo abko bäri ütiäte jäandrän jökrä bti ta*

<sup>15</sup> Ngöbö abko tuen ñakare, akwa Kristo abko ja kwrere Ngöböbe amne nünabare kä nebtä kwe angwane nikwe tuani. Kristo abko Ngöbö Odei mubai amne jäandrän jökrä däte ngämi, känenkri Kristo nämanena. Niara abko Ngöbö Odei mubai amne jäandrän jökrä Ngöböökwe abko niara kräke.<sup>16</sup> Niara köböire Ngöböökwe jäandrän jökrä käinta amne tementa dätebare. Amne jäandrän tuen nie amne jäandrän tuen ñakare nie abko dätebare kwe niara köböire. Erere arato, üai jökrä tä dänkiene käta gobrane ja di kribti abko Ngöböökwe dätebare niara köböire arato. Jäandrän jökrä namani dätebare kore niara köböire amne niara kräke arato.<sup>17</sup> Jäandrän jökrä däte ngämi, känenkri Kristo nämanena amne niara diebti jäandrän jökrä tä neketaninte amne ñan tä niken ngwarbe.

<sup>18</sup> Mdakäre abko, ni jökrä tödekaka Kristobti abko Kristo ngrabare kwrere amne Kristo abko tä niaratre dokwäre. Erere arato, Kristo abko nämanena kena amne, ni krütanikrütani ye ngätäite niara ara nükantina nire käne, niara rabadre bäri käne jäandrän jökrä amne ni jökrä bti ta abkokäre.<sup>19</sup> Kä namani nuäre Ngöböbtä nünakäre täte jökrä Kristobtä<sup>20</sup> amne Kristo köböire abko Ngöböökwe jäandrän jökrä kä temenbtä amne kä käinbiti käräbare ja mäketa jabe. Ye abko Kristo krütani krusobtä angwane, därie nimianinte, ye köböire Ngöbö moto namaninta jáme ni kräke, kákwe ja mäkäninta nibe.

<sup>21</sup> Angwane mun abko nämane mente Ngöböye amne mun töi nämane ja rüere Ngöböbe, ñobtä ñan angwane mun nämane kukwe kämekäme nuene Ngöbö rüere.

<sup>22</sup> Akwa Kristo kákwe ja tare nikani, krütani era metre krusobtä angwane namani ngwäkäre, ye köböire abko Ngöböökwe ja mäkäninta munbe, mun mikakäre deme, käme ñakare amne ngite ñakare ja ngwärekri.<sup>23</sup> Akwa munkwe nünandre kore Ngöbökrä, abkokäre mutta tödeke kwatibe, yebtä munkwe nünanka dite jabtä. Kukwe kuin Jesukristobtä, ye köböire Ngöböökwe jäandrän kuin köböi mikani nie, yebtä mun ñan rika bätärekä bätärekä mento. Kukwe kuin Jesukristobtä ye mden abko munkwe kukwei nuani amne diribarera ni kwatiye kä jökräbti temen amne ti Pablo ne abko Ngöböökwe mikani kukwe kuin dirikä siba.

### *Pablota sribire ño*

<sup>24</sup> Mdakäre abko, kukwe kuin Jesubtä tikwe mikaba gare munye abko dokwäre tita ja tare mike munkrä mtare, ye abko käi nuäre kri tibtä. Ye abko, nitre gätäkä Jesu käbti abko Kristo ngrabare kwrere, ye kräke ja tare nika Kristokwe rabadre bare täte ti ngrabare nehti, ie Kristo tö namani.<sup>25</sup> Nitre tödekaka Kristobti, ye kräke Ngöböökwe ti mikani sribikä amne Ngöböökwe sribi mikani ti kisete, ye abko ti rikadre Ngöbö kukwei kuin Jesubtä ye mike gare täte jökrä munye, abkokäre sribi ye biani kwe tie.<sup>26</sup> Ni kwati kákwe nünabare ja täritäri kira abti kä nüke mtare abko okwä bäre kukwe kuin ne nämane ükani kaibe tiebe Ngöböökwe, akwa mtare juta deme Ngöböökwe, ye ie Ngöböökwe kukwe tiebe ye mikanina gare.<sup>27</sup> Amne juta deme Ngöböökwe nitre ñakare israelitare ngätäite, ie Ngöböökwe jäandrän kuin bää nuäre ütiäte kri mikani gare. Kristo tä nüne munbtä mtare, ye mden abko nämane ükani tiebe Ngöböökwe kira, akwa mtare tä nüne munbtä, ye köböire abko mun näin nüne kä nuärete Ngöbö känti, ye abko gare nie.

<sup>28</sup> Ne aisetet nunta niken mdente erere, känti nunta kukwe kuin Kristobtä mike gare ni jökräye. Erere arato, nun namani töbtä Ngöbö köböire, yebtä nunta mäträre ni jökräbti

amne nunta dirire ietre, ye köböire abko nun rikadre ni jökrä ngwena nebe Ngöbö ngwärekri ünan täte jökrä Kristo köböire. <sup>29</sup> Ye rabadre bare, abkokäre Kristo diebti tita sribire krübäte. Kristo di kri ye abko tä ti die mike sribi ne nuene.

## 2

<sup>1</sup> Ye abko, mun kräke titat sribire tare krübäte abti titat naente amne ja mräkätre nünanka käname juta Laodiceate amne ja mräkä mda mda ie ti gare ñakare metre abko kräke titat sribire tare kri kore abko rabadre gare munye, abkokäre titat niere. <sup>2</sup> Tita sribire kore, ye köböire abko ja rabadre ruen dite mun jökräye amne mun töi rabadre kwatibe ja tarere kwärikwäri, ye köböire abko kukwe Kristobtä nämane tiebe kaibe Ngöbökwe, ye abko rükadre gare metre täte jökrä munye, mun rabadre tödeke metre niarabti, abkokäre titat sribire kore munkrä. <sup>3</sup> Kukwe ütiäte kri amne kukwe töbtä amne kukwe ja töikrä, ye abko tä jökrä Kristokwe abko kwandi nie. <sup>4</sup> Amne ni mda mda jatadre mun känti blite nuäre nuäre kukwe mdabtä, ye käkwe ñan mun ngökadre, abkokäre titat kukwe niere kore Kristobtä munye. <sup>5</sup> Ti abko tä ñakare ketetibe munbe yete bkänä, akwa ti töi tä ketetibe munbe amne, nünandre ño Kristo kräke abko erere munta nüne era metre amne, munta nünenä dite jabtä, käta tödeke kwatibe Kristobti, ye abko kai nuäre kri tibtä.

*Kukwe ükaninte ja mikakrä metre Ngöbö ngwärekri abko nikwe ñan mikadre täte*

<sup>6</sup> Ne aisetet munkwe Jesukristo kani ngäbti ño ja Dänkiene, ye kwrere munkwe nüna janknu ketetibe ben. <sup>7</sup> Amne kri ngätri tä nikent mente dobote nguse käta kri mike dite, ye kwrere munkwe ja töi mika kwatibe Kristobtä. Erere arato, ju mikata angwane, ürä nökata mente nguse abko kwe juta nebe dite, ye kwrere munkwe nüna ketetibe Kristobe tödekakäre kwatibe niarabti. Ngöbö Kukwei diribare ño ño munye abko erere munkwe mika täte. Angwane munkwe kuin nie kärekäre Ngöböye.

<sup>8</sup> Mdakäre abko, munkwe mokre jabti, ñobtä ñan angwane ni ruäre tä näin kukwe ngwarbe dirire. Kukwe mikanintbe ngwarbe kira abko tätre dirire amne, kukwe ye tä kíte üai käme di kri käta gobrane kä nebtä yekri abko tätre dirire mun ngökakäre, aisetet munkwe ñan ja ngwian nain ietre, <sup>9</sup> ñobtä ñan angwane Kristo jatani nüne ni kwrere amne ngrabare tä abko btä Ngöbö ara jire tä nüne täte jökrä. <sup>10</sup> Munta ketetibe gware Kristobe, aisetet jändrän jökrä Ngöbökwe tä munkwe amne munta jändräni jökrä Ngöbökwe mdei mike ñakare jire chi. Kristo abko tä üai käme di krikri dänkiene amne tä angeletre di krikri dänkiene arato. <sup>11</sup> Mdakäre abko, ñäräkrä mikata ngäbäkre kwatabtä angwane, ngäbäkre kwata diankata btä, ye kwrere arato munkwe tödekani Kristobti angwane, mun namani mikani ketetibe ben. Ye ngwane Kristo köböire kukwe kämekäme mdei nämane munye, ye abko dianinkä mento kwe munbtä. <sup>12</sup> Erere arato, mun ngökanie ñöte Jesu käbti angwane, mun namani doboi mikani ketetibe gware Kristobe bä mikata, akwa Ngöbökwe Kristo mikaninta nire ja di kribti, yebti munkwe tödekani angwane, Ngöbökwe mun mikaninta nire Kristobe gware arato.

<sup>13</sup> Ye abko, käne mun nämane kukwe nuene kämekäme Ngöbö rüere amne, kukwe kämekäme mdei munye, ye Ngöbö ngämi denkä mento munbtä angwane, mun nämane ni ngwäkäre kwrere Ngöbö ngwärekri. Akwa mtare Ngöbökwe mun mikaninante nire Kristo ben gware, käkwe mun ngite dianinkä jökrä mento munbtä. <sup>14</sup> Ye abko, ni nämane nüne Ngöbö rüere, abtä kukwe nämane ükaninte ni rüere, kä nämane ni ngite Ngöbö ngwärekri nire, ye abko Ngöbökwe metani krusobtä käin Kristo ben gware. Ye mden kisete Kristo krütani angwane, kukwe nämane ni ngite niere, ye Ngöbökwe juani ngwarbe Kristo ben gware, aisetet namani ütiäte ñakare mda. <sup>15</sup> Erere arato, üai kämekäme dite krikri bti nämane gobrane, ye abko Ngöbökwe di dianinkä jökrä käin. Kristo köböire Ngöbökwe üai käme ye mikani ngwarbe ni jökrä ngwärekri. Abti ni rükä dänkiene käta rüe ganaine rübtä, käta nikent ni mda mda ngwena ngite ni jökrä ngwärekri, ye kwrere jire Kristo käkwe üai käme ganainbare kwäräbe, ye abko mikani gare ni jökräye, kä nikani ngwena ngite ni jökrä ngwärekri.

<sup>16</sup> Ne mden kisete, mutna mrö ño ño kwete amne mutna tomna ño ño ñaen, yebtä ni mda mdakwe ñäkädre mun rüere abko, ie munkwe ñan olo ketate. Erere arato, bieta Ngöbö mikakrä ütiäte abko köböi, sö mräre nindrini köböi amne köbö jadükakrä, ye mutna mike ütiäte ñakare jae, yebtä ni mda mdakwe ñäkädre mun rüere abko, ie munkwe ñan olo ketate, <sup>17</sup> ñobtä ñan angwane Ngöböökwe kukwe kuin nuendi Kristo köböire abko jändrän ye nämane bä mike jirekäbe, akwa kukwe era metre Ngöböökwe, ye abko Kristo jatani ngwena ni kräke, käta bien nie. <sup>18</sup> Ngöböta jändrän kuin ngibiare munkrä garera munye, akwa ni ja bä mikaka bobre jatadre niere munye: Mun ñakare ütiäte rabakäre jändrän ye bkäne, niedre kwe munye, ye ngwane munkwe ñan ja olo ketate jire chi ie. Ni ja mikaka bobre ye käta angeletre mike ütiäte jae Ngöbö tätä arato. Erere arato, Ngöböta jändrän mike tuare köböre kwrere ietre tä niere, akwa niaratre ñan tä nüne Ngöbö Üai Deme köböire, aise te töita kukwe ngwarbebtä, abti jata nebe ruen ütiäte krikri ietre.

<sup>19</sup> Munkwe ñan ja olo ketadrete ietre, ñobtä ñan angwane nitre tödekaka Kristobti abko tä Kristo ngrabare kiakia kwrere amne Kristo abko tä ni dokwä kwrere abko btä nitre ye tä nekete ñakare mda. Akwa ni kiakia ngrabare tä ketetibe jökrä, ye kwrere ni rabadre nemenkä Kristobtä amne, ni rabadre niren Kristo köböire, ie Ngöbö tö, ye kwrere ni ye tä nekete ñakare mda Kristobtä, aise te munkwe ñan kukwei mika ütiäte.

<sup>20</sup> Munkwe tödekani Kristobti angwane, ni krütani kwrere mun namani ketetibe ben, aise te üui käme tä gobrane kä nebtä, ye abko ñan nena mun dänkiene mda, se ñobtä abko nitre tödekaka ñakare Jesubti kwrere jire mun tä nüne amne kukwe ükaninte ngwarbe abko mun tä mike ja dänkiene abko krörö: <sup>21</sup> “Munkwe ñan kise mika jändrän sebtä” amne “Munkwe ñan jändrän se kweta” amne “Munkwe ñan jändrän se dian kisete” abko ni mdata nuemna munye angwane, mutna kukwei mike ütiäte. <sup>22</sup> Akwa kukwe ükaninte nuendre kore amne jändrän kwetata kore, ye abko näin jökrä ta, ñobtä ñan angwane ni kä nebtä kákwe kukwe ye ükaninte nuendre abko erere dirita, aise te näin jökrä ta amne, ñan rabadre ütiäte mda. <sup>23</sup> Akwa kukwe ükaninte nuendre ni kä nebtäkwe, ye abko tuen töbtä kri bkänä, ñobtä ñan angwane nikwe nünandre metre Ngöbökrä abko tä niere. Erere arato, nikwe bikadre bobre amne nikwe ja kwata mikadre ja tare nike abko dirita kwetre, akwa ye köböire ni ñan raba kukwe käme mdei juentari mento jabtä.

### 3

#### *Kukweta ükaninte nünankrä deme*

<sup>1</sup> Mdakäre abko, Ngöböökwe mun mikaninante nire Kristobe gware, aise te kä bäri ütiäte kä käinbti, känti Kristo tä täkänintbe Ngöbö küde ruenkri, ye känti jändrän bäri ütiäte tä munkrä, yebtä munkwe ja töi mika kusatibe käre. <sup>2</sup> Mdakäre abko, jändrän käme kä nebtä, ye jiebti munkwe ñan ja töi mika mda, akwa jändrän kuin tä kä käinbti Kristo känti, yebtä munkwe ja töi mika kusatibe, <sup>3</sup> ñobtä ñan angwane mun krütani ketetibe gware Kristobe amne munkwe nünandi kärekäre Kristobe, ye abko Ngöböta ngibiare munkrä. <sup>4</sup> Kristo abko mun mikaka nüne kärekäre Ngöböökwe amne niara jatadita angwane, bä rabadi nuäre, ye kwrere mun bä rabadi nuäre arato niarabe gware.

<sup>5</sup> Ne aise te kukwe kämekäme mdei tä munye, ye kite jökrä temen munkwe abko krörö: munkwe ñan ja mika gure batibati ni mda mdabe amne, mun merire brare kákwe ñan kukwe nuen kämekäme jabtä kwärikwäri. Mun tö rabai bäri ni mda mike jabe, ye munkwe kita temen. Erere arato, kukwe kämekäme tä mun töibtä amne mdeita nebe krübäte munye, ye munkwe kita temen amne munkwe ñan jändrän jökrä ribe kabre krübäte jae, ñobtä ñan angwane ni tö jändränje kabre kore abko käta jändrän ye mike ngöböökwe jae Ngöbö tätä aise te. <sup>6</sup> Angwane ni kwati tä ja mike ngite kore, ye dokwäre Ngöböökwe mikadi ja ngie nuen kri krübäte. <sup>7</sup> Mun ngämi tödeke Jesubti, känenkri mun nämane nüne kore angwane, mun nämane ja kite kukwe kämekäme ye nuene jökrä arato. <sup>8</sup> Akwa mtare kukwe krörökrörö kite jökrä temen munkwe: mun moto romon, mun mätä ni mdabtä amne kukwe mikatbe kämekäme ni mda mda rüere amne mun ñäke ngwarbe diän diän ni mda mdabtä amne, mun ñäke diän diän ye kite jökrä temen munkwe. <sup>9</sup> Erere arato, munkwe ñan ja ngöka kwärikväri, ñobtä ñan angwane mun

nämane nüne ño käne angwane, mun nämane dre dre nuene, ye abko munkwe kitanina jökrä temen <sup>10</sup> amne dän btin kita jabtä, ye kwrere jire mun nena ni btin kwrere. Köbö kwatirekwatire Ngöbö mun dätekä kitera mun kwite bäri ja kwrere, ye köböire abko Ngöbö rükadre gare bäri kuin munye. <sup>11</sup> Ye mden kisete, Ngöbö ngwärekri ni ñakare israelitare ya o ni israelitare, ye abko ñakare ütiäte mda. Erere arato, ni ñäräkrä mikani kwatabtä nitre israelitata nuene ye kwrere ya o ñakare ya, ye ütiäte ñakare mda Ngöbö ngwärekri rabakäre dianintari. Erere arato, ni menteni ya, ni käme töi ñakare ya, ni klabore ya, ñakare ya, ye abko ñakare ütiäte mda Ngöbö ngwärekri, akwa Kristo abko aibe ütiäte jäandrän jökrä bti ta amne niarata nüne nibtä aibe ütiäte.

<sup>12</sup> Ngöbö käkwe mun dianinkä jenena jakrä amne mun abko deme amne Ngöböta mun tarere, aisetet munkwe nüna krörö: munkwe ni mda mda ngwian ruen bobre jae, munkwe ja moto mika kuin ni mda mdakrä amne, munkwe bika tidrä ni mda mdabtä. Erere arato, munkwe ja moto mika jáme amne munkwe jäandrän jökrä ngibia bätärekä ja täritäri. <sup>13</sup> Erere arato, ni mda mda tä kukwe nuene mun rüere ne ngwane, munkwe ñan ja ngie mika amne, kukwe tärä ja rüere kwärikwäri munkwe ne ngwane, munkwe kukwe ye dian jabti ta kwärikväri. Ye abko, ni Dänkien käkwe mun ngite diani munbti ta, ye kwrere munkwe nuen jakrä kwärikväri arato. <sup>14</sup> Akwa jäandrän jökrä kuin, ne bti ta abko munkwe ja tare kwärikväri, ye köböire abko munkwe ja mäkädi era metre jabe kwärikväri.

<sup>15</sup> Mdakäre abko, mun jökrä abko tä ketetibe Kristo ngrabare kiakia kwrere amne, Ngöbökwe mun käräbare jakrä nünakäre jáme jabe kwärikväri, aisetet kä jáme Kristokwe, ye ie munkwe kä bian gobrane jabtä. Erere arato, jäandrän jökräbtä munkwe kuin nie Ngöböye. <sup>16</sup> Erere arato, Ngöbökwe mun mikani töbtä, yebti monta dirire jae kwärikväri amne monta mäträre jabtä kwärikväri arato angwane, Kristo kukwei kuin, yebtä munkwe töbika kärekäre. Erere arato, munkwe Ngöbö käi ngwian nuäre jabtä, käkwe salmos, himno nie käre Ngöböye amne, ka mda mda Ngöbö käikitakakrä, ye munkwe nie Ngöböye arato angwane, Kristo kukwei kuin, yebtä munkwe töbika kärekäre. <sup>17</sup> Angwane munkwe jäandrän nuen ya o munkwe blita ya, akwa munkwe nuen jökrä ni Dänkien Jesu kähti, käkwe kuin nie Ngöbö ni Rün nikweye ni Dänkien Jesu köböire.

### Nünandre ño ja gwirierte

<sup>18</sup> Mdakäre abko, mun merire gure gure käkwe ni brare munkwe ye kukwei mika ütiäte jae, kukwe mikakäre täte, ni tödekaka ni Dänkien Jesubti käkwe nuendre ye kwrere.

<sup>19</sup> Erere arato, mun brare gure gure abko käkwe meri munkwe ye tare amne, munkwe ñan mika ene ja kisete amne munkwe ñan bätä ngwian btä.

<sup>20</sup> Ngäbäkre, mun abko käkwe mun rün btä mun meye kukwei mika täte jäandrän jökräbtä, ñobtä ñan angwane ye abko käita nebe nuäre ni Dänkienbtä. <sup>21</sup> Amne mun ngäbäkre rünre abko käkwe ñan ngra ngra ngäbäkrehti, niaratre moto mikakäre ulire dikaro.

<sup>22</sup> Mun klabore abko käkwe mun bkänkä kä nebtä kukwei mika täte sribi jökräbtä, akwa ñan mun bkänkä okwäbti aibe munkwe sribi nuendre kuin niara moto mikakäre nuäre, akwa munkwe sribi jire jökrä nuen kuin ja moto kuinbti mun Dänkien Jesu mikakäre ütiäte jae. <sup>23</sup> Mdakäre abko, munkwe dre dre nuen, erere munkwe nuen kuin ja di ngöi jökrä amne, ñan monta sribire ni kä nebtä kräke, akwa monta sribire ni Dänkien Jesu ara jire kräke abko munkwe nütü käkwe sribi kore, <sup>24</sup> ñobtä ñan angwane munkwe sribi nuendre kuin, ye ütiäre abko ni Dänkien käkwe jäandrän kuin kä käinbti biandi munye abko gare munye. Ye abko, Kristo mun Dänkien era metre ara kräke monta sribire, aisetet munkwe sribi nuen kuin. <sup>25</sup> Akwa nire nire käta kukwe nuene ni mda rüere, ye dokwäre abko Ngöbökwe mikadi ja ngie nuen, ñobtä ñan angwane Ngöbö abko tä kukwe ükete ja kwrere ni jökrä kräke.

## 4

<sup>1</sup> Amne mun ni klabore bkänkä, mun ye abko Bkänkä tärä kä käinbti arato abko mun Dänkien Jesukristo, ye abko munkwe ngwian töre jae, käkwe ni klabore munkwe mika sribire kuin era metre jakrä amne munkwe ñan mika ene jae.

*Blitadre kärekäre Ngöböbe*

<sup>2</sup> Mdakäre abko, munkwe ja töi mika kwatibe blitakäre kärekäre Ngöböbe amne drebtä munkwe blitadre Ngöböbe, yebtä munkwe mokre jabti, käkwe kuin nie Ngöböye.

<sup>3</sup> Angwane kukwe nämane ükani kaibe tiebe Ngöböökwe Kristobtä, ye abko tita mike gare, abtä tita ngite kä teri mtare. Kukwe ye abko tikwe mikadre gare bäri ni mda mdaye, abkokäre ni Dänkien käkwe kä biandre nunye, yebtä munkwe blita Ngöböbe nunkrä. <sup>4</sup> Erere arato, kukwe kuin Kristobtä, ye tikwe mikadre gare ni mda mdaye angwane, rükadre gare kuin metre ietre abko erere tikwe mikadre gare, yebtä munkwe blita Ngöböbe tikrä. <sup>5</sup> Angwane nitre tödekaka ñakare Kristobti, ye okwäbti munkwe nüna töbtä amne, kä tädre munye blitakrä bentre Kristobtä angwane, munkwe blita btä amne, munkwe ñan kä juan ngwarbe ta. <sup>6</sup> Erere arato, käre munkwe blita ja moto jämenbti ni mda mdabe amne mun kukwei rabadi mate nuäre ni mda mda olete, ni mda mdakwe kukwe ngwiandretari ño ño munye Ngöböbtä, ye munkwe kukwe kadre ngäbti ño rabadre gare munye abkokäre.

*Pablota köbö kuin juen*

<sup>7</sup> Mdakäre abko, ni mräkä Tíquico tare kri nikwe. Niarakwe ti die mikani kri krübäte amne tä sribire gwaire tibe ni Dänkien Jesu kräke. Niara näin nebe mun känti yete angwane, dre dre tä nakenkä tibtä nete abko niedi jökrä kwe munye. <sup>8</sup> Amne nunta ño nete abko niedre kwe munye amne, kä mikadre nuäre kwe munbtä, abkokäre tita juen. <sup>9</sup> Amne Onésimo näin siba Tíquicobe nebe mun känti yete. Onésimo ne abko tare kri nunkwe amne ni raba tödeke niarabti. Mdakäre abko, niara mun mräkä Colosabo yete arato abko näin siba. Dre dre tä nakenkä nete abko niedi jökrä kwetre munye.

<sup>10</sup> Amne ti kukwe muko Aristarco tä ngite siba tibe kä teri nete abko käta köbö kuin juen munkrä. Erere arato, Bernabé etbakrä Marcos abko käta köbö kuin juen munkrä. Marcos ne rika nebe mun känti angwane, dre dre nuendre kräke abkobtä blitabarera munbe, aisetet nane Marcos rika nebe basare mun känti yete angwane, munkwe ka ngäbti kuin. <sup>11</sup> Erere arato, ni iti kädianta Jesu abko ara kädianta Justo arato abko käta köbö kuin juen munye. Nitre tä sribire tibe gwaire kä gobrankrä ni Dänkien ye kräke, ngätäite nitre ne aibe abko israelitare. Niaratre ne abko käta kä mike nuäre kri tibtä nete. <sup>12</sup> Amne Epafras sribikä Kristo Jesukrä abko käta köbö kuin juen munye arato. Epafras ne abko mun mräkä Colosabo yete amne Ngöbö tö dreye munkrä, ye erere munkwe nünandre käre amne, mun rabadre nünenkä dite era metre ni Dänkienbtä, abkokäre käre niarata blite Ngöböbe munkrä. <sup>13</sup> Amne Epafras abko tä sribire krübäte munkrä, ye abko tita tuen ja okwäjenbti, aisetet tita kukwe era erere niere niarabti munye, akwa ñan mun Colosabo yete aibe kräke tä sribire kore, akwa ja mräkätre tödekaka Jesubti tä juta Laodiceate amne juta Hierápolite abko kräke tä sribire krübäte arato. <sup>14</sup> Amne Lucas ni kräkä bianka abko tare kri nikwe, niara ye abko käta köbö kuin juen munkrä. Erere arato, Demas käta köbö kuin juen munkrä.

<sup>15</sup> Angwane ja mräkätre tödekaka Jesubti tä juta Laodicea, kräke tita köbö kuin juen abko munkwe nie ietre tikrä. Erere arato, tita köbö kuin juen Ninfakrä amne ja mräkätre tä ja ükekrö niara juete, kräke tita köbö kuin juen abko munkwe nie ietre arato.

<sup>16</sup> Tita tärä juen munkrä, nebtä munkwe ñäkä ünän jökrä angwane, munkwe juan nebe juta Laodiceate abko ja mräkätre yete käkwe ñäkädre btä arato abkokäre. Erere arato, tärä tikani tikwe tä ja mräkätre Laodiceabo kisete, ye járaba mun känti yete angwane, munkwe ñäkä btä arato.

<sup>17</sup> Mdakäre abko, Arquipoye abko munkwe kukwe ne nie krörö tikrä: sribi mikani ma kisete ni Dänkienkwe, ye makwe nuen kuin täte abko munkwe nie kore ie tikrä.

**18** Mräkäre abko, ti Pablo ti ne abko käta köbö kuin juen munye abko tita tike ja kise jenbti au munkrä, tita tärä ne tike rabadre gare munye abkokäre. Tita ngite mäkäninte kadenanbti nete, ye munkwe ngwian töre jae abko tita ribere munye. Ngöbökwe ja moto mika kuin mun jökrä kräke. Abko kore se. Ne ngörä.

## Tärä Tikani Käne Pablokwe Nitre Tesalónicabokrää

### 1 Tesalonicense

Tärä ne abko tikani Pablokwe kä 50-51 angwane, aisetetärä ne abko tikani bări kăne kwe. Pablo nikani Ngöbö kukwei kuin kădriere juta Tesalónicate angwane, nikani Silvanobe amne Timoteobe. Pablo namani Ngöbö Kukwei kuin kădriere juta Tesalónicate angwane, ni kwati namani romon kräke, abtä ngitiani, nikani nebe juta Atenate mda. Yebti Pablo tö namani rikai sribireta Tesalónicate nitre tödekaka Jesubti Tesalónicabo die mikakäre nüne bări Jesukrä, akwa ñan nikaninta yete. Akwa nitre Tesalónicabo tödekaka Jesubti nämane ja tare nike nitre tödekaka ñakare Jesubti ye kisete, aisetetimoteo aibe juaninta Pablokwe tärä ne ngwena nitre Tesalónicabo die mike. Ye abko tä tikani Hechos 17.1-14 yebtä.

Pablokwe tärä juani abko tikani krörö kwe ja täritäri: nitre Tesalónicabo gätäkä Jesu kăbti abko kräke Ngöböökwe jändrän kuin nuenbare, abtä Pablokwe kuin niebare Ngöböye. Erere arato, Ngöbö nämane bentre abko Pablokwe mikaninta töre ietre.

Bobukäre abko, Pablokwe nünabare ño nitre Tesalónicabo ngätäite amne niaratre tarebare ño kwe abko mikaninta töre kwe ietre. Pablokwe tärä tikani kore nitre Tesalónicabo die mikakäre nüne käre Jesukristokrä.

Bämäkäre abko, Pablokwe nitre Tesalónicabo töi diani nüne bări Jesukristokrä. Mdakäre abko, ni tödekaka Jesubti tä krüte, btä dreta nakenkä abko niebare kwe ietre. Mräkäre abko, nikwe Jesukristo ngibiadre ngäbti ño kisere abko niebare kwe arato.

#### *Pablota köbö ngwentari*

<sup>1</sup> Mun gätäkä Jesu kăbti tä nekete ni Rün Ngöböökri amne ni Dänkien Jesukristokri käta nüne juta Tesalónicate, ye ie ti Pablo, Silvano amne Timoteo käta köbö ngwentari. Ngöbö raba ja moto mike kuin munkrä amne, mun raba nüne jáme Ngöbö diebti, ie nun tö.

#### *Pablota kuin niere nitre Tesalónicaboye*

<sup>2</sup> Ja mräkätre, käre nunta kuin niere Ngöböye mun jökräftä amne, nunta blite Ngöböökwe angwane, nunta blite ben munkrä. <sup>3</sup> Erere arato, nunta blite Ngöbö ni Rün nikwebe angwane, munta tödeke kwatibe Ngöböbti abtä munta sribi kuin nuene ni mda mdakrä abko käre tä nüke töre nunye. Erere arato, munta Ngöbö tarere abtä munta jändräni kuinkuin nuene ni mda mdakrä abko käre tä nüke töre nunye. Erere arato, munta ni Dänkien Jesukristo ngibiare ngäbti abtä munta nünenkä dite ja tare nikakäre tödekabtä Jesubti abko käre tä nüke töre nunye.

<sup>4</sup> Ja mräkätre, Ngöböta mun tarere. Niarakwe mun dianinkä jen jakrä, ye abko gare kuin nunye, <sup>5</sup> ñobtä ñan angwane nun jataba kukwe kuin Jesukristobtä kădriere munbe angwane, ñan nunkwe blitabare jirekäbe, akwa nun köböire Ngöböökwe ja di kri mikani gare munye amne, Ngöbö Üai Deme kákwe sribi nuenbare kri mun ngätäite. Erere arato, kukwe ne abko era metre nunkrä abko näma gare munye. Ye mden kisete, Ngöböökwe mun dianinkä jen jakrä gare kuin nunye. Erere arato, nun näma munbe angwane, nun näma jändräni kuinkuin aibe nuene munkrä abko garera mun jökräye. <sup>6</sup> Ye abko, nun näma nüne ño, erere arato ni Dänkienkwe nünabare ño, ye kwrere mun jatani nüne abko krörö: Munkwe kukwe kuin Jesubtä kani ngäbti, ye dokwäre mun näma ja tare nike, akwa Ngöbö Üai Deme köböire kă namani bări nuäre munbtä. <sup>7</sup> Ye mdenbtä abko, nitre gätäkä Jesu kăbti nünanka kă Macedoniate amne kă Acayate, kräke mun nämane ütiäte kri, aisetet munkwe nünabare ño, ye abko kákwe niaratre tötitikani nünabtä. <sup>8</sup> Erere arato, kukwe kuin ni Dänkienbtä, ye abko ñan nitre Macedoniabo amne Acayabo aibe ie gare akwa, mun köböire kukwe ye nena gare mente temen. Ye aisetet ñan nunkwe kukwe ye mikadre gare amne batibe rabadi gare ni mda mdaye, <sup>9-10</sup> ñobtä ñan angwane nun nükani mun ngätäite angwane, munkwe nun kani ngäbti ño, ye abko garera ni mda mdaye. Erere arato, munkwe jändräni dätebare ngöbö ngwarbere tuanimetre ño, bti munkwe Ngöbö

nire era metre kani ngäbti ño sribikäre kräke, amne Jesu Ngöbö Odei tä kä käinbti abko munta ngibiare ngäbti abko nena gare ni mda mdaye abko erere tä niere nunye. Jesu ye abko müre ketani, bti Ngöbökwe mikaninta nire. Ngöbökwe ni mikadi ja ngie nuen, ye ngäniene Jesuta ni dentari.

## 2

*Sribi Pablokwe nitre Tesalónicabobe*

<sup>1</sup> Ja mräkätre, nun janama mun känti, ye abko ñan nun janama ngoto nike ngwarbe, ye gare kuin munye. <sup>2</sup> Nun janama mun känti, ye känenkri nun näma juta Filipos angwane, nitre yete käkwe nun mikaba ja tare nike kri amne nun mikaba ngwarbe jae kwetre arato. Nun rüe rababa kwati mun känti arato, akwa Ngöbökwe nun die mikaba ja kukwei kuin kädriere munbe, aise te nunkwe ja moto mikaba kwe kwe blitakäre munbe, <sup>3</sup> ñobtä ñan angwane kukwe era erere nunkwe kädrieba amne, ñan nun näma blite ja töi blobti. Erere arato, nun ñan töi rababa mun ngökai jire chi. <sup>4</sup> Akwa Ngöbökwe tödekani nunbti sribi ne nuenkäre, käkwe nun mikani ja kukwei kuin kädriere abko erere nunta dirire. Ye abko nun ñan töi ni mda mda moto mikai nuäre diribtä kore, akwa Ngöbö aibe nun töi moto mikai nuäre, ñobtä ñan angwane Ngöbö aibe käta ni moto ño abko tuente aise te. <sup>5</sup> Ye mdenbtä, nunkwe ñan blitaba nuäre nuäre jire bati mun näkwitakäre. Erere arato, ñan nun janama bike kuin munbe ngwian diankäre jae munkän, ye gare kuin munye amne tuen kuin Ngöböye. <sup>6</sup> Erere arato, ñan nun käkitadrekä munkwe amne ni mda mdakwe, abkokäre nunkwe Ngöbö kukwei kädrieba.

Nun abko Jesukristo kukwei ngwianka, aise te nun rabadre sribi ütiä kärere munye, akwa nunkwe käräba ñakare munye. <sup>7</sup> Akwa ngäbäkre chi därebe meye kwe tä ngibiare kianbtä abko ben meyeta blite jáme, kwrere jire nunkwe blitaba jáme munbe. <sup>8</sup> Erere arato, mun tare bäri kri nunkwe, aise te ñan nunkwe kukwe kuin Ngöbökwe aibe mikaba gare munye, amne nun töi ño ño abko käi rababa nuäre nunbti mike gare jökrä munye, ñobtä ñan angwane mun tare kri nunkwe aise te. <sup>9</sup> Ja mräkätre, nun nämane Ngöbö kukwei kuin Jesubtä kädriere munbe angwane, käre nun nämane ganane mrökrä jae. Nun nämane sribire tare dibire rare, ñobtä ñan angwane nun ñan töi namani sribi mikai mun köitärä, ye tä töre kuin munye, ruen nunye.

<sup>10</sup> Mdakäre abko, mun ngätaite nunkwe nünanba deme amne metre Ngöbö ngwärekri amne, ni mda mda ñan rababa ñäke blo nunbti, ye munkwe tuani amne Ngöbökwe tuani arato. <sup>11-12</sup> Ye abko, ngäbäkre rün kwe käkwe töi dian amne die mika kwe, ye kwrere nunkwe mun töi diani jäandrän kuin nuene amne, mun moto ulire angwane, nunkwe kä mikaninta nuäre munbti, ye tä gare munye, ruen nunye. Erere arato, ni jen Ngöbökwe käkwe nünandre ño abko erere nunkwe nünamna munye. Kä nuäre te Ngöböta gobrane, ye känti niarata mun kärere rabakäre siba jabe.

<sup>13</sup> Nun nämane Ngöbö Kukwei kädriere munbe angwane, kukwe ye abko munkwe kani ngäbti Ngöbö Kukwei ara jire kwrere amne, ñan kukwe mikanintbe ni mdakwe, kwrere munkwe kani ngäbti. Yebtä abko, käre nunta kuin niere Ngöböye arato, ñobtä ñan angwane Ngöbö Kukwei ye abko tä sribire mun tödekaka Jesubti ye töibtä mtare. <sup>14</sup> Ye abko ja mräkätre, nitre jen Ngöbökwe gätäkä Kristo Jesu käbti kä Judeate abko mräkä israelita käkwe ngwianja ja tare nike kri tödekabtä Jesubti, ye kwrere munkwe ja tare nikani tödekabtä Jesubti mun mräkä Tesalónicabobe kisete. <sup>15</sup> Kira abti kä nüke mtare nitre israelita tä ni juani Ngöbökwe blitakäre bentre kämike abko krörö: Nitre israelita abko käkwe ni Dänkien Jesu müre ketani. Ye kwrere Ngöbö kukwei niekä kira müre ketani kwati kwetre arato. Erere nun juanintari kä ye känti kwetre arato. Yebtä Ngöbö moto ñakare nuäre kräke amne, niaratre tä ja rüere ni jökräbe abko krörö: <sup>16</sup> Nitre ñakare israelitare rabadre dianintari, abkokäre nun töta nebe kukwe kuin Jesubtä kädriei bentre angwane, nitre israelita tätre neme ja rüere nunbe. Ne kwrere nitre israelita tä ja mike ngite bäri kabre krübäte. Yebtä abko Ngöbö moto gadadi, käkwe ngwiandi ja ngie nuen kri krübäte.

*Pablo tö namani ja tuaita nitre Tesalónicabobe*

<sup>17</sup> Ja mräkätre, ni ngidianinkä jötrö ken jene jene ja okwä bäre mento angwane, ni nämane ja tuenta ñakare akwa, käre munta ja töibtä nunkwe amne, bäri nun tö namani rikai ja tuakäreta munbe arato. <sup>18</sup> Nun tö namani rikai mun känti, akwa ti Pablo, ti ne bäri tö rababa rikai bäre bäre akwa, Satanakwe ji ötaba nun käne, aisetetun ñan namaninta mun känti. <sup>19</sup> Nun tö rababa näin bäri, ñobtä ñan angwane Jesu rükadita angwane, mun tädi näin käre Jesube, bti nuta tödeke. Mun tädi näin käre Jesube angwane, Jesu rükadita näire, käi rabadi nuäre nunbtä amne ja rabadi ruen ütiäte sribi nunkwebtä nunye Jesu ngwärekri, aisetetunta tödeke bäri krübäte munbti. <sup>20</sup> Ne aisetetunta tödeke bäri krübäte munbti.

3

<sup>1</sup> Nun tö rababa mun tuai bäri, aisetetun ñan rababa neme nuäre, abtä nun aibe rabadi kaibe juta Atenas nete abko nunkwe ükateba kore angwane, <sup>2</sup> nun mräkä Timoteo abko juanba nunkwe. Timoteo abko tä sribire Ngöböbe kukwe kuin Kristobtä kädriere. Nunkwe niara juanba mun töi ketabtäkäre Jesubtä amne, mun kitakäre nüne bäri Jesukrä. <sup>3</sup> Erere arato, kukweta nakenkä taretare mun rüere, yebtä munkwe ñan ja töi mikadre ngwarbe kwärkwärä abkokäre nunkwe juanba, ñobtä ñan angwane nita ja tare niike tödekabtä Jesubti, ye tä käre ni jiete, ye garera mun jökräye. <sup>4</sup> Ye garera kore munye, ñobtä ñan angwane nun näma munbe yete angwane, nikwe ja tare nikadi kri abko nunkwe nieba munye, mden erere tä nakenkä nibtä abko nena gare munye arato. <sup>5</sup> Ne mdenbtä abko, mun töi nämane Jesubtä ya abko ti Pablo ne tö rababa gai amne, ti ñan rababa neme nuäre, käkwe Timoteo juanba kukwe gain jakrä, ñobtä ñan angwane nane Satanakwe kukwe käme mikadre mun jiete mun nuatekäre ja käne, ye abko jürä rababa krübäte tibtä, amne nane nunkwe ngoto nikani kri ngwarbe abko jürä rababa tibtä arato.

*Timoteo nükaninta Pablo känti kukwe kuin ngwena*

<sup>6</sup> Akwa Timoteo janama Tesalónica mun känti yete, rükabata angwane, mun tä tödeke kватibe Jesubti amne, mun tä ja tarere kwärkwäri amne ni mda mda tarere, ye abko kukwe kuin järukaba kwe nunkrä. Erere arato, käre nuta nüke töre munye ja moto kuinbti amne, nun tö ja tuaita munbe, ye kwrere mun tö ja tuaita nunbe arato, nieba Timoteokwe nunye. <sup>7</sup> Ne mdenbtä abko kä rababa nuäre nunbtä amne, ja rababa ruen dite nunye ja mräkä, ñobtä ñan angwane nuta ja tare niike kri abtä jata nebe ruen diäne nunye akwa, mun abko tä tödeke Jesubti, ye abko bäri käi nuäre nunbtä. <sup>8</sup> Mdakäre abko, munta nünenkä dite ni Dänkien Jesu diebti ye gaba nunkwe abko käta nun die mike bäri mda. <sup>9</sup> Nebtä abko kukwe ñan tä nebe kwen jire mda nunye kuin niekäre Ngöbö nikweye munbti. Erere arato, munkwe kä mikani nuäre kri nunbtä Ngöbö ngwärekri, yebtä abko nunkwe kuin niedre ño mda Ngöböye ñan tä nebe nüke gare nunye arato. <sup>10</sup> Ngöbökwe kä biandre nunye niken ja tuenta gwärere munbe ie nun tö, ñobtä ñan angwane dre dre ngämi gare munye, rabadre mun die mike tödeke bäri Jesubti, yebtä abko nun tö näin mun die mike bäri abko nuta ribere dibire rare Ngöböye.

*Pablota blite Ngöböbe*

<sup>11</sup> Tita blite krörö Ngöböbe mun kräke: Ngöbö ni Rün nikwe ara amne ni Dänkien Jesu käkwe nun jie tika nebata mun känti abko ie nun tö. <sup>12</sup> Mdakäre abko, nuta mun tarere ño, ye kwrere ni Dänkien käkwe mun mikadre ja tarere bäri kwärkwäri amne, ni mda mda tarere bäri mda arato. <sup>13</sup> Erere arato, ni Dänkien Jesu jatadita nitre deme kwe ben, ye ngäbti Ngöbö ni Rün nikwe käkwe mun töi mika dite nünakäre metre amne deme ja ngwärekri abko ie nun tö. Abko kore se.

4

*Ñan ja mikadre gure jire chi bati bati, akwa nünandre deme*

<sup>1</sup> Mdakäre, ja mräkätre, munkwe nünandre metre kä mikakäre nuäre Ngöböbtä, ye nunkwe diribarera munye abko erere munta näne. Mtare munkwe nüna janknu kore köbö kwatirekwatire abko nun tö ribei munye ni Dänkien Jesu käbti, <sup>2</sup> ñobtä ñan angwane ni Dänkien Jesu käkwe nun mikani kukwe dirire munye abko nunkwe diriba munye, ye nena gare mun jökraye abko krörö:

<sup>3</sup> Mun rikadre näne bari deme mda Ngöbökrä köbö kwatirekwatire, ie Ngöbö tö abko krörö: munkwe ñan ja mika gure jire chi bati bati. <sup>4</sup> Erere arato, mun töi raba ngitiekä ja mikabtä gure tiebe ni mda mdabe angwane, munkwe ja ngrabare ye näkwita au amne, munkwe nüna kuin deme amne ja mika ütiäte kwärikwäri munkwe. <sup>5</sup> Nitre ie Ngöbö gare ñakare abko tä ja gaire ñakare jäandrän ngwarbe kwrere, ye kwrere munkwe ñan nüna. <sup>6</sup> Mdakäre abko, mun ja mräkäre Jesu käbti käkwe ñan kukwe nuen blo ja rüere kwärikväri amne, munkwe ñan ja ngöka kwärikväri ja mräkä merire, brare mikabtä ja ken bati bati, ñobtä ñan angwane ni kukwe nuenkä käme mräkä rüere kore abko ni Dänkienkwe mikadi ja ngie nuen abko nunkwe niebara munye amne, nunkwe mun mikabara mokre btä. <sup>7</sup> Ye abko, Ngöböökwe ñan ni käräbare ja mikakäre ngite kore ni mda mdabe akwa, Ngöböökwe ni käräbare nünakare kuin deme jakrä. <sup>8</sup> Ne mden aisetet, nire nire mun ngätäite käkwe kukwe ne kitadre temen angwane, ñan ni kä nebtä kukwei kitadre temen kwe akwa, Ngöbö ja Üai Deme bianka nie, ye ara jire kitadre temen kwe.

<sup>9</sup> Ja mräkätre, munta ja tarere kwärikväri, yebtä abko nun ñan raba tärä tike munye, ñobtä ñan angwane Ngöbö ara käkwe mun töi tikani ja tarere kwärikväri. <sup>10</sup> Munta ja mräkätre tödekaka Jesubti nünanka kä ngrabare temen Macedonia yete tarere jökrä bkänä. Ye abko kuin akwa, munkwe ja taredre bari mda köbö kwatirekwatire abko nunta nire munye.

<sup>11</sup> Mdakäre abko, munkwe ja töi mika nünanbtä jäme amne, munkwe töbika bari kukwe jakwebtä. Mdakäre abko, sribidre jen jakrä munkwe, niebare nunkwe munye, ye kwrere munkwe sribi ja kise jenbti jakrä. <sup>12</sup> Munkwe ne nuendre mun rabadre ütiäte nitre tödekaka ñakare Jesubti ye okwäbti abkokäre. Erere arato, munkwe nünandre kore jäandrän jen jakwebti. Ye kwrere munkwe ñan jäandrän ni mdakwe ngibiadi nünankrä jae abko ie nun tö.

### *Jesu jatadita nirekrä abko Pablokwe niebare*

<sup>13</sup> Mdakäre abko ja mräkätre, ni mda mda käta tödeke ñakare Jesubti abko ni mda ñakare tödekakrä kwetre, aisetet mräkäta krüte kän angwane, motota nötöte krübäte jiebti. Ye kwrere ñan rakadrekä munbtä, abkokäre ni tödekaka Jesubti tä krüte angwane, dreta nakenkä btä abko nun tö mikai gare krörö munye: <sup>14</sup> Jesu müre ketani, bti nukaninta nire, ye abko garera nie amne era nikrä. Ye kwrere arato, ni tödekaka Jesubti krütanikrütani, ye abko Ngöböökwe mikadita nire rikakäre Jesube abko era nikrä arato. <sup>15</sup> Ni Dänkien Jesu ara käkwe kukwe diribare, erere nunta nire munye abko krörö: Ni Dänkien Jesu jatadita angwane, nitre tödekaka bti tä näne, ye ñan rikadi ben ni krütanikrütani känenkri, <sup>16</sup> ñobtä ñan angwane ni tödekaka Jesubti krütanikrütani rükadita nire käne. Ni Dänkien Jesu ara jire jatadita kä käinbti timonkwäre angwane, ni kukwei jaradi kri kä käinbti timonkwäre. Erere arato, angele ütiäte kri abko kukwei jaradi amne, trombeta ngö kä käinbti abko kukwei jaradi ni Dänkien käne arato. Ye ngwane ni tödekaka Kristobti krütanikrütani, ye ara jire rükadita nire käne. <sup>17</sup> Yebti ni tä näne nüne abko jänain gware nitre yebe mütateta käin ni Dänkien Jesu ngäbti. Ye ngwane ni rabadi näne kärekäre ni Dänkienbe. <sup>18</sup> Ne aisetet munkwe blita kukwe nebtä ja die mikakäre kwärikväri.

<sup>1-2</sup> Mdakäre abko ja mräkätre, ni Dänkien Jesu jatadita ne abko rakadikä ñongwane ti rabadre niereta munye, akwa ti bike nire ñakare munye, ñobtä ñan angwane garera metre krörö munye: Ni gokä rükadre gore ñongwane gare ñakare ju bkänkäye, akwa batibe rükadre gore deo, ye kwrere jire ni tädi ni Dänkien ngibiare ngäbti ñakare

angwane, batibe jatadita. <sup>3</sup> Ne kwrere arato, meri ñan mobe bren kwe kisete, ye kákwe ja ngibiadre ñongwane metre gare ñakare ie, akwa batibe ja ngibia kái tä nüke ie, ye kwrere nitre tödekaka ñakare Jesubti tädi niere krörö: Mtare kukwe ñakare. Nita nüne kuin jáme, tädi niere. Ye ngwane ni Dänkien Jesu jatadita kákwe juandi ngwarbe jökrä amne ñan kwäräbedre jire kwetre.

<sup>4</sup> Akwa mun abko ñan tä nüne kái ikote ja mräkätre, aisetet ni Dänkien Jesu jatadita abko btä mun töita, aisetet mutta ngibiare ngäbti kisete mun ñan kwandre jáme ie. <sup>5</sup> Ye abko, mun jökrä tä nüne kái ngwente Ngöbö träte. Ñan nita nüne mente Ngöböye kái ikote amne ñan nita nekete kái ikokri. <sup>6</sup> Ne mden kisete ni tödekaka Jesubti kákwe ñan nünandre okwä kware, akwa ni tädre ngwate niara ngibiare ngäbti amne nikwe ja ngibiadre kukwe kämekäme ngäniene. <sup>7</sup> Nita kibien abko tä kibien deo abko gare nie. Erere arato, ni dröbaka dröbaka tä dö ñaen kái ikote deo, ñobtä ñan angwane nitre tödekaka ñakare Jesubti abko, ietre Ngöbö gare ñakare, aisetet ñan tä ni Dänkien Jesu ngibiare ngäbti. <sup>8</sup> Akwa nitre tödekaka Jesubti tä nekete kái ngwen yekri amne nikwe kukwe kämekäme bätäkä ngwarbe nuendre ñakare nitre dröbaka ye kwrere. Akwa ari töbige kuin ja káne kukwe kämekäme rüere. Erere arato, ari tödeke kwtibe Jesubti amne, ni rükä kätä jäandrän ribi mike ja mäträbti ja ngibiakäre, ye kwrere ari ja tarere kwärikwäri ja ngibiakäre. Ne kwrere arato, ni Dänkien Jesu jatadita ni diantarikäre, ye ngäbti abko ari niara ngibiare kisete, ño ni rükä kätä sobro balinkwatate ribi mike ja dokwäbti ja ngibiakäre ye kwrere. <sup>9</sup> Nikwe nünandre kore, ñobtä ñan angwane ñan Ngöböökwe ni dianinkä ja ngie nuakäre akwa, niarakwe ni dianinkä jen jakrä ni diantarikäre ni Dänkien Jesukristo köböire. <sup>10</sup> Nita nire ya o ni krütarera ya, akwa ni rabadre nüne kärekäre ni Dänkien Jesukristobe, ne mdenkäre ni Dänkien Jesukristo krütani ni kräke. <sup>11</sup> Ne aisetet munkwe ja moto mika nuäre kwärikväri nünakäre dite ni Dänkien Jesukristo kräke amne, munkwe ja mika bäri dite nünakäre ni Dänkien Jesukristo kräke. Ye abko mutta nuene, akwa nuen janknu munkwe.

#### *Nünandre ño jabe kwärikväri*

<sup>12</sup> Ja mräkätre, kukwe mda nun tö nibi ribei munye abko krörö: Nitre mun jie ngwianka kätä sribire mun ngätäite amne tä mun töi tike era metre ni Dänkien Jesubtä, ni ye abko munkwe mika ütiäte jae. <sup>13</sup> Erere arato, sribi nuenta kwe, yebtä raba tare kri munkwe amne munkwe mika bäri ütiäte jae.

Mdakäre abko, munkwe nüna jáme jabe kwärikväri, ie nun tö. <sup>14</sup> Mdakäre abko ja mräkätre, nire nire btä kái krene sribire, yebtä munkwe ñäkä ietre amne, nire nire moto ulire abko munkwe die mika kái mikakäreta nuäre btä. Erere arato, nire nire di krüte abko munkwe die mika. Erere arato, mun ñan moto raba romon jötrö jötrö ni mda mdakrä. <sup>15</sup> Mdakäre abko, munkwe ja mika juto kukwe ne nuene abko krörö: Ni mdakwe kukwe nuen blo mun rüere akwa, munkwe ñan ja ngie mika amne, munkwe jäandrän kuin nuen jakrä kwärikväri, ye kwrere munkwe nuen ni mda mda ñakare tödekaka Jesubti kräke.

<sup>16</sup> Käre munkwe kái ngwian bäri nuäre jabtä. <sup>17</sup> Käre munkwe blita Ngöböbe. <sup>18</sup> Kukwe ño erere, btä munkwe kuin nie Ngöböye, ñobtä ñan angwane ni tödekaka Kristo Jesubti kákwe kuin niedre Ngöböye abko ie Ngöbö tö.

<sup>19</sup> Mdakäre abko, sribi Ngöbö Üaikwe ñan dokwä täkä munkwe. <sup>20</sup> Erere arato, ni Ngöbö kukwei niekä, ye ñan kukwei mika ngwarbe munkwe, <sup>21</sup> akwa tä Ngöbö kukwei niere metre ya, ñakare ya, ye mika ñäräre kuin munkwe amne, kukwe kuin nie kwe ne ngwane, munkwe kukwei mika era. <sup>22</sup> Erere arato, kukwe kämekäme bätäkä ngwarbe, ye ngäniene kái mikaka munkwe.

#### *Kukwe niebare mrä Pablokwe*

<sup>23</sup> Mräkäre abko, Ngöbö ni mikaka nüne jáme jabe kwärikväri amne ni mda mdabe, Ngöbö ye ara kákwe mun die mika nüne kuin deme. Amne ni Dänkien Jesukristo jatadita, ne ngwane ja ñan rabadre ruen ngite niara ngwärerekri munye, abkokäre Ngöböökwe mun üai amne mun ngrabare üka kuin kukwe kämekäme ngäniene. <sup>24</sup> Ngöbö mun käräkä abra tä ja kukwei mike täte era metre amne kukwe ne rabadi bare täte jökrä ie.

<sup>25</sup> Ja mräkätre, munkwe blita Ngöböbe nunkrä. <sup>26</sup> Erere arato, munkwe köbö ngwiantari jae angwane, munkwe ja demain era metre ja moto kuinbti. <sup>27</sup> Mräkäre abko, munkwe ñäkä tärä nebtä ja mräkä mda mdakrä abko titä niere munye ni Dänkien käbti.

<sup>28</sup> Ni Dänkien Jesukristo raba ja moto mike kuin mun kräke. Ne abko kore. Ne ngörä.

## Tärä Tikani Bobukäre Pablokwe Nitre Tesalónicabokrä 2 Tesalonicense

Pablo nämane juta Corintote angwane, niarakwe tärä ne tikani juandre nitre gätäkä Jesu kähti nünanka juta Tesalónica känti. Tärä 1 Tesalonicense jänikani Silvanokwe amne Timoteokwe nebe Tesalónica yete, abti nükaninta Pablo känti juta Corintote. Yebti tärä ne tikani Pablokwe nitre Tesalónicabokrä. Jesukristo jatadreta ño amne jatadreta ñongwane abko Pablo tö namani dirii nitre tödekaka Jesubti Tesalónicabo yeye abko erere tikani kwe tärä nebtä. Niara tö namani kukwe tikai kore, ñobtä ñan angwane Jesu kebera nüketa, aisetet ñan sribidre jire chi mda mrö ganainkrä jae abko ni ruäre dirikätre blo nükani dirire Tesalónica yete. Nitre ruäre tödekaka Jesubti kákwe kukwe ye mikani era jae, aisetet ñan nämane sribire mda mrö ganaine jae.

Akwa Jesu ngämi nüketa, känenkri nitre tödekaka Jesubti nünanka juta Tesalónicate kákwe nünandre metre amne sribidre mrö ganainkrä jakrä kwetre abko Pablokwe niebare ietre.

Akwa Jesu ngämi nüketa, känenkri nitre tödekaka Jesubti nünanka juta Tesalónicate kákwe nünandre metre amne sribidre mrö ganainkrä jakrä kwetre abko Pablokwe niebare ietre.

### *Pablota köbö ngwentari*

<sup>1</sup> Mun gätäkä Jesu kähti tä nekete ni Rün Ngöböökri amne ni Dänkien Jesukristokri käta nüne juta Tesalónicate, ye ie ti Pablo btä Silvano amne Timoteo käta tärä ne tike. <sup>2</sup> Ngöbö ni Rün nikwe amne ni Dänkien Jesukristo raba ja moto mike kuin mun kräke amne, mun raba nüne jáme niaratre diebti.

### *Pablota nitre tödekaka Jesubti mike ütiäte jae*

<sup>3</sup> Ja mräkätre, munta tödeke bări mda Jesubti amne, mun itire itire käta ja tarere bări kwärikwäri, aisetet nunkwe kuin niedre kärekäre munbtä Ngöböye ruen nunye. <sup>4</sup> Abtä nitre Ngöböökwe tä gätäre, ye känti nunta mun käkitekä abko krörö: Kukwe taretare tä nakenkä munbtä tödekabtä Jesubti abko kisete munta ja tare nike, akwa munta nünenkä dite jabtä amne Jesu rükente ñakare amne munta tödeke janknu Jesubti abko nunta niere ietre.

<sup>5</sup> Ye abko, Ngöbö abra kukwe ükatekä era metre ni jökrä kräke abko bă mikata munkwe abko krörö: Munta ja tare nike tödekabtä Jesubti, aisetet niarata gobrane, ye känti mun tädi biare nüne ben abko niarakwe niedi. <sup>6</sup> Akwa Ngöbö abra kukwe ükatekä metre aisetet, nire nire tä mun mike ja tare nike, ni ye abko Ngöböökwe mikadi ja tare nike mun dokwäre. <sup>7</sup> Erere arato, mun ja tare nikaka, ye abko Ngöböökwe mikadi jadüke nunbe gware. Ye abko, ni Dänkien Jesu tä kä käinbti abko jatadita angele dite dite kwe ben ñukwä jutrate, ye angwane ni mikadi jadüke Ngöböökwe. <sup>8</sup> Ni Dänkien Jesu jatadita angwane, nire nire ie Ngöbö gare ñakare amne ñan tä ni Dänkien Jesu kukwei kuin mike täte, ni ye abko niarakwe mikadi ja ngie nuen. <sup>9</sup> Ye angwane juandi ngwarbe kärekäre kwe amne niaratre ñan rabadre jire chi ni Dänkien känti amne ni Dänkien Jesu di kri bă nuäre ñan tuadre jire kwetre. <sup>10</sup> Akwa ni Dänkien Jesu jatadita angwane, ni deme kwekwe kákwe käkitadikä. Erere arato, nitre tödekaka niarabti töi ñan rabadi krüte niara tuare. Nitre ne ngätäite mun tädi siba, ñobtä ñan angwane kukwe kuin Jesubti abko nunkwe niebare munye angwane, munkwe mikani era aisetet.

<sup>11</sup> Kukwe rakadikä kore gare kuin nie, aisetet käre nunta blite Ngöböbe munkrä amne, Ngöböökwe mun käräbare, yebtä mun die mikadre nüne niarakrä kwe abko nunta ribere ie. Erere arato, mun tö jändrän kuinkuin nuein, ye erere btä mun die mika kwe, jändrän ye mikakäre neme bare. Erere arato, munta tödeke Jesubti, ye köböire sribi jökrä btä

Ngöbö raba mun die mike abko nunta ribere ie. <sup>12</sup> Nunta ribere kore Ngöböye ni Dänkien Jesu rabadre käkitaninkä mun köböire amne Ngöbö amne ni Dänkien Jesukristo käkwe mun käikitadrekä ja moto kuinbti, abkokäre nunta blite kore Ngöböbe mun kräke.

## 2

*Jesu jatadita, ye näire dre rakadikä*

<sup>1</sup> Ja mräkätre, ni Dänkien Jesukristo jatadita angwane, niarakwe ni ükadikrō jökrä ketetibe jabe. Köbö ye ngibiare kwärä abko nun tö ribei krörö munye: <sup>2</sup> Ni Dänkien rükadreta abko erere köböi nüra, aisetet ni Dänkien nürate ye abko Ngöbö Üaikwe mikani gare tie, ye ni mda mda jata niere munye, yebtä munkwe ñan ja töi kwita amne munkwe ñan kä jürä ngwian jire chi jabtä. Mdakäre abko, ni Dänkien rükadreta abko erere köböi nüra, aisetet ni Dänkien nürate abko nunkwe diribare amne nunkwe juani täräre abko ni mda mda raba niere, akwa nun abko kukwe ye kwrere niere ñakare. <sup>3</sup> Munkwe ñan ja ngökamna jire chi, ñobtä ñan angwane ni Dänkien Jesu rükadreta, ye känenkri ni kwati rikadi rüre Ngöböbe amne, ni jatadi iti Ngöbö rüere abko ni Ngöbö Kukwei kitaka temen abko rükadi. Akwa Ngöböökwe ni ye juandi ngwarbe mrä. <sup>4</sup> Ni ye abko Ngöbö rüe, aisetet jäandrän jökrä mikata Ngöböre amne mikata ütiäte ngöbö kwrere, ye ben niara rabadi ja rüere. Erere arato, rabadi ja mike bäri ütiäte jäandrän jökrä ngöböre ye ngwä. Abtä ju blitakrä Ngöböbe, ye känti ni ye näin käkwe ja mikadi bäri kri Ngöböbti ta, käkwe ja Ngöbö niedi.

<sup>5</sup> Ye abko, tikwe nünabare mun ngätäite angwane, tikwe blitaba kukwe nebtä munbe, ÿe töre ñakare munye ya? <sup>6</sup> Ni Ngöbö Kukwei kitaka temen ye abko rabadi mikani gare kä ngrabare temen, akwa köbota kitani Ngöböökwe, ye känenkri ni ye ñan rükadre ja mike gare, ñobtä ñan angwane jäandrän keteti tä ketebtä. Jäandrän ye abko jäandrän ño garera munye. <sup>7</sup> Kä ne ngwane Satanata kukwe miketbe käme, ye abko nena näin kä ngrabare temen akwa, nita iti käta ni Ngöbö Kukwei kitaka temen ye ketebtä, akwa ni ye diandikä angwane, <sup>8</sup> ni Ngöbö Kukwei kitaka temen ye käkwe ja mikadi gare kä ngrabare temen. Akwa ni Dänkien Jesu jatadita angwane, niarakwe müre täkädi ye käkwe ni ye gadikä amne niaraträ niadi bä nuäre ye käkwe müre ketadi arato. <sup>9</sup> Akwa ni Dänkien Jesu ngämi nüketa, känenkri ni Ngöbö Kukwei kitaka temen ye käkwe sribidi Satana diebti, aisetet rabadi sribi kri ñan tuabare nuene amne di rabadi krübäte jäandrän bätäkä ngwarbe nuenkäre akwa, ye abko bä rabadi sribi Ngöböökwe kwrere ni ngökakäre. Sribi kri, yebtä ni kwati töi ñan rabadi krütare. <sup>10</sup> Erere arato, kukwe käme nuendi bätäkä ngwarbe kwe, ni mden mden tä biare riatekäre ye ngökakäre. Nitre tä biare riatekäre tätre ja dokwä mike ribi, aisetet ñan tö kukwe era metre Ngöböökwe tarei, abtä ñan rabadre dianintari amne riadite jökrä. <sup>11</sup> Ne aisetet Ngöböta niaratré töi kwite ngwarbe, ni ye rabadre kukwe ngwarbe mike era jae abkokäre. <sup>12</sup> Ne abko ni jökrä btä käta neme nuäre kukwe diän diän nuene abko ñan tä kukwe era metre mike era jae, ni ye mden abko Ngöböökwe juandi ngwarbe jökrä.

*Kukwe diribare Pablokwe abko ketadrete dime ja kisete*

<sup>13</sup> Mdakäre abko, ja mräkätre tare ni Dänkien Jesukwe, nunkwe kuin niedre kärekäre munbtä Ngöböye, ñobtä ñan angwane mun rabadre dianintari, abkokäre kena dekä Ngöböökwe mun dianinkä jakrä. Sribi Ngöbö Üaikwe mun mikakrä nüne deme Ngöbökrä amne mutta kukwe metre Jesubtä mike era jae, ye köböire Ngöböökwe mun dianintari.

<sup>14</sup> Ye rabadre bare, abkokäre kukwe kuin diribare nunkwe Jesubtä munye, köböire Ngöböökwe mun käräbare jakrä. Ni Dänkien Jesukristo bä nuäre, ye kwrere mun rabadi kwitani, abkokäre Ngöböökwe mun käräbare jakrä. <sup>15</sup> Ye mden kisete ja mräkätre, nunkwe kukwe diribare gwärere munye amne, nunkwe tikani täräre munye, ye munkwe ñan käikitakata jire chi jabti amne, munkwe ketate dime ja kisete, ie nun tö. <sup>16</sup> Ni Dänkien Jesukristo btä Ngöbö ni Rün nikwe käkwe ni tarebare amne jäandrän kuin nuenbare ni kräke ja moto kuinbti kwetre, käkwe kä mikani nuäre nibtä kärekäre amne ni die mikani

jändrän kuin kä käinbti ngibiakäre kisere. <sup>17</sup> Niaratre ara käkwe mun mika ruen dite munye amne mun die mika sribi kuin nuenkäre amne kukwe kuin niekäre abko ie nun tö.

## 3

*Nitre tödekaka Jesubti käkwe blitadre Ngöböbe Pablokrä*

<sup>1</sup> Ja mräkätre, mräkäre kukwe kuin ni Dänkien Jesubtä, ye nun rikadre ngwena jötrö kä jökräbti temen. Erere arato, kä namani nuäre munbtä kukwe kuin ye mikakäre ütiäte jae, ye kwrere ni mda mdakwe mikadre ütiäte jae, abkokäre munkwe blita Ngöböbe nunkrä. <sup>2</sup> Erere arato, ni diän diän töi kämekäme Ngöbö rüere, ye ngäniene Ngöbökwe nun ngibiadre, abkokäre munkwe blita Ngöböbe nunkrä.

<sup>3</sup> Ni Dänkien käta kukwe niere, erere tä mike täte. Niara ye ara käkwe mun die mikadi näne jakrä amne, mun ngibiadi kwe ni rüe käme Satana ngäniene. <sup>4</sup> Nunkwe kukwe diribare munye, erere monta nuene, amne munkwe nuendi käre ruen nunye. <sup>5</sup> Ngöbota ni tarere ño, ye kwrere ni Dänkien Jesu raba mun die mike ja tarere kwärirkwäri amne, Kristo käkwe ja tare nikani angwane, nünankabare dite kwe jabtä, ye kwrere niara raba mun töi tike nünenkä dite jabtä ja diebti, ie nun tö.

*Ni jökrä käkwe sribidre*

<sup>6</sup> Ja mräkätre, mun mräkä mden mden tä nekete Jesukri, akwa kä krene btä sribire amne, kukwe diribare nunkwe tä mike ñakare täte, ni yebe munkwe ñan ja geta jire chi abko nunta niere munye ni Dänkien Jesukristo käbti. <sup>7</sup> Tita kukwe ne niere munye, ñobtä ñan angwane nunkwe nünabare ño mun ngätäite, ye kwrere munkwe nünandre garera munye abko krörö: Nun nämane mun känti, ye ngwane nunkwe kä ngwiani krene ñakare jabtä. <sup>8</sup> Erere arato, nunkwe ñan mröbare ngwarbe ni mda mdakän, ñobtä ñan angwane nun ñan tö namani sribi mikai kri dikaro mun kötärä, kä nämane sribire dibire rare mrökrä jae. <sup>9</sup> Nunkwe mrö ribedre munye abko rabadredbe akwa, sribidre ño jen jakrä abko nun tö namani bää mikai mun okwäbti, ne kwrere munkwe nuendre arato, abkokäre nunkwe sribibare kore mrökrä jae. <sup>10</sup> Mdakäre abko, nun nämane mun känti yete angwane, nunkwe kukwe ükateba krörö munkrä: Nire nire ñan tö sribire käkwe ñan mrödre, nunkwe nieba.

<sup>11</sup> Akwa ni ruäre mun ngätäite abko tä dikekä ngwarbe krö kwärirkwära, kä krene btä amne, ñan tö sribire. Käre tä ja mike kukwe ni mda mdakwe te ta abko nunkwe gaba.

<sup>12</sup> Ni ye kwrere kwrere abko käkwe sribi jáme mrökrä jae abko nun tö niei ie amne, nunta mikamna sribire ni Dänkien Jesukristo käbti. <sup>13</sup> Akwa mun mda mda abko ñan raba dräre sribi kuin nuene.

<sup>14</sup> Erere arato, tärä juanta nunkwe, ne nire nire ñan tö raba mikai täte, ye abko mika ñäräre kuin munkwe, bti rabadre ja gaire, abkokäre munkwe ñan ja geta ben. <sup>15</sup> Akwa munkwe ñan mika ñäräre ja rüe kwrere amne, ni mräkä nikwe töi dian, ye kwrere munkwe töi dian jirekäbe.

*Kukwe mrä ja mräkä Tesalónicabokrä*

<sup>16</sup> Ja mräkätre, ni Dänkien kä jáme bianka ye käkwe mun moto mika näne jáme köbö kwatirekwatire kukwe bätäkä ngwarbe te abko nunta ribere Ngöböye. Ni Dänkien raba munbe.

<sup>17</sup> Ti Pablo käta köbö ngwentari mrä munye amne titä kukwe mrä ne tike ja kise jenbti, titä kukwe tike ño rabadre gare munye abkokäre. Ne kwrere titä tärä juen metre rabadre gare munye, abkokäre titä kukwe tike kore mrä. <sup>18</sup> Ni Dänkien Jesukristo raba ja moto mike kuin mun jökrä kräke. Ne abko kore. Ne ngörä.

## Tärä Tikani Käne Pablokwe Timoteokrä 1 Timoteo

Ni nitre tödekaka Jesubti jie ngwianka, kräke Pablokwe tärä tikani ketämä. Ne mden ngätäite abko tärä ne tikani käne kwe Timoteoye. Tärä ne abko, ni nitre tödekaka Jesubti jie ngwianka töi diankrä sribibtä.

Timoteo abko sribi muko Pablokwe. Niara nämane bati angwane Pablokwe dianinkä sribikäre jabe. Niara nämane nüne juta Listrate, kä Asiate. Niara rün abko griego amne meye abko israelita. Pablokwe kukwe kuin Jesubtä mikani gare juta Listrate angwane, Timoteo käkwe tödekani Jesubti. Abti Pablo nükani bobukäre juta Listrate angwane, Timoteo dianinkä kwe sribikäre jabe abko tä tikani Hechos 16.1-4 yebtä. Yebti Timoteokwe sribibare raire Pablobe kukwe kuin Jesubtä mikakäre gare kä ketareketare temen. Abti Timoteo nämane nitre gätäkä Jesu käbti juta Efesote jie ngwena. Timoteo käkwe nünandre ño amne sribidre ño, btä Pablokwe tärä ne tikani Timoteo die mikakäre.

Mdakäre abko, ni ño mikadre ni nitre tödekaka Jesubti jie ngwianka amne die mikaka abko tikani kwe Timoteoye. Mdakäre abko, nitre tödekaka Jesubti nämane Efeso, ngätäite kukwe namani kri krübäte, ñobtä ñan angwane ni ruäre namani kukwe ngwarbe dirire abko nikani niren bäri mda. Timoteo abko käkwe kukwe ne ükadrete ño abko Pablokwe niebare ie.

Kukwe ne abko raba ni die mike kri mtare. Nikwe ni ño diandrekä sribikäre ni jie ngwianka kwrere abko tärä ne tä mike gare nie. Erere arato, ni ño diandrekä sribikäre nitre jie ngwianka die mikaka abko tärä ne tä niere. Mdakäre abko, ni nitre tödekaka Jesubti jie ngwianka käkwe nünandre ño amne sribidre ño abko 1 Timoteo ne tä niere nie.

### *Pablotä köbö ngwentari Timoteoye*

<sup>1-2</sup> Ti Pablo käta tärä ne take mae Timoteo. Ti ne abko Kristo Jesu kukwei ngwianka. Ngöbö ni Diantarikä amne Kristo Jesu, bti nita tödeke ye käkwe ti mikani ja kukwei ngwianka. Sribi tikwe ye köböire makwe tödekani Jesubti, aise te ma abko ti ngobo tikwe kwrere Timoteo. Ngöbö ni Rün nikwe btä Kristo Jesu ni Dänkien raba ja moto mike kuin makrä amne ma raba ruentari tare ietre. Erere arato, ma raba nüne jäme niaratre diebti, ie ti tö.

### *Kukwe blo dirikätre, ietre Timoteokwe ñäkädre*

<sup>3</sup> Timoteo, ni näma juta Efesote, bti ti jataba kite Macedonia nete angwane, ni ruäre näma dirire blo abko ñan diridre kore mda kwetre makwe niedre ietre, abkokäre ma rabadre yete, tikwe nieba mae. <sup>4</sup> Kukwe mikanintbe ngwarbe kirakira aibebtä niaratre tä ja däkwite amne nire därebare mräkä ütiäte kirakri, btä kukwe ñan krütare, aibebtä tä ja däkwite abko ñan nuendre kore makwe niedre ietre, abkokäre ma rabadre yete. Kukwe mikanintbe ngwarbe kirakira, yebtä ni kwati tä neme ja kwete angwane, ñan tä ja kite sribi Ngöböökwe yebtä angwane, tödekadre ño metre Ngöbööti abko dirita ñakare. Akwa tödeka Ngöbööti, ye köböire Ngöbööta sribire ni kwekwe ngätäite. Ye mden kisete, kukwe ngwarbe, yebtä ja däkwitadre ñakare amne diridre ñakare abko makwe nie ietre. <sup>5</sup> Akwa ja taredre kwärikwäri kwetre, abkokäre makwe nie kore ietre. Ni töi deme bti nikwe ja taredre metre. Arato kukwe käme nuendre ñakare kwetre, ja rabadre ruen ngite ñakare Ngöbö ngwärerekri abkokäre. Erere arato, nikwe tödekadre era metre Jesubti amne, ñan bike ni tödekaka Jesubti kwrere. Kore nikwe ja taredre kwärikväri. <sup>6</sup> Ni ruäre ñan tä kukwe ye nuene mda, käta ja kwete jirekäbe kukwe ngwarbebtä. <sup>7</sup> Niaratre tö rabai Kukwe Biani Ngöböökwe Moiséye dirikätre, abtä jata kukwe ye dirire metre nieta kwetre, akwa kukwe ye tä dre niere metre abko ñan tä nüke gare ietre, aise te tä dirire blo.

<sup>8</sup> Kukwe Biani Ngöböökwe Moiséye, ye dirita metre ne ngwane, kukwe ye kuin ni die mikakrä garera nie. <sup>9</sup> Akwa Ngöböökwe ñan ja kukwei biani Moiséye ni nünanka metre ye kitakäre ngite. Akwa ni kukwe ye mikaka ngwarbe jae, kräke Ngöböökwe mikani, ni ngite

ye mikakäre gare ie. Erere arato, ni dokwä ribi ribi, ni rüre Ngöbö rüere, ni diän diän kukwe kämekämē nuenkä, ni Ngöbö jürä ngwen ñakare amne, ni Ngöbö kukwei mike ütiäte ñakare jae abko kräke Ngöböökwe ja kukwei mikani nuendre, ni ngite ye mikakäre gare ie. Mdakäre abko, ni ni rün btä ni meye kämikaka amne, ni ni mda mda kämikaka abko kräke Ngöböökwe ja kukwei mikani nuendre, ni ngite ye mikakäre gare ie. <sup>10</sup> Ne kwrere arato, ni merire, ni brare ja mike gure bati bati amne, ni brare bike merire, ni merire bike brare, ni ngäbäkre mikaka ja ken, arato ni ni mda mda rürümoinkä mikakäre klabore amne, ni ni ngökaka amne ni blitaka ngwarbe ni mda mda rüre amne, ni kukwe nuenkä kämekämē Ngöbö kukwei metre rüere kore, mden kräke Ngöböökwe ja kukwei mikani nuendre, ni ngite ye mikakäre gare ie. <sup>11</sup> Akwa Ngöbö Kukwei dirita metre, ye abko käta kukwe kuin nuäre Ngöböbtä niere metre. Angwane Ngöbö käkitadrekä ni jökräkwe. Kukwe kuin Ngöböökwe, ye mden Ngöböökwe ti mikani ngwianka ni jökräye.

### *Jesukristokwe kukwe nuenbare kuin Pablokrä*

<sup>12-13</sup> Ngöböökwe ti mikani sribire jakrä, ye mdentä titä ni Dänkien Kristo Jesu demaine. Niarakwe ja di biani tie sribi ne nuenkrä. Ti nämane tödeke ñakare Jesubti angwane, ti nämane ñäke blo niara rüere. Erere arato, nitre tödekaka niarabti, jiebti ti nämane näin kisere mikakäre ja tare nike amne, ti nämane rüre krübäte Jesukristo rüere. Akwa ti nämane tödeke ñakare bti, aiseti ti nämane kukwe ye nuene Ngöbö rüere nämane gare ñakare tie. Abtä Ngöböökwe ja ngie mikani ñakare, kákwe ti ngwiani ruen bobre jae amne tödekabare kwe tibti angwane, ti mikani ja kukwei ngwianka kwe. <sup>14</sup> Ni Dänkien kákwe ja moto mikani kuin krübäte tikrä amne kukwe kuin nuenbare kabre kwe tikrä amne ti die mikani kwe tödeke metre jabti. Erere arato, ti die mikani kwe ni mda mda tarere. Ne abko namani bare Kristo Jesu diebti.

<sup>15</sup> Kukwe ne abra kukwe era metre abko rabadre era ni jökrä kräke abko nere: Kristo Jesu nükani kä nebtä ni kukwe kämekämē nuenkä dentari. Ni kukwe kämekämē nuenkä, ye ngätäite ti abko bäri käme. <sup>16</sup> Ye mdentä kisete, Ngöböökwe ti ngwiani ruen bobre jae. Ti nämane kukwe nuene bäri käme Jesu rüere ni mda mda ngwä akwa, Jesukwe ñan ja ngie mikani ti rüere angwane, ti ngibabare raire kwe tödekakäre jabti. Ne köböire abko, Jesukristo tä ni tarere kri rükadre gare ni jökräye angwane, tödekadre kwetre Jesubti, ye angwane nünandre kärekäre ben, abkokäre Ngöböökwe ti ngwiani ruen bobre jae kore. <sup>17</sup> Mtare ti tö Ngöbö käkitaitä. Ngöbö abra gobranka kärekäre. Niara krüte ñakare amne tuen ñakare. Ngöbö mda ñakare jire, aiseti Ngöbö itibe aibe raba mikani ütiäte kärekäre jae amne raba käkitaninkä. Abko kore se. Amen.

<sup>18-19</sup> Timoteo, ti ngobo tikwe, ma rabadre sribire ja di ngöibti Ngöbökrä, abkokäre titä kukwe nuemna kore mae. Ni Ngöbö kukwei niekä kákwe blitabare mabtä sribi makwebtä, ye kwrere titä kukwe nuemna mae. Erere arato, makwe nüna deme amne, kukwe käme nuen ñakare makwe abtä ja rabadre ruen ngite ñakare mae Ngöbö ngwärekri. Ni ruäre abko ñan tö namani ye nuein mda, aiseti nikani ji blobti. <sup>20</sup> Ye mdentä abko nakaninkä Himeneobtä amne Alejandrobtä, abkokänti tikwe mikani gare Satanaye mda. Nebtä abko ñan ñäkädre blo Ngöbö rüere kwetre abkokäre.

### *Ngöbö mikadre ütiäte ño gätäte*

<sup>1</sup> Timoteo, kukwe mdara jire btä ti tö blitai bäri käne mabe abko krörö: Nitre tödekaka Jesubti ye kákwe jäandrän ribe Ngöböye amne blita kwetre Ngöböbe ni jökrä kräke. Erere arato, ja di kärä kwetre Ngöböye ni jökrä kräke amne kuin nie kwetre Ngöböye. <sup>2</sup> Ne kwrere arato, ni gobranka krikri btä ni sribikä ütiäte gobrankrä, ye kräke blita kwetre Ngöböbe, nikwe nünandre jáme amne deme Ngöbö ngwärekri, abkokäre blita kwetre Ngöböbe niaratrekä. <sup>3</sup> Nita blite kore Ngöböbe, ye abko tä neme tuen kuin Ngöbö ni Diantarikäye amne käta neme nuäre btä. <sup>4</sup> Niara tö ni jökrä diaintari amne, kukwe era metre Jesubtä rabadre gare ni jökräye, ie niara tö, <sup>5</sup> ñobtä ñan angwane Ngöbö itibe ni

jökrä kräke. Erere arato, ni itibe ni kwrere, aibe köböire ni jökrä raba ja mäketa Ngöböbe abko Kristo Jesu ara. <sup>6</sup> Kristo Jesu käkwe ja mikani müre ketadre ni jökrä kökatarikrä Ngöbökrä. Ye abko, köböi kitani Ngöböökwe, erere namani bare, niara tö namani ni jökrä diaintari bää mikakäre. <sup>7</sup> Ni jökräkwe kukwe ne kadre ngäbti, abkokäre Ngöböökwe ti mikani kukwe ye kädriekä amne ngwianka nitre ñakare israelitareye abko kukwe metre Jesubtä diridre tikwe ietre abkokäre. Ne abra kukwe era erere tita niere; ñan tita ni ngökö.

### *Ni brare btä ni merire rabadre ño gätäte*

<sup>8</sup> Mdakäre abko, munta gätäre angwane, ni brare brare kä jökräbti käkwe nüna deme amne blita Ngöböbe angwane, küde kaka käin kwe blitakäre Ngöböbe abko ie ti tö. Ni brare brare tä blite Ngöböbe angwane, ñan rabadre romon ni mda mdakrä amne kukwe ñakare nikwe ni mda mda rüere abko blitadre kwe Ngöböbe.

<sup>9</sup> Mdakäre abko, ni merire merire abko käta Ngöbö mike ütiäte jae, ye rükadre gare ni jökräye, abkokäre ñan ja ngwä kita kwetre ni mda mda okwä mikakäre ja jiebti, akwa ja ükate kuin era metre kwetre, ie ti tö. Amne ñan ja dokwä söka bätäkä ngwarbe kwe, ni mda mda okwä mikakäre ja jiebti. Erere arato, ñan jäandrän orore orore kitadre bäri ja ngrabare, ñan jäandrän tuäre tuäre amne dän ütiäte ütiäte kita kwetre jabtä. <sup>10</sup> Akwa sribi kuin nuendre ni mda mdakrä, ñobtä ñan angwane meri mden mden käta Ngöbö mike ütiäte jae käkwe ja kitadre sribi kuin nuene aise.

<sup>11</sup> Mdakäre abko, ni merire merire käkwe ni Ngöbö kukwei dirikä ye kukwei nuadre kä bube amne rabadre juto biare kukwe ye mike täte. <sup>12</sup> Erere arato, nitre tödekaka Jesubti käta gätäre, ye känti ni merire käkwe ñan diri jire ni brareye. Erere arato, ñan ja mikadre ni brare brare dänkiene, ie ti tö. Ni merire raba kwekbe, <sup>13</sup> ñobtä ñan angwane Ngöböökwe Adán dätebare käne. Abti Eva dätebare kwe aise. <sup>14</sup> Erere arato, Adán ngökani ñakare angwane, merire kwe Eva abko namani ngökani tbikwe. Ye känti Evakwe ja mikani ngite Ngöbö rüere. <sup>15</sup> Akwa ni merire tä ngäbäkre ngibiare, ye ngwane tödekadre kwatibe kwe Ngöböbtí angwane, ni mda mda taredre kwe. Erere arato, nünandre era metre kwe Ngöbö ngwärekri, ye köböire rabadi dianintari Ngöböökwe.

## 3

### *Ni tödekaka Jesubti jie ngwianka*

<sup>1</sup> Mdakäre abko, kukwe ne abra kukwe era metre abko ti bike niere mae: Nire tö ja mikai nitre tödekaka Jesubti jie ngwianka, ye abko tö sribi kuin nuein. <sup>2</sup> Nire erere tö sribi ye nuein abko käkwe nünandre krörö: Tädrera nüne metre ni mda mda okwäbti. Nebtä ni mda mdakwe ñan kädrie blo. Arato meri itibe kwe. Erere arato, ni töbike kuin ja käne amne ni nüne kwekbe amne, ni mda mdata mike ütiäte jae, ni ye kwrere käkwe sribidre. Erere arato, ni juto biare ni menteni kaen ngäbti ja juete amne, ni ie diri gare kuin käkwe sribidre. <sup>3</sup> Erere arato, ni dröbare ñakare amne, ni ngüdrekä ñakare käkwe sribidre amne, ni moto jáme btä ni romone ñakare amne, ni ngwian tarekä ñakare abko käkwe sribidre.

<sup>4</sup> Mdakäre abko, ni ni mräkä jie tike kuin btä ngibiare kuin amne, tä ngäbäkre kwe kwe tö den kuin abko erere ngäbäkreta kukwe mike täte, ni ye abko käkwe sribidre, <sup>5</sup> ñobtä ñan angwane ni ie mräkä jie tika gare ñakare kuin käkwe ñan nitre jen Ngöböökwe gätäkä Jesu käbti ngibiadre kuin aise. <sup>6</sup> Erere arato, ni tödekaka krile Jesubti ñan mikadre nitre tödekaka Jesubti jie ngwianka, ñobtä ñan angwane nane ni tödekaka krile Jesubti mikadre sribire angwane, rikadre bike kri ño diablu namani bike kri, känti Ngöböökwe mikani ja ngie nuen, ye kwrere ñan rakadrekä, abkokäre ni tödekaka krile Jesubti käkwe ñan sribidre. <sup>7</sup> Erere arato, ni nitre tödekaka Jesubti jie ngwianka, ye abko nitre tödekaka ñakare Jesubti käta mike ütiäte jae, ni ye kwrere käkwe sribidre, ñobtä ñan angwane niara mikata ütiäte ñakare ne ngwane, niara mikadi yakrä jae angwane, diablukwe kukwe blo mikadre jiete angwane, nane ja mikadre ngite kwe.

*Ni ni die mikaka*

<sup>8</sup> Ne kwrere arato, ni krörökrörö mikadre ni ni Ngöböökwe die mikaka: Ni mikata ütiäte jae ni mda mdakwe abko mikadre sribire. Arato ni ja kukwei kite ñakare temen amne, ni dröbare ñakare btä ni ni ngökö ñakare ngwian diankrä jae abko mikadre sribire. <sup>9</sup> Mdakäre abko, kukwe era Jesubtä mikani gare nie Ngöböökwe kata ngäbti kwe amne, tödekata bti metre; ñan bikata ni tödekaka Jesubti kwrere kwe abko mikadre sribire. <sup>10</sup> Erere arato, ni mikadre sribi ye nuene, känenkri tä nüne kuin ya, ñakare ya abko mikadre ñäräre käne. Yebti kukwe ñakare kwe, ne ngwane mikadre sribire ni ni die mikaka kwrere.

<sup>11</sup> Nitre merire mikata ütiäte jae ni mda mdakwe. Erere arato, meri töbike kuin ja käne amne, jäandrän jökräftä tödekadre bti, meri ye kwrere kákwe sribidre amne, meri näin blite ngwarbe kwäräkwärä ni mda mdabtä abko ñan mikadre sribire.

<sup>12</sup> Mdakäre abko, ni ni Ngöböökwe die mikaka, ni ye abko meri itibe kwe amne, ngäbriänkä kwekwe btä mräkä kwekwe jie tikadre kuin kwe btä ngibiadre kuin kwe.

<sup>13</sup> Nire nire käta sribi ye nuene kuin, ye abko rabadre bäri ütiäte ni mda mda ngwärekri. Ye kwrere ñan rabadre Kristo Jesu gaire amne, Kristo Jesu köböire rabadre blite jáme Jesubtä ni mda mdabe.

<sup>14</sup> Timoteo, ti tö näin ja tuakäreta mabe yete, akwa ye känenkri tita tärä ne tike mae, <sup>15</sup> ñobtä ñan angwane nane ti ñan rabata jötrö angwane, ni ja mräkäre Jesu käbti kákwe nünandre ño abko rabadre gare mae angwane, ma rabadre dirire ietre, abkokäre tita tärä tike mae. Ngöbö nikwe abko Ngöbö nire, amne ürä btä jä ju ketatekrä dite krö, ye kwrere nitre gätäkä Jesu käbti tä niara kukwei era metre mike ütiäte käre. <sup>16</sup> Kukwe era Jesubtä nämame tiebe, akwa mtare Ngöböökwe mikanina gare nie. Kukwe nämame tiebe ye abko bäri ütiäte kri nikrä abko köböire ni raba nüne deme Ngöbökrä. Kukwe ye abko nere: Jesukristo därebare angwane, ngrabare nämame ni kwrere.

Angwane Ngöbö Odei jen kwe bä mikani Ngöbö Üaikwe.

Angele Ngöböökwe kákwe tuani.

Abti kukwe kuin niarabtä diribare kä jökräfti temen.

Kukwe ye mikani era ni kwatikwe kä nebtä amne,

Ngöbö nikani ngwenante kä nuärete kä käinhti.

4

*Pablota Timoteo tö den dirikätre blobtä*

<sup>1-2</sup> Mdakäre abko, Ngöbö Üai tä kukwe mike gare metre nie kä mräbtä abko krörö: Kä mrä angwane, ni ruäre kákwe Jesukristo gibiadikäta amne, üai käme ni ngökaka, ye jiebti rikadi. Üai käme ni ngökaka kákwe ni tödekaka Jesubti ngwiandi dirikätre blo mike ütiäte jae amne ngwiandi Jesu gibiekäta. Dirikätre blo abko ni bikaka kuin amne ni ngökaka, ie ja ruen ngite ñakare kukwe kämekäme nuenbtä, kákwe kukwe diribare ietre üai kämenkwe ye diridi ni mda mdaye. <sup>3</sup> Ye abko, ja mikadre gure ñakare abko ni ye jatadi niere. Erere arato, ni ye abko kákwe mrö ruäre dokwä täkädi. Mrö ruäre käme Ngöbö ngwärekri, aisetet ñan kwetadre niedi kwetre. Akwa Ngöböökwe mrö dätebare ni kräke, aisetet ni tödekaka Jesubti, ie Ngöbö kukwei era metre gare, kákwe mrö jökrä kadre ngäbti kwetadre jae, kuin niere kwärä Ngöböye btä. Mden kisete ni ñan raba mrö ruäre dokwä täke. <sup>4-5</sup> Mrö btä jäandrän jökrä dätebare Ngöböökwe abko kuin niebare kwe, aisetet ñan käi ngwiandre käme jabtä akwa, nikwe kuin niedre btä Ngöböye, amne Ngöböökwe mrö mikadi kuin biare kwetadre.

<sup>6</sup> Makwe kukwe ye diri ja mräkätre tödekaka Jesubtiye angwane, ma rabadi sribikä kuin Jesukristokwe. Kukwe metre diribare Jesubtä, ye mata mike täte amne ja töitike btä. <sup>7</sup> Akwa kukwe kirakira diän diän amne kukwe mda mda mikanintbe ngwarbe, ye ie makwe ñan olo mika. Akwa makwe dre dre nuendre nünankrä deme Ngöbö ngwärekri, ye jiebti ma rankwa bäri, <sup>8</sup> ñobtä ñan angwane nita nakwenkä ja mikakäre biare amne dite ngrabare, ye abko kuin bkänä nikrä, akwa nikwe ja mikadre juto nünankrä kuin deme

Ngöbö ngwärekri, ye abko béri ütiäte kri nikrä mtare amne, nünakäre kärekäre Jesube arato. <sup>9</sup> Aisete kukwe ne abra kukwe era metre abko rabadre era ni jökrä kräke, ie ti tö. <sup>10</sup> Ne mden kisete nita sribire ja di ngöi jökrä Ngöbökrä, ñobtä ñan angwane Ngöbö nire, bti nita tödeke. Niara abko ni jökrä Diantarikä akwa, niarata nitre tödekaka Jesubti ara jire dentari.

<sup>11</sup> Kukwe ne makwe nuemna ja mräkätreye amne makwe diri ietre. <sup>12</sup> Ma abko bat Timoteo, aisetet mata dirire angwane, nane ni ruäre tö rabai ma mike ütiäte ñakare jae, akwa makwe blita jáme amne nuäre ni mda mdabe. Erere arato, makwe nüna kuin metre, amne makwe ni mda mda taredre. Ye kwrere arato, makwe ja mika ngite ñakare ja mräkätreye tödekaka Jesubti okwäbti, ne ngwane mata nüne ño rükadre gare nitre tödekaka Jesubtiye. Angwane ni jökrä tö rabadi nünai ma kwrere, kákwe nünandi kore, ne ngwane ma bat akwa, ma rabadi ütiäte ni mda mdakrä. <sup>13</sup> Timoteo ti ngämi nementa yete angwane, munta gätäre ye känti makwe ñäkä käre Ngöbö Kukweibä ja mräkätreye kräke. Makwe Ngöbö Kukwei nie ietre amne makwe Ngöbö Kukwei diri ietre arato. <sup>14</sup> Ngöbö Üai kákwe ja di biani mae sribi ye nuenkäre, ye abko makwe ñan tuemetre ngwarbe jire chi, akwa yebti makwe sribi janknu. Ngöbö Üai köböire ni mda mda jie ngwianka kákwe kise mikani mabti angwane, kukwe niebare kwetre ma mikakäre biare sribi yekrä. Kä ye ngwane Ngöbö Üaikwe ja di biani mae, ma die mikakäre sribibä. Ye mden kisete, makwe ñan tuametre ngwarbe.

<sup>15</sup> Kukwe yebtä ma rankwa béri, ie ti tö. Yebtä makwe sribi béri mda köbö kwatirekwatire, mata nüne béri Ngöbökrä rabadre gare ni mda mdaye abkokäre. <sup>16</sup> Mata nüne ño, yebtä makwe töbika kuin ja käne amne, kukwe diri makwe, yebtä makwe töbika kuin ja käne arato. Ye erere makwe ja ngibia au ne ngwane, ni kwati ma kukwei nuaka abko Ngöböökwe dianditari siba mabe gware.

## 5

*Timoteokwe ni töi diandre ño*

<sup>1</sup> Mdakäre abko, ni unsunine unsunine abko kákwe ja mikadre ngite abtä töi diandre, ye ngwane makwe ñan ngra ngra bti, akwa ni rün nikwe mikata ütiäte jae, ye kwrere makwe ni unsunine unsunine kita nüne béri Ngöbökrä. Ni batibati abko ni etba nikwe btä mäträta, ye kwrere makwe mäträ btätre. <sup>2</sup> Erere arato, ni meye mikata ütiäte ño jae, ye kwrere makwe meri unbret unbret mika ütiäte jae. Ni merire batibati abko ni ngwai nikwe mikata ütiäte, ye kwrere makwe mika ütiäte. Angwane, makwe ñan ja mika ngite jire chi bentre.

*Ni merire merire kän brare krütani die mikadre ño*

<sup>3</sup> Mdakäre abko, ni merire merire, kän brare krütani, aisetet tä kaibe amne, mräkä ñakare ngibiaka, ye abko nitre tödekaka Jesubti kákwe ngibiadre abko makwe diri kore ietre. <sup>4</sup> Akwa meri kän brare krütani, ye ngäbriänkä btä bränkä tärä, ne ngwane ngibiadre kwetre. Meri ye kákwe niaratre ngibiabare ño, ye ütiäre ngibiadreta kwetre, ñobtä ñan angwane tuen béri kuin Ngöböye aisetet.

<sup>5</sup> Meri kän brare krütani abko ngibiaka ñakare, akwa tä nüne kaibe era metre abko tä tödeke kwatibe Ngöböbti amne tä blite Ngöböbe dibire rare ja di kärere ie, meri ye kwrere abko die mikadre. <sup>6</sup> Akwa meri mda mda abko kän brare krütani, akwa tä kukwe nuene blo blo kä ngwiankrä nuäre jabtä jirekäbe, meri ye tä nire, akwa ni krütani, kwrere jire tä Ngöbö ngwärekri, ñobtä ñan angwane tä tödeke ñakare Ngöböbti. Meri ye abko ñan die mika. <sup>7</sup> Nitre tödekaka Jesubti btä ñan ñäkädre blo, abkokäre makwe diri kore ietre, <sup>8</sup> ñobtä ñan angwane ni tödekaka Jesubti akwa, ni mräkä jen nikwe, ye nita ngibiare ñakare, ne ngwane nita Ngöbö Kukwei kite temen. Erere arato, nita kukwe nuene béri käme ni ñakare tödekaka Jesubti ye ngwä, ñobtä ñan angwane ni ñakare tödekaka Jesubti käta mräkä kwekwe ngibiare.

<sup>9</sup> Meri kän brare krütani abko tä nüne kaibekaibe abko kä tikadre täräbtä die mikadre abko nere: Meri ie kä gre ketamä (60) mentokwäre, kän brare krütani amne, brare

kwe ben nünabare käre kwe amne ñan ja mikani ngite kwe brare mdabe, meri ye abko kä tikadre täräbtä die mikakäre. <sup>10</sup> Meri kän brare krütanikrütani käkwe ngäbriänkä ngibabare amne ni menteni kata ngäbti kuin kwe amne tä ni deme deme Ngöböökwe ye ngoto bätete kräke kakäre ngäbti kuin ja gwiriete, meri ye kwrere abko kä tikadre täräbtä die mikakäre. Erere arato, ni ja tare nikaka die mikata kwe amne tä sribi kuinkuin nuene bätäkä ngwarbe ni mda mdakrä, meri ye kwrere abko kä tikadre täräbtä die mikakäre.

<sup>11-12</sup> Akwa meri bäri bati bati abko kä ngämi gre ketamä (60) ie, kän brare krütani amne tä kaibe, ye abko ñan kä tika täräbtä die mikakäre, ñobtä ñan angwane nane niara kä tikadre täräbtä die mikakäre angwane, ñan ja mikadre gure mda niedre kwe Jesuye, abti tö rabadreta ja mikaita gure bobuta, ye ngwane ja kukwei kitadreta temen kwe abtä rabadre ja mike ngite Jesu rüere, aisetet ñan kä tikadre täräbtä die mikakäre. <sup>13</sup> Erere arato, meri bati bati kän brare krütani die mikadre angwane, kä rabadre krene btä angwane, rikadre blite ni mda mdabtä ju kwatirekwatire te. Arato rikadre ja mike kukwe jökräte siba amne kukwe btä ñan blitadre jire abko rikadre kädriere. <sup>14</sup> Mden kisete ni merire merire bati bati, kän brare krütani abko käkwe ja mikata gure, ngäbäkre ngibia kwe amne ju ngibia kuin kwe jakrä. Ne kwrere meri ye ñan kädriedre blo rükwe abko ie ti tö. <sup>15</sup> Ye abko, meri bati bati, kän brare krütani namani kaibe abko ruäre käkwe Jesu tuaninametre, käta näin Satana jiebti.

<sup>16</sup> Meri kän brare krütani, ye abko nane nitre tödekaka Jesubti ngätäite mräkä merire tärä kän brare krütani amne tä nüne kaibe, ne ngwane mräkä kwekwe käkwe die mika. Ne kwrere nitre tödekaka Jesubti mda mda rabadre meri mda mda kän brare krütani amne ngibiaka ñakare ye die mike, sribi ñan rabadre kabre dikaro nitre tödekaka Jesubti kräke abkokäre.

### *Kukwe mda mda nitre jie ngwiankabtä*

<sup>17</sup> Mdakäre abko, ni ji ngwianka ye tä nitre tödekaka Jesubti jie ngwena kuin ne ngwane, nitre tödekaka Jesubti kwetre raba tare kri amne mika ütiäte kwetre jae. Erere arato, die mika kwetre mröbti amne ngwianbti. Akwa nitre jie ngwianka käta Ngöbö kukwei dirire bäri, ye abko mika bäri ütiäte amne die mikadre mröbti amne ngwianbti abko makwe diridre, ie ti tö. <sup>18</sup> Tita niere kore, ñobtä ñan angwane Ngöbö Kukweita niere krörö: "Buey trigo münantekä, ye munkwe ñan kö kita ngwärebä," nieta. Erere arato, "Ni sribikä, ie sribi ütiä biandre," nieta kore Ngöbö Kukweibä. Ne mden kisete makwe diri kore nitre jie ngwiankabtä.

<sup>19</sup> Mdakäre abko, ni ni Ngöböökwe jie ngwianka käta ja mike ngite abko ni itibe jata niere angwane, makwe ñan kukwe mika era. Akwa ni nibu, ni nimä käkwe kukwe arabe nie mae angwane, kukwe ka ngäbti makwe. <sup>20</sup> Angwane ni Ngöböökwe jie ngwianka mden mden tä ngite, ye ie makwe ñäkä gätäte nitre Ngöböökwe ye ngwärekri jökrä. Nebtä abko, ni mda mda btä kä jürä rabadre amne, ñan tö ngwiandre ja mikai ngite kwetre abkokäre.

<sup>21</sup> Timoteo, Ngöbö btä Kristo Jesu amne angele dianinkä jakrä Ngöböökwe, ye ngwärekri ti bike kukwe ütiäte niere mae, ne erere makwe nuen abko krörö: Ni ma kukwe muko ya, ñakare ya tä sribire ji ngwianka kwrere, akwa nane kukwe raba kwetre makwe ga angwane, makwe tö dian amne makwe die mika ja kwrere jökrä, ie ti tö.

<sup>22</sup> Erere arato, makwe ñan kise mika jötrö ngwarbe nibti mikakäre sribire ji ngwianka kwrere, akwa makwe töbika kuin käne niara mikakäre sribire, ñobtä ñan angwane nane makwe ni kukwe kämekäme nuenkä mikadre sribire, yebtä abko kukwe käme nükebti mae siba nütü rabadre mabtä. Makwe ja ngibia kuin deme kukwe kämekäme ngäniene.

<sup>23</sup> Timoteo, ma ngirie abko neme bren käre. Erere arato, bren mda mda tä neme mabtä. Ye kräke abko, makwe uba doi kwaka ña kiakia angwane, makwe ñan ñö aibe ña abko ti tö niei mae.

<sup>24</sup> Nitre tödekaka Jesubti abko ruäre käta kukwe nuene käme, mika ngämi ja ngwärekri, känenkri tärä neme gare ni jökräye; akwa ni ruäre abko tä kukwe nuene kämekäme mikata ja ngwärekri amne batibe neme gare. <sup>25</sup> Ne kwrere arato, ni ruäre tä jändrän kuinkuin nuene abko tä neme gare ni jökräye; akwa ni ruäre abko tä jändrän kuinkuin

nuene tiebe abko gare ñakare. Abti kira erere angwane, tä niken neme gare ni jökräye. Ne mdenbtä abko, makwe töbika kuin ja käne abko ti tö nie mae Timoteo.

## 6

*Nitre klabore käkwe sribidre ño bkänkäkrä*

<sup>1</sup> Mdakäre abko, nire nire abko tä klabore ni mdakwe, ruäre abko tä ja tare nike, akwa bkänkä kukwei mika ütiäte kwetre jae, niarakwe ñan ñakädre blo Ngöbö rüere amne kukwe dirita nunkwe ye rüere abkokäre. <sup>2</sup> Akwa nane ni klabore ye bkänkä käta tödeke Jesubti arato ne ngwane, ñan bkänkä mikadre ngwarbe kwe jae, ñobtä ñan angwane niara ja mräkäre Jesu kähti arato. Akwa bäri sribi kuin kwe bkänkäkrä, ñobtä ñan angwane tä niaratre mräkä Jesu kähti die mike amne tä tare kri kwe arato aisetet. Kukwe ne abko makwe diri amne nuemna nitre klabore tödekaka Jesubti ye.

*Kukwe blo dirikätre tä nüne ño*

<sup>3</sup> Nire nire käta kukwe dirire blo amne kukwe diribare era metre ni Dänkien Jesukristokwe, ye tä kaen ngäbti ñakare, erere arato kukwe dirita era metre Ngöböbtä, ye tä kaen ngäbti ñakare, <sup>4</sup> ni ye abko töi ñakare, akwa tö bikabtä kri. Ye mden abko jatadi dirire bä jene abko krörö: Niara töta neme ja kwetai bäri kabre krübäte ni jökräbe kukwe ngwarbegtä. Ye mden känti ni ruäre töta neme ja tuai ni mda kwrere, abtä tä bätä ngwen ni mdabtä jäandrän dokwäre. Ne mdenbtä ni ruäre motota neme romon jakrä kwärikwäri amne ñäkäta niken diän diän jae kwärikväri ja kukwe ñan mikata niken era jae kwärikväri. <sup>5</sup> Erere arato, ni ye tä niken rüre käre jabe kwärikväri. Ni ye abko töi käme, aisetet kukwe era metre Jesubtä dianinkä niaratrekän. Ngöböta nitre tödekaka Jesubti die mike ngwian gananbtä nieta kwetre, aisetet tä bike nüne metre ngwian diankrä jae.

<sup>6</sup> Era metre Ngöböta nitre tödekaka Jesubti die mike, akwa nita nüne metre Ngöbö ngwärekri amne jäandrän ño ño tä nikwe, ye käi tädre nuäre nibtä, ye abko bäri ütiäte <sup>7</sup> ñobtä ñan angwane ni därebare angwane, ni därebare büttere, jäandrän ñakare nikwe. Erere arato, ni krütadi angwane, ni ñan rikadre jäandrän ngwena jire chi jabe. <sup>8</sup> Ne mden aisetet, mrö tärä kwetadre nie amne dän amne ju tärä nikwe, ye abko käi rabadre nuäre nibtä.

<sup>9</sup> Ye abko käi rabadre nuäre nibtä, ñobtä ñan angwane ni mda abko jäandrän ye tärä kwetre akwa, töta nebe rabai ngwian btä jäandrän bkäne bäri kabre abko tä niken ja mike ngite. Erere arato, tätre niken ja dokwä mike kö okwä Satanakwete. Erere arato, jäandrän bätäkä ngwarbe ye mdei tä neme ietre, ye käta kukwe taretare ngwena kräke amne mrä tä ni se juen ngwarbe. <sup>10</sup> Kukwe tä nakenkä kore ni yebtä, ñobtä ñan angwane nita ngwian tarere, ye abko tä niken ni mike kukwe nuene blo blo ngwian diankrä jae. Ni ruäre töi kore abko käkwe Jesu kukwei tuanimetre, abkokänti tä ja tare nike kri mtare.

*Pablotu Timoteo tö den mrä*

<sup>11</sup> Akwa ma abko ni Ngöbökw, aisetet ma gitia kukwe käme jökrä ye ngäniene amne nüna era metre Ngöbö ngwärekri, yebtä makwe ja kita. Nüna Ngöbökrä amne tödeka Ngöböbtä jäandrän jökräbtä, ye jiebti ma rankwa. Erere arato, ni mda mda taredre, ye jiebti ma rankwa angwane, makwe nünanka dite tödekabtä Jesubti. Erere arato, makwe blita ja moto jämenbti ni mda mdabe. <sup>12</sup> Makwe tödekadre käre Ngöböbtä, yebtä makwe nünanka dite jabtä rükäre kukwe kämekäme rüere. Makwe ja töi mikaba kwatibe Ngöböbtä angwane, makwe nieba ni kwati ngwärekri, ye ngwane Ngöbökw ma käräbare nüne kärekäre jabe, aisetet makwe nünandre kärekäre Ngöböbe, ye makwe ketate dime kisete jakrä, ie ti tö Timoteo.

<sup>13</sup> Mtare Ngöbö jäandrän jökrä mikaka nire, ye ngwärekri amne, Kristo Jesu btä kä jürä namani ñakare, käkwe ja niebare metre Poncio Pilatoye, Kristo Jesu ye ngwärekri ti tö niei krörö mae Timoteo: <sup>14</sup> Jesukristo rükadita, ye känenkri niara kukwei mika täte jökrä makwe. Erere arato, makwe nünandre ño, ie niara tö, ye kwrere makwe nüna niara ngibiare ngäbti kwärä. <sup>15</sup> Ngöbö tö rabai Jesukristo juenta ñongwane, erere juandita

kwe angwane, niara rükadita. Ngöbö aibe gobran kri. Niara aibebtä käita neme nuäre metre. Erere arato, Ngöbö abko Jrei kri, jrei jire jökrä kä nebtä bti ta amne niara abko tä Dänkiene dänkin jökrä kä nebtä yebti ta. <sup>16</sup> Ngöbö aibe därebare ñakare amne kruëte ñakare. Niarata nüne kärekäre, ñotra trä ngwen bürere te tä nüne. Ye känti ni ñakare raba neme ja ken ben. Ni kä nebtä kákwe ñan Ngöbö tuabare gwärere amne Ngöbö ñan tuare nikrä arato. Ngöbö aibe raba ütiäte ni jökrä kräke kärekäre amne niara aibe di kri. Abko kore se.

<sup>17</sup> Timoteo, ni ngwian bkänkä krikri, ye abko kákwe ñan bika kri amne, ñan ngwian kabre kwetre, yebti tödeka kwetre, makwe nie ietre, ñobtä ñan angwane ngwian tä nikken ngwarbe jötrö amne, ni ñan raba ngibiare kärekäre. Akwa Ngöbö abko käta jäandrän kuin bien kabre nie, kä mikakrä juto nibtä. Yebtä ni ngwian bkänkä krikri kákwe tödeka Ngöböbti, makwe nie ietre. <sup>18</sup> Mdakäre abko, ni ngwian bkänkä krikri ye kákwe ñan ja mika käbäre, amne jäandrän kuin nuen kabre kwe ni mda mdakrä ngwian kwetre yebti. <sup>19</sup> Nünandre kore kwetre angwane, rabadi jäandrän kuin bkäne kabre kä käinbti amne rabadi nüne kärekäre Ngöböbe, makwe nie kore ietre Timoteo.

<sup>20</sup> Timoteo, kukwe kuin Jesukristobtä mikani gare mae, ye makwe ngibia kuin jakrä. Erere arato, kukwe ngwarbe diän dian ütiäte ñakare, ye makwe ñan ja olo mika ie. Mdakäre abko, nitre ruäre tätre dirire blo, akwa tä dirire kuin era metre tä nütüre au jabtä, akwa dirita blo kwetre. Ni dirikä blo ye kwrere abko, ben makwe ñan ja geta jire chi, <sup>21</sup> ñobtä ñan angwane ni ruäre kákwe kukwe blo ye mikani ütiäte jae, aisete tä Jesu mike ütiäte ñakare mtare amne nikani dikekä Ngöböbtä mento.

Ngöbö raba ja moto mike kuin makrä. Abko kore se. Ne ñ Görä.

## Tärä Tikani Bobukäre Pablokwe Timoteokrä 2 Timoteo

Pablo nämane ngite kä teri juta Romate, bti kä 62-63 angwane tikaninteta. Yebti niara nikaninta bäbkäkäre kukwe kuin Jesubtä ngwenante kä ngrabare temen. Angwane tärä tikani kena kwe Timoteoye amne Titoye. Yebti kä 66-67 näre angwane, Nero namani gobrane emperador kwrere angwane, Pablo kitaninta ngite bobukäre kwe. Pablo namaninta ngite angwane, tärä ne tikani kwe Timoteoye. Kä ye angwane, Pablo mikani ngite bā jene, ñobtä ñan angwane käne niara nämane ngite gwi ja juete. Akwa kitani ngite bobukäre angwane, kä käme amne kä tibo känti kitani ngite. Erere arato, Pablo mäkäninte kadenanbti. Nete Pablokwe sribibare mrä amne müre ketadi abko namani gare ie, aisetekukwe tikani krörö kwe Timoteoye:

Bäri käne abko ja namani ruen kaibe Pabloye, abtä namani ulire, ñobtä ñan angwane niara kukwe muko Figelo amne Hermógenes käkwe kä mikaninkä btä. Erere arato, Demas amne ni mda mda käkwe kä mikaninkä btä, aisetek Timoteo jatadre niara die mike, ie niara tö namani.

Bobukäre abko, nitre tödekaka Jesubti namani ja tare nike emperador Nero kisete. Yebtä abko, Pablo namani töbike kri, käkwe Timoteo töi diani nünenkä dite jabtä kukwe Jesukwe yebtä. Erere arato, Timoteo käkwe kukwe kuin ye diridre janknu, niebare kwe ie. Mdakäre abko, Timoteo tädre biare ja tare nikakäre kukwe kuin Jesubtä ye dokwäre, niebare Pablokwe.

Nikwe nünandré ño metre Jesu kräke abko tärä ne tä niere nie. Erere arato, ni rabadre juto biare ja tare nikakäre tödekabtä Jesubti abko tärä ne tä niere nie. Tärä ne abko tikani mrä Pablokwe nütüta.

### *Pablotä köbö ngwentari Timoteoye*

<sup>1</sup> Ti Pablo käta tärä ne tike mae Timoteo. Ja töi jenbti, Ngöböökwe ti mikani Kristo Jesu kukwei ngwianka. Ni rabadre nüne kärekäre Ngöböbe Kristo Jesu köböire, niebare kira Ngöböökwe, ye mden abko tita niekäre mtare ni jökräye. <sup>2</sup> Timoteo, ma ti ngobo jen tikwe kwrere. Ma tare kri tikwe. Ngöbö ni Rün nikwe btä Kristo Jesu ni Dänkien käkwe ja moto mika kuin makrä. Erere arato, ma raba ruuentari tare ietre amne, makwe nüna jáme niaratre diebti abko ie ti tö Timoteo.

### *Pablokwe ja di käräbare Ngöböye Timoteokrä*

<sup>3</sup> Timoteo, ti mräkätre kirakira käkwe sribibare era metre Ngöbökrä, ye kwrere tita sribire kräke amne, ja ruen ngite ñakare tie Ngöbö ngwärerekri. Tita blite dibire rare Ngöböbe angwane, mata nüketa töre tie angwane, tita kuin niere ie makrä. <sup>4</sup> Ti jataba yäketa angwane, ma rababa ti müaire, ma okwä ñöi rababa nimiente ti okwäbti, ye tä nüketa töre tie amne, ti töta neme ma tuaita jötrö, kä ngwiankäreta nuäre jabtä. <sup>5</sup> Mata tödeke kwatibe Ngöböbti, ye tä nüketa töre tie arato Timoteo. Timoteo, ma mölöi Loida btä ma meye Eunice käkwe tödekani kwatibe Ngöböbti käne, ne kwrere arato mata tödeke kwatibe bti gare kuin tie.

### *Timoteokwe ñan Jesu gaidre*

<sup>6</sup> Mata tödeke kwatibe Jesubti, aisetek ti tö kukwe ngwiain töreta krörö mae: Tikwe kise mikaba mabti sribi mikakäre ma kisete angwane, Ngöböökwe ja di biani mae sribi jakwe nuenkrä. Ngöbö di ye abko makwe mika bäri ütiäte jae abko tita niere mae, <sup>7</sup> ñobtä ñan angwane Ngöböökwe ja Üai biani nie, ni die mikakäre nüne dite niarakrä amne, ni mda mda tarekäre, erere arato töbikakäre kuin ja käne. Ngöbö ñan tä ni mike kä jürä ngwen jabtä.

<sup>8</sup> Ne aisetek ma ñan raba ja gaire jire chi blitakäre ni Dänkienbtä. Erere arato, tita ngite ni Dänkien Jesukristo kukwei diribtä, nebtä ma ñan raba ja gaire, akwa kukwe kuin Jesukristobtä, ye kräke makwe ja tare nikadre tibe gware Ngöbö diebti. <sup>9</sup> Ngöbö käkwe ni

dianintari amne ni käräbare nünakäre deme kwe. Ne ñan nikwe jändrän kuin nuenbare abko ütiäre Ngöböökwe ni dianintari, akwa kira Ngöbö ngämi kä ne dätere, känenkri niarakwe ni tarebare ja moto kuinbti angwane, ja töi jenbti kukwe mikanintbe au kwe, kukwe kuin nuene ni kräke Jesukristo köböire. <sup>10</sup> Ngöböökwe kukwe mikanintbe kore, mden abko bää mikanina kwe nie. Kristo Jesu ni Diantarikä nükani kä nebtä angwane, kukwe mikanintbe kira Ngöböökwe nükani gare nie. Kristo Jesu käkwe gata die juani ngwarbe. Erere arato, ni rabadre nüne kärekäre Ngöböbe, ye abko mikani gare kwe nie kukwe kuin jabtä ye köböire. <sup>11</sup> Kukwe kuin Jesubtä, titi tike mae, ne mden abko Ngöböökwe ti mikani kädriere ni kwatibe. Erere arato, ti mikani kukwe kuin ye ngwianka kwe amne, ti mikani kukwe kuin ye dirikä kwe arato. <sup>12</sup> Ne mdentä abko, titi ja tare nike mtare, akwa yebtä ti ja gaire ñakare, ñobtä ñan angwane ni gare kuin tie, bti titi tödeke. Jesukristo di kri bti titi tödeke, aisetet niara jatadita, ye ngäbti abko ti ngibiadi kuin kwe ño tikwe ribebare ie ye kwrere.

<sup>13</sup> Timoteo, ma rabadre dirire metre, abkokäre tikwe kukwe diribare ño ño, ye kwrere makwe diri. Angwane makwe tödekadre kwatibe Kristo Jesubti amne, makwe ni mda mda taredre. <sup>14</sup> Kukwe kuin era metre Jesubtä mata dirire, yebti abko makwe kukwe ngwarbe ngwarbe krai. Ngöbö Üai Deme tä nüne nibtä abko diebti makwe kukwe ngwarbe krai.

<sup>15</sup> Mdakäre abko, ti kani ngite angwane, nitre Asiabo nünanka Roma nete käta tödeke Jesubti, ye käkwe kä mikaninkä jökrä tibtä. Erere arato, nuenbare Figelokwe amne Hermógenekwe tibtä abko garera mae.

<sup>16</sup> Ti nämane ngite, akwa Onesíforo abko rababa ti gaire ñakare amne, batire batire rababa nüke ti moto mike nuäre nete. Niara ye abko ni Dänkien ie raba ruentari tare tikrä näre. <sup>17</sup> Onesíforo nämane Roma nete angwane, namani ti känenentari kisere, namani jadüke ñakare abti ti kwantariba ie. <sup>18</sup> Amne ni nämane Efeso angwane, ni die mikaba kri kwe. Ye tä töre kuin mae ruen tie Timoteo. Ye abko, ni Dänkien Kristo Jesu rükadita, ye ngwane Onesíforo raba ruentari tare ie abko ie ti tö.

## 2

### *Timoteokwe nünandrekä dite jabtä ja tare nikakäre Jesu dokwäre*

<sup>1</sup> Timoteo ma abko ti ngobo tikwe kwrere. Kristo Jesu tä ni tarere ja moto kuinbti, ye diebti makwe nünanka dite, ie ti tö. <sup>2</sup> Erere arato, tikwe diribare ni kwati okwäßti angwane, makwe ti kukwei nuani, ye abko nire nire bti tödekadre amne rabadre Ngöbö kukwei dirire kuin, raba tuen mae, ye ie makwe kukwe ye dirita, niaratre käkwe diridreta ni mda mdaye ja täritäri abkokäre.

<sup>3</sup> Timoteo, ma abko rükä Kristo Jesukwe, aisetet ni rükä tä biare ja tare nike, ye kwrere ma raba ja tare nike tibe tödekabtä Jesubti angwane, makwe nünanka dite Jesukrä. <sup>4</sup> Nitre rükä kuinkuin tä ja kite ñakare jändrän mda mdabtä kä mikakäre nuäre dänkienbtä, ye kwrere makwe ñan ja kita jändrän mda mdabtä amne, sribi Kristo Jesukwe aibebtä makwe ja kita, kä mikakäre nuäre btä. <sup>5</sup> Erere arato, nitre jadakaka abko kräke kukweta ükaninte jadakrä metre, akwa kukwe ye mikata ñakare täte ne ngwane, ñan tä ganane, aisetet korona bianta ñakare ietre. Akwa nitre jadakaka tä kukwe mike täte, köböire tä ganane angwane, korona bianta ie mikakäre ütiäte. Ye kwrere Ngöböökwe kukwe ükaninte, erere mata nuene, köböire Ngöböökwe korona biandi mae. <sup>6</sup> Erere arato, ni sribikä tirete käta sribire tare krübäte, aisetet nura öta näire, niara ara jire, ie biandre käne. Ye kwrere Ngöböökwe jändrän kuin biandre mae, abkokäre makwe sribi ja di ngöibti Kristo Jesukrä. <sup>7</sup> Timoteo, titi kukwe ketamä bää mike mae sribi Jesukristokwebtä, nebtä makwe töbika käre angwane, ni Dänkien käkwe mikadi gare jökrä mae abko gare tie.

<sup>8</sup> Erere arato, kukwe krörö ne makwe ngwian töre käre jae: Jesukristo krütani, abti Ngöböökwe mikaninta nire. Niara abko jatani jrei David tukwe mräkäkri. Kukwe ye abko kukwe kuin Jesukristobtä mikata gare tikwe. <sup>9</sup> Ye mden dokwäre titi ja tare nike kri amne ni ja mikaka ngite kri mäkäteta kadenante, kwrere jire titi mäkäninte kadenante;

akwa Ngöbö kukwei abko ñan tä mäkäninte kadenante, ñobtä ñan angwane ni kwati tä kädriere. <sup>10</sup> Ye mdən kisete tita ja tare nike bätäkä ngwarbe. Ni dianinkä jakrä Ngöböökwe abko rabadre dianintari jökrä Kristo Jesukwe amne rabadre nüne kärekäre kä nuärete, abkokäre tita ja tare nike bätäkä ngwarbe.

- <sup>11</sup> Kukwe ne abra kukwe era metre abko rabadre era ni jökrä kräke:  
Nikwe tödekan Jesubti angwane, ni krütani ben,  
ye kwrere arato nikwe nünandi ben.
- <sup>12</sup> Nikwe nünandrekä dite jabtä ja tare nikakäre niara dokwäre,  
ne ngwane niarakwe gobrandi, känti nikwe gobrandi siba ben.  
Akwa nikwe niara rükandrete ne ngwane,  
ni rükandite kwe arato.
- <sup>13</sup> Nikwe Jesukristo gobiarekäta akwa,  
niara abko kákwe ja kukwei mikadi täte käre, ñobtä ñan angwane niara abko ñan raba ja kukwei kite temen.

*Sribikä kuinkuin tä sribire ño abko Pablokwe niebare*

<sup>14</sup> Timoteo, nitre dirikä mda mda kákwe ñan ja kwetadre kukwe ngwarbe ngwarbebtä, tikwe nieba, erere makwe nieta ietre Ngöbö okwäbti abko erere nuendre kwetre, makwe nie ietre janknu, ñobtä ñan angwane ja kwetata ngwarbe, ye abko tä ni die mike ñakare amne, tä ni kukwe nuaka nuaka ngwianta Jesu gibiekäta, aisetet ñan ja kwetadre abko makwe nie metre ietre. <sup>15</sup> Erere arato, ni sribikä ütiäte Ngöböökwe käta Ngöbö kukwei metre Jesubtä dirire metre ta, abtä sribi gaire ñakare, ye kwrere ja di ngöibti makwe Ngöbö kukwei diri metre angwane, ma ñan raba sribi gaire Ngöbö ngwärekri Timoteo. <sup>16</sup> Kukwe ngwarbe diän diän ütiäte ñakare, yebtä makwe ñan ja kita, ñobtä ñan angwane ni ñäke ngwarbe kore abko käre tä nikken kukwe nuene bärä kämekämäne mda. <sup>17</sup> Erere arato, kukwe dirita kwetre ye tä nikken niren ni kwati ngätäite abti mrä ni kwaita näin kukwe ngwarbe jiebti. Ye mdən kwrere abko dirita Himeneokwe amne Filetokwe. <sup>18</sup> Kukwe era metre Jesubtä dirita ñakare kwetre. Ni krütani rükadreta nire abko erere namanina bare, tätre niere, ye käta ni ruäre mike Jesukristo gibiekäta. <sup>19</sup> Akwa nitre tödekaka metre Jesubti abko kákwe ñan Jesu gibiaikäta, ñobtä ñan angwane nitre tödekaka Jesubti abko ürä kwrere. Ürä nökata kuin nguse angwane, ñan tä juen ngitiekä, aisetet juta neme dite. Ye kwrere jire ni tödekaka metre Jesubti tä mikani Ngöböökwe abko btä kukweta tikani krörö: “Ni jen Ngöböökwe erere gare jökrä Ngöböye” amne, “Ni jökrä käta ja di kärere ni Dänkien Ngöböye, ye käta kukwe kämekämäne kite temen,” abko tä tikani kore btätre. Nebtä Ngöböta ni jen kwe metre ngibiare kuin ñan Jesu gobiadrekäta abko tä gare nie.

<sup>20</sup> Kukwe nebtä abko, ti bike kukwe mda bärä mike mae Timoteo abko krörö: Ni jändrän bkänkä kri gwiriete ñan oro btä plata dätebare blatore amne basore aibe tä kwe amne, kri kukwän btä dobro dätebare blatore amne basore tä kwe arato. Akwa jändrän kuin orore btä platare abko tä ni ütiäte ütiäte kakrä ngäbti amne, kri kukwän btä dobro sribebare blatore amne basore, ye abko tä sribi ngwarbe ngwarbekrä gwita. <sup>21</sup> Ye kwrere abko, nitre tödekaka Jesubti kákwe ja ngibiadre kuin deme nitre dirikä ngwarbe ngwarbe ngäniene ne ngwane, jändrän kuin ütiäte ye kwrere jire ni rabadi Ngöbö ngwärekri amne, ni mikadi kuin deme ni Dänkienkwe, sribi kuinkuin bätäkä ngwarbe nuenkäre jakrä.

<sup>22</sup> Timoteo jändrän kämekämäne mdei tä krübäte ni batibatiye abko ngäniene ma gitia. Akwa nüna metre Ngöbökrä, yebtä makwe ja kita amne tödeka kwatibe Ngöböbti amne ja taredre kwärikwäri, amne nüna jäme, ye jiebti ma rankwa bärä nitre töi deme deme käta blite Ngöböbe yebe gware abko ie ti tö Timoteo. <sup>23</sup> Erere arato, kukwe ngwarbe, btä ja kwetata nikken kwärikväri, yebtä ni kwati tä nikken neme romon jakrä abko garera mae, aisetet kukwe ye kwrere btä makwe ñan ja kweta siba. <sup>24</sup> Ye abko, ni sribikä ni Dänkienkwe abko ñan tädre ja kwete ni mda mdabe, akwa ni dirikä ye abko tädre ja gete jäme ni jökräbe. Arato rabadre Ngöbö kukwei dirire kuin. Erere arato, ñan moto rabadre romon ja dokwäre. <sup>25</sup> Ja moto kuinbti, niarakwe niara rüe töi diandre, ñobtä ñan

angwane nane Ngöbökwe nitre ye töi kwitadre angwane, kukwe käme kitadre temen kwetre amne kukwe metre Jesubtä rükadre gare ietre. <sup>26</sup> Angwane diablukwe niaratre kani ngite ja mikakäre täte ye gadre kwetre jadtä amne jatadre tödeke Jesubti, abkokäre töi diandre kore Timoteo.

## 3

*Kä mrä angwane ni kwati rabadi nüne Ngöbö rüere*

<sup>1</sup> Timoteo, kukwe mda rabadre gare mae abko krörö: Kä mrä angwane, kukwe rabadi nakenkä taretare krübäte, <sup>2</sup> ñobtä ñan angwane ni kwati rabadi ja tarere kaibe au, amne rabadi ngwian tarere bäri. Erere arato, ni kwati rabadi ja käkitekä au amne rabadi bike kri ni mda mdabtä. Ni kwati käkwe ñäkädi diän diän gwärere ni mda mdaye amne, rün btämeye ñan kukwei mikadi täte kwetre. Ni mdakwe jändräñ kuinkuin nuendi kräke akwa, ye rabadi tuen ütiäte ñakare ietre amne, Ngöbö rabadi ütiäte ñakare kräke arato. <sup>3</sup> Erere arato, ni kwati ñan rabadi ni mda mda tarere jire chi amne, kukwe nuenbare rüere, ye abko ñan diandi jabti ta kwetre. Erere arato, rabadi blite ngwarbe ni mda mda rüere, tö rabadi kukwe kämekäme nuene bätäkä ngwarbe, erere rabadi nuene jökrä, ñobtä ñan angwane ñan rabadi ja töi ketebtä. Erere arato, rabadi kukwe nuene blo ni mda mdabtä abko käi rabadi juto btätre, akwa jändräñ kuin rabadi tuen käme ietre. <sup>4</sup> Erere arato, rabadi kukwe muko kwekwe kite ngite ngwarbe, kä jürä rabadi ñakare btä kukwe kämekäme nuene. Rabaditrebike bäri krikri ni mda mdabtä, tö rabadi kä ngwen nuäre jabtä, akwa Ngöbö taredi ñakare kwetre. <sup>5</sup> Nitre tödekaka era metre Jesubti, kwrere jire ja bä mikadi kwetre akwa, täditre kukwe nuene kämekäme, yebtä abko Ngöbö di kri mikadi ngwarbe kwetre. Ne mden kisete, kä mrä angwane kukwe jatadi nakenkä tare krübäte kore.

Timoteo, ni töi kämekäme ye kwrere ben makwe ñan tö ngwian ja gete jire, <sup>6</sup> ñobtä ñan angwane ni ye kwrere abko tä nikeni ni ngökakäre ju kwatirekwatire te kwäräkwärä, käta meri töbikë ñakare ja käne ngökö jae. Ne abko raba nuene ñobtä ñan angwane meri ye abko ie jata neme ruen ngite krübäte Ngöbö ngwärekri amne, käre tä kä kwitekwite jabti. <sup>7</sup> Meri ye kwrere käre tätre ja töitike Ngöbö kukweibtä akwa, kukwe diribare blo Ngöböbtä, yebtä tätre ja töitike, aisetödekadre era metre Jesubti abko ñan tä näke gare jire chi ietre. <sup>8</sup> Nitre kukwe dirikä blo ye käre tä ja mike kukwe metre Jesubtä rüere, sukia nibu kädian nämane Janes btä Jambres namani Moisés rüere ye kwrere. Nitre ye töita ngwarbe kukwe kämekäme aibebtä amne tä tödeke ñakare mda Ngöböbtä. <sup>9</sup> Akwa ni nibu namani Moisés rüere, btä kukwe nakaninkä ño, ye kwrere rakadikä nitre töi kämekäme btä, ñobtä ñan angwane töi ñakare, ye abko gadi ni jökräkwe btätre amne, ni kwati ñan rabadi nekete mda niaratrebe, ye raba gare mae Timoteo.

*Pablokwe Timoteo töi diani*

<sup>10</sup> Akwa tikwe kukwe diribare mae amne, tikwe nünabare ño, ye garera mae. Erere arato drekäre ti nämane nüne kore amne, ti nämane tödeke ño Jesubti garera mae, amne ti nämane nebe romon ñakare jötrö garera mae. Erere arato, ti nämane ni mda tarere ño amne, ti nämane nünenkä dite ja tare nikakäre tödekabtä Jesubti ño garera mae. <sup>11</sup> Erere arato, tikwe ja tare nikani jakän garera mae amne, juta Antioquíate amne juta Iconiote, erere arato juta Listrate tikwe ja tare nikani kri tödekabtä Jesubti abko garera mae. Tikwe ja tare nikani kri, akwa ti Dänkien Jesukristo käkwe ti dianinkä ti rüe kisete, ye abko garera mae arato. <sup>12</sup> Ye abko, nire nire tö nünai kuin deme Kristo Jesukrä abko käkwe ja tare nikadi rüe kisete. Ne abko kukwe era titi niere mae Timoteo. <sup>13</sup> Akwa ni moto kämekäme, ni ngökaka abko näin kukwe nuene bäri kämekäme mda. Niaratre näin ni ngökö bäri amne, niaratre ngökadi krübäte ni mda mdakwe. Ne abko rabadi nakenkä kore ja täritäri.

<sup>14-15</sup> Ngöbö Kukwei brendebare makwe, ye abko makwe mika täte amne mika ütiäte janknu makwe, ñobtä ñan angwane ni Ngöbö Kukwei dirikä mae abko ni ütiäte garera metre mae. Erere arato, ma nämane chi ngäbäkrere angwane, Ngöbö Kukwei deme ye

namanina gare mae, aisetē makwe mika tātē janknu. Nita tödeke Jesukristobti angwane, Ngöböta ni dentari, yebtā abko Ngöbö Kukwei tä ni mike töbtä. <sup>16</sup> Ngöbö Kukwei jökrä abko Ngöböökwe mikani gare metre nitre tārā tikakaye, aisetē kukwe ütiäte dirikrä amne kuin mäträkrä amne, kuin ni mda töi diankrä amne, kuin ni töitikakrä nüne metre Ngöbö ngwärekrä. <sup>17</sup> Ne köböire abko nitre tödekaka Jesubti tä nüne Ngöbökrä ye tädre juto biare sribi kuinkuin bätäkä ngwarbe nuenkrä.

## 4

<sup>1</sup> Timoteo, Kristo Jesu rükadita kritobore ni nire kräke amne ni krütanina kräke. Erere arato rükadita gobrane. Ngöbö ngwärekrä amne Kristo Jesu ye mden ngwärekrä tita nire krörö mae: <sup>2</sup> Makwe Ngöbö Kukwei nie ni mda mdaye. Ni mda mda tö raba ma kukwei nuai ya, ñakare ya, akwa ma raba juto biare Ngöbö kukwei niekäre. Amne ni mda tö dian makwe, amne makwe mäträ ni mda mdabtä. Erere arato, makwe ni mda mda kita nüne bärä Jesukrä amne, makwe diri metre ta ja moto jämenbti ietre abko tita nire mae. <sup>3</sup> Makwe nuendre, ñobtä ñan angwane kä jatadi angwane, ni kwati ñan tö rabadi kukwe era Ngöböbtä ye kukwei nuai aisetē. Kukwe ño ño niaratre tö rabadi kukwei nuai, ye erere kräke dirikätre ngwarbe ngwarbe känändi kwati kwetre dirikäre jae ja mikakrä nuäre. <sup>4</sup> Erere arato, Ngöbö kukwei era metre abko btä rabaditre kä mikekä amne kukwe mikanintbe ngwarbe kirakira ñakare era, ye aibebtä rabaditre ja däkwite. <sup>5</sup> Akwa ma abko, käre makwe töbika kuin metre ja käne amne makwe nünanka dite jabtä ja tare nika näire. Erere arato, ni mda mda, ie kukwe kuin Jesubtä gare ñakare abko ietre makwe mika gare amne sribi ño ño nuendre, ye makwe nuen kuin jökrä.

<sup>6</sup> Ye abko makwe nuendre, ñobtä ñan angwane ti abko müre keta kebera Jesu mikabtä tātē, aisetē ti kebera krüte jakän. <sup>7</sup> Ni rükä käta rüre kuin, ye kwrere jire tikwe ja di mikaninkä kwe tibtä, nikani juta Tesalónicate. Crescente abko nikani kä Galaciate amne Tito abko nikani kä Dalmaciate. <sup>11</sup> Aisetē Lucas aibe tä tibe nete. Timoteo, ma jata angwane, makwe Marcos ngwian siba jabe; ben ma jata, ñobtä ñan angwane Marcokwe ti die mikadre kri sribi Ngöböökwebtä nete ruen tie, aisetē ma jata ben. <sup>12</sup> Tíquico abko tikwe juani juta Efesote. <sup>13</sup> Timoteo, majata angwane, dän ngetbo kä tibo kriere mikateba tikwe juta Troate, Carpo känti, ye ma jata ngwena tikrä. Erere arato, täräta mikaninte ruäre tikwe, ye majata ngwena tikrä amne, kabra btä obeja kwata sribebare täräre täräre tā mikaninte tikwe yete, ye ma jata ngwena jökrä tikrä, ie ti tö bärä.

<sup>14</sup> Alejandro abko sribikä jändräñ jierobtä, ye abko käkwe kukwe nuenbare käme krübäte ti rüere abko dokwäre ti Dänkien Jesukwe mikadi ja ngie nuen. <sup>15</sup> Mden kisete makwe mokre jabti Alejandro yebe arato, ñobtä ñan angwane kukwe kuinkuin Jesukristobtä dirita nikwe, ye rüere niarata rüre krübäte.

<sup>16</sup> Timoteo, ti järababa kena kritobo romanobo ngwärekrä angwane, ti mräkätre tödekaka Jesubti käkwe kä mikakaba jökrä tibtä, aisetē ni rababa ñakare mda ja kwetaka ti dokwäre. Akwa Ngöböökwe ñan ti mräkätre mika ja ngie nuen näre. <sup>17</sup> Ti mräkätre tödekaka Jesubti käkwe ti mikateba kaibe, akwa ti Dänkien Jesukwe ja di bianba tie, nitre ñakare israelitare tödekaka ñakare Jesubti näma yete, ye olote Jesu kukwei kuin ni diantarikrä abko ti rabadre kädriere abkokäre. Ye ngwane ti Dänkien Jesu käkwe ti ükaba gata ngäniene, aisetē ye näire ti rüekwe ti müre ketaba ñakare. <sup>18</sup> Ne kwrere ti Dänkien

*Pablota jändräñ kärere mrä Timoteoye*

<sup>9</sup> Timoteo, ma jata jötrö ti känti nete ja tuakäreta tibe, ie ti tö, <sup>10</sup> ñobtä ñan angwane Demas nämane tibe nete akwa, jändräñ kä nebtä nämane tare bärä kwe, aisetē kä mikaninkä kwe tibtä, nikani juta Tesalónicate. Crescente abko nikani kä Galaciate amne Tito abko nikani kä Dalmaciate. <sup>11</sup> Aisetē Lucas aibe tä tibe nete. Timoteo, ma jata angwane, makwe Marcos ngwian siba jabe; ben ma jata, ñobtä ñan angwane Marcokwe ti die mikadre kri sribi Ngöböökwebtä nete ruen tie, aisetē ma jata ben. <sup>12</sup> Tíquico abko tikwe juani juta Efesote. <sup>13</sup> Timoteo, majata angwane, dän ngetbo kä tibo kriere mikateba tikwe juta Troate, Carpo känti, ye ma jata ngwena tikrä. Erere arato, täräta mikaninte ruäre tikwe, ye majata ngwena tikrä amne, kabra btä obeja kwata sribebare täräre täräre tā mikaninte tikwe yete, ye ma jata ngwena jökrä tikrä, ie ti tö bärä.

<sup>14</sup> Alejandro abko sribikä jändräñ jierobtä, ye abko käkwe kukwe nuenbare käme krübäte ti rüere abko dokwäre ti Dänkien Jesukwe mikadi ja ngie nuen. <sup>15</sup> Mden kisete makwe mokre jabti Alejandro yebe arato, ñobtä ñan angwane kukwe kuinkuin Jesukristobtä dirita nikwe, ye rüere niarata rüre krübäte.

<sup>16</sup> Timoteo, ti järababa kena kritobo romanobo ngwärekrä angwane, ti mräkätre tödekaka Jesubti käkwe kä mikakaba jökrä tibtä, aisetē ni rababa ñakare mda ja kwetaka ti dokwäre. Akwa Ngöböökwe ñan ti mräkätre mika ja ngie nuen näre. <sup>17</sup> Ti mräkätre tödekaka Jesubti käkwe ti mikateba kaibe, akwa ti Dänkien Jesukwe ja di bianba tie, nitre ñakare israelitare tödekaka ñakare Jesubti näma yete, ye olote Jesu kukwei kuin ni diantarikrä abko ti rabadre kädriere abkokäre. Ye ngwane ti Dänkien Jesu käkwe ti ükaba gata ngäniene, aisetē ye näire ti rüekwe ti müre ketaba ñakare. <sup>18</sup> Ne kwrere ti Dänkien

Jesukwe ti ükadi käre jäandrän kämekäme ngäniene. Abti tä gobrane kä käinbti, ye känti näin ti ngwena nüne jabe. Ni Dänkien Jesu aibe käkitadrekä kärekäre ni jökrakwe. Abko kore se. Amen.

<sup>19</sup> Timoteo, tita köbö kuin juen Priscilakrä, Aquilakrä amne Onesíforo mräkäkrä, ye makwe nie ietre tikrä. <sup>20</sup> Erasto abko rababa juta Corintote amne Trófimo abko rababa bren, abtä tikwe mikateba juta Miletote. <sup>21</sup> Timoteo, kä ñüre amne kä tibo, känenkri ma jata jötrö ti känti nete, ie ti tö. Arato ni mräkä tödekaka Jesubti Eubulo, Pudente, Lino, Claudia btä ni mräkä mda mda juta Roma nete käta köbö kuin juen makrä.

<sup>22</sup> Ni Dänkien Jesukristo raba mabe amne Ngöbö raba ja moto mike kuin mun jökrä kräke. Abko kore se. Ne ngörä.

## Tärä Tikani Pablokwe Titokrä Tito

Pablo nämane ngite kä teri juta Romate, tikaninteta angwane, tärä ne tikani kwe Titoye. Kä 63-65 angwane, Pablokwe tärä ne tikani. Titokwe kukwe kuin Jesubtä mikani era Pablo köböire gare nie. Abti Tito namani sribikä siba Pablobe Timoteo kwrere.

Pablo nämane ngite, yebti tikaninteta kena angwane, niara btä Tito kákwe sribibare Cretate. Yebti Pablo nikani kä mdabti angwane, Tito mikaninte sribire ja täte kwe.

Mren Mediterráneote, kä butu krikri nämane ketabkä. Ne mden ketati kädianta Creta. Tito amne Pablo näire ni Cretabo kwati namani nüne käme krübäte.

Ye angwane abko, ni ño diandrekä sribikäre ni nitre tödekaka Jesubti jie ngwianka amne ni nitre jie ngwianka die mikaka kwrere abkobtä Pablokwe tärä ne tikani Titoye, niara töi diankäre. Erere arato, nitre nämane ja mike kukwe kuin Jesubtä rüere ye abko kukwe ötadre ño, abkobtä Pablokwe töi diani.

Mdakäre abko, dirikätre blo jatadi abko Pablokwe niebare arato. Kukwe ne mdenbtä abko tärä ne raba ni die mike mtare arato.

### *Pablotä köbö ngwentari Titoye*

<sup>1</sup> Ti Pablo käta tärä ne tike mae Tito. Ti abko ni klabore Ngöböökwe amne Jesukristo kukwei ngwianka. Ngöböökwe ti mikani sribire kore ni dianinkä kwe jakrä die mikakäre tödeke kватibe jabti. Erere arato, kukwe era metre Ngöböbtä dirita nunkwe rükadre gare ni dianinkä Ngöböökwe yeye, abkokäre Ngöböökwe ti mikani sribire. Kukwe era metre Ngöböbtä ye tä ni die mike nüne Ngöbökrä. <sup>2</sup> Erere arato, nita tödeke Ngöböbtä, ñobtä ñan angwane niara ngämi kä ne dätere, känenkri ni dianinkä kwe jakrä, ye kákwe nünandi kärekäre ben niebare kwe. Ngöbö abko ja kukwei kite ñakare temen, aisetet dre niebare kira kwe, ye erere rabadi bare. <sup>3</sup> Ngöbö kukwei kuin rabadre gare ni kwatiye abko köböi kitani Ngöböökwe, erere käi nükanina. Ye mden abko Ngöbö ni Diantarikä kákwe ti ara jire mikani dirire mtare.

<sup>4</sup> Tito, nita tödeke ja kwrere Jesubti, aisetet ni töita ketetibe. Ma ti ngobo tikwe kwrere. Ngöbö ni Rün nikwe amne Kristo Jesu ni Diantarikä raba ja moto mike kuin makrä, amne makwe nüna jäme niaratre diebti, ie ti tö Tito.

### *Titokwe dre nuendre Cretate*

<sup>5</sup> Tito, tikwe ma mikateba kä butubti Cretate angwane, kukwe ükate ngämi, ye makwe ükadrete jökrä, abkokäre tikwe ma mikateba. Erere arato, nitre tödekaka Jesubti juta kwatirekwatire te, ye känti makwe ni mikadre niaratre jie ngwianka, tikwe nieba mae ye kwrere, abkokäre ma mikateba tikwe. <sup>6</sup> Nitre ni jie ngwianka abko ni nüne era metre, aisetet kukwe ñakare kwe, btä ni mda mda raba kite ngise abko ni krörö mika sribire makwe: Ni gure itibe mika sribire makwe. Erere arato, ngäbriänkä kwekwe käta tödeke Jesubti amne tä nüne kuin, aisetet ngäbäkre kwe diän diän amne dokwä ribi ribi ñan niedre btä. <sup>7</sup> Ngöböta sribi kwe mike nitre ji ngwianka kisete, aisetet ni nüne era metre abko kákwe sribidre, ni mda mda ñan rabadre niara kite ngise abkokäre. Ne mden kisete, ni tö bikabtä kri amne ni btä kukwe ñan matare abko ñan mikadre sribire. Erere arato, ni dröbaka, ni ngüdrekä ngwarbe ngwarbe amne ni ni ngökö ngwian diankrä jae abko ñan mika sribi ne nuene makwe arato.

<sup>8</sup> Akwa ni ni Ngöböökwe jie ngwianka abko tädrera juto biare ni menteni kaen ngäbti ja juete amne tädrera kukwe kuinkuin tarere. Erere arato, ni töbige kuin ja käne amne, nüne era metre amne, nüne deme Ngöbökrä amne, ñan tä nakwen jötrö jändrän jökrä jiebti, ni ye kwrere abko kákwe sribidre. <sup>9</sup> Mdakäre abko, Ngöbö kukwei metre diribare nunkwe, ye abko ketadrete dime ja kisete angwane, rabadre dirire metre ni mda mdaye, niaratre die mikakäre. Erere arato, ni ñäkäkä blo Ngöbö Kukweibtä, ye tö diandre metre kwe, abkokäre Ngöbö kukwei era metre ketadrete dime ja kisete.

<sup>10</sup> Ni nüne kore makwe mika sribire, ñobtä ñan angwane nitre kwati dokwä ribi ribi kukwe metre Jesubtä kräke abko tä näin kukwe ütiäte ñakare dirire amne, tä näin ni ngökö ngwarbe. Nitre ne ngätäite abko nitre israelita kwati tä näin dirire blo siba abko käta ja ñäräkrä mikamna ja kwatabtä nitre israelita kwrere nitre tödekaka Jesubtive rabakäre metre Ngöbö ngwärekri, nieta kwetre. <sup>11</sup> Nitre ye abko kada ketadre dirikätre era metrekwe, ñobtä ñan angwane kukwe ñan diridre jire, ye abko tätre dirire ngwarbe. Ye mden känti ni kwati käkwe ja töi kwitaninta ngwarbe kwäräkwärä mräkä kwekwe ben ngöö. Erere arato, tätre dirire blo ngwian diankäre jae ni ngökabti.

<sup>12</sup> Ni ni ngökaka kore, mdentä abko ngöbö ngwarbe kukwei niekä kira nünanka Cretate käkwe niebare mräkä niara käite btä krörö: Ni nünanka Cretate käre tätre ni ngökö, jändrän ngwarbe töi ñakare, kwrere jire tätre nüne amne, tätre mröre ere, akwa neme trine ñakare amne krenekrene arato, niebare kwe. <sup>13</sup> Ne abko, nitre Cretabo nämane nüne ño abko erere niebare metre kwe btätre kore. Ne aisetekwe kuin diribare Jesubtä nunkwe, yebtä nitre Cretabo tödekaka Jesubti käkwe ja töi mikadre era metre, abkokäre ñäkä metre ngwärebä makwe. <sup>14</sup> Erere arato, nitre Cretabo tödekaka Jesubti käkwe ñan olo mikadre kukwe mikanintbe ngwarbe kirakira nitre israelitakwe yebtä, abkokäre makwe ñäkä ietre. Arato nitre kukwe era Jesubtä mikaka ngwarbe jae käta dre dre nuemna, ye ie nitre Cretabo tödekaka Jesubti käkwe ñan olo mikadre, abkokäre makwe ñäkä ietre. <sup>15</sup> Ye abko ni deme tödekaka Jesubti, kräke jändrän jökrä kuin deme, ñobtä ñan angwane Ngöbökwé dätebare; akwa ni ñakare tödekaka Jesubti abko kräke jändrän jökrä käme, jändrän ñakare jire kuin deme kräke, ñobtä ñan angwane niaratre abko töi diän amne, ja ruen ngite ñakare ietre kukwe diän diänbtä. <sup>16</sup> Nitre dirikä blo ye abko, ie Ngöbö gare tätre niere, akwa tätre kukwe nuene kämekäme. Yebtä abko, Ngöbö gare ñakare ietre bä mikata kwetre jabtä, ñobtä ñan angwane jändrän jökrä käita neme käme btätre. Niaratre dokwä ribi ribi amne, tä Ngöbö mike täte ñakare amne, jändrän kuin nuendre abko erere neme bare ñakare ietre.

## 2

### *Dre diridre*

<sup>1</sup> Tito, Ngöbö Kukwei diridre ño era metre, ye kwrere makwe diri abko krörö: <sup>2</sup> Ni brare unbret bre unbret ñan rankwa jötrö jändrän ngwarbe jiebti amne, töbika kuin ja käne kwe amne, niara rabadre ütiäte, abkokäre nüna kuin kwe ni mda mda okwäbti abko makwe diri ietre. Erere arato, Jesukristo kukwei mika era kwe amne, raba ni mda mda tarere ja moto kuinbti. Erere arato, nane kukwe jata tare niara rüere angwane, nünanka dite kwe jabtä, makwe diri ietre Tito.

<sup>3</sup> Ne kwrere arato, makwe diri krörö meri unbret unbret unbreye: Meri unbret unbret abko käkwe nünandre deme Ngöbö mikakäre ütiäte jae amne, ñan blita ngwarbe kwetre ni mda mdabtä. Erere arato, ñan dröba kwe amne, nünandre ño kuin abko diri kwetre meri bati batiye abko krörö: <sup>4</sup> Meri bati gure gure käkwe brare kwe btä ngäbriänkä kwe taredre ño, ye jiebti jie tika kwetre. <sup>5</sup> Mdakäre abko, meri bati gure gure käkwe töbika kuin ja käne ja ngibiakäre deme. Niaratrekwe ñan töbika ni brare mda mdabtä amne, ju ngibia kuin kwetre jakrä arato. Erere arato, ni mda mda die mika kwe amne, brare kwe kukwei mikadre täte kwe, ye jiebti meri unbret unbret käkwe jie tika. Meri bati gure gure käkwe nünandre kore, ni mda mdakwe ñan ñäkäbre blo Ngöbö Kukwei rüere abkokäre.

<sup>6</sup> Ne kwrere arato, ni bati bati abko käkwe töbikadre kuin ja käne abko jiebti makwe kita. <sup>7</sup> Akwa nünandre ño kuin, ye abko makwe nüna käne bä mikakäre nitre bati batiye. Ye erere, nünandre ño Ngöbö ngwärekri rükadre gare ietre. Erere arato, ma rika dirire angwane, kukwe kuin ütiäte dirita ye kwrere makwe diri era metre ietre. <sup>8</sup> Erere arato, ni mda mdakwe ñan kukwe känändre ma rüere, abkokäre makwe kukwe era erere aibe diri. Ye ngwane, mun rüe rabadi ja gaire, ñobtä ñan angwane kukwe ñan kwandre ietre ñäkäkäre nitre tödekaka Jesubti ye rüere.

<sup>9</sup> Mdakäre abko, nitre klabore, ye ye makwe diri krörö: Nitre klabore abko käkwe bkänkä kukwei mika täte jändrän jökräbtä amne, ja moto mika jäme kwetre bkänkäkrä

amne, ñan ja kweta kwetre bkänkäbe abko makwe diri ietre. <sup>10</sup> Erere arato, ni klabore ye bkänkäkwe tödekadre bti, abkokäre sribi nuen kuin era metre kwetre amne ñan jäandrän goidre kwetre kän abko makwe diri ietre. Ni klabore kákwe bkänkä mikadre ütiäte kore ne ngwane, kukwe dirita nunkwe Ngöbö ni Diantarikäbtä rabadi tuen bä nuäre ietre.

<sup>11</sup> Nitre tödekaka Jesubti kákwe nünandre kore, ñobtä ñan angwane Ngöbökwе jäandrän kuin nuenbare ja moto kuinbti nikrä, mden köböire tä biare ni jökrä dentari.

<sup>12</sup> Ngöbökwе jäandrän kuin nuenbare ja moto kuinbti nikrä, ye käta kukwe krörö mike gare nie: Jäandrän jökrä Ngöbö rüere, ye nikwe kitadre jökrä temen amne, kukwe kämekäme kä nebtä, ye nikwe ñan nuendre mda, akwa nikwe töbikadre kuin ja käne. Erere arato, nikwe ja töi mikadre kватibe nünakäre deme Ngöbökrä kä ne ngwane.

<sup>13</sup> Nikwe nünandre kore Jesukristo ngibiare ngäbti kwärä. Jesukristo abko Ngöbö nikwe amne ni Diantarikä nikwe. Niara ara rükadita kä trä ngwente angwane, kä rabadi nuäre nibtä, abkobti nita tödeke aune nita ngibiare kisere. <sup>14</sup> Jesukristokwe ja biani müre ketadre ni kräke ni kökatarikäre Ngöbökrä, nikwe ñan kukwe diän diän nuendre mda abkokäre. Erere arato, ni ngite kukwe kämente diankakrä jökrä nibtä amne, ni rabadre juta jen kwe amne ni rabadre töbige jäandrän kuin nuene, abkokäre ja biani müre ketadre kwe nikrä.

<sup>15</sup> Kukwe ye abko, makwe diridre. Makwe ni mda mda die mika kukwe ne mike täte. Erere arato, Ngöbö diebti makwe ñäkä ni kukwe kämekäme nuenkäye, ñobtä ñan angwane Ngöbökwе ma mikani ji dokwätä, aisetekwe ñan ni mda tuemetre ma mike ngwarbe jae.

### 3

#### *Nitre tödekaka Jesubti kákwe jäandrän kuin nuendre*

<sup>1</sup> Mdakäre abko, nitre tödekaka Jesubti, ye kákwe gobran amne kritobo mika ütiäte jae amne kukwei mika täte kwetre. Erere arato, tädre biare jäandrän kuin nuene. Ne abko, makwe ngwianta töre käre ietre. <sup>2</sup> Mdakäre abko, ñan blitadre ngwarbe ni mda mdabtä kwetre. Erere arato, ñan rüdre ni mda mdabe akwa, nünandre jäme kwetre ni mda mdabe. Erere arato, ni mdakwe kukwe nuendre blo rüere angwane, ja ngie mikadre ñakare kwetre amne, ja getadre jäme ni jökräbe kwetre. Ne abko, makwe ngwianta töre käre ietre arato Tito. <sup>3</sup> Ngöbö gare ñakare nie angwane, ni töi ñakare, kwrere jire ni nämane nüne amne, ni nämane ja dokwä mike ribi Ngöbökrä. Arato kukwe ngwarbe diri nämane nie abko jiebti ni nämane näin ngwarbe siba amne jäandrän kämekäme bätäkä ngwarbe abko mdei nämane nie, erere ni nämane nuene. Mdakäre abko, ni nämane töbige blo ni mda mdabtä amne jäandrän ni mdakwe, ie ni tö nämane nebe jakrä. Erere arato, ni nämane bätä ngwen jökrä jabtä kwärikwäri.

<sup>4</sup> Akwa Ngöbö ni Diantarikä kákwe jäandrän kuin nuenbare nikrä amne ni jökrä tarebare kwe abko mikani gare kwe nie, ye ngwane <sup>5</sup> ni dianintari kwe. Ye abko, ñan nikwe jäandrän kuin nuenbare, abko ütiäre Ngöbökwе ni dianintari, akwa ni nämane ruentari tare ie, aisetekwe ni dianintari kwe. Ye ngwane ni nämane käme jäandrän dobrorre kwrere kukwe kämekäme kisete angwane, ni därebareta bobukäre Ngöbö Üai Deme köböire angwane, Ngöbökwе ni jükaninte kuin merebe ja Üai Deme köböire. <sup>6</sup> Ni dianintari kwe angwane, Jesukristo ni Diantarikä, köböire Ngöbökwе ja Üai Deme biani täte jökrä nie ja moto kuinbti. <sup>7</sup> Ngöbökwе ni dianintari angwane, niara nämane ni tarere. Yebtä ni ngite ñakare mda ja ngwärekri niebare kwe ja moto kuinbti abko köböire ni rabadre neme ngobo jen kwe abkokäre. Ye mdenbtä Ngöbökwе ni mikadi nüne kärekäre, yebtä ni raba tödeke kватibe mtare. <sup>8</sup> Kukwe ne abra kukwe era metre, aisetekwe nitre tödekaka Jesubti, ye ben makwe blita käre kukwe nebtä, ie ti tö, ñobtä ñan angwane kukwe ne abko kukwe kuin ni jökrä kräke, aisetekwe nitre tödekaka Ngöböbtä tädre biare jäandrän kuin nuene, abkokäre makwe blita käre ben kukwe nebtä.

<sup>9</sup> Akwa kukwe mda abko ngwarbe amne tä ni die mike ñakare, aisetekwe ni mräkä kirakirabtä amne Kukwe Biani Ngöbökwе Moiséye nuendre nie, yebtä makwe ñan ja

kweta, ñobtä ñan angwane kukwe ngwarbe ütiäte ñakare btä nita ja kwete, abtä rüta niken jabe kwärikwäri. <sup>10</sup> Akwa nitre tödekaka Jesubti ngätäite, nireta ja kwete kukwe ngwarbe yebtä amne tä nitre tödekaka Jesubti töi mike romon jakrä kwärikväri, ye abko ie makwe ñäkä batí, bobu töi diankäre. Akwa nebtí ma ñan kukwe mika täte kwe ne ngwane, ñan rikadre mda gätäbtä nitre tödekaka Jesubti yebe abko makwe nie ie, <sup>11</sup> ñobtä ñan angwane ni ye abko töi ñakare metre amne, kukwe nuenta kämekäme kwe arabe käta niara mike ngite Ngöbö ngwärekri.

*Pablota kukwe mrä nire Titoye*

<sup>12</sup> Tito, tikwe Artemas ya o Tíquico juandi ma känti Cretate yete, niaratré nibu ne mdén raba ma känti angwane, ma jata jötrö juta Nicópolite ti ngäbti ja tuakäre tibe, ñobtä ñan angwane kä ñüre näire ti tö nünai juta Nicópolite aiseté. <sup>13</sup> Arato Zenas, ni blitaka ni mdakrä kritobo ngwärekri, btä Apolos, ye jata nikenta angwane, ma btä nitre tödekaka Jesubti käkwe die mika. Munkwe jäandrän bian täte ietre, ñan ja tare nikadre kwetré abkokäre, <sup>14</sup> ñobtä ñan angwane nirekwe jäandrän ñakare, ye abko nitre tödekaka Jesubti käkwe ja töitikadre jäandrän kuin nuene ni die mikakäre. Ne kwrere nitre tödekaka Jesubti käkwe ñan nünandre ngwarbe abkokäre. <sup>15</sup> Nitre tödekaka Jesubti jökrä tä tibe nete käta köbö kuin juen mae Tito. Erere arato, nire nire käta nun tarere ma känti yete, ye kräke nunta köbö kuin juen arato.

Ngöbö raba ja moto mike kuin mun jökrä kräke. Ne abko kore. Ne ngörä.

## Tärä Tikani Pablokwe Filemónkrä Filemón

Pablo nämame ngite juta Romate angwane, niarakwe tärä ne tikani. Kä ye angwane abko niarakwe tärä Efesios, Filipenses amne Colosenses tikani arato. Pablokwe tärä ne tikani niara kukwe muko iti kädian nämame Filemón kräke. Filemón abko nünanka juta Colosa känti. Niara abko kákwe ni kökani iti kädian nämame Onésimo sribikäre jakrä. Yebti Onésimo kákwe jäandrän goibare Filemón kän, bti ngitiani, ñobtä ñan angwane ni gokä abko kämikadre abko kukwe nämame ükaninte kä ye angwane. Onésimo nikani nebe juta Romate, känti Pablo nämame ngite kä teri kukwe kuin Jesubtä diri dokwäre. Pablo abko kákwe kukwe kuin Jesubtä niebare Onésimoye angwane, Onésimo kákwe tödekanji Jesubti. Abtä tö namani näinta bkänkä Filemón känti ja ngite niekäre ie. Ye mden kisete, Pablo kákwe tärä ne tikani Filemón kräke, Filemón moto mikakäre jáme Onésimokrä. Jesukristo kákwe Filemón tarebare kri, kákwe ngite dianinkä mento btä, bti kani ngäbti kwe, ye kwrere Filemón kákwe Onésimo taredre amne niara ngite jäandrän goibtä ye diandre jabti ta kwe, bti kadre ngäbti ja mräkä kwrere Jesukristo käbti kwe abko Pablokwe ribebare Filemónye tärä nebti.

Tärä nebtä abko Pablota jadenkä kukwe Onésimo yebtä, ñobtä ñan angwane kukwe Onésimo käta “kuin ütiäte sribikrä” niere griegore. Onésimo ngämi tödeka Jesubti angwane, niara ñakare ütiäte sribikrä, akwa tödekanji Jesubti kwe, yebti tö namani sribire metre, aisetet “kuin sribikrä”.

### *Pablota köbö kuin juen*

<sup>1</sup> Ti Pablo, tita ngite kä teri tödekabtä Kristo Jesubti amne ti mräkä Timoteo tä tibe nete käta köbö kuin juen makrä Filemón. Filemón, ma abra nun kukwe muko amne sribi muko nunkwe, aisetet ma tare kri nunkwe. <sup>2</sup> Erere arato, nun mräkä merire Apia, kräke nunta köbö kuin juen amne rü muko nunkwe Arquipo abko kräke nunta köbö kuin juen arato. Mdakäre abko, ja mräkätre tödekaka Jesubti tä gätäre ma gwirierte, ye kräke tita köbö kuin juen. <sup>3</sup> Ngöbö ni Rün nikwe btä ni Dänkien Jesukristo kákwe ja moto mika kuin munkrä amne mun mika nüne jáme kwetre, ie ti tö.

### *Pablota kuin niere Ngöböye*

<sup>4</sup> Tita blite Ngöböbe angwane, mata nüke töre tie angwane, käre tita kuin niere Ngöbö tikweye mabtä, <sup>5</sup> ñobtä ñan angwane mata tödeke ni Dänkien Jesubti amne nitre deme deme Ngöbökwé abko mata tarere jökrä abko tita kukwe nuen, yebtä abko tita kuin niere Ngöböye mabtä kärekäre. <sup>6</sup> Mdakäre abko, dre dre kuin nuendre Kristo kräke, ye rabadre gare kuin mae, abkokäre nitre tödekaka Jesubti, ye ben gwaire ma reketadre jakri tödekare kwärä Jesubti, ye abko tita ribere Ngöböye makrä Filemón. <sup>7</sup> Amne mata ni mda mda tarere ye abko kai nuäre krübäte tibtä amne tä ti die mike krübäte arato, ñobtä ñan angwane juta deme Ngöbökwé abko mata kä miketa nuäre motobtä.

### *Pablota ja di kärere Onésimokrä*

<sup>8-10</sup> Ne aisetet ti tö kukwe ribei krörö mae Onésimo kräke. Kristo käbti makwe dre nuendre abko ti rabadre ükete nuendre mae, akwa ti ñan tö kukwe nuein kore, aisetet nita ja tarere kwärikwäri, yebti ti tö kukwe ribei krörö mae: Ti nena unsunine jakän amne mtare tita ngite kä teri kukwe kuin Jesubtä diri dokväre amne, tita ngite kä teri, ne känti Onésimo kákwe tödekanji Kristobti ti köböire. Ne aisetet Onésimo abko ti ngobo tikwe Kristo köböire amne ti abko niara rün kwrere, aisetet ti bike ja di kärere krörö kräke mae: <sup>11</sup> Käne Onésimo ngämi tödeke Jesubti, känenkri nämame klabore ngwarbe amne ütiäte ñakare makrä, akwa mtare niarata tödeke Jesubti, aisetet niara rabadre klabore ütiäte kri makrä amne tikrä.

<sup>12</sup> Mtare tita juenta nebta ma känti yete. Niara abko ti ngobo jen tikwe kwrere, aisetet tare kri tikwe. <sup>13</sup> Kukwe kuin Jesubtä diri dokväre tita ngite kä teri, ne känti Onésimo

rabadre ti die mikakäre ma täte, ie ti tö rababa bäri. <sup>14</sup> Akwa kukwe ngämi nükebti ja moto kuinbti mae, ye känenkri ti ñan tö jändrän nuein, aisetetita Onésimo juenta jirekäbe mae yete. Ja moto kuinbti makwe niara tuadremetre neme nete ti die mikakäre abko ie ti tö amne, ñan tikwe kukwe niedre abko erere makwe nuendre abko ie ti tö, aisetetita juenta kore ma känti yete. <sup>15</sup> Onésimo abko ngitiani bä jötrö makän mentokwäre, ye abko nane tödekadre kwe Jesubti abko köböire rikadre nebeta ma känti angwane, nünandre kärekäre kwe mabe, abkokäre nakaninkä kore. <sup>16</sup> Akwa mtare abko niara ñan rabadreta klabore jirekäbe makwe, akwa ma mräkä tare kri makwe ni Dänkien kähti, ye kwrere rabadi makrä. Niara tareta kri tikwe, akwa makwe rabadi bäri tare ruen tie. Ye abko ñan klabore makwe abtä makwe tare angwane, makwe tare ja mräkä kwrere ni Dänkien kähti.

<sup>17</sup> Ye abko, tödektä Jesubti mata ti kaen ngäbti ja mräkä kwrere ne ngwane, makwe ti kadre ngäbti ño ja gwiriete, ye kwrere makwe Onésimo kata ngäbti abko tita ribere mae. <sup>18</sup> Amne nane kukwe nuenbare blo mabtä kwe o rürümmon ütiä bti makwe, ye abko makwe ütiä kärä tie <sup>19</sup> amne tikwe niara ütiä biandi jökrä mae ne abko ti Pablo käta tärä tike ja kise jenbti kore mae. Ma abko bti rürümmon ütiä kri tikwe, ñobtä ñan angwane makwe tödekani Jesubti ti köböire, aisetetita makwe rürümmon ütiä niarakwe biandre abko ti ñan tö nibi niei mae, käta niere kore mae. <sup>20</sup> Rürümmon ütiä kri kore mabti tikwe, ye mdenbtä abko ni Dänkien käta ni tarere, ye kähti ti tö ja di käräi mae Onésimo kräke, ye kwrere makwe Onésimo kata ngäbti kä mikakäre nuäre tibtä, ni ja mräkäre Kristo kähti ye kwrere. <sup>21</sup> Tita kukwe niere, ye erere makwe mikadi täte jökrä gare kuin tie amne tita ja di ribere mae Onésimobtä, yebti ta makwe kukwe mda mda nuendi bäri kuin kräke, ye gare kuin tie, aisetetita tärä ne tike mae.

<sup>22</sup> Mdakäre abko, munta ja di kärere tikrä Ngöböye, yebtä Ngöökwe mun kukwei nuadi angwane, Ngöbö diebti ti rabadreta tikaninte angwane, ti tö näin basareta yete, aisetetita makwe kä ükate biare keteti ti käne abko ti tö ribei mae.

<sup>23</sup> Amne ti kukwe muko Epafras tä ngite kä teri tibe gware nete tödektä Kristo Jesubti abko käta köbö kuin juen munkrä. <sup>24</sup> Erere arato, sribi muko tikwe Marcos, Aristarco, Demas amne Lucas käta köbö kuin juen munye.

<sup>25</sup> Ni Dänkien Jesukristo käkwe ja moto mika kuin mun jökrä kräke. Abko kore se. Ne ngörä.

## Tärä Tikani Nitre Hebreokrä Hebreos

Tärä ne tikani nitre israelita tödekaka Jesubti die mikakäre. Nitre israelita abko kädianta hebreo amne arabe kädianta judio arato. Niaratre abko juta kwaitibe, akwa kädianta ketamä. Nirekwe tärä Hebreos ne tikani gare ñakare metre. Pablo käkwe tikani abko ni ruäre tä nütüre. Ni mda abko tä Bernabé niere amne ni mda abko tä Apolos niere, akwa nirekwe tikani abko gare ñakare metre nie. Nitre romanobo ngämi juta Jerusalén juen ngwarbe kä 70, ye känenkri tärä ne namanina tikani nütüta.

Nitre israelita tödekaka Jesubti, kräke tärä ne tikani niaratre die mikakäre nünenkä dite Jesukristobtä, ñobtä ñan angwane niaratre nämame ja tare nike tödekabtä Jesubti amne ni ruäre tö namani trö kwitai Jesukristoye Kukwe Biani Ngöböökwe Moiséy mikakäreta täte. Jesukristo di ñakare era metre niaratre die mikakäre, aisetet trö kwitadre ie abko ni ni ngökaka nämame dirire ietre. Ye mden kisete, ni tärä ne tikaka käkwe Jesukristo bää mikani krörö ietre: Jesukristo köböire abko Ngöböta ja mike gare bări metre ta. Kira Ngöböökwe blitabare ja kukwei niekä niekä köböire, angele köböire amne Moisés köböire, akwa mrä blitabare bări metre kwe ja Odei itibe Jesukristo köböire.

Mdakäre abko, Ngöböökwe kukwe ükadite btin nitre israelitabe abko Ngöböökwe niebare kira, kukwe btin ye abko namani bare Jesukristo köböire abko tärä ne tä mike gare. Erere arato, juta Jerusalén yete nitre blitaka Ngöböbe ni mda mda diäre nämame jäandrän kämike köbö kwatirekwatire nitre israelita ngite ye dianakäre mento btä, akwa nuenbare kwetre köbö kwatirekwatire ñobtä ñan angwane jäandrän ngwarbe di ñakare ni ngite diantarikrä mento nibtä. Akwa Jesukristo abko krütani batibe ni ngite dianakäre mento nibtä, ye abko namani ütiäte kärekäre Ngöbö ngwärekri, aisetet Jesukristo abko bări kuin amne bări ütiäte, aisetet niara aibebti nikwe tödekadre amne niara aibe jiebti ni rikadre. Mtare niarata Ngöbö ngwärekri kä käinbtí blite Ngöböbe nikrä.

Jesukristo abko bări ütiäte, aisetet nitre israelita tödekaka bti käkwe ñan trö kwitadre ie. Jesukristo köböire Ngöböökwe ji tikani btin ni kräke nebe Ngöbö känti kä käinbtí, aisetet ni rabadre juto biare ja tare nike tödekabtä Jesubti abko tärä ne tä mike gare nie. Nikwe Jesukristo rükandrete ne angwane, Ngöböökwe ni mikadre ja ngie nuen, Ngöböökwe nitre israelita nünanka kira mikani ja ngie nuen ye kwrere.

### *Ngöböökwe blitabare ja Odei Jesu köböire*

<sup>1</sup> Ti mräkätre, nitre Ngöbö kukwei niekä,\* köböire Ngöböökwe blitabare bäre bäre bätäkä ngwarbe ni mräkä kirakira ben. <sup>2</sup> Akwa kä mrä ne ngwane abko Ngöböökwe blitabarera ünän täte nibe niara Odei jen kwe Jesukristo ye köböire. Ngöböökwe ja Odei mikani jäandrän jökrä bkänkä amne niara köböire Ngöböökwe kä käinta amne kä temen dätebare. <sup>3</sup> Ngöbö Odei ye abko tä Ngöbö töi kuin bää nuäre mike gare nie. Erere arato, Ngöbö Odei abko ja kwrere Ngöböbe amne Ngöbö abko ño, ye abko tä bää mike metre ta nie. Mdakäre abko, Ngöbö Odei ye arabe tä jäandrän jökrä ketete kuin ketetibe ja kukwei di kri köböire. Erere arato, kukwe kämekäme nibtä ye dianinkä jökrä mento nibtä kwe, käkwe ni bätäninte amne ni mikani merebe jökrä kwe, bti nikaninta kä käinbtí, känti Ngöböökwe mikani bări ütiäte kri, ye bää mikakrä mikani täkänintbe kwe ja küde ruenkri.

### *Jesu abko bări ütiäte angeletre ngwä*

<sup>4</sup> Amne Ngöböökwe mikani bări ütiäte kri angeletre ngwä. Niara kädekaní ño Ngöböökwe, ye abko namani bări ütiäte angeletre jökrä bti ta abko namani bare kore.

<sup>5</sup> Angele ñakare jire iti abko ie Ngöböökwe niebare krörö:  
Ma abko ti Odei tikwe, ye abko titä mike gare ni jökräye mtare,

*Salmos 2.7*

\* 1:1 nitre Ngöbö kukwei niekä btä blitata nete abko ni jökrä Ngöbö kukwei niekä, köböire Ngöböökwe blitabare Jesukristo känenkri. Ruäre abko Moisés, Jeremías, Isaías, Oseas, Malaquías amne Juan Bautista.

niebare Ngöböökwe niara Odei Jesuye.

Erere arato, angele ñakare jire iti, ie Ngöböökwe niebare krörö:  
Ti rabadre niara Rün jen kwe amne, niara rabadi ti Odei jen tikwe,  
*Crónicas 17.13*

abko Ngöböökwe niebare ñakare jire chi kore angelebtä. <sup>6</sup> Akwa tärä mda Ngöbö  
Kukweibtä, Ngöböökwe ja Odei mubai mikani gare ni jökräye angwane, niebare kwe:

Angele Ngöböökwe jire jökrä käkwe niara mika ütiäte jae, *Deuteronomio 32.43*  
niebare Ngöböökwe. <sup>7</sup> Amne angelebtä abko Ngöböta niere krörö ja Kukweibtä:

Tita angele tikwe mike näin jötrö müre kwrere amne niaratre tä sribi nuene ñukwä jutra  
kwrere tikrä, *Salmos 104.4*

nieta Ngöböökwe. <sup>8</sup> Akwa Ngöbö Odei Jesu abkobtä nieta krörö Ngöbö Kukweibtä:  
Ngöbö, mata gobrane, ye rabadi kärekäre amne, mata gobrane kuin era metre ni  
jökräbtä.

<sup>9</sup> Mata jäandrän jökrä kuin tarere amne, jäandrän jökrä kämekäme, yebtä ma mätä.  
Ye mdenbtä abko Ngöbö makwe käkwe ma dianinkä jenena jakrä amne, kä nuäre mikani  
täte jökrä mabtä abko köböire ma mikani bäri ütiäte kri ma kukwe muko mda  
mda ngwä, *Salmos 45.6-7*

abko Ngöböökwe niebare niara Odei Jesubtä. <sup>10</sup> Erere arato, Ngöböta niere krörö btä:  
Ti Dänkien, kena dekä makwe kä temen ne dätebare amne, ja kise jenbtí makwe kä käinta  
dätebare.

<sup>11</sup> Angwane kä ye abko näin jökrä ta, akwa ma abko tädi kärekäre.  
Dän tä kite ngututute tä niken ngwarbe jökrä, ye kwrere kä temen, kä käinta näin  
ngwarbe jökrä.

<sup>12</sup> Amne dän mriakata, ye kwrere makwe kä temen amne kä käinta mriadikä jökrä.  
Amne nita dän mdara jire kite jabtä, ye kwrere makwe kä kwitadi jökrä.

Akwa ma abko tädi ja kwrere kärekäre amne ma ñan krütadi jire chi, *Salmos 102.25-27*  
abko Ngöböta niere ja Kukweibtä niara Odei Jesubtä. <sup>13</sup> Erere arato, Ngöböökwe niebare  
krörö niara Odeiye:

Kä bäri ütiäte kri ti küde ruenkri, ne känti jakwe täke nete.  
Ye känti ma raba abti tikwe ma rüe mikadi jökrä ma ngoto täni, *Salmos 110.1*  
niebare Ngöböökwe ja Odei Jesuye. Ye kwrere abko angele ñakare jire iti, ie Ngöböökwe  
kukwe niebare kore, <sup>14</sup> ñobtä ñan angwane angele jökrä abko üai sribikä Ngöbökrä amne,  
nire nire rabadre dianintari abko Ngöböta angele juen die mike.

## 2

### *Ni mikani mokre*

<sup>1</sup> Ngöböökwe kukwe niebare kore ja Odeibtä, ye mden kisete Ngöbö kukwei nuaba  
nikwe, ye ie nikwe olo ketadrete kватibe bäri mda, ni ñan rikadre ji Ngöböökwe bäre  
mento bätärekä ja tärítäri abkokäre, <sup>2</sup> ñobtä ñan angwane kira Ngöböökwe ja kukwei  
niebare Moiséye angele köböire, ye abko Ngöböökwe mikamna täte metre amne nire nire  
käkwe ja mikani ngite kukwe ye rüere, käkwe kukwe ye kitani temen abko ütiäre mikani  
ja ngie nuen era metre Ngöböökwe. <sup>3-4</sup> Yebti Ngöböökwe kukwe niebare mda ni Dänkien  
Jesu ara jire köböire ni diantarikrä amne ni Dänkien kukwe nuaka nuaka käkwe niebareta  
jökrä nie angwane, kukwe ye abko kukwe metre mikani gare kwetre nie. Akwa kukwe ye  
abko rabadre bäri ütiäte ni okwate, abkokäre Ngöbö ara jire käkwe sribi kri ñan tuabare  
nuenbare, niara nämane kukwe ye niekä niekä ben bä mikakrä. Erere arato, sribi kri btä  
ni jökrä töi ñan namani krütare nuenbare kwe amne, Ngöböökwe ja di kri mikani tuadre  
arato. Mdakäre abko, ja Üai Deme köböire Ngöböökwe ja di biani bätäkä ngwarbe nie,  
niara tö namani ja di biain ño ño ni itire itire ie, ye kwrere biani kwe. Ngöböökwe ni  
diandretari ye abko bäri ütiäte kri kore, aisetekwakwe ñan trö kwitadre kukwe yeye, abtä  
ni ñan rabadre dianintari angwane, nikwe ñan kwäräbedre jire chi Ngöbö ngäniene.

### *Jesu namani ni kwrere*

<sup>5</sup> Mdakäre abko, kä mda btin dätedi Ngöböökwe btä nunta blite, ye abko ñan Ngöböökwe mikadi gare angeleye. <sup>6</sup> Akwa tärä keteti Ngöbö Kukweibtä ni iti kákwe niebare krörö: Ni kä nebtä abko bobre jakän.

¿Se ñobtä mata töbika btä?

¿Se ñobtä abko mata tarere?

<sup>7</sup> Makwe ni kä nebtä mikani bär obre angele se kräke, akwa yebti makwe niara mikani bär ütiäte kri angele ngwä, rabadre mikani ütiäte ni jökräkwe abkokäre.

<sup>8</sup> Amne makwe jäandrän jökrä mikani niara ngoto täni gobrankäre bti, *Salmos 8.4-6* abko niebare Ngöbö Odei Jesubtä. Ye abko, Ngöböökwe jäandrän jökrä mikani niara ngoto täni, aisetet jäandrän ñakare jire keteti abko Ngöböökwe mikaninte niara ngoto bäre mento. Akwa gwängwarbe jäandrän ruäre abko tä ñakare niara ngoto täni tä nebe tuen nie. <sup>9</sup> Akwa Jesu nämane nüne kä nebtä angwane, Ngöböökwe mikani bär obre angele ngwä abko nita tuen. Akwa mtare Ngöböökwe mikanina bär ütiäte kri käikitadrekä ni jökräkwe, ñobtä ñan angwane Ngöbö moto kuinbti niarakwe ja tare nikani amne krütani ni jökrä kräke amne ni jökrä täte.

<sup>10</sup> Ngöbö abko jäandrän jökrä dätekä amne jäandrän ye abko jökrä Ngöbökrä. Ngöbö ye abko tö ja ngäbriänkätre tödekaka Jesubti tuai jökrä nebe kä nuärete jabe, aisetet Jesukristokwe ja tare nikani ye köböire Ngöböökwe niara mikani biare täte Ji Ngwianka ni diantarikäre. <sup>11</sup> Ye abko, Jesu ni mikaka kuin deme ye käta nitre tödekaka niarabti mike kuin deme. Niaratre btä Jesu ye abko Rün itibe, aisetet Jesu tä nebe ja gaire ñakare ni ja etbare niere abko <sup>12</sup> gare nie, ñobtä ñan angwane Ngöbö Kukweibtä abko Jesukwe niebare krörö Rün Ngöböye:

Ti mräkätre ben tikwe blitadi mabtä, amne nitre gätäkä ma käbti, ye ngwärekri tikwe ka niedi ma käkitakakäre, *Salmos 22.22*

abko tä tikani Ngöbö Kukweibtä. <sup>13</sup> Erere arato nieta krörö:

Tikwe tödekadi metre Ngöböbti, *Isaías 8.17*

niebare Jesukwe Rün Ngöböye. Erere arato, niebare krörö kwe:

Ngöböökwe ja ngäbriänkätre biani tie abko ben tita nete, *Isaías 8.18*  
nieta kore Ngöbö Kukweibtä.

<sup>14</sup> Ngöbö ngäbriänkätre ye abko ngrabare ja kwrere jökrä, aisetet Jesu därebare angwane, ngrabare namani ni kwrere. Diablu abko di tärä ni kämikakrä. Akwa Jesu därebare ni kwrere, niara krütani angwane, di rabadre diablu gakakäre amne ni tikatekäre. <sup>15</sup> Jesu krütani ni kwati tikatekäre, ñobtä ñan angwane ni klabore käta bkänkä jürä ngwen, ye kwrere jire ni jökrä nämane gata jürä ngwen käre abko kisete nämane ja tare nike abko tikaninte kwe. <sup>16</sup> Ne aisetet, ñan niara jatani angele die mikakäre kore, akwa jatani Abraham mräkä tödekaka Jesubti die mikakäre. <sup>17</sup> Ye mden kisete, niara rabadre sribire Ngöbökrä ni blitaka Ngöböbe ni mda mda diäre dänkien kwrere amne, rabadre sribi ye ngwena bare täte jökrä, amne rabadre niara mräkä ngwen ruentari tare jae, abkokäre nükani därere niara mräkätre kwrere. Mdakäre abko, jäandrän kämika nämane ni ngite ütiäre, ye kwrere niara jraindre ni ngite ngite diankakäre mento nibtä, abkokäre nükani därere ni kwrere. <sup>18</sup> Niara ara jire kákwe ja tare nikani kri amne namani nuaninte ja käne kukwe kämenbti. Ye mden kisete, nire nire nuateta ja käne rüe Satanakwe abko niarata die mikaka arato.

### *Jesu abko bär ütiäte Moisés ngwä*

<sup>1</sup> Mdakäre abko ti mräkätre deme deme, mun ye abko Ngöböökwe käräbare jakrä. Kukwe nini tikwe, yebtä munkwe töbika kuin metre Jesubtä. Niara abko jatani Ngöbö Kukwei Ngwianka kwrere amne niara abko Ni Blitaka Ngöböbe Ni Mda Mda Diäre Dänkien abko bti nita tödeke kwatibe. <sup>2</sup> Kira abko nitre israelita abko ju Ngöböökwe kwrere. Moisés abko nämane sribire niaratre ngätäite amne Ngöböökwe sribi biani ie abko erere mikani täte jökrä kwe, kákwe sribi nuenbare kuin täte ju Ngöböökwe jire jökrä

te. Ye kwrere arato, Ngöböwe Jesu mikani sribire angwane, Jesu käkwe Ngöbö mikani täte metre, käkwe sribi nuenbare kuin täte arato. <sup>3</sup> Akwa Jesu abko Ngöböwe mikani bäri ütiäte Moisés bti ta, ñobtä ñan angwane ni ju mikaka ye abko mikata bäri ütiäte ju ara yebti ta. Jesu abko käkwe ju Ngöböwe mikani, aisetet Ngöböwe mikani bäri ütiäte Moisés ngwä. <sup>4</sup> Ju kwatirekwatire mikata ye abko ni tärä iti käta mike, akwa Ngöbö abko käkwe jändräñ jökrä dätebare. <sup>5</sup> Moisés abko sribikä jirekäbe amne sribi nuenbare kuin täte kwe ju Ngöböwe te amne, Ngöböwe dre dre niedi niara täbti abko bä mika nämane niara köböire. <sup>6</sup> Akwa Kristo abko Ngöbö Odei ara, aisetet niara abko tä ju Ngöböwe dänkiene kuin metre. Ye abko, nitre tödekaka Kristobti abko Ju Ngöböwe ara, bti Kristo tä dänkiene. Ye abko, nikwe nünandrekä dite Kristobti amne Kristo jatadita abkobti nikwe tödekadre janknu ye ngwane, ni rabadre ju niarakwe janknu amne Kristo rabadre ni dänkiene janknu.

### *Nikwe ñan Ngöbö Kukwei kitadre temen*

<sup>7</sup> Ne mdentä abko, Ngöbö Üai Deme käta niere krörö Ngöbö Kukweibtä: Ngöböta dre niere, ye munkwe kukwe nua mtare, <sup>8</sup> ne ngwane munkwe ñan ja dokwä mika ribi, mun mräkä kirakira käkwe ja dokwä mikani ribi Ngöbö rüere Moisés näire ye kwrere.

Niaratrekwe Ngöbö nuaninte ja käne kä kaibete, ye kwrere munkwe ñan nuen.

<sup>9</sup> Kä kaibe yete tikwe sribi kri ñan tuabare nuenbare mun mräkä kirakira kräke amne, kä gre ketebu jire sribi kri ye tuani kwetre.

Akwa ti di nämane ti kukwei mikakrä täte ya, ñakare ya, ye abko tö namani tuai janknu, amne ja dokwä mikani ribi kwetre jirekäbe.

<sup>10</sup> Ye mdentä abko nitre nünanka kä ye ngwane, kräke ti moto rababa romon, käkwe nieba krörö:

Nitre noko käre tä niken ngwarbe ji mdabti, amne ji tikwe, bti rikadre, ye gare ñakare ietre abti kä nüke mtare, tikwe nieba niaratretbä.

<sup>11</sup> Abtä ti moto rababa romon krübäte, käkwe nieba krörö niaratret rüere: Käjadükakrä tikwe, ye känti nitre ye ñan rükadre jire, tikwe nieba kore rüere, *Salmos 95.7-11*

niebare Ngöbö Üai Demekwe Ngöbö Kukweibtä.

<sup>12</sup> Ne aisetet ti mräkätre, mun itire itire käkwe ñan ja töi mika kämekäme amne, munkwe ñan ja dokwä mika ribi, käkwe ñan tödekadre mda Ngöböbtä, käkwe trö kwitadre Ngöbö nire yeye. <sup>13</sup> Akwa "Mtare" \* kä ne tä ne ngwane, ja die mika kwärikwäri köbö kwatirekwatire munkwe, kukwe kämekäme käkwe ñan mun ngökadre jire iti amne mun ñan dokwä rabadre ribi Ngöbö rüere abkokäre. <sup>14</sup> Nikwe tödekani era metre Kristobti kena, ye kwrere nikwe nünandrekä dite jabtä nebebe kä mrä ye näire, ye ngwane ni rabadi ketetibe Kristobe kärekäre arato. <sup>15</sup> Ne aisetet Ngöbö Kukwei käta niere krörö:

Ngöböta dre niere, ye munkwe kukwe nua mtare, ne ngwane munkwe ñan ja dokwä mika ribi, mun mräkä kirakira käkwe ja dokvä mikani ribi Ngöbö rüere Moisés näire,

*Salmos 95.7-8*  
abko nieta Ngöbö Kukweibtä.

<sup>16</sup> Ye abko, ñirekwe Ngöbö kukwei nuani abti namani rüre kore Ngöbö rüere? Nitre israelita nämane Egipto Moisés nikani ngwenante, ye mdent abko namani rüre Ngöbö rüere. <sup>17</sup> Amne nire kräke Ngöbö moto namani romon kä gre ketebu? Ye abko nitre israelita käkwe ja mikani ngite Ngöbö rüere, ye mdent abko ngwákä namani kitanintbe tementa kwäräkwärä kä kaibete. <sup>18</sup> Mdakäre abko, ñire ñan rükadre kä jadükakrä Ngöböwe känti niebare ie Ngöböwe? Ye abko, nitre israelita käkwe Ngöbö kukwei mikani ñakare täte. Nitre ye mdent abko ie Ngöböwe ñäkäbare kore. <sup>19</sup> Nitre israelita ye abko käkwe tödekani ñakare Ngöböbtä, aisetet namani ñakare kä jadükakrä Ngöböwe känti abko gare nie.

\* 3:13 Mtare. Nikwe Ngöbö kukwei mikadre täte abko bä mikata kukwe "Mtare" yebti.

## 4

*Köbö jadükakrä tärä mtare juta Ngöbökwe kräke*

<sup>1</sup> Ne aise, kä jadükakrä Ngöbökwe köböi mikani nie, ye känti kä tä rikakrä mtare, aise nikwe ja ngibiadre kuin amne nikwe ñan ja mikadre ngite nitre israelita kirakira kwrere. Nane mun ruäre ñan rabadre kä jadükakrä ye känti abko ngäniene titi nire kore, <sup>2</sup> ñobtä ñan angwane kukwe kuin Ngöbökwe ye niebare kira nitre israelitaye, ye kwrere jire kukwe kuin Ngöbökwe Jesubtä niebare nie. Akwa kukwe nuani jirekäbe kwetre kira amne niaratre kákwe tödekaní ñakare Ngöböbiti, ye mdentä abko ñan namani kä jadükakrä Ngöbökwe känti. Kukwe ñan rakadrekä kore munbtä abko ngäniene titi nire kore munye. <sup>3</sup> Akwa ni abko kákwe tödekaní Kristobti, ye abko näin kä jadükakrä Ngöbökwe ye känti, aise kukwe niebare kira Ngöbökwe nitre israelitabtä ñan rakadrekä nibtä. Kä ye mdentä abko Ngöbökwe niebare krörö:

Ti moto rababa romon krübäte, kákwe nieba krörö niaratre rüere:

Käjadükakrä tikwe, ye känti nitre ye ñan rükadre jire, tikwe nieba kore rüere, *Salmos 95.11*

niebare Ngöbökwe ni mräkä kirakirabtä. Akwa kena dekä Ngöbökwe kä dätebare angwane, sribi nuenbare ünän jökrä kwe, bti jadükani kwe gare nie, <sup>4</sup> ñobtä ñan angwane köbö kükü abko btä Ngöbö Kukwei tä nire krörö tärä keteti känti:

Ngöbökwe sribibare ünän jökrä, yebti köbö kükürare angwane jadükani kwe, *Génesis 2.2* abko nieta Ngöbö Kukweibtä. <sup>5</sup> Abti nitre israelita kákwe tödekaní ñakare Ngöböbiti, aise Ngöbökwe niebare ja Kukweibtä abko ti bike nire bobuta abko krörö:

Kä jadükakrä tikwe, ye känti nitre ye ñan rükadre jire,

*Salmos 95.11*

niebare Ngöbökwe.

<sup>6</sup> Akwa kä jadükakrä Ngöbökwe ye tä janknu mda abko känti ni ruäre rabadi niken, akwa nitre israelita kirakira ie kukwe kuin Ngöbökwe niebare, akwa kukwe ye abko kitani temen kwetre, abtä ñan nikani nebe kä jadükakrä Ngöbökwe ye känti. <sup>7</sup> Ye mdentä kisete, kä nikanina kira ta Josué täbti angwane, Ngöbökwe köbö jadükakrä mdara jire köböi kitani. Köbö btin mda ye abko kä “Mtare” niebare Ngöbökwe jrei David tukwe köböire abko krörö:

Ngöböta dre nire, ye munkwe kukwe nua mtare, ne ngwane munkwe ñan ja dokwä mikaribi,

*Salmos 95.7-8*

niebare Ngöbökwe jrei David köböire. <sup>8</sup> Ngöbökwe niebare kore, ñobtä ñan angwane Josué rabadre nitre israelita ngwena kä jadükakrä Ngöbökwe känti era metre, akräke köbö jadükakrä tärä mda Ngöbökwe ñan niedre jire chi. <sup>9</sup> Akwa Josué ñan nikani nitre israelita ngwena nebe kä jadükakrä era metre känti, aise köbö jadükakrä tärä mda juta Ngöbökwe kräke, <sup>10</sup> ñobtä ñan angwane Ngöbökwe jäandrän jökrä dätebare, yebti köbö kükü te jadükani kwe, ye kwrere jire nire nire rikadre kä jadükakrä Ngöbökwe ye känti abko tä jadüke sribi kweye.

<sup>11</sup> Kira nitre israelita ruäre ñan nükani kä jadükakrä Ngöbökwe känti, ñobtä ñan angwane Ngöbö kukwei kitani temen kwetre. Ye kwrere, mun ngätäite ni ñakare jire iti kákwe Ngöbö kukwei kitadre temen, köböite ñan rükadre kä jadükakrä Ngöbökwe ye känti, abkokäre ari sribire ja di ngöi jökrä, <sup>12</sup> ñobtä ñan angwane Ngöbö Kukwei abko nire amne dite amne, ngitra tu grine jütre jabtä kwärikwäri abko tä jäandrän tikekä därebe, yebti ta Ngöbö Kukwei bäri grine krübäte. Ni töi amne ni moto bäri kaibe ñäre ñakare abko Ngöbö Kukwei ye käta tikekä därebe amne ni töi ño ño kaibe nikwe amne nita töbike ño ño ni mdabtä, ye abko Ngöbö Kukwei tä mike gare jökrä nie. <sup>13</sup> Jäandrän jökrä dätebare Ngöbökwe, ye abko ñan raba ja rükente jire chi Ngöbö okwä bäre mento Ngöbö ngäniene. Jäandrän jökrä tä bütiere Ngöbö ngwärekri, aise Ngöbö abko ie nikwe ja niedi metre jökrä. Ngöbö ye mdentä okwä bäre ni ñan raba ngitie.

*Jesu abko Ni Blitaka Ngöböbe Ni Mda Mda Diäre Dänkien era metre*

<sup>14</sup> Mdakäre abko, Jesu Ngöbö Odei ye ara jire tä ni blitaka Ngöböbe ni mda mda diäre dänkien kri nikwe abko nikani nünenta kä käinbtí, aise ari tödeke kwatibe janknu

bti. <sup>15</sup> Ari tödeke kore bti, ñobtä ñan angwane Jesu ni blitaka Ngöböbe ni mda mda diäre dänkien tä nikwe, ye abko ni di ñan rabadre nünandre mda Ngöbökrä angwane, ni rabadre ruentari tare ie, ñobtä ñan angwane kukwe kämekäme Ngöbö rüere käta ni nuente ja käne, ye kwrere nakaninkä bätäkä ngwarbe käne Jesubtä, akwa ja mikani ngite ñakare jire chi batí kwe. <sup>16</sup> Ne aisetet, nikwe ñan kä jürä ngwiandre jabtä amne, brän krötö bári kürä gobrankrä Ngöbökwé, bti Ngöbö tä täkäninte ye känti. Ngöbö moto kuin ni tarekä, ye ken ari krötö angwane, ni rabadi ruen bobre ie amne, kukwe bätäkä ngwarbe tä kite ni rüere, angwane ni die mikadi kwe.

## 5

<sup>1</sup> Nitre blitaka Ngöböbe ni mda mda diäre dänkien ye abko diankata ni mda mda ngätäite amne, mikata blite Ngöböbe ni mda mda diäre amne ni mda mda kräke. Erere arato, niara tä jändrän bianka Ngöböye amne jändrän kukwaka Ngöböye ni ngite ngite ütiäre. <sup>2</sup> Akwa ni blitaka Ngöböbe ni mda mda diäre dänkien ye abko tä ja mike ngite ni mda mda kwrere arato. Ye mden kisete, ni mda mda töi ñakare käta ja mike ngite amne tä niken ji blobti, ni yebe rabadre blite jáme, ñobtä ñan angwane tä ja mike ngite niaratre kwrere. <sup>3</sup> Ye mden kisete, niarakwe jändrän kämikadre Ngöböye ja ngite ütiäre. Erere arato, jändrän kämikadre kwe juta Ngöbökwé israelita ye ütiäre.

<sup>4</sup> Sribi ye abko ütiäre kri abko ni ñakare jire iti raba den kise aubti jae, akwa Ngöbö ara jire käta ni kärere abko erere kisete sribi ütiäre ye mikata kwe. Kira Moisés näire, Ngöbökwé Aarón käräbare sribi ne nuene abko erere mikani kwe niara kisete. <sup>5</sup> Ye kwrere arato, Kristo käkwe ñan ja mikani ni blitaka Ngöböbe ni mda mda diäre dänkiene au, akwa Ngöbö ara jire käkwe sribi bári ütiäre kri ye biani ie, käkwe niebare krörö ie:

Ma abko ti Odei jen tikwe, ye abko titi mike gare ni jökräye mtare, *Salmos 2.7* niebare Ngöbökwé Jesukristoye. <sup>6</sup> Erere arato, tärä mdara jire känti Ngöbökwé niebare krörö ie:

Melquisedec nämame blitaka tibe ni mda mda diäre,

ye kwrere jire ma rabadi blitaka tibe ni mda mda diäre kärekäre, *Salmos 110.4* niebare Ngöbökwé Jesukristoye, erere mikani ütiäre kri kwe, käkwe mikani blitaka jabe ni mda mda diäre dänkiene.

<sup>7</sup> Jesu nämame nüne kä nebtä angwane, Ngöbö niara ngibiaka gata ngäniene, ye ben nikani blite angwane, namani ngrente krikri be, kä namani ja müaire amne, okwä ñöi namani näkäenkä kabre ie ja di käräbtä Ngöböye amne, Ngöbö kukwei mikani täte jökrä kwe, aisetet Ngöbökwé kukwei nuani, käkwe mikani nire. <sup>8</sup> Jesu abko Ngöbö Odei bkänä, akwa ja tare nikani kwe, ye köböire Ngöbö kukwei mikadre täte ño abko nükani gare täte jökrä ie angwane, <sup>9</sup> Ngöbö jatani Jesu mike juto biare ne kwrere, aibe köböire ni jökrä Jesu mikaka täte abko kräke Jesuta ni diantarikä kärekäre. <sup>10</sup> Amne Ngöbökwé mikani ni blitaka jabe ni mda mda diäre dänkiene Melquisedec nämame sribire ño ye kwrere.

*Trö kwitadre ñakare Jesukristoye*

<sup>11</sup> Tikwe kukwe nini, yebtä kukwe mda mda tä kabre niedre munye, akwa tikwe niedre ño angwane, rükadre gare nuäre munye abko ñan tä nebe ñüke gare tie, ñobtä ñan angwane kukwe dirita munye abko tä niken jökrä mun olo bäre. <sup>12</sup> Era bkänä kä nikana reire ta angwane, munkwe Ngöbö Kukwei nuani amne, mun rabadrera dirire ni mda mdaye bá amarebti kukwe dirita käne ni jökräye Ngöbö Kukweibtä abko diridreta bobuta munye. Se abko mun rabadrera ünän käkwe mrö ribi kwetadre bá amarebti bási ngäbäkre di ñakare käta kian aibe ñaen, kwrere jire mun tä nüne se, aisetet kukwe dirita käne diridreta bobuta munye. <sup>13</sup> Tita niere kore munye, ñobtä ñan angwane ni kian aibe ñaen mun kwrere, ye abko ngäbäkre kianbtä kwrere amne ngäbäkre kianbtä, ie kukwe mden mden kuin metre Ngöbö ngwärekri gare ñakare, ye kwrere mun tä nüne. <sup>14</sup> Akwa ni ünän ünän abko käta mrö ribi ribi kwete. Nitre ye abko dre dre kuin amne dre dre

käme Ngöbö ngwärekri, yebtä ja töitikanina kabre kwetre, aisetet tärä nebe gare ietre. Kwrere jire mun rabadre bää amarebti.

## 6

<sup>1</sup> Ne aisetet, brän janknu mentokwäre rabakäre ünän Ngöbö ngwärekri. Mun rabadi ünän täte jökrä angwane, kukwe diribare känökäne munye Kristobtä, ye aibebtä mun ñan rabadre ja töitike kärekäre. Erere arato, ñan kukwe garera munye, ye aibe jiebti mun tädre näin janknu abko krörö: Kukwe kämekäme bätäkä ngwarbe mun nämane nuene, kä nämane mun mike mente Ngöbö okwä bäre mento, yebtä ñan mun tädre dirireta bobukäre. Erere arato tödekadre kватibe Ngöböbti, ye abko ñan mun tädre dirire janknu.

<sup>2</sup> Erere arato, ja ngökadre ñöte Ngöbö käbti amne köbötikadre ño, ñan mun tädre kukwe ye dirire janknu. Mdakäre abko, kise mikadre ni mdabti Ngöbö die biandre ie, ñan yebtä mun tädre dirire käre. Mdakäre abko, Ngöböökwe ni krütanikrütani mikadita nire ño kä mrä näire amne Ngöböökwe kukwe ükadite ño ni kräke kä mrä näire, ñan yebtä mun tädre dirire janknu. <sup>3</sup> Akwa Ngöbö diebti ni rikai niren janknu mentokwäre rabakäre ünän abko tita niere munye, <sup>4-6</sup> ñobtä ñan angwane ni ruäre, ietre Ngöbö mikanina gare amne jäandrän kuin Ngöböökwe kä käinbti abko Ngöböökwe biandre ngwarbe ietre, ye namanina gare metre ietre, akwa nitre ye käkwe trö kwitadre Ngöböye angwane, ni mda ñan rabadre nitre ye töi kwiteta jire chi Ngöbö kukwäre. Erere arato, Ngöbö Üai Deme nükani nüne btätre amne Ngöbö kukwei nükani gare metre ietre amne, sribi kri ñan tuabare namani bare okwälbt arato, akwa niaratre käkwe trö kwitadre Ngöböye angwane, ni ye ñan rabadre töi kwiteta jire chi Ngöbö kukwäre kore. Kukweta nakenkä kore, ñobtä ñan angwane kukwe kämekäme tätre nikken niaratre mike trö kwite Ngöböye kore, yebti abko tä Ngöbö Odei müre keteta bobukäre kwrere jire tätre bää mike, amne tätre Ngöbö Odei Jesu mike yakrä ni jökräye. Ye abko tä tare krübäte kräke.

<sup>7</sup> Nitre btä tikwe kukwe nini, ye abko ti bike bää mike krörö: Dobo bti ñüta näkäen käre amne nura kuinkuin aibe tä kite niren te, ye abko ni sribikä käta nura ngwä ötö kuin, yebtä abko Ngöböta dobo ye die mike amne tä ngibiare kuin. Ye kwrere tä nakenkä nibtä arato. <sup>8</sup> Akwa dobo bti ñüta näkäen käre abti kri mu ngwarbe kämekäme aibe tä kite niren, ye ngwane dobo ye tä nebe ütiäte ñakare. Abtä nane ngürün kebera nebe dobo yebtä. Abti mrä sribikä käkwe dobo kukwadi. Ye kwrere rakadikä nitre trö kwitaka Ngöböye yebtä.

<sup>9</sup> Tita kukwe niere kore, akwa mun ti mräkätre tare tikwe, mun ye abko btä kukwe tare ye ñan rakadrekä ruen tie, ñobtä ñan angwane munta näin ji metrebtä rabakäre dianintari Ngöböökwe. Ye abko gare kuin tie, <sup>10</sup> ñobtä ñan angwane Ngöbö abko töi metre aisetet ñan tä ni kite ngise ngwarbe, amne munta Ngöbö tarere, käkwe ni jen Ngöböökwe die mikani abti kä nüke mtare munta die mike janknu, ye abko Ngöböökwe ñan käikwitadrekä jabti, käkwe mun die mikadi ruen tie. <sup>11</sup> Munta ni jen Ngöböökwe die mike ja di ngöi jökrä, ye kwrere munkwe nuendre janknu abti Jesukristo jatadi nüketa, ie ti tö, jäandrän kuin ngibiata munkwe Ngöböye, ye erere rabadi tätet jökrä munkwe abkokäre. <sup>12</sup> Ne aisetet, munkwe ñan kä ngwian krene jabtä sribi Ngöböökwebtä, ie ti tö, akwa ni mda mda käta tödeke kватibe Ngöböbti, käta jäandrän köböi mikani ie Ngöböökwe ye ngibiare bätärekä jae abti tä nüke kisete, ye kwrere munkwe jäandrän ngibia jae arato.

*Ngöböökwe ja kukwei mikadi tätet*

<sup>13</sup> Abraham abko käkwe tödekanai kватibe Ngöböbti, kwrere munkwe nünandre. Niarabtä kukwe nakaninkä krörö: Kira Ngöböökwe ngäbäkre köböi mikani ie angwane, ni mda ñakare bäri ütiäte Ngöbökrä, aisetet Ngöböökwe ja kukwei mikadre tätet era metre abko niebare ja käbti kwe, niebare krörö kwe Abrahamye:

<sup>14</sup> Tikwe ja di biandi mae, aisetet ma bkün däredi kwati ja täritäri, *Génesis 22.17*  
niebare Ngöböökwe. <sup>15</sup> Ye abko Abrahamkwe ngibiabare bätärekä abti Ngöböökwe ngäbäkre köböi mikani ie ye därebare. Ngöböökwe ja kukwei biani ie, ye erere namani bare.

<sup>16</sup> Ye abko, ñobtä Ngöbökwe ja kukwei biani ja kähti kore abko ti bike bä mike krörö munye: Ni kä nebtä tä ja kukwei bien kватibe, ye mikadre täte kwe, abkokäre tä ja kukwei bien ni bări ütiäte niarakrä ye kähti. Ne aisetet ni tärä ja kukwei bien kватibe ni mda kähti, ye ngwane ni ye käkwe ja kukwei mikadi täte tä gare metre, aisetet ni ñan raba ja kweteta jire chi mda kukwe yebtä. <sup>17</sup> Ngöbökwe jäandrän köböi mikani, ye abko nire nire rabadre bkäne abko mikani gare metre kwe, yebti ja kukwei mikadre täte era metre abko niebare ja kähti Ngöbökwe Abrahamye. <sup>18</sup> Ngöbökwe kukwe ketebu niebare krörö Abrahamye: keteti abko ja kukwei biani ja kähti kwe. Ketebukäre abko, ñan ja kukwei kitadre jire chi temen kwe, akwa ja kukwei mikadre täte era metre kwe, niebare kwe Abrahamye. Jäandrän ketebu ye abko ni ñan raba kwite jire chi, ñobtä ñan angwane Ngöbö abko ñan raba ni ngökö jire chi. Ngöbökwe nuenbare kore, ni tödekaka Jesubti ngitiani Ngöböye jäandrän kuin köböi mikani kwe rabadre nikwe, ye käi rabadre nuäre nuäre nibtä abkokäre. <sup>19</sup> Nitre ru ngwianka abko käta jä doboko kite ñöte nguse ru ketatekrä dime, ñan rikadre mento abkokäre. Ngöbökwe jäandrän köböi mikani nie, bti nita tödeke, ye abko jä doboko ye kwrere, ñobtä ñan angwane nita tödeke Ngöböbti ye abko käta ni mike nünenkä dite jabtä, ni ñan rikadre mento Ngöböye abkokäre. Nita tödeke kватibe Ngöböbti, ye mden köböire ni nena nebe kä bări deme Ngöbö känti kä käinbti, ye abko nita näin dän ngetbote ta nebebe Kä Bări Demente ju blitakrä Ngöböbe känti ye kwrere. <sup>20</sup> Kä bări deme, ye mden känti abko Jesu ara jire nikanina ji tike ni käne nebe yete. Ye abko, Melquisedec nämane blitaka Ngöböbe ni mda mda diäre, ye kwrere jire Jesu abko ni blitaka Ngöböbe ni mda mda diäre dänkien kärekäre kä bări demente Ngöbö ngwärekri.

## 7

*Melquisedec amne Jesu abko blitaka Ngöböbe ni mda mda diäre*

<sup>1</sup> Melquisedec ye abko nämane jreire juta Salemte. Niara abko ni blitaka ni mda mda diäre Ngöbö ütiäte kribe. Bati Abraham jananbare rüre, käkwe jrei ruäre ganainbare kwäräbe, bti jataninta nüke Salem angwane, Melquisedec nikani ngäbti, käkwe ja di biani ie. <sup>2</sup> Angwane Abrahamkwe jäandrän dianinkä rübtä, ye ñäkänintbe keta jätä kwe, bti biani keteti kwe Melquisedeye. (Kukwe Melquisedec käta “Jrei kukwe ükatekä metre” niere hebreore. Akwa “jrei juta Salem” ye abko käta “Jrei kä jämente” niere hebreore arato.) <sup>3</sup> Melquisedec ye abko rün amne meye gare ñakare nie. Erere arato, mräkä kirakira gare ñakare nie. Mdakäre abko, niara därebare ñongwane amne krütani ya abkobtä Ngöbö Kukwei tä blite ñakare arato. Ne aisetet, Melquisedec abko bä mikata bäsí Ngöbö Odei Jesu kwrere arato amne niara abko ni blitaka Ngöböbe ni mda mda diäre kärekäre.

<sup>4</sup> Melquisedec abko bări ütiäte tuen munkwe. Melquisedec abko bări ütiäte, aisetet ni mräkä käne Abraham ara jire käkwe mikani ütiäte jae amne jäandrän dianinkä kwe jrei mda mdakän rübtä abko biani keteti kwe Melquisedeye. <sup>5</sup> Akwa Kukwe Biani Ngöbökwe Moiséye abko käta niere krörö: Nire nire därebare Leví mräkäkri käta sribire ni blitaka Ngöböbe ni mda mda diäre kwrere, ye aibe käkwe jäandrän kärädre keteti jakrä abko nieta kore. Nitre blitaka Ngöböbe ni mda mda diäre ye abko israelita mräkä ara amne därebare Abrahamkri arato, akwa jäandrän kärädre kore kwetre mräkäye abko nieta Ngöbö Kukweibtä. <sup>6</sup> Melquisedec abko ñan jatani Leví mräkäkri, akwa Abraham ara jire käkwe jäandrän dianinkä rübtä ye abko kani ngäbti keteti kwe Abrahamye. Bărire mda abko, Abraham abko ie Ngöbökwe jäandrän köböi mikani akwa Melquisedec käkwe ja di biani Abrahamye. <sup>7</sup> Ye abko ni ie ja di bianta abko ñakare bări ütiäte ni ja di bianta ie ye kräke abko garera ni jökräye, aisetet Melquisedec abko bări ütiäte Abrahamkrä gare nie. <sup>8</sup> Angwane nitre blitaka Ngöböbe ni mda mda diäre därebare Leví mräkäkri käta jäandrän kaen ngäbti keteti jakrä nitre israelitaye, ye abko ni kä nebtä, aisetet tätre krüte. Akwa Melquisedec abko tä nire amne tä nüne janknu, kwrere jire blitata btä abko käkwe jäandrän kani ngäbti keteti Abrahamye. <sup>9</sup> Amne nitre blitaka Ngöböbe ni mda mda diäre därebare Levíkri käta jäandrän kaen ngäbti keteti jakrä, ye ara jire käkwe

jändrän biani keteti arato Melquisedeye Abraham köböire abko ni rabadre niere,<sup>10</sup> ñobtä ñan angwane Melquisedec jatani Abraham ngäbti angwane, Abrahamkwe jändrän biani keteti ie, ye ngwane Leví ngämi därrere, akwa nämane ñäre ñakare Abrahambä angwane, Abrahamkwe jändrän biani Melquisedeye, aisetet Melquisedec abko bäri ütiäte Leví kräke amne Leví mräkä ja täritäri kräke arato.

#### *Jesu abko Melquisedec kwrere*

<sup>11</sup> Mdakäre abko, nitre blitaka Ngöböbe ni mda mda diäre därebare Levíkri käta jändrän kukwe Ngöböye ni ngite ngite ütiäre. Angwane Kukwe Biani Ngöböökwe Moiséye, ye rüere nitre israelita nämane ja mike ngite angwane, nämane jändrän ngwena nitre blitaka Ngöböbe ni mda mda diäre yeye kukwadre Ngöböye ja ngite ütiäre. Akwa jändrän kukwata Ngöböye ni ngite ngite ütiäre ye kákwe niaratre mikadre metre Ngöbö ngwärekri akräke Ngöböökwe ñan ni mda blitaka jabe ni mda mda diäre juandre jire mda. Akwa ni blitaka Ngöböbe ni mda mda diäre därebare Levíkri nämane jändrän kukwe ni ngite ngite ütiäre ye ñan namani ni mike metre Ngöbö ngwärekri, aisetet ni blitaka Ngöböbe ni mda mda diäre Melquisedec kwrere juani Ngöböökwe amne ñan ni mda Aarón kwrere juani kwe,<sup>12</sup> ñobtä ñan angwane ni blitaka Ngöböbe ni mda mda diäre kwitadre jökrä, ye ngwane kukwe biani nuendre nie ja ngite ütiäre ye kwitadre arato.<sup>13-14</sup> Ni Dänkien Jesu, btä Ngöbö Kukwei tä blite ye abko ñan jatani Leví mräkäkri, akwa jatani Judá mräkäkri. Judá mräkäkri abko ni blitaka Ngöböbe ni mda mda diäre jatadre abko Moisékwe niebare ñakare jire, akwa Jesu abko därebare Judá mräkäkri abko gare metre nie amne niara abko blitaka Ngöböbe ni mda mda diäre nieta Ngöbö Kukweibä.<sup>15</sup> Ye abko, ni blitaka Ngöböbe ni mda mda diäre Melquisedec kwrere rükadre btin mda bkänä, ne ngwane nunkwe kukwe nini abko rabadre tuen bäri metre nunye.<sup>16</sup> Ye abko, ni blitaka Ngöböbe ni mda mda diäre nukanina mda era metre, akwa Ngöböökwe ñan mikani sribire ñobtä ñan angwane därebare Levíkri, akwa mikani sribire Ngöböökwe ñobtä ñan angwane niara abko ni di kri amne krüte ñakare aisetet.<sup>17</sup> Ye gare nie, ñobtä ñan angwane ni blitaka Ngöböbe ni mda mda diäre Melquisedec, yebtä Ngöböökwe niebare krörö: Melquisedec nämane blitaka tibe ni mda mda diäre,

ye kwrere jire ma rabadi blitaka tibe ni mda mda diäre kärekäre, *Salmos 110.4*  
niebare Ngöböökwe Jesukristoye abko tä tikani Ngöbö Kukweibä.

<sup>18-19</sup> Leví mräkä blitaka Ngöböbe ni mda mda diäre, ie Ngöböökwe sibi biani nuendre käne Moisés näire, akwa sibi kwe namani ngwarbe, ñan namani ütiäte, ñobtä ñan angwane nikwe jändrän biandre ni blitaka Ngöböbe ni mda mda diäre kukwakrä ni diäre ni ngite ye ütiäre niebare Ngöböökwe Moiséye, ye abko di namani ñakare ni mikakrä metre Ngöbö ngwärekri. Ye mden kisete, kukwe ye namani ütiäte ñakare mda amne kukwe ye täte abko Ngöböökwe kukwe mdara jire btin mikani Jesu köböire abko bäri ütiäte tödekkärä nie. Jesu ye mden köböire abko nita krötö ja ken Ngöböbe.

<sup>20</sup> Mdakäre abko, Jesu namani bäri ütiäte ye abko Ngöbö ara jire kákwe ja kukwei mikadre täte era metre abko ja kukwei biani kwatibe kwe Jesubä. Akwa nitre blitaka Ngöböbe ni mda mda diäre därebare Levíkri abko Ngöböökwe mikani sribire arato, akwa niaratre kräke Ngöböökwe ja kukwe biani ñakare kwatibe kore.<sup>21</sup> Akwa ni Dänkien Jesu kräke abko Ngöböökwe ja kukwei biani kwatibe, aisetet Ngöbö Kukweibä niebare krörö kwe Jesuye:

Ma abko blitaka tibe ni mda mda diäre kärekäre, aisetet ni Dänkien Ngöbö kákwe ja kukwei biani kwatibe kore, niebare kwe, yebti ñan ja töi kwitadita jire chi kwe, *Salmos 110.4*

nieta kore Ngöbö Kukweibä.<sup>22</sup> Ngöböökwe ja kukwei mikadi täte niebare kwatibe kwe, ye mdenbtä kukwe mda ükaninte btin Ngöböökwe Jesu köböire ye abko bäri kuin kukwe ükaninte käne Moisébe ye ngwä.

<sup>23</sup> Nitre blitaka Ngöböbe ni mda mda diäre därebare Levíkri ye abko kwati, kákwe sribibare ja täritäri, ñobtä ñan angwane tä krüte abko täte mda nämane neme sribire abti kä nüke mtare.<sup>24</sup> Akwa Jesu abko tä näne kärekäre, niara krütadita ñakare mda, aisetet

Jesu aibe rabadi blitaka kärekäre Ngöböbe ni diäre amne ni mda ñan rabadi sribire jire chi niara täte.<sup>25</sup> Ne aisetet, nire nire tä kite Ngöböye rabakäre dianintari Jesu köböire, ye abko Jesu di tärä diantarikrä täte jökrä kärekäre, ñobtä ñan angwane Jesu abko tä näne kärekäre blitakäre kräke Ngöböbe aisetet.

<sup>26</sup> Ye abko ni blitaka Ngöböbe ni mda mda diäre dänkien Jesu ye kwrere abkodbe nikrä abko erere namani, ñobtä ñan angwane Jesu abko deme, kukwe kämekäme ñakare btä amne ja mike ngite ñakare. Erere arato, nitre kukwe kämekäme nuenkä, ye kwrere nünabare ñakare kwe amne Ngöböökwe mikani bäri ütiäte ni jökrä ngwä kä käinbiti sete.

<sup>27</sup> Ye abko, nitre blitaka Ngöböbe ni mda mda diäre dänkientre därebare Levíkri ye abko ñakare ja kwrere Jesube, ñobtä ñan angwane käne niaratre nämame jändrän kämike kukwadre Ngöböye ja ngite ütiäre, abti nämame jändrän kämike kukwadre mda Ngöböye nitre israelita mda mda ngite ye ütiäre. Ye abko nämame nuene köbö kwatirekwatire, akwa Jesu abko käkwe ja ara jire biani müre ketadre au ni jökrä ngite ütiäre. Ye abko niarakwe nuenbare batibe amne ütiäte kärekäre Ngöbö okwåte.<sup>28</sup> Kukwe Biani Ngöböökwe Moiséye ye abko tä ni kukwe kämekäme nuenkä mike blitaka Ngöböbe ni mda mda diäre dänkiene. Abti Ngöböökwe ja Odei Jesu mikadi sribire niebare kwe. Ngöböökwe ja Odei Jesu ara mikani blitaka jabe ni mda mda diäre dänkiene. Ngöbö Odei Jesu ye abko Ngöböökwe mikani biare täte sribi ye nuenkäre kärekäre.

## 8

*Kukwe ükaninte btin Ngöböökwe nibe*

<sup>1</sup> Ye abko, kukwe nieta tikwe abko krörö: Jesu abko ni blitaka Ngöböbe ni mda mda diäre dänkien nikwe, ye abko kä bäri ütiäte känti namani täkänintbe Ngöbö küde ruenkri kä käinbiti sribi namani bare ie bä mikakäre.<sup>2</sup> Kä bäri kuin deme era metre kä käinbiti, ye känti tä blitaka ni diäre, ye abko ju blitakrä Ngöböbe nuäre ngwiandre\* nämame bää mike, akwa ju kä käinbiti ye abko ñan ni kä nebtäkwe mikani, akwa ni Dänkien Ngöbö ara jire käkwe mikani au abko känti Jesu tä blite Ngöböbe ni diäre.

<sup>3</sup> Nitre blitaka Ngöböbe ni mda mda diäre dänkien abko mikata jökrä Ngöböökwe jändrän biankäre Ngöböye amne jändrän kukwakäre Ngöböye ni ngite ütiäre, ye kwrere arato Jesu käkwe jändrän biandre Ngöböye ni ngite ütiäre arato abko erere ja biani kwe müre ketadre krusobtä.<sup>4</sup> Akwa Jesu tädre janknu kä nebtä, ye ngwane abko niara ñan rabadre blitaka Ngöböbe ni mda mda diäre, ñobtä ñan angwane ni blitaka Ngöböbe ni mda mda diäre därebare Levíkri tärä kwati, käta jändrän bien Ngöböye, Kukwe Biani Ngöböökwe Moiséye käta nuemna ietre ye kwrere.<sup>5</sup> Ju blitakrä Ngöböbe, känti nitre blitaka Ngöböbe ni mda mda diäre kä nebtä tä sribire. Ju ye abko käta jändrän kuin era metre kena kä käinbiti abko bää mike jirekäbe ye gare nie, ñobtä ñan angwane kira ju blitakrä Ngöböbe nuäre ngwiandre ye Moissés nikani mike angwane, Ngöböökwe mäträbare btä, käkwe niebare krörö ie: Ju mikadre ño, tikwe bää mikaba tuadre mae Ngítio Sinaibti, yebtä makwe töbika amne, ju bää tuaba makwe, ye kwrere makwe mika, niebare Ngöböökwe ie.<sup>6</sup> Akwa Jesu abko ni blitaka Ngöböbe ni mda mda diäre dänkien tä nikwe ye abko sribi bäri kuin biani ie Ngöböökwe amne, niara köböire Ngöböökwe kukwe mdara jire ükaninte btin nikrä abko bäri kuin kukwe ükaninte käne Ngöböökwe Moissés näire yekrä. Amne kukwe ükaninte btin, ye köböire abko jändrän bäri kuin köböi biani nie Ngöböökwe.

<sup>7</sup> Ngöböökwe kukwe ükaninte käne nitre israelitabe Moissés näire ye rabadre kuin täte jökrä, ye ngwane Ngöböökwe ñan kukwe mdara jire ükarete btin ben.<sup>8</sup> Akwa kukwe ükaninte käne Ngöböökwe nitre israelitabe abko btä kukwe namani kri, ñobtä ñan angwane ye köböire niaratre ñan namani kuin metre, namani tuen Ngöböye, aisetet Ngöböökwe niebare krörö abko tä tikani niara Kukweibtä:

Ni Dänkien Ngöbö käta niere krörö:

\* 8:2 ju blitakrä Ngöböbe nuäre ngwiandre. Ju ne abko kädianta tabernáculo suliare abko btä ma raba ñäke tärä Exodo 26-30.

Kä jatadi angwane, tikwe kukwe mdara jire ükadite btin nitre israelita Judá mräkä yebe amne nitre israelita mda mdabe.

<sup>9</sup> Tikwe kukwe ükadite btin mda, ye abko ñan rabadre kukwe ükaninte käne tikwe nitre israelita mräkä känökäne ben Moisés näire ye kwrere.

Nitre israelita nämane Egipto angwane, ngäbäkre rün käta ngäbäkre kaen küdebtí niara ngibiakäre,

ye kwrere tikwe nitre israelita kaba küdebtí, ti rikaba ngwenante juta Egipto bäre mento.

Ye ngwane tikwe kukwe ükateba bentre, akwa niaratre käkwe ti kukwei kitani temen amne, ñan mikani täte kwetre amne tikwe trö kwitaba ietre.

Akwa kukwe ükadite btin, ye abko ñan rabadre kukwe käne kwrere, niebare ni Dänkienkwe.

<sup>10</sup> Akwa yebti tikwe kukwe mdara jire ükadite btin nitre israelitabe abko krörö nieta ni Dänkienkwe:

Ti kukwei ñan käi rikwitadrekä jire btitre, ñobtä ñan angwane rabadi niaratre töite.

Ti rabadi Ngöbö jen niaratrekwe amne niaratre rabadi juta jen tikwe.

<sup>11</sup> Ye ngwane abko, ni ñan rabadi dirire jire chi mda ni kukwe mukoye amne ni mräkäye ni Dänkien mikakäre gare ietre, ñobtä ñan angwane ni ütiäte krikri amne ni ütiäte ñakare abko ie ti rabadi gare jökrä, aise ñan rabadi dirire jae kwärikwäri.

<sup>12</sup> Mdakäre abko, nitre ye käkwe ja mikani ngite kri ti rüere, ye abko tikwe diandikä jökrä mento btätre.

Amne ja mikani ngite kwetre, ye ñan rükadita töre jire chi tie, Jeremías 31.31-34 niebare kore ni Dänkienkwe. <sup>13</sup> Ye abko, Ngöböta kukwe mda btin ükete tä niere, ye ngwane kukwe ükaninte käne Moisés näire abko tä neme ütiäte ñakare nieta kwe amne, kukwe ütiäte ñakare tärä neme ngwarbe abko näin nenkä jötrö.

## 9

*Ju blitakrä Ngöböbe nuäre ngwiandre*

<sup>1</sup> Ye abko, kukwe ükaninte käne Ngöböökwe nämane angwane, Ngöbö mikadre ütiäte ño ño abko Ngöböökwe ükaninte ja täritäri. Kä ye ngwane abko kä nämane mikani jenena kä nebtä, känti Ngöbö käkitadrekä abko nämane ükaninte krörö: <sup>2</sup> Ju blitakrä Ngöböbe nuäre ngwiandre ye mikani angwane, namani ñäkänintbe ketebu ja täritäri abko krörö: känième jukwe ken abko Kä Deme nämane. Kä Deme ye känti abko ñotra grä nämane mikani amne mesa nämane kwati arato abko bti ban deme mikani Ngöbö ngwärekri.

<sup>3</sup> Angwane kä bäri gwi nämane ñäkänintbe dän kukwän getbo ötöbu bti abko kädian nämane Kä Bäri Deme. <sup>4</sup> Kä ye känti abko ñukwä grä orore kri ngwäri mnü rä bänne kukwakrä Ngöböye nämane amne kaja btä oro nämane ketaninkä bäre ta nämane yete abko Ngöböökwe kukwe ükaninte nitre israelitabe nämane bä mike. Erere arato, kaja orore ye teri abko kantra orore nämane mikani kwati. Kantra ye abko te mana nämane mikani. Mdakäre abko, kaja ye teri mökän Aarónkwe mu ngitianinkä\* btä abko nämane. Erere arato, jä btä Ngöböökwe ja Kukwei biani nuendre Moiséye ye nämane mikani arato kaja ye teri. <sup>5</sup> Angwane kaja käri ye känti Ngöbö nämane ni ngite denkä nibtä. Kaja käri yebti abko angele kä kerubine bä nämane mikani nibu abko nämane ngike metaninte ja ngäbti kwärikväri kaja käribti ta, ye abko Ngöbö ütiäte kri nämane yete abko nämane bä mike kore. Ye abko, kukwe tä kabre mda jändrän nebtä, akwa gwängwarbe ti ñan raba blite metre jökräbtä ja täritäri.

<sup>6</sup> Jändrän jökrä nämane ükaninte biare kore ju nuäre ngwiandre blitakrä Ngöböbe te, ye känti nitre blitaka Ngöböbe ni mda mda diäre tä nikken käre köbö kwatirekwatire kä ñäkänintbe kena gwi kädianta Kä Deme ye känti, sribi kwe nuenkäre Ngöbökrä. <sup>7</sup> Akwa kä ñäkänintbe ketebukäre kä teri gwi kädianta Kä Bäri Deme, kä ye känti abko nitre blitaka

\* <sup>9:4</sup> Mökän Aarónkwe mu ngitianinkä. Ngöböökwe mökän Aarónkwe mikani mu ngitiëkä, niarakwe Aarón dianinkä sribikä jakrä bä mikakäre. Ñäke Números 17.1-11 ye känti.

Ngöböbe ni mda mda diäre dänkien aibe tä niken batibe kä kwatirekwatire. Akwa tä niken kä ye känti angwane, jändrän därie jäta niken kwe metadrekä kaja yebti ta ja ngite ütiä biankrä Ngöböye amne ni mda mda tä ja mike ngite abko tä gain ñakare abko ütiä biankrä arato.<sup>8</sup> Kukwe kore ye mden köböire abko Ngöbö Üai Deme nämane kukwe krörö mike gare nie: Jesu ngämi nüke, känenkri ju blitakrä Ngöböbe känti kä deme tä käne yete, ye ngwane ji niken Kä Bäri Demente, känti Ngöböta abko tä dikani jite ni mda mda kräke.<sup>9-10</sup> Akwa kukwe ye abko tä kukwe bää mike jirekäbe nie kä ne ngwane abko krörö: Nitre israelita nämane nüke ju blitakrä Ngöböbe känti jändrän bien kämikakrä Ngöböye ja ngite ütiäre. Erere arato, kukwe nämane ükaninte kabre mröbtä amne jändrän ñadre yebtä ja mikakäredbe Ngöbö ngwärekri. Erere arato, nitre israelita nämane köbötike bätäkä ngwarbe amne nämane jüben bätäkä ngwarbe ja mikakäredbe Ngöbö ngwärekri. Ngöböökwe ükaninte nuendre, ye kwrere nuenbare nitre israelitakwe, akwa nitre Ngöbö mikaka ütiäte kore jae, ye tä ja ngrabare aibe mike dbe Ngöbö ngwärekri, ñobtä ñan angwane jändrän yebti Ngöbö ñan tä ni töi kwite, aisetetata nebe ruen ngite janknu ietre, aisetetata Ngöbö ngämi kukwe mda ükete btin, ye känenkri abko kukwe ye ütiäte.

### *Kristo därie bäri ütiäte Ngöbö ngwärekri*

<sup>11</sup> Akwa mtare Kristo nükanina. Niara köböire Ngöböökwe kukwe mda ükaninante btin, aisetetata niara abko ni blitaka Ngöböbe ni mda mda diäre dänkien nikrä amne jändrän kuinkuin tä nikrä Ngöböökwe, ye niara jatani bien nie. Erere arato, ju blitakrä Ngöböbe kä käinbti, ye känti niara nikani gwi sribire ni blitaka Ngöböbe ni mda mda diäre dänkien kwrere. Ju ye abra bäri kuin deme era metre ju blitakrä Ngöböbe kä nebtä ye ngwä. Ju kä käinbti ye ñan ni kä nebtäkwe mikani amne ñakare sribi ni kä nebtäkwe.<sup>12</sup> Mdakäre abko, Kä Bäri Deme te Kristo nikani, ye abko ñan nikani chibo amne nbi ngäbäli därie bien ni ngite ütiäre, nitre blitaka Ngöböbe ni mda mda diäre dänkien tä nuene kä nebtä ye kwrere, akwa niara krütani krusobtä batibe ni ngite ütiäre abko namani dbe amne ütiäte kri kärekäre Ngöbö ngwärekri. Ye köböire Kristo käkwe ni dianinantari kärekäre, yebti Kä Bäri Deme te Kristo nikani batibe, ñobtä ñan angwane sribi namani bare täte ie aisetetata.

<sup>13</sup> Ye abko, nitre israelita käta nbi kwane därie, chibo därie metekä ni ngite ngitebti. Erere arato, nbi möre kukuwata abko ngübrün metakata ni ngite ngitebti, ni ye ngite diankakäre mento btä, akwa ye abko käta ni ngite denkä ñakare jire chi mento ni yebtä, akwa tä ni ngrabare aibe mike dbe Ngöbö ngwärekri. Niaratre töi amne moto tä nebe käme janknu.<sup>14</sup> Jändrän ngwarbe ütiäte ni ngrabare aibe mikakrä dbe Ngöbö ngwärekri, akwa Kristo därie bäri ütiäte kri käkwe ni mikadre deme era metre Ngöbö ngwärekri, ñobtä ñan angwane Ngöbö Üai tä nire kärekäre ye köböire Kristo ara jire käkwe ja biani müre ketadre nikrä krusobtä. Kristo abko deme metre, ja mike ngite ñakare jire batibei Ngöbö rüere, käkwe ja biani Ngöböye ni ngite ütiäre. Ye mden kisete, kukwe kämekäme nuen nämane nikwe kä nämane niken ni ngwena Ngöbö okwä bäre mento, ye abko Kristo därie käta denkä jökrä ni töibtä amne Ngöbö nire nünanka kärekäre, ye kräke ni rabadre sribire, abkokäre Kristo därie käta ni mike deme Ngöbö ngwärekri.

<sup>15</sup> Ye mden kisete, kukwe ükaninte btin Ngöböökwe nibe, ye abko Jesukristo aibe käta mike ütiäte nikrä, käta ni mike ja mäketa Ngöböbe. Ni kärabare Ngöböökwe rabadre näne kärekäre ben, Ngöböökwe köböi mikani kore ietre ye kwrere, abkokäre Kristo abko ni mikaka ja mäketa Ngöböbe kukwe btin ye köböire. Ni jökrä käkwe ja mikani ngite kukwe ükaninte käne Ngöböökwe ye näire, akwa Kristo krütanina niaratre diäre, niaratre tikatekäre kukwe kämekäme nuenbare kwetre yebtä, aisetetata Ngöbö raba mike näne kärekäre jabe.

<sup>16</sup> Yebtä abko, ti bike kukwe bää mike krörö: Ngäbäkre rün käta tärä ükete jändrän jakwe dräikrä ngäbäkrebti. Ye abko ngäbäkre rün tä nire angwane, kukwe ükaninte täräbti ye ñakare ütiäte. Akwa ngäbäkre rün ye krütadre tä gare metre, ye ngwane batibe tärä ye rabadre ütiäte.<sup>17</sup> Ne aisetetata ni tärä ükatekä ye tä nire angwane, tärä ye ñan rabadre ütiäte, akwa krütadre angwane, batibe tärä ye rabadre ütiäte.<sup>18</sup> Ye

mden kisete, kira Ngöböökwe kukwe ükaninte käne nitre israelitabe angwane, kukwe ye rabadre ütiäte, abkokäre jändräñ gatadre abko därie käkwe kukwe ye mikani ütiäte. <sup>19</sup> Ne aisetet Ngöböökwe kukwe biani nuendre, ye Moisékwe niebare jökrä nitre israelitaye, bti obeja drüen dikani dänre bä tain Moisékwe diani kisete, käkwe hisopo krie küde ötaninkä krati, bti nbi amne chibo därie mritani ñöbe abko te Moisékwe hisopo küde amne dän bä tain ye mritaninkä, bti metaninkä kwe kukwe biani Ngöböökwe Moiséye yebti amne nitre israelitabti arato. <sup>20</sup> Angwane Moisékwe niebare ietre: Ngöböökwe kukwe ükaninte munbe, ye mden abko jändräñ därie ne köböire nibira ütiäte munkrä mtare, niebare kwe ietre. <sup>21</sup> Erere arato, ju blitakrä Ngöböökwe nuäre ngwiandre, yebti Moisékwe jändräñ därie metaninkä amne, jändräñ jökrä sribikrä ju yete abko bti jändräñ därie metaninkä kwe arato, <sup>22</sup> ñobtä ñan angwane bäsí jändräñ jire jökrä ye mikadredbe Ngöbö ngwärerekri jändräñ ngwarbe däriebti amne, jändräñ ñan kämikadre därie mikakäre nibtä ne ngwane, ni ngite diankaka ñakare nibtä abko Kukwe Biani Ngöböökwe Moiséye käta niere.

<sup>23</sup> Ne aisetet, ju blitakrä Ngöböökwe nuäre ngwiandre amne jändräñ mda tä ju yete abko jändräñ därie käta mikedbe Ngöbö ngwärerekri. Akwa ju blitakrä Ngöböökwe amne jändräñ mda mda tä ju yete, ye abko tä Ngöbö känti kä kainbti aibe bärä mike, akwa Ngöbö känti kä kainbti abko bärä ütiäte, aisetet jändräñ därie abko ñakare ütiäte jändräñ yekrä. Ye mden kisete, ni bärä ütiäte jändräñ yekrä abko därie aibe rabadre mikedbe Ngöbö ngwärerekri, <sup>24</sup> ñobtä ñan angwane ñan ju blitakrä Ngöböökwe nuäre ngwiandre sribebare ni kä nebtäkwe te Kristo nikani. Ju blitakrä Ngöböökwe nuäre ngwiandre kä nebtä ye abko jändräñ ño tä kä kainbti Ngöbö känti tä ükaninte ño abko bärä mikata jirekäbe nete, ñan ye kwrere te Kristo nikani, akwa Ngöbö kä kainbti ara jire, känti Kristo nikani, aisetet mtare Kristo tä Ngöbö ngwärerekri kä kainbti amne tä blite nikrä Ngöböökwe. <sup>25</sup> Angwane nitre blitaka Ngöböökwe ni mda mda diäre dänkien tä niken käre kä kwatirekwatire Kä Bäri Demente jändräñ jenena därie ngwena ni ngite ütiäre Ngöböye. Niara ñan tä ja därie ngwena ni ngite ütiäre Ngöböye. Ye kwrere Kristo ñan nikani kä kainbti ja mike müre ketadre bärä bärä ni ngite ütiäre. <sup>26</sup> Ye abko, jändräñ kämika nämane käre ni ngite ütiäre, ye kwrere Kristokwe nuendre, ye ngwane kä dätebare kena Ngöböökwe abti kä nüke mtare Kristo krütadre bärä bärä ni ngite diankakäre mento nibtä; akwa ye kwrere nakaninkä ñakare. Kä mrä ne ngwane Kristo nükani, käkwe ja biani müre ketadre batibe amne kärekäre rabai ütiäte Ngöbö ngwärerekri. Kristo ara jire käkwe ja biani müre ketadre au ni ngite diankakäre mento nibtä. <sup>27</sup> Ye abko, ni jökrä krütadre batibe abko ükaninte kore Ngöböökwe nikrä, abti kritobo tä kukwe ükete, ye kwrere Ngöböökwe kukwe ükadite nikrä. <sup>28</sup> Ye kwrere arato, Kristo käkwe ja biani müre ketadre batibe ni kwati ngite ye diankakäre mento btätre. Abti Kristo jatadita bobukäre kä nebtä angwane, ñan jatadita ni ngite diankakäreta nibtä akwa, nire nire tä ngibiare ngäbti, ye abko jatadi dentari.

## 10

### Kristo käkwe ja biani müre ketadre batibe

<sup>1</sup> Ye abko, ju blitakrä Ngöböökwe nuäre ngwiandre te jändräñ biandre ja ütiäre niebare Ngöböökwe Moiséye, ye abko jändräñ bärä kuin jatadre Kristo köböire abko bärä mike nämane, akwa jändräñ ye bärä aibe amne ñakare era metre. Ye mden kisete, nitre nämane nüke Ngöbö käkitakakäre ye nämane niken jändräñ arabe bien kämikadre janknu kä kwatirekwatire ja ngite ütiäre Ngöböye. Jändräñ kämikaní ye ñan raba ni ye mike metre Ngöbö ngwärerekri. <sup>2</sup> Ye abko, jändräñ nuenta ja ngite ütiäre ju blitakrä Ngöböökwe te, ye käkwe ni ngite diandrekä mento nibtä era metre, ye ngwane nitre Ngöbö käkitakaka nämane jändräñ bien kämikakrä kore, ye ñan biandre kwetre ja täritäri ja ngite ütiäre, ñobtä ñan angwane niaratre ñan rabadre ngite mda Ngöbö ngwärerekri amne ja ñan rabadre ruen ngite jire chi mda ietre. <sup>3</sup> Akwa jändräñ bianta kämikadre ja ngite ütiäre Ngöböye, ye abko niaratre tä ja mike ngite Ngöbö rüere abko tä miketa töre ietre kä kwatirekwatire. <sup>4</sup> Niaratre tä nuene kore, ñobtä ñan angwane nbi kwane därie amne

chibo därie ye abko ñan raba ni ngite denkä jire chi mento nibtä, aisetet jata nebe ruen ngite janknu ietre. <sup>5</sup> Ye mden kisete, Kristo jatani nüke kä nebtä angwane, niebare kwe Ngöböye abko tä tikani Ngöbö Kukweibta abko krörö:

Jändrän ngwarbe kämikata makrä amne nura ngwä bianta makrä, ni ngite diankakäre mento btä, ie ma ñan tö, aisetet makwe ti mikani därrere ni kä nebtä kwrere.

<sup>6</sup> Erere arato, jändrän kukwani makrä amne jändrän kämikani makrä ni ngite diankakäre mento btä, ye abko käi namani nuäre ñakare mabtä.

<sup>7</sup> Abtä tikwe nieba krörö mae:

Ma kukwei tä tikani ño tibtä, ye kwrere tita nete ma kukwei mikakäre täte Ngöbö,  
*Salmos 40.6-8*

niebare Kristokwe Ngöböye. <sup>8</sup> Kukwe Biani Ngöböökwe Moiséye ye käta jändrän ngwarbe kämikamna biandre Ngöböye, akwa kukwe yebtä Kristokwe niebare Ngöböye: Jändrän ngwarbe kämikata mae amne nura ngwä bianta, ye abko ie ma ñan tö amne käi namani nuäre ñakare mabtä. Erere arato, jändrän ngwarbe kukwata mae ni ngite diankakäre btä, ye abko ie ma ñan tö, niebare Kristokwe. <sup>9</sup> Yebti niebare krörö mda kwe Ngöböye: Ma kukwei tä tikani ño tibtä, ye kwrere tita nete ma kukwei mikakäre täte Ngöbö, niebare Kristokwe. Ne aisetet kukwe ükaninte käne, ye abko Ngöböökwe dianinkä mento abko täte kukwe mda btin ükaninte kwe. <sup>10</sup> Jesukristo kákwe Ngöbö kukwei mikani täte, ja biani müre ketadre au kwe ni ngite diankakäre mento nibtä, ye mden köböire abko Ngöböökwe ni mikani deme ja ngwärekri, ñobtä ñan angwane Jesukristo krütani batibe amne ye abko ütiäte kärekäre.

<sup>11</sup> Akwa kukwe ükaninte käne Ngöböökwe, yebti abko nitre blitaka Ngöböbe ni mda mda diäre tä nünaninkä krö\* sribi kwe nuene Ngöbökrä köbö kwatirekwatire. Köbö kwatirekwatire jändrän kämikata kwetre ja täritäri, akwa jändrän ye ja kwrere jökrä amne di ñakare jire chi ni ngite denkä mento nibtä. <sup>12</sup> Akwa Jesukristo abko kákwe ja biani müre ketadre batibe ni ngite ütiä bianta amne ye rabai ütiäte kärekäre. Yebti nikaninta kä käinbti amne, kä bäri ütiäte känti namani täkänintbe Ngöbö küde ruenkri sribi namani bare täte ie bä mikakäre. <sup>13</sup> Ye känti abko Ngöböökwe Jesukristo rüe mikadi jökrä niara ngoto täni abko tä ngibiare, <sup>14</sup> ñobtä ñan angwane Jesukristo kákwe ja biani müre ketadre batibe, ye köböire abko nire nire mikata deme bätärekä ja täritäri Ngöböökwe ye abko Kristo mikani metre Ngöbö ngwärekri amne rabai metre kärekäre.

<sup>15</sup> Kukwe ye abko era abko Ngöbö Üai Deme käta niere nie arato Ngöbö Kukweibta abko krörö:

<sup>16</sup> Akwa yebti kukwe rabadi ükaninte btin krörö nieta ni Dänkienkwe:

Ti kukwei ñan käi rikwitadrekä jire btitre, ñobtä ñan angwane rabadi niaratre töite.

<sup>17</sup> Amne niaratre kákwe ja mikani ngite ti rüere, kákwe kukwe käme nuenbare ti rüere,  
ye ñan rükadita töre jire chi mda tie,

*Jeremías 31.33,34*

niebare Ngöböökwe. <sup>18</sup> Ye mden kisete, Ngöböta ni ngite denkä mento nibtä, aisetet jändrän ñakare jire chi mda biandre kämikakrä Ngöböye ja ngite ütiäre.

### Nünandrekä dite jabta

<sup>19</sup> Ne aisetet ti mräkätre, mtare Jesu krütani, därie nimianinte nikrä, yebti Kä Bäri Deme Ngöbö känti, ye känti kä jürä ñakare jire chi nibtä niken rabakäre Ngöböbe, ñobtä ñan angwane Ngöböökwe kä biani nie niken niara känti. <sup>20</sup> Ni raba niken nebe Ngöbö känti Kä Bäri Deme te, ñobtä ñan angwane Jesu kákwe ji tikaninta btin ni käne nebe Ngöbö känti amne ni rikadre ji yebti Jesube angwane, nikwe nünandi kärekäre Ngöböbe. Ye abko, dän kukwän ngetbo nämane mikani jite Kä Deme amne Kä Bäri Deme ye ötöbu ta, ye känti ta Kristokwe ji tikani ni käne nebe Ngöbö känti. Dän kukwän te ta Jesu nikani abko niara ngrabare ara jire. Niara krütani, ye ngwane ji tikani kwe nikrä. <sup>21</sup> Amne ni Blitaka Ngöböbe Ni Mda Mda Diäre kri tä nikwe käta ni jen Ngöböökwe ngibiarebti. <sup>22</sup> Ne aisetet, ja töi metreberti amne tödekabtä kwatibe Ngöböbti, ari krötö ja ken Ngöböbe, ñobtä

\* 10:11 nünaninkä krö. Nitre blitaka Ngöböbe ni mda mda diäre nämane nünaninkä krö sribi nuenkäre, ye abko käta sribi ngämi nebe bare ietre bä mike.

ñan angwane Jesukristo kákwe ja därie metaninkä ni töi kämenbti, ye kákwe ni mikanina deme. Nitre blitaka Ngöböbe ni mda mda diäre nämene jüben nänrä Ngöbö känti, ye kwrere Jesukristo kákwe ni ngrabare jükaninante, aisetet ari krötö Ngöbö ken. <sup>23</sup> Mdakäre abko, Ngöböökwe jäandrän köböi mikani nie abko ngibiare ngäbti, yebtä ari nünenkä dite jadtä, ñobtä ñan angwane Ngöböökwe ja kukwei mikadi täte metre, aisetet jäandrän köböi mikani kwe, ye erere rabadi bare, aisetet nikwe ñan ja töi mikadre ngwarbe kwäräkwärä amne nikwe tödekadre kwatibe Ngöböbti. <sup>24</sup> Erere arato, ari ja kite ja tarere kwärikwäri amne sribi kuin nuene jakrä kwärikwäri. <sup>25</sup> Mdakäre abko, nitre tödekaka Jesubti käta gätäre abko känti ni ruäre ñan tä kwen gätäbtä, ye kwrere nikwe ñan nuendre, akwa Jesukristo ni Dänkien jatadita abko köböi nükerate ja ken, ye gadre nikwe angwane, ari ja ükekrö bäri gätäbtä amne, ari ja die mike kwärikväri näin gätäbtä.

<sup>26</sup> Nikwe kukwe ye mikadre täte, ñobtä ñan angwane Ngöbö Kukwei era metre Jesubtä garera nie, yebti ta ni tädre ja mike ngite janknu ja töi jenbti Ngöbö rüere, ye ngwane jäandrän mda ñakare jire kämikadre Ngöböye ni ngite diankakäre mento nibtä abko rabadre ütiäte Ngöbökrä. <sup>27</sup> Akwa Ngöböökwe kukwe ükadite tare krübäte rüekrä abko köböi mikani kwe ietre, ye aibe ni rabadre ngibiare, ñobtä ñan angwane ñukwā jutra krikri käta jäandrän jökrä gaenkä, ye kwrere jire Ngöböökwe niara rüe gadikä jökrä ja dokwäre. <sup>28</sup> Ye abko, Kukwe Biani Ngöböökwe Moiséye abko nire nire kákwe kitani temen amne, niarakwe ja mikani ngite bkänä kukwe ye rüere abko ni nibu ya o ni nimä kákwe niara tuani nuene kore niedre kwetre rüere, ye ngwane ni ye ñan namani nebe ruentari tare, akwa kitani ngise kämikadre. <sup>29</sup> Se abko ni Ngöbö Odei bäri ütiäte kri ye mikaka ngwarbe jae ni mda mda okwäbti, käta mike ütiäte ñakare amne Ngöbö Odei därie deme, mdenbti Ngöböökwe kukwe ükaninte btin nibe, därie ye mikata ütiäte ñakare kwe, ¿ye dokwäre abko Ngöböökwe ñan ni mikadre ja ngie nuen bäri kri krübäte abko munta nütüre ya? Erere arato Ngöbö Üai ni tarekä abko ni ye tä mike ngwarbe, ¿ye dokwäre abko Ngöböökwe ñan ni mikadre ja ngie nuen bäri kri krübäte abko munta nütüre ya?

<sup>30</sup> Ngöböökwe ni mikadre ja ngie nuen ye gare nie, ñobtä ñan angwane ni Dänkien Ngöbö kákwe niebare krörö abko tä tikani niara Kukweibtä:

Ti ara jire kákwe ni mda mda mikadi ja ngie nuen ja dokwäre,  
niebare Ngöböökwe. Bärire mda abko, niebare krörö mda kwe:

*Deuteronomio 32.35*

Ni Dänkien Ngöbö kákwe kukwe ükadite juta jen kwe kräke angwane, mikadi ja ngie nuen

kwe,

*Deuteronomio 32.36*  
niebare kwe. <sup>31</sup> Ne aisetet Ngöbö nire moto rabadre romon nikrä kákwe ni mikadre ja ngie nuen ja dokwäre, ye ngwane jni bobre jakän!

<sup>32</sup> Kukwe kore ñan rakadrekä munbtä, abkokäre mun jatani tödeke krire kena Kristobti angwane, kukwe nakaninkä krörö munbtä, ye munkwe ngwianta töre jae ja die mikakäre nünanbtä dite Kristokrä: Munkwe ja tare nikani kri kena tödekaabtä Kristobti, akwa munkwe nünankabare dite jadtä. <sup>33</sup> Angwane mun ruäre abko ie ñäkäbare kämekäme amne taretare ni kwati ngwärekri amne, mun ruäre abko metani ni jökrä ngwärekri arato. Erere arato, ni ruäre nämene ja tare nike kore abko ben mun ruäre abko namani nekete jakri die mikakäre. <sup>34</sup> Mdakäre abko, nitre tödekaka Jesubti kitani ngite kä teri ye abko namani ruentari tare munye amne, munkwe die mikani, ye munkwe ngwianta töre jae. Erere arato, tödekaabtä Jesubti jäandrän jen munkwe abko dianinkä munkän, akwa munkwe rübare ñakare dokwäre amne kä namani bäri nuäre munbtä. Ye ñobtä ñan angwane jäandrän bäri kuin, nikken ngwarbe ñakare tä kä käinbti munkwe abko namani gare munye, aisetet mun namani jáme, ye abko munkwe ngwianta töre jae arato.

<sup>35</sup> Ne aisetet, Jesuta mun tarere amne, jatadita mun ngwiankäre kä käinbti tä gare metre munye, ye abko munkwe ñan kita temen, akwa munkwe tödeka kwatibe janknu bti, ñobtä ñan angwane ye ütiäre abko Ngöböökwe jäandrän kuin biandi kri munye. <sup>36</sup> Ye abko, Ngöböökwe jäandrän kuin köböi mikani munye, ye rükadre mun kisete, abkokäre munkwe nünandrekä dite bätärekä janknu ja tare nikakäre tödekaabtä Jesubti, <sup>37</sup> ñobtä ñan angwane Ngöbö Kukwei käta niere krörö Jesubtä:

Ni juandre Ngöböökwe ye abko gwängwarbe kebera nüke.  
Kä ñan kitadre raire ta kwe, aisetet rükadi jötrö.

<sup>38</sup> Amne ni deme tikwe käta tödeke kwatibe tibti amne ñan ti rükandite kwe, akwa nire nire kákwe trö kwitadreta tie, ye abko kai rabadi nuäre ñakare tibta, *Habacuc 2.3-4*

nieta kore Ngöbö Kukweibta. <sup>39</sup> Akwa ni abko ñan tä rikakäreta ja jiebti, aisetet Ngöböökwe ñan ni gadrekä, akwa ni abko tödekaka Jesubti, aisetet ni ne abko rabadi dianintari nünakäre kärekäre Ngöböbe.

## 11

### *Tödeka Ngöböbti abko bări ütiäte kri*

<sup>1</sup> Tödeka ye abko jändrän ngibiata nikwe abko erere rükadi ni kisete abko nita mike era jae amne, jändrän tuen ñakare nie, akwa jändrän ye abko tärä era metre tä nebe ruen nie. <sup>2</sup> Ye abko, ni mräkä kirakira kákwe tödekani kore Ngöböbti, ye namani tuen kuin Ngöböye abko Ngöböökwe niebare.

<sup>3</sup> Erere arato, nita tödeke kwatibe Ngöböbti aibe köböire Ngöböökwe kä käinta btä kä tementa dätebare ja kukweibti abko tä nüke gare nie. Akwa jändrän tuen ñakare nie abkobti Ngöböökwe kä käinta amne kä temen dätebare, ye abko tä nüke gare nie, nita tödeke Ngöböbti angwane.

<sup>4</sup> Mdakäre abko, Abel kákwe tödekani kwatibe Ngöböbti, aisetet jändrän bări kuin biani kwe Ngöböye etba Caín ye ngwá. Jändrän biani Abelikwe Ngöböye, ye Ngöböökwe kani ngäbti amne kuin niebare kwe btä. Angwane Abel nämene tödeke Ngöböbti, ye namani tuen kuin Ngöböye abko Ngöböökwe niebare. Ye abko, Abel krütanina, akwa tödekani kwatibe Ngöböbti kwe, yebtä abko kädrie tä mtare. <sup>5</sup> Enoc abko kákwe tödekani Ngöböbti, ye köböire abko Ngöbö nikani ngwena nire kä käinbt, aisetet batibe ñan kwani nitre nünanka yete yeye, ñobtä ñan angwane Ngöbö nikani ngwena nire kore. Ngöbö ngämi niken Enoc ngwena kä käinbt, känenkri Enokwe tödekani Ngöböbti, ye abko kai namani nuäre Ngöböbtä abko nieta Ngöbö Kukweibta. <sup>6</sup> Ye abko, nita tödeke ñakare Ngöböbti angwane, ni ñan raba Ngöbö moto mike nuäre jire chi, ñobtä ñan angwane ni ngämi krötö Ngöbö ken, känenkri abko Ngöbö tärä, ye abko nikwe mikadre era, abti nikwe krötadre Ngöbö ken, amne nita niara känene abko ütiä biandi kwe nie, kákwe ni kadre ngäbti abko rabadre era nikrä arato.

<sup>7</sup> Ngöböökwe ni jökrä gadrekä ñöte abko Ngöböökwe niebare Noéye angwane, Ngöbö ngämi nuene, akwa Noé nämene Ngöbö deme ye jürä ngwen jabta, kákwe ru sribebare mräkä kwekwe diantarikrä, ñobtä ñan angwane Noé abko kákwe tödekani kwatibe Ngöböbti. Noé kákwe tödekani Ngöbö kukweibti, ye köböire abko ni mda mda gadrekä Ngöböökwe abko niarakwe mikani gare ietre amne, tödekabta Ngöböbti Noé namani tuen metre Ngöbö ngwärekri, niebare Ngöböökwe.

<sup>8</sup> Abraham abko Ngöböökwe käräbare nüne Canaán angwane, Ngöbö kukwei mikani täte kwe, aisetet kä biandre Ngöböökwe ie, ye känti nikani ñobtä ñan angwane tödekani Ngöböbti kwe. Mden kisete nämene nüne, ye känti kä mikaninkä kwe, btí rikadre mdente ñan nämene gare ie, akwa nikani. <sup>9</sup> Erere arato, Abraham nämene tödeke Ngöböbti, aisetet Ngöböökwe kä köböi mikani ie, ye känti nünabare ni menteni kwrere kwe ju nuäre ngwiandre te. Isaac amne Jacob, ie Ngöböökwe kä ye köböi mikani ja kwrere Abrahambe arato, kákwe nünabare ju nuäre ngwiandre te arato. <sup>10</sup> Abraham kákwe nünabare kore, ñobtä ñan angwane juta mikani Ngöböökwe abko te tö namani näin nüne kärekäre Ngöböbe abko nämene ngibiare. Juta ye abko Ngöbö ara jire kákwe mikanintbe amne Ngöbö ara kákwe juta ye mikani abko Abraham nämene ngibiare.

<sup>11</sup> Mdakäre abko, Sara namanina kise mriani jabta amne Abraham abko namanina unsunine, akwa Ngöböökwe ngäbäkre köböi mikani ietre, yebti tödekani kwatibe kwe-tre abko köböire ngäbäkre Isaac därebare kwetre Ngöbö diebti, ñobtä ñan angwane Ngöböökwe ngäbäkre köböi mikani ietre, ye erere Ngöböökwe ja kukwei mikadre täte jökrä,

yebti tödekani kwetre, aisetē ngäbäkre namani kwetre. <sup>12</sup> Abraham namanina unsunine amne di ñan namanina ngäbäkre ngibiare, akwa Ngöböökwe ngäbäkre köböi mikani ie, ye köböire abko Abraham ngäbriänkä namani kwati krübäte ja täritäri muke käinta se kwrere amne üman mren köräbare kwrere, aisetē ñan raba tanre.

<sup>13</sup> Nitre ye abko krütani jökrä angwane, jäandrän köböi mikani ietre Ngöböökwe, ye tuani ñakare ja kisete kwetre, akwa tödekani janknu Ngöbööti kwetre. Ye köböire abko jäandrän köböi mikani ietre, ye namani era kräke amne kani ngäbti kwetre. Niaratre nämene nüne ni menteni kwrere amne, nämene nüne jötrö kä nebtä abko niebare jabtä kwetre ni mda mdaye. <sup>14</sup> Nire nire kukwe niekä kore ye abko tä kä mda känene Ngöbö känti nünankrä jae abko bää mikata jabtä kwetre. <sup>15</sup> Nitre ye töi tätre kä jakwe aibebtä, akräke nämene nüne käne ye känti rikareta, akwa ñan nikaninta, <sup>16</sup> ñobtä ñan angwane kä bäri kuin, ie niaratre tö namani amne, kä bäri kuin ye abko tä Ngöbö känti kä käinbti. Ye mden kisete, nitre ye nämene Ngöbö tikwe niere Ngöböye, yebtä Ngöbö nämene ja gaire ñakare, ñobtä ñan angwane juta namanina ükaninte biare kräke Ngöböökwe.

<sup>17</sup> Abraham abko kákwe tödekadre janknu Ngöbööti ya, ñakare ya, ye abko Ngöbö tö namani gai, aisetē Abraham ngobo itibe Isaac abko Ngöböökwe müre ketamna ie. Abraham namani biare ngobo itibe müre kete, ñobtä ñan angwane niarakwe tödekani kwatibe Ngöbööti. Ngöböökwe Isaac köböi mikani Abrahamye amne, <sup>18</sup> Isaakri Abraham ngäbriänkä rabadi kwati Ngöböökwe niebare ie, akwa nikani ngobo müre kete, <sup>19</sup> ñobtä ñan angwane Ngöbö di nämene ni krütani mikakäreta nire, erere ngobo kwe mikadreta nire kwe nämene gare ie, aisetē nikani ngobo ngwena müre ketadre angwane, ni krütani rükata nire, kwrere jire Isaac namaninta nire Abraham kisete, Ngöböökwe Isaac kämikamna ñakare ie angwane.

<sup>20</sup> Abti Isaac abko kákwe tödekani Ngöbööti, aisetē dre dre rakadrekä ngäbriänkä Jacobobtä amne Esaúbtä niara tähti, yebtä ja di biani kwe ietre.

<sup>21</sup> Abti Jacob kebera krüte angwane, niara nämene tödeke Ngöbööti, köböire ja di biani kwe José ngobo nibu yeye. Angwane namani gitaninkä mökänbti, kákwe Ngöbö käkitaninkä.

<sup>22</sup> Abti José abko jatanina krüte angwane, Ngöbö rikadre nitre israelita ngwenante Egipto bäre mento nebebe Canaán, niebare kwe mräkäye. Angwane José kroko järíkadreta doboi mikadre ja käite Canaán, yebtä abko kukwe ükaninte kwe arato, ñobtä ñan angwane nämene tödeke Ngöbööti.

<sup>23</sup> Abti Moisés abko därebare angwane, meye amne rün kákwe rükaninte sö krämä Faraón ngäniene, ñobtä ñan angwane niaratre nämene tödeke Ngöbööti. Faraón kákwe ngäbäkre brare brare nitre israelitakwe kämikamna jökrä, ye ngwane Moisés därebare. Akwa Moisés abko namani tuen bää nuäre meyeye amne rünye, abtä Faraón jürä namani ñakare Moisés meyebtä amne rünbtä, kákwe Moisés rükaninte, ñobtä ñan angwane nämene tödeke Ngöbööti.

<sup>24</sup> Abti Moisés abko namanina ünän angwane, ñan tö namani rabai Faraón ngänkän ngobo kwrere mda, ñobtä ñan angwane nämene tödeke Ngöbööti. <sup>25</sup> Erere arato, kä ngwian nuäre jabtä ja mikakäre ngite Ngöbö rüere Faraón känti, ye mikani ütiäte ñakare kwe jae amne bäri tö namani ja tare nikai mräkä israelita ben gwaire. <sup>26</sup> Mdakäre abko, Kristo rabadre mikani ütiäte, abkokäre Moisés rabadre tuen ngwarbe ni mda mdaye, ye Moisés tö namani bäri, aisetē jäandrän kuinkuin ütiäte krikri Egipto yete, ye namani ütiäte ñakare kräke, ñobtä ñan angwane Ngöböökwe jäandrän bäri kuin biandre ie tödekabtä Ngöbööti, yebtä Moisés töi nämene. <sup>27</sup> Erere arato, Moisés nämene Egipto angwane nämene tödeke Ngöbööti, köböire nikani nitre israelita mda mda ngwenante Egipto bäre mento angwane, Faraón mätä namani btä, ye jürä ngwiani ñakare kwe, aisetē Ngöbö tuen ñakare, akwa yebtä ja töi mikani kwe amne ja ñan namani ruen naente ie amne nikani janknu mentokwäre Egipto bäre mento. <sup>28</sup> Erere arato, Moisékwe Pascua nuenbare amne jäandrän därie metakamna jukwebtä kwe nitre israelitareye, ñobtä ñan angwane Moisés nämene tödeke Ngöbööti, aisetē jäandrän därie metakamna jukwebtä

kwe, angele ni kämikaka kákwe ñan nitre israelita ngobo mubai kämikadre jire iti abkokäre.

<sup>29</sup> Yebti nitre israelita abko nikani Mren Tainte ta angwane, kä namani nötare känti ta nikani, ñobtä ñan angwane nämane tödeke Ngöböbtı; akwa nitre Egiptobo nikani Mren Tainte ta nitre israelita jiebti angwane, ñö nikaninta jökrä täte kákwe müre ketani jökrä.

<sup>30</sup> Abti ki mikani juta Jericóbtı abko bäre nitre israelita kákwe dikakabare köbö kükü angwane, Ngöbökwę ki ye juani jökrä temen, ñobtä ñan angwane niaratre nämane tödeke Ngöböbtı aiseete.

<sup>31</sup> Erere arato, juta Jericó yete abko nitre israelita jananbare kä tuenbtı tiebe angwane, meri iti bti kä ngwarbe nämane nüne yete kädian nämane Rahab. Rahab abko kákwe tödekani Ngöböbtı, aiseete nitre kä tuabtikä ye kani ngäbti kuin kwe, aiseete nitre nünanka juta Jericóte ye kämikani nitre israelitakwe angwane, meri Rahab ye abko kämikani ñakare kwetre ni mda mda ben gware.

<sup>32</sup> Ne abko, nitre mda mda kákwe tödekani Ngöböbtı, yebtä abko tikwe blitadre ja täritäri jökrä, ye ngwane kä ñan rabadre täte tie blitakrä btä. Tikwe blitadre Gedeónbtä, Barabtä, Sansónbtä, Jeftébtä, Davibtä, Samuelbtä amne ni mda mda Ngöbö kukwei niekä yebtä angwane, kä ñan rabadre täte tie blitakrä btä. <sup>33</sup> Ni ruäre kákwe tödekani Ngöböbtı, köböire kä dianinkä kwetre ni mda mdakän rübtä. Ruäre abko kákwe kukwe ükaninte kuin metre ni mda mdakrä amne jändrän köböi biani Ngöbökwę nükani ni ruäre kisete, ñobtä ñan angwane nämane tödeke Ngöböbtı. Ni ruäre abko kákwe lion kada ketani, ñobtä ñan angwane nämane tödeke Ngöböbtı. <sup>34</sup> Erere arato, ni ruäre kákwe tödekani Ngöböbtı abko köböire ñukwä jutra krübäte ötaninte kwetre amne, ni ruäre abko kämika tö namani ngitrabti angwane kwäräbebare kwetre, tödeka Ngöböbtı ye köböire. Erere arato, ni ruäre di jatani krüte rübtä, akwa tödeka Ngöböbtı, ye köböire Ngöbökwę mikaninta dite, kákwe rüe ganainbare kwäräbe rübtä.

<sup>35</sup> Mdakäre abko, meri ruäre kákwe tödekani Ngöböbtı abko köböire mräkä krütanikrütani abko Ngöbökwę mikaninta nire. Ni ruäre abko nämane tödeke Ngöböbtı, aiseete mika nämane ja tare nike angwane, ñan tikadreteta, ie tö namani, ñobtä ñan angwane Ngöbökwę niaratre mikadita nire bobuta abko rabadre bari kuin nämane nütüre, aiseete nämane biare krüte. <sup>36</sup> Amne ni mda abko mikani yakrä jae tödektä Ngöböbtı amne kwata metani amne mäkäninte kadenanbtı, bti kitani ngite kä teri, ñobtä ñan angwane nämane tödeke Ngöböbtı. <sup>37</sup> Ni mda abko nämane tödeke Ngöböbtı, aiseete kämikani jäbti amne, ni mda abko tikaninkä ötöbu ta sierrabti amne ni mda abko kämikani ngitrabti tödeka dokwäre Ngöböbtı. Amne ni mda abko nämane nüne bobre, kä nämane obeja amne chibo kwata aibe kite jadtä abko te nämane dikekä nekwäre sekwäre abko nämane ja tare nike amne nämane moto ulire, tödeka Ngöböbtı dokwäre. <sup>38</sup> Nitre ye abko bari ütiäte nitre Ngöbö rüe ye ngwä. Niaratre kákwe nünabare kä ketareketare te kä kaibete amne nämane nüne ngitio bäre temen. Erere arato, nämane nüne jäkwata mkäte amne kä mkä mda mdate kwäräkwärä, akwa niaratre jökrä nämane tödeke Ngöböbtı.

<sup>39</sup> Akwa Ngöbökwę jändrän köböi mikani, ye nitre tödekaka Ngöböbtı nünanka Jesu känenkri ye kákwe ñan tuani jire ja kisete, akwa nämane tödeke janknu Ngöböbtı, yebtä abko nämane ütiäte kri Ngöbökrä. <sup>40</sup> Ye abko, Ngöbökwę jändrän bari kuin köböi mikani nikrä Kristo köböire, ñobtä ñan angwane ni aibe ben gware Ngöbö tö namani ni tödekaka bti nünanka kira ye mikai metre abko köböi mikani kwe.

## 12

### *Ngöbota ngäbriänkä kwe kwe töi den*

<sup>1</sup> Kore ni kwati kákwe tödekani era metre Ngöböbtı ni känenkri. Ni ye abko käta ni die mike nüne Kristo kräke. Ye aiseete ni yebtä ari töbike amne jändrän jökrä käta ni drätäkekä amne kukwe kämekäme Ngöbö rüere te nita nibrente, ye abko ari kite jökrä temen, bti kä kuin kukwäre nita neen, ye kukwäre ari ja die mike bari niare janknu.

<sup>2</sup> Akwa nita tödeke Ngöböbtı ye abko tä kite Jesu köböire amne Jesu ara jire kákwe ni

mikadi tödeke bäri kuin metre Ngöböbti, aisetet Jesu yebtä ari ja okwä mike kwatibe. Jesu abko müre ketani krusobtä angwane, namani ja gaire ñakare krütabtä nikrä krusobtä, ñobtä ñan angwane Jesu käkwe ja tare nikadre, yebti kä rabadreta bäri nuäre krübäte btä kä käinbti namanina gare ie, aisetet namani biare ja tare nike. Ye erere bkänä, Ngöbö nikani Jesu ngwenante kä käinbti amne namani täkänintbe kürä gobrankrä Ngöböökwe ye küde ruenkri sete, ye abko Jesukwe sribi nuenbare täte jökrä abko tä bä mike.

<sup>3</sup> Ne aisetet nitre kukwe kämekäme nuenkä kisete Jesu käkwe ja tare nikani kri kore, yebtä munkwe töbika kuin ja käne, ñobtä ñan angwane ja tare nikadre ño abko Jesukwe bä mikana nie. Mun ñan rabadre dräre amne mun ñan di krütadre ja tare nikabtä, abkokäre munkwe töbikadre Jesubtä. <sup>4</sup> Ye abko, mutta rüre kukwe kämekäme rüere nünakäre deme Ngöbökrä gare tie, akwa mun ngämi krüte jire iti rübtä kukwe kämekäme rüere. <sup>5</sup> Mutta ja tare nike, akwa Ngöbö Kukwei tä tikani munbtä abko raba mun moto miketa nuäre, ye käi nikwitaninkä munbti. Mun abko Ngöbö ngäbriänkä abko Ngöbö Kukwei tä niere krörö:

Ti ngobo tikwe, ni Dänkien käta mäträre munbtä, ngäbäkre jakwe kwrere, ye munkwe ñan mika ngwarbe jae.

Amne ni Dänkien käkwe mun ka olobti, yebtä mun ñan di krüta nünanbtä niarakrä, <sup>6</sup> ñobtä ñan angwane nire nire tareta ni Dänkienkwe, yebtä abko tä mäträre,

amne nire nire kata ngäbti ja ngobo kwrere kwe abko tä kaen olobti, *Proverbios 3.11-12*

abko nieta Ngöbö Kukweibtä.

<sup>7</sup> Ne aisetet mutta ja tare nike tödekabtä Jesubti, ye abko mäträta kore Ngöböökwe raba gare munye, ñobtä ñan angwane Ngöböta mun kaen ngäbti ja ngobo kwrere, aisetet tä mäträre kore munbtä. ¿Mun ñan tä mäträre ngäbäkre munkwebtä ya? Jänri. <sup>8</sup> Ne aisetet ni jökrä Ngöbö ngäbriänkäre abko btä Ngöböta mäträre. Ngöböta mäträre ñakare munbtä, ye ngwane mun ñakare Ngöbö ngäbriänkä era metre. <sup>9</sup> Bärire mda abko, ni nämane kiakia ngäbäkrere angwane, ni rün kä nebtä nämane mäträre nibtä, kä nämane ni kaen olobti, abtä ni nämane mike ütiäte jae. ¿Se abko ni Rün käta mäträre nibtä amne tä ni kaen olobti ni mikakäre nüne kärekäre jabe abko nikwe ñan mikadre ütiäte jae ya? Jänri, niara bäri mikadre ütiäte jae nikwe! <sup>10</sup> Ñobtä ñan angwane nita nüne jötrö kä nebtä, akwa ni rün nikwe nämane mäträre nibtä amne nämane ni kaen olobti jändrän mdan mden nämane nebe tuendbe ie, ye erere nämane mäträre nibtä. Akwa Ngöböta mäträre nibtä, käta ni kaen olobti, ye abko bäri kuin amne ütiäte nikrä, ñobtä ñan angwane ye köböire abko ni rabadre deme Ngöbö kwrere. <sup>11</sup> Ni mda tä mäträre nibtä, käta ni kaen olobti, ye näire abko tä nebe tuen tare nie bkänä, akwa kukwe btä mäträta nibtä ye tä nüke gare era metre nie angwane, tä ni die mike nüne era metre amne kuin jämä Ngöbö ngwärekri. Ne aisetet mäträta nibtä amne ni kata olobti, ye abko kuin nikrä.

<sup>12</sup> Ne aisetet nire nire küde tä nebe dräre ie amne ngüreta nebe di ñakare ie, ye kwrere mun di kitera krüte ja tare nikabtä ne ngwane, ja di miketa munkwe amne, <sup>13</sup> ji ükete kuin metre ja käne munkwe, ye köböire ni mda mda ngüre bren ie, kisete tä näin ni nakwente kwrere ye abko ngüre rabadreta kuin metre dikekä amne ñan di krütadre, abkokäre munkwe ja di mikata näin janknu Jesube.

### *Ñan trö kwitadre Ngöböye*

<sup>14</sup> Mdakäre abko, munkwe ja töi mika kwatibe nünakäre jämä ni jökrä ben amne munkwe ja töi mika kwatibe nünakäre deme Ngöbökrä, ñobtä ñan angwane nikwe ñan nünandre deme, ye ngwane nikwe ñan ja tuadre ni Dänkienbe. <sup>15</sup> Erere arato, Ngöböta ja moto mike kuin munkrä, yebti mun ñan rabadrete jire iti, abkokäre munkwe ja ngibia. Erere arato, nane ni ruäre moto romon krübäte dikaro ni mdakrä, ye ngäniene munkwe ja ngibia kwärikwäri, ñobtä ñan angwane ni romon kore käkwe ñan kukwe käme ye kitadre temen, ye ngwane kri ngätri tä niren kri, ye kwrere ni moto romon abko rabai bäri romon krübäte amne, niara käkwe ni mda ngwiandre ja mike ngite ja kwrere, aisetet munkwe ja ngibia kukwe ye ngäniene.

<sup>16</sup> Mdakäre abko, munkwe ñan ja mika gure tiebe ni mda mdabe amne jäandrän kuin deme, ye ie munkwe ñan trö kwita Esaúkwe nuenbare kira ye kwrere. Esaúkwe jäandrän kuin rürümoinbare jakän etba Jacoboye. Esaú abko mubai, aisetet niara die mikadre rünkwe, akwa mrö batibe btä jäandrän kuin ye rürümoinbare kwe jakän Jacoboye. <sup>17</sup> Yetbi dre nakaninkä Esaúbtä, ye garera munye abko krörö: Esaú abko mubai, aisetet rünkwe ja di biandre ie abko tö namani, akwa rün käkwe ja di bianina Jacoboye, aisetet trö kwitani jirekäbe kwe ie. Esaú käkwe jäandrän ye müaibare kri krübäte, akwa ja ñan namani nuene kräke. Ne aisetet Esaú käkwe trö kwitani jäandrän kuin demeye, ye kwrere munkwe ñan nuendre.

<sup>18</sup> Mdakäre abko, mun jatani tödeke Jesubti angwane, ñan jäandrän tuen abko kukwäre mun jatani nitre israelita kwrere, ñobtä ñan angwane kira nitre israelita nükani Ngitio Sinaí känti, ye känti Ngöböökwe ja bä mikani ütiäte kri abko krörö: Ñukwä namani tuen jutra ngitiekä ietre amne kä namani tuen iko ietre amne kä namani tuen diore ietre amne kä namani tuen ñüre ietre. <sup>19</sup> Erere arato, drü kukwei jarabare ietre amne Ngöbö kukwei jarabare ietre. Nitre israelita käkwe Ngöbö kukwei nuani kore ye abko Ngöböökwe ñan ñäkäde mda ietre abko namani ribere, <sup>20</sup> ñobtä ñan angwane Ngöbö namani kukwe ükete tare krübäte ye abko namani mate tare btätre Ngitio Sinaíbtä abko krörö: Nire nire käkwe ngoto mikadre Ngitio Sinaíbtä abko kämikadre jäbti, akwa ñan kämikadre jäbti ne ngwane, kämikadre bukobti, ye abko ni nire ya o jäandrän ngwarbe, akwa kämikadre kore, Ngöbö namani niere, ye abko nitre israelita käkwe kukwe nuani. Akwa mun abko jatani tödeke Jesubti angwane, drü kukwei jarabare ñakare munye amne Ngöbö kukwei jarabare ñakare munye arato nitre israelita kwrere. <sup>21</sup> Jäandrän krübäte nakaninkä Ngitio Sinaíbtä, ye abko nitre israelita käkwe tuani, aisetet Moisés ara jire käkwe niebare krörö: Ti nibi nekwetekä krübäte Ngöböbtä, aisetet ti nibi grükekä jökrä ngrabare, niebare kwe.

<sup>22</sup> Akwa munkwe tödekani Jesubti angwane, mun jatani Ngitio Siónte. Ngitio ye känti abko Ngöbö nire tä ñüne amne ngitio ye abko juta Jerusalén kä käinbti ara abko känti mun jatani. Kä ye känti abko angele mili kabre tä ja ükaninkrö Ngöbö käikitekä. <sup>23</sup> Amne Ngöbö ngäbriänkätre jire jökrä abko Ngöbö Odei mubai kwrere, ñobtä ñan angwane jäandrän jire jökrä Ngöböökwe abko niaratrekrä abko käita tikani kä käinbti, niaratre käkwe nünandi kärekäre Ngöböbe bä mikakäre abko tä ketetibe jökrä, ye känti mun jatani, munkwe tödekani Jesubti angwane. Erere arato, Ngöbö kukwe ükatekä metre ni jökrä kräke abko ken mun jatani amne, nitre nünanka kuin metre Ngöbö ngwäreökri abko Ngöböökwe mikani metre ja ngwäreökri abko üai ye ken mun jatani arato munkwe tödekani Jesubti angwane. <sup>24</sup> Amne Jesu köböire Ngöböta kukwe ükete btin nibe abko ken mun jatani amne Jesu därie ni ngite diankakrä mento nibtä, ye ken mun jatani. Jesu därie ye abko ñakare Abel därie kwrere, ñobtä ñan angwane Abel kämikani Caínkwe abko dokwäre Ngöböökwe mikani ja ngie nuen, akwa Jesu därie abko köböire Ngöböta ni ngite denkä mento nibtä.

<sup>25</sup> Ne aisetet ti mräkätre, mtare Ngöböta blite nibe, ye munkwe ñan kitadre okwä kware temen, ñobtä ñan angwane kira Ngöböökwe ñäkäbare Moisés köböire nitre israelitaye, ye niaratre käkwe ñan Ngöbö kukwei mikani täte, abtä Ngöböökwe mikani ja ngie nuen amne kwäräbebäre ñakare kwetre. Mtare abko Ngöbö kä käinbti ara jire käta ñäke nie, ye ie nikwe trö kwitadre angwane, nikwe ñan kwäräbedre jire chi. <sup>26</sup> Kira Moisés näire, Ngöbö kukwei käkwe kä temen ne ngwiani ngrenkä Ngitio Sinaí känti, akwa mtare Ngöbö Kukwei käta niere krörö mda:

Tikwe kä temen ne ngwiandita ngrenkä bati mda, ye ngwane kä käinbti ngwiandi ngrenkä tikwe arato,

Hageo 2.6

nieta Ngöböökwe. <sup>27</sup> Ngöböökwe kä ngwiandi ngrenkä bati mda tä niere, ye abko jäandrän jökrä dätebare abko Ngöböökwe diandikä jökrä mento juankäre ngwarbe kä mrä angwane abko Ngöböta mike gare nie. Ne aisetet jäandrän jökrä dätebare abko Ngöböökwe diandikä amne jäandrän ñan diandrekä kä käinbti abko erere rabadi kärekäre aibe rabadi mda.

<sup>28</sup> Amne kä ye känti Ngöböta gobrane, ye ñan raba denkäta jire abko Ngöböta bien nie amne rabadi kärekäre nikrä. Yebtä abko, ari kuin niere Ngöböye amne ari Ngöbö käikitekä. Erere arato, ari Ngöbö mike ütiäte jae niara jürä ngwiane kwärä, Ngöbö tö ie, ye kwrere ari nuene, <sup>29</sup> ñobtä ñan angwane Ngöbö nikwe abko krübäte amne ñukwä jutra krübäte kwrere, kákwe jändrän jökrä amne ni jökrä niara rüere juandi ngwarbe.

## 13

### Kukwe mrä

<sup>1</sup> Ne aisetet, munta ja tarere, ye kwrere munkwe ja tare janknu ni ja mräkäre tä ja tarere ye kwrere. <sup>2</sup> Erere arato, ni menteni rüka mun känti angwane, munkwe ka ngäbti kuin, ñobtä ñan angwane ni kابتä ngäbti kuin kore ni ruäre kákwe angele Ngöböökwe kani ngäbti ja juete abko ñan nämane gare ietre. <sup>3</sup> Mdakäre abko, tödekatbä Jesubti ni ruäre tä ngite kä teri, ye munkwe ngwian ruentari tare jae amne munta ngite siba ben raba ruen munye, kákwe die mika. Erere arato, tödekatbä Jesubti ni ruäre mikani ja tare nike kri krübäte, ye munkwe ngwian töre jae amne munta ja tare nike siba ben raba ruen munye, kákwe die mika.

<sup>4</sup> Mdakäre abko, mun merire brare gure gure kákwe ja mika ütiäte jae kwärikwäri amne munkwe nüna era metre jabe kwärikväri, ñobtä ñan angwane ni gure, akwa tädre ja mike gure batibati abko Ngöböökwe mikadi ja ngie nuen. Erere arato, ni merire brare ja mikaka ngite bätäkä ngwarbe jabe kwärikväri abko Ngöböökwe mikadi ja ngie nuen arato.

<sup>5</sup> Mdakäre abko, munkwe ñan ngwian tare dikaro amne jändräñ ño ño tä munkwe, ye abko käi ngwian nuäre jabtä munkwe, ñobtä ñan angwane Ngöböökwe niebare krörö: Tikwe ñan ma mikadrete jire chi kaibe amne, tikwe ñan kä mikadrekä jire chi mabtä,

*Deuteronomio 31.6*

niebare Ngöböökwe. <sup>6</sup> Ye mden kisete, nikwe tödekadre kwatibe Ngöböbt, kákwe niedre krörö:

Ti Dänkien Ngöbö abko ti die mikaka, aisetet nire nire tö raba kukwe nuein blo ti rüere abko jürä ñakare tibtä,

*Salmos 118.6-7*

ni rabadre niere.

<sup>7</sup> Mdakäre abko, nire nire kákwe ji ngwiani mun käne, kákwe Ngöbö kukwei kuin Jesubtä mikani gare munye, ye abko munkwe ngwianta töre jae. Nitre mun jie ngwianka ye kákwe nünabare ño mun okwäbti, amne tödekanä ño Ngöböbt kwe, yebtä munkwe töbika ja käne amne munkwe nüna niaratre kwrere. <sup>8</sup> Jesukristo abko nämanena jändrin, ara tä mtare amne ara tädi kärekäre. <sup>9</sup> Ne aisetet ni mda jata kukwe mda bää jene dirire munye, ye jiebti mun ñan rankwa. Ye abko, kukwe ükaninte mröbtä, yebtä abko ni ruäre tä dirire, akwa kukwe ye mikabtä täte ni ñan rabadre ja mike metre Ngöbö ngwärekkri, aisetet Ngöbö moto kuin käta ni tarere, yebtä ni rabadre nünenkä dite abko bäri kuin, aisetet mun ñan rankwa kukwe mda mda jiebti. <sup>10</sup> Ni tödekkä Jesubti abko kräke Jesu krütani krusobtä, akwa nitre blitaka Ngöböbe ni mda mda diäre tä sribire ju blitakrä Ngöböbe känti, ye ñan raba sribi kuin nuenbare Jesukwe krusobtä ye bkäne jire chi, akwa nikrä abko ütiäte.

<sup>11</sup> Mdakäre abko, ju blitakrä Ngöböbe känti nitre blitaka Ngöböbe ni mda mda diäre dänkien tä niken jändräñ ngwarbe därie ngwena Ngöböye Kä Bäri Demente ni ngite dianakkäre mento btä, akwa jändräñ kämika nämane kwetre ye abko ngwækä nämane kukwe juta bäre mento. <sup>12</sup> Ye kwrere arato, Jesu krütani ni ngite dianakkäre mento nibtä ja därie köböire ni mikakkäre deme Ngöbökrä angwane, krütani juta Jerusalén bäre mento.\* <sup>13</sup> Ne aisetet, Jesu jänikani juta Jerusalén bäre mento angwane, ni mdakwe mikani ngwarbe jae, ye kwrere ni rikadre Jesube gwairé angwane ni mikadi ngwarbe

---

\* 13:12 krütani juta Jerusalén bäre mento. Kira, nitre israelita kákwe niaratre ngite mikani jändräñ ngwarbebtä, bti jändräñ ye juani kwetre juta bäre mento ni ngite ngwiänkäre mento bää mikakkäre. Ye kwrere Jesu krütani juta bäre mento, niarakwe ni ngite dianinkä mento nibtä ye bää mikakkäre. Ñäke Levítico 4.21; 16.20-28 yebtä.

jae arato, ye ngäbti ari ja mike juto, <sup>14</sup> ñobtä ñan angwane juta nünankrä kärekäre nie ñakare kä nebtä amne, juta mda jatadi btin abko nita näin känene janknu.

<sup>15</sup> Ye abko, jäandrän bianta kämikakrä Ngöbö käikitakakäre, ye täte ari Ngöbö käikitekä kärekäre Jesukristo köböire. Ngöbö käkitadrekä nikwe ja kadabti, ye abko jäandrän bianta Ngöbö käkitakakäre kwrere. <sup>16</sup> Amne jäandrän kuin nuendre ni mda mdakrä, ye munkwe ñan käkwitaka jabti, akwa nire nire käta jäandrän mdei nike, ye abko ie munkwe jäandrän jakwe bian niaratre die mikakrä. Ye abko jäandrän bianta Ngöböye kwrere arato, aisetet käita nebe nuäre Ngöböbtä.

<sup>17</sup> Mdakäre abko, nitre mun jie ngwianka ye kukwei mika täte munkwe amne dre dre nuemna kwetre munye, yebtä abko munkwe ñan kukwei kita temen, ñobtä ñan angwane niaratre käre tä mun ngibiarebti. Erere arato, nitre mun jie ngwianka käkwe sribibare ño abko niedita jökrä kwetre Ngöböye. Erere arato, kä rabadre nuäre btätre sribire munkrä, abkokäre niaratre kukwei mikadre täte munkwe. Amne munkwe ñan sribi mika tare krübatë niaratre kisete, ñobtä ñan angwane ye ñan rabadre kuin munkrä.

<sup>18</sup> Mdakäre abko, ja ruen ngite ñakare nunye Ngöbö ngwärekri amne nun tö jäandrän jökrä nuene kuin metre, aisetet munkwe blita Ngöböbe nunkrä. <sup>19</sup> Erere arato, Ngöbö diebti ti rabadre niken ja tuenta jötrö munbe yete, abkokäre munkwe blita bäri Ngöböbe tikrä abko ti tö ribei kisere munye. <sup>20-21</sup> Ngöbö kä jáme bianka nie käkwe ni Dänkien Jesu mikaninta nire. Niara därie köböire Ngöbökwe kukwe ükaninte btin mda nibe abko rabadi kärekäre. Jesukristo abko obeja ngibiaka kri kwrere, käta ni ngibiare kuin. Ngöbö ye abko käkwe mun mika biare jäandrän jökräbtä, niara tö dreye abko mun rabadre nuene kuin täte abkokäre. Amne nun abko btä Ngöbö tö dre dre nuein Jesukristo köböire, ye erere nuendi kwe. Kristo aibe mikadre ütiäte kärekäre nikwe. Abko kore se. Amen.

<sup>22</sup> Mdakäre abko ti mräkätre tikwe, kukwe tikani chi braibe tikwe mun die mikakäre, ne munkwe ka ngäbti ja moto kuinbti abko ti tö ribei munye.

<sup>23</sup> Erere arato, ni mräkä Timoteo kitani ngite kä teri, akwa tikaninante abko ti tö nibi mikai gare munye. Niara rükadre jötrö ti känti nete angwane, ti näin ngwena siba jabe nebe mun känti yete basare munye.

<sup>24</sup> Mdakäre abko, nitre mun jie ngwianka tä yete, ye kräke titä köbö kuin juen, munkwe nie ietre tikrä. Erere arato, juta deme Ngöbökwe tä yete, kräke titä köbö kuin juen, munkwe nie ietre. Nitre nünanka Italia nete käta köbö kuin juen mun jökrä kräke yete.

<sup>25</sup> Ngöbökwe ja moto mika kuin mun jökrä kräke amne ja di bian kwe munye. Abko kore se. Ne ngörä.

## Tärä Tikani Santiagokwe Santiago

Santiago kákwe tärä ne tikani. Niara abko Jesu etba nütüta. Mdakäre abko, niara nämane nüne juta Jerusalénte, känti nämane ji dokwáte nitre tödekaka Jesubti ye kräke. Erere arato, nitre Jesu kukwei ngwianka kákwe gätäbare juta Jerusalénte blitakäre sribi Pablokwebtä angwane, Santiago nämane ji dokwáte. Hechos 15 ye känti ma raba ñäke kukwe nebtä. Jesu etba Santiago, btä kukweta tikani Mateo 13.55, Santiago ye ara kákwe tärä ne tikani.

Nitre israelita kwati tödekaka Jesubti nämane nüne ni menteni kwrere kä ketareketare temen kä Israel bäre. Niaratre ye kräke Santiago kákwe tärä ne tikani. Tärä nebtä Santiago kákwe blitabare kukwe keta kabrebtä, akwa bäri käne abko Santiago tä niere krörö: Nita nüne kä nebtä angwane, nikwe ja tare nikadi tödekabtä Jesukristobti. Yebtä nikwe ñan töbikadre kri, ñobtä ñan angwane ja tare nika yebti Ngöböta ni die mike nüne bäri metre ja okwäbti. Nita ja tare nike angwane, nikwe kä ngwiandre nuäre jabtä abko Santiago kákwe niebare.

Mdakäre abko, nitre tödekaka Jesubti tä nüne ño amne tä dre dre nuene, ye abko käta niaratre tödekaka metre Jesubti ya, ñakare ya bä mike tuare ni jökraye, niebare Santiagokwe. Erere arato, nita blite ño ño jabe kwärikwäri abko ütiäte amne nikwe ñan ni jäandrän bkäne krikri mikadre bäri ütiäte ni bobre bobre kräke, ñobtä ñan angwane nitre bobre abko ütiäte Ngöbö ngwärekri amne Ngöbökrä ni ja kwrere jökrä abko Santiago tä niere.

Mdakäre abko, ni ngwian bkänkä krikri käta ni bobre bobre mike ngwarbe jae, käta sribi ütiä bien ñakare metre ietre abko kräke kukwe kri, ñobtä ñan angwane ye dokwäre Ngöbökwé mikadi ja ngie nuen abko niebare Santiagokwe.

### *Santiagota köbö kuin juen*

<sup>1</sup> Ti Santiago käta tärä ne tike. Ti abko sribikä Ngöbökwé amne ni Dänkien Jesukristokwe. Mun tödekaka Jesubti därebare juta nitre israelitakwe kwä jätäbti kubu yekri, käta nüne kä ketareketare temen kä Israel bäre temen, ye kräke titä köbö kuin juen.

### *Nünandrekä dite kärekäre*

<sup>2</sup> Ti mräkätre tikwe, ñongwane erere mun raba ja tare nike bätäkä ngwarbe tödekabtä Jesubti, ye ngwane munkwe kä ngwian bäri nuäre jabtä, <sup>3</sup> ñobtä ñan angwane munta tödeke metre Ngöböbti ya, ñakare ya, yeträ tuakäre munta ja tare nike. Ja tare nika, ye köböire mun rabadre nünenkä dite käre tödekabtä Jesubti abko garera metre munye.

<sup>4</sup> Munkwe ja tare nikadre bätärekä ja täritäri abti mun nena nünenkä dite raire era metre, ye köböire abko mun rabadre nüne metre Ngöbö ngwärekri ni ünän kwrere amne mun ñan rabadre jäandrän kuin Ngöbökwé mdei nike. <sup>5</sup> Akwa munkwe dre dre nuendre, ye ñan raba nüke gare munye angwane, Ngöbökwé mun mikadre töbtä abko munkwe kärä ie angwane, mun mikadi töbtä kwe, ñobtä ñan angwane nire nire käta jäandrän kärere ie, ye erere Ngöböta jäandrän bien täte jökrä ie amne tä jäandrän kääbäire ñakare ni jökrä kän. Amne munta ja mike ngite, yebtä ñan rabai romon jire chi.

<sup>6</sup> Akwa Ngöbökwé jäandrän biandi nie, ye rabadre era ni kräke, kákwe ja töi mikadre kwatibe, kákwe jäandrän kärädre ie amne nikwe ñan ja töi mikadre ngwarbe kwäräkwärä jäandrän käräkäre ie, ñobtä ñan angwane ni ja töi kwite ngwarbe kwäräkwärä, ni ye abko ere ngwane tä tödeke Ngöböbti, ere ngwane ñakare. Ni ye abko mren gilen kitata müre ribikwe kwäräkwärä nekwäre sekwäre ye kwrere. <sup>7-8</sup> Ni ye abko tä tödeke Ngöböbti mtare amne jetbe tärä nebe tödeke jäandrän mdabti, aisetetöi ñakare kwatibe Ngöböbtä, aisetetöi ja töi kwite ngwarbe kwäräkwärä kore jäandrän jökräftä, ye abko ie ni Dänkien Ngöbö kákwe ñan jäandrän biandre jire chi nütüdre kwe.

<sup>9</sup> Mdakäre abko, ja mräkä tödekaka Jesubti mden mden tä nüne bobre abko ie ja rabadre ruen ütiäte, ñobtä ñan angwane tä jändrän jökrä Ngöböökwe bkäne. <sup>10</sup> Akwa ja mräkä ngwian amne jändrän bkäne krikri käkwe tödekani Ngöböbtä amne ja mikani bobre kwe Ngöbö ngwärekri, ye abko btä kä raba nuäre, ñobtä ñan angwane ni ngwian amne jändrän bkäne krikri abko kri blü tä nebe jötrö ye kwrere abko krörö: <sup>11</sup> Kri blü abko tä nebe tuäre, akwa ñänänta kite ngire, käta bä rötökä amne tä näkäenkä temen amne ñan tä nebe tuäre mda. Ye kwrere jire, ni ngwian amne jändrän bkänkä krikri käta sribi nuene, btäräbe ngwian amne jändrän kwekwe tä nikken ngwarbe jötrö kän angwane, ñan rabadre ütiäte mda.

<sup>12</sup> Mdakäre abko, nire nire käta ja tare nike tödekabta Jesubti amne tä nünenkä dite jabtä, ni yebtä abko kä rabadi bari nuäre, ñobtä ñan angwane ja tare nika ye rikadre ta angwane, niarakwe Jesu rukaninte ñakare, ye ngwane Ngöböökwe jändrän kuin biandi ie, käkwe mikadi nüne kärekäre jabe, ni gananka ie korona bianta ye kwrere, ñobtä ñan angwane nire nire käta Ngöbö tarere amne tä Jesu rükente ñakare abko ie Ngöböökwe jändrän ye köböi mikani.

<sup>13</sup> Mdakäre abko, mun mden mden ie kukwe kämekäme mdei jata mun nuatekäre ja käne, ye abko ñan Ngöböta mun nuente kukwe kämenbtä munkwe nütü, ñobtä ñan angwane kukwe kämekäme mdeita nebe ñakare jire chi Ngöböye, aiseke kukwe kämekäme ñan raba niara nuente jire chi ja käne. Erere arato, Ngöböta ni nuente ñakare jire chi kukwe käme nuenkäre, <sup>14</sup> akwa kukwe kämekäme käta ni nuente ja käne, ye abko kukwe käme mdei ni töbtä tä ni nuente ja käne, käta ni näkwite ja kukwäre. <sup>15</sup> Yebti kukwe kämekäme mdeita nebe nie, ye erere nita nikken nuene angwane, nita ja mike ngite Ngöbö rüere angwane, kukwe kämekäme ye aibe jiebti nita nikken nakwen janknu. Nita ja mike ngite täte jökrä Ngöbö rüere, ye dokwäre abko nita krüte amne nita nebe kärekäre Ngöbö okwä bäre mento.

<sup>16</sup> Ti mräkätre tare tikwe, munkwe ñan ja ngökamna, <sup>17</sup> ñobtä ñan angwane Ngöbö sö dätekä amne ñänä, muke dätekä jökrä, Ngöbö ye ara jire käta jändrän jökrä kuin amne metre ni die mikakrä ye bien nie. Ngöbö abko ja kwrere kärekäre. Sö amne ñänä nikwite bä jene jene, ye kwrere Ngöbö nikwite ñakare, aiseke jändrän kuin metre bianta kwe nie, jändrän ye abko kä käinbti bianta kwe nie, aiseke Ngöbö ñan raba ni nuente kukwe kämekäme nuenkäre. <sup>18</sup> Ye abko, ja moto kuinbti Ngöbö tö namani ni mikai ja ngäbriänkäre, erere nuenbarera kwe ja töi jenbti kukwe kuin era metre Jesubtä köböire. Amne nura ngwä kena öta nämane biandre Ngöböye, ye kwrere jire jändrän jökrä dätebare Ngöböökwe, ye ngätäite Ngöböökwe ni dianinkä käne jakrä ja ngäbriänkäre kwrere.

### Ni kukwei nuadre

<sup>19</sup> Mdakäre abko, ti mräkätre tare tikwe, kukwe krörö ne munkwe ngwianta töre jae: Mun jökrä käkwe ja olo mika juto biare Ngöbö Kukwei nuakäre, akwa mun ñan raba juto biare blite amne mun ñan raba romon jötrö ngwarbe, <sup>20</sup> ñobtä ñan angwane ni moto romon abko käta nüne ñakare kuin metre Ngöbö ngwärekri, Ngöbö tö ie ye kwrere. <sup>21</sup> Ne aiseke, kukwe kämekäme diän diän tä kabre mun ngätäite, ye kite temen munkwe amne kukwe kuin Ngöböökwe nökaní nura kwrere munbtä, ye kaen ngäbti mikakäre täte ja moto jämenbti munkwe, ñobtä ñan angwane kukwe kuin Ngöböökwe ye abko di tära mun diantarikrä.

<sup>22</sup> Akwa Ngöbö Kukwei kuin ye abko ñan munkwe kukwei nuadre jirekäbe, akwa kukwe ye abko tä dre dre nuemna, erere munkwe mika täte, ñobtä ñan angwane munkwe ñan mikadre täte ne ngwane, mun tädi ja ngökö au. <sup>23</sup> Ye abko nire nire käta Kukwe kuin Ngöböökwe ye kukwei nuen jirekäbe, akwa dre dre nieta kwe abko tä mike ñakare täte, ni ye abko ni ja tuaka ñäite kwrere abko krörö: <sup>24</sup> Ni ja tuaka ñäite käta ja ngwäre tuen kuin au, akwa tä nikenta mentokwäre angwane, btäräbe niara bä ño, ye tä nebe töre ñakare mda ie. <sup>25</sup> Akwa Ngöbö Kukwei kuin era metre abko kuin ni tikatekrä, ye nire nire

käta nuene abko tä töbike kuin metre ja käne amne tä mike täte metre jökrä, ni ye käta jändrän kuinkuin nuene, ye abko käi rabadi nuäre btä.

<sup>26</sup> Amne nane mun ruäre tä nekete Ngöbö Kukweibtä ruen munye, akwa mun kada nekete ñakare blitare amne munta ñäke krübäte ni mda mdabtä ne ngwane, munta ja ngökö au amne kukwe btä munta nekete ye abko tä nebe ngwarbe, ütiäte ñakare, <sup>27</sup> ñobtä ñan angwane nire nire käta tödeke metre Jesubti abko tä nüne kuin amne deme Ngöbö ngwärekri amne tä kukwe krörökrörö nuene: ngäbäkre uli uli die mikadre. Erere arato, meri kän brare krütanikrütani käta ja tare nike bätäkä ngwarbe, ye abko die mikadre amne kukwe kämekäme kä nebtä ye ngäniene ja ngibiadre kuin deme. Nikwe nuendre kore, ye ngwane nita nekete era metre Ngöbö Kukweibtä.

## 2

*Ñan ni iti mikadre bäri ütiäte ni mdakrä*

<sup>1</sup> Ti mräkätre tare tikwe, munta tödeke ni Dänkien Jesukristo bä nuärehti. Mun ye abko kákwe ñan ni iti mika bäri ütiäte ni mdakrä. <sup>2-3</sup> Ye abko ti bike bä mike krörö: Nane mun tädre ja ükaninkrö gätäbtä angwane, ni ngwian bkärnkä kri rükadre abko kisebtä anio orore tädre amne dän kuin ütiäte tädre btä abko munkwe kadre ngäbti kuin, kákwe niedre ie: Kä bäri kuin ne känti jakwe täke nete, munkwe niedre ie. Ye btäräbe ni bobre rükadre arato amne dän köliköli te rükadre angwane, munkwe niedre ie: Ma raba nünaninkä yete o ma raba täkänintbe temen ti ngotobtä, munkwe niedre ie, <sup>4</sup> ye ngwane munta ni iti mike bäri ütiäte jae ni mda yekrä amne munta kukwe nuene ja töi kämenbtí kore ni mda rüere, aisetemunkwe ñan ni mda mikadre bäri ütiäte ni mdakrä.

<sup>5</sup> Ti mräkätre tare tikwe, olo ketete ti kukweiye munkwe: Nitre bobre bobre ni jökrä okwäbti, ni ye abko Ngöböökwe dianinkä jakrä tödekakäre Jesubti, ye köböire abko Ngöbö okwäbti niaratre tä jändrän bkäne bäri kabre nitre ngwian bkäne kabre kä nebtä ye kräke. Erere arato, kä kuin känti Ngöböta gobrane, ye abko biandi kwe nitre bobre bobre käta Ngöbö tarere yeye, niarakwe jändrän kwe köböi mikani ietre ye kwrere. <sup>6</sup> Akwa mun abko tä nitre bobre bobre mike ngwarbe jae amne nitre ngwian bkärnkä krikri abko munta mike ütiäte jae, ¿ye ñan nitre ngwian bkäne krikri ara tä mun mike ene ja kisete ya? ¡Jänri! ¿Erere arato, ñan niaratre ara tä mun jäke jae kritobo ngwärekri ya? ¡Jänri! <sup>7</sup> Mdakäre abko, ¿Jesukristo kä kuin bä nuäre abko tä mun bkäne, ñan niara rüere nitre ngwian bkärnkä krikri käta ñäke blo arato ya? ¡Se ñobtä abko munta niaratre mike ütiäte jae sel!

<sup>8</sup> Ni Dänkien Gobranka kri kákwe kukwe biani nuendre nie, ye munkwe mikadre täte, ye ngwane munkwe kukwe nuendre kuin. Mden erere nieta krörö Ngöbö Kukweibtä: Mata ja tarere au,

ye kwrere makwe ni mda mda tare arato, *Levítico 19.18*  
abko nieta Ngöbö Kukweibtä. <sup>9</sup> Akwa munta ni iti mike bäri ütiäte ni mdakrä, ye ngwane munta ja mike ngite angwane, kukwe biani Ngöböökwe nuendre, ye rüere munta ja mike ngite, <sup>10</sup> ñobtä ñan angwane kukwe biani nuendre Ngöböökwe nie, ye ni iti tädre mike täte jökrä, akwa nane kukwe ye kitadre kwatibe temen kwe, ye ngwane ja mikadre ngite kwe kukwe biani nuendre jire jökrä ye rüere, <sup>11</sup> ñobtä ñan angwane Ngöbö ara jire kákwe niebare krörö: Mun gure gure kákwe ñan ja mika gure tiebe ni mda mdabe. Erere arato niebare krörö kwe: Munkwe ñan ni mda kämika, niebare kwe. Ye mden kisete, ni gure käta ja mike gure ñakare tiebe ni mda mdabe, akwa ni mda kämikadre kwe, ye ngwane kukwe biani nuendre ye kitata jökrä temen kwe.

<sup>12</sup> Ye abko, Kristokwe kukwe biani nuendre ni tikatekäre, yebti Ngöböökwe kukwe ükadite nikrä, aisetemunta blite ni mda mdabe amne munta kukwe nuene ben angwane, munkwe mikadre ütiäte jae ja kwrere jökrä. <sup>13</sup> Ye ñobtä ñan angwane Ngöböökwe kukwe ükadite kä mrä angwane, nire nire ie mräkä namani ruentari tare ñakare, ye abko ñan rabadre ruentari tare Ngöböye arato; akwa nire nire ie mräkä namani ruentari tare, ni ye abko Ngöböökwe kukwe ükadite kräke angwane, rabadi ruentari tare Ngöböye arato.

*Sribi kuin nuuenta, yebti nita tödeke Jesubti abko tuata nibtä*

<sup>14</sup> Mdakäre abko ti mräkätre tikwe, nita tödeke Jesubti ni tädre niere jirekäbe, akwa nita jäandrän kuinkuin nuene ñakare ni mda mdakrä, ¿se abko nita tödeke Jesubti nita niere abko köböire ni rabadi dianintari ya? ¡Ñakare! Ye abko ti bike bää mike krörö munye:

<sup>15</sup> Nane ni mräkä merire ya amne brare ya tädre ja bütie nike amne tädre mrö mike. <sup>16</sup> Ja mräkä ye abko ie mun iti kákwe niedre: Ma rikata kuin, ie ti tö ti mräkä amne kä ñan rabadre tibo mabtä, abkokäre makwe dän kita jabtä amne makwe mrö kweta trinetrine, munkwe niedre ie. ¿Akwa dän amne mrö mdei nikata kwe, ye munkwe biandre ñakare ie amne, juandreta ngwarbe jirekäbe kise tökare ja jiebti, ye abko kákwe die mikadre ya? Ñakare, aisetemunkwe ñäkädre kore ie, ye abko rabadre ütiäte ñakare kräke. <sup>17</sup> Ye kwrere arato, nita tödeke Jesubti nita niere, akwa ni jäandrän kuinkuin nuene ñakare tödeka Jesubti ye bää mikakrä, ye ngwane nita kukwe ütiäte ñakare niere ngwarbe kore.

<sup>18</sup> Ye abko, ni rabadre niere krörö: Mata tödeke jirekäbe Jesubti, akwa ti abko tä jäandrän kuin nuene jirekäbe ni mda mdakrä abko ni rabadre niere. Ye abko mata jäandrän kuinkuin nuene ñakare ni mda mdakrä, ye ngwane mata tödeke Jesubti ñan jatai tie mabtä; akwa ti abko tä jäandrän kuinkuin nuene ni mda mdakrä, yebtä abko tita tödeke Jesubti abko makwe tuadre tbtä.

<sup>19</sup> Amne Ngöbö tärä itibe abko mata mike era jae, ye abko mata töbike kuin kore, akwa mata tödeke ñakare metre Ngöböbti, ye kwrere arato Ngöbö tärä itibe abko mikata era jae üai kämekämenkwe amne Ngöbö jürä tä nebe btätre, abtä tätre nebe grükekä Ngöbö ngäniene, akwa tätre tödeke ñakare Ngöböbti. <sup>20</sup> ¿Ñobtä ma töi ñakare dikaro? Nita tödeke Ngöböbti nikwe niedre, akwa nita jäandrän kuinkuin nuene ñakare ni mda mdakrä, ye ngwane nita tödeke ñakare Ngöböbti abko raba gare mae, <sup>21</sup> ñobtä ñan angwane ni mräkä kira Abraham nikani ngobo Isaac ngwena müre ketadre Ngöbö mikakäre ütiäte jae, ye ngwane tödekani kwe Ngöböbti, kákwe jäandrän kuin nuenbare kore. Yebtä abko, ñakare ngite mda Ngöböökwe niebare btä. <sup>22</sup> Ne aisetem Abraham nämane tödeke era metre Ngöböbti abko bää mikani krörö kwe: nikani ngobo Isaac ngwena müre ketadre ñukwä gräbti Ngöbö mikakäre ütiäte jae. Niarakwe jäandrän nuenbare kore, yebtä abko jatani tödeke täte metre Ngöböbti. <sup>23</sup> Angwane Ngöbö Kukwei namani tikani krörö abko namani bare Abrahambtä:

Abrahamkwe Ngöbö kukwei mikani era,

yebtä abko Abraham ngite ñakare mda Ngöböökwe niebare btä, *Génesis 15.6*  
abko nieta kore abko erere namani bare. Bärire mda abko Abraham abko Ngöbö kukwe muko nieta Ngöbö Kukweibtä arato. <sup>24</sup> Ye mden kisete, ñan nita tödeke jirekäbe Ngöböbti aibe köböire ni ngite ñakare Ngöböta niere nibtä, akwa nita jäandrän kuinkuin nuene ni mda mdakrä nita tödeke metre Ngöböbti bää mikakäre abko köböire ni ngite ñakare mda Ngöböta niere nibtä arato. Mden erere nuenbare Abrahamkwe, yebtä munkwe töbika kuin ja käne.

<sup>25</sup> Ye kwrere arato, meri iti bti kä ngwarbe kädian nämane Rahab kákwe jäandrän kuin nuenbare krörö abtä ngite ñakare mda Ngöböökwe niebare: Nitre israelita nikani kä tuenbti tiebe juta Jericó känti angwane, Rahab kákwe kä biani ietre ja gwirierte, abti die mikani kwe ngitieta tiebe ji mdabti. Yebtä abko Rahab namani tödeke metre Ngöböbti bää mikani kwe jabtä angwane, niara ngite ñakare mda Ngöböökwe niebare. <sup>26</sup> Ne aisetem, mrä ti bike kukwe bää mike krörö: Ni üai ñakare nibtä angwane, nita nebe ngwakäre, ye kwrere arato Ngöböta itibe nita mike ütiäte jae, akwa nita jäandrän kuinkuin nuene ñakare ni mda mdakrä, ye ngwane nita tödeke ñakare metre bti.

Ye abko, nire nire käta blite angwane, kukwe nieta kwe, yebtä tä ja mike ngite ñakare jire, ye ngwane ni ye abko ni metre amne raba ja ngrabare ngibiare arato kukwe kämekäme ngäniene. <sup>3</sup> Ye abko ti bike bär miike krörö munye: Mdä krikri akwa ni mikadre täte kwe, abkokäre breno chi mikata kodate ta. Yebti abko ni töta nebe mdä kri ye ngwiain mdente mdente, erere känti tä niken. <sup>4</sup> Erere arato, ru krikri mrenbti yebtä töbika munkwe. Ru mrenbti abko bär krikri amne müreta nebe mate bär ribi amne tä ru kite mentokwäre, akwa kri kukwän chi ru kwitatekrä, yebti nitre ru ngwianka ye töta nebe ru ngwiain mdente mdente, erere känti ruta niken. <sup>5</sup> Ye kwrere arato tä nakenkä krörö ni kadabtä: Ni tüdrä abko chi ni ngrabare yebtä, akwa tä biare bike bär kri krübäte, ye abko ñukwä okwä chi käkwe kä tokwä krikri kukwadre kabre temen, ye kwrere jire ni tüdrä. <sup>6</sup> Amne kukwe nieta ni tüdräbti abko ñukwä jutra krübäte kwrere. Ni ngrabare kiakia ne ngätäite ni tüdrä abko bär kri krübäte, ñobtä ñan angwane ni tüdräbti nita kukwe niere diän diän ni mda mda rüere angwane, nita ja mike ngite Ngöbö rüere. Erere arato, ni tüdräbti kukwe taretare krübäte tä nakenkä nibtä amne, ni rüe Satana abko tä ni tüdrä miike blite käme kore. Ni tüdrä ye köböite jäandrän kabre bätäkä ngwarbe tä nakenkä blo nibtä. <sup>7</sup> Ni raba jäandrän jökrä näkwite amne ni raba nebe dänkiene: jäandrän ngibiata gwi, nukwä, jäandrän yorekä tementa amne jäandrän krikri mrente, ye ni töta nebe näkwitai amne dänkiene, erere nita nuene. <sup>8</sup> Akwa ni ñakare jire iti abko käkwe ja tüdrä näkwitanina amne namanina dänkiene, ñobtä ñan angwane ni tüdrä abko ñan tä ja tuemetre näkwitadre jire chi nie, aise te kräkä krübäte käta ni kämike, ye kwrere ni tüdrä.

<sup>9</sup> Ye abko, ni tüdräbti nita Ngöbö ni Dänkiene amne ni Rün nikwe käkitekä. Abti ni tüdrä ye arabebti abko ni mda mda dätebare bäs ja kwrere Ngöböbe abko nita ngürün miike btä arato. <sup>10</sup> Ne aise te ni kada kватibe, yebti nita Ngöbö käkitekä amne ni kada ye arabebti nita ngürün miike ni mdabtä, ye abko nikwe ñan nuendre jire chi kore abko titä niere munye ti mräkätre tikwe. <sup>11</sup> Ye abko ti bike bär miike krörö munye: Ñö bänän tibo tä neen, ye ben gware ñö bänän kwaka tä neen ñakare. <sup>12</sup> Erere arato, aseituna ngwäta neme ñakare higo kriebtä amne higo ngwäta neme ñakare uba kriebtä. Ye kwrere arato, ñö bänän mrene abko bänänta nebe ñakare tibo, aise te ni kada kватibe, yebti nikwe ñan blitadre kuin bat amne blo bat, ti mräkätre tikwe.

### *Ngöbö aibe raba ni die miike nüne töbtä*

<sup>13</sup> Mdakäre abko, nire nire abko töbtä kukwe Ngöböökwebtä amne nire nire abko ie jäandrän Ngöböökwe tä neme gare, ni ye abko käkwe bär miike tuadre nünanbtä kuin ni jökrä ngwärekri amne, munkwe jäandrän kuinkuin nuen ni mda mdakrä ja moto kuinbti amne ñan bikakäre kri, ñobtä ñan angwane kore ni töbtä käta jäandrän kuinkuin nuene Ngöbö mikakäre ütiäte. <sup>14</sup> Akwa nireta mokrere krübäte Ngöbö Kukweibti bikakäre kri, käta rüre ja mikakäre ji dokwate nitre tödekaka Jesubti ngätäite, ni ye abko käta ja miike ngite Ngöbö rüere, ye abko ñan rükandrete kwe amne ñan bikadre kri kwe kore. <sup>15</sup> Ye abko, munta nüne töbtä kore tuen munye akwa, ye abko ñan tä kíte Ngöböökri. Akwa ni moto käme amne ni töi diän diän abkokri tä kíte amne diablara jire käta ni kíte kukwe ye jiebti, <sup>16</sup> ñobtä ñan angwane ni mokrere krübäte jabe kwärikwäri amne ni jäandrän nuene rükäre jirekäbe jabe kwärikväri, ye känti käre kä nokre nikwe ja rüre kwärikväri amne kukwe kämekäme bätäkä ngwarbe nuenta Ngöbö rüere, aise te kukwe bär töbtä kore abko ñan tä kíte Ngöböökri.

<sup>17</sup> Akwa kukwe töbtä era metre tä kíte Ngöböökri abko bär käta ni miike nüne kuin deme Ngöbö ngwärekri amne tä ni miike nüne jäme. Erere arato, ni motota nebe kuin ni mda mdakrä amne nita nebe nuäre töi diandre. Erere arato, ni mda mda tä nebe ruuentari tare nie amne ni jökrä nita kaen ngäbti ja kwrere jökrä amne, kore nita kukwe era erere niere amne nita jäandrän kuinkuin nuene ni mda mdakrä. <sup>18</sup> Amne ni nünanka jäme, käta ni mda mda die miike nüne jäme, ni ye abko tä nüne metre Ngöbö ngwärekri.

### *Ja mikadre bobre Ngöböbtä*

<sup>1</sup> ¿Munta rüre amne munta ngüdrekä jabe kwärikwäri, ye abko ñobtä munta nüne kore gare munye ya? Munta nüne kore ñobtä ñan angwane kukwe käme tä mun töibtä, ye mden abko mdeita nebe munye amne tä ja di nuen munbe, käta mun mike nüne kore. <sup>2</sup> Ne aisetet jändrän mden mden ie mun töta nebe, akwa tä nüke ñakare mun kisete, abtä munta ni mda kämike jändrän ye diankäre jakrä. Erere arato, jändrän ie mun töta nebe jakrä, akwa ñan tä nebe nüke mun kisete, abtä munta nebe mokrere bti jabe kwärikväri. Ye mdenbtä abko munta niken ngüdrekä amne munta niken rüre jabe kwärikväri, akwa munta jändrän kärere ñakare Ngöböye jakrä, aisetet ñan tä nebe mun kisete. <sup>3</sup> Mdakäre abko, munta jändrän kärere Ngöböye angwane, ñan tä nebe mun kisete, ñobtä ñan angwane munta jändrän kärere kukwe nuenkäre kämekäme amne kä ngwiankäre nuäre jabtä, aisetet munta jändrän kärere abko Ngöbö ñan tä bien munye.

<sup>4</sup> ¡Ye ñobtä abko käre munta trö kwite Ngöböye amne munta jändrän mda tarere niara täte! Jändrän jökrä kämekäme tä Ngöbö rüere abko ben nita ja gete angwane, nita nebe ja rüere Ngöböbe abko gare ñakare munye ya? Nire nire käta ja gete kukwe kämenbtä, ye abko tä nebe ja rüere Ngöböbe. <sup>5</sup> Ye mdenbtä abko Ngöbö Kukwei tä niere krörö: Ngöböökwe ja Üai mikani nüne nibtä, ye abko bäri töta nebe ni tuai näin Ngöböbe, aisetet tä ni tarere, käta mokrere nibti abko nieta Ngöbö Kukweibtä. <sup>6</sup> Akwa Ngöbö abko bäri tä ja moto mike kuin nikrä, käta ni tarere, ye Ngöbö Kukwei käta niere krörö:

Nire nire käta bike kri Ngöböbtä abko rüere Ngöbö motota nebe romon.

Akwa nire nire käta bike tindrä Ngöbö ngwärekri abko kräke Ngöböta ja moto mike kuin,

*Proverbios 3.34*  
abko nieta Ngöbö Kukweibtä.

<sup>7</sup> Ne aisetet, bika tindrä Ngöböbtä munkwe. Amne munkwe nünanka dite jabtä rükäre diablu Satana rüere angwane, gitadi munbtä. <sup>8</sup> Krötö känime Ngöbö ken munkwe amne Ngöböökwe krötadi känime mun ken arato mun die mikakäre. Mdakäre abko, nita köbötike amne ni kise tä nebe merebe, ye kwrere mun kukwe kämekäme nuenkäre Ngöbö rüere ye käkwe nüna merebe Ngöbö ngwärekri. Erere arato, mun töi ñäkänintbe ketebu abko tö Ngöbö tarei kukwe kämekäme ben gware ye käkwe ja mika deme Ngöbö ngwärekri amne kukwe kämekäme mdeita nebe mun töite, ye abko kita temen munkwe. <sup>9</sup> Yebti mun moto raba ulire ja jiebti amne, munkwe ja müai au käkwe ngrate krikri ja müaire, ñobtä ñan angwane mun ngite Ngöböye aisetet. Erere arato, käta nuäre kötare munbtä kukwe kämekäme nuenbtä, ye rikwita müare munye amne, käta nuäre munbtä kukwe kämekäme nuene, yebtä abko mun moto raba ulire. <sup>10</sup> Abti bika tindrä ni Dänkien ngwärekri munkwe amne niarakwe mun mikadi ütiäte ja ngwärekri.

<sup>11</sup> Ti mräkätre tikwe, munkwe ñan ñäkä ja rüere kwärikväri, ñobtä ñan angwane nita ñäke ngwarbe ni mräkä rüere bä mikakäre ngite, ye ngwane nita blite Ngöbö Kukwei rüere, ñobtä ñan angwane nikwe ja mräkä taredre abko Ngöbö Kukwei tä niere. Nita blite Ngöbö Kukwei rüere angwane, nita mike ñakare täte. <sup>12</sup> Ye abko, Ngöbö itibe käkwe kukwe biani nuendre nie amne niara aibe abko Kukwe Ükatekä ni jökrä kräke. Erere arato, niara aibe raba ni dentari amne raba ni kite ngite kärekäre, akwa ma ñakare kukwe ükatekä ni mda mdakrä. ¡Se ñobtä abko ma tö ma mräkä bä mikai ngite se!

### *Nikwe ñan bikadre kri*

<sup>13</sup> Mtare olo ketete ti kukweiye munkwe. Mun jändrän kökaka amne jändrän rürümoinkä abko tä niere krörö: Mtare ya o jetbe ni näin kä mdabti amne juta mdate. Ye känti ni rabadi kä kwati angwane, nikwe jändrän kökadi amne nikwe jändrän rürümoindi ngwian diankrä kabre jae abko munta niere. <sup>14</sup> Akwa dre rakadikä munbtä jetbe, ye abko gare ñakare jire chi jabtä munye. Mütata kite jüben temen, bti jötrö ngwarbe tärä niken jökrä ta, ye kwrere munta nüne jötrö kä nebtä. <sup>15</sup> Ne aisetet munkwe niedre jirekäbe

krörö: Ni Dänkien tö ne ngwane, ni tädi nüne amne nikwe sribi ne nuendi o nikwe sribi mda nuendi abko munkwe niedre jirekäbe kore.

<sup>16</sup> Akwa mun abko tä bike krikri Ngöbö ngwärekri, kä tö sribi mikaitbe au ja töi jenbtí, aise te tikwe sribi ne nuendi, bti tikwe sribi mda nuendi, munta niere janknu bikakäre kri, ye abko tuen käme Ngöböye. <sup>17</sup> Ye abko, nire nire ie jäandrän kuin nuen gare, akwa ñan tä nuene abko tä ja mike ngite Ngöbö rüere.

## 5

*Santiago tä nitre ngwian bkäne kri mike mokre*

<sup>1</sup> Mun jäandrän bkäne kabrekabre ye olo ketete ti kukweiye munkwe. Mun jäandrän bkäne kabrekabre, ye rüere Ngöböökwe kukwe juandi tare krübäte, aise te ngrente krikri ja müaire munkwe. <sup>2</sup> Jäandrän kabrekabre munkwe, ye kebera niken ngwarbe jökrä munkän amne, dän ütiäte krikri munkwe, ye abko kä u kebera kwete jökrä munkän. <sup>3</sup> Erere arato, oro amne ngwian munkwe abko nena jialire jialire jökrä munkän abko erere tä niken ngwarbe jökrä amne ütiäte ñakare jire chi mda. Erere arato, mtare mun tä ngwian amne jäandrän ükekrö kabre jae kore amne ñan tä ni mda mda die mike ngwian yebti, yebtä abko kä mrä angwane jiali tä neketaninkä orobtä amne ngwianbtä, ye ara jire kákwe mun kitadi ngise. Amne munta jäandrän munkwe üke kaibe jakrä, ye dokwäre Ngöböökwe mun mikadi ja ngie nuen ñukwä jutrate. <sup>4</sup> Kukwe rakadikä kore munbtä, ñobtä ñan angwane nitre nura ngwä ötaka ötaka munkrä abko ie munkwe sribi ütiä biani ñakare. Yebtä niaratre tä ja di kärere Ngöböye, käta ñäke krikri Ngöböye mun rüere amne, sribikätre ye abko kukwei jarabare Ngöbö di kri yeye. Ye mdenbtä abko kukwe taretare jatadi mun rüere.

<sup>5</sup> Mun jäandrän bkäne kabrekabre käta nüne kuin nuäre kä nebtä amne munta kä ngwen nuäre jabtä, aise te mun nena köteköte. Bäsi nbi kötkata kwetadre abko tä neme köte amne kämikata, ye kwrere jire kukwe rakadikä munbtä kä mrä näire, Ngöböökwe niara rüe gadikä angwane, <sup>6</sup> ñobtä ñan angwane ni kwati bobre bobre ngite ñakare abko munkwe kitani ngite amne munkwe kämikaní, akwa niaratre kákwe ñäkäbare ñakare ja dokwäre munye. Ye dokwäre abko Ngöböökwe mun mikadi ja ngie nuen.

*Nikwe nünandrekä dite bätärekä*

<sup>7</sup> Akwa mun ti mräkätre abko ie ti bike niere krörö: Ni nura nökaka töta nebe nura ngwä kuin ötai angwane, tä kä nura öta näire ngibiare bätärekä ja täritäri amne tä kä ñüre ngibiare jáme bätärekä arato, ye kwrere ni Dänkien Jesu kebera nüketa, ye munkwe ngibia bätärekä abti jatadi nüketa. <sup>8</sup> Munkwe ni Dänkien ngibia bätärekä amne munkwe nünanka dite jabtä, ñobtä ñan angwane ni Dänkien kebera nüketa. <sup>9</sup> Ti mräkätre tikwe, nita nüke jukwebtä amne kebera kite gwä, ye kwrere ni Dänkien kukwe ükatekä nikrä nükerate. Ni Dänkien ye abko kákwe ñan mun mikadre ja ngie nuen, abkokäre munkwe ñan ñäkä ngwarbe jabtä kwärikwäri.

<sup>10</sup> Mdakäre abko, ti mräkätre tikwe, nitre Ngöbö kukwei niekä kirakira nämane blite ni Dänkien kähti, ye dokwäre ja tare nikani kri kwetre, akwa jäandrän jökrä ngibiabare bätärekä kwetre, ye munkwe ngwianta töre jae amne munkwe nüna niaratre kwrere, <sup>11</sup> ñobtä ñan angwane nire nire käta nünenkä dite jabtä ja tare nika näire ni Dänkienkrä, ni ye abko ie Ngöböta ja di bien amne käta nebe nuäre btä tä nebe ruen nie. Ni iti nünanka kira kädian nämane Job abko kákwe ja tare nikani tödekatbtä Ngöböbtä angwane, nünankabare dite jabtä kwe ja tare nika näire, ye abko munkwe kukwe nuani ruen tie. Amne mrä ni Dänkien kákwe kukwe kuinkuin nuenbare kräke amne mikani ütiäte ño kwe, ye gare kuin munye arato ruen tie. Ngöbö abko moto kuin nikrä amne nita nebe ruuentari tare ie.

<sup>12</sup> Mdakäre abko ti mräkätre tikwe, ni mda mdakwe mun kukwei mikadre era, ie mun tö raba ne ngwane, munkwe ñan ja kukwei bian jäandrän kä käinbtí kähti o kä temen ne kähti o jäandrän jökrä mda mda kähti ja kukwei mikakäre täte. Akwa mun tö jän nie angwane, munkwe jän nie jirekäbe angwane, munkwe ja kukwei mika täte; akwa mun

tö ñakare niei angwane, munkwe ñakare nie jirekäbe, ye ngwane munkwe ñakare nie kwatibe arato, Ngöböökwe ñan mun mikadre ja ngie nuen, abkokäre munkwe blita kore.

*Ja di ribedre Ngöböye tödekare kwärä bti*

<sup>13</sup> Mdakäre abko ti mräkätre, nane ni ruäre tödekaka Jesubti abkobtä kukwe kri tä nakenkä angwane, blita kwe jakrä Ngöböbe. Erere arato, nane ni ruäre btä käta nuäre ne ngwane, kanta kwe Ngöbö käikitakakäre. <sup>14</sup> Akwa nane ni ruäre tä bren mun ngätäite angwane, nitre ni jie ngwianka nitre gätäkä Jesu kähti ngätäite yete, ye munkwe kärä blite Ngöböbe kräke angwane, ni Dänkien kähti aseite kekadre kwetre ni bren yebti. <sup>15</sup> Ye abko, tödekadre kwatibe Ngöböbti kwe, käkwe blitadre Ngöböbe ni bren ye kräke angwane, ni bren ye jatadita mobe amne rabadita kuinta Ngöbö diebti. Erere arato, nane ja mikani ngite kwe Ngöbö rüere, köböite tä bren ne ngwane, Ngöböökwe ngite ye diandikä mento btä arato. <sup>16</sup> Ne aisetet, munkwe ja mikani ngite Ngöbö rüere, ye munkwe nie jae kwärikwäri, bti munkwe blita Ngöböbe jakrä kwärikväri angwane, Ngöböökwe mun mikadita kuinta, ñobtä ñan angwane ni tödekaka kwatibe Ngöböbti käta blite Ngöböbe ja di käräkäre ie, ye köböire abko Ngöböta jäandrän kri nuene.

<sup>17</sup> Mden erere ti bike bää mike munye: Kira ni Ngöbö kukwei niekä nämane iti abko kädian nämane Elías. Niara abko ni mda mda kwrere, akwa tödekani kwatibe kwe Ngöböbti, käkwe blitabare ben angwane, Ngöböökwe ñan ñü mikadre näkäen temen abko ribebare kwe ie, ye erere ñü näkäni ñakare temen kä komä bti ötare. <sup>18</sup> Abti blitabareta kwe Ngöböbe angwane, ñü mikadre näkäenta temen abko ribebare kwe ie, erere ñü näkäninta temen amne kri mu jatani nüketa mure jökrä arato.

<sup>19</sup> Mdakäre abko ti mräkätre tikwe, nane mun ruäre käkwe trö kwitadre Ngöböye amne mun rikadreta ji blobti, akwa ni mda tödekaka Jesubti käkwe ngwiandreta Ngöbö kukwäre, ye köböire abko mun rabadre näinta Ngöböbe angwane, <sup>20</sup> nire nire käta nikeni ngite ye ngwenante Ngöbö kukwäre amne tä nikeni ngwenante ji kuinbti, ye köböire ni ngite ñan rabadre ja tare nike kärekäre Ngöbö okwä bäre mento, abkokäre tä dentari amne, Ngöböta ni ngite ngite denkä jökrä mento nibtä, ye raba gare munye. Abko kore se. Ne ngörä.

## Tärä Tikani Käne Pedrokwe

### 1 Pedro

Simón Pedro käkwe tärä ne tikani. Nitre ja tötitakaka Jesube, ye ngätäite Pedro nämane bäri ütiäte. Akwa Jesu kani ngite müre ketadre angwane, Pedro aibe käkwe Jesu rükaninte. Abti namani moto ulire krübäte amne ja töi mikani kwatibe kwe Jesu miketa täte. Pedro nämane nüne mdente metre angwane tärä ne tikani kwe abko gare ñakare metre. Niara nämane juta Babiloniate abko niarakwe niebare 1 Pedro 5.13 ye känti, akwa juta Babilonia nämane kubu jene jene. Erere arato, Babilonia nie nämane juta Roma btä arato, ñobtä ñan angwane ni kwati nünanka Roma abko nämane nüne käme krübäte Ngöbö rüere nitre nünanka juta Babilonia käkwe nünabare ye kwrere, aise te niarakwe tärä ne tikani angwane, nämane nüne juta Romate abko bäri ni kwati tä niere.

Nitre tödekaka Jesubti nünanka kä ketareketare temen kä kädianta Ponto, Galacia, Capadocia, Asia amne Bitinia ye kräke Pedrokwe tärä ne tikani. Mtare kä ye abko kä Turquía. Nitre tödekaka Jesubti nämane ja tare nike, aise te Pedro tö namani niarat te die mikai nüne deme kärekäre Jesu kräke ja tare nika näire, abkokäre tärä ne tikani kwe ietre. Erere arato, Ngöbö ara jire käkwe nitre tödekaka Jesubti dianinkä jakrä, aise te bäri ütiäte Ngöbökrä. Ye mden kisete, nitre tödekaka Jesubti käkwe ñan ja kwata taredre, akwa rabadre juto biare ja tare nike bätärekä Jesukristo kräke amne, Jesukwe ja tare nikani ye kwrere. Ja tare nikadre kwetre tödekabtä Jesubti angwane, kä rabadre nuäre btätre, ñobtä ñan angwane Ngöbö Üai Deme tä nüne era metre btätre abko Pedrokwe niebare.

#### *Pedrota köbö kuin juen*

<sup>1</sup> Ti Pedro abko Jesukristo kukwei ngwianka käta tärä ne tike munkrä. Mun dianinkä Ngöbökwе tä nüne ni menteni kwrere kä ketareketare te kä kädianta Pontote, Galaciate, Capadociate, Asiate amne Bitiniate, mun ye mden kräke titä köbö kuin juen. <sup>2</sup> Kira kena Ngöbö ni Rün nikwe käkwe mun ara jire diandikä jakrä abko nämane gare ie abko erere mun dianinkä kwe jakrä, niara Üai Deme köböire. Ngöbö Üai ye abko käta mun mike deme. Ngöbökwе mun dianinkä jakrä, munkwe Jesukristo mikadre täte amne Jesukristo däriebti Ngöbö käkwe mun ngite diandrekä jökrä mento munbtä abkokäre.

Ngöbökwе ja moto mika bäri kuin mun jökrä kräke amne mun mika nüne jäme kwe, ie ti tö.

#### *Pedrota Ngöbö käkitekä*

<sup>3</sup> Ari Ngöbö käkitekä. Niara abko ni Dänkien Jesukristo Rün. Jesukristo krütani, akwa Ngöbökwе mikaninta nire, ye köböire ni mikaninta därereta btin bobuta kwe, ñobtä ñan angwane niarakwe ni ngwiani ruentari tare kri jae. Ne aise te nikwe nünandi kärekäre Jesukristo ben, yebti ni raba tödeke kwatibe era metre. <sup>4</sup> Amne jändrän kuin nikken ngwarbe ñakare, jübente ñakare amne bä nikwite ñakare tä ükani Ngöbökwе kä käinhti nikrä, ye abko biandi kwe munye. <sup>5</sup> Erere arato, mutta tödeke Ngöböbti, ye köböire abko Ngöböta mun ngibiare ja di kribti, yebti Jesukristo jatadita angwane, mun rabadi dianintari ünän täte. Ye abko tä mikani Ngöbökwе munkrä, ye erere rabadi mikani gare kä mrä, abkokäre Ngöböta mun ngibiare. <sup>6</sup> Yebtä käta nebe bäri nuäre munbtä, akwa bä jöträ mutta ja tare nike bätäkä ngwarbe tödekabtä Jesubti. <sup>7</sup> Ñobtä mutta ja tare nike kore abko krörö: Mutta tödeke Ngöböbti, ye abko bäri ütiäte oro kwrere. Oro abko mikata ñukwätä, köböire oro metre ya, ñakare ya tä nüke gare, ye kwrere abko mutta ja tare nike angwane, mutta tödeke metre janknu Ngöböbti abko rükadi gare munbtä. Akwa mutta tödeke metre janknu Ngöböbti, ye abko bäri ütiäte orobti ta, aise te mutta ja tare nike tödekabtä Jesubti angwane, munkwe tödekadre metre janknu angwane, Jesukristo jatadita angwane, mun käi rabadi nuäre btä amne mun mikadi ütiäte kwe arato.

<sup>8</sup> Jesukristo abko munkwe ñan tuabare ja okwä jenbti, akwa mutta tarere. Erere arato, mtare mutta tuen ñakare, akwa mutta mike era jae, käta tödeke bti, ye abko käita nebe bäri nuäre munbtä. Jesukristo käita nebe nuäre krübäte munbtä, aisetekukwe ñakare jire mda bti mun raba kä nuäre ye niere, <sup>9</sup> ñobtä ñan angwane mun rabadre dianintari, bti mutta tödeke ye ken mun kitera nebe.

<sup>10</sup> Ngöbökwemun dianditari ja moto kuinbti, yebtä abko Ngöbö kukwei niekä kirakira käkwe blitabare amne Ngöbökwemun nuendi ño, yebtä abko namani ja töitike amne nikanintre ngwentari ja täritäri. <sup>11</sup> Mdakäre abko, Kristo müre ketadre, bti mikadretta nire amne rabadre mikani ütiäte kri kä käinbti, ye abko Kristo Üai namani mike gare kira ietre angwane, kukwe ye abko rakadrekä ño amne ñongwane, ye abko niaratré tö namani gai bäri. <sup>12</sup> Akwa kukwe btä nitre Ngöbö kukwei niekä käkwe blitabare ye abko ñakare kräke, akwa kukwe kuin ye abko munkrä mtare abko Ngöbökwemikani gare ietre. Kukwe ye abko mikanina gare munye mtare angwane, Ngöbö kukwei Jesukristobtä mikani gare munye ni mda mdakwe. Ngöbö Üai Deme di kri kä käinbti juani ara jire köböire niaratré käkwe kukwe ye mikani gare munye. Kukwe ye abko angele kä käinbti tö gai bäri arato.

### Munkwe nüna deme

<sup>13</sup> Ye mden kisete, munkwe ja mika juto nüne Ngöbökrä amne munkwe töbika kuin ja kane. Erere arato, Jesukristo jatadita, ye näire Ngöbökwemun dianditari ünän täte ja moto kuinbti, yebtä munkwe ja töi mika kwatibe. <sup>14</sup> Käne mun ngämi tödeke Ngöböbti angwane, mun tö namani kukwe kämekäme nuein abko erere munkwe nuenbare, akwa mtare abko, mun nena Ngöbö ngäbriänkäre amne mutta Ngöbö mike täte, aisetekukwe nämane nüne kane, ye kwrere munkwe ñan nüna mda. <sup>15</sup> Akwa Ngöbö mun käräkä jakrä abko deme, aisetekukwe nüne ngwane, munkwe nüna deme niara kwrere, <sup>16</sup> ñobtä ñan angwane Ngöbö ara jire käkwe niebare krörö ja Kukweibtä:

Ti abko deme,

aisete munkwe nüna deme,  
niebare kwe.

Levítico 11.44-45

<sup>17</sup> Ye abko, mutta blite Ngöböbe angwane, "Ti Rün" mutta niere ie amne Ngöbö ye ara tä kukwe ükete nikrä angwane, ni jökrä tä ja kwrere Ngöbö okwätä, aisetekukwe nita dre dre nuene abko erere btä kukwe ükateta kwe. Ye mden kisete, munkwe nüna ni menteni kwrere kä nebtä amne munkwe Ngöbö mika ütiäte kärekäre jae, <sup>18-19</sup> ñobtä ñan angwane, mun mräkä kirakira nämane nüne ngwarbe amne kukwe ütiäte ñakare, btä nämane ja kate, ye kwrere mun jatani nüne siba niaratré täbti, akwa Ngöbökwemun kökanintarita jakrä. Mun kökanintarita kwe, ye abko ñan oro amne ngwianbti mun kökanintarita kwe. Oro amne ngwian ye abko tä nikken ngwarbe. Akwa kordero kuin deme, bren ñakare bian nämane Ngöböye ja ngite ütiäre, ye kwrere Kristo käkwe ja biani müre ketadre krusobtä abko däriebti Ngöbökwemun kökanintarita, ye nena gare kuin munye. <sup>20</sup> Ye abko, Ngöbö ngämi kä ne dätere, ye känenkri Kristo mikanina biare kwe rükakäre kä nebtä, akwa kä mrä ne ngwane Ngöbökwemun kökanintarita, ye nena gare kuin munye. <sup>21</sup> Kristo köböire mutta Ngöbö mike era jae, käta tödeke bti mtare. Kristo krütani ye abko Ngöbö ara jire käkwe mikaninta nire, bti nikani ngwenante kä käinbti, känti mikanina ütiäte kri kwe. Kristo ye mden köböire mutta tödeke Ngöböbti amne mutta ngibiare ngäbti kisere.

<sup>22</sup> Mtare kukwe era metre Kristobtä mikata täte munkwe, ye köböire abko Ngöbökwemun mikanina deme ja ngwärekri mun mräkä tarekäre era metre jökrä. Ne aisetekukwe ja di ngöi jökrä munkwe ja tare era metre kwärikwäri, <sup>23</sup> ñobtä ñan angwane mun därebareta bobukäre. Munmeye amne mun rün tä krüte, yekri mun därebare käne, akwa Ngöbö Kukwe nire amne tä kärekäre, ye köböire mun därebareta. <sup>24</sup> Ne aisetekukwe Ngöbö Kukwe käta nire krörö:

Ni jökrä kä nebtä abko tä mikä kwrere amne, ni kuin bärnuäre nuäre abko tä kri blü kwrere.

Mikä tä bärnuäre jötrö amne kri blü tä näkäenkä jötrö, ye kwrere nita jötrö kä nebtä,

<sup>25</sup> Akwa ni Dänkien Ngöbö abko Kukwe tä kärekäre,

Isaías 40.6-8

abko nieta Ngöbö Kukweibta. Ni Dänkien Kukwei ye mden abko Ngöbö kukwei kuin Jesukristobtä abko mikani gare munye.

## 2

<sup>1</sup> Ye mden kisete, kukwe käme bätäkä ngwarbe ni mda mda rüere, ye kite jökrä temen munkwe amne, ni ngöka bätäkä ngwarbe ye kite jökrä temen munkwe. Erere arato, ja bärä mika kuin au, ye kite temen munkwe amne, jändrän ni mdakwe ie mun töta nebe jakrä amne ñäkä ngwarbe ni mda mda rüere, ye kite jökrä temen munkwe. <sup>2-3</sup> Ye abko, ni Dänkien moto kuin era metre nena gare täte munye, aise te ngäbäkre chi tä därrere käta nebe kian känene duadre jae abko te tä niren, ye kwrere jändrän jökrä Ngöböökwe kuin deme mun mikakrä niren, ye abko munkwe känäntari kisere jae, Ngöböökwe mun dianintari ño rabadre nüke gare bärä munye abkokäre.

*Jesukristo abko jä nire kwrere*

<sup>4</sup> Mdakäre abko, jä ütiäte kri mika nämane ju gräre, ye kwrere ni Dänkien Jesukristo abko ütiäte kri munkrä. Niara abko jä ütiäte ye kwrere, akwa niara abko nire. Niara ken munkwe kröta. Ni Dänkien abko ütiäte kri jä ütiäte kwrere, akwa nitre kä nebtä kákwe trö kwitani ie, akwa Ngöböökwe dianinkä jakrä amne ütiäte kri kräke. <sup>5</sup> Ye abko, Jesukristo köböire Ngöböökwe mun mikanina nire arato. Jä jue mikata ño, ye kwrere Ngöböta mun ükekrö ketetibe, kákwe ja Üai mikani nüne munbtä mun mikakäre ju kwrere jakrä, mun rabadre sribire niarakrä ni blitaka Ngöböbe ni mda mda diäre deme kwrere amne, Jesukristo köböire mun rabadre jändrän kuin bien Ngöböye niara Üai diebti kä mikakäre nuäre Ngöböbtä. <sup>6</sup> Yebtä abko, Ngöböökwe niebare krörö abko tä tikani niara Kukweibta: Tita ni mike iti Sión nete abko jä bärä ütiäte ju mikakrä kwrere.

Ni jä kwrere ne abko bärä ütiäte kri ju gräre, aise te tikwe dianinkä mikadre nete.

Aise te nire nire kákwe tödekadre ni yebti abko Ngöböökwe ñan mikadi ja ngie nuen, aise te ñan rabadre ja gaire,

*Isaías 28.16*

abko niebare Ngöböökwe Jesukristobtä. <sup>7</sup> Angwane mun Ngöbö mikaka era jae abko kräke ni jä ütiäte kri kwrere abko ütiäte kri, akwa nire nire käta tödeke ñakare Jesubti abkobtä Ngöbö Kukweita blite abko erere tä nebe bare krörö:

Jä ütiäte kri ju mikakrä metre abko nitre ju mikaka kákwe kitaninkä,  
akwa jä ye abko ni Dänkien kákwe mikani bärä ütiäte ju mikakrä metre. *Salmos 118.22*

<sup>8</sup> Mdakäre abko Ngöbö Kukwei tä niere krörö:

Niara abko jä kwrere btä ni mda mda ngoto ritadite angwane, näin ngitiekä temen jä yebti ta, erere Ngöböökwe mikadi ja ngie nuen,

*Isaías 8.14*

nieta Ngöbö Kukweibta ni Dänkien Jesukristobtä. Niaratre tä ngoto ritete kore Jesukristobtä, ñobtä ñan angwane ñan tö Ngöbö Kukwei Jesukristobtä mikai täte, dokwäre Ngöböökwe kukwe mikanintbe kira kräke, ye erere rabadi bare btätre, kákwe ja ngie nuadi.

<sup>9</sup> Akwa mun tödekaka Jesubti ara jire abko ja mräkäre dianinkä Ngöböökwe jakrä. Erere arato, ni blitaka Ngöböbe ni mda mda diäre tä sribire jrei ngwärekri, ye kwrere Ngöböökwe mun mikani sribire jakrä. Amne mun abko juta deme Ngöböökwe. Mdakäre abko, mun abko jen Ngöböökwe. Niarakwe mun dianinkä kore jakrä angwane, jändrän kuinkuin nuenbare kri krübäte kwe munkrä, ye abko mun rikadre mike gare ni mda mdaye abkokäre. Mun nämane nüne kä ikote Ngöbö okwä bare mento, akwa Ngöbö ara jire kákwe mun käräbareta nüne kä trä kuin bärä nuäre jen kwe te. <sup>10</sup> Mdakäre abko, käne mun nämane ngwarbe, ütiäte ñakare juta kwrere, akwa munkwe tödekani Jesubti angwane, mun juta Ngöböökwe mtare. Erere arato, mun ñan nämane ruentari tare Ngöböye, akwa munkwe tödekani Jesubti angwane, mun ruentari tare kri ie.

<sup>11</sup> Ti mräkätre tare tikwe, ti bike kukwe ribere krörö munye: Munta nüne ni menteni kwrere kä nebtä, aise te kukwe käme mdeita nebe munye, käta rüre mun rüere, ye kákwe ñan mun ganaindre, abkokäre munkwe ñan kä bian ie jabtä. <sup>12</sup> Angwane nitre ie Ngöbö gare ñakare, ye okwäbti munkwe nüna kuin, ñobtä ñan angwane bäsí ni kukwe

kämekäme nuenkä btä ñäkä blo, ye kwrere jire tädre ñäke mun rüere mtare, akwa munkwe jändrän kuin nuendi niaratre okwäbti ne ngwane, Ngöökwe kukwe ükadite ni jökrä kräke, ye ngwane niaratre kákwe Ngöökwe käkitadrekä kukwe kuin nuenbare munkwe yebtä.

*Gobran kukwei amne ni bkänkä kukwei mikadre täte*

<sup>13</sup> Mdakäre abko, ni Dänkien rabadre ütiäte ni mda mda okwäte, abkokäre ni jökrä tä mikani gobrane ji dokwäte, ye munkwe kukwei mika täte abko krörö: emperador romanobo tä bari ji dokwäte, aisetemunkwe mika ütiäte jae. <sup>14</sup> Erere arato, gobran mda mda juanta emperadorekwe nitre kukwe kämekäme nuenkä töi diankäre amne ni jändräni kuin nuenkä abko mikakäre ütiäte, ye munkwe mika ütiäte arato, <sup>15</sup> ñobtä ñan angwane nitre töi ñakare käta blite ngwarbe mun rüere abko ngwärekri munkwe jändräni kuin nuendre niaratre kukwei ötakäre abko ie Ngöök tö. <sup>16</sup> Ngöökwe mun ngite dianinkä mento munbtä kákwe mun tikaninte, akwa ye köböire munkwe ñan bika kuin, kukwe kämekäme nuenkäre janknu tiebe. Akwa ni klabore Ngöökwe kákwe nünandre ño, ye kwrere munkwe nüna. <sup>17</sup> Mdakäre abko, munkwe ni jökrä mika ütiäte jae: Munkwe ja mräkätre tödekaka Jesubti tare amne munkwe Ngöök jürä ngwian amne emperador abko mika ütiäte munkwe.

<sup>18</sup> Mdakäre abko, mun klabore ni mda mdakwe, ye abko kákwe mun bkänkä kukwei mika täte jökrä amne munkwe mika ütiäte jae arato. Ye abko mun bkänkä moto kuin amne moto jáme, ñan ye aibe munkwe kukwei mikadre täte kore, akwa mun bkänkä moto kämekäme ye kukwei mika täte munkwe arato, <sup>19</sup> ñobtä ñan angwane ni ja mike ngite ñakare, akwa ni mikata ja ngie nuen ngwarbe amne, nita Ngöök mike täte, aisetemita nebe kwekbe jirekäbe ja tare mike bätärekä kore, ye abko tä nebe tuen kuin Ngööye.

<sup>20</sup> Mun klabore kákwe ja mikadre ngite abtä mun mikadre ja ngie nuen, yebtä abko tädre ja tare mike bätärekä, ye abko rabadre ütiäte ñakare, ñobtä ñan angwane mun mikadre ja ngie nuen metre kwe. Akwa munkwe jändräni kuin nuendre, dokwäre mun mikadre ja ngie nuen angwane, mun tädre ja tare mike kwekbe bätärekä, ye abko tä nebe tuen kuin Ngööye, <sup>21</sup> ñobtä ñan angwane Kristo kákwe ja tare nikani kore käne munkrä, ye kwrere munkwe ja tare nikadre arato, abkokäre Ngöökwe mun käräbare jakrä. Ne aisetemita ja tare nikadre ño, ye abko Kristo kákwe bärä mikani käne abko erere munkwe nuendre abko krörö:

<sup>22</sup> Kristo kákwe ja mikani ngite ñakare Ngöök rüere amne, ni mda mda ngökani ñakare kwe, abko nieta Ngöök Kukweibä. <sup>23</sup> Akwa niara rüe namani ñäke taretare ie angwane, namani kwekbe, ñäkäbare ñakare tare kwe ietre. Erere arato, mika namani ja tare mike krübäte angwane, rüe rätäninkä ñakare kwe amne Ngöök abko kukwe ükatekä metre, ye aibe ie namani ja mike gare jirekäbe. <sup>24</sup> Kristo ara jire kákwe kötä mikani au nikrä amne müre ketani krusobtä ni diáre, ye ngwane ni nämane ja mike ngite krübäte Ngöök rüere abko dianinkä jökrä mento nibtä kwe. Ne köböire abko ni krütani käta ja mike ngite ñakare mda Ngöök rüere, ye kwrere nikwe ñan ja mikadre ngite mda Ngöök rüere amne nikwe nünandre kuin era metre, abkokäre Kristokwe ja biani müre ketadre au ni diáre. Erere arato, Kristo mikani trääine ngrabare, bti krütani, ye köböire abko mun namaninta kuinta. <sup>25</sup> Krütani kore munkrä, ñobtä ñan angwane obeja tä nente angwane, tä nikene ngwarbe kwäräkwärä, ye kwrere mun nämane näin mente Ngööye, akwa mtare mun jataninante Jesukristoye. Ni obeja ngibiaka tä obeja ngibiare kuin, ye kwrere Kristo tä mun ngibiare amne tä mokrere munbti.

*Kukwe ni gure gure kräke*

<sup>1</sup> Ne kwrere arato, mun merire gure gure kákwe ni brare munkwe kukwei mikadre ütiäte, ñobtä ñan angwane nane ni brare ruäre abko ñan tä tödeke Jesubti, akwa mika ütiäte jae munkwe amne munkwe nünandre kuin, ne ngwane ñan munta blite

*Isaías 53:9*

Jesubtä ben abtä tödekadre bti kwe, akwa munta nüne kuin ye köböire jatadi tödeke bti, <sup>2</sup> ñobtä ñan angwane Ngöbö käikitarekä kwärä munta nüne kuin deme ni brare munkwe okwäbti, ye köböire jatadi tödeke Jesubti. <sup>3</sup> Akwa munkwe ñan ja däte bätäkä ngwarbe ngrabare ja bä mikakäre nuäre amne, munkwe ñan ngwian gate ja dokwä sökakrä bätäkä ngwarbe ja bä mikakäre nuäre. Erere arato, munkwe ñan jäandrän orore tuäretuäre mika ja ngrabare ja bä mikakäre nuäre amne ütiäte amne, munkwe ñan dän kuinkuin ütiäte krikri kita jabtä ja bä mikakäre nuäre ngrabare. <sup>4</sup> Akwa munkwe ja moto mika kuin, kákwe nüna jáme ja bä mikakäre nuäre. Ja töi amne ja moto mikadre kuin kore munkwe, ye ngwane mun bä rabadi nuäre kärekäre. Ja bä mikadre nuäre kore, ye abko ütiäte kri Ngöbö ngwärekri. <sup>5</sup> Ne kwrere arato meri deme deme nünanka kira tödekaka Ngöböbti nämane ja bä mike nuäre, kä nämane ja moto mike kuin amne jáme ja bä mikakäre nuäre. Niaratre nämane brare kwe mike ütiäte jae amne nämane kukwei mike täte <sup>6</sup> Sara kwrere. Sara abko kákwe brare kwe Abraham kukwei mikani täte kákwe "ti dänkien" niebare ie. Mun merire merire abko kákwe nünandre metre kore amne munkwe ñan kä jürä ngwiandre jabtä ne ngwane, mun rabai Sara kwrere.

<sup>7</sup> Mun brare gure gure abko ie nüna rüka gare kuin meri munkwe yebe. Meri abko di ñakare ja kwrere munbe, aisetet munkwe mika ütiäte amne munkwe ngibia arato, ñobtä ñan angwane ja moto kuinbti Ngöböwe mun brare käräbare nünakäre kärekäre jabe, ye kwrere Ngöböwe meri ye käräbare arato nünakäre kärekäre jabe, aisetet munkwe meri munkwe ye mika ütiäte. Munkwe blitadre Ngöböbe angwane, Ngöböwe mun kukwei cadre ngäbti, abkokäre munkwe nüna kore ben.

<sup>8</sup> Mdakäre abko, mun jökrä kákwe nüna jáme ketetibe jabe amne ja raba ruen ja kwrere jökrä munye ja die mikakäre kwärikwäri. Erere arato, ni ja mräkäre käta ja tarere, ye kwrere munkwe ja tare kwärikväri. Erere arato, munkwe ja moto mika kuin jakrä amne munkwe bika tidrä jabtä kwärikväri. <sup>9</sup> Ye abko, ni mdakwe kukwe nuen blo mun rüere angwane, munkwe ñan kukwe nuenta blo btä ja dokwäre. Erere arato, ni mdakwe ñäkä taretare munbtä angwane, munkwe ñan ñäkäta taretare btä ja dokwäre amne munkwe ja di kärä kräke Ngöböye jirekäbe, ñobtä ñan angwane Ngöböwe mun käräbare jakrä ja di biankäre munye Kristo köböire, aisetet munkwe ñan ja ngie mika. <sup>10</sup> Munkwe nünandre kore, ñobtä ñan angwane

Nire nire tö nünai kuin amne tö kä tuai nuäre jabtä,

ni ye abko kákwe ñan ñäkä taretare ni mda mdabtä amne ñan ni mda ngöka kwe.

<sup>11</sup> Erere arato, jäandrän käme Ngöbö rüere, yebtä kä mikaka kwe amne jäandrän kuin nuen kwe.

Mdakäre abko, ja töi mika kwatibe kwe nüne jáme ni mda mdabe amne rankwa janknu kä jáme ye jiebti arato, <sup>12</sup> ñobtä ñan angwane ni nüne metre abko ni Dänkien tä ngibiarebti.

Erere arato, tä blite Ngöböbe angwane, niara tä biare kukwe kaen ngäbti.

Akwa ni kukwe nuenkä kämekäme Ngöbö rüere abko kräke Ngöbö motota nebe romon,

*Salmos 34.12-16*

abko nieta Ngöbö Kukweibtä.

<sup>13</sup> ¿Ne aisetet munkwe ja kitadre jäandrän kuin aibebtä, ye ngwane nirekwe kukwe nuendre blo mun rüere? Bäsi ni ñakare jire. <sup>14</sup> Akwa nane nünanbtä kuin, ye dokwäre ni mdakwe mun mika ja tare nike ne ngwane, Ngöböta ja di bien munye, jaisete munkwe kä ngwian nuäre jabtä! Amne munkwe ñan ni ye jürä ngwian jabtä amne mun ñan rekwetaka käne arato, <sup>15</sup> akwa munkwe ja töi mika kwatibe Kristo mikakäre ütiäte ja Dänkien kwrere. Erere arato, ñobtä munta tödeke Kristobti, käta ngibiare ngäbti, ye ni mda mda ngämi kite ngwentari munye, känenkri munkwe ja mika juto biare kukwe kakäre ngäbti. Akwa ja moto jämenbti munkwe blita bentre amne munkwe ja mika bobre, kákwe ni mda mda mika ütiäte jae niaratre kukwei kare ngäbti. <sup>16</sup> Erere arato, ja ñan rabadre ruen ngite munye Ngöbö ngwärekri, abkokäre munkwe nüna kuin ni mda okwäbti, ñobtä ñan angwane munta tödeke Kristobti, abtä munta nüne metre,

yebtä ni ruäre tä ñäke blo mun rüiere, ye abko rabadreta ja gaire, abkokäre munkwe nüna metre. <sup>17</sup> Tita niere kore, ñobtä ñan angwane jändrän kuin nuenbtä nikwe ja tare nikadre, ie Ngöbö tö ne ngwane, rabadre kuin nikrä ja tare nike kore; akwa nikwe ja tare nikadre jändrän käme nuen dokwäre, ye abko rabadre käme nikrä, <sup>18</sup> ñobtä ñan angwane Kristo ara jire käkwe ja tare nikani amne krütani ni ngite Ngöbö rüiere diankakäre mento nibtä, ye abko nuenbare batibe kwe amne namani ütiäte kärekäre. Kristo abko ngite ñakare jire chi Ngöbö rüiere, akwa niara krütani ni ngite ngite ngwiankäreta Ngöböye. Ye abko, Kristo müre ketani, akwa ngwákä ye abko Ngöbö Üai käkwe mikaninta nire. <sup>19-20</sup> Ye kwrere üai kämekäme nämane kira Noé näire käkwe ñan Ngöbö kukwei mikani täte abko nämane kitani ngite abko ie Kristo käkwe dre dre nuenbare amne dre dre nuendi kwe abko Kristo Üai jananbare mike gare. Noé nämane ru dätere angwane, nire nire jatadita Ngöböye abko Ngöbö nämane ngibiare bätärekä, akwa ye ngwane ni braibe namani dianintari. Ni ni kwäbe namani dianintari ñöbti Noébe. <sup>21</sup> Ñöbti niaratre namani dianintari kira, ye abko nitre tödekaka Jesubti ngökata ñöte bää mikani kwetre ye kwrere. Jesukristo krütani, bti Ngöböökwe mikaninta nire, ye köböire abko nita nebe dianintari abko ni ngökata ñöte tä bää mike. Akwa ni ngökata ñöte, yebti ñan ni rabadre merebe ngrabare, abkokäre ni ngökata ñöte. Akwa ni ngökata ñöte angwane, Ngöböökwe ni töi mikadre merebe abko nita kärere Ngöböye. <sup>22</sup> Amne Kristo mikaninta nire Ngöböökwe, yebti abko nikaninta kä käinbti amne tä kä bäri ütiäte te Ngöbö küde ruenkri sete amne, angele btä üai käme mda mda dite krikri, ye abko namani mikani jökrä Kristo ngoto täni.

## 4

*Nünandre Ngöbökrä*

<sup>1</sup> Mdakäre abko, Kristo käkwe ja tare nikani ja ngrabarebti, ne aisetet munkwe ja mika biare ja tare nikakäre niara kwrere, ñobtä ñan angwane nire käkwe ja tare nikanina ja ngrabarebti, ye abko nämanena biare kukwe kämekäme kite temen nünakäre Jesukristo kräke abko erere nuenbare kwe. <sup>2</sup> Ye mdentä, kukwe kämekäme mdei ie, yebtä ñan tä ja kite mda, akwa nünandre ño kwe, ie Ngöbö tö, ye kwrere tä nüne. <sup>3</sup> Nitre ie Ngöbö gare ñakare tö nünai ño, ye kwrere munkwe nünabare raire arato abko krörö: Mun nämane nüne nukro kwrere, jändrän käme aibe mdei nämane nebe munye, amne mun nämane mröre krikri, kä nämane dröbare amne, mun nämane dö ñaen kabre krübäte kä mikakäre nokre amne jändrän ngwarbe kämekäme abko mun nämane mike ütiäte ngöböre jae.

<sup>4</sup> Akwa mtare abko, nitre ñakare tödekaka Jesubti käta kukwe kämekäme nuene kabre krübäte, ye ben mutta dikekä ñakare gwaire mda, ye mdentä abko niaratre ñan töita nebe krütare munbtä, käta ñäke blo mun rüiere mtare. <sup>5</sup> Akwa Ngöbö kukwe ükatekä ni nire kräke amne ni krütani kräke, ye ngwärerekri niaratre käta kukwe nuene kämekäme ye rükadi niere jökrä. <sup>6</sup> Ngöbö rabadre kukwe ükete metre ni kräke, abkokäre ni ngämi krüte, känenkri Ngöbö kukwei kuin Jesubtä mikani gare ietre. Nire nire käkwe tödekani Jesubti abko Ngöböökwe ñan mikani ja ngie nuen. Abti niaratre krütani ni jökrä kwrere, akwa niaratre üai namani nüne kärekäre Ngöböbe.

<sup>7</sup> Kä mrä kitera nüke, aisetet mun rabadre blite Ngöböbe, abkokäre munkwe töbika metre amne munkwe töbika kuin ja käne arato. <sup>8</sup> Bärire mda abko, nita ja tarere era metre kwärikwäri angwane, ni mdata ja mike ngite ni rüere angwane nita juto biare denkä jabti ta, aisetet munkwe ja taredre kri kwärikväri, ye abko bäri kuin. <sup>9</sup> Erere arato, munkwe ja ka ngäbti kuin kwärikväri ja gwiriete, akwa yebti munkwe ñan ngra ngrata jabtä kwärikväri. <sup>10</sup> Mdakäre abko, Ngöböökwe ja moto mikani kuin munkrä, käkwe ja di biani bätäkä ngwarbe munye abkobti munkwe sribidre, ye kwrere munkwe sribi kuin ni mda mdakrä, Ngöböökwe ja moto mikani kuin bätäkä ngwarbe munkrä, ye kwrere munkwe sribi abko krörö: <sup>11</sup> Munkwe blita ni mda mdabe angwane, Ngöbö ara jire tä blite mun köböire ni mda ye die mikakäre, kwrere jire munkwe blita. Erere arato, munkwe sribi ni mda mda die mikakäre angwane, Ngöböta ja di bien ño munye, ye

erere bti munkwe sribi nuen ja di ngöi jökrä ni mda mdakrä, munkwe dre dre nuendre, yebti Ngöbö rabadre käkitaninkä Jesukristo köböire abkokäre. Ngöbö aibe abko rabadi käkitaninkä amne di rabadi kri kärekäre arato. Abko kore se. Amen.

*Munkwe ja tare nikadi tödekabtä Jesubti*

<sup>12</sup> Ti mräkätre tare tikwe, ñukwā jutra ngire tä ni kukwe tare, ye kwrere jire munta ja tare nike tödekabtä Jesubti, yebtä munkwe ñan töbika krübäte dikaro, ñobtä ñan angwane kukwe ye abko rabadi bare kore, aisetē ñan raba tuen bā jene munye. <sup>13</sup> Akwa Kristo käkwe ja tare nikani ño, ye kwrere munta ja tare nike gware ben, ye abko munkwe käi ngwian nuäre jabtä, Kristo jatadita ja di kri bā nuärebiti angwane, kä rabadre bari nuäre munbtä niarabe gware abkokäre. <sup>14</sup> Erere arato, munta tödeke Kristobti, ye dokwäre ni mdakwe ñäkä taretare munye angwane, munkwe kä ngwian nuäre jabtä, ñobtä ñan angwane Ngöbö Üai bā nuäre tä nüne munbtä aisetē. <sup>15</sup> Akwa nane mun raba ja tare nike angwane, ñan ni mda kämikabtä amne ñan gobtä mun tädre ja tare nike. Mdakäre abko, ñan ja mikabtä ngite bätäkä ngwarbe ni mda mda rüere amne ñan ja mikabtä kukwe jenenante ta, abtä mun tädre ja tare nike, ie ti tö. <sup>16</sup> Akwa mun abko tödekaka Kristobti, abtä munkwe ja tare nika ne ngwane, mun ñan raba ja gaire, akwa mun kädeka Kristobti angwane, munkwe Ngöbö käkitaka jirekäbe, <sup>17</sup> ñobtä ñan angwane mtare ni jen Ngöböökwe käta kukwe käme nuene Ngöbö rüere angwane, Ngöböta töi den käta mike ja tare nike. *¿Ye abko, ni tödekaka Kristobti ara jire btä kukwe tare rakadrekä kore, se abko nitre käta kukwe kuin Jesubtä mike ñakare täte abko kräke kukwe rabadi ño mrä? Aitee, Ngöböökwe niaratre mikadi ja tare nike kri krübäte!*

<sup>18</sup> Mdakäre abko, nitre nünanka metre Ngöbö ngwärekri, akwa töi diankäre Ngöböta mike ja tare nike, akwa mrä niaratre rabadi dianintari.

*¿Kore ne ngwane nitre diän diän ja mikaka ngite Ngöbö rüere abko Ngöböökwe dianditari ya? Ñakare, abko nieta Ngöbö Kukweibtä.*

*Proverbios 11.31*

<sup>19</sup> Ne aisetē munkwe ja tare nikadre, ie Ngöbö tö ye erere munkwe ja tare nika ka ngäbti. Akwa Ngöbö mun dätekä, ye kisete munkwe ja mika amne niarakwe ja kukwei mikadi täte, kákwe mun dianditari amne mun rika jäandrän kuinkuin nuene janknu.

## 5

*Ñan bikadre kri, akwa ja mikadre bobre*

<sup>1</sup> Mtare nitre ji ngwianka tä mikani ji dokwätē mun ngätäite, ye abko ti tö töi diain mda, ñobtä ñan angwane ti abko unbretar arato amne titä sribire nitre ji dokwätē ye kwrere. Erere arato, Kristo käkwe ja tare nikani kri, ye tikwe tuaba ja okwā jenbti abko erere titä kädriere ni mda mdabe. Erere arato, Kristo jatadita angwane, rabadi ütiäte kri, ye ben gware ti rabadi mikani ütiäte arato abko gare kuin tie, aisetē <sup>2</sup> mun unbretar unbretar ji dokwätē, ye ie ti bike niere krörö: Nitre tödekaka Jesubti tä obeja kwrere Ngöbö ngwärekri amne tä mikani ngibiadre munye, ye abko munkwe ngibia kuin, akwa munkwe niaratre ngibia ja moto kuinbti, Ngöbö tö ie ye kwrere. Akwa munkwe ñan ja moto mika iko niaratre ngibiabtä. Erere arato, munkwe ñan niaratre ngibia ngwian ganainkäre jae, akwa munkwe kä ngwian nuäre jabtä niaratre ngibiakäre. <sup>3</sup> Erere arato, nitre tä mikani ngibiadre munye, ye munkwe ñan ja mika dänkiene, akwa niaratre kákwe nünandre kuin, abkokäre mun ara jire kákwe nüna kuin niaratre okwätbi. <sup>4</sup> Abti Kristo, Obeja Ngibiaka Bäri Ütiäte Kri, ye jatadi nüketa angwane, korona bianta ni ganankaye, ye kwrere jäandrän ütiäte biandi kwe munye, kákwe mun mikadi ütiäte kri amne ye abko ñan rikadi ngwarbe jire chi.

<sup>5</sup> Erere arato, nitre unbretar unbretar ji ngwianka mun bati bati käne, ye munkwe kukwei mika täte. Erere arato, ja moto jämenbti mun jökrä kákwe bika tidrä jabtä kwärikwärä amne munkwe ñan bika kri jabtä, akwa munkwe ja mika ütiäte jae kwärikwärä, ñobtä ñan angwane Ngöbö Kukweita niere krörö:

Nire nire käta bike kri abko rüere Ngöbö motota nebe romon.

Akwa nire nire käta bike tindrä Ngöbö ngwärekri abko kräke Ngöböta ja moto mike kuin,

*Proverbios 3.34*

abko nieta Ngöbö Kukweibta. <sup>6</sup> Kä jatadi angwane, Ngöböökwe mun mikadre ütiäte, abkokäre munkwe bika tindrä Ngöbö di kri yebtä. <sup>7</sup> Amne kukwe ño ño tä mun kisete, abtä munta töbike kri, ye munkwe kita jökrä Ngöbö kötarä, ñobtä ñan angwane Ngöbö töita käre munbtä.

<sup>8</sup> Mdakäre abko, kwra lion ie mröta nebe angwane, tä nikene ngwäne krikri, käta nikene jäandrän känene kwetadre jae, ye kwrere jire mun rüe diablu Satana tä näin ni känene juankäre ngwarbe, aisetekwe munkwe töbika kuin ja käne amne munkwe mokre jabti au.

<sup>9</sup> Akwa munkwe tödeka k watibe Ngöböbti amne munkwe nünanka dite jabtä rükäre mun rüe Satanabe, ñobtä ñan angwane munta ja tare nike, ye kwrere mun mräkä tödekaka Jesubti kä jökräbti temen tä ja tare nike arato. Yebtä munkwe töbika, käkwe nünanka dite jabtä. <sup>10</sup> Munkwe ja tare nikadi bää jötrö mda, yebti Ngöbö ja moto mikaka bäri kuin ni kräke käkwe ni käräbare nünakäre kärekäre kä nuärete kä käinbti Jesukristo köböire, Ngöbö ye ara jire käkwe mun mikadi juto biare nüne jakrä. Erere arato, mun mikadi nünenkä dite kwe amne ja di biandi kwe munye amne mun mikadi dikekä janknu kwe Jesukristobe arato. <sup>11</sup> Ne aisetekwe Ngöbö di raba kri jäandrän jökrä bti ta kärekäre, ie ti tö. Abko kore se. Amen.

*Kukwe mrä*

<sup>12</sup> Mräkäre abko, ti mräkä Silvano abko tä tödeke era metre Kristobti tuen tie, aisetekwe niara köböire tita tärä tike chi munye, mun die mikakäre. Ngöböökwe ja moto mikani kuin munkrä, käkwe jäandrän kuin nuenbare munkrä abko rabadre gare munye arato, abkokäre tita tärä ne tike. Ngöböta mun tarere kore, yebtä munkwe nünanka dite dite.

<sup>13</sup> Amne juta Roma nete, ne arabe kädianta Babilonia arato, ne känti nitre tödekaka Kristobti tärä arato abko käta köbö kuin juen munkrä. Ngöböökwe mun dianinkä jakrä, ye kwrere niaratre dianinkä jenena jakrä kwe arato. Erere arato, Marcos, ti ngobo tikwe Ngöbö käbti käta köbö kuin juen munkrä. <sup>14</sup> Amne munta ja tarere kwärikwäri, ye bää mikakrä abko munkwe ja demain kwärikväri köbö ngwianretari kwärä jae. Mun abko nena Kristokwe, yebtä kä jáme raba jökrä. Abko kore se. Ne ngörä.

## Tärä Tikani Bobukäre Pedrokwé 2 Pedro

Simón Pedro käkwe tärä ne tikani. Pedro kebera krüte abko namanina gare ie, ye abko niebare kwe 2 Pedro 1.12-15. Pedro käkwe tärä ne tikani kukwe era metre Jesubtä mikakäreta töre nitre tödekaka Jesubtiye, niaratre käkwe nünandre deme amne nünandre janknu kwetre Jesu kräke abkokäre. Mdakäre abko ni ruäre bikaka tödekaka Jesubti rükadre nitre tödekaka Jesubti ngätäite niaratre ngökakäre abko Pedro tö namani mikaita töre ietre. Nitre ye abko ni ño amne tätre nüne ño abko Pedrokwé niebare ietre. Nitre ni ngökakäye abko Ngöbökwé mikadi ja ngie nuen kri. Mräkäre abko, kukwe rakadrekä ño ño kä mrä abko Pedrokwé mikaninta töre arato. Kä mrä ye jatadre jötrö, aisetet ja di ngöi jökrä nünandre deme Jesukristo mikakäre ütiäte abko Pedrokwé niebare.

Erere arato, Jesukristo jataita era metre, akwa Ngöböta ni jökrä ngwen ruuentari tare jae amne tö ni jökrä tuai ja töi kwite niara kukwäre amne tö bäri ni kwati tuai tödeke niara Odei Jesukristobti, ye aisetet ñan tö Jesukristo juainta gwängwarbe, akwa tä ni ngibiare bätärekä bätärekä abko Pedro tö namani mikai gare. Kukwe kabre 2 Pedrobtä abko ja kwrere tärä Judabe.

### *Pedrota köbö kuin juen*

<sup>1</sup> Ti Simón Pedro, ti abko sribikä Jesukristokwe amne ti abko Jesukristo kukwei ngwianka arato. Ngöbö nikwe Jesukristo abko ni Diantarikä abko bti nunta tödeke, ye kwrere munta tödeke niarabti arato. Jesukristo abko ni metre, käkwe ni die mikani tödeke jabti. Mun ye abko kräke titä köbö kuin juen tärä nebtä. <sup>2</sup> Angwane Ngöbö nükani gare munye amne Jesukristo nükani gare munye, aisetet niaratre käkwe ja moto milka kuin mun jökrä kräke amne mun mika nüne jäme kwetre, ie ti tö, käta tärä tike munye.

### *Ngöbökwé ni käräbare abko erere nikwe nünandre*

<sup>3</sup> Ngöbö nükana gare nie, ye mden köböire ja di kribti jändräni jökrä ütiäte nünankrä metre biani kwe nie. Ja di kri bä nuärebti amne ja moto kuinbti niarakwe ni käräbare jakrä. <sup>4</sup> Ja di kri bä nuäre amne ja moto kuin, ye köböire abko jändräni kuin ütiäte kri köböi mikani Ngöbökwé nie. Jändräni kuin, ye köböire abko jändräni kämekäme mdeita nebe nie käkwe ñan mun juandre ngwarbe, akwa munkwe kwäräbedre amne, Ngöbö tö mun tuai nüne ño, ye kwrere mun rabadre nüne, abkokäre jändräni kuin köböi mikani kore kwe nie.

<sup>5</sup> Ye mden kisete munta tödeke kwaitibe Jesubti, ye bärire mda abko nünandre kuin Ngöbökrä, ye jiebti mun rankwa ja di ngöi jökrä; amne nüna kuin Ngöbökrä, ye bärire mda abko Ngöbö rükadre gare bäri kuin munye abko jiebti mun rankwa; amne <sup>6</sup> Ngöbö rabadre gare bäri kuin munye, ye bärire mda abko ja ngibiadre kuin au kukwe kämekäme ngäniene, ye jiebti mun rankwa. Erere arato, ja ngibia kuin au, ye bärire mda abko jändräni jökrä ngibiadre bätärekä, ye jiebti mun rankwa; amne jändräni jökrä ngibia bätärekä, ye bärire mda abko nüna metre Ngöbökrä, ye jiebti mun rankwa. <sup>7</sup> Erere arato, nüna metre Ngöbökrä, ye bärire mda abko nitre tödekaka Jesubti, ie ja rabadre ruuentari tare kwäräkwäri, ye jiebti mun rankwa amne, ja rabadre ruuentari tare kwäräkwäri nie, ye bärire mda abko munkwe ja taredre kwäräkwäri abko jiebti mun rankwa. <sup>8</sup> Munkwe nünandre kore bäri mda köbö kwatirekwatire, ye ngwane ni Dänkien Jesukristo nükani gare munye, ye kräke munkwe jändräni kuin nuendi amne munkwe ñan nünandre ngwarbe. <sup>9</sup> Akwa jändräni jiebti mun rankwadre tikwe nini, ye nire nire tä bkäne ñakare ne ngwane, ni ye abko tä nüne ni okwä kä ikote kwrere. Erere arato, ni ye tä töi ngitiekä ñakare metre, aisetet kä tuen käname ja käne nie, kwrere jire tä nüne amne, niara nämane ja mike ngite käne Ngöbö rüere, ye abko ni Dänkien Jesukristo käkwe dianinkä mento btä amne bätäninte jökrä btä kwe, ye abko tä käikwitekä jabti.

<sup>10</sup> Ne aisetet i mräkätre tikwe, Ngöböökwe mun käräbarera jakrä amne mun dianinkära jenena jakrä kwe, ye rabadre era munkrä, aisetet jändräñ ye jiebti mun rankwa kisere janknu, ñobtä ñan angwane munkwe ye nuendre ne ngwane, munkwe ñan ni Dänkien gibliadrekäta jire chi <sup>11</sup> amne ni Dänkien, ni Diantarikä Jesukristo tä gobrane kärekäre, ye känti Ngöböökwe mun kadi ngäbti kise kubu ja känti sete.

*Nire nire kukwei era metre abko ie olo ketadrete*

<sup>12</sup> Ne aisetet, kukwe era metre diribarera munye abko nena gare metre munye, yebtä munta nünenkä dite, akwa tikwe mikadita töre käre munye. <sup>13</sup> Ti tä nüne kä nebtä ne ngwane, tikwe kukwe ye mikadreta töre munye ruen tie, <sup>14</sup> ñobtä ñan angwane ti kebera krüte abko ni Dänkien Jesukristo käkwe mikani gare tie, aisetet tita niere kore munye. <sup>15</sup> Ti krütadrera, ye täbti kukwe ye tädre töre käre munye, abkokäre ti ngämi krüte, känenkri tikwe sribidi ja di ngöi jökrä kukwe ye mikakäreta töre janknu munye.

<sup>16</sup> Ti mräkätre, ni Dänkien Jesukristo abko di kribti jatadita, ye abko nunkwe diribare munye. Ye abko ñan kukwe mikanintbe ngwarbe kira mun ngökäkare abko niebare nunkwe munye, akwa nunkwe ni Dänkien di kri bä nuäre tuaba ja okwä jenbti abko erere nunta niere. <sup>17-18</sup> Nun näma ngitio demenbti ni Dänkien Jesube angwane, Ngöbö ni Rün käkwe ni Dänkien mikaba ütiäte kri abkoträ rababa bä nuäre, ye nunkwe tuaba. Erere arato, kä ye känti Ngöbö kukwei jaraba krörö kä käinbti nunye: “Ni ne abko ti Ngobo tikwe. Niara tare kri tikwe. Niara käi nuäre kri tibtä”, nieba Ngöböökwe kä käinbti, ye abko kukwe nuaba ja olo jenbti nunkwe arato.

<sup>19</sup> Nitre Ngöbö kukwei niekä kirakira käkwe kukwe niebare ni Dänkienbtä, ye mikaba bäri era nun okwäte. Ne aisetet nitre Ngöbö kukwei niekä ni Dänkienbtä abko munta tuente, yebtä munkwe ja töitika kuin, ñobtä ñan angwane nitre Ngöbö kukwei niekä kirakira käkwe kukwe niebare ni Dänkienbtä, ye abko ñotraträ kä ikote ye kwrere tä nunkrä mtare. Akwa ni Dänkien Jesu jatadita angwane, muke kri tä kite dekä käin, abti käta kite ngwen, ye kwrere ni Dänkien rükadita angwane, käträ tikadikä jökrä kwe mun töite. <sup>20</sup> Akwa kukwe krörökrörö rabadre gare metre munye: Nitre Ngöbö kukwei niekä kirakira käkwe Ngöbö kukwei niebare, ye abko tä dre dre niere abko niaratrekwe ükaninte ñakare jire au, <sup>21</sup> ñobtä ñan angwane nitre Ngöbö kukwei niekä era metre ye käkwe ñan Ngöbö kukwei niebare jire chi ja töi jenbti au, akwa Ngöbö Üai Deme ara jire käkwe niaratetre jie ngwiani Ngöbö kukwei niere abko erere niebare kwetre.

## 2

*Ngöböökwe nitre dirikä blo mikadi ja ngie nuen*

<sup>1</sup> Akwa ni ja bärä mikaka Ngöbö kukwei niekä nämanena kira nitre israelita ngätäite, ye kwrere arato rükai mun ngätäite. Niaratre ye abko töi käme, abkobti kukwe bärä blo diridi tiebe kwetre munye abko köböite ni ruäre käkwe ni Dänkien Jesu tuadimetre. Ni Dänkien käkwe nitre ja bärä mikaka dirikä kwrere kökanintarita, akwa niaratrekwe rükandite. Niaratre käkwe diridi blo munye, ye dokwäre abko Ngöböökwe niaratetre mikadi ja ngie nuen bärä jötrö. <sup>2</sup> Nitre ye käkwe kukwe gaidre nuendi, akwa ye jiebti ni kwati näin. Ye köböite abko ji era metre ni Dänkienkwe abko rüere ni kwati käkwe ñäkädi blo. <sup>3</sup> Mdakäre abko, nitre bikaka Ngöbö kukwei dirikä ye abko töi rabadi krübäte ngwianye, käkwe kukwe ngwarbe tandi ngwian diankakäre munkän. Akwa kira Ngöböökwe niaratetre mikadre ja ngie nuen abko köböi kitinina Ngöböökwe kräke, ye erere niaratetre käkwe ja ngie nuadi kri amne ñan kwäräbedre kwetre.

<sup>4</sup> Ye abko, nitre ye käkwe ñan kwäräbedre gare nie, ñobtä ñan angwane kira angele ruäre käkwe ja mikani ngite Ngöbö rüere, ye Ngöböökwe dianinkä ñakare bti ta, akwa mäkäninte kadenante kwe, bti kitani ngite kwe kä bärä iko te kä ja tare nikakrä känti. Abti mrä angwane Ngöböökwe mikadi ja ngie nuen abko tä ngibiare yete. <sup>5</sup> Ye kwrere arato, nitre kirakira nünanka Noé näire nämane ja mike ngite Ngöbö rüere, ye Ngöböökwe dianinkä ñakare bti ta, akwa ñü juani kri temen kwe moto kämekäme gakakäre

amne, Noé nämane nüne metre abko kwrere nämane dirire ni mda mdaye abko aibe namani dianintari mräkä ni kükü ben. <sup>6</sup> Ye kwrere arato, nitre nünanka juta Sodamate amne Gomorrata nämane kukwe nuene kämekäme Ngöbö rüere, ye dokwäre Ngöböökwe mikani ja ngie nuen, kákwe kukwani jökrä amne ngübrün aibe namani niaratre täbtä, ye abko nitre kukwe kämekäme nuenkä Ngöbö rüere abko btä kukwe rakadikä ño mrä abko Ngöböökwe bää mikani kore juta yebtä. <sup>7</sup> Nitre Sodomabo amne Gomorrabo, ye ngätäite abko Lot aibe nämane nüne metre Ngöbökrä, aisetet niara aibe namani dianintari. Akwa Lot nämane nüne yete angwane, nitre kukwe nuenkä käme, ye kisete Lot nämane nebe ulire krübäte, <sup>8</sup> ñobtä ñan angwane niara abko nünanka metre Ngöbökrä, akwa nämane nüne nitre ye ngätäite, aisetet köbö kwatirekwatire nitre ye nämane kukwe nuene kämekäme niara okwäbti amne niara nämane kukwe nuen, yebtä abko Lot nämane ja tare nike, abtä moto nämane iko kukwe tuare. <sup>9</sup> Ngöböökwe nitre nünanka era metre ye dianintari kore, ye mden kwrere ni jökrä nünanka era metre Ngöbökrä abko Ngöböökwe diandretari ño kukwe taretare ngäniene, ye abko gare kuin Ngöböye. Erere arato, nitre kukwe nuenkä kämekäme Ngöbö rüere abko Ngöböta ngibiare jenena mikakäre ja ngie nuen kää mrä, akwa mtare tätre mike ja tare nike arato. <sup>10</sup> Erere arato, nitre ie kukwe kämekäme aibe mdeita nebe amne tä nakwen jiebti, erere arato tätre bike kri amne tätre nitre dite ji dokwäte mike ngwarbe jae, ye abko ni Dänkien kákwe mikadi ja ngie nuen bääri kää mrä.

Nitre dirikä blo ye abko ja gaire ñakare bikakäre krikri ni mda mda okwäbti amne kää jürä ñakare btätre ñäke blo üai käme di kri ye rüere. <sup>11</sup> Akwa angele sribikä Ngöböökwe abko bääri dite dite amne ütiäte krikri abko ie nin jata nüke töre jire chi ñäke üai käme dite krikri ye rüere ni Dänkien ngwärerekri. <sup>12</sup> Dirikätre blo ye abko bäsí jändräñ ngwarbe kwrere, ñobtä ñan angwane niaratre töi ñakare amne tätre nüne okwäbti be jändräñ ngwarbe kwrere. Erere arato, jändräñ ngwarbe tä därrere abko ie kömikata amne tä nebe köte, känti tä ngataen, ye kwrere rakadikä nitre dirikä blobtä, abkokäre därebare amne jändräñ nüke gare ñakare ietra abko rüere tätre ñäke diän diän, akwa jändräñ ngwarbe tä ngataen köte, ye kwrere niaratre jraindi arato.

<sup>13</sup> Mdakäre abko, niaratre kákwe kukwe nuenbare blo ni mda mda rüere, käta ni mda mda mike ja tare nike, ye dokwäre abko Ngöböökwe ja mikadi rüere abko kákwe mikadi ja tare nike. Nitre dirikä blo tä ja mike gure batibati, ye abko käita nebe nuäre btätre amne ja gaire ñakare, aisetet tätre ja mike gure kää trää ngwenbti. Erere arato, tätre mröre munbe Jesu mikakäre ütiäte jae angwane, käta nebe nuäre btätre, akwa ngwarbe tätre ni ngökö, käta ja bää mike ni kuin kwrere mun ngätäite, akwa jändräñ kämekäme btä nita nebe ja gaire, ye kwrere tätre nebe mun ngätäite. <sup>14</sup> Mdakäre abko, meri ñan jatare dirikätre bloye, okwäta nebe meribtä angwane, töi tärä nebe ie jakrä amne käre niaratre nebe dräre ñakare ja mike ngite Ngöbö rüere amne, meri ruäre töi braibe abko tätre näkwite kukwe käme nuenkäre jabe. Erere arato, jändräñ ni mda mdakwe, ie töta nebe krübäte jakrä. Akwa mrä Ngöböökwe mikadi ja ngie nuen kärekäre. <sup>15</sup> Erere arato, nitre dirikä blo nikani ji kuin metre Ngöböökwe bäre mento, aisetet niaratre tä näin ngwarbe nianinte amne, Beor ngobo Ngöbö kukwei niekä kädian nämane Balaam tö namani kukwe nuein blo ngwian ganainkrä jae, ye kwrere jire nitre dirikä blo tä näin. <sup>16</sup> Angwane kukwe nuenbare käme kore Balaamkwe, yebtä Ngöböökwe mäträbare krörö btä: Buro abko blite ñakare, akwa Ngöböökwe mikani blite ni nire kwrere, kákwe ñäkäbare Balaamye, aibe kákwe ji ötani Balaam käne angwane, ñan nikani Ngöbö kukwei nire ngwarbe janknu ngwian ganainkrä jae.

<sup>17</sup> Mdakäre abko, dirikätre blo ye abko ñö okwä ngrötani kwrere amne müta juankata niken ja käne mürekwe ye kwrere, ñobtä ñan angwane tätre ni die mikakrä tä niere, akwa ñan raba ni die mike jire chi, aisetet tätre dirire blo, ye dokwäre abko kää bääri iko te Ngöböökwe kitadi ngite kärekäre abko tä mikanintbe kräke. <sup>18</sup> Niaratre tä blite kuin bää nuäre, akwa tätre blite ngwarbe amne, ni ruäre kákwe kwäräbebare krire nitre nünanka blobtä, abti nikani kukwe kämekäme kite temen, kákwe tödekani krire Jesubti, aisetet di

tä braibe näin metre Ngöböbe, ye abko niaratre tä näkwite ja kukwäre kukwe kämekäme nuenkäre ben, aisetekukwe kämekäme mdei ietre, yebtä tä ni ye näkwite kore. <sup>19</sup> Erere arato, nitre dirikä blo abko käkwe ni mda mda tikadrete tätre niere, akwa niaratre ara jire tä kukwe kämekäme ngoto täni, ñobtä ñan angwane jändrän ño ño erere kräke ni tä ni klabore kwrere, ni ye abko tä jändrän ye ngoto täni. <sup>20</sup> Akwa nire nire ie ni Dänkien amne ni Diantarikä Jesukristo nukanina gare amne kukwe kämekäme kä nebtä, ye ngäniene kwäräbebarera kwe, abti tä niken nakwenta bobukäre kukwe kämekäme ye arabe jiebti, ye ngwane tä nibrenteta kukwe kämekäme te, aisetekukwe töita nikenta kukwe kämekäme ngoto täni amne tä nebe kukwe nuene bäri käme mda, aisetekukwe ngämi tödeke Jesubti angwane, nämane kukwe käme nuene ñakare abko erere tä nuene bäri mda. <sup>21</sup> Nitre ye abko, ie ji kuin era metre ni Dänkienkwe ñan rükadre gare jire chi abko rabadre bäri kuin kräke abko namani gare ietre, abti tätre kukwe kuin deme biani nuendre diribare ietre abko tätre kiteta temen. <sup>22</sup> Akwa kukwe nieta abko erere namani bare ietre abko krörö:

Nukro tä yen, abti tä kweteta,  
abko nieta Ngöbö Kukweibtä. Erere arato, mtü jükateta tä neme merebe, akwa yebti tä niken jübenta dobrote abko nieta. Nitre ye ie ji kuin era metre ni Dänkienkwe tä nüke gare, abti tä niken kukwe kämekäme nuene bobukäre, ye abko mtü ye kwrere abkobtä tä nakenkä kore.

*Proverbios 26.11*

### 3

#### *Ngöbökwe kä ne gadikä*

<sup>1</sup> Ti mräkätre tare tikwe, tita tärä tiketa bobukäre munye. Tära ketebu nebti abko ti tö kukwe mikaita töre munye amne jändrän kuin deme deme btä munkwe töbikadre, abkokäre tita tike. <sup>2</sup> Nitre deme Ngöbö kukwei niekä käkwe dre dre niebare kira, ye munkwe ngwian töre käre jae. Erere arato, ni Dänkien amne ni Diantarikä Jesukristo käkwe kukwe biani nuendre nie abko nitre Jesukristo kukwei ngwianaka käkwe diribare munye, ye tädre töre käre munye abko ie ti tö, käta tärä ne tike munye.

<sup>3</sup> Ti mräkätre, ti bike kukwe bäri ütiäte nire, nebtä munkwe töbika: Kä mrä angwane, ni jatadi ruäre abko kukwe kämekäme mdei ietre, ye aibe kräke nünandi kwetre amne jatadi Ngöbö Kukwei mike yakrä jae, <sup>4</sup> käkwe niedi krörö: ¿Kristo rükadita bobukäre kä nebtä niebare kwe abko ame? ¿Se ñian ngwarbe ni ngökata ya? Kristo ñian rükadreta, ñobtä ñan angwane ni mräkä känekäne krütanina jökrä, akwa Kristo ngämi nüketa amne kä dätebare ño kena abko erere kä tä ja täritäri abti kä nüke mtare, aisetekukwe ni ngökata, niedi kwetre. <sup>5-6</sup> Akwa niaratre tä töbike blo, ñobtä ñan angwane kena dekä ja kukweibti Ngöbökwe kä käinta dätebare amne kä tementa dätebare ñöbti, ye niaratre ñan tö mikai era. Abti Noé näire nitre kukwe nuenkä kämekäme Ngöbö rüere abko Ngöbökwe ganinkä jökrä ñöbti, aisetekukwe kä dätebare kena abti kä nüke mtare jändrän ñakare ja kwrere ja täritäri, ye abko ñan tö mikai era jae arato. <sup>7</sup> Akwa kä käinta amne kä tementa nita tuen mtare noko abko Ngöbö ara jire käkwe gadikä ñukwä jutrabi ja kukweibti amne, nitre kukwe nuenkä kämekäme Ngöbö rüere, ye abko Ngöbökwe gadikä ñukwä jutrabi kä käinta amne kä tementa noko ngöi jökrä, abkokäre Ngöbö tä kä ngibiare mtare.

<sup>8</sup> Mdakäre abko, ti mräkätre tare tikwe, kukwe ne munkwe ngwian töre käre jae: Kä köböiti ye abko kä mili krati kwrere ni Dänkienkrä amne kä mili krati ye abko kä köböiti kwrere kräke. <sup>9</sup> Ne aisetekukwe käkwe köbö mikaninta, akwa ñan tä ja kukwei mike täte jötrö abko ni ruäre tä nütüre ni Dänkienbtä, akwa ni jökrä kukwe nuenkä kämekäme Ngöbö rüere, ye abko käkwe tödekadre jökrä Jesubti amne ñan rikadre ja tare nike Ngöbö okwä bäre mento, ie Ngöbö tö, aisetekukwe käkwe köbö kite bätärekä ja käne rükakäretä, ye abko munkwe ngwian töre jae. <sup>10</sup> Akwa batibe ni gokä tä nüke, ye kwrere jire ni Dänkien köböi rükai. Köbö ye näire ñukwä jutra rabadi kri krübaté abko ngöi rabadi juuu, käkwe kä käinta se gadikä jökrä. Erere arato, jändrän jökrä bti Ngöbökwe kä dätebare, ye ñukwä

jutrukwe gadikä jökrä arato amne, jäandrän jökrä tä kä nebtä, se abko rukwadi jökrä ñukwä jutrate kä temen noko ngöi jökrä.

<sup>11</sup> Ngöbökwe jäandrän jökrä juandi ngwarbe kore ñukwä jutrabti, ne aisetet munkwe nünandre bari deme ni Dänkien aibe kräke, <sup>12</sup> kákwe Ngöbö köböi ngibia ngäbti kisere amne, munkwe jäandrän jökrä nuen kuin ja di ngöi jökrä Ngöbö köböi ye krötakäre bari jötrö ja kukwäre. Köbö ye näire kä käinta se rukwadi jökrä ñukwäte amne jäandrän jökrä bti Ngöbökwe kä temen ne dätebare abko güdadite jökrä ñukwä jutrate. <sup>13</sup> Akwa Ngöbökwe kä käinta amne kä tementa btin köböi mikani mda nie, ye abko nita ngibiare amne kä btin ye känti abko ni nüne kuin era metre aibe kákwe nünandi.

<sup>14</sup> Ne mdan kisete ti mräkätre tare tikwe, kukwe rakadikä jökrä kore, ye ngibiare ngäbti kisere kwärä munkwe nüna deme amne munkwe ñan ja mika ngite amne munkwe nüna jáme jabtä Ngöböbe amne ni mda mdabe. <sup>15</sup> Mdakäre abko, kukwe ne munkwe ngwian töre jae arato: Ni kwati rabadre dianintari, abkokäre ni Dänkien käta ni ngibiare bätärekä kore. Kukwe ye arabebtä ni mräkä tare kri nikwe Pablo kákwe tärä tikani munye arato amne Ngöbökwe niara mikani töbtä ruen tie. Tita kukwe tike munye, ye kwrere Pablota tike munye arato. <sup>16</sup> Akwa Pablokwe tärä tikani ketareketare, yebtä abko kukwe ruäre tare rükare gare, aisetet nitre ie Ngöbö gare ñakare metre amne nitre töi mräme käta ja töi kwite jötrö jötrö, ye abko käta kukwe tikani Pablokwe kwite bä jene, abti tätre dirire blo. Ye kwrere arato, Ngöbö Kukwei mda mda kwitata kwetre, dokwäre Ngöbökwe mikadi ja ngie nuen abko känänta au jakrä kwetre.

<sup>17</sup> Ne aisetet, ti mräkätre tare tikwe, nitre dirikä blo jatadi ruäre tikwe niebare mun mikakäre mokre abko nena gare munye amne, nitre dirikä blo ye kákwe ñan mun ngökadre, abkokäre munkwe ja ngibia niaratre ngäniene. Erere arato, nitre moto kämekäme ye kákwe ñan mun kitadre ji blobti, abkokäre munta nünenkä dite jabtä, ye kwrere munkwe nünanka janknu, kákwe ja ngibia. <sup>18</sup> Angwane ni Dänkien ni Diantarikä nikwe Jesukristo ye munkwe mika gare bari kuin jae amne ni Dänkien käta mun tarere ja moto kuinbti ye abko rüka gare täte jökrä munye. ¡Ni Dänkien aibe raba käkitaninkä mtare amne kärekäre! Amen. Abko kore se. Ne ngörä.

## Tärä Tikani Käne Juankwe 1 Juan

Ni ja töitikaka Jesube kädian nämane Juan käkwe tärä ne tikani. Niarakwe tärä mda mda tikani arato abko krörö: Kukwe Kuin Jesubtä Tikani Juankwe, 2 Juan, 3 Juan, Apocalipsis. Nitre tödekaka Jesubti nämane nüne juta kwatirekwatire te käkä Asiate, kräke tärä ne tikani. Mtare kä Asia abko kädianta Turquía. Juan namanina unbre angwane tärä ne tikani kwe.

Jesukristo köböire Ngöbö nämane nitre tödekaka Jesubti tarere kri krübäte, käkwe kukwe kuin bätäkä ngwarbe nuenbare kräke abko Juan tö namani mikai gare ietre tärä nehti, käkwe tikani. Erere arato, nitre tödekaka Jesubti käkwe ni mda mda taredre era metre, ñobtä ñan angwane nita ni mda mda tarere metre angwane, Ngöböta ni bkäne era metre tä nüke gare nie, niebare Juankwe.

Mdakäre abko, Juankwe tärä ne tikani nitre tödekaka Jesubti mikakäre mokre dirikätre blobtä. Jesukristo abko ñakare ni kwrere abko dirikätre blo nämane niere. Niara bā namani ni kwrere amne ngrabare aibe ni ngrabare kwrere dirikätre blo nämane niere, akwa niara ñakare ja kwrere nibe amne ñakare Ngöbö Odei abko dirikätre blo nämane niere. Nitre tödekaka Jesubti käkwe ñan olo ketadrete jire chi nitre yeye, ñobtä ñan angwane dirikätre kore abko ni ni ngökaka, niebare Juankwe. Kukwe era metre Ngöböbtä amne Ngöbö Odei Jesukristobtä, ye abko Ngöbö Üai käkwe mikadi gare abko Juankwe niebare abko erere tikani täräbtä.

### *Jesukristo abko Kukwe Ngöbökwе kwrere*

<sup>1</sup> Ti Juan käta tärä ne tike munye. Kena dekä, kä ne däte ngämi, känenkri Jesukristo nämanena. Jesukristo ye abko nunkwe kukwei nuaba, nunkwe tuaba ja okwä jenbti amne nunkwe nuabtaba ja kise jenbti. Niara ye abko Kukwe kwrere nikrä, käta ni mike nüne kärekäre Ngöböbe abko nunta mike gare munye. <sup>2</sup> Jesukristo nämanena kena ni Rün Ngöböbe, akwa Ngöbökwе juani nüne nun ngätäite nete angwane, nunkwe tuaba, aisetet nunta blite btä munbe. Niara ni mikaka nüne kärekäre Ngöböbe abko nunta mike gare munye. <sup>3</sup> Nunkwe niara tuaba amne nunkwe kukwei nuaba abko erere nunta mike gare munye angwane, nunta ja gete era metre Ngöbö ni Rün nikwebe amne Odei kwe Jesukristobe, ye kwrere mun rabadre ja gete nunbe, abkokäre nunta kukwe era metre niarabtä ne mike gare munye, <sup>4</sup> kä rabadre nuäre täte jökrä munbtä, abkokäre nunta tärä ne tike munye.

### *Nünandre metre*

<sup>5</sup> Kukwe diribare Jesukristokwe nunye abko erere nunta mike gare munye abko krörö: Ngöbö abko ñotra kwrere amne kä iko ñakare jire chi btä.\* <sup>6</sup> Ne aisetet nita ja gete era metre Ngöböbe ni tädre niere, akwa ni tädre ja mike ngite käre Ngöbö rüere kä ikote, ye ngwane nita ni ngökö amne kukwe era metre Ngöbökwе käta nünamna metre nie, ye kwrere nita nüne ñakare. <sup>7</sup> Akwa ñotra trä dirare, te Ngöböta nüne deme amne metre, ye kwrere nita nüne deme amne metre ñotra träte ne ngwane, nita ja gete era metre jabe kwärikwäri amne, Ngöbö Odei Jesu krütani krusobtä nikrä angwane, ja därie ianinte nikrä kwe, ye köböire Ngöböta ni ngite bätete jökrä nibtä, käta ni mike deme ja ngwärekri.

<sup>8</sup> Akwa ni ja mike ngite ñakare Ngöbö rüere nikwe niedre ne ngwane, nita ja ngökö au amne nita ñäke ngwarbe, ñobtä ñan angwane Ngöbö Kukwei era metre ye gare ñakare nie. <sup>9</sup> Akwa nita kukwe nuene kämekäme abtä ni ngite Ngöbö ngwärekri, ye nikwe niedre metre jökrä Ngöböye ne ngwane, Ngöbökwе ni ngite diandrekä nibtä niebare kwe, aisetet

---

\* <sup>1:5</sup> Ngöbö abko ñotra kwrere amne kä iko ñakare jire chi btä. Ngöbö abko ñotra kwrere, ye abko käta Ngöbö abko deme, era metre amne moto kuin bā mike. Niarata kukwe käme nuene ñakare jire chi abko “kä iko ñakare jire chi btä” käta bā mike.

ja kukwei mikadi täte kwe amne Ngöbö abko metre, aisetet ni ngite ye diandikä jökrä nibtä mento kwe amne ni mikadi deme ja ngwärekri kwe. <sup>10</sup> Akwa ni ngite Ngöbö rüere, Ngöbökwe niebarera nibtä, aisetet ni ja mike ngite ñakare Ngöbö rüere nikwe niedre, ye ngwane nita Ngöbö bää mike ni ni ngökaka kwrere. Erere arato, ni ja mike ngite ñakare nikwe niedre, ye ngwane niara kukwei abko nita mike ñakare ütiäte jae.

## 2

<sup>1</sup> Ti mräkätre, mun abko ti ngäbriänkätre tikwe kwrere. Munkwe ñan ja mikadre ngite Ngöbö rüere, abkokäre tita tärä ne tike munye. Akwa nane ni iti tödekaka Jesubti kákwe ja mikadre ngite angwane, Ngöbökwe niara ngite diandikä mento btä, ñobtä ñan angwane blitaka tärä nikrä ni Rün Ngöbö ngwärekri. Ni blitaka nikrä ye abko Jesukristo ara. Niara abko Ni Era Metre. <sup>2</sup> Jesukristo kákwe ja mikani müre ketadre krusoftä Ngöbö mätä kri diankakäre nibtä amne Ngöbö moto mikakäreta jäme nikrä, erere arato ni ngite diankakäre nibtä. Ye abko ñan ni ne aibe kräke akwa, ni kä jökräbti temen kräke ja mikani müre ketadre kore kwe.

<sup>3</sup> Ye abko, Ngöbökwe kukwe biani nuendre nie, ye erere nita mike täte ne ngwane, Ngöbö nena gare metre nie abko rükadi gare jabtä nie. <sup>4</sup> Akwa nire nire kákwe niedre: Ngöbö nena gare tie, niedre kwe, akwa kukwe biani Ngöbökwe nuendre nie abko mike ñakare täte ne ngwane, ni ye abko tä ni ngökö jirekäbe amne Ngöbö Kukwei era metre gare ñakare ie. <sup>5-6</sup> Akwa nire nire tä Ngöbö Kukwei mike täte angwane, ni ye abko tä Ngöbö tarere era metre bkänä. Ye abko, nire nire käta niere, tita nüne kuin metre Ngöböbe abko tä niere, ye ngwane Jesukristo kákwe nünabare ño kä nebtä, ye kwrere nünandre kwe arato. Nita nüne kore ne ngwane, nita nüne ketetibe Ngöböbe abko tä gare era metre jabtä nie.

<sup>7</sup> Mdakäre abko ti mräkätre tare tikwe, kukwe biani nuendre Ngöbökwe tita tike munye, ye abko ñakare biani btin abko tita tike, ñobtä ñan angwane mun jatani tödeke krile Jesubti angwane, munkwe ja taredre kwärikwäri abko niebarera munye, aisetet kukwe ne abko garera munye, aisetet ñakare btin munkrä. <sup>8</sup> Akwa kukwe ye abko kukwe btin kwrere abko tita tiketa munye. Kristokwe ni tarebare era metre, ye kwrere munta ja tarere era metre kwärikväri, ñobtä ñan angwane Jesu jatani amne, jäandrän kämekämä nämane Ngöbö rüere abko jatani jire jökrä kä ikokri ye abko kitera niken ta amne, Ngöbö trä kuin era metre kiteraträ ngitiekä, ye mden abko kukwe btin, btä tita tärä tike munye.

<sup>9</sup> Ye abko, nire nire tä nüne deme amne metre Ngöbö träte tä niere, akwa tä bätä ngwen mräkäbtä, ni ye abko tä dikekä kä ikote Ngöbö rüere. <sup>10</sup> Akwa nire nire käta mräkä tarere era metre, ye abko tä nüne Ngöbö träte amne kukwe ñakare jire niara töite kä raba mike niken ngwarbe Ngöbö bäre mento. <sup>11</sup> Akwa nire nire käta bätä ngwen mräkäbtä, ni ye abko tä nüne amne tä dikekä kä ikote, ñobtä ñan angwane nita dikekä ji ngrabare kä ikote angwane, käta neme tuen ñakare nie, ye kwrere ni ye tä nüne kä ikote, aisetet tä niken mento Ngöböbtä abko tuen ñakare ie.

<sup>12</sup> Ne abko, mun ngäbäkrere, ie tita tärä ne tike, ñobtä ñan angwane Jesukristo krütani krusoftä, ye köböire Ngöbökwe mun ngite dianinkä jökrä munbtä, aisetet tita tärä ne tike munye.

<sup>13</sup> Mun tataretatare abko ie tita tärä ne tike arato. Ngöbö ngämi kä ne dättere, känenkri Jesukristo nämanena. Jesukristo ye abko nükanina gare munye, aisetet tita tärä ne tike munye.

Mun bati bati abko käta ni rüe Satana ngututu ganaine kwäräbe, aisetet tita tärä ne tike munye.

Angwane mun ngäbäkrere abko ie ni Rün Ngöbö nükanina gare, aisetet tita tärä ne tike munye.

<sup>14</sup> Mun tataretatare abko Ngöbö ngämi kä ne dättere, känenkri Jesukristo nämanena. Jesukristo ye abko nükanina gare munye, aisetet tita tärä ne tike munye.

Mun bati bati abko dite dite Ngöbö Kukweibä. Ngöbö Kukwei tä käre mun töite amne munta ni rüe Satana ngututu ganaine kwäräbe, aisetet tita tärä ne tike munye.

*Ni ñan rankwadre jändrän kä nebtä jiebti*

<sup>15</sup> Mdakäre abko, jändrän kämekäme Ngöbö rüere kä nebtä, ye munkwe ñan tare jire chi, ñobtä ñan angwane nire nire tä jändrän Ngöbö rüere tarere, ni ye abko ñan tä ni Rün Ngöbö tarere, <sup>16</sup> ñobtä ñan angwane jändrän jökrä kämekäme Ngöbö rüere ye abko tä kite ñakare ni Rün Ngöbö kri, akwa jändrän jökrä kä nebtä tä Ngöbö rüere, yekri tä kite. Angwane jändrän kämekäme kä nebtä tä rüre Ngöbö rüere abko krörö: ja mika gure bati bati bätäkä ngwarbe abko mdeita nebe nie. Erere arato, jändrän tä nebe tuen kuin ni okwaye abko mdeita nebe nie amne, nita jändrän bkäne amne nita dre dre nuene, yebtä nita bike kri abko tä Ngöbö rüere kä nebtä. <sup>17</sup> Akwa jändrän jökrä kämekäme Ngöbö rüere mdeita nebe nie, ye abko rikadi jökrä ta, akwa Ngöbö tö dreye, erere nire nire tä mike täte, ni ye abko kákwe nünandi kärekäre Ngöböbe.

*Nitre Kristo rüe, ye ngäniene nikwe ja ngibia*

<sup>18</sup> Ti mräkätre, mun abko ti ngäbriänkätre tikwe kwrere. Kä ne abko kä mrä. Kä mrä angwane, ni iti kädianta Kristo Rue jatadi iti niebare, ye abko munkwe kukwe nuani, ye erere Kristo rüe nükanina kwati dirire mtare, ye mdentä abko kä mrä nükera abko tä gare nie. <sup>19</sup> Nitre Kristo rüe ye abko nämane ja ükekrö ketetibe nibe, akwa niaratre nämane tödeke ñakare era metre Jesubti, aisetet nämane nekete ñakare era metre nibe, aisetet nikani nibtä mento. Niaratre tädre tödeke era metre Jesubti angwane, tädre nekete era metre gwaire nibe akräke tädre ketetibe nibe; akwa nämane tödeke ñakare era metre Jesubti amne nämane nekete ñakare era metre nibe abko rükadre gare btä, abkokäre nikani jökrä jenena nibtä mento.

<sup>20</sup> Ye abko nitre Kristo rüe rükadre gare metre munye, abkokäre Kristo Ni Deme kákwe Ngöbö Üai mikani nüne munbtä, aisetet kukwe era metre nena gare mun jökräye. <sup>21</sup> Tita tärä ne tike munye ye abko ñan kukwe era metre gare ñakare munye abtä tita tike, akwa kukwe era metre nena gare kuin munye, aisetet tita tärä ne tike kore munye, ñobtä ñan angwane kukwe dirita ngwarbe, ye ñan tä kite kukwe era metrekri ye garera munye, abtä tita tärä ne tike kore munye. <sup>22</sup> Nire nire ni ngökaka abko ti bike nire munye. Jesu abko Ni Dianinkä ñakare Ngöbökwe, ye nire nire tä nire, ni ye abko ni ngökaka amne ni ye abko Kristo rüe amne Ngöbö ni Rün nikwe mikata ütiäte ñakare kwetre. Erere arato, Jesu ye abko Ngöbö Odei abko mikata era ñakare kwe. <sup>23</sup> Ne aisetet, nire nire käta Jesu mike ñakare ütiäte Ngöbö Odei kwrere, ni ye abko ie Ngöbö ni Rün gare ñakare; akwa nire nire käta Jesu mike ütiäte jae Ngöbö Odei kwrere, ni ye abko ie Ngöbö ni Rün nena gare era metre.

<sup>24</sup> Mdakäre abko, mun jatani tödeke krire Jesubti angwane, kukwe kuin Jesubtä diribare kena munye, ye munkwe ketate käre kisete jakrä. Munkwe nuendre kore ne ngwane, mun tädi nüne käre ketetibe Ngöbö Odeibe amne Ngöbö ni Rünbe arato. <sup>25</sup> Ye abko, nikwe nünandre kore ketetibe bentre angwane, nikwe nünandi kärekäre ben, ye mdent abko Jesukristokwe köböi mikani nie.

<sup>26</sup> Ye abko, ni ruäre tö mun ngökai, tö mun ngwiain ji blobti Ngöbö bäre mento. Ni yebtä abko tita tärä ne tike munye mun mikakäre mokre. <sup>27</sup> Akwa Jesukristo kákwe Ngöbö Üai Deme mikani nüne munbtä, ye abko tä kukwe jökrä Ngöböbtä amne Kristobtä dirire munye amne, kukwe dirita Ngöbö Üaikwe munye, ye abra era metre amne tä ni ngökö ñakare. Ye aisetet, ni mdakwe diridre munye ye abko ñakare ütiäte munkrä, aisetet Ngöbö Üai kákwe diribare ño munye Kristobtä, ye kwrere munkwe nüna ketetibe Kristobe.

*Ni tödekaka Jesubti abko Ngöbö ngäbriänkätre*

<sup>28</sup> Mdakäre abko, mun ti ngäbriänkätre tikwe kwrere. Kristo rükadita angwane, niara jürä ñan rabadre nibtä amne ni ñan rabadre ja gaire niara ngwärekri, akwa ja rabadre ruen jäme nie niara ngwärekri, abkokäre munkwe nüna käre ketetibe ben.

<sup>29</sup> Niara abko era metre, ye garera munye, aisetet nire nire käta nüne era metre, ni ye abko Ngöbö ngäbriänkä.

## 3

<sup>1</sup> ¡Anchinal! Ngöbö ni Rün nikwe käta ni tarere kri krübäte tuen munkwe abko krörö: ni abko Ngöbö ngäbriänkätre ara niarata niere nie mtare. Ye abko, nitre kä nebtä tä nüne Ngöbö rüere, ie Ngöbö gare ñakare, aisetet ni abko Ngöbö ngäbriänkätre ñan tä nüke gare ietre arato. <sup>2</sup> Ti mräkätre tare tikwe, ni abko nena Ngöbö ngäbriänkätre era metre bkänä, akwa ni rabadi ño mrä, ye abko Ngöbö ngämi mike gare. Akwa Jesukristo rükadita angwane, niara abko ño nikwe tuadi ja okwä jenbti, aisetet ni rabadi niara kwrere arato. <sup>3</sup> Ye abko nire nire tö ja tuai Jesube, käta ngibiare ngäbti kisere, ni ye abko tä ja ngibiare bäri kukwe käme ngäniene nünakäre deme, Jesukristo kuin deme ye kwrere.

<sup>4</sup> Akwa nire nire käta kukwe nuene kämekäme ja mikakäre ngite Ngöbö rüere, ni ye abko tä kukwe biani Ngöböökwe nuendre nie kite temen, ñobtä ñan angwane nita kukwe nuene kämekäme angwane, kukwe biani Ngöböökwe nuendre nie ye nita kite temen. <sup>5</sup> Akwa Jesukristo nükani kä nebtä ni ngite Ngöbö rüere ye diankakäre mento jökrä nibtä, ye abko nena gare munye amne, Jesukristo abko kákwe ja mikani ngite ñakare jire batí Ngöbö rüere. <sup>6</sup> Ye aisetet, nire nire tä nüne ketetibe niarabe, ni ye abko ñan tä niken ja mike ngite janknu Ngöbö rüere; akwa nire käta ja mike ngite käre Ngöbö rüere, ni ye abko kákwe ñan Jesukristo tuabare amne gare ñakare ie.

<sup>7</sup> Ti ngäbriänkätre tikwe, munkwe ñan ja ngökamna ni mda mdaye kukwe nebtä. Nire nire käta kukwe era metre nuene, ni ye abko ni era metre Ngöbö ngwärekri, ñobtä ñan angwane tä nekete Ngöbö era metre yekri. <sup>8</sup> Akwa nire nire käta kukwe nuene kämekäme, käta ja mike ngite Ngöbö rüere, ni ye abko tä kite diablukri, ñobtä ñan angwane kira kena abti kä nüke mtare, käre diabluta ja mike ngite Ngöbö rüere. Ngöbö Odei nükani kä nebtä sribi diablukwe bätäkä ngwarbe juankäre ngwarbe. <sup>9</sup> Nire nire Ngöbö ngäbriänkä abko ñan tä kukwe kämekäme nuene janknu ja mikakäre ngite, ñobtä ñan angwane Ngöbö Üai tä nura kwrere btä abko rikai Ngöbö ngäbriänkä töi kwite, Ngöböta töbike ño ye kwrere, aisetet ñan raba ja mike ngite janknu Ngöbö rüere. <sup>10</sup> Nire nire Ngöbö ngäbriänkä amne nire nire diablu ngäbriänkä tä nüke gare krörö nie: Nire nire ñan tä jändrän kuin nuene ni mdakrä amne ñan tä mräkä tarere, ni ye abko ñakare Ngöbö ngäbriänkä.

### Nikwe ja taredre kwärikwäri

<sup>11</sup> Mdakäre abko, mun nikani tödeke krire Jesubti angwane, kukwe diribare munye abko krörö: Nikwe ja taredre kwärikwäri abko diribare munye. <sup>12</sup> Nikwe ja mikadre ngite ñakare Caín tukwe kwrere. Caín abko diablukwe, aisetet moto käme diablu kwrere, kákwe etba Abel kämikan, ñobtä ñan angwane Caín moto käme, erere nämane kukwe nuene käme. Akwa Abel abko moto kuin, aisetet nämane jändrän kuin nuene, ye dokwäre Caín moto nämane iko kräke amne namani bätä ngwen btä, kákwe kämikan. <sup>13</sup> Ne aisetet ti mräkätre tikwe, munta jändrän kuin nuene, dokwäre nitre nünanka Ngöbö rüere Caín kwrere käta bätä ngwen munbtä angwane, yebtä munkwe ñan töbika dikaro, <sup>14</sup> ñobtä ñan angwane ni ngämi tödeke Jesubti, känenkri ni nämane ni ngwäkäre kwrere Ngöbö ngwärekri arato, akwa nikwe tödekani Jesubti, aisetet mtare nita ni nire kwrere, ye abko nena gare metre nie, ñobtä ñan angwane mtare nita ni mräkä tarere aisetet. Akwa nire nire ñan tä mräkä tarere, ni ye abko tä ni ngwäkäre kwrere. <sup>15</sup> Ye abko, nire nire tä bätä ngwen mräkäbtä, ni ye abko ni kämikaka Ngöbö okwäbti amne, ni ni kämikaka kákwe ñan nünandi kärekäre Ngöböbe, ye nena gare munye.

<sup>16</sup> Akwa nikwe ja taredre ño kwärikwäri abko Jesukristokwe mikani gare krörö nie: Jesukristo kákwe ja biani müre ketadre nikrä, ye kwrere nikwe ja taredre kwärikwäri angwane, ni rabadre biare krüte ni mräkä kräke arato. <sup>17</sup> Ye abko ti bike bä mike krörö munye: Ni tödekaka Jesubti ngwian bkäne tädre iti amne niara mräkä bobre tädre siba, akwa ni ngwian bkäne ie rabadre ruentari tare ñakare, kákwe mräkä bobre ye die mikadre ñakare, ¿ni ye abko tä Ngöbö tarere ya? ¡Ñakare jire chi!

<sup>18</sup> Mun ti ngäbriänkätre tikwe kwrere, nikwe ñan ni mräkä taredre kadabti be ni ngwian bkäne ye kwrere, akwa nikwe jändrän kuin nuendre ni mräkäkrä amne nikwe

ni mräkä taredre era metre arato. <sup>19-20</sup> Mdakäre abko, ja rabadre ruen ngite nie Ngöbö ngwärekri angwane, Ngöböta ni bkäne era metre amne kukwe era metre Ngöbökwe, btä nita nekete era metre, ye tä nüke gare krörö nie, ni rabadre nüne moto jäme blitakäre Ngöböbe: Ngöbö bäri töbtä ni ngwä amne ni moto amne ni töi ño ño abko gare metre ie.

<sup>21-22</sup> Ne aisetet ti mräkätre tare tikwe, ja rabadre ruen ngite ñakare nie Ngöbö ngwärekri ne ngwane, ni rükadi jäme Ngöbö ngwärekri blitakäre ben, ñobtä ñan angwane Ngöbö tö dreye, erere nita nuene amne, kukwe biani bätäkä ngwarbe nuendre nie Ngöbökwe, erere nita mike täte, aisetet nikwe dre dre ribedre ie, erere biandi jökrä kwe nie. <sup>23</sup> Ye abko, kukwe bäri ütiäte biani keteti nuendre nie Ngöbökwe abko nikwe tödekadre niara Odei Jesukristobti amne, Jesukristo käkwe ja taremna ño nie, ye kwrere nikwe ja taredre kwärikwäri. <sup>24</sup> Ngöbökwe kukwe ye biani nuendre nie, ye nire nire tä mike täte abko tä nüne ketetibe Ngöböbe amne Ngöböta nüne ketetibe ben. Ngöbökwe ja Üai mikani nüne nibtä, ye mden köböire abko Ngöböta nüne ketetibe nibe abko tä nüke gare nie.

## 4

*Üai mden mden köböire dirita abko mikadre ñäräre*

<sup>1</sup> Ti mräkätre tare tikwe, ti bike kukwe mdara jire nire munye abko krörö: Ni jökrä jata dirire munye abko tä näin dirire Ngöbö Üai köböire jata nire, ni ye abko ie munkwe ñan ja ngwian nain jötrö ngwarbe, akwa tä näin dirire era metre Ngöbö Üai köböire ya, o üai käme köböire ya, ye abko munkwe mika ñäräre kuin, ñobtä ñan angwane ngöbö ngwarbe kukwei niekä tä näin kwati mtare üai käme köböire, aisetet munkwe ja ngibia kuin. <sup>2</sup> Ye abko, nire nire btä Ngöbö Üai tä era metre bkänä abko köböire tä dirire abko rükadre gare krörö munye: Jesukristo abko därebare era metre ni kä nebtä kwrere, ye nire nire käta mike era jae, erere tä nire, ni ye abra btä Ngöbö Üai tä era metre bkänä; <sup>3</sup> akwa Jesu därebare era metre ni kä nebtä kwrere, ye nire nire ñan tä mike era, akwa tä rükente ne ngwane, ni ye abko btä Ngöbö Üai ñakare amne niara abko tä näin Kristo Rüe üai kämenbti. Nitre dirikä kore jatadi abko niebarera, ye munkwe kukwei nuani, ye mden abko nükanina kä ketareketare temen, aisetet munkwe ñan ja ngwian nain.

<sup>4</sup> Ti mräkätre, mun abko ti ngäbriänkätre tikwe kwrere. Mun abko jen Ngöbökwe, aisetet nitre ni ngökaka abko munkwe ganainbare kwäräbe, ñobtä ñan angwane Ngöbö Üai tä munbtä abko bäri di kri üai käme Ngöbö rüere kä nebtä ye ngwä, aisetet munkwe ganaibarera kwäräbe. <sup>5</sup> Jändrän jökrä tä Ngöbö rüere, yekri nitre ye tä nekete, aisetet tä ñäke Ngöbö rüere amne nitre nünanka Ngöbö rüere abko tä olo ketete niaratré kukweiye.

<sup>6</sup> Akwa ni abko, ni jen Ngöbökwe, aisetet nire nire ie Ngöbö gare abko tä olo ketete ni kukweiye; akwa nire nire ñan tä olo ketete ni kukweiye abko ñakare jen Ngöbökwe. Ne aisetet nire nire btä Ngöbö Üai era metre tä abko tä ni kukwei mike era; akwa nire nire btä üai käme ni ngökaka tä abko ñan tä ni kukwei mike era jae.

*Ngöböta ni tarere, kwrere nikwe ni mräkä taredre*

<sup>7</sup> Ti mräkätre tare tikwe, Ngöbö aibe käta ni kite ni mda mda tarere, aisetet ari ja tarere kwärikwäri. Nire nire käta mräkä tarere abko därebare Ngöbökri, aisetet Ngöbö ngobo amne Ngöbö gare metre ie. <sup>8</sup> Ngöbö abko ni tarekä amne jändräni jökrä nuenta kwe abko tä nuene ni tarekäre, aisetet nire nire ñan tä ni mda mda tarere, ni ye abko ie Ngöbö gare ñakare. <sup>9</sup> Ngöböta ni tarere ye abko bä mikani krörö kwe nie: Nikwe nünandre kärekäre Ngöböbe, abkokäre Ngöbökwe ja Odei itibe juani kä nebtä. Ye kwrere Ngöböta ni tarere abko bä mikani kwe nie. <sup>10</sup> Erere arato, Ngöböta ni tarere kri abko krörö: Ñan nikwe Ngöbö tarebare käne abtä Ngöböta ni tarere, akwa Ngöbö ara jire kákwe ni tarebare käne, kákwe ja Odei juani krüte krusobtä ni kräke, Ngöbö mätä kri nibtä diankakäre mento amne Ngöbö moto mikakäre jäme ni kräke amne ni ngite Ngöbö rüere ye diankakäre mento nibtä, abkokäre krütani. <sup>11</sup> Ne aisetet, ti mräkätre tare tikwe, Ngöbökwe ni tarebare kri kore, ye kwrere nikwe ja taredre kwärikwäri arato. <sup>12</sup> Ni ngämi

Ngöbö tuen jire bati, akwa nita ja tarere kwärikwäri, ye ngwane Ngöböta nüne nibtä abko tuata nibtä, amne nikwe Ngöbö taredre ño metre, erere arato nikwe ni mda mda taredre metre abko tä nüke gare nie.

<sup>13</sup> Mdakäre abko, nita nüne ketetibe Ngöböbe amne Ngöböta nüne ketetibe nibe, ye abko gare nie, ñobtä ñan angwane Ngöbökwe ja Üai mikani nüne nibtä. <sup>14</sup> Ye abko, ni Rün käkwe ja Odei juani ni jökrä diantarikäre, ye abko nunkwe tuani amne nunta mike gare ni jökräye. <sup>15</sup> Jesu abko Ngöbö Odei era metre, ye nire nire kräke tä nebe era, käta tödeke bti, ni ye abko tä nüne ketetibe Ngöböbe amne Ngöböta nüne ketetibe ben arato. <sup>16</sup> Ye abko Ngöböta ni tarere era bkänä, yebti nita tödeke amne nita mike era.

Ngöbö abko ni jökrä tarekä, aiseete nire nire käta kä bien Ngöböye ja tarekäre, ni ye abko käta ni mda mda tarere amne tä nüne ketetibe Ngöböbe amne Ngöbö tä nüne ketetibe ben. <sup>17</sup> Ngöböta ni tarere, ye tä nebe era nikrä, ye ngwane Ngöbökwe kukwe ükadite ni jökrä kräke kä mrä angwane, kä jürä rabadre ñakare nibtä Ngöbö ngwärekri, ñobtä ñan angwane Jesukwe nünabare kä nebtä, ye kwrere nita nüne, aiseete ni rabadre moto jäme Ngöbö ngwärekri. <sup>18</sup> Ye abko, Ngöböta ni tarere era metre gare nie angwane, kä jürä ñakare nibtä Ngöbö ngwärekri, ñobtä ñan angwane Ngöböta ni tarere era metre, ye abko tä Ngöbö jürä nibtä juentari mento, akwa nane Ngöbö jüräta neme nibtä, ye ngwane Ngöböta ni tarere era metre ngämi nüke gare täte jökrä nie.

<sup>19</sup> Mdakäre abko, Ngöbökwe ni tarebare käne, ye mden kisete nita Ngöbö tarere amne nita ja tarere kwärikwäri. <sup>20</sup> Akwa nire nire käkwe niedre: Tita Ngöbö tarere, niedre kwe, ye btäräbe tädre bätä ngwen mräkäbtä, ni ye abko tä ni ngökö jirekäbe amne niara ñan raba Ngöbö tarere, ñobtä ñan angwane niara mräkä tuen ie abko nuäre taredre, akwa tä tarere ñakare, ¿se abko Ngöbö tuen ñakare ie abko tareta era kwe ya? ¡Ñakare jire chi!

<sup>21</sup> Ne aiseete niarakwe kukwe biani nuendre nie abko krörö: Nire nire käta Ngöbö tarere ye käkwe mräkä taredre arato abko biani nuendre kwe nie.

## 5

### Nikwe tödekadre Ngöbö Odeibti

<sup>1</sup> Jesu abko Ni Dianinkä Ngöbökwe, ye nire nire käta mike era amne tä tödeke bti, ni ye abko därebare Ngöbökri, aiseete Ngöbö ngobo. Ye abko, ti mräkätre, nire nire käta ni rün tarere, ni ye abko käta ni rün ye ngäbriänkätre tarere arato, <sup>2</sup> aiseete nita Ngöbö tarere amne nita niara kukwei mike täte, ye ngwane nita Ngöbö ngäbriänkätre mda mda tarere arato abko tä nüke gare nie. <sup>3</sup> Ye abko, nita Ngöbö tarere angwane, nita kukwe biani Ngöbökwe nuendre nie ye mike täte jökrä amne, kukwe biani nuendre kwe nie, ye abko ñakare tare nuene, ñakare tribe doboko kwrere, <sup>4-5</sup> ñobtä ñan angwane Jesu abko Ngöbö Odei ye nire nire käta mike era jae, käta tödeke bti, ni ye abko Ngöbö ngäbriänkä. Erere arato, ni ye käta jändrän jökrä kämekäme Ngöbö rüere kä nebtä ganaine. Ye abko, tödeka kwatibe Jesubti, ye aibe köböire nita kukwe kämekäme Ngöbö rüere ganaine.

<sup>6</sup> Mdakäre abko, Jesukristo abko Ngöbö Odei era metre nükani ni ngätäite, ye abko ñö amne däri käkwe bå mikani. Ye abko, ñan ñö aibe käkwe bå mikani, akwa ñö amne däri arato käkwe bå mikani. Erere arato, Ngöbö Üai ara jire käta kukwe ne mike gare metre nie Jesukristobtä amne, Ngöbö Üai tä ni ngökö ñakare jire. Jesukristo abko Ngöbö Odei era metre, ye abko Ngöbö Üai tä mike gare nie. <sup>7</sup> Ye abko, jändrän ketamä käta kukwe era niere kore Jesukristobtä abko krörö: <sup>8</sup> Ngöbö Üai amne ñö amne däri abko käta blite ja kwrere jökrä Jesukristobtä. <sup>9</sup> Ni mda abko tä kukwe niere ni mdabtä angwane, nita mike era. Ngöbö bäri ütiäte kri ni ngwä, aiseete Ngöböta kukwe era erere niere Jesubtä ye abko bäri ütiäte, ñobtä ñan angwane Ngöböta kukwe era erere niere nie niara Odeibtä, aiseete bäri rabadre era nikrä. <sup>10</sup> Ne aiseete, nire nire tä tödeke Ngöbö Odei Jesukristobtä ye abko tä kukwe niebare Ngöbökwe niara Odeibtä ye mike era jae; akwa nire ñan tä kukwe niebare Ngöbökwe niara Odeibtä ye mike era jae, ni ye abko tä Ngöbö bå mike ni ni ngökaka kwrere, ñobtä ñan angwane kukwe era niebare Ngöbökwe ja Odei Jesukristobtä abko ñan tä mike era jae aiseete. <sup>11</sup> Kukwe era metre niebare Ngöbökwe niara Odeibtä

abko krörö: Ngöböta ni mike nüne kärekäre niara Odei köböire. <sup>12</sup> Ye aise, nire nire tä tödeke Ngöbö Odei Jesukristobti, ni ye abko rabadi nüne kärekäre Ngöböbe, akwa nire nire ñan tä tödeke Ngöbö Odei Jesukristobti, ye kákwe ñan nünandre kärekäre Ngöböbe.

*Kukwe mrä*

<sup>13</sup> Mdakäre abko ti mräkätre, munta Ngöbö Odei mike era jae, käta tödeke bti, ye köböire mun rabadi nüne kärekäre Ngöböbe abko rabadre gare metre munye, abkokäre tita tärä ne tike munye. <sup>14</sup> Mdakäre abko, nita krötö Ngöbö ken kukwe ribere ie, ye ngwane ni raba kukwe ribere jáme ie, ñobtä ñan angwane, Ngöbö tö dreye nikrä abko erere nita kärere ie, ye ngwane tä ni kukwei kaen ngäbti ja moto kuinbti. <sup>15</sup> Nita jäandrän kärere Ngöböye angwane, Ngöböta ni kukwei kaen ngäbti ja moto kuinbti abko garera nie, ye kwrere arato jäandrän käräta ie nikwe, ye biandi kwe nie abko gare kuin nie arato.

<sup>16</sup> Mdakäre abko, mun mräkä mden tua ja mike ngite munkwe angwane, kukwe btä ja mika ngite kwe, yebtä Ngöböökwe ñan mikadre ja tare mike kärekäre ja okwä bäre mento ne ngwane, munkwe blita kräke Ngöböbe angwane, Ngöböökwe mikadita nüne kärekäre jabe, ñobtä ñan angwane kukweta kwati btä ja mikata ngite abko käta ni mike kärekäre Ngöbö okwä bäre mento, yebtä abko munkwe blitadre Ngöböbe kräke abko tita nire ñakare. <sup>17</sup> Kukwe jökrä kämekäme nuenta nikwe, yebti abko nita ja mike ngite Ngöbö rüere, akwa kukwe tärä ruäre btä nita ja mike ngite abkobtä Ngöbö ñan tä ni mike ja tare mike kärekäre ja okwä bäre mento.

<sup>18</sup> Mdakäre abko, nire nire därebare Ngöböökri abko Ngöbö ngäbriänkä, ni ye abko ñan tä niken ja mike ngite janknu Ngöbö rüere, ye abko garera nie, ñobtä ñan angwane Satana ngututu käme kákwe ñan diandrekä jakri abko ngäniene Ngöbö Odei Jesu därebare Ngöböökri, käta ngibiare ja kisete, ye abko gare nie arato. <sup>19</sup> Ni abko Ngöbö ngäbriänkätre amne ni kä jökräbti temen tä nüne Ngöbö rüere abko tä Satana ngututu ngoto täni, ye garera nie. <sup>20</sup> Akwa Ngöbö Odei nükani kä nebtä, kákwe ni töi tikani, Ngöbö era metre rabadre nüke gare nie abkokäre, ye garera nie arato. Ye mden kisete, Ngöbö era metre, ben nita nüne ketetibe mtare amne, nita nüne ketetibe Jesukristo Ngöbö Odei ara ben arato. Jesukristo ye abko Ngöbö era metre amne ni mikaka nüne kärekäre Ngöböbe arato abko nena gare nie ti mräkätre.

<sup>21</sup> Mräkäre abko, mun ti ngäbriänkätre tikwe kwrere, jäandrän ngwarbe sribebare ngöböre, ye ngäniene munkwe ja ngibia amne munkwe ñan mika ngöböre jae abko tita nire mrä munye. Abko kore se. Ne ngörä.

## Tärä Tikani Bobukäre Juankwe 2 Juan

Juan ne mden kákwe tärä 1 Juan tikani arato. Niara abko Jesu kukwei ngwianka. Nire kräke tärä ne tikani kwe, btä töbikata jene jene. Meri nämane iti amne ngäbäkre kwe, kräke Juankwe tärä ne tikani abko ni ruäre tä nütüre. Akwa kukwe “meri” amne “ngäbäkre kwe” käta nitre gätäkä Jesu kähti bä mike kore abko ni kwati tä nütüre, aise te nitre tödekaka Jesubti kä nämane gätäre Jesu kähti, kräke Juankwe tärä ne tikani abko nütüta bäri.

Juankwe tärä ne tikani, ñobtä ñan angwane ni ni ngökaka nükani nitre tödekaka Jesubti ngätäite. Ni ni ngökaka ñan nämane kukwe era metre Jesubti dirire amne tö namani nitre tödekaka Jesubti ngwiain ji blobti. Yebtä abko Juankwe tärä ne tikani nitre tödekaka Jesubti mikakäre mokre. Erere arato, nitre tödekaka Jesubti kákwe ja taredre era metre kwärikwäri abko Juankwe niebare ietre.

### *Juanta köbö kuin juen*

<sup>1</sup> Ti unbre amne ti nitre tödekaka Jesubti jie ngwianka käta köbö kuin juen mun gätäkä Jesukristo kähti kräke. Ngöbökwe mun dianinkä jenena jakrä. Tikwe mun taredre diribare Ngöbökwe, ye kwrere titi mun jökrä tarere era metre. Ne abko ñan ti aibe käta mun tarere, akwa ni jökrä ie kukwe era metre Ngöbökwe nükana gare abko käta mun tarere arato, <sup>2</sup> ñobtä ñan angwane kukwe era metre Ngöbökwe nükani gare nie abko nita mike era jae amne nita tödeke bti abko erere nikwe mikadi era kärekäre. Ye mden kisete titi mun tarere era metre. <sup>3</sup> Ti mräkätre tikwe, Ngöbökwe nünamna metre munye, ye kwrere mun jökrä tä nüne amne mun tä ja tarere kwärikwäri. Ngöbö ni Rün nikwe btä Jesukristo ni Rün Odei kwe kákwe ja moto mika kuin mun jökrä kräke amne mun ngwian ruentari tare kwe jae amne munkwe nüna jäme niara diebti abko ie ti tö.

### *Nikwe ja taredre kwärikwäri*

<sup>4</sup> Ti mräkätre tikwe, Ngöbö ni Rün nikwe kákwe nünamna ño nie abko erere mun ruäre tä nüne, ye tikwe gaba angwane, käi rababa nuäre kri tibtä. <sup>5</sup> Ti mräkätre tare tikwe, mtare nikwe ja taredre kwärikwäri abko titi kärere munye. Ne abko ñan kukwe mdara jire biani btin nuendre nie tikata tikwe munye, akwa kukwe bianina kena Ngöbökwe nuendre nie, arabe titi tiketa munye. <sup>6</sup> Amne Ngöbökwe kukwe biani nuendre nie, ye erere nita mike täte ne ngwane, nita ja tarere era metre kwärikwäri. Kukwe ne abko ñakare btin munkrä, ñobtä ñan angwane munkwe tödekani kena Jesubti angwane, munkwe ja taredre kwärikwäri abko diribare munye.

<sup>7</sup> Mdakäre abko, munkwe ja taredre kore kwärikwäri, ñobtä ñan angwane ni kwati tä näin kwäräkwärä ni ngökakäre, käta niere krörö: Jesukristo abko därebare ñakare era metre ni kä nebtä kwrere amne niara ngrabare namani ñakare, tätre näin niere. Ni blitaka kore ye abko ni ni ngökaka amne Kristo rüe arato. <sup>8</sup> Nitre dirikä kore, ye ngäniene munkwe ja ngibia kuin, sribi munkwe Ngöbökrä ñan rikadre ngwarbe abkokäre. Akwa Ngöbökwe sribi ütiä biandre munye, abkokäre munkwe ja ngibia, <sup>9</sup> ñobtä ñan angwane Kristo kákwe kukwe diribare, yebti ta ni mda mda jatadre kukwe bä jene dirire mda ne ngwane, ni yebtä Ngöbö tä nüne ñakare. Akwa kukwe diribare Kristokwe ye kwrere niere tä nüne, ni yebtä abko Ngöbö ni Rün nikwe amne Ngöbö Odei kwe tä nüne.

<sup>10</sup> Nane ni ruäre rika basare munye, akwa kukwe diribare Kristokwe titi niere ne kwrere tä dirire ñakare ne ngwane, munkwe ñan ka ngäbti ja gwiriete die mikakäre amne munkwe ñan köbö ngwiantari ie, <sup>11</sup> ñobtä ñan angwane niere niere kákwe ni ye kwrere kadre ngäbti ja gwiriete abko kákwe sribi käme ye die mikadi siba, aise te ni dirikä kore, ye munkwe ñan ka ngäbti jire chi.

<sup>12</sup> Kukwe tä kabre mda tikwe niedre munye akwa, ti ñan tö tikai jökrä täräbtä munye, ñobtä ñan angwane ti tö rikai ja tuen gwärere munbe yete blitakäre munbe. Angwane nikwe kä ngwiandre nuäre gwaire jabtä, abkokäre ti tö rikai yete. <sup>13</sup> Angwane nitre gätäkä Jesu käbti nete abko Ngöböökwe dianinkä jakrä arato, käta köbö kuin juen mun jökrä kräke. Abko kore se. Ne ngörä.

## Tärä Tikani Bämäkäre Juankwe 3 Juan

Juan ne ara käkwe tärä 1 Juan amne 2 Juan tikani arato. Niarakwe tärä ne tikani niara kukwe muko iti kädian nämane Gayo kräke. Gayo nämane nüne, ye känti Juan käkwe ni juani ruäre kukwe kuin Jesubtä dirire, akwa ni iti kädian nämane Diótrefes nämane bike kri, aisetet ñan tö namani nitre ye kain ngäbti. Ye ñan namani mate kuin Juanbtä, aisetet niarakwe tärä ne tikani Gayoye, Gayo mikakäre mokre Diótrefebtä. Gayo abko nämane dirikätre kaen ngäbti kuin abko namani tuen kuin Juanye abko Juan tö namani niere Gayoye. Erere arato, Gayo käkwe nitre dirikä ye kadre ngäbti janknu abko ie Juan tö namani, aisetet tärä ne tikani kwe Gayoye.

### *Juanta köbö kuin juen Gayoye*

<sup>1</sup> Ti unbre amne ti nitre tödekaka Jesubti jie ngwianka. Ti ne ara käta köbö kuin juen makrä ti mräkä tare kri tikwe Gayo. Tikwe mun taredre diribare Ngöbökwe, ye kwrere tita ma tarere era metre Gayo.

<sup>2</sup> Ti mräkä, ma tare kri tikwe. Ma tä nüne kuin jäme jabtä Ngöböbe, ye kwrere arato jäandrän jökrä raba neme bare kuin mae amne ma ñan rabadre bren nike abko tita kärere Ngöböye makrä, <sup>3</sup> ñobtä ñan angwane kukwe era metre Ngöbökwe mata mike ütiäte janknu jae amne kukwe era metre Ngöbökwe diribare mae abko erere ma tä nüne, ye abko ni ruäre rükaba nete, käkwe nieba tie abko käi rababa nuäre kri tibtä. <sup>4</sup> Kukwe era metre Ngöbökwe tä nünamna nie, ye kwrere ti ngäbriänkätre tikwe Jesu käbti ma kwrere tä nüne abko tita gain angwane, bäri käta neme nuäre tibtä.

<sup>5</sup> Ti mräkä tare tikwe, ni mräkä menteni tödekaka Jesubti, kräke ma tä sribi kuin nuene täte niaratre die mikakäre, käta kaen ngäbti kuin, ye abko tuen bäri kuin tie. <sup>6</sup> Mata nitre menteni tödekaka Jesubti ye tarere kri, ye abko ja mräkätre gätäkä Jesu käbti tä nete abko ngwärekri tätre niere, aisetet jäandrän ñakare kwetre, yebtä makwe die mika. Makwe niaratre die mikadre ño, ie Ngöbö tö, ye kwrere makwe die mika nikken mentokwäre ji ngrabare abko tita ribere mae, <sup>7</sup> ñobtä ñan angwane niaratre tä dikekä kwäräkwärä sribikäre Jesukristo kräke amne tä ja di kärere ñakare nitre tödekaka ñakare Jesubti yeeye. <sup>8</sup> Ni ye kwrere abko nikwe kadre ngäbti kuin ja gwiriete die mikakäre, ñobtä ñan angwane ye kwrere nikwe niaratre die mikadi kukwe kuin era metre Jesubtä ngwiankäre kwäräkwärä.

### *Kukwe Diótrefebtä*

<sup>9</sup> Mdakäre abko, nitre gätäkä Jesu käbti tä yete, ie tikwe tärä tikaba, akwa Diótrefes abko ñan tö nun kukwei mikai ütiäte jae, ñobtä ñan angwane tö rabai bäri ji dokwäte ni jökräbti abko erere tä bike kri kaibe, aisetet ñan tö nun kukwei mikai ütiäte jae. <sup>10</sup> Ne aisetet, ti näin nebe yete angwane, tikwe mäträdi btä mun jökrä ngwärekri, ñobtä ñan angwane tä näin blite ngwarbe nun rüere, ye kwe ñan tä neme dbe amne, ñan tä ja mräkätre Jesu kukwei dirikätre ye kaen ngäbti. Mdakäre abko, ni ruäre töta neme ja mräkätre ye kain ngäbti angwane, tä dokwä täke kän. Erere arato, ni ruäre tä Jesu kukwei dirikätre ye kaen ngäbti abtä niara tä kitekä mento nitre gätäkä Jesu käbti ye ngätäite, aisetet tikwe mäträdi btä.

<sup>11</sup> Ti mräkä tikwe, ni mdakwe jäandrän käme nuen ma okwäbti kwrere, ye kwrere makwe ñan nuen siba, akwa ni mdakwe jäandrän kuin nuen ma okväbti, ye kwrere makwe jäandrän kuin nuen siba, ñobtä ñan angwane ni jen Ngöbökwe abko käta jäandrän kuin nuene, akwa ni jäandrän käme nuenkä abko ie Ngöbö gare ñakare. <sup>12</sup> Ni jökrä okväbti abko, Ngöbö kukwei kuin era metre Jesubtä käta nünamna nie, ye kwrere Demetrio tä nüne abko tätre niere Demetriobtä. Erere arato, Demetrio tä nüne metre abko nunta niere btä arato. Ne abko, nunta kukwe era erere niere abko gare kuin mae, ruen tie ti mräkä.

<sup>13</sup> Ti mräkä, kukwe näma kabre tikwe niedre mae, akwa ti ñan tö tikai jökrä täräbtä mae, <sup>14</sup> ñobtä ñan angwane bä jötrö ti tö ja tuai mabe angwane, tikwe blitadi gwärere mabe.

<sup>15</sup> Ngöbökwe kä jäme mika mabtä, ie ti tö. Mdakäre abko, ma kukwe muko jökrä tä nete käta köbö kuin juen makrä. Erere arato, nunta köbö kuin juen nun kukwe muko yete kräke abko makwe nie itire itire ie nunkrä. Abko kore se. Ne ngörä.

## Tärä Tikani Judakwe Judas

Tärä ne tikaka abko kädian nämane Judas. Niara abko nire gare ñakare metre, akwa niara abko Jesu kukwei ngwianka kädian nämane Judas btä täräta tikani Lucas 6.16; Hechos 1.13 abko ni ruäre tä nütüre. Erere arato, Judas mdara jire abko ni Dänkien Jesu etba bati Santiago kwrere abko käkwe tärä ne tikani abko ni kwati tä nütüre arato, ñobtä ñan angwane Mateo 13.55; Marcos 6.3 käta blite Jesu etba kädian nämane Judabtä. Tärä ne tikaka abko ñakare Judas Iscariote.

Judas käkwe tärä ne tikani nitre tödekaka Jesubti mikakäre mokre dirikätre blobtä, ñobtä ñan angwane ni ruäre bikaka tödekaka Jesubti nükani nitre tödekaka Jesubti ngätäite niaratre ngökakäre amne niaratre ngwiankäre ji blobti. Nitre ye ngäniene nitre tödekaka Jesubti käkwe ja ngibiadre abko Judakwe niebare ietre. Ngöböta ja moto mike kuin ni kräke, käkwe ni ngite dianinkä mento nibtä, aise te ni rabadre ja mike ngite janknu abko rabadredbe abko nitre ni ngökaka nämane dirire, akwa ñakare kore abko Judakwe niebare. Nitre nünanka kira käkwe nünabare Ngöbö rüere angwane, Ngöböökwe mikani ja ngie nuen kri, ye kwrere Ngöböökwe nitre ni ngökaka ye mikadi ja ngie nuen kri arato abko Judas tö namani mikai gare nitre tödekaka Jesubti yeye, aise te tärä ne tikani kwe kräke.

### *Judata köbö kuin juen*

<sup>1</sup> Ti Judas käta tärä ne tike munkrä. Ti abko ni klabore Jesukristo kräke amne ti abko Santiago etba. Ngöbö ni Rün nikwe käkwe mun käräbare jakrä, käta mun tarere amne, mun ye arabe Ngöböta ngibiarebti Jesukristo kräke. Mun ye mden kräke tita köbö kuin juen. <sup>2</sup> Ngöbö raba mun ngwen ruuentari tare jae amne mun mika nüne bari jáme kwe. Erere arato, raba mun tarere bari kri abko ie ti tö.

<sup>3</sup> Ti mräkätre tare tikwe, nita dianintari gwaire siba Ngöböökwe, kukwe yebtä bari ti tö rababa tärä tikai munye, akwa mtare kukwe mdara jire btä tikwe tärä tikadre jötrö munye ruen tie, aise te ti bike tärä tike munye, nebtä ti bike ribere krörö munye: Kukwe kuin Jesubtä ye abko Ngöböökwe biani batibe juta deme kweye abko ñan rabadre kwitani. Kukwe ye dokwäre munkwe rü abko ti tö nibi ribei munye, <sup>4</sup> ñobtä ñan angwane ni nükani ruäre mun ngätäite. Nükani tiebe mun ngökakäre abko käta bike dirikätre kuin kwrere, akwa ñakare kore. Nitre ye ara Ngöböökwe mikadi ja ngie nuen abko Ngöbö Kukwei käkwe niebare kira. Ni ye abko ni ngututu moto kämekäme Ngöbö rüere. Ngöböta ni tarere ja moto kuinbti, aise te ni rabadre kukwe kämekäme nuene bätäkä ngwarbe, akwa Ngöböökwe ñan ni mikadre ja ngie nuen, tätre niere, erere tätre nuene. Erere arato, Jesukristo ni Dänkien amne ni Bkänkä itibe abko ie tä trö kwite, käta rükente.

<sup>5</sup> Ti bike kukwe niere, ne garera munye, akwa ti bike miketa töre jirekäbe munye abko krörö: Ngöböökwe nitre israelita dianinkä Egipto bäre mento angwane, nire nire käkwe ñan Ngöbö kukwei mikani era ye abko Ngöböökwe ganinkä jökrä kä kaibete. <sup>6</sup> Bobukäre abko, angele ruäre nämane sribire Ngöbökrä, sribi ye abko kitani temen kwetra amne, namani bike kri, käkwe kä kuin Ngöbö känti mikaninkä. Ye mden dokwäre abko kä iko te Ngöböökwe kitani ngite kärekäre abti kä mrä angwane, Ngöböökwe kukwe ükadite kräke abko tä ngibiare kä ye känti. <sup>7</sup> Mdakäre abko, kukwe nakaninkä angelebtä, ye kwrere nakaninkä arato nitre Sodomabobtä amne nitre Gomorrabobtä. Erere arato, nitre nünanka juta känimékäne Sodoma amne Gomorra bäre temen, yebtä nakaninkä. Nitre nünanka juta yete ye namani ja mike gure bati bati nekwäre sekware amne, nitre brare abko namani bike merire jae kwärikwäri. Erere arato, nitre merire namani bike brare jae kwärikväri amne kukwe kämekäme kore ye aibe mdei namani krübäte ietre abkobtä ja kitani kwetra. Abtä Ngöböökwe mikani ja ngie nuen, käkwe ganinkä kärekäre ñukwä jutrate. Kukwe nakaninkä kore, ye abko namani ja töikrä ni jökrä kräke.

<sup>8</sup> Kukwe nakaninkä kore ja töikrä, akwa nitre kirakira käkwe ja mikani ngite kore, ye kwrere jire nitre dirikä blo käta ja mike ngite mtare mun ngätäite. Ja mikadre ngite bätäkä ngwarbe kwetre abko dbe, ye abko mikata tuadre ietre köböre, tätre niere abko erere tätre ja mike ngite. Erere arato, ni Dänkien Jesukristo di kri, ye abko mikata ngwarbe kwetre. Erere arato, üai kämekäme amne angeletre Ngöbökwe tuen ñakare abko rüere ñan ñäkädre jire, akwa niaratre abko tä ñäke rüere. <sup>9</sup> Akwa angele ütiäte kri kädianta Miguel nämane ja kwete Moisés ngwákäbtä diablube angwane, angele Miguel ye ie ja nükani töre ñakare ñäke taretare diabluye au jakrä, aisetet Ngöbökwe diablu kada ketadre abkokäre, niebare krörö kwe diabluye: ¡Ni Dänkien Ngöbö käkwe ma kada keta! niebare kwe ie. <sup>10</sup> Akwa dirikätre blo ye abko ie üai kämekäme amne jäandrän mda mda gare ñakare, akwa tätre ñäke taretare rüere. Erere arato jäandrän ngwarbe töi ñakare käta jäandrän gare ie aibe nuene, ye kwrere jire nitre ye tä nüne amne tätre kukwe nuene kämekäme. Ye dokwäre abko Ngöbökwe mikadi ja ngie nuen abko känänta au kwetre jakrä.

<sup>11</sup> ¡Aiteeje, dirikätre blo ye bobre jakän! ñobtä ñan angwane Caín käkwe nünabare ño, ye kwrere niaratre tä nüne. Erere arato, kira ni iti kädian nämane Balaam abko nämane Ngöbö Kukwei niere ngwian ganainkrä jae, ye kwrere nitre dirikä blo käta dirire ngwian ganainkrä jae. Mdakäre abko, ni iti kädian nämane Coré abko moto namani romon Moisés rüere abko dokwäre Ngöbökwe kämikani, ye kwrere rakadikä arato niaratrebtä.

<sup>12</sup> Mdakäre abko, dänta jübente bäta nebe käme, ye kwrere abko nitre dirikä blo tä mun ngätäite, ñobtä ñan angwane mutta ja tarere kwärikwäri, ye bä mikakrä mutta mröre ketetibe, ye känti abko dirikätre blo käta mröre kabrekabre, tä dö ñaen kabrekabre abko käita nebe nuäre btätre amne tätre mun mike ütiäte ñakare. Ye abko, kukwe gaidre kri abko tätre nuene. Erere arato, tätre ja bä mike ni mda mda ngibiabtikä kwrere, akwa tätre ja ngibiare au. Mdakäre abko, müta aibe tä kíte jüben amne ñü ñakare te, aisetet müreta nikken juenkä mentokväre, ye kwrere jire niaratre tä nüke, bti näin ta, akwa ñan tä ni die mike jire chi. Erere arato, kri rabadre ngwäre ngwäre abko käita nüke amne ngwätä nebe ñakare btä, ye kwrere jire niaratre tä amne, kri ngatanina kwrere jire bäta nebe abti diankata ngätri ngöi kuin, ye kwrere jire niaratre tä arato. <sup>13</sup> Erere arato, mrenta nebe romon, tä nikken nakwenkä käta nikken däi dobrore kämekäme kite jate jate, ye kwrere jire nitre dirikä blo tä kukwe kämekäme gaidre kri ye nuene. Erere arato, muke tä nikken mentokväre amne ñan tä näin metre ta, ye kwrere jire tätre näin, ye dokwäre abko käbäri iko krübäte, te Ngöbökwe kitadi ngite kärekäre.

<sup>14</sup> Mdakäre abko ni iti kädian nämane Enoc käkwe nünabare kira Adán mräkä ni kükü ja täritäri Adán tähti abko käkwe kukwe niebare krörö nitre dirikä blo yebtä: ¡Tuen nete! Angele deme mili kabre kabre krübäte abko ben ni Dänkien jatadi. <sup>15</sup> Angwane nitre ngututu moto kämekäme Ngöbö rüere käkwe kukwe nuenbare diän diän, erere arato ñäkäbare taretare kwetre Ngöbö rüere, ye dokwäre ni Dänkien jatadi mike ja ngie nuen jökrä, niebare Enokwe nitre dirikä blo yebtä. <sup>16</sup> Jäandrän jökrä Ngöbökwe btä tätre ñäke amne jäandrän keta kabre abko rüere tätre blite taretare. Erere arato, kukwe kämekäme mdei ietre, ye aibe jiebti tätre nakwen. Mdakäre abko, tätre ja käkitekä krübäte au amne tätre nikken blite nuäre nuäre ni mda mdabe jäandrän diankakäre kän.

### Nünandrekä dite

<sup>17</sup> Akwa ti mräkätre tare tikwe, kukwe tä nakenkä mtare, yebtä nitre Jesukristo kukwei ngwianka käkwe diribare ño ño, ye munkwe ngwian töre jae. <sup>18</sup> Niaratre käkwe niebare krörö munye: Kä mrä angwane, ni jatadi ruäre abko käkwe Ngöbö mikadi yakrä jae amne kukwe kämekäme mdei ietre, ye aibe jiebti rabadi nakwen abko erere nünandi kwetre, niebare kwetre munye, ye munkwe ngwian töre jae. <sup>19</sup> Nitre dirikä blo ye abko tä mun mike rüre jabe kwärikwäri amne kukwe kämekäme mdei ietre, ye aibe jiebti tätre nakwen amne Ngöbö Üai ñakare btätre.

<sup>20</sup> Akwa ti mräkätre tare tikwe, kukwe kuin deme Jesukristobtä diribare munye, mikata era munkwe, yebtä munkwe ja die mika nünenkä bäri dite mda amne munkwe blita

Ngöböbe Ngöbö Üai Deme köböire. <sup>21</sup> Erere arato, Ngöböta mun tarere kri, yebtä munkwe nüna janknu amne, ni Dänkien Jesukristo käkwe ja moto mikadi kuin nikrä, käkwe ni mikadi nüne kärekäre jabe, ye munkwe ngibia ngäbti.

<sup>22</sup> Angwane nitre ruäre käkwe tödekadre janknu Jesukristobti abko töita niken kwäräkwärä, ni ye abko munkwe ngwian ruentari tare jae, töi mikakäre kwatibe ni Dänkienbti. <sup>23</sup> Amne ni mda mda kebera Jesukristo rükente, abtä bikera niken ja tare nika ñukwä jutrate, ye abko munkwe diantari ñukwä jutra ngäniene, niaratre ñan rabadre nianinte kärekäre abkokäre. Amne ni mda mda abko munkwe ngwian ruentari tare jae, akwa ni bren krübäte abtä kä jüräta nebe nibtä kise mike dän kwebtä, ye kwrere jire nitre ye abko krübäte, aisetet munkwe ja ngibia niaratre ngäniene arato. <sup>24-25</sup> Mrä abko, Ngöbö itibe ni Diantarikä nikwe abko di tära täte mun ngibiakrä, mun ñan rikadre niara bäre mento abkokäre. Amne kä bää nuäre Ngöbö känti, ye te Ngöbö rabadre nebe mun ngwena kuin deme amne kä rabadre nuäre munbtä nebe yete, abkokäre Ngöbö di tära täte arato, aisetet Ngöbö aibe bää nuäre, yebtä raba mikani ütiäte amne, niara aibe raba mikani ütiäte jrei kwrere. Erere arato, niara aibe di kri jäandrän jökräbti ta amne niara aibe jäandrän jökrä bkänkä, yebtä abko kira dekä, mtare amne kärekäre Ngöbö aibe rabadre mikani ütiäte kri ni Dänkien Jesukristo köböire. Amen. Abko kore se. Ne ngörä.

## Kukwe Mikani Tuare Juanye

### Apocalipsis

Ni ja tötitikaka Jesube kädian nämane Juan käkwe tärä ne tikani. Niarakwe tärä mda mda tikani arato abko krörö: Kukwe Kuin Jesubtä Tikani Juankwe, 1 Juan, 2 Juan, 3 Juan. Juan nämane kitani ngite kä butu kädianta Patmos ye känti angwane, niarakwe tärä ne tikani.

Jesu ara jire käkwe tärä ne tikamna Juanye. Nita jäandrän tuen ño köböre, ye kwrere jire kukwe jökrä tä tikani tärä nebtä abko Jesukristo käkwe mikani tuare Juanye, amne kukwe jökrä niebare Ngöbökwe Juanye abko Juankwe kukwei nuani köböre, ye abko Jesukristo käkwe tikamna täräre ie. Käne abko, Jesukristo käkwe ja mikani tuare köböre Juanye angwane, Jesukwe kukwe tikamna täräbtä biandre nitre gätäkä Jesu käbti nünanka juta keta kükü känti kä Asiate.

Mdakäre abko, Satana tä rüre käre Ngöbö rüere, ye abko rakadrekä ño ño Juan näire mentokwäre abko Juankwe tikani täräbtä Ngöbö amne Ngöbö Odei Jesukristo käkwe Satana btä sribikä kwekwe ganaindi kwäräbe rükadre gare metre nitre tödekaka Jesubti yeeye abkokäre.

#### *Kukwe käne*

<sup>1</sup> Kukwe mden mden rakadikä bä jötrö abko rabadre gare nie abko Ngöbökwe mikani Jesukristo kisete mikakäre gare sribikä kwekwe ie. Akwa kukwe ye rabadre gare, abkokäre Jesukristo käkwe angele kwe juani niere ti Juan sribikä kwe neye. <sup>2</sup> Ye abko, tikwe dre dre tuaba Ngöbö kukweibtä amne Jesukristo käkwe kukwe mikani tuare ño ño tie abko tita niere metre jökrä arato. <sup>3</sup> Kukwe biani Ngöbökwe ni Ngöbö kukwei niekä neye, nebtä nire nire käkwe ñäkädre amne nire nire käkwe kukwe nuadre amne mikadre täte kwe, ni yebtä abko kä rabadi nuäre kri amne Ngöbökwe ja di biandi ie, ñobtä ñan angwane kukweta tikani tärä nebtä kebera nakenkä.

<sup>4-5</sup> Nitre gätäkä Jesu käbti kä keta kükü te kä Asiate, kräke ti Juan tä köbö kuin juen krörö: Ngöbö tä nire amne Ngöbö nämanena nire amne arabe jatadi, erere arato üai ni kükü tä kürä gobrankrä Ngöbökwe ye ngwärekri, erere arato Jesukristo käta kukwe niere era metre Ngöböbtä amne niara aibe nükaninta nire käne amne niara tä gobrane jrei jökrä kä nebtä bti ta—niaratré käkwe ja moto mika kuin munkrä amne mun mika nüne jáme kwetre, ie ti tö.

Jesukristo käta ni tarere amne ja därie ianinte krusoftä kwe angwane, ni tikaninte kwe, ni nämane ngite Ngöbö rüere ye ngäniene. <sup>6</sup> Niarata gobrane nibtä. Erere arato, niarakwe ni mikani blitaka Ngöböbe ni mda mda diäre sribikäre Ngöbö niara Rün kräke, aisetet Kristo raba käkitaninkä kärekäre amne niara di raba kri kärekäre! Amen.

<sup>7</sup> Olo ketete munkwe.

Kristo jatadita mütabti, ye ni jökrä käkwe tuadi.

Nitre käkwe niara däkäninte bukobti, ye ara jire käkwe tuadita arato.

Ye ngwane ni kä jökräbtä temen rabadi nekwetekä ja jiebti, kä rabadi ja müaire. Abko kore se. Amen.

<sup>8</sup> Ni Dämkien Ngöbö käta niere krörö: Ti abko tärä okwä kena kädianta alfa amne tärä okwä mrä kädianta omega. \* Ti nämanena jäandrän jökrä känenkri kena amne ti rabadi jäandrän jökrä tähti mrä. Ti abko Ngöbö Di Kri Jäandrän Jökrä Nuenkrä käta niere.

#### *Ni bä Ni Kä Nebtä Ngobo kwrere abko Juankwe tuani*

<sup>9</sup> Ti abko Juan. Jesu käbti ti ne mun mräkä munkwe amne, munta ja tare nike tödekabtä Jesubti, ye kwrere titja ja tare nike arato. Erere arato, Ngöbötä gobrane munbti, ye kwrere

---

\* 1:8 alfa amne omega. Alfa abko tärä okwä käne alfabeto griegorebtä amne omega abko tärä okwä mrä alfabeto griegorebtä, ye kwrere Jesukristo abko nämane käne amne niara rabadi jäandrän jökrä tähti mrä.

tä gobrane tibti arato amne, mutna nünenkä dite jadtä tödekkäre janknu Jesubti, ye kwrere jire tita nüne arato. Ye abko, Ngöbö Kukwei kuin metre ti nämane dirire amne kukwe kuin Jesubtä ti nämane niere, dokwäre ti kitaba ngite, aisetet i näma ngite kä butu kädianta Patmos ye känti. <sup>10</sup> Angwane bati bämante, Ngöbö Üai näma täte tibta angwane, ti trökri ni kukwei jaraba krikri bäsü drü kukwei kri kwrere tie se kwrere. <sup>11</sup> Ni kukwei ye abko käkwe nieba krörö tie:

Jändräni tuata makwe, ye erere tike jökrä täräbtä, bti nitre gätäkä Jesu kähti tä juta keta kükü te kä Asiate, ye känti makwe juan abko krörö: juta Efeso, Esmirna, Pérgamo, Tiatira, Sardis, Filadelfia amne Laodicea ye ie makwe tärä ye juan, nieba kwe tie.

<sup>12</sup> Ye btäräbe ti rikwitata ba angwane, ni näma blite abko tikwe tuaba angwane, oro dätebare ñotra gräre näma krä kükü, btä ti okwä rababa. <sup>13</sup> Akwa ñotra grä krä kükü ye ngätäite abko ni näma iti abko bäsü rababa Ni Kä Nebtä Ngobo kwrere abko btä dän nga nüke mate ngotobtä temen näma amne, koria orore abko näma kitani ja köitäti ta kwe, btä ti okwä rababa. <sup>14</sup> Angwane niara dokwä drüen abko ngwen bürere jökrä obeja drüen bätäninte kuin deme kä lana bäsü ngwen bürere, kwrere jire bäsü rababa tuen tie amne, nieve ngwen bürere, kwrere jire bäsü rababa tuen tie amne okwä abko rababa trä ngitiekä ñukwä jutra kwrere jire rababa tuen tie. <sup>15</sup> Erere arato, bronse kukwata kuin ñukwäte abko tä nebe trä ngitiekä, ye kwrere jire niara ngoto rababa tuen tie amne ñöta kite kri abko ngöta nebe juuu, ye kwrere jire niara kukwei rababa ruen kri tie. <sup>16</sup> Amne niara kise ruenkri abko te muke näma kwä kükü rababa tuen tie. Erere arato, ngitra tu grine grine jadtä jütre kwärikwäri ye kwrere kukwe rababa betekä kodate, rababa ruen tie amne, ñänä träta ngitiekä dirare, ye kwrere jire niara ngwäre, rababa tuen tie.

<sup>17</sup> Ni ye btä ti okwä rababa kore angwane, ti rikaba ngitiekä ngwákäre kwrere niara ngotobtä temen, akwa niarakwe ja kise ruenkri mikaba tibta, bti nieba kwe tie:

Ma ñan rekwtaka tibta. Ti nämanena jändräni jökrä känenkri kena amne ti rabadi jändräni jökrä täbti mrä. <sup>18</sup> Ti abko tä nüne kärekäre. Ti ne mden krütani bati, akwa ti nukaninta nire amne mtare titi nüne kärekäre. Mdakäre abko, ti bari di kri gata yekrä, aisetet titi gata dänkiene amne ti di tärä ni juankrä kärekäre Ngöbö okwä bäre mento amne ti di tärä ni diantarikrä gata ngäniene, ye bäsü mikakrä llabe gatakwe kä nakebtä tä ti kisete.

<sup>19</sup> Ne aisetet, makwe jändräni turi, ye erere tike jökrä täräbtä. Dre tä nakenkä mtare amne dre rakadikä mtare mentokväre, ye tike jökrä täräbtä. <sup>20</sup> Amne muke kwä kükü tä ti kise ruenkri makwe turi, erere arato ñotra grä orore krä kükü makwe turi, ye abko tä dre bäsü mike abko tä tiebe, aisetet ñan nibi nüke gare mae, ye abko ti bike niere mae abko krörö: ñotra grä orore krä kükü, ye abko nitre gätäkä ti kähti juta keta kükü känti kä Asiate abko bäsü mikata amne, muke kwä kükü ye abko angeletre ni kükü tä nitre gätäkä ti kähti juta keta kükü ngibiabtikä abko bäsü turi kore makwe abko nieba kwe tie.

## 2

### Tärä nitre gätäkä Jesu kähti juta Efesote kräke

<sup>1</sup> Angwane angele tä nitre gätäkä ti kähti juta Efesote ngibiare, ye ie tärä tike krörö:

Ti kise ruenkri abko te muketa kwä kükü amne ñotra grä orore krä kükü, ngätäite titi dikekä die mikakäre, ti ne mden käta niere krörö: <sup>2</sup> Dre dre nuenta munkwe, ye gare jökrä tie abko krörö: Mutna sribire tare krübäte Ngöbökrä, ye garera tie amne ja tare nikabtä mutna nünenkä dite jadtä, ye gare tie. Mdakäre abko, ni ruäre diän diän tä nüne Ngöbö rüere, tä kite ja Ngöbö kukwei ngwianka niere abko ben mutna ja gete ñakare, akwa munkwe mikani ñäräre kuin amne nämane näin ni ngökö, ye abko munkwe gani btätre, aisetet munkwe juanintari, ye abko gare kuin tie arato. <sup>3</sup> Mdakäre abko, mutna nünenkä dite tibta amne mutna ja tare nike kri ti dokwäre, akwa mun nebe dräre ñakare tödekkäti tibti, ye abko gare kuin tie arato, yebtä käta nebe nuäre tibta.

<sup>4</sup> Akwa mun jatani tödeke krire tibti angwane, mun nämane ti tarere kri, ye kwrere munta ti tarere ñakare mda, ye aibe tuen blo munbtä tie. <sup>5</sup> Ne aisete mun nämane ti tarere kri kena, ye ngwenta töre jae, bti mun jata ja mäketa Ngöböbe angwane, mun nämane ti tarere kri kena, ye kwrere munkwe nuuenta. Akwa munkwe ñan nuendreta kore ne ngwane, ñotra grä tä mun bä mike yete, ye ti bike denkä mento nitre gätäkä ti käbti mda mda ngätäite. Akwa munkwe ja mäkädita Ngöböbe ne ngwane, tikwe ñan ñotra grä ye diandikä mento munkän. <sup>6</sup> Akwa kukweta keteti mutta nuene kuin abko nitre nicolaita käta kukwe nuene diän diän, kukwe yebtä mun mätä kri, ye abko kuin tuen tie, ñobtä ñan angwane kukwe nuuenta kwetre yebtä ti mätä kri arato.

<sup>7</sup> Ye abko, nitre gätäkä ti käbti tä nüne juta keta küküte kä Asiate, ye olo tärä, aisete Ngöbö Üai tä dre nire, ye ie olo ketate kwe mikakäre täte. Angwane nire nire kákwe ja tare nikadre tödeketä tibti, kákwe ti rükandrete ñakare abko ni rüe ganainkä kwrere. Ni ye ie tikwe kä biandi kri ngwakä ni mikakrä nüne ye kwetadre angwane, rabadi nüne kärekäre kä kuin Ngöbökwete abko nieba kwe tie.

#### *Tärä nitre gätäkä Jesu käbti juta Esmirnate kräke*

<sup>8</sup> Yebti nieba mda kwe tie:

Angele tä juta Esmirnate nitre gätäkä ti käbti ngibiare, ye ie tärä tike krörö:

Ti Jesukristo nämanena jäandrän jökrä känenkri kena amne rabadi jäandrän jökrä täbti mrä. Ti krütani akwa nükaninta nire abko käta nire krörö: <sup>9</sup> Munta ja tare nire amne mun bobre, jäandrän ñakare munkwe, ye gare kuin tie, akwa jäandrän Ngöbökwе tärä kabre munkwe kä käinbti sete, aisete Ngöbö ngwärekri mun jäandrän bkäne kabre amne ñakare bobre era metre. Mdakäre abko, nitre ruäre tä ja israelita era metre nire abko tä ñäke blo mun rüere, ye gare kuin tie, akwa Ngöbökrä niaratre abko ñakare israelita era metre, ñobtä ñan angwane tä tödeke ñakare tibti, akwa niaratre tä gätäre Satanakrä. <sup>10</sup> Mdakäre abko, mun kebera ja tare nire tödeketä tibti angwane, diablukwe ni juandi mun ruäre kite ngite kä teri, akwa munkwe ñan ja tare nikadi raire. Kóbö jätäbe munkwe ja tare nikadi. Mun raba ja tare nire kore angwane, munkwe nünanka dite jabtä abti mun krütadi tödeketä tibti. Mun krütadre kore ti dokwäre, ye ngwane munkwe mun rüe ganandi. Ye ütiäre tikwe mun mikadi nüne kärekäre Ngöböbe.

<sup>11</sup> Ye abko, nitre gätäkä ti käbti tä nüne juta keta küküte kä Asiate, ye olo tärä aisete, Ngöbö Üai tä dre nire, ye ie olo ketate kwetre mikakäre täte. Nire nire kákwe ja tare nikadre tödeketä tibti, kákwe ti rükandrete ñakare abko ni rüe ganainkä kwrere. Ngöbökwе kukwe ükadite ni jökrä kräke kä mrä angwane, Ngöbökwе ñan juandi ja okwä bäre mento, akwa kadi ngäbti kwe nünakäre kärekäre ben, aisete ñan krütadi bobukäre abko nieba kwe tie.

#### *Tärä nitre gätäkä Jesu käbti juta Pérgamote kräke*

<sup>12</sup> Yebti nieba krörö kwe tie:

Angele tä juta Pérgamote nitre gätäkä ti käbti ngibiare, ye ie tärä tike krörö:

Ti Jesukristo kwe ngitra tu grine jabtä jütre kwärikwäri tä abko käta nire krörö: <sup>13</sup> Satana tä gobrane Pérgamote, känti mutta nüne, ye abko gare kuin tie. Satana tä gobrane yete, akwa mun tä tödeke kwatibe tibti, käta nünenkä dite tibtä. Juta munkwe, känti Satana tä nüne, ye känti ni iti tödekaka tibti kädian nämane Antipas näma nüne, akwa kämikani kwetre tödeketä tibti, akwa ti rükaninte ñakare kwe. Ye näire mun näma tödeke kwatibe tibti arato amne munkwe ti rükaninte ñakare, yebtä käta nebe nuäre tibtä.

<sup>14</sup> Akwa kukwe ruäre tä mun ngätäite yete abko ñakaredbe tuen tie abko ti bike nire munye abko krörö: Mekera Moisés näire nitre israelita kákwe ja mikadre ngite Ngöbö rüere, abkokäre jäandrän kämikani ngöbö ngwarbeye abko nitre israelita kákwe \* kwetadre ngöbö ngwarbe mikakäre ütiäte jae amne, ja mikadre gure batibati kwetre \*

\* 2:14 ja mikadre gure batibati kwetre. Números 25.1-2 tä blite kukwe nebtä. Nitre israelita kákwe ja mikani gure batibati ngöbö ngwarbe mikakäre ütiäte jae.

abko ni iti kädian nämane Balaam kákwe diribare kira Balaye abko erere Balakwe bää mikani nuäre nuendre nitre israelita okwätē. Mtare, ni ruäre mun känti yete tä kukwe ye kwrere mike ütiäte jae, käta ja mike ngite kore, ye abko tuen blo tie. <sup>15</sup> Mdakäre abko, kukwe diribare kira Balaamkwe, ye kwrere arato kukwe dirita nitre nicolaitakwe abkokri ni ruäre mun känti yete tä nekete, ye abko tuen blo tie. <sup>16</sup> Ne aisetet, munkwe kukwe käme ye kita temen amne munkwe ja mäkäta Ngöböbel! Munkwe ñan nuendre kore ne ngwane, ngitra tu grine jabtä jütre kwärikwäri, kwrere jire ti kukweita betekä ti kadata, yebti ti näin rüre jökrä niaratrete yete.

<sup>17</sup> Ye abko, nitre gätäkä ti käbti tä näne juta keta küküte kä Asiate, ye olo tärä aisetet, Ngöbö Üai tä dre niere, ye ie olo ketate kwe. Kira Ngöböökwe mrö kädianta mana biani kwetadre nitre israelitaye nünakäre. Angwane mtare nire nire kákwe ja tare nikadre tödekaabtä tibti, kákwe ti rükandrete ñakare abko ni rüe ganainkä kwrere abko ie mana tä ükani tiebe abko tikwe biandi kwetadre ie. Erere arato, tikwe jä ngwen bürere biandi ie näkrä kä käinbti amne jä yebtä abko ni käi btin tädi tikani abko gare ñakare ni mda mdaye, akwa nire nire ie tikwe jä ye biandi, aibe ie ni käi btin ye rükadi gare.

### *Tärä nitre gätäkä Jesu käbti juta Tiatirate kräke*

<sup>18</sup> Yebti nieba krörö mda kwe tie:

Angele tä juta Tiatirate nitre gätäkä ti käbti ngibiare, ye kräke tärä tike krörö:

Ngöbö Odei okwää bää ñukwää jutra kwrere amne bronse bätäninte kuin tä nebeträ ngitiekä, kwrere jire ngoto bää ie abko käta niere krörö: <sup>19</sup> Munta dre dre nuene, ye gare jökrä tie abko krörö: Munta Ngöbö tarere amne ni mda mda tarere amne, munta tödeke kwallib Ngöböbti amne, munta sribire kuin amne munta ja tare nike tödekaabtä tibti angwane, munta nünenkä dite jabtä, ye gare kuin tie. Mdakäre abko, munkwe tödekan krire tibti angwane, mun nämane jändränuinkuun nuene, akwa mtare munta nuene bări kuin, ye abko gare kuin tie arato.

<sup>20</sup> Akwa jändränuinkuun nuenta munkwe abko tuen blo tie abko krörö: Meri tä iti mun ngätäite yete abko ja Ngöbö kukwei niekä tä niere au jabtä, ye abko tä näin dirire sribikä tikketikwe ngökakäre, käta näin niere krörö: ja mikadre gure batibati ngöbö ngwarbe mikakäre ütiäte jae amne mrö ngöbö ngwarbe mikakäre ütiäte abko kwetadre tä näin dirire. Meri kädian nämane Jreina Jezabel kákwe diribare kira, ye kwrere jire meri ye tä näin dirire abko munta tuemetre dirire mun ngätäite yete. Ye abko tuen ñakaredbe tie. <sup>21</sup> Meri ye abko kákwe kukwe käme Ngöbö rüere ye kitadre temen, bti tödekadre Ngöböbti kwe, abkokäre tikwe kä bianina ie, akwa tö ja mikai gure batibati janknu, ye abko ñan tö mikai temen arato. <sup>22</sup> Ne aisetet, ti bike mike ja ngie nuen, kákwe mikadi bren jume amne rabadi ja tare nike jänbti. Erere arato, nire nire käta niara kukwei mike täte amne tä näin ja mike gure batibati ben, ye abko tikwe mikadi ja tare nike kri krübatä meri ye kukwei mikabtä täte, akwa kukwe käme ye kitadre temen kwetere angwane tikwe ñan mikadi ja tare nike kore. <sup>23</sup> Erere arato, nire nire tä nekete niarakri, ye abko tikwe gadikä jökrä. Yebtä abko kukwe kaibe ni jökrä töibtä abko gare jökrä tie abko rükadi gare tibtä ni jökrä gätäkä ti käbti kä ketareketare temen ie amne, ni itire itire kákwe dre nuendre, ye erere tikwe ütiä biandi ie.

<sup>24</sup> Angwane mun mda mda tä juta Tiatirate yete arato, akwa meri dirikä blo, jiebti munta näin ñakare amne, kukwe ütiäte Satanakwe tä ükani kaibe tiebe nieta kwetere abko gare ñakare munye. Mun ye abko kötärä tikwe ñan kukwe mdara jire mikadi mda, <sup>25</sup> akwa munta tödeke metre tibti, ye kwrere munkwe nuen janknu abti ti jatadi nüketa abko ti tö niei kore munye.

<sup>26</sup> Erere arato, nire nire kákwe ja tare nikadre tödekaabtä tibti, kákwe ti rükandrete ñakare abko ni rüe ganainkä kwrere amne nire nire kákwe ti kukwei mikadi täte, ye abko tikwe mikadi gobrane nitre nünanka kä ketareketare temen yebti. Ti Rün kákwe ja di biani gobrankrä kore tie, ye kwrere tikwe ja di biandi ietre gobrankrä. Ti abko tä gobrane krörö:

<sup>27</sup> Angwane niara kákwe gobrandi ja di kribti amne, bási dobro sribeta kantrare metata krito ribi jierore bti amne tä ngidiente kiakia jökrä, ye kwrere gobrandi kwe.

*Salmos 2.9*

<sup>28</sup> Erere arato, nitre ganainkä abko ie tikwe muke kri tä kite käin dekä biandi. <sup>29</sup> Ye abko, nitre gätäkä ti käbti tä nüne juta keta küküte kä Asiate, ye olo tärä aise, Ngöbö Üai tä dre niere, ye ie olo ketate kwetre mikakäre täte abko nieba kwe tie.

### 3

#### *Tärä nitre gätäkä Jesu käbti juta Sardite kräke*

<sup>1</sup> Yebti nieba kwe tie: Angele tä juta Sardite nitre gätäkä ti käbti ngibiare, ye abko kräke tärä tike krörö:

Ti Jesukristo, kwe üai Ngöböökwe ni kükü amne muke kwä kükü tä abko tä niere krörö munye: Munta dre dre nuene, ye gare jökrä tie. Munta nüne kuin metre Ngöbökrä ni mda mda ngwärekri, aise mun tuen kuin ni mda mdaye, akwa ni krütani kwrere jire munta Ngöbö ngwärekri, ñobtä ñan angwane munta nüne käme, käta ja mike ngite krübäte Ngöbö rüere. <sup>2</sup> Ne aise mokrere jabti munkwe amne munta dre dre nuene, yebtä munkwe töbika kuin ja käne! Kukwe ruäre kuinkuin munta nuene, akwa kitera neme munye, ye känentarita ja dibti ja käne, tita niere munye, ñobtä ñan angwane sribi nuenta munkwe Ngöbökrä, nin munta nuene täte jökrä tuen tie. <sup>3</sup> Ne aise, kukwe diribare munye, munkwe kani ngäbti, ye munkwe ngwianta töre jae abko jiebti mun rankwata, amne munta ja mike ngite Ngöbö rüere, ye kita temen munkwe, kákwe ja mäkäta Ngöböbe abko tita niere munye. Akwa munkwe ñan mokredre jabti ne ngwane, ni gokä rükadi ñongwane gare ñakare nie, akwa batibe tä nüke, ye kwrere batibe ti rükadi mun mike ja ngie nuen yete.

<sup>4</sup> Akwa nitre gätäkä ti käbti, ye ngätäite ni tärä ruäre juta Sardite yete abko tä nüne metre, ñan tä ja mike ngite ni mda mda kwrere, ye abko ni ngämi dän ngwen bürere kwetre mike dobrore kwrere. Ne aise, niaratre abko kákwe dän ngwen bürere kitadi jabtä, nünabare metre amne deme bá mikakäre. Niaratre rabadi dikekä tibe dän ngwen bürere te, ñobtä ñan angwane ganainbare jökrä kwetre aise. <sup>5</sup> Ye abko, nire nire kákwe ja tare nikadre tödektä tibti, kákwe ti rükandrete ñakare abko ni rüe ganainkä kwrere. Nitre ye kákwe dän ngwen bürere kitadi jabtä, niaratre abko metre Ngöbö ngwärekri bá mikakäre, erere nünandre kärekäre Ngöböbe kwetre. Erere arato, nünandi kärekäre kwetre, aise käita tikani tärä ni nünanka kärekäre Ngöböbe mikakrä gare yebtä amne tikwe ñan kä diandrekä mento. Mdakäre abko, ni ye abko ni jen tikwe, tikwe niedi ti Rün ngwärekri amne angeletre Ngöböökwe ngwärekri arato.

<sup>6</sup> Ye abko, nitre gätäkä ti käbti tä nüne juta keta küküte, ye olo tärä aise, Ngöbö Üai tä dre niere, ye ie olo ketate kwe mikakäre täte abko nieba kwe tie.

#### *Tärä nitre gätäkä Jesu käbti juta Filadelfiate kräke*

<sup>7</sup> Yebti nieba kwe tie: Angele tä juta Filadelfia nitre gätäkä ti käbti ngibiare, ye ie tärä tike krörö:

Ti Jesukristo abko kuin deme amne kukwe era metre niekä. Erere arato, llabe jrei Davikwe jukwe juta Jerusalén btin ye tikakrä abko tä kisete amne, jukwe dikadre kwe angwane, ni mda ñan raba tiketa jire chi. Erere arato, jukwe tikadre kwe angwane, ni mda ñan raba diketa jire chi. Ti Jesukristo ye abko käta niere krörö munye: <sup>8</sup> Munta dre dre nuene, ye gare kuin jökrä tie. Tikwe jukwe tikani kwati mun känenkri, ye ni mda ñan raba diketa jire munkän abko tuen nete. Mun abko di ñakare bökan nünankrä tikrä, akwa munkwe ti kukwei mikani täte jökrä amne munkwe ti rükantte ñakare. <sup>9</sup> Ye abko, nitre ruäre därebare ni israelitakri tä ja israelita niere au jabtä, akwa niaratre tödeke ñakare tibti, aise ñakare israelita era metre Ngöbö ngwärekri. Niaratre tä ngwarbe ni ngökö amne niaratre abko Satanakwe era metre. Niaratre ye abko tikwe ngwiandi nüke ja mike bobre ngukudokwäbti mun ngotobtä temen angwane, tita mun tarere kri abko niedi kore kwetre.

<sup>10</sup> Angwane munkwe ja tare nikadre tödekabtä tibti angwane, munkwe nünandrekä dite jadtä, tikwe nieba, erere munkwe mikani täte jökrä. Ye mden kisete, Ngöböökwe kukwe juandi kri ni jökrä kä nebtä nünanka Ngöbö rüere ye rüere, niaratre nuatekäre ja käne angwane, nitre ye käkwe ja tare nikadi kri, akwa mun abko käkwe ti kukwei mikani täte abko ütiäre tikwe mun ngibiadi ja tare nika ye ngäniene. <sup>11</sup> Ti abko jatadita jötrö ngwarbe, aisetet mutta nüne metre ti ngwärekri, ye kwrere munkwe ja ngibia janknu, ñobtä ñan angwane munkwe nünandi kärekäre Ngöböbe abko korona kwrere, ye ni mda mda käkwe ñan diandrekäta munkän, abkokäre munkwe ja ngibia janknu. <sup>12</sup> Angwane nire nire käkwe ja tare nikadre tödekabtä tibti, akwa ti rükandrete ñakare kwe abko rüe ganainkä kwrere. Ni ye abko ürä nökani nguse Ngöbö tikwe jue ye täni ñan rabadre denkä jire, ye kwrere jire ni mda ñan rabadre ni ganainkä denkä tikän Ngöbö känti mento. Erere arato, niara abko jen Ngöböökwe, abkokäre tikwe Ngöbö tikwe käi tikadi ni ganainkäbtä amne, juta Jerusalén btin Ngöböökwe tä kä käinbiti, akwa kebera kite temen, ye käi tikadi tikwe ni ganainkäbtä niara abko nünanka juta Jerusalén btinte bää mikakäre. Angwane niara abko jen tikwe arato, ye bää mikakäre tikwe ja käi btin tikadi btä arato. <sup>13</sup> Ye abko, nitre gätäkä ti kähti tä nüne juta keta küküte, ye olo tärä aisetet, Ngöbö Üai tä dre niere, ye ie olo ketate kwe mikakäre täte abko nieba kwe tie.

### Tärä nitre gätäkä Jesu kähti juta Laodiceate kräke

<sup>14</sup> Yebti nieba mda kwe tie: Angele tä juta Laodiceate nitre gätäkä ti kähti ngibiare, ye kräke tärä tike krörö mda:

Jesukristo abko kä Amen, ñobtä ñan angwane niara abko käta ja kukwei mike täte metre amne niara abko kukwe era erere niekä. Jesukristo köböire jändrän jökrä namani bare Ngöböye kena. Niara ara käta niere krörö munye: <sup>15</sup> Munta dre dre nuene, ye gare kuin jökrä tie. Ni tibo abko ni tödekaka ñakare tibti kwrere amne ni ngire abko ni nüne ja di ngöi jökrä tigrä kwrere, akwa mun abko ñakare tibo amne mun ñakare ngire arato. ¡Mun ye rabadre tibo ni tödekaka ñakare tibti kwrere näre o mun rabadre ngire ni nünanka ja di ngöibti tigrä kwrere näre! <sup>16</sup> Akwa mun abko ñakare tibo amne mun ñakare ngire. Mun krube jirekäbe, aisetet mun abko ni ütiäre ñakare jire kwrere, ye dokwäre abko tikwe mun yaidi jirekäbe mentokväre.

<sup>17</sup> Mdakäre abko, mun jändrän bkäne kri, mutta niere. Erere arato, mutta jändrän mdei niike ñakare, aisetet mutta nüne kuin, mutta niere. Akwa mun abko ni bobre, ngwarbe, amne jändrän bäri ütiäre Ngöböökwe ñakare munkwe amne kä iko mun okwäte, ñobtä ñan angwane kukwe era metre Ngöböökwe nüke gare ñakare munye. Erere arato, mutta ja mike ngite krübäte, abtä munkwe ja gaidre, ye abko mutta dikekä büttere Ngöbö okwäbti ye kwrere abko mutta gain ñakare jadtä, aisetet mun abko bobre Ngöböta nütüre munbtä. <sup>18</sup> Ne aisetet, mun rabadre jändrän Ngöböökwe bkäne era metre, abkokäre mun jata kökö tie. Ye abko, jändrän ütiäre kri krübäte Ngöböökwe oro kuin kukwani ñukwäte mikakäre orore metre, kwrere tärä tikwe makrä, aisetet mun jata kökö tie. Erere arato, tikwe mun mikadre metre ja ngwärekri, ye bää mikakäre dän ngwen bürere ye mun jata kökö jökrä tie, bti munkwe mun bütiekrä gaidre kri ye jue mika angwane, mun ñan rabadre dikekä büttere mda. Mdakäre abko, kukwe Ngöböökwe ye gare ñakare munye, aisetet kä iko mun okwäte kwrere, ye kräke abko mun jata kräkä kökö tie kitadre ja okwäte, ye köböire abko Ngöbö kukwei rabadi gare metre munye abko titä niere.

<sup>19</sup> Nire nire tareta tikwe abko btä titä mäträre töi diankäre. Ne aisetet, munkwe ja di mikata kri kärekäre nünakäre ja di ngöibti tigrä amne, munkwe kukwe käme kita jökrä temen amne munkwe ja mäkäta Ngöböbe amne tibe. <sup>20</sup> ¡Tita nete! Ti abko tä jukwebtä, käta ñäke, ye mike ñäräre. Nire nire, ie ti kukwei jaradre, käkwe ti kärädre gwä angwane, ti näin känti nebe gwi abko ben tikwe mrödi siä kwatibe te. <sup>21</sup> Angwane tikwe ja tare nikaba, akwa tikwe Ngöbö rükanteba ñakare abti ti krütaba, aisetet tikwe kukwe blo ganainbare kwäräbe jökrä, ütiäre Ngöböökwe ti mikani täkänintbe gobrane

ketetibe jabe, ye kwrere nire nire käkwe ja tare nikadre, akwa ti rükandrete ñakare kwe abko rabadre kukwe blo ganaine kwäräbe jökrä arato. Nitre ye abko tikwe mikadi täkänintbe gobrane ketetibe jabe arato. <sup>22</sup> Ye abko, nitre gätäkä ti kähti tä näne juta keta küküte, ye olo tärä aiset, Ngöbö Üai tä dre niere, ye ie olo ketate kwe mikakäre täte abko nieba kwe tie.

## 4

*Kürä gobrankrä, bti Ngöbö nämane täkänintbe*

<sup>1</sup> Yebti tikwe nikraba angwane, jukwe näma tikani kä käinbti, btä ti okwä rababa. Angwane ni kukwe kri, drü kri kwrere tikwe kukwe nuaba käne, ye kwrere jire kukwe jarabata tie abko käkwe nieba krörö tie:

Jakwe kä käinbti nete amne, kukwe rakadikä ño ño mda abko ti bike mike tuadre mae, nieba kwe tie.

<sup>2</sup> Ye btäräbe Ngöbö Üai rükaba täte jökrä tibta angwane, kürä gobrankrä, yebti ni näma täkänintbe iti gobrane kä käinbti, btä ti okwä rababa. <sup>3</sup> Angwane niara bä rababa tuenträ ngitiekä tie. Jä ngwen bürere kädianta brillante, kwrere jire rababa tuen tie. Erere arato, jä bä tain trä ngitiekä, kwrere jire bä rababa tuen tie amne, kürä niara täkräre, ye bäre temen abko mrüträ näma krati. Mrüträ ye abko rababa trä ngitiekä rerebare bäsijä tuäre trä rerebare kädianta esmeralda, kwrere bä rababa tuen tie. <sup>4</sup> Mdakäre abko, kürä gobrankrä ye bäre ta abko kürä mdara jire näma kwä gre bti kobkä. Kürä yebti abko nitre unbret näma täkänintbe ni gre bti nibkä. Nitre ye abko metre amne deme, ye bä mikakrä dän bä ngwen bürere näma kitani btätre amne korona orore orore näma mikani dokwäbti, btä ti okwä rababa. <sup>5</sup> Angwane kürä gobrankrä ye känti merabe rababaträ ngitiekä amne kä ngö rababa ruen krikri be tie. Erere arato, unsuni aibe ngö rababaruuen tie amne kürä gobrankrä ye känenkri ñotra näma jutra ngitiekä krä kükü. Ñotra krä kükü näma trä ngitiekä ye abko Ngöbö üai ni kükü, btä ti okwä rababa. <sup>6</sup> Mdakäre abko, kürä gobrankrä ye känenkri abko mren trä ngitiekä bidrio kwrere näma.

Angwane kürä gobrankrä ye bäre ta abko jändrän nire näma kräbkä. Jändrän ye abko okwä jökrä ngrabare, okwä jökrä ngwärerekri amne trökri abko tikwe tuaba. <sup>7</sup> Jändrän kräbkä tikwe tuaba, ye abko krati rababa tuen lion kwrere jire tie. Krobukäre abko rababatuen buey kwrere tie amne, krämäkäre abko ngwärere rababa tuen ni kwrere tie amne kräbkäkäre abko mü kri tä nakenkä käinta, ye kwrere jire rababa tuen tie. <sup>8</sup> Jändrän kräbkä tuaba tikwe, ye abko kratirekratire ngike krä ti rababa tuen tie amne ngike btä abko okwä rababa tuen jökrä btärikri amne terikri tie. Angwane jändrän ye abko käredibire rare näma jadüke ñakare, näma niere krörö:

Ngöbö ni Dänkien Di Kri Jändrän Jökrä Nuenkrä, ma abko deme, deme, deme.

Ma nämanena näne kena amne, mata näne amne ma ara jatadi, näma niere. <sup>9-10</sup> Angwane Ngöbö näma täkänintbe gobrane kürä gobrankräbti, ye abko jändrän kräbkä ye näma käkitekä batire batire amne, näma mike ütiäte kri jae, kä näma kuin niere Ngöbö nünanka kärekäre yeye. Angwane nitre unbret näma gre bti nibkä ye tä nebe ngukudokwäbti niara ngwärerekri, käta korona jakwe mike temen Ngöbö ngwärerekri, Ngöböökwe kä biani gobrane ietre bä mikakäre, käta niere krörö:

<sup>11</sup> Ni Dänkien Ngöbö,

ma aibe ngöräbe käkitadrekä amne  
ma aibe raba mikani ütiäte amne  
ma aibe di kri,  
ñobtä ñan angwane makwe jändrän jökrä dätebare amne,  
ma aibe köböire jändrän jökrä tä mtare,  
abko nitre unbret näma niere kore, rababa tuen tie.

## 5

*Kordero abko ütiäte täräkwata mrianinkä ye metatekä*

<sup>1</sup> Angwane kürä gobrankrä, bti Ngöbö näma täkänintbe. Niara kise ruenkri abko täräkwata mrianinkä ketaninte näma, btä ti okwä rababa. Täräkwata ye abko näma tikani jökrä terikri amne btärikri amne, näma ketaninkä kuin bä kükü ja täritäri munkwatabti, rababa tuen tie. <sup>2</sup> Angwane angele bäri di kri näma iti, btä ti okwä rababa amne, angele ye käkwe ngrateba kri käkwe nieba: „Nire bäri ütiäte kri abko käkwe täräkwata ne metadite amne, munkwata keta kükü mikani ja täritäri täräkwata ketakakrä abko nirekwe diandikä täräkwatabtä amarebti ye? rababa niere kore. <sup>3</sup> Akwa kä käinbti, kä temenbtä, amne dobo täni abko ni kwanba ñakare jire iti täräkwata ye metatekä amne ñäkäkä btä. <sup>4</sup> Ni ütiäte ñan kwanba jire iti täräkwata ye metatekä amne ñäkäkä täräbtä ti okwäbti, yebtä abko ti rababa müen krübäte. <sup>5</sup> Abtä nitre unbre unbre näma siba yete abko iti käkwe nieba tie:

Makwe ñan müa mda, ñobtä ñan angwane ni iti Judá mräkäkri abko dite kwralion kwrere, niara abko jatani David bkükkri amne niarakwe jäandrän jökrä Ngöbö rüere ganainbare kwäräbe, aisetet niara abko bäri ütiäte käkwe tärä se metadite amne ketaninkä bä kükü ja täritäri se diandikä kwe arato, ni unbre ye käkwe nieba kore tie.

<sup>6</sup> Ye btäräbe, Ngöbö näma täkänintbe kürä gobrankräbti, ye ngätäite amne jäandrän kräbkä ye ngätäite amne nitre unbre unbre ni gre bti nibkä ye ngätäite ni näma iti abko rababa tuen Kordero kwrere tie. Ni ye abko näma nünaninkä, akwa Kordero müre ketani, kwrere jire rababa tuen tie. Erere arato, ni ye abko di kri, aisetet niara di ye abko rababa tuen kroture krä kükü tie amne niara okwä rababa tuen kwä kükü tie, ye abko Ngöbö üai ni kükü tä näin kä jökräbti temen abko tikwe tuaba. <sup>7</sup> Angwane Ngöbö nämane täkänintbe kürä gobrankrä yebti, ye kise ruenkri täräkwata näma, ye ni Kordero kwrere ye käkwe dianba kisete ti okwäbti. <sup>8</sup> Niarakwe täräkwata ye dianba kisete, ye btäräbe jäandrän kräbkä näma yete amne nitre unbre unbre ni gre bti nibkä näma yete, ye rikaba ngitiekä ngukudokwäbti temen ni Kordero kwrere ye ngwärekri, niara mikakäre ütiäte jae. Angwane nitre unbre unbre ye kisetekisete abko arpa näma amne, blato kiakia orore orore ngwian näma kisetekisete kwetre arato abko te kri ngwäri mnüne rä båne näma kwetre. Kri ngwäri mnü rä båne näma blatote kwetre, ye abko ni itire itire tödekaka Jesubti tä näne kuin deme Ngöbökrä käta blite Ngöböbe abko bä näma kore kwetre. <sup>9</sup> Angwane niaratre rababa ka btin niere krörö ni Kordero kwrere ie:

Ma aibe ütiäte kri, kä raba täräkwata ye den kisete amne ketaninkä munkwatabti, ye ma  
aibe raba denkä mento,  
ñobtä ñan angwane ma abko müre ketani ni kräke amne,  
ja däriebti makwe ni bätäkä ngwarbe kökanintarita Ngöbökrä.

Ye abko, ni kukwe bätäkä ngwarbe amne  
ni juta kwatirekwatire te amne  
ni nünanka kä ketareketare temen,  
te makwe ni kökanintarita ruäre rabakäre ni jen Ngöböökwe.

<sup>10</sup> Amne ma köböire Ngöböta gobrane ni tödekaka mabti yebti  
amne makwe mikani sribire ni blitaka Ngöböbe ni mda mda diäre kwrere Ngöbö  
nikwe kräke.

Amne niaratre käkwe gobrandi kä nebtä mabe,  
abko nieba kwe ti okwäbti.

<sup>11</sup> Yebti tikwe nikrabata mda angwane, Ngöbö näma täkänintbe kürä gobrankräbti, ye  
bäre temen amne jäandrän kräbkä ye bäre temen, erere arato nitre unbre unbre näma ye  
bäre temen angele kukwei rababa ruen kwati krübäte tie. Ye erere bkänä, angeletre näma  
kwati kwati krübäte abko ni ñan rabadre tanre <sup>12</sup> amne rababa Jesu bä mike Kordero  
kwrere, kä rababa ngrente ja dibti, kä rababa niere:

¡Kordero ye müre ketani ni diantarikäre,  
ye ütiäre abko Ngöböökwe ja di kri mikani niara kisete amne raba jäandrän jökrä bkäne!  
¡Erere arato, niara aibe raba töbtä kri amne di raba jäandrän jökrä bti ta amne,  
niara aibe raba mikani ütiäte jae amne

raba käikitaninkä amne demainbare!  
abko angele kukwei rababa ruen kore tie.

<sup>13</sup> Yebti jäandrän jökrä dätebare Ngöbökwetä näne kä käinbtä, kä temenbtä, dobo täni amne mrente abko kukwei rababa ruen krörö tie arato:  
¡Ngöböta täkänintbe gobrane küräbti amne Jesu Kordero kwrere, niaratre nibu ye aibe raba demainbare amne raba mikani ütiäte kri!

¡Erere arato, raba käikitaninkä amne raba ja di bkäne kri kärekäre!  
abko jäandrän jökrä rababa niere kore. <sup>14</sup> Angwane jäandrän kräbkä näma kürä gobrankrä bäre temen, ye abko rababa niere: ¡Jän, ye kwrere raba bare! ¡Amen! rababa niere. Angwane nitre unbre unbre ni gre bti nibkä, ye rababa jökrä ngukudokwäbti temen Ngöbö amne ni Kordero kwrere ye ngwärekri, niaratre mikakäre ütiäte jae abko tikwe tuuba kore.

## 6

*Munkwata diandrekä täräbtä angwane dre dre rakadrekä*

<sup>1</sup> Yebti ni Kordero kwrere ye käkwe munkwata täräkwata ketakakrä keta kükü ye diankaba keteti käne ti okwäbti angwane, jäandrän kräbkä näma kürä gobrankrä bäre temen, ye krati käkwe ñäkäba krikri be abko kukwe rababa ruen unsuni ngö kwrere tie abko käkwe nieba: ¡Jakwe! nieba kwe. <sup>2</sup> Ye btäräbe tikwe nikraba angwane, mdä ngwen bürere näma, btä ti okwä rababa. Angwane ni näma näin mdä yebti abko näma tukwen rükrä ngwena kisete amne, niarakwe rüe ganaindre ye bä mikakäre korona bianba ie, bti niara rikaba ni jökrä ganaine rübtä.

<sup>3</sup> Yebti ni Kordero kwrere ye käkwe munkwata ketebu täräkwata ketakakrä ye diankaba angwane, jäandrän näma kürä gobrankrä bäre temen ye krobukäre kukwei jaraba tie, käkwe nieba krörö: ¡Jakwe! nieba kwe. <sup>4</sup> Ye btäräbe, mdä mda jataba tuen tie. Mdä ye abko bä tain amne ni näma näin bti abko käkwe kä jáme diandrekä jökrä nikän kä nebtä amne, ni rabadre ja kämike jökrä kwärikwäri, abkokäre ja di bianba ie angwane, ngitra kri bianba rükrä ie arato.

<sup>5</sup> Yebti ni Kordero kwrere käkwe munkwata täräkwata ketakakrä diankaba ketamäkäre angwane, jäandrän näma kürä gobrankrä bäre temen ye krämäkäre kukwei jaraba tie, käkwe ¡Jakwe! nieba. Ye btäräbe tikwe nikraba angwane, mdä bä drüne, btä ti okwä rababa amne, ni näma näin mdä yebti abko näma jäandrän däbä nuatekrä ngwena kisete.

<sup>6</sup> Angwane jäandrän ketabkä, ye ngätäite Ngöbö kukwei jaraba krörö tie:

Makwe mrö gaka kä jökräbti temen. Yebti abko ngwian ganaindre köböiti abko biandre jökrä trigo kilo kratibe btä. Erere arato, ngwian ganaindre köböiti abko bti sebada kökadre kilo krämäbe jökrä, akwa olibo köi amne uba döi,\* ye abko makwe ñan juan ngwarbe jire chi, nieba kore kwe abko jaraba tie.

<sup>7</sup> Yebti ni Kordero kwrere ye käkwe munkwata täräkwata ketakakrä diankaba bäbkäkäre angwane, jäandrän näma kürä gobrankrä bäre temen, ye abko kräbkäkäre käkwe ¡Jakwe! nieba. <sup>8</sup> Ye btäräbe tikwe nikraba angwane, mdä bä ngwen bürere nita kite krüte bätä nebe kwrere, btä ti okwä rababa. Mdä yebti abko ni kädekata Gata näma näin amne Gata jiebti abko ni kä nakedtä ngibiatikä näma näin, ni kämikani Gatakwe ngwiandre ja tare nike kä nakedtä abkokäre. Ngöbökwetä köbö biani ietre ni kämikakrä krörö: Nita näne kä ketareketare temen abko tä ñäkänintbe ketabkä ye abko kämikadre keteti rübtä. Erere arato ni krütadre mrö miare, bren kisete amne kwra krübätekrübäte käkwe ni ye kämikadre abko erere Ngöbökwetä köböi biani ietre.

<sup>9</sup> Yebti ni Kordero kwrere ye käkwe munkwata täräkwata ketakakrä diankaba bärilekäre angwane, nitre Ngöbö kukwei mikaka gare käkwe nünankabare dite Jesubtä amne niara rükaninte ñakare kwetre abtä kämikani abko üai näma ñukwä grä täni,

\* <sup>6:6</sup> olibo köi amne uba döi. Mrö mda mda nämane krüte jökrä angwane olibo köi amne uba döi aibe nämane angwane yebti rabadre näne, aisetse mrö jökrä ngätäite ye abko bari ütiäte nünankrä.

sribi kwekwe Ngöbökrä nämane dbe kräke bä mikakrä, btä ti okwä rababa. <sup>10</sup> Angwane niaratre üai näma ñäke ja dibti krörö:

Ngöbö, ma abko Gobranka jändrän jökräbti amne ma deme amne ma abko kukwe era niekä käre. Nitre nünanka ma rüere kä temenbtä käkwe nun kämikani tödekatbä Jesubti, ye abko ñongwane kukwe ükadite kräke, käkwe mikadi ja ngie nuen nun dokwäre amarebti ye? näma niere kore. <sup>11</sup> Angwane dän bä ngwen bürere bianba ietre, niaratre abko metre Ngöbö ngwärekri bä mikakäre. Kukwe ükarete nitre niaratre kämikaka kräke, ye abko ngibiadre ken kwetre abti niaratre mräkä sribikä Ngöbökrä mda mda kämikadre täte jökrä abko rabadre jökrä ketetibe bentre angwane, Ngöbökwé kukwe ükadite niaratre rüekrä, käkwe rüe mikadi ja ngie nuen niaratre dokwäre, nieba kwe ietre.

<sup>12</sup> Yebti ni Kordero kwrere ye käkwe munkwata täräkwata ketakakrä diankaba bä tikäre angwane, tikwe mikaba ñäräre angwane, dobo rababa nakaenkä kri krübäte kä temenbtä, rababa tuen tie amne ñänä abko bä rikwitaba iko jökrä. Bäsi dän drüne, ye kwrere jire ñänä bä rababa. Sö abko bä rikwitaba tain bürere däri kwrere rababa tuen tie. <sup>13</sup> Angwane kri ngwákä kädekata higo abko tä kite tain mrä abko müreta kite mate ribi käta münente jökrä higo kriebtä, ye kwrere jire muke rababa betekä timontimon kä temen nebtä rababa tuen tie. <sup>14</sup> Angwane täräkwata mriakata, ye kwrere jire kä käinbti se rikaba nibrenkä, nibrenkä, nibrenkä angwane, ñan rababa mda rababa tuen tie amne, Ngöbökwé kä tokwä krikri amne kä butu mrente mrente diankaba jökrä mento arato, rababa tuen tie.

<sup>15</sup> Angwane nitre jreire kä nebtä gitiaja jökrä kä mkäte amne jäkwata mkäte ngitiobi Ngöbö ngäniene. Erere arato, nitre gobranka krikri amne nitre rükä dänkien amne ni jändrän bkänkä krikri amne ni ütiäte krikri, btä nitre klabore amne nitre ñakare klabore nünanka Ngöbö rüere gitiaja jire jökrä kä mkäte jrei ben gware Ngöbö ngäniene, <sup>16</sup> kä rababa niere krörö ngitioye amne jäkwataye: Ngöböta täkänintbe kürä gobrankräbti amne ni Kordero kwrere mätä kri, se ngäniene nun üke ja täni amne jakwe nunbti temen, <sup>17</sup> ñobtä ñan angwane Ngöbökwé ni mikadre ja ngie nuen kri krübäte abko kái nüra, ¿se abko nirekwe nünandrekä jabtä Ngöböbe se? nitre nünanka Ngöbö rüere rababa niere kore ti okwäbti.

## 7

*Ngöbökwé ni jen kwe ngibiadi jenena jakrä*

<sup>1</sup> Yebti angele näma nibkä, btä ti okwä rababa mda. Angele näma iti kä driri, iti nindrini, iti ngwitaräkri amne iti mötarikri. Angwane müre ñan rabadre mate mda kä nebtä, mrenbtä amne kribtä, abkokäre niaratre näma müre ketebtä. <sup>2</sup> Ye btäräbe angele mdara jire näma kä driri jataba arato abko Ngöbö nire kái näma tikani jábtä abko ngwian näma kisete kwe. Angele ye rükaba angwane, angele nibkä ie Ngöbökwé ja di biani kä juankrä ngwarbe amne mren juankrä ngwarbe mürebti, yebti angele rükaba mrä käkwe ngrateba kri ja dibti, käkwe nieba krörö:

<sup>3</sup> Nitre sribikä Ngöbö nikwe kräke, ye okobtä Ngöbö kái ketaka ngämi ngibiakäre Ngöbö mätä kri ye ngäniene, ye känenkri munkwe ñan kä temen ye juan ngwarbe. Erere arato, munkwe ñan mren amne kri juan ngwarbe mürebti, nieba kwe ietre ti okwäbti.

<sup>4</sup> Angwane nitre israelita nibe btä Ngöbö kái ketadrekä ngibiakäre kukwe taretare ngäniene nieba jökrä abko 144,000 abko ni kukwei jaraba kore tie.

<sup>5</sup> Nitre därebare juta Judákri btä Ngöbö kái ketakaba abko 12,000.

Nitre därebare juta Rubénkri abko 12,000,  
juta Gakri abko 12,000.

<sup>6</sup> Juta Aserikri abko 12,000,  
juta Neftalíkri abko 12,000,  
juta Manasékri abko 12,000.

<sup>7</sup> Juta Simeónkri abko 12,000,  
juta Levíkri abko 12,000,

juta Isacarekri abko 12,000.

<sup>8</sup> Juta Zabulónkri abko 12,000,

juta Josékri abko 12,000,

juta Benjamínkri abko 12,000 arato.

*Ni kwati dän ngwen bürere kitani btä käkwe Ngöbö käikitankä*

<sup>9</sup> Yebti tikwe nikraba angwane, ni kä jökräbti temen näma kwati, btä ti okwä rababa. Ni bätäkä ngwarbe amne ni kukwe bätäkä ngwarbe näma, erere arato ni nünanka juta bätäkä ngwarbe, ye näma kwati kwati krübäte nünankä kürä gobrankrä Ngöböökwe ken amne ni Kordero kwrere ye ngwärerekri, btä ti okwä rababa. Nitre rababa kwati krübäte, aisetet ñan rababa tanre jire chi. Nitre ye abko ngite ñakare mda Ngöböökwe niebare btätre, ye bä mikakrä abko dän bä ngwen bürere bürere te näma näin amne näma datile kriekä\* ngwena kisetekisete kä ngwiankäre nuäre jabtä. <sup>10</sup> Angwane rababa ngrente ja dibtí, kä rababa niere krörö:

¡Ngöböta täkänintbe kürä gobrankräbti amne ni Kordero kwrere, ye aibe köböire nita nebe dianintari jökrä!

rababa niere kore.

<sup>11</sup> Angwane kürä gobrankrä bti Ngöbö näma täkänintbe ye bäre temen, nitre unbre unbre bäre temen btä jäandrän kräbkä ye bäre temen angeletre näma nünankä jökrä, käkwe ja okokrä mikaba neme dobobtä temen, käkwe Ngöbö käikitakaba, <sup>12</sup> krörö:  
¡Amen!

Ni jökrä raba Ngöbö demaine amne käkitekä amne, Ngöbö aibe töbtä kri amne ni jökrä  
raba kuin niere kärekäre ie.

Erere arato, Ngöbö aibe mika ütiäte jae amne niara aibe di kri jäandrän jökrä bti ta.

Ye aisetet Ngöbö nikwe ye aibe abko mika ütiäte kri kärekäre ni jökräkwe. Abko kore se.  
¡Amen!

abko angeletre rababa niere kore.

<sup>13</sup> Ye btäräbe nitre unbre unbre iti käkwe nieba krörö tie:

¿Nitre dän ngwen bürere ngwen bürere kitani jabtä, se abko nire amarebti se?  
Mdakäre abko, ¿niaratre kä mdenbo tä näin ruen? nieba kwe tie.

<sup>14</sup> Angwane tikwe nieba mda ie:

Ne abko. Niaratre garera mae ti mräkä, aisetet makwe nie tie, tikwe nieba ie.

Abtä niarakwe nieba krörö mda tie:

Ja tare nikani kri tödekkabtä Jesubti angwane, nitre se käkwe ja tare nikani arato, akwa krütani tödekkabtä bti abko mdan se. Angwane dän bätäteta kuin tä nebe ngwen bürere, ye kwrere niaratre käkwe tödekkani Jesubti angwane, ja bätäninte ni Kordero kwrere däriete kwetre angwane, Ngöböökwe niaratre ngite dianinkä mento btä abko dän ngwen bürere bürere bärä abko mdan se.

<sup>15</sup> Ye mdan kisete kürä gobrankrä Ngöböökwe, bti Ngöböta täkänintbe gobrane abko känti  
niaratre tä sribire Ngöbökrä dibire rare mtare.

Ngöböökwe niaratre ngibiadi kärekäre.

<sup>16</sup> Ye känti ñan mrö nikadre mda kwetre amne ja tare nikadi ñakare mda kwetre tomna  
miare.

Erere arato, ñänänkwe ñan kukwadre jire chi mda amne kä ngire käkwe ñan nikadre jire  
chi mda,

<sup>17</sup> ñobtä ñan angwane ni Kordero kwrere tä kürä gobrankrä Ngöböökwe känti abko  
käkwe niaratre ngibiadi.

Nitre obeja ngibiaka tä obeja ngibiare, ye kwrere ngibiadi kwe.

Angwane ñö ni mikaka nüne kärekäre, ye känti näin niaratre ngwena ñö tuen jae.

Amne kukwe taretare btä tätre müen, ye ñan rabadi jire chi mda amne Ngöböökwe okwä  
ñöi rötadi jökrä ietre,

abko nieba kore kwe tie.

\* 7:9 datile krikä. Datile krie abko dba krie kwrere, akwa tukwä ñakare btä amne ngwä abko mane amne bänante,  
aisete kuin kwetadre.

*Tärä ketaninkä bā kükükäre amne blato orore*

<sup>1</sup> Yebti ni Kordero kwrere käkwe munkwata täräkwata ketakakrä diankaba bā kükükäre angwane, ñänä okwä ötare näre kä rababa kwekbe kä käinbtí sete.

<sup>2</sup> Yebti tikwe nikraba angwane, angele näma nünaninkä ni kükü Ngöbö ngwärekri, btä ti okwä rababa angwane, angeletre ye abko ie drü bianba krä kükü. <sup>3</sup> Bti angele mdara jire jataba. Angele ye abko näma blato chi orore kri ngwäri mnü rä bāne kukwakrä ye ngwena kisete abko rükaba ñukwä grä ye känti, rababa nünaninkä. Ye btäräbe, kri ngwäri mnü rä bāne bāne bianba kabre kukwadre ñukwä grä ororebti kürä gobrankrä Ngöböökwe ye känti amne, juta deme Ngöböökwe käkwe kukwe ribeba Ngöböye ye ben gware. <sup>4</sup> Angele rababa kri ngwäri mnü rä bāne kukwe ye ngübü rababa niken angele ye kisete kukwâne nebe Ngöbö ngwärekri, juta deme Ngöböökwe namani blite Ngöböbe abko bā mikaba kore. <sup>5</sup> Angwane angele rikaba ñukwä grä känti, käkwe ñukwä bda diankaba, mikaba blato orore kri ngwäri mnü rä bāne kukwakrä te kwe, bti ñukwä bda ye kitaba kä temen nebtä kwe. Ye btäräbe unsuni ngö rababa krikri be. Erere arato, kä ngö rababa ruen krikri, meraträ rababa amne dobo rababa nakaenkä se kwrere.

*Drü jükani krä kükü ja täritäri*

<sup>6</sup> Angwane angeletre ni kükü ye abko käkwe ja mikani juto biare drü krä kükü ye jükakäre. <sup>7</sup> Ye erere bkänä, angele iti käkwe drü jükaba káne, ye btäräbe ñü bürere jä kukwän kwrerekwrere amne ñukwä jutra mritani däribe mni mni abko Ngöböökwe juanba kä temen nebtä, ye abko käta ñäkänintbe ketamä abko kukwaba keteti jire temen. Erere arato, kri krikri kukwaba keteti jire, akwa mikä rerebare kukwaba jire jökrä kwe.

<sup>8</sup> Yebti angele nibukäre käkwe drü mda jükaba angwane, jändräbäsi ngitio kri jutra ngitiekä jökrä, kwrere jire kitaba mrente angwane, mrenta ñäkänintbe ketamä abko keteti rikwitaba därire. <sup>9</sup> Angwane jändräbäsi jökrä nünanka mrente rabadre ñäkänintbe ketamä abko gataba keteti näre. Erere arato, ru mrente ñäkänintbe ketamä abko juanba ngwarbe keteti näre.

<sup>10</sup> Yebti angele nimäkäre käkwe drü jükaba. Ye btäräbe muke kri jutra ngitiekä ñotra kwrere näma kä käinbtí, betakaba timon abko rikaba mate ñö krikri amne ñö kiakia ketamä abko keteti te rikaba mate. <sup>11</sup> Muke ye abko kädian näma Kwaka abko rikaba mate ñöte, ñobtä ñan angwane ñöta ñäkänintbe ketamä abko keteti rikwitaba kwaka jökrä. Ñö kwaka, ye kisete ni krütaba kwati krübäte ñö ye ñabtä.

<sup>12</sup> Yebti angele nibkäkäre käkwe drü jükaba angwane, käta ñäkänintbe ketamä ñänante amne söte abko keteti rikaba ngwarbe amne muketa ñäkänintbe ketamä abko keteti rikaba ngwarbe arato. Ne aise, kä keteti näre ñänante amne söte abko rikwitaba iko jökrä amne muke keteti näre rababa iko arato. Ye mdan kisete, ñänä okwä krä kwä kä ngwenbti käträ rababa ñakare. Erere arato, ñänä okwä krä kwä deo käträ rababa ñakare arato.

<sup>13</sup> Yebti tikwe nikraba angwane, mü kri näma nikenkä käinta abko ngö jaraba tie amne mü ye rababa ñäke ja dibti, kä rababa niere krörö: ¡Aingwaree, nitre nünanka Ngöbö rüere kä temenbtä abko bobre jakän, ñobtä ñan angwane angele nimä mda kebera drü jüke ja täritäri aise! rababa niere kore.

<sup>1</sup> Yebti angele nirikekäre käkwe drü jükaba angwane, angele bā muke kwrere näma kä käinbtí betaninkära timon nüke kä temen nebtä abko tikwe tuaba. Angwane kä mkä kri kädianta Kä Timonbtí kräke llabe bianba ie jukwe Kä Timonbtí ye tikakrä. <sup>2</sup> Ye erere bkänä, angele ye käkwe jukwe tikaba Kä Timonbtí angwane, ngübü tä nebe neen krikri be, ye kwrere jire ngübü rababa kite kabre kukwâne abko käkwe ñänäträ mikaba diore amne kä käinta rababa diore ngübü kisete arato. <sup>3</sup> Angwane ngübü yete abko tröda jataba kwati krübäte mda abko rikaba kä jökräbti temen kä nebtä. Tröda ye abko ie kä bianba ni täkätekäre bäsidi drike kwrere. <sup>4</sup> Tröda ye abko käkwe ñan mikä kwetadre amne kri mu

jökrä rerebare ñan kwetadre kwetre. Erere arato, kri jökrä ñan kwetadre jire chi kwetre, nieba Ngöböökwe ietre; akwa nire nire tödekaka ñakare Jesubti, aisetet Ngöbö kä ñakare ketaninkä okokrä btä, ni ye kwrerekwrere aibe mikadre bren kwetre, nieba Ngöböökwe ietre.<sup>5</sup> Akwa tröda ye abko ie Ngöböökwe kä bianba ni mikakrä bren jume jirekäbe, akwa kä bianba ñakare kwe ietre ni kämikakrä. Angwane drike tä ni täkete abko tä nebe tare krübäte nie, ye kwrere tröda ye käkwe nitre ye mikadre bren, käkwe ja tare nikadre krübäte sö krärike, Ngöböökwe nieba ietre.<sup>6</sup> Ne aisetet nitre rababa ja tare nike tröda kisete, ni ye abko tö rabadi krütai jötrö, akwa rabadi krüte ñakare.

<sup>7</sup> Angwane tröda nitre mikaka bren ye abko bä krörö: mdä mikata biare ngwiandre rübtä, ye kwrere jire bä rababa amne, dokwäbti bäsí korona orore kwrerekwrere näma angwane, ngwäre bä rababa ni ngwäre kwrere. <sup>8</sup> Mdakäre abko, dokwä drüen rababa tuen nga meri dokwä drüen kwrere tie amne tu rababa tuen kri krübäte lion tu kwrerekwrere. <sup>9</sup> Amne jäandrän ribi ribi jiero kwrerekwrere näma mikani mäträbtä ngibiakäre rüe ngäniene amne, kareta krati krübäte jäkäta niken mdäkwe rübtä ngöta nebe krikri, ye kwrere jire tröda ye ngike ngö rababa ruen nikenä käinta. <sup>10</sup> Erere arato, tröda ye abko niretu aibe rababa tuen kübarate drike kübara kwrerekwrere. Tröda kübara ye abko di rababa ni mikakrä bren jume sö krärike. <sup>11</sup> Angwane üai käme tä dänkiene Kä Timonbti abko tä tröda ye dänkiene. Üai käme tröda dänkiene ye abko kädianta Abadón hebreore amne Apolión griegore. Ye abko Ni Gakaka nieta.

<sup>12</sup> Kukwe tare kri krübäte jatadre ketamä niebare mü krikwe abko erere tröda ye köböite kukwe tare rikaba batí käne ta, akwa kukwe tare kri tä ketebu mda.

<sup>13</sup> Yebti angele ni tikäre käkwe drü jükaba angwane, ñukwä grä orore kri ngwäri rä bâne kukwakrä Ngöböye näma Ngöbö ngwärekri, yebtä jäandrän kroture kräbkä näma abko te ni kukwei jaraba tie. <sup>14</sup> Angwane angele ni ti kisete drü näma, ye ie ni kukwei käkwe nieba krörö: Angele nibkä tä mäkäninte Ñö Eufrates känti ye tikete, nieba kwe. <sup>15</sup> Ye erere bkänä, ñänä okwä nuäi, köbö mden te amne sö mdenbtä amne kä mdenbtä angele nibkä ye rabadre tikaninte abko näma mikanintbe, ye erere angele rababa tikaninte abko käkwe ni kämikadre ketamä temen, abkokäre rababa tikaninte. <sup>16</sup> Angwane nitre rükä näma näin mdäbti abko 200,000,000 nieba kore abko ni kukwei jaraba tie.

<sup>17</sup> Ye ngwane abko, bäsí köböre kwrere Ngöböökwe mdä mikaba tuare tie angwane, nitre näma näin mdä yebti abko jäandrän ribi ribi näma mikani ja mäträbtä kwetre ja ngibiakäre rüe ngäniene. Jäandrän ye abko bä rababa tain ñukwä jutra kwrere, bä mire drüne amne bä näma sübrüre asufre kwrere abko näma kitani jadtä kwetre. Mdakäre abko, lion krübäte dokwä, ye kwrere jire mdä ye dokwä rababa tuen tie angwane, mdä ye kadate abko ñukwä jutra, ngübü amne asufre rababa betekä. <sup>18</sup> Ñukwä jutra, ngübü amne asufre rababa betekä mdä kadate ye abko käkwe ni ketamä kä temen nebtä nünanka Ngöbö rüere kämikaba, <sup>19</sup> ñobtä ñan angwane mdä ye abko di rababa kadate amne kübarate ni kämikakrä. Mdä ye abko kübara rababa tbi kwrere abko bti rababa ni kwete amne rababa ni kämike arato.

<sup>20</sup> Akwa ni mda mda rababa nire ja tare nika ye näire abko käkwe kukwe kämekäme Ngöbö rüere ye kitaba ñakare temen, aisetet näma ja mike ngite janknu abko krörö: üai käme giviakaba ñakare kwetre. Mdakäre abko oro, plata, bronse, jä amne kri sribebare ngöbö ngwarbere abko ie kä tuen ñakare amne ni kukwei ruen ñakare ie amne dikekä ñakare abko mikaba ütiäte janknu kwetre arato. <sup>21</sup> Mdakäre abko, nitre ye näma ni kämike, ye erere tä nuene janknu amne, kwra neme ñakare ietre amne, ja mika gure batí batí neme ñakare ietre amne tä gore janknu arato.

ngitiekä ñänäträ kwrere amne, ngüre abko rababa tuen ürä kri ñukwä jutra kwrere. <sup>2</sup> Angwane angele ye abko näma näin täräkwata chi metaninte ngwena kisete. Angele ye abko käkwe ngoto küde ruenkri mikaba mrenbti amne ngoto küde ngeberekri abko mikaba dobo nötabti jate. <sup>3</sup> Bti lion tä ngwane krikri ja dibti, ye kwrere jire angele ye käkwe ngrateba kri ja dibti angwane, unsuni krä kukü ngö rababa ruen tie. <sup>4</sup> Unsuni krä kukü kukwei käkwe kukwe nieba, ye ti rikabara tike täräbtä angwane, ni kukwei rababa ruen kä käinbti tie, käkwe nieba krörö: Unsuni kukwei nibi krä kukü käkwe dre nini ye tuemetre tiebe. Makwe ñan tika täräbtä abko ni kukwei jaraba kore tie. <sup>5</sup> Angwane tikwe angele tuaba ngoto mike mrenbti amne dobo nötabti jate, angele ye ara käkwe kise ruenkri kakaba käin amne kukwe niedi kwe abko kukwe era erere bä mikakäre, <sup>6</sup> bti nieba krörö kwe: Ngöbö Nünanka Kärekäre amne Ngöbö kä käin, kä temen dätekä ara käkwe mren dätebare amne jäandrän jökrä tä te dätekä, Ngöbö ye käbti ti bike kukwe era erere niere krörö: ¡Ngöböökwe ñan kä ngibiadi jire chi mda! <sup>7</sup> Akwa angele ni kükükäre käkwe drü jükadi angwane, batibe kukwe kaibe tiebe Ngöböökwe ye rabadi bare täte jökrä, Ngöböökwe niebare niara kukwei niekä jökräye ye kwrere.

<sup>8</sup> Angwane ni kukwei jaraba krire kä käinbti tie ye käkwe niebata krörö mda tie: Angele tä nünaninkä amne ngoto kwärä tä mrenbti amne ngoto kwärä abko tä dobo nötabti jate abko täräkwata chi metaninte tä kisete kwe, ye nän kärere ie, nieba kwe tie. <sup>9</sup> Ye erere ti rikaba käkwe nieba krörö angele ye:

Tääräkwata chi tä ma kisete, ye ngwen tie, tikwe nieba ie.

Angwane angele ye käkwe nieba mda tie:

Tääräkwata ne, amne kweta makwe. Tääräkwata ye bänän rabadi mane munkö kwrere ma kadate, akwa ma bülete abko bänän rabadi kwaka, nieba kwe tie.

<sup>10</sup> Ye erere bkänä, tääräkwata chi näma angele kisete, ye tikwe dianba kisete, bti tikwe kwetaba. Angwane bänän rababa mane munkö kwrere ti kadate, akwa tääräkwata ye rikaba mate ti teri angwane, bänän rababa kwaka. <sup>11</sup> Angwane nieba krörö mda kwe tie: Mtare nitre juta kabre te amne nitre kukwei bätäkä ngwarbe amne, nitre nünanka kä ketareketare te amne nitre gobranka gobranka, yebtä makwe Ngöbö kukwei nieta btin mda abko nieba kore kwe tie.

## 11

### Ni nibu Ngöbö kukwei niekä

<sup>1</sup> Yebti angelekwe krito bäsí nörä kroko kwrere bianba kä ñäkäkrä tie, käkwe nieba krörö tie:

Ju blitakrä Ngöböbe amne ñukwä grä, ye nän ñäke amne ni nibe tä Ngöbö käikitekä yete, ye makwe tan jökrä. <sup>2</sup> Akwa kä mikani jenena nitre ñakare israelitarekrä ju blitakrä Ngöböbe känti, ye abko makwe ñan ñäkä, ñobtä ñan angwane nitre ñakare israelitare, ie kä ye bianina. Sö gre ketebu bti krobu niaratre käkwe rätädi jökrä juta deme Jerusalén yebti, mikakäre ja tare nike.

<sup>3</sup> Angwane tikwe ni juandi nibu abko käkwe blitadi tikrä. Tikwe ja di biandi ietre amne niaratre rikadi Ngöbö kukwei niere köbö 1,260. Ye abko, nitre Ngöbö kukwei niekä kirakira nämane dän jüräre kite jabtä, ye kwrere nitre ye käkwe dän jüräre kitadi jabtä. <sup>4</sup> Ni nibu ye abko tä olibo krie dobu kwrere amne ñotra grä krobu kwrere tä kä temenbtä ni Dänkien ngwärekri. <sup>5</sup> Nane ni mda mda tö rabadre niaratre nibu ye mikai bren angwane, niaratre kukwei tä betekä ñukwä jutra kwrere kadate käkwe rüe kukwadre jökrä. Ne aisetet nire nire tö mikai bren abko gatadre jökrä kore. <sup>6</sup> Mdakäre abko nitre nibu ye tä näin Ngöbö kukwei niere angwane, niaratre di tärä kä mikakrä töre, ñü ñan räkändre jire chi temen abkokäre. Erere di tärä ñö jökrä kwitakrä därire amne tö rabadre ni mikai bren jume bätäkä ngwarbe, ye erere di tärä ni mikakrä ja tare nike bren bätäkä ngwarbe kisete arato.

<sup>7</sup> Akwa nitre nibu ye käkwe blitadi ünän jökrä Ngöbökrä angwane, ni bä jäandrän kri krübäte kwrere abko di Satanakri, aisetet tä Kä Timonbti abko jatadi rüre nitre nibu ye rüere, bti ni jäandrän krübäte kwrere ye käkwe niaratre nibu ganaindi kwäräbe

amne kämikadi kwe. <sup>8</sup> Angwane juta ütiäte kri Jerusalén, känti ni Dänkien müre ketani krusobtä, juta ye känti nitre nibu ye ngwákä rabadi kitantibetemanta ji ngrabare. Juta kri ye mden abko kädianta Sodoma amne Egipto arato, nitre nünanka juta yete tä näne diän diän bä mikakrä. <sup>9</sup> Angwane köbömä bti ötare ni kä jökräbti temen, ni kukwe bätäkä ngwarbe amne ni bätäkä ngwarbe amne ni juta bätäkä ngwarbe te käkwe nitre nibu ye ngwákä tuadi amne ñan doboi mikadre niedi kwetre. <sup>10</sup> Angwane nitre nibu kämikaní ye abko käi rabadi nuäre nitre nünanka Ngöbö rüere btä, käkwe jändrän biandi ngwarbe jae kwärikwäri kä ngwiankäre nuäre jabtä, ñobtä ñan angwane nitre nibu Ngöbö kukwei niekä ye abko nämane ni nünanka Ngöbö rüere kä nebtä mike ja tare nike krübäte, aisetekämikaní angwane, käi rabadi nuäre btätre.

<sup>11</sup> Akwa yebti kä rikaba köbömä bti ötare ta angwane, Ngöböökwe nitre nibu ye mikabata nire amne rababa täkänintbe krö. Ni jökrä käkwe tuaba nüketa nire abko rababa nekwetekä krübäte. <sup>12</sup> Angwane ni nibu ye ie ni kukwei jaraba kri kä käinbti, käkwe nieba krörö ietre: Mun jakwe kä käinbti nete, nieba kwe ietre. Ye btäräbe rikaba mütate käin amne rüe käkwe tuaba jökrä niken kä käinbti.

<sup>13</sup> Ye btäräbe dobo rababa nakaenkä kri krübäte. Dobo rababa nakaenkä, ye kisete abko juta Jerusalén näma ñäkänintbe keta jätä abko keteti rikaba ngwarbe temen amne ni kämikaba mili krä kükü dobo yekwe arato. Angwane nitre ruäre näma nire abko btä kä jürä rababa krübäte amne Ngöbö kä käinbti se käikitakaba kwetre.

<sup>14</sup> Ye kwrere kukwe tare krübäte abko rikaba bobu ta, akwa kukwe tare ketamäkäre abko kebera nüke mda.

### *Angelekwe drü krä kükükäre jükani*

<sup>15</sup> Yebti angele ni tikäre käkwe drü jükaba angwane, nitre kukwei rababa ruen krikri ja dibti kä käinbti, kä rababa niere:

Ni Dänkien Ngöbö amne Jesu Dianinkä Ngöböökwe abko kitera gobrane ni ngätäite. Niaratrekwe gobrandi kärekäre, rababa niere.

<sup>16</sup> Angwane nitre unbre unbre ni gre bti nibkä näma täkänintbe Ngöbö ngwärekri kürä gobrankrä kwekwebti rikaba, rababa ja okokrä mike nebe dobottä temen Ngöbö mikakäre ütiäte jae amne rababa Ngöbö käkitekä, <sup>17</sup> kä rababa niere krörö:

Ni Dänkien Ngöbö, ma di kri jändrän jökrä bti ta amne ma tä kärekäre.

Nunta kuin niere mae, ñobtä ñan angwane ma di kribti ma kitera gobrane ni ngätäite.

<sup>18</sup> Nitre kä jökräbti temen tä näne ma rüere abko moto romon krübäte makrä,

akwa makwe kukwe ükarete ni krütani kräke, mikakäre ja ngie nuen abko käi nära. Amne nitre sribikä makwe käta ma kukwei niere, ye abko ie ma kitera sribi ütiä bien.

Erere arato, ni ütiäte krikri ya, o ni bobre bobre ütiäte ñakare, akwa tä ma käkitekä, ye abko juta deme makwe, ye ie makwe sribi ütiä biandi.

Amne nire nire käta kä temen ne juen ngwarbe abko makwe juandi ngwarbe arato, abko nitre unbre unbre rababa niere.

<sup>19</sup> Angwane ju blitakrä Ngöböbe näma kä käinbti abko jukwe tikaba amne ju yete abko kaja näma, btä ti okwä rababa. Kaja ye abko te kukwe ükaninte Ngöböökwe nitre israelitabe abko näma ükani abko btä ti okwä rababa. Angwane meraträ rababa, kä ngö rababa ruen amne unsuni ngö rababa amne dobo rababa nakaenkä amne ñü járe járe rababa näkäen kabre temen ti okwäbti.

### *Meri amne mökata kri*

<sup>1</sup> Ye btäräbe Ngöböökwe jändrän kuin, ütiäte kri bä mikaba kä käinbti abko tikwe tuaba. Ye abko, Ngöböökwe dre nuendi bä mikaba abko krörö: Meri iti näma kä käinbti abko btä ñänäträ näma dän kwrere amne, sö abko näma niara ngoto täni. Erere arato, korona näma niara dokwäbti abko btä muke bä näma kwä jätäbti kubu. <sup>2</sup> Meri ye ñakare mobe bren kwe kisete, aisetekämikaní jataba ja ngibiare amne rababa ngrente krikri be ja ngibiabtä.

<sup>3</sup> Yebti jäandrän mdara jire rababa kä käinbti sete abko mökata kri krübäte bä tain rababa tuen tie. Mökata ye abko Satana ara bä mikä näma. Mökata ye abko dokwä kwä kükü amne korona näma mikani dokwä kwatirekwatire bti amne krotu krä jätä ie, niara bäri dite bä mikakrä. <sup>4</sup> Angwane muke kä käinbti\* se näma ñäkänintbe ketämä abko mökata ye käkwe muke sökakaba keteti ja kübarabti, bti kitaba timon kwe kä temen nebtä. Abti meri näma ja ngibiare amne ngäbäkre däredre kwe abko mökata ye tö rababa kwetai jötrö kän, abkokäre rababa nünankä meri känti yete. <sup>5</sup> Angwane ngäbäkre däreba brare meri yekwe abko Jesu Dianinkä Ngöböökwe bä mikata. Ngäbäkre ye abko käkwe gobrandi ja di kribti juta jökräbti, käkwe juta jökrä mikadi ja ngoto täni. Akwa ngäbäkre ye däreba angwane, batibe Ngöböökwe dianinkä jenena mökata ngäniene amne járikaba nebe Ngöbö känti, kürä gobrankrä Ngöböökwe ye känti gobrane Ngöbö ben gware. <sup>6</sup> Akwa meri ngäbäkre ngibiaka ye abko gitia bärabba kä kaibete. Ngöböökwe kä ükaninante biare kräke, känti gitia bärabba. Ye känti abko Ngöböökwe bukadre köbö 1,260 abkokäre gitia bärabba.

<sup>7</sup> Yebti rüba krörö mda kä käinbti: angele Miguel btä angele mda mda käkwe rüba mökata amne angele üai käme kwekwe rüere. <sup>8</sup> Akwa niaratre abko di ñakare ganainkrä, aisetetangele Miguel btä angele mda mda ye käkwe mökata ye ganainba kwäräbe, aisetetangele kä ñan rababa mda niaratrekrä nünankrä kä käinbti. <sup>9</sup> Abtä mökata kri kädekata tbi kira, arabe kädekata Diablu amne Satana tä näin ni ngökö kwati kä jökräbti temen, ñan rikadre ji Ngöböökwebti abkokäre. Mökata ye btä angele üai käme kwekwe ben kitaba jökrä timon nüke kä nebtä. <sup>10</sup> Angwane ni kukwei jaraba kri ja dibti kä käinbti tie, kä rababa niere krörö:

Kä ni diantarikrä nära.

Ngöbö nikwe di kri kitera gobrane amne, Ni Dianinkä Ngöböökwe abko nära gobrane arato,  
ñobtä ñan angwane dibire rare ni mräkä rüe Satana kä nämane ni mräkä tödekaka  
Jesubti kite ngise Ngöbö nikwe ngwärekri abko kitankära kä käin bärabba mento  
nüke kä temen nebtä.

<sup>11</sup> Ni Kordero kwrere därie ianinte krusobtä ni ngite diankakäre mento btätre, ye köböire  
ni mräkä tödekaka niarabti käkwe Satana ganainbare.

Erere arato, ni mräkä käkwe kukwe kuin Jesubti nieba angwane, ja kwata namani  
ruentari tare ñakare ietra, käkwe kä jürä ngwiani ñakare jabtä, aisetetämäne  
biare ngataen kukwe kuin niebtä.

Yebti Satana ganainbare kwetre arato.

<sup>12</sup> Ne aisetet mun nünanka kä käinbti kä ngwen nuäre jabtä munkwe.

Akwa aingwaree mun nünanka kä temenbtä amne mun nünanka kä butubti mrente.

Mun ye abko bobre jakän, ñobtä ñan angwane kä kitera neme braibe diabluye rükäre  
Ngöbö rüere, aisetetämäne kri mun nünanka kä temenbtä ye rüere,  
abko ni kukwei rababa ruen tie.

<sup>13</sup> Mökata kitaba timon kä temen nebtä angwane, meri käkwe ngäbäkre ngibiabare  
ye jiebti mökata rikaba kisere mikakäre ja tare nike. <sup>14</sup> Akwa meri ye abko gitiadreta kä  
kaibete tbi ngäniene, abkokäre mü kri ngike kwrere Ngöböökwe bianba ie rikakakrä, ye  
erere bkänä meri ye gitia bärabba mobe tbi ye ngäniene. Ye känti Ngöböökwe ngibiabä kä  
komä bti ötare. <sup>15</sup> Angwane tbi ye käkwe ñö yaiba kabre meri ye rüere mda, ñö ye abko  
rabadre kri, kä rikadre meri ye ngwena nguse, abkokäre yaiba kwe. <sup>16</sup> Akwa dobo temen  
ye käkwe meri ye die mikaba amne, ñö kri yaiba mökatakwe, ye dobokwe ñakaba jökrä,  
aisetetämäne mökatakwe meri kämikani ñakare.

<sup>17-18</sup> Yebtä abko mökata ye mätä rababa kri krübäte meri yebtä angwane, rikaba rüre  
meri ye bkün mda mda rüere. Meri bkün mda mda abko ni Ngöbö kukwei mikaka täte  
era metre amne ni blitaka Jesu kräke, ye rüere mökata rikaba rüre.

\* 12:4 Mu ke ye abko angele ngökani Satanakwe Ngöbö rüere bärabba nütüta.

## 13

*Ni jäandrän kri krübäte kwrere jataba mrente käin*

<sup>1</sup> Yebti mökata rababa nünaninkä mren köräbti. Yebti ni jäandrän kri krübäte kwrere jire abko jataba mrente käin ti okwäbti mda. Ni ye abko dokwä kwä kükü amne krotu krä jätä ie, niara bäri dite bär mikakrä, btä ti okwä rababa. Angwane kukwe diän taretare tikani Ngöbö rüere näma ketaninkä kwati dokwä kwaitirekwatire btä amne korona näma mikani krotu kratirekratire btä abko tikwe tuaba. <sup>2</sup> Ni jäandrän kri krübäte kwrere tikwe tuaba, ye abko bär rababa tuen kwra leopardo kwrere tie amne ngoto abko rababa tuen oso ngoto kri kwrere tie amne kada abko rababa tuen krübäte lion kada kwrere tie. Ni ye abko ie mökata kákwe ja di bianba kri gobrankrä nibtä. <sup>3</sup> Ni jäandrän kri krübäte kwrere ye abko träin kri dokwä kwaitibä abko kisete gatadre, akwa träin ye abko rababa kuinta ie, bär rababa tuen tie. Yebtä abko ni jökrä ñan töi rababa krütare amne ni jökrä rikaba niara jiebti. <sup>4</sup> Angwane mökata kákwe ja di bianba ni jäandrän kri krübäte kwrere ie. Yebtä abko ni jökrä rababa mökata ye mike ütiäte Ngöbö kwrere. Erere arato, ni jäandrän kri krübäte kwrere ye mika rababa ütiäte kwetre arato, kärababa niere krörö: Ni jäandrän kri krübäte kwrere tä nete, ne kwrere ni ñakare jire mda. ¿Nirekwe rüdre ni ne kwrere rüere se? rababa niere.

<sup>5</sup> Mdkäre abko, ni jäandrän kri krübäte kwrere ye abko ie ja di bianba kri kärnebti sö gre ketebu bti krobu. Erere arato, niarakwe bikadre kri, kákwe ñäkädre kämekäme Ngöbö rüere, abkokäre kärbianba kore ie. <sup>6</sup> Ye erere bkänä, ni ye kákwe ñäkäba kämekäme krübäte Ngöbö rüere amne kärnäinta, känti Ngöböta nüne, ye rüere ñäkäba diän diän kwe. Erere arato, nitre nünanka kärnäinti, ye rüere ñäkäba kwe. <sup>7</sup> Erere arato, juta deme Ngöböökwe rüere rüdre kwe, ye ganaindre kwäräbe kwe amne kämikadre kwe, abkokäre kärbianba ie rükäre bentre. Erere arato, ni bätäkä ngwarbe amne juta bätäkä ngwarbe amne ni kukwe bätäkä ngwarbe amne kärnäinti, ye rüere ñäkäba kwe. <sup>8</sup> Angwane Ngöbö ngämi kärnebti dätere, känenkri ni Kordero kwrere nämane mikani biare kämikadre ni mdaye ni jökrä kräke. Ye abko, nire nire ñakare jen niarakwe abko kärnebti ñakare tärä ni nünandi kärekkäre mikakrä gare yebtä, ni ye abko kákwe ni jäandrän kri krübäte kwrere mikadi ütiäte jae Ngöbö kwrere.

<sup>9</sup> Nire nire olo tärä abko kákwe olo ketate kukwe neye:

<sup>10</sup> Nire nire järikadre ngite tödekkäbtä Jesubti,  
ye erere jänäin ngite.

Nire nire kämikadre ngitrabti tödekkäbtä Jesubti,  
ye erere kämikadi ngitrabti.

Kukwe rakadikä kore angwane, juta deme Ngöböökwe kákwe nünandrekä dite jabtä bätärekä ja täritäri amne Jesu rükandrete ñakare kwetre, akwa tödekkäbtä kwaitibe Jesubti janknu.

*Ni jäandrän krübäte kwrere mda jatani dobote käin*

<sup>11</sup> Yebti ni mdara jire jataba dobote käin, akwa niara abko ni jäandrän krübäte kwrere jataba, rababa tuen tie. Ni ye abko krotu krobu ie abko rababa tuen kordero krotu kwrere tie, akwa ñan ñäkäba jämä kordero kwrere kwe, akwa rababa ñäke mökata kwrere.

<sup>12</sup> Amne ni jäandrän kri krübäte kärne ye di rababa jökrä kwe, kärababa sribire ni kärne ye diäre. Ni jäandrän kri krübäte kärne abko träin kri dokwä kwaitibä abko kisete gatadre akwa namaninta kuinta ie, ye kräke ni mda ye rababa sribire, kärababa ni kärne ye mikamna ütiäte Ngöbö kwrere ni jökrä kärnebti. <sup>13</sup> Erere arato, ni ye rababa sribi kri ñan tuabare nuene, kärababa ñukwä kärnäinti mike kite timonkwäre ni mda mda okwäbti, niara di kri Ngöbö kwrere abko ni jökrä kákwe nütüdrex, abkokäre sribi kri ñan tuabare nuenbare kore kwe ni ngökakäre. <sup>14</sup> Angwane ni jäandrän kri krübäte kwrere näma kärne, ye mikakäre ütiäte, ni mda ye rababa sribi kri ñan tuabare nuene. Yebtä abko ni kwati ngökaka kwe. Erere arato, ni jäandrän kri krübäte kwrere abko dokwä kwati tikaninkä ngitrabti kämikakäre, akwa träin namaninta kuinta ie amne namani nüne janknu, ye bär sribemna kwe mikakäre ütiäte Ngöbö kwrere, ye erere ni jökrä kákwe

sribebare. <sup>15</sup> Angwane ni jäandrän krübäte kwrere nibukäre, ie ja di bianba bä ye mikakrä nire abko erere nuenba kwe. Amne nire nire käkwe ñan ni käne ye bä mikadre ütiäte jae Ngöbö kwrere abko kämikadre kwe abko jäandrän bä näma nire.

<sup>16</sup> Mdakäre abko, ni ngwarbe amne ni ütiäte, ni ngwian bkänkä krikri amne ni bobre bobre, ni klabore ñakare amne ni klabore abko btä ni jäandrän kri krübäte kwrere näma käne ye kä tikadre ni kise ruenkri btä o ni okobtä abko ni mda ye käkwe nieba abko erere mikani nuene. <sup>17</sup> Akwa nire nire btä ni jäandrän kri krübäte kwrere näma käne ye kä näma tikani ñakare, ni ye ñan rabadre jäandrän rürümoine amne jäandrän kökö jae. Ni käi ye abko ni jäandrän kri krübäte kä o niara kä tikani kö okwä jäandrän tankräbti. <sup>18</sup> Amne kö okwä jäandrän tankrä, bti ni jäandrän kri krübäte kwrere käita tikani, ye abko nire nire töbtä aibe ie ni ye raba nüke gare. Kö okwä jäandrän tankrä yebti, aisetet ni ye abko kä tikata kö okwä jäandrän tankräbti abko 666.

## 14

### Ni 144,000 abko Ngöbökwé mikani jenena jakrä

<sup>1</sup> Yebti ni Kordero kwrere näma nünankä ngitio Siónbti, btä ti okwä rababa angwane, ni ye ben abko ni mda näma 144,000. Angwane nitre okobtä Kordero ye kä näma tikani amne Kordero rün kä näma tikani arato niaratre näma nitre ye bkäne bä mikakrä abko rababa tuen tie. <sup>2</sup> Yebti ñö ngöta nebe kri, ye kwrere jire kä ngö rababa ruen kä käinbti tie. Erere arato, unsuni ngöta nebe krikri ja dibti, ye kwrere kä ngö rababa ruen tie. Mdakäre abko, ni kwati rababa arpa kabre täke gwaire jökrä abko kwrere jire kä ngö rababa ruen tie. <sup>3</sup> Angwane kürä gobrankrä Ngöbökwé ye ngwärekri nitre 144,000 rababa ka btin nire. Erere arato, jäandrän kräbkä näma kürä bäre temen ye ngwärekri amne nitre unbret unbret ngwärekri ka btin ye nieba kwetre arato. Akwa ka btin, yebtä ni mda mda ñan rababa töi ngitiekä jire chi amne nitre 144,000 kökanintarita Ngöbökwé jakrä, ye aibe ie ka btin ye rababa nüke gare. <sup>4</sup> Nitre ye abko, ni deme ja mike gure ñakare meribe, ye kwrere jire nitre ye käkwe ja ngibiabare deme, käkwe ngöbö ngwarbe ngwarbe mikani ütiäte ñakare jae. Ni Kordero kwrere näma nikken mdente erere abko jiebti niaratre nämane nikken. Erere arato, ni Kordero kwrere krütani krusobtä angwane, ni jökrä ngätäite niarakwe ni ye kökani Ngöbökrä, bti nura ngwä ötata käne, ye bianta ngwarbe Ngöböye kuin niekäre ie, ye kwrere niaratre nämane biani Ngöböye amne ni Kordero kwrereye kuin niekäre ietra. <sup>5</sup> Amne blitabare era metre kwetre Ngöbökrä amne ni mda ngökani ñakare jire chi kwetre, aisetet ni mda mda ñan rababa kite ngise jire chi. Nitre ye mden abko ie ka btin rababa nüke gare.

<sup>6</sup> Yebti tikwe angele mdara jire tuaba abko rababa nikkenä käinta sete. Angele ye abko näma Ngöbö kukwei kuin kärekäre ngwena niedre ni jökrä nünanka Ngöbö rüere kä temenbtä yeye. Ye mden kisete, ni kä jökräbti temen amne ni bätäkä ngwarbe amne ni kukwe bätäkä ngwarbe amne ni nünanka juta kwatirekwatire te abko kräke angele ye näma Ngöbö kukwei kuin ye ngwena, <sup>7</sup> kä rababa nire krörö ja dibti: Ngöbö jürä ngwian jabtä munkwe amne niara käkitaka munkwe, ñobtä ñan angwane niarakwe kukwe ükarete ni kräke mikakäre ja ngie nuen abko käi nära amne, Ngöbö kä käinbti btä kä tementa dätekä amne Ngöbö mren dätekä btä ñö dätekä, Ngöbö ye abko mika ütiäte munkwe abko angele ye rababa nire kore ti okwäbti.

<sup>8</sup> Yebti angele jataba nibukäre mda abko käkwe juta Roma bä mikaba juta Babilonia kwrere, kä jataba nire krörö: Meri bti kä ngwarbe käta ni brare brare näkwite ja mikakäre ngite, ye kwrere jire nitre nünanka juta kri Babilonia käkwe ni kwati kä jökräbti temen näkwitani, aisetet ni kwati töi nikwitani jäme käkwe ja mikani ngite ben Ngöbö rüere, akwa juta kri ye abko nikira ngwarbe jökrä, angele ye rababa nire.

<sup>9</sup> Yebti angele jataba nimäkäre mda. Angele ye abko jataba ñäke ja dibti, kä jataba nire krörö: Ni jäandrän kri krübäte kwrere arabe bä sribebare, ye nire nire käkwe mikadre ütiäte ngöbö kwrere jae amne nire nire käkwe ja tuadremetre ni ye kä tike ja okobtä o ja kisebtä, <sup>10</sup> nitre ye abko btä Ngöbö mätä rabadi kri krübäte abko uba doi kwaka ñata

kwrere jire rabadi kräke, ñobtä ñan angwane uba döi ngätäre kwaka ye kwrere jire Ngöbö mätä nibi, aisetet nitre ye abko kákwe ja tare nikadi kri krübäte ñukwä jutrate amne asufrete angele deme Ngöbökwé ngwärerekri amne ni Kordero kwrere ngwärerekri arato. <sup>11</sup> Ne aisetet, nitre ni jändrän kri krübäte kwrere mikaka ütiäte jae amne ni ye arabe bää sribebare abko nire nire kákwe kä tikani jabtä abko kákwe ja tare nikadi kärekäre dibire rare, aisetet kä rabadi ñakare jadükakrä ietre. <sup>12</sup> Ngöbökwé ni ye mikadre ja tare nike kore, kukwe nebtä abko juta deme Ngöbökwé tödekaka Jesubti, käta Ngöbö kukwei mike täte ye abko kákwe ja die mikadre nüne dite Ngöbökrä.

<sup>13</sup> Yebti ni kukwei jaraba mda kä käinbti tie, kákwe nieba krörö tie: Tärä tike krörö: Mtare mentokwäre nire nire tödekaka ni Dänkienbti tä krüte, ni yebtä kä rabadi nuäre amne Ngöbökwé ja di biandi ie.

Jän, abko kore era metre nieta Ngöbö Üaikwe, ñobtä ñan angwane nitre ye kákwe jadükadi, ñan sribidre mda kwe, amne sribibare kuin kwetre, ye abko Ngöbökwé ütiä biandi ietre abko tike kore täräbtä, nieba kwe tie.

#### *Ni jökrä ükaninkrö kukwe ükatekäre kräke*

<sup>14</sup> Yebti tikwe nikraba mda angwane, müta ngwen bürere, btä ti okwä rababa. Angwane müta yebti abko ni iti Ni Kä Nebtä Ngobo kwrere rababa tuen täkänintbe tie. Angwane korona orore näma dokwäbti amne ngitra tänene tu grine ngwian näma kisete kwe. <sup>15</sup> Ye btäräbe ju blitakrä Ngöböbe kä käinbti te angele näma abko jataba ju bäre kákwe ñäkäba ja dibti ni näma täkänintbe mütabti yeye, kákwe nieba krörö ie: Ni kä jökräbti abko nura ngwä nena tain jökrä kwrere, aisetet nura ngwä öta käi nüra, aisetet ngitra tänene tä ma kisete, yebti nura ye tikekä, bti makwe ngwä öta, erere makwe ni jökrä ükakrä Ngöbökrä, nieba kwe ie. <sup>16</sup> Ye erere bkänä, ni näma täkänintbe mütabti kákwe ni jökrä ükaninkrö Ngöbökrä ye bää mikakäre, ni ye kákwe ngitra mnianteba nura tikakakrä kä temen nebtä amne, ni jökrä ükakakrä kwe kä nebtä.

<sup>17</sup> Abti angele mdara jire näma Ngöbö ngwärerekri ju blitakrä Ngöböbe te kä käinbti, angele ye abko näma ngitra tänene tu grine ngwena kisete arato. <sup>18</sup> Angwane ñukwä grä kri ngwäri mnü rä bärene kukwakrä Ngöböye, ye känti angele mdara jire näma. Angele ye abko di näma ñukwä jutrabti. Angele ye abko kákwe ñäkäba ja dibti angele ngitra tänene ngwianka kisete yeye angwane, ni jökrä nünanka Ngöbö rüere bää mikaba uba kwrere kwe, kákwe nieba krörö ie: Uba nena tain btä amne kä uba ngwä ötakrä nüra, aisetet ngitra ye mniente kä temenbtä amne, makwe uba ngwä öta küdekrä ngöi ngöi, nieba kwe. <sup>19</sup> Ye erere bkänä, angele ye kákwe ngitra tänene tu grine ye mnianteba kä temen nebtä angwane, uba ngwä tikakaba jökrä kwe uba kökräbtä. Yebti jändrän kri uba tükakakrä, te uba kitaba jökrä kwe tükakakrä. Uba tükarekä ngotobti, ne abko Ngöbö mätä kri nitre nünanka niara rüere btä bää mikata, erere niarakwe gadite jökrä abko bää mikata kore. <sup>20</sup> Angwane uba ye abko tükakaba juta Jerusalén bäre mento, akwa jändrän uba tükakakrä te uba tükakaba, ye känti däri aibe rababa betekä kabre krübäte. Däri rababa neen kwata kri temen kilometro siento krämä jire amne rababa mate mdä kadabtä rababa tuen tie.

## 15

#### *Angele ni kükü jändrän taretare ngwianka ni rüere*

<sup>1</sup> Yebti jändrän mda krikri rakadrekä abko bää rababa kä käinbti abko btä ti ñan töi rababa krütare mda abko krörö: Ngöbö mätä kri ye abko rabadre bare täte jökrä nitre nünanka niara rüere btä abko angele ni kükü näma näin jändrän taretare keta kükü mrä ngwena kisete, ni nünanka Ngöbö rüere mikakäre ja tare nike kri abko rababa tuen tie. <sup>2</sup> Mdakäre abko, jändrän mdara jire tuaba tikwe abko bää rababa tuen mren bidriore kwrere abko näma mritani ñukwä jutrade ketetibe rababa tuen tie. Mren bidriore ye känti abko nitre näma nünankä arpa ketaninte kisetekisete rababa tuen tie. Ni jändrän kri krübäte kwrere amne bää dätebare, ye nire nire kákwe mikani ñakare ütiäte ngöböre jae kákwe ganainbare kwäräbe amne niara kä tikani ñakare kwetre jabtä amne kö okwä

jändrän tankrä ni yekwe abko mikani ñakare kwetre jadtä, ye mden ie Ngöböökwe arpa biani abko näma kisete täkäkrä Ngöbö käikitakakäre.<sup>3</sup> Moisés, sribikä Ngöböökwe käkwe Faraón ganainbare angwane, ka niebare kwe Ngöbö käikitakakäre, ka ye kwrere niaratre näma niere amne ni Kordero käkwe ka niebare, ye kwrere abko niaratre näma niere abko krörö:

Ni Dänkien Ngöbö Di Kri Jändrän Jökrä Nuenkrä, makwe jändrän krikri krübäte nuenbare, ye abko bā nuäre jökrä.

Amne ma abko tä gobrane kärekäre.

Ma abko era metre amne ji makwe abko kuin metre jökrä.

<sup>4</sup> Ni jökrä käkwe ma jürä ngwiandre ni Dänkien.

Erere arato, ni jökrä käkwe ma mikadi ütiäte jae ni Dänkien, ñobtä ñan angwane ma aibe kuin deme amne metre.

Erere arato, ni jökrä jatadi, käkwe ma käkitadikä, ñobtä ñan angwane mata kukwe ükete era metre ni jökrä kräke abko nena gare aisetet, abko nitre ye rababa ka niere kore.

<sup>5</sup> Yebti tikwe nikrabata angwane, ju blitakrä Ngöböbe nuäre ngwiandre näma kä käinbti abko jukwei gitia, rababa tuen tie amne, ju yete abko kukwe keta jätä biani nuendre nie Ngöböökwe abko näma ükani. <sup>6</sup> Angwane ju blitakrä Ngöböbe ye te angele ni kükü näma abko jataba ju bäre. Angeletre ye abko näma kukwe taretare krübäte nuendre keta kükü Ngöböökwe abko ngwian näma kisete kwetre. Angeletre ye abko näma dän merebe trä ngitiekä kädekata lino kitani jadtä te näma näin amne koria orore näma kitani ja kötäbtä ta kwetre abko jataba tie. <sup>7</sup> Angwane jändrän kräbkä näma Ngöbö bäre temen, jändrän ye krati abko käkwe blato orore te Ngöbö mätä kri nitre nünanka niara rüere btä näma mikani abko bianba kwe angele itire itire ie. Ngöbö ye mden tä näne kärekäre.

<sup>8</sup> Angwane ju blitakrä Ngöböbe nuäre ngwiandre abko te Ngöbö di kri bā rababa abko ngübü aibe rababa gwita temen amne, kukwe tare kri krübäte ngwian näma angele ni kükükwe ye ngämi niken ta, känenkri ni ñan raba neme jire gwi ju yete, rababa tuen tie.

## 16

### *Blato kwä kükü te Ngöbö mätä kri näma mikani*

<sup>1</sup> Abti ju blitakrä Ngöböbe te ni kukwei rababa ruen kri ja dibti tie, kä rababa niere angele ni küküye: Ngöbö mätä kri tä mikani blato kwä küküte, ye mun nän iente kä temenbtä amne ni nünanka kä temenbtä sebti, nieba kore angeletreye. <sup>2</sup> Ye kwrere bkänä, angele rikaba iti käne käkwe Ngöbö mätä kri näma blatote ye ianteba kä temen yebti angwane, ni jökrä, btä ni jändrän kri krübäte kwrere ye kä näma tikani amne, ni jändrän kri krübäte kwrere abko bā sribebare, ye nire nire näma mike ütiäte ngöböre jae, nitre ye abko kwata rababa ngütüete käme jökrä ietre abko bā rababa käme amne rababa tare krübäte ietre.

<sup>3</sup> Yebti angele nibukäre käkwe Ngöbö mätä kri näma blatote ye ianteba mrenbti angwane, ñö mrente ye rikwitaba därire jökrä. Däri ye abko rikrakaba ribi ribi bäsni kämikata angwane, ni därie tä nikrenkä ye kwrere jire mren ñöi rababa, aisetet jändrän nünanka mrente ye gataba jire jökrä.

<sup>4</sup> Yebti angele nimäkäre käkwe Ngöbö mätä kri näma blatote ye ianteba ñö krikribti amne ñö okwä kiakiabti. Angwane ñö amne ñö okwä ye rikwitaba därire jökrä arato.

<sup>5</sup> Angwane angele mdara jire abko ñö ngibiabtikä kukwei jaraba tie, käkwe nieba Ngöböye:

Ngöbö Deme, ma nämanena kira kena amne ma tä käre mtare.

Mata ni mike ja tare nike kore, se abko mata nuene kuin era metre, <sup>6</sup> ñobtä ñan angwane nitre nünanka ma rüere käkwe juta deme makwe kämikani angwane, niaratre därie iantinte kabre kä temen nebtä.

Erere arato, nitre ma kukwei niekä därie iantinte kwetre.

Ye mden ütiäre abko mata däri bien ñadre ietre mtare.

Niaratre kákwe kukwe nuenbare kore, ye mden ütiäre mata nuene kore btätre arato ye.  
Abko kore se,  
nieba angelekwe Ngöböye.

<sup>7</sup> Yebti ñukwā grä känti abko ni kukwei jaraba mda tie, kákwe nieba Ngöböye: Ni Dänkien Ngöbö Di Kri Jändrän Jökrä Nuenkrä, ma abko tä kukwe ükete kuin era metre nitre nünanka ma rüere kräke, rababa niere kore Ngöböye.

<sup>8</sup> Angwane angele nibkákare kákwe Ngöbö mätä kri näma blatote ye ianteba ñänänbti angwane, ñänä ye ie ja di bianba ni kukwakrä ñukwā kwrere. <sup>9</sup> Angwane ñänänkwe ni jökrä kwata kukwaba tare krübäte angwane, Ngöbö kukwe taretare kri juanka, ye rüere rababa ñäke kämekäme jirekäbe mda, akwa kukwe kämekäme kitaba ñakare temen kwetre amne Ngöbö mikaba ütiäre ñakare jire chi kwetre jae.

<sup>10</sup> Yebti angele nirikekäre kákwe Ngöbö mätä kri näma blatote ye ianteba ni jändrän kri krübäte kwrere näma gobrane yebti. Angwane kä gobrankrä kwe, ye känti kä rababa iko jökrä. Ye ngwane kukwe taretare nakaninkära nibtä, abtä ni jökrä rababa ja tare nike kri, kä rababa ja tüdrä kwete be tute ja tare nikabtä. <sup>11</sup> Akwa niaratre nämane ja mike ngite ño ño Ngöbö rüere abko kitaba ñakare temen kwetre amne jirekäbe rababa ngütüete jökrä ngrabare, kisete rababa ja tare nike kri krübäte, abtä rababa ñäke kämekäme Ngöbö kä käinbti se rüere.

<sup>12</sup> Yebti angele ni tikäre kákwe Ngöbö mätä kri näma blatote ye ianteba ño kri Eufratebti angwane, nitre gobranka btä rükä kwekwe kä driri jatani abko rikadre kä nötabti ta, abkokäre ño kri Eufrates ye grötäba jökrä.

<sup>13</sup> Yebti tikwe jändrän tuaba krörö mda: Mökata kadate, ni jändrän kri krübäte kwrere kadate amne ni ngöbö ngwarbe kukwei niekä abko kadatekadate üai käme gwre kwrerekwrere jataba komä mentokwäre ti okwäbti. <sup>14</sup> Angwane üai käme komä bärababa gwre kwrere ye rababa sribi kri ñan tuabare nuene abko rikaba nitre gobranka krikri kä jökräbti temen ükekrö rükäre Ngöbö Di Kri Jändrän Jökrä Nuenkrä ye rüere. Ye näire Ngöböökwe rüe ganaindi kwäräbe.

<sup>15</sup> Angwane ni Dänkien abko kákwe nieba: Ni gokä tä kite batibe, ye kwrere ti jatadita, aisetek munkwe mokre jabti amne nire nire tädi mokrere jabti kákwe ja ngibiadre kukwe kämekäme Ngöbö rüere ye ngäniene angwane, ñan tädre dikekä ni bütiere kwrere, abkokäre tä dän ngibiare kuin jökrä jabtä amne bütiekä gaidre kri kräke abko ñan tuadre ie, abkokäre tä dän ngibiare kuin jakrä, ye abko tädre ja ngibiare kukwe kämekäme Ngöbö rüere ngäniene. Ni ye abko btä kä rabadi nuäre amne Ngöböökwe ja di biandi ie. Abko kore se, nieba ni Dänkienkwe.

<sup>16</sup> Yebti üai käme nimä ye kákwe nitre gobranka krikri ükakröba jökrä kä kädianta Armagedón hebreore ye känti rükäre Ngöbö rüere.

<sup>17</sup> Angwane angele ni kükükäre kákwe Ngöbö mätä kri näma blatote ye ianteba mürete käinta. Ye btäräbe ju blitakrä Ngöböbe, känti Ngöbö nämane täkänintbe kürä gobrankräbti, ye känti ni kukwei rababa kri, kä rababa niere krörö: Jändrän jökrä nibira bare täte jökrä! ni kukwei rababa niere. <sup>18</sup> Angwane mera rababaträ ngitiekä, kä ngö rababa, unsuni ngö rababa krikri krübäte amne dobo jataba nakaenkä abko rababa dobo mike grükekä jökrä, ye abko ni nükani nüne kä nebtä angwane dobo ñan rakakabare kri krübäte abko erere dobo rakakaba. <sup>19</sup> Dobo rakakaba kri krübäte ye abko kákwe juta kri Babilonia\* ñäkänintbe ketamä temen amne ju krikri juta mda mdate rikaba jökrä temen. Angwane Ngöbö mätä kri bärababa iko kwaka kwrere jire, bti juta Babilonia mikadre ja ngie nuen kwe ye abko rükabata töre ie. <sup>20</sup> Angwane kä butu mrente amne kä ngitiore krikri mentokwäre abko rikaba ngwarbe jökrä amne rababa tuen ñakare mda amne, <sup>21</sup> ñü jä kukwän kwrere kä käinbti rababa näkäen temen nibti. Ñü järe ye abko däbä kilo gre ketebu näre abko rababa näkäen temen. Ngöbö rababa ni mike ja tare nike kri krübäte kore, yebtä abko ni jökrä rababa ñäke kämekäme Ngöbö rüere.

\* <sup>16:19</sup> Juta Babilonia käta juta Roma bärababa iko kwaka kwrere jire.

## 17

*Meri täkänintbe jändrän krübäte yebti*

<sup>1</sup> Abti angele ni kükü kisete Ngöbö mätä kri näma blatote abko ianteba kwetre, angele ye abko iti jataba kákwe nieba krörö tie:

Meri bti kä ngwarbe kri krübäte abko tä täkänintbe ñö bätäkä ngwarbe bti, se mikadi ja ngie nuen ño Ngöbökwe abko ti bike mike tuare mae, aisetet jakwe tuen, nieba kwe tie. <sup>2</sup> Angwane nitre jreire kä jökräbti temen kákwe kä kwita kwitaba jabti meri ye ben gware. Erere arato, nita nebe dröbare angwane, käta nebe nenkä ni dokwäbti, ye kwrere jire nitre nünanka kä nebtä dokwäbti kä rababa nerlkä, aisetet kä rababa ngwarbe bti meri ye kwrere amne kukwe diän diän nämane nuene.

<sup>3</sup> Yebti Ngöbö Üai rükaba täte jökrä tibta angwane, angele ye rikaba ti ngwena kä kaibete mda. Ye känti tikwe meri tuaba iti amne, ni jändrän kri krübäte kwrere bā tain, bti meri ye näma täkänintbe. Ni jändrän kri krübäte kwrere töi näma jökrä Ngöbö rüere, aisetet kwatabtä kukwe kämekäme taretare näma tikani Ngöbö rüere. Mdakäre abko, ni jändrän kri krübäte kwrere dokwä kwä kükü amne krotu krä jätä ie abko bti meri ye näma. <sup>4</sup> Meri tuaba tikwe ye abko btä dän ütiäte kri bā mikibare näma amne dän tain näma btä. Erere arato, meri ye kákwe ja dätebare kuin jändrän ororebti, jä tuäretuäre bti amne perläbti. Meri ye kisete abko baso orore näma arato. Baso yete abko jändrän kämekäme Ngöbö rüere btä ni mätä kri Ngöbö rüere amne jändrän ngwarbe käme nuen näma niarakwe kä mikakrä ngwarbe jabti abko näma basote kwe. Ye abko meri näma töbike kore amne näma nüne kore Ngöbö rüere abko bā mikata baso yebtä. <sup>5</sup> Amne meri ye kä näma tikani krörö okobtä:

MERI NE ABKO NIRE ABKO TÄ ÜKANI TIEBE.

MERI NE ABKO TÄ JUTA KRI BABILONIA BÄ MIKE.

MERI JÖKRÄ, BTI KÄ NGWARBE ABKO NIARA KWRERE, AISETE DÄREBARE NIARAKRI.

AMNE KUKWE KÄME DIÄN DIÄN NGÖBÖ RÜERE JATANI NIARAKRI,

abko näma tikani kore meri ye okobtä. <sup>6</sup> Yebti käta neme nuäre nibtä dröba kisete, ye kwrere meri yebtä kä näma nuäre juta deme Ngöbökwe ye därie kisete, ñobtä ñan angwane niarakwe nitre tödekaka Jesubti kämikani blitabtä Jesukrä, ye käi ngwian näma nuäre kwe jabtä abko kisete näma ni dröbare kwrere tikwe gaba mda.

Angwane meri tuaba tikwe, yebtä ti töi ñan rababa krütare. <sup>7</sup> Abtä angele ye kákwe nieba krörö tie:

¿Ye ñobtä abko ma ñan töi nebe krütare meri se tuare ye? Meri se tä kukwe ño bā mike abko tä kaibe tiebe abko ti bike niere mae. Ni jändrän kri krübäte kwrere dokwä kwä kükü ie amne krotu krä jätä ie käta meri se ngwena abko käta dre bā mike abko ti bike niere mae abko krörö: <sup>8</sup> Ni jändrän kri krübäte kwrere turi makwe, ye abko nämane nüne kira, akwa mtare tä nüne ñakare mda, akwa jändrän ye abko juan ngämi ngwarbe Ngöbökwe, känenkri nämane Kä Timonbti abko jatadita kä temen nebtä angwane, Ngöbökwe juandi ngwarbe. Angwane Ngöbökwe ni dätebare kira kena, ye ngwane mentokwäre tärä ni nünanka kärekäre Ngöböbe mikakrä gare, yebtä nire nire käita tikani ñakare abko kákwe ni jändrän kri krübäte kwrere ye tuadi angwane, niaratré ñan töi rabadi krütare ni jändrän kri krübäte kwrere yebtä, ñobtä ñan angwane niara nämane nüne kira akwa mtare tä nüne ñakare, akwa jatadita bobuta aisetet.

<sup>9</sup> Mdakäre abko, kukwe ne ti bikera niere mae abko ni töbtä ie rükadre gare abko krörö: Ni jändrän kri krübäte dokwä kwä kükü, ye abko ngitio kwä kükü, bti merita täkänintbe abko bā mikata. Erere arato, jändrän dokwä kwä kükü ye abko tä jrei ni kükü bā mike. <sup>10</sup> Akwa jrei ni kükü ye ngätäite abko jrei nirike kákwe gobranbarera, bti nikarina ngwarbe amne tä gobrane ñakare mda. Jrei iti abko gwängware tä gobrane amne, iti mda abko ngämi nüke gobrane, akwa rükadi angwane ñan gobrandre raire kwe.

<sup>11</sup> Angwane ni jändrän kri krübäte kwrere nämane nüne kira akwa mtare tä nüne ñakare mda, ye abko jrei ni kwäkäre abko bā mikata. Jrei ye abko kákwe sribidi ja kwrere jrei ni kükü yebe, akwa mrä Ngöbökwe juandi ngwarbe.

<sup>12</sup> Angwane krotu krä jätä turi makwe ye abko jrei ni jätä ngämi nüke gobrane, akwa niaratre rükadi gobrane angwane, kä biandi ñänä okwä kratibe ietre gobrankrä ni jäandrän kri krübäte kwrere ye ben gware. <sup>13</sup> Jrei ni jätä ye abko töi ja kwrere jökrä, aisetet ni jäandrän kri krübäte kwrere ye ie ja di biandi kwetre, aisetet ni jäandrän kri krübäte tö dreye, erere nuendi kwetre kräke. <sup>14</sup> Angwane niaratre kákwe rüdi ni Kordero kwrere ye rüere, akwa ni Kordero kwrere ye kákwe ganaindi kwäräbe, nitre käräbare Ngöböökwe dianinkä jakrä tä nüne janknu Jesukrä ye ben gware. Ni Kordero kwrere kákwe ganaindi, ñobtä ñan angwane ni Kordero kwrere ye abko tä nitre dänkien krikri dänkiene amne tä gobrane nitre gobranka krikri bti arato aisetet.

<sup>15</sup> Mdakäre abko, ñö bti meri bti kä ngwarbe tä täkänintbe turi makwe, ye abko ni jökrä amne ni kukwe bätäkä ngwarbe blitaka amne ni kä jökräbti temen abko turi ñö kwrere makwe. <sup>16</sup> Angwane krotu krä jätä turi makwe amne ni jäandrän kri krübäte kwrere turi makwe ye abko mätä rabai kri meri bti kä ngwarbe yebtä angwane, meri juandi ngwarbe amne meri mikadite kaibe bütiere kwe. Erere arato, meri ye ngätä kwetadi jökrä kwetre amne kroko kiakia abko kukwadi jökrä ñukwäte kwetre. <sup>17</sup> Dre nuendre, ie Ngöbö tö namani, erere mikani kwe niaratre töite, aisetet niaratre töi rabadi ja näre, kákwe ja di gobrankrä ye biandi ni jäandrän kri krübäte kwrere yeye abti Ngöböökwe dre niebare, ye erere rabadi bare täte jökrä. <sup>18</sup> Mdakäre abko, meri bti kä ngwarbe turi makwe ye abko nitre nünanka juta kri tä gobrane jrei jökräbti abko turi kore makwe ye, nieba angelekwe tie.

## 18

### *Ngöböökwe juta Babilonia juani ngwarbe*

<sup>1</sup> Yebti angele mda näma kä käinbti jataba timonkwäre ti okwäbti. Angele ye abko bäri di kri abko jataba angwane, trä gitiaha ngwen jökrä kä nebtä, <sup>2</sup> kákwe ñäkäba ja dibti krörö:

Juta kri Babilonia nikira ngwarbe!

Üai käme bätäkä ngwarbe, kräke kä nebe nete amne, nukwä bätäkä ngwarbe, ñakaredbe Ngöbö ngwärekri aibe nebe ja juda mike nete.

Erere arato, jäandrän ngwarbe ngwarbe, btä ni mätä aibe kräke kä nebe nete.

<sup>3</sup> Ngöböökwe juta ye juandi ngwarbe kore, ñobtä ñan angwane ni dröbare uba döi kwaka kisete tä ja mike ngite meri bti kä ngwarbe ben,

ye kwrere ni kä jökräbti temen namani ja mike ngite nitre nünanka juta yebe.

Angwane meri bti kä ngwarbe ben ja mika ngite,

kwrere jire jrei kä jökräbti temen kákwe ja mikani ngite.

Erere arato, nitre jäandrän rürümoinkä abko namani jäandrän bkäne kabre jäandrän bäri kuinkuin kwetre ye rürümoinkä ütiäte ütiäte, niebare angelekwe.

<sup>4</sup> Yebti ni mdara jire kukwei jaraba kä käinbti tie, kákwe nieba krörö:

Mun jen tikwe abko kákwe ñan ja mikadre ngite siba nitre nünanka juta nete kwrere angwane, ja tare nika jatadre kri niaratre rüere arato, ye ngwane munkwe ñan ja tare mikadre arato, abkokäre mun jen tikwe ye nän mento juta ne bäre,

<sup>5</sup> ñobtä ñan angwane kukwe käme nuenbare kwetre ye nena kabre Ngöbö ngwärekri kä käinbti angwane, kukwe kämekäme nuenta kwetre, ye abko käinikwitekä ñakare Ngöböbti, aisetet Ngöböökwe mikadi ja tare mike jötrö.

<sup>6</sup> Niara kákwe dre nuenbare ni mda rüere, ye kwrere nuen niara rüere arato.

Niara kákwe dre nuenbare, yebti ta jäandrän nuen bobu btä kukwe käme nuen dokwäre.

Erere arato, niarakwe ni mda mikani ja tare mike krübäte, ye abko ni bukata uba döi kwakate kwrere, yebti ta uba döi bäri kwaka bobu mda abko bian ie abko erere makwe mika ja tare mike bobu bti ta.

<sup>7</sup> Mdakäre abko, niara namani bike kri amne kä namani bäri nuäre kri btä nüne bäri kuin, ye kwrere arato makwe nika janknu amne makwe mika ja tare mike kri.

Meri se tä bike kri, käta töbike krörö:

Ñan meri kän kwäräi krütani, kwrere tita nete amne ñan tita ja tare nike, akwa tita täkänintbe kuin nete jreina kwrere, tä nütüre jabtä.

<sup>8</sup> Ye mdenbtä abko köbötira jire ja tare nika jatadi kri kräke abko krörö:

Ni rabadi krüte kwati krübäte amne  
ni kwati rabadi müen jiebti amne

ni kwati rabadi mrö Nike amne kukwadi ñukwäte arato,  
ñobtä ñan angwane Ngöbö ni Dänkien di kri kákwe mikadi ja ngie nuen bikabtä kri  
kore, aise te rakadikä kore btä.

<sup>9</sup> Angwane meri bti kä ngwarbe, ben ja mikata ngite bati bati, ye kwrere jire ja mikani  
ngite. Jrei kä jökräbti temen kákwe ja mikani ngite amne ja mikani nuäre kwetre ben, ye  
abko juta rabadi nukwe amne ngübü rabadi tuen neen kukwâne ietre angwane, rabadi  
müaire, kä rabadi ngrente krikri be jiebti. <sup>10</sup> Akwa nane mikadre ja ngie nuen arato, abtä  
kä jürä rabadi jrei kä jökräbti temen btätre, aise te rabadi nünaninkä mobe temen, kákwe  
niedi krörö:

¡Aingwaree, juta kri Babilonia juta di kri abko bobre jakän!

Ye ñobtä amarebti batibe mata ja ngie nuen jötrö dikaro ye,  
niedi jreikwe.

<sup>11</sup> Mdakäre abko, nitre jäandrän rürümoinkä kákwe juta ye müaidi amne rabadi ngrente  
krikri be arato, ñobtä ñan angwane ni ñan rabadre mda jäandrän kökaka ietre aise te.

<sup>12</sup> Nitre ye abko nämene oro, plata, jä ütiäte ütiäte amne jäandrän jä kwrere kädekata  
perla rürümoine. Erere arato, dän ütiäte kri kädekata lino amne dän sedare amne dän bää  
tain drüne amne dän tain rürümoi nämene kwetre nitre nünanka juta yete yeye. Erere  
arato, kri rá båne båne amne marfil sribebare jäandräne amne kri kuinkuin sribebare  
jäandrän ütiäte kwrere, bronse amne jiero sribebare jäandräne amne jä kuin ütiäte kri  
kädekata mármol abko rürümoi nämene kwetre ietre. <sup>13</sup> Erere arato, canela amne  
jäandrän rá båne båne mikadre ja dokwâte amne kri ngwäri rá båne kukwadre kädekata  
incienco amne ñö rá båne båne amne kri ngwäri rá båne kädekata mirra abko rürümoi  
nämene nitre nünanka juta yete yeye. Erere arato, uba döi, kri olibo köi amne arina  
kuinkuin, trigo amne nbi, obeja, mdä, kareta jäkädre mdäye amne ni klabore, ni ye abko  
ni ütiäte Ngöbökrä, akwa rürümoi nämene jäandrän mda mda kwrere nitre jäandrän  
rürümoinkäkwe.

<sup>14</sup> Ni ye kákwe niedi krörö juta yebtä: ¡Kri ngwákä kuin amne jäandrän jökrä mda mda  
nämene nebe bänante mun kadate, ye abko ñakare mda makwe! ¡Jäandrän kabre makwe,  
bti mata nüne bää nuäre, ye abko nikanina ngwarbe jökrä makän! niedi kwetre. <sup>15</sup> Nitre  
jäandrän rürümoinkä nämene jäandrän rürümoine juta yete abko köböire namani jäandrän  
bkäne kabre, niaratre ye abko btä kä jürä rabadi, aise te rabadi nünaninkä mobe temen,  
kä rabadi müen amne rabadi ngrente krikri be juta ye jiebti. <sup>16</sup> Angwane rabadi niere  
krörö:

¡Aingwaree juta kri, ma bobre jakän!

Dän ütiäte kri kädekata lino, ye ma nämene kite jabtä.

Erere arato, dän bää mikibare amne dän bää tain drüne, bti ma nämene ja dättere.

Erere arato, oro amne jä tuäre mda mda ütiäte ütiäte amne perla, bti ma nämene ja  
dättere.

<sup>17</sup> Angwane batibe jäandrän kabre ye nikira ngwarbe jötrö makän,  
abko rabadi niere.

Mdakäre abko, nitre ru ngwianka amne nitre nänkä rute mrenbti amne ni mda mda  
ru ngwianka mrenbti abko rabadi mobe temen juta mike ñäräre arato. <sup>18</sup> Angwane juta  
ye rabadi nukwe abko ngübü jatadi ietre, abtä rabadi ngrente krörö: Juta ütiäte kri ne  
kwrere tua ñakare jire abko rabadi niere. <sup>19</sup> Rabadi ulire abko bää mikakrä niaratre kákwe  
dobro mnü kitadi ja dokwäbti amne rabadi müen amne ngrente krikri be, kä rabadi ñäke  
ja dibti krörö:

¡Aingwaree juta kri, ma bobre jakän!

Nitre nünanka ma känti abko jändrän bkäne kabre, ye köböire nun ru ngwianka mrenbti  
 namani jändrän bkäne kabre arato,  
 akwa batibe Ngöökwe ma junina ngwarbe jökrä,  
 rabadi niere.

<sup>20</sup> Yebti angele ye abko kákwe nieba mda:  
 Juta niki ngwarbe se abko kä ngwen nuäre jabtä munkwe kä käinbti yete.  
 Amne mun juta deme Ngöökwe ye kákwe kä ngwian nuäre jabtä.  
 Erere arato, mun kukwe kuin Jesubtä ngwianka amne mun Ngöö kükwei niekä ye kákwe  
 kä ngwian nuäre jabtä,  
 ñobtä ñan angwane Ngöökwe juta juni ngwarbe, ye abko mun dokwäre juni  
 ngwarbe kwe, aisetet munkwe käi ngwian nuäre jabtä, nieba angelekwe.

<sup>21</sup> Yebti angele dite kri kákwe jäkwata kri bäsí krü kri trigo ukwakrä kwrere jire dianba  
 kisete, bti kitaba kwe mrente, kákwe nieba krörö:  
 Jäkwata kri kiti mrente, se kwrere makwe juta kri Babilonia juandi ngwarbe amne ni mda  
 mda kákwe ñan ma tuadreta jire mda.

<sup>22</sup> Mdakäre abko, arpa, tolero amne drü, ye abko ñan kükwei nuadi jire chi mda ma käite  
 yete.

Erere arato, krü trigo ukwakrä ñan ngö nuadre jire chi mda yete.

<sup>23</sup> Erere arato, ñotra trä ñan tuadreta jire chi kwati yete amne, ni ja mikaka gure käi  
 ngwianta nuäre jabtä yete,  
 ye kwrere käi ñan ngwiandre nuäre jabtä mda yete, ñobtä ñan angwane nitre  
 jändrän rürümoinkä yete abko namani jändrän bkäne kabre kabre abti namani  
 dite dite.

Erere arato, nitre nünanka juta yete kákwe ni kä keta kabre te ngökani kwrasibti, abtä ja  
 ngie nuadi kore kwe.

<sup>24</sup> Juta yete nitre Ngöö kükwei niekä abko kämikani.

Erere arato, nitre deme Ngöökwe kämikani amne ni kä jökräbti temen tödekaka  
 Ngööbäti abko kämikani juta yete, aisetet Ngöökwe mikadi ja ngie nuen kore,  
 nieba angelekwe juta Babiloniabtä.

## 19

### Aleluya niebare kä käinbti Ngööbäye

<sup>1</sup> Yebti ni kwati kükwei rababa ruen ja dibti tie, kä rababa niere krörö kä käinbti:  
 ¡Aleluya! Ngöö nikwe aibe ni diantarikä, aibe ütiäte kri amne di kri.

<sup>2</sup> Ye ñobtä ñan angwane meri bti kä ngwarbe tä ni brare näkwite,  
 ye kwrere jire juta ne nämane ni kwati näkwite kükwe kämekäme jiebti kä jökräbti  
 temen abko kräke Ngöö tä kükwe ükete kuin era metre.

Amne nitre deme Ngöökwe kämikani nitre nünanka juta yetekwe, ye dokwäre abko  
 Ngöökwe mirira ja ngie nuen krübäte.

<sup>3</sup> Yebti nieba krörö mda kwetre:  
 ¡Aleluya! Juta ne ngübue rabadi kärekäre kukwäne, ñobtä ñan angwane rabadi nukwe  
 kärekäre aisetet.

<sup>4</sup> Angwane nitre unbre unbre ni gre bti nibkä amne jändrän kräbkä nämane nüne  
 ye rababa ja okokrä mike nebe dobobtä temen, kákwe Ngöö näma täkänintbe kürä  
 gobrankräbti ye mike ütiäte jae abko rababa niere krörö: ¡Amen! ¡Aleluya! rababa niere.

<sup>5</sup> Ye btäräbe kürä gobrankrä Ngöökwe känti ni kükwei rababa, kákwe nieba krörö:  
 ¡Ngöö nikwe ye käikitaka munkwe!

¡Mun ütiäte kri amne mun bobre käta sribire Ngöökrä, käta Ngöö mike ütiäte jae, ye  
 kákwe Ngöö nikwe käikitaka! rababa niere.

<sup>6</sup> Yebti ni kwati kükwei rababa ruen tie bäsí ñöta neme betekä jäkwatabtä timon ngöta  
 neme kri, ye kwrere jire ni kükwei rababa ruen tie amne, bäsí unsuni ngö kri, ye kwrere  
 ni kükwei rababa ruen tie, kä rababa niere:  
 ¡Aleluya!

¡Ngöbö ni Dänkien Di Kri Jändrän Jökrä Nuenkrä kitera gobrane!  
rababa niere.

<sup>7-8</sup> Ni Kordero kwrere kitera ja mike gure amne meri bati abko käkwe ja dätenirira  
rabakäre ben abko ie dän kuin linoträ ngitiekä bini kitakrä jadtä ja mikakäre  
gure.

Ne aisetet ari kä ngwen nuäre jadtä amne ari kä ngwen juto jadtä amne ari niara käikitekä.  
Nitre deme jen Ngöbökwé käkwe sribi kuin era metre nuenbare Ngöbökrä.  
Sribi kuin era metre, ye abko dän kuin lino abko bärä mikata kore.

<sup>9</sup> Yebti angelekwe nieba mda tie:

Kukwe tike krörö tärabtä: Ni Kordero kwrere käkwe ja miri gure, ye känti nire nire tä  
nubaibare, ye abko btä kä raba nuäre kri krübäte, nieba kwe tie.

Abti jötrö nieba krörö mda kwe:

Tikwe kukwe nini, ye abko Ngöbö Kukwei era metre, erere tikwe nini mae, nieba kwe tie.

<sup>10</sup> Angwane ti rikaba ngitiekä ngukudokwäbti temen angele ye ngotobtä mikakäre  
ütiäte jae, akwa angele ye käkwe nieba tie:

Ma amne ma mräkä mda mda käta nünenkä dite jadtä kukwe era metre Jesukwe btä,  
käta sribire Jesukrä, ye kwrere tita sribire arato, aisetet makwe Ngöbö aibe mika ütiäte  
jae, ñobtä ñan angwane nitre Ngöbö kukwei niekä era metre, ye mden abko nämane blite  
Jesubtä, nieba angelekwe tie.

### *Jesu jatani mdä bärä ngwenbti*

<sup>11</sup> Angwane kä käinbti gitia sete, rababa tuen tie amne mdä bärä ngwen näma kratit.  
Mdä yebti ni näma näin iti abko kädian näma Ni Ja Kukwei Mikaka Täte amne Ni Era  
Metre. Niara näma kukwe ükete metre ta ni jökrä kräke amne kukwe era metre dokwäre  
näma rüre Ngöbö rüebe. <sup>12</sup> Angwane niara okwä abko rababa tuenträ ngitiekä ñukwärä  
jutra kwrere tie jändrän jökrä gare ie bärä mikakrä amne, dokwäbti abko korona näma  
kabre kabre, niara abko gobran kri bärä mikakrä amne, niara kä näma tikani mda ye abko  
niara aibe ie näma gare kaibe. <sup>13</sup> Mdakäre abko, dän jükani därire jökrä näma kitani  
jadtä kwe niara krütani ni diantarikäre bärä mikakrä amne, niara kädian näma Ngöbö  
Kukwei arato. <sup>14</sup> Niara ye jiebti abko nitre rükä kä käinbti näma näin kwati krübäte  
abko dän ngwen lino näma kitani jadtä. Dän lino ye abko ütiäte amne merebe amne,  
niaratre näma näin mdä ngwen ngwenbti. <sup>15</sup> Niara rababa ñäke angwane, bäsí ngitra  
tu grine jadtä kwärikwäri, ye kwrere jire kukwe rababa betekä kadate nitre kä jökräbti  
temen nünanka Ngöbö rüere kämikakäre. Erere arato, “mökän jierore ni kämikakäre,  
bti niarakwe gobrandi tare,” amne bäsí uba tükkakata ngotobti amne ñöi aibe diankata,  
ye kwrere jire niarakwe rätädi Ngöbö rüebti, yebti abko Ngöbö Di Kri Jändrän Jökrä  
Nuenkrä, Ngöbö ye abko mätä kri krübäte abko bärä mikata kore kwe. <sup>16</sup> Dänbtä ie amne  
uliebtä abko niara kä näma tikani mda abko krörö; JREI BÄRI KRI JREI MDA MDA KRÄKE  
AMNE DÄNKIEN BÄRI KRI DÄNKIEN MDA MDA KRÄKE abko näma tikani kore btä.

<sup>17</sup> Yebti ti okwä rababa angelebtä angwane, angele ye rababa nünaninkä ñänänbti  
angwane, nukwärä jökrä ngri kwetakakwetaka jüden kwrere tä nikenkä käinta, ie angele  
ye rababa ñäke krikri ja dibti krörö mda: Ngöbö kite mrö sribere kri krübäte mun  
bukakrä, aisetet mun jakwe ja ükekörö jökrä mröre. <sup>18</sup> Angwane munkwe jrei ngrie  
kwetadre, munkwe nitre rükä dänkien ngrie kwetadre, munkwe nitre rükä baliente  
baliente ngrie kwetadre, munkwe mdä rükä ngrie kwetadre, munkwe nitre nänkä  
mdäbti rübtä ngrie kwetadre. Erere arato, munkwe ni jökrä ngrie kwetadre abko ni  
ñakare klabore, ni klabore, ni bobre amne ni ütiäte kri ngrie kwetadre munkwe, aisetet  
jakwe, nieba angelekwe nukwärä.

<sup>19</sup> Angwane ni jändrän kri krübäte kwrere ye käkwe rükä kwekwe amne jrei kä jökräbti  
mikabara biare rükäre ni nänkä mdä ngwenbti ye rüere amne rükä kwekwe rüere arato.  
Nikani rüre, <sup>20</sup> akwa ni jändrän kri krübäte kwrere ye kaba ngite amne ni ngöbö ngwarbe  
ngwarbe kukwei niekä käkwe sribi kri ñan tuabare nuenbare abko kaba ngite arato.

Ni ngöbö ngwarbe kukwei niekä kákwe sribi kri ñan tuabare nuenbare, yebti abko ni kwati ngökani kwe amne, nitre yebtä abko ni jäandrän kri krübäte kwrere ye kä tikani. Erere arato, ni jäandrän kri krübäte abko bää sribebare ngöbö ngwarbere abko mikani ütiäte kwetre, yebtä abko ni jäandrän kri krübäte kwrere btä ni ngöbö ngwarbe kukwei niekä kaba ngite, ye abko ñukwä jutra ngitiekä asufrebe, ye te kitaba nire jökrä ja tare nikakäre. <sup>21</sup> Angwane ni mda mda nämane rüre Jesukristo rüere abko Jesukristo näma näin mdäbti ye kákwe kämikaba jökrä ja kukwei aibebti, ñobtä ñan angwane niara kukwei abko rababa betekä ngitra tu kwrere, aisetet ni kämikaba jökrä kwe. Angwane nukwä ngri kwetakakwetaka jüden kwrere kákwe nitre ye ngrie kwetaba trinetrine jökrä.

## 20

*Kä mili krati*

<sup>1</sup> Yebti angele näma iti kä käinbti, jataba timonkwäre ti okwäbti. Angele ye abko näma näin llabe jukwe Kä Timonbti ngwena kisete amne kadena kri ngwian näma kisete kwe arato. <sup>2</sup> Angele ye abko kákwe mökata kaba ngite. Mökata ye abko tbi nämane kira, arabe abko kädianta Diablu amne Satana arato. Mökata ye abko angelekwe mäkäteba kadenanbti kä mili krati, <sup>3</sup> kákwe kitaba ngite Kä Timonbti, bti jukwe dikaba kuin bti kwe, bti Ngöbö kä tikani jukwebtä, ni mdakwe ñan tikadre abkokäre. Niara ñan rikadreta nitre ngököta kä jökräbti temen, abkokäre kä mili krati ngämi niken ta niara ñan tikaditeta. Akwa yebti mökata ye tikaditeta bää jötrö.

<sup>4</sup> Yebti kürä gobrankrä näma kabre kä käinbti btä ti okwä rababa. Kürä yebti abko nitre ie ja di biani Ngöbökwé kukwe ükatekäre nikrä abko näma täkänintbe, tikwe tuaba. Erere arato, nitre kákwe ja tare nikani blitabtä Jesubtä amne kukwe kuin Ngöbökwé Jesubtä mikabtä gare ni mda mdaye, akwa nünankabare dite jabtä kwetre, kákwe Jesu rükantte ñakare abko dokwäre dokwä tikaninkä, ye abko üai näma siba yete. Mdakäre abko nitre ye kákwe ni jäandrän kri krübäte kwrere ye mikani ñakare ngöböre jae amne niara bää mikani ñakare ütiäte jae ngöbö kwrere. Erere arato, nitre ye okobtä o kisebtä abko ni jäandrän kri krübäte kwrere ye kä tikani ñakare abko üai tuaba tikwe. Niaratre ye abko rükabata nire jökrä, kákwe gobranba kä mili krati Kristobe gware tikwe tuaba. <sup>5</sup> Ni ruäre mikabata nire käne kore Ngöbökwé, akwa ni mda mda abko mikadita nire ñakare kwe abti kä rikaba mili krati ta. <sup>6</sup> Nitre rükabata nire kore, ye abko deme amne ni yebtä kä rabadi nuäre kri. Niaratre ñan krütadre mda, ye abko Ngöbökwé ñan mikadi ja ngie nuen akwa, nünandi kärekäre kwetre Ngöböbe angwane, ni blitaka Ngöböbe ni mda mda diáre tä sribire, ye kwrere sribidi kwetre Ngöbökrä amne Kristokrä amne gobrandi kä mili krati kwetre ben gware arato.

*Ngöbökwé Satana juani ngwarbe mrä*

<sup>7</sup> Yebti kä mili krati rikadi ta angwane, Satana tä ngite Kä Timonbti abko tikadite angwane, <sup>8</sup> näin ni ngökö kä jökräbti temen nebebe kä ñäre jökrä amne käkä Gog amne Magog angwane, ni ükadirkö kwati kwe rükäre Ngöbö rüere. Ye abko, mren ümain kwrere jire ni rabadi ja ükaninkrö rükäre Ngöbö rüere. <sup>9</sup> Angwane nitre rükä kwati ye rikaba mobe kákwe ja ükakröba jökrä juta deme Ngöbökwé bäre temen amne juta Jerusalén tarebare Ngöbökwé ye bäre temen, ni ye juankäre ngwarbe, akwa batibe ñukwä kä käinbti jataba timonkwäre kákwe ganinkä jökrä se kwrere. <sup>10</sup> Angwane diablu nämane niaratre ngökö, ye abko ñukwä jutra ngitiekä asufrebe mni mni te kitaba. Kä ye arabe känti ni jäandrän kri krübäte kwrere kitanina käne amne ni ngöbö ngwarbe kukwei niekä kitanina arato, ye känti diablu kitaba. Kä ye känti mikadi ja tare nire kärekäre dibire rare.

*Ngöbökwé kukwe ükaninte ni krütanikrütani kräke*

<sup>11</sup> Yebti kürä gobrankrä kri, ngwen bürere tuaba mda tikwe. Kürä yebti abko ni näma täkänintbe iti. Niara ngwärekri abko kä temen ne amne kä käinta se gitia batibe jökrä abko ñan tuaba jire chi mda tikwe. <sup>12-13</sup> Angwane nitre müre neketani mrente,

ye erere nükaninta nire jökrä. Erere arato, ni müre ketaniketani abko üai nämane kä nakebtä, ye erere nükaninta nire jökrä arato, aisetetitire ütiäte krikri ya, o bobre bobre ya, krütanikrütani abko näma nünaninkä jökrä kürä gobrankrä Ngöböökwe ye ngwärerekri, btä ti okwä rababa. Ye btäräbe tärä metateba keteti. Erere arato, tärä ni nünanka kärekäre Ngöböökwe mikakrä gare abko metateba arato. Angwane ni itire itire ngämi kruüte, känenkri dre dre nuenbare kwetre, ye erere btä Ngöböökwe kukwe ükateba kräke, aisetetitire itire kækwe dre dre nuenbare näma tikani täräbtä, ye erere kukwe ükateba kräke Ngöböökwe. <sup>14</sup> Yebti gata ara amne kä nakebtä kitaba ñukwä jutrate kä Timonbti juankäre ngwarbe. Ñukwä jutra kä Timonbti ne känti abko nita kruüte bobukäre. <sup>15</sup> Tärä ni nünanka kärekäre Ngöböökwe mikakrä gare, tärä yebtä nire nire kä kwani ñakare, ye erere kitani jökrä ñukwä jutrate ja tare nikakäre kärekäre.

## 21

### *Juta Jerusalén btin*

<sup>1</sup> Yebti kä käinta btin amne kä temen ne btin tikwe tuaba mda, ñobtä ñan angwane kä käinta se btä kä temen ne amne mren dätebare käne Ngöböökwe abko nikanina ta, aisetetitire ñan rababa jire mda. <sup>2</sup> Yebti juta Jerusalén btin kuin deme näma Ngöbö känti kä käinbti abko jataba timonkwäre tikwe tuaba bäsmeri tä ja ükaninte kuin bäsnuäre brare ngäbti ja mikakäre gure ben, ye kwrere jire juta ye rababa tuen tie. <sup>3</sup> Angwane btäräbe kürä gobrankrä Ngöböökwe tuaba tikwe, ye känti ni kukwei jaraba kri tie, kä rababa niere krörö:

Mtare Ngöböta nüne ni jen kwe ben juta btin nete. Ngöböökwe nünandi bentre amne niaratre rabadi juta jen Ngöböökwe, aisetetitire Ngöbö ara jire tädi bentre Ngöbö jen kwetre kwrere. <sup>4</sup> Angwane Ngöböökwe niaratre okwä ñöi sökadite jökrä ietre amne ni ñan krütadre jire iti mda amne ñan ja müaidre jire chi mda amne ñan ja müaidre ja tare nikabtä, ñobtä ñan angwane kukwe nämane ükaninte ño känekäne, erere nikanina jökräta. <sup>5</sup> Angwane Ngöbö näma täkänintbe kürä gobrankräbti ye kækwe nieba krörö:

Jändrän jökrä tita sribbereta btin, nieba kwe.

Bti niebata kwe tie:

Kukwe ne abko kukwe era metre, abtä ni jökrä rabadre tödeke bti, aisetetitire täräbtä, nieba kwe tie.

<sup>6</sup> Yebti Ngöböökwe nieba krörö tie:

Jändrän jökrä nibira bare. Ti abko tärä okwä kena kädianta alfa amne tärä okwä mrä kädianta omega kwrere. Ti nämanena jändrän jökrä känenkri kena amne ti rabadi jändrän jökrä täbti mrä. Mdakäre abko, nire nire ie tomna ye abko ie tikwe ñö okwä kuin nire käta ni mike nüne kärekäre ye biandi ngwarbe tommnane. <sup>7</sup> Mdakäre abko, nire nire kækwe ja tare nikadre tödekabtä tibti, kækwe ti rükandrete ñakare abko ni rüe ganainkä kwrere abko ie tikwe jändrän kuinkuin jökrä ne biandi amne, ti rabadi Ngöböökwe kwetre amne niara rabadi ti ngäbriäenkä tikwe. <sup>8</sup> Akwa ni käta ja ngwen ngwarbe amne ni tödeke ñakare Jesubti, akwa tä niara rükente, amne ni ñan tö Ngöbö Kukwei mikai era jae, erere arato ni ngututu diän diän, ni ni mda mda kämikaka amne ni ja mikaka gure tiebetiebe amne ni kwrarekwrare, amne ni sukiare sukiare, amne ni jändrän ngwarbe mikaka ngöböökwe jae amne ni ni ngökaka, ye abko ñukwä jutra ngitiekä asufrebe mni mni abko te kitadi. Ye känti krütadi bobukäre. <sup>9</sup> Yebti angele ni kükü kisete blato näma abko te Ngöbö mätä kri näma iandrete, angele ye abko jataba iti, kækwe nieba mda tie:

Meri ben ni Kordero kwrere rabai, meri ye abko ti bike mike tuare mae. Jakwe tuen, nieba kwe tie.

<sup>10</sup> Yebti Ngöbö Üaikwe ti mikani jändrän tuen köböökwe kwrere angwane, ngitio kri mobe käin, känti angele rikaba ti ngwena, kækwe juta Jerusalén deme näma kä käinbti Ngöbö känti abko jataba timonkwäre, tikwe tuaba. <sup>11</sup> Juta ye abko Ngöbö trä bäsnuäre abko bti rababa trä ngitiekä amne bäsmeri tä ja tuäre ütiäte kri kädekata jaspe, kwrere jire juta ye rababa trä ngitiekä. <sup>12</sup> Angwane juta ye bäre temen abko ki näma mikani kri amne mobe käin. Ki yebtä abko jukwe näma kwä jätäbti kubu amne jukwe kwatirekwatire btä angele näma

nünaninkä iti ngibiare. Erere arato, Jacob ngäbriänkä ni jätäbti nibu abko kä näma tikani itire itire jukwe kwatirekwatire btä. <sup>13</sup> Jukwe ye abko näma kwä jätäbti kubu: komä kä dririkri, komä ngwitäräkri, komä mötarikri amne komä nindrinikri. <sup>14</sup> Amne ki mikani jutabti, ye abko já näma mikani kwä jätäbti kubu gräre. Já yebtä abko nitre Jesu kukwei ngwianka ni jätäbti nibu kä näma tikani.

<sup>15</sup> Angwane angele näma blite tibe ye näma nörä orore ngwena krati kisete juta ñäkäkrä, jukwe ñäkäkrä amne ki jutabti ñäkäkrä arato. <sup>16</sup> Juta ye abko ja näre jökrä kwärikwäri, aise te körä ja näre kwärikväri. Angelekwe juta ye ñäkäba nörä yebti angwane, rababa 2,200 kilometro ja näre körä ngakri, kwatakri amne kukwäne rababa ja näre jökrä. <sup>17</sup> Yebti ki näma jutabti, ye ñäkäba kwe arato angwane, ki ye abko rababa 65 metro ie, ye abko ni kä nebtä tä jändrän ñäke ño, ye kwrere angele näma juta ye ñäke.

<sup>18</sup> Amne ki näma mikani juta yebti abko já kuin ütiäte kri kädekata jaspe näma mikani kire, akwa juta ara jire abko oro kuin trä ngitiekä bidrio kwrere. <sup>19</sup> Angwane já kwä jätäbti kubu mikani ki gräre abko btä já tuäretuäre ütiäte kri bätäkä ngwarbe näma mikani abko krörö: já käne btä abko já kuin ütiäte kri kädekata jaspe näma mikani, já kubukäre abko btä já kädekata zafiro näma mikani, já komäkäre abko btä já kädekata ágata näma mikani, já kobkäkäre abko btä já kädekata esmeralda näma mikani amne <sup>20</sup> já kwärikekäre abko btä já kädekata ónice näma mikani, já kwä tikäre abko btä já kädekata cornalina näma mikani, já kwä kükükäre abko btä já kädekata crisólito näma mikani, já kwä kwäkäre abko btä já kädekata berilo näma mikani amne já kwä ökäkkäre abko btä já kädekata topacio näma mikani, já kwä jätäkäre abko btä já kädekata crisopraso näma mikani amne já kwä jätäbti kwatikäre abko btä já kädekata jacinto näma mikani amne já kwä jätäbti kubukäre abko btä já kädekata amatista näma mikani.

<sup>21</sup> Angwane jukwe kwä jätäbti kubu juta yebtä abko perla aibe mikani jukwere, aise te jukwe kwatirekwatire abko perla kватibe näma mikani jukwere amne ji juta ye ngätäite ta abko oro kuin ara jire mikani jire amne näma trä ngitiekä bidrio kwrere jire abko tikwe tuuba.

<sup>22</sup> Mdakäre abko, ju blitakrä Ngöböbe tikwe tuaba ñakare juta Jerusalén btin yete, ñobtä ñan angwane ni Dänkien Ngöbö Di Kri Jändrän Jökrä Nuenkrä abko tä yete amne ni Kordero kwrere tä yete abko ben ni raba blite gwärere, aise te ju blitakrä Ngöböbe ñakare yete. <sup>23</sup> Erere arato, ñänä amne sö trä rabadre juta yete abko ñakare ütiäte, ñobtä ñan angwane Ngöbö trä kuin bä nuäre ye abko tädi juta yete amne ni Kordero kwrere abko tä ñotrase yete arato. <sup>24</sup> Ye abko nitre nünanka kä jökräbti temen abko kákwe dikadikä ñotra ye träte nebebe juta Jerusalén btin ye känti amne nitre jreire kä jökräbti temen abko kákwe jändrän ütiäte kwekwe biandi Ngöböye niara mikakäre ütiäte jae juta yete. <sup>25</sup> Angwane jukwe juta yete abko ñan dikadre jire chi rare amne juta ye känti kä ñan rabadre iko arato, aise te jukwe ñan dikadre jire chi. <sup>26</sup> Erere arato, nitre nünanka kä jökräbti temen abko jatadi jändrän ütiäte ütiäte kwekwe ngwena biandre Ngöböye niara mikakäre ütiäte jae juta yete. <sup>27</sup> Akwa jändrän kämekäme ñan rikadi jire chi nebe juta yete amne, ni diän diän amne ni ni ngökaka ñan rikadi jire chi yete arato; akwa nire nire kákwe nünandre kärekäre Ngöböbe abko käta tikani tärä ni Kordero kwrere yebtä, ni ye aibe abko rikadi nüne juta yete abko angelekwe mikani tuare tie.

## 22

### *Ñö kri ni mikakrä nire kärekäre*

<sup>1</sup> Yebti ñö kri kuin dirare angelekwe mikaba tuare tie. Ñö ye abko ni mikakrä nüne kärekäre amne ñö ye abko kuin merebe já cristal bä merebe ye kwrere. Erere arato, kürä gobrankrä Ngöböökwe amne kürä gobrankrä ni Kordero kwrere kwe, ye känti ñö ye näma neen. <sup>2</sup> Angwane ji kri juta yete abko ötöbu ta ñö ye tä neen amne kri ni mikakrä nüne kärekäre näma niren ñobtä kwärikväri. Kri ye abko ngwä näma nebe sö kratirekratire, aise te kri ye ngwä näma nebe bä jätäbti bobu btä kä kwatirekwatire amne kri ye abko kä näma ni jökrä mikakrä kuinta. <sup>3</sup> Mdakäre abko, juta Jerusalén btin yete abko jändrän btä

ngürün mikani Ngöböökwe abko ñan rabadi jire chi. Angwane kürä gobrankrä Ngöböökwe amne kürä gobrankrä ni Kordero kwrerekwe abko tädi juta yete, aisetre nitre sribikä kwekwe abko erere käkwe niaratre käikitadikä kärekäre.<sup>4</sup> Angwane niaratre jökrä käkwe ja tuadi gwärere Ngöböbe, kä näin niaratre kä ngwena tikani ja okobtä, niaratre abko ni jen Ngöböökwe bā mikakrä.<sup>5</sup> Juta yete abko kä ñan rabadre iko jire chi, aisetre nitre nünanka juta yete, kräke ñotra ñan rabadre ütiäte. Erere arato, ñänäträ ñan rabadre ütiäte kräke, ñobtä ñan angwane Ngöbö ni Dänkien ara jire käkwe kä trä biandi nitre nünanka yete ie. Niaratre käkwe gobrandi kärekäre.

<sup>6</sup> Yebti angelekwe nieba mda tie:

Kukwe nieta tikwe mae, ne abko era amne kukwe kuin tödekakrä. Ye abko, ni Dänkien Ngöbö ara jire käta nitre niara kukwei niekä töi tike ja kukwei niere, Ngöbö ye ara käkwe angele kwe juani abko kukwe mden mden rakadikä bā jötrö mikakäre tuare sribikä kwekwe ie, nieba kwe tie.

### *Jesu jatadita*

<sup>7</sup> Angwane ni Dänkien Jesu abko käkwe nieba mda tie:

¡Ti rükadita jötrö! Kukwe biani Ngöböökwe nitre Ngöbö kukwei niekä köböire tä tikani tärä nebtä, ye nire nire tä mike era jae, yebtä abko kä rabadi nuäre amne Ngöböökwe ja di biandi ie, nieba kwe tie.

<sup>8</sup> Angwane ti Juan, ti ne abko käkwe kukwe ne tuaba amne tikwe kukwe nuaba arato. Tikwe kukwe tuaba amne tikwe kukwe nuaba ünän jökrä, ye btärabe angele käkwe kukwe mikaba tuare tie, ye ngotobtä ti rikaba ngitiekä ngukudokwäbti temen mikakäre ütiäte jae.<sup>9</sup> Akwa angele ye käkwe nieba mda tie:

Ma mräkä mda mda käta kukwe tä tikani tärä nebtä mikaka täte ye käta sribire Ngöbökrä, ye kwrere tita sribire arato, aisetre makwe ñan ti mika ütiäte jae, akwa Ngöbö aibe makwe mika ütiäte jae, nieba kwe tie.

<sup>10</sup> Erere arato, angelekwe nieba krörö mda tie:

Ngöbö Kukwei biani niedre mae abko tä tikani tärä nebtä, ye abko kebera nebe bare, aisetre makwe ñan üka kaibe tiebe, akwa makwe mika gare ni mda mdaye.<sup>11</sup> Angwane kä kitera neme braibe ja töi kwitakrä nie, aisetre nire nire käta kukwe kämekäme nuene Ngöbö rüere, ye tuametre nuene janknu amne, nire nire käta kukwe diän diän nuene, ye tuametre nuene janknu; akwa nire nire käta jändrän kuinkuin nuene ye käkwe jändrän kuin nuen janknu Ngöbökrä. Erere arato, nire nire käta nüne deme amne metre, ye käkwe nüna deme janknu Ngöbökrä, nieba angelekwe tie.

<sup>12</sup> Angwane ni Dänkien Jesukristo käkwe niebata tie:

¡Ti rükadita jötrö! Akwa ni itire itire tä dre dre nuene, ye abko ti jatadi ütiä ngwena kräke amne,<sup>13</sup> ti abko tärä okwä kena kädianta alfa amne tärä okwä mrä kädianta omega. Ti nämanena jändrän jökrä känenkri kena amne ti rabadi jändrän jökrä täbti mrä.

<sup>14</sup> Mdakäre abko, dän bätäteta tä nebe ngwen bürere, ye kwrere nire nire käkwe tödekadre tibti rabakäre merebe Ngöbö ngwärekri abko rabadi nebe kri ni mikakrä nüne kärekäre känti amne juta Jerusalén btin, ye känti rabadi nikken amne ni ye abko btä kä rabadi nuäre.<sup>15</sup> Akwa ni ngututu diän diän, ni kwrarekwrare, ni sukiare sukiare, ni ja mikaka gure batibati, ni ni mda mda kämikaka, ni jändrän ngwarbe mikaka ngöböre jae amne ni jökrä käta ni ngöka tarere amne tä käi ngwen nuäre jabtä ni ngökakäre, nitre korekore abko rabadi jökrä Ngöbö okwä bäre mento.

<sup>16</sup> Ti Jesu, ti ne mden käkwe angele tikwe juani kukwe ne mike gare jökrä mae abko erere makwe mikadre gare nitre gätäkä ti käbti yeye. Ti abko Jrei David bkün amne ti abko Muke Trä Dirare Dekä kwrere, nieba Jesukwe tie.

<sup>17</sup> Ye abko, Ngöbö Üai Deme amne ni Kordero kwrere nän muko käta ¡Jakwe! niere Jesuye amne, nire nire tä ti kukwei nuen käkwe ¡Jakwe! nie Jesuye arato. Mdakäre abko, nire nire ie tomna abko tö tomna ñain nünakäre kärekäre, ye abko jata Jesuye, käkwe ñö ni mikakrä nüne kärekäre ye ña ngwarbe tommnane.

<sup>18</sup> Angwane Ngöbö Kukwei niebare tä tikani tärä nebtä, ye nire nire tä kukwe nuen ye abko ie ti bike niere krörö: Kukwe tä tikani tärä nebtä, nehti ta nire nire kákwe kukwe mdara jire tikadi, ye dokwäre abko kukwe taretare tä tikani tärä nebtä abko bti Ngöböökwe mikadi ja tare nike kri krübäte. <sup>19</sup> Angwane kukwe tä tikani tärä nebtä, ne nire nire kákwe diandrekä ruäre, yebtä abko kri ni mikakrä nüne kärekäre, ye Ngöböökwe diandikä kän amne kri ye ngwákä ñan kwetadre kwe, aise te ñan nünandi kärekäre kwe Ngöböbe. Erere arato, juta deme Jerusalén ye Ngöböökwe diandikä kän, aise te ñan nünandi kwe yete.

<sup>20</sup> Ti Jesu käta kukwe tikani tärä nebtä niere metre, käta niere krörö: ¡Ti näinta jötrö kä temenbtä! abko titi niere.

Ti Juan, ti ne abko käta niere krörö ni Dänkien Jesuye: ¡Amen! ¡Jakweta ti Dänkien Jesu! titi niere Jesuye.

<sup>21</sup> Ni Dänkien Jesu kákwe ja moto mika kuin ni jen Ngöböökwe kräke abko ie ti tö. Amen. Abko kore se. Ne ngörä.